

PAHPÂM JARKWA
CUPAHTI JÕ KÀHHÔC

Seleções da
BÍBLIA SAGRADA

Tradução no dialeto ramkokamekrá-canela
(Dialeto de família lingüística Jê)
do Brasil

Contendo um panorama
dos livros históricos, poéticos e proféticos do
ANTIGUO TESTAMENTO
e a maior parte do
NOVO TESTAMENTO



PAHPÂM JARKWA CUPAHTI JÕ KÀHHÔC

Seleções da
BÍBLIA SAGRADA
Tradução no dialeto ramkokamekrá-canela

Primeira Edição,
© 1990, Liga Bíblica do Brasil

Segunda Edição,
© 2012, Liga Bíblica Internacional

www.ScriptureEarth.com



Creative Commons Licença

(Atribuição-Uso Não-Comercial-Vedada a Criação de Obras Derivadas)

Você pode copiar, distribuir, exibir e executar a obra sob as seguintes condições:

- **Atribuição.** Você deve dar crédito ao autor original, da forma especificada pelo autor ou licenciante.
- **Uso não-Comercial.** Você não pode utilizar esta obra com finalidades comerciais.
- **Vedada a Criação de Obras Derivadas.** Você não pode alterar, transformar ou criar outra obra com base nesta.

<http://creativecommons.org/licenses/by-nc-nd/3.0/>

Paḥpãm Jarkwa Jõ Kàhhôc Japrỳ

MAM IHKÃHHÔC TÛM KAM PAḤPÃM JARKWA JÕ KÀHHÔC JAPRỲ

Kam To Ihtẽm Xà	Gênesis	1
Jo	Jó.	13
Me Cator Xà.	Êxodo	41
Ampo To Hahkre Catêjê.	Levítico	
Me Cahyt Xà	Números	59
Cute Me To Ihhimpej Xà	Deuteronomia	70
Jojuw.	Josué	73
Me To Ihhimpej Catêjê.	Juízes	78
Rutikwÿj	Rute.	82
1 Xamer.	1 Samuel	85
2 Xamer.	2 Samuel	95
Mencrer Xà	Salmos.	100
1 Pahhi Catêjê	1 Reis.	146
1 Me Hũjarẽn Xà	1 Crônicas	
2 Me Hũjarẽn Xà	2 Crônicas	
Me Hapackre Xà	Proverbios	152
Ampo To Hahkre Xà	Eclesiastes	
Xarômaw Crer Xà	Cânticos	
2 Pahhi Catêjê	2 Reis.	173
Jona.	Jonas	187
Nahũm.	Naum	
Hôxêj	Oséias	
Jôwer.	Joel	
Amoti	Amós	
Patij.	Obadias	
Miquij	Miquéias	
Hapakuc	Habacuque.	191
Xôpôn	Sofonias	
Ixaj	Isaías.	195
Menewÿr	Lamentações	
Jeremij	Jeremias	214
Execker	Ezequiel	
Taner	Daniel	196
Extikÿj.	Ester	
Extra	Esdras	224
Nemij.	Heemias	
Agew	Ageu	
Xacarij.	Zacarias	
Maraquij	Malaquias	

CURMÃ IHKÃHHÔC TÛM KAM PAHPÃM JARKWA JÕ KÃHHÔC JAPRÛ

Jeju Jarên PejtiXà Jõ Kãhhôc Te Cwat

Matew	Mateus	
Macô	Marcos	
Ruc	Lucas	231
Jowãw	João	368

Jeju Jarkwa Na Memprar Catêjê Japên Xà Jõ Kãhhôc Pyxit

Me Hàpên Xà	Atos	445
-----------------------	----------------	-----

Mehkwỳ Wỳr, Pawrô Pê Jeju Jarkwa Na Memprar Catêjê Nõ Jõ Kãhhôc Te Trexi

Roman	Romanos	533
1 Corinti	1 Coríntios	589
2 Corinti	2 Coríntios	603
Carati	Gálatas	611
Epet	Efésios	631
Pirip	Filipenses	648
Coroxo	Colossenses	660
1 Texarôn	1 Tessalonicenses	673
2 Texarôn	2 Tessalonicenses	682
1 Timot	1 Timóteo	687
2 Timot	2 Timóteo	701
Tito	Tito	710
Piremô	Filemom	717

Mehkwỳ Wỳr, Jeju Jarkwa Na Memprar Catêjê Kwỳ Jõ Kãhhôc Te Ojto

Ixaher	Hebreus	720
Tijac	Tiago	732
1 Pêtrô	1 Pedro	746
2 Pêtrô	2 Pedro	763
1 Jowãw	1 João	772
2 Jowãw	2 João	784
2 Jowãw	3 João	786
Juta	Judas	789

Jowãw Jõ Kãhhôc, Amji To Ipipên Xà Na Pyxit

Ipipê Xà	Apocalipse	794
Ampo Kôt Harên Xà	Explicações	838
Me Haprỳ	Nomes	858

HIPÊR MAM IHKÀHHÔC TÛM JÕ KÀHHÔC JAPRÛ

Mojxe Te Me Hapackre Xà Jõ Kàhhôc Te Xic

Kam To Ihtêm Xà	Gênesis	1
Me Cator Xà	Êxodo	41
Ampo To Hahkre Catêjê	Levítico	
Me Cahyt Xà	Números	59
Cute Me To Ihhimpej Xà	Deuteronomia	70

Ixaher Catêjê Jarên Xà Jõ Kàhhôc Te Tôxi

Jojuw	Josué	73
Me To Ihhimpej Catêjê	Juízes	78
Rutikwÿj	Rute	82
1 Xamer	1 Samuel	85
2 Xamer	2 Samuel	95
1 Pahhi Catêjê	1 Reis	146
2 Pahhi Catêjê	2 Reis	173
1 Me Hūjarên Xà	1 Crônicas	
2 Me Hūjarên Xà	2 Crônicas	
Extra	Esdras	224
Nemij	Heemias	
Extikÿj	Ester	

Ixaher Catêjê Incer Xà Jõ Kàhhôc Te Xíc

Jo	Jó	13
Mencer Xà	Salmos	100
Me Hapackre Xà	Proverbios	152
Ampo To Hahkre Xà	Eclesiastes	
Xarômāw Crer Xà	Cânticos	

Pahpām Jarkwa To Me Cumã Ihcakôc Catêjê

Jõ Kàhhôc Cati Te Xíc

Ixaj	Isaías	195
Jeremij	Jeremias	214
Menewÿr	Lamentações	
Exeker	Ezequiel	
Taner	Daniel	196

Pahpām Jarkwa To Me Cumã Ihcakôc Catêjê

Jõ Kàhhôc Jatujre Te Tôxi

Hôxêj	Oséias	
Jôwer	Joel	

Amoti	Amós	
Patij.	Obadias	
Jona.	Jonas	187
Miquij	Miquéias	
Nahūm.	Naum	
Hapakuc	Habacuque.	191
Xôpôn	Sofonias	
Agew	Ageu	
Xacarij.	Zacarias	
Maraqij	Malaquias	

Mehĩ Jarkwa Wỳr Pahpãm Jarkwa Jõ Kàhhôc To Ipintuw Xà

Ûhỹ, rỳ pãa mã mehĩ kwỳ pê ampo kra jãhtôa te Rãmkkôkam mehkra jõ krĩ ita kam me cuprôn ne mehkri. Ne ahpãanre na mehckôc xà pihho to mehckôc to me ipa cakrô, ihtỳj me ajpẽn kam hapac pejti. Ne cormã ita kam me cupê mehtãmwxwỳ kwỳ cakôc hõtpê ajteare mã, atajê pê: Rãmkkôkam mehkra pê Memõrtũmre me, Apãnjê kra me, Cõhtycre kra me, Xokam mehkra me, Krohtikam mehkra me, Irom catêjê kra me, Kẽn catêjê kra me, Kÿhtikô catêjê me, Carêc catêjê me, Krahô catêjê me, Hĩjaxy catêjê me, Crôrekam catêjê. Ne mehcunea ihtỳj me ajpẽn par to kẽnre nare.

Ne Memõrtũmre jarkwa wỳr, wa ite me Pahpãm jarkwa jõ kàhhôc ita to me ipintuw. Mã ampo kra cunea te cuprôn itajê kã me, mentuwjê te ramã me ihkàhhôc ita kwỳ cahyt, ne ihtỳj cute mempar pejti na me harẽn. Wa ramã ite me ihkàhhôc ita cahyt to me hàhtôa, ne me to impej cakrô, mõrmõ cormã kam ihkwỳ te ihcupan kryjre, ne nee cute ihcupan cati nare, na quê ha nee ate me kam gapac tete me acahpêrkãr nare.

PAHPĀM JARKWA NA MAM IHKÀHHÔC TŪM

Ŷhỹ, pê mam, rỳ pêa mã, caku jàhtôa kam, ramã Pahpãm na mehkwy me hõ kàhhôc kam harkwa na mehhôc. Ne caxwãm catia mã, cute me ampo pupun atajê na pit mã mehhôc. Ne pê Pahpãm ajco jũmjê itajê mã ihcakôc, ne me cumã hũjarên xà atajê to awjarê, pê ahnamehhôc.

Pahpãm jarkwa na ihkàhhôc ita pijakrut. Ne mam harkwa na ihhôc ata japyr te **Mam Ihkàhhôc Tũm**, ne cupê jarkwa na hapry te Antigo Testamento. Ne hapu na ihkàhhôc ita japyr te **Curmã Ihkàhhôc Tuw**, ne cupê jarkwa na hapry te Novo Testamento. Quê ha jũm mã **Curmã Ihkàhhôc Tuw** ita jahkre pej to prãm na, quê ha **Mam Ihkàhhôc Tũm** ita kwỳ cahyt ne hahkre pej, jirô pê mã quê ha cormã **Ihkàhhôc Tuw** ita cahyt ne hahkre pej, xà caxuw ri ihkàhhôc ita.

Ne nee por ite me amã ihkàhhôc to ipintuw ita pê **Mam Ihkàhhôc Tũm** ita, ne catia to cati nare. Ne hõtpê kam ampo jàhtôa, ne cupê **Mam Ihkàhhôc Tũm** jarkwa ita pyràac, ne ipipêan. Ne cama harkwa kwỳ cunea kam hikwa nare, ne hatujre catêjê ri kam hikwa.

Ne ihkàhhôc ita te hajyr cakrô, quê ha ihtyj me pahte Pahpãm jahkre pej na me pahtehcajpa. Cu ha, cute amji kam hapac xà kwỳ na me hahkre pej, ne hanea ne Pahpãm te Ixaher catêjê mã ihkra pê Jeju to hũjahkre xà na me hahkre pej. Cwyrjapê cu ha me ihkàhhôc ita cahyt, ne pahte me Pahpãm te amji mã me pahto ipijapar xà na, me pahto prãmti atajê na me hahkre pej, quê ha ahna me pamã ihkênre nare.

Ne **Mam Ihkàhhôc Tũm** ata kam hàhtô na, cute trĩnta ne ihkôt nowi. Ne **Curmã Ihkàhhôc Tuw** ata kam hàhtô na, cute winti ne ihkôt xet. Ne ahpyanre na ihkàhhôc ita japyr japjêhti, me hapry jatujre. Ne ate me hahkre pej prãmte, wa ha me amã to he. Mam ihkàhhôc ita japyr japjêhti pê **Ampo Cunea Kam To Ihtêm Xà Jõ Kàhhôc** ne hapry jatujre pê **Kam To Ihtêm Xà**. Ne **Pahpãm Jarkwa Jõ Kàhhôc** krã rũm ramã hapry jatujre atajê cunea hikwa.

Ne ahpyanre na ihkàhhôc itajê picokjêr xà pê ihkrã cati. Ne por ampeaj kam ihkàhhôc cati atajê kam ihkrã jàhtô. Ne por hatujre itajê kam ihkrã crêre. Ne wa ite, ate hirã pê me hõmpun ne me cahyt prãmte, ite me amã ahpyanre na ikrã cati cahyt xà cati ne ihtycti ihhôc. Ne ahpyanre na ihkrã cati atajê kam ihkrã krutre cahyt xà.

Ne ihkàhhôc cunea kam wa ite me amã ihkàhhôc japry kryjre me, ihkrã cati cahyt xà me, ihkrã krutre cahyt xà na ihhòc to hajÿr he:(Kam To Ihtēm Xà 6.9-10).

Ne ita kôt harēn xà te:

(Kam To Ihtēm Xà) ita pê Ampo Cunea Kam To Ihtēm Xà Jō Kàhhôc; ne (6) ita pê ihkrã cati te xêj; ne (.9-10) ata pê ihkrã krutre te nowi me tej.

Ne pê Jeju mã memprar catêjê nõ hapry pê Pawrô ramã Pahpãm jarkwa na hō tuwre pê Timot ata japackre to hane:

“Pom Pahpãm jarkwa jō kàhhôc ita, quē ha ihtÿj ampo cunea na atehcajpa. Ca ha gūpar krã kreti to awpa, ne Jeju Cixtô to amji mã ahimpej to apa, ne akên cati pê acato. Ne pê ramã mam Pahpãm na mehkwy, Pahpãm Carō Pejti jarkwaa kôt, ihkàhhôc ata kam mehhôc. Ne ampo pejti itajê cunea caxuw ri impej he:

Ihtÿj ampo pej cunea to me cumã hahkre xà caxuw impej.

Ne cute me ampo kên ton, mã intête cute me cumãn xà caxuw impej.

Ne me cute amji kam me hapac xà jikutti, mã cute hacpyã mã mehcuhtac xà caxuw impej.

Ne caxwãm catia mã, catyt kam me ipa xà to me cumã hahkre xà caxuw hanea ne impej.

Hôhō, quē ha jÿm mã Pahpãm kôt ipa, ne cumã hâpên catê na, cumã amji ton to prãm na, quē ha ihkàhhôc ita cahyt, ne ampo par jahkre pej to mō, ne ramã hâpên xà impejti cunea caxuw amji mã hàhcuprôn to mō” hane. (2 Timot 3.15-17)

Ne cute hapackre xà ita hanea ne me pahcunea caxuw he.

Ampo Cunea

KAM TO IHTĚM XÀ

Jarĕn Xà

Ÿhỹ, pĕ Mojxe xwỳ pĕ Pahpām jarkwa kôt, Ixaher catĕjĕ japackre catĕ. Ne ajco me cumã Pahpām jarkwa jarĕ, ne ahna ihhôc. Ne cute **Mam Ihkàhhôc Tũm** ita to xĩc ne ihhôc. Mam ihkàhhôc ita pĕ **Ampo Cunea Kam To Ihtĕm Xà Jô Kàhhôc** (Kam To Ihtĕm Xà). Ne ihkàhhôc ita, Pahpām te pjĕ kam mam ampo cunea ton na me pamã harĕ. Ne hanea ne Atãw me, mehkra to me pamã awjarĕ. Ne hanea ne Nowe me, mehkra te, Pahpām te cõ to ampo cunea jipej xà ata pĕ me amji pytâr na, me pamã to awjarĕ. Ne hanea ne Aprãw me, Ixac me, Jaco pĕ Ixaher me, mehkra to me pamã awjarĕ. Ne ihkàhhôc ita jicu xà kam ri, Canãn jô pjĕ pĩn, Ejit jô pjĕ wỳr Ixaher catĕjĕ pintuw na, me pamã harĕ.

Ÿhỹ, pĕ Aprãw jô caku atajĕ kam, ajteare mã pjĕ nõa kam me hũmre nõ japrỳ te Jo ita ihkrĩ. Nari hõ kàhhôc japrỳ te Jo **Jô Kàhhôc** (Jo). Ne ite **Ampo Cunea Kam To Ihtĕm Xà Jô Kàhhôc** cajpuw hõ kàhhôc nõr, Aprãw jarĕn xà cumam. Ne pĕ hũmre ata impeaj to impej, ne ihtỳj catyt kam Pahpām kôt ipa, ne ampo cunea na Pahpām cajpuaw. Mã me pahcurĕ xwỳn pĕ Xatanaj te Jo na Pahpām wỳr, cute to kĕn prãmte. Mã cute Jo capi prãmte cumã hahkre. Mã cute to kĕanre. Mã cute amji pupun to kĕanre cakrô, nee cute Pahpām na ihcakôc kĕn nare, ne ihtỳj ampo kĕn cunea mã awcanã, ne nee cute Pahpām to amji mã ihhimpej jicu nare. Cwỳrjapĕ ri Pahpām te cute amji pupun xà kĕanre ata jirô pĕ hacpỹa mã to impej.

Kam To Ihtĕm Xà 1.1-31

Pĕ Pahpām amcro te xĕj kam ampo cunea to

1 ¹Pĕ nee jũm Pahpām ton nare, ne nee jũ caxuw amji ton nare, ne ramã pjĕ ton xwỳjre na ihkrĩ rohnỳtti mã. Pĕ mam Pahpām cõjkwa me pjĕ me, ampo cunea to. Ne nee pĕ ampo to, ampo itajĕ ton nare. ²Pĕ pjĕ ata kam ampo hamreare, ne caprỳ, ne kam awcapãtkuti, ne cõ me

pjê cormã ajcacwa tu. Pê Pahpãm Carõ Pejti ata, cô me pjê picacwÿr ata cwÿrpê, curia ajco apu ipa.

³Mã Pahpãm te hÿjarĕn to:

— Imã hãhcujuo xà nõ na prãm! — hajÿr me ajkaam, mã amcro pyrentu. ⁴Mã Pahpãm te amcro ita pupun, mã cumã impeaj to impej, mã cute amcro me caxwa to ipicapôn. ⁵Ne cute amcro mã haprÿ to: “Apê” hajÿr, ne awcapãtkô mã haprÿ to: “Caxwa” hajÿr. Hõhõ, amcro cakõnĭ ita na, pê hapĕn xà itajê kwÿ ton to hane.

Amcro pijakrut ata kam Pahpãm jãpĕn xà

⁶Ne amcro pijakrut jŏ irarà na, pê Pahpãm cô mã harkwa to:

— Amji to ajcapô, ne kÿj rÿm cõjkwa wÿr akwÿ api ne ahtwÿ, ne harã mã pjê kam akwÿ ahtwÿ — hane. ⁷Mã cô te amji to ipicapôn pyrentu, ne kÿj pê ita jãhhuc, ne harã mã ita jãhhuc. ⁸Mã Pahpãm te kÿj rÿm ita mã haprÿ to: “Cõjkwa” hajÿr. Hõhõ, amcro pijakrut kam pê hãpĕn xà itajê kwÿ ton to hane.

Amcro incrê ata kam Pahpãm jãpĕn xà

⁹Ne ahna amcro incrê jŏ irarà na, pê Pahpãm pjê kam cô me amcrã mã harkwa to:

— Me amji to ajcapô, ne ita wÿr amcrã, ne ita wÿr cô — hane me ajkaam, mã cute amji to ipicapôn. ¹⁰Mã cute amcrã mã haprÿ to: “Pjê” hajÿr. Ne cute cô te cuprõn ata mã haprÿ to: “Cõxwa” hajÿr. Ne cute hõmpun, mã cumã impeaj to impej. ¹¹Pê Pahpãm pjê mã harkwa to:

— Amji kam pĭhhy me, pĭhhõ me, ahpÿanre na ajpĕn caxuw me hãprã hy cunea to — hane. ¹²Mã cute amji ton pyrentu, ne pjê kam apu hapõj. Ne ahpÿanre na ajpĕn caxuw kam ihhy, ne kam hõ ne hapõj. Mã cute hõmpun, mã cumã impeaj to impej. ¹³Hõ, ahna amcro incrê itajê kam, pê hãpĕn xà itajê kwÿ ton to hane.

Amcro te cwat ata kam Pahpãm jãpĕn xà

¹⁴⁻¹⁵Ne ahna amcro te cwat jŏ irarà na, pê Pahpãm cõjkwa mã harkwa to:

— Amji kam gãhcujuo xà nõ to, mãr quê pjê cujuo, ne caxwa me amcro to ajcapô, ne amcro me, putwÿr jŏ amcro me, caku jŏ putwÿr cahyt — hane. Mã cute amji ton pyrentu ne ajĕt. ¹⁶Ne cute hãhcujuo xà catia to ipijakrut ne ton. Pê amcro to ihhimpej catê ata ri ampeaj kam cati, ne caxwa to ihhimpej catê ata ri hapÿre mã increire. Ne hanea ne cute caxĕre ton. ¹⁷⁻¹⁸Ne ma cõjkwa kam apu haxõr, cute pjê cujuo, ne caxwa me apĕ to ihhimpej, ne amcro me awcapãtkô to ipicapôn prãmte. Mã cute hõmpun, mã cumã impeaj to impej. ¹⁹Hõ, ahna amcro te cwat itajê kam, pê hãpĕn xà itajê kwÿ ton to hane.

Amcro te xĩc ata kam Pahpãm jàpĕn xà

²⁰Ne ahna amcro te xĩc jõ iràrà na, pĕ Pahpãm cõxwa me cõjkwa mã harkwa to:

— Hã, ate amji kam ampo to me apijapar xà atajĕ to amji kam me hipu tu ne, cõjkwa kam pryjara tor xà me, cõ kam ampo cunea prar xà atajĕ mea mã — hane. ²¹Ne Pahpãm te cõ kam ampo te amji to ipijapar xà atajĕ cunea ton, cõxwa kam ampo catia atajĕ mea mã, ahpyanre na ajpĕn caxuw, mã hàhtõa to hàhtõ. Ne hanea ne, ajpĕn caxuw pryjara cunea ton, ne hõmpun, mã cumã impeaj to impej. ²²Mã cute ihcunea caxuw carõt jõr ne cumã harkwa to:

— Me akra to me hàhtõa, ne ma cõ kam me apicamĕn to me mõ, ne me cõ to hipu tu ne. Ne kÿj pĕ cuwĕnre tore to hàhtõa ne, ne ma me apicamĕn to me mõ — hajÿr. ²³Hõ, ahna amcro te xĩc itajĕ kam, pĕ hàpĕn xà itajĕ kwÿ to hane.

Amcro te xĕj ata kam Pahpãm jàpĕn xà

²⁴Ne ahna amcro te xĕj jõ iràrà na, pĕ Pahpãm pjĕ mã harkwa to:

— Hã, pjĕ, amji kam ampo cunea capõnÿre te amji to ipijapar xà atajĕ to, ne pjĕ na ampo apu ipa atajĕ to, ne ampo pry jàprĕhti atajĕ to, ahpyanre na ajpĕn caxuw — hane. Mã cute amji ton pyrentu. ²⁵Ne Pahpãm te ampo pryre jàprĕhti itajĕ ton, ne ampo capõnÿre itajĕ ton, ne pjĕ kam ampo apu ipa itajĕ cunea ton, ahpyanre na ajpĕn caxuw. Ne cute hõmpun, mã cumã impeaj to impej.

Pĕ Pahpãm me panquĕtjĕ to

²⁶Jirõ pĕ mã ri Pahpãm te ajpĕn mã:

— Ita caxuw cu ha amji kõat me hũmre nõ to, quĕ ha cupĕ me pahpyràac, ne ihtÿj amji kampa. Ne quĕ ha hanea ne cõxwa kam tep me, cõjkwa kam pryjara me, pjĕ kam ampo capõnÿre atajĕ me, pryre jàprĕhti atajĕ me, pjĕ kam ampo apu ipa itajĕ jamãr to ipa, ne me to ihhimpej to ipa — hajÿr. ²⁷Ne cute amji kõat jũm xũmre ata ton, ne cahãj ita ton.

²⁸Ne cute me cumã harkwa to:

— Me akra to me hàhtõa to hàhtõ to me mõ, ne ma me apicamĕn to me mõ, ne pjĕ to me hipu to me mõ, ne amji mã me hũtã ne me to ahimpej to me mõ. Ne cõxwa kam tep to me ahimpej, ne cõjkwa kam cuwĕnre to me ahimpej, ne ampo cunea pjĕ kam apu ipa atajĕ to me ahimpej.

²⁹— Ne ate me gõ to, me gàpàn xà caxuw, ite me amã ihhy cunea me, pĩxõ cunea ton, ate mehkur xà caxuw. ³⁰Ne pryre me, pryjara me, pjĕ kam ampo ipa atajĕ me, por ampo cunea amji cajpĕ ne incaca atajĕ mã, ite ahtu me ahtetet cunea ton, cute ihkur xà caxuw — hajÿr. Hõ, pĕ ampo itajĕ cunea ton to hane.

³¹Ne cute ihcunea pupun, mã cumã impeaj to impej. Hõ, ahna amcro te xêj atajê kam, pê hàpên xà atajê kwỳ ton to hane.

Kam To Ihtêm Xà 2.1-25

Pê Pahpãm amcro te xet ata kam kôt

2 ¹Pê Pahpãm cõjkwa me, pjê me, cõxwa jipêj, ne kam ampo te amji to ipijapar xà atajê cunea to. ²Pahpãm te amcro te xêj atajêa kam, cute hàpên xà itajê cunea jipêj. Cwỳrjapê ri cute amcro te xet ton ita kam ri ihkôt xà, na ri nee kam hàpên xà nare. ³Ne cute amcro kam ihkôt xà ata to ajteare mã, ne cute to impejti, kam ihkôt xà na. Ampo na? He cute amcro ata xwỳjrea na ampo cunea jipêj, na quê ha cute xet ata kam cama kôt.

Pê Pahpãm Atãw xwỳ pê me panquétti to

⁴Pê Pahhiti pê Pahpãm cõjkwa me pjê to. Pê harên xà catia hane he: ⁵⁻⁶Pê nee cormã kam ampo hiprãj nare, ne nee kam ahkêt tetetti nõ hamreare. Pê cormã Pahpãm nee kam ta to iwryc nare, ne ahcakũm kam atãr ata pê ajco pjê inco. Ne hanea ne cormã pjê kam jũmjê jãpên xà caxuw me hamreare. ⁷Mã Pahpãm te pjê te mehĩ ton ne pea hĩjakre jakõr, mã hĩa na cute amji ton. Hõ, pê mehĩ ton xà ita hane.

⁸Mã Pahhiti te pjê impejti japyr te Etê ita kam hàhkre, pyt japõj xà rũm, ne kam pjê te mehĩ xũmre jĩa mã hikran, kam ihkrĩ xà caxuw. ⁹Mã Pahhiti pê Pahpãm te Etê jõ pjê kam ampo pej pit kre. Mã ahpãanre na ajpên caxuw pĩxõ pãr pej pit japõj ne hiprãj, ne ihkur xà caxuw ihcunea impeaj. Ne pjê ata jipõc ri Pahpãm te pĩxõ pãr to ipijakrut ne ihkre, atajê ri ihkwỳ pê ajteare mã. Ne pyxit ne cupê mehtĩr rohnýtti mã xà jõ pĩxõ. Na quê ha jũm te pĩxõ ata nõ krêr na, quê ha jũ caxuw ihtyc nare, ne quêt ihtĩr rohnýtti mã. Ne ihnõ ata pê ri ampo pej me, ampo kên jahkre pej xà jõ pĩxõ pãr. Na quê ha jũm te pĩxõ ata nõ krêr na, quê ha ihcunea na amji jahkre pej ne ihkrã kre. ¹⁰Ne pjê ata kam Pahpãm te cõ ton, mã ajpjê, cute pjê inco xà caxuw. Ne Etê jõ pjê ata pĩn pê cõ ata cato, ne kaam ihcahkũm, ne cute amji to cwat ne ajpjê. ¹¹⁻¹⁴Atajê ri ahpãanre na haprỳ itajê te hajyĩr he: Pixõ jõ cõ me, Gijõ jõ cõ me, Tice jõ cõ me, Cõmpejti jõ cõ.

¹⁵⁻¹⁷Mã Pahpãm pê Pahhiti te pjê ata kam hũmre pê Atãw xwỳ ata mã hikran, kam ihkrĩ ne cute hamãr, ne kam hàpên xà caxuw. Ne cumã pĩxõ pãr pyxit ne ihcawpa ne cumã:

— Ca ha gapacta ne atỳj pĩxõ pãr itajê xõ cunea ku, ne por ampo pej me, ampo kên jahkre pej xà jõ pĩxõ ata, ca ha nee ihnõ krêr nare. Ampo na? Ca ha ate ihnõ krêr na, ca ha ramã impejti xà jahkre pej, ne ihkẽanre xà jahkre pej, ne hanea ne amcro ata kam atỳj atyc kam tẽ — hane.

¹⁸⁻²⁰Ne pê ramã pjê ata kam ahpÿanre na ajpĕn caxuw pjê kam pryre atajê to, ne kÿj pê ahpÿanre na pryjara ton pa. Ne ma ihcunea to mō, Atãw wÿr, ne cumã ihcunea jahkre, mãr quê Atãw ahpÿanre na ihcunea mã haprÿ jôr pa. Mã cute amji mã ampo mã haprÿ jôr prãmti ata na, cute cumã hôr partu. Ne haprÿ ata na quê ha ipa rohnytti mã. Ne cute pryre capônÿre mã haprÿ, ne ahkĕt kam pryre atajê mã haprÿ, ne kÿj pê pryjara cunea mã haprÿ jôr partu.

Pê Pãhpãm cahãj pê me pahnã to

Ne ampo itajê cunea jipôc ri, Atãw te nee amji caxuw ampo pê ihnô ata mã cator nare. Jirô pê mã ri Pãhpãm pê Pãhhti te amji mã:

— Imã hÿmre ita ahte apu ipa ita na to prãm nare, na wa ha hĩa na cumã catê nõ to — hajÿr. ²¹Ne jÿ mã cute Atãw ton ne to hôtswaa to hôtswa, mã hôt mã ihtyctu, ne ihtÿj nõ ne gôr. Mã Pãhpãm te hiwrÿhhi nõ caxàr, ne hacpÿa mã haxà to cumã ipijapÿn. ²²Ne hiwrÿhhi ata to cumã cahãj ton, ne ma hÿrmã to mō, mã ramã ipimprar, mã cute cumã hôr.

²³Mã Atãw te harkwa to:

— Taamã! Pãhpãm te ijiwrÿhhi kwÿ caxàr ne to imã cahãj, na ri quĕt cupê ijia kwÿ, cwÿrjapê wa ha cumã haprÿ to: “Cahãj” — hane. ²⁴Cwÿrjapê quê ha ita caxuw me hÿmre menxyrxwÿ me, me hÿmjê jicu, ne me hikwa tuw, ne ma mehprô wÿr me rê, ne mehprô me, me ajcaxê ne ajpĕn kam me pyxit peaj.

²⁵Pê Atãw me hÿxi nee mehkà to me amji pro nare, ne mehcakrô ame ipa, ne nee ajco ajpĕn kam amehpahàm nare.

Kam To Ihtĕm Xà 3.1-24

Pê Xatanaj me panquĕtjê mã ihhĕj

3 ¹Ne pjê kam Pãhpãm te ampo cunea ton atajê jirôa pê cagãti ita te amji jahkre kitre nare. Ne ma cahãj ata wÿr tĕ ne ahna hàhtĕp, ne cute ihcukij, ne cumã:

— Xà ampeaj kam Apãm Cati te, ate me pÿxô itajê cunea kur tĕte me amãn? — hajÿr.

²⁻³Mã cahãj ata cumã:

— Quê, itÿj ite mehcunea kur xà. Ne por ipàr pyxit peaj ne ihkwÿ jipôc ri xa ata ri, Inxÿ Cati te intĕte me imãn, wa nee mehnô krĕr nare, ne nee ahna me ijÿhkra nôr nare, ne amehcupĕn nare. Nãmri wa ha mempar nare na, wa ha itÿj me ty, ita na ri Inxÿ Cati pê Pãhhti te me imã harĕn — hane.

⁴⁻⁵Mã cagãti cumã:

— Quê! Ame amã ihhêj, ca nee me atyc nare! Ampo na ri ame amã ihcawpa? Nee mã ampo na nare. He ate mehnõ krêr, ne cume, me apipêan, ne mempej jahkre pej ne mehkên jahkre pej cupate ri ame amã ihhêj — hane.

Pê me panquêtjê Xatanaj kampa

⁶Mã cahāj ata te ihtyj harkwa kôt pīxô ata kur xà na impeaj na amji mã to hajjyr. Ne cute pīxô ata pupun, mã cumã impejti, ne ihtyj amji mã cute amji jahkre pej xà caxuw impej na cute to hajjyr. Ne cute hô nõ hyr ne ihkrêr, ne hanea ne impjên mã ipyr ne cumã hõr, mã cute ihkrêr. ⁷Me ajkaam cute ampo cunea jahkre pej kam ihtēm, ne cute mehcakrô na me amji jahkre pej, ne amehpahàm pyrentu. Cwÿrjapê ri cute me pīhhô kēhkên, ne me cahyr, ne me to amji pro.

Pê Pahpām me panquêtjê crôn xà kēanre to me cucrô

⁸Ne pyt ata kam ramã ahprepre to mōr kam, mã cute pjê impejti ata kam, me Pahhiti pê Pahpām mōr na me kam hapac, ne ajwar cupê pī catàtkre na me ipimxur. ⁹Mã cute me cumã hàkjêr ne me cumã:

— Atāw, ampo na mã ca apu ipê amxu? — hajjyr.

¹⁰Mã Atāw cumã:

— Wa ite ajpên amōr na me apar, ne ate icakrô na me ipupun cupate, wa apê me ipimxur — hane.

¹¹Mã cumã:

— Jūm te mã acakrô na garên? Xà ajkī ate, ite amã pīxô pàr cawpa ata nõ krêr? — hane.

¹²Mã Atāw cumã:

— Ýhÿ, por ate imã cahāj jōr ata te ri imã hõr, wa ite ihkrêr — hane.

¹³Mã Pahhiti pê Pahpām te cahāj ita mã:

— Pÿhàpà, ampo na mã ajte ate me hajjyr? — hajjyr.

Mã cumã:

— Por cagāti ata te ri imã ihhêj, wa ite ihkrêr — hane.

¹⁴Mã Pahpām te cagāti ata mã:

— Ca ate me cumã amji kam gapac xà to hajjyr cwÿrjapê, wa ha acrôn xà kēanre ita to acrô he. Ampo pryre capônÿre me hàprêhti atajê jirôa pê akēanre. Na quê ha apa xà ita pê ajteare mã, na ca ha pjê kam atu na apu pra, ne pjê jacrô pit kur to apu apa rohnÿtti mã. Quê ha ampo pryre kwÿ cunea, ma ame acaca, ca ha ahnaa jū caxuw gamre. ¹⁵Hamre, ita caxuw ca ha cahāj ita me apê ajpên curê xwÿn. Quê ha hanea ne me atãmxwÿ me, mehtãmxwÿ pê ajpên curê xwÿn. Ne ca ha jū caxuw amcro nõ na, cahāj ita tãmxwÿ tãmxwÿ nõ par kat kam ihtôc, quê ha taa mã ato hajjyr nare, ne quêt akra gântu — hajjyr.

¹⁶Ne cute hanea ne cahāj ita crôn xà ita to incrôn, ne cumã:

— Ita caxuw wa ha amã akra xà to ajcamẽ, ne kypê amã to hà nare. Cakrô ca ha atÿj cormã amã apjên kîn, ca ha atÿj ahna amji to pøj, quê ha cupê ato ihhimpej catê. Na quê ha me atãmwxÿ me acukwa kam, ahnaa me to hãm ita na — hajÿr.

¹⁷⁻¹⁹Ne cute Atãw mã hajÿr ne cumã:

— Ca ate gïxia kôt amji kam gapac, ne ite amã pïxô pàr cawpa ata krêr, cwÿrjapê wa ha ita caxuw apê pjê ita to kêanre ne. Quê ha kam hómjï pàr hapôj, ne kam ahkêt kêanre hapôj, na ca ha pïhhô me ampo hy pit kur to apa, ne apêa to apê, ne akuc na cô pra, mâr quê me amã gô, ca me apà. Hô, ca ha hajÿr to acuhhê ita kam ahnaa awej ne jÿ caxuw ty, quê ha pjê ita to me garêt, ca ha hacpÿ mã pjê ita na amji jahkre. Ne pjê ata to pê wa ato, na ca ha hacpÿa mã pjê ita mã axà — hajÿr. Mã ajwar cute mempar.

²⁰Ne Atãw te hïxi mã haprÿ to Ewakwÿj, ne haprÿ ita kôt harên xà te “Mehcunea menxi”. ²¹Mã Pahpãm pê Pahhiti te ampo pry curan, ne ihkà to me cumã mehkà.

²²Ne cute amji mã:

— Ita caxuw quê ha mehï itajê pê me pahpyràac, ne ihtÿj ihkên jahkre pej ne impej jahkre pej. Cwÿrjapê ri cute pïxô pê mehtîr rohnÿtti mã xà ata nô krêr xà nare. Nãmri quê ha cute ihnô krêr na, quê ha ihtÿj cute ihkên mã hàr xà ita kam amji to ipijapar to ipa rohnÿtti mã — hajÿr.

²³Cwÿrjapê ri Pahpãm te pjê impejti japrÿ te Etê ata tête me cator, ne ampÿa mã pjê nô ata wÿr mehkujahêc, mâr quê, cute pjê to Atãw ton ata, curi kam apê ne apà. ²⁴Cute me cator jirô pê mã ri, pyt japôj xà rÿm, Pahpãm te cõjkwa kam cumã hàprê catêjê kwÿ pyxwÿr, cute me harkwa jamâr xà na. Ne hanea ne cute wapo xwahhihti pôr ata xãm, cute mehtîr rohnÿtti mã xà ata jô pïxô pàr jamâr prãmte. Mã pra ne ipu na ajrô ita na.

Kam To Ihtêm Xà 4.1-16, 25-26

Pê Cãn ihtõ pê Aper cura

4 ¹Mã Atãw hïxi me hikwa, ne cute kam ihkra, mã cumã ihkra xÿmre pÿm. Mã cute cumã haprÿ to Cãn. Mã Ewakwÿj te amji jarên to:

— Pahhiti te itehcappar, mã imã ikra xÿmre ita cator — hajÿr. ²Jirô pê mã ri hipêr cumã ihkra xÿmre nõa pÿm ata japrÿ te ri Aper. Ne ajwar mehkà. Mã Aper pê carà cahàcre to ipijapar catê, ne Cãn pê ri pur to hapên catê.

³Ne amcro nõ na Cãn te Pahhiti mã hàprà ata jô xô nõ pyr ne to mō, ne cama cumã hõr prãmte, to kam hapac. ⁴Mã hanea ne Aper te Pahhiti mã hõ parxare nõ cakônï pÿm ata curan ne hï pejti kwÿ pyr, ne to mō, ne to Pahhiti kam hapac. Mã cumã Aper jô hï ata kinti, mã cute ahna amji

caxàr. ⁵Ne ma apu Cãn pê hàprà xò ata caca. Mã Cãn incryac kam, ihkuc kĕan kam, apu amji kam hapac to mō.

⁶Mã Pahhiti cumã:

— Ampo na mã ca apu acryc, ne akuc kĕan kam apu mō? ⁷Ca ha ate icajpuaw ampo ton na, wa ha itỳj ahna amji capa. Nãmri ca ha ate apu amji kam gapac xà kĕanre ton to apa na, quĕ ha akĕn xà ata pê ihhĕj rŭm ampo pry jàprĕ kĕanre ata pyràac, ne ihtỳj apro to prãm, ne taa ato ihhimpej to ipa. Na ca ha caa, akĕn itajĕ to amji mã capônỹre, ne tohjĕ, ne caa to ahimpej to apa — hajỹr. Mã Cãn te impar, ne nee ihkôt amji kam hapac nare. ⁸Ne amcro nō na cormã ihtō kam incryc, mã cumã:

— Hacu ne pō kam apu mō — hane. Mã ma ihtō pê Aper ihkôt mō, mã pō kam hamreare ata kam, Cãn te Aper kam ihtĕm ne ihcuran.

⁹Mã ahna ahtŭm nare mã Pahhiti Cãn mã:

— Jō ri mã atō Aper? — hane.

Mã cumã:

— Pỳpỹn, wa ite nee hōmpun nare. Xà ajkĩ ipĕ itō jamār catĕ, mã ca apu ahna icukij? — hane.

¹⁰Mã Pahpãm cumã:

— He pỳhàpà! Ampo caxuw mã ate atō to hajỹr? Pom atō caprō ita ihtỳj pjĕa kam imã akij, ne imã ate to kĕn jahpan xà ite ato kĕn na, awjahkre ita? ¹¹⁻¹²Atea amji mã acrôn xà kĕanre na gãhwỹr, ne por ate pjĕ kam atō caprō jaxwỹr, mã cute to ihkôm ata, quĕ ha nee hipĕr amã gàprà xò nō jōr nare. Na ca ha ita caxuw cama apu amji jacjĕ, pjĕ cunea kam — hane.

¹³Mã cumã:

— Itĕ ikĕn mã ijũcanãr xà ita jirôa pê, ate imã ton. ¹⁴Ca ha pjĕ ita pê ikujate, wa ha itỳj apĕ ampỳa mã pjĕ cunea kam ipa. Quĕ ha jũ ri cute me icajpar atajĕ cunea ihtỳj me icuran to prãm — hane.

¹⁵⁻¹⁶Mã Pahhiti cumã:

— Hãpà, nee cute ahna hajỹr nare. Wa ha gĩ kam, cute me gahkre pej xà na amã ihhōc, quĕ ha mehcuea me hōmpu ne me gahkre pej, ne nee me acuran nare. Nãmri quĕ ha jŭm te acuran na, wa ha ihcura, ne ihkôt cormã mekwỹa kwỳ to xĕj ne me hipej — hane. Ne cute Cãn jahkre pej xà ita na kam ihhōc, mã ma Cãn Pahhiti pê tĕ, ne pyt japôj xà rŭm, pjĕ nōa kam ihkrĩ. ²⁵Mã hipĕr Atãw te Ewa kam ihkra, mã cumã ihpỹm, mã cute me cumã haprỳ to Xet. Mã Ewa te harkwa to:

— Pahhiti te Cãn te Aper curan ata jaxà kam hipĕr imã ikra xŭmre ita jōr — hajỹr. ²⁶Mã Xet ita ihkà, ne hikwa tuw, mã hanea ne cumã ihkra xŭmre nō cator, mã cute me cumã haprỳ to Enotti.

Ne caku atajĕa kam ri cute me Pahpãm cukij to: “Ihtĩr Rohnytti Mã Ata” hajỹr, ne ahnaa me cukij kam ihtĕm. Hamre.

Kam to Ihtĕm Xà 5.1-6.7

Pê me panquêtjê me hàhtô to mō

5 Ýhỹ, pê Atāw me hīxi pê Ewa caku jàhtôa kam amji to ajpa, ne ramã mehkra jàhtôa to me hàhtô. Ne mehkra itajê cukwa kam ramã me hàmtàr to mō, ne tapi me hikwa to mō, ne me hàmtàr to mō. Ne pê cormã Ewa ihkra to hapôj rohnýtti mã. Ne pê caku jàhtôa kam amehpýpým itajê cunea kam ri me hàhtô to mō, ne pjê kôt me ipicràn to mō. Pê Pahpãm pê Pahhiti ata me hōmpu, pê tàkamrý mehkên to me mō, ne ramã mehkêanre. Ne ajco cute me amji kam hapac xà kên to pit mã me amji kam hapac to me mō.

Kam to Ihtĕm Xà 6.6-22

Pê Pahpãm pjê kam ihkrĩ atajê cunea jipej na amji to

6 ⁶Mã Pahhiti te me ton catê ata ramã me kam ihpeace, ne me kam cumã amji kīn nare. Na ri cute me caxuw amji kam hapac xà nō to ipintuw, ne ahna jêt, cute me hajýr xà ita kam. ⁷Cwýrjapê ri cute amji mã harkwa to:

— Ite me ton xà ita kam amji jũ na ipeace, na wa ha pjê kam mehcunea to hamre tu. Ne pom wa ite mehĩ ton itajê me, pryre me, pryjara me, wa ha mehcunea to hamre tu. Nãmri ramã ite me caxuw amji kam ijapac xà nō na ijêt, ne imã me hapê nare — hajýr. ⁸Pê por me hũmre nō pyxit peaj ne haprý Nowe ata pê Pahpãm cajpuaw. ⁹Ne pê Nowe ata quêt pyxit peaj ne ajco catyt kam ipa, ne ihcunea na impejti ne ajteare mã, pjê kam me hũmre atajê cunea cote na. Ne Pahpãm te amji kam hapac xàa to, ajco amji mã ihhimpej to ipa. ¹⁰Ne cumã ihkra xũmre incrê, ne me haprý pê Xēm me, Cāw me Jape.

¹¹⁻¹³Ne pê pjê cunea kam mehcunea ajpĕn to me hàprê to me ipa. Ne Pahpãm mã, ramã cute amji kam me hapac xà cunea kêanre, ne ihhêj ne ihcacu, ne ramã ihkro. Na pê Pahpãm Nowe mã amji jarĕn to:

— Wa ha pjê kam mehcunea to hamre tu. Ampo na? He imãa ramã pjê kam mehcunea kêanre. Me hàprê me, cute me ajpĕn curê me, ihcunea na cute amji kam me hapac xà kên itajê te ramã ihhêj ne me to ihkro. Cwýrjapê wa ha itýj pjê kam me hũmre me, ampo tĩr itajê cunea to hamre tu.

¹⁴⁻¹⁵— Ne Nowe, wa ha itýj me akra me apytã. Na ca ha pĩ týt to pit mã, amji mã pàr kreti nō to, ne to catia to cati to hane he. Ca ha iry na to gara capô to xetĕnta ne ihkôt xĩc, ne ihpo na to gara capô to cwatôxi, ne ihkã

na to gara capô to ôjtô. Ne ca ha ihkre cahty xà tôti pê penhóc hóc ata to cô mã hâr xà mã ihcahty. Ne pō rŭm to ihcahty, ne caxwãm pê to ihcahty, cô te cumã hâr cupate. ¹⁶Ne ca ha kam pĩ to ikre, ne pĩ to hahêr to kam ikre ata tipre to gũhkra capô to incrê. Ne ca ha kam to ihkre to incrê, harã mã me ita to, ne ihcote na me ita to, ne kÿj rŭm me ita to, ne ahpÿanre na kam to caxwÿn partu. Ne hĩpê kam ca ha harkwa to pyxit peaj. ¹⁷Nãmri wa ha cô catia ne ihkujate, quê ha pjê kam ampo cunea pĩr pa.

¹⁸— Ne wa ha ana amji ton to hane he. Ca ha ca me, aprô me, me akra me, mehprô me, ca ha me acunea pâr kreti mã me axà, mãr wa cô pê to me apytà. ¹⁹⁻²⁰Ne pryre xwÿjê ca ha ajpên caxuw hũmre me cahãj to apijakrut partu, ne pâr kreti mã to axà, ne kÿj pê ampo jara to ne pra itajê, ca ha ajpên caxuw hũmre me cahãj to apijakrut partu ne to axà, mãr quê me acahê na ihtyc xà jahpa. Ne pom ite ampo na amên itajê, quê ha amji to ajkrut pa, ne amjia kôt awÿr ipa ne acjêj. ²¹Ca ha cumã hõ cunea to cuprô ne to axà, ne amji mã me gõ catia ne to cuprô ne me to axà — hane.

²²Hõhõ, pê Pahpãm Nowe mã harkwa hyr to hane, pê harkwa kôt ampo atajê cunea ton pa.

Kam To Ihtêm Xà 7.1, 7-12, 17-24

Pê Pahpãm pâr kreti kam me panquêtjê to ihtyc ahpa

7 ¹Ne pê Nowe jâpên xà ita kam ahna caku hàhtôa, pê hipêj pa. Mã Pahhiti te Nowe mã:

— Hã, hamre, gapacta ne ajpên me akra mea mã pâr kreti ita mã me axà. Nãmri apyxit peaj, ca me hũmre itajê cunea cote na catyt kam ijarkwa kôt apa — hajÿr.

⁷Mã Nowe me, híxi me, mehkra me, mehprô me, mehcunea xâr, cute cô catia te me hipej xà pê me amji pytâr prãmte. ⁸⁻⁹Mã pryre cunea me, pryjara cunea te ahpÿanre na amji to ipijakrut par, ne hÿrmã incjêj par, Pahpãm te ahna me mên xà ata na. Mã Pahhiti pê Pahpãm te me ahna to harkwa jihê.

¹⁰⁻¹¹Mã ramã me ahna amcro te xet, mã kam mehkri ne me cõhti jikaj. Ne pê caxuaw ramã Nowe na caku xêjxênta. Mã ihprôt pê hatuj xà cunea pĩn cô catôtóc, ne cute amji mã hũhhyr, mã côjkwa pĩn hanea ne ta catia te iwrÿc kam ihtêm. ¹²Ne wrÿa to wrÿ, ne cute iwrÿc ita to amcro to cwarênta, ne hanea ne to caxwa to cwarênta.

¹⁷⁻²⁰Mã tàkamrÿ cô catihti ita te pjê jaxir to mō, ne pea cute pjê cuto tu. Ne ihtua to ihtu, ne cute kên kãhti atajê cunea cuto tu, ne cormã kàj mã ihtu na me pajara capô te cwat. Mã pâr kre ihtÿj ihcajcoc, ne cô kam apu mō.

²¹⁻²³Mã pjê kam ampo cunea incaca atajê tyc par ne me hamre tu. Pryre me, pryjara me, ampo to me ipijapar xà me, ampo jàprê me, mehĩ me, ampo kra me, ampo cunea jamre tu. Cõ te me hipej tu. Mã Nowe pyxit peaj ne ihtĩr, mehkra me, por ampo cunea cahê na pàr kre kam hàhhuc atajê me. ²⁴Pê cõ pjê cunea to hipu ita na ahna putwry xĩc.

Kam To Ihtēm Xà 8.1-22

Pê me panquêtjê pàr kreti pê me cato

8 ¹⁻²Mã nee Pahpãm te Nowe me, mehkra me cahê na pryre atajê to hapac kêt nare. Ne cute pjê caxwãm pê cõ jatuj xà jihê ne kõcti kujahêc, cute cõ cajpêr, ne to incrà xà caxuw. ³⁻⁵Mã ihcajpê, ne tàkamry cute to inxõ ne to incrà

to mõ, mã pàr kreti ata mõ,

ne kēnti kàhti catia japyr te Ararati ata na hàhhuc. Mã hipêr pjê kam cõ ita te amji to putwry to incrê, ne cormã inxõ to mõ.

⁶⁻⁷Ne me ahna amcro te cwarēnta, mã Nowe te harkwa krare nõ ita jihê mēn, ne ma põ mã xõnti cahac nõ kujahêc. Mã ihtēm rohnÿtti mã, ne nee hacpy ne cute amji jaxàr nare.

⁸⁻⁹Mã ihkõt cute tutti kujahêc, mã cute amji jaxàr pyrentu. Ampo na? Cormã nee pjê incrà nare ita kam, jõ ri quê ampo na xa? ¹⁰Mã me ahna amcro te xet jirõ pê mã ri, hipêr cute tutti kujahêc. ¹¹Mã ramã ahna pyt xàr xàa kam, mã cute amji jaxàr, ne ihkrÿt kam pĩ hõ nõ tetetti ita xa, mã to tē. Mã Nowe te ramã pjê kam cõ incrà to mõr na hahkre pej pyrentu. ¹²Ne cute amji to amcro to xet jirõ pê mã ri, ma hipêr cute tutti kujahêc, mã nee hacpy ne cute amji jaxàr nare. ¹³⁻¹⁴Mã hipêr Nowe te pàr kreti ata kam amji to putwry to ipijakrut, cõ incrà jikaj xà, mã caxuw ramã ahna caku te xējxēnta ne ihkõt pyxit. Mã cute pĩ te harkwa jihê ita jihê mēn, ne pjê kam ramã cõ incrà na hõmpun.

¹⁵⁻¹⁷Mã Pahpãm te Nowe mã:

— Ajpên pàr kreti pê põ mã me acato. Ca me, gĩxi me, me akra me, mehprõ me, pryre me, pryjara me, me acunea me acato. Ne pjê cunea kam atÿj me apicràn to me mõ, ne me gãhtõ to mõ — hajÿr.

Nowe hakryte Pahpãm mã ampo gõ

¹⁸⁻²⁰Mã mehcunea cator. Mã Nowe Pahpãm pyrên hakrya to hakry, na ri cute ampo pry ita curan, ne Pahpãm mã hõr prãmte to caxàr.

²¹⁻²²Mã Pahpãm te ampo pry to me kam hapac xà ita na cumã ihkĩn, mã cute amji mã harkwa to:

— Wa ha nee jũ caxuw hipêr pjê ita to kēanre nare, ne nee mehcunea jipej nare. Ampo na? He cute me hajÿr tũam, ne mehkēanre. Ne wa ha

ita caxuw pjê kam me caxuw ampo to ajpĕn catê partu. Na quê ha caku cunea kam me hàhkre xà caxuw, me cumã cô me amco, ne cute me hõ kĕhkĕn xà caxuw amcrà me amcro, ne hanea ne, ajpĕn caxuw, amcro me caxwa. Na quê ha to hajÿr ita kam, ahnaa ampo cunea jicu xà mã to cumẽ — hajÿr.

Kam To Ihtĕm Xà 9.1-6, 9-17

Pê Pahpãm me panquêtjê mã amji to awjahkre

9 ¹Ne Pahpãm te Nowe to impejti ne cumã: — Hamre, ita caxuw ca ha me gãhtô to mō, ne pjê cunea kam, quê ha me atãmxwÿ me hàhtôa to me hàhtô to me mō, ne mehcahkũm to me mō. ²Ne quê ha pryre cunea ihtÿj amji mã megĩ itajê cupa, ne me cupê me gō tekjê, na ca ha me caa me to ahimpej. ³Na ca ha gapacta ne atÿj me ampo itajê cunea ku. Nãmri pê wa mam me amã, ate me ampo hô kur xà itajê to pit mã hahkre. Ne ita caxuw ca ha atÿj me ampo cunea ku.

⁴— Ne nee ca ha cormã ne apu hĩ caprô pijaxwÿr nare itajê kur nare. Ampo na? Kam caprô ata pê incaca xà xakat.

⁵⁻⁶— Ne pê wa amji kôat me ato, ne megĩa na me ato, cwÿrjapê ri nee me ate me ajpĕn curan xà nare. Nãmri quê ha ampo jãprê te me anô curan na, nare quê ha jũm jĩa te megĩa nō curan na, ca ha hanea ne atÿj mehcura, cute ihcuran jahpan xà na.

⁹⁻¹⁷— Ne wa ha me amã amji jarê, ne jũ caxuw hipêr cô to pjê kam ampo cunea to ipictor to hajÿr nare. Cwÿrjapê wa ha cõjkwa kam ta jõxwÿn xô, mār wa hõmpu, ne amji mã:

— “Pê wa me cumã to awjahkre xà ata mã ajêt he. Na wa ha nee jũ caxuw hipêr cô to pjê to ipictor nare” — hane. Hõhõ, pê Pahpãm me Nowe, ita na me amji ton to hane. Hamre.

Kam To Ihtĕm Xà 11.1-9

Pê Pahpãm me panquêtjê mã harkwa to ahho

11 ÿhÿ, ne pê caku jãhtôa kam pjê cunea kam me hàhtô to me mō, ne ajco me harkwa pyxit peaj to mehcahôc. Ne mehcuea te kĕn te ikre kãhti ata xãm na me ajpĕn par. Ampo na? Nee mã ampo na nare, ma ame Pahpãm par caca. Ne ma pjê cunea kam amehcahkũm caca, cwÿrjapê pê me krĩ catia ton to prãm, cute amji to me catia prãmte. Ne me ajpĕn mã:

— Hacme, ne me ikre nō kãhti to, ne ihkôat cõjkwa wÿr me api, ne nee pjê kôt ame papicràn nare — hane. Ne cute me ton. Mã Pahhiti wrÿc, ne

cute krĩ ata me kēnti te ikre kàhti ata pupun, ne nee ahna cumã ihkĩn nare. Mã ajpēn mã:

— Mehcunea me harkwa pyxit peaj to mehçakôc ita kam, quê ha me ampo cunea jahkre pej, ne ihtÿj jũ caxuw me ampo kên catia to. Hacu ne ahpyãre na me cumã me harkwa pihho jôr pa, mãr quê nee me ajpēn par nare — hane.

Ne me iwrÿc, ne cute mehcunea mã harkwa jôr par, mã ajpēn kaj na cute mehçakôc kam mehtēm. Ne nee me ajpēn par nare ita kam, jũ wÿr quê me ajpēn kampa. Ne ma pjê cunea wÿr cute me ipicràn kam mehtēm. Ne pea cute me ikre ita me krĩ ita jicu, ne me ipicràn partu.

Pom krĩ ita japyrÿ te Meharkwapihho jô krĩ. Ita cwÿrjapê ri krĩxàre cunea me harkwa pihho to pit mã mehçakôc, ne ma pjê cunea kam amehçahkũm. Hamre.

JO JÕ KÀHHÔC

Jo 1.1-22; 2.1-10

Pê Pahpãm Jo capi na Xatanaj jamã

1-2 Ne pê me ahna caku jàhtôa jirô pê mã ri hũmre nô ita japyrÿ te Jo, ne pjê nôa kam ihkrĩ. Ne cupê hũmre krã impejti, ne ampeaj kam cumã Pahpãm kĩn, ne nee ajco apu ihkên ton to ipa nare, ne quêt catyt kam ajco ipa. Pê cumã ihkra xũmre xet, ne cahãj incrê, ne hakràaj to hakràj. Ne pê ampeaj kam ihparxare to hakràj cati, me hũkjê kwÿ jirôa pê.

Pê mehkra ajco me amji mã amji kĩn to, ne ajco mehkjêjê kwÿ na ahwÿ, hũrkwa wÿr. Pê ajco me cuprô, ne me apà, ne ajco me ikô, me hõ amji kĩn ata na. Ne pê me hõ amji kĩn ita na ajco jũ mã amji to me amcro to. Ne ajco mehkra me amji kĩn itajê jicu, pê Jo mehkra na ahwÿ, ne Pahpãm mã mehçajrên. Ne ajco iràrà na ihkrĩ, ne Pahpãm mã ampo pry to capa, mehkra kên xà itajê jahpan xà na. Ampo na? Pê ajco taa amji mã:

— Quê ihhêaj to me ikra Pahpãm mã mehkên xà nô to, ne nee me hĩ cunea kam me cumã Pahpãm kĩn nare, cwÿrjapê wa ha pa, me hahpan xà na, Pahpãm mã ampo pry to capa — hane. Hõhõ, pê Jo ajco ita ton to hajÿr to ihcuhhê.

Mã amcro nô na Pahpãm te me pahcurê xwÿn pê Xatanaj ita cukij ne cumã:

— Xà ca ajkĩ atỳj me imã hàpên catê pê Jo ata pupu? Pjê kam me hũmre kwỳ jirôa pê cupê hũmre impejti, ne ihtỳj amji mã icupa, ne ma apu ampo kên cunea caca — hajỹr.

Mã me pahcurê xwỳn Pahpãm mã:

— Ca gõtpe ma hamã, ne ma hũrkwa jamã, ne ma cumã ampo atajê cunea jamã, na ri cumã akĩn. Ca cupê ampo itajê cunea to pôj, ne cupê to hamre, quê ha hipêr cumã akĩn nare. Quê ha ihtỳj akuc ri acrôn xà kêanre nõ to acrô — hane.

Mã Pahpãm cumã:

— Xatanaj, hã gapacta ne cupê hakràj itajê cunea to kên, ne hĩ ca nee caxun nare — hane.

Jirô pê mã ri me pahcurê xwỳn te Jo to kên prãmte hỹrmã tẽ. Mã ahna ahtũm nare mã Jo kra te hipêr me hũrkwa kam, amji mã me amji kĩn nõ ton. Mã pea Jo jũrkwa ri jũm jũjarên catê ita hỹrmã cator, ne cute cumã hũjarên to:

— Wa ame gõ pryti to pur kam pjê to apkjê, mã cawrô cahàcre ihtỳj apu ipa. Mã Xapêw catêjê kwỳ cator, ne cute me amã hàpên catêjê jipej, ne ma me ampo itajê cunea to mō. Wa ipyxit peaj ne itĩr ne awỳr icator — hajỹr.

Ne cormã apu hũjarên kwỳa kam, mã ramã ihnõ ita tẽ, ne cute Jo mã hũjarên to:

— Cõjkwa pĩn cuhy pỳm, ne cute gõ carà cahàcti me, cute me hamãr catêjê cunea to caxàr. Wa ipyxit peaj ne itĩr ne awỳr icator — hajỹr.

Ne cormã hũjarên kwỳa kam, mã ita xwỳjê cator ne cumã:

— Cartêj catêjê kwỳ cator, ne cute me amã hàpên catêjê cunea jipej, wapo xwahhihti to, ne ma me gõ cawrô kô jarôti pê camer atajê to me cuto tu. Wa ipyxit peaj ne itĩr ne awỳr icator — hane.

Ne cormã apu hũjarên kwỳa kam, mã ita xwỳjê cator, ne cumã:

— Me akra te me hũrkwa kam amji mã me amji kĩn ton, ne cormã ame ahna akrua kam, mã kôc pahtỳjti ita cator, ne cute ikre kwĩn. Mã me kam ihpỳm, ne cute me hipej tu — hane.

Pê Jo nee Pahpãm kên jarên nare

Mã Jo jũpar par, ne ihtỳj Pahpãm to amji japackre, ne hãm ne xa. Ne cute amji pê ihkã jipôn, ne to ihkĩ cunea mên, cumã amji kĩn nõ xàhte. Ne cute harkwa to:

— Pê wa icakrô ipỳm, ne wa ha icakrô ty. Me ijõ Pahhiti, ca ate imã ampo atajê cunea jõr, ne hacpỹa mã ate ipê ihcunea incwỳr. Ne ijõ Inxũ Cati, imãa, cormã apejti — hajỹr.

Ne pê Jo cute amji kam hapac xà ita kam, nee Pahpãm cuna mã ihkên xà nõ ton nare, ne nee pê Pahpãm cuna mã ihcakôc xà kên nõ to ihcakôc kên nare.

Jirô pê mã ri Xatanaj te hipêr Pahpãm na hàhwỳr, cute hanea ne Jo jĩ to kên prãmte. Mã Pahpãm te ahna to tojnô.

Mã ahna ahtũm nare, mã Jo jĩ cunea kam ihkà xêt, ne ihrôt ne ampeaj kam cumã hà. Na pê amji pupun xà kêanre to amji pupun cacrô, pê nee Pahpãm cuna mã ihcakôc kên nõ to ihcakôc nare.

Jo 3-41

Pê Pahpãm hacpỹa mã Jo to impej

3-41 Mã Jo jô ikwỳ nõ catêjê te ahna me cuprôn, cute mehtečajpar prãmte. Ne xãmte nee ihtehčajpar prãmte ahna cute me cuprôn nare, ne cama apu ihkên mã me mên prãm, ne me cumã:

— Jo, me ikampa. Akêanre, na ri Pahpãm te akên jahpan xà na apu ato kêanre. Jũ wỳr quê Pahpãm jũm pejti to kên — hajỹr. Ihtỹj cute ampo kên ton na amehcãmji, na pê ame cumãn to hane.

Mã tee Jo me cumã cute ampo kên ton nare na amji jarê. Mã hõ ikwỳ nõ atajê te hapackrea to jũ mã me amcro jãhtô ton. Mã Jo te me cupê amji pytâr prãmte hajỹar, ne me cumã ampo jãhtôa jarên.

Jirô pê mã ri Pahpãm apu Jo jô ikwỳ nõ catêjê kam incryc, ne me cumã:

— Me apê amji jahkre kêatre, na ca ame Jo to acakôc kêanre to hane. Ne Jo ri me girôa pê impej. Ne cama Jo na me ahwỳ, quê imã me acajrên, wa me ato impejti ne — hajỹr. Mã Jo te Pahpãm mã mehwỳ cajrên, quê nee me kam incryc nare.

Mã Pahpãm te Jo kam hapac, ne cumã hõ ikwỳ nõ te to kên xà ita to tojnô. Ne hanea ne cute Jo mã mam cumã ampo itajê jirôa pê hõr to ipijakrut partu. Mã hanea ne Jo kjêjê xũmre me, mehkjêjê cahãj me, me hõ ikwỳ nõ catêjê me, cute ame cumã ampo jôr xà atajê to hỹrmã me mō. Ne ame Jo caprĩ, cute amji pupun xà kêanre ata cwỳrjapê.

Mã Pahpãm te Jo mã ampej, ne to hakràj catia to cati, ne hipêr cumã ihkra xũmre to xet, ne ihkra cahãj to incrê, ne ihkra cahãj itajê ri, pjê cunea kam mempej atajê jirôa pê mempej. Pê Jo caku jãhtôa kam amji to ajpa, ne ajco mehtãmwxwỳ pupu. Hamre.

(Yũy, ita ri Jo Jô Kàhhôc jicu xà. Ne ita caxuw Kam To Ihtêm Xà Jô Kàhhôc cahhur he.)

KAM TO IHTĒM XÀ JÕ KÀHHÔC

Kam To Ihtēm Xà 11.31-32; 12.1-8

Pê Pahpām menquētti Aprāw na ahwỳ

11-12 Ne pê caku atajê kam pjê nōa kam, hūmre nō ita hō pjê mã hikra, ne ma Canān jō pjê wỳr mō. Ne amji kôt ihkra japry te Aprāw me, mehkjêjê nō to mō. Ne Pjēncrāti jō krī mã me cator, ne curia hūmre nō ata tyc. Mã Aprāw pê ihkra ita te harêt.

Mã Pahpām te Aprāw mã ihcakôc ne cumã:

— Gõ pjê me, acūmxwỳ jūrkwā me, me akwỳ pê acato, ne ma ite amã pjê jahkre xà ata wỳr mō. Wa ha amã pjê ata jahkre, ne me atāmxwỳ to hàhtōa to hàhtô. Wa ha ato impej, ne ato acatia to acati. Ca ate ito amji mã ahimpej, na ca ha me hàhtōa ne me to impej. Cwỳrjapê cute me ato impejti atajê jahpan xà na, wa ha ame to impejti ne. Ne cute ame ato kêanre atajê jahpan xà na, wa ha ame to kêanre ne. Ne acwỳrjapê wa ha pjê cunea kam me to impejti ne — hajỳr.

Mã Aprāw cator, hīxi me, hapar Ro me, me cumã hàpên catêjê me, me hō parxare me, ne mehcunea Canān jō pjê wỳr me cutor, Pahhiti jarkwa kôt. Pê Aprāw cator xà ata kam ramã ahna caku xetēnta ne ihkôt xíc.

Mã ma Aprāw mō ne Canān jō pjê mã me cator. Mã Pahpām te Aprāw mã amji to ipipê ne cumã:

— Wa ha itỳj jũ caxuw me atāmxwỳ mã pjê ita gō — hajỳr. Mã Aprāw te hakryte Pahhiti mã amji jōr, ne to cati prāmte cumã ihcakôc pejti.

Ne Aprāw me, hīxi me, hō parxare me, ma Peter jō krī cahê na kên atajê wỳr me mō. Mã ihkôt hapar Ro hō parxare me, cumã hàpên catêjê to mō, ne curia ame hàhhuc cri.

Kam To Ihtēm Xà 13.1-18; 15.5-6

Pê Aprāw me Ro ajcapô

13, 15 Pê ampeaj kam Aprāw me Ro ita me hakrāj cati. Pê pjê kam me ahtwỳ ata incire, cute kam me hō parxare to me ipijapar xà caxuw, ne pê ampeaj kam me cumã hō carà cahàcre hàhtô. Cwỳrjapê ri Aprāw me Ro mã hō parxa jamār catêjê cama ame ajpu. Ne Aprāw jàhcayrēan to hàhcayrēn, cwỳrjapê pê Ro mã harkwa to:

— Cu amji to pajũkjê ita kam, jũ wỳr cu ajpu. Ca ha amji mã pjê nō capi ne hỳrmã axy, cu ha ajcapô — hane.

Mã Ro te Cõpijapjêr jõ cô cahê na pjê ata pupun, mã kam põre, ne kam ahtu, ne impejti, ne impej ita pê mam Etê jõ pjê pyrãac. Mã Ro te pjê pupun, ne amji mã capi ata kam pê mam ramã Krĩhpõc me Krĩhcumrãrti atajê ihcuhhê. Mã ma hÿrmã hõ parxa me, cumã hàpên catêjê to hy. Mã Aprãw Canãn jõ pjê kam hàhhuç.

Pê Pahpãm Aprãw mã amji to awjahkre

Pê Ro xy jirõ pê mã Pahhiti Aprãw mã ihcakõc ne cumã:

— Hõmpu he, ne pom ca pjê cunea pupu ita, wa ha amã ihcunea gõ, quê ha hanea ne me atãmxwÿ ihtÿj kam mehkrĩ. Ne ite amã me atãmxwÿ jõr xà atajê, quê ha me hàhtõa to me hàhtõ. Quê ha me hàhtõ pê ihhêj rÿm pjênxõm carõt pyrãac, ca ha nee uu ne me cahyt par nare — hane.

Ne hipêr caxwa ri irĩat kam, Pahpãm te cumã ihcakõc, ne cumã:

— Aprãw, nee ca apu pa nare. Ampo na? Wa ha itÿj ato impej ne gamã, ne apytã — hajÿr. Ne ma põ mã Pahpãm te haprõr ne cumã:

— Cõjkwa wÿr ca rĩt ne hõmpu, ca ha ate caxêre cahyt par na, ca ha cahyt pa. Ampo na? He wa ha amã atãmxwÿ to hàhtõ to hanea, pom quê caxêre jãhtõ he — hajÿr.

Mã Aprãw te Pahpãm kam hapac, ne ampeaj kam amji mã to ihhimpej. Ampo na? Cute Pahpãm te cumã harkwa to ihcakõc ata na, cute impar na ri.

Kam To Ihtêm Xà 16.1-16

Pê Hacakwÿj mã Ixamar pÿm

16 Ne ramã jÿ mã me ahna caku te, mã cormã nee Aprãw me hĩxi pê Xarakwÿj ata mã ihkra nare kam, ramã ajwar mehwej. Cwÿrjapê ri Xarakwÿj te impjên mã harkwa to:

— Pom imã hàpên catê cahãj pê Hacakwÿj ita me, ca ha apu gõr ne kam akra, quê ha cumã ihpÿm, cu ha to pahkra, wa ha pa to ajpa — hajÿr.

Mã harkwa kõt Aprãw te Hacakwÿj ita to hajÿr ne kam ihkra. Mã cute amji cajpêr me mãa mã, ma apu hõ pahhi kwÿj pê Xarakwÿj ata par caca. Cwÿrjapê ri ma Xarakwÿj apu Hacakwÿj curê ne apu to kêanre, mã ma põ wÿr cupê tẽ.

Mã curia Pahhiti te cõjkwa kam cumã memprar catêjê nõ na amji jahkre ne cumã harkwa to:

— Ca ha nee gõ pahhi kwÿj ata mã hikran, ne hipêr cupê acator to hajÿr nare. Ne hacpÿa mã hÿrmã amji jaxà, ne atÿj amji caxuw kampa. Ne wa ite ramã amã akra jõr ita, quê ha amã ihpÿm, ca ha cumã haprÿ to Ixamar. Quê ha ampeaj kam ihtÿj, ne cukwa kam quê ha ampeaj kam amã atãmxwÿ hàhtõ, ne ihtÿj mehkJêjêa me, me ajpu — hajÿr.

Mã Hacakwỳj te impar ne hacpỹa mã amji jaxàr. Mã cumã ihkra ata pỳm, mã Aprãw te cumã haprỳ to Ixamar.

Kam To IhtĚm Xà 17.1-27

Pê Pahpãm Aprãw mã ihkra to awjahkre

17 Ne ramã ahna caku te trĕxi, mã Aprãw wỳr Pahpãm cator, ne cute cumã harkwa to:

— Ýuỹ, Aprãw, hipĕr ite amã amji ton xà ata to intuw, quĕ ha ihtỳj amã akra xũmre nŏ cato. Na quĕ ha apĕ me hakat, ne apĩan quĕ ha pahhi catia catĕjĕ kwỳ me hapŏj. Wa ha amã Canãn jŏ pjĕ ita gŏ, ne hanea ne me atãmxwỳ mã cugŏ, ca ha kam me akrĩ rohnỳtti mã. Ne ca ha caa me, me atãmxwỳ me, me apĕ me ikwỳ, na wa ha pa amji to me Apãm Cati.

— Ne mehcunea te, ate ipar ne apĕ me ikwỳ na, cute me gahkre pej prãm to, ca ha ite ato ihmpej xà ita na ikam gapac to hane he. Ca ha me akam, me hũmre mehkrĩ atajĕ me, me atãmxwỳ me, ca ha me acunea me apy kà kryjre ne ajpĕn mã me hakep. Ne quĕ me atãmxwỳ nŏ mã ihkra xũmre nŏ pỳm, ne ramã ahna amcro ŏjtŏ, quĕ ha acuxà me cumã impy kà kwỳ jakep. Ne por jũmjĕ te impy kà kwỳ jakep nare atajĕ quĕ ha nee me cupĕ me ikwỳ nare. Ampo na? He nee ite amã amji ton xà na, pahte ajpĕn par xà ita mã hãr nare na ri.

— Ýuỹ, Aprãw, ramã gixi Xarakwỳj me ajwar awej cakrŏ, quĕ ha ihtỳj me amã me akra xũmre nŏ cato. Ne cupĕ me atãmxwỳ cunea xakat — hajỳr.

Mã Aprãw te Pahpãm par, ne cuna mã ihpỳm, cute cumã incirre na amji jarĕn prãmte. Ne cute nee impar xà ita to amji mã hajỳr nare, na ri cama apu acxa, ne amji mã:

— Pỳhàpà, quĕ ha pijamã cormã imã ikra nŏ cato? — hajỳr jirŏ pĕ mã, cute Pahpãm mã:

— Ca rỳ mã Ixamar to me itãmxwỳ tãmxwỳ xakat — hajỳr.

Mã Pahpãm cumã:

— Quĕ nare! Gĩxia pĕ Xarakwỳj kam quĕ ha akra xũmre ita cato, caku nŏ na, ca ha cumã haprỳ to Ixac. Ne cupĕa quĕ ha me atãmxwỳ jãhtŏti atajĕ xakat — hane. Ne ma cupĕ tĕ. Mã amcro ata na Aprãw me ihkra xũmre pĕ Ixamar me, curi cahĕ na mehkrĩ atajĕ me, mehcunea te amji mã mempy kà kryjre ne me hakep, Pahpãm te ahna mĕn xà na.

Kam To IhtĚm Xà 18.1-15

Pê Pahpãm hipĕr Aprãw mã ihkra to awjahkre

18 Pê Pahpãm hipĕr awcahti nŏ na Aprãw mã amji to ajpĕ to hane he. Pê Aprãw pyt te ihcahpa kam, harkwa mã incjĕj xà ata na jỹ.

Ne cute me hũmre to incrê ne me hõmpun. Ne ma cute mehcajpar prãmte me cuna mã hãm ne tẽ. Ne cute mehcajpar ne mehkõt na me cumã hũjahkre, ne cute hõ to me kam hapac. Mã ahna me cumã impejti.

Mã Aprãw te hỹr xà wỳr amji jaxàr, ne hĩxi pê Xarakwỳj mã harkwa to: — Awjarêa ne me hũmre itajê mã kwỳr te pro nõ to — hajỹr. Ne ma hõ carã cahãcti hõhti wỳr tẽ, ne cute harĩntuwti nõ capi ne ahna cumã hàpên catê mẽn, quê ihcura ne ihkrêr xà caxuw to. Ne ramã cute amji jipêj mã hanea ne pryti kà cacô incrã me, ihkà cacô to me mõ, ne cute me cuna mã hũxwỳr.

Mã cute mehkrêr, ne me Aprãw cukij to:

— Mêr jõ ri mã aprõ pê Xarakwỳj ata? — hajỹr.

Mã Aprãw me cumã:

— Ma ihkrĩ xà kam ri jỹ — hane.

Mã me hũmre nõ pyxit ita pê Pahhiti pê Pahpãm, ne cute Aprãw mã harkwa to:

— Caku ajpên mõ ita kam, quê ha gĩxi mã ihkra xũmre ihpỳm — hajỹr.

Mã Xarakwỳj te ita par ne cama apu amji na acxa. Ampo na? Nee cute amji mã Pahhiti jarkwa to hajỹr nare na ri. Ramã Aprãw me ajwar ihwejtu, ne mehkra xà jirõ pê ihpỳm tu, ne cormã nee mehkra nare.

Mã Pahhiti te Aprãw mã:

— Ampo na mã gĩxi apu acxa? Xà quê ipê gõ Pahhiti nee ajkĩ ita ton nare? Wa ha itỳj to. Caku pyxit ita jirõ pê, quê ha ihtỳj cumã ihkra xũmre nõ cato — hajỹr.

Mã hũpate Xarakwỳj te ipicxar na cumã amji na hàprãr to:

— Wa nee apu ipicxar nare — hane.

Mã cumã:

— Ca apicxar, wa ite apar — hane.

Kam To Ihtẽm Xà 18.16-33

Pê Aprãw Pahpãm mã Krĩhpõc me Krĩhcumrãrti cajrẽ

Jirõ pê mã ri hũmre itajê me hãm, ne ma Krĩhpõc jõ krĩ wỳr me mõ. Mã ma Aprãw mehkõt mõ. Mã Pahhiti te amji mã:

— Pom wa ite amji mã Aprãw pê me ikwỳ cunea xakat na capi ita? Nõ na mã wa apu cupê ite krĩ to kên xà ita to ipimxur to mõ? Wa ha itỳj cumã harẽ — hajỹr, ne Aprãw wỳr ipipkjêr ne cumã:

— Pom me hũmre pijakrut itajê pê cõjkwa kam imã me hàpên catêjê, ne wa ha krĩ kam mehkêanre atajê wỳr mehkujate, quê ha krĩ mea mã, me to hamre tu ne — hajỹr.

Mã ma Krĩhpõc me Krĩhcumrãrti wỳr me ipijakrut itajê me mõ. Mã Aprãw te hapar pê Ro ata te mehkra mea mã krĩ ata kam me cahê na mehkri na me to amji japackre, na ri cute Pahpãm na hàhwỳr to:

— Ýũỹ, mǒrmǒ ihtỳj curi me cahê na mempej te me xĩncwěnta ne amehkrĩ. Xà ca ha ajkĩ mehkên catêjê cahê na mempej te me xĩncwěnta atajê mea mã, me hipej tu? — hajỹr.

Mã Pahpãm cumã:

— Quê! Quê ha curi me cahê na mempej catêjê me xĩncwěnta ne amehkrĩ, wa ha nee mehkêanre atajê kôt me hipej nare — hane.

Mã Aprãw cumã:

— Xà quê ihhêaj to mempej me xĩncwěnta xà wỳr, me xĩc ne me hamre, ca ha ajkĩ atỳj ahnaa me hipej? — hane.

Mã Pahpãm cumã:

— Quê! Quê ha cute me cwarěnta ne ihkôt xĩc itajê mempej pit, wa ha itỳj mehkôt mehkwy cunea caprĩ — hane.

Mã Aprãw cumã me harěn to ihkryj to mǒr ita kam, tàkamrỳ me to hōkre nǒ to mō. Ne cute cumã ihcakôc jicu xàa kam cumã:

— Xà quê ha mempej catêjê me tej peaj, ca ha ajkĩ atỳj ahnaa mehkôt me hipej? — hajỹr.

Mã Pahpãm cumã:

— Quê! Quê ha cute me tej peaj cacrô, wa ha itỳj mehkôt mehcunea caprĩ ne me hicu — hane.

Jirô pê mã ri ma tẽ, mã ma Aprãw te hũrkwa wỳr amji jaxàr.

Kam To Ihtêm Xà 19.1-28

Pê Ro krĩ te caxàr xà pê cato

19 Mã ma ramã me hũmre pijakrut atajê Krĩhpôc jô krĩ mã me cator. Mã Ro te ihtỳj hũrkwa kam me ahna amji caxàr. Mã caxwa ata kam krĩ ata kam me hũmre mehkĩrĩ catêjê atajê jàhtôa ne cute me ahna me cuprôn, ne me Ro na hàhwỳr, ne me cumã:

— Ramã ite me pyjê caxun to ihkĩn hi, na ca ha me imã me hũmre impejti itajê jahkre, wa ame caxun to me ipa — hajỹr. Hōhō, pê cute amji kam me hapac xà kêanre kam menxyre ita me cumã hajỹr rohnỳtti mã, na pê Pahpãm ame hipej prãm.

Mã cōjkwa pĩn me hũmre pijakrut atajê te jũ mã me hũmre atajê into ton, ne me to into puror, mǎr quê nee me ikre jarkwa pupun, ne ahna me hỹrmã mencjêj nare. Mã cute me Ro mã:

— Krĩ ita pê gũjarêan kam, me akra mea mã, me acato! Ne ma kěn nǒ na, ca me akrĩ. Ampo na? Wa ha pjê ita kam, krĩ itajê cunea to me hamre tu ne — hajỹr.

Mã Ro te, por ramã ihwawỳ to cute ihkra me hikwa na cume ajpẽn par atajê mã hũjarěn, mã nee cute mempar nare, ne ihtỳj cute ame cumã hapactu na amehcãmjĩ. Mã pea me hũmre pijakrut atajê te me Ro pa na

ipyr, ne hanea ne me hīxi pa na ipyr, mehkra cahāj pijakrut atajê mea mã, ne ma me to ipicahur, krī pê, põ mã me to cator prãmte. Ne ma me to cator, ne curia ri me cumã:

— Kĕn wÿr me aprõt pyrentu, ne nee hacpÿ mã amji jahpan xà na mehwȳr ame arīt ne me gâhhuc nare. Ampo na? Wa ha mehcuea to me hamre tu ne — hane.

Mã ma mehprõt, mã cõjkwa pīn Pahpãm te cuhy te ta kujahêc, mã cute Krīhpõc jõ krī ata me, Krīhcumrãrti ata na impÿn, ne mehcuea to caxàr tu. Ne mehkõt ampo to me hàhcukrêj atajê me, me hõ pur me, pjê ata kam ampo cunea to cute caxàr partu, mã pjê pit jàhhuc, ne carãre nõ.

Mã nee Ro me hīxi ata te Pahpãm mã hàpĕn catêjê ipijakrut atajê impar nare, ne krī japê xà to hacpÿ mã hÿrmã irīt, ne curia cute caaxwa carõt na amji jahkre, ne curia ihcuhhê rohnÿtti mã. Mã ma Ro me mehkra quêt me pra, ne curia pê kĕn na mehkri.

Mã apĕ mã ma Aprãw hacpÿ mã mõ ne kĕnti nõ jimoac kam xa, ne ampÿa mã krī wÿr irīt ne cute hõmpun. Mã krī atajê kũm, me pjê kũm pit kàj mã hàpĕr to mõ, mã cute hõmpun.

Kam To Ihtĕm Xà 21.1-14

Pê Xarakwÿj mã Ixac pÿm

21 Mã Pahpãm te me Aprãw me Xarakwÿj mã ihkra to hũjahkre ita ihtÿj cumã ihpÿm, caku pyxit jirõ pê. Mã Aprãw te cumã haprÿ to Ixac, ne haprÿ ita jũjarĕn xà pê “Ipicxar”. Mã Xarakwÿj te amji jarĕn to:

— Pahpãm te ihtÿj ajte imã ikra xũmre ita jõr, cwÿrjapĕ wa ame ikwÿ mea mã, me ijakryte ame acxa — hajÿr.

Mã ramã Ixac kàre to mõ, ne cute ihkà jicu. Mã cute ihkà jicu pyrĕn hũm pê Aprãw apu hakry, ne cute me to amji pyrãc xà kõt, cumã amji kīn catia ton.

Mã Ixamar pê Hacakwÿj kra ata, cama apu Ixac mãn kĕanre to mõ. Mã Xarakwÿj te ahna hõmpun, ne kam hapac, ne apu kam incryc ne impĕn mã:

— Ixac me hũm, imã atyc jirõ pê Hacakwÿj kra pê Ixamar ita te amji mã acukrêj nõ pyr na to prãm nare. Cwÿrjapĕ ca ha ma inxi me ajwar jũ kam mehkujate, quê me mõ — hajÿr.

Mã Aprãw mã ahna ihkīn nare, ne ihpeacre. Mã ma apu jũ kam amehkujahêc caca.

Mã Pahpãm te ita to cumã ihcakõc ne cumã:

— Gapacta ne jũ kam Hacakwÿj me ihcãmter kujate. Wa ha pa me hamã, quê ha hanea cupĕ me hàhtõa xakat — hajÿr.

Mã Aprãw te impar ne ma Ixamar me inxi kujahêc, põ kam me hamreare ata wÿr. Mã curia mehkrĩ, mã ihtÿj Pahpãm me hamã. Na pê cupê me hàhtôa xakat ne ihtÿj ajco mehkjêjêa tàmwxwÿ tàmwxwÿ me, me ajpu.

Kam To Ihtêm Xà 22.1-19

Pê Pahpãm Ixac na, Aprãw capi

22 Ne ahna caku jãhtô nare mã ramã Ixac kàre. Mã Pahpãm te, Aprãw te to amji mã ihhimpej na capi, ne hahkre pej prãmte cumã:

— Por akra Ixac pyxit peaj ne amã ihkĩnti ata, ca ha to mõi, ne ate to ikam gapac xà na, imã ihcura. Ca ha to mõi, wa ha amã Morij jõ pjê ata jahkre, ca ha hàhkà jakôt atajê nõ na ihcura, ne imã to capa — hajÿr.

Mã apê mã Aprãw jÿr, ne cute to pĩ cahhêc, cute to cuhôn xà caxuw, ne cawrô cahàcre kam haxwÿr. Ne cute Ixac japrôr, ne ma amji kôt cute cumã me hàpên catêjê to ipijakrut ne to mõi. Ne cute me mōar to me amcro incrê jirô pê mã ri Aprãw te pjê ata pupun, ne cute cumã me hàpên catêjê itajê mã:

— Ita ri me ahtwÿ, cawrô cahàcre na. Wa ha ma ikra me mõi, ne ame Pahpãm to amji kampa, ne ampo to me kampa, ne ihkĩnti na me cumã amji jarên jirô pê, wa ha hacpÿa ne me amji jaxà — hajÿr. Ne Aprãw te Ixac jikre kam pĩ pre xir mã ma to mõi. Mã Aprãw te cuhy me wapo pyr, ne ma ajwar me mõi.

Mã Ixac te carà cahàcti hòhti japên, ne hũm cukij ne cumã:

— Inxũ, ihtÿj pamã wapo ne pĩ, ne jõ ri mã carà cahàcti hòhti ita, pahte to Pahpãm kam pajapac xà caxuw? — hajÿr.

Mã Aprãw cumã:

— Quê ha Pahpãm pamã ihnõ — hane.

Ne por Pahpãm te cumã pjê jahkre ata wÿr me cator, mã Aprãw te ajpên jipy kên jakôt, ne kam pĩ jaxwÿr. Ne cute Ixac cajpre, ne pĩ jipy hir. Ne caxuw wapo pyr, ne ramã cute Ixac curan xàa kam, mã cõjkwa pĩn Pahhiti te ihkrãhhia kam Aprãw mã:

— Aprãw! Aprãw! Akra curan nare! Ita kôt wa ite, ca ampeaj kam ikampa na, gahkre pej. Ampo na? Ate imã akra pyxit peaj ata jõr xà caxuw ajmãr ihcuran — hajÿr.

Mã Aprãw rĩt, ne cute carà cahàcti hòhti xũmti te hĩpàr to ahkêt na hê, ne to hãm na hõmpun. Ne cute ihpro ne ihcuran, ne kên jipy hir ne to caxàr, cute Pahpãm mã hõr xà ata caxuw.

Cwÿrjapê ri Pahhiti te hipêr Aprãw to impejti na amji ton, ne cumã ihtàmwxwÿ jãhtôa ne hõr na amji ton.

Ne hanea ne Pahpãm te cumã amji jarĕn, ne cumã:

— Ýuÿ Aprãw, ca ate ito amji mã ahimpej, cwÿrjapê wa ha krĩxàre jãhtôti atajê cunea to impejti ne, atãmxwÿ itajê cwÿrjapê. Quê ha krĩxàre itajê ihtÿj, pom ite me atãmxwÿ to impej ita na, quê ha me ina ahwÿ — hajÿr.

Jirô pê mã ri Aprãw me, Ixac me, cumã me hàpĕn catêjê me, cute hacpÿ mã ikre wÿr me amji jaxàr.

Kam To Ihtĕm Xà 24.1-66

Pê Ixac me Repecakwÿj hikwa tuw

24 Ne ahna jũ mã caku te jirô pê mã ri ramã Aprãw weaj to ihwej, ne cute cumã me hàpĕn catêjê jô pahhi kujahêc, quê ihcãmter mã ihprô japĕn to mô. Nãmri cumã Ixac te curi jũm cuprÿ me hikwa na to prãm nare, ne hõ pjêa pê Pjĕncràti jô pjê rũm, jũm cuprÿ me Ixac jikwa na to prãm.

Mã cumã hàpĕn catê ita te cawrô cahãcti kô jarôti pê camer ita to tej, ne kam ampo kĩn xà to hipu tu, cute cuprÿhti ata jahpan xà na hũm mã hõr xà caxuw, ne ma to mô. Mã jũ mã ahna amcro te, mã Aprãw na mehkwy jô krĩ mã to cator. Ne cute Pahpãm mã ihcakôc, cute cumã cahãj cuprÿ ata jahkre prãmte. Ne cute ihwÿr to hajÿr he:

— Ýuÿ, me ijõ Inxũ pê Pahpãm. Ca ha ite Ixac mã hĩxi nõ mã icator na itehcajpa to hane he. Quê ha jũm cuprÿ te cawrô cahãcti pê camer mã cõ kwÿ jõr prãm ata pê, quê ha Ixac prõ — hajÿr.

Ne cormã Pahpãm mã ihcakôc to hÿr kwÿa kam, mã me cuprÿ nõ impejti japrÿ te Repecakwÿj ata curi cator. Pê cupê Aprãw na mehkjêjê cahãj nõa. Mã hàpĕn catê ita te cõ na ihwÿr, cute to ihkõm prãmte. Mã cute cumã hõr jirô pê cute camer mã kwa pĩn cõ kwÿ to hàpir na amji ton. Me ajkaam mã hàpĕn catê ata te, Pahhiti te Repecakwÿj capi na hahkre pej pyrentu.

Mã cute cumã hapac jakrô xà jõr, ne hanea ne cumã wakÿre prãti pê õr te ihpa xê xà to ipijakrut ne hõr. Ne ihcukij to:

— Xà hõtpê gũrkwa kam imã ijõt xà nõ — hajÿr.

Mã cumã:

— Hõtpê — hane.

Mã hàpĕn catê ita te Pahpãm te itehcajpar pyrĕn hakryti na cumã amji jarĕn. Jirô pê mã ri, ma Repecakwÿj kôt mô, hũrkwa wÿr. Ne cute Repecakwÿj tõ pê Rapãw mã mõr xà atajê cunea na amji jarĕn partu. Ne hanea ne cute Pahpãm te cumã Repecakwÿj cuprÿhti ata pê Ixac prõ na to ihhimpej na harĕn.

Mã hũm me Rapãw pê ihtõ te hàpĕn catê ita mã Repecakwÿj to mõr xà na hahkre. Mã hanea ne ihtÿj ihkôt ihkràr. Mã hàpĕn catê ita te hũkjê mã cute ampo jõr xà atajê jõr par, ne caxwa mã curia hõt.

Mã iràrà na Repecakwỳj me Aprāw mã hàpên catê ita ma me mō. Mã ma Repecakwỳj kôt ihtehcajpar catê cahāj nõ ita mō.

Ne amcro nõ na ramā pyt xàrà wỳr, mã Canān jō pjê kam Ixac ma apu pō pê, Pahpām mã ihcakôc to mō. Ne irīt ne cute ramā camer te hapôj to ipa na hōmpun. Mã Repecakwỳj camer pê wrỳc, ne cute Aprāw mã hàpên catê ita cukij ne cumā:

— Měr jũm xũmre mã pō pê apu mō, ne ajpên me pahcajpar to tẽ ita? — hajỳr. Mã cumā:

— Ijō pahhi Aprāw kra ri ajpên tẽ — hane.

Mã cute cupêhkà to ihkuc pro. Pê mam cute me amji kam hapac xàa na cute cupêhkà to ihkuc pro, ihpahàm cupate.

Mã hàpên catê ita te Ixac mã mōr xà ata cunea na amji jarēn par.

Mã ma Ixac te inxyrxwỳ krī xà wỳr Repecakwỳj japrôr, ne cute to amji mã ihprō kīnti ata.

Pê Aprāw na caku jàhtôa pê xěj ne ihkôt xetēnta ne ihkôt xĩc ne ramā ihweaj ne ty.

Kam To Ihtēm Xà 25.24-28

Pê Repecakwỳj mã Exaw me Jaco pỳm

25 Ne caku te winti jirô pê mã ri Ixac me Repecakwỳj mã mehkra pijakrut hiahpuro. Ne cormā inxi tu kam me jêt kwỳa kam, pê Pahpām inxi mã me to hũjarēn to:

— Krìxàre xakat pijakrut ne atu kam harij, quê ha pyxit ne ihnō jirôa pê carôt tỳj. Ne por carôt tỳj ata pê, quê ha hapu na ihpỳm ata, ne ihtỳj cupê mam ihpỳm ata jō pahhi — hane.

Pê jũ mã ahna amcro pê cumā ihkra xũmre ajkrut ne ihpỳm. Ne pê mam ihpỳm ata mã haprỳ to Exaw ne hapu na ihtō ita mã Jaco. Ne pea ajwar mehkà. Ne pê Exaw into capôc, ne ampeaj kam cumā hũjahêr prām, ne cupê pō jō xũmre. Ne Jaco pê amji mã ampejti ne hōtpê ajco ikre pua na ampo to ajpa. Pê Ixac mã ampeaj kam Exaw kīn, ne hĩxi mã ampeaj kam Jaco kīn.

Kam To Ihtēm Xà 27.1-46

Pê Ixac Jaco cajrēn

27 Pê caku hàhtôa jirô pê ramā Ixac ihweaj, ne ramā into tũm. Ne amcro nõ na Exaw mã harkwa to:

— Ramā ita caxuw iweaj, ne wa ha itỳj amcro nõ na ty. Ne ityc xwỳjrea na, ca ha gō cuhê me gō kruw cwa, ne ma pō mã to mō, ne imã ampo

cura, ne hĩ to imã jũ na wa ha cukrê, ite amji mã hàn xà ata na. Jirô pê mã wa ha itỳj acajrên to acũmpejti ne. Nãmri apê ri mam kà — hane.

Mã Repecakwỳj te ihcakôc xà ita na impar, ne Jaco mã hũjarên, ne ihkujahêc, quê carà cahàcre to ajkrut ne to mỗ ne ihcura. Ne cute Jaco mã harkwa to:

— Cu ha apãm wej to tũm mã pahhêj. Wa ha cumã hõ to cuxwa, quê ha cukrê, ne Pahpãm mã acajrên to acũmpejti ne, Exaw cupyre mã — hajỳr.

Mã Jaco te inxi par pyrentu, ne Exaw kà mã amji jaxàr, ne cute carà cahàcre kà to amji mã hitô kà, mār quê cupê Exaw pyrãac ne ihpa hõhti ne. Ne ma hũm wỳr hõ to mỗ, por curi hikwa xà ata ri, ne cute cumã:

— Inxũ, to jỹ ne apà, ne icajrên — hajỳr. Mã hũm te ihcukij to:

— Me anõ mã ca? — hajỳr. Mã cumã:

— Ipê acãmter kà pê Exaw — hane.

Mã nee ajmār hũm te cupê Exaw na amji jarên xà ata na impar nare. Ne cute ihcukij to ipijakrut. Ne cute ihpa cupên ne ihtỳj apu amji mã to Exaw. Ne cute hõ ita krêr jirô pê, cute Pahpãm mã Jaco cajrên pejti to ihcajrên to hajỳr he:

— Pahpãm gõtpe gàhkre ita mã ta gõ, ne kam ihhy to hàhtôa ne. Ca ha gakràj cati mār quê me hàhtôa ne cama me amã hàpên catêjê na me ipa. Ne ca ha atỳj apê me akjêjê jõ pahhi. Ne por jũmjê ame ato kêanre atajê, quê ha Pahpãm hanea ne jũmjê ame to kêanre ne. Ne por ame ato impejti atajê, quê ha hanea ne jũmjê ame to impejti ne — hajỳr. Ne cute ihcakôc jicu, mã ma Jaco cator.

Mã hakàn pê Exaw hõa to hũm wỳr cator, ne cute cumã:

— Inxũ, to jỹ ne apà, ne icajrên — hajỳr. Mã hũm te ihcukij to:

— Me anõ mã ca? — hajỳr. Mã cumã:

— Ipê acãmter kà pê Exaw — hane.

Mã Ixac te amji mã ihhêj na amji jahkre pej pyrentu, ne to amji jigêc hyr, ne apu ihtertet. Ne jũ wỳr quê cute Jaco cajrên xà ita hacpỹ ne cupê capa. Mã Exaw te incwỳr kam ihtêm, ne hũm mã incwỳr kam amji na hàhwỳr, mār quê Pahpãm mã ihcajrên.

Mã hũm te cumã:

— Mam iwỳr atõ te amji to hapu na kjê cator, ne cute imã ihhêj, wa ite cumã ato impejti xà ita cunea jõr ne to ihcajrên cakrô, wa ha itỳj cuxà acajrên — hajỳr. Ne cute ihcajrên xà cahàcre, kyre pê impej ata to ihcajrên.

Kam To Ihtêm Xà 28.1-5

Pê Ixac Pjênçrati wỳr Jaco kujate

28 Mã Exaw te hũm tyc jirô pê ihtõ pê Jaco curan na amji ton. Mã Repecakwỳj te ita par ne cute jũ kam Jaco kujahêc to amji kam

hapac pyrentu. Ne cute Ixac na hàhwỳr, quê mehkwȳ wỳr Jaco kujate, quê curia hikwa tuw.

Pê Ixac me Repecakwỳj mã Canãn jõ pjê kam mehkrĩ ata jõ pyjê cuprỳ kĩn nare, na pê ma Ixac Jaco kujate, inquétti Rapãw jürkwa wỳr, mehkwȳa jõ pjê japrỳ te Pjêncrati ata wỳr.

Kam To Ihtêm Xà 28.10-22

Pê Pahpãm Jaco mã amji to awjahkre

Mã Jaco ma me hũmjê jürkwa pê cator ne mō, Pjêncrati jõ pjê wỳr. Ne cute mōr to pyt ne nōr xà ata na cator. Mã ahna caxwa mã nō, ne cute kẽn to, amji mã ihkrã japat xà ton, ne to ihkrã japat ne to nō ne gōr, ne ipimtir.

Mã ipimtir ita kam, cute cōjkwa wỳr me hàpir xà pupun, mã ma cōjkwa mã hàr. Mã Pahhiti jarkwa na memprar catêjê ihkõt me api ne me irôrôc. Ne cahĩ na Pahpãm xa ne cute cumã harkwa to:

— Ipê Aprãw Pãm Cati, me Ixac Pãm Cati. Ne pom ca pjê kam nō ne gōr ita, wa ha amã cugō, ne hanea ne me atãmxwỳ mã cugō. Quê ha me atãmxwỳ itajê pê pjênxôm carõt pyrãac, ne ampeaj kam me hàhtô. Wa ha pyt japôj xà me, pyt cjêj xà me, pjê cunea kõt me cucrà.

Ne wa ha pjê cunea kam me to impej, me atãmxwỳ itajê cwỳrjapê. Wa ha itỳj acahê na apu ipa, ne jũ ri apu amōr xà ata na, wa ha itỳj gamã, ne hacpỹa mã ate amji jaxàr na ato, ca ha pjê ita wỳr hacpỹ mã amji jaxà. Ne nee wa ha gicu nare, ne por ite ahna amã icakôc xà ton ata, wa ha itỳj amã to — hajỳr.

Mã ipimprar, ne cute amji mã harkwa to:

— Ampeaj kam ri Pahpãm pjê ita kam apu mō, wa nee ite ita ri ipa xà ita na hahkre pej nare. Ampeaj kam imã pjê ita cupa. Pjê ita pê Pahpãm jürkwa mã hàr xà, cōjkwa wỳr — hajỳr.

Ne Jaco awcahti xà wỳr hỳr, ne cute kẽn te ihkrã japat xà ata jarêc ne hãm, ne Pahhiti te kẽn to hō tekjê xà caxuw hipy ampo cacô incoti ata jaxwỳr. Ne cumã haprỳ to Peter, ne me harkwa na hũjarên xà ata te “Pahpãm jürkwa”. Jirô pê mã ri cute amji mã harkwa to:

— Quê ha Pahpãm te ampeaj kam ikõt ipa, ne apu ipa xà itajê me, ijõ me, ikà me, ipej pêa mã inxũ me inxê jürkwa wỳr ito amji jaxàr na, quê ha cupê ijõ Pahpãm to ijõ Pahpãm, na wa ha itỳj to amji mã ihmpej ne cumã apê. Ne pom kẽn xa ita pê quê ha Pahpãm jürkwa. Ne pa wa ha ijõtpê Pahpãm mã ampo gō. Quê ha imã ampo tej, wa ha cumã pyxit ne cugō, quê ha imã ihcahkur ahtwỳ — hajỳr. Ne cute amji jarên ita jirô pê mã, ma ihtêm xà ita na tẽ.

Kam To IhtĚm Xà 29.1-30

Pĕ Jaco Raquewkwỳj me hikwa tuw

29 Ne ahna amcro jàhtôa jirô pĕ mã ri, ma inquĕtti jô pjĕ wỳr cator. Ne ampỳa mã cute kwa pupun. Mã jũm te kĕn to kwa kre ryti ata jihĕ, mã xa. Mã carà cahàcti hôhti jamâr catĕjĕ ihtỳj mehkrĩ, ne me jũm pahtỳjti te hihĕ mĕn na me hikaj.

Mã Jaco me hỳrmã cator, ne cute mehçukij to:

— Hàpà! Xà ajkĩ gôtpĕ me anô te Rapãw jahkre pej? — hajỳr. Mã me cumã:

— Ýuỳ — hane. Mã ramã ihcaxwỳj Raquewkwỳj ajpĕn carà cahàcti hôhti to mō. Ne curi to cator.

Mã Jaco te kĕn te kwa kre jihĕ ata to hũcapĕr, cute carà cahàcti hôhti mã cô kwỳ jôr na, mehtehçajpar prãmte. Jirô pĕ mã ri cute cupĕ Raquewkwỳj jũkjĕa na cumã amji jarĕn, ne apu hapĕte amrã.

Mã ma hũm jũrkwa wỳr, hũm mã harĕn to ipichaur, ne cute cumã harĕn. Mã Jaco wỳr hũm pĕ Rapãw cator, ne cute ihçajpar, ne haprôr ne hũrkwa kam, cahĕ na hàhhuc prãmte cute huwahi. Ne Rapãw pĕ Jaco menxi tō.

Mã curia Jaco jàhhuc, ne apu inquĕtti mã hàpĕn to ipa. Mã ahna putwỳr pyxít jirô pĕ mã ri Rapãw te Jaco çukij to:

— Ampo na ca ha ihprãm, imã gápĕn jahpan xà na? — hajỳr. Mã Jaco cumã:

— Wa ha hapu na akra cahãj pĕ Raquewkwỳj ata na amã ijàpĕan to caku to xet — hane.

Pĕ Jaco mã Raquewkwỳj kĩn, ne ahna cumã amji to prãm, na pĕ ihtỳj cume hikwa to prãm. Pĕ Rapãw mã ihkra cuprỳ cahãj ita ajkrut peaj, Rijakwỳj me Raquewkwỳj.

Mã Jaco te caku te xet kam Rapãw mã ihkra cahãj na hàpĕn, jirô pĕ mã ri cumã:

— Hã, hamre imã iprô gō, nãmri ramã pahte amji mã amcro hyr xàa kam hàhhuc — hajỳr. Mã Rapãw te curi pjĕ ata kam, mehkrĩ atajĕ cunea to cuprôn, ne me cumã amji kĩn ton.

Mã çaxwa mã Rapãw te aracri ihkra Rijakwỳj japrôr ne ma to mō, ne cute Jaco mã hōr. Mã nee Jaco te awcapàtkô kam, cupĕ Rijakwỳj na hahkre pej nare, ne ihtỳj apu to Raquewkwỳj. Mã ahna apĕ, mã cormã cute Rapãw te cumã ihhĕj na hahkre pej.

Mã Rapãw te cute me amji ton xàa na to hajỳr na, cormã cumã ihkôt harĕn to impej, quĕ nee mam ihkra ita xwỳjrea na cumã hapu na ihkra ita jôr, quĕ cume hikwa nare. Ne hipĕr cute Jaco me ajpĕn par, cute Raquewkwỳj na hipĕr hàpĕn to caku to xet prãmte.

Mã amcro te xet jirô pê cute hanea ne cumã Raquewkwỳj jõr, mã Jaco te Raquewkwỳj me hikwa jirô pê mã, hũm mã hâpên to caku to xet.

Ne pê Jaco mã ihprõ ajkrut atajê kam, mehkra xũmre tõi ne hanea ne jũ mã me cahãj me. Ne me hũmre itajê pê me haprỳ hane he: Rupên me, Ximãw me, Rewi me, Juta me, Ixaca me, Xepurõ me, Joje me, Pênjamĩ me, Tã me, Naptar me, Cate me, Axer.

Kam To Ihtēm Xà 32.22-32

Pê Pahpãm Jaco japrỳ to antuw, Ixaher wỳr

32 Pê Pahpãm caku te cwatõi kam Jaco to impejti, ne cumã ihparxare jãhtõa ne cugõ. Mã ma Jaco inquếtti jũrkwa pê cator, ne ma hũm jũrkwa wỳr hacpỹ mã cute amji jaxàr. Ne mehprõ me, mehkra cunea to mõi, cumã me hâpên catêjê me, hõ parxare cunea to mõi. Ne ma, por pjê kam ihtõ Exaw ihkrĩ ata wỳr me mõi.

Mã caxwa ri Pahpãm te jũm xũmre na amji ton ne Jaco wỳr cator, ne cute me ajpên cujtêan to cõjkwa caprêc. Mã hũmre nõ ita te nee Jaco mã hũcanãr nare na amji cajpêr, ne hapõr hi jagãn, cute cuprõan kam, ne cupê to ipicapõn.

Mã hũmre pê Pahpãm ata cumã:

— Cama imã hikra, wa uu ne tẽ, ramã apê to mõi he — hane.

Mã Jaco cumã:

— Wỳr wa ha, ate imã ihcunea to impejti na amji ton nare kam, amã hikra — hane.

Mã hũmre ita cumã:

— Imã amji japrỳ jarê — hane.

Mã cumã:

— Ipê Jaco — hane.

Mã cumã:

— Hamre, hipêr apê Jaco nare. Ampo na? He gaprỳ ita kõt harên xà pê “Ihhêj xi”. Ne ita caxuw apê Ixaher. Ampo na? He gaprỳ ita kõt harên xà pê “Pahpãm me cute ajpên cujtên”. Ampo na? Ca ate ipê cõjkwa kam Apãm Cati me ajpên cujtên, cwỳrjapê ca atỳj, me hũmre me, me Apãm Cati tohjê — hane.

Mã Jaco te ihcukij to:

— Jũ mã ri gaprỳ te? — hajỹr.

Mã hũmre ita cumã:

— Ampo na mã ca apu ijaprỳ na icukij? — hane. Ne pea cute Jaco mã ihcakõc to impej, ne ma tẽ.

Mã Jaco te pjê ata mã haprỳ to Paniher, ita jarên xà te “Pahpãm kuc”. Ne cute amji mã:

— Wa ite Pahpām pupun ne cormã itīar — hajÿr. Ne pyt cator, mã ma me mōr xà ita na me mō. Ne cumã ihkjê xà, mã to jôt to mō.

Kam To Ihtēm Xà 33.1-20

Jaco me Exaw hipêr me ajpên pupu

33 Jirô pê mã ri Jaco te Exaw pupun, mã hÿrmã cute me hÿmre to cwatxênta ne me to mō. Mã Jaco te hōmpun ne ampeaj kam cumã hÿpa. Mã cute amji mã:

— Pê wa cupê ihcajrên xà py, cwÿrjapê quê ha ihtÿj hahpan xà na icura — hajÿr. Na ri Jaco te ihtō cajpar xwÿjrea na mam cute cumã ampo jōr xà atajê kujahêc. Ne hapua na mehkra to me mō. Mã Jaco mam ihkrãa ri mō, ne Exaw cuna mã hōpôrpo ne ihpÿpÿm to xet.

Mã Exaw ma hÿrmã ipicahur, cute ihcajpar prãmte. Ne cute me ajpên cajpar, ne me ajpên cahôr, ne me ajpên japête ame amrã. Mã Exaw rit ne cute pyjê atajê me, me ahkrare itajê pupun, ne Jaco cukij ne cumã:

— Mêr jÿmjê mã akôt me mō itajê? — hajÿr.

Mã Jaco cumã:

— Pahpām te ri ipê cumã hàpên catê ita mã mehkra itajê jōr — hane. Mã me hàpên catêjê cahãj me, mehkra me, mehprō cunea te Exaw cuna mã mehkôn krã na me hÿr.

Mã Exaw te ihcukij ne cumã:

— Ne mēr ampo na mã ate amji cumam ampo jãhtôa to me hÿmre kujahêc, por wa ite mehcajpar atajê? — hajÿr.

Mã Jaco cumã:

— Wa ite amji to acajpuaw prãmte, ite amã ampo jōr xà atajê kujahêc, mār ca nee ikam acryc nare — hane.

Mã Exaw cumã:

— He imã hàhtôa to hàhtô, pom amã ampo itajêa ri hanea ne imã — hane.

Mã Jaco cama apu ampo itajê to kam hapac to mō ne cumã:

— Quê ha amã ikîn na, ca ha atÿj ite amã ampo jōr xà itajê na amji capa. Ampo na? Wa ite akuc pupun, mã ihhêj rÿm akuc ita pê Pahpām kuc, na ri ijirôa pê acarôt tÿj. Ne gapacta ne ite amã ampo jōr xà itajê na amji capa. Ihkwÿa ri Pahpām te hàhtôa ne imã hōr, na wa ha amã itajê gō — hane. Ne pea cute ihhi kwîn.

Mã Exaw te ampo itajê na amji caxàr, ne cute Jaco mã harkwa to:

— Mēr hacme, wa ha ma me akôt mō — hajÿr.

Mã Jaco cumã:

— Amã, imã cormã ikra kryjre na, me hahkre pej. Ne hanea ne imã pryti cahãjti kà cacô na, amã hahkre pej. Cu ha me to pahkyhkyj, quê ha

nee me hūcanār nare, cwÿrjapê wa ha hapua na akôt me to mō — hane. Ne ma Jaco te Exaw pynār, ne ma Xucot jō krī kam me hàhhuc cri. Ne ma Krījikre wÿr me mō ne me cator.

Jirō pê mã ri krī ata na pire mã Jaco pê Ixaher te pjê nõ kwÿ japrôr, ne kam hūrkwã xãm ne kam ihkrī. Ne curia ri cute Pahpãm mã me ampo to caxâr xà caxuw ajpên jipy kên jakôt, ne ihtÿj kam, cute Pahpãm mã me ampo jôr xà caxuw ampo pry to me capa. Ne cute cumã haprÿ jôr to Ererore Ixaher, ita jūjarên xà te “Pahpãm Carôt tÿjti ata pê ri Ixaher catêjê jō Pahpãm”.

Kam To Ihtêm Xà 37.1-35

Joje pê Ixaher kra jarên xà

37 Pê Raquekwÿj mã ihkra pÿm ata haprÿ Joje, ne Ixaher pê Jaco mã pê ampeaj kam Raquekwÿj kra pê Joje ata kīn, mehkjêjê kwÿ jirôa pê. Na ri cute cumã ihkã impejti, crorti, pajapjêhti ton.

Mã mehkjêjê te ramã me hūm te Joje kīnti ita na me hahkre pej, ne hū na ame amji to prãm. Cwÿrjapê pê ma ame Joje curê, ne nee cumã amehcakôc pej nare.

Pê Joje amti

Mã Joje pimtir, mã ipimtir ita kam pur kam cumã hō arÿjhy pre ita xa, mehkjêjê jō arÿjhy pre cahê na. Pê mam cute me arÿjhy pre xà ata, pê ajco ihcahkôa na me hakep, ne me ihpre ne me hūxwÿ. Mã mehkjêjê jō arÿjhy pre itajê ihcuhê impejti kam, hō tekjê cupate cuna mã ihcunea pÿpÿm, mã hō tekjê hãm to xa. Ita na ri Joje te mehkjêjê mã ipimtir ita jarên. Mã mehkjêjê te mencryac kam mehcukij to:

— Xà ca ha ajkī apê me ijō pahhi, ne me ito ahimpej, wa ha acuna mã acupate ame ipÿpÿm? — hajÿr. Ne pea hipêr kam me cumã mencryc picamên.

Mã hipêr ipimtir.

Mã pyt me putwÿr me caxêre mehcunea cuna mã hōpôrpo ne hikwa. Ne pea cute hūm me, mehkjêjê itajê mã harên.

Mã hūm te ihcukij ne cumã:

— Xà wa ha ajkī me ipê caxêre pyrãc, ne acuna mã acupate me ijōpôrpo ne ame ijikwa? — hajÿr. Mã mehkjêjê ame kam mencryac to amencryc. Ne hūm ri cama apu ipimtir jarên xà itajê to amji kampa.

Pê mehkjêjê mã Joje curan prãm

Amcro nõ na Joje kjêjê ma Krījikre jō pō wÿr, hūm jō carã cahãcti hōhti to me mō, cute ame hamār to ipa xà caxuw. Ne me ahna amcro te jū mãn jirō pê Ixaher pê me hūm ita te Joje mã hàkjêr ne cumã:

— Me akjêjê kôt tē, ma Krījikre jō pō kam ame carà cahàcti hôhti jamār to me ipa. Ca ha tē ne me hōmpu, jū mā ri cute me, ne ajpên imā me harēn nō to tē — hajÿr.

Mā Joje cumā:

— Ma — hane. Ne ma Krījikre jō pō wÿr tē. Mā me hūmre nō te pō kam apu Joje mōr na hōmpun ne cumā:

— Jūm mā ca apu hapên to mō? — hajÿr.

Mā Joje cumā:

— Wa me ikjêjê japên to mō. Xà ca atÿj ajkī imā me harē? Jō ri mōrmō ame carà cahàcti hôhti jamār to me ipa? — hane.

Mā hūmre ita cumā:

— Wa ite me akjêjê itajê impar, mā ijapac kam me amji mā: “Hacme Kwapijakrut jō pō wÿr” hajÿr, wa ite mempar — hane.

Mā cute impar ne ma mehkôt mō, ne Kwapijakrut jō pō kam me kôt cator.

Mā cute ampÿa mā amji wÿr me hōmpun, ne ihcuran na me amji ton pyrentu, ne me ajpên mā:

— Por ipimtir catê ata ri ajpên tē, hacme ne mehcura, ne cô kre crà itajê nō kam me cumē, ne ampo jàprê te ihkrêr na, hūm mā me harē. Ne caxi ipimtir ita te jū na ton ita na mehkôpī. Jū wÿr quê ha me pahto ihhimpej — hajÿr.

Mā Rupên pê mehkjêjê nōa, ma apu Joje curan ita na to ihcaca ne cute harkwa to:

— Cu ha cô kre kam cô nare nō kam mehtīar mē, ne nee mehcuran nare — hajÿr.

Ne ampo na mā cute me cumā harkwa to hajÿr? Nee mā ampo na nare. Harkwa kôt cô kre nō kam, cute me mēn, mā ahna ahtūm mā hacpÿa ne cute ihtēm, ne aracri amji mā caxàr prām to, pê mehkjêjê mā harkwa to hane.

Pê mehkjêjê Joje to ihpore na aha

Mā Joje cator, mā mehkjêjê itajê te mehpro ne me cupê ihkà impejti ita caxàr, ne cô kre ryti, kam cô nare ata kam me mēn. Ne ame kwÿr kur prāmte, me hÿr, ne pea cute me ampo to hàhpan catêjê kwÿ pupun, mā cawrô cahàc kô jarôti pê camer kam me pra. Atajê pê ihtÿj ampo to me hàhpan to me mō, Ejit jō pjê wÿr.

Mā mehkjêjê nōa japry te Juta ita te mehkjêjê kwÿ mā:

— Cu ha me pahkjê ita cura, ne nee me ampo pyr nare. Cu ha cama ihpore na me to aha, ne nee mehcuran nare, ampo na cupê me pahkjê na ri — hajÿr. Hō, pê me ajpên par to hane. Pê nee mehkjêjê nō pê Rupên ita me cahê na apu mōr nare.

Mā ampo to me hàhpan catêjê atajê me ahnaa me amji to mō, mā mehkjêjê itajê te cô kre ita pīn me Joje caxàr, ne kyre pê me to hūpêr,

ihpore hy pràti te winti peaj na cute me to hàhpan. Mã ma amji kôt Ejit jô pjê wÿr Joje to me mō.

Mã Rupên te amji jaxàr ne nee Joje pupun nare, na ri ihpeacre, ne cumã amji kîn nare. Mã mehkjêjê te me carà cahàcti nō curan, ne caprô to cute ame Joje kà jatom, ne ma hũm wÿr me to pra ne me to cator. Ne me cumã ihkà pēr ne me cumã:

— Xà ajkī akra kàa mã ita? Wa ite pō kam me cumã icator — hane.

Mã pea, hũm te ihkà pupun pyrentu ne pea apu amrãhti ne amji mã:

— Ampo jàprêa te mōrmō ihkrēr — hajÿr. Ne amcro jàhtôa kam cormã ihkra tyc ata japê xà to ihkrī ne amrã. Pê tee mehkwy, cute ihkra ita to hapactu prãnte ame to hahkre. Ne jũ wÿr quê me cupê hũjapê ita cahpêta.

Kam To Ihtêm Xà 39.1-23

Pê cahãj Joje kên mã cumê

39 Mã ampo to me hàhpan catêjê itajê Ejit jô pjê kam Joje to me cator. Ne cute krãhtare jô pahhi japÿr te Potipar ita mã ihpore na me to hàhpan.

Pê Pahpãm ajco Joje cahê na apu ipa rohnÿtti mã. Ne Potipar jũrkwa kam cute hàpên xà ton xà atajê cunea na ihtehcajpa, ne Joje kôat pê Pahpãm ajco Potipar jũrkwa to impej. Na pê Potipar Joje to ikre kam me hàpên catêjê jô pahhi. Ne pê Pahpãm, Joje cwÿrjapê, ihcunea na ikre ata to impej. Ne Potipar ata pê ihtÿj Joje to amji mã ihhimpej, ne hũhkra mã hàpên xà cunea jaxà.

Pê Potipar me hĩxi ita ma Joje pupu, ne cumã ihkîn, pê ajco te cama hõmpuu ne cumã:

— Icahê na nō — hane. Pê Joje ajco cumã:

— Wÿr wa ana amji capa. Ampo na? Apjên te ihtÿj amji mã ito hajÿr, ne apê ihprō. Wa nee ikên xà ita mã ixàr nare, Pahpãm cuna mã — hane. Ne pê ajco amcro cunea kam Joje wÿ.

Mã amcro nō na ikre kam me hamreare, mã ahte Joje me Potipar me hĩxi apu mō. Mã cute Joje kà na ipyr ne ihkjên to mō, cahê na nōr prãnte. Mã ma Joje te cupê amji caxàr ne tē, mã hũhkra kam ihkà jàhhuc.

Mã apu kam incryc ne apu caràr, ne cute pō pê me hàpên catêjê ame ipa atajê mã hàkjêr ne me cumã:

— Por Ixaher catêjê nō ata apu icahê na nōr prãm, ne cute ipro, wa icaràr mã cute ijicu ne jũ kam tē — hajÿr.

Mã impjên te amji jaxàr, mã cute cumã Joje kà pēr ne hanea ne cumã ihhêj xi. Mã pea Potipar te hĩxi hêj xi xà ita kam hapac, ne Joje pro, ne Ejit jô pjê jô pahhi te me hacjên atajê cahê na, me hacjên xà kam haxàr. Mã putwÿr jàhtôa kam curi ihcuhhê.

Kam To Ihtēm Xà 40.1-23

Pê Joje me hacjên xà kam me ipimtir kôt harē

40 Ejit jō pjê kam pahhi japyr pē Paro ata apu hō pīxô cacô capi catêjê jō pahhi kam incryc, ne hanea ne apu hō pāw ton catêjê jō pahhi kam incryc. Ne cute ajwar me haxàr, me hacjên xà kam, por curi Joje me hacjên xà kam xa ata ri. Mā ajwar me ipimtir xà ita to me ipimtir, ne tee apu ihkôt me hakop to hahkre. Mā Joje te mehpeacre na me hōmpun, ne me cumā:

— Ampo na mā ca ita kam ame apec? — hajjyr.

Mā me cumā:

— Wa me ipimtir, ne jūm quē ajte me imā me ipimtir itajê kôt hakop ne harē? — hane.

Mā Joje me cumā:

— Pahpām mā ri me apimtir xà itajê jahkre pej, ne ihtjy imā harē, na ca ha me imā apimtir xà itajê jarē — hane.

Mā pīxô cacô jō pahhi te cumā amji jarēn ne cumā:

— Wa ipimtir, mā pīxô kre xà kam pīxô krô crê ne ihcuhhê. Ne pea kam irā ne kam hô. Ne ramā imā Paro kōm xà xa, wa ite pīxô pyr, ne kam hatên, ne Paro mā hōr, mā cute to ihkōm — hajjyr.

Mā Joje cumā:

— Apimtir kam pīxô krô incrê ita pē amcro incrê. Quē ha ana amcro incrê, quē ha acator na Paro me cumē, quē ha me acator. Ca ha hacpŷa mā mam gâpên xà ata to apê. Ma ito amji japackre, ne Paro mā ijarê. Ampo na? Wa rŷ mā nee me hacjên xà ita kam ixām nare. Ne nee ite ampo kên ton nare, ixàr xà ita caxuw, me hacjên xà mā — hane.

Mā pāw ton catêjê jō pahhi te hajjyar, ne Joje mā ipimtir ita jarēn partu, ne cumā:

— Ijôt kam, ikrā kam pāw na kàhàre incrê ne ihcuhhê, wa ma Paro mā to mō, mā cuwênre pra, ne cute ikrā kam ihcunea pin partu — hajjyr.

Mā Joje cumā:

— Pom kàhàre incrê ita pē amcro incrê. Quē ha ana amcro incrê ita kam, quē ha Paro akrā jakep na me cumē, quē ha me akrā jakep, quē ha cuwênre gī krê — hane.

Ne amcro incrê ata kam pē Paro pŷm xà jō amji kīn jō amcro. Mā cute me cumā me hàpên catêjê pijakrut itajê cator na me mên, mā cute me cator, me hacjên xà pīn. Mā cute pīxô cacô jō pahhi mā hacpŷa mā hàpên xà jōr, ne cute pāw jō pahhi krā jakep na me mên, mā cute me ihkrā jakep ne mehcuran. Mā Joje te me hacjên xà kam hūjarēn xà ata na, cute me hōmpun. Mā Joje te amji jarēn na, pīxô cacô jō pahhi mên, mā ajte nee cute Paro mā harēn nare, ne cama to hapac kêt.

Kam To Ihtĕm Xà 41.1-16, 25-36
Pê Joje pjê jô pahhi pê Paro mã ipimtir kôt harê

41 Ne pea cute amji to caku to me ipijakrut, mã Paro pimtir. Ne ipimtir ita kam ma Nir jô cô cahê na xa. Mã pryti cahãjti jicotti itajê te xet, ne cô pîn hàpir, ne apu ahtu kur to ipa. Mã hanea ne ihkôt cahãjti kwý kôkôtre, ihhire atajê te xet, ne cô pîn hàpir. Ne pea cute impejti, jicotti itajê cunea pin par. Mã Paro pimprar.

Ne hacpÿa mã hôt ne hipêr ipimtir xà ita te hajÿr. Ipimtir ita kam ri cute pôhy cahkô pyxit kam ihte te xet pejti, xwa pejti pupun. Ne hanea ne ihte te xet kêanre, xwa nare, ihkrôkrôcre itajê japôj na hõmpun. Mã ihkêanre itajê te impejti te xet itajê cunea pin par. Mã Paro hacpÿ ma mã ipimprar, ne ihkrâ pictor tu ne nee hôt nare, ne ipimtir ita to pit mã amji kampa, ne iriat na ahna apê.

Mã cute Ejit jô pjê jô xümre krã kreti te me amji jahkre pejti atajê cunea na hàhwÿr, mã cute me cuprôn. Mã cute me cumã ipimtir itajê jarên, mã nee jüm te cumã ipimtir itajê kôt harên nare.

Mã cormã pîxô cacô jô pahhi te Joje to amji japackre, me hacjên xà kam, ne cute Paro mã, pê Joje ihtÿj me ipimtir kôt harên xà ata na harê. Mã Paro te me hacjên xà pîn Joje na hàhwÿr. Mã cute to hama hô mên, ne ihkà to hàhpan, ne ma Paro wÿr cator, ne cuna mã xa. Mã Paro Joje mã:

— Wa ipimtir itajê to ipimtir, mã nee jüm te imã ipimtir itajê nô kôt harên nare. Mã cute, ate atÿj me cumã me ipimtir kôt harên na, imã me garên. Na wa ite ana ijãhwÿr — hane.

Mã Joje cumã:

— Wÿr wa amjia kôt amã harê, quêt ijô Pahliti, côjkwa kam ihkrî ata, quê ha imã apimtir ita kôt harê, wa ha cormã amã harê — hane. Mã Paro te Joje mã hôt kam ipimtir itajê jarên partu.

Mã Joje cumã:

— Pom gôt pijakrut ita, quê ha hÿjarên to hane. Pom pryti cahãjti pejti itajê me pôhyhti pejti itajê pê caku kam ampeaj kam me cumã me hô ata pyrâc. Ne pom pryti cahãjti te xet kôkôtre itajê, me pôhyhti te xet kêanre itajê pê ri prãm jô caku te xet ata pyrâac.

— Quê ha caku te xet itajê kam ihtÿj ame hô kur to ipa. Ne hapu na caku te xet ita kam, quê ha prãm ihkêanre ne. Quê ha caku kam me cumã prãm kêanre xà ata kam, quê ha nee ame mam caku pejti atajê to me amji japackre nare. Cwÿrjapê ca ha Paro, atÿj jüm te amji jahkre pejti ata japê, quê ampo hy catia ne to cuprô, ne haxwÿr xà kam haxwÿ, por caku jahkre kêatre kam prãm te hajÿr xà atajê caxuw — hane.

Kam To Ihtĕm Xà 41.37-57

Pê Joje pê pahhi, Ejit jô pjê kam

Joje te Paro japackre xà ata na cumã impejti ne cumã ihkîn, mã cute to amji kam hapac, ne amji mã:

— Ijhêj ne cõjkwa kam Pahpãm te Joje mã, cute amji jahkre pejti jõr. Cwÿrjapê wa ha me cupê ijarkwa kõt pahhi catêjê jô pahhi na hãm — hajÿr. Ne cute cupê me hõ pahhi xà caxuw cumã hũhhi na hê xà caxàr ne cumã hõr, ne hanea ne cute cumã pahhi kà impejti jõr, mehcunea te cupê Paro mã hãpên catêjê cunea jô pahhi na, me hahkre pej prãnte. Pê Joje pahhi nõ kra cahãj me, me hikwa tuw. Ne pê cumã ihkra xũmre ajkrut ne ihpÿm, ne me cumã haprÿ to Manaxê me Eprĩ.

Ne ramã Joje na caku te trĩnta. Mã cute Ejit jô pjê cunea kam, krĩ cunea kõt, ampo hy to cuprõn na me mën. Mã ihtÿj ihkõt me amji jacjê. Mã caku te xet ita kam ampeaj kam me cumã hõ cati ne hàhtõ ita kam, nee me to ipipên nare, ne ahnaa me haxwÿr. Ne Joje te ampo hy to ikre kwÿ jãhtõa to hipu par.

Kam To Ihtĕm Xà 47.13-20

Pê Ejit jô pjê kam prãm cati cato

47 Ne caku te xet ita kam hàhhuc, mã hamre, pjê cunea kam ampo cunea tyc par, ne ampeaj kam prãm cati.

Na ri ma Joje wÿr mehcunea me pra, cute me ampo hy japrõr prãnte. Mã hanea ne ampÿa mã amehkrĩ atajê te hajÿar, ne me hapõj. Ne me cupê ihpore jamre par, mã cute me hõ parxa to, ihpore na me hàhpan kam mehtĕm, mãr quê ame to me hõ pê ampo hy japrõ. Ne me cupê pryti jamre par, mã ma cute me hõ pjê to, ihpore na me hàhpan kam ihtĕm, ampo hy caxuw.

Pê Joje Paro mã ajco ampo itajê cunea japrõr to ipa. Mã hamre, Paro Ejit jô pjê cunea to hõ tekjê ne to hõ pjê. Ne Joje pê ri me hõ pahhi catêjê jô pahhi.

Kam To Ihtĕm Xà 42.1-38

Pê Canãn jô pjê kam prãm

42 Ne pê hanea ne Canãn jô pjê kam prãm ata cato. Mã Jaco pê Ixaher te caku kam prãmti ata kam, Ejit jô pjê kam ampo hy me,

me hõ jarĕn par. Mã ma Joje kjĕjĕ atajĕ me ampo hy japrôr to me pra, Ejit jõ pjĕ wÿr. Mã hapu na ihkjĕ Pĕnjamĩ ita ikre kam hũm me hàhhuc. Mã Ejit jõ pjĕ kam mehkjĕjĕ kwÿ cator, ne Joje mã amehcakôc.

Mã Joje te mehkjĕjĕ pupun ne me hahkre pej pyrentu, mã nee cute me Joje pê mehkjĕ na, me hahkre pej nare. Ne xwÿjĕ mã pê nee me cumã amji jarĕn nare, na pê cuna mã mehpÿpÿm, cute amji to mehkryjre to prãm to. Mã Joje te mam ipimtir nõ ata to amji japackre. Ne cute mehcukij to:

— Jũ pĩn mã ca me mõi? — hajÿr.

Mã me cumã:

— Canãn jõ pjĕ pĩn wa me ampo hy kwÿ japrôr to me mõi. Me ikjĕjĕ me, me ipĕ hũmre pyxit peaj ata kra pit, wa me. Ne ite me tõi, ne hapu na intuwre ita ri curia ikre kam me ipãm me hàhhuc, ne me inõ pê rÿ pĕa mã hamre — hane.

Mã Joje te me cajpĕar prãmte ihhĕj ne incryac kam me cumã:

— Me apĕ me hõmpun catĕjĕ, ca pjĕ kwÿ to me gãhkij prãmte ame hajÿr to me apa — hajÿr. Ne cute me hacjĕn xà kam me hacjĕn, mã me ahna amcro incrĕ. Mã Joje te me cumã harkwa to:

— Wa ite me gahkre pej prãmte, wa ha me acapi, mõi mõi ajkĩ me ahĕj xi nare, nare, mõi mõi me ahĕj xi. Ca ha me gũrkwa wÿr me ampo hy to me mõi, ne hacpÿ ne ajpĕn ate me amji jaxàr xà ata kam, ca ha ajpĕn me atõ intuwre ita japrõ. Ne ca ha me anõ pyxit ne ahtwÿ, ne me hacjĕn xà kam xa, quĕ ha ahnaa me akwÿ me atõ intuwre ita to me cato — hajÿr. Mã mehnõ ita japrÿ te Ximãw ita curia me hacjĕn xà kam hàhhuc.

Mã Joje mã hàpĕn catĕjĕ te ampo hy to me cumã hàhcuprõn partu, ne por ihpore to ampo hy pan me hàmjõr ata, cute hacpÿa mã Joje jarkwa kõt ampo hy cjĕn xà kam me hir. Mã nee mehkjĕjĕ te me hahkre pej nare. Ne ma me to mõi. Mã me ahna caxwa, mã cute ampo hy kam mehpore mã cator, ne ampeaj kam me cumã amji na pa, mã cute amji mã me harkwa to:

— Jũ na xà na mã Pahpãm te me pahto hajÿr? — hajÿr. Ne me hũrkwa mã me cator, ne cute me hũm pê Ixaher mã mehcunea jarĕn par.

Mã cute harkwa to:

— Ramã nee Joje ipa nare, ne Ximãw nee ita ri apu mõi nare, ca ramã hacpÿ mã mã Pĕnjamĩ to me amõi prãm cakrõ, ca ha nee me to amõi nare — hajÿr.

Kam To Ihtĕm Xà 43.1-34

Pĕ hipĕr Ejit jõ pjĕ wÿr me mõi

43 Mã jũ mã me ahna putwÿr te mã me cupĕ, por cute me hõ japrôr ata jamre. Mã Ixaher te mehkra mã:

— Hapỹ mã me amji jaxà, Ejit jõ pjê wỳr, ne hipêr me ampo hy kwỳ jũhkà — hajỹr.

Mã Juta te hũm mã:

— Ejit jõ pjê jõ pahhi ma ame ikjê intuwre ita to me imõr nare ita na, me ito ihcaca. Jũ wỳr wa me Pẽnjamĩ japrõr nare ne me mõ — hajỹr.

Mã Ixaher te amji kam hapac, ne amji mã harkwa to:

— Jũ wỳr cu ita pê me amji pytà, mêr pahhi ita mã ate me ampo jõr xà impejti to me mõ, ne hanea ne me Pẽnjamĩ to mõ. Quê ha Pahpãm pahhi ita cuna mã, cumã cute amji kam hapac xà nõ xi, quê ha ihtỳj Ximãw me Pẽnjamĩ to tojnõ, quê ha me amji jaxà — hajỹr. Mã ma hipêr Ejit jõ pjê wỳr me mõ.

Pê Joje hipêr mehkjêjê pupu

Ne ma Joje pê ihtõ wỳr me cator. Mã Joje te mehkõt Pẽnjamĩ pupun, ne cute cumã hũrkwa jamãr catê mã:

— Quê ha me hũmre itajê ita kam ijũrkwa kam me apà, na ca ha me hàpàn xà caxuw me haprõ — hajỹr. Mã ma cumã hàpên catê ita te me haprõr ne me to mõ, Joje jũrkwa wỳr. Mã ampeaj kam me cumã amji na pa. Ampo na? He ihtỳj ampo hy cjên xà kam ihpore ata na ame amji na amjĩ na ri. Ne cute me Joje mã hàpên catê mã, por ampo te hajỹr xà ata na, me amji jarên.

Mã me cumã:

— Ame pa nare, me Pahpãm pê me amã ihpore ata gõ, ne ampo hy jõ pore, pê wa ramã cupy — hane. Ne cute Ximãw cator, me hacjên xà pĩn, ne ma Joje jũrkwa kàhti ata wỳr me to mõ. Mã Joje te me ahna amji caxàr, mã cuna mã mehpỳpỳm par, jirõ pê mã ri cute ame cumã ampo jõr xà atajê jõr.

Mã cute mehcukij to:

— Xà cormã me apãm ita tĩar? — hajỹr.

Mã me cumã:

— Ýuỹ, cormã ihtĩar ne impeaj, ne cama ramã ihwejtu — hane.

Mã apu Pẽnjamĩ pupu, ne cute me cumã harkwa to:

— Xà atõ ita pê mã me acahhur? — hajỹr.

Mã me cumã:

— Ýuỹ — hane. Mã Joje te hapu na mehcahhur pê ihtõ ita mã harkwa to:

— Ikra, quê ha Pahpãm ato impej — hajỹr. Ne ramã me kam incwỳr xàa kam, ne ma põ mã cato.

Ne cute mehkjêjê mã ajkõt pit mã ihkrĩ xà jahkre par. Cute mam ita jỹr, ne hapu na ita jỹr, ne ihcote na ita jỹr, ne hapua na mehcahhur na, Pẽnjamĩ jỹr. Mã mehkjêjê mã hũpaa to hũpa. Ampo na? Jũ mã mã cute ne ajte ajkõt me pỳpỳm xà ata na me hahkre pej, ne me krĩ par? Ne me hirõa pê cute Pẽnjamĩ mã hõ jõr. Mã mehcunea jàpàn.

Kam To Ihtêm Xà 44.1-34

Pê Joje hipêr mehkjêjê capi

44 Mã iràrà na ma ramã me mõi xàa kam, mã Joje te cumã hàpên catê mãn, ne cumã me hàmcjên xà kam ampo hy to hipu partu, ne kam ihpore nõi par. Ne Pênjamĩ jàmçjên xà kam, cute aracri cumã Joje kôm xà impejti ata xàr. Mã ma awcahti xà wÿr me to mõi. Mã me ahna ahtümre mã Joje te mehkôt cumã hàpên catê kujahêc, quê mehcukij, ampo na mã ajte cute me cupê ihkôm xà to hàhkij.

Mã ma cumã hàpên catê ata mehkôt tẽ, ne cute me cahuc, ne mehcukij, ne me cumã:

— Ampo na mã ate me ijõ pahhi pê ihkôm xà to gàhkij? — hajÿr.

Mã mehkjêjê me cumã:

— Hamreare, wa nee me inõ te to ijàhkij nare. Ca hapên prãm ne gapacta ne hapê. Ca ha ate me inõ jõ kàhà kam pahhi kôm xà ita mã acator na, quê ha ty, ne me icahhur, wa ha cama amji to me cumã ijàpên catêjê na — hane. Mã cute hõ pahhi kôm xà japên kam ihtêm, ne cute Pênjamĩ jõ kàhà kam cumã cator. Mã mehcunea amehpec, ne ma hacpÿ mã cute krĩ wÿr me amji jaxàr.

Mã cormã ikrea kam Joje jÿ, mã cute me amji jaxàr ne hÿrmã me cator, ne Joje cuna mã pjê kam mehpÿpÿm. Mã cute harkwa to me cumã:

— He, xà ite ampo itajê cunea na me gahkre pej na, me apê ijahkre kêatre? — hajÿr.

Mã Juta cumã:

— Me ijarkwa jũ to, wa ha amã me icakôc? Pahpãm te ri, por pê wa me ikên to ata jahpan xà na, ame ito kên. Na wa ha cama amji to amã me ijàpên catêjê na — hane.

Mã Joje te me cajpêar prãmte me cumã:

— Quê! Por hõ kàhà kam ikôm xà nõ ata, quê ha pyxit peaj ne cupê imã hàpên catê, ne me acahhur gapacta ne me acuto, me apãm wÿr — hajÿr.

Mã Juta cumã:

— Me ijõ inxũ ita ramã ihwejtu, ne ramã cumã ihkra kĩnti ata cupê ipictor, ne wa ihkra ita to me cumã imõi nare, quê ha hũjapê to amji cura. Ne ito ca ha haxà jahê, wa ha pa amji to amã ijàpên catê na — hane.

Kam To Ihtēm Xà 45.1-28

Pê Joje mehkjêjê mã amji jarê

45 Mã Joje te hūcanār nare na amji cajpēr, ne mehkjêjê intête, cute me cuprôn atajê cunea cator, mã mehkjêjê pit jàhhuc. Mã apu amrã ne cute mehkjêjê mã:

— He ipê Joje — hajÿr. Mã Joje cupate mehkjêjê aracri amehcuhhê. Mã hipêr me cumã:

— Ipê Joje, ipê, por pê ca me atô to ihpore na me ahpa ata wa. Pê Pahpãm mam me acumam ikujate, mār wa me ato me atyc xà jahpa. Na ca ha me pra, ne me pajõ inxũ mã me ijarê — hane. Ne cute Pẽnjamĩ pÿn, ne ihkôt mehkjêjê japÿn par.

Mã Paro te Ixaher pê Joje pãm na harên par, ne cute haprôr na mên, quê amji wÿr haprô quê cahê na ihkrĩ. Mã Joje te me cumã amji jarên jirô pê mã ri, hũm mã cute ampo kĩn xà jôr xà atajê kujahêc.

Pê Ixaher mehkra mea mã Ejit jô pjê wÿr me antuw

Mã mehkjêjê te me amji jacjên, Canãn jô pjê wÿr, ne cute me hũm pê Ixaher ata mã Joje tiar na me harên. Ne hanea ne cupê Ejit jô pjê jô pahhi na me cumã harên. Mã nee hũm te me hũjarên xà ita to amji mã hajÿr nare, ne nee ajmār hũpar nare, ne ihkrã pictor tu. Ne cute Joje te ampo kĩn xà te cawrô jô kujti to hípu tu na hõmpun, ne hacpÿa mã amji krã kam hapac. Ne cute amji mã harkwa to:

— Xãmte cormã ikra pê Joje tiar na ipa, na wa ha ityc xwÿjrea na itÿj hõmpu — hajÿr.

Kam To Ihtēm Xà 46.1-7, 28-33; 47.1-11

Pê Pahpãm Ixaher to hàhtôa na cumã hũjahkre

46-47 Ne ma Ixaher ita hàhcukrêj me, hõ pryti me, mehkra cunea to mō, ne ma pry cahti ri Pêxerpa jô krĩ xa ata wÿr me mō, curi me hõt prãmte, ne me cator. Mã caxwa mã cute ampo pry ita curan, ne cute to Pahpãm kam hapac xà caxuw to caxàr.

Mã caxwa ri Pahpãm te Ixaher mã ihcakôc, ne cumã:

— Ipê gō Pahhiti, ne ipê apãm Pãm, na ca ha nee apu Ejit jô pjê wÿr amôr xà ita cupa nare. Ampo na? Wa ha ato gàhtôa to gàhtô, ne jũ caxuw hacpÿa ne Canãn jô pjê wÿr ajpên me atàmwxwÿ tàmwxwÿjê to amji jaxà — hajÿr.

Mã me ahna apě mã ma me mŏ, Ejit jŏ pjê wÿr. Ne ramã me hàhtêp, mã Ixaher te amji cumam Juta kujahêc, quê Joje mã ramã hÿrmã hàhtêp to mŏr na harê. Mã tẽ ne Joje wÿr cator, ne cute cumã hÿm jarên. Mã Joje jÿpar, ne cute hŏ cawrô na kujti to hàhcuprôn, ne ma cute hÿm cajpar prãnte tẽ. Ne cute cajpar, ne me ajpẽn pÿn, ne ame ajpẽn kam me amrãhti, ne cute me ajpẽn kam mencwÿr ita krÿnre nare.

Mã Ixaher pê hÿm ata te cumã harkwa to:

— Hamre, wa ha itÿj ato ijapac xà nare kam ty. Ampo na? Wa ite atĩar na akuc pupun, ne hanea ne apeaj na apupun, na wa itÿj ita caxuw ityc to prãm — hajÿr.

Mã Joje te mehkjêjê mã:

— Hã, wa ha ma tẽ, ne Paro mã ramã me acator na me garê, ne hanea ne me apê carà cahãcti jamãr catêjê na cumã me garê. Quê ha ihtÿj pŏ ita kam me gãhhuc na me gamã, ca ha kam me ahtwÿ — hajÿr.

Ne ma tẽ ne cator, ne cute Paro mã me harên, ne cute mehkjêjê to xĩc ne cumã me hahkre. Jirô pê mã ri Joje te hÿm japrôr ne ma Paro wÿr to mŏ, mã cute Pahpãm mã Paro cajrên to impejti. Mã Paro te Ejit jŏ pjê kam me hàhhuc na me cumã harkwa, mã me hàhhuc. Hamre.

MOJXE

Pê Pahpãm Jarkwa To Me Cumã

IHCAKÔC CATÊ

Ûuỹ, hapu na ihkàhhôc ita kam, Mojxe pým xà me, cute amji kam hapac xàcunea jarẽ. Pê Ejit catêjê me hõ pjê kam, Ixaher catêjê to kêanre. Pê tee menquêtjê jõ pjê wÿr ame amji jaxàr prãm. Na pê PahpãmMojxe te Ejit jõ pjê ata pê me to cator catê na hãm. Mã Ixaher catêjêcunea to pjê ata pê cator. Cwÿrjapê ri ihkàhhôc ita japyr te MeCator Xà Jõ Kàhhôc (Me Cator Xà).

Me Cator Xà 1.1-22

Pê Ixaher catêjê Ejit jõ pjê kam me amji pupun xàto kêanre

1 Ûuỹ, pê caku jàhtôa kam, ajco Ixaher kra curi mehkri. Pê Ixaher xwÿ ty, pê hakàn pê cormã me ahna cakuhàhtôa pê Joje ty. Ne pê Joje tyc jirô pê, caku jàhtôa kam ihtàmwxwÿme, mehkra me, me amtà, ne me hàhtôa to me hàhtô. Ne pê hanea ne ramã Paro ty.

Pê haxà kam jùm xàr ata pê Paro tuw, ne amji to pahhi. Ne nee pê Joje pupun nare, ne nee hahkre pej nare. Ne cute Ejit jõ pjê kam mehkricatêjê mã harkwa to:

— Me pajirôa pê Ixaher catêjê kra jàhtô, cwÿrjapê quê ha jũ caxuw me pahkamincryc, ne ihtÿj me pajirô pê me xa, ne me pamã me hàpên jicu, ne ma jũ kam me papême cato. Cwÿrjapê cu ha amji mã me to cama me pamã hàpêncatêjê na — hajÿr.

Ne Ejit catêjê te Ixaher catêjê caxuw me hõ pahhi pahtÿjtatajê mã hapôj, ne me ahna me hÿxwÿr, mâr quê me cumã me hàpên xatÿjti atajê to hàhtôa, ne ahna me cumã quêt, quêampeaj kam me apê. Pê me hàpên xà jirôa pê me hàpên to catia to cati, pê nee me cumã hàmjôr nare. Ne cute me Ixaher catêjêmãn, mã me harkwa kôtcute me cumã kri catia to ipijakrut ne me hãm.

Ne me apêa to me apê cacrô, cyt ne mehàhtô to tẽ ne me hàmtàr, ne cormã me ajhu. Mã Paro te me cumãmehkra pÿpÿm catêjê atajê tehcajpar catêjê mã harkwahyr, ne me cumã harkwa to:

— Quê Ixaher catêjê mã mehkra xÿmre mehpÿpÿm, ca ha ma mehcura — hajÿr.

Mã nee cute mempar, ne nee harkwa kôt cute me ita ton nare. Ampo na? Ampeajkam me cumã Pahpãm cupa, na ri nee Paro te ampo na me mên ata to cuteme nare. Mã Pahpãm te me cumã mehkra pÿpÿm catêjê atajê tehcajpar to impejti, ne hanea ne cute mehtehcajpar, ne me cumã mehkra jôr.

Mã Paro te mehkwy mã, cô kam Ixaher catêjê mã ihkra xÿmre pÿpÿmatajê cunea rên na hÿjahkre, mâr quê cô me ipîr pa.

Me Cator Xà 2.1-25

Mojxe pÿm xà

2 Pê amcro ata na Ixaher catêjê nõ pê Rewi tàmwxwÿ tàmwxwÿ cahäj nõ ita mãihkra xÿmre ita pÿm, ne impejti. Mã cute to ipimxur ita to putwÿr toincrê. Jirô pê mã ri cupê to ipimxur jahkre kêatre, mã cute kàhà ton, ne cumã côxàr cupate, cute ihtô xà to ihkre cunea jihê partu, ne to ihcahty. Jirô pê mã ri cute kam ihkra xÿmreata xàr, ne cô tohkà na têtêc krô ata catàt kre na hãm. Mã ihkjê cahäj japrÿ te Mirãnkwyj ita ampÿa mã ahna xa ne irît, mã ampo te kam mare mã to jÿ mãn, mã cute ahna hõmpun prãmte.

Pê Paro kra cahäj cô kam Mojxe mã cato

Mã Paro kra wÿr prãmte, ma cô mã mō, ne cute cô tohkà na têtêc krô ata catàt kre na kàhàpupun, mã kam me ahkrare nõ ita nõ. Mãcute ahna cumã hàpên catê cahäj nõ mên, mã cute cumã to hàpir. Mãcute ihpro mên, mã cute incwÿr kam ihtêm. Mã Paro kra mã hapê, mã cute harkwa to:

— Ixaher catêjê kra nõ mōrmō he — hajÿr.

Mã ahkrare tōj ita ampÿa mãapu hamâr to mō, ne ma Paro mehcxawÿj wÿr tē, ne cute ihcukij ne cumã:

— Xà wa amã Ixaher catêjê cahäj nõ japrô, quê amã ahkrare nõ ita topijahô ne to ajpa? — hajÿr.

Mã cumã:

— Ýuÿ, mēr tē, ne jÿm japrô — hane. Mã matē, ne cute ihtōre menxi japrô, ne hÿrmã toicator. Mã Paro mehcxawÿj ita cumã:

— Ca ha ahkrare nõ ita pÿ ne imã to ajpa, wa ha amã amgō — hane. Mãhamre, ma hÿrkwa wÿr cute ihkra ata pÿn ne to tē.

Pê jÿ mã ahna cakupê ramã cati ne ihkà. Mã ma inxi ita to tē ne cute Paro kra ita mã hōr. Mã cute amji mãhaprôr, ne to amji kra, ne cumã hapÿr to Mojxe. Ne hapÿr ata kôt harên xàpê “Cô pê cute me to hàpir”.

Pê Mojxe Paro cupate pōti kam me hamreare ata wÿr tē

Mã ramã Mojxe na caku jàhtôa, mã ramãihkà to mō. Ne amcro nõ na apu mō, ne cute Ejit catêjê nõ te Ixaher catêjê nõ cahÿr na hõmpun. Ne

amji pu na irít mã me hamreare, mã cutehapête ihcuran, ne pjênxômti kam me hamreare atakam, to ipimxur.

Ne amcro nõ na ma hipêr apu mõi, ne cuteIxaher catêjê pijakrut te apu ipijapu na me hõmpun, ne me cumã:

— Ampo na mã ca ame ajpên cahhy, pom ca ajpên to me akjê ita? — hajÿr.

Mã ihnõ ita cumã:

— Jùm te mã ajkam me ito impej catê ita na axãm? Xà ca ate mam Ejitcatêjê nõ curan ata cuxãmã, ca apu icuran prãmte, ito hane? — hane. Mã Mojxe te hàhcuran xà ita na amjjarên par na amji jahkre pej, ne ampeaj kam cumã pa.

Mã Paro te Mojxe na harên parto hajÿr, ne cute ihcuran na me mên. Mã ma ramãme wÿjrea na, Mitij jõ pjê wÿr ipictor ne tẽ. Ne curi cator, necuria jùmjê cahê na hàhhuc, ikre atakam, ne pea hikwa tuw, ikre kam hàhhuc ata kra nõ me.

Mã ahna caku jãhtõa jirõ pê Paro ata tyc jakàn pê, mã cormã Ixaher catêjê apu amji pupun xà kêanre to me amji pupu. Mã Pahpãm te mencwÿr kam hapac, ne cumã me caprĩ xà. Mã cutemehtehcajpar to amji kam hapac.

Me Cator Xà 3.1-22

Pê Pahpãm Ixaher catêjê to ihhimpej catê na Mojxe mã harkwa

3 Mã amcro atajê nõ na, põi kam Mojxe apu hÿprequêt jõcarà cahãcti hõhti jamãr to mõi. Ampÿa mã, por Pahpãm jõ hàhkã jakõtti japrÿ te Ihcuhyt jõ kên ata cahê na, apu hamãr to mõi. Mã Pahpãm te cõjkwa pĩn harkwa na memprarcatê na amji ton, ne cuhy kam Mojxe wÿr iwrÿc. Mã Mojxe te ahpytĩ nõ pupun, mã kam cuhy põi, ne nee ajte to caxàr nare. Mã ma hÿrmãtê, cute hõmpun pej prãmte, ne taa amji mã:

— Ampo mã ajte apu hane? — hajÿr.

Mã Pahpãm te cumã hàkjêr ne cumã:

— Mojxe, nee ca ina gãhtêp tu nare, ne apar kà to põi. Ampo na? He pomca pjê kam xa ata ajteare mã, ne cupê itekjê, na caatÿj apar cakrõ kamxa — hajÿr.

Mã Mojxe te harkwa kõthõ par kà to põi, ne ampÿa mã xa ne kampa. Mã cute cumã harkwa to:

— Ipê apãm Pãm Cati, ne cormã ipê me aquêtjê pê Aprãw me, Ixac me, Jaco Pãm Cati wa — hajÿr.

Mã Mojxe te ihkuc pro, cute Pahpãm pupun ne ihtyc cupate. Mã Pahpãm cumã:

— Wa ite Ejit jõpjê kam me ikwÿ te amji pupun xà kêanre to me amji pupun na me hõmpun. Nawa ha pjê ata pĩn me to icato, ne ma pjê impejti

ata wÿr me to ihmpej toimõr to prãm. Na wa ha pa pahhi pê Paro wÿr akujate, ca ha cumãijarê, quê me ikwÿ mãhikra, quê Ejit jõ pjê pê me cato — hane.

Mã Mojxe cumã:

— Jü wÿr wa ha apu amji mã hamã, ne ijàpên xà ita to — hane.

Mã Pahpãm cumã:

— He wa ha itÿj gápênxà ita kam acahê na apu mō — hane.

Mã cumã:

— Wa ha Ixaher catêjê wÿr mō, neicato, quê ha jüm icukij ne imã: “Jüm jarkwa kôtmã ca me iwÿr acator?” hane. Jü mã wa ha cumã amji jarên ita to? — hane.

Mã Pahpãm cumã:

— Ca ha me cumã ijarên to hane he “Pahpãm te imã amji jarên to hajÿr he: ‘Ipê, por mam me aquêtjêPãm Cati ata’ ” hane. Quê ha ahna me acukij to: “Jü mã mã jüm itajaprÿ?” hane, ca ha me cumã: “Jüm ata japrÿ pê ‘Ipê’ hane. Ampo na? Hecupê me Pahton catê me, me pajõ Pahhiti pê Pahpãm. Necute haprÿa name awÿr ikujahêc” hajÿr — hane. Mã Mojxe te impar.

Mã hipêr Pahpãm te Mojxe mã harkwa to:

— Ca ha Ixaher catêjê pê prohkam atajê to cuprõ, ne me cumã ijarên to hane he: “MeApãm Cati te me ate me amji pupun xà kêanre na me apupun, na quê ha Ejit jõ pjê pê me ato cato, ne ma pjê impejti ata wÿr me ato ihmpej to mō” hane.

— Quê ha ihtÿj ate me cumãgũjarên xà ita to amji mã me hane, ne me akampa. Ne ihtÿj pjê jõpahhi pê Paro wÿr akõt me mō, neme acunea acator xà ita na me ahwÿ. Ne ca ha me cumã: “Ca ha me ijamã, wa hapjê kam me hamreare ata kam me imõar to amcro to incrê. Ne cõjkwakam me ijõ Pahpãm to me amji kampa ne cumã me ampo gõ” hane. Ne ramã pahhi ata te me acator na me gamãr nare na imã hahkre pej. Cwÿrjapê wa ha ite Ejit jõpjê me, me to kên prãmte, me hÿrmã ite to kêanre xà ata kujate. Jirõ pê mã quê ha ihtÿj pahhi ata me acator name gamã, ca ha me acato — hajÿr.

Me Cator Xà 4.1-31

Pê Pahpãm Mojxe te ampo to ipihho xà caxuw cumã carõt gõ

4 Mã Mojxe te Pahhiti pê Pahpãm mã harkwa to:

— Mõrmõ quê ha nee me ikam hapacnare — hajÿr.

Mã Pahpãm te ihcukij ne cumã:

— Mêr ampo mã ate gũhkra to ipyr ita? — hajÿr.

Mã cumã:

— Pĩ cajrer — hane.

Mã cumã:

— Měr pjê kam amě — hane. Mã Mojxe te pjê kam pĩ cajrer ata mên, mã cute cagã na amji jahkre, mã ma hũpate tẽ.

Mã Pahpãm cumã:

— Amji jaxà ne cagã ita japy na apy — hane. Mã cute amji jaxàr ne hany na ipyr, mã hamre, hacpãa mã cute pĩ cajrer na amji jahkre. Mã cumã:

— Ca ha me cumã itato hane, quẽ ha me gahkre pej pyrentu — hane.

Mã Mojxe cumã:

— Ijõ Pahhiti, ipẽ icakôc xà to impejti jahkre kêatre — hane.

Mã cumã:

— Měr jũm te mã mehũmre itajê mã harkwa ton? Pom wa itea me amã me garkwatton ita? Ca ha itacaxuw ma mehwỹr mõi, wa ha acakôc na atehcajpa — hane.

Mã cumã:

— Ajteare mã jũm ca ihkujate, ne pa, ca nee ikujahêc nare — hane.

Mã Pahpãm apu kam incryc ne cute cumã harkwa to:

— He atõ Arãw ri ihcakôc pejti, na wa ha acaxuw cumã ijarkwa ta, ca ha cacumã harẽ, mãr quẽ taa pahhi mã awjarẽ. Wa ha pa me cumã acakôc na me atehcajpa, nehanea ne me ate me cumã ampo ton xà atajê to hahkre — hajỹr.

Mã Mojxe te impar ne hĩxi me, mehkra japrõr ne cawrõ cahàcre kam me hỹr, ne ma me to mõi. Ne cute hũhkra to hõ pĩ cajrer tecagã na amji jahkre ata pyr ne to mõi.

Pê Mojxe prohti kam Pahpãm jarkwa jarẽ

Mã ramã Pahpãm te Mojxe tõi pê Arãw ata, hĩpẽ ihkujahêc, mã me ipicaxêr. Ne ma Ejit jõi pjê wỹr me mõi, ne me cator. Ne cute me Ixaher catêjêkà to pit mã mecuprõn, cute me ajpẽn par prãmte. Ne cute me cumã Pahpãm carõt to ipipẽ. Mã Ixaher catêjê pêprohti kam Pahpãm te me hũtãr xà na, me hỹrmã Mojxe me Arãw kujahêc name hũpar, ne hũrẽn ame hakry. Na ri cute Pahpãm to cati prãmte me cumã:

— Me ijõ Inxũ Cati! Ampeaj kam acati ne apej! Na ri ate me iwỹr me ikẽn pê me ito cator catê kujahêc pyrẽn me ijakry — hajỹr.

Me Cator Xà 5.1-7

Pê pahhi Paro hipêr Ixaher catêjê to kêanre

5 Jirõ pê mã ri ma Paro wỹr Mojxe me Arãw mõi, ne cute me cumã hũjarẽn to:

— Ÿuỹ, Paro pê pahhi, me ipêIxaher catêjê jõ Pahhiti, ne cõjkwa kam me ijõ Inxũ Cati ata teamã harkwa to hajỹr he: “Me ikwỹto tojnõ quẽ põ mã me cato, ne põ kam ame amji kĩn, ne ipejti na ame ijarẽ”. Hõhõ, cute amã harkwa to hajỹr — hajỹr.

Mã Paro jũpar ne me cumã:

— Wa nee ite meApãm Cati pê Pahhiti ita na hahkre pej nare itakam, jũ wỹr wa ha me apê mehkwyitajê to tojnõ quẽ me mõ. Ne cama hacpỹ mã me gãpên xà wỹr meamõr pyrentu! — hane. Ne caxuaw amcroata na Paro te me ahna me hõ pahhi pahtỹjti ata to ihhimpej, ne me cumã:

— Me cumã me hãpên xà to ajcamẽ ne to catia, mãr quẽ me apêa to meapê, ne me ahna cõ pra, quẽhipêr me Mojxe me Arãw hẽj xi xãita par nare — hajỹr.

Me Cator Xà 7.1-24

Pê Pahpãm Paro mã ihkrã tỹj jahpan xà na, cute amji pupun xà kãanre gõ

7 Mã Pahpãm te hipêr Mojxe mã ihcakõc ne cumã:

— Hacpỹa mã Paro wỹr me amji jaxà ne cumã me ijarẽ. Quẽ ha ihtỹj meikwỹ pê Ixaher catêjê to tojnõ, quẽ ha me cato. Ne quẽ ihhẽaj to Paro meacukij to: “Jũ mã wa ha ajte, ne me Apãm Cati te me akujahêc xãita na me gahkre pej?” hane, me ajkaam quẽ ha Arãw pjê kam pĩ cajrer ita mẽ, quẽ ha Paro kam maremã cagã na amji jahkre — hajỹr.

Mã ma Paro wỹr Mojxe me Arãw te amjijaxãr ata caxuw ri, pĩ te cagã na amji jahkre. Mã Paro te me hũxyxi catêjê to cuprõn, mã hanea ne cute me cagã ton. Mã Mojxe me Arãw te cagã ton ata te me cupê hõ cagã atajê cunea pin par.

Mã Paro te hõmpun cacrõ, nee cutemempar nare. Ne amjia kõtihkrã tỹj mã hãr, na ri ma amempar caca. Ne nee cute hõ pjê pê, Ixaher catêjê cator na me hamãr nare.

Mã Pahpãm amji mã:

— Mã ajte Ejit catêjê itajê nee amji mã me icupa nare, ne ite amji mãme ampo ton atajê pit cupa to me ipa. Ne ampo itajê pê Nir jõ cõ me, ampojarare me, ampo pry. Ne me cumã ampo itajê pê me hõ pahpãm. Na wa ha me cumã ampoitajê pê pahpãm nare na to ajpẽ, ne toa mehkên mã me cumẽ — hane.

Mã Pahpãm te ma amcro nõ jõ apê nõ na Mojxe me Arãw kujahêc, Nir jõcõ tohkã wỹr. Mã hanea ne Paro curi cator. Mã kam mare mãArãw te hõ pĩ to cõ cakwĩn, mã cõ te me caprõ na amji jahkre. Mã apu tep tyc partu. Ne jũ wỹrquẽ jũm cõ ata kwỹ to ikõ. Ne ampo itajê cunea te cama Paro mã ihkrã toihtỹj cati to cator. Cwỹrjapê ri Pahpãm te cumã cute amji pupun xãkãanre atajê kujahêc.

Me Cator Xà 8.1-22; 9.1-35; 10.1-29

Pê Pahpām hipêr Paro mā cute amji pupun xà kēanrekujate

8-10 Mā hipêr Pahpām te Ejit catêjê mā mehkên xà nōkujahêc. Ne Pahpām hân ne ampo itajê kujate, māParo hân ne Mojxe me Arāwna ahwỳ, cute me ampo kên atajê to hamre prāmte, ne me cumā:
— Ca ha ampo kên itajê to me hamre, wa ha me acutor na me gamā, ca ha mame acuto — hane.

Mā hân ne Mojxe me Arāw ampo kên atajê to me hamre, mähōmpune ma hacpỹ mā ame huwahi. Ne por Pahpām ampo kên kujate itajê, camaParo mā ihkrā to ihtỳj.

Na ri hipêr cute pôrôre jãhtôa ne ihkujahêc, mā cutepjê to hipu tu, ne ikre mā acjêj, ne hanea ne mehō kam ajhu, ne hanea ne mehôt xà kam ajhu, ne ampo cunea kam ihkrī.

Jirô pê mā ri hanea ne cutedrũmre xàre kujahêc, jirô pê mā ri hanea ne cutedkôp kujahêc. Mā ma ajte cormā Paro ame cator ita na ame to ihcaca.

Mā Pahpām te me cumā hà pahtỳjti nōita kujahêc, mā cute Ejit catêjê pê hō parxare cuneajipej.

Jirô pê mā ri Pahpām te me cumā cuhê kujahêc, mā Ejit jō pjê kam me hãm catêjêcunea na cuhê.

Mā hanea ne cô carôt te amjito kên itajê pỳpỳm, côjkwa pīn, necute apu pō pê me ipa catêjê kwỳ jixôn, ne ame hàprà atajê kwỳ to kên.

Mā hanea ne cute mehwỹr xycxyc jãhtôa ne ihkujahêc. Mā cô carôt te amji to kên te ame hàprà to kên nare atajê, xycxyc te ma to irône ipin partu.

Jirô pê mā ri cute Ejit catêjê kam awcapàtkôna amcro incrê ita kujahêc, mā me kam awcapàtkô ita na amcro incrê. Ne Ixaher catêjêkam, nee awcapàtkô nare.

Mā ajte cormā nee Paro te Ixaher catêjê kujahêc nare, ne nee me cator na mehamār nare, ne cama cute Mojxe me Arāw mā me harkwa to:

— Nee ca ha hipêr me amji jaxàr nare! Ca ha hipêr me amji jaxà ne me ty! — hajỳr.

Me Cator Xà 11.1-10; 12.1-51

Pê Pahpām Mojxe mā me Hakren xà jō amji kīn to hahkre

11-12 Mā Pahpām te hipêr Mojxe mā harkwa to:
— Wa ha hipêr Paro mā, hō pjê kam mehkri atajê cuneamā, mehkên xà nōkujate. Jirô pê mā quê ha ihtỳj me gamā, ca ha

me acato. Wa ha awryc mǎawcapàtkô picapôn kam Ejit jô pjêcajpuw tẽ, quẽ ha me hũmre cakônĩ pÿpÿmatajê cunea ame ty. Quẽ ha mam Paro mǎ ihkra xũmre cakônĩ pÿmata ty, ne ihkôt mehkwy cunea pê mehkra xũmre cakônĩ cunea ihtyc pa. Ne hanea ne ampo pry mǎ mam ihkra xũmre pÿpÿm atajête hajÿar ne ihtyc pa.

— Ne pom putwry ita kam, pjê ita pê me acator xà, quẽ ha cupê caku cuneakam, me gô amji kîn catia jô putwry, ne me gô amjikîn ita quẽ ha hane he.

— Ca ha amcro te tej itana ahpÿanre na ikre kôt ame carà cahàcre hôhti kra xũmti te xwÿ nare nacaku pyxit atajê capi ne me to caprǎ, ne ma me hamǎ. Ne amcro te cwatôxiita jô caxwa kam, ca ha me carà cahàcre kra itajê cunea cura. Ne me caprôcwa, ne me to me gũrkwa jarkwa jatom to me hũjê.

— Ne me acunea cuhy na me hĩ xêt, ne ampo hô xÿre ata kam ame ku. Ne nee ame, por pǎw kam ampo jacrô te pǎw to cati xà atajê kur nare, ne quêt me pǎw tÿjre pit ku. Ne por quẽ ha me gô cahhur ahtwÿatajê, ca ha me to caxàr partu. Ne me akà me, me aparkamǎ me amji jacjê, ne me axy xà caxuw amji mǎ me gâhcuprôn hiahpuro, ne me acuhhêa kam me apǎ. Ne me gũjarêan kam, megapàn cati hiahpuro, por me aprar xajũwryhti atajê caxuw. Pom me gô ita pême Apām Cati jô amji kîn jô, atawa me amǎ to hahkre.

— Ÿuÿ, wa ha Ejit jô pjê cajpuw tẽ, nemehkra cakônĩ cunea jipej tu. He, ipyxit peaj ne ipême Apām to me Apām, ne imâme gô amji kîn ita to, ate me ito amji japackre na me atoprām. Na ca ha caku cunea kam atÿj me amji kîn ita to — hajÿr.

Carà cahàcre amji to Ixaher catêjê kritxwÿ

Mǎ Mojxe te Ixaher catêjê pê prohti kam mehcunea to cuprôn ne me cumǎ hũjarên to:

— Me acunea amji mǎ me carà cahàcre hôhti cakônĩ xũmre na caku pyxit atajêpyxit ne me capi, ahpÿanre na ikre kôt, neme to amji tÿj. Ne mehcuna, ne cratti kam me caprôcjê, ne caxuw me ahtu pre incwa, neme to gũrkwa jarkwa jatom to mehũjê, ne hanea ne kÿj rũm me to hatom. Ne nee caxwa ri ikre pême gapôj nare, mǎr quẽ Pahpām me ana tẽ, ne hõmpu, nenee ame akra caxun nare. Ampo na? Quẽ ha me Pahpām pjê ita kam wry ne apu mō, ne Ejitcatêjê xũmre cakônĩ cunea jipej. Quẽ ha harkwa na carà cahàcre kra pême pahkritxwÿ ata caprô pupu, ne nee mehcuran catê jamǎr, quêha me akra curan wÿr mencjêj nare — hajÿr.

Pê Pahpām me cakônĩ jipej

Mǎ Ixaher catêjê te Mojxe te ampo na me mên atajê ton partu. MǎPahpām te caxwa ata kam cõjkwapîn harkwa na cumǎ hàprê catêjê nō kujahêc, mǎcute Ejit jôpjê kam me cakônĩ catêjê jipej tu. Mǎ me hõ pahhi

catêjê pê mehkra xũmre cakõnĩ tyc par. Ne hanea ne me cupê pahhi nare catêjêpê mehkra cakõnĩ tyc par. Ne hanea ne ampo pry pê ihkra cakõnĩ atajê tyc partu.

Mã Paro me cumã me hàpên catêjê meEjit jô pjê kam, hõ krĩ cunea kam, caxwa ri ajpên to me hÿr, ne ame amrãa to ameamrã. Ampo na? Nee ikrenõ pyxit ne kam mehtyc nare, ne Ejit jô pjê cunea kam mehtyc. Mã Paro te Mojxe me Arãw na hàhwÿr ne me cumã:

— Hamre! Gapacta ne me acunea me ipê me acato! Ne ma me gõ Pahhiti teamji mã meato prãm xà ata to, ca me. Ne hanea ne me gõ carà cahàcre hòhti me, pryti cunea to me acuto tu, ne ma cumã me icajrën, quê me ito imejytine — hajÿr.

Ne pê Ejit jô pjê pê me cator xwÿjrea na, ramã Mojxe mehkwyãm Ejit catêjê na me hàhwÿr na, harkwa ta. Mã harkwa kôt mame hÿrmã ame pra, ne ihpore catia na cute me hàhwÿr, ne hanea nemehkà jãhtõa ne cute ahna me hàhwÿr, ne cormã cute me kên prãti me, wakÿre prãti me, me hũhhi na hê xà me, ahna me hàhwÿr. Mã Pahpãm te Ejit catêjê name hàhwÿr xà ata kam mehkwy tehcajpar, ne por ampo cunea na me hàhwÿratajê, cute me cumã hõr partu.

Mã caxwa ata kam Ixaher catêjê te Ejitjõ pjê pê me cator prãmte me mõi na me ipyr.

Me Cator Xà 13.21-22; 14.1-14

Pê Ixaher catêjê cunea Ejit jô pjê pê cato

13-14 Yũy, pê Pahpãm mehkwy to mõi xà ita pê hane he. Pê me cumã ahcacrã nõ kujate, mãr quê ihkõt me ipa. Ne amcro mã mam ahcacrã itaahpar mã iry to ipa, ne mecumã pry to ipipê to ipa, mã ihkõt me ipa. Necaxwa mã amji to cuhy ne me cumã pry kujro to ipa, mã ihkõt me ipa. Mã Pahpãm te Mojxe mãn ne cumã:

— Me ikwÿ pê Ixaher catêjê mã awjarê, quê Cõxwatepti cahê na me ahtwÿ. Ampo na? Quê ha ihtÿj Paroame apictor na ame acãmji, ne ihtÿj põ me cõxwa tohkà na ame gapê. Ne wa ha Paro mã ihkrã to ihtÿj, quê ha me pahpynã. Wa ha ita caxuw hõ krãhtare cahhur, me cute icatihti na me ijarëan to me ijarën na me to. Quê haita caxuw Ejit catêjê me ijahkre pej, ipyxit peaj ne ipê me Apãm carõt tÿjti cati na — hajÿr.

Mã Mojxete impar ne me cumãa harën. Mã Ixaher catêjêjàhhuc, por curi Pahpãm te me to hũjahkrexà ata ri. Mã pea Ejit jô pahhi pê Paro atawÿr, Ixaher catêjê te nee me amji jaxàr xà nare jarën cator.

Mã Paro te cumã me hàpên catêjê cukij, ne me cumã:

— Ampo na mã pahte me Ixaher catêjê jamãr, mã amũme cutor ne cute me pamãhàpên jicu? Hacme mehkõt! — hajÿr. Necute hõ cawrõ jõ

kujti tohàhcuprõn, ne cute cawrô jõ kujti to xêjxênta ne capi, ne kam hõ krãhtare to hipu, ne ahna me hõ pahhi pyxwÿr partu, Ixahercatêjê kôt me to imprar xà caxuw.

Mã Ixaher catêjê teamji kôt Ejit catêjêjõ krãhtare pupun, ne ampeaj kam me cumã me hûpa. Na ri cute Pahpãm te mehtehcajpar ne me hûtàr na me hàhwÿr, ne me Mojxe mã:

— Xà me ijipej xà caxuw mã, ate põ mã me ito acator? Ne ampo na mã ateEjit jõ pjê pê me ito acator? — hajÿr.

Mã Mojxe me cumã:

— Nee ca ame pa nare, ca ha ita kam, me Pahpãm te me pahpytâr xà impejtiita na me hõmpu. Ampo na? Pom ca ita kam ame Ejit catêjê pupu itajê, caha nee hipêr jû caxuw me hõmpun nare. Pahpãm quê ha jû na me pahto ne mepahpytà. Jû wÿr cu amjia kôt me amji pytà — hane.

Me Cator Xà 14.15-22

Pê Pahpãm me cumã Cõxwatepti to ajcapô

Mã Pahpãm te Mojxe mã harkwa to:

— Mojxe, Ixaher catêjê mã awjarê quê me cahi rê. Ne ca, ca ha cõxwa cwÿrpê gõ pĩ cajrer pê, quê haajcapô, ne ihcajpuw me amã pry. Ca hame acunea cõxwa cajpuw pry ata kôt, amcràre kôt me rê — hajÿr.

Mã Pahpãm te ahcacrã to ipintuw, ne Ixaher catêjê meEjit catêjê cote na inxôr. Ne hãn ne ahna caxwa mã ahcacrã ata amji tocuhy ne Ixaher catêjê rûm ahcujo, ne Ejit catêjê rûm ri awcapàtkô. Na quê nee Ejit catêjê Ixaher catêjê cahuc nare.

Mã Mojxe te cõ incwÿrpê hõ pĩ cajrer ita pêr, mã pea Pahpãm te cõ to ipicapôn. Mã kôc pahtÿjti ata cõ cajpuw, pry ata kôt apêa to apê. Mã pry ita kôt amcràre. Mã ihtÿj Ixaher catêjê Cõxwatepti cajpuw amcrã ata kôt meirêr par. Mã cõ te me hûjê kam amji to kwÿc ne xa.

Me Cator Xà 14.23-31

Pê Ejit catêjê cõ kam ame ty

Mã Ejit catêjê jõ krãhtare me, me hõ cawrô mekrãhtare me, Paro jõ cawrô jõ kujti me, Ixaher catêjê kôt cõ mã me hàr. Mã awcahti xà wÿr Pahpãm teEjit catêjê to kên, ne me huwahi kam ihtêm. Mã pea cawrô jõ kujtiamjia kôt ipinkrên, ne ihpÿpÿm, cwÿrjapê quê nee ihtêm nare.

Mã Ixaher catêjê cunea cõxwa jìkjêmã me irêr par, mã Pahpãm te Mojxe mã:

— Hacpÿa mã cõxwa cwÿrpê gõ pĩ cajrer pê, quêha cõ amji jaxà ne Ejit jõkrãhtare me, cawrô me, hõ kujti cunea pro, ne me ipĩr partu — hajÿr.

Mã Mojxe te cô incwÿrêpê hõ pĩ cajrer ata pěr, mã hacpÿa mã cô picaxêr, necute Paro jõ krãhtare me, hõ kujti cunea pro, ne ihcuneato ipictor. Mã nee côxwa na ame irêr prãm atajê nõ jãhhuc nare.

Hõhõ, Pahpãm te Ejit catêjê jũhkra pêIxaher catêjê pytàr xà ita to ri, cute mecupê me hũtâr. Mã côxwa tohkà na, cute Ejit catêjê tycne ame hikwa na ame hõmpun. Ne cute me ahna Pahpãmcarôt tÿaj to ihtÿj pupun, ne ame amji mã hũpa. Ne cute amji mã Pahpãm to me catiprãmte me cumã:

— Apeaj to apej! — hajÿr. Ne hanea ne cute Pahpãm mã hãpên catê pê Mojxe ata to amji mã mehhimpej.

Me Cator Xà 16.1-36

Pê Pahpãm mana to Ixaher catêjê mã harte

16 Ne ma põtî ata cajpuw cute me mõi kam me to incrã. Mã mehcunea Mojxe me Arãw cuna mã amehcakôc, ne me cumã me harkwa to:

— Cu rÿ mã curia Ejit jõ pjê kam ame ty na mã. Ampo na? He quêt curi ampeaj kam me pamãme pajõ cati. Mã ajte ate me põtî ita mã me ito acator, ate prãm to mejipej prãmte — hane.

Mã Pahpãm te mempar ne Mojxe mã:

— Hõmpu he, wa ha cõjkwa pîn, iràrà cunea na meamã me gõ pê mana ata kujate. Quê hapacta ne, cute ame ampo na amji mã me prãm atajê cawrà, ne ame cuku. Ne me cumã quê amcro pyxit kam me cawrà to pyxit, ne amcro te xêj ita jõiràrà na, quê ha me cawrà to ajkrut. Ampo na? He amcro te xet ita jõiràrà na wa ha nee me amã ihkujahêc nare. Wa ha cute me ipar name hahkre pej prãmte, me cumã ampoitajê to — hajÿr.

Mã Mojxe me Arãw te Ixaher catêjê tocuprõn, ne me cumã:

— He amcro ita kam, ca ha me Pahpãm te Ejit catêjê jõ pjê pê me ato cator name hahkre pej. Ne apê ita jõ iràrà na, ca ha me Pahpãm carôt pupu. Ampo na? Me ate cuna mã ame acakôc na cute me apar. Na quê ha pyt kam meamã hĩ gõ, ne iràrà na me amã kwÿr xôm gõ — hajÿr.

Mã caxwa ata kam pryrejara jãhtôa ne cator, ne ihhêj rùm cupê tutre, ne cute põ ita to ipictor tu. Mã mehcura ne me cuku.

Ne iràrà mã ampeaj kam atâr, ne atâr ata crãme ajkaam, mã krãa, ampo pê kwÿr xôm pyrãcti, inxõti ita cator, ne apu ihkrĩ pjê kam. Mã cute me hõmpun, ne ahna me hàhcukjêr to:

— Měr ampo mã ita? — hajÿr.

Mã Mojxe me cumã:

— Kwÿr ri Pahpãm te me amã hõr, ne haprÿ temana. Na ca ha amjimã, me gũrkwa caxuw, ate ahna me prãm atajê to ame cuprõ — hane. Mã ame hapôj, ne ahpÿanre na cute ame hõ itajê incwÿr.

Mã Mojxe te me cumã:

— Ca ha nee me anõ gã pê mana ata to ihhi, ne amcro nōcaxuw amji mã ihcahhur kwỳ xãm nare — hajÿr. Mãnee mehkwy kwỳ te amempar nare, ne amehcahhur pyxwÿr. Mã ahna apẽ mã cute ame hõmpun, mãramã kam ampo cõre, ne ihkro. Mã Mojxe ame kamincryc.

Mã irarã cunea na me hõ ata pit cawrà to mehcuhhê. Mã hãn ne amcro cacrone ihxêt, mã pjê kam kwÿr toame cuprõ atajê hamre ne jũ kam pra. Ne amcro te xêj ita kam ri, cute me kwÿr tocuprõn to me ipijakrut. Mã me hõ pahhi catêjê te me Mojxe cukij, ampona mã amcro te xêj ita kam hãn ne ame kwÿr to cuprõn to me ajkrut. Mã me cumã:

— Ampo na nare, me Pahpãm te rime amã amcro ata to ajteare mã, cute me ato ihkõtprãnte. Ne amcro te ihkwỳ to xet ata ri, ajteare mã ne pyxit peaj necupê Pahpãm jõ amcro, neimpeaj to impej — hane. Mã Pahpãmjõ amcro ata kam hõtpê mehkwy kwÿma põ mã me cator, ikre pê, ne ame hõ japê, ne neecute me ampo mã cator nare.

Me Cator Xà 17.1-6

Pê Pahpãm kên pĩn me cumã cô gã

17 Ne Ixaher catêjê me mõi xà ata kam, pjê nõi japyr to ame Repitĩ ita mãme cator. Ne me cator xà ata kam me cupê cô jamreare, mehkõm xà caxuw. Mã cute me Mojxe mãn kam mehtêm, ne me cumã:

— Me imã cô kwỳ, wa me to ikõ — hajÿr.

Mã Mojxe me cumã:

— Ampo na mã ca ame ikam acryc, ne Pahpãm to ate me amji mã ahimpej nare kam, amji caxuw amehcyt to meapa? — hane.

Mã ampeaj kam me cumãkõr, mã me cute me Mojxe mã harkwa to:

— Ampo caxuw mã ca ate Ejit jõ pjê pê me ito acator, põti ita wÿr, quê hakõr me ijipej, me ikra me, pryti mea mã? — hajÿr.

Mã Mojxe te Pahpãm mãamji jarên to hajÿr he:

— Ampo to wa ha ajte? Ramã kên to cute ame icapêr ne me to icuran xàa kam — hajÿr.

Mã Pahpãm cumã:

— Mêr mam amji kõt prohti kam mehkwy to mõi, quê ha hapu na mehkwyjàhtõti atajê me akõt me mõi, kenti japyr pê Ihcuhyt ata wÿr. Negõ pĩ cajrer ata to gapac kêt nare neapy ne to mõi. Wa ha curia kenti pê Ihcuhyt ata krac ri kên na acajpa, ca ha to kên tac, quê ha cõcato — hane.

Mã Mojxe ma kên wÿr tẽ, ne curi cator. Ne me kam mare mã, cute hõ pĩ cajrer pyr, ne to kên tac. Mã hamre cô te amji mãhũhhyr pyrentu ne ajpjê. Mã mehcunea me to ikõ.

Me Cator Xà 19.1-2, 16-18; 24.12-18

Pê Pahpãm Mojxe mã kên po kam hühkrahhi te ihhòcata gō

19, 24 Ne Ejit jō pjê pîn Ixaher catêjê cator na, putwryĩncrê kam ri, kēnti ata jō pjêmã, me cator. Mã pjê ata kam ampo hamreare. Mākēnti ata krac ri me hàhhuc. Mã Pahpãm te Mojemã:

— Ca ha kēnti na api ne curia ahtwỳ. Wa ha amã, ite kên po kam ijarkwa na ihhòc ita gō, ca ha me cumã to hahkre — hajỹr.

Mã Mojxe me, itehcajpar catê pê Jojuw, ma Ihcuhhyt jökên pê Pahpãm jō kên ata wỳr me tẽ. Ne kēnata na me hàpir xwỳjreana, pê prohti kam me cumã harkwa to:

— Ita ri me ijikaj, wa ha ahnaa me amjijaxà. Ne quê ihhêaj to me amã ampo naprãm, ca ha me itō pê Arãwcukij — hane.

Ne ma kēnti ita na me hàpir, ne pea ahcakrã nō ita wỳr me cator, ne cumã me hàr. Mã Pahpãm carôt jàhcujro tekên ata pro, ne cute ihcujroa to amcroto xêj. Mã kēnti ata jàhcujrôn, ne kam cuhy, ne kam ihkũm, ne kypê hàhkrihkrit nare. Cwỳrjapê ri mehcunea mã hũpa, mã hũpate amehtertet.

Ne amcro te xet kam ri, me Pahpãm te ahcakrã ita kam Mojxe mã hàkjêr. Mã ma hỹrmã hàpir, ne curia ahna amcro te cwarênta. Mã Pahpãm te Mojxe mã ihcakôc jicu, ne cute cumã kên po kam hühkrahhi te ihhòcata jör. Pê Pahpãm kam harkwa na ihhòc to hane he.

Me Cator Xà 20.1-17

Me cumã harkwa to ihhimpej xà pyxit

20 Ipê me gō Pahhiti pê me Apãm Cati. Ne imã me akwỳ kĩaan to me akĩn. Cwỳrjapê wa ite Ejit jō pjê pê me ato icator, por curi me apê cama mecumã me gápên catêjê ata pîn. Na wa itea me amã amji jör, ne amji to me gō Pahhiti. Na ca ha nee iràn xà na, hipêr amji mãme jũm to me gō pahhiti prãm nare. Ne imã me pahte ajpên kĩnti ita na me ato prãm.

Me cumã harkwa to ihhimpej xà pijakrut

Ne pa wa ha ampo kên cunea pê me apytãr to ipa, ne me atehcajpar to ipa. Na ca ha nee ame apãm cahàc kreka itajê to amji kam me gapac nare, ne nee hanea ne ame ampo carō kên pê cupêjarôti ata to amji kam me gapac nare, ne nee cute me atehcajpar xà na ame ahna gàhwỳr nare. Nãmri ca ha ate iràn xà na amji

mã me jũm to hajÿr na, ca hama ramã ame icaca, wa ha itÿj ahna ame akam icryc, ne hahpan xà na ame ato kên. Ne por pjê cunea kam me cumã ikĩnti, mã ijarkwakam me hapac to me ipa atajê, wa ha imã mehkĩn, ne me caprĩ.

Me cumã harkwa to ihhimpej xà incrê

Ne imã me akwÿ kĩnti incwÿrjapê wa ite me amã ijarkwa me ijapÿr jôr. Na waha me amã gapÿr to “Me cupê Pahpãm tekjê”. Cwÿrjapê ca ha ijapÿr to me amji jamãr peaj ne. Ne catyt kam me apa, ne nee ame ampo kên ton to me apa nare. Nãmri ca ha ame ampo kên ton tome apa, quê ahna me apupu, ne ito amji kam me hapac to: “Mõrmõ me Hũm ita kêanre na mã, ihkôat mehkêanre” hane. Nãmri ca ha ate me ipar nare, ne mãnea mã ate meampo kên ton to me apato hajÿr na, wa ha itÿj hahpan xà na ame akam icryc, ne ame ato kêanre ne.

Me cumã harkwa to ihhimpej xà te cwat

Imã me akwÿ kĩnti na pê wa, ite me amã pjê me ampo cunea impejti itajê jôr xà caxuw, to ijapêan to amcro to xêj. Ne pom amcro te xetata to, wa ite ajteare mã, kam me pahkôt xà na. Na ca haatÿj me to amji japackrea ne, ne icuxà amcro te xêj itajê kam ca ha me apê, ne cute xet ita kam, ca ha nee ame gâpên nare, ne cama me kôt. Ne amcro ata kam, ito pit mã me amji kam gapac to me apa.

Me cumã harkwa to ihhimpej xà te xĩc

Imã me akwÿ kĩnti incwÿrjapê wa ite me amã me apãmjê me, me axyrxwÿ jôr, cute me gapackre xà caxuw. Ca ha pjê ita kam, amã amji toapijapar to irya to prãm na, ca ha atÿj me apãmjê me, me axyrxwÿ kampa ne amji mã me hũpa.

Me cumã harkwa to ihhimpej xà te xêj

Imã me akwÿ kĩnti incwÿrjapê, pê wa pa amji mã me ato, ate amji to me apijapar xà caxuw. Na ca ha nee jũ caxuw me jũm curan nare.

Me cumã harkwa to ihhimpej xà te xet

Imã me akwÿ kĩnti incwÿrjapê wa ite ahpÿanre na me axũmre mã, me aprõ jôr par. Ne hanea ne ahpÿanre na me apyê mã, me apjê jôr par, ahte ate ame apa cupate, ate me ajpên kĩn, ne ajpên na me gũjaxôr prãmte. Na ca ha nee amji jũ na ame aprõ kĩn nare, quê ha pyjê xwÿjê nee amji jũ na amempjê kĩn nare, ne nee ajpên pê ame amji caxun nare.

Me cumã harkwa to ihhimpej xà te ôjtõ

Imã me akwÿ kĩnti incwÿrjapê wa ite me amã ampo kwÿ cunea jôr, ate me to atekjêa to prãm to. Na ca ha atÿj ajpên mã me ampo itajê na pahti ne, ne nee jũ caxuw jũm pê ampo to me gâhkij nare.

Me cumã harkwa to ihhimpej xà te nowi

Imã me akwý kīnti incwýrjapê, ca gapacta ne atýj amji mã me ikampa. Ampo na? Wa hãn ne ampo to icakôc, ne nee apu ihêj xi to icakôc nare. Na ca ha icuxà, nee ame ahêj xi jarên nare. Ne nee me akwý kên mã me irên prãmte, ame to ahêj xi to me apa nare.

Me cumã harkwa to ihhimpej xà te tej

Ne imã me akwý kīnti incwýrjapê ri imã me akwý me, me amã me ajpênkīnti na me ato prãm. Na ca ha nee me akwý mã ampoatajê na ame amji caprêp nare. Ne ampo itajê pê, me hürkwa me, hīxi me, cumã me hãpên catêjême, cute ampo to me ipijapar xà me, ampo pej itajê cunea me.

Me Cator Xà 20.18-21

Ixaher catêjê cunea mã Pahpãm cupa catia to cati

Hõhõ, ita to pê Pahpãm Mojxe mã ihcakôc. Mã pjê kam me hàhtôti atajê te mepahhãjê jãhcuxê me, kên kam ihkũmti ata pupun, ne kam me hàhkrihkrit me, hõhhi jãkõrti catia ata kam me hapac, ne hũpa te amehtertet. Ne ampýa mã amehcuhhê, ne cute me Mojxe mã me amji jarên to:

— Ca ha caa me imã Pahpãm jarkwa to acakôc, wa ha itýj me akampa. Ne nee me inaPahpãm te me imã ihcakôc na hamãr nare. Quê me imã ihcakôc, wa me icunea ame ty — hajýr.

Mã Mojxe te me cumã harkwa to:

— Nee ame amji mã pa nare. Ampo na? He nee Pahpãm me amã ihkênjõr nare. Ne cama cute me acapi, ne ate amji mã me to ahimpej kam me to acràna, cute me gahkre pej prãmte ri me amã carõt týtji ita to ipipê to mõ. Ca hame hõmpun to mõ, ne me hahkre pej, ne amji mã me hũpahti to me apa. Ne ca hanee cuna mã ame ampo kên ton nare, ne atýj ame apej mã me apýpým — hajýr.

Mã ampýa mã amehcuhhê, mã ma awcapãtkõti ata mãMojxe pyxit peaj ne Pahpãm wýr hàr. Mã hipêr Pahpãm te me hapackre to hàhtõa to hàhtõ.

Me Cator Xà 32.1-35

Pê Ixaher catêjê amji mã pahpãm cahàc krekà to

32 Mã Mojxe curia kên na apu ihkên, mã me hàhtõti atajê te me hapêê neArãw wýr me pra, ne me cumã harkwa to:

— Me imã ampo krekà pê pahpãmcahàc nõ to, quê ha taa me pahto ihhimpej, ne me pahto mō. Ampo na? Pom Mojxete Ejit jō pjê pê me pahto cator ata jū kam ipictor. Wa nee ampo te jūmã ton xà ata na ite me hahkre pej nare — hajÿr.

Mã Arãw me cumã:

— Měr ite ton xà caxuw me imã wakÿre pràti kwÿ — hane. Mã cute mecumã hōr, mã Arãw tepryti kra xūmti krekà na ton. Mã me cumã impejti, mã cute me harēnxà te cupan xà ata to me ajpēn mã:

— Pryti kra krekà ita pê ri me pajō pahhiti pêpahpãm, mã Ejit jō pjê pê cute me pahto cator — hajÿr. Mã Arãw te cumã hãm xà ita to ihkãhti, ne himoac kam pryti krahti ata xãm, ne amji mã me harēn to hane he:

— Apê quê ha me Pahpãm jō amji kīn — hane.

Mã apē ata na cute mepryti kra krekà pê pahpãm cahàc ata mã ame ampo pry curan, ne cuna mãame to caxàr, cute me to ihcajpuaw prãmte. Ne cute amehkīn toihhi jirō pê me hÿr, ne ame hàpàn neamehkōm jirō pê, cute ame hapactu kam me to ihtēm.

Mã Pahpãm te Mojxe mã:

— Apu uua ne wrÿ, nãmri me hàhtōti atajê te nee mejarkwa itajê impar nare, nemehkēn mã me hār. Wa ite ramã me hōmpun, mã me hūpar nare ne ampeajkam mehkrã tÿj, na ri ahna ampeaj kam me kam icryc. Na wa ha me hipej, ne ato irō ne akam me to hàhtōa — hajÿr.

Mã Mojxe te ahna hàhwÿr ne cumã:

— Ampeaj kam ri mehcunea kēanre cakrō, ca ha me caprī, ne nee ame kam acryc nare. Ne por pê ca mam amã me hàpēn catêjê pê Aprãwme, Ixac me, Jaco mã ate amji ton xà ata to ca amji japackre. Pom pê camehtãmwxwÿ mã jū caxuw pjêpejti mã me hār xà to awjahkre ata to, ca ha amji japackrea ne — hajÿr.

Mã nee me Pahpãm te me hipej nare, mã Mojxe tekēn po kam Pahpãm jarkwa pyr ne ahpar mã to mō. Ne cutewakÿre pràti te pryti kra krekà pupun, ne hanea ne ipu na ame hapactu na me hōmpun, ne mekam incryc to me kam incryc. Mã cute pjê kam kēn po ita to hūcapêr, mã ihpÿm ne ipicahhêc. Mã ma me hÿrmã tē, ne cute pryti kra krekà ita jūhhÿr ne gãn par, ne kam cuhôn ne to caxàr, ne cô kam ihpro jaxwÿr, ne cute me to kōmpartu na me mēn. Mã Pahpãm te me cumã hà nõ pahtÿjti ata kujahêc, cute amepryti kra krekà pê pahpãm cahàc kīn jahpan xà na.

Me Cator Xà 33.7-11

Mojxe te Pahpãm mã ihcakôc xà

33 Pê Mojxe ajco Pahpãm mã mehcakôc xà caxuw ikre pyxwÿr toramã amji pyrãc tu, por curi jū ri me hàhhuc xà atajê kam. Ne

pê ampÿa mã ajco me hàhhuc xà pê hũxwÿ. Ne por pê ajcoPahpãm mã mehcakôc prãm atajê, quê ha curia hÿrmãme ipa. Pê ajco MojxePahpãm mã mehcakôc xà jũrkwa wÿr ipa, pê ajco mehkwÿ cunea me hũrkwajarkwa mã mehcuhhê, ne kam mento cuhhê ne mehõmpun itaana, pê ajco acjêj.

Pê ajco ahcakrã catia ata harkwa mã irôrôc, pê kamPahpãm ajco Mojxe mã ihcakôc. Ne pê hũrkwa jarkwa mã amehcuhhêatajê ajco Pahpãm pejti na me harê. Pom ikre kam Pahpãm mã mehcakôc xà ita kam ri, hãn ne Pahpãm me Mojxe ajpên mã mehcakôc, ne hãn ne Mojxe kucri cumã awjarê. Pom hãn ne me hũmre ame hõ ikwÿ nõ mã mehcakôc itana mã, hãn ne Pahpãm Mojxe mã ihcakôc. Ne cute cumã ihcakôc jicujirô pê mã, pê ma hãn ne Mojxemehkwÿ wÿr amji jacjê.

Ne pê Jojuw cuprÿhti pê Mojxe tehcajpar catê ata, curia ajco apuPahpãm mã mehcakôc xà jũrkwa kam Mojxe jakàn pê ahtwÿ ne apu ipa.

Me Cator Xà 34; 35.4-29

Pê Pahpãm hipêr kên po kam harkwa na ihhóc

34-35 Ne amcro nõ na Pahpãm te Mojxe mã harkwa to: — Hipêr kên po to ajkrut ne cuprã, ne ajpên to mõ, wa hipêr kam ijarkwa na amã ihhóc, ate ihcahhêc ata jaxà na — hajÿr. Mã cutecuprãr ne ma to tẽ, ne curia hipêr ahna amcro te cwarênta. Neihtÿj Pahpãm me ajpên mã ihcakôc. Ne ma hacpÿ mã iwryc ne ihkuc prãti. Ampo na? Cute Pahpãm pupun na ri. Mã mehkwÿ ma ame hũpa, mãcute cupêhkà to ihkuc pro, mãr quê nee me hõmpun nare.

Ampo kà te Pahpãm jũrkwa caxuw Mojxe te hàhcukrêj to hàhcuprôn

Ne pê cormã Mojxe apu kên jimoc ri mõi kwÿa kam, pê Pahpãm cumã hũrkwaton xà ata to hahkre, jũ mã quê ha ne Pahpãm jũrkwa xãm to ne hãm. Jirô pê mã ri Mojxe te Ixaher catêjê mã harkwa to:

— Pahpãm te imã me acaxuw harkwa hydr. Na ca ha me gãhcajrênti atajê, atÿj Pahpãm mã meampo jõi prãm, ne ampo itajê to ca ha hÿrmã me apa he, wakÿre prãti me, wakÿre prã jakare me, wakÿti tÿjti me, cupêhkàkukũmti, intepti, jakati, impejti atajê me, carã cahàcre kà me, pĩ caxwÿn tÿjti impejti atajê me, ihpóc xà caxuw pĩ xô cacô impêti atajê me, ampo cacô impêti cuxwati atajê me, wakÿre prã teptiatajê te hajÿar. Ne atÿj ajpên hÿrmã me to apa.

— Ne por Pahpãm te me anõ mã cute me amji jahkre pej jõi atajê cunea, quê ha ajpên ame pra, ne me cuprõ. NePahpãm te, cute ampo to me hàpên xà me mên atajê to, ame cumã apê. Cu ha Pahpãm mã

mehûrkwa nõ xãm, ne hanea ne pĩ to me hãmçjên xà nõ ata jÿjê, ahna cute me hapÿn xà caxuw, cu ha me to. Ne hãmçjên xà ita kam, por cute kên po kam, me pamã harkwa to ihhimpej xà te tej jirên, ne ahna ihhõc ata, cu ha caxwãm pê hir. Ne quê ha cupê Pahpãm te me pamã amji ton na, me pahte me ajpên par xà jãmçjên xà.

— Ne hanea ne cupêhkà impejti te Pahpãm jûrkwa caxwÿntête hahêr xà ata, cu ha me to, ne ahname hàpàn xà nõ me, me to, ne pĩ to mehÿjê, cute me hapÿn xà caxuw. Ne cô cuhhê xàitajê me, ampo jacrô cuxwati tocaxàr xà atajê mea mã, cu ha me to. Ne hanea ne hûrkwa caxwÿn nõ to cujro xà caxuw, cu ha hàhcujro xà nõ me to.

— Ne hanea ne Pahpãm mã me hàpên catêjêcunea kà impejti atajê me, Arãw kà me, mehkra kà mea mã, cu ha me cumã to. Hõ, me pajapên xà itajê cunea to, cu ha Pahpãm mã me — hajÿr.

Mã ma me hûrkwa wÿr ame ipicràn, cute ame cumã ampo jõr xà atajê wÿr. Ne por Pahpãm Carõ Pejti ata ri mehkrã caxwãm pê cute mecumã ampo jõr xà atajê to ihhimpej. Mã cute amencwÿr, ne ma hÿrmã me to amji jacjên. Mã pyjê kwÿ te cupêhkà ton jahkre pej atajê te me cupêhkàton. Mã pyjê kwÿ nõa te carà cahàcre kà to me cupêhkà. Ne me hõ pahhicatêjê atajê ri kên pràti itajê to me mõ. Neme hàhcajrëan kam me hÿmre mepyjê te Pahpãm mã me ampo jõr xà atajê to me mõ, ne me cumã hõr.

Me Cator Xà 40.34-38

Pahpãm ampo kà te ikre mã hàr ne kam ihkrĩ

40 Mã Mojxe te hàpên xà ata krã curan, me ajkaam mã ampo kà te Pahpãm jûrkwa te amjijipêj ne xa. Mã Pahpãm jõ ahcacrã te ikre pro, mã carõt jàhcujro teto hipu tu. Na quê nee Mojxe ahcacrã kam Pahpãm carõt jàhcujro ata mã hàr nare.

Pê ahcacrã ata ajco api ne mame cumã ipa. Pê Ixaher catêjê ajcome hõmpu ne ma ihkõt me ipa. Ne ajco pry kà te ikre ata to ma me ipa. Neahcacrã ata pê ajco ahtwÿ, pê cume mãa mã ajcome ahtwÿ. Ne amcro kam pê ahcacrãata ampo kà te Pahpãm jûrkwa cwÿrpê ajco harij, ne ahna caxwa pê ajco kam cuhy, ne ahcujro, Ixaher catêjê te amji mã me irĩt xà caxuw.

Hõhõ, me ipa xà ita to pê ajco me ipa, ne meahtwÿ. Ne ma Canãn jõ pjê mã me cator.

Pê Caku Te Cwarēnta

PÕTI KAM AME IPA XÀ

Ûuỹ, ihkàhhôc to incrê ita kam ri, Ixaher catêjêmã, Pahpãm te amji kam hapac xà intuw to me cumã hahkre xà. Cwÿrjapê ri ihkàhhôc ata japyrÿ te **Me Cumã Ampo To Hahkre Catêjê Jõ Kàhhôc** (Ampo To Hahkre Catêjê).

Ne ihkàhhôc te cwat ita kam ri, Mojxe te me pamã Ixaher catêjê te Ejit jõ pjê pñ, Canãn jõ pjê wÿr, põti ata kam me mõi na caku te cwarēnta name harēn. Ne hanea ne cute Ixahercatêjê cahyt ne me hàhtô na me hahkre pej. Cwÿrjapê ri ihkàhhôc ita japyrÿ te **Me Cahyt Xà Jõ Kàhhôc** (Me Cahyt Xà).

Jaco japyrÿ nõ pê Ixaherata kra xũmre te tôxi atajê tàmxwÿ tàmxwÿ ramã me hàhtô to mõi ne me hàmtàr tu. Ne ahpÿanre na menquêtjê pê me hakat japyrÿkôt me hakrã pit, ne cute me amji mã haprÿ jõi par to: Rupēn kra me, Ximãw kra me, Rewi kra me, Juta kra me, Ixaca kra me, Xepurõ kra me, Joje kra me, Pēnjamĩ kra me, Tã kra me, Naptar kra me, Cate kra me, Axer kra. Neme hakrã te tôxi atajê cunea pê Ixaher catêjê pit.

Me Cahyt Xà 13.1-33

Pê me hũcapi catêjê me Canãn jõ pjê pupu

13 Mã Pahpãm pê Pahhiti te Mojxe mã harkwa mēn ne cumã: — Jũmjê xũmre kujate, quê ite meamã Canãn jõ pjê jõi xà ata pupu. Ne ca ha ahpÿanre na me aquêtjê te me amji jakrã te tôxi atajê kam, ajpēn caxuw mehtàmxwÿpê me hõi pahhi to caprã ne mehkujate — hajÿr.

Mã cute me to cuprõn, ne me cumã harkwa to:

— Me pra ne me pjê pupu, jũ mã mõi mõi cute. Ne ma curi mehkrĩ catêjê atajê pupu, mõi mõi ajkĩ mehtÿj, nare, ajkĩ mehpeacre, ne mõi mõi ajkĩ mehàhtô, nare, mõi mõi ajkĩ mencre. Ne me pjê pupu, mõi mõi ajkĩ impej, kam me pajapēn xàcaxuw. Ne me krĩ pupu, mõi mõi intête kwÿc ne ajkĩhiehê, nare, mõi mõi ajkĩ hamãr xà atajê nõ hamreare. Ne me pjê ata pupu, mõi mõi ajkĩ ampeaj kam hõi to hakrãj, ne kam pĩ jãhtô. Ca ha amji to mehtÿaj, ne atÿj ajpēn me pjê ita jõ pĩxõnõ to me mõi, wa cukrê ne ihcãjpê — hajÿr.

Mã ma me mõi, ne cute me Canãn jõ pjê pupun, ne cute kam ame ipa to meamcro to cwarēnta. Ne ramã me mõi xàa kam, cuteme pĩxõ jãhtõa

ne me hirên. Ne ma me to amji jaxàr, ne me to cator. Ne cute Mojxe me, Arāw me, Ixaher catêjê mã ampo itajê cunea jarênpar. Ne cute me cumã pjê jõ pîxô atajêjôr. Ne me cumã harên to:

— Wa Canãn jõ pjê mã me icator, ne ite me hõmpun, mã impeajto impej. Ne ampeaj kam, kam mecumã me hõ, ne hanea ne kam pen ne kam pryti kà cacô jãhtô, ne kam me pîxô itajê pupu he.

— Ne ampeaj kam curi mehkrĩcatêjê tỳj, ne ampeaj kam krĩ itajê cati, ne ipu nakwỳcti itajê kàa to ihkà. Wa ite kam mehĩ to cute me krĩ mã hikretiatajê kwỳ pupun, mã ampeaj kam mehkà, ne me catia to mecati — hajỹr.

Mã cute me hũmre kujahêc atajê nõ japrỳ te Carep ata te mehcunea mãMojxe mã ihhi cuxêc na me ton, me kam mare mã, ne me cumã harkwa to:

— Hacme, ne me pjêita pytà! Ampo na? Cu ha pahtỳj me tohjê, ne me hirô pê xa, ne mehipej — hajỹr.

Mã mehkwỳ teme cumã, ne ahna me amji ton kam me cumã:

— Wỳr cu apu amji mã me hamã! Ampo na? He me pajirôa pê curi catêjême hhi tỳj, ne me cati. Ne pjê ata kamampeaj kam me hàprê catêjê jãhtô, ne cute mehipu tu. Na ri me imãa me ipê xycxycre pyrãac, ne hanea ne me cumã meipê xycxycre pit, ne me cumã me ikryjre — hajỹr.

Me Cahyt Xà 14.1-45

Pê Ixaher catêjê ma ame Pahhiti par caca

14 ¹Mã Ixaher catêjê cunea mehpec xà to cute mencwỳr kam mehtêm. Ne kỳj cati pêamã ame amrã, ne cute mencwỳar to me apê. ²Ne mehcunea te me Mojxe me Arāw cuna mã me cumã amji capêrkam mehtêm, ne me cumã:

— Wa nee pjê mã me paxàr xà ita kam ame ityc prãm nare. Wa rỳ mãcuria Ejit jõ pjê kam ame ty. Nare, wa põti kam me hamreare ata kamame ty. ³Ihhêj ne me pajõ Pahhiti te pjê ita kam mehkrĩ catêjêjõ krãhtare te me pajipej na, cama me hamãr xà caxuw ri cute me pahto cator. Ne quê ha me pahto hajỹr jirô pê mã, quê hacama me pahkra me, me pahprô amji to me cumã me hàpên catêjê. Na cu ha pahtỳjma hacpỳ mã Ejitjõ pjê wỳr me amji jaxà — hajỹr. ⁴Ne me ajpên mã harkwa to:

— Cu ha amji mã me pajõ pahhi tuw nõ xãm, quê ha hacpỳa mã me pahtoamji jaxà, Ejit jõ pjê wỳr — hane.

Pê Jojuw me Carep tee mehkwỳ mã apô

⁵Mã Mojxe me Arāw, Ixaher catêjê kam mare mã pjê kam mehpỳm, ne mehõpôrpo ne me nõ, mehpec xàhte. ⁶⁻⁷Mã cute me pjê pupun catêjê

pijakrut itajê japryê pê Jojuw, meCarep atajê me cute amji pê mehkà cokjêr, mehpec xàhte, ne mehkwyê mähjjarên to:

— Pom wa ite me pjê pupun ita peaj to impej. ⁸Cu ha me pajõ Pahhiti cajpuaw na, quê ha ihtjy me pamã pjê pejti ata gõ, cu ha pahtyjamji mã me hütà. Ne pjê ata kam me hõa to me hõ, ne ampeaj kam, kampryti to ipijapar xà me, pur caxuw impej. ⁹Nee ca amji tète ame Pahpãm jarkwa curê nare. Ne nee cuna mã ame acryc nare, ne nee ame, por curi amehkrí atajê cupa nare. Ampo na? Cuha me pahtyj me to cô, ne me hipej ne me hirõ pê xa. He me pajõ Pahhiti ihtjy amepahkõt ipa, ne cute me pahpãm cahac krekà pê mepahcurê xwÿn pytâr catêjê atajê cunea rên. Cwÿrjapê wa me amã, ca ame hÿpa nare — hajÿr.

Pê Pahpãm mã Ixaher catêjê jipej prãm

¹⁰⁻¹¹Mã me hàhtõtì atajê ajwar kën to ame capêr, ne to mehcuran prãm to pit mã amehcakõc. Mã Pahpãm carõt cati jàhcujrohti ata ampo kàte hÿrkwa mã Ixaher catêjê cunea te cuprõn ata wÿr iwrÿc, ne Pahhiti te Mojxe mã harkwa to:

— Me hàhtõtì itajê ma ame icurê! Ne cute me hajÿr ita kamri ihtjy amji caxuw me icyt to me ipa. Ne jÿ caxuw mãquê ha ajte, ite me kam ampo to amji to ipipêxà ita kõt me ijahkre pej, ne ikõt me amji to? ¹²Wa ha hà kën cunea to me kam icryc, ne ame to kën, ne ite me cumãampo jõr xà to ijÿjahkre ata xwÿjrea na mehipej. Ne akam wa ha quêt meto hàhtõ, quê ha mam itajê jirõa pê me atãmxwÿ itajê cunea me carõtjy — hajÿr.

Pê Mojxe Pahpãm mã mehkwyê cajrên

¹³Mã Mojxe te Pahhiti pê Pahpãm mã harkwa to:

— Jÿ mã quê ha Ejit catêjê cahhur me ita jarên pa, ne kam me amji cajpêr to? Ne ramã Ejit catêjê te acarõt tÿjti to me akwÿto acator ata na me gõmpun, ne me gahkre pej. ¹⁴Ne ma cute pjê ata kam me ipa catêjê mã me garên. Ne hanea neIxaher catêjê kõt apê me hõ Pahhiti te amõr na, ne hÿ na pire mãajpên mã me acakõc na me cumã me garên. Ne ihtjy me cumam ahcacrã kamapê me hõ Pahhiti te amõr na, cute me gõmpun. Neihtjy amcro me caxwa ri ahcacrã ata tecuhy na amji jahkre ne harij na, cute me hõmpun. ¹⁵Ne ca ha ate me akwÿ jipej pyrentu na, quê ha pjê ata kam, krÿxàrekwÿ me ahna me garên pa, ne me ahna amji mã me garên kën to, ¹⁶“He pê ihtjy me hõ Pahhiti me cumã pjê to awjahkre ata wÿrme to mõr cacrõ, nee cute amji mã hamãr, ne me to hàr nare. Cwÿrjapêri cute ahkêt mepõti jipõac ri mehcunea jipej” hane.

¹⁷⁻¹⁸— Na ca ha acarõt jàhcaprÿhti to me cumã ajpê, necute mehkên ton xà itajê to tojnõ, ne cama amã mehkinti ne. Ne pê ca ramã amji jarên to: “Imã me akinti ita kam, wa nee me akam icryc pyrentu nare, ne ca hame ate me ito kën, ne amji tète me ijarkwa curê jicu na, wa ha itÿjme ate

ito kên ita to tojnõ ne hicu. Nãmri ca ha me ate amji tète me icurêto me axãm ita na, wa ha itỳj hahpan xà na me akên mã me amẽ, me akra me, me atàmwxỳ mea mã” hane.

¹⁹— Na ite apar xàa na wa awỳ, pom hõtpê amã me ikinti rohnỳtti mã, ca atỳj cute mehkên tonitajê cunea to tojnõ ne hicu to hanea, pom ahnaa mã ca ajpên Ejit jõ pjêa rùm mehkên na me to tojnõ to mõi he, ita na ca ha ita kam me ito — hajỹr.

Pê Pahpãm Ixaher catêjê incrôn xà kêanre to me cucrõ

²⁰⁻²³Mã Pahhiti te Mojxe mã amji jarên to:

— Hã, wa ha itỳj, pom ate iwỳr xà ita na me ato, ne cute me ito kên itajê to tojnõ. Ne wa ha pa amji japyrà na me ahna amji to. Quê ha neejũ caxuw, por pê wa me hũmjê mã pjê to ijũjahkre xà ata mã me hàrnare. Ne põi kam me hamreare ata kam, quê ha mehtyc pa.

— Ampo na wa ha meto hane? Nee mã ampo na nare. He pê ramã me icarõt tỳjti jàhcujroitajê kwỳ na me ipupu. Pê wa ramã me cumã me hõ japyrỳ te mana itagõ, ne me cumã cõ gõ, mã ajte nee ite Ejit jõ pjê me põi ita kam me cumã ampoton xà itajê na, ito me amji japackre nare. Ne ajte cormã cute me icapi prãmte, icuna mã me ampokên ton to me tej to me ipa, ne nee me ijarkwa par nare. Ne por me ijarkwa par nareatajê, quê ha nee, por pê wa me hũmjê mã pjê to awjahkre ata mã, me hàrnare. Ne pom ma ame icurê itajê nõ, quê ha nee mehnõ pjê ata pupun nare.

²⁴— Ne pom imã hàpên catê pê Carep ita nare, ajteare mã quêt amji kampa, nequêt cute ihtỳj ipar xà cunea to ipar. Na quê ha ihtỳjcute pjê pupun ata wỳr axà, quê ha mehtàmwxỳ ihtỳj hakàn pê pjê atakam me ipa, ne kam me amji to ajpa.

²⁵— Ne apê quê ha ajte ma Amarec catêjê me, Canãn catêjê, por caprùm kam mehkri atajê japy, hacpỹmã põi kam hamreare ata wỳr me amji jaxà. Ne Cõxwatepti cajpuw quêha me mõi — hajỹr.

²⁶⁻²⁷Jirõ pê mã ri Pahhiti te hipêr Mojxe me Arãw mã hũjarên to:

— Jũ caxuw mã quê ha ajte cute me imã amji kõt harên jàhcàhhõn xitiitajê mã me hikra? Wa ite ramã cute imã me hàhcàhhõn na mempar, ne ahna imã mehkĩn nare. ²⁸Na ca ha me cumã ijarên to: “Ipê me gõi Pahhiti pê Pahpãm. Wa ha itỳj me amã, por me amã ampo cupahti na, ate me amji jarên ata to. ²⁹⁻³⁰Na ca ha me acunea põi kam me hamreare ata kam me atyc pa, por ramã me ana caku te winti jirõ pê atajê, ca ha me atyc pa. Ampo na? Meacunea te imã me gàhcàhhõn par, na ca ha me atyc pa, quê ha me ahkrare pit iteme cumã pjê to ijũjahkre xà ata mã me axà. Ne mehkà pijakrut japyrỳ teCarep me Jojuw itajê, quê ha mehkà na me ajkrut peaj ne mehkõt pjê ata mã me axà.

³¹— Ne me acunea te me akra pê, por Canãn jõ pjê kam me xa atajê mã, camame hàpên catêjê na ate me harên cacrõ, waha itỳj me hamã,

ne pjê ata wÿr me toicato, quê ha quêt kam me ipa. Ne ate me pjê kêanre na me harên ata kam, quêt ihcunea na me amji pupun pejti to me ipa. ³²Ne me ca nare. Quê ha me gĩ itajê ajhu ne ty, pōti kam me hamreare ata kam. ³³Ne quê ha me apê amji jahkre kêt, ca ha atÿj me akra me, pōti kam mehamreare ata kam me apa to me caku to me cwarênta. Ne me akôt quê ha meakra me amji pupun xà kêanreto me ipa, ne ate amji mã me ito ahimpej nare itakam, ca ha xa me acunea me atyc pa, jirô pê mã quê ha cormã me akrame, me atãmxwÿ pit pjê ata mã me axà.

³⁴⁻³⁵ — Ne ca ha me apê, por pê me pjê pupun catêjê atajê pyrãac, pême mōar to me amcro to cwarênta, jikjê na ca ha pōti kam me hamreareita kam ame apa to me caku to cwarênta. Ampo na? He wa ha ita caxuwme ato impej jicu, ca ha ame akên xà pytĩtiatajê to ame acuhkwÿr. Quê ha ahpyãanre na ate me ina ajpên par xàatajêa me gipej, pōti kam me hamreare ata kam. He ipê me gō Pahhiti, na wa iteame amã icakôc xà ita ton, na ca ha atÿj pōti itakam ame ty” — hajÿr.

³⁶⁻³⁸ Mã cute me tej te me pjê pupun catêjê atajê te me mōr tète mehcunea hi kwĩn, ne mehcunea to me hàhcahhôn xi, na ri mehtycxà kêanre kam mehcunea tyc pyrentu, me pajō Pahhiti kam mare mã. Mã Carep me Jojuw pijakrut peaj ne mehtiar na me hàhhuc.

Pê Mojxe tee mehwÿ mã me curê xwÿn cawpa

³⁹Mã Mojxe te mehwÿ mã Pahpãm jarkwa ita jarên, mã mehũpar xà ita kam amehpeacre, ne me cumã amji kĩn nare. ⁴⁰Mã amcro nō na iràrà na mehcunea jÿr, ne ma, por pjê kam awjarôto cute me cumã hũjahkre ata wÿr, cute me mōr na me ipyr. Ne cute me Mojxe mã me harkwa to:

— Wa itÿj ite me Pahpãm cuna mã me ikêanre na me amjipupun, na wa ha itÿj ita caxuw, por me pajō Pahhiti te me pamã pjê tohũjahkre ata wÿr me ikràr — hajÿr.

⁴¹Mã Mojxe te me cumã harkwa to:

— Ca rÿ mã mam me hane na mã, ca neeajte ate me Pahpãm par nare. Mã ramãahna ahtũm rytu, ne ramã hō amcro jirô pê ihpÿm ita kam, jũ wÿr ca ha curi me mō. Ca ha ita kam me ate me amōr na, ca ramãate me pajō Pahhiti pê Pahpãm jarkwa par nare. ⁴²Ne pom curmã ate amji kam me gapac xà jarên itajê, ca nee kam me toacrà nare, ne me hucu. Nãmri ca haate pjê kam awjarô ata pytãr prãm kam me to acrà na, quê ha me acurê xwÿn me atohamre. Ampo na? He me pajō Pahhiti pê Pahpãm nee me akôt mōr nare ita kam, quê ha ihtÿj me gipej. ⁴³Xà ca nee me Amarec catêjê me, Canãn catêjê to me amji japackrenare? He cormã me pahcumam me xa! Ca ate me pajō Pahhiti pê Pahpãm mãhikran, cwÿrjapê quê ha hanea ne me amã hikra, ne neeme apijapu xà kam meatehcajpar nare, quê ha me acurê xwÿn ihtÿj me acura — hajÿr.

⁴⁴Ne te Mojxe te me cumã me cawpa cakrô, mãajte ma me môr kam mençrã, pjê kam kënti atajê cajpuw. Mã curia me hakàn pê Mojxeme Pahpãm jãmçjênxã jàhhuc, mã me hàhtôa ne amũ me pra. ⁴⁵Mã kënti na Amarec catêjê me, Canãn catêjê mehkrĩ atajêmehwÿr me iwryç, ne cute me Ixaher catêjê curan kam mehtêm, ne mamehcuran to mō. Mã ma me hũpate mehprôt. Mã ihtÿj mehcuranto me mō, ne cute mehcuran itaa to, ma Horma jō krĩ mã me cator. Ne Ixaher catêjê cahhur te ma Mojxe kôt pōti kam me hamrearewÿr me amji jaxàr, ne kam ajco ame ipa.

Me Cahyt Xà 16.1-35

Pê Ixaher catêjê kwÿ Mojxe jũhhÿr prãm

16 Caku te cwarênta atajê nō kam, amcro atajê nō na me hũmre atajêjapry teCôre me, Tatã me Apirãw te Ixaher catêjê jō pahhi te me xêj pijakrut ne ihkôt xïncwênta me, me ajpênpar, cute me pahhi têtê me Mojxe jũhhÿr prãmte. Ne ma Mojxe meArãw wÿr me cator, ne cute me cumã me harkwa to hajÿr he:

— Nee mã me ijirôa pê acati nare. Pahpãm te Ixaher catêjêcunea capi, cute me to amji kwÿ prãmte, ne mepahcunea kam ihkrĩ. Ne mër ampo na mã ca atÿj ite me apar ita na, hãnne me imã garkwa jirê? — hajÿr.

Mã Mojxe me cumã:

— Xãmte icaxuw ate me amji kam me gapac xà te hajÿr? Hã, quê ha apê, quê ha Pahpãm irarã na me gō ikwÿ nō itajê mea mã, me amã cuteamji mã jũmjê capi atajêjahkre, ca ha me hõmpu. Ca ha apê na ajpên me Pahpãm wÿr me mō, wa ha hanea ne Arãw me hÿrmã mō, cu ha curia me ajpên cajpa — hane.

Mã apê mã Côre me, mehwÿ te xêj pijakrut ne ihkôt xïncwênta atajê me mō, neampo kà te Pahpãm jũrkwa na cute me cuprôn. Mã hanea ne Mojxe me Arãw me, mehwÿhajÿar ne harkwa ata jïkjê rùm cute me cuprôn. Mã me hàhtôa te me cuprôn ne cama amehcuhhê, ne ame ampote me to jũ mãn xà ata na ame hõmpu.

Mã pea Pahpãm carôt jãhcujrohti te mehcunea mã amji to ipipê, necute Mojxe me Arãw mã harkwa to:

— Me cupê me hawry, ne me haprã, nãmri wa hamehcunea jipej hiahpuro! — hajÿr.

Mã Mojxeme Arãw te Pahpãm cuna mã mehkôn krã na me hÿr, ne mecumã mehcajrên to:

— Me ijō Inxũ Cati, pê ca me icunea mãite amji kam ijapac xà ita gō. Xà ca ha mehũmre kên incrê peaj atajê kôt mehcunea jipej? — hajÿr.

Mã Pahpãm Mojxe mã harkwa to:

— Me cumã awjarẽ, quẽ me Cõre me, Tatã me Apirãw jõ pryre kà te ikre ita pê me ajcamẽ — hane.

Mã Mojxe xãm ne ma me hũmreitajẽ jũrkwa wÿr tẽ, ne cute mehkwy mã caràar kam hũjarẽn to:

— Me hũmre kêanre itajẽ jũrkwa pê me ajcamẽ, ne me hawry! Ne nee amehãhcukrẽj caxun ne amehcupẽn nare! — hajÿr. Mã pea mehcunea cator, ne me cupẽ me hũjawry.

Mã Cõre me Tatã me Apirãwme hũrkwa jarkwa mã mehkra me, mehprõ mea mãamehcuhhẽ. Mã Mojxe te mehcunea mã harkwa to:

— Ca ha ita caxuw me Pahpãmte pahhi na ixãm na me ijahkre pej to hane he. Quẽ ha pjẽ te catac ne me cumãipicapõn, mã kam me hũmre itajẽ te me ipijaxwÿr, mã cute mehkrẽr na, ca ha cormã Pahpãm te me gõ pahhi na ixãm na me ijahkre pej — hajÿr.

Ne cormã cute ihcakõc jicu me ajkaam mã Cõre me, mehkwy krac ri pjẽ catac ne me cumãipicapõn, ne kre catia. Mã kam Cõre me, mehkjẽjẽ me, me kõt cute me Mojxe jũhhyr prãm catẽjẽ me, mehpÿm. Ne hanea ne kam ampo cunea to me hõ tekjẽ atajẽ cunea pÿpÿm, ne mehtyc partu. Mã me ahna pjẽ pijapÿn. Mã ma Ixahercatẽjẽ mehkõt kre ata mã mehpÿpÿm cupate, ma me pra.

Mã kÿj rũm Pahpãm jõcuhy wrÿc, ne me hõ pahhi kwÿ te me xẽj pijakrut ne ihkõt xincwẽnta te Mojxe jũhhyr na me ajpẽnpar atajẽ cunea to caxàr tu, mã me hamre.

Me Cahyt Xà 21.4-9

Pê cagã me hàhtõa jipej

21 ⁴Mã ma Ixaher catẽjẽ te me mõi kam mencrà, ne cute me Cõxwatepti jõpry kõt, me Hõi jõ këntijakren. Ne ma Etõ jõ pjẽ pu na me ipijarõ prãmte me mõi. ⁵Mã amehpec ne nee hipẽr cumã me hikaj prãm nare, mã ajpẽn mã ame Pahpãm jarẽnto amehkẽanre, ne cute me Mojxe to me hajÿar, ne ajpẽn mã ame harẽnto kêanre, ne me cumã harkwa to:

— Ampo na mã ate põi ita mã, Ejit jõ pjẽpẽ me ito acator, ita ri me ityc xà itacaxuw? Ita ri ite me ampo krẽr xà hamreare, ne nee me ikõm xà hamreare. Ne ramã me imã kwÿr pê mana ita kãn nare — hajÿr.

⁶Mã Pahpãm te me hàhcahhõn xà kêanre atajahpan xà na, mehwÿr cagã jãhtõa ne kujahẽc, cute mehcãmzar prãmte. Mã ramã cute ame hàhtõa ne amehcãmzar, mã amehtyc. ⁷Cwÿrjapẽ ri ma Mojxe wÿrmehprõt, ne cute me cumã me amji jarẽn to:

— Wa ame amji pupun kêanre! Wa ite Pahpãm me, me acuna mã me ikẽn xà kêanre itajẽ ton, cwÿrjapẽ ri me ikẽanre. Na ca ha Pahpãm mã

acakôc, ne cumã me icajrën, quê meitête cagãti itajê to hawry — hajÿr.
Mã Mojxe te Pahpãm mã mehcajrën.

⁸Mã Pahpãm te Mojxe mã harkwa to:

— Wakÿre nõ to cagã, quê ha cagã xãhti itajê mehcãmxa, quê ha mewakÿre te cagã ita pupu, ne nee amehtyc nare — hajÿr.

⁹Mã Mojxe te Pahpãm jarkwa na wakÿre to cagã, ne me hipôc ri inxôr.
Mã cagã xãhti atajê mehcãmxa, mã me wakÿre te cagã ita pupu, ne hacpÿa mã mempej. Hamre.

Me Cahyt Xà 22.1-41

Pê cawrô cahàcre Parãw mã ihcakôc

22 Jirô pê mã pê Ixaher catêjê ramã Mowap jô pjê na me ahtêp. Mã Mowap jô pjê jô pahhi catêjê mãampeaj kam me hÿpa, mã cute me ahna hÿxy xiti japyrÿ te Parãw ata mên, mãr quê mencrôn xã kêanre to me cucrô. Ne cute mencrôn xã kêanre to mencrôn jahpan xã na, ihtÿj cute me cumã ihpore to hÿjahkre.

Mã Pahpãm te Parãw mã hÿjarën, quê nee me hÿrmã ihtêm nare. Mã Parãw ihtÿj apu Pahpãm ihtêm xã na ahwÿ. Mã apu kam incryc, ne cute mehwyr môr xã ita na to tojnô. Mã cute apu hõ cawrô cahàcre to hàhcuprôn, ne ma kam hÿr ne to tê, me hÿrmã.

Mã Pahpãm apu kam incryc, ne cute hÿrmã cõjkwa pîn cumã ipijapucate nõ kujahêc, cute cupê pry jahêr xã caxuw. Mã ma tê ne xa.

Mã cawrô cahàcre te mam Pahpãm mã ipijapu catê ata tepry kam wapo to hãm na hõmpun, ne hÿpate cute pry hyr. Mã Parãw te neeihkînte hõmpun nare, ne apu cawrô cahàcre cahhy, cute pry wÿr to amjijaxàr prãmte. Mã hipêr Pahpãm mã me ipijapu catê te kên te pry to ihkre pucre atawÿr ipicamên.

Mã cawrô cahàcre te hipêr hõmpun, ne tee apu hipêhahpan to hahkre, ne cute kên to Parãw par jaxôp. Cwÿrjapê ri hipêr apuihcahhy. Mã hipêr hÿrmã me ipijapu catê itapicamên, pry kre pucreata wÿr. Ne cute hahêr. Mãcatàtkre jamreare ita kam, jÿ na quê cawrô cahàcre ata mõ.

Ne cawrô cahàcre te hipêr me ipijapu catê ata pupun, ne hÿpateParãw to ihpÿm. Mã Parãw apu kam incryc ne hipêr pÿ cajrer to ihcahhy. Mã Pahpãm te cawrô cahàcre cakôc na mên, mã ihcakôc, ne cute Parãwcukij ne cumã harkwa to:

— Ampo to mã ite apê jÿ mãn, mã ca ajte ate icahhyr ita toincrê? — hajÿr.

Mã pea Parãw caràr ne cute harkwa to:

— Ampo na mã ca apu imã? Quê imã wapo na mã, wa ha ramã acuran hiahpuro — hajÿr.

Mã cawrô cahàcre cumã:

— Pom ipê gō cawrô cahàcre ita, neramã ite ato impej crire nare ita. Xà ita kam ite ijâpên xà tonita to ramã ajkĩ ite amji pyrãc tu? — hajÿr.

Mã cumã:

— Quê — hane.

Mã pea Pahpãm te Parãw mã into jahkjên. Mã cute amji cumam cōjkwa pĩn me ipijapu catê nō atapupun. Mã ramã wapohti to cute caxwÿr xàa kam xa. Mã Parãw hūpate pjê kam ihpÿm.

Mã Pahpãm mã ipijapu catêata te ihcukij ne cumã:

— Ampo na mã ate cawrô cahàcre cahhyr to incrê? Wa ita ri ite amji toacurê xwÿn ne xa, ne apu gahkre. Ampo na? Por ca jũ ri amõr xà wÿr mō ata, nee Pahpãm mã impej nare. Ca cama ate ame to kên prãmte, ca mō. Mãquêt mam cawrô cahàcre te ipupun ne ato hàhhuc, ne cute ato atyc xà jahpan — hajÿr.

Mã Parãw te cumãamji jarên to:

— Wa ajmãr itea amji kên mã amjimên, wa nee ite pry kôt amji cuna mã gahkre pej nare. Nequê imõr xà ita na Pahpãm pê ihkaj na, ca imã awjarê, wa ha nee imõr nare, ne ita ri ijũrkwa wÿr amji jaxà — hajÿr.

Mã cumã:

— Gapacta ne atÿj me hÿrmã mō, ne Pahpãm te amã ampo jarên itajêa to me cumã awjarê — hane.

Mã ma Parãw Mowap catêjê wÿr tẽ, ne curi cator. Mã mehõ pahhi Parac te cumã harkwa to:

— Ýuÿ Parãw, Ixaher catêjê jãhtôa to me hàhtô, ne imã mehūpaa to me hūpa. Cwÿrjapê ca ha Apãm Cati te me to hy xàa kôt me tohy, wa ha itÿj ate me to hy jahpan xà na amã ihpore catia ne cugõ — hajÿr.

Mã Parãw cumã:

— Wa ha caxi, pa me to hahkre, ne ijõ Inxũ Cati te me ahna imên xà kôt pit mã, wa ha me to hy — hane.

Me Cahyt Xà 23.1-30; 24.1-25

Pê Parãw tee mencrôn kēanre to hahkre

23-24 Mã ma Mowap catêjê jō pahhi pê Parac te Parãw japrõr ne to mō, ne kên na to hàpir. Mã ahpar mã, caprũm kôt, cute Ixaher catêjê jãhtôa ne me hõmpun. Mã cumã:

— Hamre, ca ha me hàhtôti itajê incrôn kam tẽ, ne mencrôn xà kēanreto me acrô. Ne me hũn xà kēanre to ame hũn, quê ha ate me hũn xà kēanre atajêa me to hy, ne ame to kēanre ne. Nehanea ne cōjkwa kam gōPahhiti wÿ, quê ha ame to kēanre ne, neme to hamre — hane.

Mã Parãw teharkwa to me cumãn kam ihtêm, ne me cumã:

— Mowap catêjê jô pahhi pê Parac te imã ihcakôc,
ne me ahna imên to:

“Ixaher catêjê itajê to kên kam tẽ” hajÿr.

Ne jũ mã wa ha ajte,

ne por Pahpãm mehkwy to impejti atajê to apu ihkên?

He ajteare mã me, ne ampeaj kam me hàhtô,

ne ihtÿj me ipicamên to me môr ita na.

Na wa itÿj mehkôat amji ton to prãm — hajÿr.

Mã Parac apu Parãw kam incryac to incryc ne cumã:

— Nãmri! Xà wa aracri ite amã ijarkwa to hajÿr? Mãr wa ite amã
me to kêanre na ijarkwa hyr ta! Nô na mã ca ate me to impejti ita to
apuacakôc! — hane.

Mã Parãw cumã:

— Jũ wÿr wa amjia kôt ampo to icakôc, por me ijô Inxũ Cati teijarkwa
to icakôc xà na imên atajêa to, wa ha icakôc — hane.

MãParac te hipêr ihcãjêr to ipijakrut xà ata wÿr to hàpir, ne hipêr
cute me to kên xà caxuw cumã harkwa hyr. Mã Parãw teamencrôn kên
to hahkre, ne nee cute mencrôn xà kên nô to mencrôn nare, necama
harkwa pejti to me ahna ihcakôc. Mã Parac apu kam incryac to incryc, ne
cutecumã hàmjôr nare, ne ma hürkwa wÿr, hüre kam ihkujahêc.

Me Cahyt Xà 35.6-34

Pê Mojxe me amji pytàr jô krĩ to mehhimpej

35 Pê Pahpãm Mojxemã harkwa ta, quê Ixaher catêjê mã harẽ ne
cumã:

— Ahtũmre quê ha, por ite mecumã Canãn jô pjê jahkre ata mã me
cato. Ne wa ha cormã me hàhcuran catêjê kôt amã harẽ, ne amã me
tohahkre. Ne ate me toamji pyrãc xà ata kôt, quê ha jũmamji pê hũkjê nô
cura, quê ha ihtÿj ihtyc ata jũkjê hanea ne cuteihcuran catê ata cura. Ne
quê ihhêaj to cute ihcuran prãm narekam ihcuran na, quê nee hahpan xà
na mehcuran nare.

— Cwÿrjapê ca ha me cumã garkwa ta, quê me krĩ to xêj ne me capi,
mãr quê cutemehcuran prãm nare kam mehcuran catêjê atajêkrĩ itajêa
mã me acjêj, ne kam me amxu. Jũ wÿr quê cute ihcuran ata jũkjê krĩ kam
ipimxur ata ri me pro, ne mehcura. Ne quê ha me cute mehçukij catêjê
mehkrĩ, ne mehçukij ne mehkôpĩr peajne, xà ajkĩ amjia kôt cute ihcuran,
nare, cute ihcuranprãm nare kam ihcuran. Mõrmõ ajkĩ cute ampo to jũm
jixôn prãm nare kam to hixôn. Quê cute nee jũm curan prãm nare kam
ihcuranna, quê ha ihtÿj mehcunea, cuteihcuran ata jũkjê pê, amji pytàr
xà na mehtehçajpa.

— Ne quê ha curia cute apu ipa na, quê ha ahnaaimã mehcajrën catêjê jõ pahhi ihwej ne ty. Jirô pê mã quê ha ihtÿjhapacta ne hõ krĩ wÿramji jaxà. Ne por amjia kôt mehcuran prãam kam mehcura atajê, quê ha cuteme harën catêjê me ajkrut, ne ajpëan kôt me harën na, quê ha ihtÿj mehcura, cute jũm curan jahpan xà na — hane.

MOJXE

Te Me To Ihhimpej Xà

Ÿuỹ, ihkàhhôc te xïc kam ri, Mojxe te Canãn jô pjê mã me hàr xà, ne hipêr cute me cumã cute me hapackre xà cunea jarên. Cwÿrjapê ri ihkàhhôc ita japyrÿ te CUTE ME TO IHHIMPEJ XÀ JÔ KÀHHÔC (Cute Me To Ihhimpej Xà).

Cute Me To Ihhimpej Xà 6.4-16

Hipêr cute me to ihhimpej xà

6 Ne pê Mojxe hipêr Ixaher catêjê to ihhimpej to:
— Ixaher catêjê, me ikampa, Pahpãm pê ri me pajô Pahhiti, ne taa mã ri pyxitpeaj ne cupê Pahpãm. Cwÿrjapê cu ha me pahna cuhkônrecunea me, me pahcaxwÿn cunea me, me pahcarôt cunea to, quê ha mepamã ihkîn, ne to pit mã amji kam me pajapac to me papa. Ne nee me Pahpãm ràn xà na, ame amji mã ampo kînnare. Ca ha atÿj, cute me acaxuw imã ampo na harkwa, wa ite me amãharên atajê to me amji japackre. Ca ha atÿj me pahkra mã harên xà itajê to me harê, ne me cumã to hahkre, ne hanea ne ikre kam me cumã toawjarê, ne ca ha hanea ne pô pê ame apaxà ata kam, atÿj me cumã awjarê. Ne caxwa ri ca ha hanea ne me gikwa xà wÿr amjimã me harê, ne hanea ne iràrà na me akrÿ pê amji mã me harkwa ita to awjarê.

— Pê Pahpãm me aquêjtê pê Aprãw me, Ixac me, Jaco mã pjê ita toawjahkrea na, quê ha ihtÿjita caxuw hÿrmã me ato mō. Ne me amã, por pê canee me krÿ catia ton nare atajê gō, ne ramãkam me amã ampo pejti te hipu hiahpuro. Quê ha meamã ate me kwa kwÿn nare atajê gō, ne me amã me ate me pixô pàr krenare atajê gō, ca ha me ku ne me togarte. Ata caxuw ca ha Pahpãm te, por Ejit jôpjê kam ateme amji pupun xà kêanre, mã cute ihpîn me ato cator na, ca ha atÿj me to amji japackre.

— Ne ame garte jirô pê, ca ha harkwa kôt ame apa, ne cumã pit mã me apê. Ne nee ca ame pahpãm cahàckrekà atajê kîn nare. Ampo na? Ca ha ate amepahpãm cahàckrekà atajê kîn, ne ihkôt ame amji kam gapac, ne me Pahpãm tiar ita mähikran na, quê ha hanea ne me Pahpãm me amã hikra. Ne ame akam incryac toincryc, ne ame ato kêanre ne. Ca ha ampo kên cunea kam me amji pupun xàkêanre atajê to ame amji pupu, ne kaam me gamre. Cupate ca ha Pahpãm kôt pit mã me apa, nenee pahpãm cahàckrekà to hipêr me amji japackre nare — hane.

Cute Me To Ihhimpej Xà 26.1-11

Pê Mojxe me cute Pahpām mā ampo jōr xà to ihhimpej

26 Pê ajoy Mojxe Ixaher catêjê japackre to hane he:
— Ca ha ma Pahpām te me amā pjê to hūjahkre ata wÿr me acato, ne curimehkrī catêjê tohjê, ne me hipej ne hō pjê kam me akrijirô pê, ca ha me gō pur ata kam mam ate me gō to mecuprôn atajê, Pahpām mā me agō.

— Ca ha kàhà kam me to hipu, ne ma Pahpām to me amjijapackre xà jūrkwā wÿr me to apa. Ne Pahpām mā mehcajrēn catê mā me agō, necumā me amji jarēn to hane he: “Ite Pahpām mā ampo jōr xà ita mā he. Cute pjê to imā hūjahkreata mā ito hār na, harēn xà mā he” hane.

— Quê ha Pahpām mā mehcajrēn catêkàhà na me gō atajê incwa, ne Pahpām mā cute me hō to caxār xà cuna mā me hūxwÿ. Ca ha me acuneaPahpām mā me acakôc to me hane he. “Pê me iquêtjê menchrê, ne Ejitjō pjê mā me axà. Ne ita caxuw ite me amji ràn ne me ijàhtôa to me ijàhtô. Ne ite ame amji pupun xà kêanre tome amji pupun, ca ate me ikam gapac, ne apatÿjti ita to ate me ito acator, pjê impejti ita mā. Jahpan xà na wa amāmam pjê impejti ita jō intuw ita to mō” hane.

— Jirô pê ca ha mecumā cre, ne ma me gūrkwā wÿr me amji jacjê, ne ame gâpàn xà impejtiatajê to ame apà, ne amekwÿ cunea kam me gakryti ne — hane.

Cute Me To Ihhimpej Xà 31.1-8 Me Cahyt Xà 27.15-23

Mojxe jaxà kam Jojuw pê pahhi tuw

31 Ne Mojxe te Pahpām mā ihcakôc ne cumā harkwa to:
— Me ijō Inxū Cati, pê ca me icunea mā ite amji kam me ijapac xà gō, na caha meicaxuw me akwÿ nō capi, ne to me ijō pahhi tuw na. Ne por me hūmre nō mā meipijapu kam me to ihhimpej jahkre pej ata pê, quê ha me ijō pahhi, mār quê nee me cupê me akwÿ pê carà cahàcrejamār catê nare atajê pyràc, ne amjia kôt ame ipa, ne me ipictor nare — hajÿr.

Mā Pahpām Mojxe mā:

— Jojuw pê Nūm kra ata, ca ha ihpa na me apy. Ampo na? He kaamri Icarō Pejti te hipu tu. Ca ha Erexā pê imā mehcajrēncatê ata wÿr to tē, ne mehcunea kammare mā me cuna mā ihkrā na gū xi. Ne cumā me caxuw cupê pahhi ita gō, mār quê mehcunea me kampa. Ne wa ha itÿj ite cumā icakôc prāmte, caxuwErexā pê imā mehcajrēn catê ata mā ijarkwā juwahi.

— Hõ, wa ha me to hajÿr to xa. Wa ha ampo na Jojuw mãicakôc prãm, ne mam Erexa mã icakôc, mãr quê ikampa ne Jojuw mãijarkwa jarê, quê ha Jojuw xwÿjê ma amũ mehwÿ mã ijarkwa toawjarê — hane.

Mã Mojxe te Pahpãm te ampo na mên xà ata ton, ne maJojuw japrôr ne ihpa na ipyr ne to mõ, Pahpãm mã cute mehcajrên catêjapry teErexa ata wÿr. Mã cormã mehcunea me xa ne me hõmpu, mã Mojxe te me kammare mã Jojuw krã na hũ xir, necute cupê me hõ pahhi xà caxuw cumã carôt jôr.

Cute Me To Ihhimpej Xà 34.1-10

Mojxe tyc xà

34 Ne Mojxe ihtyc xà wÿr pjê pupun prãmte, por Canãnjõ pjê cahê na kenti japry te Nepo ata na hàpir. Mã Pahpãm te cumãpjê ata jahkre, mã cute hõmpun, Kricuxwati me. Jirô pê mã ri Pahpãm cumã:

— Pjê ita pê wa Aprãw me, Ixac me Jaco tãmxwÿmã to awjahkre, ne ite amã hahkre. Ca rÿ cama ate hõmpun, ne ca, ca ha nee curi mehkôtacator nare — hane. Me ajkaam mã Mojxe tyc, mãcuria Pahpãm te jũ ri harêt. Mã neejũ ri Pahpãm te harêt xà ata najũm te hahkre pej, ne hõmpun nare. Pê Mojxe cormãirít peaj, ne cormãcarôt pê mentuaw carôt, ne ahna caku xëntiwinti pê ty.

Pê Ixaher catêjêMojxe xwÿ to hapac xà te mencwÿar to me putwrÿ pyxit. Pêmam pahhi cati to cute amji kam me hapac xà te hajÿr tũam, na pê me tohane. Mã Nũm krapê Jojuw ata te amji jahkre pejti, Pahpãm Carõ Pejti kôt. Ampo na? PêMojxe ihkrã incwÿrpê hũhkra pê, na pê cumã amji jahkre pej. MãIxaher catêjê ihtÿj me Jojuw kampa, por pê Pahpãm Mojxe mã ahnaaharkwa to ata na.

Rÿ jũ caxuw Pahpãm mã ihcakôc catê nõ pê Mojxe xwÿ pyrãc nare. Pom ahna mã me hõ ikwÿ nõ mã ihcakôc ita na, pê me Pahpãm ajco ihkuc ri cumã ihcakôc.

Krãhtare Jõ Pahhi Pê

JOJUW

ÛyÛ, pê Mojxe ty jakàn pê Jojuw pê Ixaher catêjê to ihmipej catê.
Cwÿrjapê ri ihkàhhôc ita japyrê te Jojuw Jõ Kàhhôc (Jojuw). Ne ihkàhhôc
ita, Ixaher catêjê te Canãn jõ pjê pê mam menquetti pê Aprãw xwÿ ata jõ pjê
to cute me amji pytâr, ne kam me ipicràn na, me pamã harê.

Jojuw 2.1-24

Pê me hücapi catêjê me Krícuxwati pupu

2 ÛyÛ, pê Canãn jõ pjê kam Krícuxwati ata quê ha mam me hütà. Mã pahhi pê Jojuw te me hümre to ipijakrut ne mehkujuhêc, cute me, por pjê to Pahpãm te me cumã hÿjahkre ata pupunprãmte. Mã me hümre itajê mahÿr xà ata pê me cator, ne ma me pra. Ne Cõpijapjêr jõ cô na meirêr, ne ma Krícuxwati ita wÿr me cator, ne ma harkwa na me hâr, krÿ wÿr, ne ma pyjê nõ inxyre japyrê te Rapekwÿj ata wÿrme tẽ, curi me hõt prãmte. Mã jüm te Krícuxwati jõ pahhi mã Ixahercatêjê xümre pijakrut te pjê pupun prãmte me cator na harên.

Mã krÿ jõ pahhi te me hÿrmã krãhtare kwÿ kujahêc, cute me hümre itajê pro, ne me hacjên prãmte.

Mã Rapekwÿj te ikre jimoac ri me to ipimxur. Ne cute krãhtare kwÿ atajê mã ihhêj, ne cumã:

— Ita ri me hümre pijakrut ne me cator, ne ma ramã me tẽ. Wa nee ite jÿ ri me mör xà na me hahkre pej nare ita kam, atÿjame hapê. Ca ha jÿ ri me cumã me acato — hajÿr.

Mã ma krãhtare kwÿ, mehcaprÿ kôt pra. Ne harkwa na me cator me ajkaam mã krÿ mãmencjêj xà jõ harkwa te amji jihê. Mã ma Cõpijapjêrjõ cô ri ihcaprÿ na ame hapê.

Mã Rapekwÿj me hümrepijakrut atajê nõr xàa kam me hÿrmã hàpir ne jÿ, ne ame cumã amji toihhimpej, ne cute me cumã:

— ÛyÛ, he wa ite me Apãm Cati te me amã pjê ita jör na ramã me gahkre pejtu. Ne ampeaj kam ri ame acupa. Ampo na? Pê wa Ejit jõ pjê pê me acator na me garên pa, ne hanea neme Apãm Cati te me amã cô jahkjên, ca ahna me arêr na me garên pa. Nehanea ne ramã ite, me ate Amorit catêjê jõ pahhi to me ipijakrut nemehcuran na me garên par. Cwÿrjapê ri

ampeaj kam me imã me acupa. Ampona ri ame acupa? He me Apãm Cati pê cõjkwa jõ Pahpãm, ne hanea ne cupêpjê jõ Pahpãm, na ri ame acupa.

— Ne ita caxuw ca ha me imã amji ton xãnõ to me amji ton hiahpuro, me Apãm Cati japrÿa na. Quê ha jũ caxuwme akwÿ me ijõ pjê ita pytà, ca ha atÿj ite me ato me atyc jahpan xà na me ijamã. Wa ha me acahê na ameipa, inxũ me, inxê me, pa me, me ikjêjê cunea me. Ampo na? Wa ha meatehcajpa, ca ha hanea ne jũ caxuw me itehcajpa — hajÿr.

Mã me hũmreitajê te me amji kam hapac, ne me cumã harkwa to:

— Ca ha ate ita ri me ipimxur na me ijarên nare na, wa ha itÿj me acunea pytà. Ne ite gũrkwa jahkre pej prãmte ca ha harkwa krare na pàrcuxê tepti nõ ata xõ — hajÿr.

Mã Rapekwÿj te me cumã harkwa to:

— Pom wa me amã ita. Me tẽ ne kënti atajê nõ na ca me amxu, ne curiaamji to me amcro to incrê, quê ha xa krãhtare kwÿ atajê hacpÿ ne meamji jaxà, ca ha cormã me akwÿ wÿr me tẽ — hajÿr. Pê hũrkwa kën te krí tẽte kwÿc ata jipya xa. Na ri cute põ rùm harkwa krare nõ atana pàrcuxêti xõr, ne ahna me iwrÿc na me ton. Mã ma krí pê ahna me iwrÿc, põ wÿr. Ne ma kënti nõ ita wÿr me tẽ, ne curia cuteamji to me amcro to incrê. Jirõ pê mã ri ma cõ na me irêr, ne ma Ixahercatêjê jÿr xà ata ri me hÿrmã me cator. Ne cute me hõ pahhi Jojuw mã ihcunea na me amji jarên par, ampo te jũ mã me ton xà atajê na.

Jojuw 3.1-17; 4.18

Pê ame Cõpijajêr jõ cõ na rê

3-4 Mã Jojuw te Ixaher catêjê cunea to Cõpijajêr jõ cõna hàhhuc, ne curia ame ipa. Mã me ahna amcro incrê, mã me toihhimpej catêjê atajê te ame to ihhimpej, ne me cumã:

— Quê ha Pahpãm mã mehcajrên catêjê Pahpãm jãmcjên xà to me mõ, caha me hõmpu, ne atÿj me hũnãr pyrentu — hajÿr.

Ne pê ma ajco me pĩ pote Pahpãm jãmcjên xà ata pupu, ne Pahpãm me cute me ajpên par xà ata to me amji japackre pyrentu. Mã Jojuw te me cumã harkwa to:

— Quê ha apê, quê ha Pahpãm carõt tÿjti ata to me pamã ajpê. Cwÿrjapê ca ha caxuw ame amji cãmpej to mempeaj ne, ate me amji kam gapac xà mea mã, mãr ca Pahpãm to pit mã me amji kampa — hajÿr.

Ne me ahna apê mã Jojuw te Pahpãm mã mehcajrên catêjê to ihhimpej, mam cutePahpãm jãmcjên xà ata to cõ wÿr memõr prãmte. Jirõ pê mã ri Jojuw te mehcunea mã hàkjêr ne me cumã:

— Ajpên me mõ ne Pahpãm te ihcakõc xà ton ata na me kampa. Ne ita kamca ha me Pahpãm tãr te me pahcahê na apu ipa na me hahkre pej.

PorPahpãm pê pjê cunea Pãm Cati ata jàmçjên xàa ri hãn ne me acumam ipa, cô na me parêrxà na. Na ca ha me Pahpãm jàmçjên xà ata pupu, ne me Pahpãm te mepahpytâr na amji ton xà ata to me amji japackre pyrentu. Quê hame hãmçjên xà to me ipa catêjê par cô kam ahtwỳ, me ajkaamquê ha cô ata me amã ajcapô — hajÿr.

Ne ta kam pê ita hane. Mã Còpijapjêr jô cô tàm te hipu tu, ne ihtu. Mã por me Pahpãm jàmçjên xà to me mō atajê te cormã cô kam mehparxãm, mã pea cô kỳj rúm ajpjê ata cunea pinkrên, mã ahpar mãihcatur cunea pijapjêr par, ne ihcajpuw amcrà.

Mã Pahpãm mã mehcajrêncatêjê atajê te hãmçjên xà ata to cô jipôc ri amcrà ata kam mehàhhuc, ne me to xa. Mã mehcuea rêr partu, hĩkjê mã, Krícuxwati wỳr. Mã Pahpãm mã mehcajrên catêjê hapu na me irêr, me ajkaam mã cô teipijapjêr kam ihtêm, ne ipijapjêr ta to ajpjê, ne cute hipu tu.

Jojuw 6.1-25

Pê Ixaher catêjê Krícuxwati to hamre

6 Pê ramã Ixaher catêjê cupate, Krícuxwati jô harkwati hihê, na pê nee jùm hàr nare, ne nee pê hanea nejúm cator nare. Ampo na? He ramã ajpên Ixahercatêjê me hàhtêp to mō, cute me krī ata pytâr, ne me to hamre xàcaxuw. Mã Pahpãm te Jojuw mã hũjarên, ne cumã:

— Imãa ramã Krícuxwati me, me hō krãhtare me, hō pahhi me, ramã mehamre tu. Ampo na? He wa ha me gũhkra mã me haxà.

— Ne ca ha ita caxuw me hane he. Quê ha me gō krãhtare catêjê cunea, amcro cunea kam krī itapu na me ipixêr to pyxit, ne ma hacpỹ mã me amji jacjê, me gÿr xà wỳr. Quê ha hanea ne imã mehcajrên catêjê te xet itajê, ijàmçjên xà cumam mehàkôr xà atajê to me ipa. Ne ca ha me hajÿr ita to me amcro to xêj.

— Ne amcro te xet ita kam, ca ha me apixêr cahhur to krī pu na me ajxê to mexet. Quê ha imã mehcajrên catêjê me hàkôr xà itajê cakôr tome ipa, ne cute mehcajôr jicu xà wỳr, quê ha mehcajôr kam me to incrà tune, quê ha Ixaher catêjê cunea kỳj cati pêa mã ame carâr. Me ajkaamquê ha krī tète kwỳc ata cunea apu ajxwỳ. Ca ha me acunea krī ata mãme axà, ne me hipej tu ne — hajÿr.

Mã Jojuw te Pahpãm mã mehcajrên catêjê me mehcuea to cuprôn, ne me to ihhimpej, ne me cumã:

— Ca ha nee cormã ne me anō acarâr nare, ne nee acakôc nare. Wa ha pame acarâr na me amê, ca ha cormã ame acarâr — hajÿr.

Ne me hō krãhtare catêjê cunea me, Pahpãm mãmehcajrên catêjê kwỳ Pahpãm jàmçjên xà ata to hãn ne krī pu na meipixêr to pyxit, ne ma hacpỹ mã me to ipa, me hÿr xà wỳr. Ne iràràna Krícuxwati pu na cute

me ipixêr to me pyxít, ne mame amji jaxàr, me hÿr xà wÿr. Cute me ita to hajÿar toamcro to xêj.

Ne me ahna amcro te xet ata kam ri, cutekrî ata pu na me ipixêr to xet. Ne me ipixêr jicu xàata kam ri Pahpãm mã mehcajrêñ catêjê te kÿj cati pêa mã amehàkôr xà atajê cakôr. Mã Jojuw te me cumã harkwa to:

— Ame acaràr! Pahpãm te me pamã krî ita jôr! — hajÿr. Me ajkaam, mãkÿj cati pêa mã ame caràr, mã krî tète kwÿc ita cunea apuipijaxwÿr, mã Ixaher catêjê cunea xàr, krî ata wÿr.

Ne cute mehcunea jipej, me hÿmre me, pyjê me, me ahkrare me, me hõ parxare mea mã.

Ne cute me hipej xwÿjrea na Jojuw te, por pê mentuw me ajkrut ne me krî pupun to me tẽ ata mã:

— Mãr ca me jÿm cahãj pê Rapekwÿj pijapít xyre ata to me amji japackre, porate mehkên pê me hÿtâr xà na me cumã amji tonata na. Me tẽ ne me haprô, me hÿmjê me, mehÿkjê mea mã — hajÿr.

Mã ma mentuw itajê ajwar me tẽ, ne cute me pâr cuxê tepti te harkwa krare na harij ata pupun, ne cute me jÿmcahãjre ata me, me hÿkjê me, mehcunea japrôr ne amji cahê na me cumãampo kà te hÿrkwa pyxwÿr.

Mã Ixaher catêjê te krî kam ampo atajê cunea to caxàr, ne kên pràtime, wakÿre pràti me, wakÿre te ampo run xà atajê ri, nee cute jÿ name ton nare, ne Pahpãm jarkwa kôt, ma ampo kà te Pahpãm to me amji japackre xà jÿrkwawÿr, ampo atajê cunea to me mō.

Hõ, ita na ri Jojuw te pyjê nō inxyre ita me, me hÿkjê cunea pytâr, pê mentuwjê me krî pupun to pra, pê mehtehcajpa na pê.

Jojuw 10.1-15

Pê Jojuw Pahpãm wÿ, pyt me putwÿr to ipinkrênprãmte

10 Pê Jojuw na mehkwy Krîcuxwati na kjêjê jipej jirô pê mã, hanea nekrî nō ita to me hamre. Na pêKrîpînkren jō pahhi, Jojuw te krî atajê jipej na harên pa, ne hanea ne cute Gipôm jō krî me, me ajpên mã mehō cō xãm na me harên pa, ne ampeaj kamcumã me hÿpaa to me hÿpa. Mã cute Amorit catêjê jō pahhi kwÿ wÿrharkwa kujahêc, ne me cumã harkwa to:

— Ajpên me pra ne ite me Gipôm catêjê jipej na me itehcajpa. Ampo na? Cute Ixaher catêjê pê me pahcurê xwÿn atajê me, me ajpên mãme hõ cō xãm jahpan xà na, cu ha me hipej — hajÿr. Mã pahhi texïc te Gipôm catêjê jipej na me amji par.

Mã Gipôm catêjê te amji na mempar, ne Jojuw wÿr me harkwa kujahêc to:

— Ajpên gÿjaréan kam tẽ, ne me ipê amã me ijàpên catêjê tehcajpa! Nãmri Amorit catêjê jō pahhi catêjê kwÿ ihtÿj me icuna mã me ipijapu

prãm, ne ramãajpên me hõ krãhtare to me iwÿr me mõi — hajÿr. Mã Jojuw ma Ixaher catêjê jõi krãhtare to mõi, cute Gipõm catêjê tehcajpar prãmte.

Mã Pahpãm te Jojuw mã harkwa to:

— Apu pa nare, wa ramã ite gũhkra mã mehcunea jaxàr, na ca ha atÿjmehcunea tohê ne me hirõ pê xa — hajÿr. Mã ma caxwari Jojuw hõ krãhtare to mõi, iràràtia na, ne cama cute me curê xwÿn itajê mã me ipikrar, ne amehpro. Mã Pahpãm te jũmã ame curê xwÿn itajê ton, mã ampeaj kam cumã me hũpaa to me hũpa. Mã Ixaher catêjê jõi krãhtare te me hàhtõa ne me hipej, ne mapry kõt mehkwy jahê, ne ihtÿj mehcuran to me mõi. Mã Pahpãm te këntite ta catia ne ihkujahêc, mã cute Ixaher catêjê jõi krãhtare jirõa pê me curê xwÿn atajê jipej. Ne cute mehcuran to pyt.

Ne cormã Jojuw jõi krãhtare ame curê xwÿn itajê jahêar kam, mã ramãpyt to mõi. Mã caxwari ma jũ kam, jũm tẽm cupate, Jojuw te Ixaher catêjê mã Pahpãm na hàhwÿr to hajÿr he:

— Me ijõ Pahhiti, pyt me putwÿr to ankrê, cõjkwa kam, mãr quê neeawcapàtkõ nare — hajÿr.

Mã pyt me putwÿr curia cõjkwa kam ajwar ipinkrên ne ajêt, mã ahnaa Ixahercatêjê jõi krãhtare te me curê xwÿn catêjê cunea jipej tu. Mã pytipinkrên itaa na ajêt.

Rÿ jũ caxuw amcro nõ pê amcro ita pyrãc nare. Ampo na? Cõjkwa kam pyt me putwÿr ita pinkrên ne ajêt, me hũmre nõpyxit peaj ata te Pahpãm na hàhwÿr na ri. Ampeaj kam Pahpãm pê Pahhitite Ixaher catêjê tehcajpar crire nare. Mã Jojuw me, mehkwy te me curê xwÿnjipej jirõ pê mã, ma me amji jaxàr, mehkrĩ xà wÿr.

Pê Jojuw mehkwy to ihhimpej to caku to hàhtõa. Na pê pjê ata cunea pytà ne to hõ tekjê, mehkwy caxuw. Na ri Ixaher catêjê te amji mã Canã jõi pjê kwÿ pytàr ne me cumã haprÿ to Ixaher jõi pjê. Mã ahpÿanre na me hakrã cunea te amji mã pjê ata to ipicokjêr par.

Pê Rewi kra nee mehkjêjê cuxà me amji mã pjê nõ pyr nare. Ampo na? Me cupê Pahpãm te amji kam hapac xà jũrkwa kam me hàpên catêjê, mehkjêjê cunea jaxà kam. Na pê mehkjêjê cunea ihtÿj me hõ to Rewi kra tehcajpar xà. Pê Rewi kra jaxà kam, Joje kra pijakrut pê Manaxê me Eprĩ me amji mã pjê kwÿ cwa. Na pê ahpÿanre na me hakrã te tõi atajê amji mã pjê ata to ipicokjêr par to hane: Ximãw jõi pjê me, Juta jõi pjê me, Rupên jõi pjê me, Pẽnjamĩ jõi pjê me, Tã jõi pjê me, Eprĩ jõi pjê me, Manaxê jõi pjê pijakrut me, Cate jõi pjê me, Ixaca jõi pjê me, Xepurõ jõi pjê me, Naptar jõi pjê me, Axer jõi pjê.

Ne pê cormã Jojuw me, me cupê prohti kam mehtĩar ajco me to ihhimpej to me ipa, na pê ihtÿj mehkwy mehkõt Pahpãm to me amji japackre. Ne pê Jojuw ihwej ne ty, pê pjê pê hõ pjêa kam me harêt.

ME TO IHHIMPEJ CATÊJÊ

Ûyũ, pê Jojuw tyc jakàn pê Ixaher catêjê cama amji pê Pahpãm pê Pahhiti to me hapac kêtto me mō. Cwÿrjapê ri ihtÿj Pahpãm te me ipu namehkrĩ atajê te me kam ihtēm na me hamã, mãr quê mehapu, ne ame to kêanre ne. Cwÿrjapê ri Pahpãm te me ahna me to ihhimpej catêjê kwÿ pyxwÿr, mãr quê me to ihhimpej. Na ri ihkàhhôc ita japyr te **Me To Ihhimpej Catêjê Jô Kàhhôc** (*Me To Ihhimpej Catêjê*).

Me To Ihhimpej Catêjê 6.1-4

Pahpãm na mehwÿ to ihhimpej catê pê Gitô

6 Hô, pê me hajÿr to mōar kam, ajmãr me pjê ata cunea pytà. Jirô pê mã pê cama Pahpãm to me hapac kêt to me mō. Pê Pahpãm hacpÿa mã amji wÿr me to ipipkjêr prãnte, ihtÿj me curê xwÿn jÿhkramã ajco me hacjê, ne me hÿrmã Mitij catêjê kujahêc to caku toxet. Pê Ixaher catêjê me hÿpate ma ramã krĩ pême cuto, ne kên kre kam ajco amehkrĩ. Neajco Ixaher catêjê me hō pur kam ahkre, pê ajco me hapôj ne mame cupê ampo to hàhkij partu, ne ma me to cuto, me hō parxare mea mã.

Cwÿrjapê ri Ixaher catêjê te hacpÿamã Pahpãm wÿr me amji jaxàr, ne amjitehcajpar xà na me ahna hàhwÿr. Mã amcro nô na Pahpãm te harkwato imprar catê nô na amji ton, ne ma Ixaher catêjê nô intuw japyr teGitô ita wÿr cator, ne cumã:

— Hàpà! Còjkwa kam Pahhiti pê Apãm Cati quê haamã acaxwÿn kam acarôt gō. Pahhiti quê ha ato ihhimpej, mãr ca Mitij catêjê jÿhkra pê Ixaher catêjê pytà — hajÿr.

Me To Ihhimpej Catêjê 7.1-8

Pê Pahpãm Gitô pê hō krãhtare to incri

7 Mã Gitô te impar ne ma tẽ, ne cute mehwÿ xÿmrejãhtôa to ajmãr mir te trĩnta ne ihkôt mir pijakrut ne me to cuprôn. Pê ramã mecaxuw, Mitij catêjê jô krãhtareme hirôa pê hàhtôa, ne kënti cahê na caprÿm ata kam me ahtwÿ. Ne pê me krãhtare atajêjãhtô, pê ihhêj rÿm peture jãhtô. Ne hanea ne me hō cawrô kô jarôtipe camer atajê hàhtôa, pê ihhêj rÿm pjênxôm carôt jãhtô, na quê nee jÿm me cahyt par nare.

Mã Pahhitipê Pahpãm te Gitõ mã me hũmre jàhtõa na me hõmpun, ne cumã harkwa to:

— Ampeaj kam amã me hũmre jàhtõ. Ne wa ha nee me hàhtõti itajê pijapuna me hamãr quẽ me ipijapu nare. Ampo na? Quẽ ha mehàhtõti atajê me ajpu, ne me cuteame amji pytãr na ihtỳj me amji cãmjĩ, ne me amji mã: “Me itea, wa meamji pytãr” hane. Cwỳrjapê ca ha ma hacpỳ mã ikre wỳr me hàprẽ nare, ne me capõnỳre, ne me cumã hũpahti atajê kujate — hajỳr.

Mã ma cute me mir te winti ne ihkõt mir pijakrut ne ikre wỳr me amji jaxãr. Mã cormã me hũmrete me mir te tej ne me hàhhuc, ne ramã me ipijapu xà caxuw ame amji cũmpej.

Mã Pahhiti pê Pahpãm te Gitõ mã:

— Cormã ampeaj kam amã me hũmre jàhtõ. Ma cõ mã me to mõ, quẽ ha ameikõ, wa ha cormã amã jũmjê atajê jarẽ — hajỳr. Mã ma cõ mã me tomõ, ne me iwrỳc, mã ame ikõ.

Mã Pahpãm te Gitõ mã hũjarẽn to:

— Por me cupê rop, ne me harkwa to ame cõ to ikõ atajê, quẽ ha ikre wỳr meamji jaxã, ne por me hũhkra na ame ikõ atajê quẽ hame ajpu — hajỳr.

Mã me hũmre te xěj crê peaj, ne me hũhkra na me cõ toikõ. Mã Pahpãm te me hõmpun ne Gitõ mã:

— Pom me hũmre te xěj crê itajêa to, wa ha Mitij catêjê jàhtõa atajê me ajpu, ne mehipej tu. Ne mehkwỳ itajê ca ha hacpỳa mã ikre wỳr mehkujate — hajỳr. Mã cute ikre wỳr me hàhtõti atajê kwỳ kujahêc. Mã cute me xěj crê peaj ne me hàhhuc.

Me To Ihhimpej Catêjê 7.15-22

Pê Gitõ jõ krãhtare incrẽre atajê me curê xwỳn jàhtõa jipej

Mã caxwa ata kam Pahpãm te Gitõ mã harkwa to:

— To jỳ, ne gõ krãhtare to mõ, me acurê xwỳn catêjê wỳr, ne me kamtẽ, wa ha me atehcajpa, caha me hipej tu — hajỳr. Mã Gitõ te hõ krãhtarena hàhwỳr, ne me cumã:

— Me to jỳ! Nãmri ramã Pahpãm te me pajũhkra mã Mitij catêjêcunea jaxãr — hajỳr.

Ne cute me to hakrã to incrê, ne ahpỳanre na mecumã me hàkõr xà jõr par, ne ihkõt me cumã pjẽ te cõ run xà caxwãm pẽcuhy põr atajê jõr par. Mã ma põ pê Mitij catêjê jãhhuc xà ata wỳr me to mõ, ne curi awcapãtkõ picapõn jirõ pê me cator, neme ahna me ipixêr. Ne ihprõt pê cute ame hàkõr xà cakõr, ne ame cõ run xà kam cuhy ihcuhê ne põr atajê cahhêc, mã krã, ihpõc xà jãhcujro. Mã cute ame carãr to:

— Pahpãm me Gitõ quê ha me gipej! — hajÿr.

Ne nee cute me kam ihtêm nare, ne cama mehkrã ne me to xa, ne ame hõmpu, ampo te jũ na ame ton xà ata na. Mã Pahpãm te jũ mã me curê xwÿn atajê ton, mã me taa amehprõt ne awcapàtkô kam me amji kwÿa cura. Ne mehcahhur ma me pra, me hõ pjê wÿr.

Hõhõ, pê Pahhiti pê Pahpãm hõ krãhtare to Mitij catêjêjipej to hane, ne Ixaher catêjê pytã. Pê Gitõ me to ihhimpej to cakujàhtõa, pê ajco ihtÿj Pahpãm kôt me ipa.

Me To Ihhimpej Catêjê 16.1-3

Me to ihhimpej catê Xãnxã

16 Ne pê Gitõ ty jirô pê mã, pê hipêr Ixaher catêjê Pahpãm to amji pê me hapac kêt, ne me cumã hikra. Cwÿrjapê pê Pahpãm me curê xwÿn pê Piritew catêjê te Ixaher catêjê jô pjê toihhimpej na me to tojnõ, mår quê ha me taa caku jãhtõakam me to ihhimpej.

Ne ajco amji to me curê xwÿn xà ata jô amcrokam pê Xãnxã pê Ixaher catêjê jõpahhi, ne me to ihhimpej ita to caku to winti. Ne ajco Piritew catêjê jãhtõa ne ihcura. Na pê Pahpãm me caxuw mehcuea jirõa pê hĩ kam cumã carõt tÿj catia ne cugõ.

Pê Xãnxã amcro nõ na, maPiritew catêjê jô krĩ nõ wÿr mõ, ne cumã hàr. Mã cute ahna me to me hõ krĩ jô harkwa jihê, ne ihtÿj curia cute amji to apê na amehcãmji. Mãiràrà na me curê xwÿn jô xũmre jãhtõa te me cuprõn, ne mehpro prãmte hÿrmã me mõ.

Mã Xãnxã naawcapàtkô picapõn, mã ma mõ ne cute krĩ jô harkwatiita hyr, ne impÿn, ne ma krĩ pê to cator nekenti nõ ita wÿr to mõ. Ne ahna to hàpir ne himoac kam cute hir. Hõ, cute harkwati ita hyr to hajÿr, ne Piritew catêjê jũhkra pê amji pytãr.

Me To Ihhimpej Catêjê 16.21-31

Xãnxã te amji curan xà kam, me curê xwÿn jãhtõa ne mehcura

Ne ahna caku te winti ita jicu xàkam ri Xãnxã te Pahpãm kôt amji ton jicu, cwÿrjapê ri Pahpãm te intête carõt tÿjti ata cuea caxàr, mã hacpÿa mã carõt peacre. Neihrõ ata pê ri Piritew catêjê kranõa, na ri cupê curê xwÿn, mã cute Xãnxãpro na mehkwÿ tehcajpar prãmte cumã ihhêj. Mãcute mehpro, ne wakÿre to mehcajpre, ne cute mento krÿn. Ne kenti te kwÿr kên xà ata na, cute me hãm, ne mecumã hê. Mã ihtÿj ihcuhê ne ame cumã to kwÿr kê.

Mã Piritew catêjê te Xãnxã proxà ita to me amji japackre xà to, cuateamji mã me amji kîn nõ ton. Ne mehõ pahpãm cahàc krekà japry te Tagõ ita to me catiprãmte, ame to ihcakôc pejti, ne meamji mã:

— Me ijõ pahpãm pê Tagõ te ita caxuw meijühkra mã Xãnxã jaxàr. Ne taa mãpê ramã me ikwỳ to kêanre, mã tapan me ijõ pahpãmte me ijühkra mã haxàr. Ajpên me iwỳr Xãnxã to mō, wa ame to ijapactu — hajỳr. Mãajpên mehwyr me to mō, ne pahpãm cahàc krekà Tagõ jürkwati mã kên teihcuhhê xàhti atajê cote na, cute me hãm.

Mã Xãnxã te me hõntuw nõ mã harkwa to:

— Ikre mã ihcuhhê xàhti itajê nõna ijühkra xi, wa ahna cupy ne kôt — hajỳr. Ne pê Tagõ jürkwati atato me hipu tu. Pê me to ihhimpej catêjê cunea curi mehkri. Ne hanea nekỳj rûm ihkre nõ kam, me hàhtô na me mir crê ne mejỳ, ne ahpar mã cute me Xãnxã pupun, ne ame hũn kêanre to prãmte pê me jỳ.

Mã Xãnxã te Pahpãm mã ihcakôc ne ahna hàhwỳr ne cumã:

— Me ijõ Inxũ Cati pê Pahhiti, itoamji japackre, ne hipêr imã icarôt catia ne agõ, wa to Piritew catêjê to apu kên, cute me ito krỳn jahpan xà na — hajỳr. Mã Pahpãm te hacpỹa mã cumã carôt catihti jõr. Mã cute carôt cunea to ikre mã ihcuhhêxàhti atajê mã quêat neihkujahêc, mã me hipu ihcunea pỳm, ne cute mehcunea jipej tu.

Ne pê ihtĩr reria mãajco me hàhtôa ne mehcura. Ne ita caxuw cuatea mehkôt ikre to amji curan xaa kam hàhhuc, mã cute mam mehcuran atajêjirôa pê mehcuran. Mã me ahna ahtũm nare mãme hũkjê cator, ne macute me Xãnxã na hàhwỳr ne me to tẽ, ne hũm cahêa na me harêt. Hamre.

RUTIKWÿJ

ÿuÿ, ihkàhhôc ita ri jûm cahãj cuprÿ japrÿ te Rutikwÿj pê Ixaher cahãjnare cahrô, ihtÿj Ixaher catêjê jô xûmre nô me hikwa na, me pamã harê. Ne cupê pahhi pê Tawi tocatyjre. Ne mehhimpej catêjê jô caku kam pê ita hane. Ne ihkàhhôc ita japrÿ te Rutikwÿj Jô Kàhhôc (Rutikwÿj).

Rutikwÿj 1.1-19

Rutikwÿj jarên xà

1 Pê Ixaher catêjê xûmrenô ita Pãw jô krî kam, Juta jô pjê kam ihkrî. Pê caku atajê kam, Ixaher jô pjê cunea kam, me cupê hõ hamreare. Cwÿrjapê pê ma Mowap jôpjê wÿr mentuw nô ita me hîxi japrÿ te Nomikwÿj ita me, mehkra xûmre pijakrut itajê mea mã, me antuw. Ne curia mehkri to me caku tohàhtôa ne ihtyc.

Ne pê ihtyc jirô pê, pê mehkra xûmre itajê ajwar me hikwa tuw. Ne mehprôatajê japrÿ pê Orpakwÿj me Rutikwÿj, ne me cupê Mowapjô pjê catêjê cahãj, na pê nee me cupê Ixaher catêjê cahãj nare. Nepê me ahna caku jûu mãn jirô pê mã ri, mempjê itajê ajwar mehtyc. Jakàn pê mã ri Nomikwÿj pijapit tehacpÿa mã Ixaher catêjê jô pjê pê Canãn jô pjêwÿr amji jaxàr na amji kam hapac. Ampo na? Pê ramã hacpÿa mã me cumã hõ na me harên pa, na pê apu amji jaxàr prãm. Ne Nomikwÿj te mewÿjxwÿ itajê mã harkwa to:

— Wa ha ma ijô pjêwÿr amji jaxà, ne me ca, ca ha ma hacpÿa mã me akwÿ wÿr me amji jaxà. Ne ramã iwej ita kam, ikra jû wa hipêr me amã cugô? Wa haate me ito impejti ita jahpan xà na, Pahpãm mã me acajrên, quê me ato impejti ne — hajÿr.

Ne cute me cumã amji jarên. Ne peamencre itajê cunea amji to me hapac xà te ame amjikam amrà. Mã Orpakwÿj te Nomikwÿj cahôr ne cumã amji jarên, ne mahûm me inxi jûrkwa wÿr amji jaxàr.

Mã curia quêt Rutikwÿj hÿprequêj nahàhhuc, mã cumã:

— Hõmpu he, ma ramã me anô te mehkwy me, me hõpahpãm cahàc krekã wÿr amji jaxàr. Ne ca, xà ca ha nee cuxã mehwÿr amji jaxàr nare? — hane.

Mã Rutikwÿj cumã:

— Nee ite gicu na apu iton nare. Ampo na? He wa ha jû ri amõr xà ata wÿr, hanea ne ikràr. Ne ca jû ri akrî prãm ata ri, wa hanea ne ikrî

toprãm. Ne me akwÿ itajê pê me ikwÿa, ne me gõ Pahpãm ita pê ijõ Pahpãm ri, na wa ha itÿj amji mã to ihmpej to ipa. Ne curi atyc xàata ri, wa ha hanea ne ityc prãm, quê ha curia me ijarêt — hane.

Mã Nomikwÿj cumã:

— Tahnaa, mër hacu — hane.

Ne ma ajwar Ixaher jõ pjê kam, Pãw jõ krĩ ata wÿr, cute me amji jaxàr, ne me cator. Mã mehcunea te amji mã me to ipikrar, cute cakujãhtõa kam me Nomikwÿj pupun nare na ri.

Rutikwÿj 2.1-20; 4.13-17

Pê Powa me Rutikwÿj hikwa

2, 4 Ne pê Nomikwÿj pê impjê ty ata jükjêxùmre nõ ita Pãw jõ krĩ kam ihkrĩ, ne pê ampeaj kam hakràj cati, ne haprÿ pê Powa. Mã amcro nõ na Rutikwÿjte hÿprequêj mã amji jarên to:

— Ito tojnõ wa mõ, ne jùm jõ pur kam, cute ame arÿjhy cupan mã pjê kamapu hikwa atajê to cuprõ — hajÿr. Mã hÿprequêj te to tojnõ, mãma mõ, ne nee cute Powa te pur to hõ tekjê na hahkre pejnare kam hÿrmã cator, ne kam apu arÿjhy to cuprõn to mõ.

Mã krĩ pĩn Powa cator, ne cuteme cumã me hàpên catêjê jõ pahhi cukij, ne cumã:

— Mër jùm cuprÿhti mã apumõ ita? — hajÿr.

Mã cumã me hàpên catêjê jõ pahhi cumã:

— Por Mowap jõ pjê pĩn, Nomikwÿj kõt jùmccator ata ri apu pjê kam arÿjhÿpÿpÿm atajê to cuprõn to mõ. Ne nee rÿ ihkõt nare, ne cute hàpên itakam to incrã tu — hane.

Mã ma Powa hÿrmã mõ ne cute cumã ihcakõc necumã:

— Ýuÿ, gapacta ne apu mõ. Quê ha ma me imã me hàpên catêjê me gamã, quê ha nee jùm apu acaxun nare. Quê amã kôr, ca gapacta ne mõ, ne imã me hàpên catêjê kôm xà kam cõkwÿ jaxà ne to ikõ — hajÿr.

Mã cute Powa mã harkwa to:

— He ipê ampo kwÿj cakrõ, ca ate ito kênre nare, wa ha ahnaamã — hajÿr.

Mã Powa cumã:

— Wa ite, ate apjên tyc jakàn pê aprequej to impejti na garênpar. Ne quê ha Pahpãm, ate aprequej to impejti ita jahpan xà na, atoimpejti ne — hajÿr. Ne ramã Powa jãpàn xàa kam hàhhuc, mã cute cumãhàkjêr ne cumã:

— Ajpên mõ ne me icahê na apã — hajÿr. Mã ma mõ ne cumã me hàpêncatêjê cahê na hÿr. Mã cute ihu jirõa pê hàpàn xà kam me cumãhõ xãm. Mã hàpàn jirõ pê, ma cute pur wÿr amji jaxàr, necute hàpêan to pyt.

Ne ma krĩ mã cute amji jaxàr, ne hũprequêjwÿr arÿjhy to mõi, ne cute cumã hõr. Ne hanea ne cute cumã me hõ to ihhi, ne to mõi ata jõr. Ne cute hũprequêj mã ihcunea naamji jarẽn, mã hũprequêj hũrên apu hakry, ne cutePahpãm pejti kĩnti na harẽn.

Pê Powa na ahtũm nare pê Rutikwÿj me hikwa. Pê Pahpãm me cumã ihkra xũmre japry pê Opet ita gõ. Pê Opet ata pê Tawi quêtti. Hamre.

Pahhi Catêjê Pê

XAWRÔ ME TAWI

Ûuÿ, pê Xamer pê Pahpãm jarkwa to ihcakôc catêjê nō, ne cupê me toihhimpej catê cahhur. Cwÿrjapê ri hō kàhhôcpijakrut itajê japrÿ te **Mam Xamer Jō Kàhhôc** (1 Xamer) ne **Hapu Na Xamer Jō Kàhhôc** (2 Xamer). Ne Pahpãmte Xamer te Xawrô pê Ixaher catêjê jō pahhi na hãm na hũjahkre. Ne ihkàhhôc ita hanea ne Tawi to ihcakôc.

1 Xamer 1.1-28; 2.18-21

Xamer pê Pahpãm jarkwa to ihcakôc catê

1-2 Pê Ixaher catêjê xũmre nō ita japrÿpê Ercãn. Ne pê ihprō ajkrutatajê japrÿ pê Anakwÿj me Penkwÿj. Pê Penkwÿj mã mehkra, ne Anakwÿj pêihkra nare, ne ihkreçrã. Pê ajco caku cunea kam Ercãn me, mehkra cunea krī cati nōwÿr me pra, Pahpãm mã cute me ampo jōr prãmte. Ne Ercãn pê ajco ihtÿjmehkra mã cute ampo jōr xà atajê gō. Pê ihkĩnte Anakwÿj pê ihkra nare, cute cumã ampo jōr xà na. Pê Penkwÿj ajco Anakwÿj curê to ipa, ihkranare kam, ne ajco cumãn kēanre.

Pê caku cunea kam ajco to hajÿr to xa. Pê Anakwÿj ajco nee hàpàn nare, necama ajco apu amrã. Pê Ercãn hōtpê ajco ihcukij ne cumã:

— Anakwÿj, ampo na mã ca apu amrã, ne nee gápàn nare, ne cama apu apec? Xàwa akra te tej xà jirôa pê ato impej xà ata na amã ikĩn nare? — hane.

Mã amcro nō na ma hipêr krī cati ata wÿr me mō, mã ma Anakwÿj ampo kà te Pahpãmto me amji kam hapac xà jũrkwa wÿr hàr, cute Pahpãm na hàhwÿr prãmte. Mã Pahpãm mã mehcajrên catê pê Eri ata jÿ, harkwa mã mencjêj xàna, ne Anakwÿj pupu. Mã cumã amji kĩn nare, ne ihpeacre, mã cute Pahpãm mã ihcakôc na cumã amji ton, ne cumã:

— Ûuÿ, cōjkwa jō Pahhiti carôt tÿjti ita, ca haate ipupun, ne ito amji japackre, ne imãikra xũmre nō jōr na, wa ha hacpÿa mã amã cugō, quê ha cupê amãhàpên catê rohnÿtti mã — hajÿr.

Mã Eri te harkwa kà pupun, mã ihtÿj amji cahhy, ne nee ihcakôc nare. Ampo na? Amji caxwãm pê Pahpãm mã ihcakôc na ri. Mã Eri apu ipipãn na ihcãmjĩ, ne cute cumãn to:

— Píxô cacô xÿre to akôm jicu! — hajÿr.

Mã cumã:

— Wa nee apu ipipân nare, ne cama ipeacre, na wa apu Pahpãm mã amji jarê, ne apu ahna ahwÿ — hane.

Mã Eri cumã:

— Hã, apej pêa mã mõi. Quê ha Pahpãm ihtÿj amã gâhwÿr xà itagõ — hane. Mã cute amji jaxàr. Jirõ pê mãri jũ mã me ahna amcro te, mã ma cute me amji jaxàr, me hõ krĩ wÿr.

Mã Pahpãm te cute ahna hàhwÿr xà ata to amji japackre, ne cumã ihkraxũmre ita jõr. Mã cumã ihpÿm, mã cute cumã haprÿ to Xamer, nehaprÿ ata kõt harên xà te “Pahpãm te ipar”.

Pê cormã Xamer incirre, na pê nee hacpÿ mã krĩ cati wÿr me to amjijaxàr nare to me caku to cwat. Jirõ pê mã ri ma inxi me hũm to mõi, porcuri Pahpãm to amji kam hapac xà jũrkwa kam, Eri apu ipa ata wÿr. Ne peaAnakwÿj te Eri mã amji jarên ne cumã:

— Ipê, por pê pyjê nõ hĩ cuneapeacre to Pahpãm mã ihcakõc, ne ihkra naahwÿr ata. Mã Pahpãm te imã ikra ita jõr, wa hacpÿ mã cumã hõr tomõ. Cute ita ri, hàpên xà ita to cumã hàpên ita kam ahnaa ihwej xà caxuw — hajÿr.

Mã Eri te Pahpãm mã, Anakwÿj me, impjên cajrên. Mã impjên me ajwarPahpãm mã increr jirõ pê mã ri cute me amji jaxàr, me hõ krĩwÿr, ne curia cute me Eri na Xamer juwahi. Pê Pahpãm hipêr Anakwÿj mã ihkra xũmre toincrê ne cugõ, ne cumã ihkra cahãj to ajkrut ne cugõ.

Pê Xamer ajco Eri tehcajpar to ipa, ampo kà te Pahpãm jũrkwa kam hàpên xà atajê cunea na. Ne ajco ihkà impejti to ihkà, pê inxi caku cunea kam, ajco cumã hitõ kàkrare to ipa, impjên pê Ercãn me ipa xà ata kam.

Hõhõ, pê intuwre ata to ipijapar to me hane, ampo kà te Pahpãm to me amji kam hapac xà jũrkwa kam.

1 Xamer 3.1-20

Pê Pahpãm Xamer cukij

3 Pê ramã Eri ihwej ne ajmãr into tũm, ne ramã into puror. Ne amcro nõ naramã hõt xà caxuw nõr. Mã Xamer ampo kà te Pahpãm jũrkwa kam nõ ne gõr, pĩ pote Pahpãm jãmcjên xà cahê na. Mã Pahpãm te Xamer cukij ne cumã:

— Xamer, Xamer — hajÿr.

Mã Xamer cumã:

— Ampo? — hane, ne ma Eri wÿr tẽ ne cumã:

— Ampo? Wa ramã ita ri xa. Xà ca apu icukij? — hane.

Mã Eri cumã:

— Hacpÿ mã amji jaxà, anõr xà wÿr. Wa nee apu amã ijãkjêrnare — hane. Mã ma Xamer te amji jaxàr.

Mã Pahpãm te hipêr ihcukij, ne cumã:

— Xamer! — hajÿr.

Mã Xamer hipêr hÿr ne ma Eri wÿr tẽ ne cumã:

— Ampo? Xà ca apu icukij? — hane.

Mã Eri cumã:

— Quê, wa nee apu acukij nare. Hacpÿ mã amjijaxà, anõr xà wÿr — hane. Mã ma cute amji jaxàr.

He pê cormã Xamer kam Pahpãm jarkwa hamreare, ne nee cormã Pahpãmjahkre pej nare. Mã Pahpãm te hipêr ihcukij, mã ma hipêr Eri wÿr tẽ ne cumã:

— Ca ate ampeaj kam imã gækjêr, na wa ramã acuna mã xa — hajÿr.

Mã Eri te Pahpãm te ramã apu Xamer tuwre ata mã hàkjêr na hahkre pej, ne toihhimpej ne cumã:

— Anõr xà wÿr tẽ ne kam nõ. Quê hipêr jùm acukij, ca cumã: “Pahhiti, pom ipê amã ijàpên catê ita, gapacta ne acakôc, wa ha itÿj akampa” — hajÿr. Mã ma Xamer te amji jaxàr ne tẽ ne nõ.

Mã Pahpãm te hipêr ihcukij, ne cumã:

— Xamer, Xamer! — hajÿr.

Mã cumã:

— Pahhiti, pom ipê amã ijàpên catê ita, gapacta ne acakôc, wa ha itÿj akampa — hane.

Mã Pahpãm cumã:

— Wa ha Eri na mehwÿ kam apu ampo to kêanre ne. Ne por pê waramã me cumã ampo cawpa, ata to wa ha mehwÿ cuneato hamre tu. Ampo na? He Eri kra xũmre ipijakrut itajê te ramã mehkên ton xà ita te ihhêj ne ramãamehtũmti. Ne ame to kêanre ita kam, jũ mã wa ha me to, ne hacpÿmã me to ihtetet? Ramã mehtũm ita te me hirô pê ihpÿm tu! — hane.

Mã iràrà, mã Xamer te Pahpãm te ampo to cumã hũjarên atajê cuneato Eri mã hũjarên partu.

Mã Eri cumã:

— Ita na ri Pahpãm mã me to prãm — hane.

Pê Xamer ihkà to mõi, pê Pahpãm pê Pahhitia ajco cape na apu ipa. Nepê mehwÿ cunea ihtÿj harkwa na me kampa. Ampo na? Pê ajco Pahpãmjarkwa to pit mã, me cumã ihcakôc, na pê ajco me kampa.

1 Xamer 4.1-18

Pê Piritew catêjê me amji mã Pahpãm jàmçjên xà pytà

4 Pê caku ata jõi amcro atajê nõi na, Ixaher catêjê me Piritew catêjêipijapu kam tõi. Mã Piritew catêjê te Ixaher catêjê jõi krãhtare

to mirte cwat ne mehcuran. Mã ma hacpỹ mã mehkwỹ te me amji jaxàr, por curi mehỹr xà ata wỳr, ne me cator.

Mã Ixaher catêjê pê prohkam cute meamji cukij, ne me amji mã:

— Ampo na mã me Pahpãm te me pahna Piritew catêjê jamãr, mã cute mepahkwỹ jipej? Hacme, ne me Pahpãm jãmçjên xà to ajpên me mõi, ne mame papijapu xà wỳr me to mõi, quẽ ha hãmçjên xà ata ihtỹj mepahcurẽ xwỳn pê me pahpytà — hajỹr.

Ne ma cute Pahpãm jãmçjên xà wỳr mehkujahêc, mã me cator. Mã Eri kra xũmrepjajakrut atajê te me ahna hàhwỳ ne ma me ipijapu xà wỳr me to tẽ.

Ne pê ihhêj ne Pahpãm jãmçjên xà ita to pit mã me amji mã mehhimpej, ne nee Pahpãm to amji mã mehhimpej nare. Ne hãmçjên xà to me cator pêê mã, Ixaher catêjê kỹj catipêa mã ame caràr, me hakryte.

Mã Piritew catêjê ihtỹj ame Ixaher catêjê jõ Pahhiti te me ipijapu na mehtehcajpar naame cãmji, ne ame amji mã hũpa. Ne hacpỹma mã Piritew catêjê te me kam ihtẽm, ne ihtỹj me hapu, ne mehcura. Ne cute me to mir te trĩnta ne mehcuran. Ne hanea ne cute me Eri kra xũmre itajê ajwar mehcuran. Mã mamehcahhur me hũrkwa wỳr me cupê ame pra. Mã Piritew catêjê ma me Pahpãm jãmçjên xà to me mõi.

Mã Ixaher catêjê nõ pyxit ne ma Eri jõ krĩ wỳr cumã hũjarẽn to tẽ. Ne ihtẽm ita kam cute ajkamhapac xà te apu amji pê ihkà cokjêr, ne apu amji tũm, ne Eri wỳrcator. Mã ramã Eri pry jahkà kam ihkrĩ xà ata na jy.

Mã hũjarẽn catê ata cator, ne cute cumã me ipijapu xà atajê jarẽn to hajỹr:

— Wa ita kam ma ajpên me ipijapu xà pê tẽ. Ne Piritew catêjê te mepahkwỹ jipej tu. Ne me akra xũmre atajê ajwar mehhi, ne Pahpãm jãmçjên xà te hajỹr, ne ramã ipictor tu. Ma Piritew catêjê te me hũtãr ne me to mõi — hajỹr.

Ne cormã jũm tuw ita te Eri mã Pahpãm jãmçjên xàjarẽn, me ajkaam mã Eri te amji mã ipikrar, ne ihkrĩ xà pê catuat toihpỹm. Pê ramã ihwej ne ampeaj kam hicot, cwỳrjapê pêcatut to ihpỹm, ne imput kwĩn pyrentu ne ty.

1 Xamer 9.1-27; 10.1

Pê Pahpãm mehkwỹ jõ pahhi na Xawrõ capi

9-10 Ne pê caku itajê nõ kam Ixaher catêjê xũmre nõ intuw ita japrỹ Xawrõ. Ne pêhĩ to impeaj to impej, ne mehkwỹ jirõa pê ihte ry ne ihhi ihtỹj.

Ne pê Xamer ata ajco Pahpãm kampa, ne ma mehkwỹ mãharkwa jarẽ. Ne pê mam ramã amcro nõ na, Pahpãm Xamer mã Xawrõ to ihcakõc, ne cumã:

— Piritew catêjê te ame ikwỳ pê Ixaher catêjê to kêanre, mãcama ame amrã, wa ite mempar ne imã me caprĩ xà. Cwỳrjapê wa ha amãjũm

xũmre kujate, wa ha me ikwỳ jõ pahhi catia na hãm xà caxuw. Ite ramã amji mã capi, mãr quê taa me hũtã — hane.

Ne pê amcro nõ na Xawrô pãm ata ma Xawrô me, cumã hàpên catê ita me ajwar ihkujate, por cawrô cahàcre pictor ata japên to. Pê ma Xawrô me hũm mã hàpên catê ita ame cawrô cahàcre japên to memõ. Ne ame mõi ita kam, Xamer me, cute me ajpên cajpar. Mã Xamer te Xawrô pupun, mã Pahpãm cumã:

— Pom hũmre ita wa ite amji mã capi, ne amã harên. Ne cupêa quê ha meikwỳ jõ pahhi, ne me to ihhimpej — hajÿr.

Mã Xamer te Xawrô me, hũm mã hàpên catê ata me ajwar cute me haprôr, ne ma amjikĩn cati nõ ata wỳr me to mõi, ne me to cator. Ne mehkrĩ xà impeaj nõkam cute Xawrô jÿr, ne hàwmrõ catê mã harkwa hyr, quê hõ nõ impeaj to hÿrmã mõi.

Mã Xawrô Xamer cahê na hàpàn, jirõ pê mã ri ma Xamer hũrkwa wỳr Xawrô to mõi, cute curi cahê na hõt prãmte. Ne caxwa ri jÿ neajpên mã amehcakõc, ne nõ ne me hõt. Mã iràrà na Xamer jÿr ne ma pãmã, krĩ pê, Xawrô to cator, ne cumã:

— Pahpãm te imã acaxuw ampo jarên xà ata ri, ite amã harên xà — hane. Ne cute ampo cacõ impêti, incoti itacaxàr ne ihkrã kam haxwỳr, ne to impê, ne me ajpên pỳn, mã cumã:

— Ampo na mã wa apu ato hane? Nee mãampo na nare. He Pahpãm te ri Ixaher catêjê jõpahhi na amji mã acapi, ne harkwa kõt wa apu ato hane — hajÿr. Ne ma me ipicapõn.

Mã Pahpãm te Xawrô mã cute amji kam hapac xà intuwti jõi, mã ihtÿjPahpãm kampa. Mã jũ mã ahna amcro te, mã cute pahhi na amji ton, ne caku jãhtõa kam ajco Ixaher catêjê to ihhimpej to ipa. Ne caku jãhtõakam, cute me curê xwỳn pê mehkwy jũtãr. Ne pê cute amji to cati prãmte, tàkamrÿ amji pê Pahpãm to hapac kêt to mõi.

1 Xamer 15.11; 16.1-13

Pê Pahpãm Xawrô jaxà kam pahhi na Tawi capi

15-16 Pê ajkĩ Xawrô nee Pahpãm jarkwa kõt ipa nare, ne amjia kõt ipa. Napê jũ mã ahna caku jirõ pê mã, Pahpãm te Xamer mã amji jarên to:

— Wa ite Xawrô to pahhi ita jũ na ri ipeacre. Ampo na? Nee iparnare — hajÿr. Mã Xamer mã amji kĩn nare, mã cutePahpãm mã Xawrô cajrëan to apê. Mã Pahpãm cumã:

— Wa ramã ite pahhi têtê Xawrô camên ita kam, Xamer, jũ caxuw ca hahũ na apec jicu? Ca ha ma ampo cacõ incoti ata nõ py ne to tẽ, Pãw jõ krĩ wỳr. Ne to acato, ne curi me hũmre nõ japrÿ te Jexê itana ahcukij,

nāmri ramã ite pahhi na amji mã mehkra nõ ata capi, quê ha jũ caxuw Xawrô tyc xà jirô pê ihtÿj haxà kam axà, ne amji topahhi — hajÿr. Mã cute impar ne ampo cacô incotiita pyr, ne ma Pãw jõ krĩ wÿrto tẽ ne to cator.

Mã curi pahhi catêjê te ihcajpar prãnte hÿrmã mepra, ne mehçukij to:
 — Hàpà ijõ pahhi! Ampo wÿr mã ca mõi? — hajÿr. Mã Xamer me cumã:
 — Hamreare, ite cama Pahpãm mã ampo jõr xà jõ amji kìn wÿr wamõ. Ne ate Pahpãm to amji kam gapac prãnte, ca ate to amji kamgapac xà itajê cunea to amji mã ahcuprõ ne to amji cümpej, neajpên ikõt amji kìnwÿr me mõi — hane. Ne ma cute Jexê jürkwa na hàhcukjêr, mã cute me cumã harên.

Mã ma hÿrmã mõi ne hàr, ne cute mehkra to cuprõn na mên, quê me to cuprõ, ne amehcümpej. Mã Jexê te mehkra to cuprõn, mãXamer te mam kà ita pupun, ne amji mã:

— Pom ita mõi mõi Pahpãm te amji mã capi — hajÿr.

Mã Pahpãm cumã:

— Hamreare, nee ipê me axũmre pyrãc nare. Wa nee mehkucupupun xà kõt, jũm te amjikam hapac xà na hahkre pej nare. Ne me hũmre ri mehkuc pupun xà kõt, hãnne cute amji kam hapac xà na me hahkre pej. Ne pa wa quêt me caxwãm pê, cute me amji kam me hapac xà kõt, mehahkre pej — hane.

Jirô pê mã ri hipêr Jexê te mehkra kwÿ pyxwÿr, Xamer kuc ri, mã ame ipa. Mã Pahpãm Xamer mã:

— Por wa ite amji mã capi ata, nee ita ri apu mõi nare — hane.

Mã Xamer te Jexê mã harkwa to:

— Xà ajkĩ me akra itajê pit? Nãmri Pahpãm te nee amji mã itajê nõ capi nare. Xãnee cormã jũm apu mõi nare? — hajÿr.

Mã Jexê cumã:

— Cormã intuwre japrÿ te Tawi ita pit apu mõi. Ne nee ita ri apu mõi nare, ma põ pê apucarà cahàcre jamãr to mõi — hane.

Mã Xamer cumã:

— Hÿrmã garkwa kujate quê me haprõ, ne me to cato. Cuha nee cormã ne me pajãpàn nare. Quê ha xa cato, cu ha cormã me apà — hane.

Mã Jexê te Tawi japrõr na harkwa. Ne pê ampeaj kam Tawi ata impej. Mã cute me haprõr ne me to cator, mã Pahpãm te Xamer mã harkwa to:

— Ita wa quêt ite amji mã capi he. Ne ihkrãa kam ca ha ampo cacô impêti, incoti ata jaxwÿ, cupê pahhi xà caxuw — hajÿr.

Mã cormã Tawiapu mehkjêjê cote na mõiãr kam, mã Xamer te ihkrã kam ampo cacô impêti ata jaxwÿr. Me ajkaam mã PahpãmCarõ Pejti te cupê pahhi xà caxuw cumã cute amji jahkrepej catia ne hõr, ajpên amcro teamji to hapu na kjê atajê caxuw.

1 Xamer 17.1-53

Pê Tawi Piritew catêjê jâprê xakat cura

17 Ne pê Piritew catêjê ajco hõ krãhtare to cuprõ, cute Ixaher catêjê wÿr me mõr, ne me ipijapu prãmtê. Pê Ixaher catêjê me Piritew catêjê ajco ajpên wÿr me ipa, ne ajpên jikjê na caprũam wÿr meahtwÿ.

Ne pê Piritew catêjê jõkrãhtare jõ pahhi nõ ita ihkãa to ihkã. Ne ihkã ita pê, ihhêj rümme ipijakrut te amji jikre kam mehcuhhê kã. Ne ampeaj kam ihtÿj nehãprê, ne haprÿ pê Gorijti. Ne ajco amcro cunea kam mehwÿ pê hapõj, ne ajco Pahpãm me Ixaher catêjê jõ krãhtare na, hàprãr xãato me cumã akij, ne me cumã:

— Wa ha itÿj Piritew catêjê kõt ajpu, ne me ca, ca ha amji mã me jũm xũmre japê, ne me capi, quê me akõt ajpu. Ne quê ha jũm icuranna, wa ha me icunea pê cama me amã me ijãpên catêjê. Nãmri wa ha ite jũm curan na, ca ha me acunea pê cama me imã me gãpên catêjê. Ampeaj kam wa me amã, ca ha me jũm xũmre ata mã me acato, wa haitÿj cume ajpu — hane.

Pê nee jũm Gorijti catihti ata me ipijapu naamji ton nare. Na pê amcro cunea kam ajco me ahna hàprãr to ipa.

Mã amcro nõ na Tawicuri cator, ne cute hàprãr xã ita na impar. Ne pê Tawi cormã intuwrecakrõ, amji mã harkwa to:

— Wa ha itÿj cume ajpu. Wa hãn ne apu inxũ jõ carã cahàcre hòhti jamãr to ipa. Mã hãn ne rop jõkre hòhti me rop tycti, ihkur prãmtehmã hapõj, wa itÿj ihcura. Na wa ha itÿj Piritew catêjê jâprê xakat ata to hanea. Ampo na? Cute Pahpãm tãar cuna mã ihcakõckêanre. Ne Pahpãm ihtÿj hãn ne ropti atajê pê ipytã, na quê ha hanea ne ihtÿjPiritew catêjê nõ ita pê ipytã — hane.

Mã pahhi Xawrõ te ita kam hapac, ne cama apu ajpên na Tawi me Gorijti jamã.

Mã Tawi tẽ ne caprũm kam cute kên crecrti to xïc ne incwÿr, ne hõ kên cjên xã kam incjên. Ne cute hõ kõtãre pyr, ne hanea ne hũhkrana hũcapêr xã pyr, ne ma cuna mã to tẽ, ne Gorijti me cute ajpên cajpar.

Mã Gorijti te incryac kam cumã carãr, ne cumã:

— Xã ipê rop mã ca ajpên pĩ ita to pitmã iwÿr tẽ, pahte to papijapu xã itacaxuw? Jũ wÿr quê ha cõjkwa kam Apãm Cati ita atehcajpa, ne ipãm cati quê haitehcajpa, wa ha apu ato kêanre ne — hajÿr.

Mã Tawi te cumã carãr ne cumã harkwa to:

— Ca ajpên gõ xwapo xwahhihti me gõ kruwxwa to tẽ, ne pa, wa quêtijõ Pahhiti carõt tÿjti pê Ixaher catêjê jõ krãhtarejõ Pahhiti jarkwa kõt awÿr tẽ. Ne itakam quê ha ijõ Pahhiti ijũhkra mã gaxã. Wa ha acura,

ne ihkôt akrã jakep, quê ha ampo kên te mehtyc kur xà atajê gĩ me, gõkrãhtare itajê jĩ pin partu. Quê ha krĩ cunea kôt mehcunea me ijõ Pahhitite Ixaher jõ pjê kam me cahê na ipana me hahkre pej — hajÿr.

Mã ahna Gorijiti jãhtêp. Mã hÿrmã Tawi picahur ne cute hõ kên cjên xapĩn, kên nõ pyxít ne caxàr, ne hũhkra na hũcapêr xà ata kamhir, ne kam to hũcapêr. Mã kên ita te Gorijiti kuc tÿj mã hàr, mãpjê kam ihkuc to ihpÿm. Mã Tawi te cupê hõ xwapo xwahhihti atacaxàr, ne toa inxec, ne to ihkrã jakep.

Mã Piritew catêjê te mehàprê xakat tyc na me hõmpun, ne ma ame prõt. Mã Ixaher jõ krãhtarete me cumã me caràr, ne ma mehkôt me pra. Ne pry kôt cute me cahuc. Neihtÿj ajpên pê mehcuran to me mõi, ne me haxôp to me mõi, ne cute me hõkría mã me haxàr. Mã hamre, pry kôt mehtyc me, me haxôp catêjê te ame hikwaati.

Pê Tawi Xawrõ mã me hàprê catêjê kam jũ mã amji to putwrÿto, ne ajco me curê xwÿn catêjê jãhtõa ne me hipej.

1 Xamer 18.1-11; 20.1-42

Tawi me Jônata

18, 20 Ne pê Jônata pê pahhi pê Xawrõ kra xũmre, ne Tawi me ajpên cajpa ne me ajpên pupu, ne me cumã ajpên kĩn hyre nare. Mã Xawrõ te Pahpãm te Tawi to ipa, mã mehcunea mã ihkĩn na, hahkre pej. Cwÿrjapê ri hũ na apu amji to prãm, ne apuTawi kam incryac to incryc, ne amcro cunea kam, kam incryc ita cumã ajcamẽ. Mã tee apu ihcuran to hahkre.

Mã Tawi te cupê amji pytãr, ne ma tẽ. Ne cute Jônata me ajpên cajpar, mã cute ihcukij ne cumã:

— Ampo to mã ite jũ na, mã apãm apu icuran prãm? — hajÿr.

Mã Jônata cumã:

— Hamreare, nee apu acuran prãm nare — hane.

Mã Tawi cumã:

— Quê! Ihtÿj icuran prãm! Ca ha hane ne hõmpu he. Apê quê ha putwrÿintuw jõ amji kĩn. Wa ijõtpe gũrkwa ri apà, ne apê wa ha ma põi mãicato, ne jũ ri amxu. Quê ha apãm ina acukij, ca ha cumã itêm caprÿ na, ito ahêj ne cumã, wa ma inxũ jũrkwa ri amji kĩn wÿr, Pãw jõ krĩ kam itêm na, ijarê. Quê ha cute ita na amji caxàr na, cu ha ramã ihcunea impeaj na hahkre pej. Nãmri quê ha cute ita na ikam incryc na, cu ha ramã cute icuran prãm na hahkre pej — hane.

Mã Jônata cumã:

— Imã inxũ tyc jakàn pê Pahpãm te ato pahhi na gahkre pej. Ne ipê pahhi kra cacrõ, wa ha nee ipê pahhi nare. Na wa ha ampeajkam amã

amji to, wa ha inxũ mã icakôc, quê ha cute apuakam incryc ne apu acuran prãm na, wa ha ma tẽ ne amã awjarẽ, ca ha hahkre pej, ne atỳj cupê amji pytà. Ne quê ha Pahpãm akôt ipato hanea, pom quê pê ajco inxũ kôt ipa he. Ne ca, ca ha cormã itĩarkam ito impeaj ne, ne ityc jirô pê, ca ha hanea ne me ikra to impeaj ne, Pahpãm te amji mã ato ihhimpej xàa kôt — hane. Mã Jônata me Tawite ajpẽn par pejti to hajỹr.

Mã ma Tawi tẽ ne põ kam ipimxur. Mã amji kĩn kam hàhhuc, mã Xawrô pêpahhi ata hỹr xà ata kam hỹr, ikre kat na pire mã. Mã hanea ne Jônatahũm cuna mã hỹr, mã Tawi jỹr xà kam caprỳ. Ne hipêr amcro nõ na, cormã hỹr xà kam caprỳ ita na. Mã Xawrô te Jônata cukij ne cumã:

— Ampo na mã nee ihnõ kam ajpẽn Tawi mör ne cute ampo krêr nare, ne itakam ajte cute hajỹar? — hajỹr.

Mã Jônata cumã:

— Tawi te iwỹr, wa ite to tojnõ mã ma Pãw jõ krĩ wỳr tẽ, me hũmjêwỳr. Curia quê ha apu amji kĩn ita toamji japackre — hane.

Mã Xawrô apu incryac to incryc necaràar kam cute Jônata mã harkwa to:

— Quê ha ihtĩar na ipa, ca ha nee jũ caxuw apê pahhi nare, ityc xàxwỳjrea na. Tẽ ne haprô, wa ha ihcura — hajỹr.

Mã Jônata te hũmjahkre pej, cute Tawi curan prãm na, ne ma me hàpàn xà pê incryac kamlãm ne tẽ. Ne nee hàpàn nare amcro ata kam. Ne amcro nõ na Jônata mapõ mã tẽ, ne cute Tawi me ajpẽn cajpar. Ne cute me ajpẽn cajpar xà atakam me ajwar me cumã amji kĩn nare, mã cama ame amrã. Mã Jônata te Tawi mã harkwa to:

— Cu ramã pahte ajpẽn par to impejti, na ca ha gapacta ne apej pêa mâtê — hajỹr. Ne ma Jônata hacpỹ mã krĩ mã cute amji jaxàr. Mã ma Tawi xwỳjê tẽ.

1 Xamer 24.1-22

Pê Tawi mã Xawrô caprĩ

24 Mã pahhi Xawrô ma Piritew catêjê me ipijapu to mõ, ne cute amji jaxàr. Mã cute me cumã Tawi te Engeti jõ põ kam apu ipa na harên. Mã Xawrô tekrãhtare impej to pit mãmir crê ne capi, ne ma hàhkà jakõtti nõ ita wỳr meto mõ, ne ame Tawi japê. Ne pea kên kre nõ ita mã me cator, mã kênkre ita mã Xawrô ihkwỳr prãmte hàr. Mã Tawi curia hanea ne hõ krãhtarete xêjxênta atajê to cute ipimxur ne to jỹ, mã nee Xawrô te me hõmpun nare.

Mã Tawi cahê na ame ipa atajê cama ame Tawi mã incryc tohahkre, ne me cumã harkwa to:

— Ita kam Pahpãm te amã acurê xwỳn ata jõr he, ca ha caa, ate jũ naton xà nõ ata na to — hajỹr. Mã Tawi te amji mã ihprĩ, ne aracri

Xawrôpê ihkà japjêhti ata kwỳ jakep, ne nee cute ihcuran nare. Mã Xawrô kên kre pê cator, ne ramã hũwryre.

Mã ihkôt Tawi cator, ne cute cumã caràr to:

— Hàpà, ijõ pahhi! — hajÿr.

Mã hÿrmã Xawrô pipkjêr ne cute Tawi pupun, mã cuna mã ihkuc to pjê kam ihpÿm, cute amji mã hũpahti to prãm to. Ne cute cumã caràr to:

— Ampo na mã ca apu ite acuran na, cute me amã ito ihhêj catêjê kampa? Ita kam ateatoa to amehhêj xi xà ita na me hõmpun he. Pahpãm te kên kre ita kamijũhkra mã gaxàr. Mã me ikwỳ acuran na me imã awjahkre, wa nee ite ita ton nare.

— Pê Pahpãm amji mã pahhi na acapi, na wa nee ite acuran nare. Ne ijũhkra kam ca rît ne kam akà ita kwỳ pupu he. Ite cama apê ihkwỳjakep, ne nee ite to gaxôp nare. Quê ha Pahpãm ajpên na pahpupu, cu ha pahnõ te ajpên to kên na, quê ha Pahpãmapu pahnõ to kên — hajÿr.

Mã Xawrô te cumã harkwa to:

— Xà Tawi ca mã ca? — hajÿr. Ne cama ihpahàmte apu amrã, ne hipêr cumã:

— Ijirõa pê apê me hũmre impejti nõ. Ampo na? Wa ite, ate ito impejti na, gahkre pej. Na ca ha atÿj jũ caxuw apê Ixaher catêjê jõ pahhi — hane. Ne ma Xawrô te amji jaxàr ikre wÿr. Mã ma põ kam, kên kre wÿr Tawi te amji jaxàr.

TAWI

Pê Pahhi Cati

Ÿũy, pê Xamer pê Pahpãm jarkwa to ihcakôc catêjê nõ, ne cupê me to ihhimpej catê cahhur. Cwÿrjapê ri hõ kàhhôcpijakrut itajê japrÿ te **Mam Xamer Jõ Kàhhôc** (1 Xamer) ne **Hapu Na Xamer Jõ Kàhhôc** (2 Xamer). Pê pahhi Xawrô tyc jakàn pê ri Tawi pê Ixaher catêjê jõ pahhi. Ne pê mam cupê harã catêjê jõ pahhi, ne ita caxuw hanea ne cupê kÿj catêjê jõ pahhi. Nepê pahhi cunea jirôa pê Tawi mã Pahpãm jahkre pej, na pê ajco cumãihcakôc, ne cumã mençrer xà na ihhõc.

1 Xamer 31.1-6; 2 Xamer 5.1-5

Tawi pê Pahhi tuw

31 Mã caku nõ na Piritew catêjê hipêr apu Ixaher catêjê japu, nemehcuran to mõi. Mã Ixaher catêjê jõ krãhtare kwÿ ma me pra, mã Gipôw jõ kenti na, cute hipêr mehwÿ curan. Ne Piritew catêjê te hanea ne pahhipê Xawrô me, mehkra mea mã mehkra, ne cute me hipej prãnte me kam mehtêm. Ne cute me Jônata me, mehkjêjê curan ne me Xawrô caxwÿr neme haxôp, ne ma me pra, ne ihtÿj ihtyc na amji mã me to hane. Mã ihtiarçormã nõ, ne cutea hõ xwapo xwahhihti to amji curan ne ihtyc.

Jirô pê mãri ma Tawi wÿr, Ixaher catêjê jakrã jõ pahhi catêjêcunea me pra, Heprôm jõkrĩ kam, ne cute me cumã amji jarên to:

— Ipê me akwÿa wa me, pê Pahpãm ramã apê pahhi na ato ihcakôc. Na caha apê me ijõ pahhi, ne ma me ijamãr catê na amji to — hajÿr. Mã Tawi te Pahpãm kam mare mã, mehwÿ mã amji to ihhimpej to intuw, mã cute me toIxaher catêjê jõ pahhi. Pê Tawi me to ihhimpej ita to caku to cwarênta.

2 Xamer 6.1-19

Pê Tawi hacpÿa ne Pahpãm jãmcjên xà to amji jaxã

6 Pê rÿ pëa mã Piritew catêjê ma me hõ pjê wÿr pĩ pote Pahpãm jãmcjên xà ata pytà ne mame to mõi, pê curia ihcuhhê. Cwÿrjapê pê

Pahpãm Piritew catêjêkam incryc, ne ajco ameto kêanre. Ne jũ mã me to, pê ame amji pupun xà kêanre to ame amji pupu.

Cwÿrjapê ri Piritew catêjê te hacpÿa ne Pahpãm jàmçjên xàkujahêc, Ixaher catêjê jô pjê wÿr. Mã hãmçjên xà ita Apinatapjÿrkwa ri hàhhuc. Jirô pê mã ri Tawi, ma ajpên Krÿpinkrên wÿrPahpãm jàmçjên xà ata to môr prãm. Ne cute krãhtare impej to pit mã mir te trinta ne ma me to ihhimpej to mō, hãmçjên xà ata wÿr.

Pê Pahpãm rÿ pêa mã hãmçjên xà to ipa xà to ramã me cumã hahkre. Quê nee ihtÿj amehcupên nare, ne nee cawrô jô kàhà kam me to ipa nare. Ne me to ipa catêjê atajêa, quê ha me cumã pÿ jacjê, ne me hikre kam me to ipa.

Mã nee Tawi te ihhimpej xà ata kôt, hãmçjên xà ata to môr nare. Ne me to ipa xà ata kaj na hacpÿ ne me to mō. Ne cute pryti jôkujti intuw nō kam me hãm, ne ma me to mō. Mã Apinatap kra pijakrutitajê mam pryti jô kujti to mehhimpej to me mō. Mã hapu na Tawi me, mehkwy cunea me, me mō, pryti jô kujti kôt. Ne Pahpãm kam mare mã amehakrya to ame hakry, ne cama ame hàkôr xà atajê cakô, ne ame cre.

Mã pryti te amji tōc, mã Apinatap kra ata te hũhkra to Pahpãm jàmçjên xà juwahi, ihpÿm cupate. Mã Pahpãm kam incryc pyrentu. Ampo na? Cute me hãmçjên xà ita cupên xà hamreare, na ri apu kam incryc, mã ihtyc pyrentu.

Mã Tawi mã Pahpãm cupaa to hũpa, amcro atana, mã cute amji mã harkwa to:

— Jũ mã wa ha Pahpãm jàmçjên xà ita to, ne krÿ mã to mō? — hajÿr. Ne ma Opet jÿrkwa wÿr to mō, ne cute curia huwahi, mã hàhhuc ne ahna putwry incrê. Mã Pahpãm te Opet na mehkwy cunea to impej, hũrkwa kam hãmçjên xà jàhhuc ata jahpan xà na.

Mã Tawi te ita par, ne hacpÿa ne cute amji jaxàr, ne ma hō krÿ wÿrPahpãm jàmçjên xà ata to me mō. Ne ita caxuw nee pryti jô kujti kam meto môr nare, ne quêt Pahpãm himpej xàa kôtme hikre kam me to mō, ne amji mã me hũpahti to mō. Ne cute me to môr xà ita kamme pryti me, carà cahàcti hòhti jãhtôa ne me to caxàr, cute me to Pahpãm cajpuaw prãmte.

Mã Tawi mã amji kÿan kam Pahpãm kam mare mã hàkrun to mō. Ne hanea neame hàkôr xà cakô, ne krÿ mã me to cator. Ne cute Pahpãm to me amjikam hapac xà jÿrkwa kam, me hãmçjên xà ata xãm. Ne cute hipêr pryti nō curan, ne me to caxàr, ne Pahpãm mã me hōr. Ne cumã mehkwy cunea cajrên, quê me to impeaj ne. Ne mehcajrên jirô pêmã ri cute ahpÿanre na me cumã kwÿr te pro me, pÿxô pijakrut crà ata jôr. Mã ma ame cahkũm, mehũrkwa wÿr. Mã ma Tawi te hũrkwa wÿr amjijaxàr, cute mehkra cajrên prãmte.

Ne pê caku jàhtôa kam Tawi pê pahhi, ne cupê hõ kràhtare to ihhimpejcatê impeaj. Ne ajco amji na mehkwy to cuprõn tu, ne Pahpãm jarkwa kôt me ipu na krìxàre catêjê cuneame, me ajpu. Ne ihtỳj ajco catyt kam Pahpãm kôt ipa, ne ihtỳj amji kôtmehkwy cunea Pahpãm wỳr to apkjê.

2 Xamer 11.1-26; 12.1-19

Pê Tawi ihkên to

11-12 Pê Tawi pê pahhi na ramã caku jàhtôa, ne ramã hakràaj to hakràj, ne cumã ampo pej hàhtôa to hàhtô. Mã amcro nõ na, ramã pyt pec kam, Tawi tepyjê impejti nõ pupun, ne ihtỳj to ihpahàm nõ prãm. Ne ramã impjêa kam ri, ahnaa cute haprõr ne apu cume gõr, mã kaam ihkra.

Mã Tawi te amji mã huwahi prãmte, ma me ipijapu xà kêanre wỳrimpjên pê kràhtare ata kujahêc, mâr quê ahte ajpu ne ty. Ne cute impjên kujahêc, mã jùm te ihtehcajpar nare kam ipijapu ne ihtyc. MãTawi te amji wỳr hìxi na hàhwỳr, cahê na hàhhuc prãmte. Mã ahnaahtùm nare mã cumã ihkra pỳm.

Mã Pahpãm mãa Tawi te ampo ita ton xà ita kêanre, cwỳrjapê ri cute hỳrmã cumã harkwa to ihcakôc catê nõ kujahêc. Mã hỳrmãcator, ne cute Tawi mã hỳjarên xà ita to hỳjarên to:

— Pê krì nõ ita kam, me hùmre me ajkrut, ne pyxit ita jakràj, neihnõ ita pê ihkĩnte hamreare. Ne hakràjti ita mã ampeajkam pryti, ne cumã carà cahàcre hòhti hàhtô. Ne cupê hamreare itapê cumã carà cahàcre hòhtikrare incrive ita pyxit peaj, pê ajco to ajpa. Pê ajco ikrea kam mehkra cahê na apu ipa, ne curia gõr, ne mehcunea mã ihkĩnti.

— Mã amcro nõ na jũa rùm memprar catêjê kwỳ cator, hakràjtiata jũrkwa ri. Mã cute me cumã harte xà caxuw neecute hõ pryti me, hõ carà cahàc hòhti nõcuran nare, ne cute cupê hamreare ata pê hõ carà cahàcreincrive pyxit peaj ata curan na me mên. Mã cute mehcuran, ne me to hàr, mã cute mehkrêr — hajỳr.

Mã Tawi te hỳjarên xà ita par ne apu incryac to incryc, ne cute Pahpãmjarkwa to ihcakôc catê ita mã harkwa to:

— Ampeaj kam wa ha amã awjarê, pom hùmre jakràjti te ita ton ita, ihtỳj cute mehcuran xà. Quê ha carà cahàcrepyxit jahpan xà na, to cwat ne ahna amgõ — hajỳr.

Mã cute Tawi mã:

— He apêa ri jùm xùmre ata! Ne atea ca ita ton. Ita caxuw ca ha Pahpãm jarkwa nakampa he. Cute garên to hajỳr he: “Wa ite ato Ixaher

catêjê jô pahhi, ne ite acurê xwÿn Xawrô xwÿ pê ato ipimxur ne apytâr. Ne ite amã gÿrkwatôn, ne amã me aprô jôr, ne hipêr amã ampo jôr.

— Ampo na mã nee ateamji mã ijarkwa itajê cupa nare, ne ikam mare mã apu ampo kên itajê to? Ca ate impjên curan na me mên, mã cute mehcuran, ca ate cupê hÿxi togàhkÿj. Cwÿrjapê ca ha ita caxuw gôtpê me akwÿ me, me apijapu to me apa.

— Ne ca nee ate amji mã ijarkwa par, ne amji mã hÿpa nare, incwÿrjapê quê ha me akra atajê kôt me awÿr ampo kên cato. Ne quê ha acunamã me amji kam hapac to me hanea, pomquê ate ton he. Ne quê ha ihtÿj jÿmjê apê me aprô to ahkÿ. Ne quê ha ihtÿj mehcuea cute hajÿr xà ita na me hahkre pej” — hajÿr.

Mã Tawi te Pahpãm jarkwa to ihcakôc catê mã harkwa to:

— Ampeaj kam, wa ite Pahpãm cuna mã ikên xà kêanre ita ton — hajÿr.

Mã cumã:

— Pahpãm te ihtÿj akên ita to amã impej ne to tojnô, na ca ha nee atycnare. Ne ate cahãj kam akra mã ramã ihpÿm ita, quê ha ihtÿj apê ty. Ampo na? Quê ha Pahpãmcurê xwÿn, ate me kam mare mã akên xà ton atajahpan xà na, nee amji mã hÿpa nare — hajÿr.

Ne ma tê, hÿrkwa wÿr. Mã ahna ahtÿm nare mã Tawi kra ata xà ne ihtyc.

2 Xamer 15.10; 18.1-17, 33

Pê Tawi kra pê Axarãw mã amji to pahhi prãm

15, 18 Pê Tawi mã hapua na ihkra xÿmre nô ita, ne hapÿr Axarãw. Pê ihtÿjhÿm Tawi jaxà kam ajco amji to pahhi prãm. Ne cute caxuw krãhtare kwÿ me amji par, cute hÿm cuna mã me ipijapu prãmte. Ne cute me ipijapukam ihtêm. Mã ahkêt kam Tawi jô krãhtare te Axarãw jô krãhtare tohjê, ne me to winti mir ne me hipej. Mã ma pjê cunea kôt apu mehwÿcakhÿm. Ne mehtyc atajê jirôa pê me hàhtôa ne ahkêt kam me ipictor.

Mã Axarãw te hÿm jô krãhtare kwÿ me amji cajpar. Ne me hÿpate ma jÿ kamihtêm prãmte, hõ cawrô to pÿ nô catia ita krac rihâr. Mã Axarãw kÿ japjêhti ata te pÿ na hê, mã curiakam ajêt, mã ma hõ cawrô ita tê. Mã Tawi jô krãhtare nô te hõmpun ne hõ pahhi Jôwape mã harên.

Mã Jôwape cumã:

— Mêr ampo na mã ate mehcuran hiahpuro nare? Ca ha ihcura na mã, wa ha ate ihcuran jahpan xà na amãihpore catia ne cugô — hane.

Mã krãhtare cumã harkwa to:

— Wa ite pahhi pê Tawi par, mã ma apu jüm te ihkra curan na to ihcaca, nawa nee ite ihcuran nare — hane.

Mã Jôwape te wapo xwahhire to incrê ne incwÿr, ne ma to tẽ. Ne por pĩ pa na Axarãw ajêt ata wÿr cator, ne cute wapo to pøj ne toAxarãw na cuhkõnre kam to caxwÿr. Mã krãhtare te tej ne Axarãw curan na, cute me Jôwape tehcajpar.

Mã Jôwape te kÿj cati pêa mã hõ hõhhicakôr, cute to hõ krãhtare mã hàkjêr xà na, mã cute me ipijapu tohicu, ne me cuprõn. Ne cute me kreti catia kamAxarãw jĩ to me hücapêr, nehípy me kën jakôt. Ne ma ikre wÿr me amji jaxàr.

Mã pahhi Tawi te ihkra curan na harên par, ne cama apu hapête amrã.

Ne pê caku jãhtôa kam Tawi Ixaher catêjê jõ pjê cunea to ihhimpej ne pea ihtyc. Ne pê ihcunea na catyt kam Tawi ajco Pahpãm kôt ipa. Ne hãn ne ajco ampokên to, ne amji jũ na ajco ihpeacre, ne ajco hicu, ne ajco Pahpãm mã ahnaamji jarê, ne nee hipêr ton nare. Ne ampeaj kam Tawi mã Pahpãm kĩn, ne hanea ne cumã ihkĩn. Na ri cutePahpãm na increr xà jãhtôa ne to increr, ne ahna ihhóc par. Ne cute ahna ihhóc par itajê kwÿ mã ita ri he.

Pahpãm Mã

MENCRER XÀ

Ïhÿ, pahhi pê Xawrô tycjakàn pê ri Tawi pê Ixaher catêjê jô pahhi. Ne pê mam cupê harã catêjê jô pahhi, ne hanea ne ita caxuw cupê kÿj catêjê jô pahhi. Ne pê pahhi cunea jirôa pê Tawi mã Pahpãm jahkre pej, na pê ajco Pahpãm mãihcakôc, ne cumã menrcrer xà na ihhóc. Na ri hõ kàhhóc ita japry te **Menrcrer Xà Jô Kàhhóc** (Menrcrer Xà). Ne ita caxuw increcr xà kwÿ itajê mã he.

Ampeaj kam me pajakry xà na menrcrer

1 ¹ Ïhÿ me ikwÿ, ca hãn ne me icukij to:
“Jÿ mã cu ajte ame, ne amepajakryti,
ne me pamã amji kinti ne?” hane.
Ne ite me gapackre xà ita na, meikampa he:
Ca ha nee mehkrã kên catêjê te me pajapackre xà na,
me amji to pôj nare.
Ne nee mehkrã kên catêjê te amji kam hapac xà kôt,
me amji ton nare.
Ne nee hanea ne,
cute me Pahpãm to me amjijapackre prãm nare,
mã cama me ahna xwÿ xi atajê kwÿ mã me acjêj nare.
Ampo na?
Ca ha ate me krã kên kôt me ampoitajê ton to me apa na,
ca ha nee jÿ caxuw me amã amji kinti nare.

² Ca ha quêt me hane he:
Ca ha atÿj me amã amji kïan kam,
me amã ihkàhhóc cahytrpãam kam,
me Pahpãm jarkwa pejti ita cahyt, ne ihkôat me apa.
Ne amcro mecaxwa cunea kam,
ca ha Pahpãm jarkwa cupahti jô kàhhóc ita cahyt,
ne ampeaj kam ihkôt me hakop to meapa.
Ne ate ihkôt hakop xà ata kam,
ca ha atÿj me gakry, ne me amã amji kinti kam me apa.
³ Ne ca ha me apê cô tohkà na pïxô pàr amji to ajpa ata pyrãac.
Por pïxô pàr hô xà jô amcroa kam hãn ne hô,

ne ampeaj kam ihrôt,
 ne nee jũ caxuw ihhô incrà nare.
 Ata jĩkjê na, ca ha Pahpãm jarkwa cahyt neihkôt hakop,
 ne catyt kam ihkôt apa na,
 ca ha ampo cunea to me apê ata,
 quê ha ihtỳj ahnaa me amã,
 ne nee jũ caxuw me apê ihkôt hamre nare.

- 4 Nãmri ca ha ate ma ame amji pê Pahpãm jarkwa curê na,
 ca ha me apê mehkrã kên catêjê atajê pyrãac,
 ne nee me apê pĩxô pàr pejti atapyràc nare.
 Ampo na? He mehkrã kên atajê pê arỳjhy krekã pyrãac,
 mã ihtỳj kôc mehcarê.
- 5 Jĩkjê na, quê ha Pahpãm mehkrã kên atajê kên mã me curê,
 ne quêt amji mã me to hõ tekjê catêjê juwahi.
- 6 Quê ha ihtỳj catyt kam me ipa catêjê atajê jamã,
 ne mehkênpe me hũtã.
 Ne mehkrã kên catêjê, quê ha mehkĩnte ame tokêanre ne,
 quê ha me acto.

Pahpãm te mehkwỹ mã pahhi capi ne hãm na menrcrer

- 2** ¹ Ampo na mã amji caprỳ to krĩxàre kôt
 ame cõjkwa kam Pahhitipê Pahpãm kam mencryc,
 ne cute ame hapu prãmte ame cuprõ?
 Jũ wỳr quê ame amji mã hamã.
- ² Ne ampo na mã me cupê mehcahkrit atajê jõ pahhi kwỳ,
 hãn nePahhiti te me cumã hõ pahhi xãm ata cuna mã ame cuprõ,
 ne ahna ame ajpên pa?
 Ne me hõ pahhi catêjê me amji to cuprõ,
 ne tee ahna me ajpên cukij to:
 “Jũ mã cu ha ajte me,
 ne cute me pahto ihhimpej xà ita pê me pahcato?” hane.
- ³ Ne amji caprỳ to me amji mã:
 “Jũ wỳr cu ha me harkwa kôt ame papa!
 Ne nee quê ha me cupê me pajõ pahhi nare!
 Ne nee cu ha me pahnõ amjimã me hũpa to ame papa nare!
 Quê ha pea cute me pahto ihhimpej xà ita caxuw
 me cupê me carôt hamre,
 na cu ha pahtỳj ame papa” hane.
- ⁴ Mã cõjkwa kam Pahhiti,
 cute me to ihhimpej xà krĩ xà impejti ata kam jỹ,

ne nee me harkwa ita kam apu amji to hàptõ nare,
 ne cama ame ahna acxa, ne ame ahna xwỳ, ne amji mã:
 “Me cumã ipar prãm nare catêjê amji caprỳ to ame ijũhhyr prãm,
 ne jũ wỳr quême ito cõ, ne me ijũhta” hane.

5-6 Pahhiti te me cumã me hõ pahhi xãm,
 mã mehkwy ma amehcaca atajê kam ri incryac to incryc.
 Na quê ha ihtỳj jũ caxuw incryac kam, ame cumãnkam tẽ,
 ne me cumã:
 “He itea wa amji mã me gõ pahhi ata capi,
 cupê pjêcunea kam me gõ pahhi xà caxuw!
 Ne quê ha ihtỳj Xijãw jõ kên kamihkrĩ xà ata kam ihkrĩ,
 quê ha pjê cunea kam mehcunea me kampa!” hane.
 Quê ha me hũpar nare atajê me kampa,
 ne ampeaj kam me cumã hũpaa tohũpa,
 ne mehkra acto tu ne.

7 Mã Pahhiti te pjê cunea caxuw,
 me cumã me hõ pahhi xãm ata te mehkwy mã amji jarên to:
 “Wa ha Pahhiti te ito hũjarên xà ata kõt me amã harê.
 He cute cumã:

‘Apê ikra, ne ita caxuw ipê Apãm Cati.

8 Na ca ha ate mehcunea to ahimpej xà caxuw ina ahwỳ.

Wa ha amã krĩxàre cunea jahkre ne amã cugõ,
 ca ha me to ahimpej to apa, quê ha me akampa.

9 Ne ca ha acarõt tỳjti ita to me to ahimpej to ihtỳaj to apa.

Ne me hũpar nare atajê, ca ha me to pjê te pot pyrãac,
 ne cute me amji kam me hapac xà kên mea mã,
 me kam acryac kam me gãn partu’ hane”.

Hõ, pê Pahhiti me to hũjarên to hane.

10 Cwỳrjapê ca ha me apê pjê jõ pahhi catêjê,

me amji to akrã krejapêa ne me ikampa!

Ne me apê meto ahimpej catêjê cunea, ajco me ikam gapac peaj ne!

11 Na ca ha amji mã me Pahhiti cupa to kryjre nare.

Ne ate amji mã hũpahti na cute gahkre pej prãmte,
 ca ha cuna mã akõn krã na jỹ, ne cumã amjijarên to:

“Wa ha ite amji kam ijapac xà cunea kam,
 ihtỳj ihcunea na akampa” hane.

12 Hõhõ, ca ha ita to hajỳr nare na,

quê ha ihprõt pê akam incryc pyrentu,

ne ihtỳj akên catia mã amẽ,
 ca ha gamre.
 Ne por me amji pytàr prãmte,
 Pahhiti wỳr me pra atajê,
 quê ha quêt ame hakry.

Me pajirôa pê Pahpâm cati cakrô, ihtỳj me pahto amji japackre na mencrer

- 8** ¹ Ỡhỹ cõjkwa kam Pahhiti, apê me ijõ Pahhiti.
 Ne ampeaj kam pjê cunea kam,
 mehcunea mã gaprỳ ita catia to cati, ne impeaj to impej!
 Apej cati ita pêihhêj rũm pyt me cõjkwa jàhcujro pyràac,
 ne ampo cunea jirôa pê cati ne impej.
- ² Mã mehcunea acatihti ita na ihtỳj meana cre,
 me ahkrare me, mehkà na kjê kryjre atajê mea mã.
 Ca ate me acurê xwỳn mã acarôt tỳjti ita to apipê,
 mār quê acuna mã amehcuhhê catêjê atajê cunea carĩcti na me to,
 quê mehcarĩc.
 He ate me cupê amji tête gàmtàr,
 quê nee jũm, jũ mã aton nare.
- ³ Wa hãn ne ate cõjkwa ton ita wỳr rĩt,
 ne pom pê ca caa putwrỳ me caxêre to,
 ne ihkrĩ xàa kam ihkrĩ na me to, mã ihkrĩ atajê pupu.
- ⁴ Wa ampo itajê pupu ne amji mã:
 “Pỳhàpà, he Pahpâm kĩnte me ipê mehũmre pit,
 ne taa mã ri quêt ampeaj kam cati.
 Ne mêr ampo na mã,
 ma meito amji japackre ne me ijamã?”
 Hõhõ, wa amji mã hane.
- ⁵ Pê ca me ijĩa na me ito ixũmre.
 Ne ate, cute amji mã me icupahti xà to ateme cumãn to hajỳr,
 pom quê amji mã me pahhi cupa he.
 Ne apyxit peaj ne me ijirôa pê acati.
- ⁶ Ne ate, ite ampo cunea to me ihmpej xà na me ixãm.
 Ne ate ampo cunea ton itajê to ite me ihmpej,
 ne hirô pê me icuhhê na me iton.
- ⁷⁻⁸ Atajê pê carà cahàcti hõhti me, pryti me,
 hanea ne ahkêt jõampo jàprê itajê me, pryrejara me, tep me,
 hanea ne, pom cõ kam ampo cunea amji to ajpa itajê cunea jirô pê
 me icuhhê xà na,
 ate me iton.

⁹ Ỹhỹ Pahhiti, apê me ijõ Pahhiti!

Ne ampeaj kam pjê cunea kam mehcunea mã gaprÿ ita catia to cati,
ne impeaj to impej.

Me pahpÿpÿm pêa mã me pahcunea krã kêanre na menrcer

14

¹ Pom me amji mã:

“Pahpãm nee ite amji kam me ijapac xà na,
me ito amji japackre nare” hane.

Itajê krã nare, ne cute amji kam mehapac xà maj pit.

Ne ihcunea na mehkêanre.

Ne nee jÿm pyxit ne catyt kam ipa nare.

² Mã cõjkwa kam Pahpãm ihkrĩ ne mehkõpĩ,
ne tee apu jÿm krã kreti te catyt kam ipa ata japê,
ne nee cute jÿm te to amji kam hapac ata mã cator nare.

³ Mã mehcunea te me pry cupan,
ne ihcunea na mehcunea kêanre,
ne nee mehnõ pyxitre catyt kam ipa nare.
Ne ampeaj kam ri, nee jÿm catyt kam ipa nare!

⁴ Ne Pahpãm te mehkrã kên itajê jarên to hajÿr he:

“Imãa ihcunea na me cupê amji jahkre kêatre!

Ne ihtÿj cute amji to me ipijapar xà caxuw,

meikwÿ pê me hàhkĩj to me ipa,

ne nee jÿ caxuw ite me to ipijapar xà na,

amjimã me ina hàhwÿr nare” hane.

⁵ Ne cute mehkên ton to me ipa xà ata kam,
quê ha ihtÿj jÿ caxuwPahpãm cupate,
amehterteat to amehtertet.

Ampo na?

Pahpãm ihtÿj catyt kamharkwa kôt me ipa catêjê cahê na ipa,
ne ma me hamã.

⁶ Mehkrã kên catêjê mã,
ampeaj kam catyt kam me ipa atajê me,
me cupê hamreare catêjê atajê cahpêrkâr prãm,
mã ihtÿj Pahpãm me cupê mempej pytà.

⁷ Wa itÿj Pahpãm mã me ikwÿ cajrên to hane he:

“Ỹhỹ, ijõ Pahhiti.

Jamã ne ca, ite me ato amji kam ijapac xà jÿrkwa ita pĩn,

me ijõ pjê cunea kam,

me cupê me ikwÿ pê Ixaher catêjê te me icurê xwÿn atajê tohjê na,

me itehcajpa” hane.

ÿhÿ, quê ha ampeaj kam me pajõ Pahhiti te hacpÿ mã
me pampej pêa mã me papa na me pahton na,
cu ha pahtÿj hÿrên me pajakrytito me cumã cre,
ne ampeaj kam me pamã amji kÿn.

Pahpãm cahê na mehkrÿ catêjê jõ increr

- 15** ¹ Pahhiti, apê me ijõ Pahpãm!
Mêr itajê cunea jipôc ri, jÿmjê mã caha garkwa to:
“Ajpên ijÿrkwa wÿr me mõi, ne icahê na ame apa”? hane.
Ne jÿmjê mã ca ha garkwa to:
“Ajpên ijõ hàpkàjti pê Xijãw ata na me api,
ne kam me akrÿ, ne ito me amji kampa”? hane.
- ² Ne cute hajÿr he,
quê ha jÿm ihcunea na catyyt kam ipa,
ne hãn ne ihcunea na akam hapac to ipa,
ne ampo pej pit ton to ipa,
ne ampeaj kam caxwãm catia mã, to ihcakôc to ipa ata,
quê ha ma amã axà.
- ³ Ne hanea ne nee amehkwÿ kôt harên hêj xi xà atajê jarên nare,
ne nee hanea ne mehkwÿ kên mã me irên prãm nare,
ne nee jÿmjê jarên kênocràn to ipa nare ata,
quê ha ma amã axà.
- ⁴ ÿhÿ ijõ Pahhiti, pom ca ha ma apu jÿm kên curê ata,
quê ha hanea ne ma jÿm acuxà, apu jÿm kên ata curê.
Ne hanea ne, ihtÿj quêt cumãihcunea na,
catyt kam cute me apar catêjê atajê te amji mã acupahti xà.
Ne quê ha jÿm mã cute ampo na, amji to hÿjahkre xà ata kam,
ihkên mã hàr cacrô,
ihtÿj cormã cute ahna cumã amji ton xà ata na to,
ata quê ha amã axà.
- ⁵ Ne hanea ne cute me cumã ampo jôr atajê,
quê ha hacpÿ ne cute hõrxà ata na,
taa pit cwa, ne nee hipy kam ihkwÿ mên nare.
Ne hanea ne, quêjÿm cumã,
cute jÿm pejti ata kôt harên kêanre to prãmte, cumã ampo gõi,
quê ha nee ahna amji caxàr ne ipyr,
ne hahpan xà na jÿm pejti ata kên mã mên nare.
Quê ha ma apu ampo jôr xà ata caca.

ÿhÿ ijõ Pahhiti, hecute me hajÿr catêjê,
 quê ha nee akrac ri ampo ihcaxun nare.
 Ne quê ha quêt catyt kam acahê na ipa rohnÿtti mã.

Pahpãm te ampo cunea ton atajê me pamã catihti na harên na me pancrer

19

¹ ÿhÿ me ikwÿ,
 wa ha me amã ite Pahpãm to amji kam ijapac xà na harê.

Cu me cõjkwa pupu ita,
 ihtÿj hirã pê me pamã Pahpãm catia to cati naharê.
 Ne Pahpãm te ri kam caxêre me, kam ampo itajê cunea ton.

² Ne cu hãn ne amcro cunea kam,
 me pyt japôj xà na me hõmpu, ne amji mã me harên to:
 “Ampeaj kam ri Pahpãm mã ihtÿj ampo cunea ton xà” hane.
 Ne hanea ne cu caxwari cõjkwa kam me caxêre me, putwrÿ pupu,
 ne hacpÿ ma mã me amji mã:

“Nee Pahpãm mã ampo pyxit ne hahkre pej nare,
 ne cumã ampo cunea ton jahkre pej” hane.

³ He nee cõjkwa kam ampo ihkrĩ itajê me pamã harkwa to ihcakõc
 nare,
 cakrõ cu me rĩt ne me hõmpu atajê kõat,
 ramã me pamã Pahpãm catia to cati na hahkre pej.

⁴ Ne cõjkwa kam ampo pejti catihti itajê te amcro me caxwa cunea
 kam,
 ramã pjê cunea kam Pahpãm catia to cati na harên cràn.
 Ne nee jũ ri me cupê ita jahkre kêatre nare,
 ne mehcunea te me hahkre pej xà.

Ne Pahpãm te cõjkwa kam pyt mã ihkrĩ xà ton, mã kaam ihkrĩ.

⁵ Ne pom cu me pajikwa tuw xà wÿr,
 me pamã amji kĩa kam me pahprõ wÿrme pra ita na ri cute,
 ne amcro cunea kam, ihkrĩ xà pê hapôj,
 ne cumãamji kĩa kam catyatre na ma hãpir to impraar to pra.

⁶ Ne me pahnõ imprar tÿjti,
 mã ihcuhê pê cumã ipicahur prãmti, jĩkjê na mã,
 hãn ne pyt hapôj pê ma cumã cõjkwa cahpêrkàr toprãam kam,
 ihtÿj catyatre na ihcahpêrkà.

Ne jũ wÿr quê jũm apu amji mã hamã,
 ne cacro pê amji to amxu, quê nee cacro nare.

⁷ ÿhÿ me ikwÿ, pom wa ite me amã harên ita jĩkjê na,
 cu nee me pahnõ amji mã hamã, ne Pahpãm pê me papimxur nare.
 Cwÿrjapê cu ha pahtÿj mepajõ Pahhiti jarkwa pejti,
 kam ampo kên nare ata kam,

me pajapac na me amji to prãm.

Ne cute me pajapackre xà ata, ihtỳj me pamã me pahcarôt to intuw.

Ne quê ha me pahnõ pê hahkre kêatre,

quê ha me pajõ Pahhiti te ampeaj kam

me pamã harkwa jirên atajê pictor,

ne ihkôt hamre xà nare atajêa to cumãhahkre,

quê ha hahkre pej,

na cu ha pahtỳj amji mã me to pahhimpej.

⁸ Ne me pajõ Pahhiti te me pamã ampo to hahkre xà ata ri
quêt catyt kam ihcuhtacti.

Ne pahte me kam pajapac catêjê ri,

ampeaj kam me pajakry.

Ne cute me pajapackre xà kam ampo kên nare itajê,

ihỳj pahte ampo cunea jahkre pejna me pahto,

cu me hahkre pej.

⁹ Cu ha pahte amji mã Pahhiti cupahti to me papa na,
cu ha kam me pajapac to me papa rohnỳtti mã.

Ne me pajõ Pahhiti ita pê ihhêj xi jahkre kêatre,

ne cumã ampo cunea jahkre pej.

Cwỳrjapê quê ha mehcukij xà jõ amcro kam,

cute jũm pejti na harên to:

“Ampeaj kam jũm ita pej” hane.

Ne hanea ne jũm krã kên ata jarên to:

“Jũm ita krã kêanre” hane.

¹⁰ Ne cu wakỳre prà tepti pê ôr na hĩ jàhwỳrti ata jirôa pê
me Pahpãm jarkwa na prãm.

Ne pen cacô jirôa pê ri Pahpãm jarkwa me pahcajpuaw.

¹¹ Ỳhỳ cõjkwa kam ijõ Pahhiti pê Pahpãm.

Ate ijapackre xà itajê teipê ampo kên cunea cawpa,

ne ikên mã ixàr cupate, cute intête ito hũjawry tu.

Ne wa itỳj amji mã acupahti to ipa, ca cormã ita jipy,

hahpan xà na ito impej. ¹²Ne wa hãn ne me to ihcupan xà na

me amji jahkre pej nare kam,

me to ihcupa,

ne hãn ne imã garkwa itajê jahkrepej nare kam,

hirô pê me ipỳpỳm to ipa atato tojnõ,

ne nee ca hahpan xà na ito kên nare.

¹³ Ne hanea ne ite garkwa jirô pê ipỳpỳm,

ne garkwa kaj na ampo kên tonprãmti ata na ijamãr,

wa ton nare.

Ne intête ipê amtà,
mār quê nee ampo kên itajê ito ihhimpej nare.
Ca ha ito hane, wa ha itỳj amã ipej,
nenee ampo kên pyxitre nō ton nare,
ca ha ina amji capa.

14 Ijõ Pahhiti, apê ikên pê itête gântàr catê,
na ca atỳj ikên xà cunea pê ipytà.
Imã icakôc xà me,
ite amji kam ijapac xà cunea teacajpuaw na to prãm.

**Tawi te amji pupun xà kēanre kam, Pahpãm
teihtehcajpar na hàhwỳr xà na menrcer**

22

¹ Inxū Cati! Inxū Cati!

Ampo na mã ahte ate irer to hajỳr?

Wa tee ate itehcajpar xà na icagãgãa kam ana ahwỳ,
ca nee ate ipar nare!

Ca ihhêj ne ipê ampỳa mã apu mō.

² Wa ihcaprỳ na ite amã icwỳr to pyt,

ne ite amã ijàkjêar to apê,

ca nee ate imã jũ mãn nare.

Cakrô wa itỳj cormã amã akij,

ne nee wa ha uu ne ijàkjêr jicu nare.

Wa cormã pa xàhte ikrihkrit ita na ikrĩ,

ne ramã ijõtnare na, ina amcro jàhtô.

³ Cakrô, wa itỳj ate apejti,

mehcunea na atetetti to Pahhiti krĩ xàcatihti ata kam gỳr na,

imã gahkre pej.

Ne Ixaher catêjê cunea acatihti na amji mã me garên to me ipa.

⁴ Pê me iquêtjê ihtỳj ajco amji mã me ato ihhimpej to me ipa,

cwỳrjapê pê ca atỳj mehkên pê me to acato.

⁵ Pê ajco me amã akij,

pê ca ajco atỳj mehkên xà atajê pê me to gapôj.

He nee cute ihcaprỳ na amji mã me ato ihhimpej nare.

⁶ Ne mehkĩnte nee ipê me hũmre te ihkên xà pê amji pytâr xà ata nare.

Ne ihhêj rũm ipê ampo cô pyrãac, ne icrire, ne icarôt peacre.

Mã mehcunea ame ixũn, ne ma amji tête ame icurê.

⁷ Ne ame ipupu atajê cama ame ina xwỳ,

ne ame ina acxa,

ne me imã:

“Gõ Pahhiti ita te ramã amã hikran! 8 Pom ca ate gõ Pahhiti to amji mã hajÿr ita?

Mër ampo na mã nee akên mã axàr xà ita pê cute ato cator nare?

Quê gõ Pahhiti ita mã akîn na mã,

quê ha rÿ pêa mã atehcajpa,

ne akên mã axàr xà ita pê apytà!” hane.

Hõ, ame ina xwÿ to hane.

⁹ Ne cute me ijarên to hajÿr cakrô,

pê ca caa, ipÿm pêa mã, ajpên itehcajpar kam tẽ,

ne imã icaca xà gõ, ne icrire naa mã ijamãr kam tẽ,

ne cormã ijamãr to apa.

¹⁰ Ne ipÿm pêa mã ri, ipê atekjê,

ne apê ijõ Pahpãm rohnÿtti mã.

¹¹ Ne hamre, wa ramã ikêan kam ipa,

na ca nee irer ne ipê gÿjawry nare.

Ampo na?

He nee aràn xà na

jÿm te itehcajpar xà caxuw hamreare.

¹² Ramã me icurê xwÿn catêjê te me ito kên prãnte me ikrãhtu,

ne me cupê ihhêj rÿm

Paxã jõ pjê jõ pryti xÿmti jãprêhti te apu ikam imprar atajêpyràac.

¹³ Ne me cupê rop tycti hãn ne pryre mã wa japrã,

ne cumã carôrõ,

ne kam intoj ne ihcakê, ne ihcãmxa

ita kôpit na mã,

ihtÿj me ito kên to prãm.

¹⁴ Ramã icarôt jamre xà ita pê ihhêj rÿm

cô te pjê kam ipijaxwÿr ne hamre.

Ne ajpên kam ihi ihcuhhê xà itajê,

ramã apuajpên pê hapôj partu,

ne ihcuhhê xà kaj na apu ihcuhhê.

Ne ina cuhkônre pê ihhêj rÿm

amcro te apu penhê to ihhorhot,

ne ramã ipigãn to mõ.

¹⁵ Ne ramã imã kôar to kôr,

ne ijôkre kam ihhêj ne pjê jacrô ne incràre.

Mã ijôhto te ijapto na impÿn ita kam,

ca ihhêj ne ityc na apu icãmjĩ,

ne ihhêj ne ate pjê jacrô ita kam irer.

16 Ne mehkrã kên catêjê te me ito kên prãmte, me ina cuprõn.
 Ne me cupê ihhêj rûmrop te apu pryre na cuprõn ne ihkrã,
 ne ajpẽn pê ihcyt to ipa atajê pyrãac.

Ne ramã cute ame ipê ipar me ijũhkra caxwÿrti.

17 Ne wa icakrô te amji capô, ne ihire ita kam,
 quê ha ihtÿj me ihi cunea pupu.

Ne me icurê xwÿn catêjê cama ame ikôpĩr to me ipa,
 ne ite amji pupun xà kêanre ita pyrên ame hakry.

18 Ne cute ikà to ajpẽn mã me ipicràn,
 ne ihkôt kên to ajpẽn pê me hũhkâr.

19 Ijõ Pahhiti!

Nee ca ipê gũjawry nare,
 ne apu awjarêa ne itehcajpa!

He apêa ri ikên mã ixâr xà ita pê ipytâr catê!

20 Ityc xà ita pê ipytà!

Ne me icurê xwÿn pê me ikwÿ nare pê rop pyrãc itajê pê ipytà.

21 He me cupê ihhêj rûm rop tycti pyrãac,
 ne me wa te icaxwÿr xà ata pê ipytà!

Ne jũ wÿr wa ahte me cupê ihhêj rûm

pyrti xũmti jãprê jĩpâr te icaxwÿr xà ata pê amji pytà!

Ne caa, ca ha atÿj me icurê xwÿn itajê pê ipytà!

22 Ca ha ito hane,

wa ha me ikwÿ cunea mã

ate ikên mã ixâr xà ata pê ito acator na garê,

ne itÿj cute me cuprõn xà kam mehcuneamã

apejti na garê, ne me cumã:

23 “Me apê Pahhiti kôt me apa catêjê,

ca ha me gõ Pahhiti to me gãmnan prãmte me cumã:

‘Imã acupa hyre nare, na wa itÿj garkwa kôt ipa!’ hane.

Ne me apê Jaco tãmxwÿ tãmxwÿ atajê,

ate me amji mã Pahpãm cupa prãm to, ca ha me cumã:

‘Apeaj to apej! Ne ampo cunea jirôa pê acati!’ hane.

Ne me apê Ixaher catêjê pê Pahpãm na mehkwy atajê,

ca ha Pahpãm to ate mecati prãmte me cumã:

‘Apyxit peaj pê ri me ijõ Pahhiti pê Pahpãm!’ hane” hajÿr.

24 Ỹhÿ me ikwÿ,

he Pahpãm nee amji têtê

me cupê hamreare atajê curê to ipa nare.

Ne nee cute me amji pupun xà kêanre to

me amji pupun to me ipa atajê to hãn ne hapac kêt nare.
 Ne nee me cupê amji to ipimxur to ipa nare.
 Na quê ha jũm amji tehcajpar xà na cumã akij,
 quê ha ihtÿj jũm ata kampa.

- 25 Ỹhỹ Ijõ Pahhiti, pê wa ikên kam ipa xà ata kam amã:
 “Ate itehcajpar jahpan xà na, wa ha itÿj amã ampo gõ” hane.
 Cwÿrjapê wa ha cute me cuprôn xà kam,
 cute me ato amji kam hapac prãmti atajê cunea kam mare mã,
 amã ite ampo na amji ton xà ata to.
- 26 Ne wa ha mehcunea mã amji kîn nõ to,
 ne me cupê hamreare atajê mã harte.
 Quê ha me cumã akîn atajê me amã:
 “Mehcunea jirô pê apej ne acati” hane.
 Na quê ha hõtpê amji to ipijapar pej rohnÿtti mã.
- 27 Ỹhỹ me ikwÿ,
 quê ha pjê cunea kam krĩxàre Pahpãm to amji kampa,
 ne to amji japackre.
 Quê ha jũa ri amehkrĩ atajê,
 ihtÿj Pahpãm wÿrme apkjê.
 Ne quê ha ampo kra cunea me hõmpun xà ata kôt,
 Pahpãm to cute amji kam me hapac prãmte mecumã:
 “Apêa ri me ijõ Pahhiti,
 na ri mehcunea jirôa pê me imã me akîn” hane.
- 28 Pahpãm pê me pajõ Pahhiti,
 ne cupê pjê kam mehcunea to ihhimpejcatê,
 ne ihtÿj ampo kra cunea to ihhimpej.
- 29 Ne cute amji to me cati prãmti atajê,
 quê ha ihtÿj cuna mã mehpÿpÿm,
 ne mehkryjre na cumã me amji jarê.
 Ne cu me pahcunea me pahtycto mō atajê,
 quê ha Pahpãm cuna mã mehkôn krã na me jÿ ne me cumã:
 “Wa itÿj amji mã me acupa” hane.
- 30 Na quê ha mehtãmxwÿ tãmxwÿ ihtÿj amji mã me hũpa,
 ne me kam hapac to me ipa,
 ne ihtÿj mehkra mã me Pahhiti jarên to me ipa.
- 31 Quê ha me kampa,
 ne hanea ne cormã nee mehpÿpÿm nare atajê mã me harên to:
 “Me pajõ Pahhiti pê Pahpãm
 pê ajco mekwÿ kên mã mencjêj xà atajê pê me hũta” hane.

Pahpãm pê me pajamãr catê impeaj na mencrer xà

23

¹ Ihhêj rûm ipê carà cahàcre hôhti pyràac,
mã Pahpãm pê ijamãr catê.

Cwÿrjapê ri nee ipê ampo jamre nare.

² Ne pom carà cahàcre hôhti jamãr catêjê
cama hõ ahtu kukûmti rericre kam hikwa na hamã,
mã kam hikwa,
ita na mã Pahpãm ito,
ne ihtÿj imã ite ijikwa ne ikôt xà ita gõ.
Ne pom carà cahàcre hôhti jamãr catêjê cô pinkrinti wÿr,
hõ carà cahàcre hôhti to ipa, mã to ikõ,
ita na mã ihhêj ne Pahpãm ito,
ne ihtÿj ite amji kam ijapac xà kam ikrihkritti ita to imã ihcarĩc,
ne imã to ankrê.

³ Ne hõtpê imã, ite amji kam ijapac xà to intuw.
Ne carà cahàcre jamãr catêjê hãn ne pry cuhtacti kôt
catyt kam ipa na to,
mã ihkôt ipa,
ita kôpit na mã, Pahpãm catyt kam ite ipa na ito ipa,
mãr wa ampo pej pit ton to ipa.
Hõ, pê cute ijamãr na amji to awjahkre ata na mã ijamãr to ipa.

⁴ Ỹhÿ ijõ Inxũ Cati,
pom hãn ne carà cahàcre hamãr catêcãmtà rûm,
nee cumã awcapãtkô cupa nare,
ita na mã ite.
He apê ijamãr catê,
ne wa itÿj akôt cormãcaprûm kôt
ityc xà jõ awcapãtkô jakren to ipa.
Ne ca icumam apa ita kam ri, acãmtà rûm,
nee imã ampo kên te icuran xà ata cupa nare.
Ne pom carà cahàcre jamãr catêjê hõparxare jamãr caxuw,
hõ kôtãre incwa ne to ipa,
mã curê xwÿn hÿrmã hapôj,
mã kô ata to ihcura,
ita na mã ate, ne ramã ate icurê xwÿncatêjê caxuw
amji mã gãhcuprõn hiahpuro.
Mã ihhêj ne, gõ kôtãre ma icurê xwÿn pê itête hàmtàr to ipa.
Ne ca hanea ne gõ pĩcajrer ita to, prya kôt icapôr to apa.
Na ri ate ijamãr xà ita pyrên,
imã amji kĩnti.

- ⁵ Ne pom carà cahàcre jamãr catêjê,
hãn ne ampo pê curê xwÿn atajê cunea jipôc ri cumã harte,
ita kôpit na mã,
ca ate cute me icurê xwÿn catêjê kam mare mã,
gàpàn xà wÿr ijator.
Ne ate ijator ita kam,
quê nee me icurê xwÿn itajê nõ jũ mã iton nare.
Ca hãn ne ina amji tohpôj to hanea,
pom quê hãn ne me catia na me amji tohpôj he.
Ne gôtpê ikôm xà kam
imã ampo cacô impejti ata to hipu tu, mã ajxwÿ,
ca imã agô.
- ⁶ Ne quê ha amã ikĩnti itaa na, imã gahkre pej.
Na ca ha imã gâhcajrên to axãm itaa na, wa ha ahnaa ty,
ne itÿj gũrkwa kam amji to ipijapar rohnÿtti mã.

Cu ha Pahpãm mã pahte me to kên xà na me amji jarêna mencre

32

¹ Ýhÿ me ikwÿ!

Ampo pyrên cu ha ame pajakry?

He Pahpãm te me pamã, por pahte harkwa jirô pê me pahpÿm,
ne ihkaj na me pahkên xà ton atajê jicu,
ne to tojnô ne ihhur ata pyrên,
cu ha ame pajakry.

- ² Por Pahpãm te ampo kên ton atajê na
me pajarên kên nare atajê pyrên,
cu ha ame pajakry.

Por me pahcaxwãm pê
me pahte amji kam me pajapac xà hêj xi nare atajê pyrên,
cu ha ame pajakry.

- ³ Ne pê wa cumã ite ikên ton xà to icakôc nare ri mã,
ajco amcro cunea kam icwÿr to amji pectu, ne ipeacre.

- ⁴ Ýhÿ, ijô Inxũ pê Pahpãm,
wa itÿj ite ikên ton jahpan xà na,
ajco amcro me caxwa cunea kam ate ito kên xà atajê cajpê,
ne ramã ipê icarôt jamre to môr te hajÿar,
pom quê pyt cacro atâr to incrà to ipa he.

- ⁵ Jicu xà kam, pê wa amji mã:

“Wa ha Pahpãm mã ite to kên na amji jarê” hane.

Pê wa amã ikên xà cunea na amji jarê.

Ne nee pê wa ite ampo kên ton xà atajê nõ to apê ipimxur nare.

Ne ite amã ihcunea to icakôc xà ata kam,
pê ca ampo to ite ato kên atajê cunea to tojnõ, ne hicu.

⁶ Ne por mehcunea mã akîn,
mã amji mã me ato ihhimpej atajê te ri,
ihtÿjme amã amji cajrën to ipa xà.
Mâr quê jũ caxuw me hÿrmã ampo kên catia te cator xà ata kam,
nee cute me amã amji cajrën catêjê wÿr cator nare.

⁷ He apêa ri ito apimxur catê.
Ca ampo kên atajê cunea pê ito amxu ne itête amtã.
Wa ate itête me cupê gãmtàr xà ita pyrën ijakry to
kÿj cati pêa mã, amã cre.

⁸ Ỹhÿ me ikwÿ, Pahpãm te me pamã amji jarën to:
“Wa ha jũ ri me amõr xà ata jõ pry to me amã hahkre,
ca ha ihkõt me mõ.

Wa ha pa me gapackre, ne me gamãr to mõ.

⁹ Na ca ha nee me apê cawrõ me,
cawrõ cahàcre jüpar nare atajê te mempar prãnte,
mehkrã na hê,
ne jũ kam me to mõr xà ata wÿr
mehkjên to meipa atajê pyrãc nare” hajÿr.

¹⁰ Ỹhÿ me ikwÿ, ampeaj kam ri,
mehkên catêjê hãn ne me amji pupun kên to ihkryjre nare.
Ne quêt me Pahpãm to amji mã mehhimpej catêjêatajê ri,
Pahpãm te me to ihhêj rüm pryjara pyrãc,
ne ma mentête hara to kwÿcto ipa ita na,
ampo kên atajê cupate.
Ne ihtÿj hàhcajrëan kam, cumã mehkian kam,
mentête hàmtàr to ipa.

¹¹ Ne pom ca me acunea catyt kam me apa atajê,
me acunea me gakry!
Ne Pahpãm te me ato impejti xà atajê pyrën
hanea ne me amã amji kian ne!
Pom ca me amji mã kam gapac pejti,
ne catyt kam me apa itajê,
me gakrya ne,
ne pom me gakryti itajê to, me cumã cre!

Pahpãm to hàmnãn na menrcer

33 ¹ Ỹhÿ me ikwÿ, por ca me acunea catyt kam me apa atajê,
Pahpãm pyrën me gakrya ne.

- Mempejti catêjê te me Pahpãm mã catihti,
ne impejti jarên xà ri quêt ahnaa.
Na ca ha atỳj me cumã cati ne impejti jarê.
- ² Ca ha Pahpãm mã catihti ne impejti jarên xà ata kam,
atỳj me cumã cre ne me gækôr xà cakô,
ne cumã cuhkônre cakô.
- ³ Ne Pahpãm mã me acrer xà intuwti to
kỳj cati pêa mã, me cumã cre,
ne cuhtôj cajrôn pejti ata to,
ca ha me gakryti to me cumã cre.
- ⁴ Ne mễr ampo na mã cu ha me to hajỳr to prãm?
Nee mã ampo na nare, he Pahpãm jarkwa pê ri quêt,
ampeaj kam, ne catyt kam,
ne quêt cute ampocunea ton xà na,
ihtỳj amji jarkwa na amji kampa.
- ⁵ Ne Pahpãm mã, pjê kam mehkrĩ atajê cunea kĩn,
mã me hamâr to impejti.
Ne cumã ihtỳj catyt kam me ipa atajê kĩn,
ne catyt kam, cute mehkwỳ to amji kam hapac na
cumã me to prãm.
- ⁶ Pê Pahpãm ihcakôc xàa to, cama ihcakôc,
ne ramã côi kwã to,
ne kamcaxêre me ampo cunea ihkrĩ atajê to.
- ⁷ Pê Pahpãm côi kwã cunea to cuprô, ne hỳr xàa kam hỳr,
mâr quê hàhhuc tu rohnỳtti mã.
- ⁸⁻⁹ Pê cama Pahpãm pjê ton xà ata to cumã ihcakôc,
pê ramã pjê amji to,
ne ampo cunea te amji ton xà na cumã harkwa,
pê ramã ampo cunea amji to.
Na ca ha pjê cunea kam me akrĩ itajê,
ate atỳj amji mã me Pahpãm cupa xà.
He me pahcunea mã,
pahte amji mã me Pahpãm cupahti kam
me cumã amji jarên xà.
- ¹⁰ Ne mễr ampo na mã pahte me to hajỳr xà?
Nee mã ampo na nare.
Pahpãm ihtỳj krĩxàre te me ajpên par xà kêanre atajê to
me cupê hamre,
mâr quê nee ihkôt me ampo kên ton to me ipa nare.

- 11 Ne quêt Pahpãm te ampo na amji ton xà ata ri,
 nee ihkôt hamre xà nare,
 ne ihtÿj quêt cute ahna amji ton xà, ne ahna to hãm ita na.
- 12 Pê Pahpãm cute me pahto hõ tekjê xà caxuw
 amji mã me pahcapi,
 na ri hūrên me pajakryti.
 He ampeaj kam quê ha jũ ri, krĩ nõ kam,
 Pahpãm toamji mã me hõ Pahhiti,
 ne por toa amji mã mehhimpej atajê,
 quê ha ihtÿj hanea ne me hakry.
- 13 Ne ampo na mã
 cu ha cumã cati me impejti to cumã me cre?
 Nee mã ampo na nare.
 Cõjkwa pĩn Pahhiti pjê kam mehcunea mehkri atajê cunea pupu.
- 14-15 Ne cutea ri me pamã pahte amji kam me pajapac xà ton,
 ne ihtÿj pahte me ampo cunea ton atajê na me pahpupu,
 ne kam amji kampa.
 Ne ihtÿj ihkri xà ata pĩn pjê kam,
 por mehcunea mehkri atajê pupu,
 cwÿrjapê cu ha pahtÿj me cumã cre.
- 16 Ne mër ampo na mã cu ha me cumã cre?
 Nee mã ampo na nare.
 Jũ wÿr quê Pahpãm krãhtare jõ pahhi tehcajpar nare kam,
 quê apu amji mã hamã, ne curê xwÿn tohjê.
 Ne quê ha te krãhtare pahtÿj cackrô,
 quê Pahpãm cumã carôt jor nare,
 quê nee ihtyc xà ata jahpan nare.
- 17 Quê me pamã cawrô carôt tÿjti cati cackrô,
 jũ wÿr quê Pahpãm ihtehcajpar nare kam,
 quê cawrô ata me pahcurê xwÿn pê me pahpytà.
- 18 Ne Pahpãm ihtÿj quêt amji mã me hũpahti atajê jamã.
 Cu ha me Pahpãm jãhcaprĩa kam,
 cumã me pahkĩn rohnÿtti mã ata te,
 me pahtehcajpar xà naaracri me hikaj,
 quê ha ihtÿj me pajamãr to ipa.
- 19 Ne quê ha ihtÿj pahte me pahtyc xà jahpan na me pahto,
 cu ha me hãpa.
 Ne prãm catia te cator xà ata kam,
 quê ha nee prãm ata te me pajipej na hamãr nare.

ÿhỹ me ikwỳ,
 cu ha Pahpãm te me pahto impejti itajê cunea pyrên
 me pajakryti na cumã me amji jarẽ,
 ne cumã me cre to hane he.

- 20 “ÿhỹ me ijõ Pahhiti, apê me itehcajpar catê,
 ne apê ampo kên pê itête gântâr catê.
 Na wa itỳj aracri ahna me gikaj to me ipa ita na.
 21 He apyrêan ri me ijakryti.
 Na wa itỳj apejti ita to amji mã me ihmpej to me ipa.
 22 Ne wa itỳj cormã aracri me gikaj to ipa ita kam,
 ca ha gâhcaprĩa kam, amã me ikĩn ita na” hane.

**Mehkrã kên mehkên mã me acjêj, ne mehkã
 pej mempej mã me acjêj na menrcer**

- 37** ¹ ÿhỹ me ikwỳ,
 nee ca mehkã kên catêjê jũ na ame akrihkrit to me apa nare.
 Ne nee ame hũ na cute mehkên ton atajê kĩn nare.
 2 Ampo na? He me cupê ahtu te êê ne apu incrà pyrãac,
 quê ha me ahna ahtũm nare quê ha me hamre.
 He ampeaj kam ri me cupê pøre pit,
 na quê haihtỳj me hamre tu.
 3 Ca ha cõjkwa kam me Pahhiti pê Pahpãm to amji mã me ahimpej,
 ne me ampo pej pit ton to me apa.
 Mã cute me amã pjê jõr, ca kam me akrĩ,
 mãkam me atête ampo kên pê amtà.
 Ne ca ha hàmtâr xà ata kĩa kam, kam me akrĩ.
 4 Ca ha Pahhiti cukwa kam,
 me amã amji kĩnti kam me apa na,
 quê ha ihtỳj me amã,
 ate amji mã me ampo na prãm̃ti xà atajê cunea gõ.
 5 Ne ca ha Pahhiti mã me ate amji kam me gapac xà cunea gõ,
 mãr quê taa, ate amji kam me gapac xà to ihhimpej.
 Ne ca ha ate amji mã me toahimpej to me apa na,
 quê ha me ato impejti to hane he.
 6 Pom quê pyt hapõj mã mehcunea me hàhcujro pupu,
 ita jĩkjê na,
 quê ha Pahhiti mehcunea te me apupun na me to,
 mãr quê cutea me ana amji caxàr na me gahkre pej.
 Ne me pahkrã jimoc kam pyt ihkrĩ, mã me ihprà pupu,
 ita jĩkjê na,

quê ha Pahhiti ihtÿj mehcunea te catyt kam me apa na,
 cute megahkre pej na me to,
 quê ha me gahkre pej.

7 Na ca ha aracri, amji mã me aprĩa kam,
 me Pahhiti te me atehcajpar xà na me hikaj.

Ne quê mehrã kên catêjê
 hãn ne me ampo kên ton to me ipa xà ata kôt,
 amji to me cati to me ipa,
 ca ha nee me hũ na ame akrihkrit to me apa nare.

8 Ne nee ca ame kam acryc, ne me kam acàcàc nare.
 Ne nee ame hũ na ame akrihkrit nare.
 Ampo na?

Ca ha ate, cute me ampo kên ton ata kam akrihkrit na,
 quê ha ihtÿj ate ampo kên ton wÿr ato mō.

9 Ne quê ha Pahhiti mehrã kên atajê
 mōr pejti kam, me to hamre hiahpuro.
 Ne por ca quêt
 me Pahhiti te mehkên mã me hàr xà pê
 me hũtâr xà na me hikaj atajê,
 quê ha ihtÿj cute pjê to me cumã hũjahkre ata kam
 me amji to ajpa.

10 Ne quê ha mehrã kên atajê na ahtũm nare,
 quê ha me hamre partu.
 Ca ha tee ame hapê, ne nee hipêr me jũm mã acator nare.

11 Ne quêt cute amji to mehkryjre prãm atajê,
 quê ha ihtÿj cute pjê to me cumã hũjahkre ata kam me amji to ajpa.
 Ne curia, quê ha mehcarĩcti kam,
 nee amji mã me ampo kên cupa nare kam me ipa.

12 Ne mehrã kên catêjê tee cute catyt kam me ipa itajê to kên prãmte,
 ahna ame ajpên kampa.

Ne ihtÿj me kam incryac kam ame wa gyj to me ipa.

13 Ne Pahhiti mã ramã mehrã kêanre atajê jamre xà jō amcro jahkre
 pej,
 na ri cama ame ahna acxa.

14 Ne ramã mehrã kên catêjê te me hō wapo xwahhihti tohpôj,
 neramã me hō cuhê na cute ame amji cohe,
 cute me cupê hamreare atajê me,

- catyt kam me ipa atajê jipej prãmte.
- ¹⁵ Cakrô, quê ha nee me to hajÿr nare.
He quê ha me hõ wapo xwahhihti atajêa
me ahna cuhkõnre japôc, ne me hõ cuhê itajê,
quê ha hanea ne me cupê impàt pa.
- ¹⁶ Pahpãm mãa, catyt kam me ipa itajê pê ampo crêre atajê ri,
mehkrã kên mã ampo jàhtôti itajê jirôa pê impej.
- ¹⁷ Ampo na?
He quê ha Pahhiti mehkrã kêanre atajê pê me carôt to hamre,
ne quêt catyt kam me ipa atajê,
quê ha mehtehcajpar to impeaj ne.
- ¹⁸ Quê ha Pahhiti amcro cunea kam,
catyt kam me ipa atajê jamãr to ipa,
quê ha ihtÿj cute me cumã pjê jôr xà ata kam,
amji to me ipijapar to me ipa rohnÿtti mã.
- ¹⁹ Ne quê ha me hÿrmã ampo kên catia te cator xà ata kam,
quê ha nee me to hamre nare.
Ne quê ha me hÿrmã prãm catia cato,
quê ha ihtÿj me cumã hõ.
- ²⁰ Ne mehkrã kêanre catêjê,
quê ha me acto tu.
Ne Pahhiti curê xwÿn atajê,
quê ha me cupê põ kam pîrã pejti atajê pyrãac,
ne êê ne me hamre.
Ne me cupê cuhy kÿm te apu hamre pyrãac,
ne ma jÿ kam me acto.
- ²¹ Ne mehkrã kên catêjê hãn ne mehkwyê pê ampo cwa,
ne nee hacpÿ mã me hõr na me amji to hÿjahkre ata na,
me amji jarkwa par nare.
Ne quêt catyt kam me ipa catêjê ri me hàhcajrëan kam,
ampo to mehkwyê tehcajpar to me ipa.
- ²² Pahhiti te mehkrã kam harcô mën atajê,
quê ha pjê to cute me cumã hÿjahkre ata kam
me amji to ipijapar rohnÿtti mã,
ne mehkĩnte,
cute mencrôn atajê, quê ha me mõr pejti kam me to hamre.
- ²³ Ne quê ha Pahhiti pry kam jÿm mẽ ata,
quê ha catyt kam pry ata kôt ipa,
quê ha jÿm ata mã cute amji kam hapac xà kîn hyre nare.
- ²⁴ Ne Pahhiti me hÿhkra na cucwa ita kam, quê ha me ajhu,

ne nee me ipihur tu nare.

25 Pê wa icuprÿ pê mã,
Pahhiti te jÿmjê pejti te catyt kam me ipa atajê mã hikran na
me hõmpun nare,
ne ahnaa ramã iwej.
Ne nee hanea ne,
rÿ ite mehkra nõ te apu hõ na hàhwÿr to mõr na hõmpun nare.

26 Ne ihtÿj cumã ampo,
mã hàhcjãrënti kam to mehkwy tehcajpar to ipa.
Ne quê ha Pahhiti ihtÿj mehkra itajê to impej,
ne ma me hamã.

27 Ne ca ha ate ampo kên ton to apa ata pê amji to awpjê,
ne quêt ate ampo pej pit ton to apa xà ata kam,
quê ha Pahhiti ihtÿj gõ pjê kam me akrī rohnÿtti mã na me ato,
ne ampo kên cunea pê atête hàmtàr to ipa.

28 Ampo na?
He Pahhiti mã catyt kam, cute mehkwy to impejti atajê kîn,
mã me to impejti to ipa.
Na quê ha nee cute amji mã me to hajÿr to ipacatêjê mã hikran nare,
ne ma mentête ampo kên pê hàmtàr to ipa rohnÿtti mã.
Ne quê ha mehkĩnte
mehkrã kên tãmxwÿ atajê me mõr pejti kam,
mehcunea me hamre.

29 Ne catyt kam me ipa atajê,
quê ha Pahhiti te me cumã pjê to hÿjahkre ata mã me axà,
ne kam mehkri rohnÿtti mã.

30-31 Ne catyt kam me ipa catêjê kam ri,
ihtÿj hõ Pahpãm te amji kam hapac xà,
na quê ha nee catyt kam ipa xà ita to ihcupan nare.
Ne ihtÿjmehcakõc xà te amji jahkre pejti to mehcakõc to me ipa,
ne cute me hapackre xà atajê, quê ha mehcajpuaw.

32 Ne mehkra kêanre atajê ri,
ihtÿj pry cahtiri,
catyt kam me ipa atajê jikaj, cute me hipej prãmte.

33 Cakrô, quê ha nee Pahhiti mehkra kên jÿhkra mã,
catyt kam me ipa atajê incjêj na me hamãr nare.
Quê ha ma cute mehcukij catêjê wÿr me to axà,
quê ha Pahhiti, cute mehkên mã me mên xà ata na
nee me hamãrnare,

ne taa mentête amtà.

- ³⁴ Ca ha atỳj me Pahhiti jikaj,
ne cute amji kam hapac xàa kôt me apa.
Quê ha ihtỳj jũ caxuw ato acati,
ne cute amã pjê to hũjahkre ata, quê ha ihtỳj amã cugõ,
ca ha to gõ tekjê.
Ne quê ha akam mare mã, mehkrã kênmõr pejti kam me hipej.

- ³⁵ He pê wa ramã ito jĩa to, cute ita ton na hõmpu.
Pê hũmre nõ ata ihkrã kêanre,
ne hàprêa kam ajco mehkwỳ to kên to ipa.
Ne cute me to kên to ipa xà ata kôt,
cute amji to cati to hajỳar,
pom quê pjê impejti kam pĩ ihkà to ipa,
ne catia to cati he.

- ³⁶ Cakrõ, mã ahna ahtũm nare, mã hamre,
ata jĩkjê na ri cute hajỳr.
Wa tee apu hũmre ita krĩxà japê,
mã ramã hamre, wa nee ite hipêr hõmpun nare.

- ³⁷ Ne ca ha catyt kam me ipa catêjê me, mempejti,
ne nee ame ipijapu to ipa nare atajê kópĩr to me apa.
Quê ha ihtỳj cumã mehtãmxwỳ hàhtõa.

- ³⁸ Ne mehkĩnte, cute mehkên ton to me ipa catêjê atajê,
quê ha ihtỳj me to hamre.
Quê ha mehkĩnte nee me cumã mehtãmxwỳ nare.

- ³⁹ Ne quê ha ihtỳj Pahhiti,
ampo kên pê catyt kam me ipa catêjê pytà,
ne ampo kên te me hỹrmã hapõj xà atajê kam,
quê ha cupê ikre tỳjti ata pyrãac, ne ihtỳj mentête amtà.

- ⁴⁰ Ne ma Pahhiti te mentête hàmtàr xà ata wỳr me pra,
quê ha taa mehtehcajpa,
ne mehkrã kêanre atajê pê me hũtã, ne mentête amtà.

Jũm xũmre ita hũrkwa pê ampỳa mã Pãhpãm mã amji na increr xà

- 42** ¹ Ỡhỹ, Inxũ Cati, ca ihhêj ne ipê ampỳa mã apa.
Pom cõjkwa crã kam, carã mã hatuj xà jõ cõ to kõrti,
ita na mã ite,
ne wa apê ampỳa mã apu ipa.
Na wa hacpỹa mã awỳr amji jaxàr to prãam to prãm,
mãr cu hipêr ajpẽn pupu, ne ajpẽn cahi na papa.

² Inxũ tĩr rohnÿtti mã ata, he ihhêj rũm apê cô,
 ne imã ato kôar to kôr.
 Ne jũ caxuw mã wa ha ajte awÿr icato,
 ne ite ato acati prãnte imã akĩnti ita na amã amji jarẽ?
³ Me icurê xwÿn catêjê me icukij to:
 “Mêr jô ri mã cõjkwa kam Apãm Cati ita?
 Ihhêj ne hamreare” hane.
 Cwÿrjapê ri imã amji kĩn nare, ne ipeacre,
 ne wa ijàpàn nare kam, amcro me caxwa cunea kam amrã.
 Mã ito cacô pit ajxwÿ.
 Ne ito cacô pijaxwÿr ita pê ihhêj rũm ijõ,
 wa to pit mã apà.

⁴ Wa hãn ne ituwre na
 mam ite ato amji kam ijapac xà atajê to amji japackre,
 ne ijĩ cunea kam ikàj xà pyrentu.
 Pê wa me ikjêjê jàhtôa to ajco amji kôt ipa,
 ite me ato amji kam ijapac xà jũrkwa wÿr.
 Ne me icuhtom pej pêa mã,
 me imã amji kĩan kam me ipa,
 ne ajco me icrear kam
 apê Inxũ Catilhti na me ato ijũjarên to me ipa.
 Ata to wa amji japackre.

⁵ Ne mêr ampo na mã wa imã amji kĩn nare ne ikrihkrit ita na ipa?
 Xà quê ha ajkĩ Inxũ Catilhti ita hipêr itehcajpar nare?
 Hãpà! Quê haihtÿj hacpÿa mã imã amji kĩnti na ito.
 Cwÿrjapê wa ha hacpÿa mã Inxũ Cati to amji mã ihhimpej,
 ne to amji japackre, ne to cati prãnte wa ha cumã:
 “Apeaj to apej,
 ne apê Inxũ Cati pê Pãhpãm
 pê ikên pê ipytàr catê rohnÿtti mã” hane.

⁶⁻⁷ Wa Pãhpãm jũrkwa me, me ikjêjê pê, ampÿa mã ipa,
 ne Cõpijapjêr jô cô jatuj xà na kēnti itajê kam ikrĩ.
 Mã kēn cati itajê pĩn, cô catia ne ikam ajxwÿ,
 ne kypê hàhkrihkrit nare, ne tee icuran prãm.
 Ita pê ihhêj rũm imã amji kĩn nare te ikam ipijaxwÿr.
 Cwÿrjapê ri imã amji kĩn nare ita pê ihhêj rũm
 ijĩ cunea kam ikàj xà,
 ne Pãhpãam te ri imã amji kĩn nare ita na iton,
 na wa itÿj to amji japackre.

- ⁸ Ne amcro cunea kam Pahnãm imã:
 “Imã akĩn rohnýtti mã” hajãar to pyt.
 Ne wa caxwa ri cumã cre, ne cumã:
 “Mehcunea jirõa pê apeaj to apej” hane.
 Ne itỳj cumã icakõc ne cumã:
 “Apê ite amji kam ijapac xà xakat,
 na ca ha atỳj ijamãr rohnýtti mã” hane.
- ⁹ Pahnãm pê ikên pê ipytàr catê, na wa cumã:
 “Ca ihhêj ne ate ito gapac kêt!
 Mã me icurê xwỳn catêjê ame ito kêanre,
 wa imã amji kĩn nare kam ipa” hane.
- ¹⁰ Mã amcro cunea kam me icurê xwỳn catêjê ame ina xwỳ,
 ne me imãn to:
 “Jõ ri mã Apãm Catihiti ita?
 Ihhêj ne hamreare ita kam,
 jũ wỳr quê ha atehcajpa” hane.
 Ne cute me imãn xà ita pê ihhêj ne ramã me icuran to mõ.
- ¹¹ Ne mễr ampo na mã wa imã amji kĩn nare,
 ne ikrihkrit ita na ipa?
 Xà quê ha ajkĩ Inxũ Catihiti ita hipêr itehcajpar nare?
 Hãpã! Quê ha ihtỳj hacpỹa mã imã amji kĩnti na ito.
 Cwỳrjapê wa ha hacpỹa mã Inxũ Cati to amji mã ihhimpej,
 ne to amji japackre, ne to cati prãmtecumã:
 “Apeaj to apej,
 ne apê Inxũ Cati pê Pahnãm pê ikên pê ipytàr catê rohnýtti mã” hane.

Tawi te Pahnãm mã amji cajrên na menrcer

- 45** ¹ Ỡhỹ, ijõ Pahhiti pê Inxũ Cati,
 me icurê xwỳn itajê kêanre, ne ampeaj kam mehhêj xi,
 ne nee me ato amji japackre prãm nare.
 Ne cute me ijarên to kêanre atajê pê ipytã.
 Ne me cumã ijarên to:
 “Imãa cupê jũm pejti ata” hane.
- ² He pom apê ampo kên pê ipytàr catê ita?
 Nõ na mã ihhêj ne ate imã hikran.
 Mã me icurê xwỳn imã amji kĩn nare na me ito,
 wa imã amji kĩn nare kam ipa,
 ca ihhêj ne nee ita na ito amji japackre nare.

- ³ Pom hãn ne hàhcujro xà,

- awcapàtkô kam jūm pictor ata tehcajpa
 mǎ hacp̃ya mǎ pry kam ajhu,
 ita kôpit na, ca ha iwÿr garkwa te ijapackre xà nõ hêj xi nare,
 pê ihhêj rŭm gâhcujro xà nõ ata kujate,
 mǎr quê hacp̃ya mǎ awÿr ito amji jaxà.
 Ne ate ijapackre xà ita kôt,
 wa ha hacp̃ya ne Xijāw jō hàpkàjti na
 ite atoamji japackre xà jŭrkwa kam akrĩ xà ata wÿr amji jaxà.
- 4 Ne ate imǎ amji kīnti wÿr
 ito amji jaxàr xà ata pyrên ijakryti,
 ne hahpan xà na wa itÿj amǎ ampo gō.
 Ne amǎ ijàkôr xà cakô, ne amǎ icrer to:
 “Apê imǎ amji kīnti jōr catê xakat” hane.
- 5 Ne mē̃r ampo na mǎ wa imǎ amji kīn nare
 ne ikrihkrit ita na ipa?
 Xà quê ha ajkĩ Inxū Catihiti ita hipêr itehcajpar nare?
 Hāpà! Quê ha ihtÿj hacp̃ya mǎ itehcajpa ne imǎ amji kīnti na ito.
 Cwÿrjapê wa ha hacp̃ya mǎ Inxū Cati to amji mǎ ihhimpej,
 ne to amji japackre, ne to cati prāmte wa hacumǎ:
 “Apeaj to apej.
 Ne apê Inxū Cati pê Pahpām pê ikên pê ipytār catê rohnÿtti mǎ”
 hane.

**Tawi te to kên na amji jahkre pej, ne Pahpām mǎ
 cuteto tojnō na hàhwÿr na mencre**

- 51** ¹ Ijō Inxū pê Pahpām, icaprīa ne.
 Wa itea ikên xà pê ampo kên ita to amji tŭm.
 Ne amǎ ikīn ne amǎ ijapê rohnÿtti mǎ ita kam,
 ca ha imǎ ikên cunea cuhhō,
 ne nee hipêr to amji japackre nare.
 Itē acuna mǎ ampo kên ton ita kam ri amǎ ikēanre.
 Na ca ha imǎ ite amji kam ijapac xà kênkam,
 ite ikên ton ata to caprā.
- ² Ne gâhcaprīa kam, ite ikên ton ata cunea pê icuhhō,
 ne ite garkwa jirô pê ipÿm ata hur pa,
 ne to tojnō, mǎr wa hacp̃ya mǎ itetet.
- ³ He ramǎ imǎ, ite to ihcupan xà itajê cunea na, amji jahkre pej,
 na wa amǎ ahna amji jarê.
 Ne ikên xà itajê, ihhêj ne icunaa mǎ imǎ hikwa,
 na wa hōtpê to amji japackre.
- ⁴ He wa ite nee jŭmjê cuna mǎ ikên xà ita ton nare,

- ne acuna mã wa ite ton.
 Ne itỳj ate ita cwỳrjapê ito kên xà na ramã gahkre pej.
 Ne ca catyt kam apa na ri ate icurê mã imẽn xà ita caxuw,
 quêt ampeaj kam apejti.
- 5 Pê wa ipỳm pêa mã ramã ite amji kam ijapac xà kêanre.
 Ne ampeaj kam pê wa ipỳm pêa mã,
 ramã ajpên acuna mã ampo kên itajê ton to mỗ.
- 6 Ne amã, ate amji kam gapac xà impejti, hêj xi nare ita pyr na
 ito prãm,
 mâr wa catyt kam, ihêj xi nare to ipa.
 Na ca ha imã ate amji kam gapac xà impejti,
 krã kreti ita to hahkre,
 ne imã agỗ.
- 7 Ne itête imã, ite amji kam ijapac xà kên tũm ita cuhhỗ,
 wa itetetti to hanea, pom quê hằcwỳn jaka he.
- 8 Ite ato kên jahpan xà na,
 ate imã amji kĩn nare ne ipeacre na iton.
 Ne ita caxuw ca ha hacpỹa mã imã amji kĩnti na ito.
 Mâr wa ate ito impejti ita pyrên ijakryti to amã cre.
- 9 Ne ate imã ikên cunea ton itajê to caprâr ne ihhur partu na,
 imã ato prãm,
 mâr ca nee hipêr hõmpun nare.
 Ne ite acuna mã ikên ton ita totojnỗ,
 ne nee hipêr to amji japackre nare.
- 10 Ỡhỹ, ijỗ Inxũ Cati,
 imã ite amji kam ijapac xà tetetti impejti gỗ,
 mâr wa ato pit mã hupkre cahkỗ to ipa ita na.
 Ne ite ato amji kam ijapac pejti xà caxuw,
 imã ite amji kam ijapac xà tuwti gỗ.
- 11 Ne nee amji tête pỗ mã imẽn nare,
 ne nee ipê ikam Acarỗ Pejti ita caxâr nare,
 ne quêt hipêr ajpên kam pahhõnco na ito.
- 12 Ne cama hipêr imã ate ipytâr pyrên ijakryti na ito,
 ne ita caxuw ite akam ijapac prãm na ito,
 mâr wa akampa.
- 13 Ca ha ito hajỳr jirỗ pê mã,
 wa ha itỳj cute mehkên ton catêjêmã,
 ate me imã garkwa jirên itajê to hahkre,
 quê ha me gahkre pej,
 ne hacpỹa mã awỳr me amji jacjê.

- 14 Ijõ Inxū Cati, apê ampo kên pê ipytàr catê,
ne nee ca ite jūm curan xà ata kôt amji mā ihcuhtom nare.
Wa ha imã amji kīan kam, mehcunea mā,
ca catyt kam apa, ne apejti na garēn to ipa.
- 15 Ijõ Pahhiti, mehcunea mā icakôc na itehcajpa,
mār wa itỳj me cumã acatihti ne apejti na ato ijàmñān to ipa.
- 16 Ne ite amã ampo to acajpuaw prãmte,
ite amã ampo pijapar to caxàr xà ata na, nee amã ihkīn nare.
Ca ha ma apu ite amã ampo jōr xà atajê caca nare na mā,
wa ha ramã amã cugō ne to capa.
- 17 Ỹhỹ ijõ Inxū Cati,
wa ite ampo to acajpuaw prãm xà ata na amã ihprãm nare,
ne quêt amã icrire na ito prãm.
He wa ite ikên ton ita to amji japackre, ne imã amji kīn nare,
ne ipeacre ata na ri amã ito prãm.
Ne ite ikên ton jicu ne akôt pit mā ipa to prãm ata kôt,
ca ha ina amji capa.
- 18 Ỹhỹ Pahpãm, ate itehcajpar xà ita na,
ca ha hanea ne me akwỳ cunea tehcajpa.
Ne por ramã Krīpinkrên tēte kwỳc nare,
mã me curê xwỳn te ame to kêanre,
na ca ha hipêr gâhcajrēan kam
Xijaw jō kên cahê na krī ata to impej, ne itehcajpa.
- 19 Ate me itehcajpar jahpan xà na,
wa ha ihcunea na me amã amji gō.
Ne ahna ate me ijahkre pej xà na,
wa ha me amã pryti krahti xūmti nō tocapa,
ne catyt kam me to akam ijapac to me ipa.

Me hō kēhkēn pyrēn me pajakry na menrcer

67 ¹ Ỹhỹ, me ijõ Inxū Cati, me icaprīa ne,
ne me ikrã kam garcô mē, ne me ito impej,
mār wa me ipej.

² Mār quê pjê cunea kam, mehcunea, krīxàre mea mā,
ate amji kam gapac xà impejti na me gōmpu,
ne mehcunea apê me hūtàr catê na me gahkre pej.

³ Ỹhỹ, me ijõ Pahpãm,
imã krīxàre cunea te acatihti na me garēn na me to prãm.

Ne hanea ne imã ampo kra cuneate apejti na
me garên na me to prãm.

⁴ Imã mehcunea mã amji kîn,
ne me hakryte amencrer na me to prãm.
Ampo na?
He caa ca ha quêt catyt kam mehcukij jirô pê
mempej to impej,
ne mehkrã kên to kên,
ne pjê cunea kam mehkrĩ atajê japackre
ne ma me to ahimpej to apa.

⁵ Ỹhỹ, imã krĩxàre cunea te acatihti na me garên na me to prãm.
Ne hanea ne imã ampo kra cunea te apejti na
me garên na me to prãm.

⁶ Ỹhỹ me ikwỳ, pê Pahpãm me pamã me pajô pjê gô.
Ne ramã cute me pahkrã kam harcô mên,
ne me pamã pajàprã cunea jôr.

⁷ Pê Pahpãm ramã me pahto impej.
Ne imã pjê cunea kam,
mehcunea te amji mã me hũpa to ipa na me to prãm!

Pahpãm catyt kam mehkrã pej me mehkrã kên to ipicokjêr na menccrer

73 ¹ He imã, Ixaher catêjê te amji kam hapac xà cunea kam
mehkên nare, ne mehtetetti atajê caxuw ri,
Pahpãm peaj to impej na,
imã hahkre pej.

²⁻³ Ne mam pê wa nee hahkre pej to hajỹr nare.
Pê wa mehkrã kên me,
amjia kôt ame ipa catêjê atajê jũ na,
apu cute me amji kam hapac xà pê mehàhcukrêj cati atajê kîn.
Na pê wa ajmãr Pahpãm kôt ipa xà ita na atij, ne ipỳm,
ne ajmãr ikên mã axà.

⁴ Ampo na?
Me cumãa, cute me amji kam hapac xà cunea kam mehcarĩcti.
Ne nee ame hà nare, ne me capēnti, ne mehtỳjti.

⁵ Ne me cumãa, cute me amji pupun xà kēanre nō hamreare.
Pom ahnaa mã mehkwy te me amji pupun xà kēanre to
me amji pupu ita na,
cute me hajỹr nare.

- 6 Ne por me hakràj cati na amji to me ipipẽ to me ipa atajê ri,
ihhêj ne me cumã impeaj to impej.
Ne ramã cute me cupê hamreare,
ne me cupê mehkryjreatajê to me hàprê to me ipa to
cute me amji pyrác tu.
- 7 Ne cute amji kam me hapac xà kên to pit mã,
cute ame caxwỳn to hipu tu.
Ne ramã amji jirôa pê
cute me amji kam hapac xà kên jàhtôa to
amji to mehhimpej to me ipa.
- 8 Ne mehcunea mã xwỳ xà kêanre to me ipa,
ne ampo kên to pit mã mehçakôc to me ipa.
Ne ihtỳj mehcunea jirôa pê amji to me cati prãm tome ipa.
Ne cute me cupê hamreare, ne mehpeacre atajê mã mehhêj,
ne mehkên mã me irên to pit mã me amji kampa.
- 9 Ne ihtỳj cõjkwa kam Pahpãm to mehçakôc kêanre to me ipa.
Ne cute amji to me cati prãmte,
ihtỳj pjê kam mehcunea mã me harkwa jirê,
ne tee ampo cunea to mehhimpej to me ipa prãm.
- 10 Hõhõ, ata to ri Pahpãm na mehkwy to ihcuhê ne mehhi kèhkê,
mã ma mehkôt me ipa,
ne ihtỳj cute me ampo jarên xà atajê kôt me ipa.
- 11 Mã ajpên mã ame hũjarên to:
“Quê ha nee Pahpãm ampo itajê nõ na me pajahkre pej nare.
Quê ha Carôt Tỳjti ata nee ampo itajê nõ na
me pamã cator nare” hane.
- 12 Mehkrã kên catêjê te me hajỳr he.
Me cumã ampo catia,
ne ma hõtpê me ipicamên to me ipa,
ne ampeaj kam me hakràj.
- 13 Cwỳrjapê wa ajmãr ite amji jarên to hajỳr he:
“He wa ihhêj ne amji caprỳ to,
ite ikên ton tète amji jiprôn to ipa.
Ne mër ampo caxuw mã waikên pê ijũhkra to awpjê,
ne to ihtetetti to prãm?”
- 14 Ne pom ite ipej cwỳrjapê amji cajpêr xà kêanre itajê to,
ite amji pupuan to pyt ita?
Ne wa ipej ton to ipa cacrô,
amcro cunea kam ajte ihhêjne ampo kên mã icjêj to ipa” hajỳr.
Hõ, wa ajmãr ite amji jarên to hajỳr.

- 15 Ỹhỹ ijõ Pahhiti, wa ha ampo itajê na amji jarẽ na mã,
wa ha ramã ipê aracri me akwỳ kên mã me irẽn catê hiahpuro.
- 16 Cwỳrjapê wa ite ampo itajê cunea jahkre pej xà na,
ite amji to hahkre ne hahkre pej.
Na ri imãa ampo itajê jahkre pej xà nee hirã pê nare.
- 17 Ỹhỹ me ijõ Inxũ Cati,
wa amã icakôc prãnte gũrkwa mã ixàr,
ne ite mehkrã kên catêjê te amji kam me hapac xà jicu xà mã mẽn na,
me hahkre pej pyrentu.
- 18 Ca ate mehkrã kên catêjê itajê kên mã me irẽn xà itajê pê ihhêj rũm
ate pry cuwrỳhti kôt ame hũxwỳr,
mã me hàtij to me ipa,
ne ma mehkênxà ata mã mehpỳpỳm, ne me hamre ata pyrãac.
- 19 Ne quê ha ihprôt pê, me mõi pejti kam,
por amji mã me ampo cupahtiata pê Pahhiti te me to hamre xà ata,
me hỹrmã cato ne me kam tẽ,
ne me to hamre partu.
- 20 Ỹhỹ me ijõ Pahhiti, he ihhêj rũm mehkrã kên atajê pê,
pom me amti, ne me ahna apê,
mã jũ kam me cupê pra ata pyrãac.
Wa ha amti ne ampra ne to ijapac kêt,
ita jĩkjê na,
ca ha ma amji cuna mã amehkrã kên catêjê atajê caca.
- 21 Ne pa, pê wa ajmãr acuna mã ixãm tỳj pyrentu,
ne ajmãr akêanre na ato amji kampa.
- 22 Ne pê wa ihhêj rũm ipê ampo jũpar nare ta,
ne ihhêj rũm ipê mehkrã nare ata pyrãac,
ne nee ajte ate amji kam gapac xà itajê na
gahkre pej nare.
- 23 Cakrô ca atỳj icahi na apa,
ne awpôc rũm ate ipa na ijuwahi tu,
na wa ha nee ikên mã ipỳm nare.
Ne ikĩnte nee ate mehkrã kên atajê juwahi nare.
- 24 Na ca ha ate amji jahkre pejti ita to ijapackre to mõi,
ite amji kam ijapac xà itajê cunea kam.
Jirô pê mã, ca ha ma amji wỳr ijaprô,
ne cõjkwa kam, amji jĩkjê rũm ijỳr.
Quê ha mehcunea acahê na me ipupu.
- 25 Ne jũm to wa aràn xà na amji mã ijõ Inxũ Cati?

He aràn xà na jũm hamreare!
 Ca imã akrĩ ita kam,
 wa nee pjê me cõjkwa kam imã jũm na prãm nare.
 Ne ampo na wa amji cuna mã ihprãam to prãm?
 Ampo nare, he ca!
 Ana wa ihprãam to prãm!

²⁶ Quê icapēnti xà ita ihtỳj ipê hamre,
 quê ha ijĩ cunea ihtỳj ipê hà,
 ne apê ri imã ijĩ to ihtỳj catê.
 Ne apêa ri cõjkwa kam imã,
 ite amji kam ijapac xà to impej,
 ne to hakràj catê rohnỳtti mã.

²⁷ Ne por jũm apu amji tēte acurê ne ma apu acaca ata,
 quê ha ihtỳj hamre.
 Ne por quê ha jũm amã hikra ne apê hawry ata,
 ca ha ihkên mã amê, ne to hamre.

²⁸ Ne wa pa ate amji cahĩ na ito apijapar ita na ite amji cajpêr,
 ne ahna imã impeaj to impej.

Ỡhỹ me ikwỳ, Pahpãm pê ri me pantête hàmtàr catê,
 cwỳrjapê wa mehcunea mã,
 cute imã ampo ton itajê cunea na, harên to ipa.

Pahpãm jũrkwa to me pajapac xà na menrcer

84 ¹ Ỡhỹ Pahpãm, apê ampo cunea jõ Pahhiti,
 ne mehcunea jirõa pê ampeaj kam quêt acarõt tỳj.
 Ne ampeaj kam imã ite me ato amji kam me ijapac xà jũrkwa kĩn.

² Ne imã gũrkwa ata ri apu imõr prãmti,
 ne ampeaj kam to ijapac xà.
 Wa ite amji kam ijapac xà cunea to,
 wa apê me ijõ Inxũ Cati tĩar ata pyrên ijakryti to amã cre.

³ Apê ijõ Pahhiti pê Pahpãm!
 Quêt ampeaj kam acarõt tỳjti!
 Acatihti cakrõ,
 mã ihtỳj cute me ato me amji kam hapac xà jũrkwa kam
 cuwênre me, xiprõre amji mã hahê to,
 cute kam amji mã intoreto ipijapar xà caxuw.

⁴ Por cute me ato amji kam hapac prãmte,
 gũrkwa mã hãn ne me acjêj,
 ne me hapõj atajê ri hãn ne ampeaj kam me hakry xà,
 ne hõtpe acatihti na me amã cre!

- ⁵ Ne por apĩn amji mã me carôt cwa,
ne ma Krĩpinkrên jõ hàpkàjti pê Xijãw na me to hàpir,
gũrkwa wÿr me to cator prãnte atajê ri,
ampeaj kam me hakry xà.
- ⁶ Ne caprũm cràre nõ kôt me mõi xà ata kam,
ca ha atÿj me cumã ihkôt cô catôc ne ipijapjêr na to,
quê ha ajpjê.
Ne quê ha hanea ne ta cakônĩnõ wrÿ,
quê ha ampeaj kam hĩpô hàhtô.
- ⁷ Ne me mõi kwÿa kam,
quê ha ihtÿj me carôt ita me cumã ipicamẽn to mõi.
Ne ma Krĩpinkrên kam,
cute me ato amji kam me hapac xà jũrkwa wÿr me cato,
ne me apê pahpãm cahàc krekà cunea jirôa pê acati
ne apê Pahhiti impeaj na me apupu.
- ⁸ Mehcunea jirôa pê ijõ Pahhiti pê Pahpãm carôt tÿjti ita,
ite amã icakôc xà ita na, ikampa.
Apê iquêtiti pê Jaco xwÿ jõ Pahpãm ita, ikampa.
- ⁹ Pahpãm, ate amji mã me ijõ pahhi capi ne hãm ata krã kam garcô mẽ,
ne to impeaj ne.
- ¹⁰ Wa ite jũ ri amji to amcro jàhtô to mir romã,
wa ha gũrkwa kam amji to amcro pyxit peaj.
Ne mehkrã kên jũrkwa pejti kam ijãhhuc romã ri,
imã cormã gũrkwa jarkwa mã mencjêj xà kam ixãm na
amji to prãam to amji to prãm.
- ¹¹ Pahpãm, apê me ijõ Pahhiti, ne apê pyt pyrãac,
ne ampeaj kam acati ne aprãti, ne apê me itête gãmtàr catê.
Ne gãhcãjrënti to, amã me ikĩnti kam, ca hãn ne me ito impej,
ne mehcunea kam mare mã me ito me icati.
Ne por catyt kam, mempejti to ame ipa atajê pê ri,
nee ate ampo pejti intê xà nare.
- ¹² Mehcunea jirôa pê apê ijõ Pahhiti carôt tÿjti ita.
He ampeaj kam ri amji mã me ato ihhimpej atajê cunea jakry pit.

Pahpãm pê ampo kên pê me pahpytãr catê na menrcer

- 91** ¹ ÿhÿ me ikwÿ!
Quê ha me anõ mã, ampo kên pê amji pytãr to prãm na,
ca ha Pahpãm mã amji cajrên,
quê ha Pahpãm pê me pahcunea jõ Pahhitipahtÿjti ata,
ihtÿj atête amtã.
Cwÿrjapê ca ha gapacta ne me pajõ Pahhiti pê mehcunea jirôa pê

ihpahtýtji ata mã me amji jarên to,

² “Apê ipytàr catê,
ne apê ampo kên cunea pê itête gàmàtär catê,
ne apê ijõ Pahpãm,
na wa itýt ate ijamär na amji mã ato hane” hane.

³ Quê ha Pahpãm ihtýtj
ampo kên pimxur te akên mã amên xà ata pê apytà,
ne atête axà te acuran xà ata pê amtà.

⁴ Quê ha ihtýtj amji jarkwa pa,
ne ampo te ato kên xà ata pê apytà.
Quê ha ihhêj rüm cupê ampo jara, ne hara to apro,
quê ha nee ihkrac ri ampo acaxun nare.

⁵ Cwýrjapê quê ha nee amã caxwa ri ampo kên awýr pra atajê cupa
nare.

Ne quê ha ihprôt pê amcro kam ampo kêanre ata awýr cato,
ca ha nee hūpate apu akrihkrit nare.

⁶ Ne nee amji mã, por awcapàtkô kam,
hà kêanre picràn ata cupa nare,
ne nee amji mã amcro kam ampo te ame ato hamre xà ata cupa nare.

⁷ Ne quê ha me mir ne me ty, ne awke rüm me ajxwý,
ne me tej mir ne me ty, ne awpôc rüm me ajhu cacrô,
quê ha nee ampo kên ato kên nare!

⁸ Na ca ha cama xa ne ankrêre ne apu rīt.
Ne ca ha atýtj Pahpãm te me hūpar nare me,
mehkrã kên te ampo kên ton atajê jahpan xà na,
cute ame to kên na me to ihtýtj tu na me hõmpu.

⁹⁻¹⁰ Ate amji jarên to:

“Pahpãm catia pê ijõ Pahhiti ata pê ri,
por curi ipimxur xà ata,
ne cupêa ri itête hàmtàr catê!” hajýr.
Cwýrjapê quêha nee ampo kên gürkwa wýr cator
ne jũ mã aton nare.

¹¹ He quê ha Pahpãm cõjkwa kam cumã me hàpên catêjê mã harkwa ta,
quê ha harkwa kôt,
por ca jũ ri apu amõr xà ata kam me gamã,
ne me atête me hàmtàr to ipa.

¹² Ne quê ha me gamär to hanea,
pom quê jüm xümre pry kam kên teihkra par tõi cupate,
ma hūhkra to, to huphê ne hamã he.

- 13 Ca ha Pahpãm cãmtàa rûm
atỳj me acuré xwỳn pê rop jõkre hôhti me,
me cupê cagã kêanre pyrác atajê me,
me ajpu, ne me kam acuhhê, ne me tojhê.
Quê ha nee jũmjê itajê nõ ato kên nare.
- 14 Na quê ha Pahpãm amji mã garên to:
“Wa ha itỳj me cumã ikĩnti itajê pytà.
Ne cute amji mã me ito ihhimpej atajê, wa ha itỳj mentête amtà!
- 15 Ne quê ha kam ampo kên cato, quê ha imã amji cajrên,
wa ha kampa ne ramã curia cahê na xa,
ne pa ampo kên pê hũtã,
ne pa mehcunea te amji mã me hũpahti xà na me to,
quê ha amji mã me hũpa.
- 16 Wa ha cute amji to ipijapar to irya na to,
ne cute amji to ipijaparxà ata kam,
ahnaa mã, wa ha itỳj hũtãr to ipa” hane.

Pahpãm to me hàmnãn na mencreer xà

- 95** ¹ Hacme, ne me pajõ Pahhiti pê Pahpãm to me cati prãmte,
me cumã me pahcakôc!
Ne cupê me pahpytãr catê pyrên me pajakryti to,
cu me cumã cre!
- ² Hacme, ne Pahpãm to me amji kam hapac xà jũrkwa mã me axà!
Ne curia cu ha cuna mã,
cute me pahto impejti ita pyrên me pajakryti to
cumã me amji jarê,
ne pahtỳj me cumã cre!
- ³ Ne mêr ampo na mã cu ha me to hane?
Nee mã ampo na cu ha me to hajỳr nare.
He me pajõ Pahhiti pê Pahpãm carôt tỳjti ata ri,
pjê cunea kam,
pahpãm cahác cunea jõ pahhiti carôt tỳjti atajê
jirõa pê cati.
- ⁴ Ne pjê cunea to ihhimpej,
ne ahkre ryti rûm to ihhimpej kam pra,
nema kên kãhti ata mã to hahê.
- ⁵ Ne taa cute cõxwa ton ata to ihhimpej,
ne taa hanea ne cute pjê ton ita to ihhimpej.
- ⁶ Cwỳrjapê cu ha ma me pra ne Pahhiti cuna mã

me pahkõn krã na me jỹ,
necumã impejti na me harẽ.

Hacme ne me cumã:

“Apê me ijõ Pahhiti pê me iton catê” hane.

⁷ He cupê me pajõ Pahpãam to Pahpãm,
ne me papê mehkwy, mã me pajamã.

Ne me papê hõ parxare pyrãac,

mã ihtỹj me pamã me pahte ampo pej na prãm xà atajê gõ.

Cwýrjapê cu ha ita kam

cute me pamã ihcawpa xà atajê na me kampa:

⁸ “Nee ca me apê me aquêtjêa ne me gãprãr xi nare.

He pê me aquêtjê me hàprãr xi cwýrjapê

pêpõti kam me hamreare ata kam,

ajco amji caxuw cô na me icyt to me ipa.

⁹ Pê wa caku te cwarênta kam,

me kam mare mã icarõat kõt

ajco ampo catia pihhoti atajê ton to ipa,

ne ajco me cumã harte,

ne ajco me cumã cô gõ,

ne ajco me curê xwýn pê mentête amtã.

Pê mento jãa to ahna me ipupun cakrõ,

cute me icapi prãmte amji caxuw me icyt,

ne ajpên mã me ijarênto:

‘Nee Pahpãm me pajamãr pej nare’ hane.

¹⁰ Pê wa caku jãhtõti ita cunea kam me aquêtjê itajê kam icryc,

ne ma amehcaca ne pa amji mã me to icakõc to:

‘Mehkrã kên atajê te amji kam hapac xà kêanre,

ne cama ijarkwa jirõ pê mehpýpým to me mõ,

ne ma ame ijarkwa par caca’ hane.

¹¹ Ne wa me kam icryac to icryc,

ne ampeaj kam ite me cumã amji jarên,

ne me ahna amji jarên tu, ne me cumã:

‘He me gũpar nare ita kam,

ite pjê to me amã ijũjahkre ata mã me acunea xàr.

Ne kam me akõt xà ata kam,

ca ha nee jũ caxuw curi me axàr nare.

Na ca ha ita ri põti ita kam me atyc pa,

quê ha me akra pit pjê ata mã me axà’ hane”.

Hõ, me pajõ Pahhiti, amcro ita kam mepamã ihcawpa to hane,

na cu ha pahtỹj me kampa.

Pahpãm te mehkwy mã pahhi xãm te me curê xwÿn tohjê na menrcer

- 110** ¹ Pahpãm pê Pahhiti te ijõ Pahhi mã:
 “Icahê na, Pahhi jÿr xà kam, awpôc rûm jÿ.
 Wa ha apar krac ri me acurê xwÿn atajê cunea nõr na meto,
 quê ha me nõ.
 Ca ha ate me tohjê na cute me gahkre pej xà na,
 me hipy apar xãm” hajÿr.
- ² Quê ha Pahpãm Krîpinkrên pîn, ijõ Pahhi mã,
 cute pjê to ihmipej xà ata caxuw carôt cunea gõ, ne cumã:
 “Apê pjê jõ Pahhi ne acarôt tÿj.
 Ne acarôt tÿjti ita to,
 ca ha acurê xwÿn catêjê cunea jirô pê acuhê partu,
 ne me to ahimpej.
- ³ Ne ca ha me cume apijapu kam me tẽ me ajkaam,
 quê ha me acahê na me ipijapu xà caxuw,
 me akwy me hàhtôa ne me amji to ajpê.
 Ne me cupê pîhhô na atâr pyrâac,
 ne pjê cunea kam me hàhtôa to me hàhtô.
 Quê ha mentuwjê, me cumã amji kian kam,
 Krîpinkrên jõ kên pejti atajê kamme acajpa,
 akôt me ipijapu xà caxuw” hane.
- ⁴ Ne Pahpãm pê Pahhiti te ampeaj kam ijõ Pahhi na amji jarên to hajÿr,
 na quê ha nee jû caxuw amji pê
 cute cumã amji jarên xà ata to hapac kêt nare.
 Na ri Pahpãm te ijõ Pahhi mã:
 “Ca ha gõtpe apê me akwy jõ Pahhi.
 Ne hanea ne apê imã mehcajrên catê rohnÿtti mã.
 Ca ha apê mam imã mehcajrên catê pê Merquixê pê Pahhi ata pyrâac,
 ne hapua na apê imãmehcajrên catê pê Pahhi” hajÿr.
- ⁵ Ỹhÿ Pahpãm, ca ijõ Pahhi tehcajpar xà caxuw,
 cahê na akrĩ ita na.
 Ne ca ha jû caxuw pjê jõ pahhi kwÿ kam acryc,
 ne mehcunea to hamre.
- ⁶ Ne quê ha cute jû caxuw pjê cunea kam ate mehcunea cukij,
 ne me to apicokjêr xà jõ amcro kam ahtwÿ,
 ca ha mehkên jahpan xà na,
 pjê kamme hàhtôa ne mehcura ne me to hakôat to hakôt,
 ne pjê cunea kam pahhi catêjê cunea to hamre partu.

7 Ne quê ha ijõ Pahhi pry cahê na cô ajpê ata to ikõ,
quê ha cumã carôt catia to cati,
cute me hirô pê ihcuhê xà caxuw.

Pahpãm jarkwa jõ kàhhôc na menrcer

119 ⁹⁷ Ỹhỹ me ijõ Inxũ Cati, wa ha garkwa na amã amji jarẽ.
He ampeaj kam imã acaca xà itajê cunea kĩn!

Wa to amji japackrea to pyt.

⁹⁸ Ca gõtpe ate imã, ate ijapackre xà jõr,
wa ite amji mã huwahi ata kôt,
ca ha me icurê xwÿn jirôa pê hãn ne ito amji jahkre pej.

⁹⁹ Wa cute me imã ampo to hahkre catêjê jirôa pê
hãn ne imã hahkre pej.

Ampo na?

Wa hãn ne ate imã ampo itajê to hahkre xà impejti
itajê to amji kampa na wa.

¹⁰⁰ Wa itÿj acaca xà kampa, ne amji mã hũpahti to ipa,
na ri mehwej jirôa pê imã hahkre pej.

¹⁰¹ Itÿj imã garkwa par to prãm,
cwÿrjapê wa nee ampo kên ton to ipa nare.

¹⁰² Ne nee wa ate ampo na garkwa atajê ton jicu nare.
Ampo na?

He caa pê ca imã to hahkre na ri.

¹⁰³ Ne ate imã garkwa jirên itajê cunea inxô pit!
Ne imã ihhêj ne pen jirôa pê inxô.

¹⁰⁴ He ate imã ampo to hahkre xà kôt ri imã hahkre pej,
na wa ma apu cute me amji kam hapac xà hêj xi xà
atajê cunea impar caca,
ne ma ame curê.

¹⁰⁵ Garkwa ita pê ihhêj rãm
hãhcujro xà nō te imã gō pry kujro,
ihkôt imōr xà caxuw.

Na wa ihkôat amji kam ijapac xà to impejti to ipa.

¹⁰⁶ Na wa ite apar na amã amji to ijũjahkre,
ne wa ha itÿj ampeaj kam,
amji mã ate ito ahimpej xà cuhtacti itajê kampa!

¹⁰⁷ Ijõ Pahhiti, imã ite amji pupun xà itajê kêanre!
Ne pom ca ate imã ampo pejti na amji to gũjahkre ita na ca ito,
ne imã icarôt gō, mãr wa ityc xà jahpa.

- 108 Ỹhỹ, Pahpãm, ate ito kênre nare ita pyrên wa ijakryti to,
ite amãamji jarên xà ita na, ca ha atỳj amji capa,
ne ate ampo to imã ahimpej xà ita to imã hahkre.
- 109 He ihtỳj hõtpe jũmjê atajê ame icuran prãm cakrô,
wa nee ate amji kam gapac xà to, ite amji pê ijapac kêt nare.
- 110 Ne mehkrã kêanre atajê te me imã ipro xà ton,
ne me imã hãm, cute me to ipro prãmte,
cakrô wa nee ite,
ate ampo na ito ahimpej xà atajê kamijapac jicu nare.
- 111 Ate imã ampo to hahkre xà itajê pê itekjêa.
Na wa ha itỳj amji mã me huwahi, ne amji caxãm pê me cunõ,
mã ihtỳj ina cuhkônre kam me imã ijakryti to.
- 112 Na wa ite amji mã garkwa ita par to ikrĩ,
ne ahnaa to hicu xà mã mên na amji ton.

Pahpãm pê me pahpupun catê na menrcer

121 ¹ Wa hãn ne rĩt ne hàhkà jakôt pupu ne pa amji cukij to:
“Xà quê ha ajkĩ hàhkà jakôt ita pĩn,
cute itehcajpar catê ata cato?” hane.

² Hãpà!

He quêt Pahpãm pê Pahhiti
pê pjê me cõjkwa to ata pê ri itehcajpar catê!

³ Ne cupê me pajamãr catê, mã ma me pahto huphê ita kam,
quê nee ampo te me pahnõ mên na hamãr nare.

⁴ Ne cupê me pahkwỳ pê Ixaher catêjê jamãr catê ita kam,
quê nee jũ caxuw hõtswa quê nõ ne apu hõt nare.
Ne nee apu hõt nare, ne irĩat na quêt ihkrĩ.

⁵ Me pajõ Pahhiti pê me pajamãr catê,
quê ha ihtỳj me pahcahê na ipa ne me pahpytãr to ipa.

⁶ Quê ha nee pyt cacro me pahnõ mên nare,
ne nee quê ha caxwa ri, putwrỳ na,
ampo xà me pahwỳr cator nare.

⁷ Quê ha me pajõ Pahhiti
ampo te me pahto jũ mãn xà atajê cunea pê me pahpytã,
ne nee quê ampo te me pahnõ to jũ mãn na hamãr nare.

⁸ Ne cu ha ma jũ kam me pra, quê ha ihtỳj me pajamãr to mõ,
ne cu ha hacpỹ ne me amjijaxà,
quê ha hanea ne ihtỳj me pajamãr to mõ.
Ne quê ha me pahto hajỹr tohãm ita na,
ne nee jũ caxuw me pajicu nare.

Krîpinkrên to me hàmnân na menrcer

122 ¹ Ijõ krî kam cute Pahpãm jûrkwa wÿr me ijator, ne me imã:
 “Hacme, Pahpãm to cute me amji kam hapac xà jûrkwa wÿr!”

hajÿr,

ata pyrên ijakry, ne imã amji kîn crire nare.

² Na wa ramã hÿrmã me icator, ne itÿj Krîpinkrên kam ame ipa.

³ Ne ramã hacpÿ mã cute me Krîpinkrên to impej.

Mã ramã Ixaher catêjê jakrã amehcuhhê atajê te hÿrmã me cuprôn.

Mã jûm te mehcukij to,

⁴ “Mêr ampo na mã me hõ krî cunea pîn,
 Krîpinkrên wÿr, me hàpir to me ipa?” hane.

Wa cumã:

“Nee mã ampo na nare!

He cute ampo pej cunea pyrên me hakryti na,
 me Pahhiti pêPahpãm mã me amji jarên prãnte ri me ipa” hane.

Hõ, ita na ri cute mehcunea mên,

mã harkwa kôt cute me ton.

⁵ Ne ita ri mehcukij xà kam hõtpê me pajõ pjê jõ pahhi.

Ne cute ajpên kôt me harên catêjê atajê kampa,

ne catyt kam mehcukij,

ne ajkam me to impej.

Ne ita ri me cupê pro kam atajê ihcunea na,

ihÿj me ajpên kampa.

⁶ Hacme, ne Pahpãm mã Krîpinkrên kam amehkrî atajê cajrên.

Cu ha mehcajrên to hane he:

“Ca ha ma me hamã,

mãr quê ajpên na mehhôncoti to me ipa.

Ne por krî kwÿ mã, Krîpinkrên kam amehkrî catêjê kîn atajê,

ca ha hanea ne me to impej,

mãr quê me cuxà mempej pëa mã me ipa.

⁷ Ne imã Krîpinkrên tète kwÿc tÿjti me,

cute me hamãr catêjê jûrkwa tÿjti atajê to,

cuteme curê xwÿn pê, me amji pytâr pejti na me to prãm,

mãr quê ikre atajê cunea kôt me ankrê,

ne nee ame amji mã ampo cupa nare, ne mehcarĩcti ne.

⁸ Ne por krî ata kam, me ikwÿ me, me ikjêjê ame ipa atajê,

ca ha hanea ne me to impej, quê mempej pëa mã ame ipa.

⁹ Ne mër ampo na mã wa ame ana ijãhwÿr to hane?

He apê me ijõ Inxũ Cati pê Pahhiti to
ite amji kam me ijapac xà jũrkwaita,
ita ri krĩ ita kam ihcuhhê,
na ca ha ipu na amehkrĩ atajê to hanea ne impej,
mãr quê me cumã amji kĩn jakryti kam me ipa” hane.

Pahpãm pyxit peaj pê ampo kên cunea pê me pahpytâr catê na menrcrer

124 ¹ Ite me ikwỳ cukij to hajỹr he:
“Yhỹ, me ikjêjê, wa ha meacukij,
ca ha me imã me amji jarê.
Quê ha me parũm Pahpãm hamreare na mã,
jũ mã quê ha ampo te me pahto kên xà ata me pahto?” hajỹr.

²⁻⁵ Mã me ikwỳ te imã me amji jarên to:
“Quê ha me parũm Pahpãm hamreare na mã,
quê ha me pahcurê xwỳn te me pahkam incryc to
imprar xàata pê ihhêj rũm,
cute me pahtĩar na me pahkur xà pyrãac.
Nare, quê ha cupê ihhêjrũm cõ te hipu ne me pahcuto tu,
ne ma ahpar mã hũwrya wỳr me pahto imprar,
ne iroocti pahtỳjti to cute me papĩr pyrãac” hajỹr.

⁶ Ite mehkwy mã harkwa to hajỹr he:
“Pê me pajõ Pahhitite me pahcurê xwỳn te me pahto hamre na
hamãr nare pyrên me pajakryti to,
cu ha cumã me amji jarê.

⁷ Pê cu ihhêj ne me papê cuwênre pyrãac.
Pê Pahpãm cuwênre jahêrcatêjê te me pahpro xà ton atajê pê
me pahpytã.
Ne ihhêj rũm me pahte na hê xà ata ta, pê pãt,
ne hamre, pê cu pahtỳj ame papa.

⁸ Me pajõ Pahhiti pê cõjkwa me pjê ton catê,
ne cupêa ri me pahtehcajpar catê ata pyrên me pajakryti na,
cu ha me cumã amji jarê” hajỹr.

Pahpãm jahcajrênti na amji mã me to hajỹr namenrcrer

127 ¹ Quê me pajõ Pahhiti pê Pahpãm
ikre xãm na ikre pyxwỳr catêjê rãn nare na mã,
quê nee me amji mã hamãr, ne me hãm nare,
quê te ame to hahkree, ne me to hàpên jicu.
Quê me pajõ Pahhiti
krãhtare pê krĩ jamãrcatêjê te krĩ tète hàmtàr na
mehrãn nare na mã,

quê te ame krĩ tète hàmtàr to hahkree ne me hìcu.
Ne jũ wỳr quê apu amji mã hamãne me hũtàr to impej.

² Jũ wỳr cu me pajàpên pejti to prãm to, iràràa na me pahkrĩ,
ne me pajàpêan pê mepajàpên kam pra,
ne me pajàpên to awcapàtkô rytu ne me cumã hikra ne pra,
ne me pajikwa ne ame amji mã hamã.

Ampo na?

He Pahpãm mã mehkĩnti atajê te me hàpên xà jìcu jirô pê
me hikwa ne ame hõt.

Mã cutea me cumã harte xà caxuw ihtỳj me cumã hõ to.

³ Ne me pahkra pê ri ihhêj rũm
Pahpãm te me pamã ampo pejti jõr xà atajê,
mã ihtỳj me pamã cugõ.

Cwỳrjapê ri ihtỳj amji kõt me pahwỳr
mepamã ampo pejti jàhtõa ne me to hapõj.

⁴ Ne me hũmre, mentuw kwỳa kam
me cumã mehkra hàhtõa to me hàhtõ.

Ne hãn ne mehwej mã me taa me hũtã, ne me hamã.

Atajê pê ri ihhêj rũm krãhtare jũhkra kam
cute amji tète hàmtàr xà caxuwme cumã hõ kruw jàhtõa pyrãac,
na quê ha mehkraatajêa to amji tète hàmtàr to ihkrĩ.

⁵ Por me hũmre mã mehkra jàhtõa to me hàhtõ atajê pyrên
ampeaj kam me hakry.

Ampo na?

He me cupê ihhêj rũm krãhtare mã hõ kruw jàhtõa to hàhtõ pyrãac.

Ne jũ wỳr quê curê xwỳn nõ amji mã hamã ne me tohjê.

Jĩkjê na mã

me hũmre mã mehkra jàhtõa to me hàhtõ atajê te me hajỳr.

Quê ha mehcukij xà kam curê xwỳn nõ me ajpên kam tẽ,
quê ha cumã hamãr catêjê pê mehkra jàhtõtĩ itajê me hũtã,
quê ha nee jũm tohjê nare.

Pahpãm te me pahtehcajpar na me pajàhwỳr na menrcer

130 ¹ Pỳj me hêj xi ijõ Pahhiti!
He ityc xàa wỳr ikrã pictor tuata kam,
wa itỳj ate itehcajpar prãmte ana ijàhwỳr.

² Ijõ Pahhiti, ite amã icaràr xà ata na ikampa!

Ne ite amji pytàr xà na ijàhwỳr xà ata to, ca ipytà!

³ Ca ha ite ato kên xà itajê to,

ate amji japackre prãmte ahna ihkàhhôc to na mã,
jũ mã wa ha, ne ate icurê mã imẽn xà ata pê icato,
ne ma jũ kam tẽ?

Hamreare!

Ca ha atỳj hahpan xà na ikên mã imẽ.

⁴ Cakrô, ca nee ate ito hajỹr nare.

Ne quêt cama atỳj, ite ato kên xà itajê to tojnô,
ne nee hipêr to amji japackre nare,
mãr wa ihkôt amji mãacupahti to ipa.

⁵ Yhỹ me ikwỳ, wa ite amji kam ijapac xà cunea to
Pahhiti te itehcajpar na hikaj.

Ne ampeaj kam wa itỳj cute ampo na
imã amji to hũjahkre xà ata na
amji mã to hane.

⁶ Ne pom krãhtare pê caxwari krĩ jamãr catêjê apẽ xà jikaj ata jirôa pê,
wa itỳj ijô Pahhiti jikaaj to hikaj.

⁷ Me ikwỳ pê Ixaher catêjê atajê,
ca ha atỳj ampeaj kam Pahpãm to me amji mã hanea to me hane.
Ampo na?

He cumã me akĩn rohnỳtti mã,
nehôtpê ihtỳj cumã me apytâr prãm.

⁸ Na quê ha ihtỳj Ixaher catêjê
pê mehkwy atajê te ame to kên jahpan xà na,
cute mehkên mã me hàr xà ata pê me hũtã.

Pahpãm mã ihcunea na me pajahkre pej pejtu na menrcer

139 ¹ Ijô Pahhiti, ca ramã ate ipupun pejtu
na ri amã ijahkre pej.

² Ne ramã ite ampo ton xà atajê cunea na amã ijahkre pej.
Ne ampỳa mã amã ite amji kam ijapac xà cunea na ijahkre pej.

³ Ca ijapên xà cunea me, ite apu ikôt xà atajê cunea kam ipupu,
ne ite ampo ton xà atajê cunea na
amã ijahkre pej.

⁴ Ne ite jũm mã ampo jarên xà ata xwỳjrea na,
ramã ite harên xà ata na amã ijahkre pej.

⁵ Ne jũ ri apu imôr xà ata ri,
ca atỳj ipu na apa,
ne acarôt to itête gãmtâr to apa,
ne imã ijô pry to hahkre to apa.

⁶ Ne ramã ate ijahkre pej xà ita pupun pejtu,
wa nee ajte akĩnte iteamji pupun pej xà ita na,

ite amji jahkre pej nare.

Ne ite ahna amji jahkre pej xà ita ipê ipimxur tu.

7 Ne jũ kam wa ha apê tē?

Ca pjê cunea kam apa xà ita kam,

jũ mã wa ha ajte ne jũ kam apê hawry?

He wa nee jũ kam, apê ijũjawry nare.

8 Wa ha ma cõjkwa wÿr api,

ca ha curia ramã apu mō.

Nare, wa ha ma pjê krac ri mehtyc krī xà wÿr wrÿ,

ca ha curia ramã apu mō.

9-10 Wa ha pyt japôj xà wÿr ite itor ne itēm na,

nare, ampÿa mã pyt cjêj xà kam amji to ipijapar cacrô,

quê ha cormã gãhkra imã ijõ pryto hahkre to mōr ita na.

Ne wa ha jũ ri cormã apu mō,

ca ha curi atÿj itehcajpa.

11 Wa ha awcapàtkô mã ijarkwa to:

“Ito amxu” hane,

ne hanea ne amcro mã ijarkwa to:

“Amji to awcapàtkô” hane,

quê ha kam awcapàtkô cacrô,

wa ha nee apê ipimxur nare.

12 Ampo na?

He amã awcapàtkô kam ampo pimxur ata pimxur nare.

Ne amã awcapàtkôti ata pê amcro jõ apê.

Ne amã awcapàtkô me amcro pipēan.

13 Ne caa pê ca ahpÿanre na imã icukrã xà ton pa,

ne inxê cahã xà caxwãm pê ajkam ipyxwÿr pa.

14 Na wa itÿj amji mã apejti na garē.

Ampo na?

He ate ampo ton xà atajêcunea pihho

ne hahkre pej xà pimxur tu,

ne ajtea mã, ne quêt impejti.

Wa ite amji kam ijapac xà cunea to gápên xà ita na,

ite gahkre pej pejtu.

15 Pê ca inxê tu kam ihi ton xà me, ite amji jipêj xà na ipupu.

Pê wa aracri, jũm te ipupun nare kam,

inxê cahã xà kam ipicamēn to icati to mō.

16 Ne pê ca ipÿm xwÿjrea na ramã ipupu.

Ne caa ramã imã jũ mã ite amji to ipijapar xà na

amcro atajê na gã kàhhôc kam ihhôchiahpuro, mã hikwa,

cormã amcro jamre reria mã.

- ¹⁷ Pÿhàpà ijõ Pahpãm,
ate amji kam gapac xà itajê cunea jahkre pej xà jahkre kêatre!
Ne ampeaj kam hàhtô ne impej pit.
- ¹⁸ Wa ha hàhtô na ite hahkre pej prãmte cahyt xà na mã,
quê ha imã hàhtô pê ihhêj rùm pjênxôm carôt jàhtô.
Wa cahyt, ne cahyt,
ne neejũ caxuw cahyt jicu xà mã to mên nare,
ne kaam gôr.
Ne wa iràrà na ampra, ne hãn ne acahê na ipa,
ne ato amji japackre pyrentu.
- ¹⁹ Ỹhỹ ijõ Pahpãm,
he imã ate atỳj mehkrã kên te ampo kên ton to ipa atajê curan,
ne me to hamre na to prãm.
Ne imã ate me hàprêhtijũhcaprô prãmte atajê to
ipê gũjawry tu na to prãm,
mãr quê me hawry, wa icarĩcti na ipa.
- ²⁰ Ne me acurê xwỳn atajê ato mehcakôc xà kêanre to me ipa,
ne ihcaprỳ na gaprỳ to mehkêanre to me ipa.
- ²¹ Ijõ Pahhiti, pom ma ame acurê,
ne ma ame apynãr caca itajê ri,
ite hajỹar ne ihtỳj imã me curê, wa ma amehcaca!
- ²² Wa me curê xà cunea to me curê to ipa.
Ampo na?
He acurê xwỳn itajê pê hanea ne icurê xwỳn to icurê xwỳn.

- ²³ Ỹhỹ, ijõ Pahpãm!
Gapacta ne ikôpĩ ne icaxwỳn na awcapi,
ne ite amji kam ijapac xà cunea na ijahkre pej.
- ²⁴ Ne imã, ihhêaj to ite ijõ pry cupan xà nõ ata jarê,
ne quêt mehtĩr rohnỳtti mã xà ata jõ pry wỳr ca ito mō,
ne kam imê, wa ihkôt mō.

Pahpãm to me pajãmnãn na menrcer

145 ¹ Ijõ Pahpãm pê ri ijõ Pahhiti,
wa ha mehcunea kam mare mã acatihti ita na ana cre!
Wa ha jũ caxuw acati na garên to amji pê ijapac kêt nare,
wa ha quêt garên to ipa rohnỳtti mã.

- ² Ne amcro cunea kam wa apyrên ijakryti na amji jarê,
ne ato amji kam ijapac to ipa rohnỳtti mã.

- ³ Ijõ Pahhiti, ampeaj kam acati!
Na wa ite amã acatihti to icakôc xà ata na amã ihkên nare,
ne quêt acajpuaw.
Ne jũ wÿr wa me inõ amji mã hamã ne acatihti ita na gahkre pej.
- ⁴ Ne pom ate ampo pejti carôt tÿjti ton itajê cunea,
quê ha ihtÿj me hũmremehkra mã me harê,
quê ha me kampa.
Ne me taa, hanea ne mehkra mã me harê,
ne me to hajÿr to mör rohnÿtti mã.
- ⁵ Quê ha gâhcujrohti me apê Pahhiti pejti ita to mehçakôc.
Wa ha pa gâpên xà impejti itajê cunea kôt
itÿj ato amji kam ijapac to ipa.
- ⁶ Ne quê ha me taa mehcunea mã
gâpên xà carôt tÿjti atajê cunea kôt harên to me mō.
Na wa ha hanea ne me cuxà gâpên xà catia na garê,
ne mehcunea mã ato icakôc pejti ne.
- ⁷ Ne quê ha mehcunea ihtÿj me hirôa pê apejti ita na
me ato amji japackre xà kôt me amji mã,
amji kîn ton to me ipa.
Ne ihtÿj ate amji kam gapac xà cuhtacti ita na me cre.
- ⁸ Ỹhÿ me ikwÿ, Pahhiti pê jũm peaj to impej ata.
Ne nee cupê ampo kamincryc kam imprar pyrentu catê nare.
Ne cumã me pahkian to me pahkîn, mã ihtÿj me pahcaprî.
Ne hân ne hõtpê pahte me pahkên ton jicu jirô pê mã,
ihtÿj me pahkên to tojnõ, ne hicu.
- ⁹ Ne mehcunea mã impeaj to impej.
Ne cumã cute ampo cunea ton itajê caprî xà.
- ¹⁰ Hàpà me ijõ Pahhiti pê Pahpãm!
Wa ha pjê kam me icunea itÿj amji mã me acupa,
ne ato amji kam me ijapac prãmte me ana cre.
Ne me akwÿ cunea, quê ha apyrên me hakryti na me amã amji jarê.
- ¹¹ Quê ha me hirôa pê apê Pahhiti ita na
mehcunea amji mã me ato ihçakôc.
Ne ihtÿj acarôt tÿjti ita na amji mã me garê.
- ¹² Mår quê mehcunea
ate acarôt to gâpên xà ton atajê cunea na me apupu,
ne apê Pahhiti catihti ata na me gahkre pej.
Ne quê ha ihtÿj mehcunea mã
ahimpej xàjhçujro tetetti carôt tÿjti ata jahkre pej.

13 Ne ate me ito ahimpej xà ita jamre xà hamreare.
Ne apê Pahhi pê Pahhiti rohnÿtti mã.

ÿhÿ me ikwÿ, Pahpãm hãn ne ampo to awjahkre,
neihtÿj hõtpê harkwa ata to amji japackrea rûm ihkrĩ.
Ne cute ampo ton xà atajê cunea kam, cumã me pahkĩn pit.

14 Ne ihtÿj ampo kên mã mencjêj atajê tehcajpa,
ne ihtÿj hanea ne cute me to ihcupan atajê tehcajpa,
ne hacpÿa mã catyt kam me ipa na me to.

15 Por ampo cunea tĩar atajê,
ihtÿj hõ to hàpàn xà ata kõt Pahpãm pupu.
Ne cute me cumã ampo na me prãmtijõr xà atajê na ihtÿj me hikaj.
Mã hãn ne cute me cumã me hõ jõr xàa jõ amcro na mecumã cugõ.

16 Ne ihtÿj hãn ne hũhkra mã hikra, ne nee apu hũ intê nare,
cute ampo cunea tĩr atajê mã ampo na prãmti atajê jõr prãmte.

17 Pahhiti te ampo cunea ton xà caxuw ihcunea na catyt kam ipa,
ne ampeaj kam hàhcaprĩ.

Ne ampo cunea na cute me pahto impej, ne cumã me pahkĩn.

18 Ne por amji tehcajpar xà na ampeaj kam me cuwÿ atajê cahi na ipa,
cute mehtehcajpar prãmte.

19 Pahhiti ihtÿj cute amji mã me hũpahti atajê mã
ampo na me prãmti atajê gõ.

Ne ihtÿj me caràr kampa, ne hãn ne me hũtã.

20 Pahhiti ihtÿj me cumã ihkĩnti atajê tète amtã,
ne mehkĩnte mehkêanre atajê intête nee hàmtàr nare,
ne cama hãn ne me to hamre.

21 Ne ampo itajê cunea cwÿrjapê,
wa ha ijõtpê Pahhiti catihti na harên to ipa rohnÿtti mã.
Ne imã pjê ita cunea kam,
icuxà cute me Pahhiti japrÿ pejti na me harên na
me to prãm rohnÿtti mã.

XARÔMĂW

Pê Pahhi Cati

ÿuÿ, ihkàhhôc pijakrut itajê ri me pamã me cupê Ixaher catêjê jô pahhicatêjê to awjarê, na ri ihkàhhôc itajê japyrÿ te **Mam Pahhi Catêjê Jô Kàhhôc** (1 Pahhi Catêjê) me **Hapu na Pahhi Catêjê Jô Kàhhôc** (2 Pahhi Catêjê). Ne ihkàhhôc itajê kam pê Tawi xwÿ kra pê Xarômăw to me pamã awjarê.

Ne hanea ne ihkàhhôc pijakrut itajê nōa te mam pahhi catêjê na ihkàhhôc atajê jūjarēn xà jatujrehanea ne harēn. Cwÿrjapê ri ihkàhhôc itajê japyrÿ te **Mam Me Hūjarēn Xà Jô Kàhhôc** (1 Me Hūjarēn Xà) me **Hapu na me Hūjarēn Xà Jô Kàhhôc** (2 Me Hūjarēn Xà).

1 Pahhi Catêjê 3.5-13

Pê Xarômăw pê pahhi tuw ne cumã amji jahkre pej

3 Pê Tawi mă ihkra xūmre nō ita haprÿ Xarômăw, ne hūm tyc jakàn pê haxà kam amji to pahhi. Mă Pahpām te caxwa ri Xarômăwpimtir kam cumã amji to ipipê, ne cumã amji jarēn, quê rÿ mă ampo na cuwÿ, quê ha ihtÿj cumã ampo gō.

Mă Xarômăw cumã:

— Pê ca ampeaj kam inxū Tawi caxuw apej.
Ne ampo na mă, pê ca caxuw apej?
He pê ampeaj kam akampa na pê,
ne ampeaj kam cumã gahkre pej.
Cwÿrjapê pê ca amji mă to me akwÿ jô pahhi.

— Ne ipê ihhêj rūm cormã me hōkre nōrepyrãac,
ne cormã ipê ijūpar hamreare.
Ne ipê ate amji mă me capi itajê to ihmpej jahkre kêatre.
Pom me akwÿ jãhtōti itajêcaxuw
imã ite amji jahkre pejti gō.
Mār wa mehkên na me hahkre pej,
ne ahna mehcukij,
ne mempejti na me hahkre pej,

ne ahna mehcukij,
 ne ajpẽn pême to caprã,
 ne catyt kam ajpẽn kam me to ihmpej to ipa,
 ne ma ajpẽn na me hamã — hane.

Mã Pahpãm mã cute amji jarẽn xà ita na cumã ihkĩn, mã cumã:

— Wa ha amã ate amji jahkre pejti gõ,
 nãmri atea amji mã,
 ate amjijahkre pej pê ampo pejti ita capi,
 ne ahna gãhwÿr.
 Na wa ha mehcunea jirõa pê
 amã ate amji jahkre pej gõ.
 Ne hanea ne ate ampo na iwÿr nare ata,
 wa ha itÿj amã cugõ.
 Ne itÿj amã gакràjcatia ne cugõ,
 quẽ ha mehcunea ihtÿj amji mã me acupa — hajÿr.

Ne cute Xarõmãw mã ihkrã kre te amji jahkre pej catia ne hõr. Mã cute amjijahkre pejti.

1 Pahhi Catêjê 3.16-28

Pê Xarõmãw ajkam me cahãj pijakrut cukij

Mã amcro nõ na me cahãj pijapit xyre atajê pijakrut nepahhi Xarõmãw wÿr me cator, cute mehcukij prãmte. Mã pyxit ita te cumã harkwa to:

— Ýuÿ pahhiti, wa ikre pyxit peaj kam ajwar me ikrĩ, mã ajwar me imãme ikra pÿm. Mã caxwa ri cupê ihkra tyc, mã to hãm ne cute ipa kamhir, ne ma ipê ikra impÿn. Wa ipimprar ne tee apu to pijahõr to hahkre, mã ramã xãmte ihtyctu. Ne ahna apê, wa ite hõmpun, mã neecupê ikra nare, ne ihkra ri — hajÿr.

Mã ihnõ ata cumã:

— Quẽ, ihkraa ri cupê ihtyc, ne ihtĩr ita ri, ikra — hane.

Ne cormã me ajpẽn mãn kwÿa kam mã pahhi te harkwa to:

— Ajpẽn me imã wapo xwahhihti nõ to tẽ — hajÿr. Mã cumã hàpẽn catê nõ te cumã wapo xwahhihti pyr ne to tẽ.

Mã pahhi te cumã harkwa to:

— Hã, awryc mã me cumã to ahkrare nõita tĩar jipõ, ne ita mã hĩkjê gõ, ne ita mã hĩkjê gõ — hajÿr.

Mã ramã cute me to hipõn xàa kam, mãquêt inxi te harkwa to:

— Ame to hajÿr nare! Gapacta ne me cumã ihtĩar na agõ, nee ca mehcurannare! — hajÿr. Ne ampo na mã cute harkwa ita to hajÿr? Ampeaj kam cumã ihkra japê na ri.

Mã ihnõ ita te harkwa to:

— Nee to hõ tekjê nare, wa pa xwÿjê nee to itekjê nare ita kam, gapacta ne me to hipô — hajÿr.

Mã pahhi te cumã hàpên catê mã:

— Hã, nee to hipôn nare! Por pyjê nõ ihkratĩar na ahwÿ ata mã ca me agõ, nãmri cupêari ahkrare nõ ita nã — hajÿr.

Mã caxuaw Ixaher catêjê kam Xarômãw krã kreti na harên cahkũm pyrentu, mã mehcunea amjimã me hõ pahhi ata cupa. Ne pê Xarômãw ajco Pahpãm te cumã amji jahkre pej jõr xà ata kõt mehkwy cukij, ne mehkên me, mempej to ajcojkjê, ne maajpên na me hamã. Pê hanea ne ihkrã kreti kõt mehkwy japackre, ne ajco ihkãhhôc kam me hapackre xà atajê hôc.

1 Pahhi Catêjê 5-6

Pê Xarômãw cute Pahpãm to amji kam me hapac xà jũrkwa xãm

5-6 Ne pê caku atajêa kam Xarômãw Pahpãm mã kên te ikrepejti xãm, mãr quê kam Pahpãm to me amji kampa. Ne Xarômãw te ikre peaj ton na harkwa, ne me to hàpên catêjê mã:

— Ca ha me cumã pí tÿj pit pyxwÿr to mõ, ne kên jakati tÿjti impejtiata to pit mã me hahêr to mõ. Ne wakÿre prãti pê ôr ata to me catia neme to ikre ita xãm. Ne imã me hũrkwa cunea jirõa pê ikre ita peaj na to prãm. Ampo na? Imã Pahpãm kian to ihkĩn, na wa ha to hane — hajÿr.

Ne pê cute Pahpãm to amji kam me hapac xà jũrkwa ata na caku xet pê cormã amji jipêj. Ne pê wakÿre prã tepti pê ôr to pit mãikre kam me ampo atajê cunea jipêj.

Mã Pahpãm te Xarômãw wÿrharkwa kujahêc ne cumã:

“Ca ha ampeaj kam ate ikam gapac,
ne catyt kam ijarkwa kõt apa na,
wa ha itÿj, pom pê wa apãm xwÿ pê Tawi mã ijarkwa to icakôc ita to,
wa ha amãicakôc,
ne Ixaher catêjê cahê na ikrĩ,
ne jũ caxuw me cupê icator nare” hajÿr.

1 Pahhi Catêjê 8.1-6, 22-30

Pahpãm jàmçjên xà to ipintuw xà

8 Pê pĩ po te Pahpãm jàmçjên xà ata ampo kà te Pahpãm jũrkwa ata kamahtwỳ. Mã Xarômãw ma Pahpãm to amji kam hapac xà jũrkwa mã tohàr prãm, por cute kẽn me ôr to ikre tuw xãm ata wỳr. Ne cute Ixaher catêjê pê prohti kam me cupê pahhi catêjê to cuprõn, cute me ajpẽnpar, ne me Pahpãm jàmçjên xà ata to me ipintuw prãmte. Mã mehcunea Xarômãw te kẽn te Pahpãm mã hõ pyxwỳr xà ata cuna mã me xa ne me hõmpu.

Mã cute cõjkwa mã hũhkra pěr, ne Pahpãm mã ihcakõc, ne cumã:

— Hàpà, me ijõ Inxũ Cati,
apê Ixaher catêjê cuneaPãm Cati,
ne nee pjê mecõjkwa caxuw jũm hamreare,
ne apyxit peaj ca ampo cunea to ahimpej.
Ne amã me ikĩnti.
Ne ca ha me akwỳ mã ampo na amji to, ne atỳj to.
Ne por me hĩcunea to ame akĩn atajê mã,
ca ha ita kam,
pom pê ca inxũ Tawi xwỳ mãampo na amji to awjahkre ata,
ca ha atỳj imã to.

Yhỹ, Ixaher catêjê Pãm Cati,
ca ha ita kam,
pom pê ca inxũ Tawi xwỳ pê amã hàpên catê mã ampo na amji to
awjahkre ata,
ca ha atỳj imã to.
Quê ha Tawi kra nõ te gõ prya kõt ipa,
ne cute amã ampo na prãm atajê pit ton to ipa mã impàròpên,
quê ha ihtỳj cupê pahhi.

Ne ampeaj kam acati,
na quê nee cõjkwa ita acahuc nare,
ne quê ha nee hanea ne ikre itaacahuc nare cakrõ,
ca atỳj gõtpe me ipupu.
Ne wa ijõ Pahhiti, amã icakõc,
ca atỳj ikampa,
ne caxwa me amcro kam ma gũrkwa ita pupu.
Ampo na? He ca ramã ate atỳj ita ri apu apa na amji ton.

Ipê amã ijâpên catê,
 wa ita ri hãn ne amã icakôc,
 ca atỳj hãn ne ikampa.
 Ne quê hãn ne Ixaher catêjê pê me akwỳ ita ri,
 gũrkwa ita kam, me amã ihcakôc,
 ca atỳj cõjkwa rũm me kampa.
 Ne atỳj cute mehkên tonatajê to impej,
 ne to tojnõ ne hicu hiahpuro — hajỹr.

1 Pahhi Catêjê 11.1-13; 12.17-20

Pê Xarômãw pahpãm cahàc kĩn ita to apu amji to kên

11-12 Ne pê Xarômãw ramã hĩ tỳj tu ne hakràj cati, ne ajte amji pê Pahpãm tohapac kêt to mõ. Ne pê hũm Tawi xwỳ Pahpãm par pejti ata kaj na apu to.

Pê Xarômãw pjê jàhtõa jõ cuprỳ me hikwa. Ne pê pyjê jàhtõaatajê, nee ampeaj kam Pahpãm tíar kôt ame ipa nare, ne pahpãm cahàckrekà kôt pit mã ame ipa. Pê Pahpãm ramã mam Ixaher catêjê mã harkwa ta, mâr quênee pyjê cahkrit pê Ixaher catêjê nareatajê me, ame hikwa nare. Nãmri quê ha me cupêPahpãm na mehkwy nare atajême ame hikwa na, quê ha cama mehprõ itajê pahpãm cahàc krekà wỳr mempjê to apkjê, cupate pê Pahpãm ramã me cumã harkwa ta, quê me cupêPahpãm na mehkwy cahãj pit me, ame hikwa.

Pê Xarômãw ajte, cute mam me amji kam hapac xà kôt, ihprõ to hàhtõa to hàhtõ, ne hanea ne pyjê kwỳjàhtõa ne to ihpahàm nõ, pê hũrkwa kam mehkri. Ne mehprõ atajê pẽamji kõt me Xarômãw to me Pahpãm curê xwỳn, ne pea ihwej. Mãmehprõ itajê te amji kõt Pahpãm cuna mã Xarômãw te pahpãm cahàckrekà kĩn na me ton, pê hũm Tawi xwỳ Pahpãm kam hapac pejti ata kaj na.

Pê Xarômãw prõ itajê mã kên te me hõ pahpãm cahàckrekà itajê mã ahpãanre na hũrkwa pyxwỳr pa, cute kamamehkĩn prãmte. Ne me hõ pahpãm cahàc krekà atajê te amji kam me hapac xà kẽanre, ne mehaprỳ te, Axarot me, Camot me Moroc. Ne pê ajco cute amji to me pahpãm cahàc kẽanre krekà itajê cajpuaw prãmte, ihtỳj me ahkrareto me capa, mehtĩr kwỳa kam.

Mã Pahpãm apu Xarômãw kam incryac toincryc. Ampo na? Nee hipêr apu Ixahercatêjê Pãm Cati pê Pahpãm jarkwa kõtipa nare, ne mehprõ atajêa kôt apu ipa na ri. Cwỳrjapê ri Pahpãm te cumã harkwa to:

“Ca nee ite amã amji ton xà na,
 pahte ajpẽn par xà ata to amji japackre nare,
 ne nee ite ampo na amã ijarkwa ata par nare.

Cwÿrjapê wa ha nee amã akra to, meakwÿ mã pjê cunea jõ pahhi nare.

Quê ha me akwÿ kwÿa ajpên cuna mã mehcuhhê,
ne me ajpu, ne ihtÿj amji to me ajcokjê.

Na wa ha me amã pjêjipô,
mãr quê akra pê pjê jikjê jõ pahhi,
ne hĩkjê jõ pahhi ata
quê ha ajteare mã jũm to ihhimpej” hajÿr.

Xarômãw xwÿ himpej xà picapôn xà

Ne pahhi Xarômãw tyc jirô pê mã ri Canãn jõ pjê to ihhimpej xà ata picapôn, ne kÿj rũm hĩkjê ata japrÿ pê Ixaher, ne harã mãhĩkjê ata japrÿ te Juta. Ne Juta jõ pjê jõ pahhi ata pê ri Xarômãw kra, ne Ixaher jõ pjê jõ pahhi ata pê ri ajtea mã jũm ita.

Xarômãw Te

ME HAPACKRE XÀ

Jõ Kàhhôc

Ïhÿ, Tawi xwÿ kra krã kreti japrÿ te Xarômãw xwÿ pê Ixaher catêjê jô pahhiti catia, ne cute ihkrã kreti kôt ihkàhhôc to incrê ne ihhôc. Ne mam ita japrÿ te Xarômãw Te Me Hapackre Xà Jõ Kàhhôc (Me Hapackre Xà). Ne kaam ri Pahpãm jarkwa kôt, cute me pamã, pahte amji to me pahhimpej to me papa to hahkre. Ne pahte amji mã me Pahpãm cupa to me pamã hahkre.

Ne ihkôt ihkàhhôc nô ita ri Xarômãw te ramã ihwej tu kam, cute me pamã ihhôc. Ne me pamã me pahkamPahpãm nare kam, ihcunea na me pahkôt hamreare na to hahkre. Cwÿrjapê ri ihkàhhôc ita japrÿ te Xarômãw Te Ampo To Hahkre Xà Jõ Kàhhôc (To Hahkre Xà).

Ne ihkàhhôc crê ita kam ri cute me hikwa tuw jô increr na ihhôc, cwÿrjapê ri ihkàhhôc ita japrÿ te Xarômãw Crer Xà Jõ Kàhhôc (Xarômãw Crer Xà).

Pê Pahpãm Xarômãw mã cute amji jahkre pej catia ne cugô, cute ihkên tonxwÿjrea na. Ne ita caxuw Me Hapackre Xà ita kwÿ mã he.

Me Hapackre Xà 1.1-19

Me hapackre xà itajê ri ampo cunea caxuw impej

1 ¹Pê pahhi Xarômãw xwÿ pê pahhi Tawi xwÿ kra, ne cupê Ixahercatêjê jô pahhiti. Ne pê ihkrã krea to ihkrã kre, mehcunea jirôa pê, neajco cute me hapackre xà jarê, ne ahna ihhôc. ²Ne cute me pajapackre xà itajê, ihtÿj me pahkrã kreti me, cuteme pajapackre xà impejti itajê jahkre pej na me pahtehcajpa, ne hanea necute me pajapackre xà kam me pajapac jahkre kêatre atajê jahkre pej na, mepahtehcajpa. ³Ne cute me pajapackre xà itajê, ihtÿj ihcunea na catyt kam pahteamji to me papijapar pejti to me pamã hahkre. Ne hanea ne me pahkwÿ to me pahhêj xi nare kam, catyt kam pahte me to papipênti to me papa to mepamã hahkre. Ne pê Xarômãw xwÿ mã, cute me amji kam me hapac xà impejtito me ipa na me to prãm, na pê me hapackre to hane he.

Xarômăw mã ampo cunea jahkre pej na me to prām

⁴Imã me cupê ampo jahkre kêatre atajê te me ampo cunea jahkre pej na me to prām. Ne imăcormã mentuwre, mehka to me ipa atajê jūpar pejti na me to prām to, wa me cumã mehkrã kên cawpa to ipa. Ne imã catyt kam, cute amji kam mehapac xà to, amji to me ipijapar na me to prām. ⁵⁻⁶Ne por ramã mehkrã kre atajê ri, cute mehkrã kreti to me amjimã me ipicamēn na, imã me to prām. Ne imã cormã cutemehkrã kre itajêto me hahkre, ne caxwām catia mã me hūpar na, imã me to prām, cwýrjapê wa itajê cunea na me cumã ihhōc.

Cu ha amji mã me Pahpām cupahti to me papa

⁷Ŷhỹ, ca ha akrã kre to prām, ne mam cati mã Pahhiti pê Pahpām toamji mã ahimpej to apa, ne amji mã hūpahti to apa. Ne nee apê, por cute me amji jahkre kêatre te ma ame hūpar pejti caca atajê pyrãc nare.

⁸⁻⁹Ne anã me apām te amãampo to hahkre xà atajê na, ca impar to impeaj ne. Quêha mehccunea ahna me apupu, ne me gahkre pej, ne apejti na amji mã me garê.

¹⁰Quê ha jūmjê krã kêanre atajê kwý me acapi prāmte, cute me amji kam hapac xà kêanre ton xà ata wýr me gato, ca ha ma apu gitôt. ¹¹⁻¹⁵Quê te me amã:

— Hacme ne amji kīn ata na ame jūmjê cura, ne ame cupê ampo kwý to ahkī, ne amji mã ame toajcrã, ne ahnaa me pajūrkwã to amji mã me hakrãj — hajýr cakrô, ca ha nee mempar nare, ne nee mehkhôt amji ton nare. Ca ha me cupê ampýa mã apu apa. ¹⁶Ne pom mehkhêanre itajê mã me hūjarêan kam, cute ampo kên to mehcuranto prām, ne ihtýj toa mehcura.

¹⁷Quê ha pryjara nō te, ate cumã to catêc xà inxôr na apupun na, quê ha nee hýrmã ihtēm nare, ne ma tē ne hawrya ne apu kwý. ¹⁸Ne me hūmre itajê te ihtýj mehkwý mã me catêtêc xà jaxôrna amji to me hane, ne aracri cute amji mãa me to haxôr. ¹⁹Ne por amji to me hakrãj prāmte mehcuran to me ipa itajê, quê ha ihtýj jūm me hipej xà kêanre to me hipej.

Me Hapackre Xà 3.1-18

Mentuwjê japackre xà

3 ¹Ŷuỹ me ikra, nee ca ite me gapackre xà ita to amji pê me gapac kêt nare, ne ite me amã ijarkwa jirên itajê, ca ha amji mã me huwahi. ²Ampo na? He quê ha ihtýj ate amji to me apijapar to me caku jáhtôa na, me atehcajpa. Na ca ha ate ihkôt me ampo ton to me hahkre na, quê ha ihtýj ihkôtme amã ampo. ³Ne quê hōtpê amã mehccunea kīnti ne, ne

hanea ne jũm mã ampo to awjahkre, ne atỳj ate amji ton xà ata na amji jarkwa na amji par to apa. Ne hõtpê ita to apa to, nee amji pê gapac kêt nare. ⁴Hõ, ca ha ate hajỳr to apa na, quê ha Pahpãm ihtỳj ato impej. NePahpãm me, mehcunea, quê ha me garẽn pejti to me ipa.

⁵Ca ha gĩ cunea to Pahpãm tĩr rohnỳtti mã ata kam gapac to impeaj to apa, ne nee ca amjia kõt akrã kre na amji ton to apa nare. ⁶Ne ca ha ate ampo ton xà atajê cunea kam amjicaxuw Pahpãm cukij na, quê ha ihtỳj amã hõ prya jahkre.

⁷Ne nee ca ate amji jahkre pejti na apu amji to hajỳr nare, ne cama amji mã Pahpãm tĩr rohnỳtti mã ata cupa to apa. Ne nee ate ampoto ihcupan xà atajê nõ ton nare.

⁸Ca gõtpe mehxêt cahê xà pejti to amji mã axêt cahhê, mãr quê amãto incrí, ca quêt acapẽnti na apu apa, ita jĩkjê na, ca ha ite amã ate ampo ton xà na ijũjahkre itajê kõt ate apa na, quê ha ihtỳj amã, ate amji kam gapac xà kẽanre to impej.

⁹Ne Pahpãm mã ca ha impejti to acakõc to apa. Ne cumã mam gõ pjê kam gãprã kam gõ atajê jõr to apa. ¹⁰Ca ha ate itajê to hajỳr na, quê ha gũrkwa kam amã arỳjhy hipu tu ne, ne ampeaj kam gõ pur kamamã pĩxõ hàhtõa to hàhtõ, quê ihhêaj togũrkwa nee amã cahuc nare.

¹¹Ikra, quê hãn ne Pahpãm pê Pahhiti ata gũpar pejti xà caxuw, amji mãato ihhimpej xà to, ca ha ate kam gapac nare na, quê ha ihtỳj akàj xà na ato, ca ha akàj xà. Ne akàj xà ata kõt ca ha ampeaj kam amji mã kampa, ne cute amji to amã hahkre na amji mã to hane. ¹²Nãmri Pahpãm pê Pahhiti ata mã mehkĩnti atajê to ihtỳj hàpẽn xà tonto ipa, ahnaa mã me hũmjê amji mã mehkra to impejti prãmte, hãn ne mehkra to me hàpẽn to me ipa he, me hũpar prãmte. Ampo na? He cumãmehkĩnti na ri ihtỳj me to hajỳr to ipa.

¹³Ne por mehkřã kreti atajê ri me hakryti, ne ihtỳj me cumã ampo cunea kõt hakop jahkre pejti. ¹⁴Ne pom mehkřã kreti itajê mã ri ihpore cati ata me, kẽn prã tepti pẽõr atajê jirõa pê cati ne impej, ne ahna hĩ jãhwỳrti. ¹⁵Ne pom me hũpar te amji jahkre pejti itajê ri me hõkre xê xà prãti itajê jirõa pê impej. Nepom cu amjia kõt ame ampo pejti na prãm itajê, neeimpej te me pahte amji kam me pajapac xà impejti ita cahuc, ne to ipipẽn nare.

¹⁶He me pahkrã kreti ita ihtỳj caku jãhtõa kam, pahte amji to papijaparna me pahto, ne hanea ne me pajakrãj na me pahto, ne mehcunea te me pampejti na me pahpupun na me pahto. ¹⁷Ne me pahkrã kreti ita ihtỳj me pamã pahte amji mã, pahte amji kam me pajapac xãkĩnti ata na me pahto, ne ihtỳjcatyt kam, me pahcarĩcti kam, me pahte ampo cunea ton xà atajê na me pahtehcajpar to ipa. ¹⁸Ne por ampeaj kam me hũpar te amji jahkre pej krã kre atajê ri me hakrya to me hakry, mã ihtỳj mehkřã kre ita me cumã cute amji kam me hapac xà jõr to ipa.

Me Hapackre Xà 7.1-27

Pyjê xyre pijapit tête mentuwjê japackre xà

7 ¹Yhỹ ikra, ite amã ampo jarên itajê to amji japackrea ne, ne nee jũ caxuwite gapackre xà itajê to gapac kêt nare. ²Ne pom wa amã ampo jarê itajê, ca ha to, ne atiar na amji to apijaparita na. Ne ite amã ampo to hahkre itajêa kôt, ca ha amji to guphê to hanea, pom ca ato to guphê he. ³Wa amã ampo jarê itajê, ca ha akrãa kam amji mã anõ, ne ma gĩ cunea to, amcro cunea kam, gâpên xà cunea kam to amji japackre. ⁴Ne ate ampo jahkre pejti ita to, ca ha ihhêj rûm amji mã atôj, ne cahi na apu apa. Ne ate ampo par pejti ita to, ca ha amji mã akwỳ nõ to impeaj ne, ne cume ajwar apu apa. ⁵Quê ha pyjê inxyre kêanre atajê pê ampÿa mã ato ajrõ. Ne pyjê te mehhêj xi to me hũmre mãamji to hàkjêr prãmti atajê pê, ampÿa mã ato ipa.

Cahãj xyre pijapit te amji kam hapac xà kên

⁶Pê wa jũ ata caxuw ijũrkwa jarkwa mã xa, ne apu rĩt. ⁷Ne mentuwjê jãhtõa ne me hõmpu, por cormã mehkrã kre nare atajê kwỳ. Ne ite mehnõ pyxit krã nare ata mã icator ne hahkre pej, ne ampeaj kam ri ihkrã nare. ⁸⁻⁹Pê mentuwjê nõ itaapu krĩ cape na mõ, pry japôj na, ne ma, por jũm cahãjihkrĩ ata jũrkwa cahi na mõ, mã ramã ahna caxwa to mõ. ¹⁰Mã pyjê nõ inxyre pijapit te amji kam hapac xà kêanre ata te ihkã impejti nõ ata mãamji jaxàr, ne ma cuna mã mõ, ne cute me ajpên cajpar. ¹¹Ne cahãj xyre pijapit ata pê amji wỳr me hũmre na hàhwỳr catê, na pê nee ihpahàmna, ne ihkrãhhia kam ajco me hũmre cukij, ne ma ajco krĩ cape na apu ipa. ¹²Ne hãn ne ajco pry japôaj na hirãa pê ame hikaj to ipa, ne por jũ ri me hũmre me cuprõ ata ri, hirãa pê ame hikaj to ipa.

¹³Ne mentuwjê nõ ita cator, mã cute impÿn ne cahõr, ne ihcakõc xà na ihpahàm nare ata to cumã:

¹⁴— Ita caxuw imã amji kĩn jõ catia ne hàhhuc, ne imã hĩa to hĩ.

¹⁵Cwỳrjapê wa ajpên apu gapên to mõ. Ne wa tee apu acajpar to prãmto ipa. Ne hamre, ita caxuw pahte ajpên cajpar! ¹⁶Ne ramã ite, por ihneat rûm cupêhkã impejti krorti cator ata to panõr xà cahty. ¹⁷Ne ite ampo cacõ cuxwati ata to panõr xà ita cuxwa. ¹⁸Ajpên ikôt mõ, cu ha ita kam amji to pahpahàm nõa to apê, ne ajwar ajpên pyrên pajakryti ne. ¹⁹Ipjê nee ijũrkwa kam apu mõr nare, ne ma ihtêm xà jũwrya wỳr amũ tẽ. ²⁰Ne cute ihpore catia ne ipyr ne amũ to tẽ, ne quê ha jũ mã amji to amcro to, ne cormã hacpỹ ne amji jaxà — hajỹr.

²¹Ne cute ihhêj xi xà atajê to ihcajpêar prãmtecama cumã ihhêj xi. Mã pea cute ahna amji caxàr. ²²Ne ahna ahtũm nare mã ma ihkôt mõ, ne

ihhêj rûm cupê pryti te apuihcuran xà wÿr ipa, ne ihhêj rûm cupê ampo pry te catêtêc xà wÿr apu ipicahur. ²³Por curi ampo te hapôc tu xà ata wÿr. Ne ihhêj rûm cupê cuwênre te ihpro xà na, nee amji jahkre pej nare kam apu imprar ata na, pê wa hõmpun to hane.

²⁴Ikra, ita caxuw ikam gapac to impeaj ne, ne ma ihkôt hakop, pom wa amã ampo jarê itajê kôt. ²⁵Ne nee amji na pyjê nõ te hajÿr ata jamãr quê apê gĩ te amji kam hapac xà pyr nare, ne nee apu pyjê te hajÿrjê kôt apa prãm nare. ²⁶Ramã me hũmre kwÿ te pyjê nõ ata cwÿrjapê amji na mehpahàm catia incwÿr. Ne ramã incwÿrjapê mehtyc atajê jãhtôa, ca nee me hàhtô na me cahyt par nare. ²⁷Ca ha ate pyjê te hajÿrjêjürkwa wÿr apa na, ca ha ramã mehtyc jõpjê wÿr, ca ha apa, ne amã gõ pry hatujre ne.

Me Hapackre Xà 9.1-18

Pahpãm te amji jahkre pej catia

9 ¹⁻²Pahpãm pyxit peaj ne cute amji jahkre pej catia to cati. Ne cumãa ri jũ mã pahte amji kam me pajapac xà ata na me pajahkre pej. Ne cupêari me pahkrã kreti to cute me pamã hahkre catê, na cu catyt kam ihkôt me papajahkre pej.

Pahpãm te amji jahkre pej catia ata pê me hũmre nõ te hũrkwati catia ton, ne kam amji kĩn nõ ton ata pyrãac. Ne cute me hõ jãhtôa to cuprõn, ne hàpàn xà na me cumã hãm. ³⁻⁶Ne hanea ne cute cumã me hàpên catêjê kwÿ kujahêc, krĩ cape na, mãame cumã me hàkjêr to me pra, mã cute me to cuprõn xà caxuw me cumã:

— Me amã prãm, ne me amã kôr atajê! Ajpên ijürkwa wÿr ame pra neame apa ne ame ikõ! — hajÿr.

Ita jĩkjê na mã Pahpãm te me pamã ampo to hahkre xà itajê pê me pajõ pyrãac. Ne ihtÿj me pamã to hàkjêr to ipa ne me pamã:

— Ate me amji jahkre kêatre ne me akrã nare atajê! Ajpên iwÿr me apkjê, ne ite me amã ikrã kreti to hahkre xà ita na me ikampa, ne ateme amji jahkre kêt itajê mã me hikra. Ne catyt kam amji to me ajpa. Ne me akrã kreti itajê to me hahkre, ne me hahkre pej. Ampo na? Me akrã kreti itajêa kôt ca ha quêt me apej pêa mã me apa — hajÿr.

⁷Yuÿ me ikwÿ, ca ha mehkêanre nõ to ate impejti to prãmte cumã, cute amji kam hapac xà pejti to hahkre, quê ha cama ajte apu akam incryc, ne ihtÿj apu ato kên prãm. Ca ha ate jũm te hajÿr to impej prãm to apu amõr na, ca ha caa apu amji to akênjapên to mõ, ne apu apahàm. ⁸Cwÿrjapê ca ha cute me hajÿr catêjê to tojnõ, ne nee apu catàtkrena me acjêj nare. Ampo na? Nee mã ampo na nare, ca ha ate ampo kên tète cumãn jahpan xà na, quê ha ihtÿj apu acurê.

Ne mehkrã kreti te nee mehajÿr nare. Ca ha ampo kên tète cumã, quê ha ate ampo kên tète cumãn xà ita jahpan xàna, ihtÿj cumã akîn. ⁹Ne me hũpar pejti catêjê ca ha me jũm japackre, quê ha hipêr me hũparkrã kreti ata to amji mã me ajcamê. Ne me hũmre catyt kam me ipa atajê quê ha hipêr me hũpar to me ajcamê, ne catyt kam ame ipa.

¹⁰Ne quê ha jũmjê amji to ihkrã kreti to prãm, ne mam cati mã amji mã Pahpãm cupahiti to ipa. Ÿuÿ, por jũm amji mã Pahpãm pejti cupa ata, quê ha ihtÿj cute amji kam hapac xà impejti te Pahpãmcajpuaw ata to amji to ajpa. ¹¹Ne mehkrã kreti atajê, mehkrã kre atajêa mehtehcajpa, mã amji to meipijapar to me iryã to me iry.

¹²Ca ha ate amji mã Pahpãm krã kre te amji jahkre pejti ata pyr na, ca ha atÿj to amji mã ampopejti jãhtôa ne to. Nãmri ca ha ate amji pê Pahpãm krã kreti ita caca na, ca ha me pahcurê xwÿn pê Xatanaj te amji kam hapac xà kêanreata py ne caa akên mã amji jaxã.

¹³Ne Xatanaj ata pê ihhêj rũm jũm cahãj xyre ata pyrãac, mã me hũmre to hapactu to pit mã amji kampa, ne ma apu Pahpãm kôtampo pej krã kreti itajê to amji kam hapac caca. ¹⁴Ne hãn ne ikre jarkwa mã ihkrĩ to ipa, ne krĩ cape te amji jacjên kam ipa. ¹⁵Ne hãn ne me hũmre, cute amji kamme hapac xà wÿr me pra atajê jator to me cumã hàkjêrto ipa. ¹⁶Ne cute me amji cajpêr, krã kre nare atajê mã harkwa to:

— Ajpên ijũrkwa wÿr ikôt mō, ne ipjê pê ina gãhkra! ¹⁷He, ampo to me pajãhkĩj itajê ri quêt impej! Ne kwÿr te pro to me pajãhkĩj itajê ri quêt papimxuar pê pahte mehkur xà, ne ampeaj kam cuxwa! — hane. ¹⁸Mã me hũmre jãhtôa ne hãn ne ihtÿj me kampa, ne amji mã me to hane, ne ma mehtyc xà wÿr me pra, cute me amji jahkre pej nare kam. Ne ramã me hàhtôa te amji mãmehkên xà ita capi, na quê ha ma jũ caxuw cuhy tyc xànare ata wÿr me pra.

Me Hapackre Xà 10.1-32

Ampo kwÿ jãhtôa to me hapackre xà

10 ¹Ÿhÿ, jũm xũmre mã ihkra krã kreti ata pê, hũm me inxi mã amji kĩnti ton catê.

Ne ihkĩnte jũm kra krã kêanre, jũpar nare ata pê ri hũm me inxi mã amji kĩn nare ton catê.

²Ne por mehhêj xi xà jãhkĩj kôt amji to me hakràj atajê, mã nee me hakryti xà nare.

Ne quêt catyt kam me ipa xà ata pê ri me hakryti me, mecaxwãm pê me carĩcti ton xà.

3 Ne Pahpãm pê Pahhiti ata nee hãn ne prãm te mempejti curan na me hamãr nare.

Ne mehkên catêjê te amji mã ampo na mehprãmti atajê ri, Pahpãm ma ame cupê intê, ne intête ame to jũa mã, mempejti atajê kĩnte.

4 Ne cute me xuwcacati atajê pê ri ampo hamreare.

Ne quêt me hãpên prãmti catêjê mã ri, ampeaj kam ampo mã me to hakràj.

5 Ne por jũm ampeaj kam amji kampa ata ri, hãn ne hàprà kêhkên xà jõ amcro na ihkêhkê.

Mã hàprà kêhkên xà jõ amcro kam hãn ne hõtswana to hõtwa mã gôr ata ri, cama ihkĩnte amji na ihpahàm rê.

6 Pahpãm hãn ne ihcunea na mempejti catêjê to impej.

Ne mehkêanre catêjê ri mempejti kĩnte me harkwa pejti kam, cute amji kam me hapac xà jãprêhti itajê to me amxu.

7 Ne mempejti catêjê to, nee me hapac kêt xà nare.

Kĩntee mã ri mehkêanre catêjê to, ihtỳj me hapac kêt xà.

8 Me hũmre krã kreti atajê ri, ihtỳj me hakrya kam amji mã, cute me hapackre xà atajê incwa.

Kĩntee mã, quê ha jũmjê amji to mehkrã kreti pyrentu prãm atajê me amji jarên to:

“Wa ramã ite itajê impar jahkre pejtu” hajỳr na, quê ha taa ramã amjia pê, cute amji kam hapac xà caca to mō.

9 Ne por jũm mã cute amji kam hapac xà impejti jahkre pejti ata, quê ha nee apu amji mã ampo cupa to hajỳr nare.

Kĩntee mã quê ha jũm apu ihhêj xi tomō ata, quê ha ihtỳj ihkên mã me axà.

10 Quê ha jũm te ampo kên na jũm pupun, ne nee intête cumãn nare na, quêha ihtỳj jũm ata cama amji mã ihkên to ajcamê.

Ne quêt quê ha jũm ampo kên tete me cumãn kam incrà, quê ha cama mehkwy to impejti japên to ipa.

11 Ne por catyt kam me hũmre cakôc xà impejti ata, ihtỳj mehkwy te catyt kam me ipa na mehtehcajpa.

Kĩntee mã ri me hũmre cakôc xà kêanre atajê, cama mehkwy to kêanre to prãm to me ipa, ne cumã hàwxũn me, me to kên pit jahkre pej.

- 12 Me pancryc me, pahte me pahkwỳ curê me, pahte me ajpẽn par nare ita, ihtỳj me papijapu na me pahto.
Ne me pahte me ajpẽn kĩnti ata pê ri quêtpahte me pahkên cunea to me pajapac kêt xà.
- 13 Ne mehkrã kre cakôc xà atajê cunea kam ri quêt me pamã amji jahkre pej pit.
Ne mehcakôc xà krã kêanre atajê pê ri mehkĩnte cama mehkên mã me irẽn xà.
- 14 Ne cute me amji jahkre pejti atajê ri, hãn ne amji mã, cute mempejti atajê pupun xà cunea kôt amji mã me nõi to me ipa.
Ne mehkrã kêanre catêjê ri, mehkĩnte nee me harkwa kôt hakop nare kam, hãn ne me to ihcakôc to me ipa, ne toa amji mã mehphàmti ton to me ipa.
- 15 Ne me hakràjti atajê ri, me hakràj te amji kam hapac xaa to me amji kampa.
Ne me cupê hamreare atajê ri, mehkĩnte hãn ne me cupêhamreare te amji kam hapac xaa to me amji kampa.
- 16 Ne mempejti jàpên xà atajêa, hãn ne me to ajcamê.
Ne mehkêanre atajê ri mehkĩnte, pom mam mehkên xà itajê jirôa pê, amji mã mehkên to me ajcamê.
- 17 Ne por ampo kên tète mehkwy mã, mã ahnaa me ampo jicu atajê, quê ha me hõ pry pejti kôt me ipa.
Ne por ampo tète me cumã, mã nee me hũparnare atajê, quê ha mehkĩnte me hõ pry cupa ne mehkên mã me acjêj.
- 18 Ne mehhêj xiti atajê ri hãn ne me harkwa hêj xia to mehkwy kam incryc to me amxu.
Ne hãn ne ampo kên na mehkwy jarẽn pa, ne amjia kôthãn ne me to cati to mençràn to ipa atajê ri mehkrã nare.
- 19 Ca ha acakôc xà to ihcupan to cati, ca ha amji mã akên xà to cati.
Nãmri ca ha ate akrã kre na, ca ha ma garkwa kên to acakôc na amjijamã, ne garkwa cakôc xà impej to pit mã acakôc to apa.
- 20 Ne mempejti cakôc xà kôt ihtỳj ampo pejti hapôj, ne cupê ihhêj rũm wakỳre prà pejti ata, necupê ahna hĩ jàhwỳrti ata pyrãac.
Ne mehkên catêjê cakôc xà ri ihkĩnte ihkôt hamreare.

- 21 Ne mempejti cakôc xà ri me hàhtôa ne me to impej.
Ne mehkêanre catêjê cakôc xà ri mehkînte, ma mehtyc xà wÿr me to ipa.
- 22 Ne me Pahpãm tîr rohnÿtti mã ata, ihtÿj caku cunea kam amã ate amji kam me gapac xà to ipicamên to ihcuhê tu.
Ne jÿ wÿr quê iràn xàna, ampo me amã acaca xà te hajÿr xà ita to.
- 23 Ne me hàprêhti atajê mã, me hàprê xà ata pê ihhêj rÿm me hapactu xà, ne me cumã ihkîn.
Jîkjê na ri, mehkîrã kreti atajê mã cute amji kam mehapac xà impejti atajê, mã hÿrên ame hakry.
- 24 Mehkên catêjê mã ihtÿj ampo cupaa to hÿpa, ne cumã hÿpahti ata quê ha ihtÿj to hanea to, to hane.
Ne mempejti atajê ri quêt ihtÿjcute me amji kam hapac xà impejti na me hapôj.
- 25 Quê ha kôc pahtÿjti ajpên mō ne cato, ne mehkên to hamre tu.
Ne quêt mempejti krã kreti atajê, quê ha ihtÿj amehcuhê, quê ha neekôcti ata jÿmjê atajê rên, ne me to ihtêm nare.
- 26 Ca ha nee jÿ caxuw ampo ton xà ata wÿr jÿm te xuwcacati ata kujahêc nare.
Ampo na? He cute me hajÿr catêjê pê ihhêj rÿm ampo cacô te me wa cahhêc xà, nare, me cupê ihhêj rÿm me panto kam cuhy kÿm, ne ihtÿj ihhahac.
- 27 Ne por jÿm amji mã Pahpãm tîr rohnÿtti mã cupahti ata mã, cute amji to ipijapar xà japjêa to hapjê.
Ne por mehkîrã kêanre, ne nee amji mã Pahpãm cupa nare atajê, quê ha mehkînte, cute amji mã me to amcro hyr xà ata japyre mã me ty.
- 28 Ne por mempejti atajê ri ihtÿj cute me ampo pejti cwÿr xà atajê jikaj, ne ihtÿj hân ne me cucwa.
Ne mehkên catêjê te nee me hajÿr nare, na quê ha nee jÿ caxuw me ampo pyr nare.
- 29 Pahpãm tîr rohnÿtti mã ata ihtÿj mempej pytà.
Ne mehkînte mehkên catêjê mã ihtÿj mehpahàmti gō.
- 30 Ne por catyt kam me ipa atajê mã ri ihtÿj mehkîrã xà.

Ne mehkĩnte mehkêanre atajê pê ri mehkřĩ xà hamreare, ne nee mehkřĩ kam mencrã xà hamreare.

³¹ Ne por mehkřã kre te amji jahkre pejti atajê mã ri, ihtỳj mehcakôc xà krã kreti to me hapackre xà.

Ne por mehkêan kam ampo kêanre to mehapackre to me ipa atajê, quê ha ihtỳj mehkên xà kêanre atajê mã me amji gõ.

³² Me hũmre krã kreti atajê, ihtỳj hãn ne mehcakôc xà kam me hapac prãm̃ti atajê to, me cumã mehcakôc.

Ne mehkřã kêanre atajê ri ihkĩntecama me harkwa kêanre to mehkwy kên mã curê.

Me Hapackre Xà 22.17-29

Xarômãw te mehkwy japackre xà te trĩnta itajê

22 ¹⁷Me ikampa. He wa ha me amã mehkřã kreti te me hapackre xà itajê to hahkre. Ca ha ampeaj kam, cute me hapackre xà impejti itajê to me hahkre, ne ate mehahkre pej na, ca ha ihkôat me amji jahkre pej. ¹⁸Ne ate to amji japackre xà ata kam, quê ha ampeaj kam amã mehkĩn na, ca ha atỳj ihkôat me apa, ne toa me acakôc to me apa. ¹⁹⁻²⁰Wa ha ita kam me amã me hapackre xà itajê to hahkre, mār ca Pahpãm to pit mãamji mã me ahimpej, ne toa amji mã me ahimpej to me apa. Ne wa ha, ite me gapackre xà te trĩnta itajê na, me amã ihhôc. Quê ha taa amji to me amã hahkre, ne ihtỳj me gapackre xà impejti to me gapackre. ²¹Ata quê ha ihtỳj catyt kam ate amji kam gapac xà impejti to me apa jahkre pej na, me atehcajpa. Quê ha jũm te ahna me acukij na, quê ha ihtỳj amã catytkam, ate me cumã harên xà atajê hahkre pej.

²²⁻²³Nee ca ha me cupê hamreare atajê pê hamreare na harên xà kôt ame to kêanre nare. Ne nee cute mehcukij xà kam, cute me amji pytãr xà caxuw mecupê hamreare atajê to, ame amji to pejpej nare. Côt mã Pahpãm ihkrĩ rohnỳtti mã ata me hũtã, ne mencwỳrjapê cute me cupê hamreare atajê mã amji cawpa catêjê atajê to kêanre ne.

²⁴⁻²⁵Ne nee me hũmre jãprêhti incryc xiti atajê to ame amji kwỳ nõ prãm nare. Côt ca ihhêaj to amji mã cute amji kam hapac xà atajê incwa, neihkôt apu apa, ne nee jũ caxuw cupê acator nare.

²⁶⁻²⁷Ca ha nee jũm jũ jahpan xà na, gãmjôr na amji ton nare. Ampo na? Ca ihhêaj to gãmjôr nare, quê ha ihtỳj cute to new ata jahpan xà na, amji mã apê gikwa xà cunea to cuto tu.

²⁸Ca ha nee me aquêtjê te me amã pjê rer ata hyr xà jirô pê to apỳm nare, ne nee acahê na jũm jô pjê ata to cupê incri nare.

²⁹Xà ajkĩ jũm te hâpên xà to impejti ata na amãhahkre pej? Quê ha ahtũm nare, quê ha hâpên xà impejti to cute hâpên xà ton ata na, me hõmpu. Quê ha pahhicati impej nõ amji mã to cumã hâpên catê, quê ha cumã apê.

Me Hapackre Xà 23.1-35

23 ¹⁻³Quê ha jũm jàmkrã cati te amji cahê na gâpên xà na gator na, ca ha ma hãmkrã cati ata na to amji japackrea ne. Ca ha ate gâpân cati na, ca ha nee cuna mã gâpân cati nare. Ca ha nee cupê cute hõ kur xà ata kur to gũjarên nare. Ampo na? Quê ihhêaj to cute amã ihhêj prãmte quê gato.

⁴⁻⁵Nee ca amji to gakràj prãmte, gâpên xà toamji curan prãm nare, ne nee to pit mã, amji mã ahimpej to apa nare. Ampo na? Quê ihhêaj to gõ pore ita ihtỳj kam hara to hanea, pom quê hàcti kam hara mã to he. Ne ma to, ne apê ampýa mã apu ipa.

⁶⁻⁸Ne nee ca cute me hakràj cati to pit mã me amjikam hapac atajê cahê nagâpân to prãm nare. Ca ihhêaj to ate cahê na gâpân na, ca ha nee cumã hõ impejti ata kur to gũjarên prãmnare. Cõt mã amã:

— Hipêr incirre ne krê — hane, ne cama apu amã ihhêj. Cute hõ ata jahpan xà naapê ampo catia pyr prãmte ri amã ihhêj. Ca ha ate ihkõt amji kam gapac, ne atỳj gartecatı na, quê ha pea hõ ata jahpan xà na ana ahwỳ. Ca ha ate hacpýa mã cumã hõ ata jõr xà na, atỳj to gõjahĩr prãm. Quê ha ampeaj kam cama akamincryc, ne nee ate cumã acakõc xà ata na apar nare.

⁹Nee ca apu cute me amji mã hamãr nare atajê me, nee catyt kam me ipa toprãm nare atajê mã, acakõc xà krã kretiatajê to acakõc nare, cute me apar to mã apu.

¹⁰⁻¹¹Ne nee ca me huwatĩ atajê pê me hõ pur to gâhkĩj prãmte, gõ pur hyr xà to apintuw, ne me hõ pur kam hãm nare. Ampo na? He por ihtỳj Pahpãm me huwatĩ to ajpa, ne me hamã, ata quêihtỳj mehtehcajpa, quê me ahna apupu ne ate me to amji kam gapac xà ata to ana apkjê, ne to akên mã amê.

¹²Ampeaj kam cute me amji jahkre pej catêjê te me amã ampo to hahkre xà atajê na me kampa, ne hahkre pej ne amji mã anõ, ca ha quêt mã ca, amji krã krea japê.

¹³⁻¹⁴Ne nee ca akra japackre jicu nare. Nãmri quê ha cute apar nare na, ca ha atỳj hũhcatêtêc. Quê ha ate hũhcatêtêc ita nee ihcuran nare. Quê ha cama to ihtyc xà jahpa.

¹⁵⁻¹⁶Yũy, ikra xũmre. Ca ha ate akrã kreti na, wa ha ampeaj kam apyrên ijakry, ate acakõc xà krã kreti to acakõc ata pyrên. Ne wa ha itỳj ijakryti na amji cajpê.

¹⁷⁻¹⁸ Nee ca mehkên ton catêjê jũ na, cute amehkên ton xà atajê kĩn nare. Ate amji mã Pahpãm cupahti na, ca ha amcro cunea kam amji to ahcukij. Ita na quê ha acumam amã ate amji kam gapac xà impejti ne, ne por ca ampo pejti jikaj atajê, ca ha atỳj acwa.

¹⁹⁻²¹ Ýhỹ, ikra xũmre ikampa. Ca ha ate amji jahkre pej na, ca ha atỳj caxwãm catia mã amji kampa. Ne nee apu cute me cõxỹhti xenti catêjê kôt apa nare, ne nee ame hõ to mehtũm prãmti jàpàn catihti atajê kôt me apa na me amji to prãm nare. Ampo na! Pom cute me cõxỹhti xenti atajê me, caxuw me hàpàn catihti atajê, ampeaj kam me hõtswa, mã cama me hikwa ne ame gõr. Ne me cupê ampohamreare, mã mehkà kêanre kam ame ipa.

²²⁻²⁵ Apãm kampa, cute gapackre xà atajê cunea na. Ampo na? Ate impar na ri amã impej. Ne anã krã kreti ata, ca ha atỳj kampa, ne nee ca ramã ihwej kamapu impar caca nare. Ne por ampeaj kam ampo pejti to hahkre xà atajê, ca ha kampa, ne amji mã huwahi, ne catyt kam apejti na apa, ne nee jũ caxuw amjipê to gapac kêt nare. Por me hũmjê nõ mã ihkra xũmre te catyt kam ipa, ne ihkrã kre ata, quê ha ampeaj kam hũrên hakry. He apyrên apãm jakryti nato, quê gũrên hakryti ne. Ne anã to hanea, ne cumã amji kĩnti jakryti to.

²⁶⁻²⁸ Ýuỹ ikra xũmre, acaxwỹn cunea to, ite gapackre xà itajê kôt ca amji to, ne ampeaj kam ahna ikampa. Ne mempijapit pê ampỹa mã apu apa. Nãmri me cupê me gõ pry tẽte me akên mã me arên catêjê. He me cupê ihhêj rũm aracri cute me apê ampo tohãhkĩj catêjê pyrãac. Ne cute me hũmre jãhtõa ne ramã me cumã ihhêj, cõjkwa kam Pahpãm me, mehprõ mã cute mehhêj prãmtẽ.

²⁹⁻³⁵ Jũm mõrmõ hĩ kam cute amji pupun xà kêanre me, ihkàj xà te cumã hipu? Mër jũm mã ihtỳj ame ipijapu xà mã incjêj to ipa, ne mehkên mã incjêj to ipa? Ne mër jũm mã hõtpê me haxõp, mã ihkàj xàa na ipa? Ne mër jũm mã hõtpê into kãhtuhti ita na apu ipa? He jũm nare, por me hũmre nõ me hàkrun xà kam apu ipa, ne cormã mã ihtỳj ajpên caxuw cõxỹhti to ajcacwa, ne to ikõ ata te ri hajỹr.

Ne nee acuhhê ne mehkõm xà kam ampo cacõ xỳre jiwryhti ata pupun nare, nãmri ampeaj kam hỹ pahtỳj. Ampo na? Quê ha ihtỳj itajê cunea jicu xàa kam hacpỹa mã cupê cagã kêanre ata pyrãc, ne ihtỳj axa ne acura!

Ca ha ampo te jũa na ata pupu, ne atỳj garkwa te amji jahkre kêatre ata nõ to acakõc. Ne ato kam waj akam tẽ, ca ha apê ihhêj rũm cõ harõ to imprar kam, pãr kre kam me ipaatajê pyrãac, ne atỳj ampo kam garij to apa, ne to amji jahyr to apa, ne atỳj apu apỹpỹm to mõ. Ne ampo na mã ca ha apy ne ahna amji juwahi?

Ne ana ahtũmre, ca ha cormã jũm ata te acahhyr na amji cajpê, ne amji mã garkwa to:

— Mõrmõ jũm aracri apu icahhy, wa nee ite ikàj xà nõ na amji cajpêr nare — hane. Ne cormã akrã ajrõ, ca ha amji mã garkwa to:

— Jũ caxuw wa ha ajte ikrã impej ne xa? Wa tee apu ixãm to hahkre. Wa ha to xa neitjy hipêr ihkwý incirre ne to ikõm prãm — hane.

Me Hapackre Xà 24.1-22

24 ¹⁻²Nee apu mehkên catêjê jũ na mehkên kîn nare, ne nee ame to amji kwý prãm nare. Ne mehkên catêjê me hàprê to pit mã ame amji kam me hapac to me ipa, nemehcakôc xà kên to pit mã mehcakôc to me ipa.

³⁻⁴Ca ha ate ampo pejti to acukrêj to prãm na, ca ha xa akrã kreti to gakràj, ne cormã ampo pejti pê acukrêj atajê to gakràj. Hõhõ, ita na caha me akra te me amã ampo na prãm xà atajê cunea to me cumã, ne me cumã agõ.

⁵⁻⁶Ne quêt mehkã kreti ita ri mehhi tỳj jirõa pê impej. Ca ha jũ caxuw apijapu prãmte me ipijapu catêjê wýr axà, ne nee amji pê cute me amã ihkrã kreti to hahkre catêjê atajê to gapac kêt nare, mârquê me amã akrã kreti to hahkre. Quê me amã ampo to hahkre catêjê mehãhtõa to me hàhtõ, ca ha cute me ampo to hahkre xà itajêa kõt atỳj me hirõ pê xa.

⁷Ne por amjia kõt ame ipa to prãm atajê, quê ha jũ caxuw mehkã kre nare, cwýrjapê ca ha nee cute amã ate catyt kam ampo to hahkrexà na ihwýr nare. Ampo na? Ampo to quê amã hahkre?

⁸⁻⁹Por me hũmre hãn ne mehkwy cuna mã amjimã, cute amji kam me hapac xãkêanre capõ, mã ahna me hahkre pej, atajê ri hãn ne mehcunea kam mencryc, ne me cupê ampo kên cunea xakat. Ne por mehkã nare atajê cakôc xà kêanre, mã hãn ne ihtỳj mehkên mã me curê. Ne por mehcunea ihtỳj ame cumãn to, me cumã me hàhcahhõn to me ipa atajê kam ri, mencryc pit.

¹⁰Quê ha akam ampo kên te cator xà ata kam, ate kam akrã pictor tu na, ca ha apê jũm peacre caprĩ xàre ata.

¹¹⁻¹²Ne por cute me jũm curan xà caxuw me cupjê ata, ca ha ajte mehteccajpar ne me hũtãr tohahkre xà kaj na, ca ha ajte ahna me amji jarên to:

— Xà aracri ite amji kam ijapac xà, wa ajte ihcote naaxà? — hajýr na, ca ha atỳj Pahpãm te me pahcunea mã, me pahte amji kam me pajapac xà pupunna, me to amji japackrea ne. Ampo na? He quê ha ihtỳj Pahpãm te ampo kên na me pahpupun xà atajêajahpan xà na, me pamã me pahkên atajêa to amgõ.

¹³⁻¹⁴Ýuý ikra, pen ca ku, ne inxõti ita na ihcappê, quê ha acajpuaw. Ahnaa mã ca me pen cajpê mã garkwa kam inxõti he. Jĩkjê na mã, ate me amji jahkre pej krã kreti ita me acaxwýn mã impeaj to impej. Ca ha

ate to hamãr na, quê ha acumam amã ate amji kamgapac xà cunea amã ihkênre nare. Na ca ha nee amji pê ate hikaj ata to apictor prãm nare.

¹⁵Ne ca, me hũmre nõ kêanre ita! Nee ca apu hũmre krã kre te amji jahkre pejti ata jũrkwa wỳr arĩt nare, ca ate cupê ampo pytãr, ne cupê ipyr prãmte, ca apu hỹrmã rĩt. ¹⁶He mehkrã kre catêjê ihtỳj me hipy mã me acjêj, ne hõtpê hacpỹa mã mempej mã me acjêj, ne mehcuhhê. Ne mehkên catêjê, quê hamehkĩnte mehkên kam mehpahãmti atajêa kam me hamre.

¹⁷⁻¹⁸Pahpãm ihtĩar ihkrĩ rohnỳtti mã ata mã mehkêanre catêjê to hamre prãm nare, ne quêt cama cumã cute mehkên ton jicu na to prãm. Na ca ha nee ame acurê xwỳn kên xà kam mehpahpahãmti atajêakam me hamre atajê pyrên ame gakry nare. Mã Pahpãm ahna me gahkre pej, ne ahnacumã me akĩn nare ne, quê ihhêaj to cute gahpan xà na acurê xwỳn to kên xà ata jicu.

¹⁹⁻²⁰Ne nee cute ame to kên xà kõt, cute amji to me cati atajê jũ na apu akrihkrit nare. Ne nee me hũ na amehkên to atajê kĩn nare. Ne cute mehkên ton catêjê cumam me cumã, nee cute me amji kam hapac xà impejtihamreare. Ne ihhêj rũm me cupê ramã ihpõc xà tyc xàa wỳr, ne ihpõc crire ne.

²¹⁻²²Yũy ikra, he amji mã, por Pahpãm tĩar rohnỳtti mã ata cupaa ne, ne amji mã pahhi catêjê cupa. Ne nee, por ame pahhi cuna mã, ame kam incrycatajê mã acjêj nare. Ampo na? He Pahpãm pê Pahhiti, quê ha cute me hajỳr catêjê to hamre, me mõr pejti kam.

Me Hapackre Xà 31.10-31

Me hirõa pê me pahprõ pejti ita

31 ¹⁰Yhỹ ikra, ita caxuw wa ha aprõ na ato ihimpej, ne amã to hahkre. Pyjê jãhtõa to hàhtõ, ne jũ wỳr ca ha uu ne me catàtkre na aprõ nõ impejti ata mãacator pyrentu. Nãmri ca ha ate me catàtkre na cumã acator na, ca ha amji mã huwahi toimpeaj ne, nãmri ihpore jakõtti ita jirõa pê impej. He me pahprõ pejti te hajỳr, pom quê ite me amã ampo jarên itajê he.

¹¹Mã ramã impjên te hĩxi pejti ita pupun pejtu ihcunea na, na rinee jũ caxuw cupê ampo hamreare nare.

¹²Mã amcro cunea kam, cute amji kam hapac xà cunea kam to impejti to ipa, rỳ jũcaxuw cute apu amji pê to kên nare.

¹³Ne hõtpê ampo cunea to hàpên to catia to ipa, ne mehkra mã cupêhkà te mehkà ton to ipa.

¹⁴Ne cupê, pom hãn ne pàr kre hũwry catia pĩn ampo to ipa atajê pyrãac, ne hũwry catia pĩn hãn ne hũrkwa wỳr amji mã hõ to hapõj, mehkra wỳr.

¹⁵Ne hãn ne awcahti xà wÿr ihkrĩ, ne mehkra mã apu hõ ton to ipa. Ne ma cumã hãpên catê pupu, ne hamãr to ipa, ne ma cumã harkwa jirê, ne to ihmpej to ipa.

¹⁶Ne por hãpên to ipa ita jõ porea to, me cupê amji mã hõpjê jũhkà, ne kam amji mã pĩxô pejti kre to ipa.

¹⁷Ne hãpên xà cunea caxuw ihcuhtÿjre.

¹⁸Ne cumã hãmjixur pejti na hahkre pej. Na ri ihtÿj to hĩ to ahwÿa to ahwÿ. Ne ampo pej pit japrôr toipa, ne hãn ne hãpên to caxwa rytu.

¹⁹Ne taa amji mã to cupêhkà hy, ne amji mã to ihkà.

²⁰Ne hãn ne me cupê ampo jamreare atajêtehcajpa, ne me cumã ampo jõr to ipa, ne amehãhwÿr to ipa atajê mã ampo jõr to ipa.

²¹Quê ha krya to kry, quê ha nee apu amji mã hũpa nare. Ampo na? Ihtÿj mehkra mã mehkà.

²²Ne ihtÿj amji mã me hãhpro xà to, na ri ihtÿj taa amji mã ihkà hẽrhẽtre tÿjre ata to, ne to ihkà.

²³Mã mehcunea amji mã mempjen pejti na harẽ, ne ihtÿj amji mã me hũpa to me ipa. Ne ampeaj kam me cumã cati, hõ krĩ ata kam.

²⁴Ne ihtÿj ahhy, ne cute me hũhkàr catêjê mã ihpore na to ahpa.

²⁵Ne catyt kam ipa. Ne nee cumã cute amji to ipijapar cupa nare, ne cumã ahna mehpahãmti xà.

²⁶Mã ihcakôc xà te amji jahkre pejti, jãhcaprĩhti to ihcakôc to ipa.

²⁷Ne jũ caxuw apu xuwcaca nare, ne ihtÿj mehkra jamãr to ipa.

²⁸Mã mehkra amji mãme harên pejti to me ipa. Mã impjen ihtÿj amji mãhĩxia jarê, ne amji mã harên to:

²⁹— Mehprõ kwÿ kên nare cakrõ, ca me hirõa pê apê iprõ impejti — hane.

³⁰ÿhÿ, ikra, pyjê jĩ cunea na impeaj to mempej cakrõ, quê ha impejti ita ihtÿj jũ caxuw ihwej, ne ihcunea na impejti ita hamre.

Ne por pyjê kwÿquêt amji mã Pahpãm tíar cupahti atajê, quê haihtÿj quêt amji mã mempejti na me harên rohnÿtti mã.

³¹ÿhÿ ikra, ca ha ate amji mãaprõ te hajÿr nõ mã acator na, ca ha amji mã to impeajne, ne hãn ne cumã garkwa to:

— Ihcunea na imã akênre nare gãpên xà me, acakôc xà cunea kam. Mã mehcunea amji mã me garên to impejti to me ipa — hane. Hamre.

ERIJ ME ERIXÊW

Pê Pahpãm Jarkwa To Me Cumã

MEHCAKÔC CATÊJÊ

ÛyÛ, pê Xarômãw tyc jakàn pê ri, pê Ixaher catêjê jakrã te tôxi itajê amji tome ajcapô. Na pê me hakrã te tej itajê amji to me kÿj catêjê, ne kÿj rÛm, Krÿrÿtpej jô pjê kam me Hÿpôjajo jô pjê kam me ahtwÿ ne amehkrÿ. Ne cute cormã amji mã me haprÿ to Ixaher catêjê.

Ne me hakrã pijakrut itajê te ri amji to me harã catêjê, neharã mã Juta jô pjê kam amehkrÿ, ne cute amji mã me haprÿ to Juta catêjê. Ne hôtpe pê me hakrã te tej atajê pÿn Ixaher catêjêjàhtôa ne ma Juta jô pjê wÿr me ipintuw, ne curi me cahê na me xa.

Pê Juta catêjê atajê me cupê Tawi tàmxwÿ catêjê to pit mã amjimã me hõ pahhi. Mã mehkÿnte kÿj catêjê pê Ixahercatêjê atajê ri amjia kôt, amji pê me hõ pahhi jÿrê, ne ihtÿj pahhi na mehkwyÿ pyxwÿ.

Ne me ahna ahtÿm nare mã kÿj catêjê pê Ixaher catêjê atajê ma ame Pahpãmcaaca, ne ihtÿj me to hapac kêt to me mō. Cwÿrjapê ri Pahpãm te mehÿrmã me cumã harkwa to mehcakôc catêjê kujahêc, atajê japrÿ te Erijme, Erixêw. Mã cute me cumã, cute mehkên ton jahpan xà na mehkên mã mehàr to me cumã hÿjarên. Ne Pahpãm jarkwa kôt me hÿrmã mecatôr, ne Pahpãm te to ihkujahêc na me hahkre pej xà caxuw, ihtÿj me cumã Pahpãm carôat kôt ampo na amji to me ipipê to me ipa. Ne ihtÿj me hà caprã ne mehtyc to ihtÿr.

1 Pahhi Catêjê 16.29-33; 17.1-24

Erij pê Pahpãm jarkwa to ihcakôc catê

16-17 ÛyÛ, pê caku jàhtôa jirô pê, kÿj rÛm pjê jÿkê ata pê Ixaher jô pjê jô pahhi nō ita japrÿ pê Acapê, ne pjê to ihhimpej itaa to caku to wintÿ ne ihkôt to ajkrut, ne hÿm jirôa pê ihkêanre. Ne Ixaher catêjê kam me cupê pahhi catêjê cunea jirôa pê ihkêanre.

Pê curi Pahpãm jarkwa to me cumã ihcakôc catênō ita japrÿ Erij. Ne Pahpãm jarkwa kôt, ma pahhi Acapê wÿr cator, necute cumã harkwa to:

— Acapê, Ixaher catêjê Pãm Cati pê ri quêt Pahpãm tĩar, na waipê cumã ijâpên catê, neimã ihkĩn. Wa ite cumã icakôc, ne ihwÿr pejti, mār quê nee ta nõ toiwryc nare, ne nee cumpêti nõ to iwryc nare ita na, ahnaa caku to incrê, ate me akwÿ me, me akên ton xà atajê jahpan xà na. Jirô pê wa ha hipêr ahna ahwÿ, quê ha cormã ta nõ to wrÿ — hajÿr. Ne ma tẽ.

Jirô pê mã ri Pahpãm te Erij mã harkwa to:

— Ca ha acato, ne ma pyt cjêj xà wÿr tẽ, ne curia cô jarare nõ ajpê ata ri, ca ha amxu, ne toa ikô. Wa ha awÿr pryjara kujate, quê ha awÿr gô topra, ne amã to garte — hajÿr.

Mã Erij te Pahpãm te ampo na mên xà ata na ton, ne ma cô jarare nahàhhuc. Mã pryjara hÿrmã kwÿr me hĩ to pra, ne to cumã harte, iràrãme pyt cunea kam, mã cô jarare ata to ikô. Mã ta nõ wrÿc nare ita kam, cô jarare atacrà. Mã Pahpãm te cumã harkwa to:

— Ca ha ma Xarep jô krĩ wÿr tẽ, necuria ahtwÿ. Quê ha jũm cahãj pê impjên tyc mã impijapit ata ato ajpa. Wa ramã cute ato hajÿr xà na, ite cumã ijarkwa hyr — hajÿr.

Mã ma Xarep jô krĩ wÿr tẽ, ne krĩ jô harkwa na cator me ajkaam, cutejũm pijapit ata pupun, mã apu pĩ to cuprôn to mō. Mã cute cumã hàkjêr, ne cô na ihwÿr. Mã ma cô wÿr ihteam kam, mã hanea ne cute kwÿr na ihwÿr.

Mã cumã:

— Wa ha ampeaj kam Pahpãm krac ri amã amji jarê, ipê ampo xàr hamreare, ne imã kwÿr cuhtom pyxit peaj ne nõ, ne caxuw to impê xàincrire ne xa. Wa caxuw apu pĩ to cuprôn to mō, wa ha ikra me to amjimã impê, ne mehkrêr hiahpuro. Quê ha hamre, ampo wa ha hipêr me cukrê? Quê ha prãm ajwar me icura — hane.

Mã Erij cumã:

— Nee apu amji na atyc cãmjĩ to hajÿr nare, ne nee apupa nare. Ne gapacta ne ate harên xà ita to. Ne mam ihkwÿto impê, ne ajpên iwÿr to tẽ. Jirô pê mã ca ha cormã akra me amjimã atekjê to. Ampo na? Por Ixaher catêjê Pãm Cati pê Pahhiti ata te imã atohũjarên to hajÿr he: “Quê ha hõtpê gô kwÿr xôm cjên xà me, to impê xà cuhhê xà kam, amã ihcuhê ita na, wa ha ahnaa hipêr me ta nõ to wrÿ” hajÿr. Ita na ri cute imã ato hũjarên — hane.

Mã cute Erij par pyrentu, ne ma tẽ ne harkwa kôt ton. Ne ihkra ita me, Erij me, me hàpàn pej ita to cute me putwrÿ jàhtôa. Mã jũ caxuwme cupê me hõ ita jamrenare. Ampo na? Pahpãm jũ mã to, mã hamre to ipa, ne hacpÿa mã hipu to ipa, cute to hũjahkre xà ata na.

Ne amcro nõ na cahãj kra xũmreita xà ne ihtyc. Mã inxi te Erij mã harkwa to:

— Hàpà, Pahpãm mã hàpên catê ita! Ampo to mã wa ite? Ca me iwÿr mō, wa ite aracri ikên xà nõ ton, mã ca ate hahpan xà na ipê ikra to hy, mã ipê ihtyc? — hajÿr.

Mã Erij cumã:

— Hã, caxi, imã akraitã gõ, wa ha Pahhiti pê Inxũ Cati mã ihcãjrën — hane. Ne cute ihkra ita pÿn ne ma kÿj pê, hõt xàata wÿr to hàpir, ne hikwa xà kam hir.

Ne cute Pahpãm mã hàkjêr ne cumã:

— Hã, ijõ Pahhiti, ampo na mã ate impijapit te imã ijàhhuc xà jõr ne ito ajpa itapê ihkra ita curan? — hajÿr. Ne cute intuw ita jipy amji capô to incrê, ne ampeaj kam Pahpãm mã ihcãjrën ne cumã:

— Hã, ijõ Inxũ Cati, ca haintuw ita to hacpÿã mã ihtÿr — hajÿr. Mã Pahhiti te Erij te ahna hàhwÿr xà ita na impar, nehacpÿã ne cute intuw ita mã carõ kujahêc, mã hacpÿã mã ihtÿr.

Mã Erij te impÿn, ne ma inxi wÿr to mõ, ne cumã:

— Hõmpu he, hacpÿã mã akra tÿr, ne quê ha ihtÿjamã amji to ajpa — hane.

Mã cute Erij mã harkwa to:

— Ita caxuw wa ampeaj kam apê Pahpãm mã gápên catê na, ite gahkre pej. Ca atÿj Pahpãm jarkwa to acakôc to apa — hajÿr.

1 Pahhi Catêjê 18.20-46

Pê Erij Ixaher catêjê mã Pahpãm carôt na to ajpê

18 ²⁰Pê Pahpãm ta nõ kujahêc nare to cakuto incrê, ne ihkôt to hÿkjê. Ampona? Pê nee me Pahpãm jarkwa par nare, ne pahpãm cahàc krekà kôt pit mã me amji kampa na pê. Jirô pê mã ri Pahpãm te cumã ihcakôccatê pê Erij kujahêc, Acapê pê pjê jõ pahhi ata wÿr, quê cumã awjarê, mãr quê Carer jõ kënti na mehwÿ to cuprôn tu ne. Mã ma Erijtê, ne cute pahhi pê Acapê mã hÿjarën.

Mã Acapê te mehwÿ pê Ixaher catêjêcunea to cuprôn tu, me pahpãm cahàc krekà pê Paharata mã me hàpên catêjê me, cute Carer jõ kënti na me to cuprôn. ²¹Mã Erij te me hàhtôtî atajê mã harkwa to:

— Jũ mã ca ha amji to me gãhtũm ry to, ne amji mã me ipijakrut itajê nõ teamji kam hapac xà nõ capi, ne mehnõ pyxit peaj kôt me amji kampa? Quê haPahpãm pê ijõ Pahhiti pê Pahpãm to Pahpãm na, taa mã ca ha me hÿnã! Nãmri quê hapahpãm cahàc krekà pê Pahar ata pê pahpãm na, taamã ca ha me hÿnã! — hajÿr.

Mã nee jũm te cumã jũ mãn nare.

²²Mã hipêr me cumã:

— He wa me acatãtkre na, ipê Pahpãm pê ijõ Pahhiti mã ijápên catê pyxit peaj neijàhhuc. Ne Pahar mã me hàpên catêjê mã ajte me hàhtôa to me hàhtô, ne cute me cwatxênta ne ihkôt xÿncwênta. ²³Hã, ajpên me pryti xũmti to me ajkrut ne me to mõ. Quê Pahar mã me hàpên catêjê

amji mã mehnõ capi, ne mehcura, ne me to ihkryj ne tocaxàr xà kam pĩ ata jipy me haxwỳ. Ne nee ajco, ihkrac ri pĩ ata kam me cuhôn nare. Wa ha hanea ne ihnõ to hanea ne ihcura, ne to ihkryj, nePahpãm mã to caxàr xà kam pĩ ata jipy haxwỳ, ne nee ihkrac ri cuhôn nare. ²⁴Ca ha me gõ pahhiti pê pahpãm cahàc krekà pê Pahar ata na ahwỳ, jirô pê mã, wa ha hanea ne ijõ Pahpãm pê Pahhiti na ahwỳ. Ne por quê ha mePahpãm nõ me pahkampa, ne cuhy kujate, quê ha pĩ ita na cupỳ ne to capaata pê, quê ha quêt Pahpãm peaj — hajỳr.

Mã ipu na amehcuhêitajê cunea te ita na me amji caxàr, ne me cumã:
— Pom ate harên xà ita na ihkênre nare — hajỳr.

Pê Pahar mã hàpên catêjê cute cuhy kujahêc na tee Pahar wỳ

²⁵Jirô pê mã ri Erij te Pahar mã me hàpên catêjê mã harkwa to:

— Ampeaj kam me gàhtô, cwỳrjapê ca ha me caa mam me pryti ita nõ capi ne mehcura, ne mam me apãm pê me gõ pahhiti pê Pahar ata mã me acakôc, ne nee me pĩ jakôtata krac ri me cuhôn nare — hajỳr. ²⁶Mã cute me pryti ata curan, ne ame ton, ne cute me to caxàr xà ata jipy me haxwỳr.

Ne pea iràràtia na, me hõ pahpãm cahàckrekà pê Pahar ata pejti na me harên kam mehtêm, ne tàkamrỳ cuteme to pyt jàpir to me mō, ne me caràr to:

— Hàpà, me ijõ inxũ pê Pahar, me ikampa, pom wa me awỳ ita? Me ijõ pahhiti, me ikampa ne ajpên cuhy kujate! — hane. Mã nee cute me kam hapacnare. Mã cute me pryti to caxàr xà ata pu na me hàkrun kam mehtêm, mecumã cuhy cator prãmte. ²⁷Ne cute me hàkruanto ramã me pahkrã jimoc kam pyt to me hajỳr to mō.

Mã Erij te me ahna xwỳ kam ihtêm, ne me cumã harkwa to:

— Ca cormã kyre pê ame acaràr, me acaràr to mehtỳajne — hajỳr. Ne me ahna ahtũm ryre mã hacpỹ ma mã cute me cumãn kamihtêm, ne me cumã harkwa to:

— Me gõ pahhiti pê Pahar ita mã me acaràr to ihtỳaj ne, mãr quê me akampa. Mõrmõ cormã apu jũm mã ihcakôc, na ri nee cuteme apar nare. Nare, mõrmõ ma ihkwỳr xà wỳr mō, nare, mõrmõ ma jũ kamihtêm xà ata na tẽ, nare, mõrmõ ihtỳj nõ ne gõr, na ca ha ate mehcujrôn xà na me akrãhhia kam me cumã me acaràr! — hajỳr.

²⁸Mã mehkrãhhia kam me cumã me caràr, ne cute amji kam me hapac xàa na, ihtỳj wapo xwahhihti to me amji jĩ jakep, ne me hõ kruwxwa to me amjicaxwỳ, ne ajco me amji caprô jaxwỳr to me ipa. ²⁹Ne cute me caràr tỳj ita to me pyt to mō. Mã nee me hõ pahpãm cahàc pê Pahar ata te mempar ne me cumã jũ mãn nare, ne nee cute me caràr parnare, ne nee jũm par nare. Ne hamre, ramã pyt pec to mōr xà ata kam ri, quêt me Pahpãm peaj mã cute me ampo to caxàr xàa kam hàhhuc.

Pê Erij cute cuhy kujahêc na Pahpâm wÿ

³⁰Mã Erij te mehcunea mã hàkjêr to:

— Ajpên me mō, ne me ina ahtipre ne, mār ca ahna me ipupun peaj ne — hajÿr. Ne cormã cute ame Pahpâm mã ampo to caxàr xà hur ata toimpej kwÿa kam, mã cute ahna me cuprôn. ³¹Mã cute kên te tôxi atajê japÿn. Ne kên atajê pê ahpÿanre na me hakrà pê Ixaher krate tôxi atajê.

³²Ne Pahpâm jarkwa kôt cute ahpÿanre na Ixaher kra atajê na kên te tôxi atajênôr par, Pahpâm mã cute ampo to caxàr xà to impej prãnte. Jirô pê mări hōtpê cute ipu na cô mã hahkwÿn to kre ryre. ³³Ne cute kên jipy pĩ kwÿ jakôt, ne kam pryti jĩ kryj ne hakôt, ne cumã harkwa to:

— Me cô jacjên xà catia nō to me cwat, ne me to hipu, ne pryti jĩ kam mehaxwÿ, ne pĩ kam me haxwÿ, ne me to inco tu ne — hajÿr.

³⁴Mã cute me ton jirô pê, hipêr cute me cumã harkwa to:

— Hipêr kam me cô kwÿ jaxwÿ — hajÿr. Mã cute hipêr kam me haxwÿr.

Mã hipêr me cumã:

— Kam me haxwÿr to incrê mã — hane. Mã cute hipêr kam me haxwÿr. ³⁵Mã kên te tôxi atajê kam prytijĩ ata pĩn, cô ajxwÿ ne tàkamrÿ cute ipu na kre jahkwÿn ata to hipu.

³⁶Mã pyt pec kam, cute me Pahpâm mã ampo to caxàr xà to me amji pyràcxà ata kam hàhhuc. Mã Erij xãm ne mō, ne Pahpâm mã ampo to caxàr xà jĩkjê rúm hàhhuc ne xa, ne Pahpâm mã ihcakôc, ne cumã:

— Hàpà, me ijō Pahhiti. Por apê Aprãw me, Ixac me, Ixaher pê me apynã atajê jō Pahpâm. Neita kam me cumã apê Ixaher catêjê jō Pahpâm na amji to ajpê, ne hanea ne ipê amãijapên catê na me cumã ito ajpê. Pom ite ampo cunea ton itajê, wa nee amjia kôt ite ton nare, ne garkwa kôt wa ite ton! ³⁷Ijō Pahhiti ikampa, mār quê itajê cunea apê ampeaj kam Pahhiti pê Pahpâm na, me gahkre pej, ne caa pê ca, amji wÿr, amji mã mehĩ to apkjê — hajÿr.

³⁸Me ajkaam mã cōjkwa pĩn cuhy pÿm! Ne cute pryti me pĩ to caxàr, nekên to caxàr, ne pjênxôm to caxàr, ne hanea ne cute cô to incrã tu, kre ata kam!

³⁹Mã mehcunea te me ita pupun, ne hūpate, pjêkam, mehcunea mehkuc to mehpȳm, ne me hūjarên to:

— Cōjkwa kam me pajō Pahhiti ita pê ri Pahpãam to Pahpâm! Cōjkwa kamme pajō Pahhiti ita pê ri Pahpãam to Pahpâm! — hajÿr.

⁴⁰Mã Erij te me cumã harkwa to:

— Me pahpâm cahàc krekà pê Pahar mã me hàpên catêjê cunea pro, mār quênee jū kam jūm pyxit ne ihtêm nare! — hajÿr. Mã cute mehcunea pro, mã ma Erij Quixō jō kàj mã nôre wÿr me to mō, ne curi cute mehcunea jipej.

Pê Erij cute ta kujahêc na Pahpâm wÿ

⁴¹ Mã Erij te Acapê mã harkwa to:

— Ita caxuw gapacta ne tẽ ne apã ne ikõ. Ampo na? He ramã ite ta nõpahtÿjti jàhkrihkrit kam ijapac, mã ajpên mõi! — hajÿr. ⁴² Mã ma Acapê tẽ, hÿr ne hàpàn ne ihkõm prãnte.

Mã ma Erij Carer jõ kënti ata jimoac wÿr cumã hàpên catê me hàpir, ne pjê kam hÿr, ne cute ihkuc to ihkõnkrã catêc ne to jÿ. ⁴³ Jirõ pê mã ri cute cumã hàpên catê mã harkwa to:

— Mõi ne cõxwa wÿr rît! — hajÿr.

Mã ma tẽ, ne irît ne hacpÿa necute Erij wÿr amji jaxàr ne cumã:

— Wa nee ite ampo pupun nare — hajÿr.

Mã Erij te ampo pupun xà atawÿr ihkujahêc to xet, mã cute amji jacjên to xet.

⁴⁴ Mã cumã hàpên catê te amji jacjên to xet ita kam ri, cute cumã hÿjarên to:

— Wa ite cõxwa pîn ahcakrã nõ incirre pê me hÿmre jÿhkra pyràcti incirre jàpir to mõi na hõmpun — hajÿr.

Mã Erij te cumã hàpên catê ata mã:

— Atêm pyrentu, ne Acapê mã awjarê, quê hõ cawrõ jõ kàhã kam jÿ, ne kënti pê to wrÿ, mãr quê nee cõhtàm cupê pry jahêr nare — hajÿr.

⁴⁵ Mã nee harkwa crãre nare. Ne cõjkwa kam awcapàtkõ pyrentu, ahcakrã kam. Mã kõi pahtÿjti ata cator, ne pahhàjê kypê iwrÿc nare. Mã Acapê hÿjarêan kam Jexer jõ krî wÿr ihteam to tẽ. ⁴⁶ Mã Pahpâm te Erij mã ipicahur xà caxuw, carõt tÿj jõi. Mã cute Acapê jakren, ne ma mam hamrea kam tẽ, ne mam Jexer jõ krî mã cator.

1 Pahhi Catêjê 19.15-21

Erixêw pê Pahpâm jarkwa to ihcakõc catê

19 Mã Pahpâm te Carer jõ kënti na hõ cuhy kujahêc jirõ pê mã, cute Erij mãharkwa hÿr ne cumã:

— Amji jaxà ne jÿm tuw japrÿ te Erixêw ata japê, mãr quê gaxà kam cupêijarkwa to me cumã ihcakõc catê — hajÿr. Mã Erij te amji jaxàr ne Erixêwna cator, ne cumã Pahpâm te harkwa to ihcakõc catê naamji mã capi na harên. Mã Erixêw teimpar, ne ma ihkõt mõi.

HAPU NA PAHHI CATÊJÊ JÕ KÀHHÔC

2 Pahhi Catêjê 2.1-14

Pê carĩjre cõjkwa wỳr Erij to api

2 Ne jũ mã ihkõt ipa na caku te, jirô pê mã ri, Pahpãm te ma amji wỳr cõjkwa wỳr, carĩjre to Erij to hàpir xà jõ amcroa kam hàhhuc. Mã cormã Erixêw apu Erij kõt mō. Ne ma Krĩjajojõ pjê pĩn me mō, mã Erij te Erixêw cajpêr prãmte cumã harkwa to:

— Ita ri ahtwỳ, nãmri quê ha ma Pahpãm Peter jõkrĩ wỳr ikujate — hajỳr.

Mã Erixêw cumã:

— Wa ha Pahpãm kam mare mã amã amji jarẽ, jũ wỳr wa are — hane. Nema ajwar me mō, Peter jõ krĩ wỳr. Ne pê curi Pahpãm jarkwa tohahkre xà jũrkwa nõ ita xa.

Mã Pahpãm jarkwato hahkre catêjê kwỳ intuwitajê ajpên mehwỳr me pra, ne cute mehcajpar ne me Erixêw mã:

— Xà ca ramã ate ita kam, Pahpãm te ma gõ pahhi pê Erij to ihtêm na, hahkre pej? — hajỳr.

Mã Erixêw me cumã:

— Wa ite ramã hahkre pej, mêr me kêt — hane.

Mã Erij Erixêw mã:

— Quê ha ma Pahpãm Krĩcuxwati wỳr ikujate, ca ha ita ri ahtwỳ — hane.

Mã hipêr Erixêw cumã:

— Wa ha Pahpãm kam mare mã amã amjijarẽ, wa nee arer nare — hane. Ne ma memō, Krĩcuxwati wỳr. Mã curi hanea ne Pahpãm jarkwa to hahkre xà jũrkwanõ ita xa, mã curi me cator.

Mã me hỳrmã Pahpãm jarkwa to hahkrecatêjê kwỳ me pra, ne cute me Erixêw cukij to:

— Xà ramã ate ita kam Pahpãm te ma Erij japrôr ne to ihtêm na, hahkre pej? — hajỳr.

Mã Erixêw me cumã:

— Ýuỹ, wa ite hahkre pej, mêr me kêt — hane.

Mã Erij Erixêw mã:

— Quê ha ma Pahpãm Cõpijapjêr jõ cõ wỳr ikujate, na ca ha ita ri ahtwỳ — hane.

Mã Erixêw cumã:

— Wa ha Pahpãm kam mare mã amã amji jarê, jũ wÿr wa ha are — hajÿr.

Ne ma Cõpijapjêr jõ cô wÿr me mõi. Mã ma Pahpãm mã me hãpêncatêjê intuw te me xïncwênta ne ihkõt me mõi, ampÿa mã cute me hõmpunprãmte. Mã Erij te ihkà japjêhti ata to cajõt ne to cô cakwïn, mãcõ picapõn ne ihcajpuw amcrãare. Mã me ipijakrut itajê ihkõt me irêr. Mã Erij te Erixêw mã harkwa to:

— Ca ha ampo na iwÿ, waha itÿj, itêm xwÿjrea na, amã ampo ata gõ — hajÿr.

Mã Erixêw cumã:

— Wa ha Pahpãm te ato acarõt tÿjti ita jirõa pê to ajkrut ne ahna awÿ — hane.

Mã Erij cumã:

— Ca ate atÿj ampo catia ne ahna iwÿr, ne ca ha ate itêm xà na ipupunna, ca ha atÿj amji mã ate ampo na iwÿr xà ita cwa. Nãmri ca ha ate itêm xà ita na ipupun nare na, ca ha neeate ampo na iwÿr xà ata cwÿr nare — hane.

Ne ma me mõi ita kam, me amji mã mehçakõc to mõi, mã ihprõt pê cuhy tecawrõ jõ kujti ita cõjkwa pïn cator, ne cuteme to ipicapõn. Mã ma carÿjre te cõjkwa wÿr Erij to hãpir. Mã Erixêw te ita pupun ne carãar kam cumã harkwa to:

— Inxũ, inxũ! Ixaher catêjê jõ cawrõ me hõ kujti, ca me hõmpu he! — hajÿr. Mã ma me ipictor.

Mã Erixêw te apu amji pê ihkãcokjêr, ne ma cute Erij pê ihkà pÿm ata pyr ne to mõi, cô wÿr. Ne cute Erij cuxà to cô cakwïn, mã cô picapõn ne ihcajpuw pjê incrãre, mã ma irêr. Ne pê ita caxuwErixêw pê Erij jakàn pê Ixaher catêjê mã Pahpãm jarkwa to ihçakõc catê.

2 Pahhi Catêjê 4.1-7

Pê Erixêw cahãj pijapit mã hõ ampo to impê xà to ajcamê

4 Pê Pahpãm jarkwa to hahkre catêjê intuwatajê nõ hikwa tuw, ne jũ mã ahna caku pê ty. Mã ma hïxi Erixêw wÿr cator. Ne cute cumã amji jarên to:

— Por pê ipjê pê amã hãpên catê ata ramã ihtyc. Ne cumã Pahpãm kïn na, amã hahkre pej. Pê jũm ita to new catia to cati, ne ahnaa ihtyc, mã ramã ina ahwÿ, ite cumã ipjê te to new ata jahpan xà na ijãmjõrprãmte. Ne ampo to wa cumã amgõ? Na quê ha ma ipê ikra xũmre pijakrut itajê japrõ, ne amji mã me tocumã hãpên catêjê na rohnÿtti mã — hajÿr.

Mã Erixêw cumã:

— Jũ mã wa ha ajte ato? Ampo mã gũrkwa kam amã? — hane.

Mã impijapit ita cumã:

— Ipê ampo hamreare, ne imã ampo to impê xàna incjên xà pyxit peaj ne xa — hajÿr.

Mã Erixêw cumã:

— Hã, ca ha tẽ ne me acahi na amehkrĩ atajê pê ampo to impê xàrun xà cunea incwa, ne amcro nõ na hacpÿa mã mecumã hõr na me cumã harẽn hiahpuro. Ne gũrkwa mãto acjêj pa, ne amji na to hihê. Ne me hãmrunxà atajê cunea kam ampo to impê xà pyxit ita jaxwÿ, quẽ ha amjia kõt hipêr amji to hipu to mõi, ne ihcunea to hipu partu, quẽ ha to hipupa, me ajkaam incrà — hane.

Mã ma tẽ ne cute mehkra mãn. Mã cute cumãme hãmrun xà to cuprõn, mã cute to hipu partu. Ne ramã me hãmrun xà jamre, me ajkaam mã ampo to impê xà jamre.

Mã ma hacpÿ mã Erixêw wÿrtẽ, ne apu cumã harẽ, mã cumã:

— Hã, ca ha tẽ ne ampo to impê xà ata to ihpore na apha, ne ihporeto ate new ata jahpan xà na amgõ. Quẽ ha cormã ihpore cahhur ata me amãahwÿ. Ne pom quẽ ha ihpore cahhur ahtwÿ ita, quẽ ha ihtÿj akra me, ate amji to me apijapar na meatehcajpa — hane.

Mã cahãj pijapit ita te harkwa kõtton partu, ne ihkên pê amji pytàr.

2 Pahhi Catêjê 5.1-8

Pê Namã ma Ixaher jõ pjê wÿr tẽ

5 Ne pê caku atajê kam pê Xiri jõ pjê kamkrãhtare jõ pahhi nõ ita japrÿ Namã. Ne ampeajkam ihpa tÿj cacrõ apu ihkà xêtti. Ne ihxêtti ata quẽ ha ihkêanre kam, ihtÿj jũ caxuw ihcura.

Pê Xiri jõ krãhtare ma Ixaher catêjê jõ pjê wÿr me pra ne ajco pyjê to me ahkĩ. Pê Namã hanea ne jũm cuprÿre ita japrõ, ne hĩximã cugõ, cute amji mã to cumã hàpên catê prãmte. Neamcro nõ na cahãj cuprÿre ita te hõ pahhi cahãj ita mã:

— Quẽ rÿ mã ijõ pahhi pê Namã ijõ pjê kam Pahpãm jarkwa to ihcakõccatê ata mã ihkà xêt ita na amji jarẽ, quẽ caprã — hajÿr.

Mã hĩxi te impjên mã hũjarên. Mã Namã te Xiri jõ pahhi mãita na amji jarên. Mã hõ pahhi te cumã:

— Hã, mër mõi ne Pahpãm jarkwa to ihcakõc catêita pupu ne cumã amji jarẽ. Wa ha Ixaher catêjê jõ pahhi mã ana ihkàhhõc kujate — hajÿr.

Mã Namã te amji caprãr jahpan xà na cumã ampo jõr xà na cumã kên pràtime, wakÿre pràti me, ihkà me, ma to mõi. Ne ma hanea ne hõ pahhi jõ kàhhõc ata, Ixaher catêjê jõ pahhi wÿr to mõi.

Mã ihkàhhõc ata hũjarên to:

“Yũÿ, Ixaher jõ pjê jõ pahhi ita.

Ipê Xiri jô pjê jô pahhi.

Ne por amã ihkàhhôc to mō ata pê imã hàpên catê.

Ca ha imã, cumã ihkà xêtti ita caprã” hajÿr.

Mã Namã Ixaher jô pahhi wÿr ihkàhhôc itato cator, ne cute cumã hõr.

Mã cute ihkàhhôc ita cahyt jirô pê mări, cute ihpeacre na me hahkre pej prãmte, amji pêhitô kà jipôn, cute me amji kam hapac xàa kôt. Ne me cumã:

— Xiri jô pjê jô pahhi ita te imã ihkà xêtti ita kujahêc, wa caprã. Xà ajkĩ ipê Pahpãm, wa caprã, ne itÿj cumã cute amji kam hapac xà tuwti nõ gô? Hàpà! Tee ame papijapu prãmte me pahto hahkre — hajÿr.

Mã Pahpãm jarkwa to ihcakôc catê pê Erixêw tepahhi peacre na harên par, ne cumã harkwa kujahêc ne cumã:

— Ampo na mã ca apu apéc? Ajpên imã Namã kujate, wa ha pa caprã. Quê ha ihtÿj cormã ita ri, pjê ita kam, Pahpãm mã hàpên catê te ipa nahõmpu ne hahkre pej — hajÿr. Mã Ixaher jô pahhi te Erixêw wÿr Namã kà xêtti ata kujahêc.

2 Pahhi Catêjê 5.9-17

Namã caprãr xà

Mã ma Namã tẽ ne Erixêw jÿrkwa wÿr cator, ne harkwa mã hõ cawrô me hõkujti to hàhhuc. Mã Erixêw nee hÿrmã cator nare, ne cute hÿrmã cumãhàpên catê nõ pit kujahêc, quê to ihhimpej to hane he:

— Ca ha ma Cõpìjapjêr jô cô wÿr tẽ, ne kam amrôr to xet, ne amjicajpêr pyrentu, quê ha akà xêt ita amã hamre, ne akà tetet, ne ramã acaprãr — hajÿr.

Mã Namã apu incryac to incryc, ne ma mō, ne cute cumãme hàpên catêjê mã harkwa to:

— Wa itÿj amji mã: “Mõrmô quê ha iwÿr cato ne ijũ na cupy, wa haajpên mã me icakôc, quê ha ina hũ xi ne Pahpãm mã icajrên” hajÿr, cakrô mã ajte nee cute ito hajÿr nare, ne cama cute imã harkwa ita kujahêc. Ne ijô pjê kam cô ita, Ixaher jô pjê jô cô itajê cuneajirôa pê ihtetet ne impej, cute jũm caprãr xà caxuw. Ne mër ampo na mã wa curi cô ata kam ixwÿr, quê icaprãr nare? — hajÿr. Ne apuincryc ne ma cawrô jô kujti to tẽ.

Mã ihteam kam cumã mehàpên catêjê te me cumã harkwa to:

— Ijô pahhi, quê Pahpãm jarkwa to ihcakôc catê camaampo jahkre kêatre na amẽ namã, ca ha atÿj to. Nõ nãmã ca ha ajte nee hahkre kêt nare ita ton nare? — hajÿr.

Mã Namã te cumã me hàpên catêjê impar, ne maCõpìjapjêr jô cô wÿr mō. Ne cute kam mrôr to xet, mã pea ihkà impejpyrentu, ne ihkà ita pê

ihhêj rûm ahkrare kâtetet. Mã Namã me, cumã me hàpên catêjê me, ma mehcunea te me amji jaxàr, Pahpãm jarkwa to ihcakôc catê wÿr, ne me cator, ne cuna mãme xa. Mã Namã te Erixêw mã harkwa to:

— Hamre, ita caxuw wa ite pjê cunea kam Pahpãm ita pyxit peaj na hahkre pej, ne cupê Ixaher catêjê Pãm Cati. Xà ca ha atÿj ate icaprãr jahpan xà na, ite amã ampo jôr xà itana amji capa? — hajÿr.

Mã Erixêw cumã:

— Wa ha Pahpãm kam mare mã amã amji jarê, wa nee ihnô na amji caxàrnare — hane. Mã Namã ihtÿj cormã to kampa, mã nee cute ihnô na amji caxàr nare.

Mã Namã cumã:

— Wa ha ma ijô pjê wÿr amji jaxà, nepor Ixaher catêjê Pãm Cati pyxit peajata, wa ha itÿj kampa, ne to pit mã, amji mã ihmpej to ipa — hane. Ne macute amji jaxàr, hõ pjê wÿr.

2 Pahhi Catêjê 6.8-18

Côjkwa pîn Pahpãm jô krãhtare

6 Ne pê caku nõ na, Xiri catêjê me, Ixaher catêjême ipijapu kam tẽ. Ne hãn ne ajco me kam imprar xà wÿr, Xiri catêjê jô pahhihõ krãhtare jô pahhi kwÿ me ajpên pa, ne me ajpên mã:

— Por curi me papicaxêr xà ata ri, pjê ata kam, cu ha me pajô krãhtare to me cuprô, pahte me Ixaher catêjê jô pahhi pro prãmte — hane.

Mã ramã Erixêw te mehahkre pej, ne Ixaher jô pahhi mã hÿjarên, mãr quê amji to huphê, quê Xiri catêjê jô pahhi ata nee mehpro nare. Hõ, pê ajco Erixêwjÿjarên xà ata me cumã amji jahkre pej gõ to hane, na pê me amji pytà. Ne ihtÿj ajco me to hajÿr to xa.

Mã Xiri catêjê jôpahhi tee apu amji jahkre, jü mã quê ha ajte. Ne pea cute krãhtare jôpahhi catêjê na hàhwÿr, ne me cumã:

— Jüm te mã ajte Ixaher jô pahhi mã pahte me ajpên par xà ita jarên? — hajÿr.

Mã krãhtare jô pahhi nõ ita cumã:

— Nee me pahkwÿ nõ te me hõ pahhi mã hÿjarên nare. Ne por Pahpãm jarkwa toihcakôc catê pê Erixêw ata te ri hõ pahhi mãhÿjarên, ne ihtÿj cumã ate ahtee gÿrkwa caxwÿn kam acakôc xà ton atajahkre pej — hane.

Mã Xiri catêjê jô pahhi te ahna me mên, ne me cumã:

— Me hapên to mõ ne mehpro — hajÿr.

Mã amcro nõ na jüm te Xiri catêjê jô pahhi mã Kwapijakrut jôkrĩ kam Erixêw apu mör na harên. Cwÿrjapê ri pahhi te hÿrmã hõ krãhtare jãhtôa ne ihkujahêc, hõcawrô me, hõ kujti mea mã. Mã caxwa ri Kwapijakrut jô krĩ mã me cator, ne cute me krĩ krã.

Mã Erixêw mã hàpên catê nõ intuwre nõ ita iràrà na hÿr, necute põ pê, krĩ pu na Xiri catêjê jõ krãhtarekwÿ pupun. Mã me cumã hÿpa mã ma Erixêw wÿr tẽ, ne cute cumã hÿjarên to:

— Ijõ pahhi! He ramã me pahcurê xwÿn te me pahkrã tu ita kam, jũ mã cu ha ajte? — hajÿr.

Mã Erixêw cumã:

— Apu amji mã panare. Ampo na? Pom me cumã krãhtare jãhtô ita jirôa pê ri me pamã hàhtô — hane. Ne cute Pahpãm wÿr ne cumã:

— Me ijõ Inxũ, wa ha awÿ, ca ha imã hàpên catê ita to jũ mã, quẽ côjkwa pĩn me pra jõ krãhtare pupu — hajÿr.

Mã Pahpãm te ihhêj ne into jahkjên, mãrquẽ ihtÿj me hõ krãhtare pupu. Mã cute cuhy te cawrô me, hõ kujti ita me hàhkà jakôt nõ ita to hipu tu na hõmpun.

Mã ramã ajpên Xiri catêjê jõ krãhtare te amjimã mõi, krĩ wÿr.

Mã Erixêw te Pahpãm wÿr ne cumã:

— Me ijõ Inxũ, me to into tũm — hajÿr. Mã Pahpãm te Xiri catêjê jõkrãhtare cunea to into tũm. Hõ, Pahpãm te me to hajÿr, ne me cupê cumã hàpên catê ata pytãr. Hamre.

PJÊ JÕ PAHHI CATÊJÊ KWÛ

Ûyũ, pê pahhi Xarômãw tyc jakàn pê ri, pê Juta catêjê atajê me cupê Tawi tâmxwÛ catêjê to pit mã amjimã me hõ pahhi. Pê pahhi kwÛ crêre atajê impej ne ihtÿj Pahpãm jarkwa kôt ame ipa. Ne mehkĩnte pahhi kwÛ cati atajê ma ame Pahpãmçaca, ne ihtÿj, mehkÛwÛ mea mã, me to hapac kêt to me mõ.

2 Pahhi Catêjê 11.1-21

Juta jõ pjê jõ pahhi Jõwat jarên xà

11 Pê caku jàhtõa jirõ pê, Juta jõpjê jõ pahhi nõa ty. Ne pê ihtÿj ihkra jaxà kam, inxi amji to pahhi prãm. Ne pê cahãj ata japry AtarijkwÛj, ne ihkêanre. Ne cute ihtãmxwÛ itajêcunea jipej na me mên, mã cute me hipej. Pê pyxit peaj ne cormã incirre, ne hapry Jõwat. Pê into catyjure haprõ, ne ma to tẽ, ne Pahpãm tome amji kam hapac xà jürkwa kam to amxu. Mã nee cute ihcuran nare. Mã curia cute me to ipijapar to caku to xêj.

Mã AtarijkwÛj te amji to pahhi, ne ihhimpej to caku to xêj. Mã Pahpãmmã mehcajrên catêjê jõ pahhi pê Jojata te me hũjamãr catêjê jõpahhi na hàhwÛr. Pom krãhtare Pahpãm to me amji kam hapac xà jürkwajamãr catêjê atajê jõ pahhi me, me AtarijkwÛj jürkwa jamã atajê jõ pahhi me, cute me ahna hàhwÛr.

Mã cute me cuprõn, ne ma ajpên pê ame jũm te, jũm mã Jojata cakõc xà ata jarên tẽte me ajpên mã. Mã mehcuneate ampeaj kam, nee jũm mã me harên nare na me amji ton. Ne cute me cumã, por pê pahhi xwÛ ty ata kra pê Jõwat to ipipê, mã cute me hõmpun. Mãpea Jojata te me to ihhimpej to hajÿr he:

— Ca ha me akwÛ me AtarijkwÛj jürkwa jamã, mãr quê nee jũ kam ihtêm nare. Ne me akwÛ me Pahpãm to me amji kam hapac xà jürkwa krã, ne kamhũmre intuwre pê pahhi xwÛ kra ata jamã. Quê ihhêaj to jũm apu ihkra ita to jũ mãn prãm, ca ha me jũm ata pro ne mehcura — hajÿr.

Mã Pahpãm mã mehcajrên catêjê jõ pahhi te mam pahhi xwÛ kra intuwre ita japrõr, ne me kam mare mã ihkrã mã pahhi krãhkã mên, nepea cupê pahhi xà caxuw, hanea ne ihkrã kam ampo cacõimpêti ata jaxwÛr. Ne cute cumã ihkãhhõc kamPahpãm jarkwa ata jõr, ne to pahhi tuw. Mã mehcunea ame cumã me hũhkracahy, ne ame cumã caràr to:

— Pahhi tuw! Ca ha caku jàhtôa kam amji to ajpa! — hane.

Mã Atarijkwÿj te mehtàmwxwÿ jipej ata te me harkwa xãmti ata kam hapac, ne ma Pahpãm to me amji kam hapac xà jürkwa wÿr ipicahur, ne cute pahhi tuw pupun. Mãkrãhtare te hütàr tu ne to xa, ne cama ame hakry, ne ame hõhhi cakô. Mã Atarijkwÿj caràr, ne cute harkwa to:

— Côt ca me acunea icuna mã me akên? — hajÿr, ne ihpeacre.

Mã Jolata te krãhtare jõ pahhi mã Atarijkwÿj curan na hÿjahkre ne me cumã:

— Me to acato, ne nee Pahpãm to me amji kam hapac xà jürkwa kam mehcurannare. Ne por jÿm te ihtehcajpar prãm ata mea mã, atÿj mehcura — hajÿr. Mã cute mehpro ne ma pô mã me to cator, ne cute mehcuran, mã hamre.

Ne caxuaw pê cormã Jôwat na caku te xet peaj cacrô, ihtÿj cutepjê to ihhimpej kam ihtêm. Mã Pahpãm mã mehcajrën catêjê jõ pahhipê Jolata ata te ihtehcajpar kam ihtêm, ne ihtÿj hõtpê ihtehcajpa. Mãcute mehkwy mã, pahpãm cahàc krekà pê Pahar ata jürkwa jÿhhyr ne to hamre na, harkwa hyr. Mã hÿrmã me mô, ne cute me hÿhhyr.

Pê pahhi pêJôwat ata catyt kam Pahpãm jarkwa kôt ipa, ne Juta jõ pjê to ihhimpej to caku to cwarênta ne ty.

2 Pahhi Catêjê 18.13; 19.1-37

Juta jõ pjê jõ pahhi Exequij

18-19 Ne caku nõa na pê Juta jõ pjê kam pahhi nõ ita hapry Exequij. Ne Krîpinkrên kam ajco ihhimpej. Pê Axiri jõ pjê jõ pahhi ata kêanre, na pê nee Pahpãm to amji kam hapac nare. Ne Exequij pê amji mã Juta jõpjê kam krî atajê cunea pytà. Pê hõ krãhtare kwÿa hanea ne Krîpinkrên pytàr prãmte me hÿrmã me cato.

Pê ma Exequij Pahpãm to me amji kam hapac xà jürkwa wÿr tẽ, cute Pahpãm wÿr, mã cute krî pytàr prãmte. Ne cute ihkà impejti ata jipôn, ne cupêhkàkêanre nõ ata to ihkà, cute me cumã amji kîn nare name hahkre pej prãmte. Ne ma cute Ixaj pê Pahpãm jarkwa to ihcakôc catê ata wÿr jÿm kujahêc, mâr quê jÿm cumã awjarê quê Pahpãm mã mehcajrën. Mã ma tê ne cute cumã hÿjarên. Mã Ixaj te Pahpãm mã krî kam mehkrî atajê cajrën.

Mã Pahpãm te kam hapac ne cumã:

— Wa ha Axiri jõ pahhi ata te hacpÿ mã hõ pjê wÿr amji jaxàr na meto, quê ha amji jaxà, quê ha curia jÿm ihcura — hajÿr.

Mã hamre, amcro nõ na ma hacpÿ mã krãhtare atajê te hõ pjê wÿrme amji jaxàr to me amji kam hapac. Mã ihtêm xà wÿr Axiri jõ pahhi te Exequij mãihkàhhôc juwahi, mã ihkàhhôc ata hÿjarên to:

“ÿuÿ, por cõjkwa kam me Apãm Cati ata, ca nee ampeajkam ame kam gapac nare.

Quê Apãm Cati te, ite Krĩpinkrên to kên nare na me ijarên na,
 ca ha nee kam megapac nare.
 Ampo na? Wa ha itỳj me amji jaxà ne ame ato kêanre ne.
 Neramã mehcunea te, por wa pjê kwỳ kam ite me amji hi ata ri,
 ite ame ampoto kêanre na me cumã me ijahkre pej.
 Mãnee jũ ri me hõ pahpãm cahàc krekà itajênõ te jũm pytår nare,
 na wa ite mehcunea to hamre tu” hajỹr.

Mã cute Exequij mã hõ kàhhôc ita kujahêc. Mã cute ipyr ne cahyt jirõ
 pê, maPahpãm to me amji kam hapac xà jũrkwa wỳr to mõ, ne cute kam
 hir, nePahpãm mã ihcakôc to:

— Hã, me ijõ Inxũ Cati,
 apyxit peaj ne apê Ixaher jõ pjê Pãm Cati, ne apê cõjkwa jõPahhiti.
 Ca pjê kam pahhi itajê cunea to ahimpej.
 Ne caa pê ca cõjkwa mepjê to.
 Me ijõ Pahhiti ikampa,
 ne pom Axirijõ pjê jõ pahhi te ihkàhhôcton ita pupu he.
 Cute atĩar cuna mã ihcakôc xà kêanre ita to ihcakôc he.
 Me ijõ Inxũ,
 he ampeaj kam ri cute ampo kra me, krĩxàre kwỳ cunea jipej,
 ne cute me hõ pahpãm cahàc krekà atajê to caxår partu.
 Ne por me hõ pahpãmcahàc krekà atajê akĩn te nee ihtĩr nare,
 na ri cute me to hamre.
 Ne ampona ri cute mehcunea to hamre? Nee mã ampo na nare.
 He me hũmrea te ri pĩ me kente me hõ pahpãm cahàc krekà atajê ton,
 cwỳrjapê ri cute to hamre.
 Ne me ijõ Pahhiti, pahhi ita pê me ipytà.
 Quê ha mehcunea me apyxit peajpê Pahpãm Cati na me gahkre
 pej — hajỹr.

Jirõ pê mã ri Pahpãm jarkwa to ihcakôc catê pê Ixaj te pahhi Exequijmã
 Pahpãm jarkwa kujahêc. Mã harkwa ata hũjarên to:

“Wa ite me ate Axiri jõ pjê jõ pahhi to me imã acakôc xà ata na me
 apar.
 Na quê ha nee me gõ krĩ mã me hår nare. Ampo na?
 He pa wa ha me cupê me apytà” hajỹr.

Ne caxwa ata kam Pahpãm te Axiri jõ pjê jõkrãhtare jãhtõa jipej. Ne
 iràrà na Krĩpinkrên catêjê pimprar necute me curê xwỳn jãhtõa tyc pit
 pupun.

Cwÿrjapê Axiri jô pahhi tehõ pjê wÿr amji jaxàr pyrentu, ne hõ krãhtare cahhur me, me cator. Mã amcro nõ na mehkraa te mehcuran. Hõ, pê Pahpãmpahhi Exequij jô amcro kam Krîpinkrên pytàr to hane.

2 Pahhi Catêjê 22.1-20; 23.1-25

Juta jô pjê pahhi pê Joxij

22-23 Ne pê caku jãhtõa jirõ pê Juta jô pjê kam mehkri atajê cunea hipêr me Pahhiti pê Pahpãm to mehapac kêt ne me cumã hikra. Ne pê cakuata kam kri jô pahhi ata japyr Joxij, ne cupê hũmreimpeaj, ne quêt ihtÿj cumã Pahpãm pynãr prãm. Cwÿrjapê ri cute pahpãm cahàc krekà cunea tohamre, ne Pahpãm to amji kam me hapac xà jũrkwa to apu impej partu.

Mã amcro nõ na, Hirquij pê Pahpãm mã mehcajrên catê jô pahhi ata apuPahpãm to amji kam me hapac xà jũrkwa kam mõ. Ne cute Pahpãm jõkãhhõc weaj nõ ita mã cator, ne cute ipyr, ne cute pahhi Joxij mã ihkujahêc. Mã jũm te Joxij mã Pahpãm jarkwa na ihkãhhõc wej ata cahyt, mã cute impar, nehũ na ihpec pyrentu.

Ne cute Hirquij na hàhwÿr ne cumã amji jarên to:

— Ÿuÿ Hirquij, ate imã Pahpãm jarkwa weaj kujahêc ata, jũm te imã cahyt, wa ite impar, ne ajte ipeacre. Ne mõ ne Pahpãm to me amji kam hapac xà jũrkwa mã axà, ne cumã icajrên. Ne cumã me papê Juta catêjê cunea cajrên. Ampo na? Cu ramã nee kam me pajapac nare. Mã ame pahkam incryac to incryc, mã hõ kãhhõc ita kam cute me pahna amji jarên — hajÿr.

Mã Hirquij me, mehkwy atajê te impar, ne ma Pahpãm mã mehcajrên catê cahãj ata wÿrme mõ. Ne cute me cumã pahhi Joxij te ampo cunea na ihpeacre, mã cuteamji cajrên na hàhwÿr xà na, cumã harkwa kujahêc atajê cunea jarên.

Mã mehcajrên catê cahãj ita te Hirquij mã harkwa to:

— Ca ha pahhi mã awjarê, nãmri Pahpãmte pahhi ata mã harkwa kujahêc to:

“Pa wa ha krî ita cunea jipej tu.

Nepor ihkãhhõc kam ampo kên cunea na ihhõc ata, quê ha ihkên to hane.

Ampo na? He me ikwÿ pê Juta catêjête cama ramã me ito hapac kêt, neahti na ame hõ pahpãm cahàc krekà atajê kîn, na ri ampeaj kam me kam icryc, por cute ame ampo ton atajê incwÿrjapê.

Ne Joxij, atea ca gõtpe ipar, ne ikam mare mã, icuna mã,
ate apeacre na imã amji jarĕn, ne amji pêakà jipôn, ne acwÿr.
Cwÿrjapê ca ha nee ampo kĕn atajê cunea pupunnare.
Wa ha nee gõ krĭ to hamre nare, ca ha ahnaa jũ caxuw ty, wa
hacormã krĭ ita jipej” — hajÿr.

Mã hacpÿa mã pahhi Joxij wÿr cute mePahpãm jũjarĕn ita to me amji
jaxàr, ne me cumã harĕn, mã cute impar. Ne cute mehkwy to cuprôn, ne
hũpar xà ita to me cumã hahkre.

Mã cute me hahkre pej ne krĭ cunea kôt ame ipicràn, ne kam cute ame
pahpãm cahàc krekà jürkwa atajê cunea to me hamre partu. Ne quêtcute
amji kam hapac xà cunea to Pahpãm to meamji mã ihhimpej, ne catyt
kam ihkôt me ipa.

HAPU NA ME HÛJARĒN XÀ JÕ KÀHHÔC

2 Me Hũjarĕn Xà 20.1-30

Pahhi Joxap jarĕn xà

20 ¹Pê harã mã hĭkjê pê Juta jõ pjê kam Joxap pê Xarômãw xwÿ
tãmxwÿ tãmxwÿnõ, ne cupê Juta catêjê jõ pahhi. Ne ajco catyt
kam Pahpãm jarkwa kôt ipa, na pê Pahpãm ajco ihtehcajpar to ipa.

Ne amcro nõ na Mowap catêjê jõkrãhtare me, Amonit catêjê jõ krãhtare
me, Etõ catêjê te, ma pahhi Joxap me, Juta catêjê wÿr me harkwa
kujahêc, ne me cumã:

— Wa ha me gapu ne me ato hamre tu — hajÿr.

²Mã pahhi Joxap wÿr hanea ne cute me harĕn catêjê cator, ne me
cumã:

— Ihmat rûm ajpĕn Cõxwatycti jĭkjê pĭn krãhtare jãhtõa neme cator,
Xiri jõ pjê me, Geti jõ cõ kôt pjê ata pĭn — hajÿr.

³Mã Joxap te me harĕn par, mã cupê amji jahkre kêatre, ne cumãpa.
Mã cute amji tehcajpar xà na Pahpãm wÿr na amji kam hapac, ne
Jutacatêjê cunea mã harĕn to hajÿr he:

— Cu ha me pajãpàn nare kam, Pahpãm mã me pahcakôc ne cumã me
amji cajrĕn, me pamã amjikĭn nare kam — hajÿr. ⁴Mã cute me kam hapac ne
Juta jõ pjê kam krĭ cunea pĭn, Krĭpinkrĕn wÿr me cator, cute me cahê na me
ipijacri xà ata kam me Pahpãm temehtehcajpar xà na hàhwÿr prãmte.

⁵Mã Joxap mehcunea jipôc ri hãm, cute Pahpãm to me amji kam hapac
xà jürkwa tuw kam, nePahpãm mã ihcakôc to:

- 6 — Me ijõ Pahhiti pê me iquêtjê jõ Pahpãm!
 He apyxit peaj ne cõjkwa kam apêPahhiti,
 ne apê pjê cunea kam Pahhiti.
 Ne apê pjê cunea kam pahhicatêjê cunea jõ Pahhiti.
 Ne ampeaj kam acarôt tỳj, ne ampeaj kam quêt atỳj.
 Ne jũm quê ato cõ? Hamreare!
- 7 Me ijõ Pahpãm, pom pê ca pjê ita kam mehkrĩ catêjê tome akwỳ mã
 to hamre ita?
 Ne akwỳ nõ Aprãw tàmwxỳ catêjê mã, pê ca pjê ita to awjahkre,
 mãr quê me to hõ tekjê rohnỳtti mã.
- 8 Ne me akwỳ itajê mehkrĩ, ne cute gaprỳ to me cati prãmte
 meamã gũrkwa ita xãm,
 ne me amã amji jarĕn to hajỳr he:
- 9 “Quê ha me ikam me ixà nõ cato,
 nare, quê ha me ipijapu xà nõcato,
 nare, prãm cato,
 wa ha itỳj gũrkwa ita kam me acunamã me icuhhê,
 ne ate itehcajpar xà na me ana ahwỳ,
 ca ha atỳj meikampa ne me ikĕn xà nõ itajê pê me ipytã” hajỳr.

- 10 Ne ita caxuw, pjê incrê pĩn ajpĕn cute me ito hamre xà caxuw
 me mõr na, ca me hõmpu.
 Ne pjê incrê atajĕa inquêtjê tĕte,
 pê came iquêtjê jiprõ,
 pê nee me hipej nare,
 Ejit jõ pjê pĩn me catorxà ata kam,
 ne quêt cama me ipu na me ajrõ.
- 11 Ne hamre, ita kam mehtàmwxỳ te me iquêtjê kĩnte,
 me ijipej to prãm to ajpĕn me mõr na, ca me hõmpu he!
 Hamre, ramã cute, pom ate me imã pjê jõr ita tĕte me icator xàa
 caxuw ri, ajpĕn me mõ.

- 12 Me ijõ Pahpãm, ca ha me hõmpu ne me to amji kampa,
 ne me imãjũ mã me to, ne me cupê me ipytã.
 Ampo na? Me ipê krãhtarepahtỳjti ita pê jũ mã ite me amji ton,
 ne me cupê me amji pytãr xàjahkre kĕatre cakrõ,
 wa itỳjapê me ijõ Pahhiti te me cupê me ipytãr na me gikaj — hajỳr.

13 Ne Juta jõ pjê cunea pĩn me hũmre cunea me, mehprõ me, mehkra
 mea mã cute me cuprõn, ne Pahpãm cunamã me hãm.

14 Mã Pahhiti Carõ Pejti ata mehcote na jũm xũmre nõ japrỳ teJajiwer
 ata mã amji jõr, mã cute mehcunea mã harkwa kõt hũjarĕn to hajỳr he:

15— Me acunea me apê Juta catêjê me, Krîpinkrên catêjê me, pahhi Joxap me, me acunea me ikampa! Pahpâm pê Pahhiti te me pamã hûjarĕn to hajÿr he:

“Nee ca ame pa nare!

Ne nee krãhtare jãhtôa to hàhtô ne carôt tÿjti ita jarĕn par xàto ame amji mã me apec xà crÿn nare!

He me ipijapu xà ita, nee cupême atekjê nare,

ne cupê ipê me Apãm Cati tekjê, wa ha pa me to amji pytà.

16 “Ne apê quê ha Xicjô caprûm jatuj xà kôt, me awÿr kàj mã me mō, ca ha ajpêan kam, ajpĕn wÿr ahpar mã me mō, ne Xeruwew jō pō jahkã kam me ajpĕncajpa, ne cama me ajpĕn to xa.

17 Ne nee ame apijapu nare,

ca ha cama ame acuhê ne ite me apytãr xà ita na, me ipupu.

Me apê Juta catêjê me,

me apê Krîpinkrên catêjê me,

nee ca ame hûpa nare, ne nee ca ame apeacrenare!

Ca ha apê na curi me hÿrmã me mō,

wa ha hanea ne ipê me gōPahhiti me acahê na me hÿrmã mō”

hane — hajÿr.

18 Mã pahhi Joxap jûpar, ne Pahpâm to cati prãmte, pjê kam ihkõn krã to ihpÿm. Mã Juta catêjê me, Krîpinkrên catêjê te me hajÿar, ne ame Pahpâm kîn to amji kampa. 19 Jirô pê mã ri Rewi catêjê pê Cowat me Cõre tãmxwÿ tãmxwÿ atajê te me amji to caprãr ne me xa, cute me Ixaher jō Pahpâm pê me hō Pahhiti cati na ameharĕn prãmte, ne kypê me cumã mençrer nare, cute me harĕn xàa to.

20 Mã apê mã irãrãtia na, ma Juta jō krãhtare me hÿrmã pō ata wÿr me mō, mã pry kôt Joxap jãhhuc ne cute me hapackre to:

— Me ikampa, me apê Juta catêjê me, me apê Krîpinkrên catêjê, Pahhiti pê me pajō Pahpâm to, ca amji mã me ahimpej kam me to acrà tu ne, quê ha taa meapytà! Ne Pahpâm jarkwa to mehçakôc catêjê to me amji mã me ahimpeajne, quê ha ampo cunea me pamã imej pit! — hajÿr.

21 Ne cute ame hō pahhi catêjê cunea me, me ajpĕn par jirô pê mã ri, Pahpâm mã mençrer kam cute me to ihtĕm, ne ma me cumã increr to mō, nemençrer xà kôt me to cahi rĕn to mō. Mã mam mençrer catêjê mençrerto mō. Ne cute me to increr catêjê kã itajê ajteare mã, ne Pahpâm toamji kam me hapac xà caxuw pit mãimpej, mã me cumã increr to:

“Hõtê ampeaj kam,
me amã ikîn rohnÿtti mã

pyrên meijakry!”

to hajÿr to mŏr kwÿa kam, cute me Pahpãm mã amji jarĕn, pry kŏt.

²²Ne cute me Pahpãm mã mençrer kam ihtĕm, me ajkaam mã Pahpãm te Amonit me, Mowap me, Etŏ jŏ krãhtare te ame ipijapu na me ton. Mã cutea me ajpĕn kam ihtĕm, ne me cutea me amji jipej tu, ne me amji to hamre tu. ²³Mã Amonit catĕjĕ me, Mowap catĕjĕ te Etŏ catĕjĕ kam mehtĕmne cute me hipej tu. Jirŏ pĕ mã ri cute ajpĕn kammencryc ne me ajpĕn kam ihtĕm, ne cute me ajpĕn jipej tu!

²⁴Mã ma Juta catĕjĕ hawĕnti nŏ kàa na me hàpir, ne ahpar mã meirit, ne cute me pjĕ kam mehtyc pit pupun, mã pjĕ kam mehtyc pit ame hikwa. Ne nee krãhtare pĕ me curĕ xwÿn catĕjĕ atajĕ nŏ cator neihtir nare, ne cute amjia kŏt me amji jipej tu. ²⁵Mã pahhi Joxap na kjĕjĕ me hÿrmã me cator, ne cute me krãhtaretyc catĕjĕ pĕ me hàhcukrĕj cunea to me cuto tu, ne me to ihcuhkwÿr he. Ne cute me ampo na hÿ jãhwÿrti atajĕ to ame amji jahĕrpartu. Ne cute me ampoitajĕ to me ipa to me amcro to incrĕ! ²⁶Ne me ahna amcro te cwat kam ri Perac jŏ caprũm kam cute me cuprŏn, ne Pahpãm catihtĭ na me cumã harĕn. Cwÿrjapĕ ri cormã ita kam caprũm ita japrÿ te “Pahpãm to me cati xà jŏ caprũm”.

²⁷Ne ma cute me amji jaxàr, Krĩpinkrĕn wÿr, mã Joxap mehkwÿ mãmam mŏ, ne ampeaj kam me cumã amji kĩn. Ampo na? Pahpãm te me curĕ xwÿnpĕ hÿtãr xà impejti ata to me hÿtãr na ri. ²⁸Ne me cahĭ rĕn to mŏ, ne Krĩpinkrĕn mã me hàr, mã mehkhŏt mehãkŏr xà japãre me, hŏhhi me pãtwÿ to me hàkŏr to me mŏ, ne me catyatre na Pahpãm to cute me amji japackre xà jũrkwa wÿr me mŏ.

²⁹Mã pjĕ kwÿ jŏpahhi catĕjĕ te me Ixaher catĕjĕ jŏ Pahpãm te mentĕte me curĕ xwÿn catĕjĕ cunea jipej na me harĕn par, ne ampeaj kam me cumã Pahpãm cupa. ³⁰Hŏ, ita na pĕ Pahpãm Joxap himpej xà carĩcti na to, mã kam ahcarĩcti. Pĕ nee hipĕr me curĕ xwÿn nŏ me kam ihtĕm nare. Hamre.

Pahpãm Jarkwa To Me Cumã

MEHCAKÔC CATÊJÊ

Ûyũ, me hũmre pijakrut nõ japyrẽ te, Jona me Nahũm, ne me cupê Pahpãmjarkwa to mehcakôc catêjê nõa. Na ri me hõ kãhhôc japyrẽ pê Jona Jõ Kãhhôc (Jona) me Nahũm Jõ Kãhhôc (Nahũm).

Mã Pahpãm te me Xiri catêjê pê Ixaher catêjêcurê xwÿn atajê mã amji cawpa xà caxuw, mam me hÿrmã Jona kujahêc. Mã hõtpê cute me Jona kam hapac ne me kên ton jicu.

Jirô pê mã ri hacpÿa mã Xiri catêjê te mehkên ton kam mehtẽm, cwÿrjapê ri hacpÿ ma mã cute me hÿrmãNahũm kujahêc cakrô, mã cute nee ihkôt me Pahpãm jarkwa par prãm nare. Ne caku nõa kam cute Ixaher catêjê, por kÿr rũm pjê jÿkjê kam me hakrã atajê cunea pro, ne mame hõ krÿ japyrẽ te Ninew wÿr mehcunea to mõ, Mã curia me ipicacwÿr, ne curia me hàhhuc, ne me ipictor. Cwÿrjapê ri Pahpãm te Xiri catêjê atajê to kêanre, ne me to hamre. Ne ita caxuw Jona jõ kãhhôc kwÿ mã he.

Jona 1.1-4

Jona pê Pahpãm jarkwa to ihcakôc catê

1-2 Pê caku atajêa kam Xiri jõ pjê kam Ninew jõ krÿ catêjê pê Ixaher catêjê curê xwÿn, ne mehcuneakêanre. Cwÿrjapê pê Pahpãm mã me hipej prãm. Ne cumã me caprÿ, cwÿrjapê pêcormã me cumã amji cawpa pyxit, cute ame to kên xwÿjreana. Quê ihhêaj to hacpÿ mã Pahpãm wÿr meapkjê, quê ha nee me hipej nare xà na, cute Jona na hàhwÿr. Ne Jonaata pê Ixaher catêjê nõa, ne cupê Pahpãm jarkwa to me cumã ihcakôc catê.

Mã Pahpãm te Jona mã harkwa to:

— Ca ha ma krÿ catia japyrẽ te Ninew ata wÿr tẽ, neme acurê xwÿn pê Xiri catêjê atajê mã ijarê, nãmri wa ha amehkên itajê jahpan xà na, ame to kêanre ne. Wa ha me cumãmehkên ita kujate ne to me hipej, cute mehkên jicunare ita kam — hajÿr.

Mã ma Jona apu hitôt. Ampo na? He ihtÿj cumã Ninew catêjê pê Jona na mehkwy curê xwÿn atajê jamre na to prãm, na pê ma amjia kôt apu hitôt, ne ma cama cõxwa tohkã ata wÿr tẽ. Ne cute Ninew jõ krÿ wÿr ihtẽm xà kaj na, Cra jõ pjêwÿr amji mã pãr kreti nõ mõ ita mã cator. Ne

cute ihtēm xà ita na hāmjōr ne ma cumã hār. Pê pâr kreti ata ihkre ita ajkrut, ne kÿj rûm ita, ne harã mã ita. Mã harã mãita mã Jona xār, ne curia caxwãm pê nõ ne apu gōr.

Jona 1.5-17; 2.1-10

Pê Pahpãm Jona kôt kôcti kujate

Mã ramã côxwa jipôac ri pâr kre me to mō, mãPahpãm te kôc pahÿtÿjti nõkujahêc, mã ampeaj kam côxwa to harô to pra. Mã pâr kre mōr xà atakêanre. Ne tàkamrÿ kam me hâpêncatêjê mã hūpaa to hūpa, mã ihtÿj amehtyc na ameamji to hane. Ne cute me hō pahpãm cahàc krekà mã me caràr kammehtēm. Ne cute côxwa kam me ampo pytÿti atajê to me hūcapêr kam mehtēm.

Mã Jona ihtÿj caxwãm pê nõ ne gōr, ne nee cuteampo te hajÿr xà ata na hahkre pejnare. Mã ma pâr kre jō pahhi apu hapên to tē, ne cute ahna cator, ne cumã harkwa to:

— Ampo na mã ca nõ ne apu gōr? Jū wÿr ca ha ita caxuw gōr! To jÿ ne gō Pahpãm mã me pahcunea cajrên, quê me pahtehcajpa! — hajÿr.

Mã pâr kre kam me hâpên catêjê te jūm cwÿrjapê kôcti ita te ame to hajÿr xà ata jahkre pej prãmte, ajpên mã hūtâr xà ata rē, ne ame hōmpu ne ihkôt me hakop, ampo cwÿrjapê mōrmō kôc ita ame to hane. Ne pea cute me Jona mã cator, ne mehçukij, ne me cumã:

— Ampo to mã ate, mã Pahpãm te me pahwÿr kôcti ita kujahêc? Me anō mã ca? Ampo to mã caapê? Jū pîn mã ca mō? Jūmjê kwÿ mã ca? — hajÿr.

Mã me cumã:

— Ipê Ixaher catêjênō, ne wa itÿj me cōjkwa kam Pahpãm pê me ijō Pahhiti pê ampo cunea to ata to amji kam ijapac to ipa. Por pê cōjkwa me, pjê me, côxwa to ata mã wa apê — hane. Ne hanea ne cute ma Pahpãmpê ihtēm ita na, me cumã amji jarên par.

Mã cute me hūjarên xà atapar, ne me cumã paa to pa, mã me cumã:

— Mêr ampo na mã ate hajÿr? Jū mã wa ha me ato, quê cōjkwa kam Apãm Cati kôcti ita toankrê? — hajÿr. Pê cormã kôcti ita xwÿ kam, ajco hâpêr tÿj to ipicamên to ipa nare, na pê ameJona çukij to hane.

Mã Jona me cumã:

— Mêr cô kam me imê, quê ha kôcti ita ankrê. Wa ite ramã kôc ita jahkre pej. Icwÿrjapêa ri ame ato hane, ijūpar nare kam — hane.

Mã ma cô kam ame mên caca, ne ma cama kre wÿr, pjê wÿr me to ihçakrÿnto, me hahkre to mō, ne nee cute me to mōr ita mã hamãr nare. Ampo na? Ma kôcti ita hâpêr toihtÿj to ipa.

Mã pea Pahpãm mã ame caràr, ne me caràr to:

— Pahhiti, ca ha nee me ite cô kam Jona mẽn ita jahpan xà na, me ikamacryc nare — hane. Ne cute me Jona pro necô kam me mẽn. Me ajkaam mã kôc ita pinkrên. Mã me hũmre itajê ame Pahpãm cupa, ne ihtÿj cute Pahpãm par na me amji ton.

Mã Pahpãm te tepti catia nõ ita kujahêc, mã cute Jona cunea na ihkrêr. Mã cute tepti ita caxwãm pê amji to amcro to incrê, ne cute Pahpãm mã ihcakôc, ne amji tehcajpar xà na ihwÿr. Mã Pahpãm te tepti mã, Jona toamcrà na pire mähôjahir na hũjahkre. Mã tepti te Jona to hõjahir, mãihtiar na pjê wÿr hàpir.

Jona 3.1-10

Pê Jona Ninew jô krĩ catêjê mã ahcawpa

3 Mã Pahpãm te hipêr Jona mã ihcakôc ne cumã: — Ca ha maNinew jô krĩ catia ata wÿr tẽ, ne ite amã ijũjarên xà ita to mecumã awjarê — hajÿr. Mã ita caxuw Jona te Pahpãm par pyrentu, ne ma Ninew jô krĩ wÿr tẽ.

Ne pê Ninew jô krĩ ata catia to cati, quê jũm ihcunea ton to prãm, neapu ihkôt môr to amcro to incrê, ne cormã apu ton pa. Mã krĩ mãJona xàr, ne amcro ata na, cutePahpãm te cumã hũjarên xà ata to me cumã hũjarên kamihtêm, ne cute me cumã ihcawpa to:

“Quê ha ajpên amcro te cwarênta xà ita jirô pê me akên itajêjahpan xà na, Pahpãm me gô krĩ ita cuneajipej tu!” hajÿr.

Mã ihtÿj ajte cute me Jonapar. Ne cute mehkên ton jicu. Ne nee ame hàpàn nare, ne nee amehkômnare. Ne cute amehkên jũ na mehpeace na ame amji jarên xà na, cute amehkà impejti atajê to pôj, ne amehkàkêanre pê xác te amehkà itajê mã ameamji jacjên, ne kam ame ipa. Mã hanea ne Ninew jô krĩ jô pahhi te Jona jũjarên xà itapar, ne apu amji tũm. Cute ihkên xà ton atajê na amji jahkre pej, na ri cumã amji kĩn nare. Mã cute ihkà impejti ata krÿn, ne cute xácte ihkà ita mã amji jaxàr, ne ma mô ne pro jipy to hÿr, cute hũ na ihpeace na to amji jarên xà caxuw.

Ne pahhi ita me, cumã me hàpên catêjê me, cute me ajpên to hÿr, ne meajpên par. Mã pahhi te mehkwy mã ihkàhhôc ton, ne cutekam harkwa kujahêc to hajÿr he:

“Cu ha nee, me pajô parxare mea mã, amepajàpàn nare, ne nee me pahkôm nare.

Ne me pahcunea me pahkà kêanre mã me amji jacjê,

neampeaj kam Pahpãm pejti ita mã me amji cajrën.
 Ne me pahcunea me pahteamji kam me pajapac xà kên atajêmã me
 hikra,
 ne me pajàprê to me papa jicu,
 quê ihhêaj to Pahpãm ihtÿj amji mã me pajapê,
 cu ha pahÿtÿj me xa, quê ha nee me pajõ krĩ to ipictor nare” hajÿr.

Ne cute hõ kàhhôc ita to, ma cumã me hàpên catêjê kwÿ kujahêc. Mã
 cutemehcunea mã ihkàhhôc kam harkwa itajêa cahyt, ne harên partu.
 Mã mehcunea te harkwa kôt mehkên xà itajê jicu.

Mã Pahpãm te me hõmpun, ne cumãme caprĩ, mã nee cute me to
 ipictor, ne me hõ krĩ tohamre nare, mã ihtÿj me xa. Hamre.

JUTA CATÊJÊ MÃ

Pahpãm Jarkwa To

MEHCAKÔC CATÊJÊ

Ïhÿ, caku jàhtôa kam Pahpãm te harã catêjê pê Juta catêjê atajê mã, cute harkwa to mehcahôccatêjê kwÿ kujahêc. Atajê te ahpÿanre na Pahpãm jarkwa to me cumã mehcahôc par, ne ihkãhhôc kam ahna ihhôc. Ne ahpÿanre na me hõkãhhôc kam me haprÿ pit. Ne me haprÿ te, Hõxêj me, Amoti me, Miquij. Na ri me hõ kãhhôc japrÿ pê **Hõxêj Jõ Kãhhôc** (Hõxêj) me, **Amoti Jõ Kãhhôc** (Amoti) me, **Miquij Jõ Kãhhôc** (Miquij). Ne cute me cumã Pahpãm te ame to kên xà cawpa to: “Ca ha mãnea mã ate me akên ton na, quê ha Pahhiti hahpan xà na me awÿr me acurê xwÿn kujate, quê ha me acunea pro, ne me akwÿ kwÿ jipej, ne ma jÿ kam me akwÿ to pra” hane. Ne hanea ne cute me cumã hõtpê jÿ caxuw Pahpãm te me to impej, ne hacpÿa mã me hõ pjê kam me hãm na to hÿjahkre.

Mã hanea ne Pahpãm jarkwa to ihcahôc catê japrÿ te Patij te Juta jõ pjê cahi na Etõ jõ pjê kam mehkrÿ atajê mã Pahpãm cawpa. Na ri hõ kãhhôc japrÿ pê **Patij Jõ Kãhhôc** (Patij). Ne cute me cumã cuteame Juta catêjê to kêanre jahpan xà na, Papirõn catêjê te me to hamre tu na harên. Mã nee Etõ catêjê te me kam hapacnare, cwÿrjapê ri me hÿrmã Papirõn catêjê cator, ne ame hapu, ne me hipej mã me hamre tu.

Mã hanea ne cute mencre itajê te Juta catêjê mãPahpãm jarkwa jarên, ne mehõ kãhhôc kam mehhôc par. Atajê japrÿ te, Jõwer me Hapakuc me, Xõpôn. Na ri me hõ kãhhôc japrÿ pê Jõwer Jõ Kãhhôc (Jõwer) me, **Hapakuc Jõ Kãhhôc** (Hapakuc) me, **Xõpôn Jõ Kãhhôc** (Xõpôn). Pê Hapakuc mekwÿ wÿr me curê xwÿn pê Papirõn catêjê pupu, ne curi mekwÿ jirõa pê meh kêanre na, me hahkre pej pyrentu. Na pê me ahna Pahpãm cukij to: “Ampona mã ca ame akwÿ jirõa pê Papirõn catêjê kêanre atajê te me akwÿ to kên na hamã, quê ha rÿ ame to kêanre ne?” hane. Mã Pahpãm cumã: “Nee quê ha Papirõncatêjê me ikwÿ to hamre nare, quê ha cama ame to kên, jirõa pê wa ha pa Papirõn catêjê cunea to hamre tu” hane. Ne ita caxuw Hapakuc jõ kãhhôc kwÿ mã he.

Hapakuc 3.1-19

- 3** ¹ Ỹhỹ, Hapakuc pê Pahpãm jarkwa to me cumã ihcakôc catê ata te Pahpãm to cati prãmte, cumã increr xà to increr to hane he:
- ² “Ỹhỹ Pahhiti Cati,
 ca ate imã ate amji kam gapac xà na amji jarẽn.
 Ne ca ate gâpên xà ton xà ata catia to cati,
 na wa itỳj amji mã hũpa to catia to ipa.
 Ne pom pê ca mam me iquêtjê tehcajpar to catia,
 pê wa ahna garẽn pa,
 ita na ca ha hipêr ita kam me itehcajpa,
 mār wa hanea ne me cuxà me ahna me apupu.
 Ne wa ite me ato kên jahpan xà na me ikam acryc cakrô,
 ca ha atỳj ate me icaprĩ na amji to amji japackre.
- ³ “Wa ite Etô jô pjê kam kënti japrỳ te Parã ata pĩn,
 ate apejti to ajpên iwỳr amôr na apupun.
 Mã acarôt prà jàhcujro te còjkwa cunea cujro.
 Mã pjê cunea kam me amã acatihiti to mehcakôc.
- ⁴ Ne apê pyt japôj pê mã hàhcujro pyrãac,
 ne ate gũhkra kam
 acarôt tỳjti to apimxur ata pĩn gàhcujro catia cator.
- ⁵ Ne acumam me hà catia mō,
 ne hanea ne akôt me hà nō kēanre ata ajpên mō.
- ⁶ Ne gàhhuc ne apinkrên me ajkaam mã pjê te hàhcujrôn kam ihtēm.
 Ca ate krĩxàre pupun ne mehkopĩr,
 mã acupate amehtertet.
 Mã rỳ pēa mã kënti kàhti ihkrĩ atajê pijaxwỳr par.
 Mã hanea ne rỳ pēa mã awjarô ihkrĩ atajê acupate pỳpỳm ne hamre
 par.
 Ne ate amji kam gapac xà atajê,
 jũ caxuw hamre xà nare,
 ne quêt ihkrĩ rohnỳtti mã.
- ⁷ “Ite Cuxã catêjê krã pictor na me hõmpun.
 Ne hanea ne ite Mitijcatêjê te acupate amencwỳr na me hõmpun.
- ⁸ Ne ate cō cunea te apu amji hohoc na ton,
 mã apu amji hohoc na ite hõmpun.
 He xà ajkĩ cōxwa me cō cunea kam acryc na mã,
 ca apu to hane?
 Hãpà! He ca ate amã me hàprê catêjê jô cawrô me,

hõ kujti kam mehrĩ atajê te me ipytâr xà ata caxuw ihkujahêc,
na ri cô cunea apu ahhohoc.

⁹ Ate to gõ cuhê xê kre tỳj,
ne ate kruw jàhtôa na gàhwỳr,
ate to acurê xwỳn catêjê jipej prãnte.
Ne ate pjê cunea kôt cô pijapjêr nacumã gũjahkre,
mã ihtỳj pjê cunea kôt apu ajpjê ne cute capahkre ton par.

¹⁰ Mã kēnti te ihhêj ne apupun,
ne acupate apu ihtertet,
mã cô catia ne cator ne ihpahtỳjti to ajpjê,
ne cute pjê to hipu par.
Mã côxwa ihhêj ne carâr,
ne kày mã harôti catia to pra.

¹¹ “Ne pyt me putwrỳ jirôa pê gõ kruw me,
gõ kruwxwa pràti ita te pyt me, putwrỳ jirâr,
mã ihhêj ne kam awcapàtkô.

¹² Ne ca pjê kam,
me kam acryac kam apu mō,
ne ateacàcàac kam, krĩxàre kam axãm.

¹³⁻¹⁴ Ne ca ate amji mã me akwỳ capi,
ne me cumã pahhi na me hũxwỳratajê pytâr prãnte,
ca me hỳrmã acator.
Wa me icurê xwỳn catêjêjō krãhtare cupate ame amxu.
Mã ihtỳj cute me ijipej jahkre kêt nare kam,
me ijipej na amji to ame hajỳr.
Ne cute me icràn prãnte me cupê carĩjti pyràc,
ne me ikam ihtēm.
Ca ate me kam atēm,
ne me hõ pahhi jō kruw xwaa to
ate me hõ pahhi krã caxwỳr.
Ne ate hĩ gãn par,
ne mehhi pit juwahi.

¹⁵ Ne ca côxwa kam gõ cawrô to apu gàhhuc,
na ri cô ita apu ahhohoc.

¹⁶ “Ne wa ite ampo itajê kam ijapac,
ne apu itertet pyrentu.
Mã ijahkà ampo itajê cupate apu ihtertet,
ne icahi apu amji cahhy ne icarôt peacre” hane.
Hõ, pê Hapakuc Pahpãm mã increr to hane.

Pê hanea ne ihkwỳ mã amji jarẽ ne me cumã:

“Ỡhỹ me ikwỳ!

He Pahpãm te imã, por rỳ nee ampo te jũ mãn nare atajê jahkre,
wa ite hõmpun,

ne quê ha cormã me pahwỳr cato.

Ne wa ha apu hũpa cakrô,

itỳj aracri hikaj to ipa,

quê ha ahnaa Pahpãm, cute ame pahto kên prãm catêjê to hamre
partu.

¹⁷⁻¹⁸ “Quê ha pĩxô pàr cunea irã nare,

ne hanea ne pĩxô krô na hô nare,

ne pur cunea kam me hõ nare,

ne nee ikre pu na carà cahàcrehamreare,

ne nee kwỳc kam pryti hamreare cakrô,

wa ha itỳj Pahhiti pyrên ijakryti ne.

Ne Pahpãm te ipytàr catê ata kam ri ijakryti ne.

¹⁹ Pahhiti Cati pê mehcunea to ihhimpej catê ata pê riicarôt.

Ne pom hĩjaxy kēnti kàa jimoc na,

carôt tỳj imprar tỳjti to apu ipa,

ne nee ihpỳpỳm nare,

ita jĩkjê na ri Pahpãm ito,

ne ite ampo kên cunea mã

ijũcanãr xà caxuw

imã icarôt gô” hane. Hamre.

IXAJ ME JEREMIJ

Pê Pahpãm Jarkwa To

MEHCAKÔC CATÊJÊ CATI

ÿuÿ, harã catêjê pê Juta catêjêatajê, hanea ne kÿj rûm catêjê pê Ixaher catêjê cuxã, Pahpãm to me hapac kêt to me mō. Cwÿrjapê ri Pahpãm te me hÿrmã me cumã harkwato mehcahôc catêjê jãhtōa ne ihkujahêc. Mã Pahpãm te ahpÿanre na me cumã ampo to hahkre atajêa to me cumã ihcakôc to me ipa, ne cute me hōkãhhôc kam ahna mehhôc.

Ne Pahpãm jarkwa to me cumã mehcahôc catêjê pijakrut itajê japrÿ te Ixaj me Jeremij. Na ri ahpÿanre na ihkãhhôc atajê kam me haprÿte **Ixaj Jō Kãhhôc** (Ixaj) me, **Jeremij Jō Kãhhôc** (Jeremij). Mã Jeremij te hō kãhhôc nō kam ramã ampo pej cunea jamre ata to cute me amji japackre xãcaxuw ahna ihhōc, cwÿrjapê ri hō kãhhôc ata japrÿ te **Mencwÿr JōKãhhôc** (Mencwÿr). Cwÿrjapê ri ajwar me hō kãhhôc catihti atajê kam, cute me Juta catêjê mã me Pahpãm cawpa. Ne ita caxuw Ixaj me Jeremij jō kãhhôc kwÿ mã he.

Ixaj 1.1-4, 10-20

Pahpãm amji wÿr mehwÿ to ipipkjêr xã caxuw me cumã akij

1 Me ikwÿ, me ikampa! Pahhiti pê Pahpãm me amã ihcakôc to hane he:

“Pê wa Ixaher catêjê jakrã te tōxi atajê to amji mã ikra,
ne ajco me hamãr to impejti.

Mã ajte icuna mã mehkêanre.

Pryti me cawrô cahãcre,
ihÿÿj to ipijaparcatê pupu.

Mã ajte nee ihkĩnte me ikwÿ pê Juta catêjê me ipupun nare.

Ne imãa ihhêj ne me ikwÿ jãhtōti itajê,

nee me ipar nare.

Ne mecupê mehkên catêjê,

ne iwÿr me catut to me ipipkjêr,

ne cute me imã hikran.

“Me ikwỳ, xà ca cormã me amã ite ame atokên xà ata na me prãm?
 Xà ca ha ajkĩ ipê me gõ pahhina,
 ma ame icaca ita na?
 Ca ha amehane,
 quê ha me acurê xwỳn me akrã rûm me ato kên na cucwa,
 ne ma meapar mã to ajhu.
 Quê ha me gõ krĩ
 hanea ne caxàr tu ne.

“Me ikampa he:
 Pom ca me akên jahpan xà na,
 me imã ampo pryre to me capaitajê kam, ramã ipeacre.
 Hipêr me imã ihnō ton nare.
 Imã hipêrcarà cahàcti hōhti twỳmti na prãm nare.
 Ne imã hipêr ampo itajê nōcaprô pupun prãm nare.
 Ne imã hipêr me akên jahpan xà na,
 ate me imãampo pryre to caxàr ita na prãm nare.
 Ampo na? He ca nee me akên xàitajê jũ na me apec nare.

“Ca ha me imã acakôc,
 ne kàj mã cōjkwa wỳrme imã gũhkra curor, ne me apě,
 wa ha nee me apupun nare,
 ne nee me aparnare.
 Ca ha ampeaj kam, tee imã me acakôac to me acakôc,
 wa ha nee me aparnare.
 Ampo na?
 Me gũhkra itajê pê mehcuran catêjê jũhkra.
 Ne ihhêj necormã ahna ate mehcuran atajê caprô.

“Imã me ate me amji cuhhôn ne me atetet na me ato prãm.
 Nãmhã, ne meakên ton jicu.
 Ne ampo pejti ton to ca me amji kampa,
 ne me to amji pyràc.
 Ne me cupê hamreare atajê me,
 me cupê me hũmjê nare atajê me,
 me cupêmpjê nare atajê,
 ca mehtehcajpa.

“Ca ha ita to hane,
 wa ha ana amjicapa ne ato impej.

He ampeaj kam wa me amã amji jarẽ.
 Caha te ate me akên itajê ton,
 mã cute me acaxwÿn to kên cakrô,
 ate ihkên ton jicu jahpan xà na,
 wa haitÿj hacpÿa mã me amã to impej.
 Ne ca ha ampeaj kam me ikampa,
 ne ito pit mã amji mã me ahimpej,
 wa ha itÿj me ato me gakraaj to me gakraj.

“Nãmri ca ha ma ate ame ipar caca,
 ne icuna mã ame akên ton na,
 wa ha cama meana me acurê xwÿn jamã,
 quê ha jũ mã ame ato,
 ne me gipej tu” hane.

Hõhõ, quê ha ita me ato hane he.
 He me gõ Pahpãm, pê Pahhitia te ri me amã hũjarên xà ita to hajÿr.

Ixaj 11.1-11

Pê Pahpãm Mexij pê mehkên catia pê me tohpôj catê to awjahkre

11 ¹Pê Pahpãm hipêr harkwa to ihcakôc catê pê Ixaj ata mã harkwa
 kujahêc to hane he:

“Quê ha jũm pĩ pàr nõ kat na hakep,
 quê ha ihtÿjipàr wej ata kat kam, haxà kam hitêr,
 ne kam ipàr tuw nõ cato.

Jĩkjêna, quê ha pahhi xwÿ pê Tawi tàmwxwÿ tàmwxwÿ nõa cato.
 Ne quê ha ramãpahhi xwÿ pê Tawi ihtyc cakrô,
 quê ha ihtÿj ihtàmwxwÿ tàmwxwÿ nõacato,
 ne cupê imã hàpên catê.

²“Quê ha ipê Pahhiti Carõ Pejti ata cumã amji gõ,
 ne ihkôt cumãihkrã kre te amji jahkre pejti gõ,
 mār quê carôt tÿjti to me hapackre,
 ne ihtÿj cumã ijahkre pej, ne cumã icupa.

³Ne quê ha ampeaj kam ihcunea na, cumã ipar prãm pit.
 Ne cupêajpên pê mehkrã kên me, me mempejti to ipicokjêr catê
 impeaj.

Ne neequê ha cute mempar xà kôt pit mã,
 põ rũm cute me hõmpunxà kôt mehkên mã me irên,
 ne mempej mã me irên nare.

- ⁴ Ne quêt cute catyt kam,
me cupê ampo hamreare atajê tehcajpar prãmtẽ,
cute ame to kên catêjê atajê kên mã me curẽ.
Ne harkwa to cuteme cumã ihcakôc xà to, quê ha me hipej.
- ⁵ Ne ihtỳj catyt kam ahpyãre na,
mehcunea to impej to ipipẽnti to ipa.
Ne ihtỳj cute ampo tohũjahkre xà ata na, amji jarkwa par to ipa.
Quê ha mehcunea ahna me hõmpu,
ne me cumã impejti ne.
- ⁶ “Ne quê ha pahhi xwỳ pê Tawi tàmwxỳ tàmwxỳ ata himpej xàjõ
amcro ata kam,
quê ha ampo cunea hacpỹa mã,
mamcute amji ton pê mã,
amji ton xà ata na quê ha.
Ne rop cahàc jàprêhtiatajê hacpỹa mã capônỹre ne,
ne ihtỳj carà cahàcti hõhti atajêcahê na apu ipa.
Ne ropkror jàprêhti atajê hacpỹa mã capônỹre ne,
neihtỳj carà cahàcre atajê cahê na apu hikwa.
Ne hanea ne rop cahàcjõkre hõhti atajê,
quê ha ihtỳj pryti krahti atajê me ajpẽn cahê na apuhàpàn to ipa.
Quê ha hanea ne, ihtỳj ahkrare kwỳ amji kôt ame to ipa.
- ⁷ Ne quê ha ihtỳj ampo jàprêhti pê uxô atajê hacpỹa mã capônỹre ne,
ne ihtỳj pryti cahãjti atajê cahê na apu hàpànto ipa.
Quê ha pryti krare me uxô kra xwỳjê ihtỳj ajpẽn cahê na hikwa.
Ne rop cahàc jõkre hõhtiatajê,
quê ha cupê prytiã pyrãc,
ne ihtỳj ahtu pit kur to ipa.
- ⁸ Ne me ahkrare kryjre itajê,
quê ha ihtỳj cagã pahtỳj ihkrĩ xà atajê cahê na
ame hàkrun to me ipa,
ne ahkrare kàre itajê,
ihtỳj hũhkra to parpup krĩ xà kam hahê atajê caxun to me ipa,
quê ha nee mehcãmzar nare.
- ⁹ Ne quê ha ijõ pjê impejti ita kam,
nee ampo te me to kên xà caxuw hamreare ne,
ne nee kam ampo jamre xà nare.
Ne měr ampo na mã quê ha ampo itajêcunea to hane?
Nee mã ampo na nare.
Pom côxwa hãn ne hipu,
ne ampo cunea pro ne inco,
mã nee incrà nare,

ita jĭkjê na,
 quêha pjê kam mehkrĩ atajê cunea
 ipê Pahhiti na me ipupu,
 ne me ijahkre pejpejtu ne,
 na quê ha nee jũm pê ijahkre kêt nare.

¹⁰ “Ne amcro ata kam,
 quê ha pahhi xwỳ pê Tawi ata tàmwxwỳ tàmwxwỳ ata pê pjê cunea jõ
 Pahhiti catia.

Quê ha krĩxàre cunea me,
 pjêcunea kam ampo kra cunea,
 hỹrmã me cuprõ,
 ne me cumã amji kĩan kam ihhimpej xà krac ri me axà.
 Ne ihtỳj ihkrac ri mempejti to ame kôt.

¹¹ Ne amcro ata kam,
 quê ha pjê cunea pĩn,
 hipêr Pahhiti na mehkwyỳ pê Juta catêjê me Ixaher catêjê cahhur to
 caprã,
 ne amji na me to cuprõ,
 mārquê hanea ne ihhimpej xà krac ri me axà” hane.

Ixaj 40.1-31

Pê Pahpãm mehkwyỳ mã caprĩ

40 ¹⁻² Ỵhỹ me ikwỳ, Pahpãm te me acaxuw ito cumã ihcakôc catê
 na, ne imã ampo jarên ata, wa ha me amãharê. Cute imã hajỹr
 he:

“Ca ha Krĩpinkrên kam me ikwỳ pê Jutacatêjê mã ito gũjarên picre to
 awjarê, ne me cumã:

‘Ate me amji pupunkên tỳjti ata hamre.

Ne ate me ito kên jahpan xà na,
 wa ramã ite me amji pupun xà kêanre na me aton to ipijakrut,
 na wa nee hipêr ate me ito kên ita to amji japackre nare’ hane” hajỹr.

³ Ne Pahpãm te imã harkwa to imprar catê nō kujahêc, mã cute imã
 carâr to:

“Me pajõ Pahhiti mã, ate amji kam me gapac xà kên atajê jicu,
 ne me to impej xà te hajỹr he:

Ca ha gõ pahhi mã põtĩ kam,

pjê kam mehamreare ata kam pry nõ to,
mār quê cumã ihcuhtacti ne,
ne ajpēnti ne.

⁴ Ne hanea ne me caprũm to hipu,
ne me kēn to hōkre nõ,
ne ahkre jituw to me hipupa,
ne me awjarô to ajpēn pa,
ne cumã pry jikōtti atajê to ihcuhtac,
mār quê ahna mōr xà ata cumã ajpēnti ne.
Jĩkjê na, ca ha me cumã
ate amji kam gapac xà impejti ton to me apa,
ne catyt kam me apa.

⁵ Ne quê ha pjê kam mehcunea mehkřĩ atajê
me pajō Pahhiti carôt jãhcujiro ata pupu.
Ne Pahpãm te ri ita ton na amji jarēn,
na quê ha ihtỳj ton to hane” hajỳr.

⁶⁻⁷ Mã jũm ita te imã:

“Acaràr!” hajỳr.

Wa cumã:

“Mēr icaràr xà jũ to mã, wa ha icaràr?” hane.

Mã cute imã:

“Ca ha acaràr to hane he:

‘Pom mehcunea pjê kammehkřĩ atajê pē ihhēj rũm ahtu pyràc,
ne me hàpēn xà impejti atajêpē pĩrã pejti pyràc!

Ne quê ha ahtu me pĩrã incrà,

ne cyt ne hamre,

ita jĩkjê na,

quê ha mehcunea cyt ne me hamre,

me hàpēnxà mea mã!

Quê ha hanea ne ahtu me pĩrã

pō kam kōc pahtỳjtjacacrohti ita apê,

ne to incrà pyrentu,

ita jĩkjê na,

quê ha Pahpãm me hakô,

quê ha me hamre pyrentu!

⁸ Ne ihtỳj jũ caxuw ahtu incrà xà,

ne hanea ne ihtỳj ampo rã inxô,

ne hamre xà.

Ne quêt me pajō Pahpãm jarkwa nare,

quê ha quêtihỳj ihkřĩ rohnỳtti mã!’ hane” hajỳr.

⁹Mã hipêr jũm ita te imã:

“Ca ha ate me gũjarêñ pejti to me gũjarêncatêjê nõ,
 hawênti nõ kàa na api,
 ne Krĩpinkrêñ kam mehkrĩ atajêmã acaràr,
 ne akrãhhia kam me cumã acaràr,
 ne nee apu amji mã meampo cupa nare.
 Ne Juta jõ pjê kam
 krĩ cunea kam mehkrĩ atajê mã:
 ‘Ramã me gõ Pahpãm cator to mõi’ hane” hajÿr.

Pahpãm ri mehcunea jirõ pê carõt cati ne cute amji jahkre pej cati

- ¹⁰ Õhÿ, Pahhiti pê Pahpãm ri ramãcarõt tÿjti catia to cator to mõi!
 Ne quê ha carõt kam ihhimpej xà tÿjti ata me to ihhimpej.
 Ne quê haahpÿanre na cute me ampo ton atajê jahpan xà na,
 me cumã hãmjõr xàimpejti ata to ajpên ahpar mã mõi.
- ¹¹ Ne pom hãn ne carà cahàcre hõhti jamãr catêjê hamãr prãmte to ipa,
 ita jĩkjê na,
 quê ha ihtÿj mehkwy atajê to amji pytà,
 ne taa cupê mehamãr catê impejti ata na amji to.
 Ne ihpa kam quê ha mehkrare japÿ ne me toipa,
 ne ma menxyrxwÿ me,
 me hamãr peaj to ipa.
- ¹² Ne jũm te mõrmõ Pahpãm cuxà,
 hũhkra to cõxwa to ipipên?
 Hamreare,
 nee jũm te cuxà ton nare!
 Nare, jũm te mõrmõ Pahpãm cuxà,
 hũhkra to cõjkwa to ipipên?
 Hamreare,
 nee jũm te cuxà ton nare!
 Ne jũm temõrmõ Pahpãm cuxà,
 hõ kàhà kam pjê jacrõ cunea to cuprõn?
 Hamreare!
 Nare, jũm te mõrmõ, cute ampo to ipipên xà kam,
 hawênti jõ kēncunea to ipipên ne hũtĩ na hahkre pej?
 Hamreare!
- ¹³ Ne jũm te mõrmõ Pahpãm cuxà,
 Pahhiti Carõ Pejti ata jahkre pejpejtu?
 Hamreare!
 Ne jũm te mõrmõ Pahpãm Carõ japackre prãmte,

cumã ampo to hahkre?
Hamreare!

- 14 He xà ajkĩ Pahhiti te,
jũm te cumã ampo to hahkre xà na,
jũm nahàhwỳr?
Hãpà!
He xà ajkĩ jũm te Pahhiti mã catyt kam ipa to hahkre?
Hãpà!
He xà ajkĩ jũm te, cute ampo jahkre pej xà to cumãhahkre,
mã cute hahkre pej?
Hãpà.
He xà ajkĩ jũm te cumã cute amjijahkre pejti ita to hahkre?
Hãpà!

- 15 He Pahpãm mã pjê kam ampo cunea na,
krĩxàre mehkrĩ itajê jamreare.
Ne cumã me cupê cuhkôn kam,
cô kryjre ne ahtwỳ
ne ihpehpec pyxit peaj atapyràac,
ne ihcunea na me hamreare.
Ne cumã me cupê ihhêj rũm
ampo te ipipên xà kam
pjê jacrô toamji japackre xà nare ata pyrãac.
Ne cumã cô jipôc ri pjênçrà itajê to ipipên xà te hajyãr,
pom quê ampo cajcucre to ipipên xà nare he.
- 16 Quê ha te kên catia atajê na pĩ cunea to me cuprõ,
ne cumã kênatajê kam pryre apu ipa atajê cunea jôr prãmte,
pĩ ata kam haxwỳ ne me to caxàr cakrô,
quê ha nee Pahhiti mã ihnô na cormã cati nare!
- 17 Ne cumã ampo na,
krĩxàre atajê jamreare ata,
ne cumã mecupê ampo kôt hamreare atajê japyre mã me.

Pahpãm cahàc krekà atajê pê nee Pahpãm pyrãc nare

- 18 Ne mër ampo me ca ha Pahpãm ita to me ajpên?
Xà ajkĩpahpãm cahàc krekà me ipipêan?
Hãpà!
- 19 He pahpãm cahàc krekà ton catêjê,
ihtỳj hãn ne carêc to me to,
ne wakỳre prà tepti pê ôr ata to hipy me ahna pra ne me to incururo,
ne ihkôt wakỳre jakati to,

cumã me hakrô xà to.

²⁰ Ne me cupê hamreare pê wakÿre prà tepti pê ôr me,
 wakÿre prà jakatina hĩ jàhwÿr atajê jamreare,
 na quê ha ihtÿj amji mã pĩ impejtiatajê nõ capi,
 cute cumã pahpãm cahàc krekà na ton prãmte.
 Necute me pĩ to ipihho catêjê nõ te amji jahkre pejti nõ mã cugõ,
 mārquê cumã pahpãm cahàc krekà cuhhê impejti nõ to.
 Ne nee ampo itajê nõ pê Pahpãm pyràc nare.

²¹ He xà nee jũ caxuw ate Pahpãm jahkre pej nare?
 He xà nee ajkĩ jũmte me amã harên nare?
 He pom pê mam me amã Pahpãm to hahkre ita?
 He xà pê ca, pjê te amji ton pê mã,
 ramã cute ihcakôc xà ton ata na,
 ate hahkre pej nare?

²² He Pahpãm ri pjê jajoti ita jipy ihkrĩ,
 ne cumã me pahkryjre te hajÿr,
 pom quê me pamã xycxycr kryjre he.
 Ne taa mã ri cõjkwa capô,
 ne ihkrac ri ihkrĩ to hanea,
 pom cu ahpykrã xà caxuw me cupêhkã capô,
 ne ihkrac ri me pahkrĩ he.

²³ Ne taa mã ri pjê kam,
 pahhi carôt tÿjti me,
 me to ihhimpej catêjê catia atajê to ihkryjre,
 mã cumã me ampo na me hamreare.

²⁴ Ne cumã me cupê ampo kre xà ata pyràc,
 ne pom me ampo hy kre,
 mã kam harê me ajkaam,
 mã kôc to incrã, mã carĩjre ma to ahhi, ne tocuto ita na mã,
 cumã pahhi atajê te hajÿr,
 mã cyt ne me to hamre.

²⁵ Ampo cunea jirô pê Pahpãm pejti ata te amji na hàhcukjêr to hajÿr
 he:

“He ampo me, ca ha me ito ajpên?
 He xà ajkĩ ipê ampo pyràc?
 He xà ajkĩ jũm me ipipêan?
 Hãpã” hane.

²⁶ Ne ca ha caxwa ri cõjkwa wÿr rĩt,

ne caxêre jàhtôti atajê cuneapupu,
 ne jùm te mōrmō ton?
 He Pahpām te ri ton,
 ne ahpÿanre na haprÿ atajêa na,
 cute cumã hàkjêr par,
 ne ihkrĩ xàa kam ihkrĩ par.
 Ne carôt pahtÿjti catihtti ata kôt,
 nee ihnõ jamre nare.

²⁷Hàpà, Pahpām na mehkwy pē Juta catêjê itajê! Ampo na mã ca ame Pahpām mã me gâhcãhôn itajê to ame amji jarên to:

“He Pahhiti te nee ite amji kam ijapac xà na ijahkre pej nare,
 necupê ipimxur tu.
 Mã nee cute, ite ampo na prãm ata na ito amjijapackre nare” hane?

²⁸ He xà apê Pahpām jahkre kêatre?

Xà nee jũ caxuw ate harên parnare?
 He Pahhiti pē Pahpām tĩr rohnÿtti mã ata,
 ne cupê pjê mekam ampo cuneaton catê.
 Ne nee quê ha jũ caxuw ihtycrĩ, ne ihpeacre nare.
 Ne nee jũmte, Pahpām te amji jahkre pej krã kreti atajê cunea na
 hahkre pej nare.

²⁹ Ne taa mã ri mehtycrĩ atajê mã carôt to ihtÿj,
 ne mehpeacreatajê mã carôt to ajcamê.

³⁰ Ne mentuwjê intuw cãkrô,
 ihtÿj jũ caxuw mehtycrĩ, ne mehpeacre xà.
 Ne mentuw picahur na mehte tÿjti cãkrô,
 quê ha ihtÿj jũcaxuw ame ajhu,
 ne ame hikwa.

³¹ Ne quêt Pahhiti to amji mã mehhimpej,
 ne me hikaj to me ipaatajê,
 quêha ajteare mã me,
 ne hõtpê amji mã me carôt to intuw.
 Ne me cupê hàctijara tÿjti,
 mã to ne kÿaj pē apu ipa to pyt ata pyrãac,
 ne ampo cunea mã me hũcanãr to ipa.
 Na quê ha Pahpām jarkwa na memprarcatêjê na ame pra,
 ne nee amehtycrĩ nare.
 Ne quê ha harkwa kôt catyt kamame ipa xà ata caxuw,
 nee me cupê me carôt hamre nare.

Ixaj 53.1-12

Mexij te mehkwȳ pytar xà caxuw ihtȳj amji pupun to kêanre

- 53** ¹ Pahpãm te jũm ita na, me pamã harkwa kujahêc,
 cu pahte ahna mehkwȳmã me harên cacrô,
 mã ihhêj ne, nee cute mempar,
 ne amji mã me to hajȳr nare.
 He Pahhiti te me cumã mehkritxw̄y to hũjahkre ata to ipipê cacrô,
 mã ma hỹrmã ame irĩt,
 ne ame hõmpun caca.
- ² Ne pom pjê incrà kam me ahkêt jakep,
 mã kam harê ahtw̄y, ne hacpyãmã kam hitêr ne hapôj,
 ita jĩkjê na mã,
 jũm ita te Pahhiti kam mare mã, ampo kên cunea jipôc ri,
 amji to ipijapar ne ihkà.
 Ne põrũm pê hĩ kam,
 ihhêj ne neeimpej nare.
 Ne ihhêj ne, nee cupê jũm catihti ata nare,
 ne cupê me pajĩ te hajȳrỹre ata pyrãac.
 Na ri nee ihhêj ne cute amji w̄yr me pahto hàhtêp xà caxuw,
 hirã pê impej ne cati nare.
- ³ Ne cupê hũmre te amji pupun xà kêanre kam ipa catê,
 cama hanea neamehcaca,
 ne ame curê.
 Na ri nee hỹrmã me irĩt,
 ne me hõmpun prãm nare,
 ne ma amehcaca.
 Cu nee ajte pahte amji mã me to cati nare.
- ⁴ Ne me pahte hajȳr cacrô,
 mã ihtȳj cutea me pahte me amji pupun xà kêanre ata mãamji jõr,
 ne cutea amji kam me pahte me amji cajpêr xà kãj xãhtiatajê cunea
 jaxw̄yr.
 Cacrô, cu pahtȳj ajpên mã me harên to:
 “Pahpãm ri apu hũmre ita to kên he,
 netaa mã ri apu ihcahhy,
 mã ihkàj xà” hane.
- ⁵ He pahte ajpên mã me harên to hajȳr cacrô,
 mã nee cute hajȳrnare.

Ne pahte me to kên,
 ne me to ihcupan xà atajê cwÿrjapê ri,
 cute me hũmre ata caxwÿr.
 He pahteme ampo kên ton atajê jahpan xà na ri,
 ma cute me to irô,
 ne cupê mehĩ to kêanre.
 Ne cute me to kên xà ita kôt ri,
 cute me pamã ampo cupa nare na me pah-ton,
 mār cu me pahcarĩcti kam me papa.
 Ne cute me haxôp xà ata kôt ri,
 ihhêj ne hacpÿa mã, me pahcaprãr, ne me pahcapēnti.

- ⁶ Ne pom carà cahàcre hôhti me hamãr catêjê kaj na apu ipa,
 ne cute amji to ipictor,
 ita jĩkjê na mã,
 cu pahte me Pahpãm jô pry cupan,
 ne amjia kôt me pajô pry itajê pynãr.
 Ne Pahhiti te,
 pahte me to kên ne me to cupan xà atajê jahpan xà na,
 nee me pahto kên nare,
 ne ma jũm pê me pahkritxwÿ ata to irô, ne cute apu to kêanre.
- ⁷ Mã cute mehkôt harên hêj xi xà kêanre to me harên,
 ne to mecumã ihkàj xà catia ton cacrô,
 mã nee cute amji pytãr xà na
 me cumã ampo to ihcakôc nare,
 ne nee amji jahpan xà na mencrôn nare.

Ne pom ma carà cahàcre kra curan xà wÿr me to ipa, mãaracri ipa,
 ita jĩkjê na ri cute mehcuran na, cama amji na me hamãr,
 mãcute mehcuran.

Ne pom me carà cahàcti hôhti hô Jakep, mã nee incwÿr nare,
 ita jĩkjê na mã cute,
 ne nee amji jahpan xà na cute ame to kêncatêjê mãn kên nare.

- ⁸ Ne cute mehpro, ne mehhêj xia to cute me to ihhêj xi,
 ne mehcukij xà kêanre to mehcukij,
 ne nee cormã ihkra nare kam mehcuran,
 mār quê nee hipêr ita ri me hipôc ri apu ipa nare.
 Ne me pahkwÿ te me to kên,
 ne me to cupan xà cwÿrjapê ri amehcahhy.
- ⁹ Ne nee apu hàprê to ipa nare,
 ne nee apu ihhêj xia to ihcakôc to ipa nare cacrô,
 mã ihtÿj cute me hàhcuran catêjê cahê na me harêt naharkwa cacrô,

mã me hakràjti jarêt xàa kam, cute me harêt.

- ¹⁰ Ne nee cute ampo to kên nare cakrô,
 mã Pahhiti te to mehkên catêjê pyrâac,
 ne cumã ihkàj xà ton.
 Ne pê mam ramã Pahhiti ita ton xà ita na amji kampa,
 na pê to hane.
 Ihhêj ne Pahhitite, jüm te me to cupan xà jahpan xà na,
 cute me hümre ita curan na me hamär,
 mã cute mehcuran cakrô,
 quê ha ihtÿj hacpÿa mã ihtír,
 neihtíar na apu ipa rohnÿtti mã.
 Na quê ha ihtÿj jü caxuw cumã mehkrajãhtôti atajê pupu,
 ne Pahhiti mã ihkôt pjê kam me hàhtôa to ihkra prãm.
- ¹¹ Ne cute amji cajpêr xà kêanre to amji cajpêr xà ata jakàn pê,
 quê ha cormã me hàhtôa atajê,
 cute amji cajpêr xà kên ata cwÿrjapê
 cupê Pahpãm kra na me hahkre pej,
 na quê ha ampeaj kam hürên me hakry.
 Ne quê ha cupê Pahpãmmã hàpên catê, ne catyt kam ipa.
 Na quê ha me hàhtôa ne, cupê mehkritxwÿ ita na me hahkre pej,
 ne ihtÿj amji mã me to ihhimpej.
 Ne quêha taa, cute me to ihcupan xà jahpan xà na,
 ihkên cunea mã amji gô,
 mâr quê Pahhiti me ahna amji capa,
 quê ihtÿj mempej pêa mã ame ipa.
- ¹² Cute mehcuran xà mã amji jörtu.
 Mã cute me to cupan catêjê cahê na
 cute mehcuran xà ata pê,
 cute amji mã mehkên ton xà atajêcunea juwahi,
 ne ihtÿj cute me to cupan catêjê cajrên.
 Na quê ha Pahpãm pê Pahhiti itajê cunea jahpan xà na to catia to cati,
 ne ampeaj kam to carôt tÿj.

Ixaj 55.6-13

Pê Pahpãm mã mehcunea te hÿrmã ipipkjêr na to prãm

55 ⁶ ÿhÿ me ikwÿ, cormã Pahhiti te ita ri apu mör ita kam,
 ca haatÿj me hapê,
 ne cormã ame acahê na mör xà ita kam,

- ca haatỳj cute me apytàr xà na me wỳ.
- ⁷ Ne quê ha mehkrā kên catêjê,
cute me amji kam hapac xà kên tonjicu,
ne nee hipêr cute me ton na me amji to amjijapackre nare,
ne rỳ mã me pajõ Pahhiti pê Pahpām wỳr meapkjê na mã,
quê ha taa ame caprĩ,
ne cute me to kên atajêto tojnõ hiahpuro,
ne nee hipêr to amji japackre nare.
- ⁸ Pahhiti te me pamā, me pahna amji jarēn to:
“Ite amji kam ijapac xà pê nee me ate amji kam me gapac xà pyrācnare.
Ne nee ijāpên xà pê me gāpên xà pyrāc nare.
- ⁹ Pom pjê jirōa pê cōjkwa te pjê jirār,
ita jĩkjê na mã,
ijāpên xà te me gō tekjê jirār.
Ne ite amji kam ijapac xà tegō tekjê jirār.

Pê Pahpām jarkwa cakôc xà kôt ihtỳj ampo

- ¹⁰ Ne pom hãn ne cōjkwa pĩn cō carôt wrỳ, ne ta wrỳ, ne xa pjê inco,
mār quê pjê kam ampo cunea to ajcamê,
quê ha me cumācute me hō kur xà atajê,
ne cute mehkre xà caxuw me cumā ihhy,
ne cormā hacpỹa mã api,
ita jĩkjê na,
quê ha ijarkwa hane he.
- ¹¹ Ne ipĩn, ijarkwa hapôj ata,
quê ha nee hacpỹ ne caprỳ iwỳr amjijaxàr nare.
Ne cute me kam hapac prāmte,
wa ite mehwrỳr ihkujahêc,
naquê ha nee ahna mehprār nare ne ihtỳj me kampa.
- ¹² Na ca ha atỳj, jũ caxuw, me gakrya kam,
me acurê xwỳn catêjê jōpjê pê me acato,
ne me acarĩcti kam,
me amā ampo cupa nare kam,
ma megō pjê impejti ata wỳr me axy.
Na quê ha, me amāa ihhêj ne hãhkàjakôt me, awjarô atajê cunea,
ate me amji jaxàr xà ita pyrên hakryte apu cre.
Quê ha hanea ne pĩ cunea
me apyrên cumā amji kĩnte,
ihhêjne apu hũhkra cahhy.
- ¹³ Ne curi hōmjĩ jaxà kam,
quê ha quêt pĩ tỳjti pejti cuhtactiatajê hapôj.
Ne curi pĩhhô jàprêhti hapôj ata jaxà kam,

quê ha quêtampo pîhhô cuxwati atajê hapôj.
 Ne ampo pejti itajê,
 quê ha quêtijaprya na hapôj.
 Ne ipê Apâm Cati pê Pahhiti to
 ate me amji japackrerohnytti mã xà na,
 quê ha ita hane.
 Na quê ha nee jũ caxuw hamre nare” hajÿr.

Ixaj 61.1-11

Quê ha Mexij ihtÿj me cupê hamreare atajê tehcajpa

- 61** ¹ÿhÿ me ikwÿ, por Pahpâm te me pamã jũm kujahêc na to
 hũjahkre ata te amji jarên to:
 “Pahhiti te ampo cunea to ihhimpej catê ata te mecupê hamreare
 atajê mã,
 ite ijũjarên xà pejti jarên catê na ixãm,
 cwÿrjapê ri Carô Pejti te imã amji jôr.
 Ne cutea ri mehkwÿ wÿr ikujahêc,
 mârwa mehpeacre me,
 me cumã amji kîn nare atajê caprĩ,
 ne hacpÿa mã mecumã me carôt gô.
 Ne hanea ne cute awcapàtkôti kam me hacjên catêjêmã:
 ‘Gapacta ne me gapôj’ hajÿr to ipa.
- ² Ne wa hanea ne mehcunea mã Pahhiti jarê, ne me cumã:
 ‘Quê ha caku itajêa kam
 Pahhiti me akên cati pê me gapôj
 ne me ato impej,
 ne amjijahpan xà na,
 mehkrã kêanre atajê to kên’ hane.
 Ne wahanea ne mehcunea ame amrã atajê mã caprĩ.
- ³ “Ne por Xijãw jô kên cahê na Krîpinkrên kam mehkrĩ
 ne ame amrãatajê,
 wa ha itÿj cute ame ampo na prãm atajê,
 me cumã cugô.
 Ne me cumã amji kîn nare na cute me hahkre pej prãmte,
 pro to cute me amjikrã cunea jipro atajê,
 wa ha quêt me cumã pahhi krãhkà impejti gô,
 hacpÿa mã me cumã amji kîn na, cute me hahkre pej prãmte.
 Ne mehpeacre atajê,
 waha me cumã ampo cacô cuxwati gô,

mār quê me hakry.

Ne jũm mã amji kĩn nare ne cupê amji jahkre kêatre atajê,
wa ha me cumã cupêhkà impejti gõ,
ne cute me Pahpãmpej na hũrên hakryti na harên na me to.
Ne pom hãn ne me ampo pĩxõpejti pàr kre,
mã cati ne ihkô, mã mehcunea amji mã ihkre catê jarên pejti,
ita jĩkjê na,
quê ha mehcunea me Pahhiti na mehkwỹ pêcatyt kam me ipa na ame
hõmpu atajê,
ihtỹjme Pahpãm jarên to impejti ne.

Quê ha Mexij hacpỹa mã mehkwỹ to ajcamê ne to cati

- 4 “Yhỹ me ikwỹ, por pê mam me curê xwỳn me panquêtjê pê me hõ krĩ
to kên ne meto hamre atajê,
ca ha hacpỹa mã me to impej.
- 5 Quê ha me cupê mehcahkrit atajê,
ihtỹj me amã meapaxare jamār to me ipa.
Ne me cupê me akwỹ nare atajê,
quê ha ihtỹj me gõ pur kam me amã me apê.
- 6 Ne quê ha mehcunea mã me apê Pahhiti mã amehcajrên catêjê,
ne apê cumã me gápên catêjê na
me gahkre pej.
Ne ca ha krĩxàrecunea jõ to amji mã garte,
ne to garte tu.
Ne ca ha me hàhcukrêj atajê pê me atekjêa na ahna me amji jarê.
- 7 “Ampeaj kam quê ha me ikwỹ te amehpahàm catia pro xà kaj na,
mehcunea kam mare mã me ampo pejti catia pyr to me ajkrut.
Ne mehpahàm xàhte amencwỳr xà kaj na,
quê ha cute me ampo pejti ita pyr pyrên ame hakryte ame cre.
Ne quê ha pjê to hõ tekjê ata kam me to ajkrut ne mecukwa.
Na quê ha hũrên cumã amji kĩn rohnỳtti mã.

Pahpãm ma apu ampo kên cunea caca

- 8 “Ne ampo na mã quê ha me hane?
Nee mã ampo na nare.
Pahhiti te me ahna amji jarên to hajỹr he:
‘He ipêa ri me hõPahhiti,
ne quêt imã,
catyt kam jũm te me ampo kên ton jahpan xà na,
cute mehcukij xà hêj xi nare kam mehcukij ata na ri,
imã ihprãm.

Newa ma apu hàhkīj xi me,
ampo kên cunea caca.

Ne waitỳj ite me cumã ampo to ijũjahkre ata na,
amji jarkwa kampa,
ne wa ha itỳj
iteme cumã ijàmjõr xà gõ.

Ne itỳj meajpẽn pa.

Ne quẽ ha ite me ajpẽnpar xà ata kôat me ipa rohnỳtti mã.

⁹ Ne quẽ ha pjẽ cunea kam,

krĩxàre cunea, me ikwỳ tàmwxwỳ tàmwxwỳjahkre pej.

Ne quẽ ha mehcunea ame hõmpu atajẽ me amji mã harẽn to:

“Itajẽa kam ri Pahpãm te harcõ mẽn, ne me to impej he” hane’ hajỳr.

Hõ quẽ ha ihtỳj amji jarẽn to hane” hane.

¹⁰ Na quẽ ha Pahpãm na mehkwy me amji jarẽn to:

“Pahhiti pẽ Pahpãm pyrẽn

me ijakrya to me ijakry,

ne me imã amjikĩn hyre nare” hane.

Ampo na?

Hepom me hakràjti me cupẽ hamreare tehcajpar prãmte,
me cumã ihkat kàimpejti me,

hitõ kà pejti gõ,

mãr quẽ impej pẽa mã apu kam me ipa,

itajĩkjẽ na ri,

Pahpãm te me itehcajpar prãmte,

ampo kên catia pẽ me ipytàr,

ne catyt kam me ipa na me ito,

mãr wa catyt kam ame ipa.

Ne pom me hikwa tuwcatêjẽ

me amji krã jakrõ,

ne me hakrõ xà to me amji cũmpej,

itajĩkjẽ na mã,

Pahpãm te me ito impej,

mãr wa me ipej pẽa mã ame ipa.

¹¹ Ne pom pjẽ kam me ampo hy kre,

mã hupràj hapõj,

ita jĩkjẽ na mã,

Pahhiti te ampo cunea to ihhimpej catẽ ata,

pjẽ cunea kõt krĩxàre cuneate catyt kam me ipa na me to,

quẽ ha catyt kam me ipa.

Ne quẽ ha Pahpãm to cute mecati prãmte,

ihitỳj cumã impej ne cati na me harẽn to me ipa.

Ixaj 65.17-25

Quê ha Pahpãm ampo cunea to antuw ne to impej

65 ¹⁷Ne Pahpãm pê Pahliti pê ampo cunea to ihhimpej catê ata te amji jarên to:

“Wa ha ijâpên xà to ita
ca hõmpu he:

Wa ha côjkwa tuwme, pjê tuw to,
ne ramã ampo cunea tuw pit ita kam,
quê ha nee jũm hipêr mam ihtũm atajê to me amji japackre nare.

¹⁸ Ne ite me amã ampo tuw ton itajê pyrên,
ca ha ame gakry,
ne me amãamji kĩn rohnýtti mã.
Ne quê ha pjê cunea kam
me hàhtõa Krĩpinkrênme,
kam mehkrĩ atajê pyrên me cumã amji kĩn,
ne ame hakry.

¹⁹ Ne pa, ite hajÿar, Krĩpinkrên pyrên ijakry,
ne hanea ne kammehkrĩ atajê pyrên imã amji kĩn.
Na quê ha nee hipêr jũm incwÿr nare,
ne nee hipêr jũm, amji japête incwÿr kam hapac nare.

²⁰ “Ne nee quê ha hipêr jũm krare amji to ipijapar to incri
ne hacpÿ mamã ihtyc nare,
ne ihtÿj amji to ipijapar to ipa.
Ne mehwej catêjê, quêha ihtÿj mehwej to me ipa,
ne maa, cute me to hõ caku mã hahêr xà atamã me to hahêr tu,
ne cormã mehweaj to ihwej,
ne mehtyc to hane he.
Ne cormãjũm na caku te xêj ne ihtyc ata,
quê ha me amji mã harên to:
‘Pÿhàpà, nee cormã ihwej nare,
ne intuw kwÿa kam ihtyc’ hane.
Ne necormã ahna caku te xêj nare, ne ihtyc ata,
quê ha me amji mã harên to:
‘Ihhêj ne ihkrã kêanre,
ne cute Pahpãm to kên cwÿrjapê ri,
intuw kwÿa kamcute ihcuran’ hane.

²¹⁻²² Ne pom pĩ tÿjti, ihtÿj caku jàhtõa kam awcanã ne ihcuhhê,

ita jĭkjê na,
 quê ha ihtÿj me ikwÿ caku jàhtôa kam me awcanã,
 ne mempej pêa mã me amji to ipijapar to me ipa.
 Ne por wa ite amjicaxuw me ikwÿ capi atajê,
 quê ha ihtÿj caku jàhtôa kam,
 cute hũhkrato hàpên xà ton atajê to me amji cajpuaw to me ipa.
 Nenee hipêr amji mã me ikre nõ xãm,
 quê kam jũmjê mehrĩ nare.
 Ne nee hipêrkam amji mã pĩxô kre,
 quê ha ajteare mã jũmjê cupê mehrêr nare.
 Ne quêt amji mã me hũrkwa pyxwÿ,
 ne me taa kam mehrĩ.
 Ne kam me amji mã pĩxô kre,
 ne quêt me taa me cuku.

- 23 “Ipê me hõ Pahhiti,
 ne hanea ne ipê mehtãmxwÿ jõ Pahhiti.
 Ne paa, wa ha me kam ijarcô mē,
 ne me to impej ita kam,
 jũ wÿr quê meapê,
 ne me hàpên xà kôt hamreare ne.
 Ne quê ha mehkra ihpÿpÿm,
 quê ha nee ampo kêanre mehwÿr cator nare.
 Ne mehkra hãn ne me cumã meajhu,
 ne mempejti kam me amji to ajpa.
- 24 Ne hãn ne ampo na me icukij,
 wa ha itÿj me kampa.
 Ne cute amjitehcajpar xà na me iwÿr xwÿjrea na,
 wa ma ramã ite mehtehcajpar xàcaxuw me cahê na ipa.

- 25 “Hõhõ, amcro atajêa kam,
 quê hacpÿa mã rop cahàc jàprêhti atajê,
 carà cahàcre kra me ajpên cahê na hàpàn to ipa.
 Ne rop cahàc jòkrehôhti,
 quê ha cupê pryti pyrãac, ne ahtu pit kur to ipa.
 Quê hamehkĩnte cagã,
 pjê jacrô pit kur to ipa ita na.
 Ne quê ha ijõ pjê pejtiita kam,
 nee ampo te to kên xà hamreare,
 ne nee jũ caxuw ampo te to hamrexà nare” hajÿr.

Hõ, Pahhiti te amji jarên to hajÿr.

JEREMIJ JÕ KÀHHÔC

Jeremij 1.15-16; 20.1-6

Jeremij pê Pahpãm jarkwa to ihcakôc catê

1, 20 Ne Ixaj tyc jirô pê mã, hacpỹ ma mã Juta catêjênee hipêr me Pahpãm par nare. Cwỳrjapê pê Pahpãm hipêr me cumã harkwa to mehcakôc catêjê atajê kujate, pê me cumã, por quê ha Pahpãm te ampo kên to jũ mã me to ata cawpa. Pê Pahpãm me cumã ihcakôc catêjê atajê nõ japrỹ te Jeremij ita me hỹrmã kujate, pê Krĩpinkrên kam ihkrĩ.

Mã Pahpãm te cumã harkwa hyr, mã ma Pahpãm to me amji kam hapac xà jũrkwa wỳr mō. Ne harkwa nã cute me hàhtōa mã harkwa to:

“Me ikampa! Cōjkwa jō Pahpãm pê Ixaher catêjê Pãm Cati ame amã amji cawpa to:

‘Wa ha, por ite me akên xà to me amã icakôc ata tokrĩ ita to apu ihkên,
ne cahi na krĩ atajê to kên.
Ampo na?
Ca nee ate me iparnare kam,
wa ha me ato hane’ ” hajỹr.

Ne pê Jeremij amehcunea mã Pahpãm cawpa to hajỹr to incirre nare.

Mã Pahpãm to me amji kam hapac xà jũrkwa jamãr catê ata japrỹ te Paxur, ne cute Jeremij jarkwa na impar, ne ma apu ihcakôc xàata na impar caca. Na ricute haxàr ne ame caprêprêc, ne me huwapre. Mãhuwapre ita na me hacjên xà kam, cute amji to apê.

Mã amcro nõ na Paxur te Jeremij mã hikran, mã cute cumã harkwa to:

— Wa ha Pahpãm jarkwa kôt me amã ijũjarên xà ita to awjarê, ne amã:
“Paxur, wa ha jũ mã me ato,
ca ha me akwỳ mea mã,
me amã paa to me amãpa.
Ne ca ha atỳj me acurê xwỳn jō wapo xwahhihti te me acuran na mehõmpu.

Ampo na?

He wa ha ma Papirõn jõ pjê jõ pahhi mã Juta jõ pjêhimpej xà ita gõ.

Quê ha ma me ato mõi ne me gacjê,

ne me gàhtõa ne megipej.

Ne cama me ana me acurê xwÿn jamã,

quê ha Krĩpinkrên pê mehakràj cunea to cuto tu.

Quê ha ma wakÿre prà tepti me,

wakÿre prà jakati me,

kẽn pràti itajê cunea to me cuto tu,

Papirõn jõ pjê wÿr.

“Ne ca, Paxur, quê ha me akra mea mã me ato mõi,

ca ha gürkwa me gõ pjê pêampÿa mã ty,

Papirõn jõ pjê kam” hane —

hajÿr xà ata na, tahnaa cute hajÿr.

Jeremij 36.1-31

Pê Pahhi Joquĩ Jeremij jõ kàhhôc kam Pahpãm jarkwa to capa

36 Pê Joxij pê pahhi pejti ata ty, pê ihkra japyrÿ te Joquĩ ata pê pahhi, Juta jõ pjê kam. Ne cupê hũmre kãanre, ne cute Pahpãm jarkwa to ihcakôc catê pê Jeremij ita pro prãmte, apu hahêr to ipa. Mã Pahpãm te Jeremij mã ihcakôc ne cumã:

— Ca ha ihkàhhôc nõ py, ne kam ite Ixaher catêjê na icakôc xà itajêcunea na ihhôc. Ca ha mam ite Joxij pê pahhi mã, ite ampo jarên xà atarũm ahna to apy, ne curmã ite ampo jarên itajê mea mã, ahna ihhôc. Quê ha Juta catêjê te icuna mã mehkên ton xà atajê jahpan xà na, ite me to kên xà atajê, wa ha me cumã ihcunea cawpa. Quê ha ihhêaj to mehkên itajê jicu, ne iwÿr me apkjê, ne me hõ pry kên ita jicu, wa ha mehkên ita to impej, ne to ijapac kêt — hajÿr.

Mã Jeremij te ihkàhhôc kam ihhôc catê japyrÿ te Paruc na hàhwÿr. Ne cute cumã Pahpãm te harkwa cunea na ihhôc xà jarên atajê jarênpartu. Mã Paruc te ahna ihhôc partu, ne cute me hipêj.

Mã Jeremij te Paruc mã amji jarên to:

— Wa ha ita ri, ipimxur xà kam ahtwÿ. Quêha jũ caxuw, amcro nõ na, Pahpãm to me amji kam hapac xà jürkwa kam me amji kĩn nõ to, ca ha mecumã ihkàhhôc ita cahyt. Ampo na? Quê ha amcro ata na Jutacatêjê cunea curi me cuprõn tu — hajÿr.

Mã amji kîn nõ na Pahpãm tome amji kam hapac xà jũrkwa kam, cute me cuprõn. Mã Paruc te Jeremij teampo na mẽn xà atajê cunea ton. Ne cute me cumã Pahpãm te harkwakujahêc xà itajê cunea cahyt partu, Pahpãm tome amji kam hapac xà jũrkwa kam.

Jirô pê mã ri me hàhtõtì atajê jô pahhi catêjê kwỳ, mã ampeaj kamme hũpar xà ata cupaa to hũpa. Mã cute me Paruc mã:

— Wa ha itỳj pahhi Joquĩ mã me awjarẽ. Ne me imã amji jarẽ, jũ mã mãate, ne ajte gũpar xà ita to gũpar? — hajỳr.

Mã Paruc me cumã:

— Pahpãm jarkwa to ihcakôc catê pê Jeremij ata te riimã ita jarẽn, wa iteahna ihhóc par — hane.

Mã me hàhtõtì atajê jô pahhi te Paruc mã:

— Měr Jeremij ita me amxu, ne nee jũm mã jũ kam me amõr na me amjijarẽn nare — hajỳr. Ne me hõ pahhi itajê te jũ ri me Pahpãm jarkwaita to ipimxur, ne ma pahhi Joquĩ mã me hũjarẽn to me mõi, ne cute mecumã ihkàhhóc ita jarẽn.

Mã ma pahhi Joquĩ te Pahpãm jô kàhhóc itawỳr jũm ita kujahêc, quẽ cumã cupy. Mã ma hỹrmã tẽ, ne cute cumã cator ne ipyrne hỹrmã to cator, por curi pahhi me, me cumã me hàpẽn catêjê mehkri ata wỳr. Pẽ ampeaj kam me cumã kry, pê cuhy na mehkri. Mã jũm ita te mecumã Pahpãm jô kàhhóc ita hõ to incrẽ ne cahyt. Mã pahhi te waporeto hakep, ne cuhy kam haxwỳr. Ne cute to hajỳr to mõi ita kam, ihcunea to caxàr par. Mã pahhi Joquĩ mã hàpẽn catêjêitajê mã nee cute Pahpãm jarkwa to caxàr xà ata na hũpa nare, ne neepahhi te ampo kẽn ton xà ata na kam mencryc nare.

Mã Pahpãm te hipêr Jeremij mã harkwa nõ ata jarẽn ne cumã:

— Wa ha apu pahhi ita me, mehkra mea mã, ame to kẽanre ne, pom ite mehkẽn to me cumã icakôc xà ata to, wa ha ame to kẽn, pahhi me, mehkwy me, cute me ipar nare na, wa ha ame to kẽanre ne — hajỳr. Hamre.

Jeremij 39.1-10

Pê Juta catêjê mehkẽn to me amji cator, Papirõn jô pjê wỳr

39 Ne caku te jũ mãn jirô pê mã ri, Papirõn jô pjê jô pahhi japrỳ te Napucita, ma Juta jô pjê kam Kripinkrẽn wỳr hõkrãhtare to me mõi. Ne cute me ahna krikrã, ne me kam ihtẽm ne ame ajpu.

Mã Juta catêjê jô pahhi japrỳ te Xetequij ita te nee hõ krãhtareto mehcapẽn nare na, ramã amji cajpêr. Na ri me curê xwỳn te me hỹrmãkrĩ pu na kwỳc ata cahhêc xà ata kam ri ma caxwa ri me curê xwỳn cupate mehchakũm.

Mã ahkêt wÿr, Papirõn jõ pjêjõ krãhtare ma amehkôt me pra, ne cute me pahhiXetequij pro, ne ma Papirõn jõ pjê jõ pahhi wÿr meto mõi. Mã pea pahhi itate Xetequij kra cunea jipej na me mën, hũm kam mare mã. Mã cute me hipej tu, mã cormã Xetequij to impeaj ne ihtÿj cute mehkra jipej xà na mehõmpun. Jirõ pê mã ri cute me Xetequij to tũmprãnte, into ihkrÿn na me mën. Mã wakÿre to cute mehuwapre, ne mento ihkrÿn, ne me to amji mã me cumã hàpên catê, mã Papirõn jõ pjê kam me cumã ampo pytĩa to hàpên to ipa.

Mã Papirõn jõ krãhtare te Krĩpinkrên to caxàr partu. Ne cute me pahhi jũrkwa catia ata me, Pahpãm to me amji kam hapac xà jũrkwa ata to me caxàr. Ne cute kri me, intête kwÿc ata cuneahur partu. Mã krãhtare jõ pahhi te me cupê Jutacatêjê cunea to cuto tu na memën. Mã ajmãr cute mehcunea to cuto tu, Papirõn jõ pjê wÿr, cama cute me cumã me hàpên xà caxuw. Ne cute me cupê hamreare atajê topit mã tojnõ na me cumã hũjahkre, mãr quê me ahtwÿ ne pur to me apê.

Hõhõ, Pahpãm te mehwÿ to kên xà ita to ri cute ame to kên. Ampo na? Nee amempar nare.

PAPIRÕN JÕ PJÊ

Kam Ame Ipa Xà

Ûyũ, pê Exeker pê Juta catêjê nõ, ne Papirõn jõ pjê kam me cupê Juta catêjêmekhkrĩ atajê mã cupê Pahpãm jarkwa to ihcakõc catê. Ne cute ihcunea nahõ kàhhõc kam ihhõc. Cwÿrjapê ri hõ kàhhõc ata japyrÿ te **Exeker JõKàhhõc** (Exeker). Ne hõ kàhhõc kam, cute Juta catêjê te mehkên tonatajê cunea na ihhõc. Ne cute kam me pamã Krĩpinkrên jamre xà naihhõc. Ne hanea ne hõtpê jũ caxuw Juta catêjê cahhur me, Ixahercatêjê cahhur te me cuprõn, ne ajkam mehpÿm ne hacpÿa mã Canãn jõ pjêkam, cute me cuprõn. Quê ha Pahpãm me cumã jũm pê Tawi xwÿ tàmwxwÿ pême hõ pahhi catia ata kujate, quê ha me to ihmipej to impejti ne.

Ne caku atajê nõa kam ri Juta catêjê cahãj nõ impejti japyrÿ te Extikwÿj ita Papirõn jõ pjê jõ pahhi nõ me hikwa tuw. Na ri hõtpê cute mehkwyêpê Juta catêjê tehcajpar ne me curê xwÿn catêjê pê me hûtàr. Na ri hõ kàhhõc japyrÿ te **Extikwÿj Jõ Kàhhõc** (Extikwÿj).

Ne Taner pê Juta catêjê jõ xũmre nõ ne cormã incuire, ne Krĩpinkrênkam ihkrĩ, pê ahnaa mehpro ne ma Papirõn jõ krĩ wÿr me to mõi. Mãcuria ihkrĩ, ne catyt kam Pahpãm jarkwa kõt ipa rohnÿtti mã. Cwÿrjapêri Pahpãm te cumã cute amji jahkre pej krã kreti catia ne hõr, na pêPapirõn jõ pahhi kwÿ tehcajpar to ipa to caku to hàhtõa. Na ri hõ kàhhõcica japyrÿ te **Taner Jõ Kàhhõc** (Taner). Ne ita caxuw Taner jõ kàhhõc kwÿ mã he.

Taner 1.3-19

Papirõn jõ pjê kam Taner ipa na harên xà

1 Pê Papirõn jõ pjê jõ pahhi pê Napuc ita te me cumã me hàpên catêjê jõ pahhi mã harkwa to:

— Ca ha imã Juta catêjê intuw kwÿ capi, por pêijõ krãhtare Juta jõ pjê pĩn me to cato atajê kwÿ — hajÿr.

Ne pê me hàpên catêjê jõ pahhi cumã Juta jõ pjê kam mehhimpej catêjêkra to pit mã caprã, cute mecumã Papirõn jõ pjê jarkwa me, cute amji kam mehapac xà to hahkre prãmte. Ne pê mempejti atajê me, me capênti atajême, me hũpar krã kreti atajê to pit mã caprã.

Pê pahhi pê Napuc ita, cute hõ kur xà atajêa to me cumã harte na, cumã me hàpên catêjê jõ pahhi mã harkwa. Ne pê ihkàhhõc to hahkre

xàkam, me cumã ihkàhhôc to hahkrea to caku to incrê na awjahkre, mār quê ame amji jahkre pej, ne ihtÿj me pahhi catêjê tehcajpa. Itana pê pahhi Napuc me to prãm.

Mã cute me to caprãr atajê kam, cute me cwat itajê ri, mehkwyjirôa pê cute me amji jahkre pej. Ne cute me cwat itajê nõ ita japyrÿ pêTaner. Mã Taner ma apu pahhi jàpàn xà itajê caca, ne ma apu hõpixô cacô xÿre ata to ihkôm caca. Ampo na? Pê ramã Pahpãm me cupêmam Ixaher catêjê atajê mã mehàpàn xà itajê me, me hõ pìxô cacô xÿre ita cawpa, ne me to ihkôm tète mecumã. Cwÿrjapê ri ma apu ihcaca, ne cute me hàpên catêjê jõ pahhimã amji jarên, quê ihtÿj me hõ pê ampo hy me, ampo hõ me, ampo xõ pit to me cumã harte.

Mã me hàpênecatêjê jõ pahhi ihtÿj apu ita na amji mã hõ pahhi cupa, ne Taner mã:

— Ca ihhêaj to ame gápàn xà itajê to ame apà, ne me akwÿ kînteme ahire, ne me apeacre ne, quêpahhi me gõmpu, ne apu ikam incryc — hajÿr.

Mã Taner cumã:

— Cu ha ajpên par to hane he. Wa haitÿj ame ijàpàn xà itajê to me ijàpàn to amcro to me tej, jirô pê mã ca ha me ipupu, ne me icapi. Wa ha ite, cute me pahhi jõkur catêjê japyre mã me ijicot ne me itÿj na, wa ha itÿj me cuxàpahhi jàpàn xà ata to me apà, ne ihkôm xàata to me ikõ — hajÿr. Mã me hàpên catêjê jõ pahhi te mehkôat amji ton.

Mã Taner me, mehkwyjê incrê itajê te me ampo hyme, hõ me, ihhõ kur, ne cô to mehkôm to me amcro totej. Jirô pê mã ri cute me hõmpun, mã mentuw kwÿ itajê jirôa pê amehicot ne amehtÿj. Mã pahhi te hõtpê me hàpàn xà itajêa na me to ihtÿj.

Mã Pahpãm te mentuw te cwatitajê mã, me cute me amji jahkre pej jõr, ne ihtÿj ihkàhhôc to hahkre xà kam mehtehcajpar. Mã cute me cyt ne me ampo cunea ton jahkre pej. Mã Pahpãm te Taner mã me ipimtir jarên to hahkre, mār quê hahkre pej. Ne pê caku jàhtôa kamajco pahhi pê Napuc tehcajpar to catia.

Taner 5.1-30

Pê Taner me cumã ikre kat kam ihhôc kôt harê

5 Pê caku jàhtôa jirô pê, pê pahhi ata ty, pê ihtàmwxwÿ pê Perxar haxà kam amjito Papirôn jõ pjê jõ pahhi. Ne amcro nõ nacute me cumã amji kîn catia nõ ita ton, ne cute pahhito mir ne me hator. Mã ihtÿj ame ikõ, ne ame ajpã.

Ne cormã Perxar apu ihkôm kwÿakam, cute Krîpinkrên pîn, por pêpahhi Napuc xwÿ Pahpãm to me amji kam hapac xà jûrkwa pîn,

mehkõm xà impejti to catoatajê to cute amji japackre. Neamji wÿr ahna hàhwÿr. Mã hÿrmã meto mõi, mã Perxar me, pyjê atajê me, pom cute ame hator atajê me, ameampo cacõ xÿre to ame ikõ, mehkõm xà atajê kam. Ne pê ramã Pahpãm ihkõm xà impejtiitajê intête me cumã, quê nee jũm cahkrit kam ampo to ihkõm nare cakrõ, mã ihtÿj kam amehkõm.

Jirõ pê mã ri ame pĩ me kën te me hõ pahpãm cahac krekã itajêkĩn. Me ajkaam mã ikre kat kam jũm jũ krahhi teihhõc kam ihtẽm. Mã nee jũm te ikre kat kam ihhõc catê ita jĩ na hõmpunnare, ne me hũhhi pit pupun. Mãpahhi ita te ikre kat kam jũm jũhhi te apu ihhõc na hõmpun, meajkaam hũpate apu ihtertet ne ihkõn to apu amji jahy, ne cupê ihte peacre, ne ihkucjakare. Ne cumã hũpaa to hũpa. Mã cute ihkrãhha kam harkwa to:

— Ajpên cute me amji jahkre pej atajê cunea to me cuprõ. Quê ha jũmte ikre kat kam ihhõc ita cahyt na, wa ha jũm ata mã pahhi kã gã, neamji mã to imã hàpên catêjê jõ pahhi na, quê ha cupê pahhicitia — hajÿr.

Mã cute mempar necute me amji jahkre pejti atajê cunea to cute me cuprõn, mã nee jũm te ikre kat kam ihhõc ita cahyt nare.

Mã pahhi menxi te ita par, ne ma Perxar wÿr tẽ ne cute cumã hũjarẽn to:

— Ikra, apu ita to amji japackre nare, ne nee apu hũpa nare. He ita ri jũmxũmre ita pê aquêt xwÿ pê Napuc ata tehcajpar catê, ne kam cõjkwa kam Pahpãm ata Carõ, ne cupê hũràac, necumã ampo cunea jahkre pej. Pê amji mã to cute me amji jahkre pej catêjê me, mehũxy xi catêjê jõ pahhi na hãm ata apu mõi, ne haprÿ te Taner. Ata ca haprõr na awjahkre, quê me haprõ, quê ha ihtÿj amã ikre kat kamihhõc ita jũjarẽn xà jarẽ — hajÿr.

Mã pahhi te inxi jũjarẽn xà atana impar ne ahna hàhwÿr. Mãhÿrmã cator, mã pahhi te Taner cukij ne cumã:

— Xãmte apê mã Taner, por pê pahhi pê Napuc xwÿ Juta jõ pjê pĩn atocato, ne amjimã ato cumã hàpên catê ata mã ca? Wa ite akam me Pahton catê te amji kam hapac xà te amjijahkre pejti na garẽn par, ne ana ijãhwÿr. Wa ite tee cute me amjijahkre pej catêjê cunea to cuprõn, mã ihtÿj me ikre katkam ihhõc ita cahyt, ne nee cute me hahkre pej nare, ne tee ame hahkre.

— Wa ite ate ampo jahkre kêatre atajêjahkre pej na garẽn par, na wa ite ana ijãhwÿr. Ca ha ate ikre kat kam ihhõc itacahyt, ne imã hũjarẽn xà ata jarẽn na, wa ha amã pahhi kã gã, ca haapê imã me hàpên catêjê jõ pahhi, ne apê pahhi catia — hajÿr.

Mã Taner cumã:

— Imã ate imã ampo jõr xà ata kĩn nare, ne ahna imã prãm nare, ne gapacta ne jũm mã agõ. Wa ha itÿj cama amã ikre kat kam ihhõc ita cahyt, neamã hũjarẽn xà jarẽ.

— Còjkwa kam me Pahton catê pê me ijõ InxũCati te ri ikre kat kam harkwa itajê na ihhòcto hajÿr he: “Cahyt, Cahyt, Ihcajpêr, To Ipicapôn”. Ne hàhhòc itajê hũjarên to hane he. Wa ha amã harê.

— Ne por ihhòc to “Cahyt” hane ata hũjarên xà pê me ijõ Inxũ Cati te gõamcro cahyt xà cahhur mã ita. Na ca ha atÿj itakam ty.

— Ne por ihhòc to “Ihcajpêr” hane ita hũjarên xà pê me ijõ Inxũ Catite ramã ate amji kam gapac xà cajpêr, mã ramã cumã ihkêanre, ne ramã hamre.

Ne por ihhòc to “To Ipicapôn” hane ita hũjarên xà pê me ijõ Inxũ Cati te apê ate gõ pjê to ahimpej xà to ipicapôn, nepahhi tuw pijakrut atajê mã me hõr xà. Ne ampo cwÿrjapê rime ijõ Inxũ Cati te ato hajÿr? Nee mã ampo na nare. Akêanre, ne ate amji kam gapac xà kêanre, incwÿrjapê ri cute ato hajÿr — hajÿr.

Mã caxwa ata kam krãhtare pê me curê xwÿn catêjê krĩ mã me cator, ne cute me pahhi Perxar curan, ne hanea ne mehkwyjàhtõa ne amehcuran. Ne neecute me Taner curan nare. Mã ihtÿj ihkrĩ, ne pahhi tuw ata tehcajpa.

Taner 6.1-28

Pê mehkên catêjê rop jàprêhti mã me Taner mẽ

6 Pê Papirõn jõ pjê kam pahhi tuw ita haprÿ Tarir. Ne cute me hõ pahhicatêjê to incrê ne me hũxwÿr, ne atajê nõ pê Taner. Ne pê Taner mãPahpãm par jahkre pej, na pê, por me ipijakrutatajê jirõa pê cumã ampo cunea jahkre pej. Ita cwÿrjapê pê pahhiTarir ata amji mã Taner to cute me to ihhimpej catêjêatajê jõ pahhi to prãm.

Na pê mehkwy itajê mã hũ na amji to prãm, ne tee ameto hahkre, cute jũ mã me ton, nehàpên xà ita kam ihkên mã me mên prãmte. Nejũ wÿr quê jũ mã me to, ne ihkên mã me cumê. Ampo na? Pê nee hàpên xà kam apu ampo kênton nare, ne ajco ihcunea na catyt kam ipa, ne impejti.

Mã amcro nõ na me curê xwÿn itajê te amji to me cuprõn, ne me ajpên mã:

— Jũ wÿr cu me Taner ita kên mã me cumê, hũmre ita peaj to impej, hàpên xà ita kam. Ne còjkwa kam me Hũm Cati kôt ipa ita to, cu ha me to hahkre ne ihkên mã me cumê — hane. Ne ma pahhi Tarir wÿr me pra, ne cute me cumãhũjarên to hajÿr he:

— Hàpà pahhi! Me imã, ate amji to apijaparrohnÿtti mã na, ato prãm. Wa pahhi kwÿ me ite me amjipar to hajÿr he, quê ha nee putwÿr pyxit ita kam, jũm aràn xà na pahpãm nõ na hàhwÿrnare, ne nee ampo na jũm xũmre wÿr nare. Neampo na me hàhwÿr prãm, ne anaa pit mã me ahwÿ.

Quê ha jũm te hõ pahpãm nõ nahàhwÿr na, nare, quê ha jũm xũmre na cute hàhwÿr na, quê ha ma roptijõkre hòhti jàprêhti ata jõ kreti kam,

cute me mên xà. Ne me imã, ite me amã icaca xà ton ita na ihhóc, ne kam gaprÿ xir na to prãm, mâr quê nee jũ caxuwipintuw nare — hajÿr. Mã pahhi te Taner to mencaca xà ita jahkre pej nare kam, ihhêj ne cumã impejti, mã cute ahna ihhóc, ne kam haprÿ xir.

Mã Taner te hõ pahhi jõ kàhhóc cahyt, ne nee cute amji kam me hapac xà ita par nare, ne ma ikrewÿr mõi ne ihtÿj Pahpãm mã ihcakóc, ne amji na cuwÿ. Ne hõtpê amrocunea kam Pahpãm mã ihcakóc to incrê, ikre jõ harkwa krare krac ri, ne ampocunea pyrên hakryti na Pahpãm mã amjijarê, ne amji mã ahna ahwÿ. Ne pê ramã Pahpãm mã ihcakóc ita to amji pyrác tu.

Mã me hũmre itajê te me Taner kên mã mên prãmte, ma hũrkwa ri me mõi, ne cute Pahpãm naamji mã hàhwÿr na me hõmpun. Ne ma pahhi wÿr me pra, necute me cumã hũjarên to:

— Xà nee ate amji mã acaca xà ita na ihhóc nare? Pom ate putwÿr pyxitita kam jũm te aràn xà na, neeampo na jũm wÿr nare ahna ihhóc ita? Xà ate cute me akajna ampo na me jũmjê wÿr mã ate ropti jàprêhti jõkre hõhti jõ kreti kam me irên naate me imã, me cumã ihhóc nare? — hajÿr.

Mã pahhi Tarir me cumã:

— Ýuÿ, ampeaj kam me pahte amji kamme pajapac xàa kõt wa ite ita ton, na ri nee toipintuw xà nare — hane.

Mã me cumã:

— Ne pom Juta jõ pjê rũm Taner ita, nee acaca xà ita kõt amji kam hapac, ne to amji japackre nare, ne ihtÿj amcro cunea kam cõjkwa kam Hũm Catiita na amji mã hàhwÿr to incrê — hane.

Mã pahhi te ita par, nehacpÿa mã amji mã incryc. Ampo na? Pê cumã Taner kinti na pê. Ne tee apu Taner pytâr to hahkre.

Mã ramã pyt xàr xàa kam, mã hacpÿa ne pahhi wÿr me to ihhimpej catêjê itajê me pra, ne cute pahhi mã me harkwa to:

— Pahhi, jũ mã ca ha ajte Taner ita to? Pom ate pahte amji kam me pajapac xàa kõt itaton ita, ca nee to apintuw nare — hajÿr.

Mã pahhi Tarir te Taner na hàhwÿr. Mã cute me haprôr, mã pahhi te cumã harkwa to:

— Pom ca Apãm Cati mã gápên to apaita, quê ha apytà — hajÿr. Jirô pê mã ri cutekreti kam rop jàprêhti jõkre hõhti ata kam me Taner mên. Ne kenti catia nõto me ahna harkwa jihê. Mã cormã pahhi Tarir te ihtõ xà to ahna ihtõ, jũm te aracri hihê mên cupate.

Ne ma pahhi ita mõi, ne cumã amji kîn nare, ne cumã prãm nare, mã hàpàn nare, ne cama nõ. Ne nee hanea ne caxwa ri hõt nare.

Pê Pahpām ropti jàprêhti atajê pê Taner pytà

Mã ramã ahna apê jàhtêp, mã ma ropti jökre hôhti jõ kre wÿr mō, por kam cute me Taner mên ata wÿr. Mō, ne cumã amjikîn nare kam, incwÿar kam cute Taner cukij ne cumã:

— Taner, Pahpām tíar mã hàpên catê ita, xà Apãm Cati ita teihtÿj ropti jàprêhti itajê pê apytàr? — hajÿr.

Mã xãmte Taner cormãihtiar xa ne cute pahhi ita mã:

— Pahhi, he wa itíar xa. Ijõ Pahpām te cõkwa pîn harkwa na imprarcatê nõ kujahêc, mã cute itête ropti jàprêhti itajê jarkwa to ipijapÿn partu, mã nee jũ mã ihnõ te iton nare. Ne wa Pahpām krac ri nee ite ampo toihcupan nare, ne nee hanea ne acuna mã ite amji kam ijapac xà nõ to kên nare, Pahpām kam mare mã — hajÿr.

Mã pahhi te hihê mên ne Taner tíar na hõmpun, ne hūrênapu hakry, ne cute caxàr na hūjahkre. Mã cute me caxàr, ne tee amehkõpĩ, mã nee ropti itajê nõ te jũ kam ihcakên nare, ne nee cute jũ kam inxar xàhamreare. Mã tee cute amehkõpĩr par.

Mã pahhi Tarir te me cupê pahhicatêjê te ame Taner to kên prãmatajê cunea me, mehkra me mehprõ mea mã me ahna hàhwÿr. Ne ma kre kam ropti jàprêhti ata kam, cute me irên na hūjahkre. Mã kam cute mehcunea rên. Máropti itajê te amji wÿar mehpro par, ne me hipej tu.

Jirõ pê mã ri pahhi te hõ pjê kam mehcunea mã ihkàhhôc ton, ampokra mea mã, ne cute kam me cumã harkwa to:

“Me amji to impej ne,
 nãmri wa ite Taner jõ Pahpām kam mare mã,
 me ate amji mã me hūpahti to ame atertet na,
 ite me amã ihhõc, ne ahna me amãijūjahkre.
 Ampo na? Quêt hõ Pahpām ita ihtíar cumã ihkrĩ, ne nee apuamji kam
 hapac xà to ipintuw nare.
 Ne por ihhimpej xà atajê,
 quênee jũm to cô nare.
 Ne pom carôt ita quê nee jũ caxuw cupê hamre nare,
 cwÿrjapê ri ihtÿj amji mã mehkwy pytà.
 Ne ihtÿj ampo pej pit to.
 Ne jũ wÿr quê jũm cuxà ampo pejti itajê nõ to.
 Ne cutea ri roptijökre hôhti jàprêhti itajê pê Taner pytàr” hajÿr.

Hacpÿa Mã Me Hõ Pjê Wÿr CUTE ME AMJI JAXÀR XÀ

ÿhÿ, pê Juta catêjê ajmâr mehcunea me hõ pjê pê me to cutor tu, ne curia Papirônjõ pjê kam mehrĩ. Pê mehcahhur menchrêre ne me hõ pjê pê mam Canãn jõ pjê pê Ixaher jõpjê me, Juta jõ pjê kam mehrĩ, ne jũ mã me, ne me hamre, ne me acto.

Pê pjê ata kam mehrĩ itajê ihtÿj mehrĩ, ne me ipicamên to me mō. Pê Papirôn jõ pjê kam krĩxàre catêjê ajco me hõpahpãm cahàc krekà itajê kôt pit mã ame amji kampa. Pê Juta catêjêma ame pahpãm cahàc krekà itajê kôt me amji kam hapac caca. Pê mam pahpãm cahàc krekà kôt me amji kampa, jahpan xà na mehkên mã me axà, ata to rima me amji japackre, ne ita caxuw quêt cõjkwa kam Pahpãm tĩar rohnÿtti mã ata to me amji mã mehhimpej to me ipa.

Ne me ahna caku te xetênta jirô pê mã ri, hacpÿa mã Papirôn jõ pjê pĩn mehõ pjê pê Canãn wÿr mehwÿ te amji jaxàr. Ne Extra me Nemij pê me to ihmimpej catêjê, ne me cupê me cumã Pahpãm jarkwa to mehcahoc catêjê. Ne me hÿrmã me cator, ne cute hacpÿa mã me Pahpãm to amji kam me hapac xà jũrkwa xãm, ne hanea ne hacpÿa mã Krĩpinkrên tête me kwÿc to intuw. Necute ihcunea na me hõ kàhhôc kam mehhôc, na ri cute me ihkàhhôc ata mãhaprÿ to, **Extra Jõ Kàhhôc (Extra)**, me **Nemij Jõ Kàhhôc (Nemij)**.

Ne caku atajê kam hanea ne mehwÿa kwÿ te hacpÿ ne me amji jaxàr, ne Krĩpinkrên to mentuw. Mã Pahpãm jarkwa to mehcahoc catêjê incrê itajê pê Agew, me Xacarij me, Maraquiij itajê ihtÿj me hàpên xà na me cumã apô. Ne hanea ne catyt kamPahpãm kôt ame ipa na me cumã apô. Ne me hõ kàhhôc japrÿ te **Agew Jõ Kàhhôc (Agew)** me, **Xacarij Jõ Kàhhôc (Xacarij)** me, **Maraquiij Jõ Kàhhôc (Maraquiij)**. Ne ita caxuw Extra jũjarên na, hõ kàhhôc kwÿ mã he.

Extra 1-2

Pê Pahpãm hacpÿa mã me hõ pjê pê Canãn wÿr, Juta catêjê kujate

1-2 Pê me ahna caku xetênta jirô pê mã ri ramã mam itajê mehwej partu, ne ramãmehtyc to mō ne menchrêre. Ne por pê Juta jõ pjê meKrĩpinkrên pĩn mentuwre na me tocato atajê ri cormã ame ipa, ne hanea ne ramã amehwej. Ne mehtãmwxÿ rihõtpê ampeaj kam me hàhtô.

Mã ramã Pahpãm mã Juta catêjê caprĩ, mã cute Papirõn jõ pjê kam hipêr pahhi tuw japrÿ te Xiro ata mã, cuteamji kam hapac xà nõ ita ton. Mã hanea ne cumã Juta catêjê caprĩ, mãcute me hõ pahhi catêjê to cuprõn, ne mehçukij, ne me cumã:

— Xà ca ajkĩ atÿj jÿmjê hacpÿa mã me gõ pjê pê Juta jõ pjêwÿr me amji jaxàr to prãm? Quê ihhêaj to me akwÿ mãhacpÿa mã me amji jaxàr to prãm na, quê ha hapacta ne me amji jaxà, ne hacpÿa mã me gõ krĩ pê Kripinkrên ata to mentuw, ne mam cati mã hacpÿa mãkam me Pahpãm mã hÿrkwa nõ xãm — hajÿr.

Mã Juta catêjê jõ pahhikwÿ te cumã:

— Ýhÿ, pahhi Xiro, me ijãhtõa wa meamji jaxàr prãm — hajÿr. Pê caku atakam me hàhtõa ne Papirõn jõ pjê pĩn me amji jaxà, me hõ pjê wÿr, ne me krĩ xãm, ne kam mehkrĩ.

Extra 7-10

Pê Extra Juta jõ pjê wÿr amji jaxà

7-10 Pê caku atajê kam Papirõn jõ pjê kam, me hÿmre nõ ita japrÿ pê Extra ita ihkrĩ, necupê ihkàhhôc ton catê, ne cupê me cumã ampo to hahkre catê. Ne cumã Mojxe xwÿjõ kàhhôc kwÿ mã ampeaj ne hahkre pej.

Mã Juta catêjê jõ pahhikwÿ jãhhuc atajê te mehkôt ihkujahêc, Canãn jõ pjê pê Juta jõ pjê wÿr, quê me ahnaawcapi, jÿ mã mORMõ cute me. Ne hacpÿa ne amji jahpan xà Extra te me hõmpunxà atajê na, pahhi kwÿ mã ihkàhhôc nõ to, nekujate.

Mã ma mehkôt mõ necuri cator, ne cute krĩ na hÿcapi, mã ramã krĩ te amji jipêj ne xa. Nenee cormã kam, cute me Pahpãm to me amji kam hapac xà jÿrkwa to impej parnare, mã ahnaa ihcuuhê. Cwÿrjapê ri Pahpãm jarkwa kôt Agew te me cumãn, ne me cumã:

“Me gõ krĩ to mempej jicu,
ne mam me Pahpãm jÿrkwa to mempej!
Jirõ pê ca ha cormã ame gÿrkwa to mempej!” hajÿr.

Mã hanea ne Extra te Juta catêjê xÿmre te ampo kwÿj pêPahpãm jahkre kêatre atajê me, ame hikwa na me hõmpun. Na ri Pahpãm jarkwa kôt me cumã:

“Ampo kwÿj itajê me, me gikwa to hicu,
ne me cumã hikra!
Ampo na? Ca hame hane,

quê ha ihtÿj Pahpãm kaj na me amã ampo kêanre to hahkre to me ipa” hajÿr.

Extra jõ kàhhôc, me ho pahhi catêjê wÿr

Ne cute me ahna ihhôc par, ne ma hacpÿ mã, Papirôn jõ pjê kam Jutacatêjê jõ pahhi kwÿ jàhhuc, ne ame ipa atajê mã, cute ihkujahêc. Ne cute ihkàhhôc kam harkwa to hajÿr he:

“ÿhÿ, me ijõ pahhi, wa ita ri Juta jõ pjê kam icator, mã Juta catêjê pê pahhi kwÿiwÿr me mõi, ne cute me hàhtôa to imã hÿjarên, ne me imã:

‘Me pahkwÿa kwÿ jàhtôa pê ihhêj rÿm me cupê Juta catêjê nareatajê pyrãac, ne ihtÿj mehkêanre ton to me ipa. Ne mehkwyã Pahpãmjÿrkwa to me hàpên cacrô, cormã mehkên ton to me ipa. Ne pê ramã mePahpãm me pahkwÿa kwÿ te ampo kra cahãj me, ame hikwa têtê me cumãncacrô, mã cormã ihtÿj hãn ne ampo kwÿj me, ame hikwa. Mã hanea ne mecupê pahhi catêjê ihtÿj me ita to’ hajÿr. Hôhõ, cute me imã me pahkwÿ jârên to hajÿr. Wa Pahpãm cuna mãipahãm xàhte ikôn krã na ijÿr, ne ite cumã ijarkwa to:

‘Me ijõ Inxũ Cati,
ampeaj kam ri me ikêan to me ikên,
me ikên xà ita jÿ naipahãm to ipahãm.
Pê ramã rÿ pêa mã garkwa to mehcakôc catêjême imã awjarê.
Me ikên te ramã ihhêj ne me ijõ pjê ita tÿam to ihtÿm.
Pê ca garkwa to:

“Ca nee ajteare mã ampo kwÿj me ame gikwanare,
ne me akwÿa cahãj me, ame gikwa.
Ne nee hanea ne ita na ame akrajamãr nare,
ne nee cute hajÿr xà ita na ame jÿm tehcajpar nare” hajÿrcacrô,
wa ite me garkwa itajê impar pej nare’ hajÿr.

Wa cormã ipec xàhte Pahpãm to me amji kam hapac xà jÿrkwa cuna mã ijõpôrpo ne nõ, ne cormã icwÿar kam Pahpãm mã me ikên xà ita toicakôac kam, mã me hÿmre me, me cahãj me, me ahkrare me, me hàhtôa ne me cator. Ne cute me cuprôn ne ihtÿj icahê na ame amrã, cute me amji kênxà kêanre ata pupun ne. Mã mehnõa xÿmre ita te imã harkwa to:

“ÿuÿ, Pahpãm cuna mã ame pahkên crire nare. Ampo na? Cu pahtÿj amecupê me pahkwÿ nare atajê cahãj me, ame pajikwa. Ne cu cormãpahtÿj me to. Ampo na? He cu me pahte Pahpãm kam maremã me ajpên par, me pahte pyjê itajê me, mehkra itajêmã me hikran, ne mehkujahêc na me pamã harkwa.

“Hã, kepê cu itacaxuw Pahpãm jarkwa kôtame amji ton to me papa nare, ne por quêt cormã Pahpãm jarkwa kôt me pajôpahhi ame ipa atajê kampa. Ne Extra, caa ca ha amji to ihtÿj, ne iteme ampo ton xà ata na me imã awjahkre, wa ha itÿj me to” hajÿr.

Wa ixãm ne ite me cupê pahhi catêjê cuneamã ijarkwa hyr. Ne ite Pahpãm to me amji kam hapac xà jÿrkwa kam me hàpêncatêjê me, me hàhtôti atajê cunea cukij, ne me cumã:

“Ca ha me acunea, pom hÿmre te harkwa to ihcakôc xà ita na me amji capa?” hajÿr.

Mã mehcunea te ita na me amji caxàr. Wa curia Pahpãm to me amjikam hapac xà jÿrkwa kam ijàhhuc, ne apu ipijacri to mō, ne nee ite kwÿrnō krêr nare, ne nee ikôm nare. Ampo na? He me ikwÿ kên xà atajê jÿ na ipec xàhte, wa apu ipijacri to mō. Mã mehcunea te me imã harkwa to:

“Cu me pahcunea tePahpãm cuna mã me pahkên xà ton, cwÿrjapê cu ha pahtÿj ita caxuwme kampa” hajÿr. Hôhō, wa ite me kam ijapac to hajÿr, ne me amã ahnaihôc, ne me amã ihkujahêc” hajÿr. Hamre

Juta catêjê hipêr me hõ pjê kam Mexij jikaj

Ne me ahna caku jàhtôa jirô pê mã ri ramã cute me hõ krÿ jipêj partu. Ne Ixaher jō pjê me, Juta jō pjê cunea kôt ramã amehcakhkũm, ne ma meipicamên to me mō. Ne por Papirôn jō pjê kam mehcahhur me hàhhucatajê te me hõ pjê to me hapac kêt, ne curia ame hamre. Mã Ixaher jō pjê me, Juta jō pjê kam caku jàhtôa kam me xa, ne ihtÿj Pahpãm te me cumã Mexij pê hÿmre to awjahkre ata jikaj.

Jirô pê mã ri me curê xwÿn catêjê, Roman jō krÿ pîn me cator, ne metaa, Ixaher jō pjê me, Juta jō pjê kam krÿ cunea to mehhimpej. Mã Jutacatêjê cunea teme amji pupun xà kêanre to me amji pupun, ne ihtÿj me amrã. Ampo na? Pême hõ pahhi ata, pê ajteare mã jÿmjê kwÿ, na pê ajco ame amrã, neajteare mã Juta catêjê te amji kam hapac xà kajna, cute me amji kam hapac xaa to me to ihhimpej. Pê Pahpãm mekampa, ne ma me cumã, por pê rÿ pêa mã, ramã me cumã me hÿmre nō toawjahkre ata kujahêc xaa kam. Hamre.

Curmã Pahpãm Jarkwa Na Ihkàhhôc Tuw

Ûhỹ, curmã Ihkàhhôc Tuw ita nee mã curmã cute mehhôc nare. Rỳ pëa mã pë mehhôc, ne cama haprỳ te Curmã Ihkàhhôc Tuw. Ampo na? Mam Ihkàhhôc Tũm hôc xà ata jakàn pë ri Curmã Ihkàhhôc Tuw hôc xà ita, na pë.

Curmã Ihkàhhôc Tuw ita me pamã Jeju cator xà na harẽ. Ne hanea ne me pamã Jeju na mehkwy kam to ihtẽm xà jarẽ. Ne mam ihkàhhôc jĩkjẽ hôc ita, pë me hũmre me cwat ne Jeju na mehhôc atajẽ japrỳ te Matew me, Macô me, Ruc me, Jowãw. Ne hanea ne hõ kàhhôc nõ kam, Ruc me pamã pjẽ cunea kam Jeju jarkwa na memprar catêjẽ te me cunea mã, Jeju pë me pahcunea kritxwỳ, cucukwa kam me pahkên catia pë me pahcator na, me cumã harẽn to ipa.

Ne hìcu xà wỳr, ihkàhhôc jĩkjẽ ita pë, Jeju jarkwa na memprar catêjẽ te mehkwy jamãr catêjẽ me, mehkwy wỳr hõ kàhhôc kujahêc. Ne Pawrô pë mehkwy jirôa pë ihkàhhôc itajẽ ihhôc. Ne hanea pë Jowãw me Petrô me, Tijac me, mehkwy nõ, hanea ne mehkàhhôc ita kwỳ hôc.

Ne wa ajmãr mehĩ jarkwa wỳr ite mehkàhhôc itajẽ cunea to me ipintuw. Ne ihkàhhôc crê peaj ne hapjêa to hapjê, na wa nee ite mehcunea to ipintuw nare cakrô, wa ite ihkàhhôc crê itajẽ kam impej kwỳ to caprãr, ne mehĩ jarkwa wỳr me amã to ipintuw. Cwỳrjapê ca ha gapacta ne atỳj me cahyt ne ihkôat me amji kam gapac to me apa.

RUC

Te Jeju Jarēn Xà Impejti

JÕ KÀHHÔC

Ÿhỹ, pē rỳ pēa mā Pahpām pjē ita wỳr cumā ihkra pyxit peaj ata kujate, pē cōjkwa pīn wrỳ, ne ita ri, pjē ita kam apu ipa, ne haprỳ pē Jeju.

Mā me hũmre te cwat itajê te ahna me ihhōc. Ne cute me ihpỳm xà me, ihkà to mōr na me ahna ihhōc. Ne hanea ne cute me cumā ampo to hahkre xà me, cute me hapackre xà me, cute ampo cunea ton atajê na, ahna mehhōc. Ne me hīcu xà kam, cute me ihtyc xà me, hacpỹa mā ihtĩr xà me, hacpỹa mā cōjkwa wỳr hàpir xà na me ahna ihhōc par.

Ne cute me cwat te me ahna ihhōc itajê japrỳ te, Matew me, Macô me, Ruc me Jowāw. Ne caku crê kam Matew me Jowāw Jeju kōat ame ipa. Ne cute mento jĩa to me Jeju te ampo ton atajê cunea na me hōmpun. Ne cute me hapackre xà atajê cunea na me kam hapac par, ne ahpỹanre na, me hō kàhhōc kam, me Jeju te amji kam hapac xà pejti na mehhōc par.

Ne Macô pē Petrô pē Jeju kōt ipa catêjê nō ata jō ikwỳ nō. Ne cormā intuwre ita kam, nee cupê Jeju kōt ipa catê nare cakrô, ihtỳj ampỳa mā cumā hahkre pej. Mā Petrô te hōtpê catyt kam ihcunea na cumā Jeju jarēn par, mā cute harēn par xà atajêa kōt, cute hō kàhhōc kam ahna ihhōc par.

Pē mehkĩnte Ruc nee into jĩa to me cuxà Jeju pupun nare cakrô, pē ihtỳj ajco Jeju jahkre pej peju catêjê atajê cukij, ne cute me cumā Jeju jarēn xà kōt, hō kàhhōc kam ahna ihhōc.

Ne Ruc me Jowāw te hō kàhhōc kam me Jeju na ihhōc itajê cunea, wa ramā me ite mehĩ jarkwa wỳr ihcunea to me ipintuw partu, cwỳrjapê ca ha gapacta ne atỳj me cahyt pa.

*Ne Matew me Macô jō kàhhōc, wa nee me ite ihcunea to me ipintuw nare. Ampo na? He Matew me Marco te me Jeju jarēn xà itajê jàhtōa me, Ruc me Jowāw te harēn xà itajê pipēn pit, na wa ite nee hipêr to ipintuw nare. Ne quêt ajteare mā cute me harēn xà atajê, wa ite catyt kam ihkàhhōc ita kam me to ipintuw par. Ne catyt kam Ruc jō kàhhōc kam me to ipicawỳr. Ne ihkàhhōc japrỳpê **Ruc Te Jeju Jarēn Xà Pejti Jõ Kàhhōc (Ruc).***

Ruc te amji jarĕn xà

1 ¹Taamã Tejopir, ipê Ruc, pa wa Jeju na amã ihhòc. Pê ampeajkam me hàhtô ne hân ne Jeju na, ame ampopupu atajêa na mehhòc to me ipa. ²Pê mam cumã kat kam jũmjê itajê ampo cunea pupu, ne ajco mehcunea mã ampo itajê jarĕn to me ipa. Ne cute me imã ampo itajê cunea jarĕn. Na wa ite ampo itajê cunea na amã ihhòc.

³Ïhÿ, pahhi Tejopir, wa ite amji mã iprĩa ne ampo itajê to hahkre. Ne ampo itajê ri, cute mam, cumã kat kam, mam me hõmpunxà. Ita cwÿrjapê ri ahna imãa impejti, na wa catyt kam ite ihcunea naamã ihhòc to impejti. ⁴Ihhêj ne ramã jũm te amã ampo itajê to hahkre. Na wa ite ita kam ahna amã ihhòc, ca ampo itajêcunea pupu ne hahkre pej pëa ne, nãmri ampeaj kam ri.

Me cumrãr catê pê Jowãw pÿm xà to hũjahkre xà

⁵Ïhÿ, pê cormã Heroti pê pjê jõ pahhi, Juta jõpjê kam, pê curi Pahpãm mã mehcajrĕn catêjê nõita japyrÿ pê Xacarij. Pê cupê Apij xwÿ kwÿ kwÿ nõ. Ne hĩxi japyrÿ pê Ixapewkwÿj, ne cupê Arãw xwÿ tãmxwÿ tãmxwÿ nõ. ⁶Ne pê ajwar catyt kam me ipa, ne mempejti to me amjikampa, Pahpãm cuna mã. Ne ajco me Pahpãm jarkwa cunea kampa. ⁷Ne pê Ixapewkwÿj ita ihkra nare. Ampo na? Pê hahũm ita na ipa, ne ramã ajwar mehwejtu.

⁸Mã hamre, Apij xwÿ kwÿ jãpĕn xà jõ amcroa kam hàhhuc, mã Xacarij Pahpãm cunamã apu hàpĕn to mõ, Pahpãm to amji kam hapac xà jũrkwakam. ⁹Mã jũm ita te Xacarij capi, hàr ne cute Pahpãm cuna mã ampo kũmcuxwati ita mã haxàr, mã cute caxàr prãmte. Atato pê Pahpãm mã mehcajrĕn catêjê kwÿ hân ne ame. Mã hamre, ma hàr, Pahpãm to amji kam me hapac xà jũrkwacaxwãm pê. ¹⁰Mã jũmjê atajê jãhtõa ne cute me cuprõn, ne põ pê mexa, ne Pahpãm mã mehcajõc. Mã Xacarij xàr ne xa, ne apu ampo kũmcuxwati ata to capa.

¹¹Mã ihprõt pê, Pahpãm jarkwa to memprar catêjê nõcõjkwa pĩn cator, ne ampo kũm cuxwati tecaxàr xà ata cuna mã awpõc rũm xa. ¹²Mã Xacarij te hõmpun, ne ampeaj kam cumã hũpa, ne cupê amji jahkre kêatre, ampo to mõrmõ quê ha ajte. ¹³Mã Pahpãm jarkwa to imprar catê cumã:

— Xacarij, nee ca apu icupa nare, ca ate Apãm Cati mã acakõc, mãcute apar. Na quê ha gĩxi mã ihkra xũmre nõ, ca ha me cumã haprÿ to Jowãw. ¹⁴Quê ha ihpÿm xà ata kam ca ha gakry, ne amã amjikĩn. Quê ha hanea ne jũmjê hàhtõa ne ame hakry.

¹⁵— Ampo na? Quê ha Pahpãm cuna mã cupê hũmre catia. Quê ha nee ampo te ame to ipipãn xà ata to apu ihkõm nare. Nequê ha ihpÿm ata caxuw, quê ha Pahpãm Carõ Pejti cumã amji gõ, ne to hipu tu ne, ne to

carôt tỳj. ¹⁶Ne quê ha Pahpãm wỳr, Juta catêjê jàhtôa ne to amji jaxà, quê ha hipêr Pahpãm to me amji japackre.

¹⁷— Ne quê ha Pahpãm Erij xwỳ cuxà to ihtỳj, quê ha cupê Pahpãm jarkwa to imprar catê, ne ampo to impej pa, Pahpãmkra cator xà jahkà na. Pom pê Pahpãm jarkwa to ihcakôc catê Erij xwỳ ata mã mam carôt tỳjti gõ ata cuxà, quê ha cumã hĩ cunea kam carôt tỳjti gõ. Ne hacpỹa mã ajpên na me cumê, quê ha me hũmjê me, mehkra hacpỹa mã me cumã ajpên kĩn. Ne mehkrã kên atajê, quê ha hacpỹa mã catyt kam me ipa catêjê atajê krã kre te amji jahkre pejti kôt me to impej, quê ha mempej pynã. Ne quê ha hanea ne Pahpãm na mehkwỳ mã, quê meamji to impeaj ne, nãmri quê ha cõjkwapĩn, Pahhiti cato ata ri, hãn ne me hõmpu — hane.

¹⁸Mã Xacarij te Pahpãm jarkwa to imprar catê cukij, ne cumã:

— Pỳhàpà, jũ mã wa ha ajte, ne ate imã harên xà ita to amji mã hane? Jũ mãwa ha ajte ne hahkre pej, mõrmõ ajki gũjarên xà ita ampeaj kam? Ramã iwej, ne iprõ te hajỳar ne ramã ihwej, nõ na mã ca imã ikra pỳm na ijarê — hajỳr.

¹⁹Mã Pahpãm jarkwa to imprar catê cumã:

— Pỳhàpà, Ipê Caprer. Wa ijõtpê Pahpãm capi na apu ipa, necutea ri ikujahêc, wa xa ne amã icakôc, ne amã ampo pejti te hajỳr xà ita jarê.

²⁰Ca ate nee ite amã harên xà ata na ipar nare, nequê ha ihtỳj hane, amcro ata kam. Ca nee ate ipar nare, incwỳrjapê ca ha apêrkêc, ne ahnaa apa, quê ha ahnaa amã akrailhpỳm — hane. Ne ma tẽ.

²¹Mã cormã apu ihkên, mã põ pê me xa atajê cormã me xa ne me Xacarij jikaj, ne me amji mã:

— Pỳhàpà, ampo to mã apu, ne apuihkên? — hane. ²²Mã cator, ne ipêrkêc itakam, jũ wỳr quê ihcakôc. Mã ipêrkêc ita kôtcute me Xacarij te irĩat kamPahpãm to me amji kam hapac xà jũrkwa kam, cute ampo pupun ata na me hahkre pejpgyrentu, ne jũ wỳr quê amji mã hamã ne ihcakôc, ne cama hũhkra to ame cumã ihhimpej.

²³Ne Xacarij te hàpên xà jipêj, mã hamre, ne hõ amcro jamre, mã cute amji jaxàr ne ma tẽ. ²⁴Mã ahna ahtũm nare mã hĩxi mã ihkra ajêc, mãnee põ mã to hapôj nare, ne ahnaa cute amji to putwry to xĩc. Mã Ixapewkwỳj amjijarên to hane ne:

²⁵— Hamre, ramã ijahũm ita na iwej, ne ityc xàa wỳrajte ikra. Ne Pahpãm te ri itehcajpar ne imã ikra jõr. Ne hamre, ita caxuw, quê ha hipêr nee jũm imãn nare — hane.

Pahpãm kra pê Jeju pỳm xà to hũjahkre xà

²⁶Mã cormã Ixapewkwỳj mã ihkra ajêc, ne ramã ahna putwry texêj, mã Pahpãm te hipêr cõjkwa pĩn harkwa to imprar catê pê Caprer kujahêc, mã ma Hĩpôjajo jõ pjê kam, krĩ nõ japry te Naxare jõ krĩata wỳr tẽ.

²⁷Ýhÿ, pê curia cahâj nõ japry te Marijkwÿj ita ihkrî, ne cormãincrecer, ne ramã Joje meajpên pa, cume hikwa xà caxuw. Pê Joje pê pahhi Tawi xwÿtãm xwÿ tãm xwÿ nõ. Mã Pahpãm jarkwa to imprar catê te Marij mã Pahpãm jarkwa par. ²⁸Ne cõjkwa pîn hÿrmã to cator ne cumã:

— Hàpà Marij! Gakry! Ampo na? He Pahpãm te apej mã amên. Xãmte ihtÿj Pahhiti acahê na apuipa — hane.

²⁹Mã Marij te ita par, ne hamre, ihkrã pictor tu, neamji mã:

— Pÿhàpà, ampo na mã apu imã hane? — hajÿr. ³⁰Mã cormã Caprer cumã:

— Nee apu pa nare, Marij. Apyrên Pahpãm jakry, na ri cute atoimpejti.

³¹Ne quê ha amã akra xÿmre gõ, quê ha harij ne amãihpÿm, ca ha cumã hapry to Jeju. ³²Quê ha cupê hÿmre catia, quê ha me cumã haprykrut gõ, ne me cumã “Pahpãm Catia Kra” hane. Quê ha Pahpãm acãmter to pahhi, quê ha cupê mam aquêt xwÿ Tawi pê pahhi ata pyrãac. ³³Ne quê ha hõtpê cupê Juta catêjê jõ Pahhiti ita na. Ne cupê Pahhiti rohnÿtti mã, ne nee jÿ caxuw cute ihhimpej xà ita cupê hamrenare — hane.

³⁴Mã Marij Caprer mã:

— Mër jÿ mã wa ha ajte? Nãmri wa cormã itÿj apu ipa, ne cormã icunĩ — hane.

³⁵Mã cumã:

— Pom Pahpãm me hirõa pê cati ita Carõ Pejti quê ha amã axà. Ne carõat kõt, quê ha akra. Ita cwÿrjapê quê haacãmter ita pê Pahpãm kra impeaj, ne ajtea mã, ne impej, ne cupê catyt kam ipa catê.

³⁶— Mër hõhõ Marij, pom Ixapewkwÿj pê gÿkjê wej ita, mehcunea me harê, xwahna hahÿm na ipa. Ne ramã ihkra, ne ramã ahna putwry te xêj mã ihkra cumã harij ita. ³⁷Ampeaj kam Pahpãm mã ampo cunea ton jahkre pej, quê ihtÿj me hÿmre nare kam jÿm cunĩ mã ihkra to — hane.

³⁸Mã hamre, Marij cumã:

— Ýhÿ, ipê Pahpãm mãijapên catê. Quê ha Pahpãm ito hane, wa ha ahna mã — hane. Mã ma Pahpãm jarkwa to imprar catê tẽ.

(Pê Ruc Jeju jarên jicu. Pê Matew Jeju pÿm xà na harên to hane he.)

Matew 1.18-25

Pê Joje cute ajpên par xà to ajmãr hamre

¹⁸Pê Jeju Crixto pÿm xà hane he. Pê Marijkwÿj me Joje ramã ihcunĩ kam, cute me hikwa xà na, me ajpên par pejtu. Ne me hikwa xwÿjrea na, cormã Marij cunĩ kam, ramã Pahpãm Carõ Pejti kõt ihkra ne ihtic. ¹⁹Ne Joje pê hÿmre pê catyt kam ipa catê, ne hàhcaprĩ, ne hàhcajrënti, na pê Marij te apu ihpahàm cupate, nee mehcunea kam mare mã, jÿm te ahti

na kam ihkra na ihkôt harên kêanre prãm nare. Cwÿrjapê ri aracri cute Marij me hikwa tuw na me ajpên par xà ata to hamre to prãm.

²⁰Ne caxwa ata kam, nôr xà kam nō ne ita to amji kampa, ne hôt. Mã ipimtir kam, cōjkwa pîn Pahhiti pê Pahpãm jarkwa na imprar catê nō hÿrmã iwrÿc ne cumã:

— Hàpà Joje, apê pahhi xwÿ pê Tawi tàmwxwÿ tàmwxwÿ ita! Nee ca apu amji mã pa nare, ne atÿj Marij pê gïxi ita na amji capa. He nee jũm te kam ihkra nare, ne Pahhiti Carō Pejti kôt ri ihkra. ²¹Quê ha cumã ihkra xũmre nō ihpÿm, ca ha caa cumã haprÿ to Jeju. Ne haprÿ ita kôt harên xà te “Pahpãm te me hÿtâr catê”. Ampo na? He quê ha akra ita ihtÿj mehkwyê kên catia ata pê me hÿtã. ²²Ne ampo na ri gïxi te hajÿr? Pê ramã Pahpãm jarkwa to ihcakôc catê japrÿ te Ixaj xwÿ ata gïxi to awjarê, na quê ha hane. Na pê to hÿjarên to:

²³“Quê ha jũm cuprÿ ne ihcunĩ kam ihkra,
ne cumã ihkra xũmre nō cato,
quê ha cumã haprÿ to Emanew” hane.
Ne Emanew ita kôt harên xà te
“Pahpãm me pahcotea na ipa” — hajÿr.

Hôhō, Pahhiti jarkwa to imprar catê te Joje mã hÿjarên to hajÿr, ne ma hacpÿ mã cōjkwa wÿr cute amji jaxàr. ²⁴Mã Joje pimprar, ne cute Pahhiti jarkwa na imprar catê ata jarkwa kam hapac pyrentu. Ne ihtÿj cute Marij pê hïxi na ahna amji caxàr, ne nee cute me ajpên par xà ata to hamre nare. ²⁵Cakrô, pê nee cormã hïxi tic ata na ihcaxun nare, pê ahnaa cumã ihkra xũmre pÿm, pê cumã haprÿ to Jeju.

(Pê Matew Jeju jarên jicu. Pê Ruc hipêr Jeju jarên kam to incrã to hane he.)

Pê Marij Ixapewkwÿj pupu

³⁹Ita jirô pê mã amcro nō na, Marij te amji cũmpej, ne mahÿjarêan kam tẽ, Juta jô pjêkam kënti jô pjê ata wÿr. ⁴⁰Ne Xacarij jÿrkwa wÿr cator ne hàr, ne cute Ixapewkwÿjcukij ne cumã:

— Hàpà, hàpà — hajÿr. ⁴¹Mã hamre, Ixapewkwÿj te Marij jökre par me ajkaam mã ihtukam ihkra jàhcujrôn. Mã Pahpãm Carō Pejti te Ixapewkwÿj mã amji jôr, mãcute kÿj cati pêa mã ihcakôc kam ihtêm. ⁴²Ne Marij mã:

“ÿhÿ, quê ha pyjê kwÿ cuneajirôa pê Pahpãm quêt ato impejti ne.
Ne pom akra ita, quê hahanea ne Pahpãm mehkwyê jirôa pê quêt to
impejti ne.

⁴³Ne akĩnte icrire. Ampo na?

Quêt apê ijõ Pahhiti menxicakrô,
ca ahnaa iwÿr tẽ ne ate ipupun,
ne ampeaj kam apyrên ijakry.

⁴⁴ Ne ca ate icukij, mã ikra ita hakryte itua kambahcujrôn.

⁴⁵ Ca ate Pahpãm to amji mã ahimpej, cwÿrjapê quê ha ihtÿj amã to,
pom cute amã amji jarên xà ita na,
ca ha hÿrên gakryti ne” hane.

Marij crer xà

⁴⁶ Mã Marij te Pahpãm pejti na harên to:

“ÿhÿ, wa ha ite amji kam ijapacxà cunea to Pahpãm jarê.
Pahpãm ri quêt cati ne impej.

⁴⁷ Ne Pahpãm pê ikên pê ito cator catê,
na ri hÿrên ampeaj kam ijakry.

⁴⁸ Mã cute ito amji japackre,
ihkĩnte icrire na,
ne ipê cumãijapên catê wa.
Ne ita caxuw quê ha mehcunea,
pjê cuneakam, Pahpãm mã ikĩn,
mã cute ito impej na, me ito awjarê.

⁴⁹ Pahpãm carôt tÿjti,
na ri cute imã ampo catia ne ton.
Ne Pahpãmquêt ajteare mã,
ne impej.

⁵⁰ Pahpãm hõtpê me pahcunea caprĩ,
pom cu ampeaj kam me kampa atajê ri, ihtÿj me caprĩ.
Mam me panquêtjê me,
hapu na mepajĩ itajê me,
ne quê ha hapua na me pahtãmxwÿ to hanea
ne cumã mehcuneate kam me hapac atajê caprĩ.

⁵¹ Pahpãm te hÿhkra to hãpên xà catia ne ton.
Pahpãm te, cute amji to me cati prãm catêjê atajê cunea incrãn.
Cute hirôa pê amji to me cati prãm catêjê atajê te
meamji kam hapac xà mea mã,
Pahpãm te mencrãn.

⁵² Pahpãm te me hõ pahhi carôt catihti atajê jÿrên partu,
ne meto ihkryjre.
Ne amji to me cati prãm nare atajê ri, cute me toi hkà.

⁵³ Pahpãm te me cupê hamreare atajê me,
me cumã prãm ti atajê mãharte,

ne me cumã harte kam to incrã tu.

Ne me hakràj catêjê atajê,

Pahpãm te hũ kam amencràn.

⁵⁴ Ne Pahpãm pê me panquêtjê mã,

mehtehcajpar xà toawjahkre.

Ne hamre, ihtỳj cute me cumã ton,

quê ha ihtỳj Juta catêjêtehcajpa.

⁵⁵ Ne cute Aprãw xwỳ me,

ihàmwxwỳ tàmxwỳ caprì na amji to amji japackre,

por pê ramã ahna amji jarê ata na” hajỳr.

Hõ, Marij te Pahpãm to hũjarèn to hajỳr.

⁵⁶ Ne cute Ixapewkwỳj cahê na amji to putwry to incrêjirõ pê ma amji jaxàr, hũrkwa wỳr.

Jowãw pê me cumrãr catê pỳm xà

⁵⁷ Mã hamre, Ixapewkwỳj mã ihkra pỳm xà jõ amcro kamhàhhuc, mã cumã ihkra pỳm. ⁵⁸ Mã cahê na amehkrì catêjê me, me hũkjê me, cute Pahpãm te Ixapewkwỳj to amji kam hapac xà impejti na me harèn par. Mã hamre, mehcunea ame hakry, Ixapewkwỳj mea mã.

⁵⁹ Mã ihkra xũmre ita na amcro te òjtõ, mã hamre cute me cumã haprỳ jõr xàa kam hàhhuc, ne hanea ne cute mempy kà incirre ne me hitep xàakam hàhhuc. Pê me cupê Juta catêjê incaca xà ita ajteare mã me cumã. Pê ajco me cumã ihkra xũmre ajhu, pê ajco me cumã impy kà jakep, mehcunea te me cupê Juta catêjê na me hahkre pej prãmte, nãmriajteare mã me. Mã hamre, me cumã hũm japrỳ pê Xacarij xãm prãm. ⁶⁰ Mã inxi me cumã:

— Hamreare, hamreare, quê ha haprỳ Jowãw — hane.

⁶¹ Mã me cumã:

— Hamreare, gũkjê nõ japrỳ te Jowãw nare — hane.

⁶² Mã cute hũhkra to hũm cukij, haprỳ jũ ri cumã hõr prãm. ⁶³ Mã Xacarij te ihhõc xà na hàhwỳr, necute kam ihhõc to hajỳr he: “Ỗhỹ, haprỳ te Jowãw” hane. Mã hamre, mehcunea krã pictor. ⁶⁴ Me ajkaam mã hacpỹa mã Xacarij teihcakõc kam ihtêm, ne Pahpãm mã ihcakõc, ne cute Pahpãm peajna cumã harèn. ⁶⁵ Mã cahê na mehkrì catêjê cunea mã ampeaj kampa cati. Mã hamre, apu harèn xà ita cahkũm, Juta jõ pjê kam, kënti jõ pjê ata cunea kõt. ⁶⁶ Mã mehcunea te me ita par atajê, ita to pit mã ame amji kampa, ne ahna me amji cukij, ne me amji mã:

— Pỳhàpà, jũ mã mõrmõ quê ha hũmre krare ita ajte? — hajỳr. Ampo na mã ame amji cukij to hane? Pê hirã pê hũmre krare ita kamPahhiti carõt catia na pê.

Pê Xacarij Pahpãm jarkwa kôt harê

⁶⁷Mã Xacarij pê hũmre krare ata me hũm, hacpÿa mãihcakôc. Ne Pahpãm Carõ Pejti jarkwa kôt cute hacpÿa mã Pahpãm to hũjarên kam ihtêm, ne harên to:

⁶⁸“Hacme, ne me pajõ Pahhiti to me awjarê,
por Pahhiti catihti ne impejtipê me papê Juta catêjê Pãm Catihti ata
to me awjarê. Ỹhỹ, Pahpãm te mepahtehcajpar prãmte cator,
ne cute pahte me to ihcupan xapê me pahto cator.

⁶⁹Pê Tawi xwÿ pê Pahpãm mã hãpên catê,
mã Pahpãm teihtãmxwÿ tãmxwÿ nõ,
cute me pahkên pê me pahtohapõj catê na hãm,
mã ampeaj kam carõt tÿj.

⁷⁰Ne pê ramã rÿ pêa mã Pahpãm ita jarê.
PêPahpãm jarkwa to me cumã ihcakôc catêjê impejti atajê
harkwa na ahna mehhôc pa.

Ne pê Pahpãm jarkwa na mehhôc catêjêajco ita to me hane.

⁷¹Pê Pahpãm me pahcurê xwÿn pê me pahto cator xà to hane,
ne me pahcurê xwÿn carõt pê me pahto hapõj pa.

⁷²Pê Pahpãm me panquêtjê mã
jũ caxuw cute me caprĩ to cator xà ata to awjahkre.
Ne me cumã awjarê,
mãr quê meto amji japackrea rũm me ipa,
ne nee jũ caxuw me tohacac kêt nare.

⁷³⁻⁷⁴Pê Pahpãm me panquêtĩ Aprãw xwÿ mã ita to awjahkre,
neto awjahkre tu.

Ne ampeaj kam cumã harê,
quê ha me pahcurê xwÿn têtete pahto põj pa.

Cu ha me Pahpãm mã me apê,
ne nee ame pahcurê xwÿn cupa nare.

⁷⁵Ne cu ha Pahpãm mã me pajapên catêjê na ame papa.
Ne catyt kam ame papa,
ne me pancaca xà impeaj to amji kam mepajapac to me papa,
ne ahna Pahpãm krac ri mepajamre.

⁷⁶Ỹhỹ ikra, hamre,
ca ha jũ caxuw Pahpãm me hirôa pêcatia ita jarkwa kôt acakôc catê
na apa,
ne ca ha tẽ ne me pajõ Pahhiti cator xwÿjrea na apucarã pa.

⁷⁷Ca ha me Pahpãm krac ri me ipa atajê mã me awjarê,

quê ha Pahpãm nee mam cute ame to kên xà ton ata to amji japackre nare,

ata kôt quê ha Pahpãm mehkên pê me to pøj pa.

⁷⁸⁻⁷⁹ Me Pahpãm jàhcaprĩ cati, ne cupê me pamã impej pit toncatê, cwÿrjapê quê ha me pamã hàhcujro gõ.

Cu ha me pahte amji kam me pajapac xà impejti pupu, ne catyt kam mepapa,

ne me pampej pëa mã mepapa.

Ne me pamã pahtyc cupa itajê,

quê ha Pahpãm me pahpupu ne me pamã incaca xà gõ,

cu ha nee ame pahtyc xà ita cupa nare, necama me pahcaxwãm pê me pahcarĩcti na me papa” hane.

⁸⁰Mã hamre, Xacarij kra xũmre ita ihkà to mõ, necarôt tÿj to mõ. Ne pê hanea ne cute amji kam hapac xà cati ne impej to mõ. Ne ramã ihkàa kam pëpõti kam me hamreare ata kam ihkrĩ. Necormã Juta catêjê mã amji to ajpê.

Jeju pÿm xà

2 ¹Caku ata kam, putwÿr atajê nõ na, pê pjê cunea jõ pahhiti japÿr te Xexa Aguxô ita harkwa ta, mehcunea mã, por hõ pjê kam kriatajê cunea kôt, quê mehcunea me amji japÿr nõr pa, ne me amji cahyt, ne me hàhtô na me amji jahkre pej. ²Ne pê mam ramã me amji cahyt, pê Xiren pê Xiri jõ pjê to ihhimpej catê ata kam, pê mamme amji cahyt pyxit, ne me hàhtô na me amji jahkre pej. ³Mã hamre, mehcunea te me amji japÿr nõr partu, ahpyãre na me hõ krĩa kam, menquêtjê ihpÿpÿm xàa kam.

⁴Ita cwÿrjapê ri Joje pê Hípõjajo jõ pjê kam, Naxare jõ krĩkam, ihkrĩ catê, na ri ma Juta jõ pjê wÿr, Pãw jõ krĩ ata wÿr tẽ. Ampo na? Pê curia inquêt xwÿ pê pahhi Tawi xwÿ ihpÿm, ne cupê ihtãmxwÿa, na ri ma Pãw jõ krĩ wÿrtê, hĩxi Marijkwÿj me. ⁵Ne cute me amji japÿr xir. Ne pê ramã mehikwa na me ajpën pa. Mã ramã Pahpãm CarõPejti to Marij tictu. ⁶Ne pê cormã Pãw jõ krĩ kam ame mõr reria mã, ramã cumã ihkrapÿm xàa kam hàhhuc. ⁷Ne cumã ihcãmter pÿm, mã cute cupêhkà toihcupu, ne pĩ po te crat kam ampo jàpàn xà ata kam hir. Ampo na? Ramã mehàhhuc xà cunea te hipu partu, ita kam, jũ ri quê me ahtwÿ? Cwÿrjapêri ampo jũrkwa kam me hõt.

Pê carà cahàcre jamãr catêjê Jeju pupu

⁸Mã pjê ata kam, carà cahàcre jamãr catêjêhõtpe ame hamãr to me ipa. Ne amcro mecaxwa kam, hõtpe ame to ipa. Ne caxwa ri, pjê ata kam, põ pê ame hamãr to ame ipa. ⁹Mã ihprõt pê Pahpãm jarkwa to imprar catê cator, cõjkwa pĩn. Mã hàhcujro pê Pahhiti jàhcujro impejti ata hàhcujro

pyrentu, ne ipu na hàhcujrohti, ne ihpràti. Mā cute me hõmpun ne me cumã hūpaa tohūpa. ¹⁰Mā Pahpām jarkwa to imprar catê me cumã:

— Nee ame icupa nare.

Wa ite me amãijūjarēn pejti to prām to, wa me awÿr icator.

Ne wa ha me amã awjarē, ca ha me ijūjarēn xà ita kôt, caha me gakry, quê ha ampeaj kam mehcunea mā amji kīan to amji kīn, me cati me, mehkryjre me, quê ha mehcunea mā amji kīan to amji kīn.

¹¹Yhÿ, ita kam, caxwa ita kam, me gō Pahhiti pê me akên pême ato hapôj catê pÿm, Tawi xwÿ jō krī kam.

Ne cupê, por pê Pahpām meamã to awjahkre ata.

¹²Ne ampeaj kam ca ha ita kam me hõmpu.

Quê ha ahkrare xūmre nō cupêhkà ihcupu, ne ampo jàpàn xà kam nō, ca ha hÿrmãme acato ne me hõmpu, ne me hahkre pej — hane.

¹³Mā hamre, ihprôt pê cōjkwa rūm Pahpām jarkwa to memprar catêjê jàhtôa nehipēr me iwryc, ne me hÿrmã me cator. Ne cōjkwa kam mehkri catêjê pê me pajō Pahhiti jarkwa to memprar catêjê itajê te me Pahpām na mencrekam mehtēm, ne increar kam me harēn to:

¹⁴“Quê ha cōjkwa kam mehcunea jirôa pê Pahpām pejti ne cati na me harē.

Ne pjê kam, quê ha Pahpām me to impejatajê, quê ha me caxwām pê mehcarīcti ne” hajÿr.

¹⁵Mā hamre, Pahpām jarkwa to memprar catêjê hacpÿa mā cute me amji jaxàr, ne me hàpir, cōjkwa wÿr. Mā carà cahàcre jamār catêjê, hakàn pê ame amji mā harē, ne me amji mā:

— Hacme, Pãw jō krī wÿr, ne Pahpām te me pamã ampo jarēn xà ita pupu — hane.

¹⁶Ne ma me hūjarēan kam me pra, ne ame hapê, neJoje me Marij wÿr me cator, ne cute mehkrrare pupun, mãampo jàpàn xà kam nō. ¹⁷Mā cute me hõmpun, ne ma me pra ne mehcunea mā, Pahpāmjarkwa to memprar catêjê te me cumã ahkrare jarēn xà ata jarēn to me mō. ¹⁸Mā hamre, mehcunea te mempar atajê te amji mā me ipikrar, ne me amji mā:

— Pÿhàpà? — hajÿr. ¹⁹Mā Marij apu carà cahàcre jamār catêjê atajê tecumã ampo jarēn xà atajê cunea to apu amji japackre, neto amji japackre ita na. ²⁰Mā ma carà cahàcre jamār catêjê te amjijaxàr, ne ma me Pahpām pejti, ne catihti na me harēn to me mō. PomPahpām jarkwa to imprar catê te me cumã hūjarēn xàatajêa na, cute me hõmpun, mā ahnaa. Na ri ame hakry nema Pahpām pejti na me harēn to me mō.

Pê Jeju mã me haprÿ gô

²¹Mã ramã ihkrare ata na amcro te ôjtô, mã cute mempy kà incirre ne me hitep xàa kam hàhhuc, mã cute me cumã haprÿ jôr, ne me cumã Jeju. Ne haprÿ ita pê Pahpãm jarkwa to imprar catê cormã jêt nare kam, Marij mã harê.

Pê Pahpãm mã me Jeju gô

²²Ne ita jirô pê mã ri ahna putwrÿ pyxit, mã cute me ipijacri xà to hamre xà jô amcro kam hàhhuc. Mã caxuaw ma Krîpinkrên wÿrme ihkrare ata to me mô, Pahpãm to cute me amji kam hapac xà jûrkwa wÿr. Ne me to cator, ne cutePahpãm mã me ihkrare xûmre ata pêr ne me cumã:

— Atea ri me imã me ikra ita jôr, ne cupê atekjêa — hajÿr. ²³Ampo na ri cute me to hajÿr? Pê rÿ pêa mã PahpãmMojxe xwÿ kôt Juta catêjê mã harkwa ta, ne me cumã:

“Mam me akra xûmre me hapôjatajê cunea pê itekjê” hane.

Pê Pahpãm jarkwa na mehhôccatêjê me ita pa, ne ahna mehhôc pa. ²⁴Mã cute me Pahpãm mã me ihkra pêr, ne harkwa kôt me ipijacri xà tome hamre xà caxuw, cute me Pahpãm mã tutti into to me ipijakrut ne me hôr.

²⁵Ûhÿ, pê Krîpinkrên kam hûmre japrÿ te Ximãw ita ihkrî. Ne ampeaj kam impej, ne ihtÿj ajco Pahpãm kampa, ne to amji mã ihhimpej. Ne ajco Pahpãm te Juta catêjê kêntête me to pôj xà jô amcro ata jikaj. ²⁶Mã Pahpãm Carô Pejti apu Ximãw cahê na mô, ne pê ramãXimãw mã ihtyc xà nare to awjahkre ne cumã:

— Ca ha xaa, por pê Pahpãm Jutacatêjê mã mehkên pê me to hapôj catê toawjahkre ata pupu, jirô pê ca ha cormã ty — hane. ²⁷Ne Pahpãm Carô Pejti te Ximãw japrôr ne ma to mô, Pahpãm to me amji kam hapac xà jûrkwa wÿr. Mã Joje me Marijhanea ne ma curi me ihkra pê Jeju to me mô, cute me Pahpãm jarkwakôt me ipijacri xà to me hamre xà wÿr, ata wÿr. ²⁸Mã Ximãw te me hõmpun, neiha kam ihkrare ita pÿn, ne Pahpãm mã harên pejti, ne cumã:

²⁹⁻³⁰ “Hamre, ijô Pahhiti,
pê ca ito gÿjahkre xà ataramã kaam hàhhuc.
Ne pê ca ito gÿjahkre xà ata naate ton, wa ite hõmpun.
Ne atea ca me iwÿr me ikên pê meito hapôj catê ita kujahêc,
wa ite ito jãa to hõmpun.
Ûhÿ, ipê amã ijâpên catê,

ne hamre, ramã iwej, neicaxwãm pê icarĩcti,
ne gapacta ne ityc na ito tojnõ, wa ty.

³¹⁻³³ Ne ca ate mehcunea kam mare mã
me ikên catia pê me ipytâr catê ita me iwÿr ihkujahêc.
Na quê ha pjê kam mehcunea mehkrĩ atajê mã hàhcujro catê na ipa.
Ne quê ha me cumãmemepejti to hahkre,
quê ha mehcahkrit atajê,
por me cupê Ixaher catêjê nareatajê mã hanea ne ato ajpê,
mãr quê me hanea ne me gahkre pej.
Ne quê ha hanea ne me akwÿ pê Juta catêjê pêIxaher catêjê mã
impejti ne.
Quê ha mehcunea me akwÿ jarênpejti to me harê” hajÿr.

Mã inxi me hũm te Ximãw te ihkra toihcakôc xà ata na mempar, ne to
amji mã me ipikrar. ³⁴Mã Ximãw te mehcajrên, ne Marij pê Jeju menxi
mã:

— Pãhpãm te akrare increire ita capi.

Ne quê ha akra ita Jutacatêjê jõ pjê kam me hàhtôa to hõkre nõ, ne
me to hamre, ne hanea ne me hàhtôa kwÿ to ihkã, ne me to impejti
ne, ne mamehkên pê me to hapôj.

Ne Pãhpãm te ri akra ita kujahêc, mãr quê me cumãPãhpãm cawpa.
Ne quê ha me hàhtôa ne ahna amehcakôc kên, ne ame curê.

³⁵ Ita kôt quê ha me hàhtôa mã cute amji kam hapac xà pê.

Pom amji caxwãm pê cute me amji kam hapac xà to me ipimxur to
ipa prãmti atajê to, quê ha mehkwy mã ajpê.

Ne ca, quêha amã apec xà catia to cati, ne ajkam gapac xà hyre nare.
Quê haamã hà pê ihhêj rũm wapo xwahhihti te ana cuhkõnre jitep,
ne hà.

Hõhõ, ita na quê ha ana cuhkõnre kam amã hà — hajÿr.

³⁶⁻³⁷ ÿhÿ, pê hanea ne curi cahãj wejti japry te Anakwÿj ita apuipa. Ne
Pãhpãm to me amji kam hapac xà jũrkwa kam apuipa. Ne cupê Paner
xwÿ kra, ne cupê menquêtti Axer xwÿtãmxwÿ tãmxwÿ nõ. Pê hikwa
tuw ne ahna caku xet, pêcupê impjên ihhi. Hamre, pê apu increcer ipa,
necormã ahna apu ipa, pê ramã ahna caku ôjtênta ne ihkôt cute cwat,
ne ramã ihwejtu. Ne pêcupê Pãhpãm jarkwa to me cumã ihcakôc catê,
ne rÿ jũ caxuw Pãhpãm to me amji kam hapac xà jũrkwa pê cator nare.
Ne amcrome, caxwa me, pyt cunea kam ipijacri to ipa. Ne ajco ipijacri
kam, Pãhpãm to amjikampa ne cumã ihcakôc to ipa. ³⁸Mã Ximãw cormã
apu Marij mã ihcakôac kam, mã me hÿrmã Anakwÿj ata cator, ne cute
mehkra ata pupun, ne Pãhpãmmã hÿrên hakryti na amji jarên pyrentu.

Ne ihtỳj cute, por Krĩpinkrên kam mehkřĩne me Pahpãm te mehkên tête me to pøjcatê to me cumã hũjahkre, mã me hikaj atajê mã, harên kam ihtêm.

(Ita ri pê Ruc Jeju pỳm na harên jicu. Pê Matew hõ kàhhôc kamhanea ne Jeju pỳm jarên to hane he.)

Matew 2.1-23

Pê mehkřã kreti kwỳ Jeju pupun prãmte me cato

¹Pê Juta jõ pjê kam, Pãw jõ krĩ kam Jeju ihpỳm. Pê caxuawHeroti pê Juta jõ pjê to ihhimpej catê. Ne amcro ata kam me hũmre krã kreti te amji jahkre pejti kwỳ ajco me caxêre cunea te amji kamhapac xà to me hahkre to me ipa. Ne cute me pyt japôj xà rũm, Juta jõ pjê kam, Krĩpinkrên wỳrme caxêti pupun, ne maihkôat pyt cjêj xà wỳr me pra. Ne krĩ mã me cator. ²Ne curia amehkrĩ catêjê cukij ne me cumã:

— Jõ ri mormõ jũm krare pê Juta catêjê jõ pahhi ata pỳm? He waite ihmat ri pyt japôj xà rũm, me ijõ pjê pĩn, ite me hõ caxêti pupun, na wa ajpên ite amehkĩn, ne amji mã hũpahti to prãmte hỹrmã me pra — hane.

³Mã Heroti pê Juta jõ pjê jõ pahhi ata te me hũjarên xà ita par, ne ampeaj kam, jũm te hũhhyr ne haxà kam pahhi na hãr na, cumã hũpa. Mã curia mehkřĩ catêjê cunea mã, pahhi ata te me kam incryc cumã hũpa. ⁴Mã cute Pahpãm mã mehcajrên catêjê jõ pahhi me, me cumã Mojxe xwỳ te me hapackre xà to hahkre catêjê te me cuprôn, ne pahhi pỳm xà na mehãhcukjêr to:

— Jõ ri quê ha Crixto pê pahhi na Pahpãm te capi ne ihkujahêc itaihpỳm? — hajỳr. ⁵Mã cute me cumã harên to:

— Ita ri Juta jõ pjê kam, Pãw jõ krĩ kam ri ihpỳm xà. Ampo na? Hepê ramã Pahpãm jarkwa to mehcajêc catêjê Pahpãm jõ kàhhôc kamita na mehhôc to me hane he:

⁶“Pãw jõ krĩ, acrire cakrô,
krĩ cuneaajirôa pê acati.
Ampo na?
He akaam ri me ijõ Pahhiti cator xà.
Ne quê ha cato,
ne me ikwỳ pê Ixaher catêjê cunea to ihhimpej,
ne me hamã” hane — hajỳr.

⁷Mã aracri Heroti te pyt japôj xà rũm me hũmre krã kreti me mõ atajê na hàhwỳr, ne cute me ajpên par, mã cute caxêti na mehcuikij to:

— Jũ caxuw mã caxêti ata cator? — hajÿr. Mã me cumã:

— Caku pyxit jirôa pê ri ramã cator — hane. ⁸ Jirô pê mã ri cute Pãw jõ krĩ wÿrmehkujahêc, ne me cumã harkwa hêj xia hyr to:

— Ca ha me pra ne jũm krare ita na me acato, ne me imã harên par peaj ne. Mãr wa hanea ne me acuxà hõmpu, ne itÿj amji mãhũpa, ne imã ihkĩnti ne — hajÿr.

⁹⁻¹⁰ Mã cute me pjê jõ pahhi ata jarkwa par jirô pê mã ma me pra, ne pry kôt hipêr cute me pyt japôj xà rũm caxêti ata pupun. Necute me caxêti pupun xà ata pyrênampeaj kam me hakry, ne me cumã amji kĩn. Mã caxêti ata me cumam tê, ne Marij ikre kam ihkra to hÿr xà atacwÿrpê hàhhuc. ¹¹ Mã ikre mã me hàr, ne cute me Marij me ihkra ata pupun, ne cute amji mã me hũpahti na amji to me ipipêprãmte, cuna mã mehkôn krã na me hÿr. Ne me cumã mehkĩnti na me amjijarên jirô pê, cute me cumãampo cjên xà jihê mên, ne me cumã me ampo pejti jôr xà atajê jôr. Atajê pê wakÿre prã tepti pê ôr me, ampo jacrô cuxwati ata me, ampo pêpĩnhôc pê rãm jin pyrãc, ne cuxwati ata me. Ne ampo atajê cunea na hijãhwÿar to hàhwÿr.

¹² Mã caxwa ata kam Pahpãm te me hôt kam me cumã hũjarên, ne me cumã:

— Me apê pyt japôj xà pĩn me acator catêjê, ca ha nee hacpÿ mãHeroti pê pjê jõ pahhi ata wÿr me amji jaxàr, ne me cumã ahkrare nõ atajarên nare — hajÿr. Cwÿrjapê ri me hõpjê wÿr, ma pry nõa kôt, cute me amji jaxàr.

Pê Ejit jõ pjê wÿr me cuto

¹³ Mã me hõmpun catêjê, ma ramã memprar jirô pê, cõjkwa pĩnPahpãm mã memprar catê nõ te Joje jõt kam cumã ihkra to hũjarên to:

— To jÿ ne gĩxi me ihcãmter to atêm pyrentu, ma Ejit jõ pjê wÿr, ne curiame ahtwÿ ne me akrĩ. Wa ha pa jũ caxuw ate me amji jaxàr xà to meamã awjarê! Ampo na? Nee mã ampo na nare. Pjê jõ pahhi pê Herotiihtÿj apu ahkrare ita japê, cute ihcuran prãmte — hajÿr.

¹⁴ Mã Joje jũjarêan kam hÿr ne cute ihkra impÿn, ne ma caxwaa riinxi me, Ejit jõ pjê wÿr me to tê, ne amcro nõa na curi me cator. ¹⁵ Ne curia me hàhhuc ne mehkri, ne curi mehkri ita na mã me ahnaaHeroti tyc, mã cormã hacpÿ mã, cute me amji jaxàr. Ne pê rÿ pêa mã ramã Pahpãm jarkwa to ihcakôc catêjê Jeju na, me hõ kãhhôc kam, mehhôc ata harên to hane he:

“Ite, por Ejit jõ pjê kam apu ikra mõ ata na, ijãhwÿr” hane.

Pê ihkãhhôc kam ahna mehhôc xà ata na pê hane.

Pê Heroti me ahkrare jipej

¹⁶ Mã Heroti te pyt japôj xà rũm cute amji jahkre pejti te caxêti pupun catêjê te mempar nare na, me hahkre pej, ne ame kam incryac to me kam incryc. Ne cute hõ krãhtaremã ahkrare xũmre curan na harkwa hyr to:

— Ca ha Pãw jô krĩ me, krĩ ajpẽn cahi naihcuhê atajê cunea kôt me ahkrare xũmre na caku pijakrutnare atajê cunea curan to me mō — hajÿr. Mã harkwa kôt cute me hipej. ¹⁷Ne pê Jeremij pê Pahpãm jarkwa to ihcakôc catê ata ramã rÿ peamã ita jarẽn to hane he:

¹⁸ “Quê ha krĩ ata kam ame amrãhti.

Quê ha pyjê cunea amehkra japê xà toamencwÿr to me ipa kam me to incrà tu.

Ne tee ame hõhtÿj to prãm.

Ampo na?

Nee mã ampo na nare.

Quê ha me cupê mehkra xũmre cunea me ty, cwÿrjapê quê ha cama amencwÿr to ame ipa” hane.

Mã hũjarẽn xà ata na cute hajÿr.

Pê Ejit pĩn me amji jaxà

¹⁹Mã Heroti tyc jirô pê mã, cõjkwa pĩn Pahpãm mã memprar catê nõte Joje jõt kam hÿrmã cator, Ejit jô pjê kam, ne cute cumã hũjarẽn to:

²⁰— To jÿ ne gĩxi me ihcãmter to ma hacpÿ mã me gô pjê wÿr amji jaxà. Ampo na? He nee mã ampo na nare, ramã, por cuteme akra curan prãm atajê tyc par — hajÿr.

²¹Mã Joje jÿr, ne cute ihkra impÿn, ne ma inxi me, hacpÿ mã me to amjijaxàr, ne me to mō, Juta jô pjê wÿr. ²²Ne cute me Arquirãw pê Heroti xwÿ kra pê hũm jaxà kam pahhi na me harẽn par. Na ri curi me mehkrĩ na me cumã hũpaa to hũpa. Cwÿrjapê ri hipêr Pahpãm te Joje jõt kam Hĩpôjajo jôpjê wÿr me hator. ²³Mã ma harkwa kôt hacpÿ mã Hĩpôjajo jô pjê wÿr cute me amji jaxàr. Ne curia hipêr Naxare jô krĩ kam mehkrĩ. Ne pê Pahpãm jarkwa to ihcakôc catêjê nõ ramã rÿ pëa mã Pahpãm kra pê ahkrare ata jarẽn to hane he:

“Naxare jô krĩ pĩn pê cato” hane.

(Pê Matew Jeju jarẽn to hane. Pê Ruc hanea ne hõ kàhhôc kam harẽn kam to incrà to hane he.)

Pê Naxare jô krĩ wÿr me amji jaxà

³⁹Mã hamre, Joje me Marij te me Pahpãm te amji kam hapac xà cunea tonpartu, ne ma ihkra me, cute me hũrkwa wÿr meamji jaxàr, Hĩpôjajo jô pjê wÿr, Naxare jô krĩ kam. ⁴⁰Mã ihkra ita ihkà to mō, ne carôt tÿj to mō. Ne ampeaj kamcute amji jahkre pej cati. Mã Pahpãm te to impejti.

Pê Hũm Cati jũrkwa kam Jeju ahtwỳ

⁴¹Ýhỹ, pê caku cunea kam Jeju hũm me inxi ajcoKrĩpinkrên wỳr me ipa, me Hakren xà jõ amjikĩn wỳr. Ne me hõ amji kĩn ita pê, por pê Paphãm Ejit jõ pjê pêmam menquêtjê to cato ata.

⁴²Mã hamre, ramã Jeju na caku te tõi, mã hanea nemehkõt amji kĩn ata wỳr mõi, ne cator. ⁴³Ne ramã amji kĩn jamre jirõ pê, cute meamji jaxàr, me hũrkwa wỳr. Mã xãmte aracri Krĩpinkrênkam Jeju jàhhuc. Mã nee hũm me inxi te hàhhuc xà ita na me hahkre pej nare. ⁴⁴Ne ihtỳj me hàhtõtĩ atajê kõt cute amji jaxàr naamehcãmji. Ne ihtỳj cute me mõi to pyt, ne cormã ne, nee mehapên nare, ne ma me hũkjê me, mehõ ihkwỳ nõ catêjê kõt ame hapê. ⁴⁵Ne nee cute me cumã cator nare, na ri ma cute me amjijaxàr, Krĩpinkrên wỳr, cute curi me hapên prãmte.

⁴⁶Ne me ahna amcro incrê jirõ pê mã ri cute me Jeju cajpar, Paphãm to me amji kam hapac xà jũrkwa kam. Mã Jejuihtỳj me cumã ampo to hahkre catêjê jipõc ri jỹ, neame kampa, ne amehcukij. ⁴⁷Mã mehcunea te Jeju te amji jahkre pejtĩ to me cumã ihcakõc atajê to amji mã me ipikrar. ⁴⁸Mã inxi me hũm te me hõmpun, mã inxi cumã:

— Ikra, ampo na mã ate me itohajỹr? Ate me ijigêc hyr, na wa apãm me apu gapên tomõ — hajỹr.

⁴⁹Mã Jeju me cumã:

— Ampo na mã ca ame ijapê? Pomwa ita ri Inxũ Cati to me amji kam hapac xà jũrkwa kam jỹ, ne hãpên xà to apu cumã apê ita? — hane. ⁵⁰Mã nee hũm me inxi te me hũjarên xà ita kam hapac, ne kam me amji jahkre pej nare, ne mecupê hahkre kêatre.

⁵¹Mã ma Jeju te mehkõt amji jaxàr, Naxare jõ krĩ wỳr. Ne pê ihtỳj ajco hũm me inxi kampa. Na pê inxihtỳj ampo itajê cunea to amji japackre to ipa.

⁵²Pê Jeju hĩ to ipicamên to mõi, ne ajco ihkà to mõi, ne hanea ne ihkrã kre te amji jahkre pej to amji kà to mõi. Ne pê mehcunea mã ihkĩn, ne hanea ne cõjkwa kam Paphãm jỹ ita mã ihkĩn.

Pê Jowãw pê mehcumrãr catê awjarẽ

3 ¹Ýhỹ, caku jãhtõa jirõ pê, pê Tiperij ata pê Roman catêjê jõ pahhiti, ne pê ramã ahna caku quĩxi, pê hanea neJuta jõ pjê kam Pirat pê pahhi. Pê hanea neHĩpõjajo jõ pjê kam Heroti pê pahhi. Pê hanea neHeroti tõi pê Pirip pê Iturij jõ pjê me Taconiti jõ pjê kam pahhi, ne Rixin pê Apirên jõ pjê jõ pahhi. ²Pê hanea ne Anati me Cajpa pê me Paphãm mã cutemehcajrên catêjê kwỳ jõ pahhi.

³Ýhỹ, pê cormã Jowãw pê Xacarij kra ata, ahkêt kam ihkrĩ, põtĩ kam me hamreare ata ri. Pê amcro atana, Paphãm Jowãw mã harkwa ta, quê Cõpijapjêr jõ cõ kõt cute me ihcajpar atajêmã harkwa jarẽ. Pê Paphãm jarkwa kõt harên to hane he, ne me cumã:

— Me akên mã hikra, ne amji tète me ate amji kam me gapac xà kên jūrê, wa ha ahna cute me gahkre pej xà na cô kam me acumrã, quê ha Pahpãm me akêto hapac kêt, ne to tojnõ ne me amã to impej — hane.

⁴⁻⁵Ne pê hanea ne Jowãw me cumã Ixaj xwỳ pê Pahpãm jarkwa na ihcakôc catê ata jõ kàhhôc cahyt. Ne me cumã cahyt to hane he:

“Ỡhỹ, põtì kam me hamreare ata ri jũm apu caràr to mỗ, ne apu hũjarẽn to hane he:

‘Pom ca me pry kên to impej prãm
ne atỳj me hituw cunea to me hipu pa,
ne me hakôtçunea pên pa,
ne pry jikôtì atajê,
ca ha hanea ne me to ihcuhtac pa,
ne pry kên kam kre atajê,
ca ha me to impej ne me to increcer pa.

Ita jìkjê na,

ca ha me ate amji kam me gapac xà kên to mempej,
ne intète me ampo kên cunea to pỏj pa.

⁶Quê ha mehcunea Pahpãm te me akên pême ato hapỏj xà ita na,
me gahkre pej’ ” hane.

⁷⁻⁸Mã hamre, me hàhtôa ne cute me Jowãw cajpar, cute cô kam mehcumrãr prãmte. Ne cute mehcunea mãharẽn to hajỹr he:

— Ỡhỹ, me apê cagã kên kra kwỳpyrãac! Mã ihhêj ne jũm te me amã ite cô kam meacumrãr xà na ijarẽn. Wa xwahna ite me acumrãr xà ita kôt, ca ha xwahna Pahpãm te ameato kên xà ata pê me acato. Hamreare, cute ahna hajỹr xà nare! Ca ha xa me akên ton jicu, jirỏ pê mã wa ha cormã cô kam meacumrã. Ne me apê pìxỏ pàr kam hô impej nare ata pyrãac, ne ca ha xaa me amjikampa, ne me apej wỳr me apkjê, ne me kam mare mã me akên jicu, ne atỳj me akên pê me acato. Hỏhỏ, quêt cute hajỹr. Ne nee ca me amji mã: “Aprãw pê me panquếtì, incwỳrjapê ri hũne mã me papê Pahpãm na mehkwy, ne jũ wỳr quê Pahpãm mehkwyã nỏ to kên” hajỹrnare. Ampeaj kam wa me amã awjarê. Nãmri nee Pahpãm me ana prãm nare, he quê te me apê Aprãw tàmwxỳ tàmwxỳ cacrỏ, quêihtỳj ame ato kêanre ne. Quê Pahpãm Aprãw tàmwxỳtàmwxỳ na prãm na mã, quê ha ramã kên apu krì itajênỏa to Aprãw tàmwxỳ na mehkwy. Cwỳrjapê ca nee me amji mã hajỹr nare.

⁹— Ỡhỹ, he me apê pìxỏ xỳhti atajê pàr pyrãac. Co he! He ramã ihhêj ne wakỳte harê Jakep xà ata na hàhtêp. Ne pìxỏ pàrkêanre atajê cunea kam hô impej nare atajê, quê hahitep ne cuhy kam me haxwỳ — hane.

¹⁰Mã cute me Jowãw cukij, ne me cumã:

— Měr hỏhỏ, ampo to wa ha ajte me? — hajỹr.

¹¹ Mã Jowãw me cumã:

— Me anõ mã hitô kà pijakrut ata, ca ha jũm pê hamreare ata mã ihnõ. Ne hanea ne me anõmã gã ata, ca ha me cupê hamreare atajê mã toajcokjê — hane.

¹² Mã hanea ne pahhi mã me hũhkra kam me hãmcwÿrcatêjê cator, ne cute me Jowãw cukij, ne me cumã:

— Hàpà, me to ihmipej catê, ne me pa, ampo to wa ha me? — hajÿr.

¹³ Mã Jowãw me cumã:

— Ca ha nee gã pahhi jarkwajirõa pê me hũhkra kam me gãmcwÿr nare — hane.

¹⁴ Mã hanea ne krãhtare kwÿ cator, ne cute mehçukij, ne me cumã:

— Ne me pa, ampo to wa ha me? — hajÿr. Mã Jowãw me cumã:

— Hã, ca ha me hane he, ca ha nee megãprêa kam me cupê ihpore to pøj nare. Ne nee ca hamehçukij catê cuna mã jũm to ame ahêj nare. Ne ca hame gãmcwÿr xà ata pyrên me gakry — hane.

Pê Jowãw nee cupê Mexij na me cumã amji jarên nare

¹⁵ Mã mehçunea ramã me Pahpãm te jũm catihtu impejti ata kujahêc prãm ata jikaj, na ri ihtÿj ame Jowãw cãmji, ne me amji mã:

— Pÿhàpà, cõt mã pê Jowãw ita to Pahpãm awjahkre? — hane. ¹⁶ Mã Jowãw mehçunea mã amji jarê ne me cumã:

— Hamreare, quê ha cormã jũm ita cato, ne jũm ata rijirõa pê cati, ne ihkĩnte icrire. Jũ wÿr wa icrire ita kam cupê hõparkà to pøj. Ýhÿ, wa ha cô cacrõ to meacumrã, quê ha cormã jũm catihtu cato ata, quê ha quêtormã Pahpãm Carõ Pejti me, cuhy kam me acumrã. ¹⁷ Co he, nãmri me apê arÿjhy pyrãac. Na quê ha ihtÿj ajpên pê me ato haprã. He ihhêj ne ramã hũhkrakam cumã crat cute kam arÿjhy ata carêr xà caxuw. Quê ha kam ihcarê, ne ihhy caxwÿn to cuprõ, ne huwahi, ne ihkrekà to cuprõ ne cuhy kam haxwÿ, quê ha to capa. Ne cuhy te to caxàr xà ata, quê ha jũcaxuw ihtyc nare. Ne quê ha ihtÿj me ato hane — hane.

¹⁸ Hõhõ, pê Jowãw hane, ne ajco me hapackre ne me cumã awjarê. Ne me cumã hũjarên xà itajê jãhtõa to hàhtõ, pê ajco me cumã harê. Ne ajco me cumãmehkên pê me hapøj xà to hahkre.

Pê Heroti Jowãw pro

¹⁹ Ýhÿ, pê hanea ne Jowãw pjê jõ pahhi pê Heroti ita mãn kêanre. Ampo na? Pê Heroti ihkên ton to hàhtõa, ne ihtõ pê hĩxi capa, ne cume hikwa, cwÿrjapê pê Jowãw cumãn to kêanre. ²⁰ Pê hamre ita cwÿrjapê Heroti mam cute to kên xà ata jirõa pê to kên, ne Jowãw na harkwa ta, pê me Jowãw pro, ne mehacjên xà mã me haxà.

Pê Jowãw Jeju cumrã

²¹ Ýhÿ, cormã cute me Jowãw jaxàr nare kam ri mehçunea mã awjarê, ne cô kam me cumrã. Mã hanea ne Jeju hÿrmãcator, mã Jowãw te cô kam

ihcumrâr. Mã cute ihcumrâr xà ata ri xa, ne Pahpãm mã ihcakôc. ²²Mã hamre, cõjkwa te amji jihê mên, mã Pahpãm Carõ Pejti te tuttina amji ton, ne cupê tutta pyràc, ne ajpên ahpar mã tẽ, ne Jeju na hãm. Mã hamre, cõjkwa rúm Pahpãm Jeju mã ihcakôc, ne cumã cupê Húm Cati na amji jarên to:

— Ỹhỹ, apê ikraa to ikra, ne apê ikra impeaj to impej ata, ne imãakinti, ne apyrên ijakryti — hane.

Jeju quêtjê japrỹ

²³Ỹhỹ, pê ramã Jeju na caku trĩnta pê hàpên xà kam to tẽ, ne Joje kôt Jeju mã menquêtjê japrỹ te hajỹr he, ne ahpyãre na mehkra itajê japrỹpartu. Pê mehcunea ihtỹj Jeju pê Joje kra na amehcãmji. Ỹhỹ, pê Joje pê Eri kra, ²⁴ne Eri pê Matat kra, pê Rewi kra, pê pahhi Merqui kra, pê Jana kra, pê Joje kra, ²⁵pê Matatij kra, pê Amoti kra, pê Nahúm kra, pê Eti kra, pê Naca kra, ²⁶pê Mate kra, pê Matatij kra, pê Xemi kra, pê Jojekra, pê Juta kra, ²⁷pê Jowanakwỹj kra, pê Rexa kra, pê Xoropapew kra, pêXarati kra, pê Neri kra, ²⁸pê Pahhi Merqui kra, pê Ati kra, pê Coxam kra, pê Ermatãwkra, pê Er kra, ²⁹pê Jojuw kra, pê Erixê kra, pê Jorim kra, pê Matatkra, pê Rewi kra, ³⁰pê Ximãw kra, pê Juta kra, pê Joje kra, pê Jonãkra, pê Eriquim kra, ³¹pê Merej kra, pê Mena kra, pê Matat kra, pê Natã kra, pê Tawi kra, ³²pê Jexê kra, pê Opet kra, pê Powa kra, pê Xara kra, pê Naxon kra, ³³pê Aminati kra, pê Atmin kra, pê Arni kra, pê Exomkra, pê Pere kra, pê Juta kra, ³⁴pê Jaco kra, pê Ixac kra, pê Aprãw kra, pê Tera kra, pê Naco kra, ³⁵pê Xeruque kra, pê Racaw kra, pê Parec kra, pê Epewkra, pê Xara kra, ³⁶pê Cana kra, pê Arpaxat kra, pê Xêm kra, pê Nowekra, pê Ramec kra, ³⁷pê Matuxarem kra, pê Enoc kra, pê Jaret kra, pêMarer kra, pê Cana kra, ³⁸pê Enotti kra, pê Xet kra, pê Atãw kra, pê Pahpãmkra. Hõhõ, Joje quêtjê itajê pê me haprỹ itajê hane.

Pê me pajõxwỳn pê Xatanaj Jeju cajpê

4 ¹Mã hamre, Pahpãm Carõ Pejti te Jeju mã amji jõr, neto ihhimpej, mã ma cute Cõpijapjêr jõ cõ pĩn amji jaxàr, ne põ kamme hamreare ata wỳr mõ. Ne Pahpãm Carõ Pejti pê põ mã Jejuto mõ, Xatanaj te ihcajpêr prãmte. ²Ne pom Xatanaj pê me pahcurê xwỳn ita pê Jeju to kên prãm. Mã ramã Jeju te hàpàn nare na amji to amcro to cwarênta, jirõ pêmã ramã cumã prãm to prãm.

³Mã hỹrmã me pahcurê xwỳn cator, ne cute capi. Ne cute Jeju kên mã mên prãmte cumã:

— Quê ha ampeaj kam apê cõjkwa kam Apãm Cati ihkrĩ ita kra na, ca ha atỹj kên itajê mã, quê amã pãw na amji to, ca ha krê — hajỹr.

⁴Mã Jeju cumã:

— Jũ wỳr wa akampa ne ita to hane. Ampo na? Inxũ Cati jarkwa na, hõ kàhhôc kamharên te hajỹr he:

“ÿhÿ, ca ha atÿj me apà,
ne nee megõ to pit mã me amji japackre nare.
Jũ wÿr quê jũm hõ pit to amji to ajpa” hajÿr.

Hõ, cute harën to hajÿr, cwÿrjapê wa ha neeakõt amji kam ijapac nare — hane.

⁵Mã me pahcurê xwÿn te Jeju japrôr, ne ma kën kàhti ata na to hàpir.
Ne cute cumã pjê cunea kam, krĩ cunea jahkre, ne cumã:

⁶— Pjê itajê cunea itekjê pit, ne wa itÿj jũmmã cugõ. Na ca ha xa icunamã akõn krã na jÿ ne ipejti na ijarê, wa ha amã ampo pejtaitajê cunea gõ. ⁷Ca ha ate ito hajÿr na, wa ha amã pjê ita kam krĩitajê cunea jahkre, ca ha ihcunea to ahimpej to apa, quê ha cupê atekjêa — hajÿr.

⁸Mã Jeju Xatanaj mã:

— Jũ wÿr wa ha ato hane. Ampo na? Inxũ Cati jarkwa jõ kàhhôc kam harën te hajÿr he:

“Ca ha apu Pahpãm pit kĩn,
ne amji mã taa pit cupa,
ne impejti na me harê,
neto pit mã me amji kampa,
ne cumã me apê” hajÿr.

Hõ, cute harënto hajÿr, cwÿrjapê wa ha nee akõt amji kam ijapac nare — hane.

⁹Jirõ pê mã ri me pahcurê xwÿn te Jeju japrôr ne maKripinkrên wÿr to mõ, ne me kam mare mã, kÿaj pê Pahpãm to meamji kam hapac xà jũrkwa cwÿrpê hãm, ne cumã:

— Krãa caxi, quê ha ampeaj kam apê cõjkwa kam Apãm Cati ata krana, ca ha ita ri ahpar mã amũ amji to awcapê, ne neeatyc nare. ¹⁰⁻¹¹Ampo na? Apãm Cati jarkwa jõ kàhhôc kam, cute ihkra jarën tohajÿr he:

“Quê ha cõjkwa kam ijarkwa to memprar catêjê ikra jamârto mõ,
ne ma me hũhkra to ihpÿm cupate me to huphê to ipa,
mãr quênee kën nõ ihpar tõc nare” — hane.

¹²Mã Jeju cumã:

— Jũ wÿr wa ha hane. Ampo na? Inxũ Cati jarkwa jõ kàhhôc kam harën te hajÿr he:

“Ca ha neegõ Pahhiti cajpêr nare,
ne nee Apãm Cati capi nare” hajÿr.

Hõ, cuteharën to hajÿr, cwÿrjapê wa ha nee akõt amji kam ijapac nare — hane.

¹³Pê me pahcurê xwÿn pê Xatanaj tee apu Jeju to hahkre, ne apu ihcajpẽr pajirô pê mã, ma cure ne tẽ, ne quê ha ihtÿj jũ caxuw hipêr capi.

Pê Jeju hàpên xà kam to tẽ

¹⁴Pê Pahpãm Carô Pejti Hipôjajo jô pjê wÿr hacpÿa mã Jeju toamji jaxà. Pê Jeju jarên pjê ita cunea kôt apu ihcahkũm. ¹⁵Pê Juta catêjê te cuprôn xà jũrkwa kam ajco me cumã ampoto hahkre. Pê mehcunea ajpên mã me Jeju jarên to:

— Ampeaj kam Jeju te amji kam hapac xà ita pej — hane.

Pê Jeju Naxare jô krĩ kam apu mō

¹⁶Pê Jeju ma Naxare jô krĩ wÿr mō, por pê curi ihkà atari. Ne mehkôt xà jô amcro kam, ma Juta catêjê te cuprôn xà jũrkwa wÿr mō. Ampo na? Pê ramã ita ton to amji pyrãcna pê mō, ne axà ne jÿ. Ne cute Pahpãm jarkwa jô kàhhôc ahÿt prãmte hãm. ¹⁷Mã cute me cumã, por Pahpãm jarkwa to ihcakôc catê atapê Ixaj xwÿ jô kàhhôc jôr. Mã cute ihkàhhôc ita capô, ne porkam ihhôc te hajÿr ata mã cator ne me cumã cahÿt to:

¹⁸ “ÿhÿ, Pahpãm Carô Pejti icahê na ipa,
ne cute icapi,
mãr wa me cupê hamreare atajêcunea mã
Pahpãm jũjarên xà impejti itajê jarê.
Ne me hacjên xà kam mehkrĩ atajê japôj,
quê ha amjiakôt pō pê ame ipa.
Ne mento tũm atajê mã mento to impej, quê merĩt.
Ne mehkwyã te ame to kēanre atajê tehcajpa,
quê cute ame to kên itajê pê me cato.

¹⁹ Wa ha itÿj me cumã ijũjarên xà impejti itajê toawjarê.
Ampo na?

He caku ita kam quê ha mepajô Pahhiti mehkwyê tehcajpa” hane.

²⁰Ne Jeju te cahÿt jicu, ne hacpÿa mã ihkàhhôc itakrã ne hacpÿa ne hamãr catê mã hõr, ne hÿr. Mãcuprôn xà kam me jÿ atajê cunea ampeaj kam me Jeju pupu. ²¹Mã Jeju te me cumã harên kam ihtêm, ne harên to:
— ÿhÿ, me ikampa. Pom ite ita kam ihkàhhôc cahÿt ita, Pahpãm te ita kam amji jarkwa kôt ton — hajÿr.

²²Mã mehcunea te amji mã me ipikrar ne me amji mã:
— Pÿhàpà, ampeaj kam hũjarên xà ita pej, ne Jeju pê hũmreimpej. He cupê Joje kra cacrô, ahnaa hũjarênxà itajê impej — hajÿr.

²³Mã Jeju me cumã:
— Mõrmõ ca me imã: “Por hà caprãr catê ata ihtÿj mehcunea caprã, ne quê ha jũ caxuw hà, quê ha ihtÿj hanea ne taa amji caprã. Ata cuxà ca ha

ita ri, gõ pjêa kam me akwỳ mã ampo pihhoti to, quê mehõmpu. Por ate amji jahkre pejti kôt ramã Capernam jõ krĩ kam ampo ton, wa ite ahna me garẽn par, ata cuxà” hane. Hõhõ, mõrmõ ca me imã garkwa to hane.

²⁴ — Ne ampeaj kam wa ha me acunea mã amji jarẽ. He ihtỳj pjê cunea kam Pahpãmjarkwa to mehcajõc catêjê na me amji to põj, mã ajte mehkĩnte, hõ krĩa kam mehkwyã mã nee ahna me amji caxàr prãm nare. ²⁵⁻²⁶ Me ikam gapac to impeaj ne he. Ampeaj kam pê Erij jõ amcro ata kam, Juta jõpjê kam me cahãj pijapit wej atajê me hàhtõ. Pê hanea ne nee ta iwryc nare to caku to incrê ne ihkõt hĩkjê jirõ pê mã, pèpjê ata kam prãm catia cato. Pê nee Pahpãm mempijapit wej cunea tehcajpar na Erij mẽn nare. Ne por pê Xarep jõ krĩ me, Teppro jõ krĩ kam ihkriata, pyxit peaj ne ihtehcajpar na Pahpãm cumẽ. ²⁷ Ne pê hanea ne Erixêw xwỳ jõ amcro kam, Juta jõ pjê kam, mehkà xètti atajê jàhtõa ne ame ipa. Pê Erixêw neemehkwỳ cunea caprãr nare. Pê hũmre nõ japyr te Namã xwỳ ata pyxit peaj ne ihkà xètti, ne Xiri jõ pjê catêjê ata rũm cato. Pê Erixêwpyxit peaj ne caprã, pê impej. Ata cuxà wa ha nee ita ri, ijõ krĩa kam ampo pej catia ton nare — hane.

²⁸ Mã cute me cuprõn xà kam me jy atajê cunea te Jeju cakõc xàna mempar, ne ame kam incryc. ²⁹⁻³⁰ Ne me hãm, ne cute me Jeju pro, ne põ mã mecupjê. Ne krĩ pê, põ mã me to cator, ne krĩ cahê na hàpkãjti atawỳr me cupjê, cute ahna me mẽn, mã ihpỳm ne ihtyc prãmte. Mã me hàhtõa jipõc ri me hũhkra pècator, ne ma jũ kam tẽ.

Pê hũmre nõ kam me pahcurê xwỳn carõ

³¹ Mã ma Jeju Hĩpõjajo jõpjê ata kam, Capernam jõ krĩ ata wỳr mõ, ne cator ne ame cumã ampo to hahkre, mehkõt xà jõ amcro kam. ³² Ne ampo to hahkre xà impejti to me cumã hahkre. Mã mehcunea teJeju catia to cati na me to amji mã me ipikrar. Ne pê Jeju carõt tỳj, nePahhiti jarkwa kõt ipa, ne harkwa kõt ihcakõc.

³³ Mã cute me cuprõn xà ata kam, hũmre nõ ata kam, me pahcurê xwỳn carõ kên nõ hĩ mã axà, ne caxwãm pê ihkrĩ, na pê cupê to ipijapar catê.

³⁴ Mã caràr, ne Jeju mã:

— Pỳhàpà, Jeju pêNaxare jõ krĩ kra ita, ampo wỳr mã ca ita ri mõ? Ampo to mã ca ha ita riapu? Cõt mãca ita ri me ijipej prãmte mõ? Wa ite ramãapê cõjkwa kam Apãm Cati kra, ne acati, ne apejti, mã Apãm Cati terĩn wỳr akujahêc na, gahkre pej — hane.

³⁵ Mã Jeju cumã:

— Měr kêt! Ne hũmre ita pèacato! — hane. Mã me kam mare mã me pahcurê xwỳn carõkên ata te hũmre ita mẽn, mã pjê kam ihpỳm. Ne hamre, me pahcurê xwỳn carõ kên nõ ata te hũmre ata jaxõp nare kam cupècator. Mã hũmre ata pej pyrentu.

³⁶ Hamre, mã mehcunea te amji mã me ipikrar, ne me amji mã:

— Pÿhàpà, Jeju te amji jahkre peaj to amji jahkre pej, cama ihcakôc, mã hũmre ita pej pyrentu. Mõrmõ hũmre ita carôt catia to cati, ne ihtÿj cama hãn neihcakôc, mã me pahcurê xwÿn carô kên itahapôj pyrentu — hajÿr. ³⁷Ne Jeju jarên ita pjê cunea kam apu ipicràn.

Pê Jeju me hàhtôa caprã

³⁸Mã Jeju ma cute me cuprôn xà pê cator, ne hũmre nõ japrÿ teXimãw ata jürkwa wÿr mō, mã hũpãn cacroa to cacro. Mã cute Jeju mã harên, ne me ahna hàhwÿr quê cahãj ita caprã. ³⁹Mã Jeju hÿrmã mō, ne hikwa xà ata jìkjê rũm xa, necute cacro ita mã harkwa cator ne cumã:

— Cahãj ita pê acator pyrentu! — hajÿr. Mãcacro ita cupê cator pyrentu, mã cahãj ita xãm, necute me cumã harte kam ihtêm pyrentu.

⁴⁰Ne ramã pyt xàr xàa kam, cute Hũm Cati carôt kôt hapên xà pihho ton. Mã mehcunea Jeju wÿrme hà cunea na me to pra. Mã cute mehcunea na hũ xir, ne mehcuneacaprãr. ⁴¹Mã me pahcurê xwÿn carô kên me hàhtôa pínhapôj, ne hãn ne me cupê hapôj xàa kam mã me caràr to:

— Apê cõjkwa kam Apãm pejti kra — hane. Pê me pahcurê xwÿn carô mã Jeju pê Pahpãm krana hahkre pej. Ne cumã Jeju pê Crixto, por pê Pahpãm me cumã hũmre to awjahkre ata na hahkre pej. Cwÿrjapê ri Jeju te mehcakôc tète me cumã harkwa hyr, quê nee me to ihcakôc nare.

Pê Jeju me cumã Hũm Cati jarkwa jarê

⁴²Mã apê, mã ma Jeju krĩ pê cator, nepō kam me hamreare ata wÿr tẽ. Mã cute me huwahi prãmte, me hapên kamihtêm, ne cute me cumã cator. Ne ma ame huwahi, quê nee jũ kam ihtêm nare, ne curia ame cahê na ipa. ⁴³Mã Jeju me cumã:

— Wa ha hanea ne krĩ nõ kam, Pahpãm te ampo cunea to ihhimpej xà na harên xà impejti to harên to mō. Ne wa ite mehcunea mã ita jarên to ipa xà caxuw ri cute ikujahêc — hane.

⁴⁴Ne hũjarên xà ita kôt, cute Juta jō pjê kam, cute me cuprôn xà cunea kam, me cumã Pahpãm jarên pejti jarên par.

Pê Jeju ihkôt me ipa catêjê capi

5 ¹ÿhÿ, pê amcro nõ na Jeju Hípôjajo tohkà na xa, ne ampo to amecumã hahkre. Pê me hàhtôa ne ahna me cuprôn tu, ne me hĩ to ajpên wÿr mehkujahêc to me mō, cute me Pahpãm jarkwa par prãmte. ²Pê Jeju pàr kre pijakrut caprÿ pupu, pê cô tohkà na ajêt. Pê ramã tep pro catêjê cupê me cato ne jũ ita ri ame hō kryhti cuhhôn to mehcuhwÿr. ³Mã Jeju te Ximãw jō pàr kre pupun ne cumã hàr, ne cute ahna hàhwÿr, quê pàr kre to ipicamên crire ne, cô tohkà pê. Mã to ipicamên. Mã pàr kre kam hÿr, ne cute me hàhtôtiatajê mã ampo to hahkre kam ihtêm.

⁴Ne cute ampo to me cumã hahkre partu, ne cute ihcakôc to ihhi, ne Ximãw mã:

— Ca ha côhtu wÿr me akwÿ me, meto pàr kre cakrÿ ne cô kam me gõ kryhti mẽ, ate me to tep nõ pro xà caxuw — hajÿr.

⁵Mã Ximãw cumã:

— Pahhi, itakam, caxwa ita kam, ite me ijàpêan to me apê, ne nee ite me to tep ita nõihpro nare. Wa ha pijamã amcroa kam me to tep ita nõ mẽ? Wÿr wa ha me ihnõ mẽ! Cakrô ca ha caa meikujate, wa ha itÿj me mō, ne mûhûràn me ijō kryhtimẽ — hane.

⁶Ne cute harkwa kôt me ampo na mên xà atajê ton to hajÿr, ne me to tep jàhtôa nakryhti to me ipixêr, ne me to pro. Mã ampeaj kam hütî, ne ajmãrcute ame cupê hō kryhti cokjêr. ⁷Mã cute mehkwy mã hū to hàpêr, quê me hÿrmãpàr kre nõ to me tẽ, ne tep na me to ihtehcajpa. Mãma hÿrmã me to tẽ. Mã tep jàhtôa to hàhtô, ne hütî te ajmãr cô mã pàr kre ajwar to mrôr. ⁸Mã Ximãw te ita pupun, ne Jeju cuna mã ihkôn krã na hÿr, ne cumã:

— Me ijō Pahhi, imã acupa hyre nare. Ampo na? Acatia to acati neakĩnte icrire, ne ikêanre — hajÿr.

⁹Ampo na ri cute cumã harkwa ton to hajÿr? Cute me tepjàhtôa ne me to pro na ri, ne cute to amji mã ame ipikrarcrire nare. Mã mehkwy teme hajÿar, ne me to tep jàhtôa ne me to pro, na ri cute amji mã ame to ipikrar. ¹⁰Mã Jeju Ximãw mã:

— Apu pa nare. Ita caxuw ca ha quêt mehî to pit mã cuprôn kam tẽ — hane. Mã cute mempar.

¹¹Ne ma pàr kre atajê to me hàpir amcrà wÿr, neampo cunea to me tojnō, ne ma Jeju kôt me pra.

Pê Jeju ihkà xêtti nõ caprã

¹²Mã ma Jeju krî nõ wÿr mō, ne curia apuipa. Mã curi me hÿmre kà xêtti nõ ita ihkrî. Ne cute Jeju pupun, ne pjê kam ihpȳm, ne cute pjê na ihkuc xir neamji na cumã awjahkre, ne cumã:

— Pahhi, ca ha icaprãr prãm, ne atÿj icaprã — hajÿr.

¹³Mã Jeju te hÿhkra curor ne ahna hir ne cumã:

— Ýhÿ, imã acaprãr prãm, cwÿrjapê wa ite ramãacaprãr — hajÿr. Mã hamre, ihkà xêt ita hÿmre ita pêcator pyrentu.

¹⁴Mã Jeju cumã:

— Ca ha nee mō neapu jÿm mã ite acaprãr ita na ijarên to amôr nare, ne ma Pahpãm mã mehcajrên catê wÿr tẽ, ne cumã amji jarê, ne cumã amji to ajpê, quê apupu ne akôpîr to impej. Jirô pê mã ca ha Pahpãm mã ampogō. Por pê Mojxe xwÿ ramã me panquêtjê mã Pahpãmmã ampo jôr xà na ihkàhhôc juwahi ata na, ca ha cumã ampo gō. Jirô pê quê ha mehcunea ramã acaprãr ita na me gahkre pej — hane.

¹⁵Pê pjê ata cunea kôt Jeju te Hũm carôt kôt hàpên xà pihho ton xà jarên apu ihcakũm. Pê me hàhtôa ne mehkrĩ atajê ajco Jeju wỳr me pra, cute mempar prãmte. Ne hanea ne me hà hỹrmã me pra, cute me caprãr prãmte. ¹⁶Pê Jeju ma ajco pŏ mã hapôj, me hamreare ata wỳr, ne ahte ajco Hũm Cati mã ihcakôc.

Pê Jeju cukrã xà peacre nŏ caprã

¹⁷Pê amcro nŏ na Jeju ikre kam jỹ, ne ame cumã ampo to hahkre. Pê Parixêw catêjê me, me cumã Mojxe xwỳ jŏ kàhhôc tohahkre catêjê hanea curi me jỹ. Pê Hĩpôjajo jŏ pjê me, Juta jŏ pjê pĩn, krĩ cunea me hỹrmã cuto tu. Pê Pãhpãm Jeju mã carôt to ihtỳj, ne cumãcute amji jahkre pejti gŏ, cwỳrjapê ri ihtỳj me hà caprã. ¹⁸Mã me hũmre cukrã xà peacre nŏ pãrkwỳc kam nŏ. Mã hũmre kwỳ pê me hŏ kwỳ nŏ atajê te me to cator, ne tee ame to hàr to hahkre, Jeju cuna mã cute mehĩr prãmte. Ne jũ wỳr quê harkwa na me to axà, cute me hipu tu, ne me hahêr tu ita kam. ¹⁹Cwỳrjapê ri tee Jeju wỳr ame to hàr to hahkre. Ne ma me to hàpir, ikre jimoc na. Ne cute me kên po teikre ton ata nŏr par, ne me to ihkre, ne pãrcuxê to me hũmre nŏrxà ata na hê, ne ma me to iwrỳc, me hàhtôti atajêjipôc ri, ne Jeju cuna mã me hir.

²⁰Mã Jeju te ampeaj kam, cute amji mã me Pãhpãmto ihhimpej na me hŏmpun, na ri cute hũmre cukrã xà peacre nŏ ata mã:

— Ikwỳ nŏ, wa ha ita kam ate Pãhpãm to kên xà ita to tojnŏ, ne nee hipêr to amji japackre nare — hajỹr.

²¹Mã hamre, Parixêw catêjê me, me cumã Mojxe xwỳ jŏ kàhhôc to hahkre catêjê me, me amji mã:

— Pỳhàpà, Jeju ita apu ihcakôc to kêanre. Ne ihtỳj Pãhpãm to ihcakôc kêanre. Xà ajkĩ cupê Pãhpãm, quê hũmre te ihkên ton xà ita to tojnŏ? Pãhpãm quê ha quêt ihtỳj jũm te ihkên ton xà nŏ to tojnŏ, ne me paxũmre nŏ te ita ton xà nare — hane.

²²Mã Jeju te me hahkre pej pyrentu, cute amji kam mehãpac xà ata na, ne me cumã:

— Pỳhàpà, ampo na mã caame amji cajpêr xà ita to me acaxwãm pê ame amji cajpê? ²³⁻²⁴Ikam me gapacpeaj ne he. Ipê me Ahàkà, wa itỳj jũm te Pãhpãm to kên xà ata to tojnŏ. He me ikampa, ne me ipupu, ne me ijahkre pej to impeaj ne. Harên xà jũ ri amji jirôa pê ihtỳj? Xà wa ha ajkĩ hà ita mã: “Ate Pãhpãm to kên xà ita, wa ha to tojnŏ?” nare, wa ha ajkĩ cumã: “To xa ne anŏr xà py neatêm pyrentu?” hane. Harên xà itajê nŏ ri amji jirôa pê ihtỳj? He pom harên xà te: “To xa ne tẽ” ata ri, ite harên xà nŏata jirôa pê ihtỳj ita? Ne hamre, ita caxuw ca ha me ijahkre pej to impej, wa itỳj jũm tePãhpãm to kên xà ata to tojnŏ — hane. Ne cute cukrã xàpeacre ata mã harkwa to:

— To xa ne anŏr xà py, ne atêmpyrentu, gũrkwa wỳr — hajỹr.

²⁵Mã hà ita me kam mare mã hãm pyrentu, ne cute nõr xà pyr, ne ma hũrkwa wỳr tẽ. Ne ampeaj kamPahpãm te cumã ampej pyrên hakryti na cumãamji jarên to tẽ. ²⁶Mã mehcunea te ita to amji mã me ipikrar, ne mehcunea mã hũpaa to hũpa. Mã cute me Pahpãm to amji kam hapac pyrentu, ne me amji mã:

— Pỳhàpà, rỳ jũ caxuw me pahnõte ampo pejti itajê nõ pupun nare, ne ita kam mã rỳ pahte me hõmpun — hajỳr.

Pê Jeju Rewi to ihkõt ipa catê

²⁷Ita jirô pê mã ri ma Jeju cator, ne cute, por Rewi pê pjê jõ pahhi jarkwa na me hũhkra kam hãmchwỳr catêjê nõ ata pupun. Mã me hũhkra kam hãmchwỳr xà kam jỹ, mã Jeju te hõmpun ne cumã:

— Ajpên ikõt mō — hajỳr. ²⁸Mã Rewi xãm ne cute ihcunea jicu, ne ma ihkõt mō.

²⁹Ne cute hũrkwa kam, Jeju mã amji kĩn catia ton. Mã pahhi mã me hũhkra kam me hãmchwỳr catêjê jàhtôa ne me cahê na me jỹ. Pê mehkwy hanea ne mehkrĩ. ³⁰Mã me cumã Mojxe caca xà to hahkre catêjê me, Parixêw catêjê te me amji kĩn ita pupun. Ne ameJeju kõt me ipa catêjê kam mencryc, ne ame hũn, ne me cumã:

— Pỳhàpà, ampo na mã ca ame cahê na ame apà, ne ame ikõ? Pom me hãmchwỳr catêjê pê mehkrã kên catêjê ita? Pom hõtpê pahhi jarkwa jirôa pê ame hãmchwỳr to me ipa ita? Pomme cupê mehkên ton catêjê ita? Ampo na mã ca me cahê na ame hane? — hane.

³¹Mã Jeju Parixêw catêjê kwỳ mã:

— Ýhỹ, me ikampa! Me capên catêjê me, mempej catêjê, nee mehcahhê catê na prãm nare. Ne me hà catêjê ri quêt ihtỳj mehcahhê catê na mehprãm. Na ri ita pê hũràc ne ipêmehcahhê catê pyràac. ³²Na wa ite mehkrã kên catêjê to impej prãam to wa ajpên mō, mār quê mehkên pê amji to me antuw, ne mempej. Wa nee mempej catêjêto impej to icator nare — hane.

Pê Jeju ipijacri kõt harê

³³Mã amcro nõ na jũmjê itajê Jeju wỳr pra, ne mecumã:

— Ýhỹ, Jowãw kõt me ipa catêjê ihtỳj me ajcrito ame ipa, ne hõtpê me ipijacri to me ipa xà ata kam, ihtỳj Pahpãm mã mehcahoc to me ipa. Mã hanea neParixêw catêjê kõt me ipa catêjê ihtỳj me ajcric. Ne akõt me ipa catêjê, mã ajte nee mehkĩnte me ipijacri nare. Ne mēr ampo na mã akõt me ipa catêjê nee itajê cuxà ame ipijacri to me ipa nare? — hane.

³⁴Mã Jeju me cumã:

— Ýhỹ, amji kĩn catia kam, quêha pijamã jũm ipijacri to ipa? Jũ wỳr quê jũmamji kĩn kam hàpàn nare ne apu ipa. Quê ha ihtỳj mehcunea me hàpàn to me ipa. ³⁵Ne quê ha amji kĩn jõ pahhi ma jũ kam tẽ, quê ha amji kĩn hamre, jakàn pê quê haihtỳj me ipijacri to ame ipa — hane.

³⁶Ne hanea ne Jeju te me cumã, cute amji kam me hapac xà capô to impej partu, mār quê me hahkre pej pej, ne me cumã:

— Ýhỹ, jũ wỳr quê jũm cupêhkà wej to impej prãmte, cupêhkà tuw kwỳ Jakep, ne ihwej ita na cuxô ne to ajpỳ. Quê ha to hane, quê ha intuw ita ihwejita to kên nare ne hipô, jũ wỳr quê ha cupêhkà wej ita intuw ita mã awcanã. ³⁷Ne jũ wỳr quê ha jũm pryti kà te ampo cacôcên xà wej ita kam ampo cacô tuw ru. Quê ha jũm te incjêj xà wej kam irun na, quê ha incjên xà wej ita ajahte, quê ha ampo cacô ita acto. ³⁸⁻³⁹Ne jũ wỳr quê jũm ampo itajê nõ to hane, ramã me pahcunea te me hahkre pej. Cu ha ampo cacô incjên xà intuw pit kam ame ampocacô tuw ru. Pê mã nãm ampo cacô wej ata, ampo cacô tuw jirôa pê impej. Na ri jũ wỳr quê jũm ampo cacô tuw ita na prãm, cormã intuw na ri, nequêt ampo cacô wej ata ri ramã impejtu — hajỳr. Ita jĩkjê na mã, ramã cute me amji kam hapac xà tũm wej to me amji pyrác xà ata pit kĩn, nare, nee cumã to ipintuw prãm nare.

Pê Jeju mehkôt xà jô amcro kôt harê

6 ¹Ne amcro nõ na, mehkôt xà jô amcroa kam, Jeju na mehkwy te pur nõ ita cajpuw me arỳjhy cahác ata jakren to me mō. Mã ihkôt me ipa catêjê temehkêhkên ne me caxwỳn kur kam me to ihtêm. ²Mã Parixêw catêjê kwỳ te me hõmpun, ne me cumã:

— Ampo na mã ca ajte ame gápên to me apa to hane? Ca ihhêj ne ate mepancaca xà kaj na, hirô pê me apỳm, nema ame pahkôt xà jô amcro caca. Pom pê me panquêtti pê Mojxe xwỳ me pamã Pahpãm jarkwa jô kàhhôc gō ne hō amcro ata juwahi ata kam, me gápên xà ita na ihkaj na, me pahkôt xà jōamcro kam — hajỳr.

³Mã Jeju me cumã:

— Nee ite Pahpãm jarkwa jirô pê me to ipỳm nare. Atea ca me hirô pê me to apỳm. Xà ate me panquêtti pê Tawi xwỳ jô kàhhôc cahyt nare? Pê Tawi xwỳ me, mehkwy itajê mã prãm. ⁴Pê me Pahpãm to me amji kam me hapac xà jũrkwa mã me axà. Pê curi Pahpãm mã hō pyxwỳr xà na pãw pejti itajê hikwa. Ne por pãw hikwa atajê quê nee jũm pê Pahpãm mã mehcajrên catêjê nare ihnō krêr xà nare. Cakrô pê ihtỳjTawi cucwa ne mehkwy atajê mã cugō, pê me cukrê.

⁵— Ýhỹ, ipê me Ahàkà, na pê wa ixũmre na amji to. Na wa Pahhiti jarkwa kôt ipa, ne taa mã pê ite me pahkôt xà jô amcro to ihimpejcatê na ixãm — hane.

Pê Jeju hũmre jũhkra te xwỳ caprã

⁶Mã mehkôt xà jô amcro nõ na, ma Jeju Jutacatêjê te cuprôn xà mã hār, ne cute me cumã ampo to hahkre kam ihtêm. Pê hanea ne curi hũmre nõ awpôc rũm hũhkra kên ita jỹ. ⁷Mã hanea ne Parixêw catêjê kwỳ me,

me cumã Mojxexwý caca xà to hahkre catêjê kwý curi amehkrĩ, ne ame Jeju pupu, ne ihtýj amehkôpĩr to me ipa, cute ihkên mã me mên prãmte. Quêihhêaj to Jeju mehkôt xà jô amcro kam jũm caprã, quê ha hàhcaprãr xà ata kôt me to ihtýj tu ne, cute mencaca xà jirô pê ihpým cwýrjapê.

⁸Pê Jeju ramã amji na cute me amji kam hapac xà ita na me hahkre pejpartu cacrô, cute hũmre jũhkra kên ata mã:

— To xa, ne me hipôc ri ca xa — hajýr. Mähũmre ata xãm, ne me hipôc ri xa.

⁹Mã Jeju te, por ame hõmpu atajê cukij, ne me cumã:

— Ýhý, me pahkôt xà jô amcro kam, por ihkàhhôc kam me pancaca xà jô amcro ata, ampo pê Mojxe xwý Pahpãm jarkwa kôt me pamã to hahkre? Xà cu ha pahtýj amcro ita kam ame ampo pej to? Nare, xà cu ha me pahtýj amcro ita kam ame ampo kên to? Xà cu ha pahtýj amcro ita kam me jũm tehcajpa ne me to ihtyc xà jahpa? Nare, xà cu ha pahtýj amcro ita kam me jũm cura? — hajýr.

¹⁰Ne Jeju mehcunea kôt into to amji jacjê, ne cute hũmre jũhkra kên ita mã:

— Gũhkra curor — hajýr. Mã hamre, hũmre ita te hũhkra curor, ne hũhkra impej pyrentu. ¹¹Mã Parixêw catêjê kwý atajê ameJeju kam mencryc, ne cute Jeju to amehkên na me ajpên par.

(Pê Ruc Jeju jarên jicu. Pê Matew hipêr Jeju jarê to hane he.)

Matew 12.15-21

Pê Jeju mã amji to cati prãm nare

¹⁵⁻¹⁶Mã Jeju te amji na Parixêw catêjê te amehcuran prãm na me hahkre pej, ne ma tẽ. Mã me hàhtôa ne ma ihkôt me mō. Mã cute me hàcatêjê cunea caprãr, ne me to impej, ne me cumã:

— Ca ha nee me cumã ite me acaprãr ita na me ijarên nare — hajýr.

¹⁷Ne ampo na ri cute me to hajýr? He pê rý pëa mã ramã Pahpãm jarkwa to ihcakôc catê pê Ixaj xwý ata, ita na ihhôac na ri cute hajýr. ¹⁸Ne pê ihhôc to hane he. Pahpãm hũjarên to:

“Ihnãm hã, ite amji mã imã hàpên catê capiita he.

Ne taa mã ri imã ihkĩnti.

Ne taa mã ri imã amji kĩnti to

ne amji to icajpuaw.

Ne wa ite cumã Icarô Pejti kujahêc,

mã cute cumã amji jôr,

mãr quê ha Icarô Pejti ata kôatmehcukij,

ne me to ajcokjê.

Ne quê ha me cupê mehcahkrit atajê pê Juta catêjê nare
pê me ijahkre pej nareatajê mã,
ite catyt kam me to ipicokjêr xà jarê.

¹⁹ Ne nee cute amji to cati prãmte jũm me ajpẽn krac ri ihcakôc nare,
ne nee apu hàkjêr nare,
ne nee quê ha cà pêcute mempar prãmte ihcakôc to iryti nare.

²⁰ Ne quê ha jũm pê ihhêj rũm cajcaj hô nõ ata pyrác,
ne cajôc ne ihcapa na xa, quê ha nee ihkwĩn pej nare,
ne quêt hacpỹa mã hãm to impej,
ne ihcuhtac.

Jĩkjê na, quê ha jũm,
cute amjikam hapac xà ramã ihpeacre,
quê ha nee jũm ata mã hikran nare,
ne quêt hacpỹa mã to impej.

Ne quê ha jũm pê ihpôc xà nõ pyrác,
ne ramãkyre pê pôr ne ihpôc crire ne,
quê ha nee ipĩr quê ha ihtyc nare,
ne quêt to ihpôc cati,
quê ha pôr.

Jĩkjê na, quê ha jũm,
cute amji kam hapac xà kêanre to apu ipa,
quê ha taa ihtehcajpa,
quê ha catyt kam apu ipa.

Ne quê ha catyt kam me to hajỹrto hãm ita kam,
ahnaa me curê xwỳn tohjê. ²¹Ne quê ha pjê cunea kam,
krĩxàre pê mehcahkrit atajê cunea
jũm ata jikaj, ne to pit mã amji mã mehhimpej to me ipa” hane.

Hõhõ, pê Ixaj xwỳ Jeju na ihhõc to hane.

(Pê Matew Jeju jarẽn jicu. Pê Macô hanea ne Jeju kôt harê to hane he.)

Macô 3.7-12

Pê Jeju me, ihkôt me ipa catêjê Hĩpôjajo jõ pjê kam me ipa

⁷Mã Jeju me, ihkôt me ipa catêjê ma Hĩpôjajo jõ pjê wỳr me pra ne me cator, ne hĩpô tohkà na ame ipa. Mã krĩ kwỳ kôt cute me Jeju te curi apu mõi na me harẽn par, ne cute ahna me cuprõn tu. ⁸Mã Hĩpôjajo catêjê jãhtõa te me cuprõn. Ne hanea Juta jõ pjê me, Krĩpinkrên me, Cõpijapjêr jõ cõ jĩkjê pĩn hanea ne cute me cuprõn, Pjêhcaprêcti me, Kẽn jõ krĩ me,

Teppro jõ krĩ me. Ne pê mehcunea, cute meJeju cajpar prãnte, hỹrmã me mō. Ampo na? Pê ajco me Jeju te ampo ton xà atajê cunea na me harẽn pa na pê. ⁹Mã Jeju ma ame hàhtôti te me ahna ihtỹj ita na ihcaca, na ri cute ihkôt me ipa catêjê nõ mã harkwa, quê pàr kre nõ na ahwỳ, quê kam jỹ ne me cupê to ajcamẽ crire ne. Mã harkwa kôt cute me ton.

¹⁰Ne pê Jeju ajco me hà jãhtôa ne me caprã. Na pê me hà catêjê jãhtôa ne cute Jeju tãt ne me amji caprãr prãnte, mehĩ to intête hỹrmã me amji pê amtã. ¹¹Ne me kam me pahcurê xwỳn carõ kên atajê pê ajco me Jeju pupu, neajco cuna mã me ajhu, ne me caràr to:

— Apêa ri Pahpãm kra — hane. ¹²Pê Jeju ita tête incryac kam me cumã:
— Nee hipêr ipê Pahpãm kra na me ijarẽn nare — hane. Ne pê mehcãhpêrta.

(Pê Macô Jeju jarẽn to hane. Pê Ruc hõ kãhhôc kam Jeju jarẽn kam to incrã to hane he.)

Pê Jeju ihkôt me ipa catêjê te tõi capi

¹²Ne pê amcro atajê nõa kam Jeju kên na api, Pahpãm mã ihcakôc prãnte. Ne curia Pahpãm mã ihcakôc to apê. ¹³Ne cute ihkôt me ipa catêjê mã hàkjêr, ne me to tõi ne me to caprãr. Ne cute me tõi atajê to ri cute amji mã harkwa na memprar catêjê. ¹⁴⁻¹⁶Ne Jeju mã memprar catêjê japrỹ itajê pê Ximãw, por pê Jeju cumã haprỹ krut pê Petrô gõ ata me, Ximãw tõ pê Antre ata me, Tijac me, Jowãw me, Pirip me, Partômew me, Matew me, Tome me, Tijac pê Arpew kra me, Ximãw, por cumã hõ pjê kinti ata me, Juta Carijot pê Jeju curê xwỳn ata me.

Pê Jeju me hà caprã

¹⁷Ne Jeju te kên pĩn mehcunea to iwrỹc, ne meto mō, ne pjê impejti pipẽnti ata kam me tohãhhuc. Mã curi pjê cunea rũm cute me cuprõn, ne me hàhtôa ne ame ipa. Juta jõ pjê pĩn mecator, ne Krĩpinkerẽn pĩn me cator. Ne cõxwa cahê na krĩ pijakrut pê Kên jõ krĩ me, Teppro jõ krĩ ata pĩnme cator. Ne krĩ jãhtôa pĩn cute me cuprõn. ¹⁸Ampo na? Cute Jeju kam me hapac ne meamji caprãr prãnte me cuprõn. Mã Jeju ihtỹj ame caprãr to mō. Ne ihtỹj cute me pahcurê xwỳn carõ kên atajê mã, me hĩ tête harkwa japôj to mō. Mã mentête hapôj, mã amempej pyrentu. ¹⁹Cwỳrjapê ri mehcunea ame Jeju tãt to prãm. Ampo na? He ihtỹj Jejujĩ pê Pahpãm carôt hapôj, ne mehcunea caprã.

Pê Jeju amji kĩn me amji kĩn nare kôt harê

²⁰Mã Jeju te ihkôt me ipa catêjê pupun, ne me cumã harkwa to:

— Ỹhỹ, me akwỳ pê ampo hamreare atajê,

ame gakry!

Ampo na?

He me caa, ca ha quêt Pahhiti pê Pahpãm himpej xà ata kam ame akrĩ, na ca ha ame gakrya ne!

21 — Me akwỳ mã prãm atajê,

ame gakry!

Ampo na?

He me caa, ca ha quêt me garte tu ne,
na ca ha ame gakrya ne.

Ne ca me akwỳ ame amrãatajê, me gakry!

Ampo na?

He me caa, ca hame hirôa pê ame acxa,
na ca ha ame gakrya ne.

22 — Ne ca me akwỳ ampo kêanre kam me amji pupuatajê,

ame gakry!

Ampo na?

He ma ame acurê, ne ma ame acaca, ne ame axũn,
neakên na ame garên cakrô,
Inxũ mãnee me akên nare.

Ca ipê me Ahâkà kôt ame apa incwỳrjapê ri ame ato hane,
ne ame ato kêanre.

23 Ne cute ame ato kên jõ amcro itajêa kam,

ca ha ame gakry!

Gapacta ne megakryte ame atoj.

Ampo na?

He quê ha jũ caxuw Pahpãm hahpan xà na,
côjkwa kam me amãhãmjôr catia,
ne me amã impejti gô.

Na ca ame gakrya ne!

Ampo na?

He me cupê menquêtjê pyrãac,
ne ihtỳj me ato kên to me ipa,

pom pê mam menquêtjê ajco me Pahpãm to mehkên to me ipa
ata na ri me ato he.

24 — Pỳj me hêj xi,

me akwỳ pê me gakràj atajê,

ca ha atỳj ame amrã!

Ampo na?

He amcro ita pyxit peaj kam ri me gakryti ita.

Na ca ha atỳj ame amrã!

25 — Pỳj me hêj xi,
me akwỳ mã ampo cunea atajê,
ca ha atỳj ame amrã!
Ampo na?
Quê ha cormã jũ caxuw me amã prãm catia me awỳr cato,
na ca ha atỳj ame amrã!

— Pỳj me hêj xi,
me akwỳ ame acxa atajê,
ca ha atỳj me apicxar jicu ne cama ame amrã!

26 — Pỳj me hêj xi,
me akwỳ pê, pom mehcunea me apejti na ame garẽn catêjê atajê,
ca ha me amrã!
Ampo na?
He me cupê menquêtjê pyrãac.
Pom pê mam menquêtjê ajco mehhêj xi catêjê pejti na ame harê,
ata cuxà ri ihtỳj me apejti na me garẽn to me ipa.
Na ca ha atỳj ame amrã!

Pê Jeju me curê xwỳn kїн na me cumã harkwa

27 — Ỳhỹ, ampeaj kam wa ha me amã Pahpãm jarkwa jarê. Ca ha me amã me acurê xwỳn kїн. Ne ame acaca atajê, ca ha me to impeaj ne.

28 — Ca ha cute me acrôn atajê jahpan xà na, me to impejti to prãm, ne Pahpãm mã mehcajrẽn. Ne cute me ato kên atajê, ca ha Pahpãm mãmehcajrẽn, quê me to impeaj ne.

29 — Quê jũm apahãm prãmte akuc kam acakwĩ, ca hahĩkjê to cumã apkjê, quê hanea ne kam cakwĩ. Nequê jũm apê gitô kà capa, ca ha hanea ne akat kà caxàr na to tojnõ, quê amji mã capa ne to tẽ.

30 — Ne atỳj me cumã, por ampo na me awỳ atajê gõ. Ne quê jũm apê ampo capa, ca nee hacpỹ ne ahna gàhwỳr nare.

31 — Ne quê ha amã cute me ato amji kam hapac to impejti to prãm na, ca ha atỳj me to amji kam gapac to impejti to apa.

32 — Quê ha amã cute me acurê atajê kїн na, quê ha Pahpãm ihtỳj ate mehkїн jahpan xà na amã amgõ. Nee quê ate amji mã mehkїnti atajê pit kїн jahpan xà na, quê Pahpãm me amã hàmjõr nare. Quê ha amã cute me akїн catêjê atajê pit kїн na, ca ha me apê mehkên catêjê jõ ikwỳ nõ pyrãac, ne me cuxà akêanre ne.

33 — Ca ha cute me ato kên atajê to impejti na, quê haPahpãm ihtỳj hahpan xà na me amã amgõ. Ne jũ wỳr quê ha Pahpãm ate, cute me ato

impej catêjê pit to impejti jahpan xà na, me amã amgõ. Ca ha cute me ato impej catêjê pit to impejti na, ca ha me apê mehkêncatêjê jõ ikwý nõ pyràac, ne me cuxà akêanre ne.

³⁴— Ca ha atýj mehcunea mã ampo gõ, por ampo na me ahwý atajê, ca ha me cumã agõ. Ne nee hacpýa ne cute me amã ampo jõr catêjê mã pitmã ame ampo jõr nare. Ca ha jũmjê te jũ caxuw hacpýa ne amã ampo jõr nare atajê mã ampo jõr na, quê ha Pahpãm ihtýj hahpan xà na me amã amgõ. Ne jũ wýr quê ha Pahpãm hõtpê hacpýane cute me amã ampo jõr atajê jahpan xà na me amã amgõ. Ca ha ate hajýr na, ca ha me apê mehkên catêjê jõ ikwý nõ pyràac, ne me cuxà akêanre ne.

³⁵— Ne ca ha atýj amã me acurê xwýn catêjê kîn, ca ha me to impej. Ne ampo cunea na me ahwý atajê, ca ha atýj agõ, ne neehacpýa ne cute amã ampo jõr na amji mã to hajýr nare. Ca ha me ate ite me amã ampo jarënitajê cunea to hajýr na, quê ha Pahpãm hũrkwa kam, me acunea mã hãmjõr xà impejti tohãmjõr to catia, ca ha me to amcwa, ne ca ha apê Pahpãm me hirõa pê cati ata kra impeaj. Pahpãm mã mehcunea kîn, ne hãhcajrën cati, ne ihtýjcute me to kên catêjê caprî, ne ihtýj cumã cute me ampo cwýr atajê jahpan xà na me hakryti na me amji jarën nare atajê caprî.

³⁶— Na ca ha Pahpãm cuxà me gãhcajrënti ne, ne mehcunea caprî to me apa. Hõhõ, ita to ca ha me hajýr to me apa.

Pê Jeju me ajpën to impej na harkwa

³⁷— Ca ha ate nee ampo na amehpro rën nare na, quê ha Pahpãm me acuxà nee ame apro rën prãm nare. Ca ha nee ame curê mã me irën nare na, quê haPahpãm me acuxà nee me acurê mã me arën nare. Ca ha ate cute ame ato kên ita to tojnõ ne hicu na, quê ha ihtýj Pahpãm me acuxà, ateme to kên ita to tojnõ ne hicu.

³⁸— Ca ha gõtpê me cumã ampo jõr to apa na, quê haihtýj Pahpãm hõtpê me acuxà me amã ampo jõr to ipa. Ne ampeaj kam ca ha atýjme amcwa. Quê ha Pahpãm me amã me acrat to hipu, ne tohipu tu ne, ne ampeaj kam quê ha me acrat kam me amã cucjê, ne kam me amã curua to curu. Ne pom ca ampo kam me akwý mã ampo to ajpën ata kam, quêha Pahpãm hanea ne me amã ampo to ajpën ne cunõ. Ca ha jũm mã ampo crire ne agõ, quê ha Pahpãm ate ton xà ita na, acuxà hanea ne amã ampo crire ne cugõ. Nãmri ca ha ate jũm mã ampo catia ne hõr na, quê ha Pahpãm hanea ne acuxà amã ampo catia ne cugõ.

³⁹— Ýhý, jũ wýr quê jũm to tũm, amji kôt into tũam nõ to mõ. Quê ha mento tũam me ajpën to mõ, ne ajwar ihtýj kre nõ mã mehpým.

⁴⁰— Ne por me cumã ampo to hahkre atajê ri cute ampo tohahkre catêjê japyre mã me. Na quê haxa ampo to hahkre ne hahkre pej jirõ pê, quê ha cormã cute cumã to hahkre catê ata me ajpëan.

⁴¹— Ca me akwỳ jirôa pê akên ton to me apa cacrô, ca atỳj me akwỳ te ampo kên kryjre ton atajê to me cumã acakôc to me apa. Ne ca ihhêj ne me akjêjê into kam me ahhi kryjre pupu, nenee mehkînte amji toa kam pĩ kwỳcti ata pupun nare. ⁴²Ne jũ mã ca me akjêjê mã harên to, ne ajte ne me cumã: “Ikjê, cama amji na ijamã, wa ato kam amã ahhi kryjre ita to pôj” hane. Ne mēr ampo na ca caa, atoa kam amji mã pĩ kwỳcti ita caxàr nare? Ne ihcaprỳ naamji pej na ame amji jarên to me apa, ne mehkînte me akêanre. Ca ha mam me ato kam amji mã pĩ kwỳcti itajê to pôj, ne me arit pej, ne cormã me akjêjê into kam ahhi kryjre ita pupu, ne me cumã to pôj.

Pahte amji kam me pajapac xà ihtỳj me pahcakôc xà to ihhimpej

⁴³— Ỡhỹ, jũ wỳr ca ha pĩxô impejti pàr nō intête, pĩxô kên nō capa, ne jũ wỳr ca ha pĩxô kên pàr tête, pĩxô impejti nō capa. ⁴⁴Ca ha ampo pĩxô pàr cahkrit nō pupu, ne ramã hahkre pej pyrentu, xà pĩxô pàr ita ajkĩ impej, nare, mōrmō ihkêanre. Ne jũ wỳr ca ha hōmjĩ pàr kam ahkrỳt nōta, ne jũ wỳr ca ha ahkrô kam crowkwỳj xô nō ta. ⁴⁵Jĩkjê na, jũm xũmre impejti ata hōtpê amji caxwãm pêcute amji kam hapac xà pĩn ampo pejti to hapôj, mã ihkînte jũm xũmre kên ata hōtpê amji caxwãm pê cute amji kam hapac xà pĩn ampo kên tohapôj. Ỡhỹ, ampeaj kam pahte amji kam me pajapacxà me, me pahcakôc xà te hipu, cu ihkôat me pahcakôc — hane

(Pê Ruc Jeju jũjarên xà jarên jicu. Pê Matew hanea ne Jeju jũjarên xà jarên to hane he.)

Matew 5.17-30

Parixêw catêjê jirôa pê me pampej na me pamã ihprãm

¹⁷Ne Jeju hanea ne me cumã:

— Nee ca, ite Mojxe xwỳ me, Pahpãm jarkwa tomechcakôc catêjê te me hapackre xà ata to hamreprãmte icator na, ame icãmjĩ nare. Wa quêt catyt kam, cute me hapackre xà ita kôt ipa, ne me amãihkôt harên to impej to ihcuhtacti, ca ate kam me gapac, ne icuxà catyt kam me apa prãmte, wa icator.

¹⁸— He wa nee ame amã ihêj xi jarên nare, ne ampeaj kam wa me amã awjarê. Quê ha nee cōjkwa me, pjê kam ampo cunea jamre xà wỳr Mojxe xwỳ me Pahpãm jarkwa to mechcakôc catêjê te me amji kam hapac xà na ihkàhhôcata hōc pyxitre nō ipictor nare. Quê ha hajỳr to ihcuhhê rohnỳtti mã, ne ihkàhhôc kam cute mehhôc catêjê te ampo te jũ mãn xà atajêquê ha ihtỳj hane. ¹⁹Na quê ha jũm te Pahpãm te me pamã harkwa

jirên xà ata par nare, ne amjia kôt, amji kôat jũm jũpar nare to cumã hahkre na, quê ha ihtÿj cõjkwa kam Pahpãm himpejxà kam incire ne, ne Pahpãm cuna mã ihkêanre. Jĩkê na, quê ha jũm te Pahpãm te mepamã harkwa jirên atajê kam hapac, ne amji kôat catyt kam, jũm jũpar to cumã hahkre ata, quê ha cõjkwa kam Pahpãm himpej xà kam catia to cati.

²⁰— He ampeaj kam wa me amã harê. Parixêw catêjê me, Mojxe xwÿ te me hapackre xà to hahkre catêjê me, me cumãa ihhêj ne catyt kam meipa. Ne Pahpãm mã nee catyt kam me ipanare. Na ca ha Pahpãm himpej xà mã me acjêj prãm na, ca ha itajê jirõa pê catyt kam me apa to prãm.

Cu ha nee jũm kam me pancryc nare

²¹— Xà pê ca nee Pahpãm te me aquêtjê mã harkwa hyr to:

“Nee ca amehcuran nare.

Quê ha jũm ahcura,

ca ha ma cute mehckuj catê wÿr me to pra,

mãr quê mehkên na me hahkre pej,

ne mehkên jahpan xàna mehkên mã me cumê”

hajÿr kam me gapac nare? ²²Ne wa ha me amã ihkwÿ jirõ pê tÿj ita jarê he: “Quê ha jũm te apu mehkwy nõ kam incryc na, quê haihtÿj cute apu kam incryc ita na hanea ne mehckuj. Ne quê ha jũm mehkwy nõ mã harkwa to: ‘Ampo cunea na gamreare’ hajÿr na, quê ha ihtÿj cute cumãn xà ita jahpan xà na cute mehckuj catê wÿr me to mõ. Ne por jũm apu mehkwy nõ mã haprÿ kêanre pyxwÿ ata, quê ha ramã me pahcurê xwÿn pê Xatanaj jõ cuhy wÿr mõr xàa kam ipa”.

Cu pahte me to ihcupan xà to impej pyrentu to prãm

²³⁻²⁴— Na ri cute hajÿr. Nãmri ca ha ate Pahpãm mã hũrkwa kam ampo jõr to amõr na, ne curia ate me akwÿ nõ te ampo na akam incryc na to amji japackre na, ca hacuria ate Pahpãm mã ampo jõr xà ata jicu, ne ma tẽ ne mam me akwÿ nõ me ajpên mã acaprĩ, jirõ pê ca ha amji jaxà, ne cormã ate Pahpãm mã ampo jõr xà ata gõ.

²⁵— Ne quê jũm akam incryc na, ato xwahna prãmte, ma mehkên cukij xà wÿr me ato mõrkwÿa kam, ca ha me amji to impej. Ampo na? Ca ha ate me amji to impej nare kam ahnaa mehkên cukij catêacato, ne cumã me agõ, quê ha makràhtare mã me agõ, quê ha me gaxà. ²⁶He ampeaj kam wa ha me amã awjarê. Quênee gãmjõr par nare kam, jũm amã hikran nare.

²⁷— He xà cute me amã Pahpãm jarkwa jarên to: “Nee ca ahti na ame pyjê to me axy nare” hajÿr na gũpar nare? ²⁸He wa ha me amã ihkwÿ

jirôa pê ihpa tỳj ita jarê he: “Quê ha jũm cama pyjê nõ pupu, ne kam cumã amji caprêp ata, pêihhêj ne ramã cute ahna hũhkra” hane.

²⁹— Cwỳrjapê quê ihhêaj to awpôc rũm ato akên na aton prãmte ampo kên pupu, ca capa neto awcapê. Nãmri ca ha ate caxàr nare na, quê ha gícunea ihkên mã axà. ³⁰Ne quê ihhêaj to awpôc rũm gũhkra akên na aton prãmte ampo kên to, ca hanea nehakep ne to awcapê. Nãmri ca ha ate hakep nare na, quê ha gĩ cunea ihkên mã axà. He me pamã me pahcukrã xà te amji jìkjê ita na, cute jũ mãn nare, ne Xatanaj jô cuhy kam me pajĩ cunea pỳpỳm xà ata ri ampo kên itajê cunea jirôa pê ihkêanre.

Matew 5.33-37

Cu ha nee ihcaprỳ na Pahpãm japrỳ na to amji mã me pahcakôc nare

³³— Pê Mojxe xwỳ me panquêtjê mã: “Ca ha ate Pahpãm japrỳ na ampo na cumã amji ton na, ca ha atỳj to” hane. ³⁴Ne pa, wa ha quêt cama amã to hahkre to hane he: “Ca ha ate ampo na amji ton xà ata kam, ca ha nee ihkaj na Pahpãm japrỳ to acakôc to, ‘Ỡhỹ, wa ha Pahpãm japrỳa na itỳj to’ hajỳr nare. Ne nee ca hanea ne ihcaprỳ na cõjkwa pê Pahpãm krĩ xà to amji mãacakôc nare. Ampo na? He curũam ri me pahto ihhimpej. ³⁵Ne nee hanea ne pjê to amji mã acakôc nare. Ampo na? He pjê ita pê ri ihhêj rũm ihpar pyxwỳr xà. Ne nee ca Krĩpinkrên to amji mã acakôc nare. Ampo na? Hecupê Pahpãm pê Pahhiti jô krĩ. ³⁶Ne hanea ne nee ampo kôt akrãa to amji mã acakôc nare. Ampo na? Jũ wỳr ca me anõ amjia kôt me pahkĩ nõ pyxit peaj to haka, nare, to ihtycti ne. ³⁷Ne quêt ca ha cama harên to, ‘Ỡhỹ, wa ha to’, nare, ‘Quê, wa ha nee ton nare’, hane. Ne nee hirô pê mã garkwa nõ to acakôc nare. Ampo na? Pom ca me acakôc to impejti jirô pê, hipêr me ampo na me amji to itajê, Xatanaj pê me pahcurê xwỳn pĩn ri hapôj” hane.

Matew 6.1-8

Cu ha nee jũm te me pampejti na me pajarên na, mehprãm nare

¹— Ne wa ha hanea ne me amã ihnõ ita cawpa he. Co he! Nee ca cute ahna me apupun prãmte me kam mare mã Pahpãm mã hàpên xà impejti atajêton to apa nare. Nãmri ca ha ate me ita tohajỳr na, ca ha nee me cõjkwa kam Apãm Cati te me amã ampo pejti jôr xà ata cwỳr nare.

²— Ne ca ha ate jũm pê hamreare ata mã cute ampo na ihprãm ata jôr na, ca ha aracri cumã agõ. Ne nee ca ha apê jũm pê caxwãm pê cute amji kam hapac xà kên, ne põ rũm ihhêj ne impej atajê nõ pyrãc nare. Ne nee

ca me cuxà Pahpām mā mehçakôc xà jûrkwa me, krĩcape na apu amji pejti jarên to amôr nare. He jûm te impejti na amji mā me harên prãmte ri, ame hajÿr to mō. Ne cute amji mā me harên pejti ata pê riikhêj rûm hãmçwÿr xà. Na quê ha nee Pahpām hipêr cumã ampo jôr nare na, ca me to amji japackrea ne.

³— Ne ca ha cute ampo na me prãm catêjê mā ampo gō, ne ate cumã ampo jôr xà ata na amji to amxu, quê nee gōikwÿ nō peaj ahna gahkre pej nare. ⁴Ca ha ampo pejti to, ne atÿj to amxu, ne ahna amji to apimxur peaj ne, quê nee jûm ahna gahkre pej nare, quê ha Apām Cati pit ate apimxuar pêampo ton xà ata na apupu, ne hahpan xà na amã amgō.

⁵— Ca ha Apām Cati mā acakôc prãm, ne nee apê me caxwãm pê mehkêanre, ne pō rûm mempejti atajê pyrãc nare. He mehkêanre itajê me kam maremã Pahpām mā mehçakôc xà jûrkwa kam mehcuhhê, ne krĩ cape kam mehcuhhê, ne me kam mare mā me cumã Pahpām mā mehçakôc, ahna mehcunea te me hõmpun prãmte. Ne cute amji mā me harên pejti ata pê riikhêj rûm me hãmçwÿr xà na, ca me to amji japackrea ne. ⁶Na ca ha, jûm te Apām Cati pupun xà nare ata mā, me acakôc to prãm, ne gûrkwa caxwÿn mā me acjêj ne amji na me to hihê. Ne curia ca ha aracrijûm te, me ate me Apām Cati mā me acakôc na, me apupun nare xà ata mā me acakôc. Quê ha me Apām Cati ata aracri cumã me acakôc na me apupu, ne hahpan xà na cute me amã hãmjôr xà ata to me amã amgō.

⁷— Ne ate Pahpām mā me acakôc xà atajê kam, ca ha nee me apê mehcakrit pê Pahpām jahkre kêatre atajê pyrãc, ne amji cuxà cumã me acakôc xà atajê pit jarên nare. He ihtÿj amji mā cute me Pahpām mā mehçakôc to iryti ata kôt, cute me kam hapac na amji mā me to hane.

⁸Ne me apê me hûrãc nare. Ampo na? He ate me Apām Cati wÿr xà atajê xwÿjrea na, ramã ahna cumã me gahkre pej.

Matew 6.16-18

Pê Jeju Hũm Cati mā mehçakôc to hahkre

¹⁶— Ca ha gápàn nare kam apijacria kam, Pahpām mā amji cajrên kam pra, ne nee apê jûm pê pō rûm ihhêj ne impej ata ne aracri caxwãm pê cuteamji kam hapac xà kên ata pyrãc nare. Ampo na? He cute me hajÿr catêjê quê ha Pahpām mā mehçakôc tÿaj kam pra, ne ihtÿj pro to ame amji kuc jipro, mār quê mehcunea ahna me hõmpu, necute me ipijacri tÿaj kam Pahpām mā mehçakôc na mehcãmji. Ne cute ampo na amji mãmeharên pejti ata pê ri ihhêj rûm me hãmçwÿr xà. Na ca me to amji japackrea ne. ¹⁷⁻¹⁸Ca ha Pahpām mā acakôc prãm, ne quêt akuc cuhhō, ne akĩ pê, ne amji cûmpej, mār quê nee jûm apijacria kam Pahpām mā me acakôc xà ata na

me gahkre pej nare. Quê ha Apãm Cati pupun xà nare ata pit, atecumã me acakôc xà ata na me gahkre pej. Ne quê ha ate apimxuar pê ampo pejti ton atajê jahpan xà na, cute amã ampo pejti jôr xà ata gõ.

Matew 7.13-14

Pahpãm wÿr pry me harkwa hatàtre

¹³⁻¹⁴— Me ate ito amji mã me ahimpej xà ata pê ihhêj rûm Pahpãm wÿr pry me harkwa jatàtre, ne ipimxurare ata. Mã nee ahna me hàhtôa ne mencjêjnare, ne me pyxitre ne ahna me acjêj. Ne amjia kôt me ipa xà ata pê ihhêj rûm me pahcurê xwÿn jô cuhy wÿr pry, me harkwa pohti ne catihtì ne hirãa pê hikwa ata. Mã me hàhtôa ne ahna me acjêj. Na ca ha me pry hire pimxurare me harkwa hire ata japê — hane.

(Pê Matew Jeju jũjarên xà jarên jicu. Pê Ruc Jeju jũjarên xà jarên kam to incrà to hane he.)

Ikre mã ihcuhhê xà pijakrut

⁴⁶Ne Jeju me cumã:

— Ampo na mã ca ame imã: “Me ijô Pahhiti” hane, ne neejarkwa kôt ame apa nare? ⁴⁷Wa ha me amã ijũjarên xà ita jarê, mâr ca me amã ahna icaca xà jahkre pej. ⁴⁸ÿhÿ, quê ha jûm te ijarkwa kam hapac ne ijarkwa kôt ipa na, quê ha cupê ihhêj rûm hûmre te pjêtyjti kam ikre xãm ata pyrãac. Mã côte hipu, ne ma ikre wÿr cô tẽ, ne cute ikre ata cakwîn, mã nee hàhcujrôn nare, ne hãm peaj na ihtÿj xa. ⁴⁹Mã ihkînte jûm te cama ijarkwa kam hapac, ne nee toamji japackre, ne ihkôt ipa nare, ata pê ihhêj rûm hûmre nõ te pjênxôm cràre kam ikre xãm pyrãac. Mã cô te hipu ne ma ikre wÿr tẽ, ne cute ikre ata cakwîn, mã ihpÿm pyrentu, ne ikre ata jamre — hane. Hõ, pê Jeju hũjarên to hane.

(Pê Ruc Jeju jũjarên xà jarên jicu. Pê Matew hõ kàhhôc kam Jeju jũjarên xà kôt harên to hane he.)

Matew 7.28-29

Pê me hàhtôti me amji mã me ajkra

²⁸⁻²⁹Ne cute me cumã ampo to hahkre jicu, mã me hàhtôti atajê te, cute mempar xà ata to amji mã me ipikrar, ne me ajpên mã:

— Pÿhàpà, mã ajte hûmre ita te me pamã ampo to hahkre xà ita, pê nee cute me pamã Mojxe xwÿ te me pajapackrexà to hahkre catêjê atajê

pyràcnare, ne quêt amjia kôt, harkwa kôt, me pamã ampo to hahkre to ipa — hajÿr.

(Pê Matew Jeju jÿjarÿn xà jicu. Pê Ruc hõ kàhhôc kam Jeju jarÿn kam to incrà to hane he.)

Pê Jeju pahhi mã hàpên catê nõ caprã

7 ¹Mã Jeju te me cumã ampo itajê jarÿn jicu, ne maCapernam jõ krĩ wÿr mō. ²Ne pê curi Roman catêjê nõ ihkrĩ, ne cupê krãhtare te xêj jõ pahhi. Pê pahhi mã hàpên catêhà, ne ramã ihtyc xàa kam nõ. ³Mã pahhi ata te Jeju jarÿn par, ne ihwÿrJuta catêjê pê pahhi kwÿ kujahêc, cute me Jeju japrôr, mã cute hà ata caprãr prãmte. ⁴Mã cute me Jeju cajpar, ne me ahna hàhwÿr crire nare, ne me cumã:

— ÿhÿ, Roman catêjê nõ ita peaj to impej, cwÿrjapê ca ha ihtecajpa.

⁵Nãmri cumã me papê Juta catêjê kían to ihkín, ne cutea ri me imã ite me cuprôn xà jÿrkwa ton. Cwÿrjapê ca ihtecajpa, ne me ikôt mō, ne hà ata caprã — hajÿr.

⁶Mã ma Jeju mehkôt mō. Ne ramã cute ikre têp, mã krãhtare jõ pahhi te hõ ikwÿ nõ catêjê kujahêc, cute me Jeju mã hÿjarÿn prãmte. Mã cute mehcajpar ne me cumã:

— Me ikwÿ nõ te amã harkwa kujahêc to hajÿr he: “Pahhi, akĩnte icrìre ne ikêanre ita kam, wa nee acahpêrkàr prãm nare. Cwÿrjapê ca ha nee ijÿrkwa mã axàr nare. ⁷Ne jÿ wÿr wa ijãa kam amã icakôc, nãmri apê Pahhiti ne akĩnte jÿ na xà na ijamreare, ne ipahàm crire nare. Ca ha cama hà ata mã garkwa ta, quê ha imã hàpên catê ita impej pyrentu, ne capên. ⁸Ne wa hanea ne me ijõ pahhi jarkwa kôt ipa, ne wa ha ijõ krãhtare catêjê mã ijarkwa ta, quê ha ihtÿj meikampa ne ijarkwa kôt me ipa. Ne wa ha jÿm mã, ‘Tê!’ hane, quê ha ihtÿj tê. Ne wa ha mehnōa mã, ‘Ajpêntê!’ hane, quê ha ihtÿj ajpên iwÿr tê. Ne hanea ne wa ha imã hàpên catê mã, ‘Ca ha to hane!’ hane, quê ha ihtÿj to. Ne ijirôa pê acati ita kam, caha cama hà ata mã garkwa ta, quê ha imã hàpên catê ita impej, ne capên pyrentu” — hajÿr.

⁹Mã Jeju xa, ne cute hÿpar xà ita to hÿpar, ne to amji mã ipikrar. Ampo na? Cumã hÿpar xà ita peaj to impej. Na ri cute amji mã ipikrar, ne me hàhtôa neihkôt me mō atajê wÿr ipipkjêr, ne me cumã:

— ÿhÿ, ampeaj kam wa me amã awjarê, Roman jõ krĩ kra ita ihtÿj ikampa, ne ihtÿj amji mã ito ihhimpej. Wa rÿ Juta jõ pjê kam jÿ caxuw, ampeaj kam jÿm te amji mã ito ihhimpej to hajÿr nõ na, impar nare — hane.

¹⁰Mã Roman jõ krĩ kra ita jõ ikwÿ nõ itajê, hacpÿa mã me hÿrkwa wÿr cute me amji jacjên, mã hamre ramã cumã hàpên catê ata pej, ne capên pyrentu.

Pê Jeju impijapit kra tyc to ihtir

¹¹ Ỡhỹ, pê nee curi Jeju na amcro hàhtô nare, pê maPõre jô krĩ wỳr mỗ. Pê ihkôt me ipa catêjê me, me hàhtôa ne ihkôt me mỗ. ¹² Pê Jeju ramã krĩ jô harkwa têp, pê cute me harêt catêjê krĩ jarkwa na, jũm tyc jarêt to me cato. Por pê cahãj pê ihkra ty ata pê ihcãmter cumã pyxítpeaj. Ne iràn xà na cumã mehkjêjê nõ hamreare. Ne pê rỳ pêa mã ramã impjên cupê ty. Pê cute me ihkra jarêt catêjê kôt incwỳr to mỗ. Pê hanea ne me hàhtôa ne krĩ pĩn, mehkôt me mỗ. ¹³ Mã Jeju te cahãj ita cwỳr na hõmpun, ne ampeaj kam cumã caprĩ xà, mã cumã:

— Apu acwỳr nare — hajỳr.

¹⁴ Ne ihkra jarij xà ata na hàhtêp, ne cute me to hàhhuc prãmte ahna hũ xir, mã me to hàhhuc, mã Jeju ihtyc ata mã:

— Hũmre, wa ha amã ijarkwa ta. To xa! — hajỳr.

¹⁵ Mã hũmre ita jỳr pyrentu, ne cute ihcakôc kam toihtêm. Mã Jeju te inxi mã hõr. ¹⁶ Mã mehcunea mã hũpaa to hũpa. Ne ame hakry pyrên ajpên mã Pahpãm to me hàmnãn to me mỗ, ne me ajpên mã:

— Me pamã Pahpãm jarkwa to ihcakôc catê catia nõita cator! Me Pahpãm mormõ cator, cute mepahtehcajpar xà caxuw — hane.

¹⁷ Pê Jeju jarên pejtĩ ita pjê ata cunea kam apu ajcrã. Pê hanea ne cahê na pjê atajê kôt harên apu ajcrã.

Jowãw te me cumrãr catê jarkwa jarên catêjê

¹⁸ Ỡhỹ, por Xacarij me Ixapewkwỳj kra pê Jowãw ata, cormã apu ipa, ne ihtỳj mehcunea mã Pahpãm cator xà caxuw ame amji cũmpej to hũjarên to ipa. Ne por Jowãw kôt me ipa catêjê na cute me amji ton to prãm atajê ri, Jowãw te amji caxuw cô kammehcumrãr. Cwỳrjapê ri cute me cumã haprỳ krut jõr, ne me cumã: “Jowãw te me cumrãr catê” hajỳr. Mã hamre, Jowãw kôt me ipa catêjê nõ te Jeju pupun, ne ma amji jaxàr ne cumã Jeju jarên. ¹⁹ Mã Jowãw te ihkôt me ipa catêjê to ipijakrut ne me cumã hàkjêr, ne me cumã harkwa hydr to:

— Jeju wỳr me tẽ ne mehcukij, ne me cumã: “Xà apê hũmre cator xà ata mã ca? Xà Jowãw te me imã garên ata mã ca ramã acator? Nare xà wa ha pijamã ajkĩ cormã me jũm xũmre nõ ata jikaj?” hane — hajỳr.

²⁰ Mã hamre, ma Jeju wỳr me pra, ne me cumã:

— Ỡhỹ, Jowãw te me cumrãr catê te me imã harkwa hydr, wa me acukij: “Xà apê hũmre cator xà ata mã ca? Xà Jowãw te me imã garên ata mã ca ramã acator? Nare xà wa ha pijamã ajkĩ cormã me jũm xũmrenõ ata jikaj?” — hane.

²¹ Mã amcro ata kam Jeju te me kam mare mã me hàcatêjê jàhtôa ne me caprãr. Ne hanea ne cute me pahcurê xwỳn carõ kên jàhtôa mã me hitête hapôj na harkwa hydr, mã me cupê hapôj. Ne hanea ne cute mento tũm

jàhtôa ne me caprâr, mã ihtỳj me irít. ²²Ne Jeju te ame to hajỳr jirô pê mã ri, cute Jowāw kôt me ipa catêjê mã:

— Ỡhỹ, me amji jaxà, ne ate mempar atajê me, ate me hõmpun atajê to Jowāw mã me awjarê. Pommento tùm catêjê ihtỳj me irít he, ne mehkjê te xwỳcatêjê ihtỳj me capên, ne me hapac tu catêjê ihtỳj me awpa, ne mehtyc catêjê hacpỹa mã mehtĩr, ne me cupêhamreare atajê ihtỳj me Pahpām himpej xà jarên xà impejti kampa. ²³Quê ha jũmjê ikampa, ne cute ikam hapac mã hũcanār, ne nee ito amji pê hapac kêt nare na, quê hahakrya to hakry — hajỳr.

Pê Jeju Jowāw te me cumrâr catê jarê

²⁴Mã ma Jowāw kôt me ipa catêjê te me amji jaxàr ne me pra. Mã Jeju te me hàhtôtĩ atajê mã Jowāw jarên kam ihtêm, ne me cumā:

— Ỡhỹ, pê ca me Jowāw cajpar prãmte ma pō kam mehamreare ata wỳr me pra. Ne ampo pupun prãm to mã, pê ca ame pra? He pê ca nee me hũmre nō pê kôc te apu pĩhõ to tertet pyrãcti ata pupun nare. ²⁵Ne mēr ampo pê ca me hõmpu? Pê ca nee me hũmre ata na cupêhkà impejti nō pupun nare. Ne por mehkà impejti kam ame ipaatajê, ihtỳj quêt ampo pejti cunea jipôc ri, pahhijũrkwa pejti ne catilhti ata kam mehkri. ²⁶Ne me imã amji jarê, ampo pupun prãm to mã pê ca me pra ne me hõmpu? Xà Pahpām jarkwa to mehçakôccatê nō pupun prãmte pê ca ajkĩ me pra? Ỡhỹ, ampeaj kam ri Jowāw pê Pahpām jarkwa to ihçakôc catêjê nōa, ne mehkwy jirôa pê cati. ²⁷He pê rỳ pêa mã ramã Pahpām jô kàhhôc Jowāwjarên to hane he:

“Ỡhỹ, pê Pahpām ihkra mã:

“Wa haacumam ijarkwa na ipa catê kujate, quê ha amã gō pry toimpej’ ” hane.

Hõhõ, pê Pahpām ramã Jowāw jarên to hanea, na ri cator.

²⁸— Ne ampeaj kam wa ha me amã awjarê. Jowāw ri catia to cati, ne taa mã ri quêt me aquêtjê jirôa pê cati çakrô, quê ha jũm crire ramã Pahpām himpej xà krac ri ipa ata, quê ha Jowāw jirôa pê cati — hane.

²⁹Ne pê mehcunea me ampo ita kampa. Pê ihtỳj hanea nepahhi jarkwa na me hàmcwỳr catêjê atajê me Pahpām jarkwa kampa ne hỹrmã meapkjê. Cwỳrjapê pê ramã Jowāw caxuw, cô kam mehcumrã. ³⁰Pê mehkĩnte Parixêw catêjê me, cute me Mojxe xwỳ jô kàhhôc to me cumã hahkre catêjê me, ma ame Pahpām te me to ihhimpej xà ita caca, na pê nee amji na me Jowāw to tojnõ, pê cô kam mecumrâr nare. Na pê Jeju me cumã:

³¹— Ỡhỹ, me atoa wa ha me amã icakôc. Pom ca amcro ita kam, pjê kam ame apa itajê, me apê ahkrare te xuwçacati atajê pyrãac. ³²Ne me

apê me ahkrare te ame hàkrun pyràac. Neme akwỳ amji mã me acaràr to: “Wa ite me amji kīnjõ increr to me icrer, ca ajte nee me icuxà me acrer nare. Ne ite me harêt japête mencwỳr to me icwỳr, ca ajte nee me icuxà me acwỳr nare, ne cama ame xuwca to ame apa”. ³³ Ỡhỹ, me apê ahkrare kwỳ te xuwcacati atajêpyràac. Ampo na? Pê Jowāw cato ne ihtỳj ajcoipijacri to ipa, ne nee ampo cacô to ihkôm nare. Cakrô, ca nee ajte ate mempar ne me hūnār nare, ne cama meto gūjarēn to: “Cupê me pahcurê xwỳn carôkên to ipijapar catê” hane. ³⁴ Wa quêt ipê me Ahàkà, itỳj ampo cunea ku, ne ampo cunea to ikôm to ipa cakrô, ca ajte nee hanea ne ate me ipar ne me ipynār nare, ne cama me ito gūjarēn to: “Hômpu he, hūmre ita jàpàn cati, ne ihkôm cati, ne me cupê pahhi jarkwa na me hàmcwỳr catêjê me, jūmjê kêanre itajê jô ikwỳ nõ nõ” hajỳr. ³⁵ Ỡhỹ, he Pahpām te amji kam hapac xà cunea impej pit, quê ha jūm Pahpām te amji kam hapac xàa kôt ipa na, quê ha cumā amji jahkre pej pejti ne — hane. Hô, pê Jeju me cumā hūjarēn to hane.

Pê Jeju Parixêw catêjê nõ jūrkwā kam apā

³⁶ Mã Parixêw catêjê nõ japyrỳ te Ximāw te, Jeju te hūrkwā kam cahê na ampo krêr prāmte, hator. Mã ma Jeju hūrkwā wỳr ihkôt mō. ³⁷ Pê krī ata kam cahājre inxyre nõ ihkrī, ne cumā Jeju te Parixêw catêjê nõ jūrkwā kam apu mōr na hahkre pej. Ne cute ampo cacô incjên xà kam, ampo cacô cuxwati ata to hipu tu, ne ipyr ne ma hỳrmā to tê. ³⁸ Ne cute Jeju na hàhtêp, ne ihkôn krā na hỳr, ne cute ihkên ton xà atajê jū na ihpahàmte incwỳr kam to ihtēm, ne into cacôa to Jeju par co, ne ihkīa to cumā incrà. Ne ma hōtpêihpar pā, ne cute kam ampo cacô cuxwa pejti ata jaxwỳr.

³⁹ Mã Ximāw te ita pupun, ne amji caxwām pê amji mã:

— Pỳhàpà, xà mōrmō ajkī hūmre ita pê ampeaj kam Pahpām jarkwa to ihcakôc catê? Quê cupê Pahpām jarkwa to ihcakôc catê na mã, quê ha ihtỳj cahāj ita kêanre na hahkre pej. Wỳr quê cupê Pahpām jarkwa to ihcakôc catê quê amji na cahāj kêanre inxyre ita jamā, quê ihtêp ne ihcupê — hajỳr.

⁴⁰ Mã Jeju te Ximāw caca xàita na hahkre pej pyrentu, ne cumā:

— Ỡhỹ, Ximāw, wa ha amā ampo jarê — hajỳr. Mã cumā:

— Hā, gapacta ne imā harê, pahhi — hane.

⁴¹ Mã Jeju cumā:

— Ỡhỹ, pê hūmre ajkrut neihpore to jūm jakràjti ata to new. Pê ita to new cati to quījēnta, ne ita hapyre mã to new to xīncwēnta. ⁴² Ne pê ajwar me cupê ihpore hamreare, me cumā hàmjōr xà caxuw. Ne ampo to quê me hūhkra kam hàmcwỳrcatê ita mã amgō? Mã me hūhkra kam hàmcwỳr catê mã me caprī, mã cute ajwar me to tojnō. Měr hōhō, wa hame ahna acukij, měr jūm quê ha amji jirôa pê hakry, ne cumā to new catê ata kīn? — hane.

⁴³Mã Ximãw cumã:

— Imãa, pom cute to new catihti ata ri hakry — hane. Mã cumã:

— Ỹhỹ, ate to hamãar ne harën — hane.

⁴⁴Ne Jeju cahãj ita wÿr ipipkjêr ne Ximãw mã:

— Cahãj ita pupu he. Wa ixàr, ca ate ihkĩnte nee imã cô kwÿ nare, ite to ipar tũm cuhhõn xà caxuw, mã quêt cahãj ita te intocacõa to imã ipar cuhhõn, ne ihkĩa to imã incrà. ⁴⁵Wa icator, ca nee ate ihkĩnte ijũhkra na ipyr nare, ne nee ate ipãr nare. Mã quêt cahãj ita te nee ipar pãr jicu nare. ⁴⁶Ne nee ate ihkĩnte imã ikrã caxuw ampo cacõ cuxwati nõ jõr nare. Ne cutea ri quêt ipar kam ampo cacõ cuxwati jaxwÿr. ⁴⁷Ỹhỹ, he ampeaj kam wa me amã awjarẽ, Pahpãm te cahãj ita to impej ne cute to kên catihti ita to tojnõ, ne hicu, cwÿrjapê ri ampeaj kam cumãPahpãm kĩn. Ne jũm te Pahpãm to kên crire ata, quê ha cute cumã to tojnõ na, quê ha kyre pê cumã Pahpãm kĩn — hane.

⁴⁸Ne Jeju cahãj ita mã:

— Ite ramã ate ampo to Pahpãm to kên ita to tojnõ ne hicu — hane.

⁴⁹Mã me hàpàn xà na mehkri atajê te me amji mãharën kam mehtẽm, ne me amji mã:

— Pÿhàpà, jũm xũmre mã ajte, mã ihtÿj cute jũm te Pahpãm to kên ita to tojnõ nehicu? Cõt mã cupê Pahpãm? — hajÿr.

⁵⁰Mã Jeju cahãj ita mã:

— Ampeaj kam ate ito amji mã ahimpej, cwÿrjapê ri Pahpãm te apytãr. Na ca ha apej pẽa mã mõ — hane.

Pê pyjê kwÿ Jeju kõt ipa

8 ¹Pê amcro nõ na, ma Jeju krĩ jãhtõa kõt mõ, ne ma krĩ wẽn kõt me hapõj to me mõ, ne Pahpãm pê Pahhiti na harën xà impejti atajê jarën to mõ. Pê ajco ihkõt me ipa catêjê te tõi atajê ihkõt me mõ. ²Pê hanea ne pyjê kwÿ cahãj tẽte Jejume pahcurê xwÿn carõ kên kwÿ japõj atajê me, hà kwÿ na me caprã atajê me, ihkõt me mõ. Atajê japrÿ pê hane he: Marij Matarkwÿj, pom pê Jeju cupê me pahcurê xwÿn carõ kên te xet japõj ata me, ³Jowanakwÿj pê Cuxa pê pahhi Heroti mã hàpencatê ata me híxi me, Xuxankwÿj me. Mehkwy jãhtõa itajê pê ihtÿj ajco me Jeju tehcajpa, ne pyjê atajê pê ihtÿj Jeju kõt me ipa catêjê ajco me hamãr to me ipa, ne me hàhcukrêj to mehtehcajpar to me ipa.

Amo hy kre catê jarën xà

⁴Ỹhỹ, pê krĩ jãhtõa pĩn, cute me Jeju pupunprãmte, me cuprõ. Mã Jeju ame cumã ampo to hahkre, neme cumã hũjarën xà jarẽ, quê mempar to impeaj ne, ne me cumã:

⁵— Ỹhỹ, amo hy kre catê ma hõ pur wÿr tẽ. Ne hÿrmã cator, ne ampo hy kre to mõ. Ne pê ihkre xà ata hane he, pê cama ihcahkũm to mõ. Mã

hamre, ampo hy itajê kwỳ prya kam ipijaxwỳr, mã incwỳar pê me pra, mã hanea ne pryjara te ihkwỳ krēr, mã hamre. ⁶Mã ampo hy ita kwỳ pjê kam kēnti ata kam ipijaxwỳr, ne huprāj pê incrà pyrentu. Ampo na? Kēnti kam pjê ita pururure, ne incràre, ne nee inco nare, na ri incrà ne hamre. ⁷Ne ampo hy ita kwỳ hōmjĩ me hipe kam ipijaxwỳr itajê, hipe me ajkaam huprāj. Mã hipe te hipej, mã hamre. ⁸Mã hōtpê ampo hy ita kwỳ pjê impejti kam ipijaxwỳr, ne huprāj, ne cati to mō, ne ipicamēn to mō, ne apu ihkà, ne hàhtōa to hàhtō. Ỡhỹ, ca ha me ikam gapac to impejti na, ca ha atỳj me hahkre pej — hane.

Ampo hy kre catê jarēn kôt harēn xà

⁹Mã me cumã hũjarēn jirô pê, ihkôt me ipa catêjê te mehçukij, ne me cumã:

— Ỡhỹ, ampo to mã ca ame imã hahkre? Gũjarēn xà jũjê to mã ca ame imã awjarê? — hajỹr. ¹⁰Mã Jeju me cumã:

— Ỡhỹ, quê ha catyt kam Pahpãm me amã ampo cunea to hahkre, ne me amã to capô to impej partu ne. Ne pom Pahpãm me apê ampo cunea jarēn to amxu atajê, quê ha me amã harēn to capô partu ne. Na wa ha nee jũmjê atajê mã hirã pê ampo itajê to hahkre nare, wa ha cama me cumã hũjarēn xà itajê incwỳrpê harēn to ipa, mār quê ha cama me ikampa, ne nee me hahkre pej pej nare, ne me rít, ne nee me ampo pupun pej nare.

¹¹— Ỡhỹ, wa ha me amã cōjkwa kam Inxũ Cati himpej xà jũjarēn xà pê ampo hy kre catê jarēn xà itajê capô pa. Ne pom ampo hy itajê pê ihhêj rũm Pahpãm jarkwa pyrãac, ne pom pjê kam ipijaxwỳr itajê pê ihhêj rũm, mehĩ pyrãac.

¹²— Ne pom pry kam ampo hy pijaxwỳr itajê pê ihhêj rũm jũmjêa pyrãac, ne cute me Pahpãm jarkwa par pyrentu. Ne me ahna ahtũm nare mã me pahçurê xwỳn te mentête Pahpãm jarkwa to pōj. Ne ampo na ri cute me to hajỹr? Quê nee hipêr me Pahpãm jarkwa kôt ame ipa nare to prãm to ri, cute me to hajỹr.

¹³— Ne pom pjê kam kēnti atajê pê jũmjê pyrãac, necute me Pahpãm jarkwa par, ne kam me hapac to impejti, ne hũrēn ame hakry, ne me hũpar kam mehtēm. Ne me ahna ahtũm nare mã me pahçurê xwỳn te me capi, ne ame to kēn, mã cute ahna ame amji jicu, ne me hamre.

¹⁴— Hanea ne, pom hipe kam hōmjĩ kam ipijaxwỳr atajê pê jũmjê pyrãac, ne cute me Pahpãm jarkwa par pyrentu, ne me hũpar kam mehtēm. Ne hanea ne me ahna ahtũm nare, mã me caxwãm pê mehçrihkrit te me kamihtēm, mã ihtỳj amji to me hakrāj cati prãm, ne me hakrāj atajêa to hãn ne amji mã me amji kĩn ton to me ipa to prãm. Ne cute me hajỹr itajê te me to hamre. Cwỳrjapê, quê nee jũm ata ihkà ne ampo pejti ton nare.

¹⁵— Ne pom pjê impejti kam ipijaxwÿr itajê pê jÿmjê pyràac, ne cute me Pahpãm jarkwa par, ne me hÿpar pyrentu, ne Pahpãm jarkwa kôt me mō. Ne ihtÿj harkwa kôt me hÿcanār to me mō, ita kam cute me ampo pej jàhtōa ne me ton — hane. Hō, Jeju te hÿjarēnto hajÿr.

(Pê Ruc Jeju jÿjarēn xà jarēn jicu. Pê Matew hō kàhhôc kam hanea ne Jeju jÿjarēn xà jarēn to hane he.)

Matew 13.24-30

Arÿjhy cahàc kên jarēn xà

²⁴Ne Jeju te hipêr me cumã hÿjarēn xà nō jarēn, mār quê ampeaj kam hÿjarēn xà ita to me amji kampa, ne me cumã:

— Ÿhÿ, cōjkwa kam Pahpãm himpej xà ata pê ihhêj rÿm me hÿmre te ame pjê impejti kam ame arÿjhy impejti kre pyràac. Ne me hō pur kam arÿjhy pit, ne nee kam ampo hy cahàc nō te ihho nare. ²⁵Mã caxwa ata kam ihtÿj nō ne gōr. Mã ihwÿr curê xwÿn cator, ne aracri cute arÿjhy cahê na ampo hy kên ata kre, ne ma tē. ²⁶Ne ahna putwÿrÿ pyxit, mã pea arÿjhy cahkō ata kà, ne cute amji to ihhy, mã hanea ne ampo hy kêanre pê ahkêt ita cator ne kam ihhy.

²⁷— Mã hamre pur kam me hâpên catêjê atajê te me hōmpun, ne ma hō pahhi wÿr me cator, ne me cumã: “Me ijō pahhi, mār ca ate gō pur kam arÿjhy impejti kre ita? Nō na mã ajte jÿ rÿm ampo hy kên ita cator?” hajÿr.

²⁸— Mã me hō pahhi me cumã: “Me pahcurê xwÿn nō te mōrmō ita ton” hajÿr. Mã cute mehçukij to: “Xà wa itÿj me ampo hy kêanre ita to pōj pyrentu?” hajÿr.

²⁹— Mã me cumã: “Quê. Ampo na? Ca ha me to pōj pyrentu ne aracri ihkôt mempej nō capa. ³⁰Quêt taa ampo hy kên ita ihcuuhê, quê ha ahnaa ampo tep xà kam ahtwÿ, wa hacormã me amã harê, ca ha mam me ampo hy kên ata jarê ne mehpre ne cuhy kam me haxwÿ. Jirô pê ca ha cormã me arÿjhy impejti ata jirê ne mehpre, ne nōrxà kam me haxwÿ” — hajÿr.

Matew 13.36-52

Arÿjhy cahàc kên jarēn kôt harēn xà

³⁶Mã Jeju te me hàhtōti atajê jicu, ne ma ikre nō ma hār. Mã ihkôt me ipa catêjê te ahna me hàhtêp, ne mehçukij to:

— Me ijō pahhi, ampo jarēn mã ca ame imã harê? Ampo kôt harēn xà mã ampo hy kêanre ita? — hajÿr.

³⁷Mã Jeju me cumã:

— Ipê me Ahàkà pê ampo hy impejti kre catê ata pyrâac. ³⁸Ne pur ata pê pjê pyrâac. Ne ampo hy impejti itajê pê me hũmre pê Pahpãm tekjê atajê pyrâac. Ne ampo hy cahàc kêanre ita pê me hũmre kêanre atajê pyrâac. Ne me cupê mepahcurê xwÿn pê Xatanaj tekjê, na ri taa me to ihhimpej. ³⁹Ne arÿjhy kêhkên xà ita pê ri ampo cunea jamre xà kam Pahpãm te ajpên pê me atoipicokjêr xà pyrâac. Ne me hàpên catêjê itajê pê cõjkwa pîn Pahpãm mã memprar catêjê.

⁴⁰— Ahnaa mã ampo hy kên ata te caxàr xà na cuhy kam me haxwÿr xà he, jìkjê na quê ha ampo cunea jamre xà ata kam, ihtÿj me hũmre kêanre itajê to hane. ⁴¹Quê ha ipê me Ahàkà pjê ita wÿr cumã memprar catêjê kujate, quê ha Pahpãm pêPahhiti himpej xà ata pê, cute mehkwyê kên na me ton catêjê atajê me, cute me ampo kên ton to me amji pyrâc catêjê atajê mea mã, me to põj partu. ⁴²Ne jũ caxuw Xatanaj jõ cuhy prà tyc xà nare ata kam me haxwÿ, quê ha ame amrà, ne me wa gyj, mehkàj xàhte. ⁴³Ne Pahpãm na mehkwyê, quê ha quêt Pahpãm pê Pahhiti himpej xà ata kam mehtetetti ne, ne curia ihhimpej xà ata krac ri, cahê na mehkri. Ne quê me gÿpar xà caxuw me akam me gapac na, ca ha atÿj me awpa.

Ampo pejti pimxur jarên xà

⁴⁴— He cõjkwa kam Pahpãm himpej xà pê ihhêj rũm jũm xũmre nõ te jũm jõ pjê kam wakÿre prà tepti pê ôr na hĩ jàhwÿr catiamã cator, ne hacpÿa mã curia to ipimxur pyrâac. Ne cumã amji kïan kam cumã hàhcukrêjatajê cunea to ihpore na hàhpan, ne hàhcukrêj jõ pore ata to, cute pjê kam ôr jĩ jàhwÿr catia to pimxur ata japrôr. Ne cute pjê ata to hõ tekjêjirô pê mã ri cormã cute ôr jĩ jàhwÿr catia caxàr.

Kên jaka pràti jarên xà

⁴⁵— He hanea ne Pahpãm himpej xà pê ihhêj rũm jũm te kên jaka pràti japrôr catê nõ pyrâac. ⁴⁶Quê ha jũ ri ihnõ impejti na, hĩ jàhwÿrti ata nõ pupu, ne ma tẽ ne caxuw cumã hàhcukrêj atajê cunea to ihpore na apha, ne ma to tẽ, neto kên jaka pràti ata japrô.

⁴⁷— Ne hanea ne Pahpãm himpej xà pê ihhêj rũm cõ kam kryhti to tep pro xà ata pyrâac, ne ajpên caxuw tep cunea na ihpro. ⁴⁸Ne quê ha tep to hipu, quê ha cumã ipêr catêjê amcrà wÿr me cupjê, ne me to api, ne me to ihkri, ne tep to ame ajcokjê pyrâac. Ne impejcatêjê quê ha kàhà kam me cucjê, ne ihkêanre catêjê quê ha ma põ mã me to awcapê.

⁴⁹— Ita jìkjê na quê ha ampo cunea jamre xà wÿr, quê ha Pahpãm mã memprar catêjê, cõjkwa pîn me hapõj, ne mempej pê Pahpãm na mehkwyê tête mehũmre kên to haprãr partu. ⁵⁰Ne Xatanaj jõ cuhy tyc xà nare ata kam mehkên catêjê cunea to me awcapê, quê ha curia mehkàj xàhte ame amrà, ne ame wa gyj — hane.

Ampo wej me intuw jarĕn xà

⁵¹ Mă Jeju te ihkôt me ipa catêjê cukij to:

— Xà ca ate me ampo ita par? — hajÿr. Mă me cumă:

— Ỹhÿ — hane.

⁵² Mă me cumă:

— Ca ha me ate, ite amji kam ijapac xà kam me gapac, ne hanea ne ate me Mojxe xwÿ te me hapackre ne me cumă to hahkre na, ca ha me apê ihhêj rŭm jŭm pê mehkra mă hŭrkwa pĭn cute ampo wej me ampo tuw to hapôj pyrăac. Neihtÿj me cumă mam cute amji kam me hapac xà wej me hapu na, curmă cute amji kam me hapac xà intuw itato hahkre — hane.

(Pê Matew hŭjarĕn to hane. Pê Ruc hacpÿa mă hõ kàhhôc kam harĕn kam tĕ.)

Hàhcujiro xà jarĕn xà

¹⁶ Pê cormă Jeju me cumă:

— Ỹhÿ, jŭ wÿr quĕ ha jŭm ihpôc xà nō jàhcujiro xà caxuw ihpôc, ne paraj krac ri hăm, nare pàrkwÿc krac ri hăm. Quĕ nee jŭm ihpôc xà nō to hajÿr nare. Quĕ ha quĕt hàhcujiro xà ata pôc ne hăm xàa kam hăm, cute mehcujiro mă menciêj, ne me hàhcujiro pupun prămte. ¹⁷ Ne por jŭ ri ampo pimxur atajê, quĕ ha ihtÿj mehpro mĕ, ne me hõmpu. Ne hanea ne awcapàtkô kam ampo pimxur atajê, quĕ ha ihtÿj me hõmpu, ne me hahkre pej. Ampo na? Ramă hàhcujiro xà ata teihcujiro na ri, cute me hõmpun.

¹⁸ — Cwÿrjapê ca ha me ikampa, ne ikam me gapac peaj ne. Pom ramă jŭm mă ampo ata, quĕ ha Pahpăm cumă ata jirôa pê, hipêr cumă cugô, ne por ramă jŭm pê ampo kryjre, ne cupê hamreare ata, quĕ ha ihtÿj hacpÿa mă Pahpăm cupê to pôj pa — hane.

(Pê Ruc hŭjarĕn to hane. Pê Macô hanea ne hõ kàhhôc kam Jeju jŭjarĕn xà kôt harĕn to hane he.)

Macô 4.26-29

Hŭmre te pjê kam ampo hy kre jarĕn xà

²⁶ Pê Jeju me cumă harkwa to:

— He Pahpăm himpej xà pê ihhêj rŭm me hŭmre te pjê kam ampo hy kre. ²⁷ Ne ma tĕ ne ihtÿj apu ipa. Mă pjê krac ri ampo hy ata aracri huprăj to mō, cute huprăj to mōr xà ata na hahkre pej nare kam. ²⁸ He pjê ita ri cumă hō gō, quĕ ha mam hiprăj cato, jirô pê mă, quĕ ha kam

ihhy krekà cato, ne ahna ahtüm nare quê ha kam ihhy, ²⁹ne intep, quê ha caxuw wapo py ne to hakep. Ampo na? Ramã intep ne hakep xàa kam na ri — hane.

(Pê Macô hũjarên to hane. Pê Ruc hacpỹ mã mã hõ kàhhôc kam Jeju jarên kam tẽ.)

Pê Jeju menxi me, mehkjêjê ahna me ahcukij

¹⁹Mã hamre, Jeju menxi me, mehkjêjê me, hỹrmã me mō. Ne jũ wÿr quê cute ahna me hipu tu ita kam hỹrmã me axà. ²⁰Mã jũm te Jeju mã me harên to:

— Ỹhỹ, ihmat xà pō pê anã me, me akjêjê me, mehcuhê ne me gikaj, cute me amã mehcakôc prãnte — hajÿr.

²¹Mã Jeju mehcunea mã:

— He quêt Pahpãm jarkwa kam me hapac catêjê me, me hũpar to me ipa atajê pê ri ijō inxê me, me ikjêjê — hane.

Pê Jeju kôcti to ankrê

²²Ne amcro nō na Jeju pâr kre mã hâr, ihkôt me ipacatêjê me, mã me cumã:

— Hacme, ne hĩpôjĩkjê mã me rê — hane. Ne ma me mō. ²³Ne cormã me irêr to me mō, mã Jeju jôt, mãkôc pahtÿjti te hãpêr kam ihtêm, mã ramã cô harô topra, ne ihtu to pra, ne ihtÿj pâr kre mã incjêj to mō. Ne tãkam ry cute pâr kre to hipu to mō, ne ramã mehkên mã me hâr xàa kam me mō.

²⁴Mã Jeju kôt me ipa catêjê ma hỹrmã me tẽ, ne cute mehcujrôn, ne me cumã:

— Me ijō Pahhi, cu ramã me papictor xàa kam me mō — hajÿr. Mã Jeju jÿr, ne cutekôc me cô mã harkwa to:

— Me ankrê! — hajÿr. Mã pea kôc me cô pinkrên pyrentu, ne ihcunea pinkrên. ²⁵Mã ihkôt me ipa catêjê mã:

— Ampo na mã ca nee amji mã me ito ahimpej nare — hane. Mã cute amji mã me ipikrar crire nare, ne ame hũpa, ne me amji mã:

— Pÿhãpà, jũm xũmre mã ajte? Mã ihtÿj ajte kôc me cô te impar — hajÿr.

Pê Jeju hũmre nō kam me pahcurê xwÿn carō kên kwÿ caprã

²⁶Ne ma, Querat catêjê jō pjê kam, Hĩpôjajo jō pjê jĩkjê kam me cator. ²⁷⁻²⁹Mã Jeju pâr kre pê cator pêê mã hũmre nōhỹrmã cator, ne cute ihcajpar. Ne pê kam me pahcurê xwÿn kwÿ carō kên jãhtôa ne cumã acjêj ne kam ihkrĩ. Cwÿrjapê pê ihcakrô apu ipa, ne nee ihkà kam apu ipanare, ne nee ikre nō kam ihkrĩ nare, ne ma me harêt xà, pê kên kre kam pê

ihkrĩ. Ne pê ramã me pahcurê xwÿn carõ kên itajê, hũmre ita mã incjêj to hàhtôa to hàhtô, ne ihtÿj ajco cute amji to kên na cumã hũjahkre to ipa. Pê amji caprÿ to mehũkjê atajê ajco mehpro, ne wakÿre teme huwapre xà to me hũhkra me, mehpar juwapre. Pêajco ampo carõ kên atajêa me cumã hirên pa, ne ma põ mãhaprô ne ajco to ipa. Mã Jeju te hũmre nõ ata kam me pahcurê xwÿn carõ kên pupun, ne cupê cator na cumã harkwa hydr. Mã hamre, hũmre ita te Jeju pupun, ne cute caràr kamihtêm, ne cuna mã ihpÿm, ne kÿj cati pêa mã cumã:

— Pahhiti me hirôa pê cati kra pê Jeju, ampo to ca ha me imã? Wa ha me awÿ, ca nee ame ito kên nare — hajÿr.

³⁰Mã Jeju te ihcukij, ne cumã:

— Jũ mã mã gaprÿ te? — hajÿr. Mã Jeju mã:

— Ijaprÿ te Me Hàhtôti — hane. Ne ampo na pê amji jarên to hane? Pê ramã me pahcurê xwÿn carõ hàhtôa ne hũmre ita mã acjêj, na pê amji jarên to hane. ³¹Mã me pahcurê xwÿn carõ kên itajê kwÿ Jeju naahwÿa to ahwÿ, mãr quê nee pjê ata têtê ihkãkãnti kam cuhyhti ata wÿr mehkujahêc nare.

³²Ne pê curia hàhkà jakôt na crô hàhtôa ne apu hàpàn to ipa. Mã ampo carõ kên atajê te cumã incjêj prãmte ahna Jeju wÿr, quême to tojnô, quê crô atajê mã ame acjêj. Mã Jeju te ahna me cumã harkwa, ne me to tojnô.

³³Mã me pahcurê xwÿn carõ kên hàhtôti atajê cuneame hũmre nõ ata pê cator, ne ma crô mã incjêj. Mã ma cô mã ihprôt, ne hàpkãjti pìn hĩpô kam ihpÿpÿm, mã cô te hipej tu.

³⁴Mã crô jamãr catêjê te ita pupun, ne ampeaj kam me cumã hũpa. Mã ma hũpate me pra, ne pryne, pur me, krĩ kôt ame harên to me ipa. ³⁵Mã cute mempar catêjê ma Jeju pupun prãmte, ma hÿrmã mehprôt. Ne me cator, ne ahna mehàhtêp, ne cute me Jeju te hũmre intête me pahcurê xwÿn carõ kên to pøj ata pupun, ne hõmpun xà ata to amji mã me ipikrar crire nare, ne me cumã hũpa. Ampo na? He hũmre ita aracriihkãa kam ihcarĩcti jÿ, Jeju cahê na. ³⁶Mã cute me ampo ata pupun atajê te mehcunea mã Jeju te hũmre caprãr ata na harên. ³⁷Mã Querat catêjê jô pjê kam mehcunea mehkrĩ atajê mã Jeju jũpaa to hũpa, mã cute me hõ pjê pê cator na hàhwÿr. Mã Jeju pàr kre mã hàr.

³⁸Mã hũmre pê ampo carõ kên japôj ata te Jeju nahàhwÿr, ne cumã:

— Ito tojnô, wa akôt mō — hajÿr.

³⁹Mã Jeju cumã:

— Hãpà, ca ha amji jaxà, ne ma gũrkwawÿr tẽ, ne me akwÿ wÿr acato, ne me cumã Pahpãm te ato impej na amji jarê — hane. Ne ma ihkôt me ipa catêjê me, me mō. Mã ma hũmre ita krĩ cunea kôt Jeju te cumã ampo pejti ton xà ata na me cumã amji jarên to mō.

Pê Jajrô ihkra caxuw Jeju mã akij

⁴⁰Mã ma Jeju te hĩpô jĩkjê wÿr amji jaxàr. Mã curi mehcunea jàhhuc. Ne por curi ame Jeju jikaj to me ipa atajê, cute amji jaxàr xà pyrên ame

hakry. ⁴¹Mã hũmre nõ japrỹ te Jajrô hỹrmã cator, ne cupê Juta catêjê te me cuprôn xà kam me to ihhimpej catê, krĩ ata kam. Ne Jeju w̃yr cator, ne cuna mã ihp̃ym ne cute ahna hàhw̃yr, mãr quê hũrkwa w̃yr mō.

⁴²Ampo na ri cute to haj̃yr? Nee mã ampo na nare, cumã ihkra cuprỹre pyxit peaj na caku te tōxi ata caxuw ri, cute tohaj̃yr. Pê cupê hà ne ramã ihtyc xàa kam nõ na pê. Mã ma Jeju ihkôt mō. Mã me hàhtôa ne ihkôt me mō, ne me hĩ to amji w̃yr me Jeju kujahêc to me mō.

⁴³Mã me hàhtôti ata catàtkre na cahãj nõ ata cator, nepê cahãj ata ramã hà ita na ahna caku tōxi, mã hà ita na ipa. Pê ajco caprô ajxw̃y, pê ramã amji na caj jàhtôa ne cumê, pê tee ame caprã, pê nee impej nare. Pê cama amji na ramã hō pore cunearên pa, ne nee impej nare. ⁴⁴Ne Jeju kôt mō, ne cute ahna hàhtêp tu, ne hōkôt ahna hitô kà cyt. Mã caprô crã pyrentu.

⁴⁵Mã Jeju te mehcukij to:

— Jũm te mã ikà cyt? — haj̃yr. Mã mehcunea amji na me hàprãr pit, mã Petrô cumã:

— P̃yhàpà me ijō pahhi, pom mehcunea apu ajpênw̃yr me hĩ to me akujahêc to me ipa ita? — hane.

⁴⁶Mã Jeju me cumã:

— Jũm te icyt, mã ipê icarôt cator, wa ite amji cajpêr — hane.

⁴⁷Mã cahãj ata te cupê amji to ipimxur nare na amji jahkre pej, ne ma Jeju w̃yr ihtertet to mō, ne mehcunea jipôc ri, cuna mã ihp̃ym, ne cute ihcyt na cumã amji jarên. ⁴⁸Mã Jeju cumã:

— Ikra, ca ate ito amji mã ahimpej to haj̃yr, cw̃yrjapê ri ramã apej. Na ca ha apej pêa mã mō — hane.

⁴⁹Ne cormã Jeju apu cumã ihcakôac kam, mã Jajrô w̃yr cumã hàpên catê ata cator, ne cumã:

— Ijō pahhi, hamre, ramã akra cuprỹre ata tyc, na ca ha nee hipêr apu Jeju cahpêrkàr to amôr nare — hane.

⁵⁰Mã Jeju te kam hapac, ne Jajrô mã:

— Apu pa nare, ne cama ito pit mã amji mã ahimpej, quê ha iht̃y amã akra impej — haj̃yr.

⁵¹Ne ma curi Jeju cator, ne amji kôt Petrô me Jowãw me Tijac me, me to hàr, mã nee mehkôt hũm me inxi me, jũmjê xàr nare. ⁵²Pê mehcunea ikre kam ame amrã, ne me hàhkrihkrit catia to cati, pê ramã cuprỹre ata ty na pê ame amrãhti. Mã Jeju te me cumã:

— Hamre, me acw̃yr jicu, he nee cuprỹ ita tyc nare, ne cama nõ ne gôr — haj̃yr.

⁵³Mã mehcunea, cute me cuprỹ ita tyc na mehahkre peaj xà na ame cumã.

⁵⁴Mã Jeju hỹrmã mō, ne cute hũhkra na ipyr, ne k̃yjcati pêa mã cumã:

— Cuprỹ ita, to xa! — haj̃yr.

⁵⁵Mã cuprỹ ita hacp̃ya mã iht̃r, ne hãm pyrentu. Mã Jeju te cumã harte na me cumã harkwa. ⁵⁶Mã hũm me inxi te amji mã ipikrar, ne me

cumãpaa to pa, mã Jeju te me cumãn, quê nee jũm mãhacpãa mã cuprÿ ita tĩr na me harẽn nare.

(Pê Ruc Jeju jarẽn jicu, mã Matew te hõ kàhhôc kam hanea ne Jeju jarẽn to hajÿr he.)

Matew 9.27-38

Pê Jeju mento tũm to ajkrut ne me caprã

²⁷Pê pjê nõ kam Jejuapu mõ. Mã mento tũm pijakrut ne ihkõt me cumãhàkjêr to mõ, ne me cumã carår to:

— Pahhi Tawi xwÿ tàmwxwÿ ita, me icaprãa ne — hane.

²⁸Mã ma Jeju mõ ne ikre nõ mã me to hår, mã mento tũm atajê hũ na pire mã me xa. Mã cute mehcukij to:

— Xà ca ampeaj kam ajkĩ amji mã me ito ahimpej? Xà ampeaj kam ite me acaprår na ate amji mã me ito hajÿr? — hajÿr. Mã me cumã:

— Ỹhÿ pahhi, ca ha atÿj me icaprã — hane.

²⁹Mã Jeju te hũhkrahhi to mento huc, ne me cumã harkwa to:

— Pom ca ampeaj kam ito amji mã me ahimpej xà ita te ri me acaprår — hajÿr. ³⁰Mã hamre, mento itajê caprår pyrentu, mã ihtÿj me rĩt. Mã Jeju te me cumã harkwa to:

— Ca ha nee jũm mã ite me ato hajÿr xà ita na me ijarẽn nare — hajÿr.

³¹Mã ma me pra, ne cute me to ihhimpej xà ata kaj na, ihtÿj pjê ata kam mehcunea mã Jeju jarẽn to me mõ.

Pê Jeju ihpêrkêt caprã

³²⁻³³Ne memprar jirõ pê mã ri ajpên Jeju wÿr me jũm xũmre kam ampo carõ kên, mã ipêrkêrne nee ihcakôc nare to me mõ. Mã Jeju te intête ampo carõ kên ata cator. Mã cute ihcakôc kam ihtêm. Mã cute me hõmpun catêjê atajê te amji mã me to ipikrar, ne me ajpên mã:

— Wa rÿ jũ caxuw ite me pajõ pjê ita kam, iteme ampo pejti te hajÿrjê nõ pupun nare — hajÿr.

³⁴Cakrõ mã Parixêw catêjê te ajteare mã me harẽn to:

— Ampo carõ kên jõ pahhi te ri cumã cute mehkwy japôjxà caxuw carôt jôr, ne nee mã Pahpãm te cumã hõrnare — hajÿr.

Pê Jeju mã me caprĩ cati

³⁵Mã Jeju krĩ cati me krĩ kryjre cunea pupun toihkõt hapôj to ipa. Ne ihtÿj Juta catêjê te me cuprõnxà atajê kôt, me cumã Pahpãm te me to ihhimpej xà jarẽn xà impejti na harẽn to ipa. Ne ihtÿj Hũm carôt kôt hãpên xà pihho ton, ne me hà catêjê cuneacaprår to ipa. ³⁶Mã Jeju te me

hàhtôti atajê pupun, ne ampeaj kamcumã me caprĩ xà. Ampo na? Por atajê mã amji kìn nare, ne me caxwãm pê mehpeace, mã cama mehkrĩ ne ameajkampa. Ne me cupê ihhêj rûm carà cahàcre pê hamãrcatê nare ata pyrãac, ne ihtÿj ame ipa, na ri ampeaj kamcumã me caprĩ xà. ³⁷Ne cute ihkôt me ipa catêjê mã harkwa to:

— Ampeaj kam me pajâpên xà pê Pahpãm wÿr me to mepapipkjêr xà ita cati. He me pajâpên xà ita pê ihhêj rûm pur kam ampo hy to cuprôn xà pyrãac. Ne me to hàpên catêjê ri cormã mencre. ³⁸Na ca ha cõjkwa kam Pahhiti na me ahwÿ, mãr quê hipêr ajpên me pamã me hàpêncatêjê kwÿ kujate, quê me cumã hàpên xà ita to apê — hajÿr.

(Pê Matew Jeju jÿjarên xà jarên jicu. Pê hacpÿ mãa mã Ruc hõ kàhhôc kam harên kam tẽ.)

Jeju kôt me ipa catêjê te tôxi jâpên xà

9 ¹Amcro nõ na Jeju te ihkôt me ipa catêjê mã hàkjêr, ne cute me cumã harkwa hyr to:

— Ca ha ma krĩ kôt me ajcrà, ne me kamme pahcurê xwÿn carô kên atajê, ca ha mentête mehcunea japôj, ne me hà catêjê cunea caprã — hajÿr. Ne cute ampo na me cumã hÿjahkre atacaxuw carôt tÿj catia ne hõr. ²Ne cute me cumã harkwa, quê mehcunea mã Pahpãmpê Pahhiti na me harên to me mõi, ne hanea ne me hà catêjê caprãr to me mõi.

³Ne cute me cumã harên to hajÿr he:

— Ýhÿ, ca ha nee amji mã ampo catia tur nare. Ne nee pĩ cajrer to ame aprar nare, ate ahna me amji cajpar xà caxuw. Ne nee akàhà me, me gõi me, ihpore to me aprar nare. Caha me akatkà pyxit peaj to me pra, ne nee amehkwÿ incwÿr nare. ⁴Ne ca ha jamã ne krĩ mã me gapôj, ne jÿ ri ikre kam, cute me guwahĩ xà ata ri ame apa, ne ahnaa krĩ ata pê me gapôj. ⁵Quê ma krĩ nõ kam ame acurê, ca ha cupê me gapôjpyrentu. Ne me gapôj xà wÿr hãn ne me apar tete me pro jacrô capĩ, ne me hÿrê. Ne me hÿrêan kam me cumã gÿjarên to hane he: “Ýhÿ, ca nee me gÿpar nare, ne nee me ipar nare ijÿjarên xà ita na, cwÿrjapê wa ha nee hipêr ita ri ame imõi nare!” hane — hajÿr.

⁶Mã ma ihkôt me ipa catêjê cahkÿm, ne ame pra, krĩ kryjre cunea kôt, ne me Pahpãm jarkwa pejti jarên to ame ipa. Ne pjê cunea kam me hà caprãr to me ipa.

Pahhi pê Heroti pê amji jahkre kêatre

⁷Pê Heroti pê Hÿpôjajo jõi pjê jõi pahhi, ne ajcoJeju te Pahpãm carôt kôt ampo pihho jàhtõa ne ton atajê na harên pa. Nehÿpar xà atajê na, cupê amji jahkre kêatre. Pêajco ame cumã hÿjarên to hane he:

— Ýhÿ, Jowãw xwÿ te mecumrãr catê ri hacpÿa mã ihtÿr — hane.

⁸Pê ajco mehkwy me hūjarēn to, quē Erij xwý te riamji pēr, nare, mam Pahpām jarkwa to ihcakôc catê nōata mōrmō hacpÿa mã ihtír. ⁹Pê pahhi Heroti ajco taa amji mã:

— Pÿpÿn, pê wa pa Jowāw xwý krā jakep na ijarkwa ta, pê me hakep ta? Ne mēr jūmxūmre mã ajte? Pom wa ampo itajê na harēn pa ita? — hane. Ne tee pahhi Heroti apu Jeju pupun prām.

(Pê Ruc hūjarēn jicu. Pê Macô hō kàhhôc kam harēn to hane he.)

Macô 6.17-29

Jowāw pê me cumrār catê tyc xà

¹⁷Pê ramã putwry nō na pahhi Heroti ita Jowāw pê me cumrār catê ata pro na to awjahkre. Pê me hūhkra cajpre ne hacjên xà mã me haxà. Ne ampo na mã pê me to hane? Nee mã ampo na nare. Pê pahhi Heroti tō japyr pê Pirip ata prō japyr Herotijkwýj. Pê Heroti mã ihtō prō ata kīnti, mã cute cupê caxàr ne cume hikwa. Mã ihtō pê Pirip ata ahte apu ipa. ¹⁸Mã Jowāw pê me cumrār catê ata te me hōmpun, ne ma pahhi pê Heroti ata wÿr tē ne cumã:

— Ampo na mã ate atō pê ihprō caxàr? He ate Mojxe xwý te me pajapackre xà kaj na ton — hajÿr.

¹⁹Mã pahhi prō pê Herotijkwýj te harēn xà ita par, ne ahna cupê ihkaj na. Na ri ma apu Jowāw curê ne ihtÿj cumã ihcuran prām. ²⁰Mã jū wÿr quē ihcura. Ampo na? He Jowāw pê hūmre impeaj ne ajco catyt kam ipa, na pê Heroti mã hūpa, ne ihtÿj ihkên pê hūtār to prām. Pê ajco Jowāw pahhi japackre, pê kampa ne cupê amji jahkre kêatre cakrô, ihtÿj kam hapac to prām.

²¹Ne pê amcro nō na pê pahhi ata pÿm xà jō amcro cator, cwÿrjapê ri cute amji kīn catia ton, ne cute me cupê pahhi cati catêjê cunea na me hāhwÿr. Ne hanea ne krāhtare jō pahhi kwý me, Hīpôjajo jō pjê catêjê jō pahhi kwý na me hāhwÿr, cahê na cute ame amji kīn prāmte. Mã mehcunea te amji kīn ata wÿr mehcuprôn, ne ihtÿj cute ame ampo kur catia ne ame ikôm catiato prām to, cute mehcuprôn.

²²Ne ihprōtpê Herotijkwýj kra cahāj cupry japyr te Xarômkwýj ata me amji kīn ata wÿr hār, ne me cuna mã hàkrun to mō. Mã pahhi Heroti me pahhi cati kwý atajê cunea mã Xarômkwýj jàkrun xà ita kīn, ne ahna me hakry. Ne pea pahhi te cupry ata mã harkwa to:

— Wa ite me gàkrun xà ata kīnti jahpan xà na, gapacta ne ampo na ihprām xà ata na iwÿ, wa ha itÿj me akampa ne amã cugō — hajÿr. ²³Mã cupry ata xa ne kampa. Mã pahhi te hipêr cumã amji ton ne amji ton tu ne cumã:

— He ampeaj kam! Ca ha ijàhcukrêj jîkjê na ahwỳ, wa ha itỳj amã cugõ! — hajỳr.

²⁴Mã cute impar ne ma inxi pê Herotijkwỳj ata wỳr tẽ ne cumã:

— Ampo na mã wa ha ahwỳ? — hajỳr. Mã inxi cumã:

— Ca ha cumã: “Ajpên ca ha imã Jowãw pê me cumrãr catê krã to tẽ, crat kam” hane — hajỳr. ²⁵Mã hacpỳ ma mã hũjarêan kam, cute amji jaxàr ne pahhi mã:

— Ajpên ca ha imã Jowãw pê me cumrãr catê krã to tẽ, crat kam — hajỳr. ²⁶Mã Heroti te impar ne cumã amji kîn nare, ne nee cumã Jowãw curan to prãm nare. Ne cute me kam mare mã amji ton ita kam, ihpahàm cupate, cute ihcuran na harkwa hydr. ²⁷⁻²⁸Mã pyt jỳr xà ata kam, cute krãhtare pê hamãr catê ata kujahêc ne cumã:

— Hacjên xà wỳr tẽ ne ajpên cumã Jowãw krã jakep, ne crat kam to tẽ — hajỳr. Mã krãhtare ata wrỳc ne ma hacjên xà wỳr tẽ, ne cute Jowãw krã jakep, ne crat kam to tẽ ne cahãjre mã hõr. Mã cute inxi mã hõr. ²⁹Mã Jowãw kõt me ipa catêjê atajê te ihtyc xà ata jarên par, ne ma me hacjên xà wỳr me pra, ne cute me hĩ pỳn ne cute me harêt. Hõhõ, pê Jowãw pê me cumrãr catê tyc xà ita hane. Cwỳrjapê pê Heroti Jeju to amji mã Jowãw xwỳ te hacpỳ mã ihtir na ihcãmji.

(Pê Macô harên to hane. Pê Ruc hipêr hõ kàhhôc kam harên to hane he.)

Pê Jeju me hàhtôa mã harte

¹⁰Mã ma Jeju kõt me ipa catêjê te me amji jaxàr, neJeju mã cute me ampo cunea ton atajê name amji jarên partu. Mã ma Jeju te me haprôr, krĩ jacot japrỳ te Tep jõ krĩ ita wỳr, ne ahte curi ame ipa xà. ¹¹Mã me hàhtõtĩ atajê te mempar, ne ma mehũnãr. Mã Jeju te ihtỳj me ahna amji caxàr, ne mecumã Pahpãm pê pjê cunea jõ Pahhiti na harên, ne cuteme amji caprãr prãm catêjê atajê caprãr.

¹²Mã ramã caxwa xàa kam, mã ihkõt me ipacatêjê te tõi atajê ma hỹrmã me pra, ne me cumã:

— Ýhỹ, ca ha me cumã quê ame ajcrà ne ihtỳj ame pra, me pahcahê na krĩ kryjre apu ihcuhhê itajê kõt, ne curia quê ha ame apà, ne curia ame ahtwỳ, nãmri ita ri põ pê ampo hamreare — hane.

¹³Mã Jeju me cumã:

— Ca ha me caa me cumã harte — hane. Mã me cumã:

— Pỳhàpà, ampeaj kam me hàhtôa to mehàhtô, ne me pamã kwỳr te pro te xíc peaj ne tep pijakrut peaj ita kam, jũ wỳr quê me catwỳ. Ca ha pijamã me hàhtõtĩitajê mã ite ihpore to me hõ japrôr na me ito? — hane.

¹⁴Pê curi me hũmre me hàhtô na me mir to xíc, mã Jeju te ihkõt me ipa catêjê mã harkwa hydr, ne me cumã:

— Ame cumã, quê ame amji jakrã ne amehkrĩ. Quê ahpỳanre na ame xĩncwënta partu ne amehkrĩ — hajỳr.

¹⁵Mã ihkôt me ipa catêjê te mempar, ne cute mecumãn, mã cute ahpÿanre na me amji jakrã ne amehkrí. ¹⁶Mã Jeju te kwÿr te pro te xíc itajê, me teppijakrut atajê incwÿr, ne kàj mã cõjkwa wÿr to irít, ne Hũm Cati mã to ihcakôc. Jirô pê mã ri cute kwÿr te pro kryj, ne tep pijakrut ita kryj, ne ihkôt me ipa catêjê mã hõr, mãr quê ame cumã me cugõ. Mã cute ame cumã me hõr. ¹⁷Mã amehcunea jàpàn, ne ame harte partu. Mãihkôt me ipa catêjê te me hõ cahhur to me kàhà to tôxi ne me to hipu.

(Pê Ruc hũjarên jicu. Pê Macô hõ kàhhôc kam Jeju jarên to hane he.)

Macô 6.53-56

Pê me hà me Jeju kà jahkà cyt atajê cunea impej pyrentu

⁵³Mã cute Hũm carôt kôt hàpên xà pihho ata ton, ne ame harte jirô pê Jeju me, ihkôt me ipa catêjê me, ma Hipôjajo jikjê rúm, pjêjapry te Pírã jô pjê ata wÿr me irêr, ne curia cute me pàr kre mã hê, cô tohkà na. ⁵⁴Mã pàr kre pê Jeju cator, mã me hàhtôti atajê te me Jeju pupun pyrentu.

⁵⁵Mã pea curia pjê ata kam cute me amji rêc, ne ihtÿj krí cunea kôt me hà catêjê kôt ame pra. Ne ma me hà jikwa xà kam me cunõ, neme ahna ahwÿ ne ma curi, por cute me Jeju jàhhuc xà na, jũ ri me hahkre pej xà ata wÿr me to pra. ⁵⁶Pê krí jacot me krí cunea kôt ipa xà ata ri pê ajco hãn ne prya kam, cumã me hà nõ, ne me cumã Jeju na ahwÿ, ne ajco me cumã:

— Cama amji na me ijamã, wa akà jahkà cyt — hane. Ne por mehcunea te me Jeju kà jahkà cyt atajê cunea mempej pyrentu.

Macô 7.1-37

Pê Jeju curê xwÿn catêjê ihkên mã me mên prãnte, mehcurikj

¹⁻⁴Pê Parixêw catêjê kwÿ me, cute me cumã Mojxe xwÿ jô kàhhôc to me hahkre catêjê atajê me, Krípinkrên pìn me cato. Pê Parixêw catêjê ajco Juta catêjê cunea mã mam cute ampo to me hahkre xà atajêa to ihhimpej. Na quê ha menquêtjê te me to amji pyrác xà te me amji ton xàa kôt, me hàpàn curê, ne mam me amji mãampi ne hũhkra cuhhõ, ne cormã me apà. Ne por me hõ japrôr xà pìn cute me ampo xõ japrôr atajê, quê ha cute mehkur xwÿjrea na cuhhõ. Ne cormã, rÿ pêa mã cute ampo to me amji pyrác xà atajê ton tome ipa, ne mehkom xà cuhhõn xà ata na mehcuhhõ, ne me pjê te pot cuhhõ, ne wakÿre te me hàwmrõ xà atajê cuhhõ. Parixêw catêjê atajê kwÿ te me Jeju kôt me ipacatêjê nõ ata te menquêtjê te me amji pyrác xà ata kôat nee hũhkra cuhhõnpej nare kam,

ahnaa hàpàn na me hõmpun. Por pê Parixêw catêjê ajco ahna me cumã awjahkre ata kaj na, cute ton. Mã cute Jeju na me cuprõn ne mehkra.

⁵Mã pea Mojxe xwỳ jõ kàhhôc to me cumã hahkre catêjê nõ te Jeju mã harkwa to:

— Ampo na mã ajte akõt meipa catêjê nee me panquêtjê te ampo to me amjipyràc xà atajê kam me hapac, ne ihkôat me hũhkra cuhhõn nare, ne ahnaa me apà? Jũ wỳr quê ha cute me hajỹr xà ita kam me Pahlpãm cajpuaw me — hajỹr.

⁶Mã Jeju te me cumã harkwa to:

— Põ rũm ri ihhêj ne ate amji kam me gapac xà impej, ne me acaxwãm pê me akêanre! Xãmte ampeajkam pê Pahlpãm jarkwa to ihcakôc catê japyrỳ te Ixaj xwỳ me ate amji kam me gapac xà ita na me garê, ne me ana ihhõc to hane he:

“Mehkwỳ Pahlpãm mã me harkwa to:

‘Pahlpãm, apeaj to apej, ne imã akĩn’ hane, ne ajte cute amji kam me hapac xà to, ampỳa mã cupê me ipa.

⁷Ne cute me Pahlpãm to mehcakôc xà impejti ita kõt hamreare.

Ampo na?

He me cumãme hũmre te amji kam hapac xà to pit mã hahkre to hãn ne me ipa,

ne cute me cumã to hahkre xà ata kam, quê ha ihtỳj mehkwy mã mehhêj xia jarên to:

‘Pom wa me amãampo to hahkre itajê pê Pahlpãm te amji kam hapac xà’ hane”.

Hõ, pê Ixaj xwỳ me ato hũjarên to hane.

⁸— Ca ma ame ihmpej xà caca, ne ajte me aquêtjê te amji kam me hapac xà to pit mã, cute me hahkre xà ata na ca me prãm. ⁹Ca gõtpe jũ mã me, ne amji tète me Pahlpãm jarkwa himpej xà to ne me hũrê, ne amji tète me hajo, me ate me aquêtjê te amji kam hapac xaa kõt me apa prãmte.

¹⁰⁻¹¹— Pê Mojxe harkwa hyr to:

“Amji mã me apãmjê cupa, ne amji mã me axyrxwỳ cupa, quê ha ihtỳj cute me hũmxwỳ mãn catêjê curan partu”

hajỹr cacrô, ca ate me amji kam me gapac xà to me amji pyrác xà ata kõt, ajte ajteare mã me cumã to hahkre, ne me cumã: “Quê ha jũm mã ampeaj kam hàhcukrêj, quê ha ihtỳj to hũm me inxi tehcajpa. Nãmri quê

ha cutePahpãm jürkwa jamār catêjê mã, cute hũm me inxi mã ampo jõr xà atajê jõr na, amji to hũjahkre na, quê ha xwahna nee hũm me inxi mã ampo jõr xà atajê nõ nare. Ne cama me cumã harkwa to: ‘Wa ramã me Pahpãm mã ite ijãhcukrêj ita to ijũjahkre, nawa ha nee amã ampo ata jõr nare’ ” hajÿr. ¹²Ne me ate amji kam me gapac xà ita kam quê ha nee hipêr me hũmjê me, menxyrxwÿ tehcajpar to prãm nare.

¹³— Ca ha ate me hajÿr na, ca ha ma amji têtê ame Pahpãm te amji kam hapac xà curê, ate me aquêtjê te amji kam hapac xàa to ate me amji kam me gapac, ne me cumã to hahkreprãmte. Ne ramã ate amji to me hajÿr to me amji pyrãc tu, na ca atÿj me ampo itajê cunea ton to me apa — hane.

Pê Jeju ampo te me pahto kên xà cawpa

¹⁴Na pê hipêr Jeju me hàhtõa na ahwÿ, ne me cumã harkwa to:

— Ampo to icakõc xà ita na me ipar mã hamãa ne, mãr ca me kampa. ¹⁵⁻¹⁶He xà cu me pajõ ku itajê, ihtÿj pahte me pahkên ton na me pahto? Hãpà! Pom hãn ne põ rúm me pajarkwa wÿr me pajõ pra ne acjêj itajê, nee me pahto kên nare. Ne pom me pahte amji kam me pajapac xà pãn hapõjitajê ri ihtÿj me pahto kên. Xà me gũpar xà caxuw me amã me gapackre nare? Me ikampa ne ite me amã ampo to icakõc xà atajê kõt hakop to mempeaj ne — hane.

¹⁷Mã Jeju te me hàhtõtì atajê mã ihcakõc jicu, ne me huwahi, ne ma ikre mã hàr. Mã ihkõt me ipa catêjê te hũjarên xà ata na mehcukij.

¹⁸⁻¹⁹Mã cute me cumã harên to:

— Pÿhàpà, me hũmre itajê! Xãmte nee cormã ate me icakõc xà ita na me ipar nare. Me apê me ikwÿ kwÿa cacrõ, ca ajte nee ijũjarên xà atajê na me ipar nare. Pom ampo megarkwa mã acjêj ca me ku itajê, quê nee ame ato kên nare. Ampo na? Quê ha nee ate amji kam me gapac xà mã hàr nare, ne atu mã quêha axà, jirõ pê mã quê ha gĩ pê cato — hajÿr. Por pê Jeju me pajõ to hũjarên to haneata kõt, cu pahtÿj me pajõ itajê cunea ku, ne nee ampo itajê nõ ihkên nare na, ramã me pamã hahkre pej. Ne cormã Jeju me cumã:

²⁰⁻²¹— Ne por quê ha jũm te amji kam hapac xà pãn ampo cato ata, quê ha jũm ata to kêanre ne. Ampo na? Cute amji kam me hapac xà ata pãn, quê ha cute ampo to amji kam hapac xà kêanre ata cato. Atajê pê ri cute amji kam hapac xà kên me; ampo kam me pahpahàm kêanre ata me; me hàhkij me; me hàhcuran me; amji pê mehprõ caxun me; ²²cute mehporê me, me hàhcukrêj kìn me; mehkwy to kên xà caxuw me hũ na hàhtãtnare me; mehhêj xi me; mehpahàm nare me; hũ na amji mã ampo kìn me; mehkwyãmã mehkwy to mehcakõc kên me; amji to me hàmrã me; mehkra nare me. ²³Ne ampo itajê quê ihtÿj ate amji kam me gapac xà cunea pãn hapõj, ne quê ihtÿj me ato kêanre — hane.

Pê cahāj cahkrit nō amji tehcajpar xà na Jeju na ahwỳ

²⁴Jirô pê, pê ma Jeju krī pê cato ne mō, Kên jō krī pu na pjê ata wỳr. Ne pea ikre nō ita mã hâr, ne tee ame hàhtôti atajê pê amji toipimxur to hahkre, ne jũ wỳr quê amji mã hamã ne amxu. ²⁵Pê cahāj nō pê ihkra cahāj kam, me pahcurê xwỳnti carō kên ata te Jeju jarên par. ²⁶Cupê krìxàre pê cōxwa cahê na Xiri jō pjê catêjê nō, ne nee cupê Juta catêjê nō nare cacrô, mã mahỳrmã tê, ne cuna mã ihkôn krã na hỳr ne ahna hàhwỳr ne cumã:

— Ikra intête ampo carō kên ita capa — hane.

²⁷Mã Jeju te cahāj ata capi prãmtê cumã:

— Ite ato hajỳr xà ita na ihkaj na. Ampo na? Nee apê Juta catêjê nare, ne acahkrit, cwỳrjapê ri apê roap pyrãc. Ne wa ite mam mehkra mã harte xàcaxuw wa ajpên me hỳrmã mō, ne nee rop mã mam ite harte xà caxuw wa ajpên me hỳrmã imôr nare — hajỳr.

²⁸Mã cahāj cumã:

— Ýhỳ pahhi, he ampeaj kam ri icahkrit ne Juta catêjê kĩnte ipê roap pyrãac cacrô, wa itỳj hanea ana prãamto prãm. Pom quê hãn ne ahkrare hàpàn xà pê ampo krut cupa mã ajhu, mã rop krare cuku, ita jìkjê na ite hajỳr. Na wa ate itehcajpar xà kênre ita na ahna awỳ — hane. ²⁹Mã Jeju cumã:

— Ate acakôc xà ita ton, cwỳrjapê gapacta ne amji jaxà gũrkwa wỳr, ne ramã me pahcurê xwỳn carō kên, akra cahāj ita pê cator — hane.

³⁰Mã ma pyjê nō ata te amji jaxàr, ikre wỳr, ne cator. Ne cute me hikwa xà kam ihkra pupun, mã ihtỳj nō, mã ma cupê me pahcurê xwỳn carō kên cator.

³¹Jirô pê mã ri ma Jeju krī pê cator ne mō. Ne ma Kên jō krī jō pjêa na mō, krī atajê kôt, ne Teppro jō krī na mō. Ne cute Krítetêj jōpjê jakren, ne ma Hìpôjajo jō pjê na cator. ³²Mã jũmjê itajê te Jeju wỳr me jũm xũmre japac tu, ne nee ihcakôc pej nare ata to me cator. Ne cute Jeju na me hàhwỳr, quê ahna hũhkra xi ne to impej.

³³Mã Jeju te me hàhtôti ata pê to cator, ne pea cute hũhkrahhi to ajpên cuna mã hapac jũjê. Ne cute hũhhi kam harcô mên, ne cute harcôita to hũmre ata jôhto cupên. ³⁴Jirô pê mã ri kàj mã, còjkwa wỳr irít ne cute higêc mên, ne Juta catêjê jarkwa to cumã:

— Epata! — hajỳr. Ita jũjarên xà te: “Amji jihê mê, ne akre!” ³⁵Me ajkaam mã, hapackre ne hòhto jiroto, mã cute ihcakôc kam ihtêm pyrentu, ne nee hipêr ihcakôc kên nare.

³⁶Mã Jeju te amji jarên tète me cumã jarkwa to:

— Nee ame cumã ijarên nare — hajỳr cacrô mã tàkamrỳ cute me harên to cati to mō. ³⁷Ne por pê ajco me harên pa atajê to pê ajco me amji mã ajkra, ne ajpên mã me harên to:

— He cumã ampo pej cunea ton jahkre pej, na ri ihtÿj to, ne me to impej! Ne ihtÿj hacpÿa mã me hapactu jÿpar na me to, mã me awpa, ne jÿ mã meipêrkêt to, mã hacpÿa mã mehçakôc! — hane.

Macô 8.1-26

Pê Jeju hipêr me cumã harte

¹Mã me ahna amcro jàhtô nare, mã ma pō kam, mūhūràn me hàhtôa ne cute Jeju na mecuprôn. Ne me hàpàn xà caxuw ampo hamreare xà ata kam, mã Jeju te ihkôt me ipa catêjê mã:

²— Ampeaj kam imã me caprĩ xà. Ampo na? Ramã ikôt ame ipa ita to cuteme amcro to incrê, ne pōtiita kam me cupê me hàpàn xà caxuw ampo hamreare. ³Wa me hàpàn nare kam me hūrkwà wÿr ame cucrà, quê ha pry cahti ri prãm ame curê, nãmri mehkwyê hūwrya pîn me hapôj — hajÿr.

⁴Mã ihkôt me ipa catêjê te mehçukij ne me cumã:

— Jō ri wa pō ita kam, me hamreare ita kam me hàhtôti itajê mã harte xà caxuw me hō nō mã me icato? — hajÿr. ⁵Mã Jeju me cumã:

— Jū mã ri me amã kwÿr te pro jàhtô na cute? — hane. Mã me cumã:

— Imã kwÿr te pro te xet — hane.

⁶Mã cute pjê kam me hàhtôti atajê jÿr na me cumã hūjahkre, mã me hÿr. Mã cutekwÿr te pro te xet ata cwÿr, ne to Pahpãm mã hūrên hakryti to ihçakôc. Jirô pê mã ri cute me cumã ihkryj par, ne ihkôt me ipa catêjê mã hōr, mã cute me cumã to ipicràn par. ⁷Ne hanea ne caxuw tep xêt nō atajê, mã Jeju te to Pahpãm mã hūrênhakryti to ihçakôc, ne ihkryj ne ihkôt me ipa catêjê mã hōr. Mã hanea ne cute me cumã to ipicràn.

⁸Mã mehçunea jàpàn kênre nare, ne ame harte. Mã cormã ihkôt me ipa catêjê te ihçahhur jàhhuc itajê to me kàhà to xet ne me to hipu partu. ⁹⁻¹⁰Ne pê me apà atajê pê me hàhtô na me mir to cwat. Mã ma Jeju te mehkujahêc par, jirô pê mã ri pàr kre mã hàr, ihkôt me ipa catêjê me, ne ma Tarman jō pjê wÿr cō ita na me irêr, ne me cator.

¹¹Mã Parixêw catêjê kwÿr hÿrmã cator, ne cute me Jeju te ampo pihho catia ton na me ahna hàhwÿr kam ihtêm. Ne nee mã cute amji mã me to ihhimpej xà caxuw amehçukij nare. Ne cama cute mehçên mã mên prãmte ri amehçukij, ne me cumã:

— Mêr me imã cōjkwa pîn ampo pihho catia to, wa ha me hōmpu, ne cormã me Pahpãm te me iwÿr akujahêc na me gahkre pej — hajÿr. ¹²Mã Jeju te caxwãm catia mã incaca mên, ne me cumã harkwa to:

— Ampo na mã ca me akwÿr mea mã, ite ampo pihho catia ton na me ina gàhwÿr to ame apa? Wa ramã ite, me ate amji mã me ito ahimpej nare na me gahkre pej. Cwÿrjapê wa ha nee me amã, ate ampo pihho catihti na megàhwÿr xà itajê nō ton nare — hajÿr.

Pê Jeju apu ihkôt me ipa catêjê mã

¹³Ne ihkôt me ipa catêjê me pâr kre mã me hâr, ne ma hacpỹ mã hĩpô jĩkjê wỳr me to tẽ. ¹⁴Mã ihkôt me ipa catêjê te me kwỳr te pro to me hapac kêt, ne pyxit peaj ne pâr kre mã me to hâr. ¹⁵Mã Jeju te me cumã mehcawpa to:

— Co he, ma amji na me Parixêw catêjê me, pahhi Heroti jô kwỳr te pro to me guphêa ne! — hajỹr.

¹⁶Mã ihkôt me ipa catêjê te ita to ajpẽn mã mehcahoc kam ihtẽm, ne me ajpẽn mã:

— Pahte me kwỳr te pro nõ pyr nare, na ri apu hũjarẽn xà ita to hane — hajỹr.

¹⁷Mã Jeju te mehcahoc xà ita na me hahkre pej, ne mehckukij to:

— Ampo na mã ca me apê kwỳr te pro nare ata na ame ajpẽn cukij to ame apa? He xà ajkĩ me apê ijũjarẽn xà ita par kôt hakop jahkre kêatre? Xà wa ajkĩ amji jarte to pit mã amji japackre to ipa prãm? Ampeaj kam ate me ampo par xà itajê cunea na me akrã tỳj. ¹⁸Xà nee me arĩt xà caxuw me ato nare? Ne nee me gapac nare, me gũpar xà caxuw? ¹⁹He xà ca nee ajte me kwỳr te pro te xĩc to, ite me hàhtôa mã harte xà ata na, me ito amji japackre nare? Jũ mã ca ate mehcahur to me kàhà to me hipu ton? — hajỹr. Mã me cumã:

— Kàhà te tõi — hane.

²⁰Mã hipêr cute mehckukij to:

— Ne por wa ite mam me hàhtôti te me mir te cwat mã kwỳr te pro te xet kryj xà ata, jũ mã ri ihcahur na kàhà jàhtô na cute, ca ate me to hipu? — hajỹr. Mã me cumã:

— Kàhà te xet — hane. Mã Jeju me cumã:

²¹— Měr hõhõ, xà ca ajte cormã nee ite me amã Parixêw jô kwỳr te pro jarẽn xà ita jahkre pej nare? — hane. Mã cormã ihkôt me ipa catêjê te Parixêw te amji kam me hapac xà kên pê kwỳr te procawpa xà ata na me hahkre pej.

Pê Jeju into tũm caprã

²²Jirô pê mã ri Jeju me, ihkôt me ipa catêjê me, ma krĩ jacot pê Tep jô krĩ mã me cator. Mã curi catêjê te me jũm to tũm japrôr ne hỹrmã me to cator, Jeju te ihcupên prãmte. ²³Mã Jeju te into tũm ata jũhkra na ipyr, ne ma krĩ pê to cator. Ne cute hũmre ata to na harcô to ihtẽm, ne ahna hũ xir ne cumã:

— Xà ca atỳj ita caxuw ampo pupu? — hajỹr. ²⁴Mã hũmre ita rĩt ne apu rĩt, ne cute cumã harkwa to:

— Wa itỳj me hõmpu, ne cama me hõmpun xà itapê ihhêj rũm me hũmre pê pĩ pâr te ipa pupun — hajỹr.

²⁵ Mã hipêr Jeju te into na hũ xir. Mã pea hũmre ata rît pej, ne caprãr, ne ihtÿj ihcunea na irît pej. ²⁶ Ne ma cute krĩ pê hũmre ata kujahêc, hũrkwa wÿr, ne cumã:

— Tê ne nee hacpÿ ne Tep jõ krĩ wÿr amji jaxàr nare — hajÿr.

(Pê Macô Jeju jarên to hane. Pê Ruc hanea ne hõ kàhhôc kam harên to hane he.)

Pê Petrô Jeju jarê

¹⁸ Ne amcro nõ na Jeju ahte mehkwy to pit mã cator, ne apu Hũm mã ihcakôc, mã ihkôt me ipa catêjê te me hàhtêp. Mã cute mehcukij, ne me cumã:

— Jũ mã mã me hàhtôti atajê ito amji kam me hapac to? — hajÿr.

¹⁹ Mã me cumã:

— Mehkwy me garên to, apê Jowãw xwÿ te me cumrãr catê ata, ne mehkwy me garên to, apê Erij pê rÿ pêa mã Pahpãm ihtiar to api ata, ne mehkwy me garên to, apê mam Pahpãm jarkwa to mehcakôc catêjê nõ, ca hacpÿa mã atir — hane. Mã Jeju me cumã:

²⁰ — Ne me ca? Jũ mã mã ca ito amji kam me gapacto? — hane. Mã Petrô cumã:

— Apê Crixto, ne apê, pom pê Pahpãm me panquêtjê mã jũm to awjahkre ata mã ca — hane.

Pê Jeju ihtyc xà me hacpÿa mã ihtir xà na amji jarê

²¹⁻²² Mã Jeju te me cumã harkwa hyr, ne me cumã, quê nee cormã ne jũm mã ita na me harên nare, ne hanea ne me cumã:

— Ýhÿ, wa ha ipê me Ahàkà cati, cormãjũmjê jũhkra kam amji pupun xà kèanre to amji pupu. Quê ha Juta catêjê pê prohkam atajê ma ame ipê Ahàkà curê. Quê ha hanea ne me cuxà Pahpãm mã mehcajrên catêjê jõ pahhi kwÿ me, me cumã Mojxe xwÿ jõ kàhhôc to hahkre catêjê me, ma ame icurê. Quê ha me Ahàkà ty, ne ahna amcro incrê jirô pê hacpÿa mã ihtir. Na wa me amã awjarê.

²³ — Ýhÿ, quê ha jũm mã ikôt amji ton to prãm na, quê ha amjia kôt apu ipa jicu, ne ikôat amji kampa, ne icuxà amji mã ihtyc cupa nare to ipa. Quê ha jũm ata pê ihhêj rũm cuteamcro cunea kam hõ pĩ na ihtyc xà ata japjêr to ipa.

²⁴ — Ýhÿ, quê ha jũm te amji to ipijapar prãm to, cama apu amji jamãr to ipa na, quê ha ihtÿj ty. Ne por quê ha quêt jũm icwÿrjapê ty ata, quê ha icahê na ihtir na ipa rohnÿtti mã.

²⁵ — Xà quê ajkĩ jũm pjê cunea kam amji mã ampo pejtiaatê cunea to hõ tekjê xà caxuw to cuprõ, ne nee iràn xà na Pahpãm to amji kamhapac nare, ne ihkaj na apu ipa ne ahnaa ty, quê ha pijamãcute ampo pejti to

cuprõn atajê cunea, ihtyc jirô pê ihtehcajpa? Hãpà, quê ha cama amji to acto, ne nee Pahpãm cahê na amji to ipijapar nare.

²⁶— Ne por quê ha jùm ijũ na apu ihpahàm, ne hanea ne ite ampo to hahkre xà ita jũ na apu ihpahàm na, quê ha ipê me Ahàkà hanea ne jũmita jũ na apu ihpahàm. Por cõjkwa pĩn me Ahàkà te Pahpãm pê Pahhiti mã me ipijapu catêjê jàhcujro impejti ata to cute amji jaxàr xà ata kam, quê ha hanea ne apu jùm ita jũ na ihpahàm.

²⁷— Ýhỹ, me ikampa, ne me ipar xà ita to amji japackrea ne, he wa nee me amã ihêj xi xàa jarẽn nare. He ca ha me anõ atýj atĩar kamPahpãm te ihhimpej xà ata na hõmpu ne cormã ty — hajỹr.

Jeju me Mojxe xwý me Erij

²⁸Ne amcro te xet jirô pê, Jeju te Petrô me Jowãw meTijac me, me haprôr. Ne ma kẽn nõ ita wýr me to mõ, ne cute Pahpãm mã ihcakõc prãmte, hàhkà jakõtti nõna me to hàpir. Ne curia Hũm Cati mã ihcakõc, mã ihkõt me ipa catêjêjõtswa te me kam ihtẽm, mã ihtýj me hikwa ne ame gôr.

²⁹Mã cormã Pahpãm mã ihcakõac kam, Jeju kuc pintuw ne ihkà te amji to hakati, ne ihprãti. ³⁰Mã cõjkwa pĩn me hũmre pijakrut pê Mojxe xwý meErij te amji to me ipipê, ne me cumã ihcakõc kam ihtẽm. ³¹Ne pê ajwar mempeaj to mempej, ne me ipu na cõjkwa pĩn hàhcujrohti ita impejti. Ne ame Jeju mã, por quê ha putwry nõ naKripinkrẽn kam ihtyc xà ata to mehcakõc.

³²Mã Petrô na mehwý ramã ame hõtswa mã ame hikwa, ne amentohkà to ipijapýn, ne ihprõt pê ame ipimprar, ne cute me Jeju jàhcujrohti ata pupun, ne hanea ne cahê na ajwar me xa atajê pupun. ³³Mã me hũmre pijakrut atajê te me Jeju mã ihcakõc jicu xàa wýr, mã Petrô te Jeju mã:

— Me ijõ Pahhi, ita ri me pahkrĩ na ri imãaimpejti, na wa ha me amã ikrere nõ xãm, neMojxe xwý mã mehnõ xãm, ne Erij mã mehnõ xãm — hajỹr. Ne pê Petrô ihtýj xa ne apu ihcakõc, ne nee ihcakõc xà ata na amji par nare.

³⁴Ne cormã Petrô apu ihcakõc kwýa kam, mã ahcakrãcator, mã ihkõt me ipa catêjê mã ampeaj kam ahcakrã temehpro ata cupa. ³⁵Mã ahcakrã pĩn cute me jùm jõkre ata par, mã mecumã:

— Hũmre ita pê ikra. Pom pê wa amji mã capi ata. Ne quê hãn ne ihcakõc, ca atýj me kampa — hajỹr.

³⁶Ne ihkêt, mã mehcarĩcti, mã ihkõt me ipa catêjê te me Jeju pit pupun, ne nee cute me amcro atajê nõ na, jùm mã cute me ampo pupun xà ata jarẽn nare.

Pê Jeju ahkrare nõ caprã

³⁷Ne amcro nõ na, hàhkà jakõt pê me iwryc, mã mehàhtõa ne cute me Jeju cajpar. ³⁸Mã me hàhtõti atajê jipõc ri me hũmre nõ ata te caràr kam ihtẽm, ne kýj cati pẽa mã Jeju mã:

— Pahhi! Wa ha icãmter caxuw ana ahwỳ! ³⁹Nãmri ampeaj kam ikra pyxit peaj ata kêan to kên. Pê me pahcurê xwỳn carõ kên nõ ihpro, pê mõi pejti kam, ihprõt pê caràr kam tẽ, ne amji rên kamtẽ, ne ajco ihhàr to ipa, ne apu catàt tỳj, ne harkwa nahàmprõ. Ne ampo carõ kên nõ ita apu to kêanre, mã amji cahhy, ne nee jũ caxuw rỳ cute to tojnõ nare. ⁴⁰Ne wa ramã amji caprỳ to ite akõt me ipa catêjê mã harên ne me ahna ijàhwỳr, cute ampo carõ kên ita to pøj prãmte, mã nee cute me to pøj nare. Ne jũ wỳr quê ame amji mã hamã, ne intête me cator — hajỳr.

⁴¹Mã Jeju me cumã:

— Pỳhàpà, ampeaj kam ri pjê ita kam, meacunea kêanre. Ca nee ajte ito amji mã me ahimpej nare ita kam, xà wa ha itỳj ajkĩ me amã awcanã? Jũ mã wa haajte ne awcanã, ne me acahê na jũ mã amji to amcro to? — hane. Ne cute hũmre ata mã:

— Ajpên acãmter to mõi — hajỳr.

⁴²Mã cute Jeju wỳr me haprõr, mã me pahcurê xwỳncarõ kên ita te hipêr pjê kam ihkra ita mên. Mã Jeju te carõ kên ita mã harkwa hydr, quê cupê cato. Mã hamre, cupê cator pyrentu, mã ihkra ita capên pyrentu. Mã Jeju te hũm mã hõr. ⁴³Mã mehcunea te Pahpãm carõt catia ata to amji mã me ipikrar.

Pê Jeju hipêr ihtyc xà na amji jarê

Ne ma cormã Jeju te ampo ton xà ata to me amji mã me ajkra, mã Jeju te ihkõt me ipa catêjê mã hũjarên to hajỳr he:

⁴⁴— Ỳhỹ, ikam me gapac to impeaj ne. Quê ha jũ caxuw jũmjê ihtỳj Ahàkà cati curê xwỳn jũhkra mã me cugõ — hajỳr.

⁴⁵Mã nee cute me ita par pej nare, ne nee me hahkre pejnare. Cute me hahkre pej xà ita me cupê ipimxur tu ne nõita kam, jũ wỳr quê me hahkre pej. Ne mehpahàm cupate nee cute ampo ata na me Jeju cukij nare.

(Pê Ruc Jeju jarên jicu. Pê Matew hõ kàhhôc kam hipêr Jeju jarên to hane he.)

Matew 17.24-27

Pê Jeju Hũm Cati jũrkwa caxuw ihpore gõ

²⁴Mã Jeju me, ihkõt me ipa catêjê me, ma Capernam jõ krĩ wỳr me cator. Mã me hõ pahhiti jarkwa kõt me hũhkra kam me hãmchwỳr catêjê nõ te me Petrõ cukij to:

— Xà quê ha gõ pahhi, Pahpãm jũrkwa jamãr catêjê jõ pahhiti mã hãmjõr nare? — hajỳr. Mã Petrõ cumã:

²⁵— Quê ha ihtỳj me cuxà hàr jahpan xà na amgõ — hane. Ne cormã ikre mã Petrõ xàr, mã Jeju te ihcukij pyrentu, ne cumã:

— Jũ mã mã ca ita to amji kam gapac to? Ne jũmjê quê ha krĩ ita jõ pahhi mã me amgõ? Xà ajkĩ krĩ kam mehkrĩ catêjê nõ, nare, jũm cahkritmã curi ihkrĩ prãm ata quê ha ajkĩ amgõ? — hajj̃r.

²⁶ Mã Petrô cumã:

— Mehcahkrit catêjê quê ha me amgõ — hane. Mã Jeju cumã:

— Ate to hamãrti mã ne harên, ampeaj kam ri ita! Ne ita jarên xà te, quê nee curia mehkrĩ catêjê nõ hãmjõr to prãm nare. Cwÿrjapê ri nee ijãmjõr xà nare. Ampo na? Inxũ Cati jũrkwa ri, ne ipê ihkra.

²⁷ — Ne nee imã me hũhkra kam me hãmchwÿr catê ita te, pahte amji mã me Pahpãm cupa nare na, cute me pahto amji kam hapac na to prãm nare. Cwÿrjapê caha ma hĩpõ wÿr tẽ ne kam ajore mẽ. Ne mam ate to tep pro ne to gãpir ata jarkwa kam, ca ha ihpore hy pupu ne capa, ne ma hãmchwÿr catê wÿr totẽ, ne paxàr jahpan xà na to amgõ — hane. Pê harkwa ita kôat ita hane.

(Pê Matew Jeju jarên jicu, mã Ruc te hacpÿa mã Jeju jarên kam to incrã.)

Pê Jeju amji jirõa pê jũm cati kôt harê

⁴⁶ Mã ihkôt me ipa catêjê te ajpên jirõa pê me cati to ajpên mã mehcahoc kam mehtêm. ⁴⁷ Mã Jeju te ramã, por ampo to ame amjikampa ata na me hahkre pej. Na ri cute ahkrare nõ ita pÿn, ne amji cape na hãm, ne me cumã:

⁴⁸ — Ỹhÿ, me ahkrare nõ ita pupu he, incrيره ne capõnÿre. Ne imã quêt ahkrare ita cati, ne ihkĩnte me acunea kryjre. Ne quê ha jũm te icwÿrjapê ahkrare nõ ita na amji caxàr na, quê ha hanea ne ina amji capa. Ne quê ha jũm te ina amji caxàrna, quê ha hanea ne cute ajpên ikujahêc catê ata na amji capa. Ne por me akam me gapyre mã mehkryjre atajê ri, imã me catia to me cati — hajj̃r.

Jeju tehcajpar catê nõ

⁴⁹ Mã Jowãw Jeju mã:

— Ỹhÿ, me ijõ Pahhi, wa ite me hũmre nõ ita pupun, mã ihtÿj gaprÿa to ame pahcurê xwÿn carõkên to põj to mõ. Wa ite ahna me hõmpun ne me cupê ihcahpêrhyr. Ampo na? Nee cupê me pahkwÿnare na ri — hane.

⁵⁰ Mã Jeju me cumã:

— Nee ca me jũm ita cahpêrhyr nare. Ampo na? Quê ha jũm nee ame ato kên nare na, quê ha ihtÿj me atehcajpar to ipa — hane.

Pê jũmjê itajê nee Jeju na me amji caxàr nare

⁵¹ Mã ramã cõjkwa wÿr Jeju jãpir xà jõ amcro na hàntêp to mõ. Cwÿrjapê ri Jeju te Krĩpinkrên wÿr amji kràr. ⁵² Ne cute mam ihkôt me ipa catêjê nõ kujahêc. Ne ma me mõ ne Krĩrĩtpej jõ pjê kam, krĩ jacot ata

na me cator, cute me hàhhuc xà to me hàhcuprõn prãmte. ⁵³Mã xãmte curi mehkrĩ catêjê atajê ma ame Jeju naamji caxàr caca. Ampo na? He cute me Jeju te Krĩpinkrên wÿr ihkràr na me hahkre pej na ri. Pê ajco Krĩrĩtpej jô pjê kam mehkrĩ catêjê atajê ma ame Juta catêjê curê, na pê ma ame Jeju na me amjicaxàr caca. ⁵⁴Mã Tijac me Jowāw te ita na mempar, ne me Jeju cukij to:

— Xà ajkĩ amā ite cõjkwa pĩn cuhy pÿm na ijàhwÿr, mã cute krĩ ita kam mehcunea to caxàr na meito prãm? — hajÿr. ⁵⁵Mã Jeju ihkõt me ipa catêjê wÿr ipipkjêr, ne hõtpê me kam incàcàcre, mã me cumã:

— Me apê ite amji kam ijapac xà na ijahkre kéatre. Ampo na? He nee me Ahàkà ita me hipejxà caxuw mehwwÿr cator nare, ne me hütàr xà caxuw ri mehwwÿr cator — hane. ⁵⁶Ne ma krĩ jacot nõ ita wÿr me mō.

Pê Jeju kõt mehkwy ame ipa prãm

⁵⁷Mã Jeju ihkõt me ipa catêjê me, me mō, mã mam jũm xũmre nõ me hÿrmã cator, ne Jeju mã:

— Ỹhÿ, wa ha itÿj ma akõt mō, ca ha jũ ri tē, wa ha ma akõt tē — hane.

⁵⁸Mã Jeju cumã:

— Xà ca ha pijamã awcanã? He hõtpê xore mãihkre, mã kam ihkrĩ, ne hõtpê cuwênre mã hahê, mã kam hikwa, ne ihkĩnte ipê me Ahàkà pê hũrkwa kam hàhhuc xà caxuw hamreare — hane.

⁵⁹Ne ihkõt Jeju te ihnō cator ata pupun ne cumã:

— Mēr ikõt mō — hajÿr. Mã cumã:

— Wa ha itÿj akõt mō, mēr ito tojnō wa ha ma amji jaxà, ne inxũ tyc xà na hõmpune harêt, ne cormã me akõt mō — hane.

⁶⁰Mã Jeju cumã:

— Quêt taa ty, quê ha mehtyc catêjê kwÿa me harêt. Ne ca nare, ca ha quêt ikõt tē, ne me cumã Pahpãm pê pjê cunea jô Pahhiti na harên to mō — hane.

⁶¹Mã jũm xũmre nõ mehkõt Jeju wÿr cator ne cumã:

— Ỹhÿ, wa ha ma amji jaxà ne tē, ne inxême inxũ mã amji jarê, ne me akõt imōr pyrentu — hane.

⁶²Mã Jeju cumã:

— Quê ha jũm hàpên xà kam apupjê to ipipkjêr to ihcuhtacti to mō, ne hacpÿ mãamji jahpan xà rĩt, ne amji pê to hikõt, ne ahna cupê ihkaj na. Jĩkjê na quê hajũm te Pahpãm pê Pahhiti ata mã hàpên kam ihtēm, ne cumã hàpên cahtiri cute hicu na, quê ha nee jũm xũmreata Pahpãm mã hàpên xà caxuw impej nare — hane.

Jeju kõt me ipa catêjê kwÿ jàpên xà

10 ¹Ita jirô pê mã pê Jeju me hũmre to xetēnta ne ihkõt me to ajkrut ne me capi, cuteamencràn xà caxuw. Ne cute me hũmre

to ipijakrut partu neamehkujahêc par, quê mam ame pra ne krī cati me krī jacot cunea kôt, por jū ri Jeju apu ipa prām ata wÿr, cute amji cumam amehkujahêc. ²Ne me cumã:

— Ýhÿ, pom me gâpên xà pê Pahpãm wÿr ate me to apipkjêr xà ita pê arÿjhy intep to cuprôn xà pyrâac. Ne pur catia to cati, neramã inteptu, ne cute me to cuprôn catêjê ri cormã mencreêre. Cwÿrjapê ca ha me pur catihtu to hõ tekjê ata na ahwÿ, quê hipêr meamã me to cuprôn catêjê kwÿ kujate. ³Ne wa ha me ato ampo pryre capônÿreatajê kra pyrâac, ne rop cahac jâprêhti atajê cajpuw me akujate. ⁴Ca ha nee ame kâhà cwÿr nare, ne nee amehpore incjên xà me, ihpar kà incwÿr nare. Ne me acatyatre na krī wÿr me pra, pom ite me amã krī to ihmpej xà atajêa wÿr. Ne nee prykôt ame gâhhuc, ne cama ame acakôc to me apa nare.

⁵— Ne ca ha krī ata kam ikre nō mã axà, ne mehcajrên, ne me cumã: “Hâpà, quê ha Pahpãm ikre ita kam me ato impejti ne, ne me acaxwãm pê me ato acarīcti ne” hane. Quê ha jūmjê nee cumã amji caxwãm pê amji carīcti na prām nare na, quê ha ate mehcajrên xà ita hacpÿa ne me awÿr amji jacjê. ⁶Ne por curi me gâhhuc xà nō ata ri, quê ha jūmjê mã amji caxwãm pê amji carīcti na prām na, quê ha Pahpãm ihtÿj jūmjê itajê to mehcarīcti ne. ⁷Ca ha ikre ata kam me ahtwÿ, ne kaam me apà, ne kaam me ikô, ne por cute me amã me hõ jôr atajê, ca ha atÿj me ku. Me apê me gâpên catêjê, ne me hâpêncatêjê cunea hõtpê ihtÿj me hâpên jahpan xà na me apà, ne me ikô. Ne ikre kam me gâhhuc xà ata ca ha kam me gâhhuc tu, ne neeatÿj ihkwÿ kôt ame gapôj to me apa nare.

⁸— Ne hân ne krī atajê mã me gapôj, quê meana me amji to pôj, ne me amã ampo gô atajê, ca ha atÿj me ku. ⁹Ne curia krī kam me hà atajê, ca ha atÿj me caprã, ne krī kam atajê cunea mã atÿj gūjarên to hane he: “Ýhÿ, por Pahpãm pê Pahhiti te pjê to ihhimpej xà ata ri, ramã hàhtêp” hane. ¹⁰Ne ca ha jū ri krī nō kam me acato, quê jūmjê mehkinde curi mehkrī catêjê ma ame acaca, ne nee me ana amji caxâr nare na, ca ha krīcape wÿr me gapôj, ne me cumã gūjarên to hane he: ¹¹“Me amã me ipar prām nare ita kam, wa ha itÿj me ipar tète pro jacrô jūrê, ne me acunaa mã me gô krī ita jacrô capī. Quê ha te meamã me ipar prām nare cacrô, ca ha atÿj Pahhiti tepjê to ihhimpej xà ata te me awÿr cator xà ata to me amji japackrea ne” hane.

¹²— Ýhÿ, ampeaj kam wa ha me amã awjarê, quê ha cute me acukij ne me ato ipicokjêr xàa jôamcro kam ahtwÿ, quê ha Pahpãm nee krī ata caprī nare. Ne quê ha krī ata jirôa pê cumã Krīhpôc jô krī wej ata caprī — hane.

Pê Jeju krī krã nare atajê kên mã hàr na harê

¹³— Pÿj me hêj xi Coraxim jô krī, me Tep jô krī ata, ca ha atÿj amji kên mã me amji jaxà. Ne wa ha me amã mam krī wej itajê jarê. Pê krī wej itajê

jaþrÿ pê Kën jô krĩ me Teppro jô krĩ. Pê ajco cama ame Pahpãm to kên, pê Pahpãm cute ame to kên jahpan xà na, me hipej tu. Ýhÿ, ampeaj kam wa ha me amã awjarẽ, quẽ ha mam krĩ wej atajê kam, pom curmã me akam ame hàpên xà pihho impejtito to ipa itajê to me apê na mã, quẽ ha rÿ pẽa mã ihkên jicu, ne quêt catyt kam, impejti na ipa, ne caxuw hihô na ipa, ne hipro na ipa, ne ihkà kên na ipa. ¹⁴Ne mehcukij ne me to ipicokjêr xà jô amcro kam, quẽ ha Pahpãm mã me girôa pê Kën jô krĩ me, Teppro jô krĩ caprĩ. ¹⁵Ne ca Capernam jô krĩ ita, ca atÿj kàj mã, cõjkwa wÿr gàpir na amji cãmji cacrô, quẽ ha Pahpãm ahpar mã akujate, nemehtyc jaxà kam amẽ — hane.

¹⁶Ne Jeju ihkôt me ipa catêjê mã:

— Ne por jùmjê me akampa atajê, quẽ ha hanea ne me ikampa, ne por jùmjê ame acurêatajê, quẽ ha hanea ne ma ame icurê. Ne por jùmjê me icurê atajê, quẽ ha hanea nema ame Inxũ Cati te ikujahêc ata curê — hane.

Pê mehwÿ me amji jaxà

¹⁷Mã ma ihkôt me ipa catêjê te me xetênta ne ihkôt me ipijakrut itajê me cutor, ne ma pjê cunea kôt ame ipa. Ne amcro nõa na cute me amji jacjên, ne me hakrya to me hakry, mã cute Jeju mã me amji jarên to:

— Ýhÿ, me ijô Pahhi, wa me gaprÿ to pôj, mã me pahcurê xwÿn carô kên kwÿ ihtÿj me ikampa — hajÿr.

¹⁸Mã Jeju me cumã:

— Ýhÿ, wa ite me pahcurê xwÿn jõpahhiti pê Xatanaj ata pupun. Mã cõjkwa pín ihpÿm xà ita pê ihhêj rûm pahhàjê cuxê pyrãac ne ihpÿm.

¹⁹Me ikam gapac to impeaj ne he. Wa ite me amã icarôt catia me, ite amji jahkre pej catia jôr, na ca atÿj gapacta ne cagã me, pacti kam ame gãhhuc to me apa, ne ate atÿj me pahcurê xwÿn pê me carôt to ihpec. Na quẽ ha nee jũ caxuw ampo itajê nõ me anõ to kên nare. ²⁰Nee ca me pahcurê xwÿn carô kên te me apar xà pyrên ame gakry nare. Nequêt Pahpãm te mehwÿ caxuw me acapi, ne amji mã cõjkwa kam hõ kãhhôc kam me gaprÿ nõr pyrên, ca ame gakry — hane.

Ampeaj kam Jeju jakry

²¹Mã pyt jÿr xà ata kam, Pahpãm Carô Pejti kôt Jeju jakrya to hakry, mã cute harên to hajÿr he:

— Inxũ, apê cõjkwa me pjê kam Pahhiti. Ne ate me cupêhahkre kêatre atajê mã ampo pimxur atajê cunea capô, ne me cumã to apipê. Ne mehkĩnte ate me cumãhahkre pej catêjê me, cute me amji jahkre pej catêjêpê ampo itajê to apimxur. Ýhÿ Inxũ, pom ite ampo na garên par itajêa to, pê ca ramã amji toahimpej. Ne imã acaca xà ita cunea impej pit.

²²— Inxũ, ca ramã ate imã ampo cunea jôr. Ne amã pit mã ijahkre peaj to ijahkre pej, ne nee aràn xà na jũm mã ijahkre pej nare. Ne hanea ne

imãpit mã gahkre peaj to gahkre pej. Na wa ha jũm mãato hahkre, quê ha hanea ne jũm ita mã gahkre pejpejti ne — hajÿr.

²³Ne cute ihkôt me ipa catêjê mã pit mã harên, neme cumã:

— Me gakry, hamre me apej mã me apÿm. Por ate meampo pupun ata pyrên ca ame gakry. ²⁴Ampeaj kam wa me amã harê, Pahpãm jarkwa to ihcakôc catêjê jãhtô, ne pjê jô pahhi catêjê jãhtô, ne te ame ampo itajêpupun prãm cakrô, quê me hõmpun nare. Ne me ca nare, ca atÿj me hõmpu ne me kampa. Mã me akĩnte te ame ampo ita par prãm cakrô, nee cute mempar nare — hajÿr.

Hũmre pê me hàhkij na ihtehcajpar catê

²⁵Mã amcro nõ na me cumã Mojxe xwÿ jô kàhhôc to hahkre catêjê nõ xãm, cute Jeju capi ne ihkên mã mên prãmte ihcukij, ne cumã:

— Ýhÿ, Pahhi, wa ha acukij, jũ mã wa ha ajte ne Pahpãm cahê na itĩr rohnÿtti mã na ipa? — hajÿr.

²⁶Mã Jeju cumã:

— Ýhÿ, pom pê Pahpãm Mojxe xwÿ mã harê, pê harkwa kôt ahna ihhôt ita? Ne mër ampo ca ate hõ kàhhôc kam cahyt ne kam gapac? — hane.

²⁷Mã hũmre ita cumã:

— Ýhÿ, wa ite cahyt, mã harên to: “Ca ha ate gĩ cunea me, acarôt cunea me, acaxwÿn cunea me, ate amji kam gapac xà cunea to, amã Pahpãm pê Pahhiti ata ihkĩn. Ne hanea ne amã amji kĩnti ita na, quêamã me akwÿ kĩn” hajÿr — hane.

²⁸Mã Jeju cumã:

— Ýhÿ, ca ate to hamãr, ca ha ate ampo itajê cunea ton to apa na, ca ha Pahpãm cahê na atĩr rohnÿtti mã na apa — hane.

²⁹Mã me cumã Mojxe xwÿ jô kàhhôc to hahkre catê ita te cute amji mã ihpahàm hi prãmte, hipêr Jeju cukij, ne cumã:

— Mër jũmjê mã me ikwÿ itajê? — hajÿr.

³⁰Mã Jeju te cumã jũmjê pê mehwÿ atajê to hahkre to impejti prãmte, cumã hũjarên xà ita jarên, mã cumã:

— Ýhÿ, hũmre nõ ma Krĩpinkrên pĩn, Krĩcuxwati wÿriwrÿc. Mã pry cahtiri me hàhkij xi catêjê te me kam ihtêm, ne amehcahhy, ne me cupê ihkà caxàr, ne ma me to mō. Ne curia cute me hicu mã ihtyc cahàc ne nõ.

³¹— Mã ahna ahtũmre mã hũmre nõ ita pry ata kôt mō, ne por me hũmre nõ pry kôt mō ita pê Pahpãm mã mehcajrên catêjê nõ. Ne cute hũmre ata pupun, mã pry kam ihcujpàt neihtyc cahàc ne nõ. Mã ajte nee cute ihtehcajparnare, ne cute pry hyr, ne pry jĩkjêa rũm tẽ ne hakren, ne ma mō.

³²— Mã ahna ahtũm nare, mã ihkôt me hũmre nõa cator. Ne por hapu na cator ata pê Pahpãm jũrkwa jamãr catêjê nõ. Mã ma mō necute hũmre ata pupun, mã ihtyc cahàc ne nõ. Mã cupê mam ihnõ ita pyràac, ne ajte

nee cute ihtehcajpar nare, necute pry hyr, ne pry jïkjêa rûm tẽ ne hakren, ne ma mõi.

³³— Mã ahna ahtûm nare, mã me hûmre nõa pry ata kôt mõi, ne curi cator. Ne cupê nee Juta catêjê nõ nare mehkînte, ne cupê Krîrîtpej jõ pjê catêjê jõ xûmre nõ, ne ihcahkrit. Mã cutehõmpun, ne ampeaj kam cumã caprî. ³⁴Mã ahna hàhtêp, ne cute ihtehcajpar pyrentu. Necumã inxec ata cuhhõn, ne ampo cacô xÿhti ata to cumãihcahhê. Ne hanea ne ampo twÿm to cumã ihcahhê, ne cupêhkà to cumã ihcupu, ne hõ cawrõ cahàcre kam hÿr, ne ma to mõi. Ne me hàhhuc xà wÿr to cator, ne curia cute hamãr to apê.

³⁵— Ne apêa kam, cute ikre jõ pahhi mã ihporehy pijakrut ata to hàmjõr, ne cute cumã: “Hamre, ca ha hamã, neahna gõ pore kwÿ rẽ, wa ha hacpÿ ne amji jaxà, ne itÿj amã amgõ” hajÿr — hajÿr.

³⁶Ne Jeju te me cumã Mojxe xwÿ jõ kàhhôc to hahkre catê ita cukij ne cumã:

— Mër hõhõ, imã amji jarẽ, mencre atajênõ te mõrmõ jûm xûmre ihtyc cahàc ne nõ ita to amjikwÿ? — hajÿr.

³⁷Mã cumã:

— Por cumã caprî ata te ri hûmre atato amji kwÿ — hane. Mã Jeju cumã:

— Mër hõhõ, ca ha tẽ, ne cuxà ate amji kam gapac xà to hanea, ne amã me akwÿ kîn — hane.

Pê Jeju Martakwÿj me Marijkwÿj pupu

³⁸Ita jirõ pê mã pê ma Jeju ihkôt me ipa catêjê me pry kôt me mõi, ne ma krî jacot ita mã me cator. Mã curi cahãj japrÿ te Martakwÿj ata te hûrkwa kam me ahna amji caxàr, mã me hàhhuc. ³⁹Mã Marta tõi japrÿ te Marijkwÿj ita Jeju cape na hÿrne jÿ, ne apu cute ampo to hahkre xà na kampa. ⁴⁰Mã ihkînte Marta ikre kam hàpên xàjàhtõtî atajê to apu amji to ahtwÿ, ne apu ihkrihkrit, na ri Jeju na hàhtêp ne cumã:

— Xà ca nee ito amji kam gapac nare, pom wa itõi kînte ahte ijàpên xà jàhtõtî to apu apê ita? Na ca ha ijàpên xà ita caxuw imã itõi kujate, quê itehcajpa — hane.

⁴¹Mã Jeju cumã:

— Marta, Marta, ampeaj kam caapu amji to ahtwÿa to amji to ahtwÿ, ne apu akrihkrit, ne to apu amji cahpêrkà. Ne ca atõi kînte, gápên xà to pit mã amji kam gapac to apa. ⁴²He quêt atõi te amji mã ampo pyxit peaj catihtiatia capi ata pê ina hÿr, ne cute ikam hapac. Ne jû wÿr quê jûm cupê ihkrã kam, cute ipar xà itajê to põi — hane.

Pê Jeju Pahpãm mã mehcahôc to me cumã hahkre

11 ¹Amcro nõ na Jeju apu Hûm mã ihcahôc, ne cutecumã ihcahôc jicu, mã ihkôt me ipa catêjê nõ te Jeju mã:

— Pahhi, Jowāw xwỳ cuxà me imã Apãm Cati mã me icakôc to hahkre. Pê ajco ihtỳj ihkôt me ipa catêjê mã to hahkre — hajỳr.

²Mã Jeju me cumã:

— Ýhỳ, ca ha Inxũ Cati mã me acakôc prãm, ne megũjarẽn to hane he:

“Me ijõ Inxũ, wa me icunea quêt acatihtime apejti na, me gahkre pej to prãm.

Ne wa ate pjê kam mehcunea to ahimpej na me prãm.

³Ne ahpỳanre na, amcro cunea kam, me imã me ijõ gõ.

⁴Ne ite me ato kên itajê, ca ha me icuxà to tojnõ ne hicu, ahnaa mã waite ramã cute me ito kên atajê to tojnõ ne me hicu.

Ne me ipytà me pahcurê xwỳn pê, quê nee me imã incaca xà kêanre to hahkre nare.

Hamre” — hane.

⁵Ne Jeju te ihkôt me ipa catêjê mã hũjarẽn xà ita jarẽn, mãr quê cute Pahpãm mã mehcakôc, mã ihtỳj me kampa na me hahkre pej, ne me cumã:

— Me ita to amji kampa, ne ihkôt me hakop. Quê hame anõ mã gõ ikwỳ nõ nõ, ca ha caxwa cahtiri ahnagàhwỳr xà na hũrkwa wỳr tẽ, ne cumã: “Ikwỳ nõ, imã kwỳr krã toincrê ne agõ, wa ha amcro nõ na hacpỳa mã amã cugõ. ⁶Curmã ihmat pìn, iwỳr ikwỳ nõ cator, ne ipê cumã ampo jõr xà jamreare, na ca ha imã ihnõ, wa cumã cugõ” hane.

⁷— Quê ha akwỳ nõ ita ikre caxwãm pêamã: “Quê, hamreare, nee ca ame icahpêrkàr nare, wa ramã ite to harkwa jihê, ne ramã me ikra mea mã ame ijikwa, jũ wỳr wa to xa ne amã kwỳr krã itajê nõ gõ” hane.

⁸— Ne ampeaj kam wa me amã awjarê, quê haate cupê hõt cahpêrkàr cupate, ihtỳj to xa ne amã ateampo cunea na prãm atajê gõ. Ne nee mã apê hõ ikwỳ nõ cwỳrjapê quê ha amã hõr nare.

⁹— Cwỳrjapê wa me amã awjarê, ca ha ate me gàhwỳr na, ca ha atỳj me acwa, neate me hapên na, ca ha atỳj me cumã gapôj, ne ate me harkwa cahhyr na, quê ha ihtỳj me amã amji jihê mẽ.

¹⁰— Ýhỳ, mehcunea ame ampo na ahwỳ atajê, quê ha ihtỳj me cucwa, ne mehcunea amehapê atajê, quê ha ihtỳj me cumã hapôj, ne ame harkwa cahhy atajê mã, quê ha ihtỳj amji jihê mẽ.

¹¹— Měr hõhõ, xà quê me anõ kra tep na ahwỳ, ca ha tep kaj na ajkĩ cumã cagã nõ gõ? ¹²Nare quê akra hĩ xêt kwỳ na ahwỳ, ca ha ajkĩ ihkaj na cumã pacti nõ to irõ ne agõ? Jũ wỳr ca me anõ akra to hane. ¹³He me apê me hũmre pit, ne Pahpãm kĩnte me akêanre cacrõ, ca atỳjhõtpê me akra mã me ampo pej pit gõ. Měr hõhõ, quêha quêt Pahpãm cõjkwakam ihkrĩ ata, ihtỳj me amã, por ca Carõ Pejti name ahwỳ ata gõ — hane.

Jeju me, me pahcurê xwÿn carô kên jô pahhi

¹⁴Ne amcro nã na Jeju ame hũmre nã pẽrkêta ita pê me pahcurê xwÿn carô kên to pôj. Pê ampo carô kên nã ata nee ajco hũmre ata cakôc na hamãr nare, na pê nee ihcakôc nare. Pê Jejucupê cator pêê, pê ihcakôc kam ihtêm pyrentu. Mã me hàhtôti atajê te ahna me hõmpun, ne hõmpun xà ata to cute amji mã me ipikrar. ¹⁵Ne mehkwy ajpên mã me harên kên to:

— Ỹhỹ, Jeju ihtÿj ame pahcurê xwÿn carô kên to pôj to ipa. He nee me Pahpãm carôt to amehapôj nare. Ampo carô kên jô pahhiti japryê pê Perxep pêXatanaj te ri Jeju mã me caxuw carôt jôr — hane.

¹⁶Ne cute Jeju kên mã me mênprãmte mehkwy ihtÿj hipêr mehcukij, cute me kam mare mã ampo pihho catia ton, mã mehcunea te me hõmpun, ne cormã quêt Pahpãm te cumã carôt jôr na me hahkre pej prãmte. ¹⁷Mã ramã Jeju te cute amji kam me hapac xà ata na mehõmpun, ne me cumã ihkôt harên to hajÿr he:

— Ỹhỹ, quê pjê nã kam amehkrĩ catêjê atajê me amji jakrã, ne me taa me ajpu ne ihtÿj me amji jipej. Ne quê ikre ry nã kam mehkjêjê atajê me, me amji jakrã, ne taa me ajpu, ne hanea ne ihtÿj me amji jipej. ¹⁸Ita pyrãc pej ne, quê Perxep pê Xatanaj, pê me pahcurê xwÿn atajê me mehkwy me, me amji jakrã, ne taa ame ajpu, ne ihtÿj me taa me amji jipej. Came pahcurê xwÿn carô kên jô pahhi te imã icarôt jôr, wa carôt kôt ampo carô kên to pôj na, ame ijarê. ¹⁹Ne mër jũm te ri me akôt me ipacatêjê mã me carôt jôr, cute ampo carô kên to pôj xà caxuw? Xà Xatanaj te ri ajkĩ me cumã carôt jôr? He quê ha taa me amã amji jarê, ca ha me caa ate meto ihcupan xà ita na me amji jahkre pej. ²⁰Ne ampeaj kam, wa quêt Pahpãm carôat to ampo carô kên japôj to ipa, cwÿrjapê ri ihkôat ramã me acunea te me Pahpãm pê Pahhiti himpej xàte me awÿr cator na me hahkre pej.

²¹— Ỹhỹ, quê ha jũm xũmre tÿjti mã hàprê xà cunea, quê ha hàprê xà atajêa to amji jamãr to impeaj to ipa, quê ha nee jũm cupê hõ tehkrêj nã caxàr nare. ²²Nãmri quê ha me hũmre nã te jũm xũmre ata jirôa pê ihtÿjti na, quê ha kam tẽ, neto apkjê, ne cupê hàprê xà itajê cunea pytà, ne amji mã cupê hõ tehkrêj cunea pytà, ne ma to tẽ.

²³— Ỹhỹ, quê ha jũmjê te itehcajpar to prãm nare na, quê ha me cupê icuna mã hàprê catêjê. Ne quê ha jũmjê imã ampo to cuprôn nare na, quê hame cupê ito me ipicràn catêjê.

Ampo carô kên te amji jaxàr jarên xà

²⁴— Quê ha jũm pê me pahcurê xwÿn carô kên nã te cator na, quê ha carô kên ata ma amcrãti kamapu ipa, ne apu ihkôt xà japên to ipa. Ne nee ihkôtã nã na cator nare, ne taa amji mã: “Wa ha ma, por hũmre jĩ

pê ijûrkwa pê icator ata wÿr amji jaxà” hane. ²⁵Ne amji jaxà, ne ihhêj ne ikre caprÿ, ne ihcapõn pejti te hãm na hõmpu. ²⁶Ne ma tẽ, ne cute hirõa pê me pahcurê xwÿn carõ kên te xet atajê japrõr, ne mehcunea ikre pê hĩ ata mã me acjêj, necuria amehkrĩ. Mã hũmre mã mam ampo carõ kên xàr ata kam, cute amji cajpêr xà ata jirõa pê kam cute amji cajpêr xà, ne ihkêanre — hane.

Pahpãm jarkwa kôat ipa catêjê ri ampeaj kam me hakryti

²⁷Ne Jeju te itajê jarên jirõ pê mã ri me cahãj nõ te me hàhtõa jipõc ri kÿj cati pêa mã, cumã harkwa to:

— Jeju ampeaj kam apej. Ne mõrmõ pê ca anã kam apÿm ata ihtÿj ajco ato pijahõ, ne ampeaj kam apejti ita kam apyrên hakry — hajÿr.

²⁸Mã Jeju cumã:

— He cute me Pahpãm jarkwa par ne me hũpar tu, ne ihkôat me ipa catêjê atajê ri, inxê jirõa pê me hakry — hane.

Pê Jeju ampo pihho catihtti na me hàhwÿr catêjê mã cawpa

²⁹Mã me hàhtõa te Jeju pu na me cuprõn tu, mã cute me cumã ihcakõc kam ihtêm, ne me cumã:

— Æhÿ, amcro ita kam me apê Juta catêjê, ca pjê kam ame akrĩ atajê cunea kêanre. Na ca ajte me ina gãhwÿr to me hane he: “Me imã ampo pihho catihtti me ampo pejti to, wa ha me hõmpu, necormã Pahpãm te akujahêc na me gahkre pej” hane. Cakrõ wa ha nee me amã ampo pihho catihtti, impejti atajê nõ ton nare. Ne wa ha cama amji to irõ, ne me amã Jona xwÿ jarên xà ita jarê. Ampo na? He ipê hũràac, na wa ha me amã harê.

³⁰— Æhÿ, pê me cumã Pahpãm jarkwa to ihcakõc catê na Jona xwÿ ata ipa, nema Ninew jõ krĩ catêjê wÿr tẽ. Ne curi mehkrĩ catêjê mã Pahpãm jarkwa jarê, por pê Pahpãm Jona mã harên xà atajêa na me cumã harên pa. Na quê ha me Ahàkà Jona xwÿ cuxà ita kam amehkrĩ itajê mã Pahpãm jarkwa jarê. ³¹⁻³²Ne Pahpãm te mehcukij ne me to ipicokjêr xà jõamcro kam, quê ha Ninew jõ krĩkam mehkrĩ catêjê me acuna mã me hãm pyrentu, ne ame ana mehcakõc kêanre ne, ne ihtÿj me acurê mã me amê. Ampo na? Pê Ninew jõ krĩ catêjê atajê ihtÿj me ampo kên ton jicu, pê Jona xwÿ me cumã Pahpãmjarkwa jarên xà atajê kôt, pê me hicu. Ne wa ampeaj kam me amã amji jarê. He ipê me Ahàkà, wa amcro ita kam, pjê ita kam apu ipa, ne me Ahàkà ita ri Jona xwÿ jirõa pê cati. Ne ihnõ xwÿjê, pê Juta catêjê jõ pahhipê Xarômãw xwÿ ita, me cupê pahhicatêjê kwÿ jirõa pê amji jahkre pej. Mã me cupê pahhi catêjê jãhtõa ne hÿrmã me cator, cute cukwa kam ame ampo jahkre pej prãmte. Ne pécõ cati jĩkjê rũm pjê xa ata jõ pahhikwÿj cahãj, ne ma Xarômãw wÿr tẽ, cute krã kre te amji jakre pejti to hahkre xà atajê na impar prãmte. Ne Pahpãm te

mehcukij ne me to ipicokjêr xà jõ amcro ata kam, quêha pahhikwỳj cahâj ata, ihtỳj me acuna mã ihcakôc kêanre, ne me acurê mã me amê. Ampo na? He amcro ata kam, pjêita kam, ipê me Ahàkà ihtỳj me amã ampo itajê to hahkre to ipa, ne pa wa Xarômãw xwỳj jirôa pê icati cacrô, ca nee me ipar prãm nare.

Pahte amji kam me pajapac xà pejti pê hàhcujro xà

³³— Ne ihnô xwỳjê, jũ wỳr quê jũm hàhcujro xà nõ pôc ne hãm xà kam hàhcujro impejti kaj na hãm, ne jũ wỳr quê paraj krac ri hãm. Quê ha quêt hàhcujro xàata xãm xàa kam hãm, quê ha mehcunea me acjêj atajê hàhcujro kam me irit pejti ne.

³⁴— He me panto pê me pajĩ mã hàhcujro xàa. Quê ha me panto irit pejti, neampeaj kam me pajĩ kam me pamã me pajàhcujro hipu. Nãmri quê ha me panto te ihkêanre na, quê ha me pajĩ cunea kam awcapàtkô. Jĩkjê na ca ha ite amji kam ijapac xà pejti pupu, ne mehkôpĩ ne ihkôatme apa na, ca ha atỳj kam me gapac to me apa. Nãmri ca ha ate me hajỳr nare na, ca ha atỳj ame apa, ne me apê amji jahkre kêatre ne.

³⁵— Cwỳrjapê ca ha ma me amji jamã, ne ma ihhêj rùm me gĩ kam me gâhcujro xà ita jamã, cõt mã ca gâhcujro xà ata to amji pê kam awcapàtkô. ³⁶Quê ha me gĩ cunea kam hàhcujro xà ita te me ato hipu na, quê ha nee me gĩ kamawcapàtkô nare, ne me gĩ cunea kam hàhcujro ita ihpràti ne. Ne ihhêj ne me acaxwãm pê hàhcujro xà nõ xa ne ahcujro — hane.

Pê Jeju Parixêw catêjê nõ jũrkwa kam apà

³⁷Mã Jeju te ihcakôc jicu, mã Parixêw catêjê nõ te hũrkwa ri hàpàn prãmte hator. Mã ma Jeju ihkôt mō, ne hō pyxwỳr xà na hỳr. ³⁸Pê nee Jeju Parixêw catêjê te me amji ton xà ata kôt, hũhkra cuhhôn nare. Mã Parixêw catêjê nõ itate, cute nee hàpàn xà wỳrhũhkra cuhhôn nare ita na hõmpun, ne to amji mã ipikrar.

³⁹Mã Jeju te me cumã:

— Ýhỹ, me apê Parixêw catêjê, ca nee ampo caxwãm pê me to amji japackre nare, ne pō rùm pit mã me to amji japackre. Ca pō rùm me gō cuhkônme, me gō incrat catut cuhhôn to pit mã meamji japackre. Ne me caa, pō rùm pit mã me ate me gâhcukrêj cuhhôn ata kĩnte, meacaxwãm pê me akên te me ato hipu tu. Cacrô ca ajte nee me acaxwãm pê ate amji kam me gapac xà kên itajê to me amji japackre nare.

⁴⁰— Ne ampeaj kam ca ame ato kam waj, ne pom Pahpãm te pō rùm aton ita te ri hajỳr ne acaxwãm pê aton. ⁴¹Ne gapacta ne me gō incrat caquêc cuhhôn to megapac kêt, me akôm xà me. Ne impejti ita ri quêt me amã impej he, ca ha me gō incratkam ampo itajê me, me akôm xà kam ampo itajê, ca ha me cupê hamreare atajê mã me agô. Ca ha ate

mecupê hamreare atajê caprĩ na, quê ha põ rûm ampo itajê cunea me amã ihtetetti ne.

⁴²— Pÿj me hêj xi Parixêw catêjê kwÿ! Ca ha atÿj me akên mã me axà ne me gamre! He pê ihtÿj Pahpãm me amã ampo cati me ampo kryjre ton na awjahkre. Na ca gõtpePahpãm mã, por ca ihcunea to me ajpa atajê jikjê kryjre ne me agõ. Pom ca pàrhyre me, ampo kwÿ na kyre pê hĩ jàhwÿr atajê pyxit ne hãn ne me cumã agõ, ne icahhur to me gõ tekjê na ri Pahpãm mã impej. Cakrô, ca nee me akwÿto impej nare, ata pê me amã Pahpãm kĩn nare. Na ri Pahpãm mã, me ate amji kam me gapac xà itajê na me akam, cupê ihkaj na. Ampo na? He cumã ampo ita catia to cati, ihkryjre itajê jirõa pê. Na ri cumã me ate ajwar me ton na, me ato prãm.

⁴³— Pÿj me hêj xi Parixêw catêjê kwÿ! He ca gõtpe me hũjamãr catêjê catia krĩ xà ata kam me cahê na me akrĩ prãm, ate me cuprõn xà kam. Ne ca gõtpe krĩ cape na cute me apejti na me garên na me to prãm.

⁴⁴— Pÿj me hêj xi! He me apê mehtyc kre kam me hikwa, mã nee me hõmpun ne me hahkre pej nare kam, incwÿrpê me pra atajê pyrãac. Ne ihhêj ne põ rûmme apejti, ne me acaxwãam pê ate amji kam me gapac xà kên pit apu hikwa — hajÿr.

⁴⁵Mã me cumã Mojxe wÿj jõ kàhhôc to hahkre catêjê nõ hanea ne curijÿ, ne cute Jeju jũjarên xà ita kam hapac, ne cumã:

— Pÿhàpà, Pahhi, ca acakôc xà ita to ate acakôc nehanea ne me ixûn — hajÿr.

⁴⁶Mã Jeju cumã:

— Pÿj me hêj xi me apê me cumã Mojxe wÿj jõ kàhhôc to hahkre catêjê! Ca hãn ne mehcunea mã harên to hajÿr to me apa ne me cumã: “ÿhÿ, ca ha atÿj Pahpãm jarkwa cunea kôt me apa. Nãmri ca ha nee ihcunea na, catyt kami hkôt me apa nare, quê ha ihtÿj Pahpãm me ato kêanre ne” hane. Me gũjarên xà itajê ihtÿaj to ihtÿj, ne cupê ihhêj rûm ate me kam me hõ kàhà pytiapyxwÿr. Jũ wÿr quê jũm awcanã, quê jũm hũcanãr nare. Ne por ca ihhêj ne nee me to ipa xà caxuw gũhkrahhi pyxit to mehtehcajpar prãm nare ata pê nee ate Pahpãm jarkwa na mehtehcajpar, mã catyt kami hkôt me ipa xà nare.

⁴⁷— Pÿj me hêj xi! He ca ha atÿj me akên mã me apÿm! Ne ca gõtpe Pahpãm jarkwa to mehcakôc catêjê tyc atajê jarêt xà caxuw me cumã kre pejti to. ⁴⁸He ca atÿj me aquêjtê japua na ita to me hajÿr to me apa, ahnaa mã pê me aquêjtê meacumam ajco me Pahpãm jarkwa to mehcakôc catêjê cura he. Pê taa mehcure, pê ca me caa ajco me harêt.

⁴⁹— Cwÿrjapê pê Pahpãm, cute amji jahkre pejti te hajÿr romã mã, ramã harkwa to: “Wa ha me cumã me ijarkwa to mehcakôc catêjê me, me imã memprar catêjê kujate. Quê ha me jũm cura, ne ame jũm to kên” hane. ⁵⁰Hajÿr cwÿrjapê quê ha amcro ita kam, cute harkwa to mehcakôc

catêjê curan jahpan xà na, ame ipa itajê cunea to hanea, ne ame to kêanre ne. ⁵¹Pê mam pjê intuw kam me Aper xwỳ cura, ne caxuw ajpên me amji curan na me cupy, ne ajpên me amji curan to me mō. Ne Pahpām to amji kam me hapac xàjũrkwa kam, cute me amji curan jicu xà to me Xacarij xwỳ curan. He ampeaj kam wa me amā awjarê. Na quê ha Pahpām, cute mehcuran jahpan xà na, pom ita kam mehtĩar ame ipa itajê to apu ihkêanre ne.

⁵²— Pỳj me hêj xi me apê me cumā Mojxe xwỳ jō kàhhôc to hahkre catêjê! Ca ha meakên mã me apỳm! Ampo na? Ca nee me Pahpām jarkwa jahkre pej prām nare, ne nee me amā jũmjê te hahkre pej na me to prām nare. Na ri ihhêj rũm me apê cute me ikre jihê rên xà incwỳr, ne ma amentê, mã nee me to incjêj nare, ne nee jũm mã me hõr, mã cute to hihê mên, ne hàr na me amā to prām nare — hane.

⁵³Ne ma Jeju me cupê mō, mã Parixêw catêjê me, me cumā Mojxe xwỳ jō kàhhôc to hahkre catêjê me, cama ame cumān to mehcyt to amencrôn to me ipa. Ne mencryac kam ampo jàhtôa na mehçukij. ⁵⁴Ne tee Jeju jarkwa nō to me to ipipkjêr, ne cute mehpro prámte ame to hahkre.

Mehkrā kên caca xà

12 ¹Ne pê me hàhtôa ne me cuprō, ne me hàhtô kam, ihtỳj ajco amji kam mehçuhhê. Mã Jeju te ihkôtme ipa catêjê mã mam harên, ne me cumā:

— Co he, ma amji na me Parixêw catêjê to me guphêa ne, nãmri ihhêj ne ampeaj kam pō rũm mempej, ne me caxwām pê mehkêanre. Ne amehhêj xia jarên to me ipa, neme cupê pàrhÿre xỳ pahtỳjti to me hõ cunea to hỳ ita pyràac. ²Ne hanea ne ihtỳj ampo cunea to me ipimxur to ipa. Quê ha amcro nō na cute ampo to me ipimxur itajê cunea pro mē, ne ampo cunea pupu. ³Ỡhỳ, ca ate awcapàtkô kam me ampo cunea jarên atajê, quê ha ihtỳj amcroa kam me kampa. Ne ca ate ikre caxwỳn kam ampo cunea to me apimxur, neahna me to hihê ne caxwām pê me harên atajê, quê ha ihtỳj cà pê mehçunea me harê, ne me kampa.

Cu ha amji mã me Pahpām pit cupa

⁴— Me ijō ikwỳ nō, ampeaj kam wa ha me amā awjarê, nee ame, por me gĩ pit cura atajê cupa nare. He quê ha nee hipêr me ato kên nare.

⁵Ne Pahpām ca ha quêt amji mã mehũpa. Pahpām quê ha ihtỳj quêt jũm jĩcura, ne cormā hipêr apu to kên, ne ma ihkākānti kam cuhy kam cumê. Cwỳrjapê wa ha hipêr me amā harê, na ca ha quêt amji mã me Pahpām pit cupa.

⁶— Ỡhỳ, por hãn ne cuwênre te xĩc toihpore pijakrut peaj na me hàhpan cakrô, quê ha neePahpām cuwênre ata nō to hapac kêt nare. ⁷Ne hanea ne Pahpām te ahpỳanre na me akĩ cunea cahyt par. Ne me caa ri

cuwêne jàhtôti itajê jirôa pême acati. Cwÿrjapê ca ha nee amji mã ampo cupa nare.

Cu ha Jeju na amji jarê

⁸— Ỹhỹ, he ampeaj kam wa me amã awjarê, quê ha jũm me akam mare mã cute ijahkre pej na amjijarên na, quê ha me Ahàkà hanea ne cõjkwa kam Pahpãmjarkwa to imprar catêjê kam mare mã, cute jũm ata jahkre pej na amji jarê. ⁹Ne por quê ha me kam mare mã, ma ame icaca atajê, quê ha me Ahàkà hanea ne cõjkwa kam Pahpãm jarkwa to imprar catêjê kam mare mã, ma apu jũm ata caca.

¹⁰— Ỹhỹ, he quê ha jũmjê ipê me Ahàkà na ihcakôc kên na, quê ha Pahpãm ihtÿj ihkên ata to tojnõ ne hicu. Nãmri quê ha jũmjête Pahpãm Carõ Pejti na ihcakôc kên na, quê ha nee Pahpãm ihkên ata to tojnõ ne hicu nare.

¹¹— Ne quê ha amcro nõ na me acukij xà caxuw, cute mecuprõn xà jũrkwa wÿr me gaprõ. Ne cuteme akên mã me amên prãmte, pahhi catêjê me, mecupê pahhiti catêjê cuna mã me apyxwÿ, ne me acukij. Ne amcro ata na, ca ha nee ame akrihkrit nare, ne nee amji caxwãm pê me amji mã: “Jũ mã wa ha ajte amji jarên to, ne pahhi catêjê itajê pê amji pytà?” hajÿr nare. ¹²He Pahpãm Carõ Pejti quê ha amcro ata kam, me amã me ate me amji jarên xà to hahkre, cwÿrjapê ca ha nee ame akrihkrit nare — hane.

Hakràjti krã cunĩ jarên xà

¹³Mã me hàhtôa jipôc ri hũmre nõ xãm, ne Jejumã ihcakôc ne cumã: — Ỹhỹ, Pahhi! Ca ha itõ mã garkwa ta, quê imã hũmxwÿ jàhcukrêj to ajcapô — hane.

¹⁴Mã Jeju cumã:

— Pÿhàpà, xà ajkĩ jũm te me amã ampo to ipicràn catê na ixãm? Hãpà. Nee ipê ampo to ipicràn xà caxuw me acukij catê nare — hane.

¹⁵Ne me hàhtôti atajê japackre, ne me cumã:

— Krãa, me ikampa! Ca ha nee ame hàhcukrêj to me acukrêj to prãm to me apa nare. Gapacta ne ampo to amji mã me cuprõ, ne nee me acukrêj itajê to pit mã ame amji japackre nare. He ampeaj kam ri me pahcukrêj itajê pê nee pahte amjikam me pajapac xà to ihhimpej catê nare.

¹⁶— Ỹhỹ, wa ha me amã jũm jakràjti nõ jarê, ca ha me hahkre pej, ite me amã harên xà ita kôt.

— Ỹhỹ, hakràj cati ita mã hõ pur catia, ne hõ pur ita kam cumã ampo jàhtôa to hàhtô. ¹⁷Mã cute pur kam ampo itajê cunea pupun, ne to amji kam hapac pyrentu, ne amji mã: “Pÿhàpà, ampeaj kam ipurkam ampo jàhtô, ne ipêcaxuw nõr xà cati nare ita kam, jũ mã wa ha ajte to?”

¹⁸“Ỹhỹ, wa ha to hane he. Wa ha nõr xà incirre ita hu, ne amji mã nõrxà catia nõ xãm, ne curia wa ha ijõ cunea jaxwÿ. ¹⁹Ne wa ha amji mã,

‘Hamre, ramã imãijõa to ijõ, ne ijakràj catia, na wa ha nee hipêr pur nõ xir, ne kam ijapênnare. Ita caxuw wa ha caku jàhtëa kam cama ikrĩ ne cuku, ne apu to ikõm to ipa, ne ijakry ita na apu ipa’ ” hane.

²⁰— Mã cõjkwa kam Pahpãm jỹ, ne cute amji kam hapac xà ita na hõmpu, ne cutehakràj cati ita mã: “Ate amji jahkre kêatre. Pê wa amã acaca xà gõ, ne ita kam ca ha caxwari ty, ne hacpỹa mã imã agõ. Quê ha jũmjê amji mã gõ jàhtëti ita to me ahtwỹ” hajỹr. Hõhõ, Inxũ te hakràj cati ata mã harkwa to hajỹr.

²¹— He Pahpãm to ate amji kam me gapac to me apa xà ata pê ihhêj rũm cõjkwakam ate amji mã me gãhcukrêj pejti to me cuprõn. Kĩn pej ne, ca ajte pjê ita kam megãhcukrêj me, me gõ to pit mã me amji kam me gapac to meapa, ne nee hĩkjê na, hõtpê Pahpãm to me amji kam me gapac nare na, ca ha me apê hakràj cati atapyràac, ne me amji to acto — hane.

Cu ha pahtỹj Pahpãm to amji mã me pahhimpej to prãm

²²Ne Jeju te ihkõt me ipa catêjê mã, cute ampo kên na ame amji to hàptõ to me ipa nare xà jarên, ne me cumã:

— Cwỹrjapê wa ijõtpê me amã harê, ca ha nee me gõ me, me gápàn me, me akà to pit mã me amjito gápõtõ to me apa nare. ²³He me pajĩ ri me pahkà jirõa pê cati, ne pahte amji kam me pajapac xà ri me pajõ jirõa pêcati, na ca ha itajê to pit mã me amji kam me gapac to me apa jicu.

²⁴— Ca me wakê pupu, mã nee amji mã pur ton nare, nenee kam hàhkre nare, ne nee amji mã to cuprõn nare, ne nee caxuw amji mã hõ nõr xà pyxwýrnare. Cakrõ mã Pahpãm hõtpê me cumã harte. Ne mër hõhõ, Pahpãm mã wakê itajê jirõa pê me acati. Cwỹrjapê quê ha ate ampo itajê cunea na, amji to me gãhhuc xà nare kam, quê ha me gamã.

²⁵Xà ca ha me atyc nare na, amji to me gãhhucxà ata to, ajkĩ atỹj amji mã me atĩr jõ caku to ajcamê? Hamreare, ca ha nee amji mã me to apicamên nare. ²⁶Mër hõhõ, he ca ramã nee ampo to ate amji kam me gapac xà atajê to, amji mã me apicamên nare ita kam, ampo caxuw mã ca cormã ampo kryjre na me amji to me gãhhuc to me apa?

²⁷— He pĩrã te hajỹar he. Nee hàpên nare, ne nee amji mã ihkà ton nare cakrõ, mã ihtỹj ajcamê ne impejti. Ýhỹ, ampeaj kam wa me amã awjarê, por pê pahhi xwỹ pê Xarõmãw jakràj jãmkrã catia ata, pê te ihkà impejticakrõ, pê pĩrã kà ata Xarõmãw kà jirõa pê impej. ²⁸Ne Pahpãm ri, pom ahkêt amcro kam ihcuhhê neajcamê atajê mã ihkà to. Mã hãn ne ahna apê mã cuhy to capa. Mër hõhõ, quê ha Pahpãmihhtëj me amã me akà to. He ca ihhêj ne cormã kyre pê Pahpãm to amji mã me ahimpej, mã Pahpãm ihtỹj me gamãr to prãm.

²⁹— Cwỹrjapê ca nee ame akrihkrit nare, ne nee ate me ampo kur xà me, me akõm xà to pit mã na, ame amji to hàptõ nare. ³⁰Por pjê kam

krĩxàre mehkrĩ, Pahpãm to amji kam hapac nare atajê ri me hõ me, mehka to pit mã ame amji kam hapac to me ipa. Ne me Apãm Cati mã, ate ampo na me prãm atajê na me gahkre pej. ³¹Ca ha mam cati mã Pahpãm pê pjê cunea jõ Pahhiti to amji kam gapac to me apa, ne harkwa kôt ame apa, jahpan xà na, quê ha Pahpãm cormãhipêr me amã ampo cunea na, ate me prãm atajê gõ.

Cu ha cõjkwa kam me papê pahhi catêjê

³²— Ýhỹ, te me acrêre cakrô, ca nee ame hũa nare. He Pahpãm te amji cahê na, me apê pahhi na me apyxwÿr to amji kam hapac. ³³Gapacta ne me acukrêj to ihpore na meahpa, ne ihpore ata, ca ha gapacta neme cupê hamreare atajê mã me agõ. Ca ha ate me ita to hajÿr na, ca ha cõjkwa kamamji mã ampo jãhtõa ne me to acukrêj. Ne ihporeincjên xà itajê, quê ha cõjkwa kam me gõ pore me amã to hipu tu rohnÿtti mã. Wÿr quê curi me hàhkĩj xi nõ apê ihnõ to ahkĩ, ne nee quê ha krir nõ curi apêampo pejti ikrêr nare. ³⁴Ne cõjkwa kam ca quêt me acukrêj pejtiitajê to me amji kam gapac to me apa.

Me hàpên catêjê me hàpên xà to mento juphê jarên xà

³⁵⁻³⁶— He me apê ihhêj rûm me gõ pahhi jikwa tuw mã me gápên catêjê pyrãac. Ne ate hahkà na hõ amji kĩn ata to me gãhcuprôn, ne me amji cümpej, ne me hikaj na cute me amên. Cwÿrjapê ca ha me amji cümpeaj ne. Ne me atuna hê xà to me akat kã juwahi, ne megãhcujro xà nõ mã me haxà, ne mehpoç. Quê ha cato ne ikre jarkwa cahhy, ca ha me cumã hihê mên pyrentu. ³⁷Ca ha me apê cumã me gápên catêjê me hikaj, ne nee ame gõt pej nare, ne quêt me arĩat ame apa, ne ampo cunea caxuw ame apa, cwÿrjapê ca ha quêt me azej mãme apÿm. Na quê ha me gõ pahhia, amji tu na, ihtu na hê xà to ihtÿj, ne me apê me cumã hàpên catêjê atajê mã hàpàn xà na me akrĩ na awjahkre, ca ha me akrĩ, quê ha taa me amã me garte. ³⁸Quê ha te awcahti xà wÿr awcapãtkô picapôn kam, me gõ pahhi me awÿr cator cakrô, me arĩat wÿr cato, ca ha me azej mã me apÿm. Ca ha to hane, ne me apê me gõ pahhi jikwa tuw ata mã me gápên catêjê impejti pyrãac.

³⁹— Ýhỹ, quê ha ikre jõ pahhi nõ, me hàhkĩj xi catêjê cator xà na me hahkre pej na, quê ha neekre mã jũm xàr, ne jũm te cupê ampo pyr na hamãr nare. ⁴⁰Ne me ca xwÿjê, ca ha me arĩat ame apa. Co he, quê ha me Ahàkã cati ate me hikaj xãjahkre pej nare ata kam, ihprõt pê me awÿrcato. Hõhõ, ata to ca ma me amji japackrea ne — hajÿr.

Hàpên catê impej me ihkên jarên xà

⁴¹Mã Petrô Jeju cukij, ne cumã:

— Ijõ pahhi, pom ca ame imã ampo jarê ita, xà me imã pit mã, nare, xà ajkĩ mehcunea mã? — hane.

⁴²Mã nee Jeju te cumã jũ mãn nare, ne cama cumã:

— Ỹhỹ, wa ha amã ikre jamãr catê nõ jarẽ. Por quẽ ha hõ pahhi ikre jamãr na cumẽ ata, quẽ hacatyt kam, ahpyãre na mehkwy mã me hõ jõr to ipa. ⁴³Quẽ ha cute hõ pahhi cator xàakam, catyt kam cumã hàpên tohajyr na, quẽ ha impej mã ihpým. ⁴⁴Ỹhỹ, quẽ ha hõ pahhi ihtýt cumã hàpên catê ita te ikre me, pjê me, ampo cunea jamãr catê na hãm. Quẽ ha ihtýt hũpar pyrentu, ne me hàpên catêjê to kênre nare.

⁴⁵— Nãmri quẽ ha cute hũpar nare, ne me hàpên catêjê to impejti nare na, quẽ ha ihkên mã axà. Quẽ ha ikre jamãr catê ata amji mã: “Pyhàpà, ijõ pahhi cator xà ita jũwryato hũwry, ne ramã cator xà jirõ pê ihpým, cwyrjapê wa ha ipyxit peaj ne amji to pit mãamji kampa” hane. Ne cute hàpân ne ihkôm kam ihtêm, ne ipipân kam ihtêm, ne hõ pahhi mã hàpên catêjêkwý xũmre me, me cahãj cahhyr kam ihtêm na, quẽ ha ihkên mã axà. ⁴⁶Ampo na? Quẽ ha nee jũ caxuw hõ pahhi te hỹrmã cator xà jõ amcro jahkre pej, ne nee hikaj nareata kam, quẽ ha amji jaxà ne cato, quẽ ha mehpro mẽ. Quẽ ha ihkên ton jahpan xà na ihcura, ne cute me Pahpãm par nare atajê cuhhê xà kam cumẽ.

⁴⁷⁻⁴⁸— Ỹhỹ, quẽ ha me hàpên catêjê nõ mã hõ pahhi jarkwa jahkre pej nare, ne cupê hahkre kêt kamnee cute amji cùmpej nare, ne apu hàpên to kêanre ata jahpan xà na, quẽ hahõ pahhi nee ihcahhyr to ihtýt nare, ne kyre pê ihcahhy. Nãmri quẽ ha me hàpên catêjê nõ te hõpahhi jarkwa jahkre pej cacrõ, nee amji cùmpej nare, ne nee hàpên xà to impej nare, quẽ ha hõ pahhi hahpan xà na, ihcahhyr to catia. Ne quẽ ha jũm, jũm jũhkra kam, ampo catia ne cupy, quẽ ha hahpan xà na hacpy ne ampo catia ne ahna ahwý. Ne quẽ ha jũm ampo crire ne cupy ne hahpan xà na hacpy mã incirre ne cugõ. Jíkjê na mã Pahpãm me ato hanea.

Quẽ ha Jeju cwyrjapê ame amji to ajcokjê

⁴⁹— Ỹhỹ, ite pjê ita to cuhôn prãmte wa hỹrmã icator. Ne ramã ihpõc to mõr na ri imã to prãm. ⁵⁰Wa ha cormã amji pupun xà kêanre to amji pupun to hanea, pom quẽ, cô kam cute me amji cumrãr xà ita na, wa ha ite amji pupun xà kêanre ita kam amji cumrã. Ne imã amji kĩn nõti ita kam ahnaa ikên na amji pupun to ihhi.

⁵¹— Mõrmõ ca atýt amji mã me ito, ite me amã meacarĩcti jõr, ca nee ame apijapu nare prãmte, mõrmõ wa me awýr icator na, ca me ito amji kampa. Hamreare, wa nee ita caxuw me awýr icator nare. He wa ita kaj na, ite me atoipicokjêr xà caxuw wa quêt icator. ⁵²Ỹhỹ, ita caxuw quẽ ha icwýrjapê ikre kam cute me xĩc atajê ame ajcokjê, quẽ ha menchrê itajê me ipijakrut atajê kam mencryc kam ame ipa. ⁵³Ne quẽ ha me hũmjê xwýjê mehkra xũmre kam incryac kam ame ipa. Quẽ ha mehkra xwýjê mehũmjê kam mencryac kam ame ipa, ne mehkra cahãj atajê, quẽ ha menxrxwý kam mencryac kam hanea ne ame ipa. Quẽ ha me hũprequẽj

hanea ne me wỳjxwỳ kam mencryac kam ame ipa. Quê ha me wỳjxwỳ hanea ne me hũprequêj kam mencryac kam ame ipa.

Amcro cajpêr jarên xà

⁵⁴— Ỡhỹ, ca ha ita ri Juta catêjê jõ pjê kam pytcjêj xà rũm me ahcakrã nõ pupu, quê ha hàpir to mõi, ca ha me amji mã harên to hane he: “Quê ha tawrỳ” hane. Quê ha ihtỳj wrỳ. ⁵⁵Ne ca ha hanea ne me crõtze jõ kõi cajpê, ne amji mã me harên to: “Quê ha ita kam ampeaj kam me pahcacro” hane. Quê ha ihtỳj me pahcacro. ⁵⁶Mêr hõhõ, pom ihtỳj me amã ampo itajê cunea jahkre pej, ne me amã pjê me, cõjkwã jarên jahkre pej ita. Ne mêr ampo na mã me apê amcro ita kam, ite ampo to ijàpên xàitajê jahkre kêatre? He ca cama ame ahêaj to ame ahêj!

Cu ha me pahcurê xwỳn to impejti ne

⁵⁷— Ne mêr ampo na mã ca catyt kam me apa na me apê amji jahkre kêatre? ⁵⁸Ỡhỹ, quê ha jũ caxuw acurê xwỳn nõ apro mên prãmte mehckuj xà wỳr gaprõr prãm, ne gaprõ. Ne pry kõi cormã ato mõi kwỳa kam, ca ha cume ajpênpar peaj ne, ne me acator xàa kam me amji to impej. Nãmri ca ha ate me ita to hajỳrnare, ne nee me amji to impej nare na, quê ha acurê xwỳnnõ ita, mehckuj catê mã agõ, quê ha mehckuj catê mã krãhtare mã agõ, quê ha makrãhtare me hacjên xà mã gaxã. ⁵⁹He wa ampeaj kam me amã awjarê, ca ha me hacjên xà kam akrĩ ita kam ahnaa, por ate acurê xwỳn to new ata to gãmjõr par nare kam, quê nee me acator nare — hane.

Cu ha me pahkên ton jicu nare, ne me ty

13 ¹Ne amcro ata na jũmjê atajê te Jeju mã Hĩpõjajo catêjê curan xà jarên, ne me cumã:

— He mã Hĩpõjajo catêjê kwỳ Krĩpinkrênwỳr me mõi, cute me ampocuran, ne Pahpãm mã me hõr prãmte. Ne cormã Pahpãm mã me ampo jõr prãam kam, mã pahhi Pirat te me hipej na harkwa hydr. Mã cute me hipej — hajỳr. ²Mã Jeju me cumã:

— Ỡhỹ, Hĩpõjajo catêjê itajê tyc xà kêanre, ne mõi mõi ca me amji mã me to: “Cute mehkwỳ jirõa pêmehkên ton, cwỳrjapê ri cute me amji pupun xà kêanreita to ame amji pupun, ne amehtyc” hane. ³Hamreare, he nee mehkwỳ jirõa pêmehkrã kên nare. Ampeaj kam wa me amã awjarê, ca ha me caa me acunea te me akên ton jicu nare na, ca ha atỳj me cuxã ame ty.

⁴— Ne por Krĩpinkrên cahê na cute me tejõjtõne mehkrĩ atajê kam kente ikre kãhti ata pỳm, ne cute me hipej atajê, mõi mõi ca amji mã me to: “Krĩpinkrên kam mehkwỳ mehkrĩ atajê jirõa pêmehkên ton, cwỳrjapê ri cute me amji pupun xà kêanre ita to ame amji pupun

neamehtyc” hane. ⁵Hamreare, he nee mehkwy jirôa pê mehkra kên nare. Ampeaj kam wa me amã awjarẽ, ca ha me caa me acunea te me akên ton jicu nare na, ca haatyj me cuxã amehtyc xã ita to ame ty — hane.

Pîxô pâr na hô nare jarên xã

⁶Ne hipêr cute me cumã me hujarên xã nõ jarên, cute ame hahkre pej prãnte, ne me cumã:

— Ýhÿ, pê jũm xũmre nõ mã hõ pur kam pîxô parramã hô xãa kam, ne nee cormã hô nare. Pê ajco hô japê, tee hõmpu, ne nee ihnõ na hõmpun nare. ⁷Ne cute pur jamãr catê mã: “Hõmpu he, ramã pîxô pâr ita na cakucrê, wa tee apu hô japê, ne nee rÿ ite hô nõ pupunnare. Ne hamre, gapacta ne pîxô pâr ita jakep pyrentu. Cama ihcuhhê ne pjê pytã, ne nee hô nare” hane.

⁸— Mã hamãr catê cumã: “Ijõ pahhi, ca nee ite hakepna imã gũjahkre nare caku ita kam, wa ha xa ipu na hahkwÿ, ne kam ampo jîn to hipu. ⁹Quê ha ajpên caku mõ ita kam, cute hô na, quê ha ahna impej, nare, quê ha cute hô nare na, ca ha gapacta ne cormã hakep na imê, wa ha itÿj hakep” hane. Necute to hajÿr. Jîkjê na mã Pahpãm me ato hanea, ne ihtÿj cormã me ato hamre xã to ipinhuc to mõ — hane.

Pê mehkôt xã jõ amcro kam Jeju cahãj caprã

¹⁰Ne mehkôt xã jõ amcro nõ na Jeju ame cumãampo to hahkre, Juta catêjê te cuprôn xã jürkwa kam. ¹¹Mã curi me cahãj nõ kam me pahcurê xwÿn carõ kên, ne cute apu to kêanre, mã ihkô cajõc ne cumã hà, ne jũ wÿr quê capô. Ne pêramã ihkô ita capô nare na ahna caku te tejõjtõ.

¹²Mã Jeju te hõmpun ne cumã hàkjêr, ne cumã:

— Ýhÿ, cahãj ita, ramã acaprãr — hajÿr.

¹³Ne cute ahna hũ xir, mã ihkô capô pyrentu, mã cahãj ita te amji jahpan xã na, cõjkwa kam Pahpãm mã impejti jarên to mõ, ne cumã:

— Ýhÿ, me ijõ Inxũ Cati, ampeaj kam apej ne acati, ne ate icaprãr pyrên ijakry! — hajÿr.

¹⁴Mã cuprôn xã jõ pahhi apu, Jejute mehkôt xã jõ amcro kam jũm caprãr ata na, apu kam incryac to incryc, cwÿrjapê ri mehkwy mã:

— Pÿhãpã, pom me pajãpên xã caxuw amcro te xêj ita? Mêr hõhõ, amcro te xêj itajê kam, ca ajpên me ate me amji caprãr prãm catêjê me apa, ne nee mepahkôt xã jõ amcro kam ajpên me amji caprãr prãnte me apa nare — hane.

¹⁵Mã Jeju me cumã:

— Me apê me cumã mehhêj xi catêjê, me ahêj xi hyre nare. Pom ca me acunea mepahkôt xã jõ amcro ita kam atÿj me gõ pryti me, cawrõcahãre mã me hê pô, ne me to apa, mã ikõ ita? Nõ na mã ca ame hane?

¹⁶Mêr hõhõ, me cahãj ita pupu he, taa xwÿjê pê me panquêtti Aprãw

xwýtàmxwỳ tàmwxwỳ nõ. Pê Xatanaj pê me pahcurê xwỳn carõ kên ihpro ne huwapre, ne ramã huwapre ita na ahna caku te tejôjtô. Xà wa ha ajkĩ mepahkôt xà jõ amcro kam nee cumã hê pôn, ne caprãr nare? — hane.

¹⁷Mã Jeju jarkwa ata kam Jeju curê xwỳn itajê amehpahàm. Mã me hàhtôti atajê Jeju te ampo pejti ton ata pyrên quêt ame hakry.

Ampo hy kryjre jarên xà

¹⁸Mã Jeju me cumã:

— Wa ha me amã Pahpãm pê Pahhiti te pjê to ihhimpejxà ata to hahkre, ca ha me hahkre pej. He ihhimpej xà ita pê ampo hy pyrãac.

¹⁹ÿhỹ, cupê ampo hy kryjre pyrãac. Mã hũmre nõ te ipyr, ne hõ pur kam ihkre. Mã ampo hy kryjre ita hiprãj ne ihkà, ne ipàr pê pĩcatia pàr. Mã pryre jara ihtỳj ihpa atajê kam amji mã hahê to. Hõhõ, ita naquê ha Pahpãm te pjê to ihhimpej xà ata.

²⁰⁻²¹— Ne hanea ne cupê cuhy incire ata pyrãac. Quê hacuhy incire ata to me ahkêt mã haxà, quê ha ahna ahtũm nare, quê ha ihtỳj ahkêt apu ihpõc to ipa. Ita na mã Pahpãm himpej xà te hajỹr, ne mam cupê ampo kryjre pyrãc, ne ma ihtỳj cati to ipa — hane.

Harkwa jatàtre jarên xà

²²Pê ma Jeju Krĩpinkrên wỳr mõ, ne ajco krĩ atajê cunea kôt me cumã ampo to hahkre to ipa. ²³Pê jũm ata Jeju cukij ne cumã:

— ÿhỹ, Pahhi, xà mehkên catia ata pê cute me amji pytãr xà atajê incrêre? — hane.

²⁴Mã Jeju cumã:

— ÿhỹ, cõjkwa kam Pahpãm wỳr harkwa ata jatàtre. Ca ha ate amji mã ame acarõt na, ca ha atỳj harkwa ata na ame acjêj. Wa ampeaj kam me amã awjarê, he me hàhtõane tee ame hàr to prãm, ne jũ wỳr quê me axà.

²⁵— Quê ha ikre jõ pahhi ikre jarkwa na ahtwỳ ne xa, ne to harkwa jihê. Ca ha põ pê ame apa, ne tee cumã me harkwa cahhy, ne tee me cumã amji jarên to: “Pahhi, me imã hihê mē, wa me axà” hane. Quê ha me amã: “Jũmjê mã ca me? Ca jũmjê itajê ame apa, ipê me gahkre kêatre” hane.

²⁶— Ca ha me cumã: “Por pê wa ramã me acahê na me apà, ne ame ikõ ata? Por pê ca ramã me ijõ krĩa kam ampo to me imã hahkre ata?” hane.

²⁷— Quê ha hipêr me amã: “Ipê me gahkre kêatre. Wa ite rỳ jũ caxuw jũmjê itajê me apupun nare. Ne me acuto, ate ame ampo to kêanre atajê!” hane.

²⁸— Ca ha me Pahpãm te pjê to ihhimpej xà atakam, me Aprãw xwỳ me, Ixac xwỳ me, Jaco xwỳ me, pê mam Pahpãm jarkwa to mehcaokõc catêjê atajê cunea pê me panquêtjê na me hõmpu. Ne mehkĩnte põ pê ca ha ameacwỳr to ame apa, ne me akàj xàhte me axwa gyj to me apa.

²⁹Quê ha me hàhtôa ne me cato, pjê cunea pîn, quê ha pyt japôj xà me, pyt cjêj xà me, ne kÿj rûm me cato, ne harã rûm me cato, ne me hàpàn xà na amehkrî, Pâhpâm te pjê to ihhimpej xà ata ri, ca ha cama ame hõmpun to me apa.

³⁰— Ỹhỹ, ita kam, por hapua na me ipa atajê, quê hajũ caxuw mam ihkrãa ri amehcuhhê, ne pjê ita kam mammehcuhhê itajê, quê hahapua na jũ caxuw me ipa — hane.

Pê Pahhi Heroti mã Jeju curan prãm

³¹Ne Jeju xa ne apu awjarê ata caxuw ri hÿrmã Parixêw catêjê kwÿ cator, ne Jeju wÿr me hàhtêp ne me cumã:

— Atêm pyrentu, nãmri Heroti apu acuran to prãm — hane.

³²Mã Jeju me cumã:

— Me pra ne me cagã ata mã me ijarkwa jarên to hane he: “Wa ha ita kam ame pahcurê xwÿn carõ kên japôj to mō, ne ame hĩ caprãr to mō. Ne amcro incrê kam wa ha cormã ijâpên xà ita jicu” hane. ³³Ne wa ha itÿj ijâpên xà ita kam to icrà, ne cormã ma Krîpinkrên wÿr ikrâr, ne amcronõ na wa icator to prãm. Nãmri rÿ jũ caxuw Krîpinkrên kaj na Pâhpâm jarkwa to mehçakôc catêjê nõ tyc nare, na wa ha curia me cuxà ty — hane.

Pê Jeju mã Krîpinkrên kînti

³⁴Ne cute Krîpinkrên kôt harên to hajÿr, ne cumã:

— Krîpinkrên, Krîpinkrên, por akam mehkrî catêjê atajê hõtpê Pâhpâm jarkwa to mehçakôccatêjê cura, por me Pâhpâm te me amã ihkujahêc atajê, ca gõtpê ate kên to mehçuran prãmte ame tocapê. He wa tee ame ato cuprôn prãm to hanea, pom quê hõxãhxãc hãn ne intore to hara krac ri cuprõ he. Ne ipê hõxãhxãc ata pyrãac, ca ma ajte ame icaca. ³⁵Ne ita caxuw quê ha gõ krî caprÿ, ne kam hamreare ne. Ampeaj kam wa me amã awjarê, ca ha hipêr me ipupun nare ita kam, ahnaa jũ caxuw me ijarên to: “Por jũm Pâhpâm jarkwa kôt me iwÿr tẽ ata pê impejti” — hane.

Pê Jeju mehkàj xà nõ ita caprã

14 ¹Mã mehkôt xà jõ amcro nõ na Parixêwcatêjê nõ te Jeju jator, hũrkwa kamme cahê na hàpàn prãmte. Mã ma Jeju ihkôt mō, ne cator, ne hàr ne hÿr. Mã me hàhtôa ne mexa atajê ame Jeju kôpĩ. ²Mã hũmre jara me ihkjê tuhti Jeju na hàhtêp. ³Mã Jeju te Parixêw catêjê me, Mojxe xwÿ jõ kàhhôc to hahkre catêjê me, mehçukij ne me cumã:

— Xà quê ha ihtÿj ajkĩ Mojxe xwÿ jõ kàhhôcata kôt me pahte amji kam me pajapac xà na, me pahkôt xà jõ amcro kam jũm caprãr na me jũm jamã? — hajÿr. ⁴Mã nee jũm te cumã jũ mãn nare. Mã Jeju te hũmre ata cupên ne caprãr, ne ma ihkujahêc, mã ma tẽ.

⁵Jirô pê mã me cumã:

— Xà quê ha me anõ jõ cawrô cahàcre me, pryti nõ, me pahkôt xà jõ amcro ita kam, kwa mã mrõ, ca ha nee ajkĩ me anõ caxàr nare? — hane.

⁶Mã nee jũm te cumã ampo jarẽn nare, ne aracri mehkri.

Cu ha me amji to me pahcati prãm to me papa nare

⁷Jirô pê mã ri Jeju jỹ ne apu cute me hator atajê kôpĩ, mã ihtỳj amji mã me hỹr xàiampeaj japên to me mõ. Mã Jeju te me hàpàn xà na mehkri atajê japackre, ne me cumã:

⁸— Ýhỹ, quê jũm me hikwa tuw jõ amji kĩn wỳr gato, ca nee gỹr xà impeaj kam gỹr nare. Quê ihhêaj to me girôa pê jũm catia ata jato, quê ha curi cato. ⁹Quê ha ikre jõ pahhi te gator catê ata amãharkwa to: “Cumã gỹr xà impejti ita jahkre, quê kam jỹ” hane. Hamre, ca ha cama apu apahàm to mõ, ne mõ ne me hõa kam hapua na jỹ. ¹⁰Cupate ca ha nee hajỹr nare, ne quêt hane he. Quê jũm gato, ca ihkôt mõ ne hapua na me hõa kam, gỹr xà ata kam ca jỹ. Quê ha ikre jõ pahhi ataapupu ne amã: “Ikwỳ nõ, ajpên mõ ne ita ri ca gỹr xàiampejti ita kam jỹ” hane. Ita na quê ha quêt mehcunea jipôc ri me kam mare mã acati.

¹¹— Ýhỹ, pom me amji to cati prãm itajê, quê ha Pahpãm me to ihkryjre ne. Ne pom amji to mehkryjre prãm atajê, quê ha quêt me to cati — hane.

¹²Jirô pê mã ri Jeju te ikre jõ pahhi japackre ne cumã:

— Ýhỹ, ca ha jũ caxuw me gápàn xà catia ton to prãm, ne nee me akwỳ nõ catêjê jator, ne me akjêjême, me gũkjê jator nare. Ne hanea ne nee me acahê na me hakràj catêjê mehkri atajê jator nare. Ca ha ate me hator na, quê ha ate me hator jahpanxà na, cute me amã hàmjôr xà na ihtỳj amcro nõ na me gato. Na ca ha nee ita to me hajỹr nare, ne quêt me to hane he.

¹³— Ca ha jũ caxuw amji kĩn nõ ton to prãm, ne mecupê hamreare atajê ca ha me hato, ne cute me xwỳjato, ne mehkjê xà jato, ne mento tũm jato. ¹⁴Ca ha ate ita to hajỹr na, quê ha Pahpãm quêt apej mã amê. Ne jũ wỳr quê me cupê hamreare atajê, ate ame to hajỹr ata jahpan xà na, me amã amgõ. Cwỳrjapê quê ha Pahpãm, catyt kam ame ipa catêjê te hacpỹa mã mehtĩr xà jõamcro ata kam, ihtỳj me amã amgõ — hane.

Amji kĩn catia jarẽn xà

¹⁵Mã por jũmjê me hàpàn xà na me jỹ atajê nõ te ita na Jeju par, ne cumã harẽn to:

— Taamã, por jũ caxuw Pahpãm pê pjê jõ Pahhiti te me hator, mã me hàpàn xà na me jỹ atajêri mempej mã mehpỳm xà — hajỹr.

¹⁶Mã Jeju me cumã to hũjarẽn to:

— Ýhỹ, por me hũmre nõ te me hàhtôa ne me hator, quê me cuprõ, quê me cumã hõ amji kĩn to. ¹⁷Mã ramã amji kĩn jõ amcroa kam hàhhuc, mã

cute cumã hàpên catê kujahêc, cute ame hator atajê jator prãmte. Ne me cumã harkwa kujahêc to: “Ajpêname aprar pyrentu, nãmri ramã ampo cunea te amji jipêj” hane.

18 — Mã xãmte aracri ahpyãre na cute me cumã amji jarên xà atajê. Mã mam pyxitita te hàpên catê ita mã: “Wa ite pur jũhkâr, ne wa ita kam hõmpun prãm, cwÿrjapê wa ha nee gõ pahhi jõ amji kîn ita wÿr imõr nare. Na wa ha awÿ, ca nee ikam acryc nare” hane.

19 — Mã ihnõ ita te hajÿar ne cumã: “Wa ite pjê to ipipkjêr xà caxuw pryti to tej ne hũhkâr, ne waita kam hàpên xà to capì prãm, cwÿrjapê wa ha nee gõ pahhi jõ amji kîn ita wÿr imõr nare. Na wa awÿ, ca nee ikam acryc nare” hane.

20 — Mã ihnõ ita te hajÿar ne cumã: “Wa curmã ijikwatuw, cwÿrjapê wa ha nee imõr nare” hane.

21 — Mã cumã hàpên catê ita te amji jaxâr, ne hõ pahhi mã me harên. Mã ame kam incryac to incryc, ne cumã: “Atêm pyrentu, ijõ amji kîn ita caxuw, ne pry me krì cape kôt ajpên me cupê hamreare atajê japrõ, ne cute me xwÿ me, mento tũm me, mehkjê xà me, ca ha ame haprõ” hajÿr.

22 — Mã ma tẽ, ne ahna ahtũm nare mã cumã hàpên catê ita hacpÿ ne tẽ ne hõ pahhi mã: “Hamre, wa ite, por ate ampo na imên ata ton cakrõ, mã cormã nee cute me ikre to hipu nare” hane.

23 — Mã hõ pahhi cumã: “Hipêr tẽ ne krì catut na pry atajê kôt ame pra atajê jator to ihtÿaj ne, ne hanea ne pur kam ne ahkêt kam ame ipa atajê jator to ihtÿaj ne, mãr quê ijũrkwa ita to me hipu tu ne. ²⁴Ne ampeaj kam wa amã awjarê, quê ha nee mam ite amehator atajê nõ ipê ijõ ita kwÿ krêr nare” hane. Jìkjê na mã quê ha Pahpãm me ato hanea — hajÿr. Hõ, Jeju te me cumã hũjarên to hajÿr.

Pê Jeju ihkõt me ipa catê na, cute me amji ton kôt harê

²⁵Mã amcro nõ na hipêr me hàhtõa ne ma Jeju kôt me mõ, mã me hÿrmã ipipkjêr ne cute me cumã hũjarên to:

26 — Ýhÿ, ca ha me anõ te ikõt apa prãm na, quê ha ihtÿj me anõ mã ikîn, ca ha ikõt apa. Ne meapãmjê jirõa pê amãikîn, ne me axyrxwÿ me, me aprõ me, me akra me, meakjêjê me, me akjêjê cahãj jirõa pê me amãikîn. Nãmri ca ha itajê jirõa pê amã ikîn nare, ne amji jirõa pê amã ikîn nare na, ca ha nee apê ikõt ipa catê nare. ²⁷Ne quê ha jũm mã ikõt amji ton to prãm na, quê ha jũm ata ihtÿj amjia kôt ipa jicu, ne ikõt pit mã ipa, ne amcro cunea kam icuxà, hõ pĩ na ihtyc xà ita japjê. Nãmri quê ha amã ita to hajÿr prãm nare na, ca ha nee jũ caxuw apu ikõt apa nare.

28 — Ýhÿ, ca ha me anõ ikre kàhti nõ xãm prãm, nemam jÿ ne amji kampa, ne gõ pore cahyt, mãr ca hahkre pej, jũ mã quê ha gápên xà ata hàhwÿr to. Ne jũ mã quê ha apê gõ pore to ne capa. ²⁹Ca ha nee apu amji mã hahkre pej par nare ne kam to tẽ, ne apu ihhê pit pyxwÿ, ne nee hipêj

nare. Quê hamehcunea me ikre ita pupu, ne me ato hapactu kamtê, ne me ajpên mã, ³⁰“Me hõmpu he, hũmre ita te ikre ton kam ihtêm, ne nee cute hıcu xà mã to mên nare” hane. Ca ha atÿj apu apahàam to apahàm.

³¹— Ne ihnõ xwÿjê te hajÿar he. Quê ha krī pijakrut jõ pahhiti atajê me ipijapu to prãm, ne ihnõ mã hõ krãhtare jãhtô te mir te tej, ne hirôa pê ihnõ ita mã hõ krãhtare te mir te winti. Quê ha me harên pa, ne jÿ ne toamji kampa, ne amji mã: “Pÿhàpà, meijirôa pê me icatêjê jãhtô, wa ha pijamã me cunamã mençrêre itajê to ahtwÿ? Jũ wÿr wa ha me to amjimã hamã” hane. ³²Ne ihtÿj me catêjê jõ pahhiti nõ ata mã harkwa kujahêc pyrentu, cormã ampÿre mã apu mör reria mã, mãr quê nee ame ipijapu nare.

³³— Mër hõ, ca ha me amji kampa, ne me gãhcukrêjcunea mã me hikra, ne cormã ikôt me apa catêjê na meamji to. Nãmri ca ha ate me to hajÿr nare na, ca ha nee me apê me ikôt me apa catêjê nare — hane.

(Pê Ruc Jeju jarên jıcu. Pê Matew hõ kàhhôc kam Jeju jarên to hane he.)

Matew 10.40-42

Cu ha Pahpãm jarkwa to hahkre catêjê na me amji to pøj

⁴⁰Pê Jeju ihkôt me ipa catêjê te tõi japackre to hane he:

— Ca ha ma Juta catêjê jõ krī atajê wÿr me pra, ne mehcunea mã ijarê. Ne quê ha me ana amji to pøj me ajkaam, ramã hanea ne ina me amji to pøj. Nehãn ne ina me amji to pøj me ajkaam, hanea neramã, por Inxũ Cati te ajpên pjê wÿrikujahêc ata na me amji to pøj.

⁴¹— Ne por quê ha jũm, jũm pê Pahpãm jarkwa to ihcakôc catê cwÿrjapê ahnaamji capa ata, quê ha ihtÿj jũ caxuw cuxà, Pahpãm te cumã hãmjör xà ata cwa. Ne quê ha jũm, jũm xũmre impejti incwÿrjapê ahna amji capa ata, quê ha hanea ne cuxà, Pahpãm te cumã hãmjör xà ata cwa. ⁴²Ne quê ha jũm te, jũm pê ikôt ipa catê cwÿrjapê, cumã cô pit jör cakrô, quê ha hanea ne, me cuxà, Pahpãm te hahpan xà na jũm ata mã hãmjör xà ata cwa. Ita to ca me amji japackrea ne — hane.

(Pê Matew harên jıcu. Pê Ruc hacpÿa mã hõ kàhhôc kam Jeju jarên kam to incrà.)

Caaxwa xen nÿre jarên xà

³⁴Ne hipêr Jeju me cumã:

— Hõtpê caaxwa pê ampo pejti ata, ne quê ha hãnnõ mã axà, jũ mã cu ha me to, ne hacpÿ mã me to wa? ³⁵Hamre, quê ha ihkên mã axà, ne ampo cunea caxuw ramã ihkêanre, ne nee ampo xõ mã cute pjê to caxà xà na impej nare.

Na cu ha me pahtỳj caaxwa xen nỳre atato me awcapê. Por ate me ipar xà na, me akam me gapac ihcuhhê ata, mễr me to ikam gapac to impeaj ne — hane.

Carà cahàcre hôhti pictor jarên xà

15 ¹Ne amcro nỏ na Jeju wỳr me hàntỏa ne me mỏ, cutemempar pràmte, mã pahhitijarkwa na me hũhkra kam me hàmcwỳr catêjê jàhtỏane ihwỳr me mỏ, ne mehkwỳte amji kam me hapac xà kêanre. ²Mã Parixêw catêjê me, me cumã Mojxe xwỳ jỏ kàhhỏc to hahkre catêjê me, cute me Jeju te mehkrã kên catêjê mã ampo to hahkre na me hỏmpun, ne me ahna xwỳ kam mehtêm, ne me ajpên mã:

— Me hỏmpu he, hũmre ita ihtỳj mehkên na amji to pỏj, ne me cape na apà — hajỳr.

³Mã Jeju te me hapackre kam ihtêm, ne me cumã:

⁴— Ỡhỹ, quê me anỏ mã carà cahàcre hôhti te xễj, ne pyxit ne apê acto, xà ca ha ajkĩ nee hapên nare? Ca ha atỳj cute nowêntinowi atajêmã pỏ kam hikra, ne ma pyxit ata japên to mỏ, ne cumã acato. ⁵Ne hũrên gakry, ca ha apỳ ne ma to amji jaxà. ⁶Ne ikre mã to acato, ne acahê na gỏ ikwỳ nỏ mehkrĩ atajê to cuprỏ, ne me cumã: “Me gakry, nãmri wa ite carà cahàcre hôhti pictor ata mã icator” hane.

⁷— He me apê carà cahàcre hôhti jàhtỏ na, cute nowêntinowi atajê pyrãac, ne atỳj amji pej na me amji cãmjĩ. Ne por me anỏ pyxit te ihkên jicu, ne hacpỳa mã Pahpãm wỳr amji jaxàr ata pê ri carà cahàcre hôhti pyxit pictor ata pyrãac.

— He wa ampeaj kam me amã awjarê, ita kỏpit na, quê ha cỏjkwa kammehkrĩ atajê ihtỳj me apej catêjê pyrên ame hakry. Ne por quê ha jũm pyxit pej ne ihkên jicu, ne catyt kam ipa kam tễ, ata pyrên quê ha cỏjkwa kam mehkrĩatajê me girỏa pê me hakry.

Ihpore hy pictor jarên xà

⁸— Ne ihnỏ xwỳjê, quê ha cahãj nỏ mã wakỳre prã jakare te ihpore hy tej, ne cupê pyxit ne acto, quêha ihtỳj hapê. Ne cute cumã cator xà caxuw, quê ha hàhcujro xà nỏ pỏc, ne ikre capỏ ne hapên to impeaj to mỏ, ne ihtỳj cumã cato. ⁹Ne me hỏ ikwỳ nỏ catêjê me, me cahê na amehkrĩ atajê to cuprỏ, ne me cumã: “Me gakry, ite ihpore hy pictor ata mã icator” hane.

¹⁰— He wa ampeaj kam me amã awjarê, ihpore hy pictor ata pê jũm te ihkên ton to ipa ata pyrãac. Ata kỏpit na, quê ha Pahpãm jarkwa to imprar catêjê cỏjkwa kam, por jũm pyxit pej te amji kam hapac xà kên mã hikran, ne hacpỳa mã Pahpãm wỳramji jaxàr ata pyrên, quê ha ame hakry.

Ihkra xũmti pictor jarên xà

¹¹⁻¹²— Ne ihnỏ xwỳjê te hajỳar. Ỡhỹ, pê jũm xũmre nỏ mã ihkra xũmre ajkrut. Pê amcro nỏ nahapu na ihkra intuw ita hũm ita mã: “Inxũ, ita

kam imã ate atyc jirô pêimã ampo jôr xà atajê gô. Jũ wÿr wa ha atyc xà itajikaj” hane. Mã hũm te cume amji mã ampo to ipicapôn.

13— Mã ahna amcro jãhtô nare, mã hapu na ihkra ita te ampo to hõ tekjê ita to cuprôn, ne ma pjê nõ wÿr to mō. Ne curia ihkrĩ, ne cuteihkên to amji to hipu tu, ne por cute hũm pê ampo cwÿratajê to ampo kên cunea na hamre partu.

14— Ne hamre, cute ampo to hamre jirô pê, ampeaj kam pjê ata kam me cumã prãm cati. Mã prãm te kam ihtêm. 15Mã cute pjê ata kam jũmjê krĩ atajê na hàhwÿr, cute me cumã hàpên ne amji mã harte prãmte. Mã cute crô to ipijapar xà wÿr mehkujahêc, cute crô mã harte, ne me cumã hamãr xà na. 16Mã curia apu crô jamãr to ipa, ne ampeaj kam cumãprãm. Mã te crô jôata kwÿ krêr to prãm cakrô, mã nee jũm te cumã crôjô ita kwÿ jôr nare.

17— Mã cute hÿr, ne amji kam hapac ne amji mã: “Ampeaj kam inxũ mã me hàpên catêjê jãhtô, ne me cumã hõ cati, ne cute mehakren tu. Wa mehkĩnte ajte ita ritee prãm to amji curan prãm. 18Ne wa ha ma inxũ wÿr amji jaxà, ne cumã amji jarên to hane he: ‘Inxũ, wa ite cõjkwa kam Pahpãm me, acuna mã ikêanre ton. 19Na wa nee hipêr ate ito amji kra na ana ijãhwÿrnare. Ca ha ito amji mã cama amã ijãpên catê’” hane. 20Ne ma hacpÿ mã hũm wÿr cute amji xàr.

— Ne hũm wÿr cator to mō, mã hũm te prycãmpun, mã cormã ampÿa mã mō. Ne cumã caprĩ, mã hÿrmã tẽ ne cute impÿn, ne cahôr.

21— Mã cumã: “Inxũ, wa ite cõjkwa kam Pahpãm me acuna mã ikêanre ton. Na wa nee hipêr ate ito amji kra na ana ijãhwÿr nare. Ca haito amji mã cama amã ijãpên catê” hane.

22— Mã hũm te cumã me hàpên catêjê nõ mã harkwa hyr, ne me cumã: “Ame kware ne ajpên me cumã ihkã impeaj nõ to tẽ, ne me cumã haxà, quê toihkã. Ne hũhhi na hê xà nõ to cumã me hũhkrahhi na hê, ne hanea ne ihpar kã nõ mã me haxà. 23Ne hanea ne ajpên me pryti krahti nõ jicotti to me mō, ne mehcura, cume to amji kĩn to. 24Nãmri, wa ikra pictor ita tyc na amji mã to hajÿrcakrô, mã ihhêj nehacpÿa mã ihtĩr ne mō ne cator, cwÿrjapê rihÿrên ijakry” hane. Ne cute amji kĩn kam me to ihtêm.

25— Ne cormã ame amji kĩn ita toan kam, mã ihkra kã ita pur kam apu apê. Ne cute amji jaxàr, ne ramã ikre na hàhtêp to mō, ne cuteme hõkrepôj me, me hàkrun jãhkrihkrit kam hapac. 26Ne cute me hàpên catêjê nõ na hàhwÿr, ne ihcukij ne cumã: “Ampo na mã ame hane?” hajÿr.

27— Mã hàpên catê nõ ata cumã: “Gapyre teamji jaxàr ne impej pêa mã cator. Cwÿrjapê ri apãm te amji kĩn ita caxuw pryti kra jicotti curan na me imên, wa ite mehcuran, mã ame to amji kĩn” hane.

28— Mã ihkra kã te ita kam hapac, ne apu kam incryc. Ne ma apu ikre mã hàr caca, ne ma amehkôt amji kĩn ita na amji ton caca. Mã hũm pō

mãcator, ne tee apu to hàr to hahkre. ²⁹Mã cute hũm mã: “Rỳ pêa mã wa ipê amãijapên catê pyrâac, ne amã ijapên to ipa. Ne nee wa rỳ jũ caxuw ite garkwa par caca nare cakrô, carỳ jũ caxuw ate imã carà cahàcre nõ jôr, wa ite ijô ikwỳ nõ catêjê me, me to amji kĩn nõ ton nare. ³⁰Mã akra kêanre ita te, por mecahãj pijapit xyre atajê na, ate cumã ampo jôr atajê rên partu. Ne cute amji jaxâr, ca ate quêt cumã prytijicotti ita curan, ne ame to amji kĩn” hane.

³¹— Mã hũm te cumã: “Ikra, apu hajÿr nare, ca gõtpeïcahê na apu apa. Ne wa ampocunea to itekjê itajê, pê atekjêa ri. ³²Ne ampeaj kam wa ite amji kĩn ita ton na amji mã prãm, me pajakry prãmte. Ampo na? He me pamã amji kĩn nõti ita na ipê ihkaj na. Ne ampo nawa ite ita ton? He gapyre ita ramãihhêj ne ihtyc, ne hacpÿa mã ihtĩr, ne hanea ne ipictor ne hacpÿa ne cator cwÿrjapê wa ite ton” — hajÿr.

Me hũrkwa jamãr catê hêj xi jarên xà

16 ¹Ne Jeju te hipêr ihkôt me ipa catêjê mã hũjarên, ne me cumã: — Ýhÿ, por hakràj cati nõ mã hũrkwa jamãr catê. Mã jũmjê atajê te ikre jô pahhi mã, cama cute apu cupê hõ tehkrêj rên to ipa na harênto kêanre. ²Mã cute ahna hàhwÿr ne cumã: “Pÿhàpà, xà ampeaj kam mã me garê? Krãa caxi, imã amji jarê, ne imã ijô ampo itajê cunea ihhóc. Ne cute me ito new catêjê japrÿatajê cunea na imã ihhóc, wa gápên xà jahkre pej. Ne ca ha nee hipêr apê imã ijũrkwa jamãr catê nare” hane.

³— Mã hũjamãr catê ita mō ne hÿr, ne cute amji kam hapac ne amji mã: “Pea hito, wa itea amji pê ijapên xà ita to ipictor. Ne nee imã icarôt cati nare ite pjê jahkwÿn xà caxuw, ne me ahna ijàhwÿr na ipahãmti ita kam, ampo to mã wa ha ajte? ⁴Ýhÿ, wa ite hajÿr itakam, quê ha ijô pahhi ikujate, wa ha nee hipêrcute me to new catêjê jũhkra kam ijãmcwÿr to ipanare. Ne wa ha to hane, wa ha mam cute me ijô pahhi to new catêjê to impeaj ne, mâr quê cute ijapên xà pê icator jirô pê, ihtÿjme hũrkwa kam me ijuwahi. Ne me taa me itehcajpa” hane.

⁵— Ne cute me hõ pahhi to new catêjê cunea na hàhwÿr. Mã cute me cuprôn, mã cute ahpÿanre na mehcukij par. Ne cute mam ita cukij ne cumã: “Jũ mã ca ate ijô pahhi to new ton?” hane.

⁶— Mã cumã: “Hãhcujro xà cacô incjên xà te xêjto wa ite to new” hane. Mã cumã: “Ihnãm ate new na gō kãhhóc ita he, to jÿ ne cute xĩncwênta peaj na, ca ihhóc” hane.

⁷— Ne cute ihnō ita mã: “Ne ca, jũ mã ca ate newton?” hajÿr. Mã cumã: “Arÿjhy incjên xà temir to wa ite to new” hane. Mã cumã: “Cute ôjtôxênta peaj na ca ihhóc” hane. Ne cute me to new catêjê cunea to hajÿr partu.

⁸— Mã hõ pahhi te ita par, ne cumã: “Ahêj xicakrô, ampeaj kam ate amji jahkre pej” — hajÿr.

Ne Jeju te ihkôt me ipa catêjê mã:

— Ỹhỹ, ihhêj ne catyt kam me ipa nare catêjê atajê te ri, catyt kam me ipa catêjê jirôa pê me amji jahkre pej. ⁹Cwỳrjapê wa me amã: “Gapacta ne amji to megakràj, ne gapacta ne catyt kam me ipanare catêjê to me amji kwỳ nõ. Quê ha júcaxuw amã ampo atajê cunea apê hamre, quêha me gô ikwỳ nõ catêjê ihtỳj me hũrkwa kam me ana amji to pôj” hane.

¹⁰— Ỹhỹ, quê ha jũm hõtpê ampo kryjre atajê jamār to impejti na, quê ha hanea ne ampo catia jamār to impeaj ne. Quê ha jũm apu ampo kryjre atajêto ihhêj to ipa na, quê ha hanea ne ampo catia to ihhêj to ipa. ¹¹Ỹhỹ, ca ha pjê ita kam me gâhcukrêj to ame ahêj to me apa, quê ha nee jũm me amã Pahpãm jâhcukrêj nõ jôr nare. ¹²Na ca ha jũm jâhcukrêj to ate ame ahêj to me apa na, ca ha nee me gâhcukrêj cwỳr nare.

¹³— Ne jũ wỳr quê jũmjê hõ pahhi pijakrut jarkwa kôt me ipa. Ampo na? Quê ha cumã hõpahhi pyxit nõ ata pit kĩn, quê ha cumãa apê. Ne ma apu ihnõ ita caca, ne hicu ne cumã hikra. Ita jĩkjê na, ca ha Pahpãm mã me apê, ne nee ate mehpoore catia ne ipyr na, me amji cãmji nare. Nãmri ca ha ate ihpore ita topit mã me amji japackre na, quê ha cupê ihhêj rũm me gô pahhi, ca ha ihkôat me apa ne atỳj Pahpãm mã hikra — hajỳr.

Pê Jeju Parixêw catêjê mã ihpore cawpa

¹⁴Mã Parixêw catêjê mã ihpore pit kĩn atajê te me ita par, na ri ame Jeju xũn. ¹⁵Mã Jeju me cumã:

— Ihhêj ne mehcunea cuna mã me apê me hũmre impejti, ne Pahpãm mã ri quêt me ate amji kam me gapac xà cuneajahkre pej. Ỹhỹ, me hũmre mã pjê kam ampo pej ne cati na prãm atajê ri, Pahpãm mã ihkĩn nare, ne ahna cupê ihkêanre.

¹⁶— Pê Jowāw te me cumrār catê cator xà wỳr, ihtỳj ajco me Mojxe xwỳ jô kàhhôc kampa, ne me Pahpãm jarkwa na ihcakôc catêjê kampa, ne ajco ihkôat ameipa. Ata japu na, wamehcunea mã Pahpãm pê pjê jô Pahhiti na harên to mō, ne ahpỳanre na Pahpãm himpej xà mã mencjêj prãmte ame amji mã carôt. ¹⁷Xà quê ha pijamã jũ caxuw cõjkwa mepjê hamre? He quê ha ihtỳj jũ caxuw hamre, ne Pahpãm jarkwa nare, quê ha quêt jũ caxuw hamre nare. Quê ha nee Mojxe xwỳ jô kàhhôc kamhãhhôc kryjre hikwa itajê nõ ipictor nare.

¹⁸— Ne quê ha me hũmre nõ apu hĩxi caca ne cumã hikra, ne ma tẽ ne ajteare mã cahãjnõ me hikwa na, quê ha cupê hũmre inxyre ata, ne ihkêanre ne. Quê ha cupê hũmrenõa te cahãj mã hikran ata me hikwa ata, ne hanea ne cuxà inxyre ne, ne ihkêanre ne.

Hakràjti me Raxaro pê hamreare nare ata jarên xà

¹⁹— Ỹhỹ wa ha me amã me hakràj te amji kam hapac xà kôt harê. Ỹhỹ, pê hũmre nõ jakràj cati, ne ajco ihkà impej to pit mã ihkà, ne ajcoamcro

cunea kam hõ impej pit kur to ipa, ne ajco amji kîn catia ton to ipa. ²⁰Pê hanea ne hũmre nõ pê hamreare ata japrÿRaxaro. Ne ihkà xêt, ne hĩ cunea kam ahna cuhê. Pê Raxaro jũkjê atajê ajco hũmre jakràj cati ata wÿr me to pra, ne hũrkwa jarkwa mã me cunõ. ²¹Pê ajco curia harkwa mã hikwa. Por hakràj catê ata japàn xà pê hõ pihur, mã cute to harte prãmte ajco hikwa. Pê hanea ne rop ajco hÿrmã pra ne cumã cuhê atajê cũmtwÿ.

²²— Ne ty, pê me hĩ jarêt, pê Pahpãm mã imprar catêjê cõjkwa pĩn, mamempejti tyc atajê krĩ xà wÿr me caxwÿn to tẽ, ne me panquêtiti Aprãw xwÿ kjê kamme hÿr, pê huwahi ne to jÿ. Pê hanea ne hakràj catê ata ty, pê me hĩ jarêt.

²³— Pê Raxaro kĩnte mehtyc kêanre atajê krĩ xà kam, cute me amji pupun xà kêanre xà ata kamamji pupu. Ne irĩt, ne ihmãt ri cute Aprãw xwÿ pupun, ne cute hĩkjê rũm Raxaro xwÿ pupun. ²⁴Ne cumã caràr to: “Quêtiti Aprãw, icaprĩa ne! Imã Raxaro kujate, quê cõ to hũhkrahhi inco ne to ijarkwa jakry! Ampo na? He wa cuhy ita kamamji pupun xà kêanre to amji pupu!” hane.

²⁵— Mã Aprãw cumã: “Itãmxwÿ, he pê ca cormã atĩr reria mã ajco quêt amji mã ampo pejti cunea incwa ata to ca amji japackrea ne. Pê Raxaro ajcoakĩnte girõa pê amji mã ihkên pit cwa. Ne ita caxuw ri quêt imã caprĩ, mã apu hakry ne ampo ita cunea to amji mã amji kîn. Ca ihkĩnte, ita caxuw amji pupu he. ²⁶Ne xwÿjê mã, me pahcote na pjê catacti ita kam, cu nee me pahnõ ajpên wÿr parêr nare” hane.

²⁷— Mã hakràj cati ita cumã: “ÿhÿ, quêtiti Aprãw, wa ha awÿ, ca kepê inxũ jũrkwa wÿr Raxaro kujate. ²⁸Quê cormã curi me ikjêjê te xĩc ne me hàhhuc atajê mã mehkên cawpa, mãr quê mehkên ton jicu, ne nee ikrĩ xà kêanre ita wÿrmemprar, ne icuxà me amji pupun xàkêanre to hajÿr nare” hane.

²⁹— Mã Aprãw cumã: “Pom ramã me akjêjê mã Mojxejõ kàhhôc me, Pahpãmjarkwa na mehçakôc catêjê jõ kàhhôc itajê. Ne quê ha taa me cumã ita to hahkre, ne me hapackre ne me cumã ihcawpa. He me cumã ihcawpa xà ita caxuaw ri ihkàhhôc atajê” hane.

³⁰— Mã cumã: “Hamreare quêtiti, jũ wÿr quê ha ihkàhhôc itajê kampa. Quê ha quêt jũm tyc ata hacpÿa mã ihtĩr, ne me hÿrmã cato, quê ha ihtÿj me kampa, ne mehkên itajê jicu” hane.

³¹— Mã Aprãw cumã: “Quê ha cute nee Mojxe jõ kàhhôc par nare, ne hanea ne nee me Pahpãm jarkwa na ihçakôc catêjê jõ kàhhôc par nare na, quê ha nee jũm hacpÿa mã jũm tĩr ata kam hapac nare” — hane. Hõ, Jeju te Parixêw catêjê mã hũjarên to hajÿr.

Mehkên cunea jicu kôt harên xà

17 ¹⁻²Ne Jeju te hipêr ihkôt me ipa catêjê mã:
— ÿhÿ, ampeaj kam quê ha hõtpe mekwÿ, Pahpãmçuna mã mehkên xà kêanre to. Ne pÿj me xi, por cute me cumã mehkên to hahkre,

ne me cumã to mehhimpej atajê, quê ha ame amrãa to ame amrã. Ampo na? He quê ha Pahpãm, por cute jũmjê kryjremã mehkêanre to hahkre atajê, quê ha Pahpãm mehkên mã me cumẽ. Ne mehkên mã me hàr xà ata ri ihkêanre. Quê rỳ mã mehkên kêanre ata xwỳjrea na memput na kên pytia nõ mã hê, ne cõxwa tua kam ahna me cumẽ, quê cô me hipej. ³Co he, me guphê! Quê ha atõ ampo to ato kên, ca ha intête cumã. Quê ha ihkên ita jicu, ca ha cute ato kên ata to tojnõ, ne nee to amji japackre nare. ⁴Quê ha atõ, amcro pyxit kam, ato kên to xet, ne awỳr pra ne amã: “Waha ite ato kên ita jicu. Ne nee hipêr ato hajỳr nare. Ikam acryc nare” hane. Ca ha atỳj cute ato kên ita to tojnõ, ne nee to amji japackre nare — hane.

(Pê Ruc Jeju jarên jicu. Pê Matew hõ kàhhôc kam Jeju jarên to hane he.)

Matew 18.15-35

Cute ampo kên têtê jũm japackre xà

¹⁵Ne Jeju te hanea ne ihkõt me ipa catêjê mã:

— Quê Pahpãm na mehkwy nõ acuna mã ihkên xà nõ to, ca ha ma hỹrmã mō, ne ahte ajpên na me ajkrut peaj ne cumã cute ato kên xà ata jarê. Quê ha cute aparna, ca ha curia hacpỹ mã me ajpên to impej.

¹⁶— Quê apar nare, ca hacpỹa mã amji jaxà ne amji caxuw jũmjê to ajkrut, nare, mencre ne me haprô, ne ma hỹrmã me to mō. Quê ha cute ato kên xà na me hõmpun xà atajêa na me cumã harê. Nãmri pê mam ramã Pahpãm jõ kàhhôc harên to hane he: “Quê jũm pyxit peaj mehcukij catê wỳr tẽ, ne cumã jũm jarên to kên na, quê ha nee impar nare, nãmri quê ha jũmjê incre ne cute hõmpun xàa na ajpêan kõt me harênna, quê ha ihtỳj mekampa” hane. Quê ihhêaj to me akampa ne ihkên ton jicu, ca ha hacpỹa mã me ajpên to impej.

¹⁷— Quê ihhêaj to me akwỳ nõ ata me apar nare, ca ha Pahpãm na mehkwy mã ihcunea naharên pa, mār quê taa me acuxà cumã mehcakôc. Quê ha nee Pahpãm na mehkwy par nare na, quê ha cupê mehcahkrit pyrác, ne cupê Pahpãm jarkwajahkre kêt catêjê nõ, ne cupê Pahhiti jarkwa jirô pê ihpỳpỳm catê. Ne cupê amjia kõt ipa to prãm catê, ne ihtỳj ampo kêanre ton to ipa.

Me pahte ampo ton itajê cunea na, Pahpãm me pahto amji japackre

¹⁸— Ỡhỹ, pom ate pjê kam ampo kên cahpêrhyr ita, haneane cõjkwa kam ate ihcahpêrhyr. Ne hanea ne ate pjê kam ampo pej to tojnõ ita, hanea ne cõjkwa kam ate to tojnõ.

¹⁹— Ne hanea ne pjê kam cute ito amji mã mehhimpej atajê, quê ha jũmjê ajkrutne ijaprỳa na, ajpêan kõt me hàhwỳr na, quê ha cõjkwa kam

Inxũ Cati ihtÿj ampo na me hàhwÿr xà ata to me cumã. ²⁰Ne quê jũ ri jũmjê incrêre cakrô, amji mã ijapÿr to pôj xà ata kam, wa ha ramã ame cahê na ipa — hajÿr.

Cu ha jũm te me pahto kên ata kam me pancryc jicu ita na

²¹Mã Petrô Jeju na hàhtêp ne ihcukij ne cumã:

— Ijô Pahhi, jũ mã wa ha? Xà wa ha ikjê te ito kên to xet xà ata na kam icryc jicu, ne cute ito kên atajê na to tojnô to xet? — hane.

²²Mã cumã:

— Jũ wÿr ca cute ato kên xà ata jahpan xà na, kam acryc jicu to xet peaj. Ca ha cute ato kên ata na to tojnô to xetxênta, ne nee cormã kam acryc jicu to tojnô nare — hane.

Jũm te nee ihkwÿ nõ te to new ata to tojnô nare jarên xà

²³Ne Jeju mehcunea mã ihkôt harên to:

— He cõjkwa kam Pahpãm himpej xà te amji kam hapac xà pê ihhêj rũm jũmjê te hõ pahhi mã me hàpên, ne cute ajpên mã me hõ newto mehcaôc, ne ahna me ajpên par ata pyrãac. ²⁴Ne mam cute ihpore to, cute to new to mirjãw ata, pahhi ata wÿr cator. ²⁵Mã cumã hàpên catê ata pê cute to new catihti ata caxuw ihporejamreare. Mã hamre, hõ pahhi te jũm te to new atato ampo na hàhpan na me mên, hĩxi me mehkra mea mã. Ne hanea ne hàhcukrêj cunea to hõ new ata caxuw ihpore na me to hàhpan par na, cute me mên.

²⁶— Mã cumã hàpên catê ita hõ pahhi cuna mã ihkôn krã na hÿr, ne cute ahna hàhwÿr ne cumã:

— “Ijô pahhi, ito amji mã awjamã, wa ha itÿj amã ijãmjôr to imõr ita kam ijãmjôr pa!” hane. ²⁷Mã hõ pahhi mã caprĩ xà, mã cute hõ new catihti ata mea mã, ihcunea na to tojnô.

²⁸— Mã ma cute hõ pahhi to new ata na tẽ. Ne cute jũm te ihpore hy te xêj peaj to, to new ata cajpar. Mã cute jũm ita jõkre riihcuhtom, ne apu to ahcujrô ne cumã:

— “Imã amgõ! Ampo to ate ito new ata jahpan xà na imã amgõ!” hajÿr.

²⁹— Mã jũm ita cuna mã ihkôn krã na hÿr, ne ahna hàhwÿr, ne cumã harkwa to:

— “Ito amji mã awjamã, wa ha itÿj amã ijãmjôr to imõr ita kam ijãmjôr pa!” hajÿr.

³⁰— Cakrô, mã nee ajte cute impar nare, ne ihkên mã mên. Ne cute me hacjên xà kam haxàr, mãr quê curia ihcuhhê, ne ihcuhhê xà ata to cumã amgõ.

³¹— Mã hamre, me hàpên catêjê na mehkwy nõ, cute ihkên ton ita na hõmpun, ne apu kam incryac to incryc, ne ma hõ pahhi te to tojnô ata wÿr tẽ, ne cutecumã harên par.

³²— Mā pahhi te hipêr cumã hâpên catê ata na hàhwÿr ne cumã harkwa to:

— “Imã hâpên catê kêanre ita! Ca ate iwÿr, wa ite ate ito new catihti ata na ato tojnõ, ca ma tẽ. ³³Ne nee ate amji cuxà akwÿ nõ ata caprĩ, ne to tojnõ nare icuxà, pom wa iteacaprĩ ne amã hikran, ca ma tẽ ita? Ampo na mã ate icuxà to hajÿr nare?” hane. ³⁴Ne hõ pahhi ita apu kam incryac to incryc, ne ma me hacjên xà wÿr cute cumã hâpêncatê ata kujahêc, mã cute me haxàr. Na quê ha curia ihcuhhê, ne amji pupun to kêanre to ihcuhhê, ne xacute ampo to hõ pahhi to new atajê cunea jahpan xà na hàmjôr pa, necormã amji caprã — hajÿr.

³⁵Ne Jeju te me cumã hÿjarên jicu xàa kam me cumã:

— Ca ha cute me ato new catêjê me, cute me ato kên catêjê atajê to tojnõ ne me hicu nare na, quê ha cõjkwa kam Inxũ Cati me acuxà nee ate me to kên atajê to tojnõ ne hicu nare — hajÿr.

Matew 20.1-16

Pur jõ pahhi me cumã hâpên catêjê jarên xà

¹Mã Jeju te hipêr me cumã hÿjarên ne me cumã:

— Cõjkwa kam Pahpãm himpej xà te amji kam hapac xà pê ihhêj rûm pĩxõ krõ kre catêjê jõ pahhi pyrâac. Ne ma hân ne iraràtia na, cumã me hâpên catêjê japên to pra, cute mehkwy cajpar, ne hâpên xà na me ajpên par prãmte. ²Ne pê pjê ata kam, pê amcro pyxit to me hâpên jahpan xà na ihpore hypyxit to ajco me amji mã amgõ. Na ri mehkõat amcro pyxit to me hâpên to pyt jahpan xà na ihpore ihhypyxit to me cumã hàmjôr xà na cute me ajpên par. Ne ma cute me hâpên xàwÿr mehkujahêc, mã me hâpên to mõ.

³— Mã ramã ahna pyt jàpir, mã ma krĩ cape na hipêr cumã me hâpên catêjê japênto tẽ. Ne curi cute me hÿmre kwÿ te nee ampo to mehâpên nare, ne cama ame ipa atajê kwÿ pupun. ⁴Mã me cumã: “Ca ha me hanea ne me imã ijõ pĩxõ to apê, wa ha ate me gâpên xàatajê jahpan xà na catyt kam me amã amgõ” hane. ⁵Mã ma me mõ.

— Mã ramã pyt me pahkrã jimoc kam hÿr xàa kam, cuthipêr itajê to hajÿar, ne cute me haprôr, cumãme hâpên xà caxuw. Ne ramã pyt pec to mõ, mã cute hipêr itajê to hajÿar. ⁶Ne ramã pyt xâr xàa wÿr, mã ma hacpÿ mã curi cute me cumã hâpên catêjê japrôr xà wÿr amji jaxàr. Ne cute hipêr me hÿmre kwÿpupun, mã mehkrĩ, mã cute mehckuj to: “Ampo na mã ita kam ampo to me gâpên nare kam, me ana pyt?” hajÿr.

⁷— Mã me cumã: “Ampo na? He nee jÿm te me imã me ijâpên xà nõ jarên nare na ri” hajÿr. Mã pĩxõ na pur jõ pahhi te mempar ne me cumã: “Ca ha hanea ne imã me apê” hajÿr.

⁸— Mã pyt xàr xàa kam, mã pîxô na pur jô pahhi te cumã me hàpên catêjê jô pahhi na hàhwÿr ne cumã: “Me hàpên catêjê mã akij, ne me cumã gàmjôr pa. Ne ca ha hapua na ite me haprôr atajê mã mam gàmjôr kam tẽ, ne hapua na ite mam me haprôr itajê mã amgõ” hajÿr. Mã harkwa kôt cute ton.

⁹— Mã ramã pytre kam, me hàpên kam cute me to ihtêm catêjê atajê teahpÿanre na ihpore ihhy pyxit ne mencwÿr par. ¹⁰Mã iràrâtia na cute me hàpên kam ihtêm catêjê atajê, ihtÿj me hirôa pê me hàmcwÿr na me amji cãmjî cacrô, mã cute me cumã ihporeihhy to ihcahkũm atajêa jôr. ¹¹Mã cute amencwÿr, ne me hõ pahhi na mehcahôc kam mehtêm. ¹²Ne me cumã: “Pÿhàpà! Pom hapua na me hũmre jàpên kênre itajê jàmchwÿr xà me, me ijàmchwÿr xà ita pipëan ajte? Wa iràrâtia na ite me ijàpênkam itêm. Ne amcro mã me ijucanãar kam, ite me ijàpên to pyt cacrô, mã ajte me ijàmchwÿr xà itajê pipëan!” hajÿr.

¹³— Mã pîxô na pur jô pahhi te me cumã harkwa to: “Me ikwÿ nõ catêjê me ikampa, wa nee ite to ihnõ cupan nare. Mãr cu pahte ihpore hy pyxit peaj na ate me gápên to pyt na, pahte me ajpên par ta? ¹⁴Me gõ pore incwa, ne ma me gũrkwa wÿr me to pra. Wa mam ite hũmre mã ijô pore to ijàmjôr to prãm ata to, wa ite hapua nahũmre itajê mã ijàmjôr, ne me ato ipipên partu. ¹⁵Xà wa ha nee ajkî ite ijô pore to ijàmjôr na prãm ata to ijàmjôr nare? Xà ca ite me to impejtixà ita jũ na, ca ame kam acryc?” — hajÿr.

¹⁶Ne Jeju te harên jicu xà kam me cumã:

— Quê ha jũ caxuw Pahpãm pê pîxô na pur jô pahhi ata pyrãac. Ne mehkryjre me, me cati to ajpëan. Ne hapua na me ipa itajê me, mam me ipacatêjê to ajpëan — hajÿr.

(Pê Matew harên jicu. Pê Ruc hacpÿa mã hõ kàhhôc kam Jeju jarên kam to incrã.)

Cu ha pahtÿj Jeju to amji mã me pahhimpej to prãm

⁵Mã ihkôt me ipa catêjê te ita na me Jeju kam hapac, cwÿrjapê ri cute ahna me hàhwÿr to:

— Ýhÿ, me ijô Pahhi. Wa me hirôa pê amji mã me atoihimpej na me itehcajpa — hajÿr.

⁶Mã me cumã:

— Ca nee cormã ito amji mã me ahimpej nare. Kepê ca ito amji mã me ahimpej kryjre to hanea, pom quê ampo hy kryjre ita he, ne atÿjampo pî pàr catia xa ita mã garkwa ta, necumã: “Garê mea mã amji capa, ne ma côxwa kam amji kre” hane. Quê ha pî pàr ita ihtÿj me akampa, ne me akam hapac to kênre nare, ne ma côxwa kam amji kre — hane.

Cama me cumã hàpên catê jàpên jarên xà

⁷Ne hipêr me cumã:

— Quê jùm cama me anõ mã hàpên catê na ipa, ne amã pur kam apê, ne amãcarà cahàcre hòhti jamã, ne pyt xàr xàa wỳr pur pĩn amji jaxà, ca ha ajkĩ cumã: “Hamre, ate gápên xà jicu ita kam gapacta ne gápànxa na jỹ ne apà” hane? ⁸Jũ wỳr ca ha cumã hane. Ca ha ajteare mã cumã garkwa to: “Hamre, ita caxuw ca ha akà pro xà to amjipro, ne imã ijõ nõ to, ne imã agõ, waha apà ne ikõ, jirõ pê mã ca ha gapacta ne apà” hane. ⁹Nare ca ha ajkĩ amã hàpên catê ata mã: “Caate ipar pejti, ne ateitehcajpar to catia, cwỳrjapê ri apyrên ijakry” hane? Jũ wỳr ca ha cumã garkwa to hane.

¹⁰— Měr hòhõ, he me apê hàpên catê nõ ata pyràac. Na ca ha ate me, pom ite ampo cunea na me amẽn itajêton na, ca ha me amji jarênto hane he: “Me ipê meamã me ijápên catêjê kêanre, wa me ite, por ampo na ate me imẽn ata to pit mã me ijápên, ne neegarkwa jirõ pê, amjia kôt hipêr me ijápên nare” — hane. Hõ, Jeju te ihkôt me ipa catêjê mã to hahkre to hajỹr.

Pê Jeju mehka xêt te tej caprã

¹¹Pê ma Jeju Krĩpinkrên wỳr mõ, ne Krĩritpejme Hĩpõjajo jõ pjê te ajpên mã ahhyr cajpuw mõ. ¹²Ne ramã krĩ jacot mã hàr xàa kam, pêmehkà xêt catêjê me tej nehỹrmã me pra. Ne ampỳa mã me ahtwỳ ne me xa. ¹³Ne ame caràr, ne mecaràar kam me Jeju na hàhwỳr to:

— Pahhi pê Jeju! Me icaprĩa ne! — hane.

¹⁴Mã Jeju te me hòmpun, ne me cumã:

— Amũ me pra, ne Pahpãm mã mehcajrên catêjê wỳr me axà, quê me gaxàjre ata jakàn pê ameapupu, ne ame akõpir to impej, ne ame gakrõ — hajỹr. Mã me hỹrmã memprar kwỳa kam, mã ramã mehcunea impej to mõ.

¹⁵Mã mehka xêtti atajê nõ te ramã caprãr na amji cajpêr, ne amji kà pupun, ne Jeju wỳr amji jaxàr pyrentu, ne kỳj cati pêa mã caprãr pyrên hakryti na, cõjkwa kam Pahpãm to hàmnãn to mõ. Ne jùm ata pê nee Juta catêjê nõ nare, ne cupê Krĩritpej jõpjê catêjê nõ. ¹⁶Ne Jeju wỳr cator, ne cuna mã hõ pôrpo ne nõ, ne cumã:

— Ýhỹ, ikrã tũm ampeaj kam apej, ne ateicaprãr xà ita pyrên ampeaj kam ijakry — hane.

¹⁷Mã Jeju te ihcukij ne cumã:

— Pỳhàpà, jõ ri mã me akwỳ cahhur? Xà nee ite me acunea caprãr narena mã apyxit peaj te amji jaxàr? Jõ ri mã me akwỳ kwỳ te me nowi atajê? ¹⁸Ampo na mã apê mehcahkrit pê nee Juta catêjê nõ nare ita te pit mã amji jaxàr, ne Pahpãmmã hũrên gakry na amji jarên to mõ? ¹⁹To xa ne mõ. Ca ito amji mã ahimpej, cwỳrjapêri ramã acaprãr pejtu — hajỹr, mã ma tẽ.

Pahpãm te pjê to ihhimpej kôt harên xà

²⁰Mã amcro nõ na Parixêw catêjê nõ te Jeju cukij, ne cumã:

— Jũ caxuw mORMÕ quê ha Pahpãm pjêcunea to ihhimpej kam tẽ? — hajÿr. Mã Jeju cumã:

— Quê ha ihtÿj Pahpãm cato, cute pjê ita to ihhimpej xà caxuw. He jũ wÿr ca ha ampo pupu, ne ihkôt amcro nõ na cator xà atajahkre pej. ²¹ Quê ha ihprôt pê cato. Cwÿrjapê jũ wÿr quê ha jũm amã harên to: “Hõmpu he, pjê ita to ri Pahpãm himpej xà” hane. Nare, quê ha amã: “Hõmpu he, ihmãt ri pjê ata to quê ha ihhimpej” hane. He ramã Pahpãm te me acaxwãm pê, meanõ mã, cute amji kam hapac xà to ihhimpej — hane.

Jeju te amji jaxàr xà kôt harên xà

²² Mã cute mehkôt me ipa catêjê mã:

— Quê ha jũ caxuw ipê me Ahàkà jõamcro kam ahtwÿ, ca ha amcro atajê pupunprãm cakrô, nee hõmpun nare. ²³ Quê ha mehkwy me amã: “Ita ri ca Pahpãm pupu he” nare quê ha me amã: “Ihmãt ri ca hõmpu he” hajÿr cakrô, quê ha nee cator xà hajÿr nare. Cwÿrjapê ca ha nee me harkwa kôt apu hapên to apa nare. ²⁴ Quê ha ipê me Ahàkà jõ amcro ihprôt pê cato. Quê ha me icator xà pê ihhêj rùm pahhãjê cuxê pyrãac. Pom pahhãjê cuxê ne cõjkwa cunea cujroita na, quê ha icator xà hane. ²⁵ Ne icator xà ita wÿr, quê ha xa me amji pupunxà kêanre to me amji pupu, ne ame icurê.

²⁶ — Ne por pê me panquêtti Nowe xwÿ jõ amcroajco hapôj ata na, quê ha me ijõ amcro hane. ²⁷ Ne por ihtÿj ajco mehcunea me apà ne me ikõ to me ipa. Ne nee amji na me ampo cãmji nare kam, mehũmre me pyjê ajco me hikwa tuw to mÕr ata kam, pê ahnaaNowe xwÿ te pàr kreti mã hàr jõ amcro kam ahtwÿ. Ne me hàr jirô pê, pê cô cati cato, ne mehkwy jipej tu.

²⁸ — Ne menquêtti Ro xwÿ jõ amcro ata kam pê me hanea. Ne nee amji na me ampo cãmji nare kam mehcunea ajcome apà, ne ajco me ikõ, ne ajco ame ampo jũhkàr to me ipa, ne ajco ihpore to ampo na me hàhpan to me ipa, ne ajco pur kam ame ampo hy kre to me ipa, neajco amji mã me ikre pyxwÿr to me ipa. ²⁹ Ata jõ amcro kam, pê Ro xwÿ Krĩhpõc jõ krĩ pê cato, pê ihprôt pê kên te cuhy cõjkwa pĩn ihpÿm, ne krĩ me, mehkwy cunea to caxàr tu.

³⁰ — Hõ, quê ha me Ahàkà cator xà jõ amcroa kam ahtwÿ, quê ha hanea. ³¹ Ne amcro ata kam, ca ha me anõ ikre jõ mã ahtyc mãapu mõ, ne ma atêm pyrentu, ne nee ampo pyr prãmte gũrkwa mã axàr nare. Ne me anõ pur kam apu apê, ne nee hacpÿ ne gũrkwa wÿr atêm nare. ³² Co he, Ro xwÿ prõ tehacpÿ mã Krĩhpõc jõ krĩ wÿr ihtêm prãm, cwÿrjapê ri ihtyc, na ca meto amji japackre. Na ca ha nee me hajÿr nare! ³³ Quê ha jũm apu ihtĩr prãm, ne ihtÿj amji to acto. Ne jũm te amji to ipictor prãm ata, quê ha Pahpãm cahê na ihtĩr rohnÿtti mã.

³⁴ — Ne caxwa ata kam, quê ha me hũmre ajkrut ne menõ, me hikwa xà kam, quê hapyxit ne me haprô, quê ha pyxit ne ahtwÿ. ³⁵ Quê ha me cahãj

me ajkrut ne ame arÿjhy twÿ, quê ha me pyxit ne me haprô, quê ha pyxit ne ahtwÿ. ³⁶Ne me hÿmre ajkrut ne pur kam ame apê, quê ha me pyxit ne me haprô, quê ha pyxit ne ahtwÿ — hane.

³⁷Mã ihkôt me ipa catêjê te mehçukij, ne me cumã:

— Jeju, jô ri quê ha ita hane? — hajÿr. Mã Jeju me cumã:

— He me apê xônti pyrãc, ne nee cormã ne ate me hahkre pej xà nare cahrô, quê ha jÿ ri cumã ampo ty, quê ha ihtÿj ahna cuprô — hane.

Mehçukij catê te cahãj tehçajpar prãm nare jarên xà

18 ¹Quê hãn ne hôtpe Pahpãmmã mehçakôc, ne nee quê jÿ caxuw intête meamji hi kwîn nare, prãmte ri Jeju te me cumã hÿjarên xà ita jarên. Hô, cute harên to hajÿr he:

²— Ýhÿ, pê hÿmre nõ ata pêmehçukij catê, ne cupê me hõ pahhi. Ne nee ajco amji mã Pahpãm cupa, ne harkwa kôt ipa nare. Ne hanea ne nee cumã jÿm cupa nare, ne krî nõ ita kam ihkrî. ³Pê hanea ne krî ata kam jÿm cahãj pêimpjên ty ata ihkrî. Ne ahte ajco apu ipa. Ne ajco mehçukij catê wÿr pra ne cumã: “Itehçajpa, ne icurê xwÿn ata na ahçukij, ne cumã garkwata, quê hacpÿa ne imã ampo pê itekjêa atajê gô” hane.

⁴— Pê amcro jãhtôa kam ma mehçukij catê ita apucahãj ita tehçajpar caca. Pê ajco mãnea mã cahãj ata amji caxuw ihçukij to ipa. Mã jÿ ita caxuw cute amji mã: “He nee imãPahpãm cupa nare, ne nee imã jÿm cupa nare cahrô, wa ha itÿj cahãj ita tehçajpa. ⁵Ampo na? Cahãj ita cama apu icahpêrkâr to ipa, cwÿrjapê wa ha ahçukij nehÿtã. Nãmri wa ha ite to hajÿr nare na, quê ha ihtÿj ito hamre” — hajÿr.

⁶Ne Jeju ihkôt me ipa catêjê mã:

— He mehçukij catê kêanre ita jarên kam me gapac to impeaj ne.

⁷He Pahpãm pê nee mehçukij catê kêanre ata pyrãc nare. Ne quêt ihtÿj mehkwÿ, caxwa me, amcro kam amjitehçajpar xà caxuw ame cumã carâr to me ipa atajê tehçajpa ne me hÿtã. Xà quê ha ajkî cute mehçajparxà ita wÿr apu ihkên? Quê nare! ⁸Ampeaj kam wa me amã awjarê, Pahpãm quê ha ihtÿj mehkwÿa pytà, ne mehçajpa, mehçukij ne me to ipicokjêr xà jô amcro kam, ne hÿjarêan kam to.

— Ne quê hapijamã pjê kam jÿm ipê me Ahàkã cator xà ata jô amcro kam, amji mã ito ihhimpej? — hane.

Me hÿmre pijakrut Pahpãm mã mehçakôc jarên xà

⁹Ne pê me hÿmre kwÿ atajê mehkwÿ jirôa pê mempej na me amji to hane. Cwÿrjapê ri Jeju te me cumãhÿjarên xà ita to hÿjarên to hajÿr he:

¹⁰— Ýhÿ, me hÿmre pijakrut ne ma Pahpãm to me amji kam hapac xà jÿrkwa wÿr me tẽ, cumã mehçakôc prãmte. Ne ihnô ata pê ri Parixêw catêjê nõ, ne ihnô ita pê ri pjê jô pahhi jarkwa kôt mehÿhkra kam hàmcwÿr catê.

¹¹— Mă Parixêw catêjê nõ ita xa, ne hirăa pê Pahpăm mã ihcakôc, ne ampo pyrên hakry na cumă amji jarên to: “Ûhÿ, me ijõ Inxũ, nee mã ipê ijăhkij xicatê nare, ne nee ipê me cumă ihêj xi catênare, ne nee wa apu, por me ikwÿ amji pê mehprõ caxun to ipa atajê cuxà me cupê mehprõ caxun to ipa nare, wa nee hajÿr nare. Nee mã ipê pjê jõ pahhi jarkwa na mehũhkra kam hămcwÿr catê xa ata pyrăc nare pyrên ijakry. ¹²Wa ijõtpê ipijacri impejti to ipa, ne amcrote xet ita kam, amcro pijakrutita kam, wa nee ampo kur to ipa nare. Ne wa hanea ne ampo cunea to itekjê atajê, quê ha imă ihkră tejwa ha ijõtpê to ajcrà, ne hăn ne pyxit ne gũrkwa măhacjê. Cwÿrjapê ca ha ito impejti ne” hane. Hõ, cute Pahpăm mã ihcakôc xà to hajÿr.

¹³— Mă me hũhkra kam hămcwÿr catê ita ihpahămte, ihkĩnte ampÿa mã xa, ne nee kàj mã, cõjkwa wÿr, ihkuc to irit nare. Necama apu hitõhkre kam amji cahhy, cumă amji kĩn nõ xăhte, ne ma Pahpăm mã ihcakôc ne cumă: “Ijõ Inxũ, he ipê ikên ton catê, icaprĩa ne” — hane.

¹⁴Mă Jeju me cumă:

— Ampeaj kam wa me amă awjarê. Pom hũmre te Pahpăm mã ihkêanre na amji jarên ita ri, cuna mã cumă impej, ne nee ihkên nare. Ne ma quêt impej pëa mã, cuteamji jaxăr ikre wÿr. Mă ihkĩnteParixêw catêjê nõ ata ri Pahpăm mã ihkêanre, na ri nee impej nare.

— Ûhÿ, quê ha jũm apu amji to cati prăm to ipa, quê ha ihtÿj Pahpăm toincri. Ne jũm amji to incrire prăm to ipa ata, quê ha ihtÿj Pahpăm to cati — hane.

(Pê Ruc harên jicu. Pê Macô hõ kăhhôc kam Jeju jarên to hane he.)

Macô 10.2-12

Pê Jeju curê xwÿn catêjê ihkên mã me mën prămte hipêr ihcukij

²Mă ma Parixêw catêjê kwÿ Jeju wÿr me mō, cute ampo na mehçukij prămte. Ne nee mã cute me ampo jahkre pej prămte hÿrmă me mōr nare, ne cute me Jecute ihcakôc xà nõ to ihcupan na me ton to prămte ri, hÿrmă me mō. Ne hÿrmă me cator, ne me cumă:

— Xà cu ha ajkĩ Mojxe xwÿ teme pajapackre xà ata kôt, pahtÿj me pahprômă me hikra? — hane.

³Mă Jeju te mehçukij to:

— Jũ mã pê Mojxe ita na ihhôt to? — hajÿr.

⁴Mă me cumă:

— Pê Mojxe me pamă to hahkre to hane he: “Ca ha aprõ mã hikran prăm, ne ate cumă hikran xà na cumă ihkăhhôc to, ne cumă agō, ne atÿj jũkam ihkujate” — hane.

⁵Mã Jeju me cumã:

— He me akrã tỳj, ne me gũpar nare kam pê Mojxe me gapackre xà ita to hane. ⁶⁻⁸Ne rỳ pẽa mã, mam Pahpãm te pjẽ ton xà ata kam, pê mam hũmre to ne ihkõt cahãj to, ne ajteare mãquêt harẽn to hane he: “Quê ha ita caxuw me hũmre menxyrxwỳ me, me hũmjẽ jicu, ne me hikwa tuw, ne ma mehprõ wỳr me rê, ne mehprõme, me ajcaxê, ne ajpẽn kam me pyxit peaj” hane. Cwỳrjapê ri nee ita caxuw Pahpãm mã ajpẽn kam me ipijakrut nare, ne ajpẽn kam me pyxit peaj. ⁹Cwỳrjapê quẽ nee Pahpãm te ajkam me to cuprõn ne me to pyxit peaj ata to, hipêr ajpẽn pê me ipicapõn xà nare — hane.

¹⁰Ne Jeju te me cumãhũjarẽn to hajỳr jirõ pê mã, ma hacpỹ mã ikre wỳr, ihkõt me ipa catêjẽ me, me mõ. Ne ikre mã me hàr, mã ihkõt me ipa catêjẽ te me hahkre pej prãmte ahna mehckuj. ¹¹Mã Jeju me cumã:

— Ýhỹ, quẽ ha jũm xũmre hĩxi mã hikra, ne ajteare mã cahãj nõ me hikwa na, quẽ ha ramã hĩxi ata cuna mã ihkẽn xà ton ata kõt, Pahpãm mã cupê cute amji kam hapac xà kam inxyre kẽanre atajẽ ton catê. ¹²Nare quẽ ha jũm cahãj te impjẽn mã hikran, ne ajteare mã jũm xũmre me hikwa na, quẽ ha ramã impjẽn ata cuna mã ihkẽn xà ton ata pê Pahpãm mã, cupê cute amji kam hapac xà kam inxyrekẽanre atajẽ ton catê — hane.

Macô 10.35-45

Pê Tijac me Jowãw me amji to cati prãmte amji mã Jeju na ahwỳ

³⁵Jirõ pê mã ri Tijac me Jowãw pê Xeptew kra atajẽ mehkwỳ pẽampỳa mã, ahte Jeju wỳr me hàhtêp, ne me cumã:

— Me ijõ Pahhi, ate amji kam gapac xà na, ite me ana ijãhwỳr xà kampa, ne nee me ipê jũ mãn nare ajco — hane.

³⁶Mã Jeju me cumã:

— Ampo to wa ha me amã? — hane.

³⁷Mã me cumã:

— Ca ha amcro nõ na ate pjẽ cunea to ahimpej xà caxuw gỹr xà catia carõt tỳjti ata kam jỹ, ne ca ha pijamã amji na me inõ jamã, wa ha me inõ acahê na awpõc rũm jỹ, ne me inõ awke rũm jỹ, ne acahê na meihimpej! — hane.

³⁸Mã Jeju me cumã:

— Pom ca ate ampo na me gãhwỳr xà ita, caate nee me hahkre pej nare kam, atỳj ahna me iwỳr. Xà ca ha ajkĩ atỳj icuxà me ikẽn xà itajẽ mã me awcanã? Ýhỹ, wa ha ihimpej xwỳjrea na itỳj amji pupun xà kẽanre to amji pupu. Ne por ite amji pupun xà kẽanre ata pê ihhêj rũm ite ampo kẽanre te ito kẽn xà to ite ikõm, ne kam amji cumrãr xà ata — hane.

³⁹Mã me cumã:

— Wa ha itỳj me awcanã — hane. Mã Jeju me cumã:

— Ampeaj kam ca ha atỳj icuxà me amji pupun xà kēandre to me amji pupu. ⁴⁰He wa nee pa me amã jũ măn nare, nāmri ramã Pahpãm te amji mã icahê na mehkrĩ ne mehhimpej catêjê atajê capi, ne por cute amji mã jũmjê capiatajê mã quê ha ihkrĩ xà itajê jahkre, quê ha kam mehkrĩ — hane.

⁴¹Mã ihkôt me ipa catêjê kwỳ te me ita par, ne ame Tijac me Jowãw kam mencryac to amencryc. ⁴²Mã Jeju te amji wỳr mehcunea to cuprôn ne me cumã:

— He me amã pjê ita kam krĩxàre jõ pahhi catêjê te kypê mehkwy to ihhimpej nare na, me hahkre pej. ⁴³Na wa ha intête me amã, mār quê nee jũ caxuw me akam ampo itajê nō hajỳr nare. Nāmri quê ha me anō mã amji to acati to prãm na, ca ha me akwỳ cunea mã gápên to apa. ⁴⁴Ne por quê ha mam jũmjê mã amji to prãm atajê, quê ha nee pahhiti na me amji to prãm nare, ne quêt amji to cama mehcunea mã hâpên catêjê.

⁴⁵— He nee jũm xũmre te ito impejti xà caxuw wa ajpên pjê ita wỳr, ipê me Ahàkà cati te me hũmre na amji ton, ne iwryc nare. Ne quêt ite me atehcajpar prãmte wa ite amji to me akritxwỳ, ne me gaxà kam ityc xà caxuw, wa icator, mār wa me hàhtôa ne me hũtà ne me to impej — hajỳr.

(Pê Macô harên jicu. Pê Ruc hacpyã mã hõ kàhhôc kam Jeju jarên kam to incrà.)

Jeju me, me ahkrare

¹⁵Mã krĩ ata kam mehkwy te me ahkrare kwỳjapỳn, ne ma Jeju wỳr me to pra, cute me ahnahũ nōr, ne Hũm mã mehcajrên prãmte. Mã ihkôt me ipacatêjê te ahna me hõmpun, ne ame kam mencryc, ne ma intête ame huwahi. ¹⁶Mã quêt Jeju te amji wỳr me ahkrare nahàhwỳr, ne ihkôt me ipa catêjê mã harkwa to:

— Quêt taa me ahkrare itajê ajpên iwỳr me mō, amehcahpêrkárnare. Quê ha jũmjê itajê pê me ahkrare itajê pyrãac, ne ihtỳj jũmjê itajê Pahpãm himpej xà mã me axà. ¹⁷Ita to me amji japackrea ne, quê ha jũm Pahpãm himpej xà na amji caxàr to hanea, pom quê ahkrare te ahna me amji caxàr he, ita na quêha ihtỳj jũ caxuw Pahpãm krac ri me axà — hane.

Pê pahhi jakràjti nō ata Jeju cukij

¹⁸Mã Juta catêjê nō pê pahhi cator, necute Jeju cukij, ne cumã:

— Me imã ampo to hahkre catê, pom quêt apejti ita, jũ mã wa ha ne ityc jirô pê me Pahpãm jõ krĩkam apu ipa to? — hajỳr.

¹⁹Mã Jeju cumã:

— Ampo na mã ca apu ipej na ijarê? Ampo na? Neeme pahnõ impej nare. Me Pahpãm pyxit peaj ri ne impeaj to impej. ²⁰Pom ramã ate me Pahpãm jarkwa jahkre pej ita, pê me pamã harkwa to hane he: “Nee ame cupê mehprõ caxun nare, ne nee amehcuran nare, ne nee apugàhkij nare, ne nee apu ahêj xi jarên nare, ne atÿj me apãmjê me, meaxyrxwÿ jarkwa to me amji japackre to me apa” — hane.

²¹Mã hũmre ita cumã:

— Ýhÿ, icrire naa mã, wa Pahpãm jarkwa kôt amji to ihmpej to ipa — hane.

²²Mã Jeju te ita na impar ne cumã:

— Ýhÿ, ca ha cormã ampo pyxit peaj ata to. Ca ha amũ tẽ, ne amji pê ampo cuneato ihpore na apha, ne me cupê hamreare atajê mã ihpore cunea jôr pa. Ca ha ate ampo itajê to hajÿr na, wa ha cõjkwa kam ate amji pê ampo jôr atajêjirõa pê amã ampo pej pit gõ. Ýhÿ, ca ha ate hajÿr ne ampo itajê to amji caprãr na, ca haajpên tẽ, ne atÿj amji to ikôt apa catê na — hajÿr.

²³Mã hũmre ita te ita na impar, ne cumãamji kîn nare, ne ihpeacre. Ampo na? Cupê hakràj cati na pê cumã hàhcukrêj atajê japê. ²⁴Mã Jeju te cumã amji kîn nare na hõmpun, ne ihkôt me ipa catêjê mã:

— Hamreare, jũ wÿr quê jũm jakràj cati ihtÿj Pahpãmte ihhimpej xà ata mã axà. ²⁵Ampeaj kam, quê ha nee jũm jakràj cati nõ Pahpãm te ihhimpej xà ata mã hàr nare to hane, pom quê neecawrõ cahàc kô jarõti nõ aguj te kre nacator xà nare he — hajÿr.

²⁶Mã cute me ita par catêjê ita na me ahcukij, ne me cumã:

— Mër, jũ mã quê ha me, ne jũm amji pytà, ne cumã axà? — hane.

²⁷— Jũ wÿr quê me hũmre nõ ampo itajê nõto. Ne quêt me Pahpãm mã ri ihtÿj ampoitajê cunea ton jahkre pej — hane.

²⁸Mã Petrõ cumã:

— Me ipupu he, wa ite me ijũrkwa jicu, ne me apynãr — hane.

²⁹⁻³⁰Mã Jeju cumã:

— Ýhÿ, ampeaj kam wa ha me amã awjarê, quê ha jũm tePahpãm himpej xà ata cwÿrjapê hũrkwa jicu, ne ihprõ rer, ne mehkjêjê rer, ne me hũmjê rer, ne menxyrxwÿ rer, ne mehkra rer na, quê ha pjê ita kam ampo itajê jirõa pêcucwa, ne ihtyc jirõ pê mã Pahpãmcahê na ipa, ne ihtĩr rohnÿtti mã — hane.

Pê Jeju hipêr ihtyc me hacpÿa mã ihtĩr xà jarê

³¹Mã ma Jeju te me hàhtõa atajê intête ihkôt me ipa catêjê te tõi atajê japrõr ne me to mõi, ne me cumã:

— Me ikampa! Cu ha ma Krĩpinkrên wÿr me mõi, por pê rÿ pëa mã Pahpãm jarkwa to ihcakõc catêjêahna ihhõc ata wÿr, ne curia quê ha ame ipê Ahàkà to kên. ³²⁻³³Quê ha Roman catêjê jũhkra mã me haxà,

quê ha ame cumã, ne ame hũn, ne ame kam harcô rě, ne amehcahhy, jirô pê mã quê ha mehcura. Quêha ahna amcro incrê, quê ha hacpÿa mã ihtĩr — hajÿr.

³⁴Mã ihkôt me ipa catêjê te me ita par pejnare, ne nee cute me Jeju jũjarên xà ata jahkre pej pejnare. Ne cute me hahkre pej xà ita me cupê ipimxur tu.

Pê Jeju into tũm nō caprã

³⁵Pê Jeju Krĩcuxwati na hàhtêp to mō, pê hũmreinto tũm nō pry jahkà kam jÿ, ne ajco me ahna ahwÿ. ³⁶Ne cute cahê na amji to me mōr na mempar, ne cute mehckuj, ne me cumã:

— Ampo mã? — hajÿr.

³⁷Mã me cumã:

— Pom Naxare jō krĩ pĩn Jeju cator ita ri mō — hane.

³⁸Mã into tũm ita jũpar, ne cute caràr kam ihtēm, ne Jeju mã:

— Jeju! Apê pahhi Tawi xwÿ tàmwxwÿ ita, icaprĩa ne! — hajÿr.

³⁹Mã mam me mō itajê cama ame kam incryc, ne amecumã:

— Kêt! Ne aracri jÿ! — hane. Mã hipêr cute caràr to:

— Pahhi Tawi xwÿ tàmwxwÿ ita, icaprĩa ne! — hajÿr.

⁴⁰Mã Jeju te impar ne hàhhuc, ne cute cumã hàkjêr na me mên. Mã ajpên into tũm ata to me mō, ne Jeju na me to hàhtêp. Mã cute ihcukij ne cumã:

⁴¹— Ampo na ca prãm? Ampo to wa amã? — hajÿr. Mã cumã:

— ÿhÿ, Jeju, wa hacpÿa mã irĩt prãm — hane.

⁴²Mã Jeju cumã:

— Rĩt! Ramã acaprãr. Ate ito amji mã ahimpej, cwÿrjapê wa ite hacpÿa mã ato to amã impej — hane.

⁴³Mã hũmre ita irĩt pyrentu, ne ma cute Jeju pynãr, ne hacpÿa mã cumã into impej ita jahpan xà na cõjkwa kam Pahpãm pejti, necatihti na harên to mō, ne cumã into impej pyrên hakryti na amji jarên to mō. Mã mehcuea te me ita pupun, ne Pahpãm pejti na cute me harên kam mehtēm.

Jeju me Xaquêw

19 ¹Pê Jeju Krĩcuxwati mã axà ne ma krĩ japôc to mō. ²Pê curi hũmre nō japyrê pê Xaquêw ita ihkrĩ. Ne pê hũmre ata pê hakràj catê. Ne cupê pjê jō pahhi jarkwa kôt me hũhkra kam hàmcwÿr catêjê jō pahhi, ne ajco hō pahhi jarkwa jirôa pê me hũhkra kam amcwa, ne amji mã huwahi. Cwÿrjapê pê mehcuea mã ihkĩn nare ne ma ame curê. ³Pê tee ajco apu Jeju pupun nehahkre pej prãm, ne jũ wÿr quê hōkre nôre ita kam, ipu na me hàhtôti ita kam hõmpu. ⁴Ne ma cute hõmpun prãmte, hipê cumam ipichahur ne pĩxô pàr na hàpir, por pê ihkrac ri mōr xà ata na. ⁵Mã Jeju mō ne kàj mã irĩt, ne cute Xaquêw pupun, ne cumã:

— Xaquêw, awrÿc pyrentu, wa ita kam gürkwa kam ijàhhuc to prãm — hajÿr.

⁶Mã Xaquêw jÿjarêan kam iwÿc, ne cute cumã amji kïan kam hürkwa kamahna amji caxàr. ⁷Mã mehcunea te me ita pupun, ne ahna me cupêihkaj na, cwÿrjapê ri cute ahna mehcakôc kên kammehtëm, ne me amji mã:

— Pÿhàpà, quê ha Jeju ajte ihkrã kên catê ita jürkwa kam ahtwÿ — hajÿr.

⁸Ne me hàpàn jirô pê mã ri Xaquêw xãm, ne cute Jeju mã amji jarên, ne cumã:

— Ijõ Pahhi, ikampa, wa ha me cupê hamreare atajê mã ijàhcukrêj jìkjê gô. Ne me cupê ijàhkij atajê, wa ha hacpÿa mã me cupê ijàhkij pyxitjahpan xà na, me cumã ijàmjör to cwat — hajÿr.

⁹Mã Jeju cumã:

— He ampeaj kam ate amji kam gapac xà ton ita na impej. Ne toa ca ate mehcunea mã hanea ne apê Aprãw xwÿ tàmwxwÿ na amji jarên. Cwÿrjapê quê ha ita kam, Pahpãm ikre ita kam mehkrí catêjê itajê kên catia pê me hütà. ¹⁰ÿhÿ, ampo na ri ipê me Ahàkà pjê ita kam cator? He cute me ipictor catêjê japên, ne Pahpãm wÿr me haprör xà caxuw — hane, ne ma ihkôt me ipa catêjê me, me mô.

Ihpore hô catia te tej jarên xà

¹¹Ne ramã Krípinkrên na hàhtëp, cwÿrjapê ri me cumãa ramã Pahpãm te ihhimpej xà ata cator xà kam hàhhuc xàa kam na amehcãmji.

¹²Cwÿrjapê ri Jeju te me cumã Pahpãm himpej xà to hahkre prãmte me cumã hÿjarên xà nõ ita jarên, ne me cumã:

— ÿhÿ, pê hÿmre ita cati, ne cupê pahhi nõ ita kra. Ne ajco amji to pjê jõ pahhi to prãm, cwÿrjapê pê ma pjê nõ jÿwrya kampahhiti cati ihkrí ata wÿr tẽ, cute amji to pjê jõ pahhi prãmte. Ne hÿrmã ihtêm jirô pê, quê ha cupê pahhi ne amji jaxà. ¹³Ne ihtêm xà wÿr, cute cumã me hàpêncatêjê te tej atajê capi, ne me hahkre pej prãmte me ahna hàhwÿr, ne cute ahpÿanre na me cumã ihpore hô catia pyxit ne hõr par. Ne cute me cumãharkwa hyr, ne me cumã: “Ihpore hô cati ita py neto tẽ, ne gapacta ne kam me to apixô to mô. Krãa caxi, jÿ mã ca ha me, ne ihpore hô ita kamme to hàhtë to amõr to? Mår wa amji jaxà, necormã me gahkre pej” hajÿr. Ne ma pjê nõ wÿr tẽ.

¹⁴— Pê hõ pjê kam me curê xwÿn kwÿ amehkríatajê ma hÿmre ita pê me hõ pahhi na amehcaca. Ne ma ihkôt me jÿmjê itajê kujate, cute pahhiti mã me hÿjarên prãmte, ne me cumã: “Wa ma ame me ijõ pahhi na me hÿmre ita caca” hajÿr cakrô, mãhÿmre ita ihtÿj amji caxuw hõ pahhiti cukij, mã cute pjê jõ pahhi na ton.

¹⁵— Mã cupê pahhi, ne hürkwa wÿr cute amji jaxàr. Necute me cumã hàpên catêjê mã ihporehô cati jör atajê na hàhwÿr, cute me hahkre pej prãmte, jÿ mãmõrmõ cute me, ne ihpore ita to me ipicamên.

16 — Mā mam ita hỹrmã cator, ne cute hõ pahhi mã: “Ỹhỹ, ijõ pahhi, ate imã ihpore hõ pyxit ne hõrata, hamre, wa ite kam to ipixô, ne hipêr hipy to tej ne kam incwÿr” hajÿr.

17 — Mā cumã: “Ahnaa ri ita! Apê imã gâpên catêimpeaj to impej. Ne apê ampo kryjre jamâr pejti catê, na ca ha ita caxuw ampo catia jamã. Wa ha krĩ te tej jõ pahhi na axãm” hane.

18 — Mā cumã me hâpên catêjê nõ ita hỹrmã cator, ne cumã: “Ỹhỹ, ijõ pahhi, ate imã ihpore hõpyxit ne hõr ata, hamre, wa ite kam to ipixô, ne kamto xĩc ne incwÿr” hane.

19 — Mā pahhi ata cumã: “Taamã, ita caxuw wa ha krĩte xĩc jõ pahhi na axãm” hane.

20 — Mā hapua na cumã hâpên catê ita hỹrmãcator, ne cute hõ pahhi mã: “Ỹhỹ, ijõ pahhi, ate imã ihpore hõ pyxit ne hõr ata, wa itecupêhkã kam harĩj ne ma apu intê. Na wa ha hacpÿa mã amã cugõ. ²¹Ne acupate wa ite nee kam ampo to ipixô nare. Wa ite ramã gahkre pej pejtu, apê hũmre jâprêhti na. Ne ca atÿj me cupê ampo toate atekjê nare atajê to pôj. Ne ate ampo kre nare atajê, ca gõtpe ame cupê ihkêhkê” hane.

22 — Mā cumã: “Apê imã gâpên catê kêanre, wa ha garkwa ita kôt apu ato kên. Pom ramã ate ijâprêhti ita na ijahkre pej pejtu ita? Pom wa mecupê ampo to itekjê nare atajê incwÿr to ipa, ne pom wa ite ampo krenare itajê, wa hân ne me cupê ihkêhkên to ipa ita? ²³Mêr ampo na mã ate nee me ihporejamâr catêjê mã ijõ pore itajôr, mã kam cute me to imã ipicamên crire nare? Mêr ampo na mã ate me cumã hõr nare? Ca ha kepê to hane na mã, wa ha ijõtpe hipêr ihkwÿncrĩre ne kam cupy” hane.

24 — Ne cute cahê na mehcuhhê atajê mã: “Intête me ijõ pore hõ ita capa, ne jũm mã cute tej ata mã, ca me agõ” hajÿr.

25 — Mā me cumã: “Pÿhâpã, me ijõ pahhi, pom ramã cumã ihpore hõ te tej ita” hane.

26 — Mā me hõ pahhi me cumã: “Ampeaj kam wa me amã awjarê, por ampeaj kam me cumã hàhtô atajê, quê ha me cumã hàhtô atajê jirõa pême cucwa. Ne mehkinde me cupê ihkryjre atajê, quê ha me cupê capa. ²⁷Ne hamre, ita caxuw, ajpên me icurê xwÿnatajê cunea japrô ne me to mõ, por ma me hõ pahhina ame icaca atajê, ne icunaamã, ikam mare mã me hipej tu!” — hane.

Pê Jeju Krĩpinkrên mã axã

²⁸Ne hamre, Jeju te me cumã hũjarên xã ita jarênjicu jirô pê, ma Krĩpinkrên wÿr ihkôt meipa catêjê me, me pra. ²⁹Mã ramã krĩ jacot japrÿ to ame Pìxô jõ krĩ me, Mehkênupunxã jõ krĩ na mehàhtëp, por Pìxô jõ kên cahê na krĩ atajê na. Ne ma mam cute ihkôt me ipa catêjê to ipijakrut ne mehkujahêc, ne cute me cumã harkwa hyr to:

³⁰— Mam me tẽ, me pahcumam krĩ jacot ata wÿr, ne ca ha ramã me axâr xãa kam, me cawrô cahàcre kam nee cormã jũm jÿr nare ata

pupu, ne ramã cumã hêhiahpuro ne xa. Ca ha me cumã hê pô, ne ajpên me to tẽ. ³¹Quê ha jũm ate me cumã hê pôn na me apupu, ne ahna me acukij, ca ha me cumã: “Pahhi ri apu ahna prãm, ne cute hÿrmã me ikujahêc” — hane.

³²Mã ma ajwar me tẽ, ne Jejute hÿjarên xà atajêa na cute me hõmpun. ³³Ne cormã ame cawrô cahàcre mã hêpôan kam, mã cute me to hõ tekjê catêjê te ahname hõmpun, ne mehçukij to:

— Ampo na mã ca ame cawrô cahàcre ita mã hê pô? — hajÿr.

³⁴Mã me cumã:

— Pahhi ri apu ahna prãm, ne cute hÿrmã me ikujahêc — hane.

³⁵Ne ma Jeju wÿr me to mō ne to cator. Ne kam cute me cumã cupêhkà jaxwÿr, ne cute kam hÿr na mehtehçajpar, mã kam hÿr. ³⁶Ne cormã to mōr prãam kam mã, cumam me cumã me hõ cupêhkà capô, ne pry kôt me cumã nōr to mō.

³⁷Ne ma ramã Krĩpinkrên na me hàhtêp to mō, ne ramã Pĩxô jō kên jō ajpô xà mã me iwÿc to mō. Mã ihkôt me ipa catêjêjãhtôa ne ihkôt me mō. Ne cute me Pahpãm carôt kôt Jeju jãpên xà pihho catia pupun atajê pyrên ame hakrya to ame hakry. Cwÿrjapê ri kÿj cati pêa mã cute mePahpãm pejti na me harên kam me to ihtêm. ³⁸Ne me caràr to me hane he:

“Me pajō Pahhiti me pahwÿr cator!

Ne Pahpãm jarkwa kôt hãn ne ipa!

Mã cõjkwa kam mehkrĩ catêjê atajê cuneapinkrinti.

Ne mehçunea te ramã cupêPahpãm catia na me hahkre pej” hane.

³⁹Mã Parixêw catêjê kwÿ me hàhtôa jipôc riamehçuhhê atajê ame Jeju mã, ne me cumã:

— Me cumã ampo to hahkre catê, akôt me ipacatêjê mã garkwa ta, quê me kêt — hane.

⁴⁰Mã Jeju me cumã:

— Ampeaj kam wa ha me amã awjarê, quê ha me kêt, quê ha ihtÿj kên itajê me haxà kam, caràr kam ihtêm pyrentu — hane.

Pê Jeju Krĩpinkrên kam amrã

⁴¹Ne Jeju te Krĩpinkrên na hàhtêp, ne cutehõmpun ne apu caprĩ, ne apu kam amrã. ⁴²Ne incwÿar kam cute hÿjarên to:

— Pÿj me hêj xi!

Krĩpinkrên kam me akrĩ catêjê, he me apê amji jahkre kêatre.

Wa tee me amã, me ate amji kam me gapac xà carĩcti to hahkre, ca ajte nee me amji caxwãm pê me amji to me acarĩcti prãm nare.

Me apê amji jahkre kêatre!

⁴³ Ỡhỹ, quê ha amcro nō na me acurê xwỳn meakrã tu ne, ne me ana ajxê. Quê ha ame ana pjê hakôtne ajpẽn wỳr me gagã, ca ha nee ame gapôj nare.

⁴⁴ Quê ha me gũrkwa cunea to amehkêanre ne, ne me to hamre tu. Ne por kẽn te kwỳc caxwãm pê amehkrĩ atajê, quê ha mehkrare me, me hamre tu.

Nee quê hakrĩ ita jaxà kam kẽn nō hàhhuc nare.

Ne nee hakàn pê cumã hãm xà nō hàhhucne hãm nare.

Me apê amji jahkre kêatre to, ca nee ate me ipupun pej nare, cwỳrjapê ca ha me akên mã me axà.

Ne nee me amã Pahpãm jō amcro cator xà ata na hahkre pej nare.

Ne cute me apytàr xà jō amcro ata kam, ca ha ma hỹrmã ame apipkjêr caca — hajỹr.

(Pê Ruc harẽn jicu. Pê Macô ihkwỳ jarẽ.)

Macô 11.12-14

Pê Jeju pĩxô pàr nō ata crô

¹² Ne jũ mã me ahna amcro te, mã ma hacpỹ mã Mehkênupupunxà jō krĩ pĩn cuteme amji jaxàr ne me mō, mã ramã Jeju mã prãm. ¹³ Mã ampỹa mã cute pĩxô pàr nō hõncoti pupun, ne ma hỹrmã mō ne cator, cute ahna hõ japẽn prãmte, mã ahna hõ nare. Pê cormã hõ xà kaj na, na pê nee hõ nare. ¹⁴ Mã Jeju te harkwa to pĩxô pàr ata crôn to:

— Quê ha nee hipêr jũ caxuw jũm apàr xô nō krêr nare — hajỹr. Mã ihkôt me ipa catêjê te incrôn xà ita na mempar.

(Pê Macô harẽn jicu. Pê Ruc hacpỹa mã ihkwỳ jarẽ.)

Pê Jeju me to Húm Cati jũrkwa caprã

⁴⁵ Ne Jeju Pahpãm to me amji kam hapac xà jũrkwawỳr mō ne cumã hàr, ne cute kam ihpore to ampo na me hàhpan catêjê japôj kam ihtêm.

⁴⁶ Ne cute me cumã harkwa to:

— Inxũ Cati jō kàhhôc kam, ihhôc te harẽn xà ata te hajỹr he:

“Ỡhỹ, ijũrkwa pê kam imã mehcakôc xà” hajỹr.

Ca ajte ate harkwa kaj na me tome hàhkĩj xi jũrkwa — hajỹr.

⁴⁷ Ne pê Jeju ajco amcro cunea kam me cumã ampo to hahkre. Pê Parixêw catêjê me, me cumã Mojxe jō kàhhôc to hahkre catêjême, me

hõ pahhi me, ajco tee ame Jeju curan prãm. ⁴⁸Ne jũ wÿr quê me ita to. Ampo na? Pê mehcunea mã Jeju par prãm na pê.

(Pê Ruc harên jicu. Pê Macô hipêr ihkwÿ jarê.)

Macô 11.20-26

Pê Jeju pîxô pàr crôn ata incrà tu ne xa

²⁰Mã apê mã iràrà na, ma hacpÿ mã Jeju me ihkôt me ipa catêjê pryata kôt me mõi, pîxô pàr ata na, ne cute me hõmpun, mã harê mea mã incrà tu ne xa. ²¹Mã Petrô te pîxô pàr crà ata pupun, ne Jeju te cumã harkwa hyr na to amji japackre ne Jeju mã:

— Ijõ Pahhi, hõmpu he, mâr ca ate pîxô pàr crôn ta, incrà tu ne xa he — hajÿr.

²²⁻²³Mã Jeju cumã:

— Ita to amji japackrea ne he, ca ha ate ampeaj kam Pahpãm to amji mã ahimpej na, ca ha hàhkà jakôtti ita mã garkwa to: “Amji capa, ne cõxwa kam amji to awcapê” hane, quê ha hàhkà jakôtti ata ihtÿj akampa, ne garkwa kôt amji capa ne amji to awcapê. Ýhÿ, ca ha ate gũjarên xà ata kam ramã amji caxwãm pê amji mã: “Wa ramã itePahpãm te ita to hajÿr to prãm na hahkre pej” hajÿr na, quê ha ihtÿj garkwa kôt amji to awcapê. Nãmri ca ha ate gũjarên xà ata kam, amji mã: “Mõrmõ Pahpãm mã ajkĩ ita na to prãm nare, mõrmõ ajkĩ ahna cumã toprãm” hajÿr na, quê ha nee apar nare.

²⁴— Cwÿrjapê wa me amã awjarê, ca ha me Pahpãm mã acakôc ne ampo na me wÿ, ne atÿj cute me amã hõr na amji mã me to hajÿr pyrentu, mâr quêihtÿj me amã cugõ, ca ha me acwa. ²⁵Ca ha hãn ne Pahpãm mã me acakôc kam pra, ne atÿj jũm te me anõ to kên xà atajê jicu, ne to tojnõ, mâr quê cõjkwa kam Inxũ Cati jÿ ata hanea ne, meacuxà, ate me akên ton atajê cunea jicu, ne to tojnõ. ²⁶Nãmri ca ha ate me jũm te me anõ to kên ata to tojnõ nare na, quê ha Inxũ Cati, cõjkwa kam ihkrĩ ata, me acuxà, nee ate me to kên atajê totojnõ nare — hane.

(Pê Macô harên jicu. Pê Ruc hacpÿ mã mã hõ kàhhôc kam harên to incrà.)

Pê Jeju Hũm Cati jarkwa kôt apê

20 ¹Ne amcro nõ na, Jeju ame cumã ampo to hahkre, ne ame cumã Pahpãm jarênto mõi. Mã mehwÿ cator, Jeju cukij prãmte. Ne mehwÿ atajê pê Pahpãm mã mehcajrên catêjê jõ pahhi kwÿ me, Mojxe xwÿ jõ kàhhôc to hahkreatêjê kwÿ me, me prohti kam kwÿ. ²Ne hÿrmã me cator, ne cute me Jeju cukij to:

— Ỹhỹ, me imã amji jarẽ, jũm jarkwa kôt mãca apu ampo itajê to? Ne jũm te mã ahna amã harkwa? — hajỹr.

³Mã Jeju mã cormã cute mehpro na to prãm nare, na ri me cumã:

— Ỹhỹ, wa ha hanea ne me acukij pyxit, ca ha me imã amjijarẽ, jirô pê wa ha itỳj hanea ne me amã amji jarẽ. ⁴Ỹhỹ, jũm te mã Jowãw mã harkwa, mã cutecô kam me cumrãr? Xà cõjkwa kam Pahpãm te mã cumã harkwa? Nare xà ajkĩ pjê kam me hũmre nõ te mã cumã harkwa? — hajỹr.

⁵Mã cute me ajpẽn cukij kam mehtẽm, ne me ajpẽn mã:

— Ampo cu ha ajte me cumã harẽ? Cu me cumã: “Pahpãm te ri Jowãw mãharkwa” hajỹr na, quẽ ha hipêr me pahcukij, neme pamã: “Mẽr hõhõ, ampo na mãca nee ate amji mã me Jowãw to hajỹr nare?” hane.

⁶Nare, cu ha me cumã: “Me hũmre nõa te riJowãw mã harkwa” hajỹr na, quẽha me hàhtõtĩ itajê ma ame pahcaca, ne kẽn to amepahcapê. Ampo na? Ampeaj kam ri me cumã Jowãw pê Pahpãm jarkwa na ihcakôc catê — hane.

⁷Cwỳrjapê ri me Jeju mã:

— Wa nee ite me jũm te Jowãw mã harkwa hyr ata na me hahkre pej nare — hane.

⁸Mã Jeju me cumã:

— Ca ma ame imã amji jarẽn caca, cwỳrjapê wa ha hanea ne nee me amã, por wa jũm jarkwa kôt apu ampo itajê ton to ipa ata na amji jarẽn nare — hane.

(Pê Ruc harẽn jicu. Pê Matew hõ kàhhôc kam Jejujarẽn to hane he.)

Matew 21.28-32

Mehkra te hũm kam hapac, ne me kam hapac nare jarẽn xà

²⁸Ne Jeju te cute amehcukij catêjê mã ampo to hahkre prãmte me cumã:

— He pê hũmre nõ mã ihkra xũmre ajkrut. Mã cute mam ihkà ita mã harkwa to: “Ikra, ita kam ca ha imã ite pĩxô krô kre xà ata kre” hajỹr.

²⁹— Mã ihkra ita te impar ne cumã harkwa to: “Imã imõr prãm nare” hane. Ne hapu na cute amji kam hapac, ne ma tẽ.

³⁰— Mã hanea ne ihkra nõ mã cute harkwa to: “Ikra, ita kam ca ha imã ite pĩxô krô kre xà ata kre” hajỹr. Mã ihkra ita te impar ne cumã: “Ỹhỹ inxũ, wa ha itỳj tẽ” hajỹr cakrô, nee mõr nare.

³¹— Mẽr hõhõ, wa ha ita na me acukij. Me amã, jũm mã pê hũm te amji mã ampo na to prãmtilxà ata to? Xà mam kà ita, nare, hapu na ita? — hane. Mã cute impar ne cumã:

— Por mam ihkra xũmre kà ata — hajÿr. Mã Jeju cumã:

— He me apê hapu na jũm mã ihkra ata pyrãac. Ne atÿj me garkwa to me apê Pahpãm kôt me apa catêjê na me amji jarê, ne nee ihkôt me apa nare. Me amãa me hũhkra kam me hàmcwÿr catêjê atajê me, pyjê inxyre atajême girôa pê mehkêanre cakrô, mãramã me acumam Pahpãm himpej xà mã mencjêj to me mō. ³² Ampo na? Pê Jowãw ajpên me awÿr mō, cute me amã pry ata jarên prãmte, ca ajte nee ate mempar ne amji mã me to me ahimpej nare. Ne mehũhkra kam me hàmcwÿr catêjê me, pyjê inxyre atajê te mempar pyrentu. Ca ate me ita pupun cakrô, ca nee ate me to amji mã me ahimpej ne mempar nare — hane. Mã ma me pra, ne nee hipêr cute mehcyt nare.

(Pê Matew harên jicu. Pê hacpÿ mã mã Ruc hō kàhhôc kam Jeju jarên kam tẽ.)

Pur to me hàpên catêjê kên jarên xà

⁹Ita jirô pê mã ri Jeju te me cumã hũjarên xà itajê nōa jarên, ne me cumã:

— Ýhÿ, hũmre nō te hō pur ata cunea kam amji mã pĩxô krô japyr te uwaatajê kre. Ne cute pur jamãr catêjêkwÿ mã hō pur ata jahkre, mãr quê ma me hamã, quê hō ne intep. Ne ma pjê nō wÿr tẽ, ne curi cute amji to putwrÿ jãhtôa.

¹⁰— Mã cute uwa to cuprôn xà jō amcroa kam ramã hàhhuc, mã cute mehÿrmã cumã me hàpên catêjê nō kujahêc, mãr quê pur jō pahhi mã ihkwÿ ta, ne cute me hamãr catêjê mã cute me to hàpên jahpan xà naihcãhur cunea juwahi prãmte. Mã ajte pur jamãr catêjê atajê amji mã pĩxô atajê cunea juwahi prãmte, cama amehcãhhy, ne ma cute hũre kam mehkujahêc. ¹¹Mã cute hipêr me cumã hàpên catêjê nō kujahêc, mã cute me to hajÿar ne me cumã ihpahàm catiaton, ne hanea ne amehcãhhy, ne ma hũre kam cute mehkujahêc. ¹²Mã hipêr cute cumã me hàpên catêjê nōa kujahêc, mã pur jamãr catêjê te me to hajÿar, ne hanea ne ame to kêanre, ne ma pur pê me to cator.

¹³— Mã pur jō pahhi ita te amji kam hapac, ne amji mã: “Jũ mã wa ha ajte? Ýhÿ, wa ha hane, nema mehwyr imã ikra kĩnti ata kujate. Quê ha ihhêaj to amji mã me hũpa, ne nee amehcaxunnare” hane. Ne ma cute me hÿrmã ihkra ita kujahêc.

¹⁴— Mã pur jamãr catêjê itajê te amji wÿr mehkra ata pupun, ne me ajpên mã: “Me hõmpu he, pom ihkra xũmre ajpên mō ita pê pur jō pahhi kra. Hacme ne mehcura, ne me to hamre, quê ha pur ita pê me pahtekjêa” hane.

¹⁵— Ne cute pur pê mehkra xũmre ata to me cator, ne cute amji mã me mên, ne mehcuran — hajÿr. Hō, Jeju te me cumã hũjarên xà ita to hajÿrjirô pê mã ri cute mehcukij to:

— Jũ mã mǒrmǒ quê ha pur jõ pahhi ita cute amji kam hapac xà ita to?
¹⁶ Ỡhỹ, quê ha me to hane he. Quê ha mehwỹr cato ne me hũjamār catêjê kēanreatajê cunea jipej tu, ne ajteare mã me hũjamār catêjê kwỳ mã pur ita jahkre — hajỹr. Mã cute me ita par ne me cumã:

— An! Ampo na mã cute mehkra ita curan? Quê me pa mã mã, wa ha nee mehcuran nare! — hajỹr.

¹⁷ Mã Jeju me hõmpun tỹjti, ne me cumã:

— He ihhêj ne me caa, ca ha ito me jũm kra ata pyràc ne me icura. Ampo na? Paphãm jòkàhhôc kam ramã harên xà ita te hajỹr he:

“Pom ikre to me hàpên catêjê ma ame ikre mã hãm xà caxuw kên pejti caca ita te ihkwỳ jirôa pê amji to cati, ne ihcuhtac tỹjti” hane.

¹⁸ Ne ihhêj rũm ipê ikre mã hãm xà caxuw mam kên pejti cuhtacti atapyràc, mã ma ame icaca, necute me ijicu. Co he, por quê ha jũm kên ata kam ihpỹm ata, quê ha apu hirên tu. Nare, quê ha kên ata jũm kam ihpỹm ne to hacrôre ne — hane.

Pê me curê xwỳn hipêr Jeju cukij, cute ihkên mã me mên prãmte

¹⁹ Mã me cupê Mojxe wỳj jõ kàhhôc to hahkre catêjê me, me cupêPaphãm mã mehcajrên catêjê atajê te, Jeju te me to hũjarên xà ata na amji na me hahkre pej pyrentu, cwỳrjapê ri ma ame curê, ne cama mehpro ne me haxàr pyrentu to prãm. Mã me hàhtôti te me Jeju par atajê mã ampeaj kamihkîn. Ne Jeju curê xwỳn atajê mãampeaj kam me hàhtôti atajê cupa, cwỳrjapê ri nee cute me Jeju pro nare. ²⁰ Ne ihtỹj cama amehkôpĩr to me ipa. Ne cute mehkhôpĩr catêjê atajê mã me hàmjôr, mār quê amehkôpĩ, ne ihtỹj ampo na mehchukijto ipa, ne ampo kênre kôt mehpro, ne krĩ jõ pahhi jũhkra mã me haxàr to prãm tori ame ipa. Ỡhỹ, ihhêj ne pō rũm kam mempejti, ne mecaxwãm pê, kam cute me amji kam hapac xà kēanre.

²¹ Mã me hũmre atajê ame Jeju cukij, ne me cumã:

— Ỡhỹ, ampo to hahkre catê, wa ite ramã me acakôc xà me, ate ampo to me imã hahkre xà atajê pê ampeaj kam na me hahkre pej. Ne nee amãjũm cupa nare, na ca mehccunea to amji kam gapac xà to apipenti to apa. ²² Ne ampeaj kam caxi me imã awjarê. Xàwa ajkĩ itỹj me pjê cunea jõ pahhiti mã pjê jahpan xà na me ijàmjôr xà ata to meamgõ? — hane. Ne pê cute mehchukij xà ata to, ihkên mã me mên prãmte pê amehchukij. Ampo na? Quê ihhêaj to Jeju me cumã: “Ca ha atỹj me amgõ” hane, quê ha me hàhtôti atajê ihtỹj ame kam incryc. Ampo na? He me cumã hàmjôr prãm nare, na quêha ame kam incryc. Nare, quê ihhêaj to me cumã harkwa to: “Ca ha nee me gãmjörnare” hajỹr na, quê ha pjê jõ pahhi mãme hàpên catêjê atajê ihtỹj ame kam incryc, na pê amehchukij to hane.

²³Mã Jeju te me cumã, cute amji kam me hapac xà kêanre ita na hũcapi pyrentu, ne me cumã:

²⁴— Ajpên me imã ihpore hy nõ, wa hõmpu — hajÿr. Mã cute me cumã hõr. Mã cute me cumã:

— Mër jũm japyr me, ampo carõ mã ihpore hy ita kam nõ? — hajÿr. Mã me cumã:

— Pjê cunea jõ pahhiti pê Xexa carõ me hapry — hane.

²⁵Mã Jeju me cumã:

— Mër hõhõ, ca ha me pjê cunea jõ pahhiti pê Xexa mã me hàhcukrêaj gõ, ne hanea ne Pahpãm mã me hàhcukrêaj gõ — hane.

²⁶Mã mehcukij catêjê itajê pê ihpro jahkre kêatremã aracri mehcuhhê ne me ajpên mã:

— Pÿhàpà, cu amehpro prãm cakrõ, mã cute ihcakõc xà ita to hamãr kêntre nare ita kam, jũ mã cu ha me to, ne mehpro? — hane.

Hacpÿa mã ihtĩr na ihkõt harên xà

²⁷Mã Xato xwÿ kõt me ipa catêjêma apu mehtyc te hacpÿ mã ihtĩr naame ahna aprã atajê kwÿ Jeju na me hàhtêp. Ne cute hanea ne me hàhcukjêr xà ata to, Jeju kên mã me mên prãmte, cute mehcukij to:

²⁸— Ýhÿ, ampo to me cumã hahkre catê, pê Mojxe xwÿ me pamã incaca xà ita naihhõc to hane he:

“Quê jũm ihprõ nõ me hikwa, ne nee kam ihkra nare kamty, quê ha hĩxi ahte apu ipa.

Quê ha impjên tyc ita tõa cahãj pijapit ata mehikwa, ne kam ihkra.

Quê ha ihkra ita to amji mãme mam impjên tyc ata kra” hane.

²⁹Hõ, pê me pamã ahna ihhõc to hane. Ne pê xwahna jũmjê itajê me xet ne ajpên to mehkjêjê pit. Pê mam ihtõ kà itahĩxi ata me hikwa, ne nee kam ihkra nõ juwahi nare kam ty. ³⁰⁻³¹Mã hanea ne ihtõ te amji to hapu te hajÿar ne cume hikwa, ne hanea ne kaam ihtyc. Ne pê me xet itajê cunea mehprõ pyxit ata me, me hikwa partu, ne mehprõ ita kam jũm te mehkra nõ rer nare kam mehcunea mehhi. ³²Mã hapu na mehkõt mehprõ ita te hajÿar ne ihtyc. ³³Ne mehtyc jirõ pê, hacpÿa mã amehtĩr jõ amcro kam, cute me xet itajê cunea cumehikwa ita kam, jũm quê ha mehprõ ata to ihprõ? — hane.

³⁴Mã Jeju me cumã:

— Me amãa, nee hacpÿ mã mehtyc tĩr xà nare, na mã ca ame icukij to hane. Ne ca ihkaj na ame to. He pjê ita kam pyjê me, me hũmre ihtÿj ame hikwa. ³⁵Ne por me Pahpãm kampa, ne catyt kam me ipa, ne me ty, ne hacpÿa mã mehtyc xà jahpa ne mehtĩr, ne Pahpãm wÿr me api, ne cahê na mehkriatajê ri, nee me hikwa tuw xà nare. ³⁶Ne me cupê cõjkwa kam Pahpãm jarkwa to memprar catêjê

pyràac. Jũ wỳr quê jũmty, ne jũ wỳr quê hanea ne jũm hikwa tuw. Ne me cupê Pahpãm kra. Ampo na? Hacpỹa mã amehťir, cwỳrjapê ri me cupê Pahpãm kra.

³⁷— He pê Mojxe xwỳ hirãa pê me amãhacpỹa mã mehtyc ne mehtír nato hahkre. Xà ca nee me aprêj pôc ne nee cute caxàr nareata jarěn to me amjijapackre nare? Pê aprêj pôc te caxàr nare atakam Pahpãm jõkre Mojxe mãawjarẽ, ne cumã:

“Ipê apãm Pãm Cati, ne cormã ipê me aquêtjê Aprãw me, Ixac me, Jaco Pãm Cati wa” hane.

Ne nee pê amji jarěn to:

“Pê ipê Aprãw me, Ixac me, Jaco Pãm Cati” hajỹr nare.

³⁸Ne cute amji jarěn xà ita kôt ri me pamã Pahpãm pê mehtír jõ Pahpãm na hahkre pej, ne nee cupê mehtyc jõ Pahpãm nare. Pahpãm mã mehcuneatír pit, ne nee cumã jũm tyc nare. Cwỳrjapê cu me pahte me Aprãw xwỳ me, Ixac xwỳ me Jaco xwỳ tĩar na me harěn par — hane.

³⁹Mã Mojxe jõ kàhhôc to hahkre catêjê nõ kwỳ hanea ne curi mehcuhhê itajê te me cumã:

— Nee ate gũjarěn xà ita to ihcupan nare. Negũjarěn xà ita peaj to impej — hajỹr.

⁴⁰Hamre, mã hipêr jũm mã ihcukij xà nõ to ihcukij prãm nare.

Pê Jeju hacpỹa mã mehcukij

⁴¹Mã Jeju cormã me cumã:

— Wa ha por pê Pahpãm jũm pê Crixťô to awjahkre ata na me acukij. He ca ajte Crixťô pê Tawi xwỳ tãm xwỳ tãm xwỳ na me harẽ. ⁴²Ne pê Tawi xwỳa ajco ihkàhhôc kam increr xà kam ihhôc to hane he:

“Ijõ Pahhiti te ijõ pahhi mã harkwa to hajỹr he:

‘Icahê na, Pahhi jỹr xà kam, awpôc rũm jỹ.

⁴³Wa ha apar krac ri me acurê xwỳn atajê cunea nõr na me to, quê ha me nõ, ca ha ate me tohjê na cute me gahkre pej xà na, me hipy apar xãm” hane.

⁴⁴Pom pê Tawi xwỳ Crixťô to hõ pahhi na ihcukij ita kam, jũ mã quê ne cupê ihtãm xwỳ? Ampo na? He cormã Tawi ihtĩar na Pahpãmcahê na cõjkwa kam apu ipa — hane.

Pê Jeju me cumã Mojxe xwỳ jõ kàhhôc to hahkre catêjê cawpa

⁴⁵Mã me hàhtôti atajê ame Jeju kampa, mã Jeju te ihkôt me ipa catêjê mã harkwa to:

⁴⁶— Co he, me cumã Mojxe xwÿ jõ kàhhôc to hahkreatêjê to me guphêa ne, nãmri mehkà impeaj kam hãnne ame ipa to prãm, ne hãn ne cute me hũpa kam mecumã mehcaôc na me to prãm. Ne ma hãn ne cute me cuprôn xà kamapu pjê kam mehkrĩ caca, nemehkrĩ xà impeaj kam hãn ne mehkrĩ to prãm. Nehanea ne me hõ pahhi jõamji kĩn kam, hãn ne me hõ impeaj na mehprãm. ⁴⁷Ne hãn ne pyjê pê impjên tyc ne impijapit atajê mã amehhêj, ne hãn ne me cupê ampo to ahkĩ. Ne me cupê me hàhkĩj xi na amji to me ipimxur prãmte, hãn ne mehcunea kam mare mã Pahpãm mã mehcaôc to mehkrÿnre nare. Cwÿrjapê quê ha mehkên xà te mekam ipihur xà atajê me cumã ihkêanre ne — hajÿr.

Pê impijapit Pahpãm mã hõ pore cunea gõ

21 ¹Ne amcro nõ na Jeju, Hũm Cati to me amji kam hapac xà jũrkwa kam hãm ne xa, ne ame hakràj catihtĩ atajê te mehporêjõr na me hõmpu, mã ihpore incjên xà kam me cucjê. ²Ne hanea ne cute jũm cahãj pê impjên tyc neimpijapit ata pupun, mã cute ihpore incjên xà kam ihporehy to ipijakrut peaj ne hàr. ³Mã Jeju te ihkõt me ipa catêjê mã harkwa to hajÿr he:

— Ampeaj kam wa ha me amã awjarê. Cahãj pê hamreare atate ri mehcunea jirõa pê ihpore jõr. ⁴Ne mehkwy jakràjti catêjê te me hõ porecahur jãhhuc atajê pit jõr. Ne cahãj ita nare, cute to amji to ipijapar xà ita ri, cute amji pê ihcuneajõr — hajÿr.

Pê Jeju Hũm Cati jũrkwa jamre na harê

⁵Mã mehkwy Pahpãm to me amji kam hapac xà jũrkwa toamehcaôc to:

— Ampeaj kam ikre ita pej! Ne ahna kên itajêimpejti! Ne kam cute ame Pahpãm mã ampopejti jõr atajê cunea impejti — hane. Mã Jeju te mempar ne me cumã:

⁶— Ýhÿ, pom ampo cunea impejti ca ame hõmpu itajê, quê ha ihtÿj jũ caxuw ihcunea hamre tu, ne nee pom ca ame kên pupu itajê nõ hàhhuc, ne amji jipy nõr nare — hajÿr.

Amji pupun kên jõ amcro jarên xà

⁷Mã cute me Jeju cukij to:

— Me imã ampo to hahkre catê, jũ caxuw quê ha itahane? Ampo quê ha jũ na me imã, wa ha ihkõt me ita tehajÿr xà ita jahkre pej? — hajÿr.

⁸Mã Jeju me cumã:

— Me guphêa ne, quê nee jũm me anõ mã ihhêj nare. Ampo na? He quê ha me hàhtõa ne ijapry na ame amji to mehhêj to me ipa, ne me amã: “Hamre, ramã amcro hyr xàa kamhãhhuc” hane, nare, quê ha me amã: “Ipê Pahpãm teCrixto to côjkwa pĩn me amã hũjahkreatã mã, wa

he” hane. Cakrô, ca nee me anõ ihkôt amji kamgapac nare. ⁹Ca ha jû ri me ipijapu nõ jarên pa, ne nee ame hūpanare. Nare, quê jû ri, krī nõ kam pahhi na ame ajpên jūrê, ca me harênpa, ne nee ame hūpa nare. Quê ha ampo itajê cuneahane cakrô, nee cormã me hamre xà kam hàhhuc nare, ne ihtÿj hōtpê ita hapôj to ipa.

¹⁰— Quê ha krīxàre kwÿ me, mehkwyà ame ajpu, nekrī kwÿ me, krī kwÿ me ajpên kam pra. ¹¹Ne pjê jàhtôa kam pjê ahcujrô, ne pjêjàhtôa kam prāam to prām, ne pjê jàhtôa kam quê haame hà catia to cati. Quê ha ihprôt pê cōjkwa kam ame ampo kêanrepupu, ne pjê kam cute me ampo kêanre pupunxà ata, quê ha mehcunea mã hūpaa to hūpa.

¹²— Ne ita te hajÿr xwÿjrea na, ca ha ame amjipupun xà kêanre to ame amji pupu. Quê ha ame gahê ne meapro, ne hân ne ame acahhy, ne me hacjên xà mã me gacjê, ca ha kam me acuhhê. Jirô pê mã quê ha, cute me cuprôn xà jūrkwā kam mehcukij catêjê jūhkra mã me gacjê, quê ha me acukij pa, jirô pê mã quê ha hipêr me hacjên xà kam hân ne me ato awcapê. Ne icwÿrjapêa quê ha pjê jô pahhi cuna mã me apyxwÿ. ¹³Ca ha cuna mã me acuhhê, ne me ijarên pejti to me cumã ijarê. ¹⁴Ne nee me acakôc xà to ate ame amji pytâr xàatajê to cormã ne ame amji japackre nare. ¹⁵Ampo na? He wa ha cormã me amã acakôc xà gô, ne me amã ate me amji jahkre pejti gô, quê ha nee me acurê xwÿn atajê ame ato hūrâc nare.

¹⁶— Ne quê ha ajte me apâmjêa me, me akjêjêa me, megükjê catêjêa me, me gô ikwÿ nõ catêjêa me, amjiakôt me hacjên xà kam me ato awcapê, ne ihtÿj me anôcura. ¹⁷Ne icwÿrjapêa quê ha mehcunea ame acurê. ¹⁸Ne me awcanãa ne. Ampo na? Quê ha nee me apêakī nõ pyxitre nõ ipictor nare. ¹⁹Na ca ha ampeaj kam me awcanã, ne atÿj me amji pytã.

Pê Jeju Krīpinkrên jamre na harê

²⁰— Ca ha krãhtare me, me hàprê catêjê me, cute meKrīpinkrên krã na me hōmpu, ne krī ata jamre na me to amji japackre pyrentu. ²¹Por ca jūmjê Juta jô pjê kam ame apaatajê, kēnti wÿr me aprar pyrentu! Ne Krīpinkrên jōkrīa kam ame apa atajê, krī pê me gapôj, ne me aprar pyrentu! Ne porca pur kam ame apa atajê krī wÿr me aprar nare! ²²Ampo na? He amcro atajê pê quê ha Pahpãm te Jutacatêjê to kên xà jô amcro. Ne pê ramã Pahpãm hōkàhhôc kam, amcro atajê na, ampo cunea kên xà te hajÿr na to awjahkre.

²³— Pÿj me hêj xi, pyjê mehkra to tic atajê, ne haneane pyjê mã me kra kryjre atajê me, mehkà na kjêcatêjê atajê! Ne pjê ita kam, quê ha me ate amjipupun xà kên crire nare me awÿr cator. Quê ha Pahpãm meawÿr me akên xà kêanre kujate, pjê ita wÿr. ²⁴Quê ha me hàhtôa ne wapo xwahhi to mehcure, nehanea ne me hàhtôa ne mehprone pjê cunea wÿr ame to ajcrà. Por krīxàre pê mehcahkrit te mePahpãm jahkre kêatre atajê, quê

ha ihtÿj Krĩpinkrênkam ame ipa ita na, quê ha ahnaahõ amcro cahhur kam ahtwÿ.

Pê Jeju pjê wÿr cute amji jaxàr xà jarê

²⁵— Ne itajê cunea te hajÿr xà wÿr, ate me hahkre pejxà, quê ha pyt kam hapôj, ne putwÿr kam hapôj, ne caxêre kam hapôj, na quê ha pjê kam itajê mehkrã acto tu ne. Cõxwa jàhkrihkritkêanre ata cupate, quê ha nee jũm cute amji kam hapac xànõ na amji jahkre pej nare. ²⁶Ne mehcunea mã, quê ha pjê wÿr ampo kên cator xà ata hũpaa to hũpa. Na quê ha pjê kam me ajhu ne me hikwa. Ampo na? Hequê ha cõjkwa kam caxêre cunea amji mã ihkrìxà to apha, cwÿrjapê quê ha hũpate amjia kôt pjê kam ame ajhu.

²⁷— Ata caxuw quê ha cõjkwa pĩn ahpar mã ipê me Ahàkà carôt tÿjti me, hàhcujrohti ata mea mã, ahparmã iwrÿc to mõ, ahcacrã kam. Quê ha mehcunea me hõmpu ne me Ahàkà pê Pahhiti catia na me hahkre pej. ²⁸Quê ha ampo itajê hajÿr kam tẽ, ca me awcanãane, ne me amji tÿaj ne, ne cõjkwa wÿr, ca kàj mã merít. Ampo na? He ahtũm nare wa ha me apytà. Ne por ite me apytàr xà ata kôt harên xà te hajÿr he.

Pĩxõ kôt harên xà

²⁹— Por pĩxõ pàr nõ ata, nare, ampo pàr ata he. ³⁰Quê ha ramã ihhõ tetet cato, ca ha me hõmpu, ne me amji jahkre pej pyrentu, ne me amji mã harên to: “Ahtũm nare, quê ha ta iwrÿc pyrentu” hane. ³¹Quê ha ampo itajê cunea apu hane, ca ha mehõmpun to hane, ne me to amji japackre pyrentu, nãmriPahpãm te pjê to ihhimpej xà jõ amcro ata ramã catorxàa kam.

³²— Ne me to amji japackre peaj ne, nãmri quê hamehtĩr itajê tyc xwÿjrea na ampo itajê cuneahajÿr to hane. ³³He me ijarkwa ita to amji japackrea ne, nãmri quê ha pjê me cõjkwa ihtÿj jũ caxuw hamre, ne icakõc xà ita, quê ha quêt hàhhuc rohnÿtti mã, ne nee jũ caxuw hamre nare.

Cu ha me amji jamãr prãm to me papa

³⁴— Ne me ca, me amji kôt hakop to impeaj to me apa. Nenee amji kĩn na me gàkrun to pit mã me amji japackre tome apa nare. Ne nee cõxÿhti to amji to me apipãn topit mã ame amji japackre nare. Ne nee me ate amji to ameapijapar xà to pit mã ame amji japackre to me apa nare. Ca ha itajê to pit mã ate ame amji japackre to me apana, quê ha ampo cunea jamre xà jõ amcro awÿr cato, ne amõr pejti kam aproto hane, pom quê ampo pro xà ihpro he. ³⁵Ne quê ha pjê cunea kam amehkrĩ atajê cunea wÿramcro ata cato. ³⁶Cwÿrjapê ca ha gõtpe me amji kõpĩr peaj to me apa, ne ma Pahpãm mã me amji cajrên, mãr ca xwÿmã ampo itajê pê me amji pytà, ne cupê me gapôj, neicuna mã me acuhhê tu — hane.

(Pê Ruc harên jicu. Pê Macô hõ kàhhôc kam Jeju jarên to hane he.)

Macô 13.32-37

Pê Pahpâm ampo cunea jamre xà jô amcro jahkre pej

³²Jeju te pjê jamre na harên jicu xà to:

— Nee jûm mã amcro me, caxwa me, pyt jÿr xà nõ jahkre pej nare, Inxû te amji mã ihhyr xà ata na. Ne nee cõjkwa kam cumã me hâpên catêjê nõ me, ipêikra mã, cute amji mã amcro hyr xà ata jahkre pej nare. Ne Inxû pyxit peaj mãri cute amji mã amcro hyr xà ata jahkre pej. ³³Cwÿrjapê ca ha me guphêa rûm me apa, ne nee ca atÿj ame apa nare, ne ma me amji jamâr to me apa. Ampo na? He nee me anõ mã hõ amcro atacator xà jahkre pej nare.

³⁴⁻³⁵— Quê ha ihhêj rûm me Ahàkà cator xà ata pê jûa kam, hûwrya kam me hûmre nõ tẽ, ihtêm xà ata to ihtêm pyrâac. Ne ihtêm xà ata wÿr, quê ha ahpÿanrena cumã me hâpên catêjê mã, me hâpên xà jôr partu. Ne pea hûrkwa jamâr catê mã harkwa to: “Ma ijûrkwa ita jamã, nãmri me apê hacpÿ ne icator xà na ijahkre kêatre, mormô wa ha pyt kam icato, nare, wa ha caxwa picapôn kam icato, nare wa ha awcapàtkô cahtiri icato, nare, wa ha iràràtia na ajkî icato” hane.

— He me apê ikre jamâr catêjê atajê pyrâac, ne ipê ikre jô pahhi atapyrâac. Cwÿrjapê ca ha me gûjamâr pejti to me apa, ne ma me ijikaj. ³⁶Ca ihhêj to me ijikaj nare kam, wa ha krâa me awÿr icato, ne nee me gõt na icator, ne me gõt na me apupun nare! ³⁷Ne pom wa amã awjarê ita, wa nee apyxit peaj mã harên nare, wa mehcunea mã harê, ca ha nee atÿj ame apa nare, ne ma me amji jamãa ne! — hane.

Matew 25.1-13

Pyjê te tej jarên xà

¹Mã Jeju te, cute amji jaxâr xà to me cumã hahkre prãmte me cumã:

— Amcro ata kam, quê ha cõjkwa kam Pahpâm himpej xà ata pê ihhêj rûm mecuprÿ te tej atajê pyrâc. Ne cute ahpÿanre na me hõ pôc xà incwÿr, ne pry cahti ri me to jûm xûmre jikwa tuwxà ata jikaj. Ne caxwa ri ihtÿj mehkrî ne me hikaj, cute me hûnâr ne mehkôt cahãj ata jûrkwa kam amji kîn wÿr me hàr prãmte.

²— Ne me cuprÿ te xïc ne mehkrã nare, ne mehkwy te xïc itajê quêt mehkrã kre te amji jahkre pejti. ³Ne por mehkrã nare atajê te ame hõ pôc xà incwÿr, ne nee caxuw amji mã me cacô incwÿr nare. ⁴Mã quêt mehkwy te amji mã me cacô incwÿr. ⁵Mã cormã hûmre jikwa tuw xà na

mehkwỳ itajê apu mehkên, mã ame hõt ne pry cahti ri ame hikaj xà ame hikwa ne ame gõr.

⁶— Mã ramã caxwa picapôn kam, cute mehkrahhia kam mençrer na mempar. Mã me cumã carâr to: “Ramã me hikwa tuw xà na mehkwy me amji to mõi! Ajpên cuna mã me pra!” hajÿr.

⁷— Mã me cuprỳ te me tej itajê amehkrĩ, ne ame ipimprar, ne cute ame hõ pôc xà atajê to impej par, mâr quê me cumã ihpôc pej. ⁸Mã hamre me cuprỳ krã nare atajê pê ihpôc xà cacô jamre, mã me cupê ihtyc, mã mehkwy mã: “Me imã gõ pôc xà cacô kwỳ incirre ne. Ampo na? Ramã me ipê me ijõ pôc xà cacô jamre, ne ramã ihtyc to mõi” hajÿr.

⁹— Mã me cuprỳ krã kreti atajê me cumã: “Jũ wÿr quê. Hamreare, jũ wÿr quê incirre ita kam me pahcatwỳ. Ca hama me pra ne caxuw amji mã mehkwy japrõ” hane.

¹⁰— Mã ma ihpôc xà cacô kwỳ japrõr to me pra, mã me hakàn pê me hikwa tuw xà na mehkwy cator. Mã cute me cumã me hikwa tuw atajê jürkwa jarkwajihê mên, mã amji kìn wÿr mehkõt me hâr. Mã me ahna cute me to hihê.

¹¹— Mã me ahna ahtũmre, mã mehkra nare atajête amji mã me cacô japrõr, ne me cator, ne ame carâr to: “Pahhi, pahhi, cama me ijamã, wa me cuxà me acjêj!” hane.

¹²— Mã me cumã: “Ipê me gahkre kêatre, wa nee ite pry cahti ri me anõ pupun nare. Ne ramã ikre mã mencjêj xà jirõ pê ihpÿm, mã hihê” hane.

¹³— Hõhõ, cwÿrjapê ca ha me amji jamã, ne me gâhcuprõn hiahpuro, nãmri me apê ipê me Ahàkà te amji jaxàr xà jõ amcro ata jahkre kêatre, cõt ca ihhêaj to ahtwỳ — hajÿr.

Matew 25.31-46

Me ajpên pê me pahcunea to ipicokjêr xà

³¹Mã Jeju te me cumã Pahpãm te mehcukij xà to hahkre prãmte me cumã: — Quê ha me Ahàkà amji to Pahhiti, ne ajpên ahpar mã mõi, cu mã memprar catêjê cunea me, ne pahhi krĩ xà catia ata kam me jÿ. ³²Quê ha pjê kam mehkri atajê cunea cuna mã me cuprõ, quê ha me to ajcokjê. Pom ahna mã carà cahàcre hõhti to me ipijapar catêjê, hãn ne ihhõhti ita pê, increcrti to caprã ne to ajcokjê he, ita na quê ha me ato. ³³Ne quê ha awpôc rûm carà cahàcre hõhti to cuprõ, ne awke rûm ihhõ nare itajê to cuprõ.

³⁴— Ita na wa ha ipê me gõ Pahhiti awpôc rûm me xa itajê mã ijÿjarên to: “Por Inxũ te me ato impej atajê, ajpên me mõi. Ajpên me mõi ne ihhimpej xà krac ri me axà. Por pê mam pjê teamji ton xwÿjrea na, Inxũ

me amã ihhimpej xà to ata mã, ca me acjêj. ³⁵Ampo na? Nee mã ampo na nare. He pê imã prãm, pê ca me imã ijarte. Ne imã kôr, pê ca me ikôm. Ne icahkrit cakrô, pê ca me gûrkwa wÿr me ijaprô. ³⁶Ne pê ipê ikà nare, pê ca me imã ikà gô. Ne pê wa ixà, pê ca me ijamã. Ne pê me hacjên xà kam me ijaxà, pê ca ma me ipupun to me apa” hajÿr.

³⁷— Mã mempejti atajê te mehçukij to: “Pahhiti, jû caxuw ri amã prãm, wa ite me amã gô jôr? Ne amã kôr, wa ite me amã cô jôr? ³⁸Ne jû caxuw ri acahkrit, wa ite me ijûrkwa wÿr me gaprôr? Nare, apêakà nare, wa ite me amã me akà ita jôr? ³⁹Ne jû caxuw ri axà, nare, cute me gaxàr, wa ite me apupun prãmte awÿr me mō?” hajÿr. ⁴⁰Mã Pahhiti te impar ne me cumã: “Ampeaj kam wa ha me amã awjarê, por ikôt me ipa catêjê kryjre nō mã ate me acaca xà tonata, imãa ca ate me ton” hajÿr.

⁴¹— Jirô pê mã ri cute awke rûm amehçuhê atajê mã: “Icuna mã me akêanre atajê, ipê me ajcamê. Ne maXatanaj me, cumã memprar catêjê mã, iteme to kên xà na cuhy tyc xà nare ton ata wÿr me pra. ⁴²Ampo na? Nee mã ampo na nare. He pê imã prãm, pê ca nee me imãijarte nare. Ne imã kôr, pê ca nee me ikôm nare. ⁴³Ne pê icahkrit, pê ca nee me gûrkwa wÿr, me ijaprôr nare, ne ipêikà nare, pê ca nee me imã ikà jôr nare. Ne pê ixà, pê ca nee me ijamãr nare, ne pê me hacjên xà kam me ijaxà, pê ca neekam me ito amji japackre ne me ipupun nare” hane.

⁴⁴— Mã mehçên catêjê te mehçukij to: “Pahhi, jû caxuw wa ite me amã prãm na me apupun, ne amã kôr me, acahkrit me, apê akà nare me, axà me, me hacjên xà kam ite me apupun, ne nee ite me atehçajpar nare?” hajÿr.

⁴⁵— Mã Pahhiti me cumã: “Ampeaj kam wa ha me amã awjarê, ca hãn ne mehçryjre atajê tehçajparprãm nare, ne me hîcu ita kam, nee ate me itehçajpar nare, ne hanea ne ate me ijicu, ne me icaca” hane.

⁴⁶— Hôhô, pom mehçên te me hajÿrjê, quê hama mehçên mã mencjêj xà ata wÿr me pra, ne curia quê ha amji pupun to kêanre to mehçuhê rohnÿtti mã. Quêha hanea ne, mempejti atajê ma mencaca xà imejti tírohnÿtti mã xà ata wÿr me pra — hane.

(Pê Matew harên to hane. Pê Ruc hipêr harên kam to incrà to hane he.)

³⁷Pê Jeju amcro cunea kam ajco me cumã ampo tohahkrea to pyt, Pahpãm to me amji kam hapac xà jûrkwa kam. Ne ahna caxwa, pê ma krî pê hapôj, Pîxô jô kên wÿr, ne curia hãn ne amji to apê. ³⁸Pê côjkwa caprêc kôt ajco me hàhtôa ne maPahpãm to me amji kam hapac xà jûrkwa wÿr me pra, cute me Jeju kam hapac prãmte.

Pê Jeju curê xwÿn ahna me ajpên pa

22 ¹Pê ramã me Hakren xà jô amji kînata wÿr amcro incrêre ne nō.
²Pê ajco Pahpãm mã mehçajrên catêjê jô pahhi me, Mojxe xwÿ

jõ kàhhôc to me cumã hahkre catêjê me, ihtÿj ame Jeju curan prãm, ne tee ame to hahkre. Ampo na? Pê ampeaj kam ihkôt me cumã me hàhtôti atajê cupa na pê.

Pê Juta ihpore kôt Jeju kên mã mên prãm

³Pê me pahcurê xwÿn pê Xatanaj carõ kên ata Jejukôt me ipa catêjê te tõi atajê nõ, pê Juta Carijotata mã axà. ⁴Pê ma Juta tẽ, ne Pahpãm mã mehcajrêncatêjê jõ pahhi me, Pahpãm to me amji kam hapac xà jürkwa jamãr catêjê me, Jeju na cute me ajpên par. Mã Juta te me hũhkra mã Jeju to hahkre ne haxàr na, me cumã amji ton. ⁵Mã ame hakry, ne cute me Juta mã ihpore jõrna me amji ton. ⁶Mã hamre, Juta te ihpore pyr na ihtÿj cute me cumã Jeju jõr na amji ton. Quê ha nee me hàhtôti atajê nõ Jeju pupun nare kam, cute jũ riahte me cumã hõr na, me ajpên par.

Pê Jeju me Hakren xà jõ amji kîn jõ na awjahkre

⁷Mã ramã me Hakren xà to cute ame amjijapackre xà jõ amcroa kam hàhhuc. Mã amcro ata kam, amji kîn ata caxuw Juta catêjê te ahpÿanre na ame carà cahàcre hòhti kra pê mehkritxwÿ ata curan. ⁸Mã Jeju te Petrõ me Jowãw kujahêc, ne me cumã:

— Me mõi ne me pamã pyt caxuw me Hakren xà jõ amji kîn jõ nõ to — hajÿr.

⁹Mã cute me Jeju cukij ne me cumã:

— Jõ ri wa ha mër ame pajõ ita to? — hajÿr.

¹⁰Mã Jeju me cumã:

— Me ikampa, ca ha ramã krĩ mã meaxàr xàa kam, quê ha me hũmre nõ ata cô jacê ne to ipa, ca ha me ajpên cajpa, ne ma me hũnã, ne ihkôt me mõi. Quê hajũ ri ikre nõ mã axà, ca ha hanea ne ihkôt me axà. ¹¹Ne me ikre jõ pahhi ata cukij, ne me cumã: “Me cumã ampo to hahkre catê te me acukij xà na me ikujahêc, wa me acukij, jũ ri mõrmõi ikre caxwÿn nõ ita, pom quê ha ihkôt me ipacatêjê me kam me me Hakren xà jõ to apã ita?” hane. ¹²Quê ha kÿaj pê me amã ikre caxwÿn cati nõ atajahkre, ne ramã kam ampo cunea, kam cuhôn xà, ne kam ahna mehkrĩ xà, ne kam ahna me hàpàn xà, quê ha me amã hahkre. Ca ha curia pyt caxuw me me Hakren xà jõ nõ to — hane.

¹³Mã hamre, ma me pra, ne krĩ mã me hàr, ne Jejute me cumã ampo cunea jarên xà atajê cunea na me cator, ne cute pyt caxuw me hõ ita ton.

Pê Jeju ihtyc xà na amji jarên

¹⁴Mã ramã kaam hàhhuc, mã Jeju me, ihkôt me ipacatêjê me, me hàpàn xà na me hÿr, me hàpàn xà caxuw. ¹⁵Mã Jeju me cumã:

— Wa ijõtpê ikên mã ixàr xwÿjrea na, me acahê na me Hakren xà jõ ita kur na amji to prãm. ¹⁶He ampeaj kam wa ha me amã amji jarê, wa ha

hipêr me Hakren xà jõ ita nõ krêr nare, quê ha ahnaa Pahpãm pjê kam mehcunea to ihhimpej kam tẽ, wa ha cormã ihnõ krê — hane.

¹⁷Ne cute mehkôm xà pyr, ne cute Pahpãm mã to hūrên hakryti na amji jarên, ne ihkôt me ipacatêjê mã:

— Mĩ, me akôm xà ita py, ne me acunea me to akôm pa. ¹⁸Ampeaj kam wa ha me amã amji jarê, wa ha hipêr jũ caxuw pĩxô cacô ita kwỳ to ikôm nare, quê ha ahnaa Pahpãm mehcunea to ihhimpej kam tẽ, wa ha cormã ihnõ kwỳ to ikô — hajÿr.

¹⁹Jirô pê mã ri cute pãw pyr, ne Pahpãm mã to hūrên hakryti na cumã amji jarên, ne ihcojêr ne ihkôt me ipa catêjê mã hõr par, ne me cumã:

— Pom pãw ita, ijĩa mã he, wahãn ne me amã cugô, ca atÿj me ku. Jirô pê mã, ca ha ate me ito amji japackre prãmte, atÿj pĩxô cacô ita to me ikô, ne me pãw ita kur to me acuhhê tu — hane.

²⁰Ne me hàpàn jirô pê, cute hajÿr ne pĩxô cacô na me cumã ihkôm xà jõr, ne me cumã:

— Pom pĩxô cacô ita, icaprôa mã he, ne me anaa wa ha haxwỳ. Ata to wa ha me amã ite amji kam ijapac xà intuw to awjahkre.

²¹— He ramã, pom ca me jÿ itajê nõ te icurê xwỳn catêjê jũhkra mã ijaxàr, mã cute me icuran na, imã hahkre pej. ²²ÿhÿ, wa ha itÿj ipê me Ahàkà cati ityc to prãm. Ampo na? Pêramã Pahpãm ityc xà ata na amji mã to ihhimpej hiahpuro. Pÿj me hêj xi, por quê ha me ikên mã ijaxà ata, quê ha ijirôa pê amji pupun xà kêanre to amji pupu — hajÿr.

²³Mã ahpÿanre na, cute me ajpên cukij kam mehtêm, neme ajpên mã:

— Pÿhàpà, jũm mã quê ha ajte me hũhkramã haxà? — hajÿr.

Jũm ri amji jirôa pê cati

²⁴Mã me ahna ahtũmre, Jeju kôt me ipa catêjê te ajpênjirôa pê me cati na me amji jarên kam mehtêm. ²⁵Mã ahna Jeju pê ihkaj na me kam, mã me cumã:

— ÿhÿ, pjê ita cunea kam krĩxàre jõ pahhi cati catêjê cunea mã amji to me catia prãm. Ne cumã mehcunea te hàpên na to prãm, na ri ihtÿj me to ihhimpej. Ne por mehcunea tehcajpaatajê te ri amji to me cati prãmte amji mã me haprÿ to: “Mehcunea Tehcajpar Catêjê” hajÿr.

²⁶— Itajê cunea te hajÿr pit, ne me akwÿa kam, quê neeitajê nõ hajÿr nare. Me akwÿa kam, quê ha jũm catihti ata pê curmã jũm tuw ata pyrãac. Ne por me gõ pahhi ata, quê ha ihhêjrũm cupê me amã hàpên catê pyrãac. ²⁷Mêr jũm ri, me hũmre mã amji jirô pê cati? Xà ajkĩ hàpàn xà na jÿ ata? Nare, xà ajkĩ me cumã me hõ jõr to praata? ÿhÿ, por hàpàn xà na jÿ ata ri, me hũmre mã mehirôa pê cati. Ne Pahpãm mã ita na ihkaj na. Ne cumãa, por me cumã hõ jõr to pra ata ri quêt cati. Ne ipêa ri me amã hàpên catê ata pyrãc. ²⁸Ca gõtpe ikôt me apa, ne icahê na ramã meate me amji pupun xà kêanre kwỳ to ame amji pupun. ²⁹Cwÿrjapê ri Pahpãm te me acunea to ihhimpej xà na

ixãm. Ne pa, wa ha hanea ne me ate me to ahimpej xà na me apyxwỳ. ³⁰Ca ha, por curi ite ihmpej xà kam, ijàpàn xà na me akrĩ xà ata kam me apà, ne ahna me ikõ. Neca ha hanea ne me Pahhiti krĩ xàhti catia ata kam me akrĩ, ne Ixaher catêjê kwỳ te tõi atajê mã cute amji kam me hapac xà na awcapi, ne ahna mehcukij, ne me cumã to ahimpej to me akrĩ — hane.

Pê Jeju Petrô mã awjarê

³¹Ne cute Ximãw Petrô mãn ne cumã:

— Ximãw, Ximãw, nãmri ajco, nãmri ramã me pahcurê xwỳn pê Xatanaj teato arýjhy, ne acarêr ne acajpêr prãmte acaxuw amji mãPahpãm na hàhwỳr. ³²Wa ramã ite, ca nee ate itoamji mã ahimpej jicu nare na, Pahpãm mã acajrên. Na caha gõtpe ipê ampỳre mã apumõ, ne ana ahtũm nare, ca ha hacpỹa ne iwỳr amji jaxà, ne acato, ne me akwỳ mã hũcanãr xà to ihtỳaj ne ajco — hajỳr.

³³Mã Petrô Jeju mã:

— Ýhỹ, wa ita kam ihcuneacaxuw apu mõ. Quê ha hapacta ne akõt me ijaxà, ne jũ na me ito. Wa ha itỳ awcanã ne akõt ty. Ne nee imã ihnõ na hũpa kênre hamreare — hane.

³⁴Mã Jeju cumã:

— Petrô, ampeaj kam wa amã awjarê. Ca ha caxwa ita kam, hõxãhxãc kàr xwỳjrea na atejahkre pej nare na, amji to ahêj to incrê — hane.

Ihpore cjên xà me wapo xwahhi jarên xà

³⁵Jirõ pê mã ri Jeju te ihkõt me ipa catêjê cukij, ne me cumã:

— Xà ca gõtpe amcro ata to me amji japackre, mãrpê wa me akujate ta to? Pê wa me apê ihpore cjên xà nare kam me akujate, ne me apê me akà nare kam me akujate, ne me apê ampo hamrearekam me akujate. Xà ca gõtpe ajkĩ ite me apê ampo hamreare kam me akujahêc ata to me amji japackre? Xà pê ajkĩ hõtpe meapê ampo hamreare? — hajỳr. Mã me Jeju mã:

— Quê, me ipê ampo hamreare nare, pê hõtpe me imã ampo cunea — hane.

³⁶Mã Jeju me cumã:

— Por me amã ihpore cjên xà atajê me, me gãhcukrêj atajê me, gapacta ne ita caxuw me acwa. Ne por me apê wapo xwahhi nare atajê, atỳj me gitõ kà to ihpore na me ahpa, ne amji mã me to wapo xwahhihti japró.

³⁷Pê ramã Pahpãm jarkwa na mehcakõc catêjê nõ hõ kãhhõc kam, ina ihhõc to hane he:

“Quê ha mehkên catêjê me, me to ajpëan” hane.

Ampeaj kam wa me amã awjarê, por pê ramã ihkãhhõc ina ampo to hũjarên xà to awjarê ata, quê ha ihtỳj ito hanea to ito hane — hane.

³⁸Mã ihkôt me ipa catêjê me cumã:

— Me ijõ Pahhi, nãmhã, ramã wapo xwahhihti pijakrut he — hane. Mã Jeju me cumã:

— Měr nãmhã, quê ha taa mã — hane.

Pê Jeju Píxô jõ kên wÿr mō

³⁹Mã hamre, ma caxwa ri Jeju Píxô jõ kên wÿr mō. Pê ramã curi ipa to amji pyrãac, na pê mō. Pê ma ihkôt me ipa catêjê ihkôt me mō. ⁴⁰Ne curi me cator, mã cute amji mã hÿr xà ata mã cator ne kam hÿr, ne ihkôt me ipa catêjê mã:

— Ma Pãhpãm mã me acakôc, ne cumã me amji cajrën, ne ahna me ahwÿ, mār quê ma me atête me pahcurê xwÿn to pên to mō, mār quê nee me acyt, ca ame cumã me apec nare prãnte — hajÿr.

⁴¹Ne hãm, ne cute cahi rën to trinta ne ihkôn krã nahÿr, ne cute Hũm Cati mã ihcakôc kam ihtēm, ne cumã:

⁴²— Inxũ Cati, pom wa ikên xà na amji pupu ita pê ihhêj rũm ikôm xà pyrãac. Wa ma apu ikên ita cunea to ikôm caca. Quê ha amã itête ikên to ikôm xà ita camên prãm na, ca ha gapacta ne atÿj itête camê, nãmri quê ha amã ite to ikôm naito prãm na, wa ha itÿj to ikô. Ampo na? Por ate ampo to amji mã ina prãm xà ata na, wa ha itÿj ahna mã akôt amji kampa — hajÿr.

⁴³Mã cõjkwa pĩn Pãhpãm jarkwa na imprar catê nõhÿrmã iwrÿc, cute cumã hũcanãr xà to ihtÿj prãnte. ⁴⁴Mã cumã amji kĩn nare ata te ihcãm xêr, ita pëihhêj rũm ampo xà ihtÿaj te ihcãm xêr. Mã hũcanãarkam cormã Hũm Cati mã ihcakôc. Mã ahna cô pehpec ita pê ihhêj rũm caprô te pjê kam apu ihpehpec pyrãac.

⁴⁵Mã cute cumã ihcakôc jirô pê hãm, ne ma ihkôt me ipa catêjê wÿr mō. Ne me hõt wÿr cator, mã ihtÿj me hikwa ne ame gôr, ne pê me cumã amji kĩn nare, na pê me hikwa ne ame gôr. ⁴⁶Mã cute me cumã harkwa cator, ne me cumã:

— Ampo na mã ca me gikwa ne ame gôr? Ame ampra ne ame to acuhhê, ne Pãhpãm na ame ahwÿ, mār quê nee me pahcurê xwÿn me amã ampo kên to hahkre nare — hajÿr.

Pê Jeju cama amji na me hamã, quê mehpro

⁴⁷Ne Jeju cormã ame cumã ihcakôc kwÿa kam, mã mehãhtôa ne hÿrmã me cator. Ne pê Juta Carijot ita pê Jeju kôt me ipa catêjê te tõi atajê nõa, Jeju wÿr me hàhtôa ne me to mō, ne ma Jeju wÿr tẽ, ne cute cahôr prãnte ahna hàhtêp. ⁴⁸Mã Jeju cumã:

— Xà ca ha ajkĩ atÿj ipê me Ahàkà cahôr xà ita to kên mã amê? — hane.

⁴⁹Mã Jeju kôt me ipa catêjê te ita na me hõmpun tohajÿr, ne cute me Jeju mã:

— Me ijõ Pahhi, xà wa haitỳj me ijõ wapo xwahhihti ita to me kam tẽ? — hajỹr.

⁵⁰Mã mehnõa te wapo xwahhihti to Pahpãmmã mehcajrẽn catêjê jõ pahhi mã hàpẽn catê nõ atakam ihtẽm, ne cupê hapac jakep, awpõc rũm.

⁵¹Mã Jeju cumã:

— Ame hajỹr nare! — hane. Necute hapac jakep ita na hũ xir, ne cumã ihcupẽn, ne cumãto impej pyrentu.

⁵²Jirõ pê mã ri Pahpãm mã mehcajrẽn catêjê jõ pahhi me, Pahpãm jũrkwa jamãr catêjê me, prohti kam me, cute mehpro. Mã Jeju teme cumã harkwa to:

— Pỳhàpà, xà ajkĩ ipê cute me pahhi jũhhyr na me to ihhimpej catê jõ pahhina mã, ca me gõ kõtãre me, me gõ xwapo xwahhihti itajêto me ipro to me mõi? ⁵³Pom wa amcro cunea kam Pahpãm to me amji kam hapac xà jũrkwa kam me acape na apu ipa ita? Ca rỳ jũ caxuw ate me ipro prãm nare. Ne hamre ita kam ri me gõ amcro, ne me pahcurê xwỳn jõ amcro, na ca ha atỳj me pahcurê xwỳn jõ awcapãtkõa kam ame apê — hajỹr.

Pê Petrõ Jeju pupun nare na amji to ihhêj

⁵⁴Ne hamre, cute me Jeju pro, ne macute Pahpãm mã mehcajrẽn catêjê jõ pahhi jũrkwawỳr me to mõi, ne me to hàr. Mã Petrõ hapua na Jeju na mehkõt mõi. ⁵⁵Mã ikre jarkwa cahê na, carã ata kam cute me cuhõn, ne ipu na amehkrĩ, mã ma Petrõ mehwyr mõi, ne me cahê na cuhy na hỹr.

⁵⁶Mã ikre kam hàpẽn catêjê cahãj nõ atate Petrõ pupun, ne xa ne hõmpun tỳjti, ne cumã:

— Pom jỹ ita pê Jeju na mekwỳ nõa ri — hajỹr.

⁵⁷Mã Petrõ cumã:

— Pỳhàpà, pyjê nõ ita, wa nee ite jũm ita jahkre pej nare — hane.

⁵⁸Ne ahna ahtũmre mã mekwỳa xũmre nõ ita tẽ necumã:

— Apê mekwỳ nõa mã ca — hane. Mã Petrõ cumã:

— Hũmre nõ ita, nee ipê mekwỳ nare, ipê jũmjê itajê jahkre kêatre — hane.

⁵⁹Ne hamre, ahna ahtũm rya mã mehnõa hỹrmã mõi, necute Petrõ mã:

— Ýhỹ, he ampeaj kam ri cupê mekwỳa nõ mã, pom hanea ne cupê Hĩpõjajo catêjê nõ ita? — hajỹr.

⁶⁰Mã Petrõ amji tẽte apu cumã ihhêj, ne cumã:

— Hãpà, hũmre nõ ita, pom ca apu ampo jarê ita, ipê hahkre kêatre, wa nee ite hahkre pej nare — hane. Ne cormã jỹ ne apu ihcakõc kwỳa kam mã hõxãhxãc kàr.

⁶¹Mã ikre kam, hacpỹ ne Jeju Petrõ wỳr ipipkjêr nehõmpun tỳjti. Mã cute Jeju te cumã: “Caxwa ita kam, hõxãhxãc kàr xwỳjrea na, ca ha ate ijahkre pej nare na amji to ahêj to incrẽ” hajỹr na, to amji japackre pyrentu. ⁶²Ne ma hãm ne cator ne mõi. Mãihpahãm te ihcãmxêr pyrentu, mã amrãa to amrã.

Pê krāhtare Jeju cahhy

⁶³Mã me hũmre ame Jeju jamã atajê ame hũn kêanre, ne amehcahhy.

⁶⁴Ne mento pro ne mehcukij to:

— Měr jũm te mã acakwĩn? Harẽ! — hane. ⁶⁵Mã hamre, me hũmre itajê ame hapactua kam ame ahnaxwỳ.

Pê Jeju prohti kam me cuna mã xa

⁶⁶Mã apê, mã cute me amji to cuprõn. Prohti kam me, cute Pahpãm mã mehcajrẽn catêjêjõ pahhi me, me cumã Mojxe xwỳ jõ kàhhôc to hahkre catêjê me, cute me amji to cuprõn. Ne cute me cuprõn jirõ pê mã ri cuteme Jeju na hàhwỳr, prohti kam me hipôc ri hãm prãnte. Mã cute me hãm.

⁶⁷Mã cute mehcukij, ne me cumã:

— Me imã amji jarê, xà apê, por pê Pahpãm Crixto capi ne to awjahkre ata mãca? — hajỳr. Mã Jeju me cumã:

— Ýhỹ, xà wa me amã amji jarê, ca me ikampa ne gõtpe amji mã me ito ahimpej? Hãpà. ⁶⁸Xà wa hanea ne me acukij, ca ajkĩ me imã ampo jarê? Hãpà. ⁶⁹Ne hamre, quê ha hãn ne ipê me Ahàkà, Pahpãm carôt catia kam, awpôc rũm, hĩkjê rũm jỹ — hane.

⁷⁰Mã mehcunea me cumã:

— Pỳhàpà, xà ampeaj kam mã apê Pahpãm kra? — hane. Mã Jeju me cumã:

— Ýhỹ, pom ca me caa ipê Pahpãm kra na me ijarê ita? — hane.

⁷¹Mã cute mempar ne ajpẽn mã me harkwa to:

— Ýhỹ, ita caxuw cu nee jũ rũm me jũm te harẽn xà kẽn nõ kam me pajapac prãm nare. Ampo na? Ramã harkwa te harẽn xà kêanre to harẽn, cu pahte me pajapac jĩa to mempar — hajỳr.

(Pê Ruc Jeju jarẽn jicu. Pê Matew hõ kàhhôc kam Jeju jarẽn to hane he.)

Matew 27.3-10

Pê Juta amji cura

³Pê Juta Carijot xwỳ ata te Jeju curê xwỳncatêjê mã hahkre. Mã cute ihkẽn mã me mẽn. Mã cute nee me curê xwỳn pê amjipytår nare na hahkre pej, me ajkaam amji mã:

— An! Wa ite to ihcupan crire nare! Ne ite ijõ Pahhiti kẽn mã mẽn. Ne quê ha ihtỳj xãmte mehcura! Wa ha tẽ ne intête mehcahpêrta — hajỳr. Ne cute ihpore hy te trĩnta atajê pyr, ne ma hacpỹ mã Pahpãm to amji kam me hapac xà jũrkwa wỳr, cute Pahpãm mã mehcajrẽn catêjê jõ pahhi me, prohti kam wỳr to tẽ. ⁴Ne curi to cator ne me cumã:

— Pom ite me amã ihpore hy te trînta na ijõ Pahhi kên nare ata jõr ita. Nãmhã he, mî! Hapçyã mã me apy! Imã ihkîn nare. Wa ite to cupan. Ampo na? He neehûmre ita kên nare, ne impejti cacrô, wa ite me amã hõr xà ita kôt ca ha xãmte mehcura — hajÿr. Mã me cumã:

— Wa nee ita na me ato amji japackre prãm nare, atea ca amji mã ita ton — hane. Ne nee me cumã hapçy mã me ihpore pyr prãm nare.

⁵Mã Juta te Paphãm to me amji kam hapac xà jürkwa kam ihpore hy ata to me cumã hûcapêr, ne ma tẽ. Ne jũ ita ri cute amji jõkre kwÿr ne ihtyc.

⁶Mã cute mehporre ata to cuprõn ne me ajpên mã:

— Ihpore ita te ri jûm tyc xà ata japrôr, na ri cupê me caprô jõ pore. Na ri Mojxe xwÿ te me pajapackre xà kam, Paphãm jürkwa kam pahte meihpore ita to me pajàhhuc xà na ihkaj na — hajÿr. ⁷Cwÿrjapê ri cute ihpore ata na me ajpên par, ne cute me to carêc te pot ton catê ata pê, hõ pjê atajaprôr, mehcahkrit jarêr xà caxuw. Ne cute mehcahkrit jarêr xà na me ton. ⁸Cwÿrjapê ri ita kam cormã cute me pjê ata mã haprÿ to: “Me caprô jõ pjê” hane. ⁹⁻¹⁰Ne pê ramã rÿ pêa mã Jeremij xwÿ pê Paphãm jarkwa to ihcakôc catêjê nõata Paphãm jarkwa na hõ kàhhôc kam, ita na ihhôc to hane he:

“Mã Juta catêjête me hõ pahhi kên mã me mên jahpan xà na, mehporre hy te trînta jõr na me ajpên par, ata ri hapçyã ne cute me ipyr, ne me to pjê te pot ton catê pê hõ pjê japrôr” hane.

Mã ahnaa cute hajÿr.

(Pê Matew harên jicu. Pê hapçy mã mã Ruc hõ kàhhôc kam Jeju jarên kam tẽ.)

Pê Jeju Pirat cuna mã xa

23 ¹Mã prohti kam mehcunea xãm, ne ma Jeju to, por Pirat pê Roman jõ pahhiti jarkwa kôt krî to ihhimpej catê ata wÿr me mõ, ne cuna mã cute me hãm. ²Ne cute me Jeju kôt harên to me hêj xi xà kêanre kam me to ihtêm, ne me cumã:

— Ýhÿ pahhi Pirat, wa ampo na ite me hûmre ita pro ne awÿr me to imõr nare. Wa ite me ijapac jãa to mempar, mã apu Roman catêjê jõ pahhiti pê Xexa jùhhÿr prãm. Ne hanea ne, me ikam mare mã, quê nee pjê jahpan xà na me Roman catêjê jõpahhiti mã me hãmjõr nare na, me to ihcakôc to ipa. Ne hanea ne apu cupê Crixto na amji jarê, ne quê ha xwahna ihtÿj amji to me ijõ pahhiti — hajÿr.

³Mã Pirat te Jeju cukij ne cumã:

— Xà ajkĩ apê Juta catêjê jô pahhiti? — hajÿr. Mã Jeju cumã:

— Pom ca caa ijarê ita? — hane.

⁴Mã Pirat te Pahpãm mã mehcajrên catêjê jôpahhi me, me hàhtôa atajê mã:

— Ampo cwÿrjapê wa ihcuran na me cumê? Wa nee ite hũmre ita kam ampo kên pupun nare — hajÿr.

⁵Mã hipêr Pirat cunaa mã, cute me harên kammehtêm ne me harên to:

— Krĩ cunea kôt cute ampo to hahkre xà itajê to ajpêncaxuw me irêc to ipa. Hípôjajo jô pjê kam ricute kam to ihtêm, ne ramã me pajô krĩ pêKripinkrêan kam, cute ton kam ihtêm he — hajÿr.

Pê Jeju Heroti cuna mã xa

⁶Mã Pirat te me kam hapac ne me cumã:

— Pÿhàpà, xãmte hũmre ita pê Hípôjajo jô pjê catêjê nõ mã? — hajÿr.

Mã me cumã:

— ÿhÿ — hane.

⁷Mã Pirat te Jeju pê Hípôjajo catêjê nõ na hahkre pej, ne ma pahhi Heroti pê Hípôjajo jô pjê jô pahhi mã ihkujahêc. Pê ramã Krípinkrên kamHeroti apu mō, na pê hÿrmã ihkujate. ⁸Mã curi me to cator, mã Heroti apu hakry. Ampo na? Cumã Jeju pupun prãm, cwÿrjapê ri apu hakry. Ne rÿ pëa mã hãn ne Heroti Jeju te ampo cunea pihho impejti ton xà atajê na harên pa. Ne rÿ jũ caxuw cute hõmpun nare, ne cormã cute hõmpun, cwÿrjapê ri apu hakry. Ne apu Jejucukij, Jeju te kam mare mã cumã ampo pihho pejti ton, mã cute hõmpun prãmte. ⁹Ne cute ampo jàhtôa ne ahna ihcukij, mã nee Jeju tecumã jũ mãn nare, ne aracri cupê xa.

¹⁰Mã hamre, Pahpãm mã mehcajrên catêjê jô pahhime, me cumã Mojxe xwÿ jô kàhhôc to hahkre catêjê me, Heroti wÿr me cator, ne Heroti kam mare mã cute me Jeju to mehhêj xi xà kêanre to mehhêj xi kam mehtêm.

¹¹Mã Heroti jô krãhtare atajê cama apu Jeju to hapactu xà kêanre to me hapactu. Ne ame ahna xwÿ, ne pea cute me pahhi kãmã haxàr, ne me hapactua kam ame to pahhi. Ne pahhi kaimpejti ata mã cute me haxàr, jirô pê mã ri hacpÿa mã cute pahhi Pirat mã mehkujahêc.

¹²Mã hamre, amcro ata kam, Heroti me Pirat te amjito me ikwÿ nõ. Pê mam nee amji to me hõ ikwÿ nõ nare. Pê mam nee me amji cajrên nare, ne ajco me ajpên curê.

Pê Pirat Jeju curan na harkwa

¹³Mã Pirat te me Pahpãm mã mehcajrên catêjê jôpahhi me, Juta catêjê jô pahhi me, por curi me hàhtôa ne ahna me xa atajê me, cute me to cuprôn, ne me cumã:

¹⁴— Pom ca iwÿr me hũmre to mō, ne ate me imã cutepahhi jũhÿr na harên ata na, ite ramãihcukij, ne nee ite kam ampo kênmã icator ne hõmpun nare, pom

ca ampo na ame imã to awjarẽ atajê na. ¹⁵Mã hanea ne Heroti te harkwa kên nõ na imparnare, cwÿrjapê ri hacpÿa ne cute imãihkujahêc. Ne nee me anõ kam mare mã hũmre ita te ampo to kên nare. Ne mër ampo cwÿrjapê wa ha ajte ahna me cumê, quê mehcura? ¹⁶Wa ha cama pryti kà kam wakÿre to ichahyr na me cumê, quê ha amehcahhy, jirô pê mã wa ha ma ihkujate, quê ha tẽ — hajÿr.

¹⁷Ne me Hakren xà jõ amcroa kam ri cute ampo to me amji pyrác xà ata pê hane he. Pê Pirat hãn ne hõtpê me harkwa kôt me cumã me hacjên catêjê pyxit ne hapôj. ¹⁸Mã me hàhtôti atajê te me caràr kam mehtêm, ne ame caràr to:

— Me imã hũmre ita tyc na toprãm, ne Parapa mã ca ha me imã hikra — hajÿr. ¹⁹Ne pê Parapa ata pê apu pahhi jũhhyr prãm, pê hanea neramã jũm ita cura, cwÿrjapê pê me haxà, pê ajco hikwa.

²⁰Mã hacpÿ ma mã Pirat te me hàhtôa atajê cukij, cute Jeju mã hikran prãmte. ²¹Mã hipêr mehcunea te me caràr to:

— Pĩ kam me axô, quê ty! Pĩ kam me axô, quê ty! — hajÿr.

²²Mã hamre, Pirat te mehcukij to incrê ita caxuw ri mecumã:

— Nee cute ampo to kên nare, wa ha ajte ihcuran na mecumê. Wa ha cama pryti kà to apu ichahyr na pit mã me cumê, quê ha amehcahhy, wa ha ma cumã hikra, quê ha tẽ — hajÿr.

²³Hamre, mã kÿj cati pëa mã ame caràr, ne pĩ kam menxôr na awjahkre, me caràar kam. Necute me caràr ita to me Pirat hi kwĩn. ²⁴Mã Pirat te Jeju curan na me mën. Pom pê ahnaa ajco me to prãm ata na ri cute ahna me mën. ²⁵Ne cute Parapa te apu pahhi jũhhyr prãm, ne ramã jũm curan ata mã hikran. Ne me hũhkra mã Jeju jaxàr, quêt taa jũ na me to, por jũ mã cute ame ton prãm xà ata na.

(Pê Ruc harên jicu. Pê Matew Jeju tyc xà jarê.)

Matew 27.19

Pê Pirat mã hĩxi cupê Jeju cawpa

¹⁹Ne cormã Pirat pahhi krĩ xà kam jÿ ne apu Jeju cukij, me ajkaam mã hĩxi te harkwa kujahêc ne cumã:

— Ca ha nee hũmre pejti te jũ caxuw ampo kên ton nare ata to kên nare. Ampo na? He caxwa ri ite hũtir kêanre — hajÿr.

Matew 27.24-31

Pê pĩ na me Jeju xôr na harkwa

²⁴Mã Pirat te nee me cupê Jeju mã hikran nare na amji jahkre pej. Mã ame hàhkrihkrit catia kam, me hàhtôti atajê ihtÿj me pahhi jũhhyr prãm.

Mã pahhi ata te nee Jeju curan na me cumã hũjahkre nare na amji jarĕn xà caxuw, cõ na hàhwÿr, ne kam hũhkra cuhhõn, mehcunea kam mare mã. Ne hũhkra cuhhõn kwÿa kam cute me cumã:

— Wa nee ite hũmre ita curan na me amĕn nare, ne me atea ri mehcuran xà — hajÿr. ²⁵Ne mehcunea te caràr to:

— Me imã, ite mehcuran jahpan xà na, ihtÿj me ikam me ikĕn pÿm, ne hanea ne me itàmwxwÿ kam ihpÿm na to prãm — hajÿr.

²⁶Mã Pirat pê pahhi ata te me cumã Parapa mã hikran. Ne cute pryti kà to Jeju cahhyr na me mĕn, ne pea cute krãhtare mã me hõr, mâr quĕ mehcahhy catia, ne pĭ na me cuxõ ne mehcura.

²⁷Mã ma krãhtare atajĕ me to ihhimpej catĕ pê Pirat ata jũrkwa wÿr Jeju to me mõ, ne curia cute krãhtare cunea to cuprõn, mã cute mehkrã tu ne to xa. ²⁸Ne cute me cupĕ ihkà to põj, ne me ahna pahhi kà tepti japjĕhti ata mĕn, ne me cumã to ihkà. ²⁹Ne hõmjĭ to me pahhi krãhkà ne ihkrã mã me haxàr. Ne awpõc rũm hũhkra mã pĭ nõ to pahhi jõ kõ ne me haxàr. Mã curia me cuna mã to xa. Ne me to hapactu xà kĕanre ata kam me to incrã, ne cuna mã mehkõn krã na mehkrĭ ne me cumã:

— Apĕ Juta catĕjĕ jõ pahhi catia ne apej! — hane. ³⁰Ne kam me harcõ rĕ, ne hũhkra kam me cupĕ pĭ ata to põj, ne ihkrã kam me to ihcahhy.

³¹Ne cute me to hapactu xà kĕanre ata jirõ pê intĕte me cupĕ pahhi kà tepti ata caxàr, ne hacpÿa mã ihkàa to me cumã ihkà. Ne ma pĭ na cute menxõr ne mehcuran xà ata wÿr me to mõ.

(Pĕ Matew harĕn jicu. Pĕ Ruc hacpÿ mãa mã harĕn kam to incrã.)

Pĕ Jeju ma ihcuran xà wÿr mõ

²⁶Mã hamre, ma Jeju to me mõ. Ne me to mõr kwÿa kam cute pry kõt me Xiren jõ krĭ catĕjĕ nõ cajpar, pê haprÿ Ximãw. Pĕ pur pĭn mõ, pê mehcajpa ne mehpro ne pĭhti ata krac ri me haxà, ne ahna me cumã quĕt to mõ, pê ma Jeju kõt to kwÿ.

²⁷Mã me hàhtõa ne hapu na Jeju na me hõmpun to memõ. Mã pyjĕ kwÿ Jeju kõt me mõ atajĕ ahna amehõmpu, ne cama ame caprĭ ne ame kam amrã. ²⁸Mã hacpÿ mã me hÿrmã pipkjĕr, ne cute me cumãharkwa to:

— Krĭpinkrĕn jõ pyjĕ itajĕ, nee ca ikamame acwÿr nare, ne me akra kam ca quĕt ame amrã. ²⁹Ampo na? He quĕ ha cormã krĭ itajõ amcro kĕanre kam ahtwÿ, quĕ ame garĕn to:

“Por jũ caxuw pyjĕ itajĕ nõ mã ihkra nare,
mã nee cute to pijahõr nare,
ne nee to ipijapar nare atajĕ,
quĕ ha ame hakrya to ame hakry” hane.

³⁰Quê ha jũ caxuw amcro ata kam ahtwỳ, quê ha me hũmre kwỳ me kēnti nō mã:

“Hã, kēnti ita me ijipyapỳm” hane.

— Quê ha hanea ne me hũmrekwỳ kēn jawênre atajê mã:

“Me ito amxu” hane.

³¹Ûhỹ, me papê cuhy caxuw pĩ pyràac, ne pa ri cormã icoti na wa apu amji pupun xà kêanre to amji pupu. Ne me ca nare, ca ha jũ caxuw me acrà, ne ijirôa pê ame amji pupun xà kêanre nō to ame amji pupu — hane.

Pê pĩ na me Jeju xô ne me ahna xwỳ

³²Ne Jeju kôt me hàhkĩj xi pijakrut ne me to mō, cute mehcuran prãnte.

³³Ne kēn japyrỳ te Corcota ata kôt harên xà te “Mehkrãhhi jô kēn” ata wỳr me tocató. Ne pĩ na cute wakỳti to me Jeju jũhkra me ihparcuhhêc, ne ahna me hãm. Ne hanea ne me hàhkĩj xi atajê to cute me hajỳar ne pĩ na me haxôr, ne awpôc rúm me ita xôr, ne awke rúm me ita xôr.

³⁴Mã Jeju te Hũm Cati mã mehcajrên to:

— Inxũ Cati, pom ame ito kēnitajê pê ijahkre kêatre, cwỳrjapê ri ame ito hane, na ca ha nee ame kam acryc nare, ne cute me ito kēn ita to tojnô — hajỳr. Mã krãhtare atajête Jeju kà to ame ipicràn, ne kēn te amji pêhũhkàr xà to ihkôt ame amji pê hũhkà, jũm mōrmô quê ha amji pê to ihkà itajê jũhkà.

³⁵Mã me hàhtôa ne ahna me xa, ne ame hõmpu. Mã me kam mare mã, Juta catêjê jô pahhi kwỳ apu Jeju na xwỳ, ne me cumã:

— Pỳhàpà, pom ca atỳj mehwỳ pytâr to apa ita? Pom apê Pahpãm kra ita, ca mēr pĩ ita pê amji capa ne wrỳ ne amji pytâ. Me imã nee apê Pahpãm kra nare. Quê ha apê Pahpãm kra na mã, ca haatỳj pĩ ita pê wrỳ — hane.

³⁶Mã hamre, krãhtare catêjê ame ahna xwỳ ne amecumã. Mã mehwỳ xwỳjê ame cumãn kêanre, ne me hapactua kam ame ahnaxwỳ. Mã krãhtare nōa Jeju wỳr pĩxô cacô xỳre ata totê, ne cute to kam hapac, ne cumã:

³⁷— Krãa, pom apê Juta catêjê jôpahhi ita, mēr ampo na mã ca pĩ ita pê ate amji caxàr ne awrỳc nare? — hajỳr.

³⁸Ne Jeju krã incwỳrpê pĩ na ihkàhhôc ajêt ata pê hũjarên to hane he: “Cupê Juta Catêjê JôPahhiti” hane.

³⁹Mã me hàhkĩj xi pijakrut ne pĩ na Jeju cahê na meajêt atajê nō apu Jeju mã, ne cumãn to:

— Pÿhàpà, pom apê Crixto ita? Xà ca ha amji pytâr ne amji kôt me ipytâr nare? — hane.

⁴⁰Mã me hàhkij xi catê nõ Jeju jikjê rûm ajétata apu Jeju cwÿrjapê ihnõ ita kam incryc, ne cumã:

— Pÿhàpà, xà nee amã Pahpãm cupa nare? Ampo na mã ca apu cumã? Pom cu me pancrê itajê cunea me amji pupun xà kèanre to me amji pupu ita? ⁴¹Pahte ri ampo kèanre ton, ne hũmre ita te nee ampo kên ton nare cakrô, ihtÿj me pahcunea kên xà ita mã hàr. Ne pahkên xà ita pê cu ajco amji to hapê, ne hũmre impejti ita pê neeajco amji to kên xà ita japên nare — hane.

⁴²Ne cute Jeju mã amji jarên, ne cumã:

— Jeju, ca ha jũ caxuw Juta catêjê jõ pahhi na amji to, ne hacpÿ ne ate amji jaxâr xà ata kam, ito amji japackrea ne — hajÿr.

⁴³Mã Jeju cumã:

— Ÿhÿ, wa ha ampeaj kam amã awjarê, ca ha itakam icahê na, por curi mempejti tyccaxwÿn tiar ame ipa ata ri, cu ha ajwar apu mô — hane.

(Pê Matew hanea ne harê.)

Matew 27.45-46

Jeju tyc xà wÿr awcapàtkô

⁴⁵Mã ramã pyt me pahkrã jimoac kam hÿr xàa kam, cute hàhcujro to hicu, ne ampeaj kam awcapàtkô, neawcapàtkô ita na pyt pipkjêr. ⁴⁶Ne pyt pec pejti kam Jeju kÿjti pèa mã carâr ne:

— Inxũ Cati, Inxũ Cati! Ampo na mã ahte ate irer to hajÿr? — hane.

(Pê Ruc hipêr harê.)

Jeju tyc xà

⁴⁴⁻⁴⁵Mã Pahpãm to me amji kam hapac xà jũrkwa kamPahpãm jũrkwa caxwÿn me, mehũmre tekjê ata te amji mã ahhyr xà na, cupêhkà pohti ajêt ata te awryc mãamji jipôn, ne ajpên wÿr ihkre. ⁴⁶Mã hamre, Jeju hipêr kÿj cati pèa mã carâr, ne caràarkam cute Hũm Cati mã harkwa to:

— Inxũ Cati, hamre, wa ha ty, neicarô quê ha ma awÿr api — hajÿr. Ne cute amji jarên jirô pê mã ihtyc.

⁴⁷Mã Roman catêjê nõ pê krãhtare jõ pahhi cati ata te Pahpãm pej na amji mã harên, ne taa amji mã:

— Xãmte ampeaj kam mã hũmre ita peaj to impej — hajÿr.

⁴⁸Ne por cute mehtyc xà na me hõmpun xà caxuw me cuprõn atajê te me ita pupun, ne ma ame amji jacjên, ne me cumã amji kîn nõ xàhte,

amji jõ kôt kam ame amji cahhyr to me ipa. ⁴⁹Mã Jeju jõ ikwỳ nõ catêjê me, pyjê me, porpê Hîpôjajo jõ pjêa rûm ajpên ihkôt me mō atajê, ampỳa mã mehcuhhê ne ahna ame hõmpu.

Pê me Jeju jarêt

⁵⁰⁻⁵¹Pê me hũmre ihnõ japyr pê Joje, ata pê Krĩhkàhti catêjê nõ, ne ajco catyt kam ipa. Ne cupê hũmre impejti, cute amji kam hapac xà cunea to, ne ajco Pahpãm himpej xàkujahêc xà ata japên to hikaj to ipa. Ne nee cupêmehkwỳ, ne Jeju cuna mã harkwa kên nõ to ihcakôc nare, ne catyt kam ahna ihcakôc, ne mehkwy te amji kam hapac xàkaj na ajco amji kampa. ⁵²Ne ma Pirat jũrkwa wỳr tẽ, cute Jeju na ihwỳr, nepĩ pê ihtyc caxàr prãnte. ⁵³Mã Pirat te cumã hahkre, mã ma tẽ necute pĩ pê caxàr. Ne cute cupêhkà jakati impejti ata to Jeju jĩ cunea cupu, ne ma rỳ jũ caxuw jũm te kên kre ita kam amji jarêtnare, ne cormã intuwti ata wỳr to kwỳ, ne cutekam hir, ne ahna to hihê. ⁵⁴Ne mehkôt xà jõ amcro xwỳjrea na pê ita hane.

⁵⁵Ne por Hîpôjajo jõ pjê rûm, pyjê Jeju kôt me mō atajê teJoje te kên kre ata kam Jeju jarêt na me hõmpun. ⁵⁶Ne ma ikre wỳr cute me amji jacjên ne me mō. Necute me to amji pyrãc xà ata kôt, cute me Jeju jĩ cuxwa prãnte ame ampo cacô cuxwati, incoti ita cwỳr, ne ame to ipicacwỳr. Ne nee amcro ata kamhacpỳ mã cute me to amji jacjên nare, necuria amehkôt to ame ipa, mehkôt xà jõ amcro atajê kam.

(Pê Ruc Jeju jarên jicu. Pê Matew hõ kàhhôc kam Jeju jarên to hane he.)

Matew 27.62-66

Pê krĩ jamãr catêjê Jeju kre jamã

⁶²Ne ramã Juta catêjê kôt xà jõ amcro ata cator. Ne Pahpãm mã mehcajrên catêjê jõ pahhi kwỳ me, Parixêw catêjê me, Pirat pê pahhi me, cute me ajpên par. ⁶³Ne me cumã harkwa to:

— Me ijõ pahhiti, wa ite cormã me Jeju xwỳ hêj xi xà ata to me amji japackre, nãmri cute amji jarên to: “Quê ha ina amcro incrê, wa ha hacpỳa mã itĩr” hajỳr. ⁶⁴Ne cu ha pahtỳj me harêt xà ata jamãr to impeaj ne, quê ha xa ahna amcro incrê, cu ha cormã me hamãr jicu. Nãmri cu ha me ita ton nare, quê ihhêaj to ihkôt me ipa catêjê me hĩ to ahkĩ, ne me harên to: “Hacpỳa mã ihtĩr!” hane. Quê ha mehhêj xi xà ita, mam ita jirôa pê ihkêanre ne — hajỳr. ⁶⁵Mã Pirat te me cumã harkwa to:

— Nãmhã ijõ krãhtare catêjê amehcuhhê he. Ca ha me haprô, ne me to mō, ne cute me harêt xà ata jamãr na me amẽ, quê me hamãr to mempeaj ne — hajỳr. ⁶⁶Mã ma cute me haprô, ne me to pra. Ne cute me kên kre

kam me harêť xà ata jarkwa na, me ihtô xà to me ihtô, jũm te aracri ihcaxun cupate. Ne curia ame aħname ipa, ne ame hamãr to ame ipa, ne ma mehcuħhê ne me hõmpu, ne me hamã.

(Pê Matew harêñ jicu. Pê hacpỹ mã mã Ruc hõ kàħhõc kam Jeju jarêñ kam tẽ.)

Pê Jeju hacpỹa mã ihtĩr

24 ¹Ne mehkôt xà jõ amcro atajê jirô pê mã ri, iràrã na, ma Jeju kre wỳr pyjêatajê ampo cacô atajê to me pra. ²Ne ramã kre na me hàhtêp to pra, neampỹa mã cute me kre pupun. Mã kre jihê xà pê kên te kujtipyrãcti ata jũm te ramã hihê mên, mã hihê mên xa. ³Mã kên kre mã me hãr, ne nee cute me Jeju jĩ pupunnare, ne meħkrã pictor tu.

⁴Mã krãa, me hũmre pijakrut nemehkà jakati prãti kam me cuna mã me xa. ⁵Mã hamre, me hũpate pjê kam ame ipihur. Mã me hũmre itajê te pyjê itajê mã me harkwa to:

— Ampo caxuw mã ca amehtyc cote na ramã hacpỹa mã jũm tĩr ata japê? ⁶He ramã hacpỹa mã ihtĩr, ne nee ita ri apu mõr nare, ne por Hĩpõjajo jõ pjê kam cute me amã amji jarêñ ata na ca me to amji japackre. ⁷Pê me amã amji jarêñ to hane he: “Quê ha ihtỳj jũm meħkên catêjê jũhkra mã, ipê me Ahàkà jaxà, quê ha meħkên catêjê pĩna me cuxô. Quê ha ty ne ahna amcro incrê, quê ha hacpỹa mã ihtĩr” — hajỹr.

⁸Mã pyjê itajê te harkwa to me amji japackrepyrentu. ⁹Ne ma ikre wỳr me pra ne me cator, ne Jejukôt me ipa catêjê te õxi atajê me, meħkwỳ mã, ame awjarê. ¹⁰Ne pyjê itajê pê ame awjarê he: Marij Matarkwỳj me, Jowanakwỳj me, Tijac menxi pê Marij me, por pê meħkwỳa kwỳ mehkôt me mõ atajê mã, pê ihtỳj hanea ne ame harê. ¹¹Mã Jeju kôt me ipa catêjê te nee me pyjêatajê te me cumã hũjarêñ xà itajê na me kam hapac nare, ne ihtỳjcute ame hũjarêñ to ame ipa na, amji mã me to hajỹr.

¹²Ne Petrô nare, pê hãm pyrentu ne ma kên kre wỳrajcahu. Ne kên kre ri cator, ne cumã nõr, ne nee Jeju jĩpupun nare, ne cupêhkà te hĩ cupu, mã cupê cator ata na, ahnaa hakàn pê nõ. Mã ma hacpỹ mã ikre wỳr cute amji jaxàr ne tẽ, ne ita to cama apu amji kam hapac to amji mã ipikrar to mõ.

(Pê Ruc Jeju jarêñ jicu. Pê Matew hõ kàħhõc kam Jeju jarêñ to hane he.)

Matew 28.11-15

Kràhtare ame cumã hêj xi jarêñ na ajpên pa

¹¹Ne cormã pyjê krĩ wỳr pry kôt me mõr kwỳa kam, mã krãhtare te Jeju kre jamãr atajê kwỳ te Juta catêjê jõ pahhi kwỳ atajê mã Jejukre te

jũ mǎn xà atajê cunea na harĕn par. ¹²Jirô pê mã ri cute jũ mã me ton xà ata na ahna me ajpĕn par, ne me krãhtare kwÿ mã ihpore catia ne hõr, ne me cumã:

¹³— Ca ha me gũjarĕn to ame apa to me hane he: “Wa me ijikwa ne me gõr, mã Jeju kôt me ipa catêjê cator, ne ma cute me hĩ to hàhkĭj ne me to tĕ” hane.

¹⁴— Quê ha me pajõ pjê jõ pahhiti ita kampa, ne ajteare mã ampo to kam amji kampa, wa ha me cumã ate me harĕn xà itajêa na harĕ. Hamrequê ha cute, me ite me to amji kam me ijapac xà ita na to amji kampa, quê ha nee me amã ihkĕn xà nõ cator nare — hajÿr. ¹⁵Mã pea Jeju kre jamãr catêjê atajê te me ihpore ita pyr, ne ihtÿj ame cumã mehhêj xi xà na cute me ajpĕn par atajê jarĕn to meipa. Mã mehhêj xi xà atajê Juta jõ pjê cunea kôt ihcahkũm. Ne cormã ita kam mehhêj xi xà ita ipa.

(Pê Matew harĕn jicu. Pê hacÿp mã mã Ruc hõ kàhhôc Jeju jarĕn kam ihtĕm.)

Pê Mewÿrcacro jõ krĩ jõ pry kôt me mõ

¹³Mã amcro ata na ma krĩ wĕn japyrÿ te Mewÿrcacro ata wÿr Jeju kôt me ipa catêjê pijakrut ne me mõ. Pê krĩ wĕn ita hõtpê Krĩpinkrĕn pê ampÿre mã xa, mõrmõ pê hÿrmãrec pyxit ne ihkôt hĩkjê kam pê xa. ¹⁴Ne pry kôt ihtÿj Jeju pupun xà kĕanre atajê to, ajco amji mã me hũjarĕn to me mõ. ¹⁵Ne cormã amji mã me hũjarĕn to me hàhpan to me mõar kam, mã krãa, Jeju me ahna cator ne ma mehkôt mõ. ¹⁶Mã cute me hõmpun, mã jũa mã cute amji tĕte mehkãrã ton, mã nee cute me cupê Jeju na me hahkre pej nare.

¹⁷Mã me cumã:

— Ampo ca pry kôt amji mã meharĕn to me mõ ata? — hane. Mã me hàhhuc ne me cumãamji kĩn nare. ¹⁸Mã ihnõ japyrÿ te Cripa ita cumã:

— Pÿhàpà, xà ca apyxit peaj ne ajte Krĩpinkrĕn kamakrĩ, ne nee ate cormã amcro incrê cahhur ita kam ampo te hajÿr xà ata na hahkre pej nare? — hane.

¹⁹Mã Jeju cumã:

— Ampo? — hane. Mã cumã:

— Por Naxare jõ krĩ pĩn Jeju cator ata pê me pamã hũmre pê Pahpãm jarkwa to ihcakôc catê. Ne ampeaj kam Pahpãm jarkwa to ihcakôc, nehàpĕn xà to into hihtÿj, ne me pamã cupê Pahpãm to Pahpãm. ²⁰Mã ajte Pahpãm mã mehcajrĕn catêjê jõ pahhime, me pajõ pahhi me, cute me hũhkra mã me haxàr, mã cute ame to kĕanre. Ne cute pĩkam me inxôr, ne hũhkra me ihpar kam me wakÿre cuhhêc, ne toa mehcuran. ²¹Ne pê wa ajco cute Juta catêjê to amjipytãr na mehcãmjĩ, ne ahna me hikaj. Ne

cormã ampo te hajÿr xà ita na amcro incrê peaj. ²²Ne me ikwÿa kam pyjê nõ ma kên kre kam cute me harêt ata wÿr me pra. Ne nee cute hipêr me Jeju jÿ pupun nare. Cwÿrjapê wa me icunea amji mã me to ijapôj to me ipa. ²³Ne pyjê atajê te me amji jaxàr ne ame imã awjarê, xwahna cute me còjkwa pÿn Pahpãm jarkwa to memprar catêjê pit pupun. Mã xwahna ramã hacpÿa mã ihtÿr na ame cumã harê. ²⁴Mã me ikwÿa kwÿ te me hahpan, ne pyjê te me harênxà atajêa na cute me hõmpun, ne nee cute me Jeju jÿ pupun nare — hajÿr.

²⁵Mã Jeju te me cumã hÿjarên to:

— Pÿhàpà, mã ajte ca nee uu ne ame pamã Pahpãm jarkwa to mehcaôc catêjê jarkwa kam me gapac nare. ²⁶Pê ihtÿj Crixto ata kên na amji pupun to prãm. Ne quê ha cute amji pupun xà kèanre na amji pupun ata jahpan xà na, quê ha mehcuea jirôa pê hàmtàr cati na, hân ne mehcuea me hahkre pej — hajÿr.

²⁷Ne cute ihkrãa kam me cumã Mojxe xwÿ jô kàhhôc rûm cahyt kam ihtêm, ne ihkôt harên, ne ihkôt Pahpãm jarkwa to mehcaôc catêjê cunea jô kàhhôc kwÿ cahyt par. Ne me cumã, por ampo te ihkàhhôc kam jûmã ton xà atajêa na amji kôt harên partu.

²⁸Ne krÿ wên ata na ramã me hàhtêp, ne ramã me cator xàa kam, mã Jeju ma mehhyr ne ihtêm prãm. ²⁹Mã ma amji na ame huwahi, ne me cumã:

— Atêm nare, ne ita ri me ina ahtwÿ, nãmri ramã pyttu — hane. Mã Jeju me ipijakrut atajê cahê na hàhhuc.

³⁰Ne me cahê na hÿr, ne cute pãw pyrne to Pahpãm mã hÿrên hakryti na amji jarên jirô pê, cute ihcokjêr ne me cumã hõr. ³¹Ne cute me cumã hõr me ajkaam mã cormã mehkrã kre, mã cute cupê Jeju na me hahkre pej, me ajkaam, mã hãm xà ata kam hamre, ne ma tẽ. ³²Mã ajwar ajpên mã me harê, ne me ajpên mã:

— Pÿhàpà, pry kôt pamã ihkàhhôc krã krutre jarên to mõr ata kam, cu ramã pahna cuhkõnrea kam amji mã tohajÿr pyrentu — hane.

³³Ne me hãm pyrentu, ne ma hacpÿ mã Krÿpinkrên wÿr me pra, ne ihkôt me ipa catêjê kwÿ wÿr me cator, ne ame cumã harê. ³⁴Mã mehkwy me ipijakrut atajê mã:

— Ampeaj kam ri me pajô Pahhiti hacpÿa mã ihtÿr! He hanea Petrô te hõmpun! — hane.

³⁵Mã me ipijakrut itajê te hajÿr ne, por pry kôt cute me hõmpun, ne hanea ne ikre kam me cumãpãw cokjêr na cute me hõmpun ata na, cute me cumãharên.

Pê Jeju ihkôt me ipa catêjê mã amji pê

³⁶Ne cormã me amji mã harên kwaa kam, mãkrãa, mehcode na Jeju cator, ne cute me cumã harkwa to:

— Hàpà, mār me apeaj? Nee ca icupate ame akrihkrit nare — hajÿr.

³⁷Mā mehcunea pikrar ne mehcunea mā paa to pa. Ampo na? He ihtÿj cute me jūm carō pupun na ame amji cāmji, na ri ame paa to ame pa.

³⁸Mā Jeju me cumā:

— Ampo na mā ca ito ame amji mā ajkra, ne ame ahkrihkrit? Ampo na mā ca cormā nee me akrākam amji mā me ito hajÿr nare? ³⁹Me ijūhkra pupu, ne me ipar pupu. He ipê Jeju, pa wa. Me icupê ne me ijahkre pej, pom wa ijia xa ita. He me carō jī nare, ne nee mehhi nare — hane.

⁴⁰Ne cute ita jarēn jirō pê cute me cumāhūhkra me ipar jahkre, mā cute ihtÿj me wakÿrete caxwÿr xà xwa kre pupun. ⁴¹Ne me hakryte ma ajmār cupê Jeju na ame ahna aprā. Ne ihtÿj cormā amji mā me ajkra. Cwÿrjapê ri Jeju te mehcukij ne me cumā:

— Xà ajkī ita ri me apê ampo krēr xàhamreare? Wa ihkwÿ krē, ca ihkur na me ipupu — hajÿr.

⁴²Mā cute me cumā tep xēt nō ita kwÿ. ⁴³Mā me kam mare mā xa ne cuku. ⁴⁴Ne me cumā:

— Ne por wa ame acahê naimōr kwÿa kam, amji na ite me amā ampo jarēn atajê teito hajÿr to prām, ata na ri cute ito hajÿr. Por pê Mojxe xwÿ jō kàhhôc me, Tawi xwÿ jō kàhhôc me, mehkwy jō kàhhôc ito hūjarēn xà to awjarē atajêa na mā, cute ito hajÿr — hane.

⁴⁵Ne jūa mā cute mehkra ton, mā ihtÿj me Pahpāmjarkwa par pejti.

(Pê Ruc Jeju jarēn jicu. Pê Matew hō kàhhôc kam Jeju jarēn to hane he.)

Matew 28.16-20

Pê Jeju pjê cunea kôt ihkôt me ipa catêjê kujate

¹⁶Mā Jeju kôt me ipa catêjê te me ōxi atajê, ma, por pê Jeju Hīpójajo jō kēn to me cumā ihcakôc ata wÿr me mō. Mā curia Jeju te me cumā amji to ipipê. ¹⁷Mā cute me hōmpun ne cuna mā mehcunea pÿpÿm, ne Jeju to cute me cati prāmte me to ihcakôc pejti. Mā cormā mehkwy me amji mā: “XàJejua mōrmō ajkī?” hane.

¹⁸Mā ma Jeju me hÿrmā mō, ne me cumā:

— Inxū te imā pjê me cōjkwa kam ampo cunea to ite ihmpej xà caxuw imā carôt jōr, ne ahna imā harkwa. ¹⁹Cwÿrjapê ca ha pjê cunea kam mehkri atajê wÿr me pra, ne catyt kam ijarkwa kôt me ipa catêjê na me to, quê catyt kam ikôt me ipa. Caha Inxū me, Carō Pejti me, ipê ihkra japyr na cô kam mehcumrā. ²⁰Ne ite me amā ampo cunea to ihmpej atajê to me cumā hahkre, mār quê catyt kam ihcunea kam me hapac to me ipa. Ne wa ha itÿj amcro cuneakam me acahê na ipa, quê ha ahna ampo cunea jamre xà kam hàhhuc na, ca me to amji japackrea ne — hane.

(*Pê Matew harên jicu. Pê Ruc hacpỹ mã mã hõ kàhhôc kam harên kam to incrà.*)

Pê Húm Cati Carô Pejti jikaj na, Jeju me cumã harkwa ta

⁴⁶Mã hacpỹ mã Krĩpinkrên wÿr cute me amji jaxàr ne me cator. Mãhipêr Jeju te curi me cumã amji to ipipê, ne me cumã:
— Por pê Inxũ Cati jõ kàhhôc kamito hũjarên to:

“Quê ha, pê Pahpãm Crixto cator na me amã to awjahkre ata, ihtÿj amji pupun xà kêanre to amji pupu ne ty. Ne amcro incrê kam hacpỹa mã ihtír” hane.

— Ne hanea ne ihkàhhôc ata ito hũjarên to hane he:

⁴⁷“Hamre, quê ha cute harkwa jarên xà itajê cunea, krĩxàre cunea kôt ajcrà. Ne Krĩpinkrên kam quê ha ipicràn kam tẽ, quê ha me harkwa itajê cunea jarên pa, ne me hahkre pej, ne mehkên ton jicu, ne amji mã me Pahpãm na ahwÿ, quê hamehkên to tojnõ ne me to impej” hane.

⁴⁸— Ne me ca, ate me ijarên pej xà caxuw ca ate me ato jĩa to me ipupun, ampo atajê cunea na. ⁴⁹Ne me ca, por Inxũ Cati te ate me ijarên xà caxuw me amã carôt tÿjti to hũjahkreata, quê ha ihtÿj me amã cugõ. Nepa wa ha itÿj hanea ne me amã cugõ, ne ahna me ato ihmpej. Na ca ha ita ri, Krĩpinkrên kam, me hikaj. Quê ha ita ri cõjkwa pĩn, me amã me acarôt tÿjti ata wrÿ, ca ha me acwa — hane.

Pê Jeju cõjkwa wÿr hàpir

⁵⁰Ne Jeju te krĩ pê me to cator, ne ma amji kôt Mehkênupupunxà jõ krĩ wÿr me tomõ, ne curia ri cute mencwÿrpê hũhkra curor, ne cute mehcajrên. ⁵¹Ne cute mencwÿrpê hũhkra curor me ajkaam, macõjkwa wÿr hàpir to mõ. ⁵²Mã ame Jeju pejti na harê, ne maKrĩpinkrên wÿr cute me amji jaxàr. ⁵³Ne amcro cunea kam, ma Pahpãm to me amji kam hapacxà jũrkwa wÿr me ipa, Pahpãm mã mempejti to mehcaôcprãmte. Hamre.

JOWĀW

Te Jeju Jarēn Xà Impejti

JÕ KÀHHÔC

ÿhÿ, pê Jowāw ihkàhhôc ita to, ne Jeju na mehkwÿ cunea mã ihkujate. Ne pê cupê Jeju jarkwa na memprar catêjê nõ. Ne pê mam cupê tep pro catê, pê Jeju amji kôt ipa catê na ahna ahwÿ. Pê caku crê kam ajco Jeju kôt apu ipa, nepê Jeju te amji kam hapac xà cunea na hõmpu. Ne pê Jeju mã mehkwÿjirôa pê Jowāw kîn. Ne hõ kàhhôc kam cute pjê ita kam Jeju te mõr reriamã cute ampo kwÿ ton, ne ihkwÿ jarēn xà itajê kwÿ na ihhôc. Ne hõ kàhhôc ita kam cute, me pahte ampeaj kam Jeju to amji mã me pahhimpej tome pamã hahkre. Ne ampeaj kam ri cupê Pahpãm kraa to Pahpãm kra, ne taa mã ri Pahpãm cahê na me papa rohnÿtti mã na me pamã to hahkre. Ne hõ kàhhôc japyrÿ pê **Jowāw Te Jeju Jarēn Xà Impejti Jõ Kàhhôc** (Jowāw).

Jeju pê Pahpãm

1 ¹⁻²Mam, ampo cunea cumam, pê ramã me pajõ Pahhiti ipa. Ne me pamã cupê Pahpãm cakôc xà me harkwa. Ampo na? Taa mã ri me pamã Pahpãm te amji kam hapac xà me, incaca xà to ipipê to ipa. Ne pê Pahpãm cahêa na maam ajco apu ipa ne me ajpêan. ³Na pê me pajõ Pahhiti Hũm Cati jarkwa kôt ampo cunea ton partu, pê nee iràn xà na, ampo hũhkra kaj na, amjia kôt amji ton nare.

Pê Jeju me pamã Hũm Cati jahkre

⁴Na ri cupê me pahte amji kam me pajapac xà cunea xakat. Ne pom hãn ne pyt pjê cunea cujro, cu hàhcujro kôt me ampo cunea pupu, ita na mã me pajõ Pahhiti me pahcunea mã pahte mehahkre pej xà gõ, mãr cu ihcunea na me Pahpãm pê Hũm na me hahkre pej ne me hõmpu, ne cahê na me papa rohnÿtti mã. ⁵Pyràc pej na mã me pajõ Pahhiti pê me

pahcujro xà, ata kôt cu meHūm Cati jahkre pej ne me hōmpu. He jūwÿr quê mehkên ton catêjê nō, pê ihhêj rūm awcapátkô kam mehkrīcatêjê atajê kwÿ, me pahte me Pahpām pupun nare prāmte, me papê cute me pahcujro xà ita pro ne cupĩ.

⁶Ne pê me pajō Pahhiti cator xwÿjrea na, mam Pahpām me pamã harkwa na imprar catê pê Jowāw te cô kam me cumrār catê ata kujate, cute me pamã me pahcujro xà pê me pajō Pahhiti ita to hūjarēn, ne to hahkre xà caxuw. ⁷⁻⁹Ne pê Jowāw xwÿ pê me cumrār catê ata nee ihcakôc xà to:

— Ipê ihhêj rūm me acujro xà — hajÿr nare, ne cama harkwa to:

— Quê ha cormã me pamã me pajō Pahhiti cato, ata pê ri ihhêj rūm me pahte amji kam me pajapac xà cunea cujro xà, pjê cunea kam. He cupêa ri quêt me pahcujro xàa to mepahcujro xà — hane. Ne pê Jowāw me pamã me pajō Pahhiti to hahkre, pahte me hahkre pej ne to amji mã me pahhimpej xà caxuw, pê me pahwÿr cato.

Quê ha jūm te Jeju to amji mã ihhimpej na, quê ha cupê Pahpām kra

¹⁰Ne me pajō Pahhiti pê Hūm cakôc xà me harkwa ata pê mam ampo cunea to, ne taa mã pê pjê ita wÿr wrÿ ne apu ipa. Mã xãmte pjê kam mehcunea te nee cupê ampo cunea ton catê na me hahkre pej nare. ¹¹Ne ma Juta catêjê jō pjê wÿr cator, mã nee ajte cute ahna me amji caxār nare. ¹²Mã mencreêre pyxitre te ahna me amji caxār, ne cumã me amjjjōr, ne toa amji mã mehhimpej to me ipa, ne me cumã:

— Apê Pahpām kraa to ihkra — hajÿr. Cwÿrjapê ri Hūm te ihtÿj ihkôt me to amji kra.

¹³Cu me paxūmre nee ame pahkra ton to hajÿr nare, ne ajteare mã me. Quê ha me paxūmrenō mã ihkra prām, quê ha xa ihprō nō me hikwa, ne ajpên kam mehkra, quê ha cormã me cumã ihkra. Ne Pahpām te nee hajÿr nare. Quê ha cama, por jūmjê me pajō Pahhiti to amji mã mehhimpej atajê mã harkwa to:

— Imã me ato amji kra to prām. Na wa ha amã Icarō Pejti kôt, ate amjikam gapac xà tuw pejti gō, mār ca apê ikra — hane. Pea quê ha jūmjê atajê amji to Pahpām kra pyrentu.

¹⁴Ne pê me pajō Pahhiti pê Hūm Cati cakôc xà me harkwa ata, me pahwÿr wrÿ, ne me pajia na amji to, ne ajco apu ipa. Pê wa me hōmpu. Pê cupê Hūm mã ihkra pyxit peaj ata. Cwÿrjapê ri carôt tÿj me Hūm carôt tÿj pipēan, ne imej me Hūm pej pipēan. Na ri cute Hūm cuxà amji mã me pajapêti to cator, ne cute me pahpytār catê na amji ton. Ne cupê Hūam, ne nee apu ihhêj xi jarēn nare, ne quêt catyt kam, ampeaj kam mehcunea mã Hūm Cati jarkwa to hūjarēn to ipa.

¹⁵Ne pê Jowāw pê me cumrār catê ramã ita na me cumã to hūjarēn to hane he:

— Pom Jeju ita pê Pahhiti, pê wa ramã me amã to icakôc ne harên to: “Taa mãquê ha hapu na ikôt cator cakrô, ijirôa pê cati. Ampo na? He pê ramã ipÿm xwÿjrea na ajco apu ipa, na ca ha ijirôa pê amji mã mehûpa” — hane.

¹⁶Ne Jeju mã ri ampeaj kam me pahcunea caprĩ, ne cumã me pahkĩn. Cwÿrjapê ri hõtpê me pamã ampo pej cunea ton to ipa rohnÿtti mã.

¹⁷Ne pê rÿ pêa mã Mojxe xwÿ ramã me cumã Pahpãm harkwa jirên xà atajê gô, ne pyxit peaj to mecumã hahkre. Ne Jeju nare, quêt ihtÿj cumã me pahcaprĩ, mã me pahtehcajpa. Ne me pamã Pahpãm jarkwa pejti pê ampeaj kam ata to hahkre. ¹⁸Ne rÿ jũ caxuw jũm te pjê kam Pahpãm pupun nare. Mã ihkra pejti pyxit peaj ata pê Hũam pyrác ne cume ipipëan. Na pê cu hĩa na me hõmpu, ne taa mã riHũm cahê na amji kôt me pamã Hũm to hahkre, ne ihkôat cu ha me hahkre pej.

Pê Jowãw pê me cumrãr catê, ramã Jeju cator xwÿjrea na mehcũmpej

¹⁹Mã Kripinkrên kam Juta catêjê jô pahhi kwÿ te Jowãw te me cumrãr catê wÿr, Pahpãm mã mehcajrên catêjê me, Rewi catêjê pê Pahpãm jũrkwa jamãr catêjê me, mehkujahêc, cute me Jowãw cukij prãnte. Mã cute mehcukij to:

— Me anô mã ca? — hajÿr. ²⁰Mã Jowãw te hirãa pê me cumã amji jarên to:

— Nee ipê, por pê Pahpãm mehkwy mã me hũtar catê to awjahkre ata nare — hajÿr.

²¹Mã hipêr cute mehcukij ne me cumã:

— Ne mër me anô mã ca? Xà ajkĩ apê Erij xwÿ mã ca hacpÿa mãatĩr? — hajÿr. Mã Jowãw te me cumã harkwa to:

— Quê, ipê jũm ata nare — hajÿr. Mã me cumã:

— Xà apê, por pê Pahpãm me imã harkwa to ihcakôc catê to awjahkre, wame hikaj ata mã ca? — hane. Mã Jowãw me cumã:

— Quê! Pa nare! — hane.

²²Mã hipêr cute me Jowãw mã harkwa to:

— He me anô mã ca? Me imã amji jarê. Wa me gahkre pej ne ma hacpÿ mã cute awÿr me ikujahêc atajê wÿr me pra, ne me cumã garê — hajÿr.

²³Mã Jowãw te me cumã Ixaj xwÿ jô kàhhôc kôt harên to:

“Ipê, por pô kam me hamreare kam me cumã ijũjarên to hajÿr to ipa catê ata he:

‘Me pajô Pahhiti mã me hõ pry to ihcuhtac ne, mãr quê ihtÿj ihkôt môr pejti ne’ hajÿr.

Jĩkjê na quê ha mehcunea cator xà ata caxuw cute me amji kam hapac xà to impejti to me ipa, ne catyt kam me ipa” hajÿr.

²⁴Ne por pê ame Jowãw cukij atajê pê Parixêw catêjê kwÿ. ²⁵Ne hipêr cute mehcukij to:

— Pom nee apê, por pê Pahpām me pamã jūm to awjahkre ata nare, ne nee apê Erij xwỳ ata nare, ne nee apê Pahpām jarkwa to ihcakôccatê wa me hikaj ata nare, nō na mã ca atỳj cô kam mecumrã? — hajỳr.

²⁶Mã Jowāw te me cumã harkwa to:

— He wa cô cacrô kam me cumrã, ne por me acote na quêt jūm apu ipa ata, ca nee rỳ ate me hahkre pej nare. ²⁷Ne taa mã quê ha ijakàn pê cator cacrô, wa nee ite hūpa cahi ne cupê hō parkà tūm caxàr xà caxuw ipej nare. Ampo na? He taa mã riijirôa pê cati — hajỳr.

²⁸Hōhō, ita pê hane, ma Cōhnameirêrxà jō krī kam, Cōpijapjêr jō cōjīkjê rūm. Por pê curi Jowāw ajco apu cô kam mecumrār to ipa ata ri.

Pê Jowāw pê mehcumrār catê me cumã Jeju jahkre

²⁹Mã amcro nō na Jowāw te amji wỳr Jeju mōr na hōmpun, ne me cumã harên to:

— Me Pahpām jō Caràcahàcre Kra ca me hōmpu he, ramã ajpên mō he. Ne taa mã quê ha pjê kam me pahcunea kên jūhta ne to hamre! To hanea, pom cu pahte amji kam me pajapac xàa na, me pahkên jahpan xà na, Pahpām mã me pajàmjōr xà caxuw me ampo pê me pahkritxwỳ cura, ne me cumã to amgō he. Ita jīkjê na, quê ha me pajaxà kam ty, ne me pahkên cunea to hamre. ³⁰Wa ite ramã catyt kam me amã to icakôc to: “Quê ha cormã ikôt hapua na jūm xūmre cato ata, quê ha ijirô pê cati. Ne ampo na mã ijirôa pê cati? Nee mã ampo na ijirôa pê cati nare. He pê quêt ramãixwỳjrea na apu ipa, cormã ipỳm nare kam” hajỳr. ³¹Pê wa nee cupê jūm te hajỳr xà ata na hahkre pej nare cacrô, pê wa itỳj cô kam ihcumrã. Ne nee mã pê wa ampo na apu to hajỳr nare. Ite Juta catêjê mã cupê jūm te hajỳr xà ata nato ipipê to hajỳr prãmte, pê wa to hane.

³²⁻³³— Ne pê wa nee cute hajỳr xà ata na hahkre pej nare, mã Pahpām te cô kam mehcumrār catê na imên ata te imã harên to: “Ca ha Icarō te tutti na amji jahkre, ne cōjkwa pīn ahpar mã pjê wỳr tē, ne jūm xūmrecwỳrpê hàhhuc na hōmpu ata, quê ha cupê me cumã Icarō Pejti jōr catê. Mār quê Icarō Pejti ata me cumã ite amji kam ijapac xà to hahkre” hajỳr. Wa irīt, ne ite cōjkwa pīn Pahpām Carō Pejti te tutti na amji jahkrene ajpên ihtêm, ne Jeju cwỳrpê hàhhuc na hōmpun. ³⁴Ne ite hōmpun xà ata kôt wa ite hirãa pê me amãJeju pê Pahpām kra na harên — hajỳr.

Pê Jowāw pê mehcumrār catê kôt me ipa catêjê me Jeju pynã

³⁵Mã hipêr amcro nō na Jowāw curia apu ihkôt me ipacatêjê pijakrut atajê me, ame ipa. ³⁶Mã hipêr cute me ahnaa Jeju mōr na hōmpun, ne me cumã harên to:

— Nãmhã, Pahpām jō Caràcahàcre Kra apu mōhe! Cupêa ri me pahkritxwỳ, ne taa mã quê ha me pahkên jahpan xà na ty — hajỳr.

³⁷Mã ihkôt me ipa catêjê pijakrut atajê te mempar, ne ma me Jeju pynâr ne ihkôt me mō. ³⁸Mã hacpỹ mã Jeju rīt, ne cute me hōmpun, ne mehcukij to:

— Ampo japên to mã ca ikôt ame mō? — hajỹr. Mã me cumã:

— Ikrã tũmti, jō ri mã ca akrĩ? — hane.

³⁹Mã Jeju me cumã:

— Ajpên ikôt me mō, ne imã me ikrĩ xà pupu — hane. Mã ma ihkôt me mō, ne cute me cumã ihkrĩ xà pupun. Ne curia pyt xà wỳr, cahê na ame mō, pê ramã me ahna pyt to mō.

⁴⁰Pê me ajkruz ne Jowāw te Jeju jarên na me kampa, ne me Jeju pynã atajê nō pyxit ata japrỹ pê Antre, ne cupê Ximāw Petrôt te amji to hapu na kjê. ⁴¹Ne ma Antre ihtēm pyrentu, ne mam ihtō kà Ximāw wỳr cator ne cumã hũjarên to:

— Wa ite, por pê Pahpãm me pamã me pajō Pahhiti pê Mexij to awjahkre ata na icator — hane. Por pê Juta catêjê jarkwa nahaprỹ Mexij, ne Crec catêjê jarkwa na me cumã haprỹ to Crixto ata. Ne pê haprỹ pijakrut itajê kôt harên xà pê “Cute capi ne ahna hãm” hane.

⁴²Ne ma Antre te ihtō kà japrôr ne to mō, Jeju wỳr. Mã Jeju te Ximāw pupun ne cumã:

— Gaprỹ te Ximāw, ne apê Jona kra, ne hamre ita caxuw quê ha gaprỹ pê Xepa — hajỹr. Pê Crec jarkwa na Xepa ita pê Petrô, ne ihkôt harên xà te “Kên”.

Pê Jeju Pirip me Natanew te ihkôt me ipa xà na me cumã akij

⁴³Ne amcro nō na Jeju te ma Hīpôjajo jō pjê wỳr mōr to amji kam hapac. Ne mōr xwỳjrea na cute hũmre nō japrỹ te Pirip ita cajpar ne cumã:

— Ajpên ikôt mō! — hajỹr.

⁴⁴Ne Pirip ata pê Tep jō krĩ kam mehkwy nō, por pêcuri Antre me Petrô ihkrĩ atajê kwỳ nō. ⁴⁵Mã Pirip apu hō kwỳ nō pê Natanew japê, ne cute ihcajpar ne cumã:

— Wa ite, por pê Mojxe xwỳ me pahte amji kam me pajapac xà jō kàhhôc kam, jũm na ihhôc ata na icator. Ne cupê, por pê hanea ne Pahpãm jarkwa na mehhôc catêjê ahna mehhôc ata! Ne cupê Jeju, ne cupê Naxare jō krĩ kam, Joje ihkrĩ ata kra — hajỹr.

⁴⁶Mã Natanew te ahna ihcukij to:

— Xà quê ajkĩ ihtỹj Naxare jō krĩ pĩn ampo pejti cato? Jũ wỳr quê ampo pej cato! — hajỹr. Mã Pirip cumã:

— Ajpên mō ne hōmpu mã — hane. Mã ma ihkôt Jeju wỳr tē.

⁴⁷Mã Jeju te ajpên Natanew te hỹrmã mōr na hōmpun, ne mehkwy mã to hũjarên to:

— Me hōmpu he! Ajpên hũmre pê quêt catyt kam ipa catênô ata mō he. Ne nee quêt ihhêj xi nare, ne cupêIxaher catêjê nōa, ne impejti! — hajỹr.

⁴⁸Mă Natanew te impar ne cumă:

— Jū mā mā ate ne ijahkre pej? — hajÿr. Mă Jeju cumă:

— Wa Pirip te gaprŏr xwÿjrea na ite apupun, ca ihmat ri pĭxŏ pàr krac ri jÿ — hane.

⁴⁹Mă Natanew Jeju mă:

— Ikră tŭmti, apê Pahpăm kraa to ihkra! Ne wa itÿjapê Juta catêjê jŏ Pahhiti na amji mā ato hane! — hane.

⁵⁰Mă Jeju cumă:

— Xà wa ite ihmat ri pĭxŏ pàr krac ri ajÿr na apupun ne garĕn xà ita kŏt mā cacormă ate ito amji mā ahimpej? Ca ha cormă jŭ caxuw quĕt ampo ita jirŏa pĕ ihnŏ catia ata pupu — hane. ⁵¹Ne cute mehkwȳ mā harĕn to:

— Wa ha ampeaj kam me amă awjarĕ, ca ha atÿj cŏjkwa teamji jihĕ mĕn na me hŏmpu, ne ajpĕn iwÿr Pahpăm mā hăpĕn catêjê te me irŏrŏc, ne hacpÿ mā me hăpir na me hŏmpu. Ampo na? He ipĕ cŏjkwa kam me Ahăkă cati ata wa, ne cama ite me hŭmre na amji ton ne me awÿr iwryc — hajÿr.

Pĕ Jeju cŏ kam pĭxŏ cacŏ xÿre to

2 ¹⁻²Ne ahna amcro pijakrut jirŏ pĕ mā ri cute me hikwa tuw catêjê nŏ jŏ amji kĭn jarĕn par, Tĕtĕc jŏ krĭ wĕn kam, Hĭpŏjajo jŏ pjĕkam. Mă cute amji kĭn ata caxuw me Jeju me, me ipĕ ihkŏt me ĩpa catêjê jator. Wa ma ihwÿr me mŏ ne me icator. Mă ramă curia Jeju menxi apu mŏ. ³Mă amji kĭn ita cahti ri ampo pĭxŏ cacŏ xÿre ata jamre. Mă Jeju menxi te pĭxŏ cacŏ jamre na hŏmpun, ne ma ihcămter wÿr tĕ ne cumă:

— Ikra, hamre, me cupĕ pĭxŏ cacŏ jamre — hajÿr.

⁴Mă Jeju te impar ne cumă:

— Ampo caxuw mā ca inxĕ apu imă ita jarĕ? Nee ate imă ita jarĕn xà hamreare, wa ramă ite hahkre pej. Ne cuna mā cormă nee ite ampoitajĕ nŏ ton xà kam hăhhuc nare — hajÿr.

⁵Mă ma inxi amji kĭn jŏ pahhi mā me hăpĕn catêjê wÿr tĕ, ne cute me cumă:

— Ca ha atÿj ikra te ampo na me amă hŭjahkre xà atajĕ to me cumă — hajÿr.

⁶Pĕ curia kĕn te pot catia to cati te xĕj atajĕ ihcuuhĕ. Ne ihkwÿ ihtÿj cŏ to rit to ŏjtĕnta ne cucwa, ne ihkwÿ ihtÿj cŏ to rit to xĕj ne cucwa. Pĕ Juta catêjê ihtÿj ajco cŏ ata to me amji cuhhŏ, cute to me amji pyrăc xà ata kŏt.

⁷Mă ahtŭmre mă, Jeju amji kĭn jŏ pahhi mā me hăpĕn catêjê atajĕ wÿr tĕ, ne cute me cumă harkwa to:

— Cŏ to me pot itajĕ to me hipu partu — hajÿr. Mă ihtÿj harkwa kŏt cute me to hipu partu. ⁸Jirŏ pĕ mā ri cute me cumă harkwa to:

— Caxi me cŏ ita crire ne me haxà, ne amji kĭn jŏ pahhi wÿr me to tĕ, ne me cumă agŏ, quĕ capi — hajÿr.

⁹Mã jūm ita te ihkwỳ jaxàr, ne hÿrmã to ihtēm kwỳa kam, mã ramã cute pìxô cacô na amji ton. Mã cute amji kìn jō pahhi mã hōr, mãcute capi, ne nee cute cō te ampo pìxô cacô xỳre na amji jahkre ata na hahkre pej nare. Ne nee cute jū rŭm cator xà ata na hahkre pej nare. Ne cumã me hàpēncatêjê mã ri quêt hahkre pej. ¹⁰Na ri amji kìn jō pahhi te hikwa tuw catê ata na hàhwỳr ne cumã:

— Pÿhàpà, ajte ihhêj ne mam ate me cumã kyre pê pìxô cacô impej ata jōr, mã cute ame to ihkōm. Jirō pê mã ca ate cormã me cumãimpeaj ita jōr. Ne ihhêj ne ate pahte me to amji pyrác xà ata to gâhpan, ne ate hicu xà caxuw impejti ata juwahi — hajÿr.

¹¹Hōhō, pê Jeju carôt kôt ampo pihho ton kam to tēm to hane, ne ajco carôt to ipipê toipa, Têtêc jō krī kam, Hípôjajo jō pjê kam. Ne pê carôt tÿjti impejti ata to me cumã ajpê. Pê wa me ipê ihkôt me ipa catêjê, itÿjamji mã me to ihmpej, ne mempar pyrentu.

¹²Ita jirō pê mã wa me ipê ihkôt me ipa catêjê me, Jeju me, inxi me, mehkjêjê me, ma Capernam jō krī wỳr me mō, ne curia wa ite ijōtpême amji to amcro kwỳ kujahêc.

Pê Jeju Hŭm Cati jŭrkwa pê ihpore to hàhpan catêjê cato

¹³Ne Juta catêjê jō amji kìn japrÿ te, me Hakren xà jō amji kìn jō amcro ata, pê ramã cator xàa kam, ne ramã hŭ na pire mã. Ne amji kìnata pê, por pê Ejit jō pjê kên pìn, menquêtjê cator xà atajê jō amji kìn. Na wa ma Jeju me Krīpinkrên wỳr mō. ¹⁴Ne Pahpãm to me amji kam hapac xà jŭrkwa kam, Jeju te jŭmjête carà cahàcre hōhti me, pryti me, tutti to ihporena ame hàhpan na me hōmpun. Ne hanea ne cutejŭmjê atajê te mehkrī ne me hàhtōa mã ihpore to hàhpan na me hōmpun. ¹⁵Ne ame kam incryc, ne me caxuw cute pàrcuxê to mehcahhyr xà ton, ne pō mã mehcunea to cator, ampo atajê mea mã. Ne cute ihpore to me hàhpancatêjê pê ihpore pyxwỳr xà mên, ne pjê kam hō pore jaxwỳr partu. ¹⁶Ne cute, por ihpore na me tutti to hàhpan to me ipa atajê mã harkwa to:

— Ikre ita pê ampo itajê cunea to me gapôj partu! Ne nee ca Inxŭ jŭrkwa kam apu amji mã ampo itajê to ihpore na me gâhpan to me apa nare. Xà aracri Inxŭ jŭrkwa ita pê ampo to ihpore na kam me hàhpan xà? — hajÿr.

¹⁷Cwÿrjapê wa me ipê ihkôt me ipa catêjê te Pahpãm jō kàhhôc kam ita to hŭjarên na me to amji japackre, pê ramã harên to:

“Imã Pahpãm to amji kam me hapac xà jŭrkwa ita kīan to ihkìn.

Na wa nee kam ampo kên xām na hōmpun prām nare, ne wa ampo pej to pit mã kam me amji japackre” hajÿr.

Pê pahhi catêjê Jeju te ampo pihho catia ton na mehcukij

¹⁸Mã Juta catêjê jō pahhi kwỳ te ita naharên par ne mehcukij to:

— Jūm te mǎ, ate ame to hajÿr xà ita na, amǎ harkwa? Jūm te mǎ ahna amēn? Xà ajkī Pahpām te mǎ ahna amēn? Mēr hōhō, acarôt catipahtÿjti ita to me imǎ ajpē, wa ha ahna me apupu, ne cormǎ Pahpām te ahna amēn na me gahkre pej — hajÿr. Mǎ Jeju te me cumǎ amji jarēn to:

¹⁹— Ca ha me Pahpām jūrkwā ita hu, wa ha hacpÿā mǎ amcro incrē peaj kāmhām, ca ha cormǎ ihkôt Pahpām te ahna imēn na me ijahkre pej — hajÿr.

²⁰Mǎ cute me Jeju mǎ ikre jarēn to:

— Pē me Pahpām to pahte me amji kam me pajapac xà jūrkwā ita to me hāpēan to me caku to cwarēnta ne ihkôt xēj, ne me hipēj, nō na mǎ ca ajte amcro incrē peajkam hacpÿā mǎ ate hām na amji jarē? — hajÿr.

²¹Por pē Pahpām jūrkwā to Jeju ihcakôc ata pē nee kēn te ikreata nare, ne amji jīa to pē me cumǎ ihcakôc. ²²Ne pē hacpÿā mǎ ihtīr, pē wa cormāhūjarēn xà ata to me amji japackre, ne itÿj me ihkàhhôc kam Pahpāmjarkwā kampa, ne Jeju cakôc xà na me kampa.

Pē Jeju nee amji mǎ me hàhtôti atajē to hajÿr nare

²³Pē Jeju me Hakren xà jō amji kīn na Krīpinkrēn kam apu ipa xà ata kam, pē me hàhtôa ne ihtÿj cupē Pahpām kra na amji mǎ me to hane. Ampo na? Nee mǎampo na nare. Pē ajco Jeju ihtÿj Hūm carôt kôt, rÿ jū caxuw, jūm te ampo cupahti pihho pupun nare atajē to na pē. ²⁴Cakrô pē nee Jeju cormǎ amji mǎ me hàhtôti atajē to taa mǎ nare. Ampo na? Pē ajco mehcunea mǎ cute me amji kamhapac xà pupu, ne me hahkre pej to ipa na pē. ²⁵Ne pē jūm te cumǎ me harēn nare kam, pē ajco taa cute me amji kam hapac xà na me hahkre pej.

Pē Pahpām te me pahto ipintuw xà pē hacpÿā mǎ me pahpÿpÿm xà pyràac

3 ¹Ne pē hūmre nō japrÿ te Nicotem ata pē Jutacatējē jō pahhi na mehkwy nōa, ne cupēParixēw catējē kwÿ nō, ne cupē Mojxe xwÿ jō kàhhôc to me cumǎ hahkre catējē nōa. ²Ne ma caxwa ri Jeju wÿr mō, cute hōmpun, ne cumāihcakôc prāmte. Ne hÿrmǎ cator ne cumǎ:

— Ýhÿ Jeju, wa ite, Pahpām te me imǎ apē ampo to hahkre catē na akujahēc na gahkre pej. Ampo na? Ca atÿj Pahpām carôat to ampo pihhoti jàhtôa ton to apa atajē, ihtÿj Pahpām carôt tÿjti toipipē to mō. Jū wÿr qué Pahpām jūm kujahēc nare, qué jūm ampo itajē nō to — hajÿr.

³Mǎ Jeju cumǎ:

— Ýhÿ, wa ha nee amǎ ihēj xi jarēn nare. Qué hajūmjē mǎ Pahpām himpej xà mǎ mencjēj to prām na, qué ha xa hacpÿā mǎ amehpÿpÿm — hajÿr.

⁴Mǎ Nicotem cumǎ:

— Pÿhàpà, jū wÿr qué ha ramǎ jūm kàhtu ataamji mǎ hamǎ, nehacpÿā mǎ inxi tu mǎ axà ne hipēr ihpÿm — hane. ⁵⁻⁶Mǎ Jeju te cumǎ ihkôt harēn to:

— Ỹhỹ, wa nee apu amã ihêj xi jarên nare. Quê ha jũmjê te Pahpãm himpej xà mã incjêj prãm na, quê ha xa hacpỹmã amehpỹpỹm, jirô pê mã quê ha cormã me acjêj. Pêca mam gĩ to, anã tu kam cô ata kôt apỹm, ne apêanã kra. Jĩkjê na, ca ha hipêr Pahpãm Carô Pejti kôt, acaxwỹn carô to amji mã intuw, ne apê Pahpãm kra.

⁷— Nee ca ite amã hacpỹa mã, me acunea pỹpỹm na me garên ita to amji mã ame apikrar nare. ⁸Ampo na? He Pahpãm Carô Pejti kôt amehpỹpỹm xà ata pê ihhêj rũm kôc pyrãac. Jũ wỹr ca hajũ kam kôc te hãpêr xà na amji mã prãm xà ata wỹrhãpêr na hõmpu. Ca ha me hãmccoco pit kampa, ne nee hõmpun nare. Ne nee ca ha jũ pĩn cator xà me, jũ kamihtêm xà ata na hahkre pej nare. Jĩkjê na mã, Pahpãm Carô Pejti jãpên xà pê hũrãac. Ne nee quê ha jũm Pahpãm Carô Pejti te jũm to amji mã ihkra xà ata na hahkre pej ne hõmpun nare — hajỹr.

⁹Mã Nicotem cumã:

— Jũ mã quê ajte ita, ne hane? — hane.

¹⁰Mã Jeju cumã:

— Pỹhãpã, pom apê Juta catêjê mã ampo to hahkreatê ita! Nõ na mã apê ampo ita jahkre kêatre? ¹¹Wa ha nee amã ihêj xi jarên nare. He wa amcro cuneakam me akwỹ mã, ite ampo jahkre pej itajê to hahkre to ipa. Ne hanea ne ite ito jĩa to ampo pupun atajê pupun xãa kôt, wa me amãharên to ipa cakrô, ca ajte nee cormã ate me ipar nare. ¹²Ne wa ramã ite me amã pjê ita kam ampo te jũ mãnxã ata na harên, ca nee ajte ate ikam me gapac nare. Itakam, ca ha pijamã ite me amã cõjkwa kam ampo jarên xãatajê cunea na me ikampa? Me gũpar nare ita kam, ca ha nee me ikam gapac nare. ¹³Ne rỹ jũ caxuw cõjkwa wỹr jũm jãpir ne hacpỹne cute amji jaxãr nare. Ne pa nare, he ipê kỹj pê, cõjkwa kam me Ahãkã, cwỹrjapê wacurũam ite me hũmre na amji ton ne iwrỹc.

Cu ha amji mã Jeju to pahhimpej na, cu ha Pahpãm cahê na amji to me ajpa

¹⁴— Ne pê Mojxe xwỹ mat ri, põ kam mehamreare ata ri, wakỹre te cagã to, ne pĩ na cuxô. Ampo na? Nee mã pê ampo na wakỹre te cagã ata xôr nare. Pê cagã ajco me cãmxa, pê me wakỹre te cagã ata pupu, nehacpỹa mã mempej. Ita jĩkjê na wa ha hanea. Quê hajũ caxuw me ito wakỹre te cagã ata pyrãac, ne me icuran xà caxuw, pĩ na me ixô. ¹⁵Quê ha jũm ito cagã ata ne ipupu, ne ito amji mãihhimpej, quê ha ihtỹj ihtyc xà jirô pê ampo kên catia ata pê amji pytà, nePahpãm cahê na amji to ipijapar rohnỹtti mã.

¹⁶— He ampeaj kam Pahpãm mã pjê kam mehcunea ame ipa itajê kĩn, mã cute me cumã, ipê cumã ihkra pyxit peaj kĩnti atato hũjahkre ne hõr, ne pjê wỹr ajpên ikujahêc. Mãr quê cute ito amji mã mehhimpej atajê me ty, ne nee mehtyc tu ne Pahpãm kaj na ame ipa nare, nequêt hacpỹamã mehtĩr, ne Pahpãm cahê na me ipa rohnỹtti mã. ¹⁷Pê nee Inxũ imã harkwa

to: “Cute mehkên ton jahpan xà na, pjê wÿr wÿr ne curê mã me amẽ” hajÿr nare. Ne quêt cama imã: “Ca ha wÿr ne mehkên pême hÿtà” hane.

¹⁸— Na quê ha jÿmjê te, ipê Pahpãm kra na amji mã ito mehhimpej na, quê ha nee Inxũ cute cuna mã ihkênton xà atajê to me cumã ihcakôc, ne curê mãme irên nare. Ne por nee amji mã me ito mehhimpej nareatajê ri, ramã curê mã cute me mên na, me ahna me amji ton. Ampo na? Nee cute amji mã me ito ihhimpej nare, na quê ha curê mã me cumê.

Pê Jeju me hàhtôa atajê mã mehkên jarên na cumã to prãm nare

¹⁹— Cu ha ampo kên tÿmti ata wÿr me pajàhcujro xà nõ, pôc pejti ata to mō, ne me to ihtÿmti ata pupun pyrentu. Jìkjê na ri ipêpjê kam mehcunea jàhcujro xà. Ampo na? He wa itÿj me cumã cute mehkên ton xà atajê jarê, mã me hōmpu, ne cute me hahkre pej xàita caxuw wa me hÿrmã iwÿc, ne amehcujro to mō. Mã ma mehkwy apu ite mehcujro ita na mehcaca, ne me cumã amji kam awcapàtkôti ita na pit mãme to prãm. Ampo na? Awcapàtkô ita kam ri hân ne ihtÿj ame ampo kên ton to me ipa, cwÿrjapê ri ma ame icaca. Ne quê ha, cute meicaca catêjê cute me ampo kên tonatajê jahpan xà na, Pahpãm ame to kêanre ne.

²⁰— Ÿhÿ, por awcapàtkô kam ame ampo kên ton to me ipaatajê mã amji kujro prãm nare. Ampo na? Cute ampo kên ton atajê na me hahkre pej cupate ri ma ame amji kujrocaca. Cwÿrjapê ri mehkên catêjê ipê ampÿa mã ame ipa. ²¹Ne por catyt kam Pahpãm jarkwa kôt me ipa atajê ri, ijàhcujro imejti ata kam ihtÿj ame ipa xà. Mâr quê mehcunea catyt kam, Pahpãm jarkwa kôt me ipa na me hōmpu, quê nee ame ampo kên ton nare, na ri ihtÿj ame ipa. Na ri hanea ne ihtÿjmempejti catêjê atajê ikôt me ipa — hane.

Jowāw te mehcumrār catê pê Jeju jarkwa to imprar catê

²²Ita jirô pê mã, wa ma Jeju me, me ipê ihkôt me ipa catêjê me, Krîpinkrên pê me icator, ne ma pô pê Juta jô pjê kam ame ipa. Ne curiame cahê na ite jÿ mã amji to me amcro ton, wa itÿj harkwa kôt cô kam amehcumrār to me ipa. ²³Pê hanea ne ihtÿj Jowāw, cô japrÿ te Enō pê Xarim jô krî na pire mã xa ata kam, cô kam amehcumrār to mō. Ampo na? Ampeaj kam quêt curi cumã cô cati. ²⁴Ne pê caxuw cormã nee me Jowāw jaxàr nare.

²⁵Mã amcro nõ na Jowāw kôt me ipa catêjê kwÿ atajê me, Juta catêjê jô pahhi kwÿ te ajpên mãn kam mehtêm, Pahpãm mã cute meamji cÿmpej xà na cô kam me amji cumrār xà ata ri. Ne nee jÿmjê te me ajpên par pej nare. ²⁶Cwÿrjapê ri ma Jowāw te mehcumrār catê pê me hō pahhi ata wÿr, meamji to mō, ne cute me cumã amji jarên to:

— Me ijô pahhi, wa ite me amji cÿmpej xà ita kam, nee ite me ampo par pej nare, ne me ikrã pictor tu. Ne por pê ca jÿm xÿmre to me imã

awjarẽ ata, ihtỳj mehcũmpejprãmte, acuxà Còpijapjêr jô cô kam ame cumrâr to mō, mã quêt mehcunea ihtỳj hỹrmã me pra! Ne jũ mã mã cu ha ajte me? — hajỹr.

²⁷Mã Jowāw te me cumã harkwa to:

— Nee ca ita to ame amji kam gapac nare. Còjkwa kam Pahpãm te ahpÿanre na me hũmremã me hàpên xà jôr par. ²⁸He ijàpên xà ita pê Jeju pê hũmre ata mã ite pry to impejxà, mâr quê pry ata kôt me hàhtôa ne ihwÿr meapkjê. Ne nee ipê, por pê Pahpãm me pamã to awjahkreata nare, ne ite amji jarên xà na ramã ate me ipar. Ne hõ pry to ite cumã impej xà caxuw pê wa mam icato. ²⁹Ne quê ha jô ri me hàhtôa mã jũm pyxit peaj neme hirôa pê impej, quê ha hỹarmã me pra. Ita jĩkjêna, quê ha jũm hikwa tuw, quê ha híxi impjên ata wÿr pit mã tẽ, ne nee impjên jô ikwÿ nō atajêwÿr ihtêm nare cakrô, quê ha ihtỳj hũ na hõ ikwÿ nō atajê ame hakry. Ita jĩkjê na wa itỳj Jeju jũ na ijakry. ³⁰Na quê ha ihtỳj quêt Jeju ipicamên to mō, ne cati to mō, ne pa nare, wa ha ihkĩnte cama hacpÿa mã icri to mō.

³¹— Ne Jeju quêt còjkwa pĩn cator ata riijirôa pê cati. Ne pa nare, pê wa ihkĩnte pjêita kam icato, ne imã pjê kam ampo itajê to pit mã icakôc jahkre pej. ³²Ne taa mã nare, quêt cute còjkwa kam ampo par nehõmpun atajêa to hãn ne ihcakôc to ipa cakrô, mãajmâr nee jũm te ahna amji caxâr nare. ³³⁻³⁴Ne menchrêre te cute ampo jarên xà atajê na me kam hapac, ne ihtỳj ampeaj kam cute me Pahpãm catyt kam ihcakôc ata kam me hapac. Ne Pahpãm te ri ihkujahêc na, cute me hahkre pej. He ampeaj kam ri Pahpãm cakôc xàa to Jeju ihcakôc to ipa. Ampo na? Nee mã ampo na nare. PahpãmCarô Pejti catia te cumã amji jôr na ri, ne nee kam Pahpãm Carô Pejti ata crire nare.

³⁵— Ne Hũm mã ihkra ita kĩan to ihkĩn, mã cute cumãhõ tekjêa na ampo atajê cunea jôr, ne taa mã ri ita caxuw to hõ tekjê, ne ihcunea jamã. ³⁶Na quê ha jũmjê te amji mã Pahpãm kra te me hũtâr catê na me to amji mã hajỹr na, quê ha quêt Pahpãm cahê na mehtĩr rohnÿttimã na ame ipa. Ne por nee me kam hapac nare, ne nee amji mã me harkwa cupa nare atajê, quê ha nee còjkwa wÿr me hàpir, ne me Pahpãm pupun nare. Quê ha cama me kam Pahpãm cryc ata me hỹrmã apkjê, ne ame to kèanre ne — hajỹr. Hõhõ, Jowāw te ihkôt me ipa catêjê mã hũjarên to hajỹr.

Krĩrĩtpej kam me cahãj nō te amji to ipintuw xà

4 ¹Jeju te Jowāw jirôa pê mecumrâr, ne hirôa pê cumã ihkôt me ipa catêjê jàhtô. Mã Parixêw catêjê te ahna harên par. ²Ne nee pê Jejua ajco me cumrâr nare, me ipê ihkôtme ipa catêjê pê wa ajco me cumrã. ³Mã Jeju te ita na Parixêw catêjê jahkre pej, ne me harên par, ne ma Juta jôpjê pê cator, ne ma Hĩpôjajo jô pjê wÿr ihkôt meipa catêjê me, me mō. ⁴Ne Krĩrĩtpej jô pjê cajpuaw pry nō ata kôt pê me imõr xà.

⁵Ne ma Krĩrĩtpej jŏ pjê kam krĩ japrÿ te Xica ita mã me icator, por pê Jaco xwÿ ihkra pê Joje xwÿ mã pjê jahkre ata cahi na. ⁶⁻⁸Mã curia cormã Jaco jŏ cŏhkre ata ihcuhhê. Mã pyt ramã me pahkrã jimoac kam jÿ, wa curi Jeju me, me icator, mãramã mŏr mã ihpeacre, mã cŏhkre ata cahê na hÿr. Wa ma me ikwÿ me krĩ ata kam ite meampo krêr xà japrŏr to me pra, mã ahte hàhhuc. Mã pyjê nŏ pê Krĩrĩtpej jŏ pjê catêjê nŏ ata, cute cŏ jaxàr prãmte hÿrmã tê, mã Jeju cumã:

— Ate amji kam gapac xàa na, imã cŏ ita kwÿ incirre ne, wa to ikŏ — hane. Mã jŭm cahãj ata Jeju mã:

⁹— Apê Juta catêjê nŏ, ne ipê Krĩrĩtpej jŏ pjê catêjê nŏ, ne mêr ampo na mã ca apu cŏ ita na iwÿ? — hane. Ne ampo na pê cumã ihcakŏc xà ita to? Nee mã ampo na nare, pê ajco Krĩrĩtpej jŏ pjê catêjê me, Juta catêjê me ajpên kaj na me amji kampa, na pê cumã hane.

¹⁰Mã Jeju cumã:

— Ca ate cŏjkwa kam Pahpãm te amã ampo jŏr xà ata nahahkre pej na mã, ca ha ahna iwÿ. Ca ate ite cŏ na awÿr xà ata na ijahkre pej na mã, ca ha mehtĩr xà rohnÿtti mã xà jŏ cŏna iwÿ, por ca ha cŏ to ikŏ ne atĩr rohnÿtti mã na apa xà ata na iwÿ — hane.

¹¹Mã pyjê nŏ ata cumã:

— Amã cŏ jacjên xà hamreare, ne cŏhkre ita rya to iry. Ne mêr jŭ mã ca ha, ne mehtĩr rohnÿtti mã xà itajŏ cŏ ita kwÿ py, ne imã ihkwÿ? ¹²Xà ajkĩ gŏ cŏ ita me panquêt xwÿ pê Jaco jŏ cŏ jirŏa pê impej? He pê me panquêtti Jaco me imã cŏhkre ita jahkwÿ, nemehkra me, cute me ampo to ipijapar xà mã hahkre, mã ihtÿj me to ikŏ. Ne xà ajkĩ Jaco xwÿ jirŏa pê acati, mã ca ha ajte imã cŏimpejti nŏ ita gŏ? — hane.

¹³Mã Jeju cumã harkwa to:

— Quê ha jŭm, pom cŏ ita kwÿ to ikŏ, ne hacpÿ ma mãcumã kŏr. ¹⁴Ne por wa ha jŭm mã cŏ kwÿ, quê ha to ikŏ ata, quê ha quêt nee hipêr cumã kŏr nare. Ampo na? Quê ha jŭm kam cŏ ata ipijapjêr rohnÿtti mã xà ata pê ihtĩar na ipa xà ata, na quê hanee jŭ caxuw ihtyc nare — hane.

¹⁵Mã cahãj ita cumã:

— Mêr imã cŏ ita kwÿ, mãr wa imã kŏr nare ne, nãmri wa nee hipêr hacpÿ ne cŏ ita jaxàr to imŏr prãmnare — hane. Mã Jeju cumã:

¹⁶— Mŏ ne apjên japrŏ, ne hacpÿ ne to amji jaxãmã — hane. Mã cahãj ata Jeju mã:

¹⁷— Ipê ipjê nare — hane. Mã ramã Jeju te hahkre peaj xà na cumã harkwa to:

— Ampeaj kam ca apjê nare na ate imã amji jarên. ¹⁸Ne pom ramã ate apjê to xĩc, ne cumã hikran ita. Ne pom cute ihkwÿ to xêj ca apu cume apa ita te hajÿar, ne nee cupê apjên nare. Wa nee ato ahêj xi nare — hajÿr.

¹⁹Mã cahãj ita Jeju mã:

— Ampeaj kam ca ate ijarēan to ijarēn. Ne ita caxuw wa ite apêPahpām jarkwa to acakôc catê na gahkre pej. ²⁰Ne caxi imã awjarê. Jō ri mōrmō cu ha ajte ame Pahpām to ameamji kam pajapac to me papa? Wa meipê Krīrītpej jō pjê catêjêPahpām to amji kam me ijapac, ne catihti to me cumã icakôc prāmte, mahàhkà jakôtti ita wÿr ijôtpê me pra. Ca ajte me apêJuta catêjê Krīpinkrên kam ajte, me pahtePahpām to amji kam pajapac xà na me harê. Ne amãa, jū ri mōrmō Pahpām to pahte amji kam me pajapac xà? — hane. Mã Jeju cahāj ita mã:

²¹⁻²² — Ikam gapac to impeaj ne he. Ca me apê Krīrītpej jō pjê catêjê atePahpām to amji kam me gapac xà atajê na, me amjijahkre pej nare kam me to amji kam gapac to me apa. Ne me pa nare, wa itÿj quêt ite me Pahpām to amji kam me ijapac xà ita na, me imã amji jahkre pej. Ampo na? Nee mã ampo na nare. He pê me apytâr catê ita, me ipê Juta catêjê pīn meawÿr cato. Na cu ha nee jū caxuw hipêr hàhkà jakôtti ata me, Krīpinkrên kam, ame Pahpām kīnti na jūm te cumã me amji jarēn xà hamreare. ²³Ne hamre, ramã pahte Pahpām to amji kam me pajapac xà cunea pintuw. Naquê ha ita caxuw jūm ampeaj kam Pahpām to amji kam hapac na, quê ha Pahpām amji caxuw cumã cute to amji kam hapac xà to hahkre, mâr quê ha harkwa kôt to amji kampa. Hōhō, cute mehajÿr catêjê ri Pahpām amji mã me hapê, cute me to amji kam hapac xà caxuw. ²⁴Inxū pê Pahpām ata nee hīa na ipa nare, ne quêt cupê Carō Pejti ata, ne pjê cunea kam ipa. Na quê ha hanea ne cute me to amji kam hapaccatêjê me carō caxwÿn cunea to me to amji kampa, pjê cunea kam — hane. Mã cahāj ata te cumã harkwa to:

²⁵ — He imã, por jūm pê me pahpytâr catê japyr te Crixto ata to Pahpām te hūjahkre atacator xà na imã hahkre pej. Ne quê ha cato, ne mepamã ampo cunea to hahkre partu ne — hajÿr. Mã Jeju tecumã amji jarēn to:

²⁶ — He ipê jūm ata, ne ipê Crixto, ne pa wa amãicakôc — hajÿr.

Pê Jeju kôt me ipa catêjê amji mã me ajkra

²⁷Wa caxuw ramã curi me ipê ihkôt me ipa catêjê cator, ne ite amji mã ame ipikrar kryjre nare. Ampo na? Ite me Jeju te Krīrītpej jō pyjê nō mã apu ihcakôc na me hōmpun, na wa ite amji mã me ipikrar. Ne nee ajte me inō te ampo ata na cahāj ata cukij to:

— Ampo na mã ca prãm? — hajÿr nare. Ne nee me inō teJeju cukij to:

— Ampo na mã ca apu jūm cahāj ita mã acakôc? — hajÿrnare, ite me hahkre pej xà na.

²⁸Mã ma cahāj ata te hō pot rer, ne krī kam mehkrīatajê wÿr tē, ne cator ne cute me cumã hūjarēn to:

²⁹ — Ajpên me mō ne me hūmre nō ita pupu, cute ite ampo ton xà atajê cunea na ijarēn partu. Ne mōrmō ajkī cupê, por pêPahpām Crixto to awjahkre ata? — hajÿr.

Jeju mā Pahpām mā hâpên xà ata pê hō

³⁰Mā ma me hàhtôa ne krī pīn, por curi Jeju apu mō ata ri, ihwÿr me mō. Ne cormā ajpên me iwÿr me mōr kwÿa kam, wa ite me Jeju mā:

³¹— Me ijō Pahhi, ampo krē! — hajÿr. Mā Jeju te me imā harkwa to:

³²— Imā ijō, wa cuku, ca nee ite ihkur xà na me ijahkre pej nare — hajÿr.

³³Wa ite mempar, na wa ahna ite me ajpên cukij to:

— Xà ramā ajkī jūm te cumā hō nō rer? — hajÿr. ³⁴Mā Jeju te me ipar ne me imā:

— Por Inxū te ikujahêc ata te amji mā ampo kīnti ata to wa cumān to mō, ne ata pê ri ihhêj rūm ijō, wa to amji mā ijarte, mā itÿj. Ne wa ha itÿj cute imā ijâpên xà jōrata to cumā ihkrā cura, cupêa ri ihhêj rūm ijō.

³⁵— Ca ramā ate me harên to hajÿr to me amji pyrâc tuhe: “Cormā pahte me pajō kēhkên xà wÿr putwÿr tecwat ne nō” hane. Ne mēr me hàhtôti itajê pupu he. He me cupê ijō purpyràac. Ne ihhêj rūm me cupê ramā ampo hy inteptu, ne ramā ihkēhkên xàa kam hàhhuc atajê to ri pahte amji mā me cuprôn xà. ³⁶Quê ha jūm te, jūm mā pur to hâpên na, quê haihtÿj amji mā ampo cwa. Ita jīkjê na, quê ha jūm teimā me to cuprôn to ipa na, quê ha ihtÿj, cumā cute me to cuprôn to ipa jahpan xà na, hàmcwÿr xà. Na quê hame hàhtôa ne mehtir ita na ameipa, Pahpām cahê na. Ne quê ha imā me hâpêncatêjê hakrya to me hakry to hanea, pom quê cute meampo hy kre catêjê me, cute mehkēhkên catêjê he, ne ajwar me hakry. ³⁷Ampo na? He hūjarên xà ita nee ihhêj xi jarên nare, ne ampeaj kam ri awjarê: “Quê ha mam jūmjê te hàhkre na, quê ha ihtÿj ihkôt cormā ihkēhkêncatêjê ihkēhkê” hane. ³⁸Wa ite ramā me ate iwÿr me to apipkjêr na me amên. Ne pê mam rÿ pêa mā, Pahpām jarkwa to mehçakôccatêjê pê me hàhkre catêjê atajê pyrâac, ne ramā me cumā Pahpām jarkwa jarê. Na ca ha mehkôt cama iwÿrme to apipkjêr to me apa — hajÿr.

Pê Krīrītpej jō pjê catêjê cute amji kam me hapac xà to me antuw

³⁹Mā Krīrītpej jō pjê catêjê kam me hàhtôa ne, ampeaj kam cute Jeju to amji mā mehajÿr tÿj pyrentu. Ampo na? Por cahāj te harên to: “Cute imā ite ampo cunea ton atajê to ihçakôc partu” hajÿr, na ri mehçunea te amji mā me to hajÿr pyrentu. ⁴⁰Mā Krīrītpej jō pjê catêjê kwÿ cator, ne cute me Jeju wÿr, quê me cahê na amji to jū mā amcro to. Wa curia me cahê na me ijàhhuc, ne ite me amji to amcro to meipijakrut.

⁴¹Mā hūjarên xà atajê kôt, me hàhtôa ne cute Jeju mā me amji jōr, ne mempar pyrentu. ⁴²Ne cute me cahāj ata mā harkwa to:

— Wa itÿj ita caxuw me kampa. Ampo na? Wa ramā ite me hīa kam ijapac, ne nee mā ate me imā harên xà ita kôtpit mā, ite mempar nare. He

ampeaj kam ri me imãa Jeju pê me pahkên catia pê me pahto hapôj catê, pjê cunea kam — hajÿr.

Pê Jeju cama ihcakôc xàa to pahhi kra caprã

⁴³Ne wa ite amji to me amcro to ipijakrut jirô pê mã, wa ma ite Jeju me, Hîpôjajo jô pjê wÿr me iprar kam me itêm. ⁴⁴Ne pê Jejua ajco me imã amji jarên to:

— Ipê Pahpãm jarkwa to mehcakôc catêjê nõ. Ne ipême ikwÿ pyrãac, mã ijô krî kaj na ihtÿj me ikampa. Neijô pjêa kam, nee amji mã me icupa, ne nee ikam me hapac prãm nare — hane. ⁴⁵Wa curi me icator, ne curia me cahê na me ijãhhuc. Mã curi mehkrî catêjê te meito kênre nare. Ampona? Pê ramã Krîpinkrên kam Hîpôjajo catêjê mamme Hakren xà jô amji kîn ata na me Jeju te ampo pejtiaatê ton na me hõmpu na pê.

⁴⁶Jirô pê mã wa ma Têtêc jô krî wÿr Jeju me, me pra, por pê curi cô to ampo cacô xÿre na ata ri. Mã curi pahhi mã hãpên catê nõ catia, Capernam jô krî kam ihkrî ata pê ihkra xà, hûrkwa kam. ⁴⁷Ne cute Jeju te Juta jô pjê pîn môr naharên par, ne ma Jeju wÿr Têtêc jô krî wÿr tê, cute ahna hàhwÿr mã ihkôt Capernam jô krî wÿr môr. Ne cute cumã ramã ihkra ihtyc xàa kam ata caprãr prãmte. ⁴⁸Mã Jeju te pahhi mã hãpên catê ata mã:

— Xà wa icarôt to ampo pihho catia to, ca ahna me ipupune cormã ihkôt me ikampa? — hajÿr.

⁴⁹Mã Jeju mã:

— Ijô Pahhiti, ikra tyc xwÿjrea na, ajpên gũjarêan kam atêm pyrentu! — hane.

⁵⁰Mã Jeju cumã:

— Gapacta ne ikre wÿr amji jaxà! Hamre, ramã akracaprãr, ne quê ha ihtÿj amã impej, nee quê ha ihtyc nare — hane. Mã cute Jeju par pyrentu, ne ma tê. ⁵¹Mã ikre wÿr pry cahtiri cumã me hãpên catêjê kwÿ te mehcajpar, ne me cumã ihkra jarên to:

— Hamre, hacpÿa mã akra impej — hane. ⁵²Mã cute pyt jÿr xà jũ kam ri ihkra te amji cajpêr na, mehcuikij. Mã me cumã harên to:

— Ihnô kam ri, ramã pyt te ihcahpa crire kam ri, akra mã kry jamre — hane.

⁵³Mã pyt jÿr xà ata kam hũm te, Jeju te cumã harkwato:

— Quê ha ihtÿj akra amã impej — hajÿr na to amji japackre pyrentu. Cwÿrjapê ri curi ikre kam cahê na mehkrî atajê cunea te ihtÿj Jeju to amji mã me hajÿr pyrentu.

⁵⁴Pê Jeju ramã carôt to ampo pihho catia ton to ajkrut, Hîpôjajo jô pjê pîn môr xà ata kam.

Pê Jeju cô cahê na cukrã xà peacre hikwa ata caprã

5 ¹Ne ita jirô pê mã ri Juta catêjê te amji mã me amji kîn nõ ata ton, wa ma me hÿrmã Jeju me, me ikwÿ me, Krîpinkrên wÿr me mō. ²Ne

krī ata pê kēn to mehcunea intēte kwỳc, nemencjēj xà na hōtpê me harkwa jàhtôa ne me to. Atajênō na pê carà cahàcre hòhti jamār catêjê ajco hapôj ne me to acjêj. Cwỳrjapê ri cute me cumā haprỳ to CaràcahàcreHòhti Jō Harkwa. Ne cahi na kēn te kwỳc kamcô ata ri me ijarkwa na haprỳ te Krījàhcaprī. Mā ipu na hàhpykrā xà na kēn po te ikre po atajê texíc ne ihcuhhê. ³⁻⁴Mā me hà cunea cô ata pu na me nō, ne mePahpām mā imprar catê te cōjkwa pīn iwrỳc, ne cô atato ipicwrỳc na me hikaj. Pê ajco hān ne hōtpê jūa mā ahna amcro pê ajco irôroc, ne cô ata to acwrỳc. Ne pê ampo na me hikaj nare. Quê ha cô ata acwrỳc, quê ha me hà atajê nō mam cumā mrō, ne impej pyrentu. Na pê ipu na mento tūm me, cute me xwỳ me, me cukrā xàpec me, me nō. ⁵Mā curia me cahê na jūm xūmre xà na, ramā ahna caku te trīnta ne ihkôt ôjtô ata nō. ⁶Mā Jeju curi cator ne cute ramā hà ita na ahna caku jàhtôa nahōmpun, ne hahkre pej. Ne cute ihcukij to:

— Xà amā amji caprār na amji to prām? — hajỳr.

⁷Mā cute Jeju par ne cumā:

— Hewhỹ, jūm te cô ita kam ito mrōr xà caxuw hamreare. Cwỳrjapê ri hān ne acwrỳc, wa tee hỹrmā icuhkwỳr, māmā mam me ikwỳ kwỳ me ire ne kam me mrō. Ne quêt mempej ne ma me pra, wa ita ri mehkĩnte ijikwa xà ita kam ijikwa — hajỳr.

⁸Mā Jeju cumā:

— Hā to xa, ne anōr xà ata py ne to amōrpyrentu — hane. ⁹Me ajkaam mā hūmre ata pej ne hām, ne cute nōr xàata pyr ne ma to ihtēm pyrentu. Ne mehkôt xà jō amcropê xap na, pê ita hane.

¹⁰Mā Juta catêjê jō pahhi catêjê kwỳ te jūm ata te nōr xà pyr ne to ihtēm na me hōmpun, ne me cumā harkwa to:

— Pỳhàpà, he ita kam me pahkôt xà jō amcro pê xap, nō na mā ca ajte ate anōr xà ita pyr ne to tē? He ate amji kam gapac xà ita nee me pahte amji kam me pajapac xàcajpuaw nare, ne ihkaj na! — hajỳr.

¹¹Mā cute mempar ne me cumā:

— Por hūmre te icaprār ata te imā harkwa to: “Anōr xàpy ne to amōr pyrentu” hajỳr. Wa harkwa kôt tē — hajỳr.

¹²Mā cute mempar ne mehcukij to:

— Jūm te mā anōr xà ita pyr ne to atēm na amēn, mā ca apu to tē? — hajỳr.

¹³Mā me cumā:

— Pỳhàpà, nee cute icaprār catê ata te imā amjijaprỳ jarēn nare, ne ite hōmpun pej nare kam, ma me hàhtô mā hàr — hajỳr.

¹⁴Mā ramā ahna ahtūm ryre mā Jeju te Pahpām to me amji kam hapac xà jūrkwā kam ihcajpar ne cumā:

— Ramā acaprār ne apej ita na amji pupun peaj ne he. Nehipêr mō ne amji caxuw ampo kēn nō ton nare. Nāmri caha ate ihnō ton na, quê ha mam ata jirôa pê acaxuwihkēanre ne — hajỳr, ne ma tē.

¹⁵Mã hūmre ata xwỳjê cator ne ma tẽ, ne cute mecupê Juta catêjê jŏ pahhi kwỳ mã amji jarẽn to:

— Xãnte nee jũm te icaprãr nare, Jeju te ri icaprãr — hajỹr.

Pê Jeju cupê Pahpãm na amji jarẽ

¹⁶Ne cute me Jeju te mehkôt xà jŏ amcro na, cuteshãncaprãr na me harẽn par ne me ajpẽn mã:

— Cute me pahkôt xà jŏ amcro kam hãncaprãr, ne apu to kên, cwỳrjapê cu ha hanea ne ame to kêanrene — hajỹr. Ne ma Jeju wỳr me pra, ne cute me cumãn kammehtẽm.

¹⁷Mã Jeju me cumã:

— Me ikampa, rỳ jũ caxuw cŏjkwa kam Inxũ Cati te ihkôt xà caxuw hãpên xà imejti atajê to hãpên jicu nare. Na wa ha hanea ne cuxà hãpên xà ita to ijãpên to ipa kam to icrà tu — hane.

¹⁸Pê me cupê pahhi catêjê kwỳ harkwa ita na me kampa ne ame kam incryac to ame kam incryc, na pê me cumã ihcuran prãam to ihcuran prãm. Ampo na? Nee mã ampo na nare, pê mehkôt xà jŏ amcro kam hà atacaprã, ne cormã hipy cupê Pahpãm kraa to ihkra na me cumã amji jarẽ, ne Hũm me ipipêan na amji jarẽ. Na pê ihtỳj cupê Pahpãm kra na cute amji jarẽn to apu ihhêj na amehcãmji, cwỳrjapê pê kam amencryac to amencryc.

Pahpãm kra himpej xà

¹⁹Mã Jeju cormã me cumã:

— Ikam me gapac to imepej ne he. Ipê Pahpãm kra, na wa hanee amjia kôt ampo itajê nŏ ton nare. Ne por Inxũ ampoto, wa ahna hŏmpu atajêa to wa ijãpên to ipa. Ne porInxũ ampo cunea to atajê, wa itỳj hanea ne to. ²⁰Ampo na? Inxũ mã ikinti, na ri ihtỳj imã cute ampocunea ton xà itajê to ipipê to ipa, wa hŏmpu. Ne quẽ ha cormã imã cute ampo ton xà itajê jirŏa pê cute ton xà atajê to ajpê, wa ha to, ca ha ahna me ipupu. Ne atỳj hŏmpun xà ata to me amji mã ajkra. ²¹Ne pom Inxũ hacpỹa mã mehtyc to ihtĩr, ita na wa haipê hũràac ne ite amji mã jũm tyc to ihtĩrprãm ata to, itỳj hacpỹ mã ihtĩr. ²²Ne nee Inxũ Cati pê mehkên me, mempej to ipicokjêr catê nare. Ampo na? He ite ita to ijãpên xàa caxuw ri cute imãhŏr. Ne pa wa ha cute mempejti ton atajê jahpan xà na, mecumã ijãmjŏr xà imejti atajê to amgŏ. Ne cute mehkênton atajê jahpan xà na, wa ha me cumã ijãmjŏr xàkêanre atajê to amgŏ, ne cama mehkên mã ame curẽ. ²³Quẽ ha icati na me ipupu, ne amji mã me icupa to hanea, pom quẽ amji mã me Inxũ cupa he. Ne por jũm amji mã ipê Pahpãm kra na icupa nare ata ri, hanea ne nee amji mã, por Inxũ te ikujahêc ata cupa nare.

²⁴— He ampeaj kam wa ha me amã awjarẽ. Por quẽ ha jũmicakôc xà itajê cunea to amji mã ihhimpej ne kampa, neInxũ te ajpên ikujahêc na

amji mǎ ito ihhimpej ata, quê ha ihtÿj ihtîr rohnÿtti mǎ. Ampo na? He wa nee ite jŭm ata kên mǎ mên nare, ne cama quêt to ihtyc xà jahpan, na quê haihtîr rohnÿtti mǎ na ipa, Inxŭ cahê na. ²⁵He ampeaj kam wa ha me amǎ awjarê. Quê ha ita caxuw, por cormǎ mehtîar na ame ipa, mǎramǎ Inxŭ mǎ mehtyc itajê, jŭ caxuw ipêihkra na me ijôkre kampa, ne hacpÿ mǎ ihcunea na amehtîr pyrentu. ²⁶Ne pom Inxŭ pê mehcunea mǎ, cute me amji kam hapac xà jôr catê zakatata te ri imǎ hôr. Na wa itÿj hacpÿmǎ mehtyc to ihtîr. ²⁷Ne ampeaj kam ri ipê Pahpām kra, ne hanea ne ipê me Ahàkà, cwÿrjapê ri hajÿar neInxŭ Cati te ito mempej me, mehkên catêjê cukij ne me to ipicokjêr catê.

²⁸— Ne nee ca ite icakôc xà to icakôc itajê impar xà to ame amji mǎ me apikrar nare. Ampo na? He ramǎ amehtyc catêjê te meijôkre par, ne hacpÿa mǎ amehtîr ne kre pê me hapôjxàa kam ri ramǎ hàhhuc to mō. ²⁹Ne por mempejti ton to me ipa atajê, quê ha mehtyc xà jirô pê hacpÿamǎ mehtîr, ne Pahpām cahê na amji to me ipijaparohnÿtti mǎ. Ne por mehkînte mehkêanre ton to me ipaatajê, quê ha mehtîr, ne cama mehkên mǎme axà, ne ampÿa mǎ, Pahpām pê amji to me acto.

³⁰— Ne pa wa nee amjia kôt jŭm kên mǎ mên nare, ne Inxŭ te catÿt kam amji jahkre pejti te me hahkre pej xà ata kôt, wa ha me to ajcokjê. Na wa nee apu ampo itajê to ihcupan nare. Ampo na? He wa nee ite amji kam ijapac xàa na jŭm kên mǎ mên nare. Ne por Inxŭ te ikujahêc ata te amji kam hapac xàa kôt wa hân nemehkên catêjê kên mǎ me curê, ne mempejti catêjêatajê impej mǎ me curê.

Pê Jeju hàpên xà ton atajê, ihtÿj cupê Pahpām na harê

³¹— Ne wa ha pa ipyxit peaj ne me amǎ amji kôt harê na mǎ, quê ha ite amji jarên xà itajê kôt hamreare ne. ³²Ne nee mǎ ipyxit peaj nare, ne ihtÿj icaxuw jŭm ata, ne cupê ijôInxŭ. Ne por ito ampo na awjarê atajê, ampeaj kam ri, neemǎ Inxŭ apu ihhêj xi jarên nare na, ramǎ imǎ hahkre pej. Inxŭ teijarên xà ata ampeaj kam ri, ne nee ihkôt hamre xà nare.

³³— Ne ate me ina gâhcukjêr ne me ijarên par prâmte, Jowāw te me cumrār catê wÿr me jŭmjêkujahêc, mǎ cute me cumǎ ito hŭjarên paratajê ri nee ihhêj xi xà nare, ne ampeaj kam ri. ³⁴Ne nee imǎ pjê ita kam, cute me cumǎ me ito hŭjarên xà ita na prām nare, ne quêt Inxŭ te ito hŭjarên xà atajê ri imǎ impej, ne nee ihkôt hamre nare. Ne mēr ampo na ri Jowāw te mecumrār catê te me amǎ ijarên to hajÿr? He ca ihhêaj toijarên par xà atajê kôt me ikampa, ne ate amji mǎ meito ahimpej na, ca ha nee me akên mǎ me axàr nare, neatÿj me atyc xà jahpa.

³⁵— Ne pom ihpôc xà hân ne amji na ampo jarare jàhtôa ne to cuprô, ita jîkjê na ri Jowāw te me cumrār catê ata amji na me ato cuprô. Ne cupê ihpôc xà pyrâac ne me amǎ ahcujro, ca atÿjahna ate me cuprôn to amcro to incrêre xà, mār quê me amǎ ampo to hahkre. Ca hŭrên

amegakry cakrô, ca ajte nee ate me hūjarēn xà atajê cunea na me kam gapac nare. ³⁶Ne ampeaj kam pê Jowāw hirāa pê me amā ijarē. Mā cormā Inxū Cati te ijāpēn xà catia ita na imēn, wa to ijāpēn to ipa, atajê ri Jowāw jirôa pê, hirāa pê ijarē, ne hanea ne ihtÿj ajpēn Inxūte ikujahêc na ijarē. ³⁷Ne hanea ne Inxū te ikujahêc ata, ihtÿj ito me amāawjarē cakrô, ca rÿ jū caxuw ate me hōkre par ne mehōmpun nare. ³⁸Ca nee ajte icakôc xà itajê na me ipar, ne amji māmē ito ahimpej nare. Ne ca rÿ jū caxuw ate me Inxū teajpēn ikujahêc ata jōkre me, cute me amā harkwa jirēn atajê nō impar nare. ³⁹Ne cormā ihnō xwÿjê, he ca atÿj me Inxū pêPahpām jarkwa na ihkàhhôc to hahkre to me apa. Neate me to hahkre xà atajê kôt atÿj nee jū caxuw ate ame atyc nare na, ame amji cāmji. Ne por ihkàhhôc ata ihtÿj ito awjarē. ⁴⁰Cakrô ca ma ajte ite me amāme atir rohnÿtti mā xà ata jōr xà wÿr ame gitōt.

⁴¹— Ne imā Inxū te ito ihcakôc to impejti naa pit mā to prām. Cwÿrjapê ri imā pjê kam me hūmre te ikôt me harēn to impejti na me to prām nare. ⁴²Ne wa ite ramā me akrāhky na me amā Pahpām kīn name gahkre pej, ne nee me amā caxwām catia mā Pahpām kīn nare. ⁴³Ne wa Inxū te amji kam hapac xāa na ajpēn me awÿricator cakrô, ca ajte ma ame icaca. Ne quê ha pjê ita kam, ita ri, ajte jūm xūmre amjia kôt cute amji kam hapac xāa na me awÿr cato, ca ha atÿj ahna me amji capa, ne ihkôat me amji to. ⁴⁴Ne ate pjê kam me hūmre te me apejti na me garēnna ri, me amā impar prām. Ne Pahpām te me apejti na megarēn na ri, nee amji to me amā gāhcukjêr to prām nare, ita kam jū mā ca ha ne ito amji mā me ahimpej? Wÿr ca ha amji mā hamā ne me to.

⁴⁵— He xà pa wa ha ajkī Inxū cuna mā me garēn to kēanre ne? Hāpà. Ne pom ca me Mojxe xwÿ te me hapackre xà to me amji kampa, ne cute me atehcajpar xà na amji mā me to hane ita, quê haPahpām mā me apê mehkēn ton catêjê na me amā hacjê. ⁴⁶Nāmri ca ha me ate caxwām catia mā amji mā me Mojxe kam gapac na, ca ha atÿj hanea ne ito amji mā hane. Ampo na? Taa mā pê ina ihhōc. ⁴⁷Ca nee ramā Mojxe to amji mā me ahimpej nare ita kam, jū wÿr ca ha ito amji mā me ahimpej — hajÿr. Hō, Jeju te Juta catêjê jō pahhi kwÿ mā harkwa to hajÿr.

Pê Jeju hō incrire to me hàhtôa mā harte

6 ¹Ita jirô pê mā, wa ma Jeju me, me ikwÿ me, Hīpôjajo jō cô na me irêr, ata japyr nō te Tiperij jō cô. ²Mā me ikôt me hàhtôa ne me mō. Ampo na? Cute meJeju te me hà caprār, ne me to impej pyrentu na me hōmpunna ri. ³Wa hàhkà jakôt nō na Jeju me, me ipê ihkôt me ipacatêjê me, me ijāpir ne me ijÿr. ⁴Pê caxuw ramā me Hakren xà jō amji kīn me Pāwtÿjre jō amji kīn na ahtipre.

⁵Mā Jeju te amji wÿr, por ihkôt me hàhtôa ne me mō atajê pupun, ne cute Pirip mā harkwa to:

— Jō ri cu ha ajte me hàhtôti itajê mã me hō nō mãme pahcato, ne me hūhkà? — hajÿr.

⁶Ne pê ramã cute me cumã pãw kryj ata kam to hàhtô to amji kampa, ne cama cute Pirip cajpëar prãnte pê cumã hane.

⁷Mã Pirip cumã:

— Ahpÿanre na me pyxit te me pãw kryjre ne mencwÿr xàcaxuw, cu ha me putwÿr te ôjtô jãpên xà jō pore jirôa pê ahna me cumê cakrô, quê ha nee me cahuc nare — hane.

⁸⁻⁹Mã Antre pê Petrô tō te cumã harkwa to:

— Ihnãm hã ahkrare xūmre nō ita mã pãw kryjre texïc, ne caxuw cumã tep pijakrut ne hàr hiahpuro mã to jÿ he, ne jū wÿrquê me hàhtôti itajê catwÿ! — hajÿr.

¹⁰Mã Jeju te me imã harkwa to:

— Me cumã, quê mehcunea pjê kam me to jÿ — hajÿr. Nepê ampeaj kam pjê ata kam pôre. Mã mehcunea jÿr, pjê kam, ne por me hūmre me hÿr atajê pê me hàhtô na me xïc mir, me hūmre pit. ¹¹Mã Jeju te pãw kryjre atajê incwÿr nehūrên hakryti na Hūm pê Pahpãm mã to amji jarên. Ne cute ihcokjêr neme imã hōr, wa ite me cumã hōr par, mã cute tep pijakrut atajê to hajÿar. ¹²Mã ajte me hō pãw kryjre itajê to mehcunea jarte partu. Ne cute me hàpàn tohhijirô pê mã ri, Jeju te me imã harkwa to:

— Cute ame cahhur tohhi itajê to kàhà kam me cuprō, quê neeihnō ipictor nare — hajÿr. ¹³Wa ite me to cuprôn, ne me to kàhà to tōxi ne me to hipu par, por pãw kryjre te xïc atajê cahhur to.

¹⁴Mã cute Jeju te ampo pejti ton xà ita na mehōmpun, ne amji mã me harên to:

— He ampeaj kam ri hūmre ita pê me pamã Pahpãm jarkwa to ihcakôc catê, por pê Pahpãm me pamã cator xà na to awjahkre ata mã he — hajÿr. ¹⁵Mã Jeju te, cute me hàprêa kam amji mã me to hōpahhi na me hahkre pej, ne ma ahte tē, ne kēnti kàa nō na hàpir.

Pê Jeju cô incwÿrpê mō

¹⁶Mã ramã me ina caxwa, wa curia ite me Jeju rer, ne ma me iwÿrc, hīpô tohkà wÿr. ¹⁷Ne pàr kre mã meicjêj, ne ma Capernam jō krī wÿr ite me to irêr na me amji to hajÿr. Ne ramã ihcajpuaw pàr kre to me mō, mã ramã awcapàtkô, mã nee cormã me iwÿr Jeju cator nare. ¹⁸Mã kôc pahtÿjti ata te hàpêrkam ihtêm, ne cô to harô to pra. ¹⁹Wa ramã ite me imōr jūwÿr to me rec pyxit, cô kam, ne ma me to cakrÿn to mō. Ne me ite amji wÿr ajpên cô jipy Jeju te mōr na me hōmpun, ne ampeaj kam me imã hūpa.

²⁰Mã pea me ina hàhtêp, ne cute me imã harkwa to:

— Ame icupa nare, pa wa mō, nee mã ipê me carōnare — hajÿr. ²¹Wa ite me hahkre pej, ne hacpÿa mã hūrên ame ijakry, ne itÿj ite ahname

amji caxàr. Mā me iwỳr hàr, ne jū mā cute pàr kre ton, mā cyt ne me imōr xà ata wỳr me ito icator.

Pê me hàhtôti atajê ame Jeju japê

²²Ne pê Jeju curi me cumã harte xà ata ri, wa ahte ite pàr kre pyxit peaj mā me icjêj na cute me ipupuan na, curia cormã me ahtwỳ, ne me Jeju jikaj. Ne nee pê ramã me iwỳr Jeju cator na me hahkre pej nare. ²³Mā ma me ijakàn pê Tiperij jō krī jō pàr kre kwỳ cator, por curi Jeju te Hūm mā pāw pyrên hakryti jarên, ne me cumã kryj, mā cute ame to harte tu ata ri. ²⁴Ne cute me ijapên, ne curia ame Jeju jikaj atajê kwỳ te pàr kre kwỳ mā mencjên, ne ma me ikôt Capernam jōkri wỳr me to cator, cute me Jeju japên prãmte.

Jeju pê me pahto ihtīr rohnýtti mā catê

²⁵Ne curia ri me hàhtôti atajê te me Jeju mǎcator ne me cumã:

— Hàpà me Ikrā tūm! Jū caxuw mā ca ita ri acator? Wa ihcaprýna curi ame gikaj, ca ate jū mā ajte ne ramã ita riacator? — hajỳr. Mā Jeju me cumã:

²⁶— Ampeaj kam wa ha me garê! Ca ate ijapên xà catia na me ipupun, ne Pahpāmkra na ate amji mā me ito hajỳr to, ca ikôt me acator nare. Ne ame garte prām ita to pit mā, ca ikôt me acator. ²⁷He ame hajỳr nare! Nee ca pjê ita kam, ate amji to me apijapar prãmte, me gápàn to pit mā ameamji kam gapac nare. Ne quêt Pahpām cahê na ate amji to me apijapar rohnýtti mā xà ata to, ca ha me amji kampa. Ampo na? He ate meto amji kam me gapac ata pê ihhêj rūm me gō te me ato meatīr rohnýtti mā xà. He ipê me Ahàkà, na wa ite me axūmrea na amji ton, ne me amã Inxū Cati to hahkre, ca ate cahê na amji to me apijapar rohnýtti mā xà caxuw. Mā ihtỳj Inxū pê Pahpām te, ite to ijapên xà caxuw imã carôt jōr. Ampo na? He cumã ipej na ri — hajỳr.

²⁸Mā cute ita na mehcukij to:

— Ampo ton na ri Pahpām mā me ito prām, wa me cumã to? — hajỳr.

²⁹Mā Jeju te me cumã harkwa to:

— Ate ito amji mā me ahimpej na ri, Pahpām mā me ato prām, cwỳrjapê ri cute me awỳr ikujahêc — hajỳr.

³⁰Mā me cumã:

— Ca ha hipêr acarôat to ampo pihho pejti to! Wa ha ahna me apupu, ne itỳjamji mā me ato ihmpej! ³¹He pê me panquêtjê pō kam me hamreare ata kam ajcome hō pê mana ata pit kur to me ipa, ata pê Pahpām jō kàhhôc kam harên to: “Cute cōjkwa pīn me cumã me hōjōr, mā cute mehkrêr” hajỳr. Na ca ha pijamã ajkī cuxà me imã to? Wa ha me hōmpu, ne me cukrê, ne itỳj amji mā me ato ihmpej — hane.

³²⁻³³Mā Jeju me cumã:

— Ỡhỹ, ampeaj kam wa ha me amã cŏjkwa jŏ ata kŏt harĕ. Pĕrỳ pĕa mĕ Mojxe xwỳ jŏ caku kam, cute pjĕ kam amji tome ipijapar xà caxuw pit mĕ, pĕ Pahlpĕm me cumĕ me hŏjaprỳ te mana ata gŏ. Ne nee mĕ pĕ Mojxe me cumĕ hŏ ata jŏr nare, Pahlpĕm pĕ me cumĕ cugŏ. Ne pom curmĕ cŏjkwa pĭn Pahlpĕmjŏ intuwti cator ita pĕ ri cŏjkwa kam Pahlpĕm cahĕ na ate amji to meapijapar rohnỳtti mĕ xà caxuw impej — hane.

³⁴Mĕ me cumĕ:

— Me Ikrĕ tũmti, gŏtpĕ amcro cunea kam, mĕr me imĕ Pahlpĕm jŏ intuwti ita gŏ! — hane.

³⁵Mĕ me cumĕ:

— He ipĕ ri ihhĕj rũm cŏjkwa pĭn Pahlpĕm jŏ intuwtiata, na wa ha me to ihtĩr rohnỳtti mĕ. Quĕ ha jũm ty, ne ihtyc jirŏ pĕ hacpỹa mĕ ihtĩr, ne nee hipĕr jũ caxuw ihtyc nare. Quĕ ha prĕm na jũm te apu ipa na, quĕ ha apĕ na hacpỹa mĕihtỳj, ne cumĕ amji kĩn, ne harte pyrĕn hakry. Ne quĕ ha hanea ne jũm kŏr na apu ipa ne ikŏ, ne hacpỹa mĕ ihtỳj ne cumĕ amji kĩn. Jĩkjĕna, quĕ ha jũm te Pahlpĕm jahkre pej ne cumĕ amji jŏr, ne ahna mehkwy mĕ hĕr to prĕm na, quĕ ha iwỳr apkjĕ ne ito amji mĕ ihhimpej, nePahlpĕm jahkre pej, ne ahna mehkwy mĕ hĕr pyrĕn hakry.

³⁶— Wa ramĕ ite me amĕ me atoa icakŏc to, ca atỳj me ipupun cakrŏ, ca nee cormĕ me ikam gapac nare. ³⁷Ne por Inxũ te ijũhkra mĕ me hacjĕn xà atajĕ, quĕ ha ihtỳj ijũhkra mĕ me acjĕj, wa ha itỳj amji mĕme huwahi, ne jũ caxuw pŏ mĕ, amji pĕ, jũm to ijũcapĕr, quĕ ha ipictor nare. ³⁸Ne por Inxũ te ampo na amji mĕ ito prĕmti xà atawỳr pĕ wa cŏjkwa pĭn wrỳ. Ne nee amjia kŏt ite amji mĕ ampo na prĕmti ata wỳr, iwrỳc nare. ³⁹Ne ite, cute ijũhkra mĕ me hacjĕn atajĕ tohajỳr xà caxuw ri, cute me awỳr ikujahĕc he. Quĕ ha nee jũm ipĕ ipictor nare. Wa ha jŏ ri pjĕ jamre xà ata kam, me to ipicokjĕr xàjŏ amcro kam, itỳj amji kŏthacpỹa mĕ mehcunea to ihtĩr. Hŏhŏ, ita caxuw ri Inxũ te ikujahĕc. ⁴⁰Ita na ri Inxũ ito prĕm he. Quĕ ha ihtỳj ipĕPahlpĕm kra te hajỳr romĕ mĕ iwỳr me apkjĕ. Ne por quĕ ha ito amji mĕ mehhimpej atajĕ, wa hajũ caxuw, pjĕ jamre xà ata kam, hacpỹa mĕ me to ihtĩr. Quĕ ha me to ipicokjĕr xà jirŏ pĕ Inxũ cahĕ na mehtĩr rohnỳtti mĕ na ameipa — hajỳr.

⁴¹Mĕ Juta catĕjĕ kwỳ te ajpĕn mĕ Jeju toihcakŏc kĕn kam mehtĕm. Ampo na? Cute cŏjkwa pĭn cupĕme hŏ tuaw pyrĕc ne iwrỳc na amji jarĕn, na riame ajpĕn mĕ harĕn to hane he:

⁴²— Pom cupĕ Joje me Marij kra ita? He wa ramĕ ite me hŏmpun pejtu, nŏ na mĕ ajte cŏjkwapĭn iwrỳc na amji jarĕ? — hane.

⁴³Mĕ Jeju te mempar ne me cumĕ:

— Nĕmhĕ ne apu ihĕj xi na amji mĕ me ito hajỳrjicu. ⁴⁴Jũ wỳr quĕ jũm amjia kŏt amji to ikŏt ipa catĕ. Nĕmri quĕ ha Inxũ te jũm pĕ ikŏt ipa catĕ na ton na, quĕ haihtỳj cupĕ ikŏt ipa catĕ. Na wa ha itỳj hacpỹa mĕ toihtĩr, ampo cunea jamre xà ata kam. ⁴⁵Ne Pahlpĕm jarkwa to mehcakŏc catĕjĕ

jō kàhhôckam hūjarēn xà te hajÿr he: “Quê ha Pahpām pê mehcunea mǎ ampo to hahkreatê” hane. Quê ha cute me kamhapac, ne amji mǎ me to ihmipej atajê, quê ha ajpên iwÿr me apkjê, ne iwÿr me pra, neihtÿj amji mǎ me ito ihmipej. ⁴⁶Ne rÿ jū caxuw ita ri, pjê kam catêjê nō te Inxū pupun nare, ne pa nare. Wa ipyxit peaj ne itÿj quêt hōmpu. Ampo na? Hecurūam wa icator, na ri imǎ hahkre pej.

⁴⁷— He wa ampeaj kam me amǎ awjarê, quê ha jūm te amjimǎ ito ihmipej na, quê ha ihtyc jirō pê hacpÿa mǎihtîr, ne ihtîr ita na apu ipa rohnÿtti mǎ. ⁴⁸Na ri ipê me gō te me ato atîr rohnÿtti mǎ xà ata. ⁴⁹Ne pê mam me panquêtjê pō kam me hamreare ata kam ame hō pejti japyr te mana ata pit ku cacrō, pê ihtÿj amehwej ne amehtyc partu, ne nee camahacpÿa mǎ jūm tîr nare. ⁵⁰Ne por mehwÿr cōjkwa pîn me hō tuwti wrÿc ata, quê ha jūm te ihkwÿ krêr na, quê ha Pahpām cahê na ihtîr ita na apu ipa rohnÿtti mǎ. ⁵¹Ne ipêa ri cōjkwa pîn me cumǎ me hō tîar wrÿc ata. Ne ipêa ri me to ihtîr rohnÿtti mǎ xà. Wa ha pa, pjê kam mehcunea mǎ amji gō. Na quê ha jūmte ihhêj ne ikwÿ krêr na, quê ha Pahpām cahê na ihtîr ita na apu ipa rohnÿtti mǎ — hajÿr.

⁵²Mǎ Juta catêjê kwÿ ame kam incryac to ame kam incryc, na ri cute meajpên mǎ harên kên kam ihtêm, ne me harên to:

— Jū mǎ quê ajte hūmre ita ne me pamǎ amji jīa gō, cu ame cuku? — hajÿr.

⁵³Mǎ Jeju me cumǎ:

— He ampeaj kam wa ha me amǎ amji jarê, ca ha me ateame ipê Ahàkà jī kur nare, ne nee ame icaprō ita to ameakōm nare na, ca ha nee Pahpām cahê na amji to ame apijapar kam me toacrà nare, ne atÿj ame atyc pa, ne me akôt hamre rohnÿtti mǎ. ⁵⁴Ne quê ha jūm te ijī kwÿ krêr, ne icaprō ita kwÿ to ihkōm na, wa ha itÿj jūm ata to hacpÿa mǎ ihtîr, por jū caxuw me to ipicokjêr xà jō amcro pê ampo cunea jamre xà ata kam. ⁵⁵Quêt ijī ita ri pjê kam me hō itajê jirōa pêmpej. Ampo na? He ijī ita pê ri quêt me hâpàn xàimpejti ata, ne icaprō ita pê ri quêt mehkōm xà imejti ata, me to ihtîr rohnÿtti mǎ xà caxuw. ⁵⁶Na quê ha jūmjê te ijī kwÿ krêr, ne icaprō to mehkōm na, wa ha ramǎ me ajcacwa, ne ajpên kam me ihônco tu ne. Quê ha ramǎ Icarō Pejti me cumǎ acjêj, quê ha Icarō Pejti ata carôat kôt me ipa. ⁵⁷Ne por Inxū pê mehtîr xà cunea xakat ata te riapên ikujahêc, na wa itîar na ipa. Na quê ha jūm te ijī kwÿ krêr na, quê ha hanea ne ihtîr ita na apu ipa. ⁵⁸Hōhō, pê mam me panquêtjê me hō pejti pê mana krêr cacrō, ihtÿj amehwej pa, ne amehtyc partu. Ne pom curmǎ cōjkwa pîn ipê me hōintuwti wrÿc ita caca xà te nee hajÿr nare, ne ajtearemǎ, wa quêt mehtîr rohnÿtti mǎ na me to — hane.

⁵⁹Pê Capernam jō krī kam, cute me cuprōn xà jürkwakam Jeju me cumǎ hūjarēn xà ata to awjarê tohane. Ne nee pê cormǎ ne Jeju mecumǎ amji to ipipê nare, mehcunea te me hahkre pej cupate. Cwÿrjapê pê ajco

cute me cumã amji jarĕn xà itajêcwÿrpê me cumã amji jarĕn to ipa. Ne Jeju jĭ kur xàata kôt harĕn xà te hajÿr he. Quê ha ihtÿj jŭm amji mã Jeju to ihhimpej, ne ihkôat ipa, ne ihkôt ipa xà ata pê ri cute hĭ kur xà.

Pê me hàhtôa ne me Jeju mã hikra

⁶⁰Mã Jeju kôt me ipa catêjê jàhtôa ne cute me itapar, ne ajpĕn mã me harĕn to:

— Pom me pamã ampo to hahkre itajê impar kôt hakop jahkre kêatre! Ne jŭ mã quê ha jŭm kam hapac to, ne hahkre pej ne ahna amji capa? — hajÿr.

⁶¹Ne nee jŭm te Jeju mã me harĕn nare kam, mã cutearamã me ahna ihcakôc xà ata jahkre pej, cwÿrjapê ri cute mehcukij to:

— Xà ita cwÿrjapê mã ca ame icaca, ne ame imã hikranprãm? ⁶²He ca ha atÿj jŭ caxuw còjkwa wÿr ipê me Ahàkà te hacpÿa mã hàpir na me hõmpu. Jirô pê mã ca ha cormã me ijŭjarĕn xà itajê kôt me hakop, ne me hahkre pej. ⁶³Ne Pahpãm Carô Pejti ata ri cahê na me ato ipijaparohnÿtti mã. Ne jŭ wÿr ca me anô amjia kôt amji mãhamã ne ca amji to ajpa, ne me ca ajpĕn to me ajpa. Ne ca ha ate me icakôc xà ita naikam me gapac na, quê ha Pahpãm Carô Pejti me amãacjêj, ne me ato ipijapar rohnÿtti mã. Hôhô, ita pê ri ate me ijĭ kurxà ata, pom wa me amã harĕ ita. Ne wa ampeaj kamme amã ampo itajê jarĕn cakrô, ca ajte nee me akwÿito amji mã me ahimpej nare — hajÿr. ⁶⁴Ampo na pê Jeju me cumã ita jarĕ? Nee mã ampo nanare. He pê ramã rÿ pĕa mã, mam jŭmjê atajê te to amji mã mehhimpejxà nare na me hahkre pej, ne hanea ne jŭm te ihkĕn mãmĕn xà ata na hahkre pej.

⁶⁵Ne cute me cumã:

— Cwÿrjapê wa ite ramã me amã harĕn xà ata na, quê ha Inxŭ te ikôt jŭm te ipa catê na hãm nare na, quê ha nee cupê ikôt ipa catĕnare — hajÿr. ⁶⁶Na ri Jeju kôt me ipa catêjê jàhtôa ne cute ihkôt me ipa jicu, ne nee hipĕr ihkôt me ipa nare.

Pê Jeju kôt me ipa catêjê te tôxi atajê nee me cumã hikran nare

⁶⁷Mã cute me ipê ihkôt me ipa catêjê te tôxi itajê cukij to:

— Xà ca ha hanea ne me ijicu, ne ma me aprarprãm? — hane. ⁶⁸Mã Ximãw Petrô te cumã harkwa to:

— Jŭm wa ha ajte me hŭnã? Me ijô Pahhiti, pom acakôcxà itajêa ri quĕt me imã ite amji to me ipijapar rohnÿtti mã xà to hahkre. ⁶⁹Wa ite me Pahpãm te apê jŭm pejti ata kujahĕc name gahkre pej, na wa itÿj ite amji mã me ato hajÿr — hajÿr.

⁷⁰Mã Jeju me imã harkwa to:

— Ýhÿ ita cwÿrjapê wa ite amji mã me ate tôxi itajê capi cakrô, mã me anô pyxit ne kam me pahcurê xwÿn carô kĕn jô pahhi — hane.

⁷¹Ne pê Jeju, Juta Carijot pê Ximāw Carijot kra ata to, pê meimã ihcakôc. Ampo na? Juta ata pê ihkôt me ipa catêjête tōxi atajê nōa cacrô, quê ha ihtÿj jū caxuw Jeju curê xwÿn tehcajpa, ne ihkên mã cumê.

Pê Jeju kjêjê intuwre atajê ame cumã xwÿ

7 ¹Ita jirô pê mã ri ma Jeju ame ito mō, Hípôjajojō pjê kam, ne pê nee Juta jō pjê kam ajco apu ipa nare. Ampo na? Pê curi me hō pahhi catêjê apumehcuran prãm na pê. ²Mã ramã caxuwaw Juta catêjê jō amji kîn nōjapÿr te Ikrere jō amji kîn ata to me cator xàakam. Pê ajco me hōamji kîn ton xàa na, ihtÿj ikrere atajê kam amehkrī, ne nee me hūrkwā pej kam amehkrī nare. ³⁻⁵Mã cormã hapu na Jeju kôt mehkjêjê atajê teihtō kà pê Pahpãm kra na amji mã me to hajÿr nare, na ri cute me hapactua kam cumã harkwa to:

— Juta jō pjê wÿr atēm pyrentu, ne curi acato, ne acarôat to me cumã ampo pihho catihiti itajê cunea to, quê me hàhtôti atajê me hōmpu! Quê ha jūm mã amji to cati prãm na, quê ha nee apuipimxur to ihcuhkwÿr nare. Ne mērampo na quê ate ampo jahkre pej xà itajê na me apupunnare? Me cumã to, quê ahna mehcunea me apupu! — hajÿr.

⁶Mã Jeju me cumã:

— He cormã nee ite mehcunea mã amji to ipipê xà jō amcro kamhàhhuc nare! Ne me amã amji kîn wÿr meaprar xà caxuw amcro cunea impej. ⁷Mã pjê kam catêjê itajê nee quêt ame acurê nare. Ne pa nare, me ikam incryc kam ame ipa. Cwÿrjapê ri ma ameicurê, ne ma ame icaca! Ampo na? Wa itÿj me cumã, cute meampo to kên atajê jarên to ipa na ri, ma ame icurê. ⁸Ne me ca nare, gapacta ne amji kîn ita wÿr me mō. Waha ita ri apu mō. Ampo na? He cormã amji kîn wÿr imōrxà caxuw nee ijō amcro kam hàhhuc nare — hane. ⁹Hō, Jeju te me cumã amji jarên to hajÿr, ne curiaHípôjajo jō pjê kam hàhhuc, ne apu mō, me hakàn pê. ¹⁰Wa me hakàn pê ame ipa, mã me ina jū mã amcro te, wa ma me ipimxuar pê Jeju me, me mō. Mã nee jūm te me imōr xà na meipupun, ne me ijahkre pej nare.

Me hàhtôti atajê mã Jeju to cute amji kam me hapac xà pijakrut

¹¹Mã tee Juta catêjê jō pahhi kwÿ amji kîn ata na, me hàhtôti atajê catàtkre na ame Jeju japê. Ne amehapên to me ahna hàhcukjêr to hajÿr to me ipa he:

— Jō ri mōrmō Jeju apu mō? — hajÿr.

¹²Mã me hàhtôti atajê kwÿ kàjpej pê, ajpên mã me Jeju jarên to:

— Ampeaj kam jūm ita pej — hane. Ne mehkwy ajpên mã meharên to:

— Quê, he jūm ita ihtÿj mehkwy mã ihhêj xi to ipa — hane.

¹³Mã Juta catêjê jō pahhi kwÿ mã Jeju kinnare na, cute me hahkre peaj xà na, nee jūm me kam mare mãajpên mã Jeju kôt harên nare, me hō pahhi kwÿ te ame kam incryc, ne ame to kên cupate.

Pê Jeju me cuprôn xà kam me cumã ampo to hahkre

¹⁴Ne ramã cute me to amji kîn ata krã curan xà wÿr, ihcahti na cute me to hajÿr. Mã ma Jeju Pahpãm to meamji kam hapac xà jürkwa wÿr mō ne hār, ne curia hÿr ne ame cumã ampo to hahkre. ¹⁵Mã Juta catêjê kwÿ te mehcahôc xà atajê na mempar, ne me amji mã harên to:

— Pÿhàpà! Pê nee ihkàhhôc to hahkre cati nare cacrô, ampeaj kam cute amji jahkre pej — hajÿr.

¹⁶Mã Jeju me cumã amji jarên to:

— Pom wa me amã ampo to hahkre itajê, wa nee amjia kôthahkre pej, ne me amã to hahkre nare, ne nee cupê itekjênare. Ne cupê Pahpãm te ikujahêc ata tekjê. Necurüam ri ajpên ampo itajê pra, wa cama me amã to hahkre. ¹⁷Ne quê ha jüm mã Pahpãm te amji kam hapac xàjahkre pej, ne ihkôt amji ton to prãm na, quê ha ite ampo to hahkre xà itajê na ikampa, ne hahkre pej pyrentu, Pahpãm pîn hapôj na, ne nee ikrã pîn hapôj nare.

¹⁸— Ne quê ha mehcunea te amji mã me jüm cupa to prãmto, quê ha ihtÿj amjia kôt, ihkrãa kam me cumã ampojarên to ipa. Ne pa nare, wa nee ite hajÿr nare. Ampo na? Imã ate amji mã me icupa ita na me ato prãm nare, quêt ate me amji mã me Pahpãm te ikujahêc ata cupahti na ri, imã me ato prãm. Na wa itÿj catyt kam me amãijüjarên xà, hêj xi nare ita to ijüjarên to ipa, ne nee wa ame amã ihêj xi jarên to ipa nare. ¹⁹Ne pê ramã Mojxe xwÿ me panquêtjê mã Pahpãm jarkwa gō cacrô, ca ajte nee amji mã me kam gapac nare, ne mër ampo cwÿrjapê mã ca tee ame icuran to hahkre? — hane.

²⁰Mã mehcunea te Jeju mã me harkwa to:

— Mōrmō ca apu akrã kam waj, na mã ca apu amji na meikraj! Jō ri mã jüm apu acuran prãm ita? — hajÿr.

²¹Mã Jeju me cumã:

— Por wa ite me pahkôt xà jō amcro na icarôat to ampo pihho pyxit peaj ton, ne ite jüm xà ata caprâr, ne to me amã ipikrar ata to, wa ite amjina me amên, ca ajte ame ikam acryc. ²²Ne ca hanea ne atÿj me pahkôt xà jō amcro na meapê. Ampo na? Quê ha me pahkôt xà jō amcro na jüm cahãj mã ihkrare ihpÿm, ca ha atÿj ajte mepahkôt xà jō amcro itajê nō na me cumã impy kà kwÿjakep, pê Mojxe xwÿ me amã to hahkre xàa na. Ne nee mã pê Mojxea ita to ipipê nare, ne mam Mojxe quêtiti pê Aprãw xwÿ ata mã pêita to me amã ajpê. ²³Ne Mojxe xwÿ te me hapackre xà ita kôt, mã ca atÿj me pahkôt xà ita na me ahkrare mã mempy kà jakep. Ne nee ipê me apyrac, wa ite jüm ita pê ihkà kwÿ jakep nare, ne quêt cumã ihkà cunea na to impejti, ca ajteita na ame ikam acryc? ²⁴Ne ca hãn ne ajte ampo na me hōmpun pyxit peaj kam, ramã ihkêanre na me harê. Ahna cute hajÿr nare, ca ha xaate hōmpun xà ata kôt to amji

kampa, ne ihkôt hakop, neimpejti na hahkre pej, nare, ihkéanre na hahkre pej jirô pê, ca ha cormã atỳj harẽ — hane.

Jeju pê ri Mexij pê me to awjahkre ata

²⁵Mã Krĩpinkrên catêjê kwỳ Jeju na me ajpên cukij to:

— Xà Jeju ita mã me pajô pahhi catêjê amehcuran prãm? Ne mër ampo na mã cute mehpro nare? ²⁶Pom me pahcuneajipôc ri xa ne ame pamã ihcakôc ita? Mã nee ajte jũm te cumã ampo jarên nare? Nare, mormõ me pajô pahhi catêjê, por pê Crixto toPahpãm me pamã awjahkre ata na, mormõ amji mã me to hane? ²⁷He me imãa, nee cupê Crixto nare! Quê ha jũ caxuw me pahwỳr Crixto ata cato, cu ha neejũ rũm cator xà na me hahkre pej nare. Ne pom jũmxũmre ita ri ihtỳj jũ rũm cator xà ata na me pamãhahkre pej, he cupê Naxare jô krĩ catêjê nõ — hane.

²⁸Mã cormã Jeju Pahpãm to me amji kam hapac xajũrkwa kam xa, ne cute me cumã ampo to hahkre xà ata kam, ihkrãhhia kam me cumã:

— Xà ajkĩ ampeaj kam me amã jũ rũm icator xà ita najjahkre pej? Hãpà! Wa nee amjia kôt icator nare, ne me apê, por ajpên cute ikujahêc ata jahkre kêatre. Ne por jũm te ikujahêc catê ata pê ri amji jarkwa par catê, ne catyt kam ipa! ²⁹Ne imãa ri quêt hahkre pej. Ampo na? Heihpian wa icator, ne cutea ri ajpên ikujahêc — hane.

³⁰Mã cute mempar, ne tee amehpro to hahkre, ne neejũm te ihcupên nare. Ampo na? He nee cormã cute mehpro, ne ihkên mãme mên xà kam hàhhuc nare na ri. ³¹Mã me hàhtôti atajê jipôc ri me hàhtôa te ihtỳj Pahpãm te Jeju to me cumã hũjahkre na amji mã meto ihhimpej. Na ri me ajpên mã harên to:

— He ihhêj ne me imãa, cupê, por pê Crixto to Pahpãm me pamã awjahkre ata! Ne quê ha jũ caxuw ajkĩ Crixto cato, ne ajkĩ, pom Jeju te ampo ton xà itajê jirôa pê ajkĩ to? Hãpà. Taa mã ri ramã cator — hane.

Pê krãhtare amji caprỳ to Jeju pro to, hỹrmã pra

³²Mã Parixêw catêjê kwỳ te kàjpej pê cute amji mã me harên to hajỳr na mempar, cwỳrjapê ri cute Pahpãm mã mehcajrên catêjê jô pahhi kwỳ me, cute Jeju pro na me ajpên par. Ne cute hỹrmã me hõ krãhtare kwỳ kujahêc, cute mehpro ne me haxàr prãmte. Mã hỹrmã me cator ne cama mehcuhhê ne me kampa.

³³Mã cormã Jeju me hàhtôti atajê jipôc ri xa neme cumã:

— Wa ha itỳj cormã ijôtpê ame acahê na imõr crirene, ne quê ha ina ahtũm nare, wa ha ma hacpỹ mã cute ajpên ikujahêc ata wỳr amji jaxà ne tẽ. ³⁴Ca ha me ipupun prãmte, tee ame ijapê ne nee me ipupun nare. Ampo na? Jũ wỳr ca me anõ, por wa curi apu mõ ata ri ikõtacato! Na ca ha nee me imã acator nare! — hane.

³⁵Mã Juta catêjê te ajpên mã me harên kam mehtêm, ne me ajpên mã harên to:

— Jū kam mā quē ha ajte tē, cu ha ajte neecumã me pahcator nare? Xà quē ha ajkĩ ma me cupê Crec catêjê jō pjê wÿr tē, ne curia me cupê Juta catêjê kwÿ mā apu ampo to hahkre to ipa? ³⁶Ne mēr ampo mā hãn ne harên kam pra ne harên to: “Wa ha ma tē, ca ha tee ame ijapê, ne nee hipêr me imã acator nare”, ne “Jū wÿr ca me anō curi itēm xà ata wÿr ikôt tē” hane? — hajÿr. Hōhō, pahhi catêjê te ajpên mã harên to hajÿr.

Pahpãm Carō Pejti ata pê cô te me pahto ihtĩr xà rohnÿtti mã ata pyrãac

³⁷Ne pê me hō amji kĩn cahhur ata, cute kam meto ihtēm xà jirôa pê impej, na pê Jeju me hipôc ri xa, neihkrãhhia kam me cumã hũjarên to: — Quē ha me anō mã, Pahpãm jahkre pej xà pê amã kôr pyrãcti ata naprãm na, ca ha iwÿr tē, wa ha amã Pahpãm to ajpê, ca ha hahkre pej pyrên gakry. ³⁸He pê ramã Pahpãm jarkwa ita jarên to hane he:

“Quē ha jũm te amji mã ito ihhimpej na, quē ha cute amji kam hapac xà tuw pejti atakôt me hàhtôa ne Pahpãm wÿr me apkjê, quē ha taa mehtĩr rohnÿtti mã na me to.
Quē ha cute amji kam hapac xà tuw pejti ata pê cô catiapijapjêr ata pyrãac, ne ipijapjêr ita na” — hane.

³⁹Ne por cô to mehkôm xà to Jeju te me cumã ihcakôcata pê Pahpãm Carō Pejti incwÿr xà. Ampo na? Por quêha jũmjê amji mã me Jeju to mehhimpej atajê, quē haihtÿj me Pahpãm Carō Pejti ata cwa. Ne ampo na pê cormã ne nee ame Pahpãm Carō Pejti ita cwÿr nare? Pê cormã Jeju nee hacpÿ mã ihtĩr ne Hũm wÿr amji jaxàr, ne hacpÿa mã amji to cati nare na pê.

Pê me hàhtôti atajê ahpÿanre na Jeju na cute me amji to hajÿr xà

⁴⁰Ne pê me hàhtôa ne cute cô to mehkôm tome cumã ihcakôc na me kampa, atajê ajco ajpên mã me harên to:

— Ampeaj kam ri hũmre ita pê me pamã Pahpãm jarkwa toihcakôc catê catia, cu me hikaj ata, ne taa mã ri cator — hane.

⁴¹Ne pê mehkwy ajpên mã me harên to:

— Me imã cupê Crixto to Crixto, ne toa pê Pahpãm me pamã awjahkre — hane. Ne mehkwy ajco ajpên mã me harên to:

— Pom Jeju pê Hĩpôjajo catêjê nō ita? Xà quē ha ajkĩ ihtÿj Crixto jũ caxuw Hĩpôjajo jōpjê pĩn cato? Jū wÿr quē ha curũm cato! ⁴²Ampo na? Pê ramã Pahpãm jō kàhhôc kam tohũjarên to hane he:

“Quē ha ihtÿj jũ caxuw pahhi pê Tawi xwÿ tãmwxwÿ nō kam Crixto cato, ne por pê curi Juta jō pjê kam, Pãw jōkrĩ kam Tawi xwÿ ihkrĩ ata kam, quē ha ihpÿm” — hane.

⁴³Mã pea me hàhtôti atajê te Jeju to me amji kam hapac xà to me ipicapôn. ⁴⁴Ne pê mehkwy ihtÿj me pro ne ihkên mã me mênprãm, ne me hacjên xà mã me haxår prãm. Ne pê nee jũm ajte ihcupên nare.

Pê krãhtare nee me Jeju pro nare

⁴⁵Na ri ma hacpÿ mã krãhtare atajê te me amji jaxår, ne me hũ kam me pra, Pahpãm mã cutemehcajrên catêjê jô pahhi kwÿ me, Parixêw catêjê atajê wÿr. Mã cute me Jejujapên ne ahna mehcukij to:

— Ampo na mã ca nee ate mehpro ne ajpên iwÿr me to amörnare, ne ajpên gũ kam me pra? — hajÿr.

⁴⁶Mã krãhtare atajê me cumã harên to:

— Wa rÿ jũ caxuw ite me jũm te ihcakôc xà nõto ihcakôc to hajÿr na mempar nare, ne ihcakôc xà itajêajteare mã — hane.

⁴⁷Mã Parixêw catêjê atajê krãhtare atajê mã:

— Pÿhàpà? Xà hanea ne ajte cute me amã ihhêj? ⁴⁸Xà ajkĩ me ipê pahhi catêjê kwÿ me Parixêwcatêjê kwÿ nõ te mã amji mã Jeju to ihimpej? Hãpà! ⁴⁹He por Jeju to amji mã mehhimpej to me ipa atajê pê me pahte amji kam me pajapac xà jô kàhhôc jahkre kêatre! Cwÿrjapê quê ha Pahpãm ame to kêanre ne, nemehkên mã me cumê — hane.

Pê Nicotem Jeju tehcajpar prãm to prohti kam ihcakôc

⁵⁰Pê Nicotem ramã jũ caxuw caxwa ri Jeju mã ihcakôc ata pêmehkwÿa nõ, ne cute mehkwy mã harkwa to:

⁵¹— He cu nee me pajô kàhhôc kam pahte amji kam me pajapac xà ata rer, ne me jũm atacukij ne mempar nare kam ihkên mã me mên nare. Cu ha xa mehcukij, ne me kampa, ne ihkên na me hahkre pej, ne cormã ihkên mã me cumê — hajÿr.

⁵²Mã mehkwy me cumã harkwa to:

— Pÿhàpà, xà ajkĩ apê Hípôjajo jô pjê catêjê nõa, mã caatÿj apu Hípôjajo jô pjê pĩn Crixto ata cator na amjimã to hane? Apu hajÿr nare, ne cama Pahpãm jô kàhhôc to ca hahkre ne hahkre pej, he nee rÿ jũ caxuw Pahpãm jarkwa to mehcakôc catêjê nõ te Hípôjajo jô pjê pĩn cator nare — hane.

Pê Jeju cahãj xyre ata te hipêr ampo kên ton nare xà caxuw hũtà

8 ¹Jirô pê mã ri ikre wÿr mehcunea cutor, mã ma JejuPĩxô jô kên wÿr mō. ²Mã amcro nõ na, awcahti xà wÿr, Jeju te amji jaxår, Pahpãm to me amji kam hapac xà jũrkwa wÿr, ne hàr ne jÿ. Mã me hàhtôa ne ahna me ipixêr, ne me xa, ne cuteampo to me cumã hahkre xà atajê na ame kampa. ³Mã cute me cumã Mojxe xwÿ jô kàhhôc to hahkrecatêjê me, Parixêw catêjê te me pyjê nõ te ahti naimpjê kaj na jũm me nõ ata pro, ne ma me to mō. Ne cute Jeju cuna mã me hãm xà caxuw, ame cumã quêt. Mã mehcunea jipôc ri hãm ne xa. ⁴Mã cute Jeju mã me harên to:

— Me Ikrā tūm, pom cahājre ita ihtỳ ahti na mō ne hūmre ita to nō, impjên kaj na. Mā jūm te ajpên kam me hōmpun, wa ite mehpro, ne ajpên awỳr me to mō. ⁵Ne pê Pahpām jō kàhhôc kam Mojxe xwỳ me pamā pyjê te hajỳrjê atajê kên to curan to hajỳr na, awjahkre he: “Quê ha pyjê nō apu hajỳr to mō ata ri kēan to cutemehcuran xà” hane. Ne ca? Jū mā ca ha cute hajỳr xà ita na me imā ihkôt harên to? — hane.

⁶Ampo na pê pyjê nō ata kôt ame Jeju mā harên tohane? Nee mā ampo na nare. Jeju te me hapackre xà nō to ihcupan, mā cute mempar ne mehpro prānte, pê tee ame to hahkre. MāJeju te cama hỳr ne me kam hapac, ne pjê na hikôt nehūhkrakhi to kam ihhōc to mō. ⁷Mā mehçukij ita na. Mā cute amji capô ne hỳr pej, ne me cumā harkwa to:

— Por rỳ jū caxuw me anō te Pahpām cuna mā ampo kēnton nare ata, ca ha mam kên nō to cahājre ita kamawcapê, ate to ihcuran xà caxuw — hajỳr.

⁸Jirô pê mā ri hacpỹa mā pjê na hikôt, ne ihtỳ jỹ ne kam ihhōc. ⁹Mā cute me Jeju te me cumā hūjarên to hajỳr na kamme hapac atajê, ma me pyxit ne me pra. Ne por mam jūm kàhtu ata ri mamam me cumā tē. Ne ahnaa me pyxit ne ajkôtmemprar ita kam me cutor. Mā ahte Jeju me jūm cahājre ata pit jàhhuc. ¹⁰Mā Jeju te amji capô ne hỳr pej, ne jūm cahājre ata mā:

— Hàpà? Ne mēr jō ri mā kên to cute ame acapêr prāmatajê? Ne mēr jō ri mā ame akôt harên to kēanre atajê? — hajỳr.

¹¹Mā jūm cahājre ata Jeju mā:

— Hamreare, nee jūm jàhhuc nare — hane. Mā cumā:

— Wa nee pa xwỳjê ato kên nare. Mēr gapacta netê, ne nee hipêr mō ne ampo kên tonnare — hane.

Jeju pê hàhcujro xà pyràac, ne me pamā ampo cunea to ajpê

¹²Jeju te hipêr me hàhtôa mā ampo to hahkre kamihtēm, ne me cumā amji jarên to hajỳr he:

— Ipê, pom hàhcujro xà ampo cuneacujro, ca me hōmpu ne me hahkre pej ita pyràac. Ipê Pahpām wỳr me amā ijàhcujrocatê. Na ca ha ate me amji mā ito me ahimpej na, ca ha jūcaxuw awcapàtkôti kam, me apê amji jahkre kêatre kam, mePahpām pê apictor xà ata kam ame apa nare — hajỳr.

¹³Mā Parixêw catêjê kwỳ te me Jeju kam hapac ne mecumā:

— Ca ramā ca apu amji to acakôc, na ri acakôc xà itajêkôt hamreare — hajỳr.

¹⁴Mā Jeju me cumā:

— Pom wa ampeaj kam me amā amji jarên to ipa itajê kôt nee hamre nare. Ampo na? He ampeaj kam, wa nee apu ihêj xi nare. Ne pa ri quêt imā, por jū rūmicator xà ata na amji jahkre pej, ne hanea ne imā hacpỹ

mã ite amji jaxàr xà ata na amji jahkre pej. Ne me ca nare, me apê jū rūm icator xà ata na ijahkre kêatre, ne hanea ne jū kam itēmxà ata na me apê ijahkre kêatre. ¹⁵Na ca me ate amji kam me gapac xàa kôt, amji mã meikêanre na me ito hane, nare, mōrmō ca amji mã me ipej na me ito hane. Ne imāa, ate me ijarēn xà itajê cunea kôt hamreare. Ne nee cormã ite mehkênme, mempejti cukij ne me to ipicokjêr xà jō amcro cator nare. ¹⁶Wa ha ite ramã me ato ipicokjêr xà na mã, wa ha itÿj catyt kam me akên me, me apejti to ipicokjêr to ipa. Ampo na? He wa ha ite ton xà ata kam, nee ahte ton nare. Quê ha hanea ne, por Inxū te ikujahêc ata icahê na jÿ, ne ite me atohajÿr xà to imã hahkre. ¹⁷Ne Mojxe xwÿ te me amã incaca xà te hajÿr ata rer, na quê ha jūmjê ajkrut ne jūm te ampo ton xà ata na mehōmpu, ne cute me hōmpun xà ata na ajwar ajpêan kôt me harēn na, quê ha me amã ampeaj kam ri cute ton. ¹⁸Ita jīkjê na wa Inxū te ikujahêc ata me ajwar me ijūjarēn xà caxuwme ipijakrut, cwÿrjapê ca ha atÿj ite amji jarēn xà itana me ikampa — hane.

¹⁹Mã me cumã:

— Jō ri mã apām ita? — hane. Mã Jeju me cumã:

— He me apê Inxū jahkre kêatre, ne hanea ne me apêijahkre kêatre, quê ha me amã ijahkre pej na mã, quê hanea ne me amã Inxū jahkre pej — hane.

²⁰Ne por cute Pahpām to amji kam me hapac xà jūrka kam, cute me cumã ihporeto cuprōn xà ata cahê na, pê Jeju me cumã hūjarēn xaitajê to awjarê. Mã nee cute mehpro ne me haxàr nare, mehacjên xà kam. Ampo na? Pêcormã nee cute mehpro xà jō amcro hÿrmã cator nare, na pê.

Pê Jeju pahhi catêjê cunea mã amji jarê

²¹Mã Jeju te hipêr me cumã amji jarēn to:

— He wa ha ma tē, ca ha ate me ipupunprāmte, tee ame ijapê, ne nee me ipupun nare. Ampo na? Jū wÿr ca me anō, por wa ha curi tē ata ri, ikôt acato. Na ca ha ita ri ame apa, ne ca ha atÿj me akên itajêa kam amety. Ampo na? He Pahpām te nee me amã me akên itajê to impej ne to tojnō nare ata kam, ca ha ame ty — hajÿr.

²²Mã Juta catêjê ajpên mã me harēn to:

— Jū kam mã quê ha ajte tē? Cu ha nee hipêr mehōmpun nare? Xà quê ha ajkī amji cura? — hane.

²³Mã Jeju me cumã:

— He me apê pjê kam me apa catêjê, ne quêt ipê kÿj pê, cōjkwa kam Pahpām na mehkwy, na ri nee ipê pjê kam me akwy nare. Ne ate amji kam me gapac xà itajê pê pjê te amji kam hapac xà, ne ite amji kamijapac xà pê ri kÿj pê, cōjkwa kam, Pahpām te amji kam hapac xà. ²⁴Ca ate nee ite me amã amji jarēn xà ita to amji mã me hajÿr nare, cwÿrjapê wa ite me akên atajêa kam me atyc na me amã harēn. Ca me ate, por

Pahpām teajpên ikujahêc ata to amji mǎ me hajÿr nare, ne amji mǎ me ito ahimpej nare na, ca haatÿj me atyc partu, ne nee hacpÿa mǎ me atÿr ne Inxū cahê na me akrĭ nare — hajÿr.

²⁵Mǎ cute me Jeju cukij to:

— Ne mĕr me anō mǎ ca? — hajÿr. Mǎ Jeju me cumāamji jarĕn to:

— He ipê, por pê wa mam ramā me amā amji jarĕ ata, nepa wa cormā.

²⁶Ne wa ha cormā, hipêr me amā me ate me akĕn ton itajê cunea jarĕ. Ne nee wa ahte cama me amāme akĕn xà itajê to icakôc to ipa nare. Ampo na? He wa, por Inxū Cati pê cute amji jarkwa par catê, ne catyt kam ipa, ne ajpĕn cute ikujahêc atajarkwa to, wa pjê kam mehkrĭ atajê cunea mǎ icakôc to ipa. Ne wa ha itÿj jū caxuw amjia kôt me amā me akĕn xà ton itajê cunea jarĕ — hane.

²⁷Pê nee cute me cumā cōjkwa kam Hūm to ihcakôc xà ata na me hahkre pej, ne me kam hapac nare. ²⁸Cwÿrjapê pê Jeju me cumā amji jarĕn to:

— He ca ha jū caxuw, ipê me Ahàkà te me hūmre na amji jahkre, mǎ cute pĭ na menxôr na me hōmpu, ne cormā me ijahkre pej pej. Na wa nee amjia kôt ampo itajê ton to ipa nare, ne Inxū te ahna imā harkwa ne to imā hahkre atajê to pit mǎ ijapĕn to ipa. ²⁹Ne ampo na ri ajpĕn cute ikujahêc ata nee amji pê irer nare, ne ihtÿj apuicahê na ipa? Wa cumā cute amji mǎ ampo na prām̄ti xàatajê to pit mǎ ijapĕn to ipa na ri — hane.

³⁰Ne Jeju te ihcakôc xà to hajÿr jirô pê mǎ ri mehàhtôa te cupê Pahpām kra na amji mǎ me toihhimpej kam mehtĕm.

Jeju pê me pahcunea pytàr catê

³¹Mǎ Jeju te Juta catêjê kwÿ te amji mǎ me to ihhimpej kam mehtĕm atajê mǎ:

— Ca ha ate amji mǎ me ito ahimpej kam me to acrà na, caha me apê ikôt me apa catêjê impej pit. ³²Na ca ha me ite amji kam me ijapac xà impejti itajê cunea jahkre pej partu. Na ca ha nee me apê cama me jūm jarkwa kôt me cumā hàpĕncatêjê atajê pyràc nare, ne atÿj quĕt ameapa — hajÿr.

³³Mǎ me cumā:

— He me ipê Aprāw xwÿ tàmwxwÿ tàmwxwÿ, mǎ nee rÿ jūcaxuw jūm te amji mǎ me ito cama me harkwa kôt me cumā hàpĕn catêjê nare, ne wa itÿj ameipa, nō na mǎ ca ajte jūmpê ate me ipytàr na amji jarĕ? — hane.

³⁴Mǎ Jeju me cumā:

— Jū wÿr quĕ cama jūm pê me cumā hàpĕn catê ataapu hàpĕn to mō, ne amjia kôt hīcu. Quĕha hō pahhi cute hīcu na cumā harkwa, quĕ ha cormā hīcu. Ita jĭkjĕ na mǎ, me pahcurĕ xwÿn pê Xatanaj me ato hane, ne ihtÿj cormā me ato ihhimpej ita kam, ca nee me akĕn ton jicunare. Ne

ampeaj kam wa me amã awjarẽ, wa nee ame amã ihêj xi jarẽn nare. ³⁵Ne ihnõ xwÿjê te hajÿar he. Quê ha nee cama me hõ pahhi jarkwa kôt me cumãhâpên catêjê nõ hõ pahhi jÿrkwa kam ihkrĩ kam incrãnare. Ampo na? Quê ha ramã hõ pahhi mã ihkĩn nare, quêha ihtÿj hÿrkwa tète cator, ne jÿ kam ihkujate. Ne quêtihkra ata quê nee amji tète cator nare, ne nee jÿm mã ihpore na to hàhpan nare. Ampo na? Cupêihkra, na quê ha hÿrkwa kam ihkrĩ rohnÿtti mã. ³⁶Ne ipêa ri Inxũ Cati kra. Nãmri wa ha itea me acurê xwÿn pê Xatanaj pê me apytâr na, ca ha atÿj cama ame apa rohnÿtti mã, quê ha nee irãn xà na hipêr jÿm me ato ihhimpej nare.

Pahpãm pê me pajõ Inxũ Cati

³⁷— He ampeaj kam ri me apê me panquêt xwÿ Aprãw tãm xwÿ tãm xwÿ, wa ramã ite me gahkre pej. Nõ na mã ca ajte ame icuran prãm. Ne mër ampo na mã ca ame icuran prãm? Nee mã ampo na nare, ca ma ame ite me amã ampo to hahkre xà itajê caca, na ca ame icuran prãm. ³⁸Ne Inxũ te imã ampo jahkre, ne imã to hahkre xà atajêa na wa to icakôc to ipa. Ne me amã ajtea mã, me apãm pê Xatanaj ata ihkrĩ, ne me ato ihhimpej. Na ca ihkôat me amjikampa, ne atÿj me ampo kên ton to me apa — hane.

³⁹Mã me Jeju mã:

— He me ipãm pê Aprãw xwÿ — hane. Mã Jeju me cumã:

— Quê ha me apê Aprãw xwÿ kra na mã, ca ha cute amjikam hapac xàa to amji kam me gapac to me apa. Ne imãa, neeme apê ihkra nare. Ampo na? Ca nee me cute amji kam hapac xà to me amji kam gapac nare. ⁴⁰Na wa ite ampeaj kam me amã Inxũ te imã ampo to hahkre na harẽn. Atajê jarẽn cwÿrjapê mã, ca ame icuran prãm. He pê Aprãwxwÿ nee jÿ caxuw jÿm pejti curan prãm nare. ⁴¹Ne ajteare mã, Inxũ Cati kaj na me apãm te me amã ampo ton to hahkre xà atajêa mã, ca me ton to me apa he — hane. Mã Juta catêjê Jeju mã:

— Ne nee me ipê jÿm mã ajteare mã hÿm ata nare. He Pahpãm ita pê ri me ipãm, wa me to amji mã me ijõ Pahpãm, ne me ipê mehkra impeaj wa me — hane.

⁴²Mã Jeju me cumã:

— Hamreare, me apê Pahpãm pê Inxũ Cati kra nare. Quê ha me apêPahpãm kra na mã, quê ha ihtÿj me amã ikĩn. Ampo na? He ihpian wa icator. Ne nee wa amjia kôt apu ipa nare, necute amji kam hapac xàa to wa apu ipa. Ne cutea ri ajpênikujahêc. ⁴³Ne ampo na mã ca nee me icakôc xà itajê impar jahkre pej nare? Nee mã ampo nanare. Ca nee caxwãm catia mã ito amji kam me gapac prãm nare. Cwÿrjapê ca ha nee me icakôc xà itajê impar jahkre pej nare. ⁴⁴Ne me apê Pahpãm curê xwÿn pê Xatanaj ata kra, na ca cumã ampo kĩnti itajê to pit mã me gâpên to me apa. Ne cute amji kam hapac xàato, ca me amji kam gapac to me

apa he. Ne pjê te amji ton pê mã, pê ramã me apãm ita mehcuran kam tẽ. Ne nee cupê catyt kam, ampeaj kam ampo to ihcakôc catê nare, ne amji cãm tâa rûm ri cupê ampo cunea to ihhê xi to ihcakôc to ipa catê. Ne cupê ampo cunea hê xi pãm, na ri ampo hê xi xà to pit mã ihcakôc to ipa. Ne rỳ jũ caxuw ampeaj kam ampo to ihcakôc nare. Ne ramã cute me acaxuwincaca xà ita ton to amji pyrác tu. ⁴⁵Ne wa quêt catyt kam, ampeaj kam ampo hê xi xà nare to ijũjarẽn to ipa, ca ampo ita naajte ma ame ipar caca. Ampo na? Ca nee caxwãm catia mã itoamji mã me ahimpej, ne me ipar nare to prãm to mã caame hane. ⁴⁶Ne gapacta ne ite ampo to kên japê ameamji cukij, ca ha nee me anõ amji mã ite ampo to kên xà nõ na ijarẽn nare. Ampo na? He wa rỳ jũ caxuw ite ampo kên ton nare. Na wa hãn ne catyt kam ampo atajê jarẽ, ca ma ajte ame ipar caca. Ne mẽr ampo na mã ca ajte nee amji mã ito me ahimpej nare? ⁴⁷Ne me cupê Pãhpãm kra catêjê ihtỳ amji mã meharkwa cunea na me kampa, ne mempar to kênre nare. Ne me ca nare, nee me apê ihkra nare, na ca ma amempar caca — hane.

Pê Jeju Aprãw xwỳ pupu

⁴⁸Mã me Jeju mã:

— Nee mã apê Juta catêjê kra impeaj nare, ne me ikĩnteapê Krĩrĩtpej jŏ pjê catêjê nõ, ne ihpian pê ca acato, ne akam ampo carõ kên te hipu tu — hane.

⁴⁹Mã Jeju me cumã:

— Hamreare, ikam quêt ampo carõ kên hamreare, na waquêt amji mã, por Inxũ te ajpên ikujahêc ata pit cupahtito ipa, ne ma haprỳ to cati to ipa. Ne me ca nare, ca ajte nee amji mã me icupa nare, ne cama me ito icirire to prãm. ⁵⁰He wa nee cute amji mã me icupa to prãm to icator nare cakrô, quê ha ihtỳ Inxũ Cati ata, por nee amji mã me icupanare itajê cukij, ne mehkên mã me cumê. ⁵¹Ne ampeaj kam wa ha me amã awjarẽ. Por quê ha meijarkwa kampa, ne amji mã me icupahti to me ipa atajê, quê ha jũ caxuw amehtyc nare, ne mehtĩr ita na ame iparohnỳtti mã, Pãhpãm cahê na — hane.

⁵²Mã me cumã:

— Hamre, ita caxuw wa ite me akam ampo carõ kên na megahkre pej pejtu. Ne pê ramã Aprãw xwỳ me, por me cupê Pãhpãm jarkwa to mehcakôc catêjê catia atajê mehtycpartu. Nõ na mã ca ajte amji jarẽn to: “Quê ha jũm amji mã ikampa, ne cute ijarkwa kôt ipa na, quê ha nee jũ caxuw ihtyc nare” hane? ⁵³Pom me ipãmjê pê Aprãw me, cute Pãhpãm jarkwa to mehcakôc catêjê atajê ihtỳ ramã amehtyc par ita? He xà ajkĩ me hirôa pê acati? Jũ mã mã ca apu amji to, amji kam gapac xà itajê to? Mõrmõ ca atỳ apu amji catia na amji cãmji? — hajỹr.

⁵⁴Mã Jeju me cumã:

— He wa ha ipyxit peaj ne amji mã ipejti to icakôc to ipa na mã, quêha icakôc xà atajê kôt hamreare ne. Ne pom ca Inxū toamji mã me Apãm ata ri ihtÿj ijapÿrÿ to cati to mō. ⁵⁵Ne ikĩnte me apê Pahpãm jahkre kêatre, ne imãa riquêt hahkre pej. Wa ha ipê hahkre kêatre na amji jarê namã, wa ha ipê me apyrãac ne ampeaj kam ihêj xi. Ne neeite hajÿr nare, ne itÿj quêt imã hahkre pej, na wa amji mã harkwa na kampa, ne amji mã hũpahti to ipa. ⁵⁶Ne me aquêt xwÿ pê Aprãw ata pê ramãicator xà ata na ipupu ne ijahkre pej, cwÿrjapê pê ampeaj kam hũrên hakry — hane.

⁵⁷Mã me Jeju mã:

— Pÿhàpà? Xà pê ca atÿj ajte Aprãw xwÿ pupu? Pomnee cormã ana caku te xĩncwēnta nare ita? Ne cormã atuwre, nō na mã ca ajte ate Aprãw xwÿ pupun na amjijarê? — hane.

⁵⁸Mã Jeju me cumã:

— He wa ha ampeaj kam me amã amji jarê. Pê wa ramãAprãw pÿm xwÿjrea na apu ipa, ne cormã apu ipa rohnÿtti mã — hane. ⁵⁹Mã Juta catêjê te mempar, ne caxuw kên to me amjityj, cute me to kam hũcapêr, ne to mehcuran prãmte. Ampo na? Cupê Pahpãm pyrãac ne rÿ pēa mã mam ipa rohnÿttimã na cute amji jarên, na ri kên to amehcuran prãm. Mã me cupê Jejudimxur ne ma Pahpãm jũrkwa pê cator ne tē.

Pê Jeju jũm to tũm ita caprã

9 ¹Ne Jeju cormã mōr kwÿa kam, cute jũm to tũam naihpÿm ata pupun. ²Wa me ipê ihkôt me ipa catêjê te ahna mehçukij, neme cumã:

— Me ijō Pahhi, ampo na mã pê hũmre ita into tũm ita na ihpÿm? Xà pê ajkĩ ihkên xà nō to jahpan xà na mã cute hajÿr? Nare, xà ajkĩ hũm me inxi te ihkên xà nō ton jahpan xà na mã into tũam naihpÿm? — hajÿr.

³Mã Jeju te me ipar ne me imã:

— Nee mã ihkên nō cwÿrjapê into tũm nare, ne nee mãhũm me inxi kên nō cwÿrjapê cute hajÿr nare. Ampona ri into tũm? He Pahpãm te hũmre ita kôt carôt tÿjti to ipipê to prãm to ri, cute to into tũm. ⁴Pom hãn ne ihtÿj amcro kam me hàpên xà to mehàpên to me ipa, ne caxwari nee me hàpên nare. Itajĩkjê na mã ite hajÿr. Na wa ha cormã ita ri pjê kamapu imōr reria mã itÿj, por cute ajpên ikujahêc ata mã, apu ijapên to ipa. Ne wa ha ma jũ caxuw hacpÿ mã tē, ne nee hipêr ita ri cumã ijapên nare. ⁵Ne pom pyt me parit xà caxuw me pamã pjê çujro, cu me rĩt, ne me ampo pupu ne me hahkre pej, ita jĩkjê na mãipê me cumã Inxū te amji kam hapac xà cunea tohahkre catê, mãr quê mehçunea me hahkre pej — hajÿr. ⁶Hō, cute ita jarên to hajÿr jirô pê mã ri cutepjê kam harcô mên, ne to pjê to incire ne to ihtô, ne to carêc necumã into na to ihtêm, ne cumã harkwa to:

⁷— Tē ne Kujahêc jō cô kam akucçuhhō — hajÿr. Mã into tũm ata te mōr ne ihkuc cuhôn, ne hacpÿ ne amji jaxàr, ne ramã ampo cunea

pupun to mō. ⁸Mã cahi na mehkri catêjê me, hâhwÿr na cute mehõmpun pejtu atajê te me hõmpun, ne ahna me ajpên cukijto:

— Xà into tûm ihkri ne me pahna ahwÿ ata mã? — hajÿr.

⁹Mã mehkwy me cumã:

— He taa mã ri! — hane. Mã mehkwy me cumã:

— Quê nare! Taa mã nare! — hane. Mã mehkwy me cumã:

— He mã ajte cupê hÿrãcti — hane. Mã me cumã amjijarên to:

— He pa wa! — hane.

¹⁰Mã cute mehcukij ne me cumã:

— Ne mër jû mã mã ate ne atÿj rit? — hajÿr.

¹¹Mã me cumã:

— He jûm japyrÿ te Jeju ata te ri harcô to pjê incirrene carêc na ton, ne ito na imã to ihtêm ne imã: “Tê ne Kujahêc jô cô kam ca akuc cuhhõ” hane. Wa ma mō ne ite ikuc cuhhõn, ne amji jaxâr, ne ramã ampo cunea pupun to imõr pyrentu — hane.

¹²Mã ahna mehcukij ne me cumã:

— Jô ri mormõ jûm xÿmre ita apu mō? — hane. Mã mecumã:

— Pÿpÿn — hane.

Pê Parixêw catêjê me ahcukij

¹³Mã ma me cupê Parixêw catêjê wÿr, por pê mam into tûm ata to me mō. ¹⁴Ne por pê amcro nō na Jeju carêc to ihtô, ne hÿmre into tûm ata na to tê, ne hacpÿa mã cumã irit to impej jô amcro ata kam pê mehkôt xà jô amcro. ¹⁵Mã Parixêw catêjê kwÿ te ahna mehcukij ne me cumã:

— Jû mã mã cute aton ne acaprâr? — hajÿr. Mã mecumã:

— Pjê kam cute harcô mên ne to carêc to ihtô, ne ito na imã to ihtêm, wa ma tê ne ite ihcuhhõn ne irit pejpyrentu — hajÿr.

¹⁶Mã Parixêw catêjê kwÿ ajpên mã me harên to:

— Por jûm te ita ton ata pê nee Pahpãm tekjê nare. Xàajki Pahpãm jarkwa kôt mã cute hâpên xà ita to hajÿr? Ne mër ampo na mã nee me pahkôt xà jô amcro ita pupun, ne amji mã hÿpanare, ne ihtÿj apu ahna apê? — hane. Mã mehkwyã nō te me cumã harên to:

— Xà quê ajki jûm kêanre ata ihtÿj carôat to ampo pihho catia pejti atajê nō ton to hane? — hajÿr. Ne ajpên mã me harên itacwÿrjapê cute amji to me ipicapôn. ¹⁷Mã hipêr Parixêw catêjê atajê te ahna mehcukij ne me cumã:

— Ca ate cute amã ato tûm caprâr na amji jarên, nejû mã mormõ ca to amji kam gapac to? — hajÿr. Mã mecumã:

— Imã cupê Pahpãm jarkwa to ihcakôc catêjê nōari — hane.

¹⁸Mã Juta catêjê jô pahhi kwÿ te nee amji mã, jûm te into tûm caprâr, mã hacpÿa mã irit na, amjimã me to hajÿr nare. Cwÿrjapê ri cute hÿm me inxi na mehâhwÿr, cute ahna mehcukij prãmtê. ¹⁹Mã hÿrmã me cator, mã cute ahna mehcukij to:

— Xà me akra mã ita? Pê ca into tùm ita na ihpým na me imã harẽ, nõ na mã ajte ihtýjrít? — hajýr.

²⁰Mã hũm me inxi atajê me cumã:

— Wa cupê me ikra na ite me hahkre pej, ne pê into tũamna ihpým.

²¹Ne pom jũm te caprãr, mã hacpýa mã irít ita na ri, me ipê hahkre kêatre. Ne ramã ihkàhtu. Mehcukij, quẽ ha taa me amã amji jarẽ — hane.

²²Ampo na pê hũm me inxi me cumã harẽn to hane? Nee mã ampo na nare. Quẽ ha jũm te Jeju pê, por pê Crixto to Pahpãm awjahkre ata jarẽn pejti to harẽn na, quẽ ha ma cute me cuprõn xà pê me jũm cator, quẽ ha jũ caxuw hacpý ne amji jaxàr nare na, cute me hahkre pej. Na ri nee me kam mare mãme cumã Jeju pê me pahkritxwý jarẽn xà impejti nõ jarẽn nare. ²³Cwýrjapê pê me hũpate hũm me inxi me cumã harẽn to:

— Ramã ihkàhtu, mehcukij, quẽ ha taa me amã amji jarẽ — hane.

²⁴Ne hipêr cute me hũmre into tùm ne hacpýa mã irít ata na hàhwýr, ne me cumã:

— Me imã ahêj jicu ne Pahpãm kam mare mã ampeaj kam me imã gũjarẽn na amji to. Ampo na? He waite me Jeju kêanre na me hahkre pej — hajýr.

²⁵Mã into tùm ne hacpýa mã irít ata me cumã:

— Pýpýn, ipê Jeju kêanre ita na hahkre kêatre, ne ampopijakrut ita na ri imã amji jahkre pej he, mam ito tùm, newa itýj ita caxuw rít — hane.

²⁶Mã hacpý ma mã cute mehcukij to:

— Jũ mã ri cute aton ne amã ato tùm ita toimpej? — hajýr.

²⁷Mã hipêr me cumã:

— Wa ite ramã me amã amji jarẽn, ca ma ame ipar caca. Nemêr ampo caxuw mã ca hipêr ahna me icukij? Xà ca ha ajkĩ hanea ne amji to ihkõt me apa catêjê na me amã amji to prãm? — hane.

²⁸Mã cute me hũn kam ihtêm, ne me cumã:

— He apêa ri ihkõt apa catê, ne me ipê ri Mojxe xwý teamji kam hapac xà kõt me ipa catêjê. ²⁹Ne wa ite me Pahpãm te Mojxe xwý mã ihcakõc, necumã ampo to hahkre na me hahkre pej. Ne jũm xũmre ita, wanee ite jũ rũm cator na me hahkre pej nare — hajýr.

³⁰Mã me cumã:

— Pýhàpà! Xãmte me apê jũ rũm cator xà ita na hahkre kêatre? Cakrõ mã ihtýj cute icaprãr, wa hacpýa mã itýj rít. ³¹He me pahcunea mã Pahpãm te mehkên catêjê imparnare na me pamã hahkre pej. Ne por amji mã me Pahpãm cupa, ne me cumã, cute ampo na ihprãmti xà ton to me ipa atajê ri, ihtýj quêt me kampa. ³²Ne cu rý jũ caxuw pjê te amji ton pê mã, me pahnõ te jũm te jũm to tũam na ihpým ata caprãr na me harẽn parnare. Mã ihtýj Jeju te icaprãr, ne imã ito to impej. ³³Xà quẽ ajkĩ Pahpãm ihkujahêc nare, quẽihtýj ajkĩ ampo itajê nõ to? Hãpà, ne imãa ampeaj kam ri Pahpãm te ihkujahêc — hane.

³⁴Mã cute mempar, ne me cumã harkwa to:

— Pê ca apÿm pê akên ton kam tẽ, nõna mã ca ajte cormã me ipê pahhi catêjê mã ampo tohahkre prãm? Me ipê ahna ihkaj na! — hajÿr. Ne ma cute pŏ mã cute me cuprŏn xà jÿrkwa pê me into tÿm atato cator. Cwÿrjapêquê ha nee jÿ caxuw hipêr cute me cuprŏn xà ata mã hàr nare.

Me cupê Pahpãm te amji kam hapac xà jahkre kêatre atajê

³⁵Mã Jeju te, cute me cuprŏn xà jÿrkwapê pŏ mã me hÿmre ata cator na harên par. Na rí apu hapê ne ahna cator ne cute ihcukij to:

— Xà ca ha ajkí atÿj Pahpãm kra to amji mã ahimpej? — hajÿr.

³⁶Mã cute Jeju mã harkwa to:

— Ijŏ Pahhi, jÿm pê mã Pahpãm kra ita? Wa itÿj amjimã to ihmpej — hajÿr.

³⁷Mã Jeju te cumã amji jarên to:

— Pom ca ipupu ita! He pa wa amã icakôc — hajÿr.

³⁸Mã hÿmre ata te Jeju kînte amji crire na Jeju mã amji jarênprãm to, cuna mã ihkŏn krã na hÿr, ne cumã:

— Wa ha itÿj ato amji mã ihmpej — hajÿr.

³⁹Mã Jeju te cumã hÿjarên to:

— He wa nee mento tÿm caprãr to pit mã pjê ita wÿricator nare. Ne ite mempej te amji kam me hapac xà me, mehkên te amji kam me hapac xà pupunprãmte wa icator. Ne wa itÿj mento tÿm caprã, mãr quêhacpÿa mã me irít pej, ne ihtÿj me ampo cunea pupun to me ipa. Ita jÿkjê na mã wa itÿj me cumã Pahpãm te amji kam hapac xàto hahkre to ipa, mãr quê me hahkre pej, ne ihtÿj ihkôtme ipa. Mã mehkwy ihtÿj, cute ramã me Pahpãm jarkwacunea jahkre pej na ame amji cãmjÿ, atajê pê ihhêj rÿm mento tÿm pyrãac. Ampo na? He nee cormã me cumã Pahpãm jarkwa jahkre pej nare, na wa ite me cuna mã icakôc to prãm to, wamehwÿr icator — hajÿr.

⁴⁰Mã curi me cahê na Parixêw catêjê kwÿ ihcuhhêatajê te me Jeju cukij to:

— Pÿhàpà! Xà mŏrmŏ ajkí hanea ne me ipê mento tÿampyrãac, ne me ipê Pahpãm jarkwa jahkre kêatre? Hãpà! He wa itÿj ite me Pahpãm jarkwa jahkre pej — hajÿr.

⁴¹Mã Jeju me cumã:

— Quê ha jÿm to tÿm amji jarên to: “Me anŏ itehcajpa, jÿ wÿr wa ito tÿm ita kam ahte mŏ” hane, ne me kam mare mã kre kam ihpÿm na, quê ha nee taa amji curê caxàr nare. Ne me apê Parixêw catêjê te neeme hajÿr nare. Me apê jÿm to tÿm te amji jahkre kêatre ata pyrãac. Ne ihtÿj irít na amji jarê, ne ma jÿm te ihtehcajpar na apuihcaca, ne amjia kôt kre kam ihpÿm ata pyrãac. Ne ca me amji jarên to: “Ramã meimã Pahpãm jahkre pej” hajÿr cacrô, cormã me apê Pahpãm jahkre kêatre. Cwÿrjapê ca rÿ ate me amji curê caxàr ne me akên mã me axàr — hane.

Jeju pê me pajamār catê

10 ¹Mã Jeju te hipêr mehcunea mã harên to: — Wa ha me amã ijūjarên xà nō ita jarē. Ca ha ihkôatme ijahkre pej. He Pahpām himpej xà atapê ihhêj rūm kwÿc kam, cute me carà cahàcre hôhtijamār xà ata pyrâac. Ne hÿrmã harkwa pyxít peaj. Ne por qué ha jūm nee carà cahàcre jō kwÿc jarkwa na hàr nare, ne ihtÿj intoj ne hàr ata pê ri me hàhkĭjxi, ne cupê me hàprêa kam me cupê ampo cwÿr catê. ²Ne por qué ha harkwa na axà ata pê ri carà cahàcre hôhti jamār catê. ³Qué ha harkwa jihê rên catê caxwām pê jÿ ata ihtÿj cumã harkwa jihê mẽ, qué ha axà ne hō carà cahàc mã haprÿa na akij, qué ha ihtÿj hōkre kampa. ⁴Ne hÿrmã pra, qué ha ma kwÿc pê to cato, pō mã, ne ma mam cumã mō, qué ha ihtÿj ihkôt ipa. Ampo na? Ihtÿj hōkre kampa na ri. ⁵Ne jū wÿr qué ajteare mã jūm kôt pra. Qué ha ma cama jū kam cupê pra. Ampo na? Jū wÿr qué cute jūm cahkrit jōkre par nare ne hahkre pej nare kam ihkôt pra — hajÿr.

Jeju pê Pahpām wÿr me pancjêj xà jō pry

⁶Hō, Jeju te me cumã hūjarên xà ita to hajÿr. Mã nee cute mempar ne me hahkre pej nare cormã, por cute me cumã ampo jarên xà ata na.

⁷Cwÿrjapê ri hipêr Jeju te me cumã hūjarên xà ita kôt harên to impej ne me cumã:

— Wa ampeaj kam me amã amji jarē. He ipê, por harkwa nacarà cahàcre incjêj xà ata pyrâac. Cwÿrjapê wa ha nee me hÿrmã me curê xwÿn cjêj na me hamār, qué ha me hÿrmã mencjêj nare.

Jeju pê me pajō Pahhiti impeaj

⁸— Ne por qué ha icumam ramã me pra atajê pê ri me hàhkĭjxi, ne me cupê me hàprêa kam me cupê ampo cwÿr catê, mã me ikwÿ pê carà cahàcrepyrâc atajê te nee me hōkre par nare. ⁹ÿhÿ, ipê Pahpām te me hamār xà ata wÿr harkwa. Ne qué ha jūm ina Pahpām wÿr axà ata, qué ha ampo kên cunea pê amji pytà. Qué ha cupê hō parxa pyrâc ne ihtÿj acjêj ne hapôj, ne apu hàpânto ipa. ¹⁰Ne ikĩnte me hàhkĭj xi atajê qué ha cama me hàhkĭj me, cute mecarà cahàcre hôhti curan ne me to hamre to prãm to, qué ha hÿrmã me pra. Ita jĭkjê na mã me ikwÿ curê xwÿn me hÿrmã pra, cute me to kênprãmte. Ne pa, wa quêt ajpên mehwÿr icator, cute catyt kam amji to meipijapar xà impejti cunea to me amji to ipijapar prãm to.

Jeju pê me pajamār catê impejti ata

¹¹— Ipê me ikwÿ pê carà cahàcre hôhti jamār catê impeaj ata pyrâc. Ne ipê cumã cute amji kam hapac xà jōr catê, na wa itÿjme hÿtâr prãmte

ityc to prām. ¹²Ne por ihpore na pit mā me hâpên catêjê atajê ikĩnte nee mecarà cahàcre jamār to impejti nare. Ampo na? Caràcahàcti hòhti atajê pê nee me hō tekjê nare. Cwÿrjapê quê ha rop cahàc jàprêhti nō ihwÿr cato ne apu cucrà, quê ha cute me hamārto kêanre atajêhūpate nee me to amji japackre nare, ne me cumã hikra, ne ma ame pra. Quê ha pea rop cahàcti jàprêhti ata carà cahàcre hòhti atajê kam tē, ne ihtÿj apu cucrà ne ihcura. ¹³Ampo na? Ihpore na pit mā me apê, na rinee me cumã carà cahàcre hòhti jamār to impejprām nare.

Jeju me mehwÿ mā ajpên jahkre pej

¹⁴⁻¹⁵— Ne ipê carà cahàcre hòhti jamār catê impejti ata pyrâc naInxū mā ijahkre pej, ne hanea ne imã Inxū jahkre pej. Ita jikjê na mā ite hajÿar, ne imã me ikwÿ pê carà cahàcre jahkre pej, ne hanea ne me cumãijahkre pej. Na wa itÿj me hamār to impejti to prām to ityc to prām. ¹⁶Ne mehwÿ pê itekjê atajê, nee ite me hamār xàita mā cormã mencejê nare. Na wa itÿj hanea ne ajpên amji wÿr me to ijãhtêp prām. Na wa ha me cumã akij, quê ha me ijökre kampa, ne mehwÿ me ina me cuprô, ne ajkam me pyxitpeaj. Na wa ha ipê me hamār catê pyxit peaj ata.

¹⁷⁻¹⁸— Ne pê Inxū ramã imã harkwa to: “Ca ha ate jūm te acuran na hamār nare na, quê ha nee acuran nare. Nãmri ca ha ate cute acuran na amji na hamār na, quê ha ihtÿj acura, ca ha atÿj hacpÿa mā atír. Xà caxuw wa iteamã icarôt cunea jôr, ne ate hajÿr xà na ri imã atoprãm” hane. Wa ite Inxū jarkwa kôt hajÿr, cwÿrjapê ri cumã ikĩn — hajÿr.

Jeju to cute me amji kam hapac xà pijakrut

¹⁹Mã Juta catêjê te me ita par, ne hipêr amji to meipicapôn. ²⁰Ne me hàhtôa ne ajpên mã me harên to:

— Apu into kam waj! Ne kam ampo carô kên! Ampo kôt mã ca, cute me amã ampo jarên xà itajê na ame kampa? — hane.

²¹Mã mehwÿ ajpên mã me harên to:

— Jū wÿr quê jūm kam ampo carô kên quê ihcakôc xà to hane! Xà quê ajkĩ jūm kam ampo carô kên quê ihtÿj jūm to tūm caprãr to hane? — hane.

Pê Juta catêjê kwÿ ma ame Jeju caca

²²Ne pê hacpÿa mã Pahpãm jürkwa to impej xà jô amji kĩn na, Jeju Kripinkrên kam apu mō, ta jô putwÿya kam. ²³Pê Jeju Pahpãm to amji kam me hapac xà jürkwa jarkwa mã mencejê xà cwÿrpê hàmkrà xà japÿr te Xarômãw Jô Amkrã ata krac ri apumō. ²⁴Mã Juta catêjê kwÿ te Jeju na me cuprôn, ne ahna me ipixêr, ne cute mehcukij to:

— Ne rÿ pêa mã wa tee ate me imã amji jarên, wa ite me apar pej japê tee meakampa. Ne jū caxuw ca ha me imã amji jarên to impej, wa me

akampa ne me gahkre pej to impej? Ne me imã amji jarê, xà ampeaj kam riakĩ apê Crixto pê, por pê Pahpãm me imã ato awjahkre ata mã ca? — hajÿr.

²⁵Mã Jeju te me cumã amji jarên to:

— Wa ite ramã me amã amji jarên, ca nee ate ijũjarên xà ata kôt amji mã ito me ahimpej nare. Nepom wa Inxũ carôt kôt ijãpên xà pihho pejti ton to ipa itajê, hanea ne ihtÿj ito awjarê. ²⁶Ca nee ajte ikam me gapac nare. Ampo na? Me apê me ikwÿ nare, na ca nee me ikam gapac nare. ²⁷Ne quêt me ikwÿ atajê pê carã cahàcre hôhti atajê pyrãac, neipê me hamãr catê impejti atapyrãac. Na wa ite ramã me ikwÿ pê me ijõ parxa kwÿ pupunpejtu, mã ihtÿj me ijõkre kampa, ne ma ikôt me ipa. ²⁸Cwÿrjapê wa ha nee ampo te me to hamre na me hamãr nare, quê ha Pahpãmcahê na amji to me ipijapar rohnÿtti mã, ne nee jũ caxuw Inxũ pê me ipictornare. Ne jũ wÿr quê jũ caxuw ijũhkra pê jũm mehnõ capa. ²⁹⁻³⁰Ampo na? Por Inxũ te imã me hõr ata ri quêt mehcunea carôt jirõa pêcarôt tÿj, cwÿrjapê quê nee jũm hũhkra kam cupêjũm caxãr nare. Ne taa mã pê imã icarôt ita gõ, na wa me ipipêan. Ne quê ha nee jũ caxuw jũm ijũhkra kam ipê jũm caxãr nare — hajÿr.

³¹Mã hacpÿ ma mã Juta catêjê kwÿ te kên to me amji tÿj, cute me to capêr, ne me to ihcuran prãnte. ³²Mã Jeju te me cumã harkwa to:

— Wa ite me akam mare mã icarõat to ampo pejti pihho jãhtõa ne ton, por Inxũte ton xà na imã harkwa atajêa na. Ne mër ampo pejti itajê nõ incwÿrjapê mã, ca kên to ame ikam gũcapêr prãm? — hajÿr.

³³Mã Juta catêjê te me cumã:

— Wa nee ampo pejti itajê nõ incwÿrjapê apu kên to meacapêr prãm nare, ne pom ca apu apê Pahpãm na amji toacakõc, ita to ca ramã apu Pahpãm mãn kêanre. Neihkĩnte apê me hũmrea to me hũmre, nõ na mã ca ajte apu amji to Pahpãm to apa — hajÿr.

³⁴⁻³⁵Mã Jeju te me cumã harkwa to:

— Pê Pahpãm me panquêtjê mã cute amji kam hapac xà me harkwa gõ, pê me amã ihkãhhôc kam ihhõc. Cu me pahcunea teihkãhhôc ita kam ihhõc itajê nõ te ihhêj xi xà nõjarên nare na me pamã hahkre pej. Ne catyt kam ampeaj kam hũjarênrohnÿtti mã. Ne pê Pahpãm me panquêtjê te me kamhapac xà caxuw me cumã ihkãhhôc ita gõ, ne me cumã:

“Me apê me ikraa to me ikra, cwÿrjapê ri me ate amji kam gapac xà me, iteamji kam ijapac xà pipêan” hane.

³⁶— Ne pa nare, pê Pahpãm icapi ne ajpên ikujate, ite ate me harkwa ita par na me atehcajpar xà caxuw. Cwÿrjapê ri me panquêtjê jirõa pê icati. Na wa itÿj ipê Pahpãmkra impeaj na amji to icakõc. Ne mër ampo na mã ca ame ikam acryc? ³⁷Nãmri wa ha ite Inxũ jãpên xà ton nare na,

ca hanee me ikam gapac nare. ³⁸Nāmri wa ha ite hâpên xà ton na, ca ha atỳj ite Inxū Cati carôt kôt jâpênxà pihho ton ata kôt me ikampa. Ca ha ate ite me amâijûjarên xà to ijûjarên itana me ikam gapac nare cacrô, ca ha atỳj, pom wa hâpên xà to apê itajê kôt meikampa. Ne ihkôat ca ha Inxū me ipipêan, ne me ipyxit peaj na me ijahkre pej — hajÿr.

³⁹Mã hacpÿ ma mã amehpro prâm cacrô, mã ma me hũhkrapê cator.

Pê Côpijapjêr jô cô jĩkjêa kam Jeju apu mō

⁴⁰Ne ma Jeju te amji jaxàr, Côpijapjêr jô cô jĩkjê wÿr, mâr pê curi Jowāw xwÿ ajco cô kam mehcumrâ ata ri. Ne curia apu ipa. ⁴¹Mã me hàhtôa ne hÿrmã me ipa, ne ajpên mã meharên to:

— Pê Jowāw xwÿ pê me cumrâr catê ata, nee Pahpâm carôt kôt hâpên xâpihho pejti te hajÿrjê nō ton nare cacrô, pê ihcunea na ihtỳj Jeju jarên xà to harê atajê, ampeaj kam pê — hane.

⁴²Mã curi me hàhtôa ne cute me Jeju kam hapac, neamji mã me to ihhimpej to me ipa.

Raxaro tyc xà

11 ¹Pê hũmre nō ita japyr te Raxaro ita xà. Ne pêmekkjêjê pê Marij me Marta mea mã krĩ jacot japyr teMehkênupunxà jô krĩ ata kam mehkrĩ. ²Ne Marij ata pê amcro ata na Jeju par kam ampo cacôcuxwati ata jaxwÿ, ne ihkia to cumã incrã. ³Mã Raxaro kjêjê cahãj itajê te Jeju mã hũjarênto hajÿr xà ata kujahêc he:

— Me ijô Pahhi, por amã gō ikwÿ nō kĩnti ataxà! — hajÿr.

⁴Mã Jeju jũpar ne cute harkwa to:

— Quê ha nee hicu xà kam hà ita ihcuran nare. Ne hàata kôt quê ha me hàhtôa ne quêt ipê Pahpâm kra carôt tÿjti na meijahkre pej. Ne hà ata kôt quê ha me hàhtôa ne quêt me Pahpâm carôt tÿjti ata pupu ne amji mã me hũpa — hajÿr.

⁵Ne pê ihtỳj Jeju mã Marta me ihtōj Marij ata kĩn, ne hanea ne cumã Raxaro kĩn. ⁶Mã Jeju te Raxaro xà na harên par cacrô, curia hàhhuc xà ata kamapu mō, ne apu ihkên, ne ahna amcro pijakrut. ⁷Jirô pê mã ri cute me ipê ihkôt me ipa catêjê mãharkwa to:

— Hacme, hacpÿ mã Juta jô pjê wÿr — hajÿr.

⁸Wa me cumã:

— Me ijô Pahhi, mâr curmã curi Krĩpinkrên catêjê kên to ame acapêr prâm ta? Ca ajte ramã hacpÿa mã amji jaxàr prâm? — hane.

⁹⁻¹⁰Mã Jeju me imã:

— Nee ita na cute imã jũ măn nare, ne jũ wÿr quê jũ na me ito. Pom ca me pyt pupu, mã hapôj ne ma acjêjmã caxwa ata jĩkjê na ri ite hajÿar. Ne wa cormã iteijâpên xà jipêj nare kam, quê nee jũ na me iton nare. Ne hanea ne cu caxwari me papa, ne pahtỳj me papihur to ame papa.

Ne pom pyt me pamã ahcujro, cu kam ame papa, ne me pamã papa xà jahkre pej, ne nee amepapihur, ne me pahkên mã me pancjêj nare. Ita jîkjê na mã Inxū te ito hajÿar. Mã Pahpãm teikrã kam imã ite amji jahkre pej jŏr, cwÿrjapê ri imãampo te amji kam hapac xà cunea jahkre pej, na wa nee ikên mã icjêj nare.

¹¹ — Me pajŏ ikwÿ nŏ Raxaro ramã nŏ ne apu gŏr cakrô, wa ha itÿj ihcujrô ne hÿr — hane.

¹² Na wa me cumã:

— Pahhi, quê ha cute nŏ ne hŏt na, quêt taa nŏ ne gŏr, ne amji cajpê. Ampo na? He cormã me hÿrmã me pahcator xà ita ampÿa mã — hane.

¹³ Ne pê tee Jeju ame imã ramã Raxaro tyc na harên tohahkre, na wa itÿj amji mã me to hŏtxwa mã hŏt na amji mã ame to hane! ¹⁴⁻¹⁵ Mã Jeju hirãa pê me imã:

— Ramã Raxaro tyc, ne me acwÿrjapêa ri, ampeaj kam hÿrên ijakry. Quêt taaty, wa nee curi apu imŏr nare na ri ihtyc. Ne ihkŏat ca ha atÿj ito amji mã me ahimpej. Hacme, ne me hŏmpu — hane.

¹⁶ Mã Tome ita me imã:

— Hacme, me pajŏ Pahhi kŏt, quê cuxà me pajipej — hajÿr.

Jeju pê me pahto ihtîr catê

¹⁷ Mã ramã cute kên kre kam me Raxaro jarêt na amcro te cwat, wa Jeju me, me icator. ¹⁸ Mã Mehkên pupunxà jŏ krî ata ri rec pyxit jîkjê kam xa, Kripinkrên wÿr. ¹⁹ Cwÿrjapê pê Juta catêjê hàhtŏa ne me cato, cute me Marta me Marij pupun, ne me cupê hÿjapê cutor prãmte. ²⁰ Mã Marta te Jeju te ajpên hàhtêp to mŏr na harên par, ne ma hÿrmã tē ne cute pry kŏt ihcajpar. Pê Marij curia ikre kam jÿ. ²¹ Mã Marta Jeju mã:

— Ijŏ Pahhi, ca ha ita ri apu mŏ na mã, quê ha neeikjê ipê ihtyc nare, ne ramã ihtyc, ca hakàn pê acator. ²² Cakrô ca ha ahnaa Pahpãm na ahwÿ, quê ha amã ateampo cunea na gâhwÿr xà atajê gŏ — hane.

²³ Mã Jeju cumã:

— Quê ha akjê ihtÿj hacpÿa mã me amãihtîr — hane.

²⁴ Mã Marta cumã:

— Quê ha ampo cunea jamre xà ata jŏ amcro kam ihtÿj hacpÿa mã ihtîr na, imã hahkre pej — hane.

²⁵ Mã Jeju cumã:

— He ampeaj kam ri, ipê hacpÿa mã mehtyc to ihtîr catê. Na quê ha jÿm te ihkên ton to ipa na, quê ha ramã Pahpãm mãa jÿm ata tyc pyrãc. Cakrô quê ha ito amji mã ihhimpej na, wa ha cumã cute amji kam hapac xà tuw pejti gŏ, quê ha Pahpãmmã jÿm ita ihtîr rohnÿtti mã.

²⁶ Ne por jÿm ito amji mã ihhimpej to ipa ata, quê hanee jÿm ata ihtyc ne ihtyc tu nare. Ne ca? Xà ca ha ajkî pijamã ijÿjarên xà itato amji mã ahimpej? — hane.

²⁷Mã cumã:

— Ỹhỹ ijō Pahhi, wa itỳj apê Pahpãm kraa to ihkra naamji mã ato hane, ne imãa apê Crixto pê, por pê Pahpãm pjê ita kamate me ito ahimpej xà na ato awjahkre ata mã ca — hane.

Pê Marij pê Raxaro tōj Jeju cajpa

²⁸Jirô pê mã ri Marta te amji jaxàr ne ihtōj mã hàkjêr ne kyre pê cumã hũjarên to:

— Pajō Pahhi cator ne cute ana hàhwỳr — hajỹr.

²⁹Mã Marij te harên par, ne hãm pyrentu, ne ma Jejuwỳr tẽ. ³⁰Pê nee cormã krĩ mã hàr nare, ne cormã Martaihcajpar xà ata kam, curia pry kam apu mō. ³¹Ne pê ramã hōtpê Juta catêjê kwỳ ikre kamame ipa, cute me Marij jũjapê tête me cumãn prãmte. Ne cute me Marij xãm na me hōmpun, mã hũjarêan kam hãm ne ma tẽ, mã ma ihkôt me pra. Ne pê ihtỳj cute kre wỳr ihtêm ne kam apu incwỳr na amji mã me to hane.

³²Mã Marij Jeju wỳr cator, por curi xa ata ri, ne ihpar cahê na ihkôn krã na hỹr, ne cumã:

— Ijō Pahhi, ca ha ita ri apu mō na mã, quê ha neeikjê ipê ihtyc nare, ne ramã ihtyc, ca hakàn pê acator — hane.

³³Mã Jeju te Marij cwỳr na hōmpun. Ne hanea ne cuteJuta catêjê kwỳ incwỳr na me hōmpun. Ne hōtpê ahna incrycre, ne cumã amji kĩn nare.

³⁴Mã cute mehçukij, ne me cumã:

— Mêr jō ri ca ate me hir? — hajỹr. Mã Marij cumã:

— Ajpên mō ne hōmpu — hane.

³⁵Mã Jeju te ahna kên kre pupun ne apu kam amrã.

³⁶Mã Juta catêjê me ajpên mã:

— Me hōmpu he, cumã Raxaro kĩan to ihkĩn na mã apu kamamrã! — hane.

³⁷Mã mehkwỳ me harên to:

— Hōtpê cute into tũm caprãr, ne quê rỳ mã Raxaro tyc xwỳjrea na jũ na to, quê ha nee ihtyc nare. Nehamre ramã ihtyc, ne jũ mã mã quê ha to? — hane.

Pê hacpỹa mã Raxaro tĩr

³⁸Mã hipêr ahna Jeju crycre, ne cumã amji kĩn nare, mã ma kên kre wỳr tẽ, ne cute kên kre jarkwa pupun, mã kên nōa te kre ata jarkwa jihê, Juta catêjê te amji jarêr xà ata kôt.

³⁹Mã cute kre na harkwa hyr to:

— Me kên te kre jarkwa jihê ita capa — hajỹr. Mã Raxaro kjê pê Marta ita te cumã harên to:

— Ijō Pahhi, ramã harêr na amcro te cwat ita kam ramãihkro — hajỹr.

⁴⁰Mã Jeju cumã:

— Xà wa ite curmã me amã amji jarĕn to: “Ca ha ate me ipar na, ca ha atÿj me Pahpãm carôt pupu” hajÿr nare? — hane.

⁴¹Mã cute me kĕn kre ata jihĕ mĕn. Mã Jeju kàj mã irĭt ne cute Hũm mã harkwa to:

— Inxũ, wa hŏtpĕ amã icakŏc, ca atÿj ikampa pyrĕn riijakry. ⁴²Ampo na mã wa ite icakŏc xà ita ton? He me hàhtŏti atajĕ mã wa ite icakŏc xà ita ton, mã cute me ipar. Ne ate ikujahĕc na me ijahkre pej to prãm to wa ite me cumã hajÿr — hajÿr.

⁴³Ne cute hũjarĕn to hajÿr jirŏ pĕ mã ri cute Raxaro mã hàkjĕr to:

— Ikwÿ nŏ Raxaro, ajpĕn pŏ mã acato! — hajÿr.

⁴⁴Mã por Raxaro tyc ata tĭr pyrentu. Mã cupĕhkà te ihpar me hũhkra cunea cajpre ita kam, jũ wÿr quĕ mŏr pej, na ri ajpĕn pŏ mã toamji rĕn to mŏ. Mã hanea ne ihkuc na hĕ. Mã Jeju te ame hŏmpu atajĕ mã harkwa to:

— Intĕte me cupĕhkà te ihcupu ata pŏ, quĕ ihtÿjtĕ — hajÿr. Mã cupĕ ipŏt par, mã ma pŏ mã tĕ.

Jeju cuna mã mencaca xà kĕanre

⁴⁵Mã Juta catĕjĕ jàhtŏa ne me Marij pupun to mŏatajĕ, te me Jeju te Inxũ carôt kŏt hàpĕn xà pihho pejti ton ata na mehŏmpun, ne ihtÿj amji mã me to ihhimpej pyrentu. ⁴⁶Ne mehkwÿ te nee me hajÿr nare, ne ma cute me amji jacĕn, ne Parixĕw catĕjĕ mã, Jeju te ampo tonxà atajĕ na harĕn.

Pĕ Jeju curan na, me curĕ xwÿn me ajpĕn pa

⁴⁷Mã Parixĕw catĕjĕ me, cute Pahpãm mã mehcajrĕn catĕjĕ jŏ pahhi me, cute me cuprŏn, prohti kam catĕjĕ me, ne cute me ajpĕn par, ne me ajpĕn mã:

— Ampo to mã cu ha ajte me? Nãmri jũm xũmre itacarôt catia to hàpĕn xà pihho pejti pit ton to mŏ. ⁴⁸Cu cama ahna me hamã, ne nee intĕte mehcahpĕrkàr nare, quĕ ihtÿj me cumã ton to mŏ, quĕ ha mehcunea ahna me hŏmpu, ne me kampa, ne ihkŏat meamji kampa. Quĕ ha Roman catĕjĕ jŏ pahhi me hŏmpu, neihtÿj hacpÿa mã me pahna apkjĕ, ne me pahkam tĕ, ne mepapĕ Pahpãm to amji kam me hapac xà jũrkwa pytà, neame pajŏ krĭ to kĕanre ne — hajÿr.

⁴⁹Mã caku ata na Cajpa ata pĕ Pahpãmmã cute mehcajrĕn catĕjĕ jŏ pahhiti. Na ri cute harkwa to:

— Pÿhàpà, ajte me acunea pĕ amji jahkre kĕatre! ⁵⁰Ne imãa ite amji kam ijapac xà te hajÿr he. Quĕ ha jũm xũmre pyxit peaj nety, cu ha nee me pahcunea me pahtyc nare. Nãmri quĕha pyxit peaj te ihtyc nare na, cu ha me pahcunea me pahhi tu. Cwÿrjapĕ ri Jeju pyxit peaj ne ihtyc xà — hajÿr.

⁵¹Ne pĕ Cajpa ihcakŏc xà ata kam, nee amjia kŏtihcakŏc nare, Pahpãm pĕ cumã ihcakŏc xà ita tohahkre. Ne pĕ cupĕ Pahpãm mã cute mehcajrĕn

catêjêjō pahhiti. Cwÿrjapê pê Jeju te Juta catêjê cuneaincwÿrjapê ihtyc na, me cumã amji jarê. ⁵²He nee mã Juta catêjê incwÿrjapê pit mãihtyc xà nare. Ne pjê cunea kam, mehcuea pê Pahpãm kraame ipicràn atajê to cute cuprôn, ne me to pyxitpeaj prãm to, quê ha ihtÿj ty.

⁵³Ne amcro ata kam cute me Jeju curan prãmte pê me cupê Juta catêjê jō pahhi kwÿ cunea ahna me ajpên pa. ⁵⁴Cwÿrjapê pê nee Jeju hirã pê ajco apu Juta jō pjê kam ipa nare. Na wa ma, por pô na pire mã, pjê kam pô kam me hamreare ata wÿr Jeju me, me mô, por Píxôhrôt jō pjê ata wÿr, necuria wa me ijãhhuc.

⁵⁵Ne pê ramã amcro incrêre me Hakren xà jō amji kÿnwÿr. Pê amji kÿn ata xwÿjrea na Juta catêjê jãhtôa ne Krîpinkrên wÿr me cato, cute ame ampo kên ton atajê to me hapac kêt, ne ame amji cümpej. Ne amji kÿn ata na mempejti na ame ipa xà caxuw. ⁵⁶Ne pê mehcuea ame Jeju japên to me ipa, ne ajco ahna ame ajpên cukij, Pahpãm to me amji kam me hapac xà jürkwa kam. Ne me ajpên mã:

— Pÿhàpà, mormô quê ha ajkî ihtÿj ajpên Jeju amji kÿn ita wÿr mô, nare, quê ha nee môr nare? — hajÿr.

⁵⁷Me Pahpãm mã cute mehcajrên catêjê jō pahhi kwÿ me, me cupê Parixêw catêjê kwÿ me, cute me Jeju jaxàr na me ajpên par. Cwÿrjapê ri cute ahna meharkwa, quê jü ri jüm hõmpu, ne uua ne me cumã harê, por jü ri apu môr xà ata ri.

Pê Marij Jeju par kam ampo cacô na hî jãhwÿrti ata jaxwÿ

12 ¹Ne ramã me Hakren xà jō amji kÿn wÿr amcro te xêj, wa ma Jeju me, Mehkênupunxà jō krî wÿr me mô. Por pê curi hacpÿã mã Raxaroto ihtîr mã ihkrî ata ri. ²Mã cute Jeju te hacpÿã mã Raxaro to ihtîr na me toamji japackre, ne amji mã me to catia to prãm to ri, cute me cumã hõ ton. Mã Marta apu mehtehcajpa, mã Raxaro me cahê na me hãpàn xà na jÿ. ³Mã Marij te ampo cacô cuxwati atajaprÿ te nartô cacô te rit cahti na hajÿr ata pyr. Ne pê ampeaj kam nartô cacô ata na hî ahwÿ. Mã cute Jeju par kam haxwÿr, ne ahna haxwÿr partu ne cute to cumã ihpar cuhhôn, ne ihkîa to cumã incrà, mã ikre cunea cuxwaa to cuxwa.

⁴Mã me ikwÿa nô pê Juta Carijot te cormã Jejukên mã mên catê ata te harkwa to:

⁵— Pom ampo cacô ita na ihpore jãhtô na cute xêj crê, ne cupê caku pyxit japên xà jō porea. Ne mër ampo na mã cama cutehaxwÿr, ne nee cute ihpore na to hàhpan ne imã hõr, wa ite me cupê hamreare atajê mã hõr nare? — hajÿr.

⁶Ampo na pê Juta Carijot ihcakôc xà ita to hane? Nee mã pê ampo nanare. Pê hàhkij xi, na pê harkwa ita to hane. Pê neecute me cupê hamreare atajê tehcajpar prãmte harkwa ita to hajÿr nare. Pê ajco me cupê me hõ pore incjên xà cwa, ne ajco me cupê ihpore to ahkî na pê. Pê ramã hàhkij ita to amji pyrãc tu.

⁷Mã Jeju te cumã harkwa to:

— Quêt taa Marij ito hane! Cute ijarêt xwỳjrea na ramã icuxwa, me panquêtjê te amji ton xàa kôt. ⁸Ne me cupê hamreare atajê, quê ha hõtpê ame ipame acahê na. Ne pa nare, wa ha nee ame acahê na imõrkam to icrà nare — hajỳr.

Pê Raxaro curan na me hõ pahhi kwỳ ajpên pa

⁹Mã Juta catêjê jàhtôti atajê te meJeju te Mehkênupunxà jõ krī kam apu mõi na me harên par. Ne ma curi me cator. Ne nee pê Jeju pit wỳr me mõi nare, ne Raxaro me ajwar hỳrmã me mõi, por hacpỳa mã Jeju te to ihtĩr ata. ¹⁰Mã hamre, Pahpãm mã cute mehcajrên catêjê jõ pahhi kwỳ te meajpên par, ne hanea ne ihtỳj me Raxaro curan prãm. Ampo na? Nee mã ampo na nare. ¹¹Pê Juta catêjê jàhtôa ne Raxaro tĩr xà ata kôt, me hõ pahhi mãme hikra, ne Jeju to amji mã mehhimpej to me ipa na pê.

Pê me hakrya kam, Krīpinkrên mã Jeju axà

¹²Ne amcro ata na, pê me hàhtôa ne me Hakren xà jõ amji kĩn na ame ipa. Ne cute me Krīpinkrên wỳr Mehkênupunxà jõ krī pĩn Jeju mõi na me harên par. ¹³Ne cute me ampo hõ pê crowràti hõ pyrãcti ita to me amji tỳj, ne ma hỳrmãme to pra, cute me to ihcajpar prãmte. Ne me to ihcajpar, ne me hakryte cama cumã ame to hàpêr to me ipa, ne ame cumã caràr to:

— Pahpãm cati ne impej! Pahpãm ri me pahwỳr mõi! Pahpãm te amji japrỳa na mepahwỳr me pajõ Pahhiti kujahêc! Me imã Pahpãm te me pajõ pjê to ihhimpej na to prãm! — hane.

¹⁴Mã Jeju cawrô cahàcre nõ ita na cator, ne kam hỳr ne to mõi. Por ahnaa rỳ pêa mã ramã Pahpãm jõ kàhhôc kam harên to:

¹⁵“Krīpinkrên pê Xijãw jõ hàpkàjti me, ca kam me akrī atajê, ca hanee hipêr amji mã ame ampo cupa nare.

Nãmri ramã ajpênme gõ Pahhiti cawrô cahàcre intuwre nõ kam hỳr ne to mõi he” hane,

mã ahnaa.

¹⁶Ne amcro ata kam pê wa nee me ipê ihkôt me ipacatêjê nõ ampo atajê nõ kam ijapac, ne hahkre pej nare. Mã Jeju tyc, ne hacpỳa mã ihtĩr, ne ma Pahpãm wỳr hàpir, wa cormã ite me ita toamji japackre, por ramã ampo te to hajỳr xà ata na Pahpãm jõ kàhhôc kam ahna ihhôt ata to. Na pê ihtỳj to hanea to hane.

¹⁷Mã me hàhtôa ne Jeju kôt me mõi, mã me kam maremã cute carôt tỳjti to Raxaro mã hàkjêr, ne hacpỳamã to ihtĩr ata na, cute me hõmpun catêjê te ihtỳj meharên cràn. ¹⁸Mã me hàhtôa te me harên par, na ri ma mehcajpar to me mõi. ¹⁹Mã Parixêw catêjê kwỳ ajpên mã me harên to:

— Me hõmpu he, wÿr cu ame amji mã hamã ne intête mecuta. Ne ramã pjê cuneapĩn mehcunea ihkôt ame ipa — hane.

Cu ha mam pahte me amji kam me pajapac xà kên ita mã hikra

²⁰Ne por Krĩpinkrên wÿr, amji kĩn wÿr me mō atajê kôt hõtpê Crec jō pjê catêjê kwÿ me mō. ²¹Atajê ma me ikwÿa nō japrÿ pê Pirip ata wÿr me pra. Ne Pirip ata pê Tep jō krĩ kam Hípôjajo jō pjê kam me xa atajê jō xũmre nō. Mã cute ahna me hàhwÿr, ne me cumã:

— Jeju pupun prãnte wa me mō — hajÿr.

²²Mã Pirip hō ikwÿ nō Antre wÿr tē, ne cutecumã hũjarēn, ne ma ajwar Jeju wÿr me mō, ne me cumã:

— Crec catêjê kwÿ cator, ne ame amã ihcakôcto prãm — hane. ²³Mã me cumã:

— Ipê me Ahàkà, ne ipê, por pê cōjkwa kam amji to incirre ne hũmrea na amji to, ne me awÿr wrÿ ata. Ne hamre ramã ite hacpÿ mã amji jaxàr, ne icati ta to, icati xàa kam ramã hàhhuc to mō. ²⁴Wa nee ame amã ihêj nare, ampeaj kam wa me amãawjarē. Quê ha pjê kam jũm ampo hy kre, quê ha cute amji to ipixô nare na, quê ha nee kam hiprãj ne ihhy nare, ne ihhy atapit cormã nō. Nãmri quê ha cute me hàmir na, quê haamji to ajxô ne kam hiprãj ne ihtÿj kam ihhy hàhtôa tohàhtô. Jĩkjê na mã ite hajÿr. Wa ityc ne amji jarêt nare na mã, waha nee hacpÿa mã me acunea to atĩr nare. ²⁵Jĩkjê na mã me acunea te me hajÿar. Ca ha me amã mam ate amji kam me gapac xà kên tũm ata kĩn, ne me amã hapêti na, ca ha nee me amji mã intuw pejti ita nō pyr nare. Nãmri ca haate mehcaca, ne me cumã hikran na, ca ha hirôa pê me amji mã ate amji kam me gapac xà tuw pejti ita py. Ata quê ha me amã irya to iry, caha cōjkwa kam Pahpãm cahê na ame apa rohnÿtti mã. ²⁶Ne quê ha jũm te ikôt amji ton, ne imã hàpên prãm na, quê ha jũm ata ipynã, ne ikôt amji to. Ne wa ha jũ ri apu mō, quê ha hanea ne ikôt imã hàpên catê apu mō. Quê ha Inxũ pê Pahpãm, por jũm imã apê ata to impejti ne.

Pê Pahpãm Jeju pê ihkra na harê, cōjkwa pĩn

²⁷— Wa ita kam imã amji kĩn nare catia na ite amjicajpêr. Ne jũ mã wa ha ajte? Xà wa ha ajkĩ amji mãInxũ na ahwÿ ne cumã: “Inxũ, itête ampo kên te ito jũ mãn xà itacamē” hane? Hãpà, jũ wÿr wa ha cumã ijarkwa to hane, he ita caxuw wa icator, pjê ita kam — hajÿr. ²⁸Ne cute Hũm mã:

— Inxũ, imã ate amji mã gaprÿ to catia to cati na atoprãm — hajÿr. Mã cōjkwa pĩn jũm jökre ita tecumã:

— Wa ramã ite to cati, ne wa ha cormã hipêr itÿj to cati to mō — hajÿr.

²⁹Mã me hàhtôti atajê te me hōkre ita par, ne mehkwy ajpên mã me harên to:

— Pahhàjê jàwrãrac mōrmō — hane. Mã mehkwy amji mã me to:

— Còjkwa kam Pahpām jarkwa to imprar catê nō te cumāihcakôc — hane. ³⁰Mā Jeju te me cumā harēn to:

— Nee mā icwỳrjapê jūm jōkre ita cakôc nare, meacwỳrjapêa ri hōkre ita cakôc. Ampo na? Ate me hōkrepar xà ata kôt ca ramā ate Pahpām teihtỳj ikam hapac na, me ijahkre pej. ³¹Ne ramā pjê cunea kam ame icurê catêjê cukij ne mehkên mā me hàr xàa kam ri hàhhuc. Ne por me pahcurê xwỳn pê Xatanaj pê pjê kam me toihhimpej catê ata, quê ha Pahpām mentête hūrê. Quê hanee hipêr me kam ihhimpej nare. ³²Quê ha pĩ na me ixô, ne kỳj pê ina me hām, wa ha kam ityc to imōr me ajkaam amji wỳr me hàhtôa ne me to apkjê, mār quê ito amji māihhimpej to me ipa — hajỳr.

³³Ne hūjarēn xà ata to pê ajco cute jū mā mehcuran xà ata to amji jarēn to ipa.

Jeju te amji kam hapac xàa to me papa xà

³⁴Mā me hàhtôti atajê te me Jeju kam hapac ne me cumā:

— Pỳhàpà! He wa ijōtpê hān ne me Mojxe xwỳ jō kàhhôc cahyt, nekam me, por pê ramā Pahpām me pamā jūm te jū caxuw me pahto ihhimpej xà to me pamā awjahkre ata jarēn par. Ca ajte còjkwa pĩn me hūmrea na ate amji ton, ne awrỳc ne apu apa na, me imā amjijarê. Cwỳrjapê ri apê ihhêj rūm, por pê Pahpām jūm to me pamā awjahkre ata. Ne quê ha apê Pahpām te ato hūjahkre ata mā impàràpên, ca haatyc nare, ne me icunea to ahimpej kam acrà tu ne, ne jū caxuw atyc xà nare. Nōna mā ca ajte, cute me acuran ita na amjijarê ita kam, me icunea pê gahkre kêatre. Na ca ha hirāa pê me imā apê jūm te còjkwa pĩn me hūmrea na amji jahkre ne iwrỳcita na amji jarê, wa me gahkre pej — hajỳr.

³⁵Mā Jeju me cumā:

— He cormā nee ate me ite me amā ampo jarēn xà itajê cunea par xà hamreare, ne jūa caxuw ca ha cormā me kampa ne me hahkre pej. Ne me ijūjarēn xà ita kampa ne mehkôt hakop. Ne me hōmpu he, cu ha hàhcujro xà nō to ampo cujro, ne hōmpun kênre nare, quê ha ampo kêanre na, cu ha me hōmpu ne me hahkre pejpyrentu. Na ri ipê hàhcujro xà nō ata pyràac. Na wa ha ihhêj ne me acujro, ne me amā ate amji kam me gapac xà pupu, mōrmōajkĩ impej, nare, mōrmō ajkĩ ihkêanre. Na ca haihkôat amji mā ate amji kam me gapac xà jahkre pej. Ampona? He wa ha nee ita ri me acahê na apu imōr kam to icrà nare, ite me amāijàhcujro xà caxuw. Na wa ha ita ri cormā apu imōr kwỳakam, ca ha amji mā ate amji kam me gapac xà to antuw, ne me to intuw. Nāmri quê ha ahtūm nare wa ha ma me apê tē, quê ha me apê awcapàtkô, ne jū mā ca ha me, ne ite me atehcajpar nare kam, ame amji māhamā? Ne jū mā ca ha me amji mā me ate amji kam me gapac xà to meantuw? Wỳr ca ha ame amji mā hamā.

³⁶Nāmri ca ha ate amji mā me ito ahimpej na, ca hagàhcujro jarwryhti ita

na me akrĩ, ne icuxà jũmjê kwỳ kujro, mār quê cute amji kam me hapac xà to me antuw — hane. Hõ, Jeju te me cumã ihcakôc xà to hajÿr, ne ma tẽ, ne me cupê ipimxur.

Pê me hàhtôti atajê nee amji mã me Jeju to ihhimpej nare

³⁷Ne pê ramã me kam mare mã Pahpãm carôt tÿjti ata to hàpên xà pihho catia to, pê me hõmpu cakrô, nee me kam hapac ne amji mã meto ihhimpej nare. ³⁸Na pê Ixaj xwỳ pê Pahpãm jarkwa to ihcakôccatêjê nõ ata ramã ita na ihhóc to hane he:

“ÿhÿ me ijõ Pahhiti, ca ate me cumã acarôt tÿjti ata to apipê, ne to gápên xà catia ton na ite me cumã garên cakrô, mã nee jũm te me ipar nare” hane.

Hõ, ita na pê Ixaj xwỳ ihhóc, mã ahnaa cute.

³⁹Ampo na? He mehkwy amjia kôt ma amempar caca, na pê Ixaj xwỳ me ahna ihhóc to hane he:

⁴⁰“Pahpãm te cute ampo pupun cupate, ihhêj ne me to into puror, ne cute mempar cupate, ihhêj ne me to me hapactuare. Cute amji kam hapac xàto me ipintuw ne hÿrmã amji to me ipipkjêr, mãcute me to impej cupate” hane.

Hõ, pê ma ame Pahpãm parcaca, na pê me to hane.

⁴¹Ampo na pê Ixaj xwỳ ihhóc to hane? Nee mã ampo nanare, pê ramã mam rÿ pêã mã Jeju te carôt tÿjti to ampo catiatio hàpên xà ata na me hõmpu, na pê ahna ihhóc to hane.

Pê pahhi kwỳ cupate, nee ame Jeju jarên pejti to me harên nare

⁴²Mã me hàhtôa ne nee me Jeju par nare cakrô, mã Juta catêjê jôpahhi kwỳ te hõtpê mempar. Ne nee cute mekam mare mã, amji mã me Jeju pejti na me harên nare. Ampona? Nee mã ampo na nare. Parixêw catêjê te cute mecuprôn xà intête, põ mã me hapôj mã hipêr na mencjêj nare cupate. ⁴³Ne me cumã Pahpãm te mempejti na me harên na ihkĩn nare, ne ajte me cumã me hũmre te mempejti na me harên na, amji to prãm.

Pê Pahpãm Jeju mã ampo to hahkre atajêã to ri, me cumã hahkre

⁴⁴Mã Jeju te ihkrãhhia kam mehcunea mã hũjarên to:

— Quê ha jũm te amji mã ito ihhimpej na, quê ha neeipyxit peaj ne amji mã ito ihhimpej nare. Quê ha cute ito amji mã ihhimpej me ajkaam, por cute ajpên ikujahêc ata to hanea ne amji mã ihhimpej. ⁴⁵Ne hanea ne, por jũm ipupu ata, ramã ajpên cuteikujahêc catê ata pupu. ⁴⁶Ne pjê

ita kam cute me amji kam hapac xà kēanrejāhtô, ne me cupê cute amji to me ipintuw jahkre kêatre. Na ri ihhêj ne awcapâtkô kam ame ipa. Na wa ihhêj rûm ipê mehcejroxà, ne me hÿrmã icator, ite cute amji kam me hapac xà to ipintuw ne ihhêj ne awcapâtkôti to mentêtehamre xà caxuw. Na quê ha jûm te amji mã ito ihhimpejna, wa ha itÿj cumã cute amji kam hapac xà to antuw.

⁴⁷⁻⁴⁸ — Ne por ma ame icaca atajê me, ma apu ite mehapaackre xà itajê caca atajê, quê ha ihtÿj jÿ caxuw hahpan xà na Pahpãm mã meamgô. Ne pa nare, wa nee ite me hÿhkra kam ijâmcwÿr xà caxuw pjê ita wÿr icator nare. Quêt ite me to impej ne mehken catia pê mehÿtâr xà caxuw wa icator. Ne pom wa me cumã icakôc xà ton to ipa itajê, quê ha me ahna ahwÿ, quê ha, por jÿ caxuw ampo cunea jamre xà ata kam, ihtÿj me cumã amgô.

⁴⁹ — Ampo na? Inxÿ rûm ri ajpên icakôc xà itajêimã pra. Na wa Inxÿ te ampo to, ite icakôc xà nairên atajê to pit mã, me cumã icakôc to ipa. Wa neeamjia kôt icakôc to ipa nare. ⁵⁰Na quê ha jûm te icakôc xà atajê kam hapac, ne toamji mã ihhimpej na, quê ha Inxÿ cahê na amji toipijapar rohnÿtti mã. Caxuw ri, Inxÿ te imãite to ijÿjarên xà itajê jôr — hajÿr.

Pê Jeju ihkôt me ipa catêjê mã ihpar cuhhô

13 ¹Pê ramã me Hakren xà jô amji kîn jô amcro wÿr amcropÿxit peaj ne nô. Pê Jeju te ihtyc, ne pjê ita rer, ne mahacpÿ mã côjkwa wÿr, Hÿm wÿr cute ihtêm jô amcro ramã hàhtêp na, cumãhahkre pej. Ne pê hôtpe cumã pjê kam me cupê mehô tekjê atajê kîn, ne cumã mehkiân to mehkiân ita na mã ahnaa ihtyc xà ita mã cute to hahêr. Mãcute me ikînti ita to me imã hahkre tohajÿr he.

²Wa Jeju me, me ipê ihkôt me ipa catêjê me, ramã caxwa xàa kam, meikrî ne ame apà. Pê ramã caxuwaw mepahcurê xwÿn pê Xatanaj ata me ikwÿ nõ japrÿ pê Juta Carijot ata mã, cute amji kam hapac xà kēanre ata jôr, mã ihkôt aracri cute Jeju kên mã mên xà caxuw. ³Mã Jeju te, Hÿm te cumã carôt cunea jôr na, cumã amji jahkre pej. Ne hanea ne cumã Hÿm pîn cator, ne quêha hacpÿa mã hÿrmã api na, cumã amji jahkre pej. ⁴Cakrô mã hãm ne cute ihkà ata caxàr, ne cutecupêhkà nõ ita to amji cahti na hê. ⁵Ne cute crat nõ ita kam cô kwÿ mên, ne ahpÿanre na kam me imã me ipar cuhhôn kam ihtêm. Ne ihcuhhô ne ma cupêhkà ata to me imã incrà.

⁶Ne ma Ximãw Petrô na to cator, mã cute Jeju cukij to:

— Pÿhàpà ijô Pahhi, pom ampeaj kam acati ita, nõ na mã ca ha ajte me ipar cuhhô? — hajÿr. Mã Jeju te cumã harkwa to:

⁷— Ca ha nee ita kam ampo caxuw ite amã apar cuhhôn xà ita jahkre pej nare, ne jÿa caxuw ca ha hahkre pej. Na ca ha ito tojnô wa amã apar cuhhô — hajÿr. Mã Petrôcumã:

⁸— He apêa ri ijô Pahhi, na wa ha nee ate imã ipar cuhhôn ita na ato tojnô nare — hane. Mã Jeju cumã:

— Wa ha ite amã apar cuhhôn nare na, ca ha nee hipêr apê ikôt apa catê nare — hane. Mã Petrô te ahna hàhwÿr to:

⁹— Ijô Pahhi, mër imã ipar pit cuhhôn nare, ne hanea ne imã ijühkra me ikrã cuhhô! — hajÿr. ¹⁰Mã Jeju cumã:

— Hamreare, nee mã gĩ cunea xwÿr xà nare, ne apar pitcuhhôn xà. Por ramã jũm xwÿr ata tũm nare, ne cumã ihpar pitcuhhôn xà. Ampo na? Pjê kam apu to ipa mã ihtũm, cwÿrjapê ri cumã ihpar pit cuhhôn xà. Ne imã ihhêj neramã me acunea tetet pit, ne por jũm ata ri pyxít peaj ne nee ihtetet nare ne ihtũmti — hajÿr.

¹¹Ne pê ramã Jeju cute ihkên mã mën catê atajahkre peaj, na pê harkwa ita to hane he:

— Ramã me acunea tetet, ne jũm ata ri pyxít peaj, ne nee ihtetet nare ne ihtũmti — hajÿr. Ne nee mã mehtũm to pê Jeju hũjarên to hajÿr nare, ne cute me amji kam hapac xà kên to pê hũjarên to hane.

Pê me hàpên catêjê me hàpên xà na me ajpên tehcajpa

¹²Mã cute me imã ipar cuhhôn par jirô pê mã rihacpÿa mã cute ihkã mã amji jaxàr, ne mejjapàn xà na hÿr, ne cute me icukij to:

— Xà ate me ite curmã ampo ton xà ita kam me gapac, ne me hahkre pej? Mõrmõ nee ate me hahkre pej nare, cwÿrjapê wa ha me amã ihkôt harê. ¹³Ca me ito amji mã: “Me imã ampo to hahkre catê” hane. Ne hanea ne amji mã me ito: “Ijô Pahhi” hane. Neampeaj kam ri ate me ijarêan to me ijarêan. ¹⁴ÿhÿ, he te ipê me gô pahhi, ne ipê me amã ampo to hahkre catê cakrô, wa itÿj me amã ijapên, ne ite me amã me apar cuhhôn par. Cwÿrjapê ca ha me caa icuxàajpên mã me apar cuhhôn pa. Ne ampo cunea na me ajpên tehcajpa, ne ajpênto me acati, ne ajpên mã me apê. ¹⁵Ne ite me amã to hahkre na, ca haikôat me to, ne ajpên mã me apar cuhhôn pa. ¹⁶Wa ampeaj kam me amã awjarê, he me hàpên catêjênô hõ pahhi jirôa pê cati nare. Ne nee hõ pahhi japyre mã hàpên nare. Ne quêt hõ pahhi ri mehîrôa pê cati. Ne hanea ne, por harkwa nacumã imprar catêata, nee cute ihkujahêc catê ata jirôa pê cati nare. ¹⁷Hamre, ita caxuw ca ha ite amji kam ijapac xà na mejjahkre pej kam me to tẽ. Na ca ha ate ikôat me ton to me amji pyrác na, ca haatÿj hũrên me gakry.

Pê Jeju, por cute ihkên mã mën catê ata jarê

¹⁸— Wa nee ite me acunea to icakôc nare. Ampo na? Wa itÿj ite amji mã me acapi atajê pupu, ne imã me gahkre pej. Ne pê Pahpãm jô kàhhôc kam ramã me anô ata to hũjarên to: “Por icahê na ijô pãw ku ata, quê ha ihtÿj icuna mãahtwÿ ne amji to icurê xwÿn” hane. Ne ampeaj kam quê ha caxwa ita kam, jũm ita ito hane. ¹⁹Ne wa ha ita kam ampo te ito hajÿr xà ita xwÿjrea na, me amã harê. Mãr quê

jūm ita ito hane, ca ha ramã me ipê Pahpãm kraa to Pahpãm kra na me ijahkre pej. ²⁰Ne ampeaj kam wa me amã awjarê, quê ha jūm te, porite jūm kujahêc ata na amji caxàr me ajkaam, hanea ne inaanji capa. Ne quê ha jūm te ina amji caxàr me ajkaam, hanea ne Inxū te ajpên ikujahêc ata na amji capa — hajÿr.

Pê Jeju cute ihkên mã mên catê jahkre

²¹Cute ita jarên jirô pê mã ri cumã amji kîn nare, ne hĩ cunea kam ihpeacre. Mã hirãa pê me imã amji jarên to:

— Wa ampeaj kam me amã amji jarê, ca ha atÿj me anō meicurê xwÿn tehcajpa ne me cumã igō, neikên mã imê — hane.

²²Wa tee ame ajpên pupu, ne nee me ite, por cute jūm to ihcakôc ata jahkre pej nare. ²³Ne pê ampeaj kam Jeju mã ikîn, cwÿrjapê pê wa cahi na jÿ. ²⁴Mã Ximãw Petrô te hũhkra to imã hàpêr, ne hũhkra to imã, ite jūm ata na Jeju cukij na awjahkre.

²⁵Wa Jeju wÿr ipipkjêr ne ite kyre pê ihcukij to:

— Ijô Pahhi, jūm mã ajte? — hajÿr. Mã Jeju imã:

²⁶— Por wa ha jūm mã pãw co ne cugō ata — hajÿr. Ne cute pãw kwÿ hyr ne crat kam cô cacro to inco, ne Juta Carijotmã hōr. ²⁷Mã cute pãw ata pyr me ajkaam mã Xatanaj te cumã amji jōr. Mã Jeju te cumã harkwa to:

— Gapacta ne ate amji mã acaca xà nō na prãm ata ton pyrentu — hajÿr.

²⁸Mã me ikwÿ me ijapàn xà na me jÿ atajê te nee me ita jahkre pej nare, por Jeju te imã harên xà ata na. ²⁹Ne pê Juta ihpore incjên xà to amji pytà, ne ajcoapu to ipa na, pê ihtÿj cute amji kîn caxuw cute ampojaprôr na Jeju te cumã harkwa na amehcãmji, nare, cuteme cupê hamreare atajê mã ihpore nō jōr na amehcãmji. ³⁰Mã Juta te pãw pyr, ne ikrêr ne ma ihtêm pyrentu. Mã ramã awcapàtkô ne caxwa.

Pê Jeju ihtêm xà na ihkôt me ipa catêjê mã amji jarê

³¹Ne ma Juta tēm jakàn pê ri Jeju te me imãhũjarên to:

— He ipê me Ahàkà ata pê wa me hũmre na amji to, ne cōjkwa pîn wÿ. Ne ita caxuw quê ha mehcunea me hirôa pê icati na mejjahkre pej. Ne icwÿrjapêa quê ha hanea ne me Inxū japyrÿto me catia to me cati na me hahkre pej. ³²Wa ha mehcunea mã Inxū carôt catihti impejti cupahti ata to ajpê, ne ahtũm nare, quê ha hanea ne me cumã icarôt catihti impejti cupahti ata to ajpê. ³³Me apê me ikrare pyrãac. Ne wa ha nee me acahê na apu imōr kam icrà nare, ne ahtũm nare wa ha ma tē. Na ca ha tee ame ijapê. Nepor wa ite ramã Juta catêjê mã amji jarên xà ata to, wa ha me amã amjijarê, ne me amã: “Jū wÿr ca ha curi imōr xà ata ri memō” hane.

Cu ha me pamã ajpên kinti ne

³⁴— Na wa ha me amã ite ijarkwa hyr xà intuwti ita ta, ne me amã harên to: “Atÿj me acunea mã ajpên kinti, to hanea, pom quê wa me akinti to

amji kampahe, ita to quê ha hanea ne me amã ajpẽn kĩnti ne” hane. ³⁵ Quê ha me acunea mã ajpẽn kĩnti na, quê hamehcunea ajpẽn na me apupu, ne me apê ikôt me apa catêjê na me gahkre pej pyrentu — hane.

Pê Jeju Petrô mã cute hõmpun nare na harên na cumã harê

³⁶ Mã Ximãw Petrô te Jeju cukij to:

— Jô ri ca ha ajte mō? — hajÿr. Mã Jeju cumã:

— Jũ wÿr ca ha ita kam curi imõr xà ata ri mō, ne jũacaxuw ca ha atÿj curi ikôt acato — hane.

³⁷ Mã hipêr Petrô Jeju cukij to:

— Mêr ampo na wa ha nee ita kam akôt imõr nare? Pomipê akôt ipa catê ita, cwÿrjapê wa ramã ita kam akôt ityc xàa caxuw apu mō — hane.

³⁸ Mã Jeju cumã:

— He xà ca ajkĩ ampeaj kam ikôt atyc xàa caxuw apu mō? Hamreare. Wa ha amãijÿjarên hiahpuro. Ca ha ita kam, hõxãhxãc kàr xwÿjrea na, ate ipupun nare, ne apêijahkre kêatre na, amji jarên to incrê — hane.

Pahpãm cahê na ampeaj kam me pamã me pahkrĩ xà jãhtô

14 ¹ Jirô pê mã ri cute me pahcunea mã harkwa to:

— Nee ca me amji mã pa, ne amekrihkrit nare. Ne Pahpãm to ca quêt amji mã me ahimpej, ne hanea ne ito amji mã me ahimpej. ² Ne Inxũ krĩ xà kam ampeaj kam mehkrĩ xà caxuw mehkrĩ xà jãhtô, na wa ha ma hacpÿ mã tẽ, ne me amã ihnõ cümpej hiahpuro. Wa nee ame amã ihêj xi jarên nare, quê ha curimehkrĩ xà caxuw ikre caxwÿn atajê hamreare na mã, wa ha nee me amã harên to hajÿr nare. ³ Na wa ha ihcümpej par jirô pê mã, wa ha hacpÿane me awÿr amji jaxà, ne me gaprô, mâr wa curi apuipa ata ri, ca hanea ne ikôt curi ame apa.

⁴ — Ne ramã me amã jũ kam itêm xà ata jô pryjahkre pej — hajÿr.

Jeju pê ri Pahpãm wÿr me pancjêj xà jô pry

Mã me ikwÿ nõa pê Tome ata te ihcukij to:

⁵ — He me ipê cormã jũ kam atêm xà ita na gahkre kêatre ita kam, jũ mã wa ha ajte me, ne me gô pry ita jahkre pej? — hajÿr.

⁶ Mã Jeju cumã:

— He Pahpãm wÿr pry pyxit peaj. Ne ipêa ri pry ata. Cwÿrjapê ca ha ipyxit peaj kôt Inxũ wÿr me acato. Ne ipê me amã iteInxũ to ipipê xà to ihêj xi nare xà xakat. Ne ipê meate amji kam me gapac xà impejti cunea xakat.

⁷ Ne ramã ate me ipê Pahpãm kra na me ijahkre pej, na ca ha atÿj hanea ne ita caxuw meInxũ jahkre pej. Ýhÿ, he pê ca ramã me hõmpu — hane.

Jeju me Pahpãm pipëan

⁸ Mã me ikwÿ nõa pê Pirip ata te Jeju mã:

— Me ijō Pahhi, me imā Apām to ajpē, wa me hōmpu, netahnaa mā ihkōt me amji kampa, ne nee wa iràn xà na me ampo pupun prām nare — hajÿr.

⁹Mā Jeju cumā:

— Pÿhàpà, he rÿ pēa mā wa me acahê na ipa, ca ajte nee cormā ate me ipupun nare? Por jūm ipupu ata, ihtÿj hanea nelnxū pupu, ne mēr ampo na mā ca cormā imā: “Me imāApām to ajpē, wa me hōmpu” hane? ¹⁰Pirip, xà ca nee ajte, wa Inxū me ajpēn kam ihōnco, ne ajkam me ipyxit peaj na amji mā meito hajÿr nare? — hane. Ne Jeju me icunea mā:

— Ne pom wa me amā awjarē itajê, wa nee amjia kōtharēn nare. Ne wa ite Inxū me ajpēn mā amji jōr, ne ajpēn kam me ihōnco, na ri taa hàpēn xà itajêcunea to. ¹¹He, wa Inxū me ite ajpēn mā amji jōr, ne ajkam me ipyxit peaj, na wa me amāamji jarē, ca atÿj me ikampa. Nāmri quē ha me amā icakōc xà itajê na ipar jahkre kēatre na, ca ha meijàpēn xà itajê pupu, ne ihkōat amji mā me itoahimpej ne me ikampa.

Ampo na pahte me Jeju wÿr xà atajê, ihtÿj me pamā cugō

¹²— Wa ampeaj kam me amā awjarē, quē ha jūm te ampeajkam ito amji mā ihhimpej na, quē ha, pom waijàpēn xà to itajê jirōa pē hàpēn xà ton to ipa. Ampo na? Wa ha malnxū wÿr hacpÿ mā tē, na quē ha ajpēn me amā icarōt kujate. ¹³Ne wa me ato amji kwÿ cwÿrjapê ca ha ampo na me iwÿ, wa ha itÿj me amā hōr pa, mār quēmehcunea me acwÿrjapê Inxū catia to cati na me hahkre pej. ¹⁴Ne wa me ato amji kwÿ cwÿrjapê, ca ha ampo na me iwÿ, wa ha itÿj me amā cugō.

Pahpām Carō Pejti te me pamā caprī xà

¹⁵— Nāmri quē ha me amā ikīn na, ca ha atÿj ite ampo na me amā ijarkwa jirēn atajê na me ikampa. ¹⁶Ne wa ha me amā Inxū na ahwÿ, quē ha ijakàn pē ijaxà kam, me amā jūm kujate, quē ha me atehcajpa. Ne taa mā quē ha quēt me acahê na ipa rohnÿtti mā. Ne jūm ata pē riInxū Carō Pejti. ¹⁷Ne taa mā quē ha me amā Inxūte amji kam hapac xà impejti to ipipē to mō. Ne porme cupê Inxū tekjê nare, ne hanea ne me cupê me ikwÿnare atajê, quē ha nee amji mā me Inxū Carō Pejti itacwÿr nare. Ampo na? Jū wÿr quē ha me hahkre pej, ne mehōmpu. Ne me ca nare, ca ha atÿj quēt me hōmpu. Ampo na? He quē ha ihtÿj quēt me acaxwām pē ihkrī, quē ha me acahi na ipa.

Quē ha Jeju me parer, cu ahte ame papa nare

¹⁸— Ne quē ha ina ahtūm nare, wa ha ma tē cakrō, wa ha nee me ato tojnō ne me amā hikran, ca ha ahte ame apa nare. Ne itÿj me awÿramji jaxà, ne me acahê na apu ipa. ¹⁹Ne quē ha ina ahtūmre quē ha me cupêPahpām tekjê nare atajê nee hipêr me ipupun nare, ne me ca nare,

ca ha quêt atỳj hipêr me ipupu. Ne wa ha itỳj hacpỹa mã itĩr ne Pahpãm cahê na apu ipa. Cwỳrjapê ca ha icuxà hanea ne hacpỹa mã me atĩr, ne me atĩr ita na Pahpãm cahê na ame apa. ²⁰Ne quê ha jũ caxuw, amcro nõ na me awỳr PahpãmCarõ Pejti cato, ca ha Inxũ me ite ajpên mã amji jõr, ne ajkam me ipyxit peaj na meijahkre pej. Ne hanea ne me amã, wa Inxũ Carõ Pejti kôt, me akam ikrĩ na ijahkre pej, na cu ha ajpên mã me amji gõ, ne ihhêj ne ajkam mepahpyxit peaj.

²¹— Ne por quê ha jũmjê ito amji kampa, ne ijarkwa kôt me ipa atajê, quê ha me cumã ikĩnti na me to ipipê to ipa. Ne quê ha haneane Inxũ mã, por jũmjê mã ikĩnti atajê kĩn, wa ha hanea ne imã mehkĩn, na wa ha me cumã amji to ajpê, mār quê me ipupu ne me ijahkre pej pejtu ne — hane.

²²Mã me ikwỳ nõa pê ajtea mã Juta nõ ata, pê nee Juta Carijot nare ata te Jejucukij to:

— Jũ mã ca ha ajte ne me imã pit mã amji to ajpê? Nenee me cupê me akwỳ nare atajê mã amji to apipênare? — hajỳr.

²³Mã Jeju cumã:

— Quê ha jũm mã ikĩn na, quê ha ihtỳj ite cumã ampona ijarkwa jirên itajê na ikampa. Cwỳrjapê quê ha ihtỳj Inxũ mã ihkĩn, wa ha Inxũ me ajwar me cumã amji to ajpê, ne ajpên kam meihõnco, ne me cahê na me ipa rohnỳtti mã. ²⁴Nãmri quê ha jũm mã ikĩn nare na, quê ha nee ite ampo na cumã ijarkwa jirên atajê na ipar nare. Ne cute hajỳr xà ita kam jũmã wa ha ajte, ne me cumãamji to ajpê, ne ajpên kam me ihõnco to ipa? Jũ wỳr wa ha me to hane — hane.

Carõ Pejti ri pahte me Pahpãm te amji kam hapac xà impar na me pahto

Ne cute me icunea mã:

— He wa ampeaj kam me amã awjarê. Pom wa icakôc xà toicakôc, ca ahna me ikampa itajê nee cupê icakôc xà nare, ne cupê, por pê Inxũajpên ikujate ata cakôc xà.

²⁵— Ne wa ita ri cormã ame acahê na imõr xà ita kam, ramã ite me amã ampo itajê cunea to icakôc partu. ²⁶Na quê ha Inxũ hacpỹ ne ajpên ijarkwa kôt me awỳr Carõ Pejtikujate, quê ha taa me atehcajpa, ne me amã ampo cunea tohahkre. Ne taa ite ampo to me amã icakôc xà itajê to, ateme amji japackre na me ato, ca ha me to amji japackre.

Quê ha Jeju me pahcaxwãm pê me pamã me pahcarĩcti gõ

²⁷— Ne wa ha me amã, pom wa icarĩcti kam ipa ita gõ, mār ca nee amji mã ame ampo cupa nare, ne nee ampo cupate ame akrihkritnare. Ampo na? He wa ha pa me apê ate amji mã me ampo cupa, ne ame akrihkrit xà atajê to hamre, ca ha atỳj ame apa. Ne wa ha nee ipê me cupê Inxũ na mehkwỳ nare atajê pyrác, ne ijarkwacacrô to me amãn, ca ha me anõ akên nõ mã axàr nare, ne me apej pêa mã ame apa, ne quêt me acarĩcti

kam ame apa. ²⁸Ne wa ramã ite me amã: “Wa ha matê, ne hacpÿa ne me awÿr amji jaxà, ne me acahê na apuipa” hajÿr na, ate me ipar. Ampo na? He wa ha ma, porijirôa pê Inxū Cati ata wÿr amji jaxà. Ne quê ha me anô mã ikîn na, ihtÿj itêm xà ita pyrên hakry. ²⁹Wa ha ampo itajê te ito hajÿr xà xwÿjrea na me amã harên to ipa, mâr quê jū caxuw ito hane, ca haamji mã me ito ampeaj kam pyrentu. ³⁰⁻³¹Ne jū wÿr wa ha ahkri xa ne ame amã icakôc. Ampo na? Quê ha ahtūm nare, quê ha me pahwÿr me cupê Pahpãm na mehkwyñnare atajê jō pahhi, pê me pajō xwÿn cato. Ne cupê me pajō xwÿn cakrô, quê ha nee jū na iton nare. Ampo na? Hirôa pê icarôt cati na ri. Ne pê ramã Inxū imã: “Cama amji na mepajō xwÿn jamã, quêt taa acura” hane. Na wa ha itÿjInxū te imã harkwa to hajÿr xà ita na kampa. Ampo na? Mehcunea te imã Inxū kînti na me ijahkre pej prãmte, wa ha hane. Me to xa cu uu ne me — hajÿr. Wa ite me ajpên mã: — Mêr hacme — hajÿr.

Jeju pê pîxô pâr pyrâc

15 ¹Ne wa cormã pry kôt me imôar kam, mã Jeju te me imã amji jarên to:

— He ipê pîxô pâr ata pyrâac, mã Inxū pê pîxôpâr ata jamâr catê ata pyrâac, ne ma ijamã. ²Ne por amji mã me ito ihhimpej catêjê atajê pêihhêj rûm ipajühtê atajê pyrâac. Cwÿrjapê quê hanee jûm te amji mã ite amji kam ijapac xà impar nare na, quê ha ihtÿj Inxū itête pō mã mên to hanea, pom quêhân ne pîxô pâr pajühtê hô nare, mã hamâr catêhakep ne curê, ata jîkjê na Inxū te hajÿar. Ne quê hapîxô pâr nō pajühtê na hô pyxitre apu harij, quê hahamâr catê hōmpu, ne intête ahna xà me, ahna ampo kêncunea harij atajê jürên pa, cute cumã hô to hàhtôa toprãm to. Ita jîkjê na mã Inxū hân ne cute amji mã me ito ihhimpej catêjê atajê to hane. Cute amji kam hapac xà kam, cute me ampokên to me amji kam hapac atajê cuneajürê, mã mempej, ne ma ijarkwa kôt, me hàpên xà impejti to amji mã me ipicamên to me ipa. ³Ne ramã Inxū te, ite me amã ampo to hahkre itajêakôt, cute me amã ate amji kam me gapac xà kên jürên ne to impej. ⁴Nãmri quê ha pîxô pâr pajühtê nō te impàt ne ihpÿm na, quê ha nee hô nare, ne cama incrà. Ita jîkjê na, ca ha me anô, ate ijarkwa kôt gâpên xà impejti to gâpên toapa nare, ne amjia kôt gâpên na, quê ha gâpên xà atakôt apê hamreare ne. Cupate ca ha ikam me akrî kam me to acrà, wa ha hanea ne me akam ikrî kam to icrà. Na cu ha me ajpêan, neajkam me pahpyxit peaj, ne atÿj ijarkwa kôt me apê. Ne me apê pîxô pâr pajühtê pejti atapyrâac, ne ampeaj kam me axô hūhhîc itajê pê me gâpên xà jâhtôa ne impej.

⁵— Ipê pîxô pâr cati pyrâac, ne me apê ihpajühtêpyrâac. Quê ha pîxô pâr pajühtê nō ipaar kamihcuhhê, ne ihtÿj ahna hô. Ita jîkjê na, ca ha ikam me akrî kam me to acrà, ne atÿj ijarkwa kôt me gâpên xà impejti

to me gâpên to me apa. Nāmri caha ate ikam me akrī kam me to acrà nare, ne amjia kôt ame apa na, ca ha nee me ampo pejti tonnare. ⁶Quê ha jūm te ijicu, ne nee ikam ihkrī kam to incrà nare na, quê ha cupê, cute me pīxôpajūhtê Jakep mā incrà, mā cute me to cuprôn, ne cuhy kam me haxwÿr, ne meto caxàr ata pyrâac. Quê ha jūm te ipê ampÿa mā apu ipa na, quê ha ihtÿj amji to acto. ⁷Ca ha ate amji mā me ito ahimpej kam me to acrà, neatÿj ikam me gapac kam me to acrà na, cu ha me ajpēan, ne ajkam me pahpyxit peaj, ca ha ampo na me iwÿ, waha itÿj me amā cugô. ⁸Na ca ha ate ijarkwa kôt gâpên xà impejti jàhtôa to gâpên to apa na, quê ha ahna me apupu, ne apê ikôt me apa catêjê name gômpu, ne me akamihÿj me Inxū catia to cati. Ne cute amji kam hapac xà impejti ata na me gahkre pej, ne hanea ne Inxū, ihtÿj jūm te amji kam hapac xà to impej na hahkre pej.

Jeju mā me pajakryti na me papa na me pahto prām

⁹— Ne pom Inxū mā ikīnti, mā ma ipupu ne ijamā ita na, wa ha hanea ne me ato, ne imā me akīn, wa ha ma meapupu, ne ma me gamā. Cwÿrjapê ca ha nee amji têtê amejjarkwa curê nare, ne ikôat quêt ame apa, mār wa imā me akīn ita na. ¹⁰Wa hān ne amji mā Inxū jarkwa na kampa, na ri cumā ikīn, ita na ca ha icuxà hān ne ijarkwa na me ikampa, wa ha imā me akīn ita na.

¹¹— Ne mēr ampo na mā wa ame amā icakôc xà ita to icakôc? He icuxà me gakryti cunea kam me aparohnÿtti mā na ne ato prām, cwÿrjapê wa ame amā icakôc xà ita to icakôc.

Cu ha me pamā ajpên kīnti kam me papa

¹²— Ne wa hān ne ijôtpê me amā ijūjarēn to: “Pom imā me akīnti ita cuxà, ca ha me amā ajpên kīnti ne” hane. ¹³Imā me akīn crāti ita kam, wa ha pa me icurê xwÿn mā amji gô, quê ha me acwÿrjapê me icura. Ca ha cormā imā me akīn crāti ita na me ijahkre pej.

Me papê, por Jeju te amji mā me pahcapi atajê jô ikwÿ nō

¹⁴— Ca ha ate ijarkwa kôt me gâpên na, ca ha me apê me ikwÿa to me ikwÿ. ¹⁵Ne imā, nee me apê cama me imā me gâpên catêjêatajê nare, ne me apê me ikwÿa to me ikwÿ. Ampo na? Nee mā ampo na nare. Hecama me cumā me hâpên catêjê atajê pê me hō pahhi teamji kam hapac xà jahkre kêatre, ne me ca nare. Wa itÿj quêt me amā, por Inxū te imā ampo cunea jarēn atajê jarēn to ipa. ¹⁶He pê ca nee amji mā me icapi nare, ne pa pê waquêt amji mā me acapi. Ampo na? Nee mā ampo na nare. Heijarkwa kôt ate me gâpên xà pejti ton to me apa toprām to, pê wa amji mā me acapi. Ne me gâpên xàimpejti atajê pê quê ha ampo pīxô pejti te jū caxuwamre xà nare ata pyrâac, ne ihcuhê rohnÿtti mā. Cwÿrjapê ca

ha ijaprÿa naampo na me Inxũ wÿ, quê ha ihtÿj me amã cugô. ¹⁷Ne wa ha hipêr me amã me ate me ajpên kînti xà ita na awjahkre.

Me cupê Pahpãm na mehkwy nare atajê ma ame cupê mehkwy atajê curê

¹⁸— Ne wa ha ma itêm jakàn pê, quê ha me cupê Pahpãmna mehkwy nare atajê, ma ame acurê. Ca ha me acumam cute ame icurêna me to amji japackrea ne. ¹⁹Ne me cupê Pahpãm na mehkwy nare atajê mã mehkwy pê me hÿràcti catêjê pit kîn. Na quê ha me apê me hÿràc na mã, quê ha ihtÿj me cumã me akîn. Ne cama nee me apê me hÿràcnare. Ampo na? He wa ite amji tekjêa na amji mã me acapi. Cwÿrjapê ri ma ame acaca ne ame acurê. ²⁰Ne curmã ite me amã ijÿjarên xà ata to ca me amjijapackrea ne. “Me cumã hàpên catêjê, nee me hõ pahhi catêjê jirôa pê me cati nare. Ne hanea nenee me hõ pahhi japyre mã, me amji pupun to kên to me ipa nare” hajÿr. Na quê ha me cupê Pahpãm na mehkwy nare atajê, me imã ite amjipupun xà kêanre na me ito. Cwÿrjapê quê ha hanea ne ameate amji pupun xà kêanre na me ato, ca ha ahna me amji pupu. Ne por me pyxitre amji mã me ijarkwa kampa atajê, quê ha hanea neihtÿj amji mã me akampa. ²¹Ne mër ampo na mã quê ha ate me amji pupun xà kêanre na me ato? Nee mã ampo na nare. He me apê ikôt me apa catêjê, na quê ha me ato hane. Ne hanea ne me cupê Inxũ te ajpên ikujahêc ata jahkre kêatre, naquê ha ma ame acurê.

²²— Na wa ite me cumã cute mehkên ton xàatajê intête me cumãn, ne me cumã harên prãmte, wa mehÿrmã icator. Mã cute me hahkre pej cacrô, ajte nee cuteme ton jicu nare. Cwÿrjapê quê ha Pahpãm ame to kêanrene. Wa ha icator ne me cumã, cute mehkên xà ton ita jarên nare na mã, quê ha nee me hahkre pej nare, quê ha Pahpãm xwÿjênee ame to kên nare. Ne hamre, jÿ wÿr quê ita caxuw, cute mehkên ton xà ata pê jÿ kam me cato. ²³Ne por ma ame icaca, ne ame icurê atajê, hanea ne maame Inxũ caca ne ma ame curê. ²⁴Wa icator, ne me kam mare mã ite icarôt tÿjti to, rÿ jÿ caxuw jÿm te ampo pejti pihho ton nare atajê cunea ton par. Wa ha me kammare mã ampo itajê ton nare na mã, quê ha nee Inxũ me cumã harkwa to: “Me apê ate me akên ton catêjê” hajÿr nare. Mã ajte cute ita name ipupun cacrô, ajte ma Inxũ me ajwar ame icurê. ²⁵Ne pê ramã rÿ pêa mã Mojxe xwÿ ina ihhêc tohane he: “Wa ite ampo kên ton nare cacrô, mã ajte ma ame icaca, ne ma ame icurê” hane. Hajÿr ata na mã cute me iton he.

Pahpãm Carô Pejti ri me pamã Jeju to hahkre

²⁶— Ne quê ha ampo kên itajê te ame ato hajÿr cacrô, ca ha nee ame amjimã pa, ne nee ame akrihkrit nare. Ampo na? He wa ha itÿj me amã Pahpãm Carô Pejti te catyt kam me amã ampo to hahkre catê ata kujate. Quê ha me atehcaypa, ne me amã ihcuneana ikôt harên to hahkre. ²⁷Ne

me ca, ca ha hanea ne mehcunea mã ikôt harên to me apa. Ampo na? He pê ca mam quêt ikôt me apa, na ri ihcunea na ramã me amã ijahkre pej.

Quê ha me pahte amji pupun xà kêanre ata nee me pahto jũ mãn nare

16 ¹— Ne wa ha jũ caxuw ampo te ito hajÿr xà ata kam, ate ame icaca, ne ame imã hikran cupate, wa ite ramã me amã ampo itajê cunea jarên hiahpuro. ²Nãmri quê ha ihtÿj ikôt me cumã me acurê, ne quê ha cute me cuprôn xà jũrkwa pê, ihtÿj me gapôj. Ne quê ha mehkwykwÿ te amji to me Pahpãm cajpuaw na me amji cãmji xà to, quê ha ihtÿj hanea ne me acura. ³Ne ampo na quê ha ame ato hane? He me cupê ijahkre kêatre, ne me cupê Inxũ jahkre kêatre, na quê ha ame ato hane. ⁴Ne quê ha ampo itajê me ato hane, ca ha ite ramã meamã harên hiahpuro na, me ito amji japackre pyrentu. He pêwa mam aracri ame akôt ipa, ne nee ajco me amã ampoitajê jarên to hajÿr to ipa nare. Ampo na? Pê wa pa me apytâr to ipa na pê.

Quê ha Jeju me pamã Pahpãm Carõ Pejti kujate

⁵— Ne hamre, ramã ma hacpÿ mã ajpên cute ikujahêc catê atawÿr ite amji jaxâr xaa kam ramã hàhhuc to mō, na waitÿj me amã ampo itajê cunea jarên to mō. Canee ajte jũ kam itêm xà ita na me icukij nare. ⁶Ne wa ramã ite me amã hacpÿa mã amji jaxâr xà ata na amji jarên, cwÿrjapê ri ajte me amã amji kîn nare, ne me apeacre. He nee ame apec nare! ⁷He ampeaj kam wa me amã amji jarê, ne wa nee apu ihêj xà jarên nare he. Imãa hacpÿ mã ite amji jaxâr xà ita na ri me amãihkênre nare. Ampo na? He wa hacpÿa ne amji jaxâr nare, quê ha nee ajpên Pahpãm Carõ Pejti te me atehcajpar catê ata me awÿr iwrÿc nare. Na wa ha ma tê, ne itÿj ajpên hacpÿ ne amji jaxâkam me amã ihkujate.

Quê ha Carõ Pejti hÿrmã me cupê mehkwy nare atajê pipkjêr na me to

⁸— Ne quê ha Inxũ Carõ Pejti te catyt kam me amã ampo to hahkre catêata te me awÿr cator na, quê ha taa me cupê Pahpãm namehkwy nare atajê mã ampo crê atajê to hahkre, quê hame hahkre pej. Atajê pê, cute me ampo kêanre ton xà na cute me amji jahkre pej xà me, cute catyt kam imã ite amji kam ijapac xà to impejti jahkre pej xà me, jũ caxuwPahpãm te, cute me hàpên xà ton na amehcukijna cute me hahkre pej xà. Hō, ampo crê itajê to, quê ha Inxũ Carõ Pejti ata cute me hahkre pej na me to he. ⁹Quê ha Carõ Pejti, pornee ito amji mã mehhimpej nare ne ame ampo kêanreton to ame ipa atajê na, cute me amji jahkre pej na me to. ¹⁰Ne quê ha hanea ne ipê Pahpãm mã catyt kam ipa catê na, cute me ijahkre pej na me to. Na wa hama hacpÿ mã Inxũ wÿr tê, ca ha nee me ipupun to acuhê tu nare. ¹¹Ne quê ha hanea cute mehkên ton xà atajê jahpan xà na, Inxũ te mehcukij nemehkên mã me irên na, cute

me hahkre pej na me to. Na ri cute me ampo kên ton xà itajê jô pahhipê Xatanaj ata kên mã mên xàa kam xa.

Quê ha Pahpām Carō Pejti me pamā, ampo cunea to hahkre

¹²— Ne cormã ampeaj kam imã me amã ampo jarên xàitajê jãhtô, wa me amã ampo itajê cunea jarê na mã, ca ha nee mempar, ne me hahkre pej nare. ¹³Ne nee ita na cute me amã jũ mãn nare. Ampo na? Quêha jũ caxuw Inxũ Carō Pejti te catyt kam me amã ampo tohahkre catê ata ajpên me awÿr cato, ne taame amã ampo itajê cunea to hahkre pa. Ne catyt kam, harkwa kôt, Inxũ te amji kam hapac xà impejti itajê to pit mã me amã hahkre, ne nee mã, quê ha amjia kôt me amã to hahkre nare. Ne me amã, por ajpêncormã me awÿr ampo cator nare atajê to hahkre. ¹⁴Ne me akam mare mã amji mã icatia to icati na ijarê, ne cute amji mã me icupa na me to, quê ha ihtÿj amji mã me icupa. Ampo na? Hequê ha icakôc xà to pit mã ihcakôc, na quê ha hane. ¹⁵Ne por Inxũ mã ampo cunea atajê te hajÿar, ne cupê itekjê. Na wa ha Pahpām Carō Pejtimã ampo jarê, quê ha ma me amã to awjarê.

Pê Jeju hacpÿa mã ihtír na me cumã amji jarê

¹⁶— Ne quê ha ina amcro hàhtô nare, ca ha nee hipêr me ipupun nare. Ne hanea ne ina amcro hàhtô nare, ca ha hacpÿa mãme ipupu — hajÿr. Jeju te me imã amji jarên to hajÿr.

¹⁷Wa ite me ajpên cukij kam me itêm, ne me ajpên mã:

— Ne mër ampo na mã tee ame pamã amji kôt harênto hahkre. Ne ajte amji jarên to: “Quê haina amcro hàhtô nare, ca ha nee hipêr me ipupun nare. Ne hanea ne ina amcro hàhtô nare, ca ha hacpÿa mã me ipupu” hane. Ne hanea ne ajte amji jarên to: “Ita cwÿrjapê wa ha ma hacpÿ mã Inxũ wÿr tê” hane. ¹⁸Ne mër ampo jarên xà pê mã: “...amcro hàhtô nare...” ita? Wa nee me ite ihcakôc xà itajê nô na mempar, ne me hahkre pej nare — hajÿr.

¹⁹Mã ampo na ite me Jeju cukij prãm ata na cute mehahkre pej pyrentu, cwÿrjapê ri me imã:

— Xà ite me amã: “Quê ha amcro hàhtô nare, ca ha nee me ipupun nare, ne ina amcro hàhtô nare ca ha hipêr me ipupu” ata na mã ca ame ajpên cukij? ²⁰Ampeaj kam wa ha me amã ijũjarên xà ita toawjarê. Ca ha atÿj jũ caxuw ame amrã, ne me amãamji kîn nare ne, ne me apeacre ne. Ne me cupê Pahpãm namehkwÿ nare atajê, quê ha ihtÿj quêt ame hakry. Cakrô, quê ha hacpÿ ma mã mam me amãamji kîn ata jirôa pê me amã amji kîn. ²¹He pom hãn ne me cahãj mã mehkra hà mã me cumãamji kîn nare, mã me cumã ajhu, mã hacpÿ ma mã mehkàj xà to me hapac kêt, ne me cumãamji kîn, ne me cumã mehkra pÿpÿm pyrên ame hakry, ita jikjê na ca ha me hanea. ²²Ne amcro itajê kam me amã amji kîn nare cakrô, cu

ha hipêr me ajpênpupu. Jirô pê mã quê ha me amã amji kĭan to amjikĭn ata, quê ha nee jŭm me apêcaxâr, ne me apê to hamre nare.

Cu ha Jeju japrÿa na me Pahpãm mã me pahcakôc

²³— Ata caxuaw ca ha nee hipêr ampo na me iwÿr nare, neme apê me ikwÿ te hajÿr romã mã, ca ha ijaprÿa na, ampo cunea na ate Inxũ na me gahwÿr xà atajê, quê ha ihtÿj me amã cugô. ²⁴Ca ajte nee cormã me ate ijaprÿa na ampo na mePahpãm wÿr nare. Na ca ha ita caxuw atÿj ijaprÿa na ampona me Inxũ wÿ, quê ha ihtÿj me amã cugô, ca ha me acwa, ne me to mam me amã amji kĭnti ata ràn, quê ha me girô pê ihpÿm tu ne.

²⁵— He wa nee cormã hirãa pê me amã ijŭjarên xà itajê jarên to ipa nare, ne incwÿrpe me amã harên to ipa. Ne wa ha jũ caxuw quêt hirãa pê meamã Inxũ te amji kam hapac xà jarê, ne me amã to ajpê. ²⁶Ne ca ha jũ caxuw me apê me ikwÿ te hajÿr romã mã ijaprÿa na ampo na me Pahpãm wÿ, wa ha nee hipêr ahna cumã me acajrên to prãm nare. ²⁷Ampo na? He ihtÿj ita caxuw cumã me akĭn, cwÿrjapê quê ha taa me akampa, ne me amã ampo atajê gô. Ampo na ri cumã me akĭn? He ca ihpĭan icator xà na amji mã me ito me ahimpej, ne me amã ikĭnti incwÿrjapê ri ihtÿj cumã me akĭn. ²⁸Ne wa Inxũ pĭn ajpên pjê ita wÿr icator, na wa haita caxuw pjê ita re, ne ma hacpÿ mã hÿrmâtê — hajÿr.

Pê Jeju ihkôt me ipa catêjê mã cute me cumã hikran na harê

²⁹Wa ite me cumã:

— Hamre, ca ita caxuw hirãa pêgŭjarên xà itajê kôt harên to mō. Ne nee incwÿrpe me imã ihkôt harên to amôr nare. ³⁰Na wa ita caxuw, ite me ate ampo cunea jahkre pej na megahkre pej, ne amã cute ampo na me acukij xà xwÿjrea na, ramã amã me hahkre pej, me hàhcukjêr xà atajê na. Cwÿrjapê wa ita caxuw itÿj Pahpãm pĭn acator na amjimã me ato ihimpej — hajÿr.

³¹Mã me imã:

— Xà ita kam cormã, ajkĭ ate amji mã ito me ahimpej? ³²Co he, nãmri ramã ihhêj ne ipê me apicràn xàa kam hàhhuc to mō. Ca ha atÿj me irer pa, ne ma ame gŭrkwa wÿr mepra, wa ha ahte ahtwÿ cakrô, wa ha nee ahte ijãhhuc nare. Ampo na? Quê ha ihtÿj Inxũ icahê na apu mō. ³³Ne ame akrihkrit cupate, wa mam ite me amã ijŭjarênxà itajê to ijŭjarên. Mâr ca ikam me amji hōnco, ne meacaxwãm pê me acarĭcti ne. Ne pjê ita kam, me cupêPahpãm na mehkwy nare atajê kam, ca ha ame amji pupun xàkêanre to ame amji pupu. Cakrô, ca ha nee ame cumã me apec nare, ne me cumã amji to ihtÿaj ne. Ampo na? He wa ramã me hō pahhi mea mã ite me tohjê, ne me hirô pê ixãm — hajÿr.

Pê Jeju Hŭm Cati mã amji cajrên

17 ¹Jeju te me imã hŭjarên to hajÿr jirô pê mã rikaj mã, cōjkwa wÿr irĭt, ne cute Hŭm mã:

— Ỹhỹ Inxū, hamre ramā ityc xàa kam hàhhuc. Inxū, ipê akra catia to icati na, cute me ijahkre pej xà na meto, quê mehcunea me ijahkre pej, mār wa hanea ne acatia to acati na, cute me gahkre pej xà na me to, quê mehcunea gahkre pej. Cwỳrjapê ca ha hacpỹamā ityc jirō pê ito itĩr ne amji wỳr ijaprō. ²Ne pê ca imā garkwa hyr to hane he: “Pjê wỳr ateacator, ne ate amji to me hō Pahhiti na, ne mehcunea toahimpej xà caxuw, ramā ite amā acarôt jōr. Ne wa haamā me hàhtōa ne cugō, ate me to gō tekjê xà na, quê ha ato amji mā mehhimpej, mār quêpahcahê na amji to me ipijapar rohnýtti mǎ” hane. ³He apyxit peaj ne quêt apê Pahpām, ne nee aràn xà na jūm pê Pahpām nare. Ne ipê por ate Jeju Crixto kujahêc ata. Ne me pahkwỳ te me pajahkre pej, cwỳrjapê quê ha me pahcahê na amji to me ipijapar rohnýtti mǎ. ⁴Ite ramā acatia to acati na pjê ita kam, cute megahkre pej xà na me ton. Ne ate imā ijàpên xà jōrata, ramā ite hipêj xàa kam. ⁵Ne pê wa ramā ate pjê ton xwỳjrea na mam acahê na ipa, pê amā icatia to icati. Na wa ha ita caxuw ma awỳr amji jaxà, ca ha amji cuna mǎ hacpỹa mǎ ito icatia to icati.

Pê Jeju Hūm Cati mǎ ihkôt me ipa catêjê cajrên

⁶— Ỹhỹ, pê ca imā me cupê me akwỳ atajê gō, ite mecumā ate amji kam gapac xà to hahkre, mǎ cute me gahkre pejprámte. ⁷Na ri ihtỳj cute me garkwa kam hapac. Ne ihtỳjita caxuw arūam iwỳr me cumā ampo cunea imprar nahahkre pej. ⁸Na wa ite, ate me cumā icakôc xà na gūjahkre xàatajêa to, wa ite me cumā icakôc, mǎ ihtỳj cute mempar, ne ahna me amji caxàr. Ne ihtỳj amji mǎ ate ajpên me hỹrmā ipyxit peaj neikujahêc na me ato hane. Ampo na? He nee mǎ ita pê ahêj xi xà nare, ne ampeaj kam ri.

⁹— Ne wa itỳj amā mehcajrên, ne nee mehkôt amāmehcunea pê me pahkwỳ nare atajê cajrên nare, ne por ateme imā hōr atajê pit, wa amā mehcajrên. Ampo na? Mecupê gō tekjêa, na wa apu mehcajrên. ¹⁰Ne mehcunea pê itekjê atajê pê atekjê, ne mehcunea pê atekjê atajê pê itekjêa. Cwỳrjapê ri pahkôt me ipa catêjê atajê kôt, cute ramā icarôt tỳjti, ne icatia to icati na me ipupun. ¹¹Ne wa ha ma hacpỹ mǎ awỳr amji jaxà, quê ha ahtepjê kam cormā me ahtwỳ ne ame ipa. Inxū, ampeaj kam apeaj to apej. Cwỳrjapê ca ha ca atỳj acarôat to me pahkwỳ jamā. Ampo na? He ampeaj kam acarôt tỳj, na pê ca imā icarôttỳjti ita gō. Cwỳrjapê ri ajkam pahpyxit peaj. Mār quê me pahkwỳ itajê pê me pahpyràac, ne meajpên hōnco tu ne, cute pahcuxà ajkam me pyxit peaj prámte. ¹²Pê wa pjê kam cormā ame cahê na imōr reria mǎ, itỳj, por ate imā acarôt jōr ata to ajcome hamār to me hūtār to ipa. Mǎ nee ijūhkra pê mehnō cator, ne ipictor nare. Ne por ramā gō kàhhôc te jūm pyxit peaj ne, ne cupê Juta Carijot ataipictor na harên ata ri, amjia kôt ahnaa cute amji to ipictor.

¹³— Ne wa hacpỹ mǎ ite awỳr amji jaxàr xwỳjrea na, cormā pjê kam ame cahê na imōrreria mǎ mecumā garkwa cunea to hahkre to ipa, mār

quê me hahkre pej, ne me cumã amji kînti ne. Pom wa ahnaa mã imã amjikîn na amji cajpê ita na, quê icuxà me amji cajpê. ¹⁴Wa ite ramã me cumã garkwa to hahkre, ne me cumã hôr. Mã me cupê ipyràac, ne nee me cupê pjê ita tekjênare, cwÿrjapê ri me cupê pjê tekjê atajê maamehcaca, ne ame curê. ¹⁵Ne wa ha me cumã ana ahwÿ, ca nee cormã ne pjê itapê amji wÿr me haprôr nare, ne ma cama me ahna mepahcurê xwÿn jamã, ne me cupê me hÿtà, mârquê nee ihkôt me amji kam hapac nare. ¹⁶Ne cute me amji kam hapac xà pê ite amji kam ijapac xàa pyrác, na ri nee me cupê pjê tekjê atajê teamji kam hapac xà pyrác nare. ¹⁷Ne garkwa cakôc xà itajê nee ihhêj xi jarên nare, ne ihtÿj cute catyt kam me ipa xà caxuw me hapackre, mâr quê ihtÿj me awpa, ne catyt kam me ipa. Na quê ha me cupê atekjê. ¹⁸Ne pom pê ca pjê wÿr ikujate ita na, wa ha me to, ne pjê cunea kôt ame cucrà, quê ha ame cumã pajarkwa pejti ita to hahkre to me ipa. ¹⁹Ne wa ite ijâpên xà caxuw amã amji jôr ita na quê ha me amã amji gô, ne ihtÿj me amã me hâpên to me ipa.

Pê Jeju Hÿm Cati mã mehkwy cunea cajrên

²⁰— Ỹhÿ Inxÿ, wa ha nee me pahkwÿ crêre itajê caxuw pit mã ana ijâhwÿr nare. Ne hanea ne cute cormã jÿ caxuw mehkôt me ikam hapac ne ito amji mã mehhimpejatajê mã, wa ha ana ahwÿ. ²¹Ne imã cute me amji kam hapac xà pyxit peaj na mehhôncoti na me to prãm. Pom ahnaa mã pamã pahte amji kam pajapac xà pyxit peaj he, ita to cute me amji kam me hapac na ri, imã me to prãm. Ita na quê ha me cupê me pahkwÿ nare atajê cute amji kam me hapac xà pyxit peaj na me hõmpu, ne ihtÿj ate ikujahêc na me gahkre pej. ²²Ne pom ate ito icati ita na, wa ite me to cati, na ricute amji kam me hapac xà pyxit peaj na me amji hõnco tu, ne me pyxit peaj te hajÿar, pom cu ajkam pahhõnco, nepahpyxit peaj he. ²³Ne ampo na mã wa ame cumã ana ijâhwÿr to hane? Nee mã ampo na nare. He mehcunea mã cute amji kam mehapac xà pyxit peaj to prãm to, wa ame cumã ana ahwÿ, mâr quê mehcunea me hõmpu ne ate ikujahêc na me gahkre pej. Ne pom amã ikînti ita na, quê ha amã mehkînti na cumã me gahkre pej.

²⁴— Ỹhÿ Inxÿ, por ate imã me hôr atajê mepahcahê na amji to me ipijapar na, imã to prãm. Ne ca ha me kam mare mã ate itoicati, mã cute me ipupun, ne me ijahkre pej. Na ca ha atÿj ito hane. Ampo na? Pê ca ramã mam pjê ton xwÿjrea na amã ikînti, na ca ha ito hane.

²⁵— Inxÿ, he ca quêt catyt kam akrî ita na, ne ita ripjê kam mehcunea pê gahkre kêatre. Ne pa nare, ihtÿj quêt imã catyt kam akrî ita na gahkre pej. Ne por ate imã me hôr atajê tehajÿar ne ihtÿj ate ikujahêc na me cumã gahkre pej. ²⁶He wa ite me cumã garên, mã cute me gahkre pej. Ne wa ha me cumã garên to ixãm ita na, mâr quê me cumãajpên kîn to hanea, pom quê amã ikîn he. Ne ite amjikam ijapac xà pyxit peaj ata

to pit mǎ me amji kam hapac to me ipa, mǎr wa ajpĕn kam me ipyxit peaj — hajÿr.

Pê krāhtare te Jeju pro

18 ¹Ne Jeju te Hūm mǎ ihcakôc to hajÿr jirô pê mǎ rima me ipê ihkôt me ipa catêjê to mō, Kÿhti jôcaprūm jikjê wÿr. Mǎ curi pīxô jô pjê ata, wa cumǎ me ixàr.

²Pê Juta pê Jeju kĕn mǎ mĕn catê ataramǎ pjê ata jahkre pej. Ampo na? Pê Jeju ramǎ curi me ito ipa to hàhtôa na pê. ³Mǎ ma me iwÿr Juta ata krāhtare kwÿ to mō, mǎ hanea ne mehkôt Pahpām jürkwajamār catêjê kwÿ me mō. Ne pê Pīxô jô pjê atawÿr me mō atajê pê, me cumǎ Pahpām mǎ mehcajrĕncatêjê jô pahhi kwÿ me, Parixêw catêjê kwÿ me, me ajpĕn pa, na pê me harkwa kôt me iwÿr me hàprê xà me, ihpôc xà me, cuhy pàr kwÿ me, me to mō.

⁴Pê ramǎ Jeju ampo te to hajÿr xà atajê cuneajahkre pej. Cwÿrjapê ri me cuna mǎ mō, ne cute mehcukij to:

— Jūm mǎ ca ame hapê? — hajÿr. ⁵Mǎ me cumǎ:

— Naxare jô krī pīn Jeju cator ata wa amehapê — hane. Mǎ hanea ne Juta pê Jeju kĕn mǎ mĕn catê ata me cahê na xa. Mǎ Jeju me cumǎ:

— He pa wa! — hane. ⁶Mǎ Jeju te me cumǎ amji jarĕn to: “He pa wa” hajÿr, me ajkaam mǎ hūpate Juta kôt me ipa catêjê cunea, hacpÿ mǎ pjê kam me hō to ame ipihur.

⁷Mǎ hipêr Jeju te mehcukij to:

— Jūm mǎ ca ame hapê? — hajÿr. Mǎ me cumǎ:

— Naxare jô krī pīn Jeju cator ata wa ame hapê — hane. Mǎ me cumǎ amji jarĕn to:

⁸— Wa ite ramǎ me amǎ amji jarĕn, he pa wa. Ne ca ha ate ame pamān japĕn na, ca ha nee ame ikwÿ caxun nare, quĕt taa ame pra — hane.

⁹Ampo na ri cute ita ton? Nee mǎ ampo na nare. He pêramǎ taa me ahna Hūm mǎ amji jarĕn to: “Ijô Inxū Cati, ate imǎ me hōr itajê, ite nee amji pê mehnō to ipictor xà nare” hane.

Pê Petrô jūm ita japac jakep

¹⁰Mǎ Ximāw Petrô te wapo xwahhihti caxàr, ne tohūmre nō japrÿ te Marco ita jaxôp, ne awpôcrūm to hapac jakep. Ne pê hūmre ata pê Pahpām mǎ mehcajrĕn catêjê jô pahhi mǎ hàpĕn catê. ¹¹Mǎ Jeju te Petrô mǎ harkwa to:

— Ajô wapo xwahhihti ita xi, nee ca apu to me cupĕipytār prām nare. He ite amji pupun xà kĕanre xà ita caxuw ri Inxū te ajpĕn iwÿr mehkujahêc. Xà wa ha ajkī nee cumǎ ixàr nare? Wa ha itÿj cumǎ axà — hajÿr.

Jeju Anati cuna mǎ xa

¹²Mǎ krāhtare me, to ihhimpej catê me, Pahpām jürkwa jamār catêjê jô pahhi kwÿ me, cute me Jejupro, ne hüntÿj na mehcajpre. ¹³Ne pê Cajpa

pê caku ata kam, me cupê Pahpãm mã cute mehcajrën catêjê jô pahhi. Ne ma Cajpa ata jûprequêt pê Anati ata jûrkwa wÿr me to mō. ¹⁴Ne Cajpa pê pahhi ata pê ramã me hapackre to hane he: “Quê ha jûm xûmre pyxít peaj ne ty, cu ha nee me pahcunea me pahtyc nare” hane.

Pê Petrô cute nee Jeju pupun nare na, amji jarê

¹⁵Wa ma Ximãw Petrô me, Jeju kôt me mō. Pê ramãPahpãm mã cute mehcajrën catêjê jô pahhiti ata ipupun pejtu. Cwÿrjapê wa ma Jeju kôt ixâr, pahhi jûrkwajarkwa mã carã intête kwÿc ata wÿr. Mã cormã curia, pō pê Petrô xa. ¹⁶Wa ite harkwa jamãr catê cahãj nō ata mã icakôc, ikwÿ nō Petrô te ikôt hàr xà caxuw. Mã ihtÿj cute hàr na hamãr, mã hàr. ¹⁷Mã cahãjre te hõmpun ne cumã harkwa to:

— Xà apê, por cute me jûm pro ata kôt apa catêjê nōamã ca? — hajÿr. Mã cumã:

— Quê! — hane.

¹⁸Ne ampeaj kam kry, cwÿrjapê ri pahhi mã mehãpên catêjê me, krãhtare te me cuhôn, ne mehkrã neahna me xa, ne ame amji cro. Mã hanea ne me cahê na Petrô xa ne amji cro.

Pê Jeju cute Pahpãm mã mehcajrën catêjê jô pahhiti cuna mã xa

¹⁹Mã Pahpãm mã mehcajrën catêjê jô pahhiti te Jeju cukij ne cumã: — Jûmjê pê mã akôt me ipa catêjê? Ne ampo to mã caamehcunea mã hahkre to apa? — hajÿr.

²⁰⁻²¹Mã Jeju te cumã amji jarën to:

— He wa ijõtpê mehcunea kam mare mã icakôc to ipa. Neramã cute Pahpãm to me amji kam hapac xà jûrkwa me, cute me cuprôn xà jûrkwa atajê kam, ite me cumã ampo to hahkre to amji pyrãc tu. Ne rÿ jû caxuw ite ampo to ipimxur pëa mã apu harën to imör nare, nō na mã ca ajte apu icukij xà ita to icukij? Ne cute me ipar catêjê ca mehcukij, wa ite ampo jarën xà atajê na, cute me ipar to kênre nare. Na ca ha mehcukij — hajÿr.

²²Jeju te ihcakôc to hajÿr. Mã cahi na krãhtare xaata te cakwîn, ne cumã harkwa to:

— Xà ajkî Pahpãm mã mehcajrën catêjê jô pahhimã me pahcakôc xà te hajÿr? — hajÿr. Mã Jeju cumã:

²³— Wa ihhêaj to ampo jarën xà kaj na harê, ca ha mër imã harê, wa hahkre pej. Nãmri wa ha ite ampeaj kam ijûjarën na, ca ha nee icakwîn nare. Ne mër ampo na mã ate icakwîn? — hane.

²⁴Jirô pê mã ri Anati pê amji jahkre kêatre, mã cute Jeju cajprea na Cajpa, pê cute Pahpãm mã mehcajrëncatêjê jô pahhi ata mã ihkujahêc.

Pê hipêr Petrô cute nee Jeju pupun nare na amji jarê

²⁵Mã curia cormã cuhy na Petrô xa, ne amji cro. Mã cute mehcukij to:

— Xà apê cute me jūm pro ata kôt me apa catêjê nōa mā ca? — hajÿr.
Mā me cumā amji jarēn to:

— Quê, he nee ipê mehnō nare — hane.

²⁶Mā pahhi mā hàpên catêjê nō pê, por Petrô te jūm japac jakep ata jūkê nōata, te Petrô jarēn to:

— Mār wa ite Pîxô jô pjê kam ihkôt apupunta? — hajÿr. ²⁷Mā hipêr Petrô cumā:

— Quê — hane, me ajkaam mā hōxāhxāc kār.

Pê Jeju Roman catêjê jô pahhi pê Pirat cuna mā xa

²⁸Jirô pê mā ri Roman catêjê nō pê krî jô pahhiÿrkwati ata wÿr Jeju to me mō, ramā apê intuwti kam. Mā nee ikre ata mā Juta catêjê nō xàrnare. Ampo na? Cute me amji to me amji kam hapac xàa na pême hane. Quê ha ramā amji kîn ata na ahtëp, quê ha nee Juta catêjê me, mehcahkrit catêjê atajê pê Juta catêjê nareatajê jürkwa mā amencjêjnare. Ampo na? Cute amji kîn ata japy ame amji to kêncupate. Na pê nee ikre ata mā Juta catêjê nō hàrnare, cute ihtÿj me Hakren xà jô atajê kur prāmte. ²⁹Mā Pirat pê Roman catêjê nō pê krî jô pahhi ata cator, pō mā, cute mehcajpar prāmte. Ne cute mehcajpar ne me cumā:

— Hūmre ita jarēn kên jū to mā, ca ha ame imāharê? — hajÿr.

³⁰Mā me cumā harēn to:

— Quê ihkên nare na mā, wa ha nee mehpro ne awÿr me toimōr nare — hane. ³¹Mā Pirat me cumā:

— Ca ha caa quêt, ate me amji kam me gapac xàa kôt, me ate me amji ton xàa kôt, mehçukij ne ihkên mā meamê — hane. Mā Juta catêjê me cumā:

— Pom hūmre ita te ihkên xà ton xà ita ihtÿj ihçuran na awjahkre. Cakrô wa nee amjia kôt ite mehçuran xà nare, ne apêa ri pahhi, cwÿrjapê ca ha caa amji kampa, ne ihçuran na me imê, wa ha cormā mehçura — hane.

³²Ne pê ramā Jeju kÿj pê, pî na ajêt ne ihtyc to mōr na amji jarêa na pê, Juta catêjê cakôc xà ata ramā cute amji jarēnxà ata na to ipipê to mō.

³³Mā hacpÿa mā Pirat xàr, hürkwa mā, ne cute Jejumā hàkjêr ne ihçukij to:

— Xà apê Juta catêjê jô Pahhi? — hajÿr.

³⁴Mā Jeju cumā:

— Xà amjia kôt ate icukij xà ita to hajÿr? Nare jūmjête amā ijarēn xà kôt mā ca ate icukij ita to hajÿr? — hane.

³⁵Mā Pirat cumā:

— Côt mā ca atÿj ipê Juta catêjê nō na apuicāmÿi? He me akwÿa kwÿ me, me hō pahhi catêjê te riimā me gōr. Ne mēr ampo to mā ate jū mǎn? — hane. ³⁶Mā Jeju cumā:

— He ihmpej xà ita pê nee pjê ita tekjê nare, ne quêt cōjkwa kam ri ihmpej xà. Wa ha ipê pjê ita kam pahhi xà na mã, quê ha ramã ikôt me ipa catêjê ihtÿj itête me ajpu, Juta catêjê mã cute me ijôr to hajÿr cupate. Nenee pjê ita kam ipê pahhi xà nare — hane.

³⁷Mã Pirat cumã:

— Xà mër apê pahhi? — hane. Mã Jeju cumã:

— Pom ca atea ita na ijarên ita? Ampeaj kam ri ipêPahhi, ne ite catyt kam amji kam ijapac xà jarên to ipaxà caxuw, wa pjê ita wÿr icator, ne caxuaw pêwa ipÿm, ne pjê ita wÿr ajpên mō. Ne por quê ha jÿmampeaj kam ite catyt kam amji kam ijapac xà ata na itoamji mã ihmpej ata, quê ha ihtÿj ikôat amji to — hane. ³⁸Mã Pirat cumã:

— Ne mër ampo pê mã “...ampeaj kam...” me “...catyt kam...” ita? — hane.

Pê Pirat Parapa mã hikra Jirô pê mã ri hipêr

Juta catêjê wÿr cator, cute mecumã ihcakôc prãmte, ne me cumã:

— Wa nee ite hÿmre ita curan xà caxuw kam ampo kên nō mã icator nare. ³⁹Ne me Hakren xà jō amji kîn ita cunea kam wahân ne itÿj me amã me hacjên catêjê pyxit ne hapôj. Xà wa ha ajkî Juta catêjê jō Pahhi ita mã hikra? — hajÿr.

⁴⁰Mã mehcunea ame carâr to:

— Quê, nee ca cumã hikran nare, Parapa mã, ca hahikra — hane. Ne por Parapa ata pê ri hàprêa kam mecupê ampo to pōj catê.

Pê krãhtare Jeju cahhy ne ahna xwÿ

19 ¹Mã Pirat te krãhtare kwÿ mã pryti kà kamwakÿre to Jeju cahhyr kêanre na harkwa. ²Mã krãhtare te me to hapactu na me ajpên par, ne me amji mã:

— Hacme, ne ame to pajapactu — hajÿr. Ne cute hōmjî to me cumã pahhi krãhkà, ne ihkrã mã me haxàr. Ne cute me hō pahhi kà intepti ata mã me haxàr, ne ahna me hãm, mã xa. ³Mã hÿrmã me pra ne ahna me ahtêp ne me ahna xwÿ to:

— Hàpà Juta catêjê jō pahhi, ampeaj kam apej, ne ampeaj kam atÿj! — hane. Ne ajco mehÿhkra krã to mehcahy.

⁴Mã hipêr me hàhtôti atajê wÿr Pirat cator, ne mecumã:

— Me ikampa! Wa ha ajpên Jeju ita to mō, ne me acuna mã hãm. Ne imãa ihhêj ne nee cute ampo kên ton nare, iteihcuran xà caxuw. Ne mër ampo na wa ha ajteihcura? — hane. ⁵Mã Jeju cator, ne ihkrã na hōmjî te me hō pahhi krãhkà ata ajêt, mã ihkà intepti kam xa. Mã Pirat te me cumã harên to:

— Nãmhã hÿmre ita xa he! Me hōmpu, imãa ramã ihhêj ne cute amji pupun xà kêanre na amji pupun — hajÿr.

⁶Mã Pahpãm mã mehcajrën catêjê jō pahhi kwỳme, cute me Pahpãm jūrkwã jamār catêjê me, cuteme Jeju pupun, ne me caràr kam me to ihtēm, ne me caràr to:

— Pī kam me axô! Pī kam me axô quê ty! — hane. Mã Pirat me cumã:

— Wa nee ite kam ampo kên mã icator nare ita kam, wa neeihcuran nare. Quê ha me amã ihcuran prãm na, ca ha me caa, ate amji kam me gapac xà to me to mō, ne pī kam me axô ne mehcura — hane.

⁷Mã Juta catêjê me cumã:

— Me icaca xà jō kàhhôc kam, cute harën to: “Quêha jūm te cupê Pahpãm kra na amji jarën na, quê haihtỳj mehcura” hajỳr. Cwỳrjapê ca ha atỳj ite mehcuran xà na me imē, wa ha mehcura — hane.

⁸Mã Pirat te, Jeju te Pahpãm kra na amji jarën na, me harën par, ne ampeaj kam cumã hūpa. ⁹Mã ma hacpỹ mã hūrkwã mã hār, ne cute Jeju cukijto:

— Jū pīn mã ca ajte acator? — hajỳr. Mã nee Jeju te cumã jū mãn nare.

¹⁰Mã Pirat te cumã harkwa to:

— Xà amã imã acakôc prãm nare? He xà amã itỳj iteacuran xà me, amã hikran xà na, apê ijahkre kêatre? — hajỳr.

¹¹Mã Jeju cumã:

— Quê ha kỳj rŭm cōjkwa kam Inxŭ pīn ate ito hajỳr xà ita caxuw amã acarôt cator nare na mã, ca ha nee ito jū mãn nare. Ne por jŭmjê te amã ijōr atajê te ri girôa pê ito kêanre — hane.

¹²Mã Pirat te ihcakôc xà ata na kam hapac, cwỳrjapêri ihtỳj cumã Jeju mã hikran prãm cakrô, mã Jutacatêjê ame cumã caràr to:

— Ca ha ate cumã hikran na, ca ha nee ramã apê pjê cunea jō pahhiti pêXexa ata jō ikwỳ nō nare! Ne por jŭmamã cupê pahhi na amji jarê ata pê ri gō pahhiti, ne cupê Xexa curê xwỳn! — hane.

¹³Mã Pirat te ita kam hapac, ne pō mã Jeju to cator. Por pō pê kên te ihcahty, mã Juta catêjê te me harkwa na me cumã haprỳ to Capata ata wỳr Jeju to cator, mã xa. Mã Pirat te ihkrī xà kam mehkên catêjê cukij xà ata kam hỳr, cute Jeju kên mã mên xà caxuw. ¹⁴Ne pê amcro ata kam, cute me Hakren xà jō amji kīn kam me to ihtēm xwỳjrea na, ramã pyt ajmār me pahkrã jimoac kam hỳr kam pê me to hane. Mã Pirat te Juta catêjê mã hūjarën to:

— Ihnãm hã, me gō Pahhi xa he! — hajỳr.

¹⁵Mã cute me caràr to:

— Quê ha ty! Pī kam me axô, quê ty! — hajỳr ita na. Mã Pirat me cumã:

— Xà me amã pī na me gō Pahhi ita xôr, mã kam ihtyc na to prãm? — hane. Mã Pahpãm mã mehcajrëncatêjê jō pahhi kwỳ te me cumã harkwa to:

— Me imã Roman jō krī kam, pjê cunea jō pahhiti pê Xexa pê me ijō pahhiti ata pyxit peaj. Na ri nee iràn xà na me imã me ijō pahhi nōhamreare — hajỳr.

¹⁶Mã hamre Pirat te pĩ na cute me Jeju xôr xà caxuwme cumã hõr, mã ma me to mõi. Ne cute me Jeju mã pĩhticatia te amji kam ihcapa ata jõr.

Pê krãhtare pĩ na Jeju xô

¹⁷Ne ma kën nõ ata wÿr me to mõi. Ne Juta catêjê jarkwa na kën ata japrÿ te Corcota, ne ihkõt harên xà te “Mehkrãhhi jô kën”. Mã ma cute hõ pĩhti ata pÿn ne cupjê.

¹⁸Mã curi me to cator, ne cute pĩ na me hir, ne ahna hũhkra me ihpar kam wakÿre cuhhêc, ne ahna me hãm, mã kÿaj pê kam ajêt. Nehanea ne cute ihkõt me hũmre to me ipijakrut, ne hajÿar ne ajtea me hõ pĩa kam me haxôr, ne ahna me hũxwÿr. Mã Jeju mehçote na ajêt, mã cute me hũjê ne me to ajêt.

Pê pĩ na ihkãhhôc ajêt ata Jeju jarê

¹⁹Mã Pirat te Jeju na ihkãhhôc jipêj, ne cute ihkrãcwÿrpê pĩ na inxôr na hũjahkre. Ne pê krĩxãreincrê jarkwa na ihhôc atajê pê Juta catêjê jarkwa me, Roman catêjê jarkwa me, Crec catêjê jarkwa. Ne ihkãhhôc ata hũjarên to:

— Naxare jô krĩ pĩn hũmre pê Jeju cator, ita pê riJuta catêjê jô Pahhi — hane. ²⁰Pom curi cute pĩ na me Jeju xôr ata, krĩna pire mã, na ri ihtÿj Juta catêjê jãhtôa ne cute mehkãhhôc ata cahyt. ²¹Mã Pahpãm mã mehçajrên catêjê jô pahhicatêjê te Pirat mã ihkãhhôc ata to mehhimpej to:

— Pom ate ahna ihhôc to: “Cupê Juta Catêjê Jô Pahhiti” hajÿr to ita ca ha antuw, ne “Cutea amji jarên to, ‘Ipê JutaCatêjê Jô Pahhiti’ ” hajÿr na, ca ha ihhôc — hajÿr. Mã Pirat me cumã:

²²— Pom wa ite ahna ihhôc ita, quê ha hàhhuc rohnÿtti mã — hane.

Pê krãhtare amji mã Jeju kà to ajçrà

²³Mã krãhtare atajê te pĩ na me Jeju cakrô inxôr, mã ihcakrô ajêt. Jirô pê mã ri cute me cwat itajê te ahpÿanre na ihkàto me amji tÿj. Ne hanea ne cute me ihkàte ihpar kôn na iwrÿc tu ata pyr. ²⁴Ne cute me ajpên par to:

— Cu ha nee ame ihkà impejti pijapÿn xà nare ita cokjêr nare, ne cama kën to ihkõt me amji pê hũhkà. Ne me pahnõ te amji pêto hũhkàr na, cu ha me pahnõ amji mã ihcunea nacupy — hajÿr. Hõ, pê ramã Pahpãm jô kãhhôc ita jarêan xà na pê hane, pê harên to:

“Cute ikà to me amji tÿj, ne ihkõt kën to ame amji pêhũhkà” hane.

Ne ampeaj kam pê cute harên xà ata. Na rikrãhtare te hahkre pej nare kam ihtÿj ton.

Pê Jeju Jowāw te inxi to amji pytār na cumā awjahkre

²⁵Mã pī na Jeju ajêt ata krac ri cuna mã wa Jeju menxi me, ihtōj xa, mã hanea ne me cahi na Marij Matarkwỳj me, Marij nō pê Cropa me hīxi ata, hanea ne xa. ²⁶Mã Jeju te ipupun, ne icahê na inxi pupun, ne cumā:
— Inxê, por ijaxà kam acahê na akra xa ata — hajỹr. ²⁷Ne imã:
— Jowāw, por ana acahê na xa ata — hane. Cwỳrjapê wa ite ahna amji caxàr, mã ijũrkwa kam hōtpê icahê na ihkrĩ.

Jeju tyc xà

²⁸Jirô pê mã ri Jeju te ramã pjê kam hàpên xàcunea jipêj na amji jahkre pej, na ri cute harkwa to:

— Ampeaj kam imã kôr — hajỹr. Ne pê ramã Pahpãm jō kàhhôc harkwa jarêan xà na ri cute ihcakôc xà ita to hajỹr.

²⁹Mã curia ampo cacô xwa xỳre na kyre pê hī ahwỳ ata xa, mã cute ampo pīhhê nō na, me ampo rerecti ita xôr, ne me to inco, ne Jeju jarkwa mã me haxàr. ³⁰Mã cute to ihkôm ne harkwa to:

— Hamre, ramã ite ijâpên xà cunea jipêj, mãhamre! — hajỹr. Ne pea imput pec to mō ne ihtyc.

Pê krãhtare Jeju jipê kam caxwỳ

³¹Mã Juta catêjê te Pirat na me hàhwỳr, quê mehũmre incrê ne pī na me harij atajê te kēhkê, mārquê cyt ne amehtyc pa, quê pī pê me to irôrôc pa. Ampo na? Ramã mehkôt xà jō amcroa kam hàhhuc to mō, na ri ma apu pī kam me jũmjê tyc ne ame harij na ame to ihcaca. Ampo na? Por ajpên iràrà mō ata na ri ramã cute me amji kīn catia kamme to ihtēm xà. Na ri Pirat te mehte kēhkên na hōkrãhtare mã harkwa kujahêc. ³²Mã krãhtare te, por pī kam ame harij atajê tekēhkên. Ne mam cute, por cute me ipijakrut to me Jeju jũjê atajê nō te kwīn, ne ihkôt cute me ita te kwīn. ³³Jirô pê mã ri ma Jeju wỳr me mō, ne ahna me hàhtêp ne cute me hōmpun, mã ramã ihtyc tu ne ajêt. Cwỳrjapê ri nee cute mehte kwīn nare. ³⁴Mã krãhtare nō te hō kruwxwa to Jeju jipê kamcaxwỳr, ne cumā caxàr, mã ihkôt mare mã caprô me côajxwỳ.

³⁵He wa ite ito ita to hōmpun, na wa iteihkàhhôc ita kam me amã harên, mār ca hanea ne me kampa, ne catyt kam Jeju to amji mã me ahimpej. He wa nee ame amã ihêj xi jarên nare. ³⁶Pê Pahpãm jō kàhhôc Jeju jarên to:

— Quê ha nee ahi nō impàt nare — hane. ³⁷Ne pê hanea ne kam harên to:

— Quê ha me, por kruwxwa to cute me jũm caxwỳr ata pupu — hane, ata na ri cute hajỹr.

Cute me Jeju jarêt xà

³⁸Ne pê Joje pê Krĩhkãhti jō krĩ catêjê nō ata mã, Juta catêjê jō pahhi kwỳ cupa, na pê aracricupê Jeju kôt ipa catê. Mã cator ne cuteJeju jī na

Pirat wÿr. Mā Pirat te cumã hahkre. Mā ma Joje tē. Mā ma ihkôt, por pê caxwa ri Nicotem mō ne Jeju pupu ata tē, ne cutepī pê me Jeju jī caxār. ³⁹Ne Nicotem ata ampo pī pàrkà cuxwati atame, ampo pīhhô pê ràm cuxwa pyràcti ata pÿ, ne to kwÿ ata pê hūti trīnta quir. ⁴⁰Ne me hūmre pijakrut atajê te me Jeju jī na hàhwÿr, ne ma me to kwÿ, ne cute ampo kà ata me, ihnô cuxwa pê ràm cuxwa pyràcti ata to me Jeju cunea cukên, ne cupêhkà jakati impejti to mehcupu. Hôhō, pê Juta catêjêcute me amji jarêt xà caxuw ajco me amji to hane.

⁴¹Ne por pê curi pī na me Jeju xô ata cahê na, pīxô jō pjê kam, cute me amji jarêt xà caxuw kên kre tuwti nō ata, mā rÿ nee jūm te kam amji jarêt nare. ⁴²Ne pê Juta catêjê mā amcro te amji mā incjêjxà pê, ajco pytre kam ajpên mā acjêj. Ne caxwa pê, pê ajco ramã amcro intuw amji mā acjêj. Ne ma apu amji kīn kam mehkôt xà kam mehtyc to me hàpên tēte me ajpên mā. Na pê me hūjarêan kam pīxô jō pjê kam kên krenô ata kam, me Jeju jī xi.

Pê hacpÿa mā Jeju tīr

20 ¹Mā mehkôt xà jō amcro jirô pê, tōmīc na, iraràtia na cormãahkūmti kam, ma Marij Matarkwÿj kre wÿr tē. Ne cute, por kên to cute me Jeju kre jarkwa jihê ata pupun, mā ajte hihê mên na xa. ²Mā cute hōmpun ne ma Petrô me, iwÿr ipicahur. Neme iwÿr cator ne cute me imã hūjarên to:

— Cute kre pīn me pajō Pahhi jī caxār ne jū ri mehir! — hane.

³⁻⁴Wa ma Petrô me ajwar kên kre wÿr me ipicahur, waite irer ne mam kre wÿr icator. ⁵Ne kên kre jarkwa mā inôr, ne tee apu Jeju jī japê, ne nee ite hōmpunnare. Ne ite cupêhkà pit pupun, ne nee hÿrmã ixār nare. ⁶Mā hapu na ikôt Petrô tē ne cator, ne ma kre mā hàr. Necute cupêhkà pit pupun, nôr xà kam. ⁷Ne hanea ne, por pê cupêhkà ihkrã jarij ata, curiahakàn pê ajtea ihkrã pejti ne nō. ⁸Wa hanea ne ihkôt ixār ne ite cupêhkà pit pupun, neite hacpÿa mā Jeju tīrna amji mā to hajÿr pyrentu. ⁹Ne nee ajte cormã me Pahpãm jō kàhhôc kamcute harên xà to: “Quê ha ihtÿj hacpÿa mā Jeju ihtīr” hajÿr ata na ihkôt me hakop to impej nare. ¹⁰Ne ma hacpÿ mā ikre wÿr ite me amji jaxār.

Pê Jeju Marij Matarkwÿj mā amji to ajpê

¹¹⁻¹²Mā Marij Matarkwÿj curia xa ne pō pê apu amrã. Mā aracri ramã cōjkwa pīn Pahpãm mā memprar catêjêpijakrut ne Jeju nôr xà kam me jÿ. Mā Marij Matarkwÿj te Jeju japên prãmte kre mā nôr, ne cute Pahpãm mā memprar catêjê pupun. Mā ihkrã nôr xà kam ita jÿ, mā ita ihpar nôr xàkam jÿ, mehkà jakati kam, cute me hūjê ne me to jÿ. ¹³Ne cute me Marij cukij to:

— Ampo na mā ca apu amrã? — hajÿr. Mā me cumã:

— Jū kam cute me ijō Pahhi jī caxàr ne me to tē, nejū ri mōrmō cute me hir, ipê hir xà na hahkrekêatre! — hane.

¹⁴Ne cute me cumã ita jarēn jirō pê mã ri ipipkjêrne cute Jeju pupun, mã xa, mã nee cute cupê Jeju nahahkre pej nare. ¹⁵Mã cute ihcukij to:

— Ampo na mã ca apu amrã? Ne jūm mã ca apuhapê? — hajÿr. Mã ihtÿj apu to pīxō jō pjē jamār catêjê nō, ne cumã:

— Ca ha ate mǎn caxàr ne jū ri hir na, ca ha imã harē, wa ha capa ne hacpÿa mã kēn kre wÿr to mō — hane.

¹⁶Mã Jeju cumã:

— Marij — hane. Mã hÿrmã ipipkjêr, ne cute Jutacatêjê jarkwa na cumã:

— Rapôn! — hane, ne Rapôn ita jūjarēn xà te “Ikrã tūmti!”

¹⁷Mã Jeju cumã:

— Nee ca icupên nare, nāmri wa cormã nee Inxū wÿrijàpir nare. Ne cama atēm pyrentu ne me ikjêjê mãjarēn to: “Wa ha ma Inxū pê me Apām, pê ijō Pahhiti pê me gō Pahhiti wÿr tē” — hane.

¹⁸Mã ma Marij ihtēm pyrentu, ne cute me imã hūjarēnto:

— Wa ite me pajō Pahhi pupun — hajÿr. Ne cute me imãJeju te cumã harkwa hyr xà atajê jarēn par.

Pê Jeju ihkôt me ipa catêjê mã amji to ajpê

¹⁹Mã amcro ata na, me ipê Jeju kôt me ipa catêjê te ramã caxwa ryre kam me cuprôn, ne ite amji na me to harkwa jihê, Juta catêjê kwÿ cupate. Mã ihprôt pê, krãa, me iwÿr Jeju cator ne meicote na xa, ne me imã:

— Hàpà, mǎr me apeaj? Nee ca icupate ame akrihkrit nare — hane.

²⁰Jirô pê mã ri cute me imã hūhkra me hīpê caxwÿrxwakre jahkre, wa ite me hōmpun, ne ampeaj kam hūrēn me ijakry. ²¹Mã hipêr Jeju me imã:

— Inxū mã, me amã ampo cupa nare na me ato prām. Ampo na? Pom ahnaa mã Inxū te ajpên ikujahêc ita na, wa ha me ato, ne pjê cunea kôt ame acrà ne ame akujate — hane.

²²Jirô pê mã ri cute me icunea jakôr, ne me imã harkwa to:

— Imã me ate me Inxū Carō Pejti incwÿr na me atoprām. ²³Na ca ha me cumã acakôc ne ijaprÿa na me cumãacakôc. Ne ita caxuw, ca ha ate jūm te Inxū Cati to kēn ata mã: “Ca ate Pahpām to kēn ata, cute to tojnō ne hīcu” hajÿr na, quê ha InxūCati acuxà ihtÿj cute to kēn ata to tojnō ne hīcu. Nāmri ca ha ate jūm mã: “Pahpām te nee ate to kēn xà ata to tojnō ne hīcu nare” hajÿr na, quê ha Inxū Cati acuxà, garkwa kôt nee to tojnō ne hīcunare — hajÿr, ne curia hamre, ne ma tē.

Pê Jeju Tome mã amji to ajpê

²⁴Ne me iwÿr Jeju cator xà ata kam, ne pê nee me ijō ikwÿ nō japrÿ te Tome pê, por ajkrut ne ihpÿm ata, ame icahê na mōr nare, ne jū ri apu mō. ²⁵Na wa ite me cumã ijūjarēn to:

— Wa ite me pajō Pahhi pupun! — hajÿr. Mā me imā:

— Wa ha nee ate me imā gūjarēn xà ita kam ijapac ne amji mā to hajÿr nare. Ne xahūhkra caxwÿr xwakre pupu, ne kam ijūhkrakhi xi, ne hīpē caxwÿr xà kōt ijū jaxà ne ihcupē, ne cormā ita na amji mā to hane — hane.

²⁶Mā me ina amcro te xet, wa hacpÿa mā ite me cuprōn, mā ita caxuw curia hanea ne me icahē na Tome apu mō. Wa ite me to harkwa cunea jihē partu cakrō, mā krāa, Jeju me ijipōc ri catorne xa, ne me imā:

— Hàpà, mār me apeaj? Nee ca icupate ame akrihkritnare — hane.

²⁷Ne Tome mā:

— Tome, mēr ijūhkra pupu ne caxwÿr xà xwakre mägūhkrakhi jaxà ne to ihcupē. Ne ijipē caxwÿr xà xwakre mā gū jaxà ne ihcupē ne ijahkre pej. Nāmhā ne gāprār xi ita mā hikra, neito ca amji mā ahimpej! — hane.

²⁸Mā Tome cumā:

— Apē ijō Pahhiti pē Pahpām — hane.

²⁹Mā Jeju cumā:

— Ca ate ato jīa to ipupun, cwÿrjapē mā ca cormā ate ito amji mā ahimpej. Por jūmjē me ipupun nare kamihtÿj ito amji mā mehhimpej atajē ri ampeaj kam mehakry! — hane, jirō pē mā ri hamre ne ma tē.

Pē ihkàhhōc ita Jeju to pahte amji mā me pahhimpej na me pamā awjahkre

³⁰ÿhÿ, he me ikam mare mā Jeju te Hūm carōt kōt hàpēn xà pihhocatia jāhtōa ne ton atajē, wa nee ite me amā ihkàhhōc ita kam nōr nare. ³¹Ne pom ca ame cahyt itajē, wa ite ihkàhhōc ita kamme amā nōr partu, mār ca ate me Jeju Crixto pē Pahpām kra, mā cute me pahpytār catē na me pamā to hūjahkre ata to, ate amji mā meahimpej prāmte, wa ite ahna me amā ihhōc. Ampo na? He ca ha ate Jeju to amji mā me ahimpej na, caha atÿj cukwa kam Pahpām cahē na amji to me apijapar rohnÿtti mā.

Pē Jeju Hīpōjajo intohkà na ihkōt me ipa catêjē mā amji to ajpē

21 ¹Jirō pē mā ri Jeju te me ipē ihkōt me ipa catêjēmā hipēr amji to ipipē, Hīpōjajo jō pjē pē Tiperij jō krī ata cahē na. Hō, pē hane.

²Ite me xet itajē wa ame ipa he: Wa itō pē Tijac me ipē Xeptew kra me, XimāwPetrō me, Tome pē ajkrut ne ihpÿm ata me, Têtêc jō krī pīn Natanew cator ata me, me ikwÿa kwÿ pijakrut atajē me. ³Mā Ximāw Petrō te me imā:

— Wa ha ma mō ne tep pro xà to ihnō pro — hajÿr. Wa mecumā:

— Wa ha hanea ne me akōt me to ihnō pro — hane. Ne ma meicunea me mō, ne pàr kre mā me ixàr. Ne caxwa ri ihpro xà to ite me hapēan to apē, ne nee ite me to ihnō pro nare.

⁴Mā ramā apē to mō, mā ramā xāmte aracri Jeju cō tohkà na xa. Wa nee ite me cupē Jeju na hahkre pej nare. ⁵Mā me imā carār to:

— Hàpà me hūmre itajê? Ampo ca ate me toihpro? — hane. Wa me cumã:

— Hamreare, wa tee ite me to hapêan to apê, ne nee iteme to ihnõ pro nare — hane.

⁶Mã Jeju me imã:

— Měr cô kam awpôc rūm, pàr kre jìkjê rūm me gō teppro xà ita to me awcapê, ca ha atỳj me to ihkwỳpro — hane. Wa ite cô kam me ijō kryhti to me ijūcapêr, ne ite me toihkjên, ne nee hacpỹ ne pàr kre wỳr me to ijàpirnare. Ampo na? Ampeaj kam, tep itajê cati ne hàhtô, na ri hūtĩ.

⁷Wa ite Petrô mã ijarkwa to:

— He me pajō Pahhiti pê Jeju ri xa! — hajỳr. Mã Ximāw Petrô ihcakrô apu kwỳ ne cute Jeju jarênpar, ne hitô kàhti ata mã amji jaxàr, ne ma mrôr neihpa na kwỳ ne ma Jeju wỳr cô tohkà na cator. ⁸Wa ma hapu na me ikwỳ me pàr kre to ajpên me tep na, ihpro xà kjên to me mō, por hỹrmã hūwry na me pajara capô te xīncwēnta ata wỳr, ne hỹrmã me to icator. ⁹Ne pō mã pàr kre pê me ijapôj pê, ite me cuhy prà kam tep kwỳ krĩna me hōmpun. Ne hanea ne ite me pāw pupun, mã hikwa.

¹⁰Mã Jeju me imã:

— Ajpên me imã, pom curmã ate me to tep pro itajê kwỳ to tē — hane.

¹¹Mã ma Ximāw Petrô pàr kre mã hàr, ne cute hō natep na ihpro xà mã hê, ne ajêt ata mã hê pôn, ne mapjê wỳr to hàpir. Mã kam tep cati pit jàhtô na cute xěj ne ihkôt xīncwēnta ne ihkôt incrê ne tohipu tu, ne nee ajte cute kryhti ata jipôn nare. ¹²Mã Jeju me imã:

— Ajpên me mō ne me apà — hane. Wa ramã ite cupê mejjō Pahhiti na me hahkre pej. Ne hūpate, nee me inō tecupê jūm ata na ihcukij nare. ¹³Mã Jeju te me imã pāw me tep ata kryj, ne ahpỳanre na me imã hōr par.

¹⁴Hō, pê Jeju hacpỹ mã ihtĩr jirô pê me imāamji to ipipê to incrê to hane.

Pê Jeju Petrô mã ihkĩn na ihcukij

¹⁵Wa me ijàpàn jirô pê mã ri Jeju te amji na XimāwPetrô cukij to incrê ne cumã:

— Ýhỹ Ximāw Petrô pê Jowāw kra ita, xà ajkĩme akwỳ jirôa pê amã ikĩn? — hajỳr. Mã Ximāwcumã:

— Ýhỹ ijō Pahhi, imã akĩn na ramã ateiajahkre pej — hane. Mã Jeju cumã:

— Ýhỹ, ca ha me cupê ijahkre kêatre, mã nee cute meipupun nare atajê mã ijarê, ne me cumã ijarkwa gō. Ampona? He me cupê carà cahàcre hòhti kra pê hamār catê nare ata pyràac, ne amjia kôt ikaj na ame ipa — hane.

¹⁶Ne cute ihcukij to ipijakrut ita kam ri hipêr cumã:

— Ximāw xà ajkĩ ampeaj kam amā ikĩn? — hajÿr. MāPetrô cumã:

— Ỹhÿ ijō Pahhi, imã akĩn na ramã atea ijahkre pej — hane. Mā Jeju cumã:

— Ca ha me ikwÿ pê carà cahàcre pyrác pê hamār catê nareatajê to amji pytà ne me hamã — hane.

¹⁷Ne hipêr Jeju te ihcukij to:

— Ximāw, xà ajkĩ ampeaj kam amā ikĩn? — hajÿr. Mā Petrô mã amji kĩn nare, mã apu ihpec. Ampona? Nee mã ampo na nare, Jeju te cumã ihkĩn na ihcukij toincrê, na ri cumã amji kĩn nare, mã cumã:

— Ijō Pahhi, amã ampo cunea jahkre pej, na ri atÿj amã ite akĩn na ijahkre pej! — hane. Mā Jeju cumã:

— Ca ha me ikwÿ pê carà cahàcre pyrác pê hamār catê nareatajê to amji pytà ne me hamã.

Jeju Petrô mã, por ampo te to jū mǎn xà ata jarê

¹⁸— Ỹhÿ, wa ha amã awjarê, pê ca atuwre na, ajco akà to amji cūmpej, ne ma jū ri amã amōr xà na ihprāmti ata wÿr ajco pra. Ne ampeaj kam wa ha ita caxuw amã awjarê. Ca ha awej, quê ha jūmjê gara cajpre, ne jū ri amã amōr prāmnare, ne hÿrmã gitōtti ata wÿr me ato mō — hane.

¹⁹Pê Jeju hūjarēn xà ata to ramã Petrô mã, jūcaxuw cute mehcuran xà ata to hahkre. Ne quê ha Jeju cwÿrjapê Petrô tyc xà ata kôt, quê ha mehcuea me Pahpām cati na me hahkre pej. Ne cute Petrô mã:

— Ita caxuw ca ha ito pit mã amji mã ahimpej, ne ikôat apa! — hajÿr.

Pê Jeju nee ampo te Jowāw to jū mǎn xà na harēn nare

²⁰Mã hacpÿ mã Petrô pipkjêr ne amji jō kôt cuteipupun. Ne pê ramã Petrô mã Jeju mã ikĩnti na ijahkre pej. Ampo na? He pê wa me Hakren xà jō amji kĩn na me ijàpànxa na cahê na jÿ ne ihcukij to: “Jūm mã quê ha ajteakên mã amê?” hane cwÿrjapê. ²¹Mã Petrô te ipupun, ne ina Jeju cukij to:

— Pahhi, ne mēr hūmre ita, jū mã quê ha ajte? — hajÿr.

²²Mã Jeju cumã:

— Quê imã ihtír ita na ipa, wa ahnaa hacpÿ ne ite amjijaxàr na to prām na mã, quê ihtÿj ipa, ca ha neeahna ihho nare. Ne ca, ca ha ito pit mã amji mã ahimpej to apa — hane.

²³Mã Jeju kôt me ipa catêjê te amji mãme ijarēn cràn, Jeju te xwahna ityc xà nare na ijarēn ata na. Ne nee cute harēn to hajÿr nare. Ne nee ito Petrô mã:

— Quê ha nee Jowāw ihtyc nare — hajÿr nare. Ne cama cute ijarēn to hajÿr he:

— Quê imã ihtír ita na ipa, wa ahnaa hacpÿ ne ite amjijaxàr na to prām na mã, quê ihtÿj ihtír ita na ipa, ca ha nee ahna ihho nare — hajÿr.

Pê Jeju jâpên xà atajê, ampeaj kam hàhtô

²⁴He ipê Jowāw, pê wa ito ita jīa to ampo itajêpupu, ne impar xàa na wa ite ahna pit mã me amã ihhôm par. Ne ramã ate me ipupun pejtu, ihêj xi nare na, na ri ampeaj kam cute hajÿr. ²⁵Ne cormã Jeju te ampo jàhtôa ne ton atajê, wa neeite ihkàhhôm ita kam ahna ihhôm nare. Quê jūm ahnaihôm na mã, quê ha nee pjê cunea kam ihkàhhôm itajênô hàhtô na cahuc nare. Hamre.

Jeju Jarkwa Na

MEMPRAR CATÊJÊ JÀPÊN XÀ

Jarên Xà

Yhÿ, pê Ruc jũm japyrÿ pê Tejopir ita wÿr ihkàhhôc ita kujate. Ne cupê Pawrô pê Jejujarkwa na memprar catêjê nõ ata kôt me ipa catê. Ne jũ kam ipa to hàhtôti atajê kam, ihtÿj ajco ihkôt ipa. Ne hõ kàhhôc ita kam, hacpÿa mã cõjkwa wÿr Jeju jàpir na harê. Ne hanea ne Jeju na mehkwÿ wÿr Pahpãm Carô Pejti wrÿc, ne cute me cumã amji jõr, ne ma me to ipicamẽn to mõi na harên. Ne haneane Petrô me Pawrô te pjê cunea kam Juta catêjê me, mehcahkrit pê Juta catêjê nare mã, Jeju pê me pahpytâr catê na to hũjarên na harên. Ne hõ kàhhôc japyrÿ pê Jeju Jarkwa Na Memprar Catêjê Jàpên Xà Jõ Kàhhôc (Me Hàpên Xà).

Pê Ruc me cumã amji jarê

Ruc 1.1-4; 24.36-49

1 ¹Yhÿ, Tejopir, ipê Ruc, ne pa wa ha amã ihhõc. Ne wa ramã ite mam amã ijõ kàhhôc ita kujahêc. Pom pê Jeju ampo to, ne me cumã to hahkre itajê na wa ite ihhõc, ne amã ihkujahêc. ²Ne pê mam Jeju cato pjê ita kam, ne ajco hàpênxà ton to ipa, pê ma Pahpãm cõjkwa wÿr to api, nawa ite amã ahna ihhõc, ne amã ihkujahêc. Ne hàpir xàxwÿjrea na cute ihkôt me ipa catêjê mãn, PahpãmCarô Pejti jarkwa kôt, mâr quê harkwa na cumã memprar catêjêna me ipa. ³Ne pê Jeju ihtyc jirô pê hacpÿa mã ihtÿr, ne ihtÿar na cute mehcuea mã amji to ipipê to amcro to cwarênta. Mã ihkôt me ipa catêjê te me hõmpun, ne Pahpãm himpej xà ata to me cumã ihcakôc. ⁴Ne amcro ata na, hacpÿa mã Jeju tÿr jirô pê mã, ihkôt me ipa catêjê me, mehkrÿ ne ame apà. Mã cute me cumãn to:

— Ita ri, Krÿpinkrên kam me ahtwÿ, ne ita ri Inxũ Cati te me amã ampo to hũjahkre, wa ite me amãharên atajê jikaj, mâr quê me amã cugõ, quê

ame ato ihtÿj. ⁵Ne hõtpê Jowāw te cô kam me acumrār, ne quê ha me ana ahtūm nare, quê ha Pahpām amji Carō Pejti carôt kam me acumrā. Ne me amā carôt gō, ca ha Carō Pejti carôt kam me atÿjti ne — hajÿr.

⁶Mā ihkôt me ipa catêjê te cormā ahna mecuprôn tu ne mehçukij, ne me cumā:

— Xà ita kam, quê ha Pahpām pjê ita kam, Juta catêjê to ihhimpej kam tē? — hane.

⁷Mā Jeju me cumā:

— Nee ate me hahkre pej xà nare. Ne Inxū Cati mā ricutea amji mā amcro hyr xà ata jahkre pej. ⁸Ne quê ha Pahpām me amā Carō Pejti carôt gō, caha me acwa ne me to apa, quê ha taa me ato ihhimpej, ne me ato atÿjti ne. Ne ita caxuw ca hame apê ijarēn catêjê. Na ca ha ita caxuw Krīpinkrēn me, Juta jō pjê me, Krīrīrtepej jō pjê me, pjê cuneakam amū pjê jūwry catia kam me ijarēn to meapa — hane.

⁹Ne pê Jeju ita jarēn jirō pê mā me kam mare mā macôjkwa wÿr hàpir to mō. Mā hamre, ahçakrā te cutor, mā nee hipêr cute me hõmpun nare. ¹⁰Ne cama me xa ne Jejujāpir xà na, côjkwa wÿr, kàj mā me ahna ahçakrā pupu. Mā ihprôt pê me hūmre pijakrut ne mehkà jakati kam me xa, me çahê na, ne cute me cumā harkwa to:

¹¹— Hīpôjajo jō pjê catêjê, ampo na mā ca me acuhhê necôjkwa wÿr ame rīt? Por Jeju ame acahê na mō ata, macôjkwa wÿr tē, ne quê ha ihtÿj jū caxuw amji jaxà, nehàpir xà ita na, quê ha amji jaxà ne wrÿ — hajÿr.

Cute me Matij capi xà

Ruc 24.52-53

¹²Mā ma Jeju jarkwa na memprar catêjê te Pīxô jō kēn pīn hacpÿa mā hū napire mā, Krīpinkrēn xa ata wÿr, me amji jaxà. ¹³⁻¹⁹Ne krī kam me cator, ne ma kÿj pê me hàhhuc xà ata wÿr memō, ne cute me cuprôn ne kam me hàhhuc. Curi Petrô me, Jowāw me, Tijac me, Antre me, Pirip me, Tome me, Partômew me, Matew me, Tijac pê Arpew kra me, Ximāw mā hō pjê kīnti ita me, Juta pê Tijac kra me, Jeju menxi me, mehkjêjê me, pyjê kwÿ me cuteme cuprôn. Ne curia mehkrī, ne hõtpê Pahpām māmehçakôc. Ne pê Juta Carijot xwÿ, Jeju pro jahpan xà na ihpore py ata to pjê japrô. Ne pjê ita kampê ihpÿm, ne apu amji kēhkê, ne ihçahti na hīn apu hapôj, ne ty. Pê Krīpinkrēn kam, mehkrī atajê cunea me ita pa, ne me hahkre pej. Cwÿrjapê pê me pjê itamā haprÿ to, Purcaprô jō pjê. Ne me ahna amcro jàhtô nare, mā Jeju na mehkwy jàhtô na cute me xēj ne ihkôt cute winti ne me cuprôn. Mā Petrô xām ne cute me cumā harkwa to:

— Me ikjêjê, wa ha me amā Juta xwÿ atajarē. Juta ata pê amji kôt jūmjê to mō, cute me Jeju pro, ne mehçuran prāmte. Ne pê cupê me pahkwÿnō, ne ihtÿj ajco me pahcape na mepajâpên xà ita to apê.

²⁰— Pê Tawi xwỳ rỳ pêa mã Pahpãm Carõ Pejti jarkwa kôt Juta na ihhóc, pê Pahpãm ramãita to amji kampa. Ampo na? He ita na pê cumã na prãm. Pê cute to prãm xà ata na ihkên mã axà, ne ty. Pê Tawi xwỳ Juta na ihhóc to hane he:

“Quê ha hũrkwa jicu, quê ha nee jũm kam ihkrĩ nare” hane.

Ne ihhó nō kam hanea ne ahna ihhóc tohane he:

“Quê ha ihtỳj jũm haxà kam axà, nehàpên xà ita to apê” hane.

²¹⁻²² Cwỳrjapê cu ha me jũm xũmre capi, quê jũm axà, ne haxà kam hacpỹa mã Jeju tĩr na harên to ipa. Pê cu me pahnõ cumã kaat kam Jowãw te cô kam mehcumrãr na hõmpu, mã ahnaa ihtyc, ne hacpỹa mã hàpir na me pahnõ te hõmpun ata, cu ha me capi, quê Jeju mã imprar catê na axà — hane.

²³ Mã cute me hũmre pijakrut mã me cator, itajaprỳ te Joje Parxap, ne haprỳ krut te Catytkam, ne hanea ne ihnõ ita japrỳ te Matij. ²⁴⁻²⁵ Mã cute me ahna Pahpãm mã mehcahôc, ne me cumã:

— Me ijõ Inxũ Cati, ca ha ca me imã me icaca xà cunea pupu. Ne me imã to hahkre, me ipijakrut itajê nō ca ha amji mã capi, ne to me imã hahkre, quê jũm me ikôt apê, ne jũm akra jarkwa na imprar catêna ipa. Nãmri Juta te ampo kêanre ton, ne me gápên xà ita pê ihpỹm, ne ihtyc, ne ma ihkrĩ xà kêanre ata wỳr tẽ — hajỹr. ²⁶ Ita jirõ pê mã ri, cute amji to me hỹr, ne cute meipijakrut itajê nō capi. Ne hamre, mehkwy te me hũmre nō ita pyxit neme capi, ata japrỳ te Matij, mã cute Juta xwỳ jaxà kam Jeju jarkwa na cumã memprar catêjê mã me haxàr.

Pahpãm Carõ Pej cator xà

Me Hàpên Xà 4.31; 8.15; 10.44; 19.6

2 ¹ Ramã me Hõ Kêhkên xà jõ amji kĩn jõ amcroa kam hàhhuc, mã Jeju na mehkwy te me cuprõn xà atakam me cuprõn. ² Mã ihprõt pê cõjkwa pĩn, krã, ampo jãhkrihkrit pê kôcti jãhkrihkrit pyrãacti ata cator. Ne hàhkrihkrit ata te ikre kam me jỹ atajê cunea mã amji jõr. ³ Mã cute me ihpõc pê cuhy põc te cajõhjõtρε pyrãcre atapupun. Mã apu ihcahkũm ne cute ahpỹanre na mehtåt par. ⁴ Mã Pahpãm Carõ Pejti carõt te mehcunea to hipu. Ne cute ahpỹanre na me cumã mehcahôc xà jõr par. Na ricute mehcahôc xà cunea to mehcahôckam me to ihtẽm.

⁵ Mã curi Krĩpinkrên kam Juta catêjê jãhtõa neme hàhhuc atajê, hõtpê Pahpãm to me amji kampa. Ne pê pjê cunea rũm hũwry catiarũm ajco me hapõj, amji kĩn ata wỳr. ⁶ Ne cute me ampo jãhkrihkriti ata par, ne hỹrmã me cuprõn. Nemehcunea te amji mã me ipikrar. Ampo na? He pê ihtỳj mehcunea me amji cakõac kampa, na pê me cupê hahkre kêatre.

7Mã me hàhtôti itajêcunea te amji mã me ipikrar, ne mehkrãpictor tu, ne ajpên mã me harên to:

— Pom me hũmreitajê pê Hĩpôjajo jô pjê catêjê na ri amehcakôc. ⁸Jũ mã mã cute me, ne me pahcakôac to amehcakôc? ⁹Pom cu Partij jô pjê catêjê me, Metij jô pjêcatêjê pĩn me pahcator, ne me pahkwýErãw jô pjê pĩn me pahcator, ne pom cu Cõpihpo jõpjê ata pĩn me pahcator, ne Juta jô pjê pĩn me pahcator ita, ne Cawrôpejti jô pjê pĩn me pahcator, ne me pahkwý Axij jô pjê pĩn me pahcator ita? Pom cu ita pĩn me pahcator ita, ne hanea ne Ponto jô pjê pĩn me pahcator. ¹⁰Ne hanea ne Amcrãti jô pjê pĩn mepahcator, ne Panpir jô pjê pĩn mepahcator ita, ne hanea ne Ejit jô pjê pĩn me pahcator. Ne Pjêhpôc jô pjê pê, por Xiren jô krĩ cahi na xa ata pĩn me pahcator, ne hanea ne me pahkwý pyxitre Roman jô krĩ pĩn ame pajapôj. ¹¹Ne hanea ne Kênpojre jô pjê pĩn me cator, ne hanea ne Põcaprýhti jô pjê pĩnme cator. Ne me pahkwý pê Juta catêjê impeaj, mã hanea ne curmã me pahkwý itajê te Juta catêjê na me amji ton. Ne me pahcunea, ahpyãrena me pajarkwa to me pahcakôc cakrô, mã ajte ihtýj me pajarkwaa na cute me pamã Pahpãm jâpên xãitajê jarên na mempar — hane.

¹²Mã mehcunea te me ampo ita jahkre pej nare kam amji mã me ipikrar, nenee kam cute ampo to me amji kam hapac nare, ne tee ame ajpên cukij, ne me ajpên mã:

— Ampo mã ajte? — hajýr. ¹³Jirô pê mã ri mehkwy ame hũn ne me cumã:

— Mõrmõ me hũmre itajê amehkõm ne ame ajpã, na ri amehcakôc pihhoti ita to hane — hane.

Petrô jũjarên xà
Me Hàpên Xà 3.12-26

¹⁴Mã Petrô pê cute me tôxi atajê kwý nõa, ne me cape na xa, ne kýj cati pêa mã, cute me hàhtôa mã hũjarên kam ihtêm, ne me cumã:

— Me ikwý pê Juta catêjê me, pom ca me acunea ita riKrĩpinkrên kam me akrĩ itajê! Me ipar peaj ne! Wa ha me amã awjarê! ¹⁵Ampo na? He ca atýj me hũmre itajê pipãn na amehcãmji. Hãpã, nee me ipipãn nare. Me hõmpu he. Pom cormãpyt jãpir pejti ita? Quê ajte irãrãtia na ame ajpã?

¹⁶Pom ca me ipupu, ajteare mã me icakôc xà, ne cupê rý pêa mã Pahpãm jarkwa na ihcakôc catê ita japyrý te Jõwer ata pê ahna ihhõc to hane he:

¹⁷“Ýhý, Pahpãm te amji jarên to hajýr he:

‘Me hõmpu he, wa ha ihmat ri, hicu xãa kam, ramã ampo cunea jamrexãa kam wa ha hane he:

Wa ha ma me hýrmã Icarõ Pejti kujate, quê ha pjê cunea kam mehcunea mã amji gõ, quê ha me cucwa.

Quê ha me akra xũmre me, me akra cahāj me, Icarō Pejti jarkwa kôt me ijarēn to me ipa.

Ne wa hamentuwjê mã, me irĩat kam, icaca xà to ajpê.

Ne mehwejte hajyar, wa ha me ipimtir kam me cumã icaca xà tohahkre.

¹⁸ Ne wa ha imã me hâpên catêjê atajêmã Icarō Pejti kujate.

Quê ha me hũmre me, pyjê atajê ijarkwaa kôt ijarkwa to amehcakôc.

¹⁹ Wa ha hanea ne kÿj rúm, còjkwa pĩn, pjê kam, rÿ jũ caxuw jũm te ampo pihhoti pupun nare ata toajpê, quê ha hane he:

Quê ha me caprô catia ne kam cuhy, ne kam ihkũm cati.

²⁰ Ne quê ha pyt kam awcapâtkô, ne quê ha putwrÿintepti ne, ne cupê me caprô pyrâac.

Hõ, ata quê hapjê wÿr ipê me gõ Pahhiti teamji jaxâr xà wÿr ihkên to hane.

Ne amcro ata kam quê haPahhiti carôt catia to ajpê, quê ha mehcunea me hõmpu ne me hahkre pej.

²¹ Ne quê ha cute me iwÿr na, wa ha me kampa, ne mehkên pê mentête amtà, ne me to ikra' ” hane.

Hõhõ, Pahnãm cakôc xà itajê na, pê Jõwer xwÿ ihhõc, hõ kàhhõc kam.

Pê Petrô me cumã Jeju jarê

²²— Na ca me ikampa, me ikwÿ pê Ixaher catêjê, pompê Jeju Naxare jõ krĩ kam ipa ata, wa ame amãharê. Pahnãm te me pamã Jeju kujahêc, mã Jeju te Hũm Cati carôt kôt ampo pej pihho jãhtõa ne ton. Por rÿ jũ caxuw jũm te ampo pupun nare atajê pê ajco to. Ne ampo na ri hãn ne ampo itajê to? Nee mã ampona hãn ne ampo itajê ton nare. He pahte me Pahnãm te ihkujahêc na me hahkre pej prãmte, pê hãn ne ajcoampo itajê to. ²³Ca ate ahnaa mehcuran. Pê Pahnãm rÿ pëa mãramã ita to amji kampa, ne ahna amji ton. Ne ahnaacute me amã ihkra jõr. Ca ate Roman catêjê mã meJeju jõr, mã cute pĩ na menxôr, ne mehcuran.

²⁴— Ne jũ wÿr quê ty ne ihtyc tu, cwÿrjapê ri Pahnãm te hacpÿa mã to ihtĩr. ²⁵ÿhÿ, pê rÿ pëa mã me panquetti pê Tawihacpÿ mã Jeju tĩr xà na hõ kàhhõc kam ahna ihhõc. Ne pê Jeju cakôc xà na ihhõc to hane he:

“ÿhÿ Inxũ, apê ijõ Pahhiti, na waijõtpê akõat ipa.

Ne ca amcro cuneakam itehcajpa, na ri imã ampo cupa nare. ²⁶Ne ampeaj kam ijakry, ne icakôc xà kam ijakry pit.

Na wa ha cormã amcro nõ na ty, ne itÿj gikaj.

Wa ijõtpê ato amji japackre.

Ne jũ wÿr ca ha ijarêt xà ata kam ijicu, ne imã hikra, cwÿrjapê ri ijakry.

Ne jũ wỳr ca ha me carõ kwỳ jipõc ri icarõ to tojnõ, ne cumã hikra.
²⁷⁻²⁸ Aampo na?

Quê ha ramã ikà cacu xàa kam, ca hahacpỹa mã ito itĩr.

Ne atea ca, catyt kam ipa to imã hahkre.

Cwỳrjapê wa itỳj ijakry, ne ipej pêa mã ipa.

Neijakryti to wa amã icakõc to ipa.

Na ca ha hacpỹa mã itoitĩr.

Ne ma kàj mã, cõjkwa wỳr amji wỳr ijaprõ.

Wa ha cormã apupu, ne ampeaj kam apyrên ijakry” hane.

Hõ, pê pahhiti pêTawi xwỳ jõ kàhhõc kam Pahpãm kra to hũjarên to hane.

²⁹— Ýhỹ, me ikjêjê, wa me amã me panquetti xwỳ kõt harên to impejti to prãm. Pê me pajõ pahhi pê Tawi xwỳ ty, pê me harêt, ne ihkre cormã me pahcote na ihkrĩ. ³⁰Ne pê cupê Pahpãm jarkwa to ihcakõc catê, cwỳrjapê pê cumã Pahpãm te jũ caxuw mehkra tàmwxwỳ tàmwxwỳ nõ to pahhi na awjahkre ata na hahkre pej. Ne cupê mam Tawi pê pahhiata pyrãac ne cupê pahhi. ³¹Ne pê Tawi ramã Pahpãm te jũ caxuw hacpỹa mã pahhi na to hũjahkre ata to ihtĩr na hahkre pej. Ne nee pê Tawi taa amji to hũjarên to hajỳr nare, ne quêt ihtàmwxwỳ tàmwxwỳ nõna pê Jeju to awjarê. Ne pê harên to hane he:

“Jũ wỳr ca ha mecarõ kwỳ jipõc ri icarõ to tojnõ.

Aampo na?

Quê ha ramã ikà cacu xàa kam ca ha hacpỹa mã ito itĩr” hane.

Pê Petrõ me cumã Jeju hacpỹa mã ihtĩr na harê

³²— Mêr hõhõ, Pahpãm te hacpỹa mã Jeju taa to ihtĩr, na ramã me icunea te me hõmpun. ³³Mã ma Pahpãm te cõjkwa wỳr to hàpir, mãPahpãm jĩkjê rùm, awpõc rùm jỹ. Ne cute Hũm te Carõ Pejti to cumã hũjahkre ata pyr, neme imã ihkujahêc. Ne por ampo cunea pihho, ca me hõmpu, ne me kampa itajê pê Pahpãm Carõ Pejti jâpên xà. ³⁴⁻³⁵Ne pê Tawi xwỳ nee cõjkwa wỳr hàpir nare, ne Jeju pê quêt api. Por pê ramã Tawi harên to:

“Pahpãm pê Pahhiti teijõ Pahhiti mã:

‘Ca ha ijĩkjê rùm, awpõc rùm jỹ, waha xa apar krac ri acurê xwỳn catêjê jaxà, ca ha cormã me hõ pahhi na jỹ’ ” hane.

³⁶— Pom me apê Juta catêjê, itajê wa me amã awjarê, ca ha me hahkre pejpeaj ne. Mâr pê ca pĩ kam me Jeju curaata to ri Pahpãm te mehcunea jõ pahhiti. Aampo na? He toa pê ramã rỳ pêa mã Pahpãm awjahkre — hane. Hõ, Petrõ te me hàhtõa mã harên to hajỳr.

³⁷Mã cute me ita par ne amehpec, ne me cumã amjikĩn nare, ne cute me Petrô me, Jeju jarkwa na memprar catêjê kwÿ cukij, jũ mã quê ha me, ne mehkên pê me cato, ne me cumã:

— Me ikjêjê, jũ mã wa ha ajte me, ne me ikên ita pê me icato? — hane.

³⁸Mã Petrô me cumã:

— Ỹhÿ, ca ha me hane he. Ca ha me akênjicu, wa ha Jeju jarkwa kôt cô kam me acumrã, quê ha mehcunea Pahpãm te, ate ame Jeju to kên atajê to tojnõ ne hicu tu na me gahkre pej. Hõhõ, ca ha me hane, ne me Pahpãm Carõ Pejti incwa, nepê ramã Pahpãm to awjahkre. ³⁹Ne me ca me, me akrame, por cormã mehcunea ampÿa mã ame ipa atajê mã, pêPahpãm to awjahkre. Pê hanea ne cute cormã mehator atajê mã Carõ Pejti ita to awjahkre — hane.

⁴⁰Mã hipêr Petrô me hapackre, ne me cumã ahcawpa ne me cumã:

— Cute me hapackre xà kên kam me ipictor itajê pê me gapôj, ne me amji pytã — hane. Hõ, me hapackre xà ita to ri cute me hapackre, necormã me hapackre xà kwÿ jãhtõa to cute me hapackre.

⁴¹Mã me hàhtõa ne cute me Petrô jarkwa par, ne cute mehkên ton jicu, mã cute cõkam mehcumrãr. Mã amcro ata na, me hàhtõa ne Jeju na mehkwy mãme hàr. Ne atajê pê me hàhtõ na me mir crê ne me axã. ⁴²Na pê Jeju jarkwa na cumã memprar catêjê te tõi atajê cunea mã Pahpãm te amji kam hapac xà to hahkre to meipa. Ne pê ajco mehcunea ajpên na mehhõncõ tu, ne ajpên kam me apã, ne ihtÿjajco Pahpãm mã mehcakõc.

Mam Jeju na mehkwy te amji kam hapac xà

Me Hàpên Xà 4.32-35

⁴³Ne pê Jeju jarkwa na cumã memprar catêjê ajco Pahpãm carõat kôt me hàpên xà catia pihhoti impejti ton to me ipa. Ita cwÿrjapê pê mehcunea mã me hũpa, nemehcunea mã mempej pit. ⁴⁴Na pê mehkwy cunea mehkõat me ajrõ, ne me cumãajpên kĩn. Cwÿrjapê pê me cumã ampo atajê, ihtÿj me cupê hamreare atajê me ajco me ajpên mã me hàhcukrêj to me ajcokjê. ⁴⁵Ne pê ajco me cumã ampo atajê to ihpore na apha, ne me cupêampo jamreare atajê caxuw amji mã mehpor to ajcrã. ⁴⁶Ne mehcunea, amcro cunea kam ajco Pahpãm to meamji kam hapac xà jũrkwa kam me cuprõ. Jirõ pê mã pê ihtÿj ajco ajpênjũrkwa kôt ame apã, ne ihtÿj ajpên pyrên me hakry, ne nee jũm amji to cati prãm nare. ⁴⁷Na pê Pahpãm to me hàmnãn ne cumã impejti na me harê. Ne pê mehcunea Jeju na mehkwy impejti na me to amji kampa. Pê amcro cunea kam Pahpãm me capi, ne me to cuprõ, ne ma Jeju na mehkwy mã me hacjê, na pê ma me to ipicamên to mõ.

Hũmre te xwÿ ita caprãr xà

Jowãw 14.12-14; Me Hàpên Xà 14.8-10

3 ¹ Ỹhÿ, pê amcro ata na, pyt pejti kam, Petrô meJowãw ma Pahpãm to me amji kam hapac xà jũrkwa wÿr memõ. Ne amcro ata na, pê

pyt pejti kam Pahpãm mã mehcakôc prãmte, ajco me curi cuprôn to me ipa. ²Pê amcro cunea kam hũmre nõ ihkjê te xwÿana ihpÿm ata, harkwa japyr te Impejti ata jarkwa mã ajcoihkrĩ, cute mencjêj mã cute me ahna hàhwÿr prãmte. ³Ne cute Petrô me Jowãw xàr na me hõmpun, ne me ahna hàhwÿr. ⁴Mã cute me hõmpun, mã Petrô cumã:

— Me ipupu — hane.

⁵Mã hũmre ata te me hõmpun, ne cute me cumã ampo jõr, mã cute ipyr prãmte, ahna me hikaj.

⁶Mã Petrô cumã:

— Ipê ihpore hamreare, ne wa ha itÿj amã ampo gõ. Ne ite amã ampo jõr xà ita pê Jeju mã ri quêt carôt cati, incwÿrjapê quê ha ihtÿj ato impej. Pê Pahpãm Jeju to awjahkre, pê Naxare jõ krĩ pĩn cato ata jarkwa na wa ha amã: “To xa ne mõ” — hane.

⁷Ne Petrô te awpôc rũm hũ na ipyr, ne ihtehcajpar. Mã hamre, ihpar kõn pej pyrentu, mã ihtÿjintoj ne hãm, ne apu mör pyrentu. ⁸Jirô pê mã ri ma mehkôt Pahpãm to me amji kam mehapac xà jürkwa mã hàr, ne apu intoj to mõ, ne apu Pahpãm to hàmnãn to mõ. ⁹Mã me hàhtõa ne cute me harkwa mã hũmre te ihkrĩne hàhwÿr catê ata pupun, mã ikre kam apuintoj to mõ, ne apu Pahpãm pej na harèn to mõ. ¹⁰Me kam mare mã impej, cwÿrjapê ri cute me hõmpun xà ata te ame to hàpêt, neamji mã me to ipikrar. Ne me amji mã:

— Rÿ jũ caxuw me pahnõ te ampo te hajÿr nõ pupun nare — hane.

Ikre kam Petrô jũjarèn xà

Me Hàpên Xà 2.14-36; Ruc 24.46-47

¹¹Mã hũmre te xwÿre ita ramã caprãr ne impej, ne ma cute Petrô me Jowãw pynãr, mã hamre, mehcunea te ita to amji mã me ipikrar neamehprôt. Ne ma Pahpãm to amji kam me hapac xà jürkwa jarkwa mã, Xarômãw jõ amkrãr ata wÿr mehprôt. ¹²Mã Petrô te amji wÿr mehprôt na me hõmpun, ne mecumã:

— Pÿhàpà, me ikwÿ pê Ixaher catêjê, ampo na mã came iwÿr ame aprôt to hane? Ne ampo na mã ca amji mã ameapikrar to ame hane, ne kypê me ipupun nare? Côt ca atÿj meitea, me icarôat kôt me hũmre ita caprãr na ame icãmji? Xà mormõ me ipej cwÿrjapê wa ite me hũmre ita caprãr? Hãpà, nee mã me icarôt to ite me hũmre ita caprãr nare. ¹³Jeju pê Pahpãm kra impeaj ata te ri caprãr. Ne cupê me panquêtjê Aprãw xwÿ me, Ixac xwÿ me, Jaco xwÿ Pãm Cati, ne cutea ri ihkra Jeju to cati, na riimpeaj to impej. Ne ca ate ahnaa amji pê mehcaca, ne megõ pahhi pê Pirat mã me hõr, cute ihcuran xà caxuw. Mãtee apu cumã hikranprãm. Ca ma ihkĩnte ame cumã hikran caca. ¹⁴Ne ate me jũm kêanre pê mehcuran catê ata me Jeju pejti ata to megãhpan, ne ate mehcuran catê ata mã hikran na Pirat name gãhwÿr. Mã cute me amã cumã hikran. ¹⁵Ca

ate me Jeju pê me pamã pahteami kam me pajapac xà jôr catê ata curan. Mã Pahpãm te hacpã mã to ihtîr, wa ite ihtîar na me hõmpun. ¹⁶Jeju te ri hũmre ita caprãr. Wa me ajwar ite, cute caprãr na me hahkre pej. Na ri ita caxuw me akammare mã, me acunaa mã hũmre ita pej.

¹⁷— Me ikjêjê, he imã, ate me gõ pahhi meJeju curan na, me gahkre pej. Ne me apêcupê Pahpãm kra na hahkre kêatre, na ca ate me to hajÿr. ¹⁸Pê rÿ pêa mã ramã Pahpãm jarkwa na ihhõccatêjê Jeju tyc xà na mehhõc. Ne cute me ahna ihhõc xà ata kõt ri ihkên mã hàr. Ne pê ihkâj xà incirre nare ata na, pê rÿpêa mã ahna mehhõc, na ca ate ahnaa me to hajÿr. ¹⁹Na ca ha me akên itajê mã me hikra, ne ate amji kam me gapac xà to me antuw, ne Pahpãm wÿr me apkjê, ne Pahpãm jikjê rũm meahtwÿ, quê ha ate me to kên atajê to tojnõ ne hicu, ne me ana amji capa. ²⁰Ca ha ame gakry, ne atÿj meapej pêa mã me amji to me ajpa. Ne quê ha Pahpãm amcro nõ na hipêr me pahwÿr Jeju kujate. ²¹Quê ha nee cormã ne amji jaxàr pyrentu nare, ne quêt cõjkwa kam ahtwÿ. Quê ha jũ caxuw Pahpãm ampo cunea to impej, ne to ipintuw jõ amcro kam ahtwÿ, quê ha cormã amji jaxà. Ne rÿ pêa mã pê Pahpãm jarkwa na mehhõc catêjê impejti atajê, ramã ita to mehçakõc, ne ahna mehhõc. ²²Pê ramã me panquêtîi pê Mojxe xwÿ ita to ihçakõc, ne me cumã:

“ÿhÿ, quê ha amcro nõ na me pajõ Pahhiti pê Pahpãm me pamã me pahnõa kujate to hanea, pom pê mam ikujate he.

Quê ha pahnõ pyxit ata me pamã Pahpãm jarkwa toihçakõc, ne harên to apu mõ, caha mempar to impeaj ne.

²³Nãmri ca ha ate nee me jũm ata par, ne harkwa kõt me apa nare na, quê ha Pahpãm ihtÿj ahna me apupu, ne mehkwy intête me anõjũpar nare ata cator pyrentu, quê ha acto” hane.

²⁴Ita to pê Mojxe me panquêtjê mã ihçakõc.

— ÿhÿ, he nee pê Mojxe pyxit peaj ne ihçakõc to hajÿr nare. Pê Pahpãm jarkwa na mehhõc catêjê cunea mehçakõc to hajÿr pit. Ne mam haprÿ to Xamer xwÿ kõt mehapõj itajê, pê hanea ne ajco mehçakõc xà ita to mehçakõc to meipa. Pom cu amcro ita kam me harkwa to hàpên xà pupu, itajêa to pê mehçakõc, ne ahna mehhõc. ²⁵Pê Pahpãm ramã Jeju to awjahkre na pêharkwa na mehhõc catêjê, harkwa kõt me pamã Jeju toawjahkre. ÿhÿ, pê rÿpêa mã Pahpãm me panquêtîi Aprãw xwÿ mã ihçakõc ne cumã:

“ÿhÿ, quê ha amcro nõ na me atãmxwÿ tãmxwÿ meikampa, wa ha mehkõt pjê cunea kam me to impejti ne” hane.

²⁶Ne pê Jeju hõtpêPahpãm kampa, pê cute to hũjahkre xà ata na capi, ne ma me amã ihkujate, cute me ato impej, ca me acunea te me akên mã

hikran, nePahpãm wÿr ate me amji xâr prãmte — hane. Ata to riPetrô te mehkwy mã hÿjarën.

Pê Petrô me Jowāw prohti cuna mã xa

Ruc 21.12-13

4 ¹⁻⁴ ÿhÿ, Petrô me Jowāw cormã Jeju to me cumã ihcakôc, ne me cumã:

— ÿhÿ, Jeju tyc mã Pahpãm te hacpÿa mã toihtÿr — hane. Mã me hàhtôa ne amehcuhhê ne me kampa atajê te amji mãme to hajÿr pyrentu, ne ihtÿj me Petrô jÿjarënxa atajê kampa. Na ri me hàhtôa ne Jeju to amji mã mehhimpej, ne ramã mehÿmre te mir te xÿc ne mehkwy mã me hàr. Mã me hõ pahhi catêjê kwÿ japôj, necute me Petrô me Jowāw cakôc xà na mempar. Ne cute mempar catêjê itajê pê Xato xwÿ kôt me ipa catêjê kwÿ me, cute Pahpãm mã mehcajrën catêjê kwÿ me, me Pahpãm jÿrkwa jamãr catêjê jõ pahhi. Ne ame Petrô me Jowāw kam mencryac to mencryc. Na ri cute mehpro, ne me haxâr. Mã ramã me ahna pytre, mã ri curia cute me hacjênxa kam me ahna apê. Ampo na? Pahhi catêjê cunea te iràrà na me hacjênatajê cakôc xà kam me hapac prãmte. Ne pê cute amji mã me Jeju to mehhimpej, ne memparatajê pê me hàhtô na me xÿc mir.

⁵ Mã apê na iràrà na, prohti kam mehkwy jakrã jõ pahhi catêjê me, Mojxe xwÿ te me hapackre xà to me cumã hahkre catêjê cunea te Kripinkrën kam amji to me cuprôn, cute me Petrô me Jowāw cakôc xà na mempar prãmte. Mã Juta catêjê jõ pahhi me, cute me cumã Mojxe xwÿ jõ kàhhôc to hahkre catêjê me, ⁶ me Pahpãm mã mehcajrën catêjê jõ pahhi japÿr te Anati ata me, mehkjêjê me, Cajpa me, Jowāw me, Arexãnre me, prohti kam mehcunea te me cuprôn, cute me Petrô me Jowāw cakôc xà na impar prãmte. ⁷ Mã pahhi te me ahna harkwa hydr. Mã cute me haprôr neme cuna mã me hãm. Mã pahhi te mehcukij kam ihtêm, ne mecumã:

— ÿhÿ, ita caxuw ca ha me imã me amji jarê. Jÿm jarkwakôt mã ate me hÿmre te xwÿ ita caprâr? Jÿm te mã meamã me acarôt jôr ne ahna me amên, ca ate mecaprâr? — hane.

⁸ Mã Pahpãm Carõ Pejti te Petrô mã amji jôr, ne incaca xà mã hàr, ne cute to ihtÿj, cute me cumã ihcakôc xà caxuw. Na ri Petrô te prohti kam me cupê pahhi catêjê mã ihcakôc to hajÿr he, ne me cumã:

Pê Petrô me cupê pahhi catêjê mã Jeju jarê

⁹— ÿhÿ, menxÿjê me, me to ahimpej catêjê, mormô ca amji mã me ito: “Cutea ri mehÿmre ita to impej ne caprâr” hane, incwÿrjapê mã ca ame icukij xà ita to me icukij? Ne ajte me imã: “Jÿm carôt to mã ate me cute xwÿ ita caprâr?” hane. ¹⁰ Mër hõhõ, me ikam gapac to mempeaj ne. Ne wa ite, me cupê Juta catêjê mea mã, ate me hÿmre ita jahkre pej prãmte, wa

meamã harên to, Jeju te ri caprãr. Por pê Pahpãm Jeju toawjahkre, pê cato ne Naxare jõ krī kam apu ipa ata te ri caprãr. Ne taa mã ca atepĩ kam mehcuran. Ne taa mã ri Pahpãm te hacpỹa mã to ihtĩr, ne cutea ri hũmre te xwỹ ata caprãr. Ne harkwa kôt wa icakôc, cwỹrjapê ri cute caprãr.

¹¹— Pê Pahpãm jõ kàhhôc ramã harên to hane he:

“Ihhêj rũm me apê, por ikre pyxwỹr catêjê kêanreatajê pyrãac.

Ne me apê hahkre kêatre.

Na ca ame ikre mã hãm xà impejti ata caca, ne ate me mên.

Mã me akwỹ pê jũmjê itajê te me ikre mã hãm xà impejti ita pỹn, ne me cumã hãm, mã impeaj to impej, ne ihkwỹ jirôa pê impej ne ihtỹj” hane.

— Ne Jeju pê ikre mã hãm xà impejti ata pyrãac. Ca ma ame curê ne ate me mên. ¹²Ne Jeju ita ri pyxiti peaj, ne me pahkên pê me pahpytã. Ne jũm mã ri pjê ita kam me pahkên pê me pahpytãrjahkre pej? Hamreare, jũm mã hahkre pej nare. Na ri Pahpãm te caxuw Jeju pyxiti peaj ne hãm. Na ri pyxiti peaj ne cumã mepahkên pê me pahpytãr jahkre pej — hane. Ita to ri Petrô te ihcakôc, ne me cumã harên.

Pê me cupê pahhi catêjê Petrô me Jowãw mã me amji cawpa

¹³Mã cute me Petrô par, ne me hõmpun, mã me ipijakrut ne me xa, mã me ajpên mã:

— Pỹhãpã, xã ajte nee me cumã me pahcupa nare, na mãame pamã mehcakôc xã ita to hajỹr to ajwar ame mō? Pom me pahcati pit ita! Ne me pamã hahkre pej pit ita! Ne cormã me pahkĩnte mencrire ita cakrô, mã ajte nee amji mã me pahcupa nare. Ampo na? HõtpêJeju me ajwar amcro atajê nõ na apu ipa na ri, nee cumã mepahcupa nare — hane. ¹⁴Ne hanea ne hũmre te xwỹ caprãr ata, hanea ne mehcuea cunamã Petrô me Jowãw cahê na impeaj xa. Na pê me cupê pahhi catêjê neePetrô me Jowãw na mehcakôc kên nare. ¹⁵Ne ma cama cute me Petrô me Jowãw cator, pō mã, cute me cuprôn xã pê. Ne me ajpên mã:

¹⁶— Pỹhãpã, jũ mã cu ha me ipijakrut itajê to me? Nãmri ramã mehcuea te Krĩpinkrên kam harkwa to cute me hũmre te xwỹ caprãr name hahkre peju ita kam. Jũ wỹr cu ita to me amxu, ne jũ wỹr cu mentête mehcakôc xã ita capa. ¹⁷Hamre, cu ha cama me cumã amji cawpa, quê nee hipêr amji mã me Jeju jarên nare. Mãr quê nee krī kôt harên ipicrãn nare — hane.

¹⁸Ne ma cute me Petrô me Jowãw to me hãr, ne amji jipôc ri, amji kuc ri me hãm. Ne me cumã:

— Hã, ca ha nee hipêr me cumãJeju jarên nare, ne ca ha ma me tẽ — hane. ¹⁹Mã Petrô me Jowãw, me hõ pahhi catêjê mã:

— Pÿhàpà, xà ajkĩ me acakôc xà ita pej? Wa hapijamã me garkwa kôt amji to, ne nee Pahpãm jarkwakôt amji ton ne ihkôt me ipa nare? Quê ha pijamã Pahpãm mã ita na impej? Hãpà, quê ha cupê ita na ihkaj na. ²⁰Pê wa Jeju me ajco ame ipa, ne ihkôt me ampo jãhtôa kampa, ne ito jãa to me ampo jãhtôa ne me hõmpu. Ita kam jũ wÿrwa me ita jicu, ne me to tojnõ, ne me to icakôcjicu nare — hane.

²¹Mã me hàhtôa atajê ame Pahpãm to ajpên mã me amnã, ne ajpên mã:

— Ampeaj kam Pahpãm cati ne carôt tÿj, cute ihtÿj hũmre te xwÿ ita caprãr — hane. Cwÿrjapê ri me cupê pahhi catêjê, me hàhtôti atajê cupate, cute me Petrô me Jowãw mã me amji cawpa, ne ihtÿj jũ na me ton to prãm, ne ma cute mehkujahêc. ²²ÿhÿ, pê me hũmre te xwÿ caprã ata pê ramã ahnacaku cwarênta. Pê mehcunea Petrô me Jowãw tePahpãm carôt kôt, cute me hũmre te xwÿ ata caprãr na me hahkre pej.

Pê Jeju kôt me ipa catêjê Jeju mã mehcakôc

²³Ne cute me Petrô me Jowãw mã hikran, mã ma me tẽ, hacpÿ mã mehkwy wÿr. Ne cute mehkwy cuneamã, pahhi me prohti kam, cute me ahnaihcakôc xà kên to, cute me ahna mehcakôc xà atajê cunea na, me amji jarên. ²⁴Mã cute me Petrô me Jowãw par. Ne mehcunea te mecuprôn, ne Pahpãm mã amehcakôc ne me cumã:

— Hàpà, me ijõ Pahhiti. ÿhÿ, apê me icunea ton catê. Pê ca cõjkwa to, ne pjê to, ne cô to, ne kam ampo tíar na amji to ajpa atajê cunea to. ²⁵ÿhÿ, pê rÿ pêa mã me iquêtti pêamã hàpên catê pê Tawi xwÿ ihhõc, ne Acarõ Pejtiarkwa kôt ihhõc to hane he:

“Ampo na mã amji caprÿ to krĩxàre kôt ame cõjkwa kam Pahhiti pê Pahpãm kam mencryc ne ame hapu prãmte ame cuprõ?

Ne jũ wÿr quê ame amji mã hamã. ²⁶Ne ampo na mã me cupê Ixaher catêjê nare atajê jõ pahhi kwÿ, hãn ne Pahhiti te me cumã hõ pahhi pyxwÿr ata me cuna mã me cuprõ, ne ahna ame ajpên pa?” hane.

— Ita na pê Tawi xwÿ, Acarõ Pejti jarkwa kôt ihhõc.

²⁷— Ne cute ame Jeju na me ajpên par ne kam amencryc prãmte ri, krĩ ita kam me cuprõ. Ne ita na ri pahhi Heroti me, pahhi Ponti Pirat me, mehcahkrit pê Juta catêjê nare atajê me, me cupê Juta catêjê me, mehcunea te me cuprôn, krĩ ita kam. Ne mâr pê ca me imãAcãmter pejti capi ne to awjahkre, ne hãm ata kam hanea ne apu mencryc. ²⁸Pom pê ca ramã rÿ pêa mã to amji kampa ata na ri mehkêan kam, cute me cuprôn. ²⁹Mêr he, me hõmpu he! Cormã me pahkam mencryc. Ne cormã imã me amji cawpa. Ne ita caxuw, ca ha hipêr me ipê me amã me ijãpên catêjê mãacarôt gõ, wa me cumã garkwa to icakôc, ne me icakôc kam pra, ne kypê me cumã me icakôc nare. ³⁰Ne ca ha me cumã acarôt pê, wa akra

Jeju jarkwa kôt me hà catêjê caprã. Ne akra jarkwa kôt me icakôcto me ipa, ne ampo to mempej, ne me to ijâpên xà impejtiton to me ipa, quê me hõmpu, ne me acarôt jahkre pej — hane.

³¹Ita na ri Jeju na mehkwy Pahpãm mã me amjicajrên. Ne cute Pahpãm mã mehcakôc jicu, meajkaam cute me cuprôn xà jâpêt. Mã Pahpãm CarõPejti te mehcunea mã amji jôr ne me to hipu tu. Na pê nee me cumã me hũpa nare, ne mehtyj pit. Mã nee mehcakôc xà na me hàhtât nare.

Pê ampo cunea to ame amji tekjê pit

Me Hàpên Xà 2.42-47

³²⁻³³Ne Jeju jarkwa na memprar catêjê hõtpê mehcunea mãPahpãm Carõ Pejti carôt tÿjti jarkwa kôt hacpÿamã Jeju tĩr na me harê. Mã Pahpãmhõtpê me to kênre nare. Ne me hàhtôa cacrô, cute amji kam me hapac xà itajê pit, ne pyxít peaj, ne cute me amji kam hapac xà pipên pit. Mã nee ame amji pê hõxÿnare. ³⁴⁻³⁵Ne pê hõtpê me cumã ampo to ajcrã. Ne pê ajco me cupê ihporehamre, pê ajco mehkwy mã, ikre me purme ampo atajê to ajco ihpore na me ahpa, ne mehpoire incwa, ne Jeju jarkwa na memprar catêjê mã me cugô. Pê me cupê hamreare atajê mã me to ajcrã. Na pê Jeju na mehkwy kam jũm pê ampo hamreare nare.

³⁶⁻³⁷ÿhÿ, mehcote na hũmre apu mō ata japyrÿ teJoje. Ne cupê Rewi xwÿ tàmwxwÿ tàmwxwÿ nō. Ne cupêXipre jō pjê catêjê nō, ne kaam ihpÿm. Mã cute me cumã haprÿ krut jôr, ne me cumã “Parnap Jũcanãr”. Ampo na? Hõtpê apu mehkôt ipa ne apu mehkwy mã hũcanãr ton to ipa, na pê haprÿhane. Mã cute hanea ne pur to ihpore nahãhpan, ne ma Jeju jarkwa na memprar catêjê mã hõr, cute mecupê hamreare atajê mã apu to ipicrãn xà caxuw.

Anana me Xapirkwÿj

Carati 6.7

5 ¹Mã hũmre nō ita japyrÿ te Anana, ne hĩxi japyrÿte Xapirkwÿj, te hanea ne pur to ihpore na me hàhpan. ²Ne aracri cute me ihpore jĩkjê juwahi, ne Jeju mãmemprar catêjê mã me hĩkjê pitjôr. Ne cute mehcunea jôr na me amji jarên. Pê ihtÿj Xapirkwÿj mãimpjên te me cumã ihpore jĩkjê pit jôr na hahkre pej.

³Mã Petrô te Anana cukij to:

— Pÿhàpà, ampo na mã ate cama me pahcurê xwÿn jamãr, mãcute amã amji kam hapac xà ita to hahkre? Ne ampo na mã ate Pahpãm Carõ Pejti mã ahêj? Ampo na mã aracri atepur jō pore jĩkjê juwahi? ⁴He ate pur to ihpore na gãhpan xwÿjrea na, pur atekjêa ri, ne hanea ne, pom ate ihpore me pur to gãhpan ita atekjêa ri. Ca rÿ mã hĩkjê pit jarê, quê ha ahna amã ihkênre nare. Ne ampo na mã ate ita to hajÿr? He nee ate jũm mã ahêj nare, Pahpãm mã ca ate ahêj — hajÿr.

⁵Mã Anana te ita par pê ihpým ne ihtyc pyrentu. Mãcute me ita jahkre pej catêjê atajê cunea mã ampeaj kam ita cupa. ⁶Mã mentuwjê kwý te mehtyc cupu, ne ma pômã me to kwý, ne cute me harêt.

⁷Mã ahna ahtúmryre mã curi ihkôt híxi cator, ne nee cormã cuteampo te impjên to jũ mãn xà ata na hahkre pej nare. ⁸Mã Petrô te ihcukij ne cumã:

— Hã, imã awjarẽ, xà ampeaj kam mã ihpore ita na pitmã ate apjên me pur to gâhpan? — hajÿr. Mã cumã:

— Ýhÿ — hane.

⁹Mã Petrô cumã:

— Ampo na mã ate apjên me amji caxuw Pahpãm CarôPejti inxÿj? Xà ate mehcajpěr prãnte mã ca ate me to hajÿr? Pom mentuwjê te me apjên jarêt ne ramãhacpÿ ne ame ipa ita, quẽ ha hanea ne ihkôt me ato kwý ne me garêt — hane.

¹⁰Me ajkaam mã Petrô cuna mãihpým ne ihtyc. Mã mentuwjê cator, ne cute me hõmpun, nema me to kwý ne cute impjên cahêa na me harêt.

¹¹Mã Jeju na mehkwy cunea te me ita par, ne me cumãhüpa to hüpa.

Pê me hâpên xà pihho catia to

Me Hâpên Xà 19.11-12

¹²Ýhÿ, Jeju jarkwa to memprar catêjê te Pahpãm carôt kôt me hâpên xà pihho catia ton. Ne cute me hàhtôa jipôc ri me hâpên xà impejjãhtôa ne me ton. Mã mehkwy cuneate me cuprôn, Xarômãw jô amkrã kam.

¹³Mã me hàhtôa ne me cupê Jeju na mehkwy nare atajê mã ampeaj kam mehüpa, na ri nee Jeju na mehkwy mã jũm xâr nare. Ne mehcunea amji mã me Jeju na mehkwy cupa to hüpa to me ipa. ¹⁴Quẽ ha jũm te amji kam hapac xà to ipintuw prãmna, quẽ ha ihtÿj jũm me hÿrmã axà. Ne por me hũmre me, pyjê jãhtôa ne ampeaj kam me Pahpãm kampa atajê ri, Pahpãm wÿr me ipipkjêr xà, na ri ma Jeju na mehkwy me ipicamên to me mō. ¹⁵Ne por Jeju jarkwa na memprar catêjê atajê, Pahpãm carôat kôt me hâpên xâpihho catia ton to me ipa. Cwÿrjapê quẽ ha me hà japÿ, ne krĩ cape na me cunō, quẽme hikwa, quẽ Petrô apu mō ne mencwÿrpê mō, quẽ hacarō pykrã me hà atajê pro, quẽ ha mempejpyrentu, ne amehcuhhê. ¹⁶Mã me hàhtôa ne Krĩpinkrên wÿr me hàcatêjê me, me kam me pahcurê xwÿn carō kên catêjê atajê to me mō, mã cute mehcunea caprãr.

Pê ame Jeju na mehkwy curê

Ruc 21.12-15; Jowãw 15.26-27; Me Hâpên Xà 4.1-22

¹⁷Mã cute Pahpãm mã mehcajrên catêjê jô pahhi me, Xato xwÿ kôt me ipa catêjê kwý me, ma ame Jeju jarkwa na memprar catêjê jũ na me amji to prãm ne ma ame curê. Ne mehkwyã kwý cunea mã Jeju jarkwa

na memprar catêjê kîn, cwÿrjapê ri me curê xwÿn itajê kwÿ ame hÿ
na mehkin ne ame curê. Na ri cute ame to kêanrexà na me ajpên par.

¹⁸Ne cute mehkujahêc, mã mehwÿr me pra, ne cute me Jeju jarkwa na
memprar catêjê pijakrut pê Petrô me Jowâw atajê pro, ne me haxâr.

¹⁹Mã caxwa ata kam, cõjkwa pîn, Pahpãm mã memprar catêjê nõ cator,
me hacjên xà kam, ne cuteme cumã harkwa jihê mên, ne põ mã ajwar
mecator, ne me cumã:

²⁰— Hã, cute Pahpãm to me amji kam hapac xajÿrkwa wÿr me tẽ, ne
me cumã Jeju te amji kam hapac xà intuw pejti ita na harên pa — hane.

²¹Mã me hÿpar pyrentu, ne apêmã, iràràtia na, ma Pahpãm to me amji
kam hapac xajÿrkwa mã me hàr, ne cute me cumã hÿjarên kam mehtêm.
Mã Pahpãm mã mehcajrên catêjê jõ pahhi te me ajpên par prãmte me
cuprôn, ne prohti kam mehõ pahhi kwÿ na me hàhwÿr, cute me cuprôn
xà ri. Necute me cuprôn jirô pê mã mame hacjên xà wÿr, cute me
Petrôme Jowâw japrôr na me harkwa kujahêc. ²²Mã me hacjên xà jamãr
catêjê curi me cator, ne necute me hõmpun nare. Ne ma cuteme amji
jaxâr, cute me cuprôn xà wÿr, ne me cator ne cute me cumã meharên to:

²³— Ỹhÿ, wa ma me hacjên xà ri me mõ, mã me hacjên xajihê pejti xa,
wa ite me hõmpun, mã me hÿjamãr catêjê harkwa mãamehcuhê, ne me
awjamã. Wa ite me hihê mên, ne nee ite caxwãm pê, kam me jÿm pupun
nare — hajÿr.

²⁴Mã Pahpãm mã mehcajrên catêjê jõ pahhi kwÿ me, me hõ pahhi me,
me hÿjamãr catêjêjõ pahhi atajê me, me hÿpar, ne mehkrã pictor tu, ne
mecupê me hahkre kêatre. ²⁵Me ajkaam mã jÿm ata cator ne me cumã:

— Me ikampa, por ca ate me hÿmre jacjên atajêa rima ramã me hàhtõa
mã Pahpãm jarê, Pahpãm to meamji kam hapac xà jÿrkwa kam — hane.

²⁶Mã me hamãr catêjê jõ pahhi me, mehwÿ ma mepra ne hÿrmã me
cator, ne cute mehaprôr. Ne me cumã ampeaj ne me to mõ. Ne nee ame
to kênare, me hàhtõtê te kên to me hamãr catêjê kwÿ jipej cupate. ²⁷Ne
cuprôn xà wÿr me to cator, ne cute me hãm, cuteme ajpên par catêjê cuna
mã. Mã me hõ pahhi mecumã:

²⁸— Pÿhàpà, wa ite Jeju japrÿ jarên tète meamã, nõ na mã ca ramã
ame harên to me apa! He ramãKripinkrên cuneakôt ate me harên crân!
Ne cormã hipy ate Jeju curan na, amji mã me icuhtom tu — hane.

²⁹Mã Petrô me, Jeju jarkwa na cumã memprar catêjê atajê kwÿ me, me
hõ pahhi catêjê kwÿ mã:

— Cu pahtÿj me Pahpãm kampa, ne me hÿmre cu nee memparnare.

³⁰Ne Pahpãm pê me panquêtjê Pãm Cati, ne cutea ri hacpÿa mãJeju to
ihtir, na wa ame amã harê. Ca me ate pĩ na me Jeju xôr, ne mehcuran,
mã Pahpãm te hacpÿa mã to ihtir. ³¹Ne cute me pajõ Pahhiti catia na
hãm, mã cupê me pahkên to pøj catê. Ne cute amji jikjê rÿm Jeju jÿr,
awpôc rÿm. Ampo na ri Pahpãm te to hajÿr? Ma ame pahkên na ihcaca

na ri pahte mepahkên mã hikran, mã cute me pahkên to tojnõ to prãm to ri cute tohajÿr. ³²Ne wa ite me hacpÿa mã me Jeju tÿr na me hõmpun. Ne ite Jeju tÿr na me hahkre peaj na wa mehcunea mã ame harên to me ipa. Mã hanea ne Pahpãm Carõ Pejti ame cumãharê. Mã hõtpê Pahpãm, cute memparcatêjê mã Carõ Pejti gõ — hajÿr. Hõ, itana ri Petrõ te me cumã harên.

Me hõ pahhi catêjê ame kam mencryc

³³Mã Juta catêjê jõ pahhi catêjê te me ita par, ne ame kam mencryac to amencryc. Ne me cumã Jeju jarkwa na memprar catêjê ihcuran prãm pit. ³⁴Mã hũmre nõ japyrê te Camar ita me cumãihcakõc prãmte hãm ne xa. Ne cupêParixêw catêjê nõa, ne cupê Mojxe xwÿ jõ kàhhõc to me cumã hahkreatê. Ne mehcunea mã ihkÿn, ne me cumã hũpa. Mã macute Jeju jarkwa na memprar catêjê tome hamãr catêjê kujahêc, quêpõ mã me to cato, ne põ pê me to hikaj. Mã ma põ mã me to cator. MãCamar te pahhi catêjê mã ihcakõc kam ihtêm, ne me cumã:

³⁵— Me ikwÿ pê Ixaher catêjê, me hũmre itajê to impeajne, nee ca ame to kên nare. ³⁶Xà ca nee me Tewta xwÿ ata to amji japackre nare? Pê teeapu amji to cati prãm to mõ. Ne ihkõt me ipa catêjê to cwatxênta ne amjimã me to cuprõ, ne ame to ipa. Pê jũm Tewta ata cura, pê peaihkõt me ipa catêjê cunea ame ajcrã. Pê meipijapu xà hamre. ³⁷Jirõ pê mã pê Hÿpõjajo jõpjê pÿn Juta ata cato, pahhi mã me hakrã cahyt xà jõputwrya kam. Ne hanea ne cute pahhi jũhhyr prãmte amji mã me hàhtõa ne me tocuprõ. Pê hanea ne me Juta ata cura, pê ihkõt me ipacatêjê ma ame ajcrã. ³⁸Na cu Jeju kõt me ipa catêjê to ame tojnõ, ne nee jũ mã ame hũmre itajê ton nare, ne me cumã hikra, quê ha me pra. Quê ha me hàpên xà ita pê me hũmre itajêa jâpên xà na, ca ha me totojnõ quê ha taa me ipictor to me hanea, pom pê mehkwy he. ³⁹Nãmri quê ha me Pahpãm jâpên xà na, jũ wÿr ca me to cõ ne me to hamre. Me to impeaj ne, ca ha ate Pahpãmjâpên xà to amehkên na, ca ha atÿj me Pahpãm cujtê, ne jũ wÿr ca ha me ampo pupu — hajÿr. Ne Camar te pahhi mã ihcakõc to hajÿr, mã cute me kam hapac, ne me ajpên mã:

— Cu ha nee mehcuran nare — hajÿr.

Pê pahhi catêjê Jeju mã memprar catêjê cahhy

⁴⁰Mã cute me Jeju jarkwa na memprar catêjê na me hàhwÿr, mã me hàr. Mã pahhi catêjê kwÿ te amehcahhyr na me cumã harkwa. Ne hanea ne cuteme cumã harkwa hyr, quê nee hipêr jũ caxuw Jeju to amehcakõc tome ipa nare. Ne ma cute mehkujahêc, mã ma me mõ.

⁴¹Ne me cator, ne ame hakry, ne me ajpên mã:

— Cute Jeju cwÿrjapê me pahcahhyr ita na ri impej. Ampo na? He cute me pahcahhyr xàita pê Jeju ihhêj rũm cahhyr xà jõamcro ata pyrãac. Ne

ihcahhyr cumam mǎa ri ita kam ame pahcahhy, ne ahnaa ri me pamǎ impej. Wa Jeju jarkwa na ame cumǎ awjarĕ, na riame pahcahhy. Ne mǎmǎ ihtÿj Jeju me papipĕan na amepahcǎmjĩ, ne ame pahcahhy. Ne ahna ri me pajakry — hane. ⁴²Ne amcro cunea kam me cumǎ Jeju to mehcaôc to me ipa, Pahpǎm to me amji kam hapac xà jũrkwa kam. Ne hanea ne me hũrkwa kam me Jeju jarĕn to me ipa. Ne ihtÿj hipĕr cute mehcunea mǎ Jejuwÿrjapĕ Pahpǎm te me ahna amji caxàr to hahkreto me ipa kam me to incrà.

Mehtehcajpar catêjê te xet

1 Timot 3.8-9

6 ¹Ne amcro nǎ na hipĕr Jeju na mehkwy picamĕn. Mǎmehkwÿ pê Crec jarkwa to mehcaôc catêjê me, Ixaher jarkwa to mehcaôc catêjê me, cute me ajpĕn mǎn kam mehtĕm. Ampo na? Xwahna amcro cunea kam Crec jarkwa to mehcaôc catêjê cahāj impijapit wej mǎcute me hǎ jǎrxà ata to me hapac kĕt to me mǎ, na ri. ²Mǎ Jeju jarkwa na memprar catêjê te tǎxi atajĕ te me amji kwÿ cunea to me cuprǎn, ne cute me cumǎ amji jarĕn, ne me cumǎ:

— Ÿhÿ Pahpǎm jarkwa to ite me ijâpĕn jicu, ne me pajǎ to pit mǎ me amji japackre, ita na me ipĕ ihkaj na. ³Cwÿrjapĕ, ca me ikjĕjê me amji capi, ne PahpǎmCarǎ Pejti carǎt te me hũmreto xet ne me amji jǎr atajĕ to me caprǎ. Ampeaj kam cute me amji kam hapac xà impejti, ne cuteme amji jahkre pej catêjê kwÿ cu ha me cumǎ me hǎ jǎr catêjê na me hũxwÿ. ⁴Ne me pa, wa ha hǎtpĕ me Pahpǎm mǎmehcajĕrĕn, ne mehcunea mǎ harkwa to hahkre me to wa ha meijâpĕn to ipa, ne nee wa ha iràn xà na ampo to amji japackre nare — hajÿr.

⁵Mǎ mehcunea te mehkôt me amji ton, ne cute me hũmre te xet capi ne me hũxwÿr. Ne jũm pyxit ata pêTewǎw, ne cute Jeju to amji mǎ ihhimpej to tÿj, mǎ Pahpǎm CarǎPejti carǎt te to hipu. Mǎ mehcachhur atajĕ pê Pirip me, Procor me, Nicanǎr me, Timǎw me, Parmena me, Nicoraw pê Antijoc catêjê nǎ, ne nee cupĕ Juta catêjê nǎ nare, mǎ cute amji to Juta catêjê. ⁶Mǎ cute Jeju jarkwa na memprar catêjê cunamǎ, cute me xet itajĕ xǎm. Mǎ cute me Pahpǎm mǎ mehcajĕrĕn, ne mehkrǎ na me hũ xir. ⁷Ne cute me ajpĕn par jirǎ pê mǎ ri, ihtÿj hǎtpĕ Pahpǎm jarkwa picràn. MǎJeju na mehkwy hǎtpĕ me ajcamĕ, Krĩpinkrĕn cunea kôt. Mǎ me Pahpǎm mǎ cute mehcajĕrĕn catêjê jàhtǎa ne hanea ne cute me Jeju te amji kam hapac xà kam hapac, ne ihkôt me amji ton, ne mehkwy mǎ me hǎr.

Tewǎw jaxàr xà

Ruc 21.14-15

⁸Pĕ Pahpǎm mǎ Tewǎw ihkĩan to ihkĩn. Nepĕ Tewǎw mǎ Carǎ Pejti carǎt gǎ, pê Tewǎw ajco carǎat kôtmehcunea jipôc ri hàpĕn xà pihho

impej catia ton to ipa. ⁹Pê ajco Juta catêjê kwý kwý ame Tewāw na mehcajê kēanre to me ipa. Pê mehkwy itajê ajco me cuprō atajê japyr te “Amjia kôt ame ipacatêjê na mehkwy”. Ne mehkwy itajê pê Xiren jō krī me, Mehtehcajpar jō krī me, Quiriti jō pjê me, Axij jō pjê rūm me cato. Ne me hūmre itajê pê ampeaj kam me harkwa to Tewāw me ajco me ajpēn mān to me ipa. ¹⁰Mā Pahpām te me caxuw Tewāw mā cute amji jahkre pej catia ne hōr, mā Carō Pejti kôt cute me cumā ihcakôc xà ata na nee cute mehcapēn nare.

¹¹Mā cute, jūmjê atajê te Tewāw cuna māamehcajê kēn prānte, me cumā hāmjōr. Mā cutemehcunea mā Tewāw to ihhêj to hajyr he:

— Wa ite me hūmre ita te ame panquētti Mojxe xwýme, Pahpām cuna mā ihcakôc kēanre to mōr na mempar — hajyr.

¹²Mā mehcunea te, cute me Tewāw to mehhêj xi xà ita par atajê te ri amji mā me ipikrar, ne mehkôat kam mencryc. Ne prohti kam me to ihhimpej catêjê me, Mojxe xwý jō kàhhôc to me cumā hahkre catêjê me, mehcunea mehkôt kam mencryc. Ne cute me amji kam me hapac xàa to, cute me tocuprôn, ne me to mō, ne me Tewāw pro, ne ma me to mō, prohti kam mehwýr. Ne cute me hapackre xà jürkwa kam, me cupê pro kam me cuna mā me Tewāw xām. ¹³Ne cute me hūmre kwý japyrōr, cute me Tewāw to ihhêjxi xà caxuw. Mā Tewāw to cute mehhêj xi to me hajyr:

— Ýhý, hūmre ita nee ihcakôc xà kēn itajê to ihcakôc jicu nare, ne camaapu Pahpām to me amji kam hapac xà jürkwa me, Mojxe xwý jō kàhhôc na ihcakôc kēanre to ipa. ¹⁴Ne hanea ne cute, pom pê Naxare jō krī rūm Jeju cato ita, cute harēn quē haxwahna Pahpām to me amji kam hapac xà jürkwa hu, ne hanea ne Mojxe te amji kam hapac xà to antuw ita na ri harēn, wa ite mempar — hane.

¹⁵Mā mehcunea ne me jý, cute me ajpēn par xà jürkwakam, ne me Tewāw kuc pupu. Mā ihkuc pê ihhêj rümçôjkwa pīn Pahpām mā imprar catê kuc pyrâac, neihprâti.

Tewāw te me cuna mā amji xām xà

Ruc 20.9-19; Me Hâpên Xà 17.24

7 ¹Mā prohti kam me hō pahhi pê Pahpām mā mehcajren catêjê jō pahhiti ata te Tewāw cukij ne cumā:

— Hâpà, me imã harê. Xà ajkī ampeaj kam mā me atoawjarê? — hajyr.

Pê Tewāw me cumã Aprãw xwý jarê

²Mā Tewāw me cumã:

— Ýhý, wa ha me amã icakôc, ca me ikampa. Me ikjêjê, menxūjê, me ikampa. Pê rý pēa mā Pahpām pejti catihtiata me panquētti Aprãw xwý mā amji to ajpê. Ne pê cormã Cōpihpo na pjê ata kam ihkrī, ne nee cormã Pjêncrâti jō krī kam ihkrī nare. ³Pê Pahpām cumã ihcakôc ne cumã:

“Yhỹ, ca ha me akwỳjicu, ne krĩ ita pê acato ne ma jũ kam tẽ. Wa ha amã pjê nõ jahkre ca ha kam akri” hane.

⁴— Pê Aprãw Pãhpãm par pyrentu, neCartêj jõ pjê mã hikra ne ma cato. Ne ma Pjêncrati jõ krĩ wỳr mõ, ne curia ihkrĩ. Pê hũm ty. Pê cormã Pãhpãm Aprãw kujate, me pajõ pjê wỳr, pê cato. ⁵Pê nee cormã Pãhpãm Aprãw mã pjê kwỳ jahkre nare. Ne nee cormã cumã ihkwỳ incirre ne hòrnare. Pê cormã ne Aprãw mã ihkra nõ hamreare. Pê ahnaa Pãhpãm cumã pjê to awjahkre, ne to ihcakõc ne cumã: “Yhỹ, wa ha jũ caxuw amã pjê itagõ. Quê ha me akra nõ tãmwxwỳ atajê hanea ne pjê ita to me hõ tekjê” hane. Hõhõ, ita to pê Pãhpãm Aprãw mã awjahkre, cormã ihkra nare kam, ne cumã: ⁶“Yhỹ, wa ha me atãmwxwỳ tãmwxwỳ mã pjê itagõ, quê ha me to hõ pjê, ne quê ha cormã ite me cumã pjê jõr xwỳjrea na, quê ha jũ caxuw jũa kam pjê nõ wỳr me mõ, ne curia mehkrĩ. Ne nee hanea ne me to hõ pjê nare. Jũm jõ pjê kam quê ha mehkrĩ, ne ampeaj kam me apêa to me apê. Ne mehõ na pit mã me cumã me hàpên catêjê na me ipa. Quê ha cormã pjê ata jõ pahhi ame to kêanre ne. Quê ha me to kên ita to caku to hàhtõ to cwatxënta. ⁷Jahpan xà na wa ha apu pjê ata jõ pahhi na mehkwy cunea to kên. Jirõ pê mã, quê ha me atãmwxwỳ tãmwxwỳ me pjê ata jicu, ne ma hacpỹ ne rĩn wỳr me amji jaxà. Ne ita ri quê ha mehkrĩ ne me awpa, ne me ikampa” hane. Ita to pê PãhpãmAprãw xwỳ mã ihcakõc, ne cumã to awjahkre.

⁸— Ne hipêr cumã ihcakõc ne cumã amji ton to hane: “Yhỹ, cu ajpên pa. Ca ha me atãmwxwỳ tãmwxwỳ me, me gũpar to impeajto me apa, ne ampeaj kam me ikampa, wa ha me ato ikra kênrenare. Ne quê ha ita na amã impej, ca ha apy kã kwỳincirre ne hitèp. Ne quê akra pỳm, ne hũmre, ca ha hanea ne impy kã kwỳ incirre ne hitèp. Mãr quêmehcunea me apupu, ne me cumã me apê me ikraa to me ikra na me gahkre pej” hane. Ita na pê Pãhpãm Aprãw xwỳ mã amji to, ne ahna meajpên pa. Na pê Aprãw ihkra Ixac xwỳ kã incirre ne hitèp, cormã incirre ne ahna amcro te õjtõ kam. Pê hanea ne Ixac kra pê Jaco xwỳ mã kã kwỳ incirre nehitep. Pê hanea ne Jaco ihkra te tõi atajê cuneakã kryjre ne hitèp pa.

Pê Tewãw me cumã Joje xwỳ jarẽ

⁹— Ne pyxit ata pê ri Joje xwỳ, pê cupê Jaco xwỳ kra. Ne pê mehkjêjê kã itajê ma ame ihtõ pê Joje te amji to hapu na kjê ata jũ na me amji to prãm, na pê ihpore na ampo kra mã me to ahpa. Pêma ampo kra Joje japrõ, ne to mõ, ampỳa mã hõ pjê pê Ejit jõ pjê ata wỳr. Ne curia pê ma irõ mã jũm ita mã ihpore na to ahpa, pê ajco me hõ na pit mã, me cumãhàpên catê na ipa. Ne pê Pãhpãm ihkõt mõ, ne cume ipa. ¹⁰Ne pê Pãhpãm Ejit jõ pjê kam ampo kên cunea pê Joje capa. Ne cumã amji jahkre pej catia ne cugõ. Ne cumã amji kam hapac xà impej pit gõ. Jirõ pê mã, pê Ejit catêjê jõ pahhi japry te Paro xwỳ ata Joje pupu, ne cumã

ihkîn, pê amji cahê na Joje xãm, cute ihtehcajpar prãmte. PêParo Ejit catêjê kam pahhi na Joje xãm, ne hanea ne amji jûrkwa jamâr catê na hãm.

¹¹— Hamre, pê caku te xet itajê jirô pê mã, me cupê me hõ hamre, Ejit jõ pjê kam, ne hanea ne me panquêtjê jõ pjê pîn Joje cator xà japyrê te Cana jõ pjê ata kam, me cupê me hõ hamre. Pê prãm na ame ipa. ¹²Na pê me panquêtjê ihtÿj ame hõ name hàhcukjêr to me ipa. Pê me panquêtiti Jaco japyrê nõ pê Ixaher ata Ejit jõ pjê kam, cormã me cumã me hõ na me harên pa, na pê macuri mehkra kujate, pê ma curi me mõi. ¹³Ne pê me mõi to ajkrut kam, pê Joje cormã me cumã cupê mehkjê na amji jarê. Pê Paro me hõmpu neme cupê Joje kjêjê na me hahkre pej. ¹⁴Ne pê ma Joje hũm me, mehkjêjê cahur wÿr mehkjêjê kujate, Cana jõ pjê pîn cute me haprôr prãmte. Pê me mõi ne mecato, ne me hũm japyrô, ne ma hacpÿ mã Ejit jõ pjê wÿrme to mõi, ne me to cato. ¹⁵Pê me hàhtô na mehcunea me xetênta ne ihkõt xïc, ne curi me cato, nemehkrî. Ne curia mehkri, pê me panquêtiti Jaco pê Ixaher ihwej ne ty. Jirô pê mã, pê mehkra cunea me, me tàmwxwÿ mea mã Ejit jõ pjê kam mehhi. ¹⁶Pê me panquêtiti ty pê ma ihmat ri, me hõ pjê wÿr, mehtàmwxwÿ me to kwÿ. Ne Krîjike jõ krî kam me to cato, ne curia me harêt. Pom pê rÿ pêa mã, Aprãw Emõrkra jũhka kam kên kre jũhkã ata kam. Ne ma me amji jaxà, hacpÿ mã Ejit jõ pjê wÿr.

¹⁷— Pê me pahkwÿ pê Jaco tàmwxwÿ tàmwxwÿ pê Ixaher catêjê caku ata na ramã me ajcamê, ne mehàhtôa to me hàhtô. Pê ramã Pahpãm Aprãw mãCana jõ pjê jahkre xà ata na caku hàhtêp to mõi. Por pê ampeaj kam cumã to awjahkrea toawjahkre ata wÿr. ¹⁸Ne pê Ejit jõ pjê jõ pahhi tuw nõ hõ pjê ata jamâr na cupy. Ne nee pê Joje pupun nare, ne nee toamji japackre nare, pê rÿ pêa mã ramã Joje ty na pê. ¹⁹Ne pê Paro ma apu Joje na mehkwy caca, ne me cumãihhêj ne me to kên crire nare. Pê me cumã mehkra pÿpÿm atajê na harkwa, quê mehkra kryjre itajê cunea to cô kam me awcapê, quê mehhi.

Pê Tewãw me cumã Mojxe xwÿ jarê

²⁰— Pê amcro ata na Mojxe ihpÿm, neimpejti. Pê hũm me inxi ikrea kam me to ajrô, pê ramã ahna putwÿrê incrê. ²¹Jirô pê mã ri cute me mehkra curan catêjê cupateme to mõi, ne põi pê me cuxi, pê nõ. Pê ma hacpÿ mã me mõi, pê Ejit jõ pjê jõ pahhi tuw pê Paro kra cahãj ita cato, ne mõi, ne Mojxe pupu, ne cupÿ ne ma to mõi, ne to ihkra. ²²Pê Mojxe, curia Ejit catêjê jipôc ri ihkã. Pê Ejit catêjê Mojxe mã cute me amji jahkre pej cunea tohahkre. Pê Mojxe amji jahkre pej, ne ihcakôc pej, nehàpên pej cati.

²³— Hamre, pê ramã ahna caku cwarênta ne ihkàntu. Ne pê mehkjêjê me, mehkwy pê Ixaher catêjê pupun prãm. ²⁴Ne pê ma hacpÿ mã

mehkwÿ wÿr amji jaxà. Neme hõmpu, pê Ejit catêjê nõ apu Ixaher catêjênõ to kêanre. ²⁵Pê Mojxe me hõmpu ne amji mã: “Hamre, ita caxuw wa haEjit catêjê nõ ita cura. Ita caxuw quê ha me ikwÿ me ijâpên xà pupu, ne me Pâhpâm te ikujahêc me ijahkre pej, ite Ejit catêjê te ame to kên pê me caxâr xà na” hane. Na pê ma me hÿrmã tẽ, neEjit catêjê nõ ita cura. Ne pê Mojxea me hamâr catê na amji to. ²⁶Pê apê pê Mojxe ma hipêr Ixaher catêjê wÿr mõ. Pê ramã mehkwyã nõ me ajkrut ne ame ajpu. Pê Mojxe mehõmpu, ne ahna cupê ihkaj na. Pê ma me hÿrmã cato, cuteajpên kam me to impej prãmte. Ne me cumã: “Pÿhàpà, ajwar me apê Ixaher catêjê, ne ca ajpên to me akjê. Ne ampo na mã ca ame ajpu?” hane.

²⁷— Pê apu mehkwy nõ to kên to mõ ata ma apu Mojxecurê, ne cumã: “Nee jÿm te me ijõ pahhi na axãm nare. Ca ame ijapackre to mõ, ne ita ri ate me icukij xà hamreare. ²⁸Xà ca ha pijamã ihnõ kam ate Ejit catêjênõ curan ata cuxà icura?” hane. ²⁹Pê Mojxe kampa, ne cumã hÿpa pê ma acto, Mitij jõ pjê ata wÿr. Ne curi cato, ne curia ihkrî. Ne curia hikwa tuw, pê cumã ihkra xÿmre ajkrut necato. Ne curia pê amji to ajpa, Mitij jõ pjê kam.

³⁰— Ne pê pjê ata kam amji to caku to cwarênta. Ne ajco apu ipa, por põti kam me hamreare ata ri, kënti catia japyrÿ te Ihcuhhyt jõ kên ata kam. Hamre, pê Pâhpâm cõjkwa pîn cumã memprar catê nõ na amji jahkre, ne cumã amji to ajpê. ³¹Pê Mojxe hÿrmã cato, nexa, ne cuhy pôc pupu, pê aprêjpôr ata, ne nee caxâr nare. Pê cuhy caxwãm pê Pâhpãmmã imprar catê nõ pupu. Pê higêc ta, pê hÿrmãahtêp, cute hõmpun pej prãmte. ³²Mã Pâhpâm te cumã ihcakôc ne cumã: “Hàpà, pa wa, ne ipê meaquêtjê Pãm cati. Ne ipê Aprãw me, Ixac me, Jaco Pãm cati” hajÿr. Hamre, pê Mojxe kampa ne hÿpate apu ihtertet, ne nee hipêr hõmpun nare.

³³— Hamre, pê Pâhpâm cumã: “Hamre, ita caxuw ca ate ipeaj to ipej na, ijahkre pej. Cwÿrjapê ca ha apar kàcapa, ne apar cakrô icuna mã xa. Wa ha ateito impejti na gahkre pej. ³⁴Ne ramã ite me ikra pê Ixaher catêjê pupun. MãEjit jõ pjê kam ame ipa. Mã Ejit catêjê ame to kêanre, wa ite mencwÿr par, ne me hÿrmã iwrÿc. Na wa ha Ejit jõ pjê intête, mehkên ita pê me capa. Ne caa, ca ha ita caxuw ma me hÿrmã tẽ, Ejit wÿr” hane.

³⁵— Ne pom pê Pâhpâm me cumã Mojxe xãm ata pê maIxaher catêjê ame curê. Ne pê amcro ata na me Mojxe mã: “Pê nee jÿm me ijõ pahhi na axãm nare, ate me ijapackrexà na. Ne nee ita ri ate me icukij xà nare” hane. Pê ahnaa Pâhpâm me hõ pahhi na me cumã Mojxe xãm, pêcupê me hõ pahhi, ne cupê mehkên pê me to hapôjcatê. Ita na pê cõjkwa pîn Pâhpâm mã imprarcatê harkwa kôt Mojxe xãm. Ne hamre, pê MojxePâhpâm jarkwa kôt hacpÿa mã Ejit jõ pjê wÿr cato. ³⁶Ne cupê me to cato. Ne pê carôt kôt rÿ jÿcaxuw jÿm te ampo pihho pupun nare atajê ton

to hàhtôa to hàhtô. Ne pê harkwa toEjit jô pjê kam hàpên xà to, ne hanea ne côxwa japryte Còxwatepti ata kam to. Jirô pê mã pê pjê capryhtiata kam, curia me amji to caku to cwarênta, ne curia cormã ame ipa.

³⁷— Pê Mojxe me panquêtjê mã ita jarê, ne me cumã: “ÿhÿ, quê ha jũ caxuw Pahpãm me amã jũmte harkwa na me amã ihcakôc catê ata kujate. Quê ha me anô capi, ne me anô xãm, hàpên xà ita caxuw. Ahnaa mã pê ixãm he” hane. ³⁸Na pê Mojxe ajco Ixaher catêjê pê me panquêtjê to ipa, pjê capryhti atakam. Ne còjkwa pĩn Pahpãmmã imprar catê me ajco ipa, por pê kenti japry te Ihcuhyt jô kên kam xa, ne Mojxe mã ihcakôc ata me. Na pê Mojxe Pahpãm jarkwa pejti incwa, cute me cumã harên xà caxuw. Ne me cumã harê, ne ma mepamã ahna ihhóc.

Pê Tewãw me cumã menquêtjê kêanre na harê

³⁹— Na pê ma ame Mojxe curê, ne ma amempar caca. Ne ma hacpÿ mã Ejit jô pjê wÿr me amji jaxår prãm. ⁴⁰Hamre, pê Pahpãm mãMojxe ihcakôc prãmte me cupê cato. Pê ma ihtô kà japry te Arãw wÿr me pra. Ne me cumã: “ÿhÿ, jũ kamMojxe pictor. Mår cute Ejit jô pjê pĩn me pajaprôr neme pahto mō, taa rijũ kam ipictor. Arãw, me imã wakÿre te pahpãm cahàckrekà nõ to. Quê ha wakÿre te pahpãm cahàc krekà ita me ito ipa. Ne taa me pajamã” hane.

⁴¹— Pê amji cunea mã me wakÿre to me pryti krahti pê me hō pahpãm cahàc krekà ata to, ne me to cati prãmte, cumã mehçakôc pejti. Ne ajco me cumãpryre ihcura, cute mehkin prãmte. Ne wakÿre te pryti kra pê pahpãm cahàc krekà ata pyrên me hakryte ajco me cumã me hàkrun xà ita to. ⁴²Pê ma Pahpãm ame curê, ne meto tojnō, mår quê ha me taa amji mã mehken ton to me ipa. Na pê amjia kôt amji mã caxêre to me hō pahpãm cahàc. Na pê Pahpãm jarkwa na ihcakôc catê ita na me ahna ihhóc. Ne hō kàhhôac kam pê ihhóc to hane he:

“Pÿhàpà, me apê Ixahercatêjê.

Rÿ pèa mã ca pjê capry catihti ita kam ame apa, ne ramã ame apa xà ita kam me ana caku te cwarênta.

⁴³ Xà ite pryre kĩn prãmte ca amehcura?

Hãpà. Hamreare, ca cormã atÿj me to ihcupan to meapa.

Ne ca cormã me akrãa kam ca me to amji kampa.

Hõhõ, ita cwÿrjapê pê ca amjiakôt amji mã me wakÿre to me apãm cahàc krekà itajê to me hàhtôa to me hàhtô.

Ne pê ca hanea ne me apãm cahàc japry te Moroc ata mã me pryre itajê cura, cute ihcajuaw prãmte.

Ne pê ca me apãmcahàc krekà ita cjên xà kam ajco me acjê, ne ma me to apa.

Ne pê ca haneane me apãm cahàc krekà japry te Renpa pê caxêre pyràcti nõ ata pê ca me to.

Hõhõ, me akên xà itajê to, pê ca ajco me hajÿr to meapa.

Ita cwÿrjapê wa ha me ana me acurê xwÿn mē, ne me ato mehkujate, Papiřon jõ krī jĳkĳê wÿr ampÿa mǎ ata wÿr, quē ha ma me to mō” hane.

— Ita na pê Pahpām jarkwana ihhōc catê harkwa kōt ihhōc.

⁴⁴— Ne cormǎ ita jamreare kam, pê Pahpām Mojxe mǎ, pêampo kà to, cute me to amji kam hapac xà jŭrkwa to. Pê Mojxe Pahpām jarkwaata na, ahnaa to. Pê me panquêtĳê ajco ampo kà te Pahpām jŭrkwa to ame hy, pjê caprÿhti ata kam. ⁴⁵Ne hamre, ramǎ me ahna caku jǎhtōa kam pjê ata mǎ me hār xàa wÿr pê Mojxe xwÿ ihhi. Ne hamre, pêJojuw xwÿ haxà na axà, ne ma me panquêtĳê to hy, pjê ata wÿr. Por pê Pahpām me cumǎ pjê jōr xà na to awjahkre atawÿr. Ne pê ramǎ Pahpām pjê ata kam mehkrī catêjê cunea japōj pa. Ne kam Ixaher catêjê jÿr, pēme haxà kam me xa. Pê ahnaa me hō pahhi Tawi jō amcrokam ahtwÿ. Pê cormǎ ampo kà te Pahpām jŭrkwa ata mecumǎ ahtwÿ ne ihcuhê.

Pê Tewāw me cumǎ Tawi xwÿ jarē

⁴⁶— Ÿhÿ, pê Pahpām pê Jaco jō Pahpām mǎ Tawi kīnti. Pê Tawi, cute cumǎ ikre nō impejti xāmprǎmte ahna ahwÿ. ⁴⁷Ne pê Tawi kra japrÿ te Xarōmāw ata pê ikrepyxwÿr catê, na pê cumǎ ikre xām.

⁴⁸— Quē ha pijamǎ me pajō Inxū pê Pahpām ne mehcuea jirōa pê cati ata, cute me hŭhkra na meikre xām, ata kam ihkrī? Quē! Hamreare! Wÿr quē kamihkrī! Me Pahpām ata cōjkwa kam ihkrī. Pê ramāharkwa na ihcakōc catê ita na ihhōc. Pê harkwa na ihhōc to hane he:

⁴⁹ “Ipê me gō Pahhiti pê Pahpām.

Ne cōjkwakam ikrī xà, ne pjê kam ri ipar pyxwÿr xà.

Ne cōjkwa pīn wa me atoihimpej.

Xà ikre ita kam ikrī xà na mǎ ate me imǎ ton?

Jū wÿr ca me imǎ to, wa kam ikrī ne kōt.

Hamreare! Wa nee ahna prām nare.

⁵⁰ He pa pê wa ampo itajê cunea to” hane.

⁵¹— Hamre, he ramǎ me apê me panquêtĳê pyrāac, ne me akēanre! Ca nee me Pahpām jarkwa par nare. Ne hanea ne ma apu amji tēte me Pahpām CarōPejti curê. Ne nee mehcakōc par nare. ⁵²Ne amjia kōt ate me amji kam me gapac xàa to ame amji kam gapac tome apa. Pê Pahpām jarkwa na mehcakōc catêjê me panquêtĳēmǎ amcro nō na Pahpām kra impejti cator na to awjarē, pê ca nee mempar nare. Ne atÿj me Pahpām jarkwa namehhōc catêjê atajê jipej. Ne pê jūm to awjahkre ata na, ihtÿj me pahwÿr iwrÿc. Ne Pahpām kra pê cato, pê ca mehcura. Ahnaa mǎ pê Pahpām ajpēn harkwa na cumǎ ihhōc catêjêkujate, pê me panquêtĳê me

hipej he, ata na ca ate mePahpãm kra ton, ne ate mehcuran. ⁵³Ne cõjkwa pĩn Pahpãm mã imprar catêjê pê me amã harkwa ita jarẽ, pê ca nee ajte me gũpar nare — hane.

Tewāw tyc xà

Ruc 21.16-19; 23.46; Me Hàpên Xà 22.3-4; 22.20

⁵⁴Mã hamre, prohti kam te me Tewāwjũjarẽn xà ita par. Ne ame kam incryac to amencryc, ne kam mencryc xà to ame wa gyj. ⁵⁵Mã Pahpãm Carõ Pejti te Tewāw carõt to hipu tu, mã cõjkwa wÿr irit, ne cute Pahpãm jãhcujro pejti pupun, ne hanea ne cute Jeju pupun, mã Pahpãm jikjê rũm xa, awpõc rũm. ⁵⁶Mã Tewāw te me cumã harẽn to:

— Mër he. Wa itÿj cõjkwa catac pupu, ne itÿj me Ahàkà pê Jejudupu he, mã Hũm Cati jikjê rũm xa, awpõc rũm — hajÿr.

⁵⁷Me ajkaam mã cute me hapac jihê par, ne kÿj cati pêa mã ame caràr, ne Tewāw wÿr mehprõt ne cute mehpro. ⁵⁸Ne cute krĩ pê me to cator, me ajkaam kẽn to kamme hũcapêr kam mehtẽm, cute me to curan prãmte. Mã mehhej xi catêjê te me hõ hitõ kà caxàr, ne me jũm tuwre japyrẽ te Xawrõ ata mã me hõr, me hahkà na, cute me cumã hamãr prãmte.

⁵⁹Ne cute kẽn to Tewāw curan prãmte kam me to awcapê, mã Jeju mãakij ne cumã amji jarẽn to:

— Jeju, icarõ japyrõ — hane. ⁶⁰Jirõ pê ihkõn krã na hÿr, ne kÿj cati pêa mã caràr ne Pahpãm mã:

— Cute ame ito kẽn itajê kam acryc nare — hane. Hõ, cute ita to ihcakõc to hajÿr ne ihtyc. Mã ampeaj kam cama Xawrõ mã Tewāw curan na impej.

Pê Xawrõ Jeju na mehwÿ to kẽn

Me Hàpên Xà 22.4; 26.9-11

8 ¹Mã amcro ata na, Krĩpinkrẽn kam, cute me Jeju namehwÿ to mehwÿ kam mehtẽm ne ame to kẽnre. Necute amehkwÿ incran, Krĩpinkrẽn pê. Mãmehwÿ curia Juta jõ pjê kam ame ipa, ne mamehwÿ Krĩritpej jõ pjê mã ame incjêj, mã Jeju mãmemprar catêjê pit jãhhuc. ²Mã me hũmre te Pahpãm to me amji kam hapac catêjêatajê te me Tewāw to me hapac xàhte me amrã, ne cute me harêt.

³Mã Xawrõ te Jeju na mehwÿ to hamre prãmte, hãn ne ihtÿj hõtpê ame ahna hàhcukjêr to ipa, ne ikrea mã incjêj to ipa, ne mehũmre pro, ne pyjê pro, ne me hacjên xà mã me hacjê.

Pê Krĩritpej kam me hũjarẽn pejti

Jowãw 12.24; Me Hàpên Xà 1.8

⁴Mã ame ipicràn atajê pê Jeju na mehwÿ, ne mehcunea mã, pjê cunea kõt ame Jeju jarẽn to me ipa. ⁵Mã ma Pirip Krĩritpej wÿr iwrÿc, ne curia

mehkrĩatajê mã apu Jeju jarên to mō. ⁶Mã me hàhtōa ne cute me Pirip jūjarên xàimpar to impejti, ne harkwa to cute hàpên xàton ata na me hōmpun. ⁷Mã Pirip te me kam ampo carō kên atajê jàhtōa nementête hapôj, mã ma me caràr to pra. Mã cute me xwỳme, me cukrà xà pec catêjê jàhtōa ne hanea ne caprâr. ⁸Mã mehcunea jakry pit, Krĩrĩtpej kam.

⁹Pê curia hūmre japyrê te Ximāw ata ihkrĩ, ne ampeaj kam hūxy xi, neamcro jàhtōa kam ajco me to hy. Ne ihtỳj ajco amji tocati prām. Na pê Krĩrĩtpej catêjê cunea Ximāw cati naamehcāmji, ne ampeaj kam amji mã me to hane. ¹⁰Ne ampeaj kam ajco me kampa. Mehkà me, ahkrare me, mehcunea ajco me kampa. Ne ajco me ajpên mã:

— Ỡhỹ, ihhêj ne hūmre ita kam Pahpām carôt, ne ampeaj kam cati, ne ihhêj ne Pahpām pĩn ri cator — hane.

¹¹Ampo na? Rỳ pêa mã ri Ximāw ata mehkwy to hy na ri, ihtỳj me kampa. ¹²Mã hanea ne cute me Pirip jūjarên xà impar, Jeju pê me pahkritxwỳ na harên xà impejti ata na. Mã Pirip te cute Pahpām himpej xà mã mencjêj na me amji jarên prāmte, harkwa na me hūmre me, pyjê me, cō kammehcumrâr, mã cute me Jeju te amji kam hapac xà pynâr. ¹³Mã hanea ne, Ximāw te Pirip jūjarên xà impar, neihtỳj Jeju na mehkwy mã hàr prām. Mã Pirip te cō kam ihcumrâr, mã cute hūnâr ne hū na pire mã apu ihkôt ipa, ne hân ne Pirip te harkwa to hàpên xà impejti ton to ipa atajê to amji mã ipikrar catia to ipa.

¹⁴Mã Jeju jarkwa na cumã memprar catêjê, Krĩpinkrên kam ameipa atajê, te me Krĩrĩtpej catêjê te hanea ne Pahpāmjarkwa par pejti na, cute me harên par. Mã ihtỳjJeju na mehkwy mã me acjêj. Mã ma cute me Petrô meJowāw kujahêc, Krĩrĩtpej wỳr. ¹⁵Mã curi me cator, ne Pahpām na me ahwỳ, quê Krĩrĩtpej catêjê te Jeju to amji mã mehhimpej atajê mã Carô Pejti gō. ¹⁶Ampo na? Nee Pahpām Carô Pejti ata cormã mehwỳr iwryc, ne cute me cumã amji jôr nare. Mã ihtỳj Pirip te Jeju jarkwa na cō kam mehcumrâr. ¹⁷Cwỳrjapê ri Petrô me Jowāw te me ahna hū xir, neme ahna Pahpām wỳr, mã Pahpām te me cumã Carô Pejti jôr.

¹⁸Mã Ximāw jūxy xi ata te Petrô me Jowāw te jūmjê atajê na hū xir, mã mehkôt Pahpām te jūmjê atajê mã Carô Pejti jôr na me hōmpun. Ne ma me hỹrmã tê, ne ihpore to ame kampa, ne me cumã:

¹⁹— Petrô me Jowāw, wa hanea ne me acarôt ita na prām. Wa ha me amã ihporea gō, ca ha me imã Pahpām carôt gō, mâr wa me acuxã jūm najũ xi, quê amji mã Pahpām Carô Pejti py — hane.

²⁰Mã Petrô te cumã harkwa to:

— Akên xà wỳr, ca gō pore ita to tê! Mōrmōca amji mã: “Wa ha itỳj ihporeto Pahpām carôt japyrô” hane. ²¹He nee ate me ijâpên xà jĩkjê to amji pytâr xàhamreare. Ne Pahpām mã ate amji kam gapac xà hêj xi xà ita nee imej nare. ²²Nãmhã, ne ate amji kam gapac xà kên ita jicu, ne Pahpām na ca ahwỳ, quê atête akên ita camê, ne akên ita to tojnō ne amã

to impej. ²³He ramã ate akên ita to amji krãhtu, na ca ajte me ijü na apu ita kîn, ramã ite me gahkre pej — hane.

²⁴Mã Ximãw te me cumã:

— He nãmri! Ca ma imã Pahpãm wÿ, quê neeate me imã ampo kên jarên xà itajê nôto, ito kên nare — hajÿr.

²⁵Mã Petrô me Jowãw te me cumã Pahpãm jarkwajarên par, ne ma Krîpînkren wÿr cute me amji jaxàr. Ne pry kôt, Krîrîtpej jô pjê kam ihtÿj me Pahpãm jarên pejti atajê jarên cràn to me mō.

Pirip me Cupêtycre

Ixaj 53.7-8

²⁶Mã côjkwa pîn Pahpãm mã imprar catêPirip wÿr iwrÿc ne cumã:

— To xa, ne ma Krîpînkren me Krîhtÿj jô prykôt tē, por curi pôti kam me hamreare, ata wÿr — hane.

²⁷⁻²⁸Mã Pirip xãm ne ma ihtēm pyrentu. Ne pea curicator. Mã cupêtycre nō ita te Krîpînkren kam Pahpãmto amji kam hapac jirô pê, ma hacpÿa mã hō pjêjaprÿ te Cupêtycre jô pjê ata wÿr amji jaxàr. Ne pê hÿmre ata pê pahhikwÿj catia japrÿ teCantikwÿj ata tehcajpar catê, ne ajco cumã hō pore jamã. Ne cawrô jô kujti kam jÿ, ne apu ihkãhhôc atacahyt. Ne ihkãhhôc ata pê Pahpãm jarkwa to ihcakôc catê japrÿ te Ixaj xwÿ, ata jô kãhhôc, pê jÿ ne apu cahyt. ²⁹Mã Pirip te hōmpun, mã Pahpãm Carô Pejti cumã:

— Tē ne cawrô jô kujti wÿr acato — hane.

³⁰⁻³³Mã Pirip ma hÿrmã ipicahur ne ahna cator. Ne cute cupêtycre ata Ixaj xwÿ pê Pahpãm jarkwa to ihcakôc catê jô kãhhôc to jÿ ne apu cahyt na kam hapac. Pê Pahpãm jÿm capi ne to awjahkre ata na ri ihkãhhôc ata cahyt, ne cahyt to:

“Ÿhÿ, jÿm ata pê pryre capônÿre pyrãac, ne cupêcarã cahàcre hôhti pyrãac.

Mã ma ihcuran xà wÿr me tomō, mã capônÿre mō.

Me to mō ne ame cupê ihhō atajakep, mã aracri xa,

jîkjê na ri jÿm ita pê carã cahàcre hôhti pyrãac, ne nee ihcakôcnare, ne aracri xa.

Mã cute me jÿm ata to incirre, ne me kam mare mã cute me cuprãr tu, mã cute ihpahàm catia ne ipÿr, ne apu ihpahàm.

Ne neecute me jÿm ata to impej nare, ne cute ame to kêanre.

Ne nee cormã ihkra nare kam, cute mehcuran, mã pjê kam cute amji to ipijapar xà ata jamre” hane.

Mã Pirip cumã:

— Hàpã, xà ca atÿj, pom ca apu ihkãhhôc cahytita kampa? — hane. Mã cumã:

— Quê, hamreare, wa itỳj cahyt ne nee impar nare. Ipê jũm te imã ihkôt harên xà nare ita kam, jũ mã wa ha ne hahkre pej? Ca ha pijamã imã to hahkre? Gapacta ne api ne icahê na jỹ, ne imã to hahkre — hane. Mã Pirip jàpir ne cahê na hỹr, mã cumã:

³⁴— Imã to hahkre, xà amji naa mã pê ihhôt? Nare xà ajteare mã jũm na pê ihhôt? — hane. ³⁵Mã Pirip te cumã Jeju jarên kam ihtêm, necumã:

— Ỡhỹ, pom jũm ita nee mã jũm nare, Jeju jarên mã he, ne curmã wa ite me hõmpun — hane.

³⁶Ne ma ajwar me mõi, mã ihtỳj Pirip cumã to hahkre to mõi, ne pea cõ jarare na me iwrỳc. Mã cupetycre ita Pirip mã:

— Cõ he, hõmpu. Ne imã Jeju na mehkwy mã ixàr prãm. Ca pijamã caxuw icumrã? — hane.

³⁷Mã Pirip cumã:

— Ca ha ampeaj kam Jeju to amji mã ahimpej, ne mehkwy mã axàrprãm, wa ha itỳj caxuw acumrã — hane. Mã cumã:

— Ỡhỹ, wa ha itỳj amji mã to ihmpej, ne ampeaj kam ri cupê Crixto pê Pahpãm kraa to ihkra, na wa itỳj ahna mehkwy mã ixàr prãm — hane.

³⁸Mã kujti to hàhhuc, ne ajwar cõ mã me iwrỳc, mãpea Pirip te cõ kam cupetycre ata cumrãr.

³⁹Ne cõ pê me hàpir, mã Pahpãm Carõ Pejti te maPirip japrõr ne to tẽ. Mã cupetycre te nee hipêr hõmpun nare, ne ampeaj kam Jeju pyrên hakry, mã ma hõ pjê wỳr tẽ. ⁴⁰Mã ihprõt pê Pirip Axoti jõ krĩ kam cator. Ne maXexa jõ krĩ wỳr tẽ, ne pry kôt krĩ ihcuhhê atajê cunea mã Jeju jarên to mõi.

Xawrô pintuw xà

Me Hàpên Xà 22.6-11; 26.12-18

9 ¹Ata jõ amcro kam ri Xawrô cormã Jeju namehkwy curan prãm to ipa. Mã Tamatcõ jõ krĩ kam hanea ne Jeju namehkwy jàhtõa ne mehkri. ²Cwỳrjapê ri Xawrô ma Pahpãm mã mehcajrên catêjê jõ pahhi wỳrtẽ, ne cute ahna hàhwỳr, quêcumã cute Jeju na mehkwy pro xà na ihkàhhôt to, quê mehpro pa. Mã hõ pahhi teTamatcõ jõ krĩ kam Juta catêjê te me cuprõn xà kam me hõ pahhi catêjê atajê mãihhôt, quê me cahyt, ne me Xawrô tehcajpa. Neme cupê Jeju na mehkwy xũmre me, pyjê me, mehpro ne mehuwapre, ne ajpên Krĩpinkrên wỳr meto pra. Hõhõ, pê me caxuw mehcajrên catêjê jõ pahhi mã ihhôt to hane, ne me cumã cugõ.

³Mã Xawrô na mehkwy ramã Tamatcõ jõ pry kôt, krĩ ata na me hàhtêp tu, mã krã, cõjkwa pĩn ampoprati ata te ahna ipixêr. ⁴Mã Xawrô pjê kam ihpỳm, ne cute cõjkwa pĩn jũm ata par, mã cute cumã harkwa to hajỹr:

— Xawrô, Xawrô, ampo na mã ca apu ito kên toapa? — hajỹr.

⁵Mã cumã:

— Me anõ mã ca? — hane. Mã cumã amjijarên to:

— Ipê Jeju, mãr ca ate apu ito kên ta! ⁶To xa ne krĩ mã axà, quê ha jũm amã ate ampo ton xà ata to awjarẽ — hane.

⁷Mã Xawrô na mehwỳ xũmre atajê cunea te amji mã me ipikrar, ne me ipêrkêt ne me ipêrkêatre. Ne ihtỳj cute me hõkre par, ne nee cute me jũm pupun nare. ⁸Mã pjê pê Xawrô xãm, ne into catac, ne nee irĩtnare. Mã cute me hũhkra naipyr, ne ma Tamatcô jô krĩ wỳr me to mõ. ⁹Mã irĩt nare na amcro incrê, ne camajỹ ne apu Jeju to amji kampa, ne nee hàpàn nare, ne nee ihkõm nare, ne cama jỹ ne apu ajkampa.

¹⁰Mã Tamatcô jô krĩ ata kam Jeju na mehwỳ nõ ita ihkrĩ, ne haprỳ te Anana. Ne irĩat kam cute Jeju pupun, mã cumã akij ne cumã:

— Anana — hane. Mã cumã:

— Ampo? Ita ri wa xa — hane. Mã cumã:

¹¹— Apu amji mã ahcuprõ ne ma Juta jũrkwa wỳr pry cuhtacti ata kôt tẽ. Curia ri, porpê Krĩjara kam Xawrô ihpỳm ata jỹ, ne apu imãihcakõc.

¹²Ne cute irĩat kam amji na apê Anana pupun, mãhỹrmã hàr ne cute into na cumã hũ xir, mã hacpỹa mãirĩt. Na ca ha caa tẽ, ne Xawrô na gũ xi ne caprã — hane.

¹³Mã Anana cumã:

— Jjõ Pahhiti, ramã mehcunea te me imã hũmre ita teKrĩpinkrên kam ampo cunea to kên ata na me harên, ne cute ame akwỳ to kêanre. ¹⁴Ne cute mehcajrên catêjê jô pahhi kwỳ jô kàhhôc pyr, neajpên to tẽ, Tamatcô jô krĩ wỳr, cute me akwỳ te, ate mehtehcajpar xà na me awỳr atajêjacjên prãmte — hane.

¹⁵Mã Pahhiti pê Jeju te Anana mãn, ne cumã:

— Wa ite amji mã hũmre ata te ijarkwa na imprar catê na capi ne ahna hãm, mãr quê ijarkwa na mehcahkrit me, me cupê pahhi cati me, Juta catêjê mãihcakõc. ¹⁶He wa ha pa Xawrô mã ijàpên xà to hahkre, quê ha imã apê. Ne icwỳrjapê cupêcute amji na ihkên xà cunea pupun catê — hajỹr.

¹⁷Mã ma Anana mõ ne ikre mã hàr, ne cute Xawrõna hũhkra xir ne cumã:

— Itõ Xawrô, pom ate pry kôt Pahhiti pê Jeju pupun ita te ri ajpên awỳr ikujahêc, ca hacpỹa mã rĩt, quê hanea ne Pahpãm Carõ Pejti carõt ato hipu — hane.

¹⁸Mã ampo pê tep kà pyrãcti ita into pĩn cumã ihpỳm, mã hacpỹa mã irĩt pyrentu. Hamre, itajirõ pê mã ri Xawrô xãm, mã Anana te cô kam ihcumrãr. ¹⁹Mã hàpàn jirõ pê, hacpỹa mã ihtỳj taa to ihtỳj. Ne cute amji to amcro jãhtõa Jeju na mehwỳ kam, Tamatcô jô krĩ kam.

Pê Xawrô Tamatcô jô krĩ kam apu mõ

²⁰Xawrô te Jeju na mehwỳ na amji ton, neJuta catêjê te me cuprõn xàkam, ihcakõc kam ihtêm pyrentu, ne cute me cumã:

— Jeju pê Pahpãm kraa to ihkra — hajÿr.

²¹Mã mehcunea te me Xawrô par, ne amji mã me ipikrar, ne me ajpên cukij to:

— Pÿhàpà, mār hūmre ita pê Krĩpinkrên kam Jeju namehkwÿ curan catê ta? Pom hãn ne Jeju namehkwÿ pro ne mehcajpre, ne ma hõ pahhi cati wÿrme to ipa prãm ita? Taa mã ri cator — hajÿr.

²²Mã Xawrô amcro cunea kam me cumã carôt tÿaj kam hūjarên to ihcuhê tu. Ne cute hūjarên to:

— Ÿhÿ, por pê rÿ pêa mã Pahpãm Crixto cator xà na to awjahkre ataa ri cator, ne cupêa ri Jeju — hajÿr. Ne cute Juta catêjê pê Jeju na mehkwÿ nare atajê mã caxwãm catia mã Jeju jarên. Mã nee jūm te cumã jū mãn nare, ne aracri mehkrĩ.

²³Mã ahna amcro jãhtôa jirô pê Juta catêjê te amji na me cuprôn, ne Xawrô curan na me ajpên par. ²⁴Mã Xawrô te amcro me caxwa cunea kam, krĩ cati jô kwÿc jarkwa mã me hikaj ne mehcuran prãmna, cute me hahkre pej. ²⁵Mã caxwa ata kam, Jeju na mehkwÿ kwÿ te kãhã catia kam Pawrô jÿr, ne ma krĩ pê, kên tekwÿc catia ata pê me to iwÿc.

Pê Xawrô Krĩpinkrên kam apu mō

Carati 1.15-24

²⁶Mã Xawrô ma Krĩpinkrên wÿr tē, cutecuri Jeju na mehkwÿ mã hàr prãmte. Mã Jejuna mehkwÿ ma ame hūpa. Ne nee mempar nare, ne nee cupêJeju na mehkwÿ na, cute amji mã me to hajÿr nare. ²⁷Mã Parnap te Xawrô tehcajpar, ne ma to mō, ne cute me to cuprôn, ne Jeju jarkwa na memprar catêjê mã Xawrô jarên, cuteme hahkre pej prãmte. Ne cute me cumã Xawrô te prykôt Pahhiti pê Jeju pupun, mã cute cumã ihcakôc na harên. Ne hanea ne Parnap te Xawrô Tamatcô jô krĩ kam Juta catêjê mã, Jeju jarkwa toihcakôc tÿaj na me cumã harên.

²⁸Jirô pê mã ri Xawrô te Krĩpinkrên kam me hūnār, ne ma mehkôtmō, krĩ cunea kôt, ne caxwãm catia mã apu Jeju jarênto mō. ²⁹Mã Xawrô me, Juta catêjê kwÿ pê Crec jarkwa to mehcakôc catêjê me, me ajpên mã me Jeju jarên xà atajê to me ajpên mã meharên to me mō. Ne ihtÿj me Xawrô curan to prãm. ³⁰Mã Jeju kam ajpên to mehkjêjê te ahna mempar, nema Xexa jô krĩ wÿr me Xawrôjaprôr. Ne ma Krĩjara jô krĩ wÿr mehkujahêc.

³¹Mã Jeju na mehkwÿ, Juta jô pjê me, Hípôjajo jô pjê kam, me ipinkrên, ne hanea neKrĩrĩtpej jô pjê kam, mehcunea pinkrênti. Mã nee jūm te ame to kên nare. Ne pê ajco me ajcamê, ne me hàhtô, pê Pahpãm Carô Pejti me to ihtÿj, na pê mehcunea ajco me Pahhiti pê Jeju kampa, ne amji mã me hūpa.

Pê Petrô Rita jô krĩ me Krĩmpejre jô krĩ kam apu mō

Me Hãpên Xà 3.1-10

³²Mã Petrô ihtÿj pjê cunea kam apu mō, ne amcro nōna ma Rita jô krĩ wÿr tē, cute curi Jeju na mehkwÿ amehkrĩ atajê pupun prãmte. ³³Ne

cute hũmrehaprȳ te Enêj ata cukrã xà peacre, ne nee ipa nare atacajpar. Pê ramã Enêj ata hikwa xà ata kamahna caku ôjtô. ³⁴Mã Petrô te cumã harkwa to:

— Enêj, quê ha Jeju acaprã, ca ha axãm pyrentu, negikwa xà to ahcuprõ — hajÿr. Mã Enêj xãm pyrentu. ³⁵Mã Rita jô krĩ ata me, põ japȳ te Xaron jô pjêkam mehkrī atajê te me ampo ton xà ata pupun, ne maJeju na mehkwȳ wÿrme ipipkjêr, ne cumã me hâr.

³⁶Mã Krĩmpejre kam Jeju na mehkwȳ nõ cahãj ihkrĩ ata japȳ te Tapita Carãhkwÿj, ne Crec jarkwa na haprȳ te Torca, ne amcro cunea kam hõtpê me cumã ampo pej pit ton to ipa, ne me cupê hamreareatajê tehcajpar to ipa. ³⁷Ne amcro ata na Carãhkwÿj xà, ne ihtyc. Mãcute mehcuhhõn ne mehcũmpej, ne ma kÿj pê ikreaxwÿn kam me hir. ³⁸Mã Jeju na mehkwȳ te me Petrô teRita jô krĩ kam apu mõi na me harên par. Pê Krĩmpejreme ajpên na pire mã krĩ ata xa, na ri cute Petrô japyrõ to hÿrmã me hũmre to ipijakrut nemehkujahêc. Mã me tẽ, ne hÿrmã me cator, ne me cumã:

— ÿhÿ Petrô, ate amji kam gapac xàa to Krĩmpejre wÿr atêm pyrentu — hane.

³⁹Mã apu Petrô jãhcuprõn, ne ma me pra. Ne curime cator, mã cute me haprõr ne ma kÿj pê, ikre caxwÿn wÿr me to mõi. Mã me cahãj wej pijapit atajê cunea Petrô na me ipixêr, ne ame amrãhti. Ne me Carãhkwÿj te apu ihtÿr ne mõi reria mã, hitô kà ton atajê jahkre, ne mehkà kwÿjahkre, ne ame amrã.

⁴⁰Mã Petrô te ikre caxwÿn pê mehcunea cator, neihkõn krã na hÿr, ne cute Pahpãm mã ihcakõc, neCarãhkwÿj tyc wÿr ipipkjêr ne cumã:

— Carãhkwÿj, to xa — hajÿr. Mã into catic, ne cutePetrô pupun ne hÿr. ⁴¹Mã Petrô te Carãhkwÿj jũ na ipyr ne hãm na ihtehcajpar, mã hãm. Mã cute Jeju na mehkwȳ cuneame, me cahãj wej pijapit atajê mea mã ahnahãhwÿr, ne cute me hũhkra mã cahãj tãr na haxãr.

⁴²Mã me harên pejti ita Krĩmpejre cunea kõt ipicrãn, mã me hàhtõa ne ihtÿj me Jeju to amji mã mehhimpej. ⁴³Mã Petrô curia ampo kà cajror catê japȳ te Ximãw ata jũrkwa kam hàhhuc, ne curia cute cahê na amji to amcro jãhtõa.

Petrô me Coner

Ruc 7.1-10

10 ¹ÿhÿ, pê Xexa jô krĩ kam, Krĩritpej jô pjê kam, hũmre ihkrĩ ata japȳ teConer. Ne cupê krãhtare catêjê to ihhimpej catê. Pê Prytikra jô pjê pê Roman catêjê jô pjê rũm cato. Ne cupê mehcahkrit atajê nõ, ne nee cupê Juta catêjê nõ nare. ²Ne pê ihtÿj ajco mehkra mea mã, Pahpãm to me amji kampa, ne me cumã Pahpãm kĩn. Ne ajco me Juta catêjê pê hamreare atajê tehcajpar to catia to ipa, ne ajco Pahpãm mã mehcahkõc. ³Ne amcro nõ na, pyt pejti kam, Coner te iriatkam

Pahpãm mã imprar catêjê nõ pupun, mã cõjkwa pîn cator ne hÿrmã hàhtêp ne cumã:

— Coner — hane.

⁴Mã cute Pahpãm mã imprar catê nõ atacupa kam hõmpun, ne ihcukij to:

— Ampo, Pahhi? — hajÿr. Mã cumã:

— ÿhÿ, Pahpãm mã ate amji kam gapac xà jahkre pej, ne ate me cupê hamreare atajê mã ampo pejti ton na, cute ato amji japackre. Cwÿrjapê ri apyrên Pahpãm jakry. ⁵Ne hamre, ita caxuw me jùm xũmre kujate, Krimpejre wÿr, quê hũmre japyrê te Ximãw Petrô ata japyrê. ⁶Por ampo kà cajror catê japyrê te haneane Ximãw ata jÿrkwa kam ri hàhhuc, cõxwa cahê na — hane.

⁷Ne ma Pahpãm mã imprar catê tẽ. MãConer te me hàpên catêjê to ipijakrut, ne hanea nekrãhtare nõ pyxit ne me cumã hàkjêr. Ne krãhtareita pê Coner tehcajpar catê, ne ihtÿj Pahpãm to amji kam hapac to ipa. ⁸Ne Coner te me cumã hÿjarên xà caxuw, cute ampopupun atajê cunea jarên. Ne ma cuteKrimpejre wÿr mencre itajê kujahêc, mã ma me pra.

⁹Mã Krimpejre kam, amcro nõ na, ramã Petrô krãcajpuw pyt jÿ, mã ikre jimoc na, cute Pahpãm mãihcakôc prãnte hàpir, ne Pahpãm mã ihcakôc. Mã ramã Coner te Petrô wÿr mehkujahêc atajê Krimpejre na me hàhtêp. ¹⁰⁻¹¹Mã ramã Petrô mã prãm, mã ihtÿj ampo krêr prãm. Mã cormã ame hõ toan kam, mã Petrô te iriat kam cõjkwa kre pupun. Mã cupêcupêhkãhti, ne catia to cati, ne hõxwahhi te cwat na hê, mã kÿj rùm, cõjkwa pîn ahpar mã ajpên mō. ¹²Ne cupêhkà ita caxwãm pê cute ampo pryre cunea pupun. Mã kam ampo pryre cunea, ne kam ampo kên pjê kam cajõhjõt to ipaita, ne kam ampo pryjara. ¹³Mã Pahpãm Petrô mã:

— Petrô, to xa ne ampo cura, ne krê — hane.

¹⁴Mã cumã:

— Pÿhàpà, ijõ Pahhiti! Jũ wÿr wa amji mã hamã neampo kên ita nõ krê. Wa rÿ jũ caxuw ite ampo kên krêr nare ita kam — hane. ¹⁵Mã Pahpãm hipêr cumã:

— Wa jamã ne ampo pej na harê, ca nee hipêrihkên na harên nare — hane.

¹⁶Hamre, cute cumã ihcakôc to incre. Jirô pê mã ri cute cupêhkãhti ita to hacpÿa mã cõjkwa wÿr amji jaxàr.

¹⁷Mã Petrô cama apu iriat kam, cõjkwa kam cute ampopupun xà atajê to amji japackre to mō, ne amji mã:

— Pÿhàpà, ampo to mã Pahpãm apu imãhahkre? — hane. Mã pyt jÿr xà ata kam, Coner te me hũmre kujahêc atajê harkwa mã me hàhhuc. Ne cuteme Ximãw pê pryre kà cajror catê ata jÿrkwa na me hàhcukjêr. ¹⁸Mã cute me cumã harên, mã ma hÿrkwa ri mecator, ne cute ikrea kam, me jùm ita mã hàkjêr, ne me jùm ata cukij to:

— Xà ajkĩ ita ri mã hũmre japrỹ te Ximãw Petrô atajãhhuc ne apu mõi? — hane.

¹⁹Mã Petrô cormã apu cute ampo pupun xà ata to amjijapackre to mõi. Mã Pahpãm Carõ Pejti cumã:

— Awpa! Ita ri me hũmre incrê, ne ame anahãhcukjêr to me ipa. ²⁰Apu ahcuprõ ne wrÿ, ne mehkõt mõi. Nee ca apu gũpar nõ nare, ne nee ame hũpa nare. Ampo na? Itea wa awÿr mehkujahêc — hane.

²¹Mã Petrô wrÿc, ne me hũmre atajê mã:

— Xà ina ca ame ahcukij? Ampo wÿr mã ca ita ri me mõi? — hane.

²²Mã me cumã:

— Ýhÿ, pahhi Coner te ri awÿr me ikujahêc. Ne Coner itapeaj, ne cupê Pahpãm to amji kam hapac catê impeaj, mãJuta catêjê cunea me kampa. Mã Pahpãm mã imprarcatê cõjkwa pĩn cator, ne apu cumã ana awjahkre, quê ana ahwÿ, ca hũrkwa ri acato, quê akampa, ate cumã ampo jarên xà atajê na — hane.

²³Mã Petrô te me hũmre atajê mã me hãr na hũjahkre, mã me hãr, ne caxwa ata kam cahê na me hàhhuc. Mã me ahna apê, mã ame hàhcuprõn, ne ma memõi. Mã Jeju na mehkwỹ kwÿ, Krĩmpejre kam mehkrĩ atajê, hanea ne mehkõt me mõi. ²⁴Me mõi ne me ahna apê nõ ma Xexa jõ krĩ kam me cator. Mã ramãConer te mehkjêjê me, me hõ ikwÿ nõ peaj catêjê me, me hator, mã ramã cute me cuprõn ne me Petrô jikaj. ²⁵Mã ramã Petrô to me mõi, mã hãr, mã Coner mõi ne cute ihcajpar, ne cuna mã ihkõn krã na hÿr. ²⁶Mã Petrô te hacpÿa mã hãm ne cumã:

— To xa, nee mã ipê Pahpãm nare. Ampo na? Hanea neipê me axũmre nõa wa — hajÿr.

²⁷Mã Petrô apu Coner mã ihcakõc jirõ pê mã, ma ikre mã me hãr. Mã me hàhtõa te me cuprõn tu curi. ²⁸Mã mehcunea mã awjarê, ne me cumã:

— Ramã me amã Juta catêjê te amji kam hapac xãjahkre pej. Ne jũ wÿr quê mehcahkrititajê me, me cuprõ ne me ajcacwa. Ne Pahpãm te quêt imãmehcunea to hahkre to hajÿr he, wa nee amji kĩnte hipêr jũm kên me, ihtũm na, to amji kam ijapacnare. Ita to ri Pahpãm te curmã imã hahkre. ²⁹Na ca ate me ina gãhwÿr, wa ajpên ite amji kamijapac xà impejti na prãm to wa mõi. Na wa itÿj amjijahkre pej to prãm, ampo na mã ca ate me ina gãhwÿr? — hane.

Pê Coner Petrô mã amji jarê

³⁰Mã Coner te Petrô mã ihcakõc, ne cumã:

— Ramã ina amcro incrê, wa ita ri ijũrkwa kam jÿ, ne pyt pejti kam apu Pahpãm mã icakõc. Mã ihprõt pê hũmre ita te ihkã jakati ihprãti itato ihkã, ne icuna mã cator, ne cute imã hũjarên to:

³¹— “Coner, Pahpãm te acakõc xà impar, ne cute ato amji japackre, ca ate me cupê hamreare atajê mã cute ampo na ihprãm ata jõr na. ³²Ne me

jũm kujate, Krĩmpejre wỳr, quê me jũm xũmre japrỳ te Ximãw Petrô ata japrô. Ne Ximãw nõapê ampo kà cajror catê jũrkwa kam rihãhhuc, cõxwa cape na” hane. ³³Na wa ite ana ijãhwỳr pyrentu. Mã ate to hamãrti mã, ne ajpên tẽ ne acator, ne ahnaa ri impeaj to impej. Ne hamre, ramãmehcunea te me cuprõn, Pahpãm cuna mã. NePahpãm te amã harẽn ne amã to hahkre atajê par prãmte, wa ramã ite me cuprõn. Na ca ha ate imparxà ata jarẽ, wa me akampa — hajỳr.

Pê Petrô me cumã hũjarẽn capô

Roman 2.7-11; 1 Timot 2.1-6

³⁴Mã Petrô me cumã:

— Ỗhỹ, he ita caxuw Pahpãm mã mehcunea pipẽn pit naimã hahkre pej. Pahpãm te ramãcumã mehcunea kĩn pipẽn pit to imã hahkre, na ri imã hahkre pej. ³⁵Ampeaj kam, quê ha pjê cunea kam jũmjê mã Pahpãmkin, ne me cumã kam hapac prãm, quê ha Pahpãm jũmjê atajêpupu, ne ihtỳj jũmjê atajê na amji capa. ³⁶Ne ramã cute me ikwỳ pê Juta catêjême, me pahcunea mã Jeju kujahêc, me pahcarĩcti prãmte. ³⁷Ne ramã ate me Jejujarẽn pejti ita par, ne me hahkre pej, por pê Jowãw ajcoJeju pê me pahcunea jô Pahhiti na me cumãharẽn to ipa, ne cõkam ajco mehcumrã. Ne pê Jeju Naxare jô krĩ pĩn cato, ne ajco mehcunea mãihcakõc to ipa, Hĩpõjajo jô pjê me, Juta jô pjê kam. ³⁸Ỗhỹ, pê Pahpãm Jeju mã Carõ Pejti mecarõt tỳjti gõ. Pê Carõ Pejti jarkwa kõt ajco hàpẽn xà impejti ton to apu ipa. Ne ajco Pahpãm jarkwa kõt mentête me curê xwỳn carõ kên to põj to ipa. Atajê na ramã me amã hahkre pej.

³⁹— Mã me ikwỳ te Krĩpinkrẽn me ipu na krĩ kwỳ atajê cunea kam, cute ampo ton xà atajê cunea na me hõmpun. ⁴⁰Mã cute pĩ na me inxõr, mã kamajêt, ne ihtyc. Mã cute me harêt, mã ahna amcro incrê, mã Pahpãm te hacpỹa mã to ihtĩr, ne ma meiwỳr ihkujahêc. ⁴¹Wa me pa pit te me hõmpun, mã nee mehcunea te me hõmpun nare. Mã cute hacpỹa mã ihtĩrjirõ pê me pa pit mã amji to ipipê, ne meicape na hàpàn ne ihkõm, wa ite me hõmpun. ⁴²⁻⁴³Ne ampo na ri Jeju me iwỳr cator? Pahpãm te mam me icapi, ne meito caprãr, ite mehcunea mã Jeju pê me pahkritxwỳ na harẽn to ipa xà caxuw. Ne hanea ne cute Jeju to me pahcukij ne me pahto ipicokjêr catê na hãm na, me cumã harẽn xà na amji na me icapi. Pê rỳ pêa mã Pahpãm jarkwa na mehhõc catêjêajco Jeju jarẽn to ame ipa, ne me harẽn to:

“Ỗhỹ, quê ha ihtỳj amcro nõ na jũm me awỳr cato.

Came akên jicu, ne hỹrmã me apkjê, ne me kampa, mār quêate me to kên atajê to tojnõ ne hicu, ne me ana amji capa” hane.

— Ita na pê Pahpãmjarkwa na mehcakõc catêjê rỳ pêa mã mam Jeju tomehcakõc. Ne Pahpãm te Jeju to me pahcukij catê. Ne taa mã quê

haamcro nõ na me pahpupu ne cormã me pahcuneatîr itajê me, ramã me pahtyc itajê mea mã me pahcukij. Me pahtiar kam, pahte me ampo kên-ton, ne pahte me ampo pej ton ata na, me pahcunea cukij, cute me pajahkre pejprãmte. Ne ite me amã itajarẽn xà caxuw ri Pahpãm te me ipyxwÿr — hane.

Pê mehcahkrit hanea ne me Pahpãm Carõ Pejti incwa

⁴⁴⁻⁴⁶Mã Petrô cormã apu ihcakôc, ne apu ita jarẽ, mãPahpãm Carõ Pejti me hipôc ri hàr. Ne cute, por me Petrô kampa atajê cunea mã amji jôr. Mã mehcuea te me to ihcakôc kam ihtêm. Ne Pahpãm cati ne impej na me harẽ. Ne me harkwa pihho cunea to mehcahôc. Mã cute me Krîmpejre pîn, Juta catêjê kwÿ pêJeju na mehkwy te Petrô pynâr atajê to amji mã me ipikrar. Ne me ajpên mã:

— Pÿhàpà, xãmte Pahpãm te hanea ne mehcahkrititajê mã Carõ Pejti jôr? — hane. MãPetrô te mehcuea mã harên to:

⁴⁷— Hanea ne mehcahkrit itajê teihtÿj me Pahpãm Carõ Pejti incwÿr to hajÿar xà, pom pê cu me cumam me cucwahe. Xà quẽ ha ajkî jûm cô kam me cumrâr têtémehcahpêrta? Hâpà! — hajÿr. ⁴⁸Ne cute cô kam, Jeju jarkwa kôt, mehcumrâr na me cumã harkwa hyr. Mã harkwa kôt cute mehcumrâr. Jirô pê mã cute me, Petrô te hipêr me cahê na amji to amcro nõ kujahêc prãmte, me ahna hàhwÿr. Mã curiame cahê na hàhhuc.

Pê Petrô ampo na amji jarẽ

Me Hàpên Xà 10.1-48

11 ¹Mã Juta jô pjê kam Jeju jarkwa na memprar catêjê atajê te Coner me, mehkra pê mehcahkrit atajê tehajÿar ne Pahpãm jîkjê rûm me hàhhuc ne mehkwy mãmehcunea xâr na cute me harên par. ²Mã Krîpînkren kam Petrô cator. Mã Jeju na mehkwy te me Mojxe xwÿ kam me hapac prãmatajê te me Petrô cukij, ne me cumãn to:

³— Pÿhàpà, ca mehcahkrit itajêkam gâhhuc ne me cape na gâpàn, ita na ihkaj na! Rÿ pêa mã pê Pahpãm Mojxe xwÿ to ihhimpej, ne me pamãawjarẽ, cu nee mehcahkrit atajê cape naame papa nare — hane.

⁴Mã Petrô te cumã kat kam ampo cunea ton atajê na, me cumã amji jarên to impejti partu, ne me cumã:

⁵— Ýhÿ, wa Krîmpejre kam apu ipa, ne Pahpãm mãicakôc, ne iriãt kam ite ampo pupun. Ne ampo ita pêcupêhkãhti pyrãac, ne côjkwa pîn iwÿr iwrÿc. Nehôxwahhi te cwat itajê na hê, wa ite ihcunea kam apêhti na hõmpun. ⁶Ne kam iriãt, ne ite kam ampo pryre cunea pupun. Hõmpri tãmre me, ampo kên pjê kam cajôhjôt to ipa itame, pryrejara me, ite ihcunea pupun. Pom pê hanea ne Pahpãmam ampo pryre kur tète me pamã atajê, wa ite hõmpun. ⁷Ne ite côjkwa rûm jûm jôkre par, mã imã: “Petrô, to xa ne atÿj ampo cura ne krê” hane.

⁸— Wa cumã: “Pahhiti, jũ wÿr wa amji mã hamã ne me iquêtjê te me imã ampo kên cawpa xà itajênõ krê. Wa rÿ jũ caxuw ite ampo kên krêr nare ita kam” hane.

⁹— Mã hipêr cõjkwa pîn imã: “Wa jamã ne ampo pej na harê, ca neehipêr ihkên na harên nare” hane. ¹⁰Ne cute imã harên to incrê, mã cupêhkà tehacpÿa mã amji jaxàr, cõjkwa wÿr.

¹¹— Me ajkaam mã Xexa jõ krí pîn, cute iwÿr me hũmre to incrê ne mehkujahêc atajê me cator. ¹²Mã Pahpãm Carõ Pejti te, ite pa nare to imã ihcakôc, ne ikujahêc, wa ma mehkôt Xexa jõ krí wÿr mõi. Ne cute me xêj itajê pê Jeju na mehkwy Krímpejre kam, ne hanea ne ma me ikôt me mõi. Wa me icunea curi me icator, ne Coner jürkwa mã me ixàr.

¹³— Mã Coner te me imãcõjkwa pîn Pahpãm mã imprar catê te hürkwa kam cumã amji pêr, ne cumã hũjarên na me imã harên. Cute cumã hũjarên to: “Hàpà, Krímpejre wÿr jũm kujate, quê tẽ ne hũmre japrÿ te Ximãw Petrõ atajaprõ. ¹⁴Quê cato, ne me acunea te Pahpãm to kên jahpan xà na, me akên catia mã me axàr xà ata pê, cute me apytàr xà to me amã hahkre” hajÿr. Hõ, Coner te me imã hũjarên to hajÿr.

¹⁵— Na wa ite me cumã Jeju jarên kam itêm. Ne cormã ite icakôc kam itêm, mã por pê mam Pahpãm Carõ Pejtime pahwÿr wrÿ, ata na ri me pahcuxà me hÿrmã iwrÿc. ¹⁶Na wa ite, pom pê Pahhiti Jeju me pamãhũjarên to: “ÿhÿ, pêJowãw pê cõ kam me acumrãr catê. Ne Pahpãm quê hajũ caxuw me amã Carõ Pejti kujate, quê ha taa amjicarõat kam me acumrã” hane ata to, ite amji japackre pyrentu. ¹⁷Pom pê mam Pahpãm me pamã Carõ Pejtigõ, ata cuxà hanea ne cute mehcahkritmã Carõ Pejti jõr. Ne Pahpãm te me cumã hõr ita kam, jũ wÿr wa Pahpãm cuna mã ikên to amji kampa — hane.

¹⁸Hõ, Petrõ te me cumã hũjarên to hajÿr, mã mehcunea te me kam hapac, ne me cumãñ jicu, ne ramã ajtea mã me, ne ampeaj kam cute Pahpãm pejna me harên kam to ihtêm. Necute me hũjarên to hajÿr he:

— Tahnaa mã, Pahpãm te hanea ne mehcahkritto impeaj to impej. Naquê ha mehkên ton jicu, ne Pahpãm mã me amji jarê, quê ha cute me to kên atajê cunea jicu ne to tojnõ. Na quê ha hanea ne Pahpãmcahê na ame ipa rohnÿtti mã — hajÿr.

Jeju na mehkwy Antijoc jõ krí kam

Me Hàpên Xà 4.36-37

¹⁹ÿhÿ, Tewãw curan xà jirõ pê mã cute me Jeju na mehkwy to kên kam mehtêm. Mã Jeju na mehkwy ma amehcahkũm neame ipicràn. Ne ma Kuhkũmtyc jõ pjê wÿr me pra, mã itajê ma Xipre jõ pjê wÿr me pra, mã itajê ma Antijoc jõ krí wÿr me pra. Ne cute me cupê Juta catêjê mã pit mã me Pahpãm jarkwa jarên, ne nee mehcahkrit atajê mã harên nare. ²⁰Mã pom pê Xipre jõ pjê me, Xiren jõ krí pînme cato atajê kwÿ kwÿ,

ma Antijoc jõ krĩ wÿr me pra ne me cator. Necute ajtea mã hanea ne mehcahkrit mã Pahpãmjarkwa jarën, ne me cumã Jeju pê me pahkrixwÿ jarën xà impejti jarën. ²¹Ne mehkwy atajê pê Pahpãm Carõ Pejti me cumã amji gõ, mã carõat kõt ame ipa. Cwÿrjapê ri me hàhtõa necute mempar, ne hÿrmã me ipipkjêr.

²²Mã ma me harën picràn, ne ma Krĩpinkrên kam cator, Jeju na mehkwyte cuprõn xà kam, na ri ma cute me hÿrmã, Antijoc jõ krĩ wÿr Parnap kujahêc. ²³Mã Parnap curi cator, ne cute Pahpãm te me toimpejti, ne cute Pahpãm te me ahna amji caxàr, mãampeaj kam me hakry na me hõmpun. Ne cute ita kam me to incrà tu to mehcunea japackre, mãr quê me Pahpãm kampa, ne cute me amji kamme hapac xà cunea to me Pahpãm caca xà pynã. ²⁴Ûhÿ, pê Parnap ita pê hÿmre impejti, ne pê Pahpãm Carõ Pejti cumã amji gõ ne amji jõrtu, na pê hãn ne Jeju to amji mã ihmipej to tÿj. Neincwÿrjapêa ri me hàhtõa ne Pahpãm wÿr me ipipkjêr.

²⁵Jirõ pê mã ri, ma Parnap Krĩjara wÿr mõ, ne kam apu Xawrõ japê, necute ihcajpar, ne ma Antijoc jõ krĩ wÿr me tẽ. ²⁶Ne caku pyxit ata na cute me cuprõn, cuprõn xà kam, ne cute me hàhtõa mã Pahpãm jarkwa to hahkre. Ne Antijoc jõ krĩ ata kam, pê mam Jeju kõt me ipa catêjê japrÿ to ajco me “Jeju na mehkwy” hane.

²⁷Mã amcro ata na Pahpãm jarkwa to mehcahcõc catêjêkwÿ Krĩpinkrên pĩn me mõ, ne Antijoc jõ krĩ wÿr me cator. ²⁸Ne pyxit ata pê haprÿ Agap, ne cator ne xa ne Pahpãm Carõ Pejti jarkwa kõt me cumã awjarê, ne me cumã:

— Ûhÿ, quê ha pjê cunea kam prãm — hane. Ne porCrawti pê Roman catêjê jõ pahhiti jõ caku ata kam pê ita hane.

²⁹Mã Jeju na mehkwy teJuta jõ pjê kam Jeju na mehkwy tehcajpar na me ajpênpar. ³⁰Ne ahpÿanre na, me pyxit ne cute me ihpore jõr par, ne mempeaj kam me cugõ. Ne cute me ihpore ata to Parnap me Xawrõ kujahêc, cute me Jeju na mehkwy to mehhimpej catêjê mã hõr xà caxuw.

Hipêr ihkên xà

12 ¹Ûhÿ, pê amcro ata na pjê jõ pahhi ata haprÿ Heroti, ne cute Jeju na mehkwy na harkwa hyr, cute ameto kêanre prãmte. ²Ne Heroti te Jowãw tõ pê Tijac na harkwa hyr, quê mehpro ne mehcura, wapo xwahhihti to. Mã cutemehcuran. ³Mã Juta catêjê mã cute mehcuran ita na kĩn. Cwÿrjapê riHeroti te hajÿar ne hipêr Petrõ pro, ne mehuwapre ne me haxàr na harkwa hyr, Juta catêjê pijacri xà jõ amji kĩn jõ amcro ata kam. ⁴Ne cute krãhtare pê me hamãr catêjê te tejixêj jÿhkra mã haxàr, ne me cumã:

— Me hamãr peaj ne, quê nee jÿ kam ihtêm nare, nãmri amji kĩn jirõ pê wa ha me cuna mã hãm, neihcukij, ne ihcura — hajÿr. ⁵Mã Petrõ

nõ, mã hamār catêjê ihtÿj mehamã. Mã Jeju na mehkwy ihtÿjPetrô na Pahpãm na me ahwÿ, quê nee me Petrô curan nare.

Petrô me hacjên xà pê cato

⁶Ne amcro ata na pahhi Heroti te Petrô cukij, ne mehcuran xà jôcaxwa ata kam pê me hamār catêjê cote na nõ ne gôr. Pê wakÿre ajkrut ne ihcajpre, ne cormã harkwa mã hamār catêjê ahna mehcuhhê. ⁷Mã ihprôt pê caxwa ata kam, Pahpãm mã imprarcatêjê nõ ata còjkwa pîn me hacjên xà wÿr iwrÿc, ne cute cumã amji to ipipê. Mähàhcujiro kam apêhti pyrentu. Mã cute Petrô jikre kamihtat, ne ihcujiro ne cumã:

— Hã, axãm pyrentu — hane. Mã wakÿre teihcajpre itajê cunea apu ipijaxwÿr. Mã cormã ihtÿj hamār catêjê ame hikwa ne ame gôr.

⁸Mã Pahpãm mã imprar catê cumã:

— Atu na hê xà to apre, ne gô par kà mã amjijaxà ne ahna to huwapre — hane. Mã cute ahna to huwaprepar mã cumã:

— Gô hitô kà mã amji jaxà ne ajpên ikôt mô — hajÿr.

⁹Ne ma mam Pahpãm mã imprar catê cator, ne cumã mô, mã hapu na Petrô ihkôt mô. Ne nee cator xà ata na cute amji jahkre pej narekam, ihtÿj ipimtir na apu amji cãmji. ¹⁰Ne ma ihkôt mô, ne cute me hamār catêjê cuhhê xà jakren, ne hirô pê ihnô ita jakren, ne ma wakÿti teharkwa catia ata wÿr me mô. Mã amjia kôtcute me cumã amji jihê mên, mã ma me cator. Ne ma krī cape kôt me mô, mã ihprôt pê ma Pahpãm mã imprar catê tē. ¹¹Mã cormã Petrô te amji cajpêr ne amji mã:

— Pÿhàpà, xãmte ampeaj kam ri Pahpãm mã imprar catê te Heroti me, Juta catêjê jô pahhi kwÿ jühkra pê icaxàr! Nee mã ijôt kam nare, ne nee mã ipimtir kam nare — hane.

¹²Ne cormã cute to amji japackre, ne ma Marij jürkwawÿr tē, por Jowãw Macô menxi ata jürkwa wÿr. Nehÿrmã cator, mã cormã cute me cuprôn ne mehkrī, ne ma hōtpê Pahpãm mã me Petrô cajrên. ¹³Mã pea Petrô te me cumã harkwa cahhyr kam ihtêm. Mã cuprÿre japrÿ te Rotihkwÿj te impar, ne ma hÿrmã tē ne cute ihcukij, ne cumã:

— Me anô mã ca? — hajÿr. Mã cumã:

— Pa — hane. ¹⁴Mã cute impar pyrentu ne hakry mã ma ipicahur, ne nee cute cumã hihê mên nare, ne ma tē ne ame cumã harê, ne me cumã:

— Ma xà, pô pê Petrô harkwa mã xa — hane.

¹⁵Mã me cumã:

— Hamreare, ca apu ato kam waj — hane. Mã me cumã:

— Quê, wa nee apu ito kam waj nare, ne nee wa apu ipimtirnare, ampeaj kam wa me amã harê. Ma xà, pô pê xahe! — hane. Mã me ajpên mã:

— Hamre, Petrô carô mōrmô xa — hane. ¹⁶Mã cormã Petrô apu harkwa cahhy, mã cute me cumãharkwa jihê mên, ne me hōmpun, ne me amji mã ipikrar. ¹⁷Mã cute hühkra to mehcuhhêc ne me cumã:

— Me kêt, ne me ankrê, wa me amã amji jarê — hajÿr. Mã me kêt, mã ame cumã Pahpãm mã imprar catê kujahêc, mã cute me hacjên xà pîn to cator na, ame cumã amji jarê. Ne amji jarên kôt me cumã:

— Ca ha me anõ tẽ, ne Jeju na mehkwy to ihhimpej catê, pê Tijac ata me, me ikjêjê mã ijarê — hane. Nema jũ kam tẽ.

¹⁸Mã apê, mã me hamãr catêjê te Petrôjapê me amji caprãr, ne me cupê amjijahkre kêatre. ¹⁹Mã Heroti te Petrô na hàhcukjêr to mehkujahêc. Mã nee cute me Petrô mã cator nare, mãHeroti te Petrô na me hamãr catêjê cukij, mã nee jũmte cumã harên nare. Na ri cute me tejixêj itajê cunea naharkwa hyr, quê me hipej, mã cute me hipej tu. Jirô pê mã ri, HerotiJuta jô pjê pê cator, ne ma Xexa jô krĩ kam hàhhuc, ne jũ mã curi cute amji to amcro ton.

Pjê jô pahhi pê Heroti tyc xà

1 Petrô 1.24-25

²⁰ÿhÿ, ampeaj kam ri, Heroti mãKên jô krĩ me Teppro jô krĩ kam mehkri catêjê kam incryc. Ampo na? He mehkwy japyre mã me cumã ihpore jôr prãm to me ipa, cwÿrjapê ri ame kam incryc. Na ri krĩ jô pahhi catêjêatajê te amji to cuprôn, ne ma Praxô pê Heroti jarkwa kôt mehcunea to ihhimpej catê ata wÿr me mō. Ne hÿrmã me cator, ne ame ajpên mã ihcakôc, cute hacpÿa mã ajpên to me hō kwÿ nôprãmte. Ne ampo na ri cuteme ajpên to hajÿr? Nee mã ampo na nare. Pê Heroti pê pahhi ata jô pjêa pîn ajco me cumã me hō to hapôj, cwÿrjapê pê me ajpên to hane. ²¹Mã Heroti te me cumã ihcakôc xà na me cumã amcro hyr, mã ramã amcro hyr xà ata kam hàhhuc. Mã cutehō pahhi kà impejti ata mã amji jacjên ne to amji cũmpej, ne pahhi krĩ xà catia ata kam hÿr, ne cute me cumã ampo kwÿ to ihcakôc to iryã. ²²Mã cute mempar pejti atajête ihcakôc ata jahpan xà na me cumã caràr ne me cumã:

— Pÿhàpà, nee mã me hũmre nō ihcakôcnare! Me pahpãm nō mã ca ajte acakôc! — hane. Mã Heroti teita par, ne cumã amji jarên xà ita na ihkĩn.

²³Mã cute cupê Pahpãm na me harên ata na, ihtÿj me to tojnō, na ri ihtÿj cupê Pahpãm na me harê. Cwÿrjapê ri cōjkwa pîn Pahpãm mã imprar catê te to kên pyrentu. Mã cutō te ihkrêr mã ihtyc.

²⁴Pê ajco Pahpãm jarkwa ma ihkà to mō, ne ipicràn to mō.

²⁵Mã Parnap me, Xawrô te me hàpên xà krã curan, nemehkjêjê mã ihpore jôr, ne ma Krĩpinkrên pĩnhacpÿa mã Antijoc jô krĩwÿr cute me amji jaxàr. Ne cute me Jowãw Macô japrôr ne ma me to mō.

Pê Parnap me Xawrô hàpên kam me tẽ

Me Hàpên Xà 9.15-16; Roman 1.1

13 ¹ÿhÿ, Antijoc jô krĩ kam Jeju na mehkwy kam, hōtpêPahpãm jarkwa to mehcakôc catêjê me, me cumãampo to hahkre catêjê

te xïc atajê japyrê te hajÿr he: Parnap me, Ximãw japyrê krut te Tycre me, Rutikwÿj pê Xirencatêjê nõ ata me, Manem, por pê me hõ pahhi Heroticape na amji to ajpa ata me, Xawrô. Atajê pê ri me cumãampo to hahkre catêjê. ²Mã amcro nõ na, Pahpãm pê Pahhiti to ame amji kampa, ne ame cumã ihcakôc xà caxuw ame ajcri, ne nee amehàpàn nare. Mã PahpãmCarô Pejti te me cumã:

— Me imã Parnap me Xawrô ta. Ampo na? Wa ramã ite me hàpên xà nõcaxuw amji mã me capi — hajÿr.

³Mã cormã me ipijacri xà ata kam, cute Pahpãm mã meParnap me Xawrô na mehçakôc, jirô pê mã ri cute me ahna hũ xir, nemehçajrën jirô pê, ma cute mehkujahêc.

Pê Xawrô me Parnap Xipre jô pjê kam ame mõ

Me Hàpên Xà 8.9-24

⁴Mã Pahpãm Carô Pejti te Parnap me Xawrô kujahêc, mã ma Xeruxij jô krí wÿr me tẽ, ne curia ri cute me pàr kre pro, ne ma me tẽ, Xipre jô pjê pê cô jipôc ri pjê ata wÿr, ne me cator. ⁵Ne krí japyrê te Cõjarô jô krí mã me cator, ne cute Pahpãmjarkwa to mehçakôc kam mehtêm, Juta catêjê te cuprônxa kam. Pê hanea ne Jowãw Macô apu mehkôt mõ, cutemehtehçajpar, ne me Jeju pê me pahkritxwÿ jarên xà impejti incràn prãmte.

⁶Ne ma cô jipôc ri pjê ata wÿr me irêr, ne haneane ma krí japyrê te Papo ata mã me cator. Mã Papo jô krí ata kam hũmre jũxy xi japyrê te Parjeju ata ihkrí. Ne Crec jarkwa na çaj ata japyrê pê Erima. Ne cupêJuta catêjê nõa ne ihkêanre, ne ajco ihkrí ne mehçunea mã ihhêj. Pê ajco me cumã ihhêj to:

— Ipê me amã Pahpãm jarkwa to icakôc catê — hane. ⁷Ne cupê pjê ata jô pahhi jô ikwÿ nõ. Mã pjê jôpahhi ata japyrê te Xerjô, ne cupê hũmre krã kreti. Ne cute Parnap me Xawrô na hàhwÿr, cute Pahpãm jarkwana hũpar prãmte.

⁸Mã hũxy xi ata ma apu Jejujarkwa na memprar catêjê caca. Ne ihtÿj cumã pahhi ata te Jeju jarên xà ata caca na to prãm. Mår quê nee pjê jô pahhi ata to amji me ihhimpej nare. ⁹Pê Xawrô japyrê nõ pê Pawrô, ne kam Pahpãm Carô Pejti te hipu tu, mã cute Erima ata pupun tÿjti, ¹⁰ne cumã:

— Apê me pahçurê xwÿn pê Xatanaj kra. Ne apê ampopejti to kên catê, ne akêan to akên, ne ampeaj kam ahêj xi. Ampo na? Apê ampo pejti kèhkên catê, na ca gõtpe Pahpãm caca xà impejti to kên to apa. ¹¹Na quê ha ita caxuw ato hy. Ca ha ato tũmpyrentu, ne ato tũm ita na jũ mã ana amcro, ca ha cormã hipêr pytpupu — hane. Mã hũxy xi ita te amji çajpêr pyrentu, mãramã into kam awcapàtkô to mõ, mã cute amji jacjên kamihtêm, ne ame hapê hàpên to mõ, jũm te hũhkra naipyr ne apu to mõr prãmte.

¹²Mã pjê jô pahhi te ita pupun, ne ihtÿj ampeaj kamcaxwãm catia mã Pahpãm jarkwa par, ne amji mã to ihhimpej. Ne amji mã ipikrar, ne jÿ ne amji mã:

— Ampeaj kam Jeju jûjarën xà pihho ne impejti pit, na wa ha itÿj ita caxuw Jeju to amji mã ihhimpej — hane.

Pê Pawrô Pixitij jô pjê kam apu mō

Me Hàpên Xà 15.38

¹³Mã Pawrô me, me mōr catêjê me, pâr kre mã mehâr, ne ma Papo pîn, krî nõjapry te Pjêjôti ita me, Panpir jô pjê wÿr me tē, ne me cator. Mã Jowâw Macô te mehhyr ne ma hacpy mã amjijaxâr, Kripinkrên wÿr. ¹⁴Mã ma ihtÿj mehtēm kam cute me to incrà tu, Pjêjôti jô krî pîn, ne ma Antijoc jô krî wÿr, Pixitij jô pjê wÿr meator. Ne jû mã amcro mã, mehkôt xà pê xap jô amcro na, ma Juta catêjê te cuprôn xà wÿr me mō, ne me hâr, ne me hÿr. ¹⁵Mã mam jūm ita te menquetti Mojxe jô kàhhôcahyt, ne ihkôt cute me Pahpãm jarkwa na mehcaôc catêjêjô kàhhôc cahyt. Jirô pê mã ri, cute me cuprôn xàjô pahhi kwÿ te me hûjarën na me mēn, ne me cumã:

— Hã, me ikwÿ, xà hōtpê me amã ampo pejti jarën xà? Gapacta ne me imã harē, wa me awpa ne me ijakry — hajÿr.

Pê Pawrô ame cumã Jeju jarē

¹⁶Mã Pawrô xãm ne cute hūhkra to mehcuhhêc, neihcaôc kam to ihtēm ne me cumã:

— Ýhÿ, me apê Ixaher catêjê pê Juta catêjê me, me apê mehcahkrit atajê me, pjê nõ rūm me acator atajê me, me amã Pahpãm kîn catêjê atajê, me ikampa. ¹⁷Ýhÿ, pê Pahpãm amji mã me papê Ixaher catêjêcapi. Ne hanea ne amji mã me panquêtjê me, me pampupxwÿjêcapi, ne me to ipicamēn to mō. Pê Ejit jô pjê kammehkrî, pê me to ipicamēn to mō catia to cati. Jirô pê mã pê ihtÿj Pahpãm carôat kôtEjit jô pjê pîn me to cuto. Ne ma me to mō, pjê impejtijapry te Cana jô pjê ata wÿr. Pê nee pry kôt me Pahpãm par nare, ne ame to kên. ¹⁸Pê Pahpãm pôti kam hamreare ata kam me cumã hūcanâr to caku to cwarēnta. ¹⁹Jirô pê mã pê Pahpãm Canãn jô pjê kam krîxàre te xet atajê to acto, ne me hipej tu. Hamre, pê me panquêtjê mã pjê ata jahkre. Ne cute me cumã hahkre jirô pê mã ri me ahna caku te cwatxēnta ne ihkôt xīncwēnta mã cormã cute me cumã hōr.

²⁰— Pê Pahpãm ajco me cumã me to ihhimpejcatêjê pyxwÿr to mō, ne ahnaXamer pê mam Pahpãmjarkwa to ihcaôc catê ata jô amcro kam to ahtwÿ. ²¹Pê me hō pahhi cati na me Pahpãm wÿ. PêPahpãm Xawrô xwÿ pê Quiti kra, pê Pēnjamî tàmwxÿ tàmwxÿ nõ to me cumã me hō pahhi cati na hãm, pê ihhimpej to caku to cwarēnta. ²²Jirô pê mã pê Xawrô nee

Pahpãmpar kam to incrà nare, cwÿrjapê pê pahhi tête me camê, ne haxà kam Tawi xãm, mehõ pahhi cati na. Pê ampeaj kam Pahpãm mã Tawi kîn. Na pê ramã harên to hane he: “Ûhÿ, Tawi pê Jexê kra ata, ito pit mã amji kam hapac to ipa. Ne ite ampo na prãm atajê to pit mã hàpên to ipa” hane.

²³— Pê rÿ pëa mã ramã Pahpãm jùm te me pahkên pê me pahpytâr catê ata to awjahkre. Ne Jeju pê Tawi tàmwxwÿ tàmwxwÿ nõa ata to pê me pamã awjahkre. ²⁴Ne pê Jeju cator xwÿjrea na mamJowãw cato. Ne ame hapackre to mõi. Ne Juta catêjêmã harê, ne me cumã: “Me akên itajê jicu. Ne me apejto pit mã me amji kampa, wa ha cô kam meacumrã” hane. ²⁵Ne ramã cute hàpên xà jipêj xaa kam, pê me cumã harên to hane he: “Ûhÿ, me ipupu, he nee ipê jùm to cute me hÿjahkre ata nare. Quê ha cormã ikõt hapu na jùm ata cato. Necupê me pahkên pê me pahpytâr catê, ne impeaj to impej. Ne taa mã ri quêt ijirõa pê cati. Ne cumã amji jahkre pej catia to cati. Neijirõa pê cumã hahkre pej catia to cati, ne ihkînte icrire, ne ikêanre. Na ri hàpên xà impejti itajê kam ipahàm pit” hane.

²⁶— Ne me papê Aprãw tàmwxwÿ tàmwxwÿ me, me cupê mehcahkrit te ihtÿj catyt kam Pahpãm kõt me ipa atajê mã ri, hanea ne harkwa hyr xà ita. Ne Pahpãm te me pahwÿr harkwa kujahêc, mâr cu me kampa ne me pahcuneame pahkên pê me pahcato. ²⁷Ne Krîpinkrên kam ame ipa atajê me, mecupê pahhi catêjê me, me cupê Jeju pê me pahkên pê me pahpytâr catê na hahkre kêatre. Ne hõtpê hãn neme ikõt xà jõ amcro kam me cuprõ, ne mehkrî nemehkàhhôc cahyt. Ne pê Pahpãm jarkwa na mehcahôc catêjêramã Jeju na mehhôc. Cakrõ, mã me cahyt catêjê atajê pê impar pej jahkre kêatre, ne me cupê Jeju pêPahpãm kra na hahkre kêatre. Mã Jeju curan xà jõ amcro kam, mam ihkàhhôc te to hÿjarên xà atajêa na cute me ton. ²⁸Pê nee Jeju ihkên xà nõ ton nare. Pê ahnaa mepro ne pahhi Pirat mã me cugõ. Ne pê hÿ na ame amji to prãm, na pê ame kam incryc. Ne cute mehcuran prãmte me ahna me Pirat wÿ. ²⁹Ne cute me Jeju curan ita na, pê Pahpãm jarkwa namehcahôc catêjê rÿ pëa mã ramã mehhôc. Mã ihcuran xàjirõ pê cute mehtyc caxàr, pÿ pê, ne ma hÿ to me mõi. Ne cute kên kre caxwãm pê me hir. ³⁰Mã Pahpãm te hacpÿa mã hipêr Jeju to ihtîr. ³¹Mã Jeju kõt me ipacatêjê Hîpõjajo jõ pjê rÿm, ihkõt Krîpinkrên wÿrme mõi atajê wÿr hapõj jàhtõa, amcro jàhtõa kam. Mã cute me hõmpun atajê ri ihtÿj ameharên to me ipa.

³²— Jirõ pê mã wa ite me amãijÿjarên xà pejti ita jarên prãmte, ita caxuw ita ri ame ipa. ³³Pê rÿ pëa mã Pahpãm ramã me panquêtjêmã, hacpÿa mã cute Jeju to ihtîr to ihcahôc. Na ri cormã cute me pamã ita ton. Na pê Tawi xwÿ Pahpãm jarkwa kõt ihhôc, pêPahpãm Jeju mã hane he, ne cumã:

“Ûhÿ, apê ikraa to ikra” hane.

³⁴— Pê Ixaj xwỳ hanea ne Pahpãm jarkwa na, Jeju jĩ cormã ihcacu nare kam, hacpỹa mã to ihtĩr xà naharẽ, ne harẽn to:

“Wa ha itỳj acũmpej, ne amã ampopěj cunea gõ.
Pom pê wa Tawi mã to awjahkre atajê, wa ha amã cugõ” hane.

³⁵— Na pê Tawi xwỳ hanea ne Jeju na Pahpãm mã harkwa to hane he:

“Jũ wỳr ca ha amã hàpên catê impejti to tojnõ, quêha ty ne hĩ ihcacu” hane.

³⁶— Mã hõ amcro ata na Tawi tePahpãm te ahna mẽn xà ata cunea ton. Ne pê ty, pêménquêtjê capea na me harêt, pê hĩ ihcacu. ³⁷Ne pê Jeju ajtea mã. Ampo na? Pê Pahpãmhipêr to ihtĩr, na pê hĩ nee ihcacu nare. Ne ihkĩnte Tawi jĩ pê ihtỳj ihcacu.

³⁸⁻³⁹— Ne ita caxuw ca ha me ipar peaj ne. He Jeju pê ri me pahkên pê me pahpytâr catê. Ne por pê me panquêtti Mojxe me pamã incacaxà kujate ata, hõtpê impej. Ne jũ wỳr quê Pahpãm te me pahkên ton jicu na to. Ne cu ha me pahnõ me pahkên mã hikra, ne Jeju wỳr apkjê, ne to amji mã me pahhimpej, quê ha ihtỳj quêt me pahte to kên ata to tojnõ ne hicu. ⁴⁰Ne me amji mã hamãa ne, ne me awpa, cõt mã ihhêaj to jũ caxuw me akam ampo kên catia cato, nãmri pê ramãPahpãm jarkwa na mehcahôc catêjê ita na mehhôc, pêmehhôc to hane he:

⁴¹ “Hã, me hàwxũn xi catêjê atajê me, por caPahpãm jarkwa to ame acakôc kêanre atajê, ca ha atỳj jũ caxuw me amjimã ajkra ne me ahi. Ampo na?

He wa ha apu gõ amcro kam ampo pej catia ne to ata, quê ha jũm cati na me amã harẽ, ca ha nee mempar ne amji mã me to hajỹr nare. Na ca ha atỳj me ahi” — hane.

Ne cute me cumã hũjarẽn jicu.

Pe me hàhtôa ne Pawrô jarkwa kôt Pahpãm wỳr me apkjê

⁴²Ne ma Pawrô me Parnap me cator, cuprôn xà pê, mã cute me cumãn, quê hacpỹa ne me mõi, xap nõ na, ne hipêr me hũjarẽn xà atajêa to me awjarẽ. ⁴³Ne cute me cuprôn jirô pê, Juta catêjê jãhtôa me, hanea ne mehcahkrit catêjê te amji to me Juta catêjê, ne ma cute mePawrô me Parnap pynâr. Mã Pawrô me Parnap me cumã ihcahôc, ne cute amji to mehtỳj na me cumã awjahkre, quê Pahpãm jarkwa kôtka me to incrã.

⁴⁴Ne xap na, krĩ kôt mehcunea te me cuprôn, cute me Pahpãm jarkwa par prãmte. ⁴⁵Mã Juta catêjê atajê kwỳ te me hàhtôa pupun, ne Pawrô na

mehkwỳ jũ na ame amji to prãm. Mã Pawrô jarkwa ata na cutemehcakôc kam mehtëm, ne me hũn kam mehtëm.

⁴⁶Mã Pawrô me Parnap te me cumã ihcakôc to tỳaj kam, me cumã hũjarên to:

— Quêt me ca, pê mam Pahpãm meapê Juta catêjê mã harkwa ta. Ca ajte ma apumehcaca, ne ahêj ne ma ame Pahpãm te meakên pê me ato hapôj na mehcaca. Ne ahêj ne ma ame Pahpãm te amji kamhapac xà intuw pejti ita caca. Na wa ha ita caxuw me gicu, ne mehcahkrit atajê mã, wa ha awjarê. Pê Pahpãm me imã harkwa hyr to:

⁴⁷“Wa ate me mehcahkrit atajê mã, pjê cunea kam gâhcujro xà na, ite me apyxwỳr.

Mãr quê mehcunea ipê mehkên pê me hütàr catê na me ijahkre pej” — hane.

⁴⁸Mã mehcahkrit atajê te me itapar, ne ame hakry ne me amji mã Pahpãm jarkwa cupa, ne me amji mã:

— Ampeaj kam Pahpãm jũjarên xà impej — hajỳr. Ne cuteamji to me Jeju na mehkwy. Pê me Pahpãm cute amji mã me to ihhimpej xà caxuw amji mã me capi atajê cunea te meamji kam hapac xà intuw mã me hàr.

⁴⁹Mã Pahhiti pê Jeju jarkwa pjê ata cunea kam ihcahkũm. ⁵⁰Mã Juta catêjê cormã Pawrô kwỳ jũ na amekam mencryc, cwỳrjapê ri cute me krĩ jô pahhi catêjê me, pyjê cati mã Pahpãm kĩn atajê rêc. Mã hanea neJuta catêjê kôat pyjê atajê ma ame Pawrô meParnap curê. Ne ma cute mehkujahêc, pjê nõ wỳr. ⁵¹Mã Pawrô me Parnap te mehpar tête pro jacrô capĩr, cute me hõmpun prãmte. Ampo na? Nee cute mempar nare na ri, ne me cumã:

— Hã, gapacta ne me hane, ne ca ihnõ na me, ca ha gõtpe amcro nõ na, jũ caxuw me akên mã axà ne mehõmpu, wa ha nee meatehcajpar nare. Ampo na? Ramã ite me amã harên — hane. Ne ma krĩ japyr te Ampokrekà jô krĩ ata wỳr me mō. ⁵²Mã ampeaj kam Jeju na mehkwy jakry, mã Pahpãm Carô Pejti te me cumã me carôt to hipu tu.

Pê Pawrô me Parnap Ampokrekà jô krĩ kam ame mō

14 ¹Ne Ampokrekà jô krĩ kam cute me hajỳar. Pawrô me, Parnap Jutacatêjê te me cuprôn xà mã me hàr, ne cuteme cumã Pahpãm jarkwa jarên. Mã me cupê Juta catêjê jàhtôa me, mehcahkritatajê me, cute ihtỳj mempar, ne me hũpar xà atakôt cute me hũnãr. ²Mã me cupê Juta catêjê kwỳa te mempar nare atajê te Jeju jarkwa na memprar catêjêkam mencryc prãmte, cute mehcahkritatajê rêc. ³Mã Jeju jarkwa na memprar catêjê amcro jàhtôa kam mehàhhuc, Ampokrekà jô krĩ kam, ne cute me hũcanãar kam Jeju pê Pahhitito me hũjarên. Mã Pahpãm te me cumã carôt

jõr, cute me to hàpên xà pejti pihhoti ton xà caxuw. Mã mehçakôac to me ampopejti ton to me ipa. Mã me hàhtôa ne cute me hàpên xà ata pupun, ne me hahkre pej pyrentu, me hūjarên to meawjarê ata kôt, nāmri ampeaj kam ri Jeju pê Pahhiti. ⁴Ne krī kam mehkri atajê te mencwyrjapê amji to meipicapôn. Ne mehkwy Jejujarkwa na cumã memprar catêjê rûm me hàhhuc, ne mehcahur Jutacatêjê rûm me hàhhuc.

⁵Mã mehcahkrit kwý me, me cupêJuta catêjê kwý me, me hõ pahhi kwý mea mã, cute me Jeju jarkwa na memprar catêjê to amehkên, ne cute kên to me hipej prãmte, cute ahna me ajpên par. ⁶Mã Pawrô me Parnap te ramã me hahkre pej, cwyrjapê ri ma me cator, ne ma Ritij jõ krī me, Terpe jõ krī wýr me tẽ. Ne maRopçahac jõ pjê kam, krī atajê wýr me tẽ. ⁷Ne krī ajpên na pire mã apu ihcuhhê atajê kôtcute me cumã Jeju pê me pahkritxwý jarên xà impejti jarên.

Pê Ritij jõ krī me Terpe jõ krī kam ame mõ

Me Hàpên Xà 3.1-10

⁸Ne Ritij jõ krī ata kam, pê hūmre par me ihpar kôn te xwý ita ihkrī. Pê xwý ita naihpým, na pê jũ caxuw hãm ne apu mõr nare. ⁹Ne hūmre ita te Pawrô cakôc xà na impar, mã cutehõmpun, ne ramã cute ihtýj Jeju to amji mã ihhimpej na hahkre pej, ne ihtýj hanea ne Pahpãm te caprâr na cute amji mã to hajýrna hahkre pej pyrentu. ¹⁰Cwyrjapê ri Pawrô te hõmpun týtji, ne kýj cati pêa mã cumã:

— To xa! Ne axãm pej! — hajýr. Mã hūmre ita toj nehãm, ne cute mõr na ipyr pyrentu, ne ma mõ.

¹¹Mã mehçunea te me Pawrô carôt kôt hàpên xà pihhoti ton ita pupun, neme harkwa to ajpên mã me carâr kam mehtêm:

— Me pajõ pahpãm pê Jupiter me Mecurij te mehĩa na amji ton, ne cõjkwa pĩn me cator! Por cu hõtpê me kampa atajê te ri mehĩa na me amji ton, ne cõjkwa pĩn me cator! — hajýr. Pêihtýj ame caxêti japyrý te Jupiter me Mecurij atapê Pahpãm na amehcãmji neahna ihkaj na. Ampo na? Nee me cupê Pahpãm nare, me cupême hūmre pit.

¹²Mã cute me Parnap mã haprý to Jupiter, ne haneane me Pawrô mã haprý to Mecurij. Ampo na? Pawrô pêihcakôc catê na ri. ¹³Ne pahpãm çahac pê Jupiter to me amji kamhapac xà jũrkwa ata ihcuhhê, krī cati jõ kwýc jarkwamã. Cwyrjapê ri Jupiter jũrkwa jamãr catêata, pryti me pĩrã te ihkrãhkà to mõ, krī cati jõkwýc jarkwa wýr. Mã mehkwy te me cumã pryti curan, cute me Jupiter mã to caxâr prãmte. Mã cute mencaca xà na me amji toan xà napahpãm çahac te amehkĩn prãmte, pê ajco ame ita to.

¹⁴Mã Jeju jarkwa na memprar catêjê te ihtýj me cupêa Pahpãm na amehcãmjĩna cute me hahkre pej, ne me cumã ahna ihkĩnnare, mã ma ita na amehçaca. Cwyrjapê ri cute amehkãcokjêr, ne ma me ipichur ne me cumã me hàr, ne me cumãcarâr to mõ, ne me cumã:

¹⁵— Ampo na mã ca ame hane? He hanea ne ipê me apyràac, ne ipê mehĩa wa. Wa ita ri ame amã Jeju jarên xàimpejti jarê. Ca ampo kên itajê mã me hikra. Ampona? He ampo itajê nee ampo caxuw impej nare. Na ca ha hacpỹa mã Pahpãm tĩar wỳr me amjijaxà. Taa mã pê quêt còjkwa me pjêto. Ne taa mã pê còxwa to, ne kam ampo cunea to. ¹⁶He pê mam amcro ata na, Pahpãm mehcunea to tojnõ, pê amjia kôt, mencaca xàa kôt ame ipa. ¹⁷Ne hõtpê Pahpãm me pamã ampo pejti gõ, pahteimpej na me hahkre pej prãmte. Ne taa mã ri hõtpê còjkwa pĩn ta kujate, ampo tuw to picamên xà caxuw. Ne taa mã ri ampo tuwjõ amcro kam to, ne amcro ata na me pamã me pajõ intuwgõ, ne hanea ne taa me pamã me pajakrygõ — hane.

¹⁸Ne cormã me cumã ihcakôc kwỳa kam, mã cute ajmãr me cumã me pryticuran ne me to caxàr.

¹⁹Jirõ pê mã ri Juta catêjê kwỳcator, Antijoc jõ krĩ me, Ampokrekà jõ krĩpĩn. Mã me hàhtõa ne me cumã hàr, nemehcunea te me Pawrõ me Parnap kam me hàhtõato me hàhtõ atajê incryc name ton. Mã ame kam mencrycne cute kên to me Pawrõ cuppàt, ne ihtỳj ihtyc naamehcãmji, ne krĩ pê me to cator prãmte me cupjê. ²⁰Mã Jeju na mehkwy te me ahna cuprõn, ne me ahna meipixêr, mã hacpỹa mã hãm ne ma hipêr krĩ ata mã hàr. Ne apê mã ma Pawrõ me Parnap, Terpe jõ krĩ wỳr me mõ.

Pê Antijoc jõ krĩ wỳr me amji jaxà

1 Timot 3.10-11

²¹Ne cute Terpe jõ krĩ kam me Jeju pê me pahkritxwỳ jarên xà impejti to me harên, cwỳrjapê ri me hàhtõa te amji to me Jeju na mehkwy. Jirõ pê mã ri cute me amji jaxàr, Ritij jõ krĩ me, Ampokrekà jõ krĩme, Antijoc jõ krĩ me, Pixitij jõ pjê wỳr. ²²Ne cute Jeju na mehkwy te me hũcanãr to me hapackre, mãr quê Jeju te amji kam hapac xà na me amji to ihtỳj tu, ne me cumã harên to:

— Cu ha pahtỳj me ampo kên jakren partu, necormã Pahpãm himpej xà ata ri me axà — hane. ²³Ne krĩ jàhtõa kam Jeju na mehkwy mehkri. Na ri Jeju jarkwa na memprar catêjê ma hãn ne krĩ atajê wỳr me pra, ne me cumã mehkwy to mehhimpej catêjê pyxwỳr to me ipa. Ne ahpỹanre na Jeju namehkwy kam hãn ne me capi, ne me to mehhimpej catêjê na me hũxwỳ. Ne cute me ipijacria kam Pahpãm mã mehcakôc ne cumã me hõ pahhi catêjê cajrên to:

— Ýhỹ me ijõ Inxũ, me hũmre itajê ihtỳj me akam hapac to kênre nare, na ca ha mehteheajpa, mãr quê me akwỳ jamãr toimpeaj ne — hane.

²⁴Ne Pawrõ me Parnap te hacpỹ mã amji prya kôt me amji jaxàr, ne krĩ atajêa kôt me hapõj to mõ, ne mehkwy mã cute to mehhimpej catêjê pyxwỳr to mõ ita kam Pixitij jõ pjê na me irêr, ne ma Panpir jõ pjê mã me cator. ²⁵⁻²⁶Ne ma Pjêjõti jõ krĩ mã me cator, ne cute me cumã Jeju pê me

pahkritxwỳ jarĕn xà impejti to harĕn. Jirô pê mã ri ma Ataraj jô krĩ wỳr me pra, ne cô cape na krĩ ata mã me cator. Ne curia pàr kre mã me hàr, ne ma hacpỹ mã Antijoc jô krĩ wỳr me tĕ, ne me cator, cute me hàpĕn xàjipĕj jirô pê mã.

²⁷Mã Jeju na mehkwy te me amji tocuprôn. Mã Pawrô me Parnap te, Pahpãm te me cumã carôt jôr, mã cute me to hàpĕn xà pejti pihho ton na, mehkwy mã amji jarĕn. Ne hanea ne cute Pahpãm te mecumã pry jihĕ mĕn, mãr quĕ hanea nemehcahkrit atajĕ me Jeju to amji mã mehhimpej na, me cumã amji jarĕn. Necute me hàhtôa te Jeju na mehkwy na amji ton na me cumã harĕn. ²⁸Ne curi cute me ahna amji to me amcro jàhtôa.

Pê Krĩpinkrĕn kam me cuprôn

Carati 2.1-5; 5.1-6

15 ¹Yhỹ, Juta jô pjĕ rũm, jũmjĕ xũmre itajĕ cator, ne ma Antijoc jô krĩ kam me cator. Ne apu Jeju na mehkwy mã ampo to hahkre to me ipa, ne nee me cumã ampo pej to hahkre nare. Ne cute me cumã to hahkre to hajỹr he:

— Ca ha me acahkrit atajĕ acunea atỳj me, pom pê Mojxe xwỳ me pamã ton to hahkre itajĕ to, ne atỳj me apy kã kryjre ne me hirĕ. Nãmri ca haate me to hajỹr nare na, quĕ ha Pahpãm nee meakĕn pê me apytàr nare — hajỹr.

²Mã Pawrô me Parnap te mehcahôc xà atajĕ na mempar to hajỹr. Ne mecupĕ ahna ihkĕanre. Na ri Pawrô te me cumã harĕn, ne mecumã:

— Hãpã! Nee cute ahna hajỹr nare — hane. Ne amjicaprỹ to ame cumã mehcahôc. Mã ma ame Pawrô meParnap par caca. Mã Jeju na mehkwy te me ita to amji kam hapac, ne ma jũmjĕ atajĕ to, cute me Pawrô me Parnap kujahĕc, Krĩpinkrĕn wỳr. Ne curia quĕ ha Jeju jarkwa na memprar catĕjĕ me, mehkwy to mehhimpej catĕjĕ atajĕ jũmjĕ atajĕ na me awcapi, ne me hahkre pej to jũ mã me, ne hacpỹa ne Antijoc jô krĩ wỳr me cumãharĕn kujate.

³Ne Pawrô na mehkwy ma Antijoc jô krĩ pĩn me cator, ne cute me Kuhkũmtyc jô pjĕ jakren, ne me Krĩrĩtpej jô pjĕ jakren, ne ma Krĩpinkrĕn wỳr me môr kam mençrà tu. Ne cute pry na Jeju na mehkwy cunea mã, me cupĕ mehcahkrit atajĕ te hanea ne amji to me Jejuna mehkwy mã harĕn. Mã Jeju na mehkwy cunea me hũparxà ata kôt ame hakry. ⁴Ne Krĩpinkrĕn mã me cator, mã Jeju na mehkwy me, Jeju jarkwa na memprar catĕjĕ me, mehkwy to mehhimpej catĕjĕ cunea ame hakry. Ampo na? Cute me hõmpun na ri ame hakry. Mã Pawrô me, Parnap te Pahpãm te hàpĕn xà catia na mehtehcajpar kĕnre nare na me cumã me amji jarĕn.

⁵Mã Jeju na mehkwy kwỳ pê Parixĕw catĕjĕkwỳ atajĕ te me Pawrô me Parnap cakôc xà impar, ne me hãm ne me xa, neme cumã mehcahôc, ne me cumã:

— Ỹhỹ, mehcahkrit atajê, por nee me cupê Juta catêjê nare atajê, quê ha Jeju to amji mã mehhimpej ne amji to ahnamehkwy, ca me cumã, quê mepy kâkryjre ne me hitep. Ne hanea ne, hõtpê me Mojxe xwy jõ kâhhôc kammencaca xà kampa, ne ihkôat me ipa — hane.

⁶Mã mehkwy to mehhimpej catêjê cunea me, Jeju jarkwa na memprar catêjê me, cute ita na me ajpên par prãnte me cuprôn. ⁷Ne cute amji mã mehcahôc to me urya to me ury, jirô pê mã ri Petrô xãm ne me cumã:

— Ỹhỹ, me iquêtjê, ca me ipupu ne me ikampa, ne ramã me ate me gipôac ri Pahpãm te amji mã icapi, ne hâpên xà ita na imên na ate me ijahkre pej. Wa mehcahkrit atajê mã Jeju te amji kam hapac xà tuw pejti jarên to ipa. Mâr quê xwy mã mePahpãm pa, ne Jeju to amji mã mehhimpej. ⁸⁻⁹Ne Pahpãm mã ramã me pahcunea te amji kam mepajapac xà jahkre pej, ne cumã me papê Juta catêjêcaca xà cunea jahkre pej. NePahpãm mã hanea ne mehcahkrit atajêkîn. Ne cute me pamã Carô Pejti jôr xà atana ri hanea ne cute me cumã hõr. Ne neemã ajteare mã me nare, me Pahpãmmã me papipên pit. Mã hanea ne cute me Pahpãm to amji mã mehhimpej, na ri cute me to kên atajê to tojnõ ne hicy ne me ahna amji caxâr.

¹⁰— Ne mër ampo na mã ca ajtea mã ihnõ ita na ame ton to prãm? Xà ca atýj amji na me Pahpãm mên, quê me akamincryc to prãm to mã ca ame ita to hane? He pê cu nee me panquêtjê me, me pahcuneaMojxe xwy caca xà týtji jahkre kêatre ita cunea kôtajco me papa nare. Nõ na mã ca ajte curmã cute amji to me Jeju na mehkwy itajê mã ate ahna me garkwa? He ame hajýr nare. Nãmri nee Mojxe te me pajapackre xà kôt pahte me amji ton xà ata kôtri Pahpãm te me pahna amji caxâr nare.

¹¹He Jeju to pahte amji mã me pahhimpej xà kôt riquêt Pahpãm te me pahna amji caxâr. Ahna mã me hàr tuw catêjêpê mehcahkrit atajê to cute, ne mehkên pê me hûtârhe — hajýr.

¹²Mã mehcunea te me Petrô kam hapac, ne me ipinkrên. Mã Pawrô me Parnap te, Pahpãm te me cumã carôt jôr name cumã me amji jarên, ne ihcâôac to hâpên xà to mehcahkrit atajê jipôc ri hâpên to ipa. Na cute mehcunea mã amji jarên par. ¹³Mã ihkôt Tijac cakôc, ne mecumã:

— Ỹhỹ, me ikjêjê, me ikampa. ¹⁴Ximãw Petrô te curmã me pamãmam Pahpãm te amji mã mehcahkritatajê capi na harên par. Ampo na? He Pahpãm mã mehcunea kîn. Mã cute amji mã mehcahkritatajê kwý capi. ¹⁵Ne pê rý pêa mã Pahpãm jarkwa na mehhôc catêjêramã ita na mehhôc. Ne pê mehhôc to hane he:

¹⁶“ Ỹhỹ, pê rý pêa mã Tawi pê Ixaher catêjê jõpahhi.

Ne ihtyc jirô pê, pê hõ parxare ajcrà neahpýnre na ame pra.

Ne hõ parxare itajê pê ikre pyrâac.

Ne ame ipijaxwýr ne ame ipicrân.

Pê ramã Pahpãm me to hũjarên to:

‘Wa ha amcro nõ na hacpãa ne amji jaxà, ne pahhi pê Tawi jũrkwa pijaxwÿr ita to hacpãa mã impej ne hãm.

Ne itÿj hipêr me cumã me hõ Pahhiti nõ xãm.

¹⁷ Mår quê mehcahkritatajê hãn ne me iwÿ, ne ijĩkjê rũm me ahtwÿ, wa haitÿj me to ikra’ hane.

¹⁸ Ata pê mam Pahpãm rÿ pêa mã ramã harê”.

¹⁹ — Cwÿrjapê ri imã ite amji kam ijapac xàte hajÿr he. Cu nee mehcahkritatajê te mehkên jicu tète amehcahpêrkãrnare, quê ha Pahpãm jĩkjê rũm me hàhhuç prãm, cu ha nee intête amehcahpêrkãr prãmte me cumã Mojxe te me hapackre xà na me irên nare. ²⁰ Ne imãa, wa ha me cumã ampo te cwat peaj na ihhóc, ne ihkujate. Mår quê nee ame pahpãmcahãc krekà jõ atajê kur nare. Ne nee ame ampo jõkre kam caxwÿr mã caprô pijaxwÿr nare atajê jĩ kur nare. Ne nee ame ampo caprô kur nare. Ne mehprõa me, mempjêa me, ame amji pupu, ne nee amji pê amehprõ caxun nare. Hõhõ, ampo itajê wa ha me cumã harê. ²¹ Ampo na? He rÿ pêa mã pê me Mojxe jõ kãhhóc cahyt na me cupy, ne ame cahyt, ne cormã krĩ cunea kõt me cahyt. Ne mehkõt xà jõ amcro kam, cute mecuprõn xà kam, hãn ne ame hõ kãhhóc ita cahyt. Ne Juta catêjê mã cute ampo cawpa xà itajê ri, amji jirõa pê ihkêanre, ne ampeaj kam hũ na me pahpahãm cati. Na cu ha mehcahkrit atajê te curmã mepahkwÿ na me amji ton, ne me pamã hàr atajê mã ampo te cwat itajê pit jarê ne ihcawpa — hane.

Pê mehcahkrit mã ihkãhhóc to

Carati 5.1

²² Mã Jeju jarkwa na memprar catêjê me, mehwÿ to mehhimpej catêjê me, Jeju na mehwÿ cunea me, cute me jũmjê itajê capi, cute Antijoc jõ krĩ wÿr Pawrô me Parnap kõt mehkujahêc prãmte. Ne cute me Juta Parxap capi, ne hanea ne mehnõ japrÿ te Xira ita capi. Mã me hũmre atajê pê mempejti, mã Jeju na mehwÿ cunea mã me hũpa. ²³ Mã Jeju na mehwÿ te me ampo cawpa xà atajê na me cumã ihkãhhóc ita ton, ne ihkãhhóc ata me ajkaam mehkujahêc. Ne ihkãhhóc ata te hajÿr he:

“ÿhÿ, me ipê Jeju jarkwa na memprar catêjê me, meipê mehwÿ to ihhimpej catêjê me, me ipê me akjêjê me, wa ite me amã ihhóc.

Hàpà, Jeju kam me ikjêjê pê mehcahkritatajê, por ca Antijoc jõ krĩ kam me amji to me ajpaatajê me, Xiri jõ pjê me, Quiriti jõ pjê kam me apa atajê.

²⁴ He me pahkwÿa kwÿ ri amjia kõt me awÿr me pra, ne ihtÿj ihhêj neharkwa to ame acahpêrkãr to me ipa, ne cute me Mojxe xwÿ te me hapackre xà name amên na, ihtÿj imã me hahkre pej.

Ne nee waite me cumã mencaca xà ita ton na ijũjahkre nare, mã amjia kôt cute mencaca xà ita ton.

²⁵ Na wa ite me cuprôn, ne me ajpẽn par, mã me icunea mã ahna ihkaj na.

Na wa ite me awÿr me jũm kujahêc prãmte me pahkwÿa kamme jũmjê itajê capi, ne wa ha ma me awÿr mehkujate, meikjêjê pê Parnap me Pawrô me.

Ne Pawrô me Parnap ita pê me ikwÿ impeaj.

²⁶ Ne Pahpãm jâpên xàa kam mehkên me, mehtyc xà jipôac ri me ipa.

²⁷ Na wa ha me awÿr Juta me Xira kujate, quê ha taa me amã, pom wa ampo na ite me amã ihhêc itajê kôt harên pa.

²⁸ Ne ite Pahpãm Carô Pejti me, me ajpẽn par.

Na wa ha nee me amã me ijarkwa hyr catihti nare.

Ne nee wa ha Mojxe xwÿ te me hapackre xà cuneana me amên nare.

Wa ha me amã me icaca xà kênre ata naprãm, ca ha me ton to me apa. Neampo cawpa xà te cwat itajê to pit mã wa ha me amã icakôc.

Na ca ha me hane he.

²⁹ Ca ha nee ame pahpãm cahêc krekà jô atajê kurnare, ne nee ame ampo jôkre kam caxwÿr, mã caprô pijaxwÿr nare atajê jĩ kur nare, ne nee ame ampo caprô kur nare.

Ne me aprôame, me apjêa me, ca ha ame amji pupu, ne nee amji pê ame aprô caxun nare.

Ne Juta catêjê mã ampo cawpa xà itajê amji jirôa pê ihkêanre, ne ampeaj kam hũ na me pahpahàm cati.

Na ca ha ate me akên itajê ton nare na, ca ha me apej mã me apÿm. Hamre, ita pit” hane.

³⁰ Ne ma cute mehkwy to mehhimpej catêjê pê Juta meXira ata kujahêc, mã ma me pra, Pawrô me Parnapkôt, Antijoc jô krĩ wÿr, ne curi me cator. Ne cute me Jeju na mehkwy to cuprôn, ne me cumã ihkâhhêc jôr. ³¹ Mã cute me cahyt, ne mempar, ne ame hakry, ne neeamehpec nare. Ampo na? Ihkâhhêc ita kam me harkwa pejti na ri. ³² Ne Juta me Xira pê ri Pahpãm jarkwa to mehcahôccatêjê, ne cute mehkjêjê pêJeju na mehkwy mã hũcanâr jôr prãm to, cute me cumã mehcahôc to irya to iry. ³³⁻³⁴ Jirô pê mã ri jũ mã cute me cahê na amji to me amcro ton. Mã Antijoc jô krĩ kam Jeju na mehkwy mehkri atajê me cumã:

— Ýhÿ, tahnaa ri impej. Ne gapacta ne hacpÿ mãme pra, hamre, ita pit — hane. Mã curia Xira mã me cahê na amji kĩn mã hàhhuc, mã Juta pyxit peaj ne cute amji jaxâr ne ma hacpÿ mã tẽ.

³⁵ Mã Pawrô me Parnap te me cahê na, jũ mã amji to amcro ton, Antijoc jô krĩ kam. Ne ihtÿj ajwar Jeju na mehkwy mea mã, amehcunea mã Jeju jarkwa to hahkre ne ame cumã harê.

³⁶Mã amcro nõ na Pawrô te Parnap mã:

— Hacu, ne krĩcunea kôt, me pahkjêjê pê Jeju na mehwý pupu, por ramã pahte me cumã pajõ Pahhiti jarkwa to mepahcakôc atajê kôt, mormõ ajkĩmehcunea impeaj — hajÿr.

³⁷Mã Parnap ihtÿj amji kôt Jowãw Macô to mör prãm. ³⁸Mã ma Pawrô apu mehkôt mör na ihcaca. Ampo na? Pê nee Panpir jõ pjê kam Macô mehkôt mör kam to incrà, ne cute kam Jeju jarên xà na mehtehcajpar nare na ri. ³⁹Na pê Pawrô me Parnap incwÿrjapêame ajpên mã, ne ma me ajcapô. Mã Parnap te Jowãw Macôjaprôr ne to mõ, ne pàr kre mã ne hàr, cô jipôc ripjê japrÿ te Xipre ata wÿr. ⁴⁰Jirô pê mã ri Pawrô te hanea ne amji mã Xira ita capi, mã Jeju na mehwý te Pahpãm mã Pawrô me Xiracajrên mã ma me mõ.

⁴¹Ne ma cute me Xiri jõ pjê jakren, ne me Quiriti jõ pjê jakren, ne ma Jeju na mehwý mã me hakry me, me carôt ton to me mõ.

Pê Timot Pawrô me Xira pynã

Pirip 2.19-22; 1 Timot 1.1-2, 5

16 ¹Mã Pawrô me Xira Terpe jõ krĩ me, Ritij jõ krĩ mã me cator. Mã Ritij jõ krĩkam Jeju na mehwý nõ japrÿ te Timot ita ihkrĩ. Ne cupêJuta catêjê cahãj nõ kra, ne hũm pê ri Crec jõ pjê catêjê nõ, ne cupêmehcahkrit, ne nee cupê Juta catêjê nõ nare. ²Pê Ritij jõ krĩme, Ampokrekã jõ krĩ kam me cupê Jeju na mehwý amehkrĩ atajê cunea pê ajco Timot to mehcakôc to impejti. ³Mã Pawrô te mempar ne ma amji kôt to mör prãm. Mã krĩ ata kam Jutacatêjê mehkri atajê cunea te ramã meTimot me hũm pê Crec catêjê nõ na me hahkre pej. Pê nee cumã impy kã kwÿ hyr nare na me Timot kôtme harên to kėanre cupate, Pawrô te Juta catêjê caca xà kôt, cupê impy kã kwÿ hyr, ne ma haprôr ne to mõ. ⁴Mã krĩ atajê cunea kôt me hapôj to mõ, ne Jeju na mehwý mã me hũjarên to me mõ, por pê harkwa na memprar catêjê me, mehwý to mehhimpej catêjê Krĩpinkrên kam me ajpênpa, ne ahna mehhôc ne ahna me hapackre ata na, mãr quê me kampa, ne me hane. ⁵Ita na pê Jeju na mehwý ajco me Jeju te amji kam hapac xà kampa ne mehtÿj, ne ame hakry. Ne ajco amcrocunea kam me ipicamên to me ipa.

Trôwat jõ krĩ kam Pawrô pimtir xà

Roman 15.18-21

⁶Ne cute me Amcrati jõ pjê me, Carati jõ pjê jakren, ne ma Axij jõ pjê wÿr mehtêm prãm, mã ma Pahpãm Carô Pejti amehuwahi, quê nee Axij jõ pjê kam me Pahpãm jarkwa jarên nare. ⁷Ramã Pĩhpoti jõ pjê na me hàhtêp, ne ma Pitin jõ pjê wÿr me mör prãm, mã ma Pahpãm Carô Pejti ame huwahi, quê hanea ne neehÿrmã me mör nare. ⁸Mã cute me Pĩhpoti jõ pjê jakren, ne macô cahê na Trôwat jõ krĩ xaata wÿr me cator.

⁹Mã caxwa ata kam, Pawrô te ipimtir kam, Maxeton jô pjê jô xũmre nõ pupun, mã xa ne ahna hàhwÿr to:

— Ajpên Maxeton jô pjê wÿr mō, ne meitehcajpa — hane. ¹⁰Höhō, cute hũtir xà ata kôt Pahpãm te me ahnahàhwÿr na cute me hahkre pej pyrentu, na ri ma Maxeton jô pjê wÿr me mōr pyrentu to prãm. Ýhÿ, ipê Ruc wa ita ri Trôwat jô krĩ kam ite Pawrô me ajpên cajpar, ne ma me icunea me imōr xàita na me mō, ite meMaxeton jô pjê kam mehkrĩ catêjê mã Jeju pê me pahkritxwÿ jarên xà imejti itajê jarên prãmte.

Pirip jô krĩ kam Ritij pintuw xà

Pirip 1.1

¹¹Ne ma Trôwat jô krĩ pĩn pàr kre mã me ixàr, ne ma me icatàatre na cõ jipôc ri ahkrã jacot crã japyrÿ te Traxij jô pjê ata mã me icator. Ne amcro nõ na wa maKrĩhtuw mã me icator. ¹²Ne ma Pirip jô krĩ wÿr me mō, por mam ihkrãa ri xa ata wÿr, Maxeton jô pjê kam, ne Pirip jô krĩ ata pê ri Roman catêjêjô krĩ. Ne curia ite amji to me amcro kwÿ kujahêc.

¹³Ne mehkôt xà jô amcro na, wa ma krĩ pê me icator ne cõ wÿr mecupê Juta catêjê te cuprôn xà japên to me mō. Ne curi me icator, ne me ijÿr, ne ite me pyjê tecuprôn atajê mã me icakôc kam me itêm. ¹⁴Mã pyjê nõ pyxit te me ipar ata japyrÿ teRitij. Ne pê cupê Tijat jô krĩ catêjê nõ, ne cupêcupêhkã imejti to ihpore na hàhpan catê. Ne ampeajkam cumã Pahpãm kĩn, mã Pahpãm tePawrô jũjarên xà ata par na ihtehcajpar. Mã cute impar, mã hũrkwa kammehkrĩ atajê cunea te amji to me Jeju na mehkwy. Cwÿrjapê ri Pawrô te cõ kam mehcumrãr. ¹⁵Jirô pê mã ri Ritij te hũrkwa wÿr me ijator, ne me imã:

— Mêr höhō, ca ate amji mã me ito, ipê Pahpãm par catê na me ito hajÿr, cwÿrjapê ca ha ajpên me mō, ne ijũrkwa kam me ahtwÿ — hajÿr. Ne kypê me ijator nare. Cwÿrjapê wa hũrkwa kam me ijãhhuc.

Pê Pirip jô krĩ kam me hacjên xà kam me nõ

¹⁶Pê krĩ ata kam jũm cahãj ita ihkrĩ. Ne cahãj ita jĩ cunea kam me pahcurê xwÿn carō kên hipu tu. Pê ampo carō kên ajco cumãampo te cormã jũ mãn xà nare atajê jarê. Pê cahãjre ata ajco ihpore na me cumã to awjarê. Ne nee amji kôt apu ipa nare. Ne cuteto hō tekjê atajê mã apê, pê hàpên xà atajê jahpan xà na, me hũmre atajê ajco amji mã mehporê incwa. Ne amcro nõ na wa ma Pahpãm mã mehcahôcxã jũrkwa ata wÿr me mō. ¹⁷Mã cahãj ata te me ipynãr ne me ikôt carãrto mō. Ne cute carãr to hajÿr he:

— Pom me hũmre itajê pê Pahpãm me hirôa pê cati ata mã me hàpêncatêjê! Ne ihtÿj me amã ateme akên catia pê me amji pytãr xà ata jarê — hane.

¹⁸Ne cahãj cuprÿhti ata te me ijarên to hajÿr to amcro jãhtô. Mã Pawrô pêita na ihkaj na. Mã cahãj cuprÿhti ata wÿr ipipkjêr ne cute kam ampo carō kên ata mã:

— Hã, wa ha Jeju jarkwa kôt amã, ca cahãjita pê acato — hajÿr. Mã hamre, ampo carõ kên ita cupêcator pyrentu. Mã impej ne aracri hÿr pyrentu.

¹⁹Mã me to hõ tekjê catêjê te me cahãj ata pê mecarõ kên cator na me hõmpun, ne nee hipêr iriãt kam, cute ampo to hÿjarêñ nare na me hahkre pej, na quê ha nee hipêr hÿjarêñ xà kôt mehpro nã pyr nare. Cwÿrjapê ri ame Pawrô me Xira kammencryc. Ne cute mehpro, ne ma cà pê me to impejcatêjê me, me cupê krî jõ pahhi catêjê wÿr me cupjê. ²⁰Ne me to mõ, Roman catêjê pê mehcukij catêjê wÿr, ne cuteme cuna mã me hãm. Ne me cumã Pawrô me Xira jarêñ, neme cumã:

— Ýhÿ, me hÿmre itajê pê Juta catêjê kwÿ, necama me pajõ krîa kam ame pahcahpêrkâr to me ipa. Neajtea mã me pamã mehcakôc xà to hahkre to me ipa, neamji kôat me pahton to me ipa. ²¹Ne me papê Roman catêjê, mã nee mencaca xà ita naprãm nare — hane.

²²Mã me hàhtôa te me kam ihtêmprãmte me cuprõn, mã krî ata kam, cute mehcukij catêjê te Pawrô me Xira pêapu ihkà cokjêr, ne cute mehcahhyr na me mên. ²³Mã pihhê to amehcahhya to amehcahhy, mã mehkàj xà cati. Jirô pê mã ri cuteme hacjên xà mã me haxâr, ne cormã me ahna me hamâr catê mã harkwa hyr, quê me hamâr to impeaj ne. ²⁴Mã me hamâr catê te me hõ pahhijarkwa kôt me hacjên xà caxwãm pê, pî cote namehpar jacjên, ne ahna meto ipijapÿn, ne me ahna wakÿre te hihê xà to hihê, ne ma tẽ.

Pê Pawrô me Xira mehkàj xà cakrô ihtÿj me Pahpãm mã cre

²⁵Mã Pawrô me Xira curia mehkàj xàa na, awcapãtkô kam me nã ne me Pahpãm mã mehcakôc, ne cute Pahpãm na increr xà to me cumã increr. Mã me hacjên xà kam me hikwa atajê ahna mehkri ne ame kampa.

²⁶Mã ihprôt pê, pjê te hàhcujrõn kam ihtêm, mã me hacjên xà hanea ne ihtertet. Mã harkwa jihê xà itacunea te apu amji jihê rên. Ne hanea ne wakÿre te amehuwapre atajê cunea apu impãt, ne me cupê ipijaxwÿr.

²⁷Mã me hacjên xà jamâr catê pimprar, ne cuteharkwa jihê mên na hõmpun. Ne ihtÿjame hacjên catêjê cunea japôj na amehcãmji. Ne cute hõ pahhi cupate amjicaxuw hõ wapo xwahhihti caxâr, cute to amji curan prãmte. ²⁸Mã Pawrô te kÿj cati pëa mã cumã carâr to:

— Apu amji to hajÿr nare! Wa ne me ijapôj nare! Ne ita ricormã ame icunea me ikri! — hajÿr.

²⁹Mã me hacjên xà jamâr catê te hàhcujro xà na hàhwÿr ne hÿjarêan kam hâr, ne apu ihtertet ne Pawrô me Xira cuna mã ihkõn krã na hÿr.

³⁰Jirô pê mã, ma põ mã me to mõ, ne cute mehcukij to:

— Pÿhàpà, jü mã wa ha, ne ajte ikên catia ita jahpa? — hajÿr.

³¹Mã me cumã:

— Ca ha Jeju pê Pahhiti ata to amji mã me ahimpej, quê ha me akra mea mã me akên ita pê meapytà — hane.

³²Ne cute me cumã Pahpãm jarkwa jarën, ne hanea ne, por me hacjên xà jamãr catê jürkwa kam mehkrĩ atajêmã, cute me Pahpãm jarkwa jarën. ³³Mã caxwa ata kam me hacjên xà jamãr catê me to mō, ne cute me cumã mehcahhyr xà xwa kre cuhhôn, ne me cumã ihcahhê. Mã Pawrô me Xira te mehkra mea mã cô kam mehcumrãr, cute Jeju na mehkwy mã me hãr na me amji jarën prãnte. Hamre, mãme hacjên xà jamãr catê ata me, mehkra cunea te amji tome Jeju na mehkwy, na ri cô kam cute mehcumrãr pyrentu. ³⁴Ne ma cute Pawrô me Xira japrôr ne me to mō, hürkwa wÿr. Ne cute me cumã hō jôr, nemehkra mea mã ampeaj kam me hakry. Ampo na? Ita caxuw ihtÿj Jeju to amji mã mehhimpej na ri.

³⁵Mã apê, mã Roman catêjê pê mehcukij catêjê atajê te me hÿrmã me cumã me hãpên catêjê kujahêc, ne me cumã harkwa to:

— Me hÿmre atajê mã me hikra — hajÿr. ³⁶Mã me hacjên xà jamãr catê te Pawrô mã hÿjarën ne cumã:

— Roman catêjê te me amã hikran na me hÿjahkre. Cwÿrjapê ca ha me acato ne gapacta ne me mō — hajÿr.

³⁷Mã Pawrô pahhi kwÿ mã me hãpên catêjê atajê mã:

— Wa nee ite me ampo kên ton nare, ne hanea ne, me ipêRoman catêjê cacrô, mã ahnaa ajte me kam mare mã ameicahhy, ne me hacjên xà kam cute me ito hÿcapêr, nō namã ajte ita caxuw aracri me apimxuar pê me ikujahêcprãm? Ita na ihkaj na. Quê ha xaa mehcukij catêjêatajêa ajpên me mō, ne me taa me ikujate, wa ha cormã ma me mō — hane.

³⁸Mã pahhi mã hãpên catêjê atajê te mehcukij catêjê mã itajarën. Mã cute Pawrô me Xira pê Roman catêjêna me harën par, ne me hahkre pej, cwÿrjapê riampeaj kam me cumã me hÿpa. Ampona? He Roman catêjê te amji kam hapac xà na, quê nee me jÿm cukij nare kam, amehcahhyr nare. ³⁹Mã ma me hÿrmã me pra, ne cute mehwyr, quê cutemehcahhyr xà ata to me amji japackre nare, ne nee me kammencryc nare. Ne cute me hacjên xà pê ajwarme cator. Ne krĩ pê me cator xà na me ahna hãhwÿr. ⁴⁰Mã Pawrô me Xira me hacjên xà pê me cator, ne maRitij jürkwa wÿr me mō. Ne curia ri cute Jeju na mehkwy mã hakry carôt tÿjti ton, ne ma me mō.

Pê Texarôn jô krĩ kam ame ipa

1 Texarôn 1.1; 2.13-14; Ruc 23.1-2; Jowãw 19.12

17 ¹Ne cute Krĩpuhnacô jô krĩ jakren, ne ma me mō, ne hanea ne cute me Apôr jô krĩ jakren, ne ma Texarôn jô krĩ kam, Juta catêjê te cuprôn xà jürkwa ata wÿr me cator. ²Mã xap na, mehkôt xà jô amcro kam, ma Pawrôte, cute me amji pyrãc xà ata na, cute me cuprôn xà wÿr tẽ. Nemehkôt xà jô amcro incré atajê cunea kam, Pawrô cute me cuprôn xãwÿr pra. Ne cute me ajpên mã me Pahpãm jarkwa jarën to hapjêa to hapjê. ³Mã Pawrô te me cumã Jeju to hahkre, ne me cumã harën to:

— Ỹhỹ, rỳ pêa mã pê Pahpãm me panquêtjê mã, por cu me jũm jikaj ata, to awjahkre. Na quê ha jũcaxuw Crixtô ita cato, ne pahte me Pahpãm to kên atajê cunea to tojnô. Ne cuteme pahtehcajpar xà caxuw quê ha ihtỳj amji pupun xàkêanre to amji pupu, ne ihtỳj ty, ne hacpỹa mã ihtĩr. Hôhô, mâr wa ite me amã Jeju jarê ita pê ri quêt, por cu me jũm jikaj ata — hajỹr.

⁴Mã mehkwy te ihtỳj me Pawrô me Xira kam hapac, ne Jeju to amji mã mehhimpej, ne ahna mehkwy mã mehâr. Mã mehchakritpê Crec jô pjê catêjê atajê mã Pahpãmkin catêjê jàhtôa ne me cumã me hâr. Mã haneane krĩ kam pyjê jàm târ catiatajê jàhtôa ne me cumã me hâr. Mã Jeju na mehkwyquêt ihtỳj me ipicamên to me mô.

⁵Cwỳrjapê ri me hũ na ame amji to prãm, na ri Juta catêjê ame pra, ne krĩ cape na cute mehkên catêjê me, cute me xuwcaaca catêjê jàhtôa ne mehaprôr, por me cumã me hàpên prãm nareatajê mea mã. Mã jũmjê itajê te krĩ kamajpên caxuw me cumã mehkêanre ton xà caxuw me Pawrô me Xira pro. Ne me cuna mã me hãm jirô pê mã cutemehkên mã me mên prãmte cute mehpro. Me hàprêakam Jaxãw jũrkwa mã me hâr, ne ame Pawrô me Xira japê. ⁶Ne nee cute me cumã cator nare, ne cute ma me Jaxãw me, Jeju na mehkwy kwỳ to me irô ne amehpro, ne ma krĩ jô pahhi catêjê wỳr me to carâr to me mô, ne me cumã:

— Me hũmre itajê te krĩ cunea kôt ajpên me ampo kêanre catia ton. Ne hamre, ramã ita ri me cator! ⁷Mã Jaxãw te me cumã hũrkwa jahkre, mã kam me hàhhuc. Ne ma ame Xexa pê Roman catêjê jô pahhiti te amji kam hapac xà caca, ne ajtea mã me imã pahhi nô japrỳ te Jeju ita jarê — hane.

⁸Mã me hàhtôa te me ita par, ne ame kammencryac to amencryc, na ri nee jũm te ihcakôc xà na amji par nare, ne ihtỳj amehcakôc kêanre to me ipa. ⁹Mã krĩ to mehhimpej catêjê te Jaxãw me, Jeju na mehkwy kwỳ jàmjôr na me ton, mã me hãmjôr jirô pê mã ri cormã cute me cumã hikran.

Pê Amcoti jô krĩ kam ame ipa

1 Texarôn 2.15-16

¹⁰Mã caxwa pê mã, ma Jeju na mehkwy te me Pawrô me Xira kujahcê, Amcoti jô krĩ wỳr. Mã curi me cator, ne ma Juta catêjê te me cuprôn xà wỳr me mô. ¹¹Mã Amcoti jô krĩ kam mehkry catêjê atajê Texarôn jô krĩ catêjê jirôa pê ampeaj kam me cumã hũpar kôt hakop jahkre pej, ne me cumã ihkĩn, ne me cumã hũpar prãm. Mã amcro cunea kam Pawrô te me cumã ampo to hahkre xà ata jahkre pej pej to prãm to, cormã Pahpãm jarkwa kam kôt me hapê ne me cahyt. ¹²Mã me hũpar xà ata kôt me cupê Juta catêjê me, me cupê Crec jô pjê catêjê me, me cupê pyjê jàm târ cati pê Crec catêjê atajê me, me hàhtôa ne cute Jeju to amji mã mehhimpej.

¹³Mã Texarõn jõ krĩ kam, Juta catêjê teAmcoti jõ krĩ kam Pawrô te Pahpãm jarkwa to ihcakôcna me harên par, ne ma mehkôt me pra, cute me irêc, mã cute mehkên ton prãmte. ¹⁴Mã Jeju na mehkwy te me Pawrô kujahêc pyrentu, côxwa to kà wÿr. Mã ma mehkwy te me Pawrô pynâr, neme cumã Atên jõ krĩ wÿr pry jarên to mõi, ne me to cator. Mã Xira me Timot cormã curia Amcoti jõ krĩ kam me hàhhuc. ¹⁵Mã Pawrô Atên jõ krĩ kam cator, ne hàhhuc. Nehacpÿa mã cute me hũnâr catêjê atajê kujahêc, Amcoti jõ krĩ wÿr, ne me to ihmipej, quê me Xira me Timot mã awjarê, quê hapu na ihkôt me mõi, Atên jõ krĩ wÿr, ne me cuprõ.

Pê Atên jõ krĩ kam Pawrô mõi

Roman 1.18-20

¹⁶Mã Pawrô Atên jõ krĩ kam apu mõi, ne ame hikaj tomõi. Ne cute kên te pahpãm cahàc krekà jàhtõa ne hõmpun, kriata kam. Ne cupê ahna ihkaj na, na ri ihpeacre. ¹⁷Cwÿrjapê ri Pawrô, Juta catêjê te me cuprõn xà kam, cute ajpên mãmehcakôc, ne hanea ne mehcahkrit mãPahpãm kĩn atajê mã ihcakôc. Ne hõtpê amcro cunea kamcã pê mehkri atajê me, me ajpên mã me awjarê. ¹⁸Mã me cumã ihkàhhôc to hahkre catêjê pê Epicurij catêjê kwÿ me, Xicõ catêjê kwÿ me, hanea ne cute Pawrô me, meajpên mã me hũjarên. Ne mehkwy me, me ajpên cukij to:

— Ampo mã Pawrô pê ihcakôccatê te amji jahkre kêatre ata ame pamã harên prãm? — hane. Mã mehkwy me ajpên mã:

— Pÿpÿn, he ihhêj ne ajtea mã apu pahpãm jÿjê itajê to me pamã ihcakôc — hane. Mã Pawrô te hacpÿa mã mehtyc tĩr na me cumã harên, cwÿrjapê riajpên mã me harên to hane. ¹⁹Ne ma cute me cuprõn xà japry te Caxêti jõ awjarô ata wÿr, cute me Pawrô japrõr ne me to mõi, ne me cumã:

²⁰— Wa itÿj me, por ca ate ajtea mã ampo tuw jarên pihhoti ata jarên atajê kam me ijapac to prãm, ne ampeaj kam me imã impar prãm. Wa rÿ jÿ caxuw iteme ampo ita jarên par to hajÿr nare, na wa me hahkre pej to prãm — hajÿr.

²¹Pê Atên jõ krĩ kam mehkri catêjê me, põi rÿm mehcahkrit ajpên me acjêj ne mehkri atajê mã, ajco me xwahnatuw atajê impar to prãm, pê mehkri ne me kampa.

²²Mã Pawrô me cuna mã hãm, ne xa, Caxêti jõ awjarô kam, ne cuteme cumã to hahkre kam ihtêm, ne me cumã:

— Ýhÿ, me apê Atên jõ krĩ catêjê, me ikampa! He ihhêj ne ca atÿj ame pahpãm cahàc to amji mã me ahimpej to me apa. Ca ihhêj ne kên to ate mepahpãm cahàc krekà ton itajê to, ihhêj ne ampeaj kam amji mã me ahimpej. ²³Ne wa ita ri me gõi krĩ kam apu ipa, ne ite, me ate kên te pahpãm cahàc krekà mã me ikre pyxwÿr, nekam me hÿxwÿr, ne kam me to amjikam gapac na, ite me hàhtõa ne me gõmpun. Ne hanea ne ite

ikre pyxit kam pahpãm cahàcpxwÿr xà nõ caprÿ ata pupun. Mã jũm te kamihhòc to hajÿr he: “Ita pahpãm cahàc krekàpxwÿr xà, ne nee cu rÿ me pahnõ te Pahpãm ita jahkre pej nare” hajÿr. Ne cormã me apê jũm pê Pahpãm ata jahkre kêatre na wa ha me amã harê, ca me ikampa.

²⁴— Ýhÿ, he Pahpãm ita pê me pajõ Pahpãm peaj ata, ca rÿ nee ate me hõmpunnare. Ne cupê me Pahton catê. Ne taa mã pèpjê to, ne pjê kam ampo cunea to. Ne cupê pjê ita kam me hirõa pê Pahhiticati, ne hanea ne cõjkwa kam cupê Pahhiti cati. Ne nee, por jũm te cumã ikre ton ata kam ihkrĩnare. ²⁵Ne nee jũm te cumã ampo ton ata na cumã prãm nare. Ampo na? He taa mã ri me pamã me pancaca xà gõ, ne me pamã me pahte amji kam me pajapac xà gõ, ne me pamã ampo cunea impejti gõ. Ne jũ wÿr cu me pahnõ cumã ampo to ne cugõ.

²⁶⁻²⁷— Ýhÿ, pê mam me panquêtti pyxit ne to, ne mepanquêtti kõt pê me pahton to mõ. Ne pê pjê ita kamme pahcunea to, cupê me, krĩxàre me, me pa me. Ne pê me pahpÿpÿm xà xwÿjrea na, pê ramã mam me pajõamcro me pahte amji to me papijapar xà to amji kampa, nekam me pahkrĩ xà caxuw me pamã pjê to. Ampo na? Cu pahte me to amji japackre, ne ahna mepajãhcukjêr, ne xwÿ mã jũ caxuw amcronõ na ahna me pahcator to prãmte. He neePahpãm me papê ampÿare mã ipa nare, ihtÿj pjê cunea kam me pahcahê na ipa. ²⁸Na pê jũm ata ramã harên to hane he: “Pahpãm cãmtã rũm cu pahtÿj ame papa, ne amji to me ajpa, ne pahtÿj me amjikampa” hane. Ýhÿ, hanea ne me anõ pê Atên catêjê nõa te ihkãhhòc kam ihhòc to hajÿr he: “Pahte me hajÿar ne me papê Pahpãm kra” hane.

²⁹— Hewhÿ, me pahcunea pê Pahpãm kra. Na cu nee pahte amji kam me pajapac xàa kõt, Pahpãm to ame amji mãampo to pahpãm nare. Ne nee cu kên to ame pahpãm cahàc krekà ton nare. Ne neewakÿre prã jakare me, wakÿre prã tepti ata to amepahpãm cahàc krekà ton nare. Ne nee cu amjia mã ame ton nare. ³⁰Pê rÿ pèa mã mam pjê cunea kam, mehcunea ramã meton to me amji pyrãc tu, na pê ajco me toan to me to. Pê nee Pahpãm to me amji japackre, ne me hahkre pej nare, cwÿrjapê pê nee Pahpãm cute me ampo to hajÿr xà ata jahpan xà na ame to kên nare. Ne hamre, ita caxuw Pahpãm tejê cunea kam ampo itajê intête me pahcunea mã, cu nee hipêr ame ampo itajê nõ ton to mehajÿr nare. ³¹Ýhÿ, he ramã cute me pahcukij ne me pahto ipicokjêr xà jõ amcro hyr, quê ha amcro ata na me pahpupu, ne me pahcukij, neajpên pê mempej me, mehkên to ajcokjê. NePahpãm te ramã me pahcukij catê na Jeju xãm, cutecumã ampeaj kam me pajarên to impejti prãmte. Ne mehcunea te Jeju pê me pahcukij catê nahahkre pej prãmte ri ihtyc jirõ pê mã, hacpÿa mã cute to ihtĩr — hajÿr.

³²Mã Pawrõ te ihtyc jirõ pê hacpÿa mã ihtĩrna me cumã harên, mã cute mempar, ne nee cute amji mãme to hajÿr nare. Cwÿrjapê rimehkwy ame cumã, ne ame hũn, mã mehkwy me cumã:

— Wa amcro nō na gũjarēn xà ita na hipêr me apar prãm — hane.

³³Mã Pawrô ma mō. ³⁴Mã me hũmre kwỳ te me kam hapac kênre nare, ne cute Jeju na mehwỳ na me amji ton, ne ahna me cuprôn. Ne me kam hũmre japyrỳ te Tijoniti pê Caxêti jō awjarô kam prohti ata me, cahāj ata pê hapry Tamar ata me, mehwỳ jũjê atajê te ahna me cuprôn.

Pê Pawrô Corinti jō krĩ kam apu mō

Roman 16.3-4

18 ¹Jirô pê mã ri, ma Pawrô mō, Atēn jō krĩ pĩn, Corinti jō krĩ wỳr. ²Ne curia pê Juta catêjê nō japyrỳ teAqura ata cajpa. Ne pê cupê Ponto jō pjê catêjê kwỳ nō. Ne curmãPrytikra jō pjê pĩn hĩxi japyrỳ te Prixirakwỳj ata me, me cato. Ne ampo na pê ajpên me mō? Pê pjê jō pahhi japyrỳ Crawti ata ma Roman jō krĩpê, ajpên Juta catêjê kujate. ³Cwỳrjapê pê Pawrô ma me hõmpun prãmte me hỹmã mō, ne me cahê na hàhhuc ne ame apê. Ampo na? Hàpên xà me Pawrô jâpênxà pipēan na pê, ne cupêhkà tỳjti ata to ame ikre to. Ne me hàpên xà ata to ri hõtpê amehpore incwa. ⁴Ne mehkôt xà jō amcro cunea kam, cute me cuprôn xà kam, Juta catêjê me, Crec jō pjêcatêjê mã ihcakôc, cute me kam hapac ne amji to me Jeju na mehwỳ prãmte.

⁵Jirô pê mã ri Xira me Timot cator, Maxeton jō pjê pĩn, mã Pawrô te cupêhkàhti to hàpên jicu, ne ma Jutacatêjê mã Pahpãm jarkwa jarēn to mō, pê ajco hãn ne me cumã:

— Jeju pê Crixto to, pê quêt Pahpãm me pamãawjahkre — hane. ⁶Mã Pawrô cuna mã mehcunea amehcakôc ne ame hũn. Cwỳrjapê ri cute me cumã hikran prãmte ihkà caxàr, ne me kam mare mã intête pjê jacró capir. Ne me cumã:

— Hamre, wa ha nee hipêr me ato ihimpej nare, ca ha caajũ mã me, ne me akên mã me axà. Ne Pahpãm pê me gũjawry to me apa xà ata kam, wa ha nee me acahê na ixàr nare. Ne nee quê ha Pahpãm ita na amji mã icuhtom nare, quê ha amji mã me anõa cuhtom. Itacaxuw wa ha nee hipêr me gamãr nare. Ne ita caxuwmechakrit itajê wỳr wa ha tē, ne me cumãPahpãm jarkwa pejti itajê jarē — hane.

⁷Hõ, cute me hajỳr. Cwỳrjapê ri cute me hicu, ne mamõ, ne Crec catêjê jō xũmre nō japyrỳ te Tico Catytkamata nee cupê Juta catêjê nare, ne hõtpê cumã Pahpãm kĩn ata cahê na ihkrĩ. Ne pê Tico jũrkwa ataJuta catêjê te cuprôn xà cahi na xa. ⁸Mã Cripõ pê me cuprôn xà jō pahhi, ne cute Pahpãmpar, mã mehkra cunea te hanea ne mempar, ne Jeju to amji mã mehhimpej, ne mehwỳ mã me hàr. Mã me hàhtõa ne cute Corinti jō krĩ kam mePahpãm jarkwa par, ne cute amji to me Jeju na mehwỳ, mãcute cõ kam mehcumrãr.

⁹Mã caxwa nō mã Pawrô te irĩatkam Pahpãm pupun, mã cumã:

— Apu acakôc xà ita na, nee amji mã pa nare, ne nee ca acakôc to hicu nare. ¹⁰Ampo na? Wa ita ri acahê na apu mō ita kam, jũ wỳr quê jũm ato

kên. Ampeaj kam krî ita kam imã me hàhtô, quê ha cormã me ipynã ne me ikampa — hajÿr.

¹¹Na ri Pawrô te curi me cumã Pahpãm jarkwa to hahkreato caku pyxit, ne ihkôt to ihnõ cahti na hajÿr.

¹²Mã Crec jô pjêata kam, hũmre nõ japyrÿ te Caro te amji to Romancatêjê jô pahhi. Mã amcro atajêa nõ kam, Jutacatêjê te me amji to cuprôn, ne me Pawrô pro, ne ma mehcukij xà wÿr me to mō. ¹³Ne cute me pahhi pê Caro mã harên to hajÿr he:

— Ýhÿ, hũmre ita te, ite mehũnãr prãnte, ame imã hũjarên to hajÿr to mō. Ne cute ajteare mã Pahpãm to amji kam me hapac xà ita to me imã hahkre ita na me ipê ihkajna. Ne me icaca xà kaj na cute amji kam hapac xàita — hane.

¹⁴Mã Pawrô te amji pytãr prãnte ajmãr pahhi Caro mã harên, mã cute Juta catêjê mã:

— Me apê Juta catêjê me ikampa. Quê ha hũmre ita teampeaj kam ampo to kên na, wa ha itÿj me akampa ne meatehcajpa. Ne hamreare, imã nee cute ampo kên catia tonnare. Ne ihhêj ne me acaca xà me, jũmjê japyrÿ itajê me, ajpênkrac ri ate me acakôc xà pit mã ita. ¹⁵Cwÿrjapê wa ha nee me atehcajpar nare, ca ha me caa amji to ame ahimpej ne me amji to impej. Ne pa, wa ha nee ita caxuw amji to me acukij catê nare — hajÿr.

¹⁶Ne cute mehcunea cator, mã ma ame hapôj. ¹⁷Mã cute ame hũmre japyrÿ to Xoten pê Jutacatêjê te cuprôn xà jô pahhi cahhyr, mehcukijcatê kam mare mã. Mã nee Caro te Xoten ita to amji kam hapac nare.

Pê hipêr Antijoc jô krî wÿr, me amji jaxà

¹⁸Mã Pawrô te Jeju na mehwÿcãhê na amji to caku pyxit ne ihkôt hĩkjê, Corinti jô krî kam. Jirô pê mã ri, Prixirakwÿj me, Aquira me, cute me pãr krepro, ne ma Xiri jô pjê wÿrme pra. Ne Ampohy jô krî kam, cormã pãr kre mã me hàr nare kam, pêPawrô Pahpãm mã amji to, ne cute cumã amji to ipipêxà caxuw to ihkrã mē. ¹⁹Mã Epet jô krî mã cator, mã cute Prixirakwÿj meAquira rer. Ne ma cute me cuprôn xà wÿr hàr, ne cute Juta catêjê me ajpên mã me hũjarên kam ihtêm. ²⁰Mã cute me cahê na amji to amcrojàhtôa to prãnte me hator. Mã ma Pawrô apu ahna ihcaca, ampo na, ma Krĩpinkrên wÿr ihkrãr na ri. ²¹Ne mōr xà wÿr cute me cumã:

— Quê ha Pahpãm mã ite amji jaxàr naito prãm na, wa ha itÿj amji jaxà — hane. Ne ma Pawrô te pãr kre kam amji kujahêc, Epet jô krî pĩn. ²²Ne ma Xexa jô krî mã cator, ne ma Krĩpinkrênwÿr mōr puro. Ne Krĩpinkrên kam cute Jeju na mehwÿmã ihcakôc, ne me cumã amji jarên, ne ma Antijoc jô krî wÿr mō. ²³Ne cute amji to amcro kwÿ jakren, jirô pê mã ri mō, ne cute Carati jô pjê jakren, ne Amcrãti jô pjê jakren, ne ihtÿj Jeju namehwÿ cunea to ihtÿj to mō.

Pê Apôr Epet jô krî me Corinti jô krî kam apu mô

Epet 1.1-2

²⁴Pê cormã Pawrô apu môar kam, pê Juta catêjê nôjapry te Apôr pê Mehtehcajpar jô krî kam ihpým ata, maEpet jô krî wÿr tẽ ne cator. Ne pê ampeaj kam ihcakôc pej, ne ampeaj kam cumã Pahpãm jarkwa jahkre pej. ²⁵Ne hanea ne ampeaj kam cumã Pahpãm te me cumã tohahkre xà ata jahkre pej, na ri me cumã Jeju jarên xàcuhctacti jarê. Ne cumã amji kian kam me cumã harê. Nenee amjia kôt me cumã Pahpãm jarên to ipa nare, ne pê cumã Jowãwjüjarên xà pit hahkre pej, pê toa ajco mecumã hüjarên to ipa. Por pê Jowãw Jeju cator xwÿjreana cato, ne cô cakrô to hikaj xà mehcumrã ata, ne cukwakam, pê me cumã Jowãw te amji kam hapac xà ata pyxít peajne hahkre pej, pê ajco me cumã harê. ²⁶Ne cumã amji kian kam, Juta catêjê te cuprôn xàkam me cumã harê. Mã Prixirakwÿj me Aquira te Apôr jüjarên xà ata par, ne me Apôr te Jowãwcukwa kam hüpar xà atajê pit jarên na me hahkre pej pyrentu. Ne ahna me ajpên par, ne me haprôr ne ikre kam me cumã Jeju jarên to impejti partu.

²⁷Mã Apôr te amji kam hapac ne ma Crec jô pjê wÿr ihkrâr. Mã Jeju na mehwÿ te mehtehcajpar prãmte, me cumã ihkàhhôcton, Crec jô pjê kam Jeju na mehwÿ mã. Ne cute kam me cumã Apôr pej naharên, ne cute me ahna hàhwÿr, mâr quê ahna me amji caxâr to impeaj ne. Mã ma curi cator ne cute, por ramã ame Jeju to amji mãmehhimpej atajê, tehcajpar catia to mô. ²⁸Ne cute Pahpãm jarkwakôt Juta catêjê mã ihcakôc, ne Jeju pê ri quêt Pahpãm kra, ne cupê Crixto, ne toa pê Pahpãm me cumãawjahkre, ne mehcunea kam mare mã ame cumã harên to mô. Ne cute hüjarên xà ata kôt Juta catêjê hi kwîn.

Pê Pawrô Epet jô krî kam apu mô

Ruc 3.15-16

19 ¹Mã cormã Apôr Corinti jô krî me, Crec jô pjê kam apu môar kam, mã ma Pawrô Epet jô krî wÿr tẽ, necator. Ne curia cute Jeju na mehwÿ kwÿ cajpar, ²ne mehcukij to:

— Ca ate me Jeju kam gapac ne mehwÿ na ate me amji ton, cwÿrjapê mormô ca ajkî ramã Pahpãm Carô Pejti te me amã amji jôr? — hajÿr. Mã me cumã:

— Wa nee ite me Pahpãm Carô Pejti ita na hahkre pej nare, xãmte ihtÿj Carô — hane.

³Mã me cumã:

— Ne mër jüm te me acumrâr xà mã kôt pê meacumrã? — hane. Mã me cumã:

— Jowãw te mehcumrâr xà ata kôt pême icumrã — hane.

⁴Mã Pawrô me cumã:

— Pom Jowāw te me acumrār xà atajê pê, por mehkên mā me hikra atajê me, por cormã ame Jeju jikaj to ipa atajê. Pê Jowāw ajco Juta catêjê mã awjarê, mār quê hapu na ihkôt me jūm ata kampa. Ne jūm ata pê ri Jeju, ne hamre ita caxuw wa ha Jeju jarkwa kôt me acumrā — hane.

⁵Mã cute me ita kam hapac jirô pê mã ri, Pawrô te Pahhiti pê Jeju jarkwa kôt, cô kam mehcumrār. ⁶Ne cute mehcunea na hūhkra xir, ne me cumã Pahpām nahàhwÿr. Mã Pahpām Carô Pejti te mehcuneamã amji jōr. Mã ajtea mã cute mehcakôc kam mehtēm, nehanea ne cute me Pahpām jarkwa jarēn kam mehtēm. ⁷Ne me hūmre te tōxi atajê to pê hane.

⁸Putwrȳ incrê kam mã hān ne Pawrô hōtpê maJuta catêjê te cuprōn xà wÿr ipa, ne nee amji na hàhtāt nare, ne me hàhtōa mã ihtÿaj kam Pahpām himpej xà mã mencjêj na ihcakôc, pê me kampa, ne ajco ajpēn mã me harē. ⁹Mã ma mehkwȳ ahna me aprā, ne ma amji mã ame to hajÿr caca. Ne cormã mehcunea kam mare mã, cute me Jeju te amji kam hapac xà na mehcakôcto kêanre. Mã cute me hajÿr ita kam, Pawrô me cupêcator, ne ma amji kôt Jeju namehkwȳ to mō. Jirô pê cute ajpēn mã me pajō Pahhiti Jeju pê me pahkritxwÿ na me harēn na ipyr ne ame harē. Ne hūmre japȳr teTiran ita jō kàhhôc to hahkre xà jūrkwā kam, pê ajco ame cumã harē. ¹⁰Ne cute me cumã to hahkre ita to caku to ipijakrut. Mã hōtpê Axij jō pjê ata kam mehcunea pê Juta catêjê me, mehcakrit atajê te Pahpām jarkwa par.

Xewa kra xūmre

Me Hàpên Xà 5.12-16; 1 Texarōn 1.9-10

¹¹Pê Pahpām ajco Pawrô tehcajpar to catia to ipa, ne ajco cumã cute amji jahkre pej gō, mār quê carôt kôt hàpên xà catia pihhoti to. ¹²Na pê Pawrô cama ihcakôc ne ihcakôc xà atato me hà catêjê caprā, neme to impej. Ne hō cupêhkā to, hàhpro xà pê hanea, ne ihtÿj ajco me caprā. Na quê ha jūm xà ata cama ihtāt, quê ha ramā impej pyrentu, ne kam ampo carō kên atajê, quê ha hanea ne jūm ihtāt, quê ha ramā impej pyrentu.

¹³⁻¹⁴Cwÿrjapê ri Juta catêjê kwÿ te ita na me Pawrô pupun, ne ihtÿj Pawrô cuxà me ton to ipa. Ne por me hūmre te xet atajêpê ri Pahpām mã mehcajrēn catêjê jō pahhijapȳr te Xewa kra atajê, pê neeme cupê Jeju na mehkwȳ nare cacrō, ihtÿjPawrô jīkjê na Pahhiti pê Jeju japȳr namehkwȳ pê me pahcurê xwÿn carō kên japôj to me ipa to. Ne ihtÿj Jeju japȳra na me hapôj to prām. Cwÿrjapê ri ampo carō kên mã mehcakôc to me hane he:

— Por ahnaa Pawrô me cumã Jeju japȳr jarē ata na, wa ha hanea ne amã, ca cupê acato — hane. ¹⁵Mã hūmre kam me pahcurê xwÿn carō ita te me cumã:

— Wa ramā ite Jeju pupun, ne Pawrô pupun. Ne jūmjê mãca me? — hajÿr.

¹⁶Ne cutea mehcahhyr kamihtêm. Ne mehcahhyra to mehcahhy, ne cute ame haxôp, ne amecupê mehkà cokjêr, mã ma ikre ata pê me cator.

¹⁷Mã Epet jô krî kam mehcunea pê Juta catêjê me, mehcahkrit mehkri atajê te me itajarên par, ne me hahkre pej. Na ri me cumã Jeju japry cupa xà kam mã rý hàhhuc. Ne mam me cumã hûpa ata jirôa pê me cumã Jejujapry cupa. ¹⁸Mã me hàhtôa te mempar atajê te amji to me Jeju namehkwý prãnte me hÿrmã me mō, ne cute ame ampo kên ton atajê na me cumã amji jarên, mehàhtôa kam mare mã. ¹⁹Mã me hÿxy xi catêjê jàhtôa te me cuprôn, ne Jeju na mehkwy mã me hàr prãnte, cute me hō kàhhôckôt me hàhcaprâr xà atajê incwÿr ne me to mō. Ne cute me kam mare mã, mehō kàhhôc atajê to me caxàr par. Ne cute mehkàhhôc te caxàr atajê jô pore cahyt, mã hō pore catia to cati, ne ihhêj rûm cupê caku te xïc jâpên xà jâmcwÿr xà jô pore. ²⁰Hô, Jeju jarên xà impejti itajêpê hane, ne ajco ajcamê ne ma ihcakûm to mō.

Pê Epet jô krî kam me ajpên par nare

Roman 1.13-15; 15.22-29

²¹Ampo itajê cunea jirô pê mã ri Pawrô te amjijaxàr xà na amji kam hapac, ne cumã catyatre na Maxeton jô pjê me Crec jô pjê jakren to ihtêm prãm. Ne ma hanea ne Kripinkrênwÿr ihtêm prãm, na ri cute me cumã amji jarên to:

— Ite Kripinkrên pupun jirô pê, wa ha ma Roman jô krî wÿr imôr to prãm — hajÿr.

²²Cwÿrjapê ri cute mehtehcajpar catêjê pijakrutpê Timot me Eraxô kujahêc, Maxeton jô pjêwÿr. Mã cormã Pawrô Axij jô pjê kam apu ipa.

²³Mã amcro ata na Epet jô krî kam me hàhtôa ne cutemehkên xà ton, mã hōtpê quêt Jeju na mehkwy picamên, cwÿrjapê ri ame kam incryc. Ne Epet jô krî catêjê kamihtÿj me cumã pahpãm cahàc krekà japry te Tijãnkwyj ata to amji kam me hapac to me ipa. Pê cumã me ikre to, ne kam me hÿ xwÿ neajco kam me Tijãnkwyj ata to me amji kampa. ²⁴Ne wakÿre prà jakare to me hàpên catêjê atajê nôjapry pê Temetti, pê ajco wakÿre prà jakare to Tijãnkwyjjÿrkwa carô krekà to. Ne pê hàpên xà ita kôt ajcoampeaj kam mehpora incwa, na pê cumã ihporea to ihpore. ²⁵Mã cute ajkam me hàpêncatêjê pê mehkwy atajê na hàhwÿr, ne cute me cumã:

— Me ijô ikwÿ nō, he me pajâpên xà itapîn ri me pajô pore hapôj.

²⁶Xà ca nee ate me Pawrô te ampo ton ata na me hōmpun ne mempar nare? He ihtÿj Pawrô me cumã awjarê, ne me cumã: “Pom ampo to ame pahpãm cahàc krekà to itajê pê Pahpãm nare” hane. Mã me hàhtôa te me hÿjarên xà ita par, na ri ihtÿjamji kôt ita ri krî kam me hàhtôa ne me to hanea neAxij jô pjê cunea kam apu amji kôt me to. ²⁷Ne ita na me papê ihkêanre. Quê hacute ahnaa apu mōr na, quê ha me pajâpên xà hamre.

Quêha nee jũm hipêr me papê me pajâpên xà itajê nõ japrôrnare. Ne nee mã ita pit nare. Quê ha hanea ne mehcuneame pahpãm cahàc krekà pê Tijãnkwyj ata jũrkwa catihtti ata jicu, ne me to hapac kêt, por mehcunea Axij jõ pjê me, pjê cunea kam mehcunea ame toamji kam hapac to me ipa atajê. Quê ha Jeju kĩnteTijãnkwyj ata to me hapac kêt, ne hũrkwato me hapac kêt, ne me hicu — hane.

²⁸Mã me hàhtôti atajê te me ita par, ne Jeju na mehkwykam amencryac to mencryc. Necute me caràr kam mehtêm, ne me Tijãnkwyj jarên to:

— Epet jõ krĩ kam Tijãnkwyj catia to cati — hane.

²⁹Mã me caràar kam me hũjarên xà ita krĩ kam apuihcahkũm tu. Mã me hàhtôa te me ita par, ne cute me Cajo meAritarcô pê Maxeton jõ pjê catêjê pijakrut ne Pawrô kôtame mã atajê pro, ne ma me cupjê, cute mecuprôn xà cati wÿr. ³⁰Mã Pawrô me hàhtôti atajê mã ihcakôc prãm, mã ma Jejuna mehkwy ame huwahi. ³¹Mã hanea ne pjê ata kam Pawrô jõ ikwÿ nõ kwÿ pêkrĩ jõ pahhi atajê kwÿ te me cumã harkwa kujahêc, quê neecute me cuprôn xà wÿr môr nare, mã Pawrô jũpar.

³²Ne nee me hàhtôti atajê me cute me ajpên par nare. Ne mehkwy ampo kwÿ jarên to ame caràr, ne mehkwy hanea neampo kwÿ jarên to ame caràr. Na ri me hàhtôa pê mehahkre kêatre, mã nee cute ampocwÿrjapê ame caràr to ame ipa ata na me hahkre pej nare. ³³Mã Juta catêjê te me Arexãre jator, cute me cumãihcakôc prãmte. Ne cute me cuna mã me hãm. Mã mehkwy amjimã me Arexãre te to ihcupan na me harê. Mã Arexãre te hũhkra tohàpêr, ne tee me cuna mã apu amji na hàpràr to hahkre. ³⁴Mã cute me Arexãre pê Juta catêjê nõ na mehahkre pej, ne mehcunea te me caràr kam ihtêm. Ne cute mecaràar to me or to ipijakrut. Ne me caràr to hane he:

— Epet jõ krĩ kam Tijãnkwyj catia to cati! — hane.

Pê krĩ jõ pahhi catêjê nõ ame hàhtôa atajê cahkũm

³⁵Mã krĩ mã hàhhôc catê te hòtpê hũjarên to mehhi kwĩn, ne me cumã:
— Epet jõ krĩ jõ xũmre, me ikampa. Ne me acunea pê me pajõ krĩ kam Tijãnkwyj jũrkwa jamãr catê, nepê kënti impejti cõjkwa pĩn ihpÿm, ca me hamã atajême hahkre pej. ³⁶He nee jũm te ajtea mã harên xà nõ to harênnare. Ne amji mã me aprĩa ne, nee ca ampo kam me amji kam me gapac nare kam me ton nare. Xa ampo ita to me amji kampa, jirô pê mã ca ha cormã me to. ³⁷Ampo caxuw mã ate me hũmre itajê japrôr? Xà ajkĩ cuteme Tijãnkwyj jũrkwapê ampo to hàhkij, nare, môrmô cute me pajõ pahpãm cahàc krekà xũn na mã ate me haprôr? Hãpà, nee cute me ampo itajênõ to jũ mãn nare. ³⁸Quê Temetti me, mehkwy mã, jũm na mehcakôc xà na mã, quê hama cute mehcukij catêjê wÿr me pra, ne me cumã me amcro nõ ta. He itajêa caxuw ri pahhi, ne cute mehcukij catêjê amehkrĩ. Na quê ha metaa me cumã jũm na mehcakôc. ³⁹Ne hipêr ita jirô pê me

ampo na prãm, ne xa cute me amã amcrohyr xà ata jikaj, quê ha kam ahtwỳ, ca ha mehcunea jípôc ri me cumãharê, quê ha me hahkre pej, ne jũ na me amã to. Hôhõ, quêt pahteme amji kam me pajapac xà te hajỹr he. ⁴⁰Ne me pahkêanre. Ampo na? Quê ihhêaj to jũm me pajõ pahhiti mãpahte me hajỹr xà ita na me pajarê, quê ame pahkam incryc. Neme pahcukij, jũ mã cu me cumã amji jarên to? — hajỹr. ⁴¹Ne cute me cumã hũjarên jirõ pê mã cute me cuprõn xà jicu ne ma amehcahkũm.

Pê Pawrô Maxeton jõ pjê me Crec jõ pjê kam apu mõ

20 ¹Ne mehkên jàhkrihkrit jamre jirõ pê, Pawrô te Jeju na mehkwyña hàhwỳ, mã cute me cuprõn. Mã cute me cumã hũcanâr xàto ihtỳj, neme cumã ihtêm xà na amji jarên. Ne maMaxeton jõ pjê wỳr mõ. ²Ne curi cator ne apu ipa, ne cute Jeju na mehkwyjãhtõa mã hũcanâr xà to ihtỳj, ne cute me hapackre to iryra to iry. ³Jirõ pê ma Crec jõ pjê mã cator, ne curi cute amji to putwỳr to incrê. Ne ramã cute Xiri jõ pjê wỳr mõr xà caxuwapu amji mã hàncuprõn, ne cute amji name cupê Juta catêjê te me toamji kam hapac xà kêanre, ne ihtỳjamehcuran prãm na me hahkre pej. Mã cute amji kam hapac, mã nee hipêr Xiri jõ pjê na cumã ihtêm prãm nare. Ne ita caxu ri cumã Maxeton jõpjê pua na ihtêm to prãm. ⁴Mã hõtpê jũmjê ihkõt me mõ atajê japrỳXõpat, pê Piro kra, pê Amcoti jõ krĩ kam ihpỳm me, Aritarcõ me Xecun, pê Texarõn jõ krĩ kam mehpỳm me, Cajo pê Terpe jõ krĩ kam ihpỳm me, Timot me Tiquicõ me Tropimo, pê Axij jõ pjê kam amehpỳpỳm. Atajê cunea pê hõtpê Pawrô kõt ajco ame ipa. ⁵Ne ma mam me pra, ne Trõwat jõ krĩ kam me cator, ne curia ame hikaj to ame ipa. ⁶Ne me Hakren xà jõ amji kĩn jirõ pê mã, wa haneane ma me tẽ, Pirip jõ krĩ pĩn mehkõt. Ne curia ite amji to me amcro to xĩc jirõ pê mã, wa ite me amjicajpar, Trõwat jõ krĩ kam, ne me icunea te curi amji to me amcro toxtet.

Pê Trõwat jõ krĩ kam Pawrô apu mõ

Jowãw 5.21; Me Hàpên Xà 9.36-43

⁷Ne xap na, mehkõt xà jõ amcro kam, Jeju na mehkwyte caxwa ri me cuprõn, me hàpàn xà caxuw cute ame ajpênkĩn to prãm to. Mã Pawrô iraràtia na ihtêmprãm, cwỳrjapê ri cute caxwa kat hãm me cumã hũjarên kam ihtêm. Mã ramã ahna awcapàtkõ picapõn mã cormã me cumã awjarê. ⁸Kỳj pê ikre caxwỳn nõ kam, cute me cuprõn xàata kam, pê ampeaj kam ihpôc xà jãhtõ ne mehcujro. ⁹Mã hũmre japrỳ te Ewti ita kỳj pê, harkwa na põmã me irit xà ata na jỹ ne kampa, ita kamhõt xwa mã hõt, ne ihpỳm, ikre kre crê atapĩn. Mã hỹrmã me iwryc ne cute me harĩ, mã ramã ihtyc tu. ¹⁰Mã Pawrô wrỳc, ne cute hũmre ita pỳn, ne me cumã: — Ame amji mã apikrar nare. Cormã ihtĩar ne quê ha ihtỳj ipa — hajỹr. ¹¹Jirõ pê mã ri Pawrô jàpir, mã mehcuneajapàn ne ame harte. Mã hacpỹ ma mã Pawrô te me cumã hũjarênkam ihtêm, ne me cumã hũjarêan to

apê, ne ma tẽ. ¹²Mã hũmre ata hacpỹa mã ihtĩr mã ma me to mõi, hũrkwa wỹr. Neampeaj kam hũrên me cumã amji kĩn, ne me hakry.

Mehakepxà jõ krĩ wỹr mehtêm xà

¹³Ne pàr kreti kam Axô jõ krĩ wỹr ite me imõr kam me icrà, ne por cõxwa cahê na krĩ xa ata kam me icator. Ne curia wame Pawrô jikaj, quê ha pjê kam ajpên mõi, ne cormã Axô jõ krĩ mãcato. ¹⁴Ne wa ite Axô jõ krĩ kam me ajpên cajpar, ne mapàr kre mã me ixàr ne me mõi, ne Mehakepxà jõ krĩ mã me icator. ¹⁵Ne me Mehakepxà jõ krĩ to me tojnõ, ne ma me tẽ, ne apê nõa nawa cormã cô jipõc ri amcrã japyrẽ te Quito ata jõ pjê cahê na me mõi. Ne amcro pyxit jirõ pê mã, wa ramã Awjarõti jõ pjê mã me icator, nehipep me ina amcro pyxit, wa ma ramã Krĩtẽpti mã me icator. ¹⁶Mã Pawrô ma apu Epet jõ krĩ kam hàhhuc caca, nema hanea ne apu Axij jõ pjê kam amji to amcro jãhtõ caca. Ampo na? Krĩpinkrên mã catorprãmte hàpõr pit. Mãr quê xwỹ mã Me Hõ Kẽhkẽn jõ amji kĩn jõamcro xwỹjrea na cato.

Pê Pawrô te me cumã harkwa kujate

Jowãw 21.15-17; 1 Timot 4.6-8; 1 Petrô 5.1-4

¹⁷Ne ma Krĩtẽpti kam me icator, mã Pawrô teEpet jõ krĩ kam Jeju na mehkwy to mehhimpej catêjê mã ihhõc, neihkujahêc, mãr quê ajpên Krĩtẽpti wỹr me mõi, nePawrô mã mehçakõc to prãmte cute me hỹrmã ihhõc neihkujahêc. ¹⁸Mã me cator, mã Pawrô te me cumã amji jarên ne mecumã:

— Ýhỹ, pê wa mam ramã Axij jõ pjê kam me awỹr icator xàata kam, pê ca ramã amji jipõc ri me ipupu, ne ramã ate me ite amji kam ijapac xà pupun pejtu. ¹⁹Wa itỹj me pajõ Pahhiti pê Jeju mã apu ijapên to ipa, amcroatajê kam, ne cormã cumã ijapên to ipa. Ne nee hanea ne ajco amji to icati prãm nare, ne pê maajco ame Jeju caca na pê wa me hũ naapu amrã. Pê meikwỹ pê Juta catêjê ame ito kêanre, pê wa amjicajpêr xà xãhti ata to ajco amji cajpê çakrõ, pê wa itỹj mecumã awcanã, ne nee pêwa me pajõ Pahhiti pê Jeju japên xà mã hikran nare. ²⁰Ne ajco me akõt ipa, ne me amã Jeju jarkwa tohahkre to ipa. Ne nee pê wa ame akam ipec xà nare. Pê wa itỹj me amã awcanã ne ite meatehçajpar xà caxuw, pê wa amã Jeju jarkwa jarêan to harê, pahte mecuprõn xà me, me gũrkwa kam, pê wa me amã Jeju jarkwa to hahkre to ipa. ²¹Ne ajco mehçunea pê Juta catêjêmã harên to ipa, ne hanea ne me apê mehçahkrit atajê mãharê. Ne pêwa mehçunea mã me huphê na awjahkre, mãr quê mehçên mã hikra, ne Pahpãm wỹr me apkjê, ne me pajõ Pahhiti pê Jeju to amji mã mehhimpej.

²²— Ne hamre, ita caxuw ri Pahpãm Carõ Pejti te Krĩpinkrên wỹrijator. Na wa ha ma curi mõi. Ne ampeaj kam ri ipê curi ampo te ikên xà ata

jahkre kêatto hahkre kêt, ampomõrmõ quê ha ajte curi jũ mã ito. ²³Ne ihnõ ata pyxit ri imã hahkre pej, quê ha me ipro, ne me hacjên xà kam me ijaxà, ne ame ito jamã, ata na ri PahpãmCarõ Pejti te ramã imã hũjarên, krĩ cuneakõt. ²⁴Na wa nee ityc xà ita to amji japackre nare, quê ha me icuran prãm, ne taa me icura. Hõ, ijâpên xà impejti na cuteimên xà ata waquêt ite hipêj to amji kampa. Ne me pajõ Pahhiti pê Jeju te ijâpên xà na imên ata te hajÿr he. Wa ha mehcuneamã Jeju pê me pahkritxwÿ na harên pejti jarê, mâr quê hacpÿa mã mehcunea Jeju kõt Pahpãm wÿr meapkjê, ne cute me amji jaxàr xà ata na ri Pahpãm mã me ahna prãm.

²⁵— Ne pê wa ajco me amãPahpãm pê me pahcunea to ihhimpej catê cati na harê. Newa ha ma ita caxuw mõ, ne ramã ite hipêr ate meipupun nare na me gahkre pej. ²⁶Cwÿrjapê wa ampeaj kam me amãawjarê. Na ca ha me anõ Jeju te amji kam hapac xà mã hikra nehicu, quê ha Pahpãm nee ita na amji mã icuhtom nare, ne amji mã me anõa cuhtom. ²⁷Ampo na? Pê wa ajco hõtpê amji na ijâhtât nare kam me amã Pahpãm te amji kamhapac xà jarê, cwÿrjapê quê ha nee ita naamji mã icuhtom nare.

²⁸— Ne me apê Jeju na mehwÿ to mehhimpej catêjê, ca ha ita caxuwme amji jamâr peaj to me apa, ne nee jũ caxuw Jeju mã mehikran nare. Ne hanea ne Jeju na mehwÿ jamâr peajto me apa, ne caxuw ri Pahpãm Carõ Pejti te me apyxwÿr. Pê Pahpãm kra mehwÿ tehcajpar prãmte ty, ne caprõcunea ajxwÿ, mã ahnaa cute me pahto amji kra. Cwÿrjapêca ha me hamâr to impeaj ne. ²⁹Ampo na? He, imãa quê ha ihtÿj jũmjê itêmjakân pê ate me Jeju mähikran prãmte me awÿr cato, ne me amã ihhêj, ne imã me gahkre pej. Ne atajê pê quêha ampo jâprê pyrâac, na quê hanea me acaprĩ nare. Quê ha cute me acunea jipej prãmteihtÿj ame ato kêanre to mõ. ³⁰Quê ha me akwÿa nõ hanea ne apu to ihcupan to mõ. Ne meapê mehwÿa nõ mã apu ihhêj to mõ, cute amji kõt me apêJeju na mehwÿ ton to prãmte. ³¹Cwÿrjapê ca ha me guphê, ne ma ita kõt me hakop. Hõ, itacupate wa ite me akam amji to ipijapar to caku to incrê. Na waicwÿar kam, caxwa me amcro cunea kam iteme acunea mã Jeju jarkwa to hahkre.

³²— Ita caxuw, wa ha Pahpãm mã me apê mehwÿ atajê cajrên, mâr quê me ato impeaj ne, me ate cute amji kam hapac xà pynâr pejti to prãm to. He Pahpãm ri me amã ampo pej cuneagõ, ne hanea ne me apicamên na me ato, ca me ajcamê. ³³Na pê wa ita ri ame akam ipa, ne nee me gõpore me, ampo pê me atekjê atajê na prãm nare. ³⁴Ne ramã ate me ijahkre pej, pê wa ijũhkra toapê, ne ijũhkra to ijâpên xà ita to me ikwÿ caxuw amjimã ihpore incwÿr na amjito, pê wa me amã pahte me cupêampo jamreare atajê tehcajpar to hahkre. ³⁵Ata to pê me pajõ Pahhiti pê Jeju me pamã hahkre to hane. Na wa maharkwa to me amji japackre, ata to pê ihcakõc to hane he: “ÿhÿ, quê jũm amã ampo gõ, ne ampeaj kam hürên gakry, ne quêtjũm mã ate ampo jõr xà ata kõt ca ha hirõa pê ampeaj kam gakrya togakry” — hajÿr.

³⁶Ne cute ihcakôc jicu, mã Jeju na mehkwy mehkôn krã name hÿr, ne Pahpãm mã mehcakôc. ³⁷Mã mehkwy me Pawrô japy, ne ame cumã amji jarê, ne mehcunea ame amrã. ³⁸Ne mehcunea mã amji kÿn nare. Ampo na? Cute me Pawrôte jũ caxuw hipêrme hõmpun nare na me cumã amjijarên, mã cute mempar na ri. Ne ma me ikôt pâr kre wÿr me mõi. Wa ma Pawrôme ite me irer ne pâr kre mã me ixâr.

Pê Pawrô ma Krîpinkrên wÿr tẽ

21 ¹Wa ite me cumã amji jarên, ne ma pâr kre kam me tẽ, ne me icatyatre na harã mã, cô jipôc ri pjê japy te Cotkam me icator. Ne amcro nô na, wa ma côxwa to kà naPirã jô krî kam me ijãhhuc, ne ma hipêr me tẽ, ne maPatara jô krî mã me icator. ²Ne curia wa ite me, pom wa pâr kre kam me mõi ata jicu, ne ite me pâr kre nô cajpar, ne cumã me ixâr, ne ma Pãrkô jô krî wÿr me tẽ. ³Ne ite me cô jipôc ri Xipre jô pjê ata pupun, ne ma harã mãme tẽ, Xiri jô pjê wÿr. Ne curi me icator, Kên jô krî kam, necuri cute me ampo to irôrôc jahkà na me irôrôc.

⁴Ne hõtpê curi ite me Jeju na mehkwy kwÿ cajpar, krî ata kam, ne curia ite me cahê na amji to me amcroto xet. Mã Pahpãm Carô Pejti te me cumã Pawrô jarên, mãcute me cumã hÿjarên, mãr qué nee Krîpinkrên wÿrmôr nare. ⁵Mã curi cute ame ipa xà na, amji mã me amcro hyr xàata me cupê hamre, mã ma pâr kre wÿr me pra. Mã ma cute me ipynâr, ne ikôt krî pê me cator, mehkra me, mehprô mea mã. Wa me icunea me ikôn krã na me ijÿr, côxwa to kà na, ne Pahpãm mã me icakôc. ⁶Jirô pê mã wa ite me cumã amji jarên, ne ma pâr kre mãme ixâr. Mã ma hacpÿ mã ikre wÿr cute me amji jaxâr ne me mõi.

⁷Wa ma Kên jô krî pÿn me tẽ, ne ma Potorma jô krî mã meicator, ne apu Jeju na mehkwy mã me icakôc, ne curia ite meahna amji to me amcro pyxit. ⁸Ne amcro nô na wa ma me tẽ, ne Xexa jô krî wÿr meicator. Ne ma Pahpãm wÿr me to ipipkjêr catê japy te Pirip jÿrkwa mã me ixâr, ne curia hÿrkwa kam cahê name ijãhhuc. Ne cupê, por pê Krîpinkrên kam Jeju na mehkwy texet pê me capi atajê nô. ⁹Ne ihkra cahãj te cwat ne cormã nee mempjê nare, nehõtpê Pahpãm jarkwa to mehcakôc.

¹⁰Na wa amcro jãhtôa kam cahê na mejãhhuc, ne ame ipa. Mã hÿmre japy te Agap itaJuta jô pjê pÿn cator. Ne cupê Pahpãm jarkwato ihcakôc catê. ¹¹Ne ma mõi ne Pawrô cape na xa, ne cute cupê ihtu na hê xà pyr, ne cutea to amji jÿhkra me ihpar cajpre, ne Pawrô mã:

— Ýhÿ, Pahpãm Carô Pejti jarkwa kôt wa ha amã awjarê. Qué haihtÿj Juta catêjê Krîpinkrên kam, atu na hêxà ita to ipa catê ata me guwapre tohanea he, ne ajkÿ mehcahkritatajê jÿhkra mã me gaxà — hane.

¹²Wa ite me Jeju na mehkwy me, ita kam ijapac, ne ma Krîpinkrên têtê ame Pawrô juwahi. ¹³Mã Pawrô me imã:

— Ampo na mã ca ame acwÿr to hane, ne imã amji kÿnnare ita na ame ijuwahi? He wa nee icajpre xà ita pit caxuw apu imôr nare. He wa hanea ne Krîpinkrên kam, Jejuwÿrjapê ityc xàa caxuw apu mõi — hane.

¹⁴Wa tee ame huwahi, ne ite me to tojnõ ne me cumã:

— Pahpãm te ampo to amji mã ato jũ mãn prãm atato, quê ha ihtÿj ato jũ mã — hajÿr.

¹⁵Ne ite me amji to amcro kwÿ kujahêc jirô pê mã, wa ame ijâhcuprôn, ne ma Krîpinkrên wÿr me mõi. ¹⁶Mã Jeju na mehkwy kwÿ Xexa jõ krî kam amehkrîatajê te me ijaprôr, ne ma Krîpinkrên wÿr me ito mõi, Mexõ jûrkwa wÿr. Mã cute me ijaprôr, wa curia cahê name ijâhhuc. Ne hũmre ata pê cô jipôc ri, Xipre jõ pjê ata kam ihpÿm. Ne rÿ pêa mã pê cupê Jeju na mehkwy. ¹⁷Mã Krîpinkrên kam Jeju na mehkwy te me Pawrô pupun, ne ampeaj kam me hakry.

Pê Pawrô Tijac wÿr mõi ne hõmpu

¹⁸Ne apê mã Pawrô ma me ikôt mõi, ne cute Tijac cajpar. Mã ramã Jeju na mehkwy to mehhimpej catêjê cunea te cuprôn, cute me cuprônxa kam. ¹⁹Mã Pawrô te ahpÿanre na, Pahpãm te ihcakôc xà kôt mehcahkrit pê Juta catêjê nare atajê mã ampo pejti ton na, me cumã amji jarên par.

²⁰⁻²⁵Mã cute mempar jirô pê, mehcunea te amji mã me Pahpãm pejti na to me hàmnãn, ne me Pawrô mã:

— Ýhÿ, wa ite ramã me ihkàhhôc pyxit ne me hipêj, ne ma ramã ite mehkujahêc, mehcahkritatajê wÿr. Mâr quê Jeju na mehkwy mã me axà, neme ihkàhhôc ata cahyt, ne me awpa. Ne ihkàhhôc ata kam wa ite me cumã ijarkwa kujahêc, mâr quê nee ame pahpãm cahàc krekà carô jõ hiatajê kur nare. Ne nee ame, por me hõkre kam caxwÿr nare atajê jîcaprô na mehkur nare, ame ampo caprô atajê kurnare. Ne quê mehprôa me, mempjêa me, ame amji to inxy, nenee quê ame ajpên pê mehprô caxun nare xà na, wa ite me cumã ihhôc ne me cumã ihkujahêc, ihkàhhôc ata kam. Ýhÿ, Pawrô, ita caxuw wa ha me amã me pahkjêjê kwÿ jarê. Ita ri Krîpinkrên kam, me cupê Juta catêjêjàhtôa ne cute amji to me Jeju na mehkwy. Atajê cunea ame Mojxe xwÿ te amji kam hapac xà to me amjikampa, ne ramã ate me hahkre pej ne me hõmpun. Ne xwahna, cute ihmat ri, mehkriatajê mã Juta catêjê te ampo te ihcupan xà to pit mã hahkre to apa na, me ato ihhêj xi na me harên par. Ca xwahna me cumã to hahkre tohane he, quê hapacta ne me Mojxe xwÿ te amji kam hapac xàata mã hikra, ne hanea ne xwahna me Juta catêjê te amjikam hapac xà atajê mã hikra, ne ma apu cutemehkra xũmre mã impy kà kryjre ne hitep tête me cumã. Mã ahna akam me cupê ihkaj na. Na quê ha ita ri acatorna me gahkre pej, ne ihtÿj me amãn kam to ihtêm pyrentu. Ita na ri me ato prãm. Jũ mã cu ha ajte me to? Cu ha pahte mehêj xi xà ita to me hamre prãm to, cu ha me to hane he. Ita ri me pajipôc ri, me pahkam me hũmre te cwatatajê, pê Pahpãm mã ampo to awjahkre. Ne ihtÿj caxuw ame ipijacri to ipa. Ne ramã me cumã amcro te xet peaj ne nõ. Ne cute amji mã me amcro hyr ata jirô pê, quê ha Mojxe xwÿ incaca xà kôt ame amji

cũmpej. Ne caa, ca ha atỳj hanea ne mehkôt mō, quē hanea ne me hipôac ri me acũmpej, ca ha caa cute me acũmpej catêjê mã amji cunea jahpanxà na amgõ. Hamre, quē ha mehcunea me panquêtjê jarkwakôt apa na me apupu. Na quē ha Axij jô pjê pînJuta catêjê kwỳ japôj atajê teame ato ihhêj na, ihtỳj me cumã hahkre pej — hane. Hõ, Jeju na mehkwy to ihmpej catêjê kwỳ te Pawrô mã me hũjarên to hajỳr. Mã cute mempar.

²⁶Ne apê, mã ma cute me hũmre to cwat ne me to tẽ, mã hanea ne me ipijacri xà ita mã me hâr, ne cutePahpãm mã me amji cuhhôn. Jirô pê mã ri ma Pahpãm tome amji kam hapac xà jũrkwa caxwãm pê me hâr. Cute amjimã me ipijacri xà jô amcro pupun prãmte. Ne cutePahpãm mã mehcajrên catêjê pê mehcũmpej catêjêmã hãmjôr xà na amcro hyr, ne me hũrkwa wỳr me amji jaxàr.

Pê me Pawrô pro
Me Hàpên Xà 24.12

²⁷Mã ramã amcro hyr xà na hàhtêp. Mã Jutacatêjê kwỳ Axij jô pjê rũm me cator, ne cute me Pawrôpupun, Pahpãm to me amji kam hapac xà jũrkwa kam. Ne cute mehcunea curi ame ipa atajê rêc, cute mePawrô pro prãmte. ²⁸Ne cute me carâr kam me to ihtêm, ne me carâr to:

— Me ikwỳ! Ajpên me pra! He hũmre itapjê cunea kam, me papê Jutacatêjê te amji kam hapac xà kaj na me cumã ampo tohahkre to ipa! Na ca ha me itehcajpa! Ne hanea ne amepanquêtiti Mojxe te amjikam hapac xà na ihcakôc kêanre to ipa, ne apu Pahpãm tome amji kam hapac xà jũrkwa na ihcakôc kêanre to ipa. Jirô pê mã ri ma Pahpãm to me amji kam pajapac xà jũrkwato cute amehkên prãmte, ma mehcakrit atajê to mō. Ne jũ wỳr quē mehcakrit atajê ikre pejti ata mã me acjêj — hajỳr.

²⁹Ỡhỹ, pê me ita jarên to me hane. Ampo na? Pê me Pawrô kwỳ nō japrỳ te Tropimo, pê Epet jô krĩ kam ihpỳm, ne ihcakrit, ne nee cupêJuta catêjê nō nare, neKrĩpinkrên kam Pawrô me apu mō. Pê me hõmpu, ne ihtỳj cute Pahpãm to me amji kam hapac xà jũrkwa mã me to hâr na ame Pawrô cãmji. ³⁰Mã xwahna ata krĩ cunea kôt ipicrân, mã ajpênamehprôt, ne cute me Pawrô pro, ne ma pō mãPahpãm to me amji kam hapac xà jũrkwa pê me cupjê. Mã Pahpãm to me amji kam hapac xà jũrkwa jamãr catêjê te cator jakân pê, me to harkwa jihê pyrentu. ³¹Mã ramã me hàhtôa te me Pawrô curan kammehtêm. Mã krĩ jamãr catêjê pê Roman catêjê jô krãhtare jô pahhi te kricunea kam, cute me amji rêc na me harên par. ³²Ne cute krãhtare to cuprôn pyrentu, ne ma me hàhtôti atajê wỳr mehprôt. Mã me hàhtôa te krãhtare atajê pupun, ne pea cute me Pawrô cahhyrjicu. ³³Mã me hõ pahhi Pawrô wỳr cator, ne cute hỹrmãhàhtêp ne ihpro, ne wakỳre pijakrut to mehuwapre na harkwa hyr, mã cute me to ihcaypre. Jirô pêcute mehcukij, ne me cumã:

— Pỳhàpà, jũm xũmre mã ajte? Ampo to ri cute ihkên? — hajỳr.

³⁴Mã mehcunea te me carâr kam mehtëm, ne ajtea mãmehkwÿ jÿjarên xà, ne ajtea mã mehkwỹ ame ampona me harê. Mã me hõ pahhi te mempar, ne cupê cute ampo to kên xà ata na hahkre kêatre. Ne cute krãhtare mã harkwa hyr, quê me Pawrô jarĩ ne ma kên te ikre tÿjti ata wÿr me to mō. ³⁵Mã cute me harĩ ne ma me hãpir xà na me to hãpir to mō, ne me to hàhtëp, ne cute me harĩ ne me to kwÿ, cute me curê catêjê cupate. ³⁶Mã me hõ kôt me carâr to me mō, ne me cumã:

— Mehcura! Mehcura! — hane.

Pê Pawrô amji pytà

³⁷Mã ma kên te ikre tÿjti ata kam cute me Pawrô xir. Mã Pawrô te Crec jarkwa to me hõ pahhi mã ihcakôc ne cumã:

— Xà wa itÿj pahhi amã icakôc? — hajÿr. Mã pahhi te amji mã ipikrar, ne cumã:

— Pÿhàpà, xà ca ajte atÿj Crec jarkwa to acakôc? ³⁸Wa xwahna itÿj amji mã ato apê Ejit catêjê nō. Por pê pjê jō pahhi to apu ihkên prãm, ne me hàprêcatêjê to cwat mir ne me to cuprō, ne ma pō mã me to mō ata na wa apu acãmji — hajÿr.

³⁹Mã Pawrô pahhi mã:

— Hamreare, ipê Pawrô, ne ipê Juta catêjê nōa wa, ne Krĩjara jō krĩ kam pê wa ipÿm, krĩ catia to cati ata kam, Quiriti jō pjê kam. Ne wa ha awÿ, ca ito tojnō wa me hàhtëti itajê mã icakôc — hane.

⁴⁰Mã pahhi te ihtÿj cumã harkwa hyr to:

— Gapacta ne me cumã acakôc — hajÿr. Mã me hãpir xà kam Pawrô jãhhuc, ne xa, necute mehcunea kêt prãmte me cumã hũhkra pêr. Mã hamre, mehcunea pinkrên. Mã cute Juta jarkwaa to ihcakôc kam ihtêm, ne me cumã:

22 ¹— Ýhÿ, me ikwÿ me, me iquêtjê me, me ikjêjême, menxÿjê, me ikampa. Wa ha me acunaa mã ite amji pytâr xà ita to me amãamji jarê — hajÿr.

²Mã cute harkwaa to me cumã ihcakôc na mempar, ne me ipinkrên, ne meipinkrên tu. Mã Pawrô me cumã:

³— Ýhÿ, ipê Juta catêjê nōa wa, ne pê waKrĩjara jō krĩ kam ipÿm, Quiriti jō pjê kam, ne wa ita ri Krĩpinkrên kam amji to ajpa, ne Camar pê ri imã ampo to hahkre catê. Ne cute ampo to imãhahkre xà ata pê wa cupê cupy, ne me panquëtti te amji kam hapac xà ata pê hàhtëa to hàhtë, ne cati, pê to hahkre ne cupy. Ne pê wa Pahpãm mã amji gōa to cumã amji gō, tohanea, pom quê ate me cumã amji jōr he. Pê wa nee cormãne Jeju pê Pahpãm kra na hahkre pej nare. ⁴Na pê wa ajco Jeju na mehkwỹ pro to ipa, ite mehcuranprãmte, ne pê wa ajco me hũmre pro, ne pyjê pro, ne cuteme amji jacjên xà kam ajco me to awcapê. ⁵Ne quê Juta catêjê jō pahhi cunea pê prohti kamihtÿj ita na me ijarê, ne ampeaj

kam pê wa ajco me to hajÿr to ipa. Na pê wa Tamatcô jôkrî kam me cupê prohti kam me caxuw ihkàhhôc py, cute me hõmpun ne me cahyt, neite Jeju na mehkwy pro na cute me itehcajpar to prãm to. Ne wa ma curi to mō, ite mejümjê atajê ihpro ne wakÿre to me huwapre, ne ajpênhacpÿ ne Krîpinkrên wÿr me toimör, ne ame to kêanre prãmte.

Pawrô ipintuw na cute amji jarên xà
Me Hâpên Xà 8.3; 9.1-19; 26.1-23

6— Ne pê wa ma mam mō, ne ramã Tamatcô jô krî na ahtêp, pê ramã pyt ikrã jimoac kam jÿ, pê wa ihprôt pê kÿj rûm, cõjkwa rûm ampo prâti catia nō ata pupu, pê iwÿr mō. ⁷Hamre, pê wa pjê kam ipÿm, ne ihcakôc kampa, pêimã ihcakôc ne imã: “Xawrô, Xawrô! Ampo na mã ca apu ito kên?” hane.

8— Hamre, pê wa ihcukij ne cumã: “Pahhi, me anō mã ca?” hane. Mã imã: “Ipê Jeju, mâr wa Naxare jô krî pîn icator, ca apu itokêanre ata wa” hane.

9— Pê hanea ne, por pê wa hûmre me mō atajê, hàhcujro pupu, nenee, por pê imã ihcakôc xà ata na hõkre par pej nare. ¹⁰Hamre, wa ite hipêr ihcukij ne cumã: “Ampo to wa hapahhi ajte?” hane. Mã imã: “To xa ne ma Tamatcô jô krî wÿr tē, curia quê hajüm amã awjarē, he ate imã ite amji mã ampo na prãmti ata ton na ato prãm” hane. ¹¹Ne pê hàhcujro prâti ata ito to kên, pê ito tûm pyrentu. Pê me hûmre ikôt me mō atajê, ma Tamatcô jô krî wÿr me ijaprô ne me ito mō, ne me ito cato.

12— Pê curi hûmre nō japyr te Anana ata pêPahpãm to amji kam hapac catê, ne hõtpê Mojxe xwÿ jôkàhhôc caca xà kampa. Na pê Juta catêjêTamatcô jô krî kam mehkri atajê ihtÿj ajco meAnana kampa. ¹³Ne pê ajpên mō, ne iwÿr cato, ne imãharkwa to: “Ikjê Xawrô, hacpÿa ma rit!” hane. Hamre, pê wa irit pyrentu, ne hõmpu.

14— Pê imã hûjarên to: “Me panquêtti jô Pahpãm te ri amji mã acapi, ne quê ha amã hàpên xà to hahkre. Ca ha Pahpãm kra pê catyt kam ipa catê ata pupu, quê ha taa amã ihcakôc, ca ha kampa. ¹⁵Ampo na? Quê ha ato Pahpãm kra mãimprar catê. Ca ha mehcunea mã, ate ampo pupun neimpar atajê na, amji jarê. ¹⁶Ne mër, ampo mã ca jÿ ne apu hikaj? To xa, ne ito tojnō, wa cô kam acumrã, ca amji tehcajpar xà na Jeju na ahwÿ, quê ha Pahpãm ate amji kam gapac xà kên me gâpên xà kên itajê to tojnō nehicu” hane. Hõ, pê imã hûjarên to hane, pê wa harkwa kôt to.

Pê Pawrô hàpên xà na amji jarê
Me Hâpên Xà 16.35-39

17— Na pê wa Krîpinkrên wÿr amji jaxà, ne Pahpãmto me amji kam hapac xà jûrkwa kam Pahpãm mã icakôc, ne iriat kam hõmpu. ¹⁸Pê imã: “Acator pyrentu, Krîpinkrên pê. Ampo na? Jû wÿr quêita ri jûm akampa, ate ito gûjarên xà ata na” hane.

¹⁹— Pê wa ma apu ijitôt, ne ma Krîpinkrên pê apu icator prâm nõ, na pê wa cumã icakôc ne cumã: “Ijõ Pahhiti, he mehçunea mã ramã ita ri ijâpên xà kêanre atajê na ijahkre pejtu. Pê wa ajcohôtpê cute me akam hapac catêjê te me cuprôn xà jûrkwa wÿr ipa, ne mehpro ne mehcahy. ²⁰Ne pê Tewãw hanea ne hôtépê me cumã ato ihcakôc. Cwÿrjapê pê me Tewãw curan na imã impeaj to impej. Nepê ramã me Tewãw curan xàa kam, pa pê wa itÿjmehtehcajpa ne me cumã mehkã jamã, ata na ramã ne cumãijahkre pejtu” hane.

²¹— Pê Pahpãm pê Pahhiti imã: “Wa ha ma ihmata ri akujate, ca ha mehcahkrit atajê wÿr tẽ” hane — hane.

²²ÿhÿ, cute me Pawrô te me cumã mehcahkrit atajêjarên, mã cute mempar pê kÿj cati pêamã me carâr kam mehtêm, ne me carâr to:

— Mehçura! Ne me to pjê caprã, quê hamre! — hajÿr.

²³Ne me carâar kam cute me to ihtêm, ne mehkã krÿ ne kâj mã me to awcapê, ne me pjê jacrô cakrÿ, ne kâj mã me to awcapê. ²⁴Mã krãhtare jõ pahhi ata te mehkwyãmã harkwa hyr, quê kên te ikre tÿjti ata kam me Pawrô jaxà, ne mehcahy, quê ampo cwÿrjapê ame carâr ata to me cumãawjarê, ampo na mã ajte ame carâr to hane. ²⁵Mã Pawrô cahhyr xà caxuw, cormã ame huwapre kwÿa kam, mã Roman catêjê nõa pê pahhitehcajpar catê ata mō ne cape na xa, mã cute ihcukij, ne cumã:

— Mōrmō ajkî ate ampo na me Roman catêjê nõ cukij nare kam mehcahyr xà ita na me amã impeaj? — hajÿr.

²⁶Mã pahhi tehcajpar catê ata te ita par, ne amji mãipikrar, ne ma me hō pahhi wÿr tẽ ne cumã:

— Co he, ca ha gâpên xà ita to impeaj ne! Nãmri hÿmre ita pê Roman catêjê nõa ri — hajÿr.

²⁷Mã ma pahhi Pawrô wÿr tẽ ne cute ihcukij, ne cumã:

— Imã amji jarê, xà ajkî ampeaj kam mã apê Roman catêjê nõ? — hajÿr. Mã Pawrô cumã:

— Ampeaj kam ri ipê mehnõa wa — hane.

²⁸Mã pahhi cumã:

— Ite hajÿar ne ipê Roman catêjê kwÿ nõa wa cakrô, pê wa nee curi me kam ipÿm nare, ne ajtea mã pjê nõ kamipÿm. Ne ite amji to Roman catêjê kwÿ prâm topê wa amji jahpan xà na ihpore catia ne cugō — hane. Mã Pawrô cumã:

— ÿhÿ, quêt inxû pêRoman catêjê nõa, cwÿrjapê ri ihkôat ipê Romancatêjê nõ — hane.

²⁹Mã ihcahyr catêjê atajê te apu ihcahyr xàa kam, mã cute cupê Roman catêjê nõ na amji jarên, mã cute mempar, ne amji mã me ipikrar, ne me cumã hikran, ne mecupê cator pyrentu. Mã pahhi te Pawrô pê Romancatêjê nõa na hahkre pej, ne apu hÿpa. Ampo na? Cute Roman catêjê incaca xà kaj na me huwapre na harkwa hyr, na ri apu hÿpa.

Pê Pawrô prohti kam me cuna mã xa

³⁰Mã pahhi cormã hüpar pej, ne amji jahkre pej prãm, ampo na mã ajte Juta catêjê ame Pawrô na ihcakôckên. Cwÿrjapê ri cute mehcajrên jô pahhi catêjê me, prohti kam me cati atajê cunea me cuprôn na me cumã hÿjahkre. Jirô pê mã ri cute me wakÿre te Pawrô cajpre ata pôn, ne ma me hÿrmã me to mõi, ne me to cator, ne me cuna mã cute me hãm na mecumã harkwa hydr. Mã cute harkwa kôt me ton.

23 ¹Mã Pawrô prohti kam me hõmpun tÿjti ne me cumã:
— Me ikjêjê! Pê wa icapênti na caxwãm catia mã Paphãm cuna mã amji toajpa, ne ahnaa cormã ita kam to xa he — hane.

²Mã Anana pê Paphãm mã mehcajrên catêjêjô pahhi catihtti ata te me cahê na mehcuhhê catêjê atajê mã Pawrô jarkwa kam me cakwîn na harkwa hydr. Mãcute harkwa kam me cakwîn. ³Mã Pawrô Anana mã:

— Pÿhàpà, ihhêj ne põi rÿm apejti, ne acaxwãm pê akêanre! Quêha Paphãm hanea ne acakwî, ate icakwîn ita jahpan xà na. Ne me panquêtjê incaca xà kôt mehcuikij catê itana ca akrî. Mër hõhõ, ampo na mã ate icahhydr nagarkwa hydr? Ca me panquêtjê incaca xà ihkaj na apuito hane — hane.

⁴Mã me hÿmre me Pawrô na mehcuhhê atajê me cumã:
— He ca apu Paphãm mã mehcajrên catêjê jô pahhitixÿn, ne ahna ihkaj na — hane.

⁵Mã Pawrô me cumã:
— Me ikjêjê, wa nee ite cupê pahhiti ita na hahkre pejnare. Wa hahkre pej na mã, wa nee cumã icakôc xà ita tohajÿr nare. Ampo na? Paphãm jarkwa na cute mehkhôc catêjê jõkàhhôc kam pê mehkhôc to me hane he: “Nee ame akwÿ jô pahhiti na acakôc kên nare” — hane.

⁶Ne Pawrô te prohkam me hakrã pijakrut na me hahkre pej, mã mehkwy pê Xato xwÿ kôt me ipa catêjê, ne mehkwy pê Parixêw catêjê. Mã cute me to ipicapôn prãmte kÿj cati pëa mã hüjarên, ne me cumã:
— Me ikjêjê, inxÿ pê Parixêw catêjê nõa, na ri ipê Parixêw catêjê nõa wa. Ne pa wa ita ri, cute me amji cukij xà kam xa, mã ameicukij. Ampo na? Wa itÿj mehtyc itajê te hacpÿa mã mehtÿr na amji mã me to hajÿr to ipa, na wa ita ri xa — hajÿr.

⁷Hõ, cute me cumã ita jarên to hajÿr. Mã Parixêw catêjê me Xato xwÿ kôt me ipa catêjê te me ajpên mãn kam mehtêm, mã prohkamcute me hapackre catêjê atajê picapôn. ⁸Ne ampo na mã ame ajpên mã? Nee mã ampo na amê ajpên mãn nare. He me cupê Xato xwÿ kôt me ipa catêjê ma apu hacpÿ mã mehtyc tÿr na me harên par caca, ne hanea ne ma apu cõjkwa pîn Paphãmjarkwa to memprar catêjê na me aprã, ne hamreare na me harê, ne me carõjamreare na amji mã me harê. Mã Parixêw catêjê ampo itajê cunea na amji mã me to hajÿr to me ipa. ⁹Na ri kypê ajpên mã

ame caràr to me ipa nare. Mã Parixêw catêjê kwÿme, Mojxe xwÿ te me hapackre xà me cumã to hahkre catêjê atajê me, me hãm, ne hanea ne me caràar kam, cute me harên to:

— Wa nee ite me hÿmre ita kam ihkên xà nõ pupun nare. Quê ihhêaj to ampeaj kam cõjkwa pîn Pahpãm mã imprar catêjê nõ cumã ihcakôc, nare, quê me carô nõ cumã ihcakôc, cu ha ahnaa mã me — hajÿr.

¹⁰Ne ihtÿj me ipijapu to me mõi, ne ampeaj kam me ipijapu xà ita catia to cati, na ri krãhtare jõ pahhi mãcute ihhêaj to amji pê ame Pawrô jirên na hÿpa. Cwÿrjapê ri cute krãhtare wrÿc na me cumãhÿjahkre, quê me wrÿ ne me Pawrô capa, ne ma kên te ikre tÿjti ata wÿr me to amji jaxà. Mã krãhtare wrÿc ne cute me cupê Pawrô caxàr, ne ma hacpÿ mã me tomõ.

¹¹Mã caxwa ata kam Jeju pê me pajõ Pahhiti te Pawrô mã amji to ipipê ne cumã:

— Apu pa nare, awcanã. Ca ate ita ri Krÿpinkrên kamijarên, ne ca ha atÿj hanea ne Roman jõ krÿ kamijarê — hajÿr.

Pê Pawrô curan na me amji pa

1 Timot 4.18

¹²Mã apê, mã Juta catêjê kwÿ te me amji to cuprõn, neampeaj kam me ipijacri tÿaj kam, me hãpàn nare, ne amehkõm nare kam, cute mePawrô curan na me amji ton. ¹³Ne por pê me hÿmre me ajpên pa atajê pê me hàhtõ na me cwarênta jirõa pê. ¹⁴Ne ma Pahpãm mã mehcajrên catêjê jõ pahhi kwÿ me, mehkwy jakrã jõ pahhi catêjê wÿr me mõi, ne me cumã:

— Ýhÿ, wa ite me ijãpàn nare kam me Pawrô curan na ampeaj kam me amji ton, ne wa ha xa mehcura, ne cormã me ampo krê, ne me ikõ. ¹⁵Na ca ha ita caxuw prohti kam catêjê me, krãhtare jõ pahhi mã me awjarê, quê ajpên ita ri me Pawrô to mõi. Ca ha me hõ pahhi mãahêj, ne cumã: “Wa hipêr me Pawrô jÿjarên parprãm, ca ha ajpên me ite cuprõn xà wÿr to mõi” hane. Quê ajpên to mõi, wa ha ramã pryjahkã kõt me hikaj, ne catorxwÿjrea na pry kõt mehcura — hane.

¹⁶Mã Pawrô támxwÿre ata aracri xa, ne cute me ajpên par xà ata namempar, ne ma kên te ikre tÿjti ata wÿr tẽ, neinquetti wÿrhàr, ne cute cumã hÿpar xà ata jarên par. ¹⁷Mã Pawrô te krãhtare nõ na hàhwÿr, ne cumã:

— Ijaparire ita japrõ ne to mõi, gõ pahhi wÿr. Quê haihtÿj cumã ampo ata jarê — hajÿr.

¹⁸Mã krãhtare te haparire japrõr ne mahõ pahhi wÿr to mõi, ne hÿrmã to hãr, ne hõ pahhi mã:

— Ýhÿ, por cute me Pawrô jaxàr mã xa ata te ina hàhwÿr, wa ite awÿr haparire ita japrõr ne to mõi, quê amã ampo ita jarê — hajÿr.

¹⁹Mã me hõ pahhi te intuwre ita jÿhkra na ipyr, ne mame cupê to hÿjawry, ne cute ihcukij to:

— Ampo ca apu imã harên prãm? — hajÿr.

²⁰Mã cumã:

— Ýhÿ, wa nee apu amã ampo jarên prãm nare, quê ha Juta catêjê Pawrô curan prãmte me amãihhêj, ne hipêr me hÿpar prãmte cute me cuprôn xà ri quêtiti na me ana ahwÿ. ²¹Ca ha nee me kam gapac nare, ampo na he ame amã ihhêj. Ne mehÿmre te me ajpên par atajê jãhtô te cwarênta jirôa pê, quê haquêtiti mã me amxu ne pryã kôt mehcura. Ne mehcunea neme hàpàn nare, ne mehkôm nare kam, xa me quêtiti curan, ne cormã ame hàpàn ne amehkôm na cute me amjiton, ne cama ramã amji caxuw meakampa — hane.

²²Mã krãhtare jô pahhi te cumã:

— Nee jÿm mã ate imã ampo jarên ita jarên nare — hane. Ne ma cute intuwre ita kujahêc, mã tẽ.

Pê pahhi Peri wÿr me Pawrô kujate

Me Hàpên Xà 21.27-39; 22.24-30

²³Mã krãhtare jô pahhi te krãhtareto ipijakrut ne cumã hàkjêr ne me cumã:

— Wapohiti na me krãhtare to me xêj to ajkrut ne me haprô, nehanea ne cawrô kam krãhtare to me xetênta ne mehaprô, ne hanea ne kruwxwa na krãhtare to me xêj to ajkrutne me haprô, quê meahcuprô, ne Xexa jô krÿ wÿr me pra, caxwa ryre kam. ²⁴Ne hanea ne me Pawrô mã cawrô nõ mã me acato, quê kam jÿ, ca me huwahi to impeaj ne, ne ma pahhiti pê Periwÿr me to mō, Xexa jô krÿ kam — hajÿr.

²⁵Jirô pê mã ri pahhi ata te ihkãhhôc pyr, ne cutekam ihhôc to hajÿr he:

²⁶— Ýhÿ, Peri pê pahhi catihti ita, xà apeaj? Ipê CrawtiRixij, ne itea wa amã ihhôc, ne amã ihkujahêc.

²⁷— Juta catêjê te me hÿmre ita pro ne ajmãrmehcuran. Wa ite me cupê Roman catêjê nõ na hahkre pej, neite ijô krãhtare to me cupê hÿtãr. ²⁸Ne wa ite ampo na cute ame to kên to hajÿr na hahkre pej to prãmtehaprôr, cute me hapackre catêjêwÿr. Ne me cupê Juta catêjê pêprohkam, ite me cuna mã hÿmre ita xãm. ²⁹Ne ite nee ihtycxã caxuw, nare, cute me haxãr xã caxuw, cute ampo kên ton nare na, hahkre pej. Ne menquêtjê caca xãkôt cute ampo kên ton na ame harê. ³⁰Ne wa ramã ite Juta catêjê kwÿ te me Pawrôcuran na me amji ton na me hahkre pej, ne ite to amji kamijapac, ne ite amã ihkujahêc. Ne ite me cumãn, quê acunaa mã me Pawrô kên na harê. Hamre, ita na pitmã wa ite amã ihhôc, apej pêã mã mō. Ipê CrawtiRixij — hajÿr.

³¹Mã krãhtare catêjê te hō pahhi par, ne cute mePawrô japrôr, ne ma caxwa ri me to mō, Antipatrij jô krÿ wÿr. ³²Ne apê, mã krãhtare catêjê te me cwatxênta atajêmehpar kam ame ipa atajê te hacpyã mã kên te

ikre tÿjti ata wÿr meamji jaxàr ne me mō. Mā cawrô kam krâhtare mepra atajê ma Pawrô to me mō, Xexa jō krī wÿr, ne me tocator. ³³Ne cute Peri pê pahhiti mā me ihkâhhôc pyr ata jōr, nehanea ne hũhkra mā me Pawrô jaxàr. ³⁴Mā pahhiti te ihkâhhôc cahyt ne Pawrô cukij ne cumã:

— Hã, pjê jũ kra mā ca? — hajÿr. Mā cumã:

— Ipê Quiriti jō pjê kra — hane. ³⁵Mā cumã:

— Quê ha xa cute me akôt harên kên catêjê me cato, wa ha cormãakampa — hane. Jirô pê mā cute krâhtare catêjê mäharkwa hyr, quê Heroti xwÿ jũrkwa mā me Pawrô jaxà, ne me huwahi tu. Mā cupê pjê jō pahhiti ata jũrkwa kam, cute me haxàr.

Pê Juta catêjê Pawrô pro rē

Ruc 21.12-13; Me Hàpên Xà 25.7

24 ¹Ne amcro te xīc jirô pê mā ri, ma Anana pê Pahpãm mā mehcajrên catêjê jō pahhi ita me, prohti kam mehkwyê kwÿ me, ma Xexa jō krī wÿr me mō, ne cute mencaca xà jahkre pej catêjê me, mā hanea ne cute me hũjarên catê japrÿ te Tertur ata japrôr, ne ma me to cator. Ne Peri pê pahhiti wÿr me hâr. Necute Pawrô to mehcahôc kên kam mehtêm. ²Ne cute me Tertur na hàhwÿr, ne Pericuna mā me hãm, mā Tertur te Pawrô kôt harên kên kamihtêm, ne pahhi mā harên to:

— Ÿhÿ, pahhiti! Apeaj to apej, ne ate amji jahkre peaj toamji jahkre pej. Cwÿrjapê wa me ipej pêa mā me amji toajpa, rÿ pêa mā wa me ipej pêa mā amji to me ajpa. Neramã ate ampo jãhtôa ne to impej to mō, me pajô pjêita kam. ³Ne ate me imã ampo jãhtôa ne hôr, pjê cunea kam, amcro me caku cunea kam, ne tahnaa ri me imã impej. ⁴Ne wa ha nee apê ijãmtâr to iryti nare, ne wa awÿ, ca ipar to hatujre ne.

⁵— Wa ite me hũmre ita jahkre pej, mā ihhêj rũm cupêhà pyrãac ne ipa, mā ampo kên cunea hapôj to ipa. Ne Juta catêjê kam xwahna to, ne pjê cunea kam to, ne krī cunea kôt xwahna ton to ipa, ne ihkên ton to ipa. Ne cupê Naxare jō krīcatêjê kwÿ jō pahhi, ne ihtÿj ame pajô pjê jō pahhito kên prãm to ipa. ⁶Ne tee apu Pahpãm to me amji kam hapac xà jũrkwa to kên prãm, ne ampeaj kam ihtũm prãm. Na wa tee me to jũ na to prãm, me icaca xàa na. ⁷Mã krâhtare catêjê jō pahhi pê Ritij ita te meijũhkra kam, hàprêa kam, Pawrô caxàr. ⁸Ne cutea ri awÿr me ikujahêc, wa me acunaa mā amePawrô na me icakôc kên. Na ca ha hũmre ita cukij ne hiakampa, ne pom wa me ampo jarê itajê, quê ha taaharê — hajÿr.

⁹Mã Juta catêjê mehcuhhê ne me Tertur jũjarênxà kampa, ne me taa xwÿjê me harên to:

— Ampeaj kam riampo kên ton to ipa — hane.

Pê Pawrô harkwa to amji pytà, Peri cuna mã*Ruc 21.14-19*

¹⁰Mã me hõ pahhiti pê Peri te Pawrô te hũjarên xà na cumã ihkrã tohãhhêc. Mã Pawrô tehũjarên kam ihtêm ne me cumã:

— Ýhỹ, wa ite ramã, apê Juta catêjê kammehcukij catê na caku jãhtôa na, gahkre pej. Cwÿrjapêwa acunaa mã icakôc, ne amji jarê ne amji pytà, pyrên wa apu ijakry.

¹¹— Ýhỹ, wa curmã Krîpinkrên mã icator. Ne cormãicator na amcro te tôxi peaj. Ne atÿj mehçukij, quê ha taa me amã awjarê. Wa Pahpãm to ite amji kam ijapac prãmte, wa Krîpinkrên kam icator. ¹²Ne nee Juta catêjê nõ te ite ampo to jũ mân toimôr na ipupun nare, ne nee wa apu jũm caxun to imôr nare, ne wa nee Pahpãm toamji kam me hapac xà jũrkwa kam, ite jũmjê rêcnare, cute me cuprôn xà kam. Ne hanea ne krî ata kam, nee krî cape na ite jũmjê rêc nare. ¹³Ne nee mehnõ te ampo kên na ipupun nare, ne nee ijũjarên xà nõ na, jũm te ipar nare ita kam, jũ mã quê me ijarên to?

¹⁴— Ne ampo pyxitre ata na ri ampeaj kam me ijarê. Waitÿj Jeju te amji kam hapac xaa kôt, me panquêtjê jô Pahpãm pynâr to ipa. NeJuta catêjê pê cama ita naihkaj na. Ne imãa ite amji kam ijapac xà te hajÿr he, na wa itÿj ihcunea kampa, ne itÿj Mojxe xwÿ jô kãhhôc kampa, ne Pahpãmjarkwa to mehçakôc catêjê jô kãhhôc kampa. ¹⁵Ne wa ha itÿj Pahpãm jikaj, quê ha jũ caxuwihitÿj hacpÿa mã mehtyc atajê to ihtîr. Mempejti atajême, mehkên atajê me, cute hacpÿa mã me to ihtîr na, wa itÿj amji mã to hane. ¹⁶Na wa apu ikên ton nare, ne caxwãm catia mã icapênti na ipa, Pahpãm me, mehçunea cuna mã.

¹⁷— Ne hamre, pê wa Krîpinkrên pê icato, ne ma pjêcunea kôt apu ipa, ne curia amji to caku kwÿ kujate. Necurmã wa ite hacpÿa mã me ikwÿ wÿr amji jaxâr, Krîpinkrên wÿr. Ite me cumã ihpore nõ jôr prãmte. Nehanea ne ite Pahpãm mãampo to ijũjahkre ata jôr prãm. ¹⁸Ne ite Juta catêjê caca xaa kôt me amji cũmpej jirô pê, Pahpãm to amji kam me hapac xãjũrkwa mã ixâr, ite me Pahpãm mã ampo jôr prãmte. Me icrê wa me mõi ne me icuhhê, ne nee wa ame ikênton to me ipa nare, ne ata kam ri Juta catêjê kwÿ Axij jô pjê pîn me cator, cute me ipupun. ¹⁹Ne quê rÿ mã ajpên cute me ipupun catêjê atajêa me mõi, ne cute ikam me ampo kên pupun xà atajêa na, me taa acuna mã me ijarê, nare, quê, pom prohkam mehkwy ita ri me xa atajêa me amã meijarê. ²⁰Ne pê wa me cunaa mã ixãm xà ata kam, pê wa neeme kam mare mã ampo kên ton nare. ²¹Ne ampo pyxit peaj ata pê wa to, ne kÿj cati pêamã me cumã icakôc, ne me cumã: “Ýhỹ, wa itÿj hacpÿa mã Pahpãm te mehtyc atajê totîr na amji mã to hane, ata cwÿrjapê mã ca ameicukij” hane — hajÿr. Hõhõ, Pawrô te pahhi pê Peri mã amjijarên to hajÿr.

²²Mã pahhi pê Peri te ramã Jeju na mehkwy te amji kam hapac xà jahkre pej. Ne cute me cumã amcro nõ hyr, neme cumã:

— Hamre, ita kam ita pit, quê ha xa krãhtare jõpahhi pê Ritij ata cato, wa ha cormã me acaca xà ita najũ na me ato — hajỹr.

²³Ne cute krãhtare pê Pawrõ jamãr catê ata mã harkwa hyr, ne cumã:

— Ỹhỹ, ita ri kên te ikre tỹjti ata wỹr Pawrõ japrõ, ne hamãr to impeaj ne, quê nee jũ kam ihtẽm nare. Ne kyre pê huwapre, ne ikre kam apu ipa na to tojnõ, quêt taa apu ipa. Ne quê ihhêaj to me hõikwy nõ mã mehtehcajpar prãm na, ca ha atỹj me to tojnõ, quê taamehtehcajpa — hane. Ne cute kên te ikre tỹjtiata kam me Pawrõ xir, mã curia hãhhuc ne apu mõ.

Pê Pawrõ Peri me Truxirkwỹj cuna mã xa

²⁴Mã amcro kwỹ te me hakren jirõ pê mã ri Peri me hĩxi japrỹ te Truxirkwỹj cator, ne cupê Juta catêjê cahãj nõa. Necute me Pawrõ par prãmte me ahna hãhwỹr. Mã Pawrõ te cumã Jeju to cute amji mã mehhimpej xà jarẽn to hajỹr:

²⁵— Cu ha me pahcunea catyt kam me papa, ne ma ampo kên tẽte me amji jiprõn tome papa. Quê ha amcro nõ na Pahpãm me pahcukijne me pahkrã kên catêjê me, me pahkrã pej catêjê me, me pahto ajcokjê. Ne apu mehkrã kên to kên, ne mehkrãpej to impej — hajỹr. Hõ, Pawrõ te me cumã hũjarẽn to hajỹr. Mã Peri te ita par, ne cumã hũpaa to hũpa, mã cumã:

— Gapacta ne mõ. Wa ha jũ caxuw ana prãm, ne hipẽrgaprõ — hane.

²⁶Ne ihcaprỹ na ihpore na Peri Pawrõ jikaj. Cwỹrjapêri cute Pawrõ na hãhwỹr to amcro jãhtõa ne apu cumãihcakõc.

²⁷Mã Pawrõ te curia amji to caku pijakrut kujahêc. Jirõ pê mã ri pahhi pê Peri ata cator. Mã haxà kam pahhitituw nõ japrỹ te Porxij Pexõ ata xãr cakrõ, neePeri ata te Pawrõ cator na to tojnõ nare. Ampo na? Cute amji to Juta catêjê cajpuaw prãmte.

Pê Pawrõ mã Roman jõ pjê catêjê jõ pahhiti cuna mã amjixãm prãm

25 ¹Mã pahhiti tuw pê Pexõ ita xãr, ne ahna amcro incrê jirõ pê mã ri, ma Xexa jõ krĩ pê cator ne Krĩpinkrẽn wỹr mõ. ²Mã mehkwy jakrã jõ pahhi kwỹ me, Pahpãmmã mehcajrẽn catêjê kwỹ me, cuna mã me hỹr, ne cutePawrõ kõt me harẽn kên kam mehtẽm. ³Pê ramã Krĩpinkrẽn jõ pry kõt Pawrõ curanna me ajpẽn pa. Cwỹrjapê ri cute me Pexõ name hãhwỹr, quê me cumã Krĩpinkrẽn wỹr Pawrõkujate. ⁴Mã Pexõ te me cumã:

— Ma Xexa jõ krĩ kam Pawrõ me hacjẽn xà kam nõ. Nequê ha ina ahtũm nare wa ha hỹrmã amji jaxà. ⁵Quê ha cute ampo kên ton na, quê ha me gõ pahhiipynã, ne curia me icunaa mã ihkõt me harẽn to kên —

hajÿr. ⁶Mã Pexô te curi me cahê na amji to amcro toôjtô, nare, cute amji to amcro to tej, ne ma hacpÿa mãcute amji jaxâr, Xexa jô krî wÿr. Ne apê mã mehçukijxà mã hàr ne hÿr, ne cute Pawrô japrôr na me mên. ⁷Mã Pawrô cator, mã Juta catêjê Krîpinkrênpîn me mõi atajê te me Pawrô krã, ne cute me cumänkên tÿj kam me to ihtêm. Ne me cumã curê catêjê ame to xwahna to me ipa, ne jÿ wÿr quê jÿm ihkên nõ na harê.

⁸Mã Pawrô te harkwa to amji pytâr, ne me cumã:

— Wa nee ite me panquêtti pê Mojxe xwÿ cacaxà cuna mã ampo kên ton nare, ne nee Pahpãm to me amji kam hapac xà jÿrkwa cuna mã ampo kên ton nare, ne hanea ne nee Xexa pê Roman catêjê jôpahhiti caca xà cuna mã ampo kên ton nare — hane.

⁹Mã pahhi Pexô te Juta catêjê mã hakry tonprãmte, cute Pawrô cukij, ne cumã:

— Xà nee amã Krîpinkrên wÿr amôr prãm nare, quêamã amôr prãm, wa curia acukij? — hajÿr.

¹⁰⁻¹¹ Mã Pawrô cumã:

— Apê Roman catêjê jô pahhiti mã gâpên catê, neRoman catêjê te amji kam hapac xà kôt mã ca apu icukij. Ne wa ihhêaj to ite ampo to kên mã impârâpên, gapacta ne atÿj jÿ na me ito. Ne hamre, wa ramã ate icuran xàa caxuw apu ijâhcuprôn, ikên jahpan xà na ijâmjôr xà caxuw. Quê ha me cupê Juta catêjê te ame ito ihhêj na, quê ha nee jÿm me cumã ijôr nare. Ne nee ite Juta catêjê to kên nare na, ramã ateajahkre pej pejtu. Cwÿrjapê wa itÿj Roman catêjê jôpahhiti cuna mã ixâm, ne cumã icakôc prãm, mâr quê taa icukij — hane.

¹² Mã Pexô te harkwa kôt cute me hapackre catêjê me, me ajpên par, ne Pawrô mã:

— Ca Xexa pê Roman catêjê jô pahhiti wÿr akrâr, na wa ha itÿj hÿrmã akujate — hajÿr.

Pê Pawrô Acrip me Perenikwÿj cuna mã xa

¹³ Mã amcro kwÿ jâhtôa jirô pê, pahhiti nõ japrÿ te Acrip pê Heroti xwÿ kra, mehîxi japrÿ te Perenikwÿj Xexa jô krî mã cator. Necute pahhi tuw pê Pexô pupun, ne ajpên pyrên me hakryti to prãm to ri hÿrmã me cator.

¹⁴ Mã amcro nõ jirô pê, Pexô te Acrip pê pahhitimã Pawrô jarên ne cumã:

— Ýhÿ, ita ri pahhi pê Peri teme hacjên xà mã hÿmre nõ ita jaxâr, mã hikwa. ¹⁵ Wa mõi ne Krîpinkrên mã icator, mã mehkwÿ jakrã jô pahhi me, Pahpãm mã mehçajrêncatêjê jô pahhi kwÿ me, icuna mã ame imã hÿmre ita kôt harên to kêanre, ne ite ihçukij neiçuran na, cute me ina hàhwÿr.

¹⁶ — Wa ite me cumã amji jarên to: “Wa Roman catêjê incacaxà na apu ipa. Ne me icaca xà ata kôt, quê ha xa icuna mã cute ame ajpên na mehçakôc kêanre catêjê me ajpên cuna mã me xa. Quê ha mam cute me cumãn catêjê atajê pê cute amji pytâr xà na ihçakôc. Wanee ita cumam

cute me cumã xi catêjê atajê mã, cute jũm curan xà caxuw hõr nare” hane.

¹⁷— Mã ita ri mehcunea cator, wa nee ite hipêr me to amcro nõ mên nare, ne apê wa ma ramã mehcukij xà mã ixàr, ne ite hũmre ata japrõr na me mên, ne itỳj apu ihkên cati na ihcãmji. ¹⁸Mã me curê xwỳn catêjê cator, ne nee ite ampo naihcãmji xà atajê nõ na cute me harên nare. ¹⁹Ne mencaca xàa kôt, cute me ampo pyxit peaj kênre ata na me harên. Ne hanea ne cute me cumã mehcakôckên, por pê jũm xũmre japyr to ame Jeju, pê ramã tyata, mã Pawrô ampeaj kam amji mã hũmre ita tiar na ipa na harê. ²⁰Wa nee ite hahkre pej nare ita kam, jũ mã wa ha to ne hahkre pej. Cwỳrjapê wa ite Pawrô cukij, quê ihhêaj to Krĩpinkrên wỳr cumã mõi prãm quê mõi, quê ha curia mehcukij. ²¹Mã Pawrô te pjê jõ pahhiti pê Xexa Aguxôpê Roman catêjê jõ pahhiti wỳr amjikrâr, ne cute huwapre itana hãm na iwỳr, ne ahnaa Roman catêjê jõ pahhiti wỳr cato, quê ha taa jũ mã to. Ita na wa ite ahna krãhtare te hamãr catê mên, quê me hamã, wa ha ahnaa Xexa pê pahhiti mã ihkujate — hane.

²²Mã Acrip cumã:

— Wa itỳj ijõtpê pa hũmre ita par prãm — hane. Mã pahhi Pexô cumã:
— Apê na ca ha kampa — hane.

²³Ne apê, mã pahhi Acrip me Perenikwỳj cator, cute mecuprõn xà kam. Mã me hàhtõa ne ahna cute me cuprõn, neme cumã ampeaj ne me to mõi, mã ihkà impejti kam mõi. Mã krĩ kam me cati catêjê jãhtõa me, krãhtarecatêjê jõ pahhi catihti atajê me, ramãcute hikaj xà cute me cuprõn. MãPexô te Pawrô na hàhwỳr mã cator. ²⁴Mã Pexô te ahna me cumã:

— Ýhỹ, pahhiti pê Acrip me, pom ca ita ri me acunea me xa itajê, me hũmre ita pupu he! Krĩpinkrên kam me cupê Juta catêjê cunea me, hanea ne ita ri amehkrĩ atajê tehũmre ita na icuna mã amehcakôc kãanre. Nehõtpê ame carãar kam, ihtỳj me hũmre ita curan na me awjahkre.

²⁵Ne imãa cute nee ampo kên cati ton nare ita kam, ampo na quê ty? Ne hanea ne cutea Xexa pê Roman catêjê jõ pahhiti wỳr amji krâr, cwỳrjapê wa ite hỹrmã ihkujahêc na amji ton. ²⁶Ne ipê cormã hahkre kêatre ita kam, ampo na wa ha ajte Xexa pê pahhiti mã ihhõc? Cwỳrjapê wa iteme acuna mã hãm, ate mehcukij xà caxuw. Ne mam cati mãca ha, caa, pahhiti Acrip ihcukij. ²⁷Wa ha kampa, ne cormã hahkre pej, ne ahna ihhõc. Ne jũ wỳr wa ite cute ampo kên ton na hahkre pej nare kam ahna ihhõc, ne cumã ihkujate, ahna ipê ihkajna — hajỳr.

Pê Pawrô harkwa to amji pytà, Acrip cuna mã

Me Hàpên Xà 8.3; 9.1-19; 22.1-21

26 ¹Mã pahhi pê Acrip te Pawrô mã ihcakôc ne cumã:
— Gapacta ne imã amji kôt harê — hane. Mã Pawrô te hũhkra pẽr ne cute ihcakôc xà to amji pytàr kam ihtêm ne cumã:

²— Ỹhỹ pahhi pê Acrip, ita kamite acuna mã amji pytâr xà ita pyrên ampeaj kam imã amji kîn. Por Juta catêjê te inaihcahôc kên ata pê, wa ha itÿj amji pytã. ³Ne icuxã apê Juta catêjê nõ, ne ramã ate amji kam me pajapac xà cunea pupun pejtu, ne hanea ne ramã ate, cute me amji kam hapac xà pihhocatêjê te amji kam me hapac xà jahkre pej pejtu. Mã ihtÿj cute ina mehcahôc kên. Na wa awÿ, ca catyt kam jÿ ne ikampa.

⁴— Ỹhỹ, ramã Juta catêjê cunea te, me ite amji kamijapac xà pupun pejtu. Ne me cumã ijahkre pej, pê wa icirena ijõ pjêa kam amji to ajpa, ne hanea ne Krîpinkrên kam amji to ajpa. ⁵Ne mam Parixêw catêjê kwÿ mã axã. Ne pom Parixêwcatêjê kwÿ ata pê mehkwy atajê cunea jirõa pê Jutacatêjê caca xà na me hünär tu. Ne Juta catêjê mãita na ijahkre pej, ne quê ha me cumã amã ijarên prãm, quê ha ihtÿj amã me ijarê. ⁶Ne wa itÿj, por pê Pahpãm mepanquetti mã jüm to awjahkre ata to me cumã ijüjarên to ipa, ne incwÿrjapê mã ame icukij, ne ina mehcahôc kêanre. ⁷Ne wa itÿj Juta catêjê cunea me, me ikwÿ cunea me, ikre ry cunea, Pahpãm te me pamã jüm to hüjahkre atajikaj. Ne wa hõtpê, amcro me caxwa cunea kam, Pahpãm to me amji kampa, ne me jüm ata jikaj. Ne wa Jeju to Pahpãm me pamã awjahkre ata na me hikaj, ne incwÿrjapê mã ameina ihcahôc kên. Mã Pahpãmte Jeju pê ihkra na to ipipê prãmte, hacpyã mã to ihtîr. ⁸Xà quê ajkî nee Pahpãm hacpy mã jüm to ihtîr nare? Hãpã, quê ihtÿj jüm to ihtîr.

⁹— Ỹhỹ, pê mam cormã ipê Jeju jahkre kêatre kam, pê wa itÿj cuna mã ajco ikên ton to prãm to amji kampa. Na pê wa itÿjajco Jeju na mehkwy to kên to amji kampa. ¹⁰Ita na pê wa Krîpinkrên kam amji to. Pê wa mepajõ pahhi catêjê jarkwa kôt ajco Jeju na mehkwyjãhtõa ne me hacjê. Ne mehcuran xà kam, pê wa haneane me cuna mã icakôc. ¹¹Amcro atajê cunea kam pê wa ajco me to kên to hajÿr to ipa. Cuteme cuprõn xà cunea kam, cute meJeju mã hikran prãmte, pê wa ajco me to hajÿr to ipa. Cwÿrjapê pê wa ajco me cumãquêt, ne ajco me to kên. Ne ampeaj kam hãn me kam icryc, pê wa ma ajco krîkõt ipa, ne me to kên kryjre nare.

Pê Pawró hipêr cute amji to ipintuw xà to ihcahôc

¹²— Cwÿrjapê pê wa ma me hõ pahhi jarkwa py ne to mõ, Tamatcõ jõ krî wÿr. ¹³He ampeaj kam pahhi, wa apu amã amji jarê, pê ramã pyt ikrã cajpuw hÿr kam, pê wacõjkwa pîn, pyt jirõa pê ampo prãti ata pupu, pry cahti ri. Pê ampo prãti ita ipu na ajxê tu, ne hanea ne me ikwÿ pu na ajxê tu. ¹⁴Na pê wa me icunea pjê kam me ipÿpÿm, wa ite cõjkwa pîn me jüm kampa, pê me imã Juta catêjê jarkwa to ihcahôc to: “Xawró, Xawró, ampo na mã ca apu ito kên to hane? He ca, caa apu amji jaxõp to prãm, ne ampeaj kam gãprãr xi. Na ca, caa apu amji jaxõp to apa. Ne ihhêj rüm apê pryti jãprê, mã amnã, ne wakÿti xwahhi to amji caxwÿyata pyrãac” hane.

¹⁵— Pê wa kampa, ne ihcukij to: “Me anõ mã ca?” hane. Pê imã: “Ipê Jeju, por ca apu ito kên ata. ¹⁶Amji tỳaj ne to xa. Wa ramã ite amji mã ato imã gâpên catê xà na, amji mã acapi, ne amã amji toipipê. Ne ita caxuw ca ha, pomate ita kam ampo pupun ita to me akwỳ mã awjarê, wa hacormã amã ampo jarê ne amã to hahkre, ca ha me cumã harê. ¹⁷Wa ha itỳj Juta catêjê pê apytà, ne mehcahkritatajê wỳr akujate, ne hanea ne mecupê apytà. ¹⁸Ca ha mento jahkjê, quê awcapàtkô pê me cato, neme apê pupu, ne hanea ne me pahcurê xwỳn carôt pê mecato, ne Pahpãm pê Inxũ Cati wỳr me apkjê. Ahnaa mã quê ha jũm ikampa, ne ampeaj kam ito amji mã ihhimpej, wa ha itỳj ihkên pê hũtã, ne mam cute Pahpãm to kên atajê to tojnõ ne to ijapac kêt, ne ma Inxũ Cati na mehkwy mã haxã” hane.

Pê Pawrô hàpên xà to ihcakôc

¹⁹— Pahhi Acrip, he pê wa iriatkam cõjkwa pĩn kampa na, wa itỳj kampa. ²⁰Pê wa mam Pahpãm jarkwa jarê Tamatcô jõ krĩ kam, ne hirõ pê Krĩpinkrên kam harê. Ne Jutajõ pjê kam, mehcahkrit me, meipicacwỳr kam ajco me cumã harê, pê mehkênjicu, ne Pahpãm wỳr me amji jaxã, ne me kam mare mã cuteme ampo kên ton atajê jicu tu. Ampo na? Mãr quê neehipêr cute me ampo kên ton nare na cumã me amji jarê, ne quêt ampo pej to pit mã me to me ipa.

²¹— Hõhõ, ampo itajê cwỳrjapê pê cuprõnxã kam, Juta catêjê me ipro, ne ame icuran prãm. ²²Ne amcro ata kam, pê Pahpãm itehcajpar kam tẽ, neme cupê ipytã, ne cormã itehcajpar to ipa ita na. Cwỳrjapê wa mehcunea mã Pahpãm jarkwajarê, me cati me, me cupê ampo jamreare atajê mã. Wa nee Pahpãm jarkwa to mehcakôc catêjê me, me panquetti Mojxe te amji kam hapac xà jirõa pê me cumã ijũjarên nare. Pêjũmjê atajê hanea ne icuxã Pahpãm te mepamã jũm to hũjahkre ata to ajco me awjarê. Ne hõtpê imã ijũjarên xà te hajỳr. ²³Pê Pahpãm me pahtehcajpar xà caxuw me pamã jũm pê Crixto to awjahkre, ata pê ihtỳj amji pupun xà kêanre to amji pupu, ne ty ne hacpỹa mãihtĩr. Cwỳrjapê cu ha me pahcunea hacpỹa mã ame pahtĩr. Por Jeju pê Crixto hacpỹa mã ihtĩr xà ata kôt, quê ha hacpỹa mã Juta catêjê me, mehcahkritatajê cunea tĩr na me to awjarê. Ne me to hũjarên xà ata pê, quê ha mecumã hàhcujro xà pyrãac, ne ihtỳj mehcujuro xà ata kôtamehtyc xà jahpa — hane.

²⁴Mã Pawrô te amji pytãr to hajỳr, mã ihprõt pê Pexõ te cumã carãr to: — Pawrô, mõrmõ ca apu ato kam waj! Ca ate ampo jãhtõato hahkre ita kam, ca apu ato kam waj! — hajỳr.

²⁵Mã Pawrô cumã:

— Hamreare, pahhiti, wa nee apu ito kam waj nare, ne ikrãmpeaj kam wa catyt kam ame amã awjarê. ²⁶Yhỹ, pahhi Acrip wa itỳj acunaa mãicakôc. Ampo na? Ca ramã ate ampo itajê jahkre pej pejtu. He

mehcunea jipôc ri ampo itajê te hajÿr, ne nee mã pjêpimxur nõ kam cute hajÿr nare. ²⁷Pahhi Acrip, xà ca ampeaj kam Pahpãm jarkwa naihhôc catêjê kampa? Wa itÿj ate me kam gapac na itegahkre pej — hane.

²⁸Mã pahhi Acrip Pawrô mã:

— Mõrmõ ca atÿj gÿjarên xà jatujre ita kôt ite amji to Jeju na mehkwy na apu icãmji? Hâpà! — hane.

²⁹Mã Pawrô cumã:

— Wa ha amã Pahpãm wÿ, ca ha atÿj ijÿjarên jatujreita kôt, nare, ijÿjarên xà cati ata kôt, me apê ipyràac ne Pahpãm pynã, ne Jeju to amji mã ahimpej. Ne imã me apê ipyràac na me ato prãm, ne nee me anawakÿre hamreare ne. Ne nee wa ha Pahpãm mã apyxitpeaj cajrên nare, wa ha cumã me acunea te me ikam gapacatajê cajrên — hane. Mã hÿjarênxà ita jirô pê, me hãm, ne põ mã mehcunea cator. Pahhi pê Acrip me, pahhi pê Pexô me, Perenikwÿj me, mehcunea mehkôt me ipa atajê me, me cator.

³⁰⁻³¹Ne me cator xà kam ihtÿj amji mã me harên to:

— Hÿmre ita te nee ihtyc xà me haxàrxà caxuw ampo kên ton nare — hane.

³²Mã Acrip Pexô mã:

— Quê ha Hexa pê Roman catêjê jõ pahhiti wÿr amji to hÿjahkre nare na mã, quê ha ramã põa pê ihtÿj apu mõ — hane. Ne amehcakhùm, mã ma hacpÿ mã Pawrô jaxàr catêjê me to mõ, ne cute me haxàr.

Pê Pawrô Roman jõ krÿ wÿr tẽ

Me Hàpên Xà 23.11; 25.12

27 ¹Ne jÿ mã me ahna amcro te, mã ma cute me Pawrôkujahêc, Prytikra jõ pjê me, Roman jõ krÿ wÿr. Wa ma, ipê Ruc, ihkôt mõ, mã cuteJujo pê krãhtare catêjê jõ pahhi nõ mã Pawrô me, mehacjên catêjê kwÿ jôr. Ne krãhtare catêjêkwÿ atajê pê Roman catêjê jõ pahhiti tekjê. ²Pê ramã Atramit jõ krÿ jõ pàr kre Axij jõ pjê wÿr amji kujahêc xàa kam, na pê wa ma kam me tẽ. Mã Aritarcô pê Maxeton jõ pjê catêjê nõ, ne Texarôn jõ krÿ kam ihpÿm ata, pê hanea ne me ikôt mõ.

³Ne apê wa Teppro jõ krÿ mã me icator. Pê Jujo ajcoPawrô to impejti, ne ihtÿj to tojnõ pê ma ajco ipa, ne me hõ ikwÿ nõ catêjê pupu, mâr quê me Pawrô mã, cute ampo na prãm atajê gõ. ⁴Jirô pê mã, wa me Teppro jõ krÿ pÿn me mõ, ne ma cô jipôc ri Xipre jõ pjê na kÿj rÿm me ipijarõ. Ampo na? Pê kôc me icunaa mã me icajpêr kam tẽ. ⁵Na pê wa côxwa cote na, por Quiriti jõ pjê me, Panpir jõ pjê jõ côxwa ata na me rê. Ne ma Mira jõ krÿ mã me icator, Rixij jõ pjê kam. ⁶Pê curia krãhtare catêjê jõ pahhi, Mehtehcajpar jõ krÿ pÿn pàr kreti ata mã me cato, ne pê ma Prytikra jõ pjê wÿr ihtêm xà carõ. Mã ahnaa kypê hÿrmã me ijator nare, wa ma cumã me ixàr.

⁷Ne pâr kreti ata kam, wa amji mã me iprĩa ne me mõi, ne me imõi xà ita na wa ite amji to me amcro kwÿ kujahêc, ne cuna mã nee me imõi xà ita pejnare, wa ahnaa Xito jõ krĩ cahê na me icator. Mã neekõc te me ito tojnõ, wa ite me imõi xà to me amji mã meihimpej xà ata wÿr me imõi nare, na wa ma cô jipõc riKênpojre jõ pjê ata jarã mã me mõi. Ne ite me pjê incràti te cajõt ita jakren, haprÿ pê Xarmõ jõ pjê. ⁸Ne hanea ne pê wa me pjê cahê na me imõi xà to me mõi ata nee impej nare, wa ahnaa krĩ nõ japrÿ te Incjênpej ita na me icator, por Raxa jõ krĩ na pire mã xa ata wÿr.

⁹Ne curia wa amcro jãhtõa kam me ijãhhuc. Mã hamre, me imõi xà ita kên kam hàhhuc, ne ramã Juta catêjê pijacri xà jõ amcro hamre, pê hõtpê putwÿr ata na kõcpahtÿjti ajco hapõj, ne jũ wÿr quê jũm putwÿr atajêno na cõxwa kam pâr kre to mõi. Cwÿrjapê ri Pawrõ tekrãhtare catêjê mã hũjarẽn, ne me cumã:

¹⁰— Ýhÿ, me hũmre, me ikampa, wa ite ramã me pamõrxã ata jahkre pej, quê ha ita caxuw ihtÿj kõc pahtÿjtiata ame pahto kên. Cu ha me pajãhcukrêj jãhtõa ne meto acto, quê ha pâr kre mrõ, cõxwa kam, quê ha me pahkwÿmehhi — hane.

¹¹Mã krãhtare jõ pahhi catêjê te nee me Pawrõ parnare. Ne quê ihtÿj cute me pâr kre to me ipa catêjê me, me pâr kre jõ pahhi me amji par. ¹²Mã por pjê ata kam me hàhhuc xà ata, nee me cumãimpej nare. Mã ma apu curi amji to me kõc pahtÿjti atajõ putwÿr jakren caca. Cwÿrjapê ri hirõa pê mehãhtõ atajê ma me hàhhuc xà ata pê me cator, nePãrkõ jõ krĩ wÿr me mõi to hãhkre to prãm. Ne krĩ jõ pjê pê Kênpojre ata kam me hàhhuc xà ata pê impejti. Ampo na? Pê ihtÿj cô pihpo ata na me hapõj xãajkrut, kÿj rũm ita ne harã mã ita. Na pê curi impeaj to impej, na pê curia amji to me kõc pahtÿjti ata jõ putwÿr jakren prãm.

Cõxwa kam kõcti

Me Hàpên Xà 23.11

¹³Mã pyt cjêj xà jĩkjê rũm, awke rũm kõc tehãpêr kam ihtêm. Mã cute me hõmpun, ne ma me mõi xà na, cute me amji parxã ata kam me to incrã. Ne cute me pâr kre juwahi xãto hàpir, ne ihprĩ na me to mõi, cõxwa to kã na, Kênpojre jõ pjê cahê na. ¹⁴Mã ihprõt pê amcrã rũm, pjê rũm, kõcpahtÿjti cator, ne cute hàpêr kam ihtêm, ne cute cõxwacati mã me ijaxãr. ¹⁵Ne cute pâr kre camên kam ihtêm, na quê nee me tomõi xà ata cajpuw me to mõi nare. Cwÿrjapê ri cute me to hàpên catêjê te me to hàpên jicu, quêt taa kõc jũ kam me ito mõi. ¹⁶Wa ahnaa cô jipõc ri Cawta jõ pjê ata jarã mã me mõi. Mã amcrã ata tète ma kõc me to pra. Ne curia wa ite pâr kre krare to me ijãpir, pê ampeaj kam ite pâr kreti kam me pâr kre krare pyxwÿr xà atahãpên xà tÿaj to ihtÿj. ¹⁷Mã cõxwa kam me hàpên catêjê te me pâr kre krarejarĩ, ne cute pâr cuxê nõ tÿaj ita to pâr kreti na mehuwapre. Ne mehcunea ame Pjêhpõc jõ pjê cahê

na côxwajürurure ata cupa. Quê ihhêaj to curia pjênxôm kamkên nõ ihcahhêc cupate. Mã cute ame cupêhkà toirôrôc, ne cute me hicu, quêt taa kôc jũ kam me to mō. Ne kôc pahtÿjti ata cormã apê. ¹⁸Ne apê, mã cute me pâr kre jâhcukrêj to hũcapêrkam mehtêm, côxwa kam. ¹⁹Ne amcro incrê kam côxwa kam me hàpên catêjê teme hũhkra to me pâr kre jõ pârcuxê me, cupêhkàhtime, cute côxwa kam ampo itajê cunea to me hũcapêr par.

²⁰Ne amcro jâhtôa kam, ne cute me pyt pupun nare, ne nee me caxêre pupun nare. Mã cormã kôc hàpêr tÿaj. Wa itÿj me icunea tyc na me amji cãmji.

²¹Ne me ijâpân nare na ramã amcro jâhtôa, cwÿrjapê ri me hipôc ri Pawrô xãm ne me cumã:

— Me hũmre itajê, ca rÿ mã me ikampa, icakôc xà ata na, cu curia me ahtwÿ Kênpojre jõ pjê kam, cu ha me ahtwÿ na mã, cu hanee ame hajÿr to me pahcuhkwÿr nare, ne nee ame ampocunea to me papictor to hajÿr nare. ²²Ita caxuw wa ha me ana ahwÿ, ca me awcanã. Ne nee ca ha me anô atyc nare. Quê ha cama pâr kre to me acto. ²³Ampo na mã wa apu ita jarê? Nee mã ampo na nare. WaPahpãm mã apê, mã caxwa te me pajakren ata kam, cõjkwa pîn Pahpãmjarkwa to imprar catê te imã amji to ipipê. ²⁴Ne cute imã hũjarên, ne imã: “Pawrô, apu panare, ca ha atÿj Xexa pê Roman catêjê jõ pahhiti wÿracato. Pahpãm mã akinti, na quê ha pâr kre kam memô atajê cunea tehcajpa, ne me to ihtyc xà jahpa” hane. ²⁵Cwÿrjapê ca me awcanã, wa itÿj Pahpãmto amji mã ihmpej, ne ampeaj kam wa harê, quê ha ihtÿj cute imãhũjarên xà ita to. ²⁶Jirô pê mã quê ha ihtÿj me pahcamê, cô jipôc ri, pjê nõ ata wÿr — hane.

²⁷Ne ramã me ina amcro te cwatôxi kam ri cormã kôcpahtÿjti ata me ito kên to mō, côxwa japyrÿ te Pjêcajpuw jõ côxwa kam. Mã caxwa awryc mã ipicapôn, mã pâr kre to hàpên catêjê te me amjicajpêr, ramã pjê na me ijâhtêp to me imôr na. ²⁸Cwÿrjapê ri cute me pârcuxê nõ to me ampo pytí na hê ne ma me mên, cute me côxwa tu to me ipipên, ne mehõmpun prãmte. Ne cute me to ipipên, mã pârcuxê na mehara capô te wintixet, côhtu na. Ne ipipên xà ita jirô pê hipêr cute me to ipipên, mã pârcuxê na me hara capô te winti ne ihkôt pyxit. ²⁹Mã ampeaj kam me cumã kên nõ tepâr kre cahhêc na hũpa. Cwÿrjapê ri cute me huwahixà to cwat, ne côxwa kam me mên, pâr kre jõ kam, necute me Pahpãm wÿr kam mehtêm ne me cuwÿ, quê apêpyrentu to prãmte. ³⁰Mã ma pâr kre to me hàpên catêjê aracri me hapôj prãm, pâr kre pê. Ne cute pâr kreti krã ri me pâr kre krare mã hikran, côxwa kam, amji cumam, ne ihhêj ne me pâr kre juwahi xà mênprãm, ihkrã rûm, ne ma cama aracri pâr kre pê me cator, ne ma jũ kam memprar to prãm. Ne ramã cute me pâr kre krã rûm pâr kre krare ata mên, côxwa kam. ³¹Mã Pawrô te krãhtare catêjê me, me hõ pahhimãn, ne me cumã:

— Hamre, quê ha pâr kre to me hâpên catêjê itajê pâr kreti kam nee me hàhhuc nare, ca ha nee me anõ amji pytâr nare — hajÿr.

³²Mã krâhtare catêjê jûpar, ne cute me pâr kre krare ata mã hê jakep, mã caprÿ ma tẽ.

³³Mã awcahti xà wÿr Pawrô te mehcunea wÿr, cute meampo krêr prãnte, ne me cumã:

— Ramã ate me amcro te cwatôxi ita jikaj xà, neeate me ampo krêr nare. ³⁴Wa me awÿ, ca me ampo krẽ. Ca ha atÿj me acunea meapà, ate me gûcanâr xà caxuw. Ca ha nee me anõ apictornare, ne nee me anõ kÿ pyxitre nõ ipictor nare — hane.

³⁵Cute ita jarên jirô pê, cute pãw pyr nehipôn, ne mehcunea kam mare mã to Pahpãm mãihcakôc, hÿrên hakry na, ne me hâpân kamihtêm.

³⁶Mã mehcunea jûcanâr, ne hôtpe mehtÿj mã me hâpân. ³⁷Pê pâr kre kam mehcunea me hàhtô na me xêj pijakrut, ne ihkôt xetênta xêj. ³⁸Mã mehcunea jâpân jirô pê, cute cô kam me arÿjhycahàc cunea jaxwÿr, pâr kre ihcajoc prãnte.

Pê mehcunea mempeaj na pjê wÿr me cato

³⁹Mã apê, mã pâr kre to me hâpên catêjê te mepjê nõ pupun, ne me cupê pjê ata jahkre kêatre. Mãcute me cô kãkân nõ pupun, por curi pjê kam kênjamreare ata ri. Ne cute xwÿ mã pâr kre te môr, ne pjêimpejti ata kam hàhhuc na me to amji kam hapac. ⁴⁰Ne cute me pâr kre juwahi xà mã me hê jitep, ne cute me cumã hikran, côxwa kam. Ne cute mehcakrÿn xà mã hê pôn par, por me to ihkrã maj xà ata me. Ne cute me cupêhkãhti jarÿ ihkrã rûm, xwÿ mã amÿ amcrà wÿr môr prãnte. ⁴¹Mã hamreare, pjênxôam to pjênxôm, mã cumã pâr kre krã xâr, ne curia hàhhuc. Mã hõ rûm côxwa tecarôt to apu ihkêhkên.

⁴²Mã krâhtare catêjê te me ajpên par, cute mehacjên catêjê cunea jipej na, quê nee mehnô cô tohkà na pjê wÿr cator, ne ipimxur ne ma ihtêm nare. ⁴³Mã me hõ pahhi ma apu Pawrô curan to xuwcaca, nenee cute ihcuran na me to tojnô nare. Ne quêtcute me cumã harkwa hyr, quê mehpa na me irêr pejreatajê côxwa kam mehpyÿm, ne ma mehpa na me pra, amcrà ata wÿr. ⁴⁴Jirô pê quê ha mehwÿ hanea ne pÿ po na me huwahi, nare, quê ha pâr kre jô pÿ kwÿc na me huwahi ne ahnaa ame rê, ne mehtyc xà jahpa. Ita na wa me icunea te me amjipytâr, ne pjê mã ame ijpâj, me ipeaj na.

Pê Pen jô pjê kam ame mõ

28 ¹Ne ramã amcrà mã me ipej pêa mã me icator, ne iteme cô jipôc ri pjê ata japyrÿ jahkre pej, mã haprÿ tePen jô pjê. ²Mã curi mehkri catêjê te hôtpe me ito impejti. Mã ta wrÿ ne krya to kry, mã cute me cuhy catia ton. ³Mã Pawrô te pÿ kwÿc to cuprôn, ne aracri ihkôt

cagã pahtýtjikêanre ata pyr ne cuhy kam haxwÿr, mã cagã cuhy cacro te intoj, ne cute hũhkra na inxar, nekam ajêr ne apê. ⁴Mã mehkrĩ catêjê te me cagã pahtýtji ata pupun, mã hũhkra kam ajêr, mã cute ajpên mã me harên to:

— Ihhêj ne hũmre ita pê mehcuran catê. Ne ramã côxwa pê cator, ne cute ihkên ton ita jahpan xà na, quê ha itacaxuw ihtýt ty — hajÿr.

⁵Mã Pawrô te cagã cuhy kam to hâpêr, mã cuhykam ihpÿm, mã nee Pawrô te cagã ata xà nõ cajpêr nare. ⁶Mã cute inxar xà kam mehtu jikaj, ne haneane môr pejti kam ihtyc xà na me hikaj. Ne tee me hamã, ne tee me hikaj, mã ihkên xà jirô pê ihpÿm, mãme hõmpu, mã nee cumã hà nare. Mã hacpÿa mã cute meamji kam hapac xà to me ipintuw, ne me amji mã:

— Pÿhàpà, jũm ita pê pahpãm nõa — hane.

⁷Mã hãm xà ata cape na, cô jipôc ri pjê jô pahhijapÿr te Puprijô ata jô pur. Mã cuteme ito kênre nare, wa curia amcro incrê kam ame ipa. ⁸Mã hũm mã kry, ne kam hahôc mã nõ, mãPawrô xâr ikre caxwÿn mã, ne cute Pahpãm mã ihcajrên, ne ahna hũhkra xir, ne caprâr. ⁹Jirô pê mã ri, cô jipôc ri pjê ata kam me hàatajê cunea me cator, mã cute mehccunea caprâr. ¹⁰Mã cute me imã ampo jãhtôa ne me hôr. Neme imôr xà wÿr ri, cute me imã, por wa me ampo cunea name prãm atajê jôr, me to imôr xà caxuw.

Pen jô pjê pĩn Roman jô krĩ wÿr mehtêm xà

Roman 1.10-12; 15.30-32

¹¹Wa ite amji to me putwÿr incrê kujahêc jirô pê, wapjê ata kam Mehtehcajpar jô krĩ jô pâr kreti jãhhucne xa, kaam me imôr xà caxuw, hapÿr te Caxô me Poruc. Pê pâr kre ita ramã amji tokôc pahtýtji jô putwÿr ata kujate, pjê ata kam. ¹²Wa kam me mō ne Xiracuxa jô krĩ kam me icator, ne curia ite amji to me amcro to incrê. ¹³Ne hipêr ma me tē, ne Krĩpãtre mã me icator. Mãapê, mã kôc te hâpêr kam ihtêm, côxwa cati rũm, waite me imôr to amcro to me ipijakrut, ne Cõhkrãcator jô krĩ mã me icator. ¹⁴Ne krĩ ata kam wa ite me Jeju na mehkwÿ kwÿ cajpar, mã cute me ijator, wa me ijãhhuc, ne curia ite me cape naamji to me amcro to xet ne mehccujahêc. Ne amcro te xetata na wa ma me mō, Roman jô krĩ wÿr. ¹⁵Mã Roman jô krĩ kam Jeju na mehkwÿ teme icator na me ijarên par, ne ajpên me icajpar to me mō. Ne cute me icajpar, por krĩ kam me hàhhuc xà japÿr te Incrê ata me Apijjô krĩ kam. Mã Pawrô te me hõmpun, ne cute Pahpãm mã me hũrên hakryti na amji jarên, ne cute me to amji mã hũcanãr to ihtýtj.

Pê Pawrô Roman jô krĩ kam hikwa

Me Hâpên Xà 17.5-6

¹⁶Wa Roman jô krĩ kam me icator, mã cute me Pawrô totojnô, mã ihtýtj amjia kôt ihkrĩ, krãhtare catêjênô cape na.

¹⁷Ne amcro incrê jirô pê mã ri, Pawrô te Juta catêjê jô pahhi na hàhwÿr, Roman jô krî kam, quê ha me ajpên cajpa, ne me cuprô. Mã cute me cuprôn, mã Pawrô te me cumã:

— Ýhÿ, me ikjêjê, wa nee ite ampo kên ton nare, mepahkwÿ cuna mã, ne hanea nee ite me pancaca xà cuna mãampo kên ton nare, por pê me panquêtti me pamãincaca xà gô ata cuna mã ite nee ampo ton nare. Cakrô mã ihtÿj Juta catêjê te Krîpinkrên kam me ijaxàr, ne cute Roman catêjê mã me ijôr. ¹⁸Cute me icukij, ne me imã hikran prãnte. Ampo na? Nee cute me ikên nô na me ijarên par nare na ri, mã ihtÿj ajte me icuran prãm. ¹⁹Ne ma ame imã hikran caca. Cwÿrjapê wa ite mehwÿr, quê Xexa pê Roman catêjê jô pahhiti wÿr me ito mô ne curia me icukij. Ne nee mã wa me pahkwÿ to ite icakôc kên prãm to icator nare. ²⁰Pê Pahpãm me papê Juta catêjê mã, jũm pê Crixto to awjahkre ata, cu me pahcunea me hikaj atacwÿrjapê mã, wa wakÿre itajê te ijuwaprea na xa he. Na wa ite me ana ijàhwÿr, ca me cuprô, wa ite me apupun, cupahte amji mã me pahcakôc prãmte — hajÿr.

²¹Mã me Pawrô mã:

— Wa ite nee me Juta jô pjê pîn ihkàhhôc nôpyr nare, ite me gahkre pej xà caxuw. Ne hanea ne, nee mepahkjêjê nô ajpên akôt anaihcakôc xà kên nô to môr nare. ²²Na wa itÿj ampeaj kam, ate amji kam me gapac xà na me apar, ne me gahkre pej to prãm. Wa ite me apêJeju na mehwÿr na xwahna par, pjê cunea kam, krî cunea kôt, ne krî cunea kam me akwÿ na mehwÿr na mehwÿr — hane.

²³Mã cute Pawrô na me ajpên par, ne me amji mãamcro hyr. Ne amcro hyr xà ata na mehwÿr jãhtôa ne ma memô, por curi Pawrô apu mô ata ri. Cute me Pahpãm himpej xà te amjikam hapac xà cunea jarên par prãmte. Mãcute harêan to pyt. Pê por quê ha jũ caxuw pjê Jeju toihhimpej xà jô amcro kam hàhhuc xà ata to pê me cumãhũjarên partu. Ne cute Mojxe xwÿ jô kàhhôc jarên, ne cute Pahpãm jarkwa na mehhôc catêjê jô kàhhôcjarên, ne tee apu Jeju pê, por pê Pahpãm jũm to awjahkre ata pro mên prãm. ²⁴Mã me pyxitre hôtpê Jeju to amji mã mehhimpej, mã mehkĩnte mehwÿr ma amji mã ame to hajÿr caca. ²⁵Ne ma mehcunea cator, ne ame ajpên mã, ne maamehcahkũm. Ne me cator xà wÿr, mã Pawrô te me cumã:

— Pê ramã Pahpãm jarkwa na mehcakôc catêjê nô japry teIxaj ata Pahpãm Carô Pejti jarkwa kôt me aquêjtê mã harê. Ne toa me amã hũjarê. ²⁶Ne pê me cumã harên to hane he:

“Mô, ne atajê mã ita jarê, ne me cumã:

‘Ca ha ampeaj kam me kampa, ne nee mempar nare, ne ampeaj kam me rît, ne nee me hõmpun nare’ hane.

²⁷Nãmri ajte atajê krã tÿaj to ihtÿj,

ne cute mehapac jihê, ne ame hõt ne amehcuhhê.
 Quê ha me to hajýrnare na mã,
 quê ha ihtýj mentoa to me hõmpu,
 ne ihtýj me hapac to me kampa,
 ne ihtýj mehkrã kam me kampa,
 neihtýj iwýr me amji jaxà,
 mãr wa me caprã” hane.

Hõ, pê Pahpãm me cumã hane.

²⁸⁻²⁹ — Na wa ha me amã harê, ca me hahkre pejpyrentu. Ampo na? Pahpãm te mehcahkritatajê wýr amji jarên xà impejti ita kujahêc. Na quê haihtýj quêt me kampa. Por Jeju pê mehkên pê me hûtàr catê na harên xà ata na, quê ha ihtýj quêt me kampa — hane. Ne Pawrô te me cumã ita jarên jirô pê mã ma ajpên to me cator.

³⁰ Mã caku pijakrut kam curia Pawrô ihkrĩ. Cute jümmã hürkwa na ihpore jör, ne kam ihkrĩ. Mã hõtpêmehkwý me ipa ne me hõmpu, na ri hõtpê ahna Pawrôjakry. ³¹ Na pê ajco Pahpãm himpej xà te amji kam hapac xà jarê, ne hanea ne me cumã Pahhiti pê Jeju pê me pahkritxwý jarên to ipa. Na pê ihtýj ihcakôc, ne nee amji mã ampo cupanare, pê nee ajco ampo ihcahpêrkàr nare. Hamre.

ROMAN JÕ KRĪ WÛR

Pawrô Jõ Kàhhôc

*Pê Pawrô pê Jeju jarkwa na memprar catêjê nõ, ne hanea ne cupê cupêhkà te ikre cahyr catê, ne hàpên xà ata to pê ajco amji to ajpa. Ne pê Jeju na mehwý jakrã Roman jõ krĭ kam mehkrĭ atajê wÛr, pom cu me hõ kàhhôc cahyt ita kujate. Na pê hõ kàhhôc ita japrÿ pê **Roman Jõ Krĭ Kam Jeju Na Mehwý Jakrã Mehkrĭ Atajê WÛr, Pawrô Jõ Kàhhôc (Roman).***

Ne hõ kàhhôc ita kam cute me pamã harên to hajÿr he. Pahpãm mã me pahcunea kêanre, me panquêt xwÿ pê Atãw cukwa kam. Na pê me pahcunea me pahcunya xà wÛr me pamprar xà. Ne pê Jeju amji to me pahkritxwÿ, ne me pajaxà kam ty. Ne ihtyc xà ata to, cu ha ampeaj kam amjimã me pahhimpej, quê ha ihtÿj Pahpãm me pahna amji capa. Ne hanea ne Jeju kam me pahhõnco xà ita me, hanea ne Pahpãm Carõ Pejti te me pamã, pahteamji kam me pajapac xà intuw impejti jõr xà ita kôt, quê ha Pahpãm me pahna amji capa.

Pê Pawrô me cumã amji jarê
Me Hàpên Xà 13.32-33; 22.14-15, 21

1 ¹⁻⁷Hàpã Roman jõ krĭ kam, me apê me ikwÿ pê, Jeju kam, pahte ajpên to me pahkjêjê atajê. Pê Pahpãm mã me akĭn, na pê me ato hõ tekjê. Ipê Pawrô pê Jeju Crixto mã ijãpên catê, ne hanea ne ipê harkwa na cumã iprar catê. Ne itea wa me amã ihkàhhôc ita kamihhõc ne ihkujahêc. Ne wa ijõtpê Pahpãm me Pajõ Pahhiti pê Jeju Crixto mã me acajrên to hane he:

— Ýhÿ, me ijõ Inxũ Cati, ca ha Roman jõ krĭ kam, me akwÿ mehkrĭ atajêcaprĭ, ne me caxwÿn caxwãm pê me cumã me acarĭcti gõ, mãr quê nee ame amji mã ampo cupa nare — hane. Ne Pahpãm pê mehcunea mã, ite Jeju pê me pahkritxwÿ, ne cupê me pahkên pê me pahpytãr catê naharên xà impejti itajê caxuw icapi ne ixãm. Ne pê rÿ pêa mã, Pahpãm ramã me pamã Jeju to hũjarênxà impejti ita to awjarê, ne to awjahkre. Pê

harkwa na cute mehcakôc catêjê Pahpãm jarkwa jô kàhhôc kam, Jeju pê me pajô Pahhiti pê Pahpãm krajûjarên xà impejti ata na mehhôc. Ne Jeju pê mepaxûmrea pyrâc na, me pamã hahkre pej. Ampo na? Cupê Tawi xwÿ pê pahhi tàmxwÿ tàmxwÿ nô na, me pamã hahkre pej. Ne hanea ne me pamã, cupê Pahpãm kraa to Pahpãm kra, ne curûam cator, ne nee cute jû caxuw ampo kên ton nare, ne impej pit na, me pamã hahkre pej. Ne hanea ne carôat tÿjti te ihtycjirô pê hacpÿa mã to ihtîr xà ata kôt, me pamã cupêPahpãm kraa to ihkra na hahkre pej. Quê Jeju hamreare na mã, wa nee ipê harkwa na cumã iprarcatê nare. Ne ihcãmtàa rûm, pê Pahpãm ito cumã harkwa na iprar catê, neimã harkwa hyr to hane he:

— Ýhÿ, Pawrô, ca ha pjê cunea kam, krìxàre cunea mã, ijarên to apa, ne ito amji mã mehhimpej na me to, quê ito amji mã mehhimpej, ne me ikampa — hane. Pê wa harkwa kôt to, pê ca hanea ne me awpa, na pê Pahpãm Jeju Crixto tekjêa na amji mã me acapi. Na ri me apê mehkwyã.

Pê Pawrô mã ihtÿj me cumã Pahpãm jarkwa jarên prãm

Roman 15.22-29; Me Hàpên Xà 28.15

⁸Ýhÿ, pê wa hôtpe ajco Pahpãm mãme acunea pyrên ijakryti na amji jarê. Ampo na? He pjê cunea kam Jeju Crixtoçãmtàa rûm ate amji mã me Pahpãm to hajÿr, ne ate amji mã me to ahimpej na, cumã me gahkre pej. ⁹⁻¹⁰Ne wa ijî me ite amji kam ijapac xà cunea to Pahpãm mã apê, na wa mehccunea mã ihkra pê Jeju pê me pahpytâr catê na harên xà impejti atajê jarên to ipa. Ne Pahpãm mã, ite me acajrên to ipana ijahkre pej, na quê ihtÿj ahna ijarê. Ne wa hôtpe hân ne cumã amji cajrên to hane he:

— Me ijô Inxû Cati, ate amji kam gapac xàa na Roman jô krî kam me akwÿ mehkrî atajê wÿr itêm, ne ite me hõmpun na ito — hane.

¹¹Ne ampo na wa apu cumã amji cajrên to hane? Nee mã ampo na nare. He imã me apupun prãam to me apupun prãm. Ne me amã Pahpãm Carô Pejti te mehkwy to impej xà caxuw, me cumã cute amji kamhapac xà te amji jahkre pejti nô jôr xà ata nô gô, mãr quê Carô Pejti carôat kôt me acaxwãm pê me ato impej, ne me ato ihtÿj. Mãr ca xwÿ kam amji mã me to ahimpej to me apa nare. ¹²Ne pom jû caxuw pahte me ajpên pupun xà ata caxuw, cu ha me pahcunea me ajpên pupun kam tẽ. Ne me ajpên pupun xà ata kam, cu ha pahte Jejuto amji mã me pahhimpej xà ata na me ajpên tehcajpar to me mõ.

¹³Ýhÿ, Jeju kam me ikjêjê, wa rÿ pêa mã me awÿr hân ne amji krâr to ipa na, ate me ijahkre pej na, me ato prãm. Mã hân ne hôtpe ampo, ma me atête icahpêrkâr to ipa. Ne waramã ite krìxàre kwÿ pê mehcahkrit, ne nee me cupê Juta catêjê nare atajê kôt, me cumã, por ite me amã Pahpãm jarên to ijûjarên atajêa to, wa hân ne mecumã ijûjarên to ipa. Ne nee ijûjarên xà atajê kôt hamrenare. He ihtÿj ite me cumã ijûjarên xà itajê kôt Pahpãm wÿr me apkjê. Na wa itÿj cormã me cuxà me awÿr icator, ne me

amã, por me acahê na me cupê Jeju jahkre kêatre, mã nee amji mã me toihhimpej nare atajê mã harên prãm.

¹⁴Ne mêr ampo na mã wa ame ato hane? Nee mã wa ampo na ame ato hajÿr nare. He ipê pjê cunea kam mehcuea mã Pahpãm jarên catê, naquê ha jũm pê krĩ cati kam mehkrĩ catêjê nõ, nare, cupê ahkêt kam ihkrĩ catêjê nõ, nare, cupê mehkrã kre te amji jahkre pej catêjênõ, nare, cupê ampo jahkre kêatre catêjê nõ cacrô, wa ha itÿj cumã Pahpãm jarên xà impejti itajê jarê. ¹⁵Na wa itÿj me awÿr itêm, ne Roman jô krĩ kam me akrĩ catêjê mã, Jeju pê me pahkritxwÿ ne me pajaxà kam ihtyc, ne hacpÿa mã ihtÿr na harên xà impejti itajê jarên to ipa to prãm.

Nee Pahpãm jarkwa jũ na Pawrô pahàm nare

Roman 3.21-24; 1 Timot 6-12

¹⁶Ne nee wa Jeju pê me pahkritxwÿ na me amã harên ita na amji jũ na ipahàm nare. Ampo na? He Pahpãm carôt tÿj na ri cupê, cute amji mã me to ihhimpej catêjê cunea kên pê me hütàr catê. Na ri cupê mam me cupê Juta catêjê pytàrcatê, ne hanea ne cupê mehcahkrit, pê Juta catêjê nare atajê pytàr catê. ¹⁷Pê rÿ pëa mã Pahpãm jarkwa na ihkàhhôc kam, mehhôc ata kam, hũjarên to hane he:

“ Quê ha jũm ito amji mã ihhimpej, wa ha, cupê jũ caxuw icuna mã, cute ampo kên ton catê nare ata to amji kam ijapac. Na wa ha itÿj ahna amji capa, quê ha icahê naihtÿr na ipa rohnÿtti mã ” hane.

Hôhõ, Jeju jũjarênxà impejti ita te ri me pamã ita jarên.

Mehcuea mã Pahpãm ipa na, hahkre pej

Me Hàpên Xà 14.17; 17.22-29; Ipipên Xà 9.20-21

¹⁸Ne ramã Pahpãm te me pamã pjê ita kam mehkrã kêanre kam incryc xà ata jarên, cu pahte me hahkre pej. Ne pom mehkrã kêanreitajê te amji kam me hapac xà cunea tũmti, ne ihkêanre. Ne nee ampo pejti, hêj xi nare to me amji kam hapac to me ipa prãm nare. Ne atajê ri Pahpãm te ame to kên xà na, ramã me pamã hahkre pej. Ampo na? Mehkên xà itajê, ma cute me Pahpãm jahkre pej xà ata to me cupê amxu. ¹⁹Ne pê ramã hanea ne Pahpãm me cumã amji to ajpê, cute me kam hapac, ne me hahkre pej prãmte. Mã nee xãmte cute mempar, ne amji mã me to ihhimpej nare. ²⁰Ne pê ramã jũm te Pahpãm pupun xà nare ata, pjê me cõjkwa itaton pëa mã, kam ampo itajê cunea to. Ne hàpênxà atajêa kôt, quê ha cupê Pahpãm to Pahpãm, ne ihtÿj na me hahkre pej. Nehanea ne cutea ri carôt tÿjti to hàpên xà itajê ton na me hahkre pej. Cwÿrjapê quê ha nee jũm, cute ampo pupun xà itajê na hàprãr to amji jarên to:

— Wa nee ite xãmte Pahpãm te ihkrĩ na hahkre pej nare — hajÿr nare.

Nee mehcunea mã Pahpãm to amji mã mehhimpej prãm nare

²¹Ne cute me Pahpãm jahkre pej cakrô, nee amji mã meto cati prãmte me harẽn to:

— Ampeaj kam ri apê Pahpãm to Pahpãm — hajÿr nare. Ne cute me hãpên xà pejti ton atajê pyrên me hakryti na cumã me amji jarẽn xà kaj na, ajte ampo kên to pit mã me amji kam hapac to me ipa. Ne cute me amji kam hapac xà kôt hamreare atajêa to pit mã me amji kam hapac to me ipa. Ne mehrã kam ampo kên to cute me amjikam hapac xà itajê pê ihhêj rûm awcapãtkôti kam amôr xà na, ate amji pupun xà nare ata pyrãac, na quê ha nee me cumã me cute amji kam hapac xà impej hamreare ne. ²²Ne me cupê amji jahkre kêatre, na ri ihtÿj mehrã kreti na ame amji to mehhêj to me ipa.

²³Ne nee ajte cute me Pahpãm tîr rohnÿtti mã ata to amji mã me hãm nãn to ipa nare, ne ihcunea na me harẽn pejti to ipa xà kaj na, ihtÿj mehõ pahpãm cahac pê, ampo cunea krekà atajê to amji mã me hãm nãn to me ipa. Atajê pê me hũmre krekà me, pryjara krekà me, ampo pry krekà me, cagã krekà caricti, cakôc nare atajê, ne mempar nare cakrô, mã ajte meharẽn to imejti to me ipa, ne toa amji mã mehhimpej.

²⁴Ampo na? He me hũmre itajê te amji jahkre kêatre, na ri ihtÿj me ampokên ton to me ipa, cwÿrjapê ri Pahpãm te mehkên itajê mea mã me hucu, ne me cumã harkwa to:

“Hamre, ca ha amjia kôt, ate amji kam megapac xà kên itajê ton to ame apa, wa ha nee hipêr me ato ihmpej nare” hajÿr.

Na ri ramã me hũmre ame ajpên to kêanre, mã hanea ne pyjê ame ajpên to kêanre, cute me ampo kên kam me pahpahãmti atajê ton to ame ipa incwÿrjapê.

²⁵Ne cute me Pahpãm hêj xi nare ata jicu, ne ma me hõ Pahpãm cahac krekàkêanre hêj xiti ata wÿr me hãr. Nenee ajte me amji mã Pahpãm te pjê ton, ne kam ampo ton catê ata kîn nare. Ne hanea ne, nee me cumã harkwa to:

— Apeaj to apej, ne apê me ijõInxũ Cati pê me ijõ Pahpãm — hajÿr nare. Ne ajte cute pjê kam me ampo ton atajê mã me harkwa to:

— Apê me ijõ inxũcati pê me ijõ pahpãm, na wa ato pit mã, me amji japackre, ne atoa me amjimã me ihmpej to me ipa — hajÿr. Ne pjê kam pahte ampo itajê mã me pahcakôc to hajÿr xà na ihkaj na, ne ihkêanre, ne quêtPahpãm mã ri me pahcakôc xà te hajÿr na imejti.

Mehcunea te amji kam hapac xà kên pit

Ipipên Xà 22.11

²⁶Mã mehcunea mãnea mã mehkên xà kêanre kam mepahpahãmti atajê ton to me ipa, kam ajte cute me to incrã tu. Cwÿrjapê riPahpãm te me kam incryc xà to me cumã harkwa to:

“Gapacta ne, ate me ampo kên tonto prãm atajê cunea ton to me apa”
hajÿr.

Cwÿrjapê ri pyjê me, me hũmre te me ajpên caxun jicu, ne pyjêa me ajpên caxu. Ne Pahpãm mã cute me ajpên to hajÿr xà ita na ihkaj na. ²⁷Mã me hũmre te me hajÿar ne cute mehprõ caxun jicu, ne me hũmrea me ajpên caxun prãam kam ame ipa. Ne ihtÿj ajpên caxuw me ampo kên itajê ton to me ipa, na quê ha Pahpãm me ahna mehkên xà ata to ihtÿj tu, quê ha ame to kêanre ne.

²⁸Pê Pahpãm me cumã amji to ajpê cacrô, mã nee mempar, ne me hahkre pej prãm nare. Cwÿrjapê ri Pahpãm te me hïcu, mãcute mehkên ton xà atajêa me to ihhimpej to ipa. Cwÿrjapê ri jũ caxuw cute me ton jicu nare. Mã tee intête me hapackre, mã nee me hũpar nare. ²⁹Ne cute me ampo kên ton xà itajêa te ramã me to hipu tu, na ri ihtÿj me ajpên caxun prãam kam ame ipa. Nemehkwÿ pê, ampo cunea to amji mã ihtũm prãm to me ipa. Ne jũ wÿr quê mehkên ton têtê me amji jiprõ, ne ihtÿj ajpên jũ na me cumã ampo kîn. Mã ihtÿj me ajpên curan to me ipa. Ne ihtÿj me harkwa to me ajpên cujtên to me ipa, ne ihtÿj ame ajpên mãihhêj to me ipa. Ne mehkwy te jũ mã me ton nare kam, cama me cupê ame ampo to ipictor to me ipa. Ne ihtÿj mehhêj xi to me xwahna to me ipa. ³⁰Ne ihtÿj ajpên na mehcakôc kêanre to me ipa. Ne ma ame Pahpãm curê, ne nee me hõpahhi kam mare mã, ahna mehcakôc kên na me hàhtât nare, ne me cumã amji to cati prãm to pit mã, mehcakôc to:

— Pa ri me acunea jirõa pê icati — hane. Ne ahpÿanre na cumã, cute ampo kên ton xà jãhtõa ton to, to ipipê to me ipa, ne nee me hũmjê me, menxyrxwÿ impar nare. ³¹Ne me cupê ampo pejti ton jahkre kêatre, na ri ihtÿj me ampo kên pit ton to me ipa. Ne neecute mehcakôc xà to mehcakôc atajê na, me amji par nare. Ne ihtÿj mehkwy to me hàprê to me ipa, ne nee me cumã jũm caprĩ xà nare. ³²Ne ramã cute me hajÿr catêjê caxuw Pahpãm te me to ihhimpej xà ton, mã cute ahna mehhôc ne me hahkre pej, ata jarên xà te:

“Por ampo kên ton to me ipa atajê ri mehtycxà, ne nee Pahpãm cahê
na ame ipa xà nare.

Ampo na?

Quê ha ihtÿj mehkên mã me cumê” hajÿr.

Na me cumã hahkre pej cacrô, mã ihtÿj cormã me ampo itajê ton to me ipa, ne mehkwy me, me ajpên mã:

— Ate me ampo kên ton itajê kôt, imã meapeaj to me apej — hajÿr to me ipa.

Cute me to kên jahpan xà na Pahpãm mã me hàmjõr xà

2 ¹ÿhÿ me ikwÿ, ca ihhêaj to mehkên itajê na me harên pa, ne nee me amji mã harên to:

— Jūmjê itajê kêanre, ne pa nare, nee quêt ikênnare — hajÿr nare. Ampo na? Ca ihhêaj to hanea ne me akên itajêa ton to me apa. Cwÿrjapê ca atÿj ate me amji jarêñ xà ata tome caa, me amji curê capa. ²Ne me pamã, quêt catyt kam Pahpãm te ipa na hahkre pej. Na quê ha catyt kam mempej catêjê me, mehkên catêjê to ajcapô, ne mempej catêjê impej mã me cumê, ne mehkên catêjê mã:

— Ramã ite me amã ampo kên jarêñ, ne me amã ihcawpa, ca mãnea mã ate me ton, na wa ha me akên mã me amê — hane.

³Ne me ca, ca ha ate catyt kam me apa nare na, nee ca ha me jūmjê kên jarêñ pa, ne me harêñ to:

— Jūmjê itajê catyt kam me ipa nare, nemehkêanre, cwÿrjapê quê ha Pahpãm mehkên mã mecumê — hajÿr nare! Ampo na? He ate me hajÿar ne me akêanre ita kam, ca ha nee Pahpãm te ato kên xà ita pê jū kam atêm nare. ⁴Ne ca ihhêaj to me anô garkwa to:

— Pahpãm pej ne hàhcaprĩ, cwÿrjapê quê ha nee ite ikên ton itajê jahpan xà na ikên mã imên nare — hajÿr nare! Ampo na? HePahpãm jàhcaprĩ na ri incaca xà amji mã ampeaj ne hapôj to ipa. Na quê nee akên mã amên pyrentu nare, ne ihtÿj hipêr amji mã ampi ne akôpĩr to mō, ca ihhêaj to akên ton jicu, quê ha nee akên mã amên nare.

Quê ha Pahpãm me pajàpên xà jahpan xà na me pamãamgō

⁵⁻⁶Ne quê ha jū caxuwPahpãm te me pahcukij, ne me pahto ipicokjêr xà jō amcro cato, quê ha incryac kam, ahpÿanre na mehkên catêjê kên mã me curê, mehkên jahpan xà na. Na ca ha me anô te akrã kêanre, mã Pahpãm jàhcaprĩhti te me amã me akên itajê cawpa cacrô, ca ha mãnea mã akên ton to apa na, ca ha me ca ramã amji caxuw Pahpãm mã mencryc to apicamên to me mō. Ne ahpÿanre na pjê kam, cute ampo ton to me ipa xà na Pahpãm te me hōmpun, ne me hahkre pej xà atajêa kôt, quê ha me cumã hàmjôr to mō. ⁷Ne por catyt kam, cute amji kam me hapac xà impejti to me ipa kam me to incrã atajê ri, Pahpãm mã me amji cajrên to me hane he:

— Me ijō Inxū, ca ha ca me ito me icati, ne ipejti na mejarê. Ne nee jūmjê te me ito icati, ne ipejti na mejarên na imã me to prãm nare. Wa cama acahê na me ikrĩrohnÿtti na me amji to prãm — hane. Atajê mã quê haPahpãm mehtĩr rohnÿtti mã na me to, mār quê cahê na me ipa rohnÿtti mã.

⁸Ne mehkwy te nee me hajÿr nare, ne mehkênto pit mã me amji kampa. Ne cute ampo ton to me amji cajpuaw xà atajê to pit mã me to me ipa. Ne ma ame catyt kam ampo pejti atajê caca, ne ampo cupan xà kên atajê to pit mã me amjijahôt to me ipa. Ne cute me hajÿr catêjê, quê ha Pahpãm me kam incryac kam, me ahna cute mehkên ton atajêa to ihtÿj tu. ⁹Ne por pjê cunea kam me ampo kên ton to me ipa atajê, quê ha me

amji pupun xà kêanre to me amji pupu. Quê ha xa mam me cupêJuta catêjê me amji pupun xà kêanre to me amji pupu, jirô pê quê ha cormã mehcahkrit atajê haneane me amji pupun xà kêanre to me amji pupu.

¹⁰Ne quêt catyt kam, cute me amji kam hapac xà impejti to me hâpên to me ipa atajê, quê ha Pahpãm me cumã ampo pej pit gō, ne me cumã harkwa to:

— Wa ha me acati na me ato, ca ha mehcunea kammare mã me acatia to me acati, quê ha me apupu, ne mehcunea me apejti na me gahkre pej. Ne wa ha me amã icaricti gō, quê ha neehipêr me amã ampo hūpa nare — hane. Quê ha mam me cupê Juta catêjê to hane, ne hapu na mehcahkrit to hanea.

Pahpãm mã pjê cunea kam ampo kríxàre cunea pipênpit

¹¹Ne Pahpãm pjê cunea kam, mehcunea to amji kam hapacxà to ajpên pit. ¹²Ne mehcahkrit pê Pahpãm te me to ihhimpej xà jahkre kêatre. Ampo na? Nee me cumã Mojxe xwỳ jō kàhhôc hamreare. Cakrô, hōtpê me caxwãm pêcute amji to me ihhimpej xàa kôt, hajÿar ne, nee ihkôat me ipa nare. Na quê ha ihtÿjPahpãm, cute mehkên ton jahpan xà na, mehkên mã me cumê. Ne pê rỳ pèa mã me cupê Juta catêjê, Pahpãm te me to ihhimpej xà jahkre pej cakrô, nee me to amji japackre nare, ne ihtÿj mehkên xà cunea ton to me ipa. Jahpan xà na quê ha Pahpãm me cumã harkwa to:

— Me amã, ite me ato ihimpej xàcunea na, ijahkre pej cakrô, ca nee me ito amji japackre nare, cwÿrjapê wa ha Mojxe xwỳ jō kàhhôc kam, ite me ato ihhimpej xà atajê kôt, me akam icryc xà kêanre to me atoapê — hane. ¹³Ne nee mã catyt kam jūmjê atajê te meMojxe xwỳ te me to ihhimpej xà cunea jahkre pej xà atajê kôt, Pahpãm te jūmjê atajê na amji caxàr nare. Ne quê ha xa me hahkre pej, ne ihkôat cute amji kam me hapac xà to me hâpên to meipa na, quê ha Pahpãm cormã jūmjê atajê na amji capa.

¹⁴Quê ha mehcahkrit te Mojxe xwỳ jō kàhhôcukwa kam me Pahpãm te me to ihhimpej xà jahkre pej nare cakrô, ne amjia kôt me caxwãm pê, me hĩa kam cute amji kam me hapac xà impejti ton to me mōr na, quê ha ihhêj ne ramã me kam, me caxwãm pê Pahpãm te me to ihhimpej xà ata kôt ame ipa. ¹⁵Ne quê ha catyt kam, cute amji kam me hapac xà impejti ton to me ipa atajê, quê ha ramã caxwãm pê Pahpãm te me to ihhimpej xà na me harê. Ne quê ha hanea ne ampo pej to, ne ihtÿj ahna amji jarên to:

— Wa ite ampo pejti ton — hane. Ne hanea ne jūm te cute ampo kên ton na hōmpun narekam, me taa ahna amji jahkre pej, ne ihtÿj amji mã:

— Mã ajte, ite ampo kêanre itaton — hane. Hajÿr xà ita ihtÿj caxwãm pê cumã Pahpãm jarkwa na harê.

¹⁶Hōhō, pom wa ite me amã ijūjarên xà toijūjarên xà ita kôt, quê ha jū caxuw me pajō Pahhiti pê Jeju Crixto, Hūm jarkwa kôt me pahcunea

cukij, ne me pahto ajcokjê. Ne cumã me pahcaxwãm pê pahte amji kam me pajapac xà cunea jahkre pej, cwÿrjapê ri hãn ne catyt kam me pahto ajcokjê.

Cu ha nee jūmjê jirôa pê me pampejti na, amji to mepajamnãn nare
Roman 3.19-20

¹⁷Ne wa ha ita caxuw Pahpãm na mehkwy kam me apêJuta catêjê mã, wa ha ita na ihhóc. Pom ca meapê Juta catêjê me amji to me gãmñãn to:
— Me ipê Juta catêjê, cwÿrjapê ri Pahpãm mã jūmjê atajê jirôa pê me ikĩn. Ne pê Pahpãm me imã Mojxe xwy jô kãhhóc kam, cute me ito ihhimpej xà cunea gô, ne wa ite me Pahpãm te me ito ihhimpej xà pupun, na ri me imã amji jahkre pej. Ne me ite Pahpãm te me ito ihhimpej xà cunea to amji mã me hajÿr to ipa, cwÿrjapê quê haito impejti ne — hane.
¹⁸Ne me amã Pahpãmte ampo ton xà na amji mã me ato prãm xà ata na hahkre pej. Ne ramã ate me hõ kãhhóc to hahkre, ne me amã catyt kam, ate me ampo pej pit ton xà na, amji mã me capi na, me amã amji jahkre pej. ¹⁹Na ca atÿj me amji jarên to:

— He me ipê hàhcujro xà pyrãac, na wa itÿj awcapàtkô pĩn, jūmjê impejti xà ata wÿr me hajo to me mō. Ampo na? He jūmjê itajê pemento tūm pyrãac, ne nee catyt kam cumã Pahpãm te me toihhimpej xà impejti ata jahkre pej nare, na wa itÿj amji kôt me to mō. ²⁰Ne me ipê, mehkà te amji jahkre kêt catêjêatajê mã, amji jahkre pej japôj catêjê. Ne hanea ne me ipê ahkrare mã ampo to hahkrecatêjê, mār quê catyt kam me ipa — hane. Ne caame amji caprÿ jarên to me apa. Ca hanea ne me amji jarên to:

— Ampeaj kam ri ramã meimã Pahpãm te me ito ihhimpej xà cunea jahkre pej partu, ne ite me ampo cunea jarên xà atajê pê ampeaj kam, ne nee ihhêj xi nare — hane.

²¹He pom me apê me cumã ampo to hahkre catêjê ita? Ne mēr ampo na mã ca ajte nee me amji mã ampo to hahkre nare? Ne ca me hapackre to:

— Nee ame gãhkij nare — hajÿr cacrô, mōrmō ca atÿj me cuxà me ahkĩ. ²²Ne me hūmre japackre to:

— Ca ha nee me aprô kaj na, ahti na, jūm cahãj caxunnare — hane. Ne hanea ne pyjê japackre to:

— Ca ha nee me apjê kaj na, ahti na, jūm xūmre caxun nare — hajÿr cacrô, mōrmō caatÿj ate me cuxà ahti na jūm caxun. Ne cama apu pahpãm cahac krekà caca cacrô, mōrmō ca atÿj hūrkwa mã me acjêj, ne kam ampo to me cupê ahkĩ. ²³Ne ca me amji jarên to:

— Pê rÿ pêa mã Pahpãm me imã cute me ito ihhimpej xà gô — hajÿr cacrô, mōrmō ca atÿj me cuxà, ate harkwa jirô pê me apÿm, ne me cumã ihpahàm catia ton to me apa. ²⁴Ne pê Pahpãm jökãhhóc ramã me ato hūjarên to hane he:

“Me apê Juta catêjê pê Pahpãm na mehkwỹ.

Ne me amã cute amji kam hapac xà jahkre pej cacrô, ca nee ihkôt me hakop, ne me ton nare.

Cwÿrjapê ri mehcahkrit atajê ihtÿj me akôtPahpãm japỹ to mehcahôc kêanre to me ipa” hane.

²⁵ÿhÿ, ipê Pawrô, ne ipê hanea ne Juta catêjê kwÿa nõ wa. Cwÿrjapê ri imã pahte amji kam me pajapac xà cunea jahkre pej. Ne pê rÿ pëa mã Pahpãm me panquêtjê mã harkwa to:

“Me apê itekjêa na, cute me gahkre pej xà na, ca haamji mã me apy kà kwÿ kryjre ne me hakep, me akra xùmrema mã” hane.

Cu ha me Pahpãm te me pahto ihhimpej xà cunea kôt me papa, ne hanea ne amji mã me pampy kà kwÿ jakep, ne ahnaa cu ha me Pahpãm cajpuaw, ne cumã me papê Juta catêjê impejpit, ne me papê mehkwỹa. Nãmri cu ha pahte cama me amji kà kwÿ jakep, ne nee amji mã me Pahpãm te me pahto ihhimpej xà kôt me papa nare na, jü wÿr cu ha Pahpãm cajpuaw. Ampo na? Pahpãm mã pahte cama me amji kà kwÿ jakep, ne nee cute amji kam hapac xà kôt me papa nare ita kôt, cumã hamreare. ²⁶Quê ha jüm pê Juta catêjê nare, ne nee amji pê ihkà kwÿ jakepnare cacrô, ihtÿj Pahpãm te me to ihhimpej xà kampa, neihkôt ipa na, quê ha Pahpãm mã cupê ramã cute amji mã mehkà kwÿ jakep atajê nõa, ne cupê hõ tekjêa. ²⁷Cwÿrjapê quê ha mehcahkrit atajê me anaihcahôc to me hane he:

— Por Juta catêjê atajê mãihkàhhôc kam Pahpãm te me to ihhimpej xà cunea jahkre pej, ne mempy kà jakep cacrô, mã ajte nee kam me hapac, ne ihkôat me ipanare — hane. He me cupê Juta catêjê nare, pê nee mempy kà kwÿ jakep nare cacrô, ihtÿj Pahpãm te me to ihhimpej xà kôt me ipa, atana ri me Pahpãm cajpuaw.

²⁸⁻²⁹Ne mër hõhõ, me pahkà kwÿjakep ata me, pahte amji kam me pajapac xà to me pahte amjipyraç xà atajê kôt, Pahpãm mã hamreare. Ne quêt, porPahpãm Carô Pejti kôt, Pahpãm te me pahto ihhimpej xà kôt me papa na ri cumã impej, ne cumã me papê mam, mehkwỹ pê Juta catêjê impeaj. Ne quê ha pjê kam me hümre me pahkà jakep nare na me pahpupu, ne nee amji mã, me papê Pahpãm kôt meipa catêjê na me pahto hajÿr nare. Ne Pahpãm nare, quêt cumã me papê mehkwỹa, na quê ha taa me pahto ihcahôc to impejti ne.

Jü wÿr quê Pahpãm me pahnõ mã ihhêj

Roman 9.4-5

3 ¹ÿhÿ me ikwỹ, ca ihhêaj to Juta catêjê to ite me amã icakôc xà ita kampa, ne nee ca me anõ amji mã garkwa to:

— Měr jū na xà caxuw mǎ me cupê Juta catêjê? Ne mehapyr̃ pê Juta, ne jū na xà na mǎ amji mǎ mehkà Jakep? Imǎ ihhêj ne Pahpām te mam me to ihmipej xà itajê kôt hamreare — hajÿr nare. ²Ampo na? Por cute mencaca xà to me amji pyrác xà itajê cunea impej pit. He Pahpāmpê ramā rÿ pēa mǎ amji mǎ me capi, ne me cumā haprÿ ita gō, ne mecumā cute amji kam hapac xà cunea pē harkwa ita gō. Ne ihkôt me cumā:

“Ca ha ite me amā ijarkwa jirên xà itajê cunea to, ma me amji jahôt to me apa, ne ma me to amji kampa, ne ihkôat me apa” hane.

³Mǎ mehkwỹ kwÿa te ihhêj ne, nee mempar nare. Ne mehkwỹ nee me harkwa to mehcaôc xà na me amji par nare ita kam, xà ajkiPahpām te hajÿar me caxuw, ne ampo na ihcaôc xà to, ne nee amji jarkwa na amji par nare? ⁴Hǎpà! He Pahpām catyt kam ihkrī, ne ihhêj xi nare, ne ihtÿj mehcunea hêj xi xà jipôc ri harkwa na amji kampa. Ne pē ramārÿ pēa mǎ Pahpām jō kàhhôc kam, cute me to hūjarên to hajÿr he:

“Quê ha jūm te, Pahpām te apu ihhêj xi na harên na, quê ha ramā mehcunea mǎ apu ihhêj to ipa na me hahkre pej.
Quê ha cute catyt kam me Pahpām toihcaôc na,
quê ha ramā mehcunea catyt kam, cute to ihcaôc na me hahkre pej”
hajÿr.

Ihcunea na Pahpām pejti, na ri ma amji tète amehkêncatêjê curê

⁵Mǎ mehkṛā kên catêjê kwÿ me to hūjarên xà impejti kaj na me to hūjarên to:

— Wa itÿj Pahpām kīnte ampo kên jikôtti cunea ton to ipa, mār quê ahna me ipupu, ne cormā me Pahpām caca xà me, itekjê to me ajpên, ne me hōmpu, ne amji mǎ me ijarên to: “Jūmjê itajê kēanre, ne Pahpām ri quêt impeaj to impej” hane. Ita kam, jū mǎ quê, ne ajte Pahpām ite me ikên xàton ita kôt me ito tÿj tu? He me icaca xà kēanre ita kôt, ramā mehcunea te me Pahpām pejti na me hahkre pej. Ne ite me hajÿr xà ita kam, ihhêj ne nee Pahpām catyt kam me ito impejti nare — hane. ⁶Ne por jūm apu hūjarên to hajÿr to mō ata kēanre. Ampo na? He Pahpām ri quêt catyt kam ipa. Ne quê catyt kam ipa nare ita kam, jū mǎ quê, ne ajte pjê ita kam ajpên pē mehkên me, mempej to caprār pa?

⁷Mǎ mehkṛā kên catêjê kwÿ hanea ne me hūjarên to:

— Wa itÿj Pahpām kīnte ame ihêj xia jarên to me ipa, mǎ me ikampa, ne me Pahpāmcaôc xà me, me icakôcxà to me ajpên, ne me amji mǎ me harên to: “Pahpāmcaôc xà ri quêt impej” haneita kam, jū mǎ quê, ne ajte Pahpām me ikên mǎme imē? He me icakôc xà hêj xi xà ita kam, ramā mehcunea te me Pahpām pejti, hêj xi nare na me hahkre pej — hane. ⁸Ne

mehcakôc xà to cute me hajÿr xà na impej nare. Mã mehkřã kên kwÿa mehcakôc xà to:

— Hã, cu ha pahte amji kam me pajapac xà to me kêanre to me papa, mãr quê ihkêanre ata kôt, me Pahpãm jãhcapřihiti na me hahkre pej — hane. NePahpãm mã mehcakôc xà te hajÿr na ihkaj na. Ne hanea ne ramã mehkwyã kwÿ nō te ito ihcakôc to hajÿar. Ne ihtÿj ame ito ihhêj to me ipa. Ne cute ame ito ihhêjjahpan xà na, quê ha Pahpãm ame to kêanre ne. Ne mehcakôc xà kêanre te hajÿr catêjê ri, ihtÿj mehkên mã me hãr xà.

Nee pjê ita kam jũm pê catyt kam ipa catê nare

Carati 3.11-22

⁹He xà ajkĩ mehcakrit atajê jirôa pê, me cupêJuta catêjê mã me cute amji kam hapac xà impej? Hãpà! He Pahpãm mã mehcunea pipên pit. Ampo na? He mehcunea ihtÿj ajpên jĩkjê na mehkênton to me ipa. Ne ramã mehcunea te ajpên jĩkjê na, cute mehkên ton to me amji pyrãc tu, ita kam, jũ mã quê me, ne mehkên ton to me ipa jicu, ne me to hapactu?
¹⁰Ne pê ramã ihkãhhôc kam Pahpãm jarkwa me to hũjarên to hane he:

“Pahpãm mã, nee jũm te ampo pejti ton nare.

¹¹Ne nee jũm Pahpãm na hàhcukjêr, ne catyt kam cumã ipa jahkre pej nare.

¹²Ne ramã mehcunea Pahpãm pê me ipipkjêr, ne ihkaj na ampÿa mã ame ipa, ne me ipictor.

Na ri nee jũm catãt kam, ampo pejti ton to ipa nare.

¹³Ne me harkwa pê ihhêj rũm kre kam, cute me harêt xà.

Ne mehcakôc xà atajê kro, ne ihkêanre, ne ihtÿj ihpĩn mehhêj xi xà kêanre hapôj.

Ne mehcakôc xà itajê jãhcurê pêihhêj rũm patti xwa cacô jãhcurê, ne ihtÿj mehcure. ¹⁴Ne ihtÿj mehcunea incrôn xà kêanre to mencrôn to me ipa.

¹⁵Ne ihtÿj me hũjarêan kam me jũm jaxôp, ne mehcuran pyrentu to prãm.

¹⁶Ne por jũ ri me ipa xà ata ri, hãn ne me hakàn pê ampo kêanre ahtwÿ.

Mã me hakàn pê me cumã amji kĩn nare na amehkrĩ.

¹⁷Ne nee me cumã ajpên to impejti to mehkřĩ jahkre pej nare.

Mã cama ame ajpên mã, ne ihtÿj me ajpu.

¹⁸Ne nee amji mã me Pahpãm cupa nare” hane.

¹⁹Hõhõ, pê Pahpãm Mojxe xwÿ mã Juta catêjê caxuw cute me to ihhimpej xà jõr to hane. Ne pê Pahpãm te me to ihhimpej xà ita, nee me cupê Juta catêjê caxuw pit mã nare, ne me pahcunea caxuw pê Pahpãm

Mojxe mã cugõ. Na cu ha catyt kam pahte me cahyt ne memparna, cu ha pahte me ampo to kên xà atajê na me amji jahkre pej pyrentu. Cwÿrjapê cu nee me pahnõ Pahpãm mã me pajarkwa to:

— He wa nee me ite ampo pejti ton xà itajê na me amji jahkre pej nare. Ne nee hanea ne ite me ampo kêanre itajê jahkre pej nare kam me ton — hajÿr nare. Cwÿrjapê quê ha Pahpãm amcro nõ na mehcunea mã harên to:

— He me amã ite me ato ihmipej xà cunea jahkre pej cacrô, ca nee ate mempar nare, cwÿrjapê wa ha hahpan xà na me ato tÿj tu ne — hane.

²⁰Ne nee rÿ jÿ caxuw jÿm te, Pahpãm te me to ihmipej xà kam hapac, necatyt kam ihkôt ipa nare. Cwÿrjapê jÿ wÿr cu Pahpãm te me to ihmipej xà kôt me papa kam me to pancrà. Ampo na? He cu me pajõtpê ampo to mehcupa. Ne jÿ wÿr quê ha jÿ caxuw Pahpãm me pamã:

— Ca ijarkwa cunea kôt me apa, cwÿrjapê ri ihcunea na imã me apej pit, na wa ha itÿj ana amji capa — hajÿr nare. Ne por ihkãhhôc kam Pahpãm jarkwa ata, cute cumã mepaxÿmre kên na me pajarên xà caxuw ri.

Jeju te ri Hÿm te me pahna amji caxàr na ton

Me Hapên Xà 17.30-31; Roman 1.17; Pirip 3.7-9; Carati 2.15-21

²¹Ne ita kam, mormõ ca ha me anõ amji mã:

— Pÿhàpà, jÿ mã wa ha ajte me, ne Pahpãm cuna mã meipej, quê me ina amji capa? — hane. He Pahpãm te ita caxuw ajteare mã me pamã, cute amji kam hapac xà intuw ita to hahkre, ne nee Mojxe xwÿ jõ kãhhôc kam Pahpãm te mam me to ihmipej xà kôt me papa xà nare. Ne pê rÿ pëa mã ramã Pahpãm jarkwa jõ kãhhôc kam, cute harkwa na mehcakôc catêjê te me ita jarên. ²²Ne Jeju Crixto pê ri curmã Pahpãm te amji kam hapac xà intuwta ata. Na quê ha jÿm krã kêanre, ne ihkên ton jicu, ne Jeju toamji mã ihmipej to ipa, quê ha Pahpãm cumã:

— Ate ikra to ihcunea na amji mã ahimpej, mã cute me ato amji kritxwÿ, cwÿrjapê ri imã ihcunea na me apej pit. Cwÿrjapê wa ha me ana amji capa, ne nee ate ito kên xà atajê to amji japackre, nehahpan xà na akên mã amên nare — hane. Ne Pahpãm te, mehcunea te Jeju Crixto to me amji kritxwÿ atajê cunea na, amji caxàr, atajêpê me cupê Juta catêjê me, mehcakritatajê. Ne cumã me ipipên pit, ne nee cumã jÿm pê ajteare mã nare. Pahpãm mã mehcunea te, cute amji kam hapac xà to pit mã, amji mã mehhimpej na me to prãm.

²³Ne mehcunea hõtpê mehkên ton to me ipa ita kam, quê ha nee me Pahpãm te me cumã cute amji kam hapac xà impejti tohÿjahkre xà ata wÿr me cator, ne kam me hàhhuc nare. ²⁴Mã quêt Pahpãm jãhcaprã na amjia kôt cute me pahte ame to kên itajê to tojnõ, ne hucu, ne me pahna amji caxàr, na cu hacpÿa mã meajpên to ikwÿ nõ. Ne ampo na ri cute me

pahto hajÿr? Nee mã ampo na nare, Jeju Crixto te amji to me pahkritxwÿ, na ri cute Hÿm te me pahna amjicaxàr na ton, mã cute me pahna amji caxàr, mã pea me pahkên catia pê me pahto cator.

Pahpãm te me pahkritxwÿ na me pamã Jeju xãm

²⁵Mã Pahpãm te catyt kam ipa na me pahte me hahkre pej prãmte ri, cutepjê ita wÿr me pahwÿr ihkra pê Jeju kujahêc, mã iwrÿc. Ne cute amji tome pahkritxwÿ, ne me pahkên xà mã me paxàr xà atajê cunea mã cute amji jôr, ne pÿ kamihtyc. Ne pahte Jeju to me amji kwÿ xà ata pê ri, Pahpãm te ame pahto kên xà ata pê, me pahpytâr xà. Naquê ha jÿm te Jeju pê ihkritxwÿa toihkritxwÿ na amji mã to hajÿr na, quê ha nee ihkên xà kèanre ata mã hàr nare. Ne Pahpãm te, me cumã catyt kam ihkrÿ, ne impejti na amji jarên prãmte ri, cute me pahkritxwÿ na me pamã Jeju xãm. He pê mamPahpãm nee cormã ne, cute ame to kên catêjê kam incryc tÿj to imprar pyrentu nare. Ne cama ahna me hamã, mâr quê ihhêaj to xwÿ mã amjia kôtamehkên ton jicu, ne hÿrmã me apkjê. ²⁶Ne ita caxuw Jeju cator xà ata me ajkaam, mã Pahpãm mã ihkôt mehcunea te mehkên jicu pyrentu na me to prãm, mâr quê me ahna amji capa. He Jeju teamji to me pahkritxwÿ. Ne me pajahpan xà na ihtyc xà ata kôt, cu ha pahte cume mã mã me pahkên jicu, ne to amji mã me pahhimpej. Na quê ha Pahpãm pejti, ne catyt kam ihkrÿ ata, me pahna amji capa. Ita na quê ha pjê kam, mehcunea me Pahpãm te catyt kam ipa, ne catyt kam me pahtoimpejti na me hahkre pej.

²⁷Cwÿrjapê cu ha nee me pahnô amji to pajàmnan to:

— Ampo na ri Pahpãm te ina amji caxàr? He wa ite, cute ampo cunea na, cute me pamên atajê ton par, na ri cute ina amji caxàr — hajÿr nare. Ampo na? He me pahte ampeaj kam Jeju pê me pahkritxwÿ na amji mã me to hajÿr xà ata kôt, quê ha Pahpãm me pahna amji capa. Ne jÿ wÿr cu me pahnô pahcakôc xà to hane. ²⁸He cu nee me pahnô Pahpãm te me to ihhimpej xà cunea ton nare. Ampo na? He cu tee ramã ame ton to me hahkre ita kam, jÿ wÿr quê Pahpãm mepahna amji capa. Ne quêt Jeju to amji mã me pahhimpej, mã cute amji to me pahkritxwÿ ata kôt ri, Pahpãm te me pahna amji caxàr.

²⁹Mã ihtÿj Juta catêjê kwÿ kwÿa me hÿjarên to:

— Nee me Pahpãm pê mehcahkrit atajê Pãm Catinare — hane. Ne cama amehhêj to me ipa. He Pahpãm pê hanea ne, mehcahkrit Pãm Cati, ne cupê me pahcuneaPãm Cati. ³⁰He Pahpãm pyxit peaj, ne cute amji kam hapac xà pyxit peaj. Ne hanea ne, Jeju pyxit peaj to mehcunea te amji mã me hajÿr xà ata kôt, quê ha ihtÿj mehcunea na amji capa, ne amji wÿr me cupêJuta catêjê me, mehcahkrit atajê mea mã me to cuprô. ³¹Na quê nee jÿm ihcakôc to:

— Mër hõhõ, wa ha nee hipêr ihkàhhôc kam Pahpãm te me to ihhimpej xà ata kôt ipa nare. Ampo na? He ramã Jeju te ite ampo ton xà itajê

cuneaton par, ijaxà kam — hajÿr nare. He cu ramã Jeju to amji mã me pahhimpej, cwÿrjapê cu ha pahtÿj mehkàhhôc kam Pahpãm te me to ihmipej itajê, amji mã me hÿpahti to me kam pajapac pejti to me papa.

Pê Aprãw Pahpãm to amji mã ihmipej, na pê ahna amjicapa

Carati 3.6-18

4 ¹Ne ita caxuw wa ha me amã me iquêt xwÿ pê Aprãw xwÿ kôt harê. Ne pê Pahpãm mã, cuna mã hÿmre ita pejti, ne catyt kam ajco ihkrí. Nejú mã mormõ pê ajte ne Pahpãm cuna mã impej ita hane? He xà pê ajkí Pahpãm ampo cunea na cumã harkwa atajê ton cwÿrjapê mã, pê ahnaamji capa? Hãpà! ²Quê hane na mã, quê ha ramã taa amji to hàmnãn to:

— He wa amjia kôt ite ampo itajê cunea ton par, cwÿrjapê ri Pahpãm mã ipejti na, quê ha ihtÿj ina amji capa — hane. ³He quê nee amji to hàmnãn to hajÿr nare. Ata na pê Pahpãm jarkwa jô kàhhôc kam ramã harê he:

“Pê nee Aprãw amjia kôt, hàpên xà to atajê kôt Pahpãm ahna amji caxàr nare.

Ne pê kypê Pahpãm to amji mã ihmipej nare, na pê cumãimpej, pê ahna amji capa” hane.

⁴Ne por jÿm apê ata ri, ihtÿj hàmcwÿr xà. Ne jÿ wÿr quê hõ pahhi amjia kôt cama cumã ampo gô. Ne por cute hàmcwÿr xà ton ata, hõ tekjêa ri, ne nee mã amjia kôt hõ pahhi te cumã hõr nare. ⁵Ne Pahpãm te nee hajÿr nare, ne quêt amjia kôt, cute amji kam hapac xàa na, ihtÿj cumã me pajàpên nare catêjê mã ampo gô. Na cu ha Pahpãmmã me amji jarên to hane he:

— He wa tee ramã apu ate me ito ahimpej xà ita cunea kôt me ipa to me hahkre ita kam, jÿ wÿr wa ha me to. Cwÿrjapê wa ha cama Jeju to amji mãme ihmipej, quê ha taa amji to me ikritxwÿ, ne taa me ijaxà kam ate me ito ahimpej xà itajê cunea ton to amã ipa — hane. Quê ha Pahpãm me pahto hÿjarên to hane he:

— Ate ikra to amji mã me ahimpej to hajÿr, cwÿrjapê ri imã me apej. Ne me apê catyt kam me apa catêjê, na wa ha itÿj me ana amji capa, ne nee ate me ito kên jahpan xà na, me akên mã me amên nare — hane.

⁶Ne pê ramã pahhi xwÿ pê Tawi atajÿmjê jakryti na, Pahpãm jarkwa kôt, hõ kàhhôc kam, me ahna ihhôt to hane he:

⁷“Jÿ mã cu ha me, ne ame pajakry?

He pahte Pahpãm jarkwa jirô pê me pahpÿm, ne ihkaj na me pahkên xà ton, mã cute hìcu, ne to tojnõ, ne ihhur, ata pyrên ri ame pajakry.

⁸ Por Pahhiti te pahte me ampo kên ton atajê kôt me pahkôt harên kêanre nare, ata pyrên ri ame pajakry” hane.

⁹ He xà ajkî me hakryti xà ita me cupê Juta catêjê te amji mã mempy kà jakep catêjê atajê mã pit mã? Hâpà! He hanea ne mehcahkrit atajê te amji mã me amjikà jakep nare atajê mã, ihtÿj me hakry xà ita. He wa ramã ite me amã Pahpãm jô kàhhôc kam, cute Aprãw xwÿ to ihcakôc to hajÿr na, harên he:

“Pê nee Aprãw amjia kôt hàpên xà to atajê kôt, Pahpãm ahna amjicaxàr nare.

Ne pê kypê Pahpãm to amji mã ihhimpej nare, na pê cumã impej, pê ahna amji capa” hane.

¹⁰ Mêr hõhõ, xà pê ajkî Aprãw xwÿ amji mã impy kà kwÿ jakep jakàn pê mã, pê harên to hane? Hâpà! He pê amji mã ihkà kwÿ jakepxwÿjrea na, pê Pahpãm cumã harkwa to hane. ¹¹ Aprãw te amji mã ihkà kwÿ jakep xwÿjrea na, pê ramã Pahpãm ahna amji capa. Ampo na? He cute amji mã Pahpãm to hajÿr cwÿrjapê. Na ri cuteamji kà kwÿ jakep xà ata te ramã Pahpãm mã Aprãw xwÿ pejti na harên. Na pê Pahpãm cumã harkwa to:

“Ca ate kypê ito amji mã ahimpej nare, cwÿrjapê ri imã apê ihhêj rûm rÿ jÿcaxuw jÿm te ampo to ihcupan nare ata pyrâac.

Na wa ha itÿj ana amji capa” hane.

Ne pê ramã Pahpãm Aprãw te amji mã ihkà jakep xwÿjrea na, harên to hane. Cwÿrjapê ri Aprãw pê, por nee cute amji mã mehkà jakep nare, ne ihtÿj amji mã me Pahpãm to ihhimpej atajê cunea xakat. MãPahpãm te atajê cunea na amji caxàr. ¹² Ne hanea ne Aprãw pê, cute amji mã cuxà mehkà kwÿ jakep, ne Pahpãm to amji mã mehhimpej atajê cunea xakat. Ne xà ajkî cute amji mã ihkàjakep cwÿrjapê mã cupê me hakat? Hâpà! He Pahpãm to amji mã ihhimpej cwÿrjapê ri cupê, por mehcunea Pahpãm to amji mã mehhimpej atajê xakat.

Jeju to amji mã pahhimpej xà ita kôt, cu ha me amcwa

¹³ Pê Pahpãm Aprãw mã pjê to hÿjahkre to hane he:

— Ýhÿ Aprãw, he pê ca nee ite me ato ihimpej xà cunea kôt apa nare cakrô, ca atÿj ate ito amji mã ahimpej, cwÿrjapê wa ite ana amji caxàr. Na wa ha amã pjê ita cunea gõ, mãr ca me atàmwxwÿmea mã me to ahimpej — hane. Pê Aprãw kampa ne amji mã:

— Pÿhàpà, pom cormã ikra nare ita, mã ajte ramã me itàmwxwÿ to Pahpãm te imã hÿjarên. Wa itÿj cute imã hÿjarên xà itajê na to amji mã hane — hane.

¹⁴He pê nee Pahpãm Aprãw mã harkwa to:

— Ca ha xaa ite amã ihmpej xà itajê cunea to, ne ihkôt apa, wa ha cormã hahpan xà na, amã pjê ita cunea gõ — hajÿr nare. Ne pê quêt Pahpãm cumã:

— Wa ha amjia kôt amã pjê ita gõ. Ca ate, ite amãapê pjê ita jõ pahhi na ato ijÿjahkre xà ata na to, amji mã ahimpej, cwÿrjapê wa ha amã cugõ — hane. Ne Pahpãm me pahto amji kam hapac to hanea, pom quê pê Aprãw to amji kampa he. Ne quêha me pamã ampo to awjahkre, cu ha cute ampo to hÿjahkre xà ata na amji mã me to pahhimpej. Cwÿrjapê quê ha me pamã cugõ. He pahte me Pahpãm te me pamã harkwa jirên xà ton ata kôt pit mã, me pamã cute to hÿjahkre xà ata jör nare. Quê hane na mã, cu mempar nare itakam, jÿ wÿr cu ha me cupê cupy. ¹⁵Ne quê ha jÿm mã Mojxe xwÿ jõ kãhhôc kam Pahpãm te me to ihmimpej xà jahkre pej cacrô, neeme ton nare, quê ha ihtÿj Pahpãm ahna kypê kam incryc nare. Quê Pahpãm jõ kãhhôc kam, cute me to ihmimpej xà ita hamreare na mã, quê nee jÿm hahkre pej, ne kam hapac nare ita kam, quê ha nee me cumã harkwa to:

— Ca ate ijarkwa jirô pê apÿm na ri me akam icryc — hajÿr nare.

Aprãw pê mehcunea te Pahpãm to amji mã mehhimpej catêjê atajê xakat

¹⁶Mêr hõhõ, cu ha Aprãw xwÿ cuxà, me pahte Pahpãm to amji mã me pahhimpej na, quê hame pamã ampo pej cunea jör xà ata caxuw, pêAprãw mã cugõ. Ne me pahte Mojxe xwÿ jõ kãhhôc kam Pahpãm te me pahto ihmimpej xà atajê cunea kôt me papa nare cacrô, quê ha Pahpãmhãhcaprãa kam ihtÿj me pamã ampo pej cunea gõ. Ne mêr ampo na mã quê ha me pamã ampo pej itajê gõ? Nee mã ampo na nare. He me papê Aprãwtãmxwÿa, ne me papê hÿràac. Ampo na? He cu pahtÿj, cuxà Pahpãm to amji mã me pahhimpej. Na ri Aprãw pê me pahcunea te Pahpãm to amji mã me pahhimpej catêjê xakat, ne me papê mehtãmxwÿa pyrãc. ¹⁷Ne pê ramã Pahpãm, hõ kãhhôc kam cormã Aprãw ihkra nare kam to hÿjarên to hane he:

“Imãa, ramã apê me hàhtôa pãm” hane.

Pê kampa neihtÿj amji mã me to hane, ne amji mã:

“He cormã ikra nare cacrô, mã ahnaa Pahpãm te imã me itãmxwÿ jãhtôa to hÿjahkre, na quê ha ihtÿj imã cugõ.

Ampo na? He ihtÿj Pahpãmhapÿã mã mehtyc to ihtÿr.

Ne hanea ne ihtÿj harkwa kôt ampo amji to ita kam, quê ihtÿj cormã jÿm kra nare ata mã ihtÿj ihtãmxwÿ gõ.

Na wa itÿj amji mã to hane” hane.

¹⁸⁻¹⁹Ne por pê Pahpãm Aprãw mã ihtãmxywỳ jàhtôa ne to awjahkre ata caxuw, pê ramã ahna caku xěj, ne ramã ihweaj to ihwej. Ne amji mãã ramãcupê jũm tyc, ne cupê ihkra nare ata pyrãac, ne hanea ne hĩxi pê Xarawkỳj ata pê ihkre crã, ne ramã ihwejtu cakrô, mã ihtỳj Aprãw Pahpãm te cumã ampocunea to hũjahkre ata na hikaj. Ne cute ampeaj kam amji mã Pahpãm to ihhimpej, cwỳrjapê ri cupê mehcunea te Pahpãm to amji mã mehhimpej catêjê xakat. Na ri cute Aprãw cuxà Pahpãm to amji mã mehhimpej atajê pê ramã mehtãmxywỳa pyrãc. Ne Pahpãm te cumã tohũjahkre xà ata, na ihtỳj cute cumã ton. ²⁰Ne nee Aprãw xywỳ te jũ caxuw Pahpãm to amji mã ihhimpej jicu nare, ne nee cuteampo to cumã hũjahkre xà atajê na to amji kam hapac to ipicokjêr to ipa to:

— Pỳpỳn, mormô quê ha Pahpãm imã ikra nõ gô, nare, quê ha nee imã ihnô jôr nare — hajỳr nare. Cwỳrjapê ri Pahpãm te cute amji mã toihhimpej xà caxuw cumã carôt jôr, na ri Aprãw te Pahpãm pejti na harên to:

²¹— Ampeaj kam apej, ne ate imã ampo to gũjahkre xà atajêjôr xà caxuw, ampeaj kam acarôt tỳj, cwỳrjapê wa itỳj ate imã hôr na amji mã ato hane — hane.

²²Pê Pahpãm mã, Aprãw te ihhêj ne nee ampo to ihcupan nare, ne catyt kam ipa, na pê hacpỳa mã to amji kwỳ, ne ahna amji capa. Ampo na? He Aprãw tePahpãm te ampo to cumã hũjahkre xà atajê na, ampeaj kam to amji mã ihhimpej na pê. Ne pê Pahpãm jô kàhhôc kam ramã ita na ihhôc to hane he:

“Ite Aprãw mã ampo to ijũjahkre, mã ihtỳj ijarkwa ita to amji mã ihhimpej. Cwỳrjapê ri imã cupê jũm te nee ampo to ihcupan nare ata, necatyt kam ipa.

Na wa ite hacpỳa mã to amji kwỳ, ne ahna amji caxàr” hane.

²³⁻²⁴He Pahpãm te hô kàhhôc kam Aprãw xywỳ to hũjarên xà ata, nee mãAprãw pit caxuw nare, ne me pahcunea caxuw pê harkwa ita to. Ne por Pahpãm carôt tỳjti te hacpỳa mã Jeju to ihtĩr ata, pahcunea te to amjimã me pahhimpej catêjê caxuw ri. He pahte Pahpãm to amji mã me pahhimpej, cwỳrjapê ri cumã me papê catyt kam me papa catêjê. ²⁵Jeju te amji to me pahkritxywỳ, ne me pajaxà kam ihtyc xà mã amji jôr, me pahkên jahpan xà na. Mã Pahpãm te hacpỳa mãto ihtĩr, mãr quê me pahna amji capa, ne me pamã:

— Ate ikra tĩar pê me akritxywỳ ata to amji mã me ahimpej, cwỳrjapê ri imã me apê catyt kam me apa catêjê pit, na wa ha me ana amji capa — hajỳr.

Pahte amji pupun kãanre to me amji pupun xà kam mepajakry

Tijac 1.2-4

5 ¹Me pajô Pahhiti pê Jeju Crixto te amji to me pahkritxywỳ, ne me pajaxà kam ihtyc. Na cu ita kam, amcro ita kam, pahtỳj cute amji

kam hapac xà ita na amji mã me to me pahhimpej. Cwÿrjapê ri Pahpãm te me pahna amji caxàr, ne hacpÿa mã hipêr me pahto amji kwÿ. ²Ne Jeju to pahte amji mã me pahhimpej xà ata kôt ri, cutea Pahpãm te amji kam hapac xà impejti ita na me panxôr. Cwÿrjapê cu mãnea mã, amjimã me to me pahhimpej ita na. Na quê ha jũ caxuw, amcro nã na, Pahpãm carôt jãhcujro ata to, me pahcunea to impejti ne. Ne me pampejti ata kam, quê ha mehcuneame papê Pahpãm pyrãc, ne me pampejti na me pahpupu. Na wa me ijakry mea mã me amcro ita jikaj to me ipa.

³Ne wa ha hanea ne me pahte me amji pupun xà kêanre xà kam, me ijakry pej pêa mã me ipa. Ampo na? He wa me pahte amji pupun xà kêanre xà ata pĩn, hacpÿ ne me pahwÿr ampo cunea na pahte me pajücanãar kamamji mã me pahprĩa ne, me papa xà ata cator na, me imã hahkre pej. ⁴Ne quê ha Pahpãm me pahte amji pupun xà kêanre ita kam, me pahte me pajücanãar kam, amjimã pahprĩa na me pahpupu, ne me pamã harkwa to:

— Pom ate amji kam me gapac xà na, ite me apupun ita na ri imã me apej pit — hane. Cu ha me kampa, ne impar xà ita kôt, cu ha cormã cute me pamãampo pejti to hũjahkre xà ata na me hikaj. ⁵He xà cu ha ajkĩ ihcaprÿ na, cormã Pahpãm te me pamã ampo to hũjahkre xà ata na me hikaj? Hãpã. He quê ha ihtÿj me pahwÿr cato. Ampo na? Nee mã ampo na nare. He Pahpãm mã me pahkĩan to me pahkĩn. Cwÿrjapê ri cute me pamã Carõ Pejti kujahêc, mãr quê Carõ Pejti itacumã me pahcaxwãm pê me pahkĩnti na, to awjarê.

Pê me pancwÿrjapê Jeju ihtyc mã amji gõ

⁶He ampeaj kam Pahpãm mã me pahkĩn, na pê cormã me pahkêanre xà ata kam, pê Jeju me pancwÿrjapê ty. Pê cu tee me pampejti na ame amji to hahkre to me papa xà ata kam ri, Jeju Crixto te amji to me pahkritxwÿ, ne me pahcunea kên jahpan xà na, me pajaxà kam ihtyc. Ne pê ramã Pahpãm mã, cute ihkra tyc na amji mã amcrohyr xà ata hahkre pej, na pê ahnaa hane. ⁷Ca ha pijamã jũm te mehkwÿ jahpan xà na ihtycprãm ata na me acato? Quê! Ca ha ame hapêê ne ihhêaj tocormã jũm mã me acato. Ne ca atÿj ihhêaj to me jũm te ihnõ impejti cwÿrjapê ihtyc prãm ata mã me acato. Hamreare, jũ wÿr ca me jũm te ihnõ kêanre jahpan xà na, haxà kam ihtyc ihprãm ata na me acato. ⁸He me pahcunea kêanre cacrô, mã Pahpãm mã me pahkĩan to me pahkĩn, na ri cute ihcãmter pê Jeju Crixto kujahêc, mã me pahcunea jaxà kam ihtyc.

⁹Ne ita caxuw pĩ kam Jeju tyc xà ata kôt ri hacpÿa mã Pahpãm te mepahna amji caxàr. Cwÿrjapê cu ha me pa, me amji mã:

— He Jeju cukwa kam, quê ha Pahpãm nee cute ame pahkam incryc xà ata to ame pahkam incryc nare. Ne me pahcukij, ne me pahto ipicokjêr xà jõ amcrokam, cu ha quêt pahtÿj ame papa — hane. ¹⁰He pê mam me

papê Pahpãm curê xwÿn. Cakrô mã ihcãmter tyc xà ita kôt, cute hacpÿa mã me pahto amji kwÿ nõ. Ne hamre, ita caxuw me papêPahpãm jô ikwÿ nõ ita kam, cu ha me papê, pom Jeju tyc, ne hacpÿa mã ihtîr ata na cu ha me, ne me ty, ne hacpÿa mã me pahtîr, ne Pahpãmcahê na me pahtîr rohnÿtti mã na me papa. ¹¹Jipy me pajô Pahhiti pê Jeju Crixto te hacpÿa mã me pahto Hÿm jô ikwÿ nõ ita kam, cu ha me pajakrya to me pajakry.

Pê Atãw me pahcunea me pahkên mã me pamê

¹²Ne ca ihhêaj to me anõa amji cukij to:

— Jÿ rÿm mã ajte me pahkên xà ita cator? — hane. He nee jÿ rÿm cator nare, ne me pahcunea quêtti pê Atãw xwÿ ata pê Pahpãm jarkwa jirô pê ihpÿm, ne cute pîxô intête cumãn atakrêr. Cwÿrjapê ri mehkên ata pjê cunea kam ipicràn. Na cu me papê hÿràac, ne me pahcunea kêanre, cwÿrjapê cu ha me pahcunea me pahtyc pa. ¹³Ne Pahpãm te Mojxe xwÿ mã cute me to ihhimpej xà cunea jarên. Mã cute ahna ihhêc xà ata cumam ri ramã mehcunea kêanre, ne ihtÿj cute me ampokên jahkre pej nare kam, me ton to me ipa. Mã Pahpãm te, cormã me cumã cute me to ihhimpej xà jôr nare ita kam, jÿ mã quê me cumãn to:

“Ate me ijarkwa jirô pê amÿm, na ri me acunea kêanre” hane.

Pê Crixto quêt me pahcunea me pampej mã me pajaxà

¹⁴⁻¹⁵Ne Pahpãm te pîxô intête Atãw mãn, mã cute ihkrêr, ne ramã ne pahcunea kên mã me pamên, ne me pamã to hahkre. Ne me pahnô te ihkôtpîxô ata krêr nare cakrô, cu pahtÿj me pahte me pahtyc kam me pahtêm, ne me pahtyc to mō. Ne me pahtyc to me pamôr itaa kam, mã ahnaa Mojxe xwÿjô amcro kam hàhhuc. Ne Atãw pê me pahcunea mã me pahkên to hahkre jakàn pê mã ri Jeju Crixto cator, pjê wÿr. Pê cupê Atãw pyrãac cakrô, cutenee me pamã ampo kên to hahkre nare, ne quêt me pamã ampo pej to pit mãhahkre, ne cute me pampej mã me pamên xà wÿr ri cator. Ne Atãw xwÿ te amji kam hapac xà kên ata kôt ri me hàhtôa ne mehtyc, ne mehtyctu. Ne Jeju Crixto teamji kam hapac xà pejti kôt ri, quêt nee jÿm tyc nare. Ne Pahpãm te amji kam hapac xà pejti ata ri Atãw tekjê jirôa pê cati. Na quê ha me hàhtôa ne mehtyc xà pê me hÿtà. Ne nee cute me hÿtàr jahpan xà nahàhwÿr nare, ne cama me hÿtàr to ipa.

¹⁶Ne Atãw te ihkên xà ton ata kôt ri mehcunea te mehkên xà jãhtôa ne me ton. Mã Pahpãm me cumã:

— Imã me akêanre, na wa ha itÿj me acurê mã me amê — hane. Ne quêt Jeju te amjia kôt amji to me pahkritxwÿ, ne me pajahpan xà na ihtyc xà ata kôt ri, Pahpãm mã me pahcunea impej pit. Mã Pahpãm me pamã:

— Imã me apeaj, na wa ha me apej mã me amê — hane. Hô, pê amjia kôt, cama me pamã pahte me hajÿr xà ita gô.

Cu ha me Jeju kôt me ampo kên cunea tohjê

¹⁷He ampeaj kam ri me hũmre pyxít peaj te ihkên xà ton ata jahpan xà na me hàhtôa ne mehtyc. Ne ita caxuw mam hũmre ata jirôa pê, hũmre nũ pyxít peaj pê Jeju ata te ri, quêt ampojej pit ton ata kôt ri me pahwÿr ampo pej pit japôj. Ne Pahpãm te me pahcunea mã cute amji kam hapac xà intuw jôr, cu pahte ahna me amji to pôj xà caxuw. Na cu ha me Jeju Crixto kôt me ampo kên cunea tohjê, ne pahtÿj catyt kam me papa.

¹⁸Ne pom Atãw pyxít peaj te ihkên pyxít peaj ton xà ata to ri, cute me pahcunea curê mã me pamên. Ita na ri hanea ne Jeju pyxít peaj te ampo pejtípê catyt kam ata ton, ne cute to me pahtyc pê me pahcunea pytâr, mâr cu me Pahpãm cahê na me pahtír rohnÿtti mã. Ne hanea ne me pamã cute amjikam hapac xà intuw jôr, mâr cu catyt kam ame papa, ne nee ame pahkên ton to prãm to ame papa nare. ¹⁹Ne pom hũmre pyxít peaj pê Atãw xwÿ, neecute Pahpãm jarkwa par nare, ne hirô pêihpÿm, ne cute me pahte me pahkên ton to me pamã hahkre. Ita na ri Jeju pyxít peaj te Pahpãm jarkwa kam hapac, ne hacpÿa mã Pahpãm wÿr cute mepahto amji jaxâr, mã ihtÿj Hũm te me pahna amji caxâr.

²⁰Ne pê Pahpãm Mojxe xwÿ mã, cute me to ihhimpej xà jarê, pê ahna ihkãhhôc to, mâr quê me cahyt, ne cute me ampo kên ton xà atajê na me amji jahkre pej. Ne ampeaj kam ri ampo kên jãhtôa to hàhtô, ne cati. Ne Pahpãm peaj to impej, ne hàhcaprí catia ita, ma cumã ipicamên to mô, ne cati. Ne cute to kên itajê jakren tu, ne hirôa pê cati. ²¹Na ri me pahkên xà pahtÿjti atajê cama me pahtyc xà mã me pagô, mã me pahcura ita kam, jũ kam cu me pahnô cupê tẽ. Mã Pahpãmjàhcajrên, ne hàhcapría na ri catyt kam hãn ne me pamã cute amji kam hapac xà intuwti jôr to ipa, mâr quê ihkôat me pahna amji capa. Ne mepajô Pahhiti pê Jeju Crixto ata kôt, cu ha hacpÿa mã me pahtír rohnÿtti mã na, cahê na ame papa.

Ihhêj ne ramã mam pahte amji kam me pajapac xà këntũm ata tyc

Carati 2.19-20; 5.24; Epet 4.17-24; 1 Petrô 4.1-6

6 ¹Pahpãm jãhcapría na mã, cu pahte cuna mã me pahkên ton cacrô, mã ihtÿj cormã me pamã ampo pej pit ton to ipa. Na ri ramã mehcunea te me pahna Pahpãm jãhcaprí na me hõmpun itakam, xà cu ha ajkĩ mãnea mã me pahkên ton kam me to pancrà, mâr quê Pahpãm te me pahcaprí na hipêr me hõmpu? ²Hãpà! Xà ca ha jũm tyc mã acakôc, quê ha ajkĩihtÿj akampa? Quê! He jũ wÿr quê akampa. Ne ramã me papê jũm tyc pyrãac. Ampo na? He quê ha me pahcurê xwÿn pê Xatanaj te akên mã amên to prãmte awÿr tẽ, ne amã akên ton na awjahkre, ca ha apê mehtyac pyrãc, ne nee kam gapac, ne cumã acakôc, ne ihkôt amji kam gapac, ne ampo kên ata ton nare. Ata pê ihhêj ne ramã me pahtyc, na quê nee hipêr jũm mepahte ampo kên ton na me pahnton nare. Cwÿrjapê cu nee hipêr amjia kôt me ampo kên ton nare.

Cô kam cute me pahcumrâr xà ata pê me pajapac xà kên jarêt xà pyrâc

³⁻⁵He ramã me amã, ate mehajÿr xà na, me amji jahkre pej tu. Pê cu me pahkên ton jicu, ne Pahpãm wÿr me apkjê, ne me Jeju Crixto pê me pahkritxwÿ na ahna meamji capa, ne pea mehcunea mã to ajpê to harên to me papa, ita na pê cu me to prãm. Cwÿrjapê ri jÿm te mehcunea kam mare mã cô kam me pahcumrâr. Ne me pahna cô pijapÿn ata te ramã me pantête, pahte amji kam me pajapac xà kên tÿm cunea juwahi na harên. Ne huwahi xà ata pê ihhêj rÿm me pahte me pahkên jarêt xà ata, ne cupê cute me Jeju Crixto jÿ jarêt xà ata pyrâac. Ne me pahte me pahkên jarêt xà ita pê Jeju Crixto me ajpên kam me pahpyxit peaj. Na ri cô pê me pajapôj xà ata pê ihhêj rÿmcutê me Jeju Crixto jarêt, mã hacpÿa mã ihtÿr, ne cator pyrâac. Ne pahte amji kam me pajapac xà to me papintuw, ne catyt kam me papa xà ita te ri ihcunea na me pajarên xà. Ne ramã Jeju Crixto kam mepahte me ajpên hõnco, mã ihtÿj pahte me pahkên ton xà nare na me pahtehcajpa, ne ihtÿj catyt kam me pahtehcajpar to ipa. Pê Pahpãm carôt tÿjti impejti to hacpÿa mã ihkra pê Jeju Crixto toihtÿr, na quê ha me pahcyc jirô pê mã, hacpÿa mã me pahto ihtÿr.

Xatanaj nee hipêr me pahto ihhimpej nare

⁶Ne mam pahte amji kam me pajapac xà tÿm kên xakat pê Xatanaj pê me pajô pahhi, na ri ihtÿj me pahto ihhimpej, cu cumã me apê. Ne Jeju te pÿ kam ihtyc xà ata me ajkaam, pahte amji kam me pajapac xà tÿm kên atato hamre, mãr quê Xatanaj nee hipêr me pahto ihhimpej nare. Cwÿrjapê quê hanee hipêr cupê me pajô pahhi nare, cu ha me pa xwÿjê neehipêr cumã me pajapên to mehprãm nare. ⁷Ca ha ate atyc na, ca ha nee hipêr akên xà nõ ton nare. Ampo na? Jÿ wÿr quê jÿm ty, ne hipêr ampo kên to. Ne me pajaxà kam Jeju tyc ita kam, jÿ wÿr quê jÿm pê me pajôpahhi, ne hipêr me pahno te ampo kên ton na me pahto.

⁸Ne ramã ihhêj ne Jeju Crixto kôt ame pahcyc ita kam ramã hacpÿamã ihkôt ame pahcÿr na pahte amji mã me to hajÿr. ⁹Ne Pahpãm te hacpÿa mã Jeju Crixto to ihtÿr ita kam, jÿũ caxuw hipêr ihtyc xà te to ihhimpej xà nare na, me pamã hahkre pej. ¹⁰Ne me pahte me pahkên ton jahpan xà na ri ihtyc. Ne ihtyc pyxit peaj, na quê ha nee hipêr jÿũ caxuw ihtyc nare. Ne ita caxuw Jeju ihtÿr na apu ipa, ne cama me pamã Hÿm carôt tÿjti to ajpê, ne harkwa kôt ipa.

Cu ha nee hipêr me ampo kên ton to me papa nare

¹¹Cwÿrjapê ca ha me amji jarên to hajÿr to me apa he:

— Ramã Jeju Crixto tyc, mã cute me harêt, ata kôt ri ramã cute pahte amji kam me pajapac xà tÿm kên cunea jarêt. Cwÿrjapê cu ha nee hipêr pahte amji kam me pajapac xà kên ita kôt ame papa to prãm nare. Ne

quêt Jeju Crixto kam me pahte ajpênhônco, ne ajpên kam me pahpyxit peaj, ne cume mã mã pahte Pahpãm cajpuaw xà caxuw ame pahtiar na ame papa — hane.

¹²Cwÿrjapê ca ha nee hipêr ate amji kam me gapac xà tùm ita to me amji mã me ahimpej nare, ne me ate amji mã ampo na prãm xà kêanre ata kôt ame apa nare. ¹³Ne ca ha nee me anõ akên ton xà nõ mã acukrà xà nõ jahkre, quê ton nare. Ne Pahpãm mã, ca ha quêt me amji jôr to me apa. Ne Pahpãm te me atyc xà pê me apytâr, ne me amã me ate amji kam me gapac xà tuw jôr ata kam, ca ha atÿj cumã meamji jôr to me apa. Ne quê ha me ate catyt kam ampo pejti ton to me apa xà na, me atehcajpar to ipa. ¹⁴Ne Pahpãm mã, ramã me apê catyt kam me apa catêjê, mã cute me ana amji caxâr. He xà ajkî me amã Pahpãm te me atoihhimpej xà jôr atajê cunea kôt hakop jahkre pej na mã, cute me ana amji caxâr? Hãpà! He amjia kôt, me akên xà kam, Pahpãm mã me acaprî, mã cute me ana amji caxâr. Cwÿrjapê ca ha nee hipêr amji na ate amji kam me gapac xà tùm kên jamâr, quê me ato ihhimpej nare.

Cu ha ampo pej ton to pit mã amji mã me pahhimpej to mepapa

Jowãw 8.34

¹⁵Ne ca ihhêaj to me anõ amji jarên to:

— He nee mã pahte me Pahpãm te me pahto ihhimpej xà cunea kôt me hakopjahkre pej cwÿrjapê mã, cute amji wÿr me pahto ipipkjêr, ne me pahna amji caxâr nare, ne ihtÿj amjiakôt cute me pahna amji caxâr. Cwÿrjapê wa itÿj Pahpãm jarkwa jirô pêipÿm prãm, ne itÿj hirô pê ipÿm — hane. Co he! Acakôc xà ita to hajÿr nare! ¹⁶Ampo na? He ca ha me anõ gô pahhi mã amji gô, hamre quê ha taa ato ihhimpej na, me amã hahkre pej pejtu. Ita kôpit na, ca ha me anõ te akên mã amji jôr na, quê ha ihtÿj taa ato ihhimpej to ipa. Na quê ha gâpên xà ata jahpan xà na gâmcwÿr xà ata pê atyc xà. Nare, ca ha me anõ tePahpãm mã amji jôr na, quê ha ihtÿj taa ato ihhimpej to ipa. Na quê ha cumã gâpên jahpan xà na ana amji capa, ne amji kôat ato, ca ha me atycxà jirô pê, hacpÿa mã atÿj me atîr.

¹⁷Na ca ha Pahpãm te me ato impejti xà ita pyrên me gakryti na cumã me amji jarê. Ne pê mam me ate amji kam me gapac xà tùm kêanre ata, pêajco me ato ihhimpej to ipa. Ne ita caxuw nee cute hajÿr nare, ne quêt Pahpãm te me amã ampo to hahkre atajê to, ca ha me gî cunea kam, me amãamji kîan kam, amji mã me to ahimpej to me apa. ¹⁸Quê ha pahhi kêanre te me pajâpên xà kam me pamãquêt ata te ihtyc, quê ha cute me harêt na, cu ha nee hipêr cumã me pajâpên to prãm nare. Ita jîkjê na mã Pahpãm te pahteamji kam me pajapac xà kên tùm ata to hamre, na quê hahipêr me pahto ihhimpej nare. Cwÿrjapê cu ha pahtÿj ame papa, ne Pahpãm mã me apê.

Cu ha Pahpãm mã me amji jôr to me papa

¹⁹He pê ca mam me akên xà atajê me, ahti na ate me axy kên to me apa xà tũmti atajêa mã, ajco me amji jôr to me apa, ne amji mã me toahimpej to me apa. Ne ita caxuw, ca ha catyt kam, ampo pej tetetti to pit mã me gâpên to me apa xà caxuw, ca ha Pahpãm mã me amji jôr to me apa. ²⁰Pê ca mam ajco me akên to pit mã, amji mã me ahimpej to me apa, nenee Pahpãm mã ampo na prãmti atajê to me nare. ²¹Ne mër ampo pej mã, ca ate amji kam me gapac xà kam me pahpahãmti ata jahpan xà na ate me ipyr? Hamreare! Ne pom ate amji kam me gapac xàita pê ri me atyc xà. ²²Ne ramã Pahpãm te, ate me akên ton jicu xà caxuw me amã carôt jôr. Na ca haita caxuw cumã pit mã me gâpên to me apa. Cwÿrjapê ca ate Pahpãm mã ramã me amji jôr, ne me amji jôrtu, ne cutea ri catyt kam me apa na me aton, ne cupêa ri me gô Pahhiti. Ne quê ha hacpÿa mã me ato me atĩr, ca ha me atĩr rohnÿtti mã na, cahê na ame apa.

²³Mër hõhõ, me pahkên mã me pajãpên to me papa, mã cute me pamã hãmjôr xà ata pê me pahtyc xà. Ne Pahpãm nare, quêt cama cute mepamã pahtyc nare xà jôr ata pê ri hacpÿa mã cute me pahto me pahtĩr xà, cuha cahê na ame papa rohnÿtti mã. Na cu ha me pajõ Pahhiti pê Jeju Crixto kam me amji hõnco, quê ha ihtÿj me pamã jũ caxuw me pahtyc xà nare gõ.

Jeju te pahte amji kam me pajapac xà kên ata pê me pahpytãr

Roman 10.4

7 ¹ÿhÿ, Jeju kam me ikjêjê, he ca atÿj me acunea te, pom ite me amã cormã ampo jarên xà itajê kam me gapac to kênre nare. Ampo na? He meakwÿa kwÿ pê Juta catêjê, na ri me amã Pahpãm te Mojxe wxÿ mã, cuteme ato ihhimpej xà juwahi ata cunea jahkre pej. ÿhÿ, quê ha cormã jũm ihtĩar na ipa, quê ha ihtÿj Mojxe wxÿ jõ kãhhõc kam, cute me hapackre xà ita jũm ata to ihhimpej to ipa. Ne jũ caxuw ty, quê ha neehipêr Mojxe te me hapackre xà ita to ihhimpej to ipa nare.

²Mër hõhõ, quê ha pyjê nõ mã cormã impjê ihtĩar na ipa, quê hanee amji mã iràn xà na impjê nõ ton nare. Nãmri quê ha cute ihtyc na, quê haihtÿj me pancaca xà to pahte me amji pyrãc xà ita to ihhimpej to ipa jicu, ne ihtÿj jũm me hikwa na to tojnõ, quê ha cume hikwa. ³Nãmri quê ha cormã impjê ihtĩar na ipa na, quê ha hĩxi te iràn xà na impjê nõ me hikwa na, quê ha me pancaca xà to pahte me amji pyrãc xàata kôt cupê cahãj xyre ata, ne ihkêanre ne. Nãmri quê ha impjê cupê ty, quê ha hakàn pê impjê nõ me hikwa na, quê ha nee me pancaca xàa kôtcupê jũm cahãj xyre ata pyrãc nare.

Cu ha ita caxuw Jeju pit mã me pajãpên to me papa

⁴Ne me ikjêjê, ate me hajÿar. Ampo na? He Jeju Crixto kam ate me ajpên hõnco ata kam, ihhêj ne ramã ihkõt me atyc. Na quê ha neeMojxe

te me ato ihhimpej xà ata hipêr me ato ihhimpej nare. Ne hacpÿa mã Jeju Crixto ihtirna ri cupê me gō Pahhiti. Na ca ha atÿj cute me amã harkwa to ihcakôc xà itajê cunea na me kampa, ne me cumã apê. Ne por jÿm cahãj pê impjêihtyc, mã hipêr hikwa tuw ata, quê ha nee hipêr impjê tyc ata kam hapac nare. Ne por impjên tuw me hikwa ata, quê ha amji caxuw kam hapac to ipa. Ita na ri me pahte amji kam me pajapac xà te hajÿar. Na cu ha mam pahte amji kam me pajapac xà wej tÿm ti ita jicu, quê ha nee hipêr me pahto ihhimpej nare, ne Jeju quê ha quêt me pahto ihhimpej to ipa. ⁵Ne pê cormã me pahte amji kam me pajapac xà tÿm ata me pahto ihhimpej reria mã, pê cu amjia kôt ajco pahte me amji mã ampo kên ton to prãmatajê ton to pit mã me papa. Ne pê Mojxe xwÿ jō kàhhôc kam, cute me hapackre xàajco ampo kên itajê ton tète mepamã cakrô, pê cu pahtÿj ajco mãnea mã me ton to me papa. Cwÿrjapê ri me pahteampo kên kinti xà ata te me pahtyc xà mã me pajôr. ⁶Ne hamre, ita caxuw cumam Mojxe xwÿ jō kàhhôc kam me pancaca xà ata cuneapê me pahcator. Ampo na? He ihhêj ne ramã ame pahtyc. Ne ita caxuw cu ha me Pahpãm tiar Carô Pejti ata kampa, ne ihkôat me papa, ne nee hipêr mepancaca xà tÿm jō kàhhôc kam ihhôc ata to me amji japackre nare, ne pahtÿj ame papa.

⁷Ne mōrmô ca ha me anô amji mã:

— He por Mojxe xwÿ jō kàhhôc kam, Pahpãm te me pahtoihhimpej xà wej ata pej nare — hajÿr na. Co he! Ca ha nee garkwa ita to acakôc to hajÿr nare. Ampo na? He cute me pahto ihhimpej xà ata te ri, me pahte ampo to mehcupan xà atajê pupun na iton, cu pahte me hōmpun, ne me hahkre pej. Ne cute mepahto ihhimpej xà ata te hÿjarên to hajÿr he:

— Ca ha nee amji jÿ na ame ampo kîn nare — hajÿr. Quêhÿjarên to hajÿr nare na mã, wa ha hahkre pej nare kam, pa ramã amji mã:

— Wa itÿj me hÿ na imã ampo kîn, ata te nee ito ikên nare, ne cormãipeaj — hane. ⁸Me ajkaam wa ijÿpar pyrentu, ne tee ame amji jÿ na ampo kîn ita jicu to ame hahkre, ne jÿ wÿr wa me hucu. Ampo na? Ite amji kam ijapac xà tÿm ita, ma ite me hÿ na ampo kîn ita na ito, ita kam jÿ wÿr wa me hucu. Ne Mojxe xwÿ jō kàhhôc te riimã ikên ita to ipipê, wa ite hahkre pej. Quê ha Pahpãm nee me pamã Mojxe te me pajapackre xà jôr nare na mã, quê ha pahte amji kam me pajapac xà kên tÿm ata nee me pahkên na me pahton nare.

Mojxe jō kàhhôc ata ampÿare mã Pahpãm pê ame papana me pajarê
Roman 3.20; Carati 3.23-24

⁹⁻¹⁰He pê wa icire naa mã nee Mojxe jō kàhhôc kamPahpãm te me pahto ihhimpej xà itajê impar, ne hahkre pej nare. He pê wa ajco ampo kên pit ton to ipa, ne nee kam imã amji kîn nō nare. Ne wa ite Mojxe jō kàhhôc kam, cute me pahto ihhimpejxà itajê kam ijapac, ata caxuw wa

ite ampo kên ton to ipa ita na amji pupun, ne ahna amji jahkre pej. Ne ihhêj rûm ipê mehtyc, ne imã amji kîn nare. Ne cu ha catyt kam cute me pahto ihhimpejitajê kôt me hakop, ne ihkôat me papa na mã, cu ha ramã me pamã amji kîn. Ne me pamã amji kîn xà kaj na, pom pahte amji kam me pajapac xà ata cama ajte me pahtyc xà wÿr me pajagã.

¹¹He wa mam itÿj, pom Mojxe jô kàhhôc te ampo kên ton tète imã atajê cunea ton to ipa. Mã ite amji kamijapac xà tûm kên ata pê imã ihhêj, ne imã:

— Gapacta ne ampo itajê cunea ton to apa, he nee akên nare, ne apeaj — hajÿr cacrô, pê cute ipej na ijarên xà ata kaj na, itekên itajê ton to ipa itajê ityc xà mã igô. Na wa ihhêj ne ramã ityc. ¹²Cwÿrjapê cu me pahte Mojxe xwÿ jô kàhhôc tetetti, impejti ne ihcuh tacti na me hahkre pej, Pahpãm te ahna me pahto ihhimpej xà na.

¹³He xà ajkî Pahpãm te me pahto ihhimpej xà impejti ita mã me pamã amji kîn nare na me pahto, ne me pahtyc xà wÿr me pajagã? Hãpã. Hepahte amji kam me pajapac xà tûm kêanre atajê te, Pahpãm te me pahto ihhimpej xà impejti atajê kôt, me pamã amji kîn nare name pahto, ne me pahtyc xà wÿr me pajagã. Pê wa mam ikên xà ton to ipa atajê te cama ikên mã irên to môr na hahkre pej. Na pê wa amji mã:

— Wa ite Pahpãm te intête me cumã xà kam ijapac, ne ite ampo kêanre itajê ton na amji jahkre pej. Ne ita caxuw ite mam ite amji kam ijapac xà tûm ita kêanre na hahkre pej, ne hõmpun — hane.

Pê cu mam cormã amji mã me ampo kên capi

¹⁴Ne Pahpãm Carô Pejti pîn ri Mojxe jô kàhhôc kam, cute me pahto ihhimpej xà atajê cator. Ne Carô Pejti ita te ri catyt kamharkwa kôt me papa xà caxuw, me pamã carôt jôr. Ne pa nare. Ihkîn te ipê hûmre, ne icarôt peacre, na wa ite amji kam ijapac xà tûm kêanreitajê kôt ampo kên cunea ton to ipa. ¹⁵He wa nee ajte pa icaca xà te ajpên jîkjêhti ita na amji jahkre pej nare, ne hãn ne ikrã acto tu. He xà wa ha ite itÿj imã ampo ton prãmti atajê to? Hãpã! Wa nee ton nare. Ne ajte imã ampo ton prãm nare, ne imã ihkîn nare atajê, wa itÿj to. ¹⁶Ne nee wa ajte ampo pejti ton to amji kam ijapac to ipa nare, ne tee intête amji mã to:

— Wa ha nee hipêr ampo kên ata ton nare — hajÿr cacrô, itÿj to, me ajkaammã Pahpãm te me pahto ihhimpej xà, ikêanre na ijarê. Ne ampeaj kam ri cute ijarên na imã hahkre pej. ¹⁷Wa nee ikên xà ton xà itajê intête amji jiprôn nare na, ramã imãamji jahkre pej. Ne icaxwãm pê icaca xà kêanre itajê xakat ri hãn ne, iteampo kêanre ton xà itajê na imã awjahkre, wa hãn ne to.

¹⁸He ite amji kam ijapac xà tûmti ita kam, nee imã ampo pejti ton xà hamreare. Ampo na? He wa te apu ampo pejti ton na amji to prãm cacrô, wa nee ajte amji mã hamãr ne ton nare. ¹⁹He ampo pejti atajê ri imã ton

prãm cacrô, wa nee ajte ton nare. Ne ampo kêanre itajê ri imã ton prãm nare cacrô, wa itÿj to. ²⁰He wa nee amjia kôt ampo kên ton nare, ne ite amji kam ijapac xà tũmti ata ri, ite ampo kên ton na imã awjahkre, wa ajte nee intête amjijiprôn nare ne itÿj to.

²¹Hôhõ, pê wa mam hane he, pê wa ajco ite ampo pejti ton xà caxuw amji mã capi cacrô, nee ajte ton nare, ne cama amji mã ampo kên pit capi. ²²He ite amji kam ijapac xà impejti kam ri, Pahpãm te me pahto ihhimpej xà kam ijapac pejti xàatajê pyrên ri, icaxwãm pê ijakry. ²³Cacrô pê wa nee ajte kam ijapac ne ihkôat ipa nare, ne ajco ampo kên pit ton to ipa. Cwÿrjapê ri ite amji kam ijapac xà ita tuwpejti me, ite amji kam ijapac xà tũm kêanre itaihêj ne ihtÿj apu ajpu. Ne ite ampo kên tonto ipa ita pê ihhêj rũm, me hacjên xà pê icator xà nare ata. ²⁴⁻²⁵Ne wa icaxwãm pê itÿj Pahpãm te amji kam hapac xà kôt ampo pej pit ton to prãm cacrô, mã ite amjito xà itajê kôt hamreare. Pê wa ajco ampo kêanre atajê ton to ipa intête, nee ajte amji jiprôn nare. Ne pê imã amji kîn nare, pê wa pa amji mã:

— Jũm mã quê ha ajte ite ampo kên ton xà itajê te, ityc mã ijõr xà ata pê ipytã? — hane. Nee mã jũm nare. He me pajõ Pahhiti pê Jeju Crixto te ri ampo kên cati ita cunea pê ipytãr!

Quê ha Pahpãm Carõ Pejti me pahtĩr ita na me pahtoipa

Carati 5.16-26

8 ¹⁻²Hamre, ita caxuw quê ha, por Jeju Crixto kam me ajpên hõnco to me ipaatajê, quê ha nee Pahpãm jũm curê mã mên nare. Ampo na? He Pahpãm Carõ Pejti ita te ri Jeju Crixto kam pahte me ajpên hõnco na me pahton, ne mepamã pahte amji kam me pajapac xà intuw pejti ita jõr. Me ajkaam, cute mam me pahte amji kam me pajapac xà kên tũmti ata te, me pahto ihhimpej xà pême pahto cator. Na cu ha nee Pahpãm kaj na, ampÿa mã cupê ame papa, ne ihkên catia ata mã me pancjêj nare.

Quê ha nee hipêr pahte ampo kên ton xà atajê mepahto ihhimpej nare

³⁻⁴Ne pê Pahpãm Mojxe xwÿ mã cute me to ihhimpej xà gõ atajê cunea imej pit. Cu nee mempar nare. Ampo na? Jũ wÿr cu apu amji mã me hamã, neme kampa. Cwÿrjapê ri Pahpãm te me pahna amji ton to:

— Tee ame ite me to ihimpej xà ton to me hahkre ita kam, quê ha nee curê mã cute me mên xà ata pê me amji pytãr nare. Cwÿrjapê wa ha mehwÿrikra kujate, quê ha mehkritxwÿ na amji to, ne taa mehkên xà ita pê me hũtã — hajÿr. Ne ma cute me pahwÿr Jeju kujahêc, mã cute me hũmrea naamji ton, ne ita ri pjê kam apu ipa. Ne ihtÿj Hũm te, Mojxe xwÿ mã cute me to ihhimpej xà atajê na, me pajaxã kam amji mã impar kên to ipa nare. Jicu xà kam, nee ampo cwÿrjapê ihtyc prãm nare kam, cupê me pahkritxwÿ te hajÿr romã mã, cama cute amji na me hamãr, mã cute

me pajaxà kam mehcuran, mã ihtyc. Ata to ri cute me pahkên xà catia ata pê me pahpytâr. Ne cute me pamã carôt jôr na, cu pahte amji kam me pajapacxà kên tûm ata kôt me papa jicu, ne pahte amji kam me pajapac xà tuw pejti, Pahpãm Carô Pejti pîn ajpên cator ata kôt, cu me papa.

⁵Ne por mam cute amji kam hapac xà tûm me to ihhimpej to ipa atajêa kôt me ipa. Ne Pahpãm Carô Pejti quêt me to ihhimpej to ipa atajê ri, ihkôat me ipa. ⁶Ne quê ha jûm te, cute amji kam hapac xà tûm ata kôt ipa na, quê ha ihtÿj jû caxuw ty, ne ihtyc tu. Ne quê ha quêt jûm te PahpãmCarô Pejti kôt ipa na, quê ha nee cumã ampo cupa nare, ne ihtÿj ihcarïcti kam, ihtïar na ipa rohnÿtti mã. ⁷Ne por jûm cute amji kam hapac xà tûam kôt ipa ata pê Pahpãm curê xwÿn. Ampo na? He hÿpar nare, na ri nee Pahpãm te to ihhimpej xà ata kam hapac nare. Ita kam tee apu ihkôt amji ton to hahkre, ne jû wÿr quêapu amji mã hamã ne to. ⁸Ne por amjia kôt cute amji kam me hapac xà tûam kôt me ipa atajê ri, nee me Pahpãm cajpuaw nare.

Pahpãm Carô Pejti ri, me pahcaxwÿn me, me pajï tírrohnÿtti mã na to Carati 4.1-7

⁹Quê ha Pahpãm Carô Pejti te nee me akam ihkrï nare na, ca ha nee me apêhõ tekjê nare. Na ca ha nee mam, ate amji kam me gapac xà tûm ata kôt me apa nare, ne quêt Carô Pejti jarkwa kôt me apa, mãr quê me akam ihkrï. ¹⁰Ne quê ha Jeju Crixto, Carô Pejti kôt, me akam ihkrï cakrô, quê ha ihtÿjjû caxuw me gï apu ty, me ate Pahpãm te me ato ihhimpej xà atajê jirô pê me apÿpÿm cwÿrjapê. Ne me acaxwÿn nare, quê ha ihtÿj ihtïr rohnÿttimã. Ampo na? He ihtÿj Pahpãm te me ana amji caxâr. ¹¹Pê Pahpãm Carô Pejti hacpÿa mã Jeju Crixto to ihtïr, ata ri me akam ihkrï. Ne taa mã quê ha hacpÿa mã, me amã me gï to ihtïr.

¹²Ita kam me ikjêjê, cu ha nee me pahte amji kam me pajapac xà tûam ata kôt me papa nare. ¹³Nãmri ca ha me ate amji kam me gapac xà tûam kôt ame apa na, ca ha ramãme atyc xà wÿr ame pra. Ne ca ha me ate Pahpãm Carô Pejti carôt kôt me akên ton jicu na, ca ha Pahpãm cahê na me atïr rohnÿtti mã na, me apa. Ne nee jû caxuw me akên catia pê, cuhy cati ata wÿr me aprar, ne kam me apÿpÿm nare.

Pahpãm Carô Pejti ri, ihkra na me pahto

¹⁴Ne por Pahpãm Carô Pejti amji kôt me to ipa atajê cunea pê mehkraa to mehkra. ¹⁵Mêr ampo na mã Pahpãm te me amã Carô Pejti jôr? Xà ajkï ate cama me cumã gâpên xà caxuw, nare, ajkï cute me gigêc rên xà caxuw mã? Hãpà. He cute me ato ihkra xà caxuw ri, cute meamã Carô Pejti ita jôr. Na ca ha atÿj Carô Pejti carôt kôt cumã:

— Inxû — hane. ¹⁶Pahpãm Carô Pejti me, me pahcaxwÿn ajkam ihhônco, ne me pamã:

— Me apê Apâm Cati kraa to ihkra — hane.

Cu ha jũ caxuw, Jeju me, me ajpëan, ne me pampejti ne

1 Petrô 1.3-9

¹⁷Ne pom hãn ne me hũmjê tycjakàn pê, mehkra te me hàhcukrêj cwÿr xà, ita kôpit na mã, cu ha Jeju Crixôtômea mã, Hũm te cumã ampo jôr xà to hũjahkre atajê cwa. Cu ha Jeju Crixôtô me, me pahcunea te cute amji pupun xà kêanre atajê na ihkôt me amji pupun na, cu ha hanea ne jũ caxuw, Jejua kôt me pahcarôt tÿjti, capënti, impejti kam ame papa. ¹⁸Ne wa pjê ita kam, pahte me amji pupun xà kêanre kêanre atajê to amjikampa, ne hanea ne ampo pejti to me pajãmcwÿr xà atajê me to ajpën mã hapyre mã. Ne pahte ampo pejti to me pajãmcwÿr xà ata ri, pahte me amji pupun xà kêanre atajê jirôa pê catiati cati. Ne pahte me ampo pejti to me pajãmcwÿr xà ata kam, cu ha nee hipêr ampo kên itajê to me amji japackre nare. ¹⁹Ne pê Pahpãm pjê kam ampo cunea to, itajê pê me hũmre me, pryre me, ampo jara me, tep me, ampo cunea. Quê ha ampo itajê cunea ihtÿjjũ caxuw, Pahpãm te me pahto ipipê xà ata kam, mepapê ihkra na cute me pahpupun na, me pajikaj.

Quê ha jũ caxuw Pahpãm ampo cunea to impej

²⁰Ne mër ampo na mã ame amcro ata jikaj? Nee mã ampo na ame amcro ata jikaj nare. He pêmam Atãw xwÿ Pahpãm cuna mã ihkên xà to, na ri ihkôt ampo cunea kên mãhâr. Ne nee mã amjia kôt ihkên mã hâr nare. Ampo na? Pê Pahpãm ramã cute ita ton xà to amji kampa. ²¹Ne quê ha ihtÿj jũ caxuw amcro ata na, Pahpãm te ampo cunea ton atajê hacpÿa mã impej pa. Ne cute me pahto ihkra ita kam, quê ha hacpÿamã me pahto impej pa. Me ajkaam, quê ha hanea ne cute ampo cunea ton itajê impej partu, quê ha nee hipêr ihcacu, ne ihkên nare. ²²Ne me pamã, pjê kam ampo cunea kàj xà, mã amrã na, hahkre pej. Ata pê ihhêj rũm pyjê mã mehkra xà, mã me ihcãjpê ita na mãampo cunea kàj xà.

Cu cormã Pahpãm te me pamã me pajĩ to ipintuw xà ata jikaj

²³Ne pê Pahpãm mam me pamã Carô Pejti jôr cacrô, mã cormã me pahkàj xà, cu me amrã, pahte amji to me papintuw xà jikaj xà cahhur to, pahte me hikaj xà ita kam. ²⁴⁻²⁵Ne cu me pahte amji mã me Pahpãm to hajÿr, ne amji mã me pahprãa kam me hikaj, ne me amji mã:

— Wa nee cormã ite me, por wa me hikaj ata pupun nare cacrô, wa itÿj Pahpãm te ampo cunea to impej, ne imã ijĩ to ipintuw na amji mã me to hane. Cwÿrjapê, wa ha itÿj me hikaj — hane.

Carô Pejti Pahpãm mã me pahcakôc na me pahtehcajpa

Epet 1.3-5

²⁶Ne jũ caxuw, pahte me hikaj to hicu prãm xà ata kam, quê ha PahpãmCarô Pejti pahte me hikaj jicu nare na me pahtehcajpa. He me

papê Pahpãm mã amji cajrën jahkre kêatre, cwÿrjapê quê ha Carõ Pejti ihtÿj ihcakôc nare kamihtarïcti kam, aracri Pahpãm mã me pahcajrën. ²⁷He Pahpãm te me pahcaxwãm pê me pahte amji kam me pajapac xà pupun pejtu. Ne hanea ne cumã Carõ Pejti te amji kam hapac xà jahkre pej. Quê haCarõ Pejti Pahpãm te me pamã ampo jôr to prãm xà ata na, quê ha me pamã ahwÿ.

²⁸Me pamã, mehcunea mã Pahpãm kïnti, mã cute amji kam hapac xà mã me hacjên xà caxuw ri, amji mã me capi atajê wÿr ampo kên teimprar, ne ame to jũ mãn xà atajê pïn impejti te amji to ipixô, ne me hÿrmã imprar na, me pamã hahkre pej.

Jeju pê me Pahhàkà cati

²⁹Ne Pahpãm te amji mã me pahcapi, ne taa amji mã:

— Pom itajê quê ha me cupê ikra pê mehtô kà pê Jejupyràac, na quê ha me to “Ihàkà” — hane. ³⁰Ne pê Pahpãm ramã me pahto amji kam hapac xà to amji kampa ata to ri, me pahto amji kampa. Ne hanea ne cute amji mã me pahcapi. Ne hanea ne cute catyt kam me papa catêjê na amjicaxãr, ne quê ha hanea ne me pamã me pahcarôt tÿjti, impejti, capëntigô, cu ha me papê hÿràac ne kam me papa.

Quê ha nee me pahcurê xwÿn ame pahto jũ mãn nare

Roman 5.1

³¹Ne pom Pahpãm te me pamã ampo pejti cunea jôr itajê kôt ri, ramã me pamã Pahpãm pê me pajamãr catê na hahkre pej. Heramã Pahpãm me pahcahê na ipa ita kam, xà quê ha ajkï ihtÿj ampo me pahtohjê? Hãpà! ³²Ne hanea ne me pajaxà kam, ihkra tyc xà caxuw, cute hôr to xuwcaca nare, ne ihtÿj ihtyc mã hôr ata kam, xà quê ha ajkï nee me pamã ihkôtampo pejti itajê nô jôr nare? Hãpà, quê ha ihtÿj me pamã cugô!

Jũ wÿr quê pahte ampo kên ton itajê, cupêcumã me pahkïnti ita cahpêrta

³³Ne Pahpãm te ri ramã me pahto hÿjarën to:

— He imãa, pom itajê pê catyt kam me ipa catêjê, na wa ha me ahna amji capa — hajÿr xà ata kam, jũm quê ampo kên na me pajarê? ³⁴He me pajô Pahhiti pê Jeju Crixto ramã me pajaxà kam ihtyc, ne ihtyc xà ata jipy, ramã hacpÿa mã ihtïr, ne ma Pahpãm jïkjêrũm awpôc rũm, me to ihhimpej xà krï xà kam jÿ, ne cumã me pahcajrën to ihkrï. Ata kam, jũ mã quêha ajte jũmjê me papê ampo kên ton catêjê na me pamãhacjê? Quê, hamreare!

Jũ wÿr quê ampo kên Pahpãm pê cumã me pahkïnti ita cahpêrta

³⁵Me pajô Pahhiti pê Crixto mã me pahkïan to me pahkïn.

Ne ampo quê cumã mepahkïnti ita têtê ihcahpêrta, quê hïcu?

Hamreare, wÿr quê ampo ihcahpêrta!
 Cu ha me amji pupun xà kēanre to me amji pupu, quê ha cormãcumã
 me pahkĩn ita na.
 Ne quê ihhêaj to ampo te me pahto jũ mãn xà ata kam, quê ha cormã
 cumã me pahkĩn ita na.
 Me papê Pahpãm tekjêcwÿrjapê ri Pahpãm curê xwÿn te ame pahto
 kēanre ata kam, quê ha cormã cumã me pahkĩn ita na.
 Quê ha ampeaj kam me pamã prãm cakrô, quê ha cormã cumã me
 pahkĩn ita na.
 Quê ha me papê hamreare cakrô, quê ha cormã cumã me pahkĩn ita
 na.
 Quê ha jũmjê ame pahcuran prãm toame ipa cakrô, quê ha cormã
 cumã me pahkĩn ita na.
 Ne jũm me pahcuran cakrô, quê ha cormã cumã me pahkĩn.

³⁶Ne pê ramã rÿ pēa mã Tawi xwÿ Pahpãm jô kàhhôc kam me pahto
 hũjarēn to:

“Me ijô Inxũ Cati, he acurê xwÿn acwÿrjapê amcro cunea kam me
 icuran to prãm.
 Ne me ito ihhêj rũm carà cahàcre hôhti curan xà caxuw, ne ihtÿj me
 icuran prãm” hane.

³⁷Ne xà cu ha ajkĩ ampo kēn itajê cunea cupate me pajô Pahhiti mã me
 pahkĩnti xà ata to, amji mã me pahhimpej jicu? Hãpã, nee cu amjimã
 me to pahhimpej jicu nare! He taa mã quêha quêt me pahte ampo cunea
 tohjê na me pahto!

Ampo quê Pahpãm pê cumã me pahkĩnti ita cahpêrta

³⁸Ne nee ampo te Pahpãm mã me pahkĩnti xà ita cahpêrhyr xà nare
 na, me pamã hahkre pej.
 Cu ha me pampeaj na me papa, nare, cu hame ty, quê ha cormã
 Pahpãm mã me pahkĩn.
 Quê ha ampo carô me, cupê jarôti me, me hôpahhi kwÿ atajê nee me
 Pahpãm mã me pahkĩnti ita têtê mehcahpêrhyr nare.
 Ne pom amcro ita kam ampo cator ata me, nare, quê ha jũa caxuw,
 cormã ampocato ata, quê ha nee Pahpãm mã me pahkĩnti ita têtê
 ihcahpêrhyr nare.
³⁹Quê nee côjkwa me pjê krac ri jũa rũm, ampo cator itajê nō Pahpãm
 mã me pahkĩnti ita têtê ihcahpêrhyr nare.
 He nee ampo te Pahpãm mã mepahkĩnti xà ata têtê ihcahpêrhyr xà
 hamreare.

Cu Jeju Crixto pê me pajõ Pahhiti kam pahte me ajpên hõnco cwÿrjapê, quê ha Pahpãm mã mepahkîn rohnÿtti mã.

Pê Pahpãm Juta catêjê mã ampo pej jàhtõa ne cugõ

Roman 3.1-2

9 ¹Ita caxuw wa ha me amã, me ikwÿ pê Juta catêjê pê Ixaher catêjê to, ite amji cajpêrxã na amji jarê. Wa Jeju Crixtõkam ite amji hõnco ita kam, wa nee PahpãmCarõ Pejti kõt ame amã ihêj nare, ne quêt ampeaj kam me amã harê. Ne hanea ne icaxwãm pê imã, wa ampeaj kam ame amã amji jarên na, imã amji jahkre pej. ²He me ikwÿ pê Juta catêjê pê me ikwÿa kwÿ, ne nee Jeju to amji mã mehhimpej prãm nare ita kam ri, me hũ na ipeacre, ne imã amji kîn nare. ³Ita kam wa itÿj, pa mencwÿrjapê Pahpãm te icurêmã imên ne ito kêanre na, amji toprãm. Ne hanea ne Jeju Crixto kam ite amji hõncoxã ita pê icapa, ne ampÿamã Pahpãm pê ixãm, quê ijaxã kam me hàhhuc, nemempej mã me hàr na, imã me to prãm cacrõ, mã nee Pahpãm te me to hajÿr nare.

⁴ÿhÿ, por me ikwÿ pê Juta catêjê atajê ajteare mã me, ne quêt me ipihho te hajÿr he. Pê ramã Pahpãm me to hõ tekjê xã caxuw amji mãme capi, ne me to amji kra, ne me cumãa Carõt jàhcujrohti impejti ata to ajpê. Pê hanea quêt Pahpãm ajco Ixaher catêjê mãa amji jarê, pê me kampa, ne me ajpên pa, ne hanea ne me cumã ihhimpej xã gõ. Ne pê hanea ne Pahpãm me cumã, cute me to amji kam hapac xã to impejti xã to hahkre, ne quêt me cumãa ampo pej jàhtõa to awjahkre. ⁵Ne menquêtjê xakat pê ihtÿj Pahpãm kõt me ipa, atajê pê Aprãw xwÿ me, Ixac xwÿ me, Jaco xwÿ pê Ixaher catêjê xakat. Na ri me ikwÿ pê Juta catêjê pê mehtãmwxwÿa to mehtãmwxwÿ. Jirõa pê ri Jeju Crixto pê Pahpãm kra te mehã na amji ton, ne cupê mehwÿa nõ. Na cu hame cumã, Pahpãm pê ri pjê cunea to ihhimpej catêna to pajãmnãn to me papa. Ampeaj kam!

Pê Pahpãm harkwa to ihcakõc ata na ihtÿj cute amjipar

Roman 2.25-29

⁶Mêr hõhõ, Pahpãm te Juta catêjê to kêanre nare, ne me to hõ tekjê. Mã cute me cumã me to Inxũ Cati na amji to hÿjahkre xã ata na, nee ajte mehcunea mãihkîn, mã ihkõt me ipa nare. Ne hõtpê mencrene ihkõt me ipa. Ita kam, xãajkî Pahpãm te nee me cumã amji ton xã ata na amji par nare? Hãpã! He ihtÿj cute harkwa to ihcakõc xã atana, cute amji par. Ne mêr ampo na mã neemhcunea pê Pahpãm tekjê nare? Nee mã ampo na nare. He Pahpãm te nee amji mã mehcunea capi nare, ne hõtpê me pyxitre ne amji mã me capi. ⁷Ne nee mã Aprãw tãmwxwÿ kwÿ cunea pê Pahpãm tekjê nare. Ne mehwÿa kwÿ pê hõtpê Pahpãm tekjê. Ampo na? He pê Pahpãm Aprãw xwÿ mã:

“He pê akra pê Ixac tàmwxwỳ tàmwxwỳ kwỳ pê itekjêa to itekjê.
Ne mehkĩnte akra nõ pê Ixamar tàmwxwỳ tàmwxwỳ kwỳ pê, nee itekjê
nare” hane.

⁸Cwỳrjapê ri Pahpãm te amji mã Aprãw tàmwxwỳ tàmwxwỳ kwỳ capi na, cute amji to hũjahkre xà atana. Cute amji mã me capi atajê pê ri hõtekjêa to hõ tekjê. Ne cute amji mã mehkwy capi nare, ne amji to hũjahkre nare atajêpê ri, nee me hõ tekjê nare. ⁹Ne pê Pahpãm Aprãw xwỳ mã ihkra xũmre to hũjahkre to hane he:

“Wa ha jũ caxuw hacpỹ ne me awỳr amji jaxà, quê ha Xarakwỳj pê gĩxi mã ihkra xũmre nõ ihpỳm” hane.

¹⁰Hanea na pê Xara mã ihkra xũmre pê Ixacita ihpỳm, ne ihkà. Ne apuipa, ne Repecakwỳj me hikwa tuw, ne kam ihkra xũmre cumã ajkrut hiahpuro ne ihpỳm. Ne mam ita japrỳ te Exaw, ne hapu na ita japrỳ te riJaco pê Ixaher catêjê quêtiti, ne cupê me Juta catêjê xakat. ¹¹⁻¹²Pê Pahpãm Repecakwỳj mã:

“Pom hapu na akra xũmre pỳm ita pê quêha mam ita jõ pahhi” hane.

Ne pê cormã ihtua kam ajwar me harij, ne nee cormã me ampo kên me, impej nõ ton, pê ahna me hõmpun nare cacrô, mã Pahpãm te amjia kôt, amji mãihnõ ita capi, ne ma apu ihnõ ita caca. ¹³Ne pê ramã Pahpãm, hõ kàhhôc kam, me ahna amji jarên to hane he:

“Jaco ri imã ihkĩn, ne Exaw ri imã kĩn nare” hane.

Hõ, pê cormã ajwar mehpỳm nare kam, pê Pahpãm me ahna amji jarên to hane, ne pyxit ne amji mã capi.

Quê ha Pahpãm mã jũm caprĩ to prãm na, quê haihtỳj caprĩ

Roman 3.5-8

¹⁴Ne cu ihhêaj to me pahnõ amji mã me pajarkwa to:

— He Pahpãm te amjia kôt amji mã jũm capi, ne ma apu ihnõ ita caca ita kam, imã Pahpãm ita nee catyt kam ipa nare — hajỹr nare. He Pahpãm pejti, ne quêt catyt kam ipa. ¹⁵Na pê rỳ pêa mã Mojxe xwỳ mã amji jarên to hane he:

“Quê ha imã jũm caprĩ to prãm na, wa ha itỳj caprĩ.

Nãmri quê ha imã jũm caprĩ prãm nare na, wa ha nee jũm caprĩ nare” hane.

¹⁶ Pahlpãm te ihtÿj mehwÿ na amji caxàr, ne ma amehkwÿ caca. He xà ajkÿ me hâpên xà to me hâpên to ipa atajê kôt mã, Pahlpãm te me ahnaamji caxàr? Nare, xà ajkÿ hÿmre ata mã, Pahlpãm te ahna amji caxàr na to prãm na mã, cute ahna amji caxàr? Hãpà! He Pahlpãm te amjia kôt, hàhcaprÿa kam, me ahna amji caxàr. ¹⁷ Ne pê Pahlpãm, hõ kàhhôc kam ramã ita na amji jarên to hane he:

“Ûhÿ Paro, itea wa Ejit jô pjê jôpahhi na axãm.

Ne ite gÿpar nare me, akrã tÿjti na aton.

Ampo na?

He akôt ite mehcunea mã icarôt to ipipê xà caxuw, wa ite pahhi na axãm.

Ne akôat quê ha mehcunea, pjê cunea kamme ijahkre pej” hane.

¹⁸ Hajÿr xà ita kôt, cu ha me Pahlpãm te amjia kôt jÿm caprÿ, ne ahna amji caxàr na me hahkre pej. Ne hanea ne amjia kôt, cute jÿm caca xàa to amji tète cumã ihkrã to ihtÿj na, me pamã hahkre pej.

¹⁹ Ne ca ihhêaj to me anõ ita na icukij to:

— Ne mër ampo na mã quê ha Pahlpãm jÿm mã hÿpar nare to, quê ha hÿpar nare xà ata kam, jÿ mã quê ha ajte Pahlpãm te ahna mên, mã cuteton ata jahpan xà na, ihkên mã cumê? Imãa Pahlpãm tejÿm to hajÿr xà ita na ihkaj na. Jÿ wÿr quê ha ajte jÿm, Pahlpãm te amji mã ampo na prãm, ne ahna mên xà ata kaj na ihnõ to — hane. ²⁰ Co he! He nee ate Pahlpãm na me amji cukij xà hamreare! Quê ha pjê te pot ata ihcakôc na mã, xà quê ha ajkÿ ihtÿj jÿm te ton catê ata mã harkwa to:

— Ampo na mã ate iton to hajÿr? — hane. He cute amjina cute ton catê cukij xà hamreare. ²¹ Ne por jÿm xÿmre pot to ata te ihtÿj pjê ata kam, amjia kôt to ipijakrut nehipej xà. Ne ajteare mã ampo pej pit caxuw, itato impejti ne. Ne ajteare mã cute ampokên pit caxuw ton ata te, nee cute ton catê na, ihcakôc xà hamreare.

Pê Pahlpãm rÿ pêa mã amji mã me pahcapi

²² Ata pyrãc pej na mã, Pahlpãm teme pahton xà kam, cute me pahto amjikam hapac xà te hajÿr, pom quê pjête pot to cute amji kam hapac xà he. Ita na mã mehwÿ to amji kam hapac to impejti, ne mehwÿ to amji kam hapac xà to kêanre. Ne Pahlpãm mã mehcuneamã carôt tÿjti to ipipê toprãm, mãr quê mehcunea Pahlpãm te ma apu ampo kên caca atajê na, me hahkre pej. Cwÿrjapê ri hàhcaprÿa kam, cute mehkên ton prãmti ton atajê na me hamãr to ipa, ne jÿa caxuw mehkên mã me curê. ²³ Ne hanea ne Pahlpãm mã mehcunea mã hàhcaprÿhti na amji to ipipê to prãm. Cwÿrjapê ri cute rÿ pêa mã amji mã me pahcapi, ne me pamãcarôt tÿjti jãhcujro impejti ata jôr, me papê hÿràac to prãm to, na ri ramã cute me

pahto impej. Na quê ha mehcunea me pahpupu, ne me Pahpãm pejtina me hahkre pej.

Pahpãm mã mehcakkrit me, me cupê Juta catêjê atajê caprî

²⁴Pahpãm te me pahto hõ tekjêa prãmtê ri, me cupê Juta catêjê kamcute amji mã me pahkwý capi, ne hanea ne mehcakkritatajê kam, amji mã mehkwy capi. ²⁵Pê Pahpãm ramã Hôxêj xwý pêharkwa na ihcakôc catê ata jõ kãhhôc kam, amji jarên to hane he:

“He por pê mam me cupê me ikwý nare atajê, wa ha ita caxuw me cumã:

‘Me ikwý’ hane.

Ne pê mam imã mehkĩn nare atajê, wa ha ita caxuw me cumã:

‘Imã me akĩnti itajê’ hane. ²⁶Ne por pê wa pjê ita kam me cumã:

‘Nee me apê me ikwý nare’ hane, atajê mã, wa ha ita caxuw:

‘Me apê, ipê me Apãm tĩr rohnýtĩ mã ata kra’ ” hane.

Hõhõ, pê Hôxêj xwý Pahpãm jarkwa na, hõ kãhhôc kam, mehcakkrit atajê na ihhõc to hane.

²⁷Pê hanea ne Ixaj xwý Pahpãm jarkwa na Ixaher catêjê na ihhõc to hane he:

“Ixaher catêjê jãhtõ pê ihhêj rũm cõxwa jõ pjẽnxõm jãhtõ cakrõ, wa ha me pyxitre ne mehkên pê me hõtã.

²⁸Wa ha ipê me gõ Pahhiti, ne pjê cunea kam me hàhtõa te mehkên ton jahpan xã na, me to ihtýtĩ tu ne.

Ne wa ha me mõr pejti kam, ita cwýrjapê mehcunea to hajýr hiahpuro” hane.

²⁹Ne pê Ixaj xwý hõ kãhhôc kam, hanea ne ihhõc to hane he:

“Quê ha me hirõa pê me pajõ Pahhiti carõt týtĩ ata, nee me pamã ihtãmwxwý nõ juwahi nare na mã,

cu ha rý pẽa mã me papê Krĩhpõc jõ krĩ me, Krĩcumrãrti pyrãac, ne ramã me pajamre tu ne” hane.

Hõhõ, Ixaj xwý te harên xã ita kõt, cu ha Pahpãm te amjia kõt jũm capi, ne ma apu ihnõ caca ata na me pamã hahkre pej.

Juta catêjê pyxitre te hõtpê Jeju to amji mãihhimpej

Roman 10.1-4

³⁰He ca ihhêaj to me anõ me harkwa itajê na icukij to:

— Ampo to mã Pahpãm jarkwa na mehçakôc catêjê itajê ame pamã hahkre to prãm? — hane. Ỳhỹ, cute hajỹr he. Mehçahkrit atajê, nee Pahpãm wỳrme mõi na amji to me hahkre nare çakrô, mã ihtỳj Pahpãm te amji mã me çapì. Ampo na? He cute Jeju to amji mã mehhimpej xà ata kôt ri, Pahpãm teme ahna amji çaxà. ³¹Ne Juta catêjê nare. He Mojxe xwỳ te me to ihhimpej xà kôt, ihtỳj Pahpãm wỳr me ipa na amji to me hahkre çakrô, quê nee jũm hỹrmã mõi nare. ³²Ampo na? He Mojxe xwỳ te me to ihhimpej xà kôt ri Pahpãm wỳr mehkràr, ne nee Jeju to cute amji mã mehhimpej xà kôt, hỹrmã mehkràrnare, cwỳrjapê ri nee hỹrmã jũm çator xà nare. Ampo na? He me cumã Jeju pê Pahpãm wỳr pry kôt kēnti nõi ata pyràac, na ri pry ita kôt me pra, mã mehtôtôc, mã me ajhu. Pom cu pry kôt me pra ne amji mã me parĩt nare, mã kēnti me parē, ita jĩkjê na mã Juta catêjê ma apu Jeju çurê. Ampo na? He nee amji mã me to mehhimpej prãm nare. ³³Pê Ixaj xwỳ jõi kàhhôc kam, Pahpãm ita na amji jarēn to hane he:

“Wa ha Xijãw jõi hàpkàjti çahēna Krĩpinkrēn kam me ikwỳ mehkrĩ atajēwỳr, jũm kujate.

Quê ha çupê pry kam kēnti çatia pyràc ne jỹ, ne pry kôt me pra atajê jàhtôa ne mehtôtôc, quê ha me ajhu.

Hõhõ, quê ha cute me tohajỹr xà ita kam, quê ha me çupê Ixaher catêjê jàhtôa mã ihkĩn nare ne, quê ha ma amehçaca.

Ne quê ha mehkwỳ te amji mã me to ihhimpej catêjê atajê, quê ha ihtỳj mempej mã mehpỹm, ne ampeaj kam hũrēn me hakry” hane.

Pê Pawrô ajço Pahpãm mã mehkwỳ pê Juta catêjêçajrê

Roman 1.16-17; Carati 3.24-27

10 ¹Ỳhỹ, Jeju kam me ikjêjê. Imã me ikwỳ pê Juta catêjê kĩan to kĩn. Imã Pahpãm te, pom çormã kam me hapac nare atajê mea mã, mehçēnpê me hũtār na me to prãm. Ne wa ijõtpe Pahpãm mã mehçajrēn to hane he:

— Inxũ Çati, ça ha amji wỳr Juta catêjê pipkjēr na me to, quê me apkjê — hane.

²He ampeaj kam wa me amã harē. Cute amji to mePahpãm çajpuaw prãm to, ihtỳj me cumã amji jõi to prãm, ne çama me çupê, cute me cumã amji jõi xà ata çunea jahkre kēatre, mã ihkaj na ame to. ³Ne me cumã Pahpãm te amji mãa, me cute amji kam hapac xà jikôtĩ tũmti to ihçuhtac, ne to impej, ne me ahna amji çaxà na, me çupê hahkre kēatre. Ne teeamjia kôt ahte ame amji çuhtac, ne ame amji to impej to me hahkre. Ne ma ame Pahpãm te Jeju kôt amji çaxuw me to ihçuhtacti, ne me to impejti xàata na me to ihçaca. ⁴He ihtỳj Mojxe xwỳ jõi kàhhôc ata kôt, tee ame amji kēn tũmti, jikôtĩ atajê to ihçuhtac, ne me to impej to hahkre. Ne Pahpãm teramã

Mojxe xwỳ jō kàhhôc ata jaxà kam Jeju Crixto xãm. Na quê ha cute amji mã me to ihhimpej catêjêatajê catyt kam, Jejua kôt cute amji kam me hapac xà cuhtacti to me ipa, mārquê Pahpãm hō tekjêa na me ahna amji capa.

Pahte Pahpãm caca xà intuw ita mã me paxàr xà jahkre kêt nare

⁵Pê ramã Mojxe xwỳ ampo itajê na Pahpãm te amji jarên xà na ihhóc to hane he:

“Quê ha jũm te, ite me cumã ijarkwa jirên xà itajê cunea to amji kam hapac to ipa, ne nee jũ caxuw ihnō to hapac kêt nare na, wa ha itỳj ahnaamji capa, quê ha icahê na ihkrĩ rohnỳtti mã” hane.

⁶Ne jũ wỳr quê jũm ita to, quê nee jũm ton nare. He pê mam Mojxe xwỳ, ma kënti na api, pê kên po kam Pahpãm cumã harkwa jirên xàatajê cunea na ihhóc, pê cupy ne to wrỳ, ne me cumã cugō. Ne pê cute amji mã Pahpãm jarkwa to iwrỳc xà ita, cumã ihtỳaj to ihtỳj. Ne itakam nare. Xà quê ha ajkĩ Mojxe xwỳ cuxà, jũm ma JejuCrixto kôt cōjkwa wỳr api, ne amji mã to wrỳ, cupê me pahkritxwỳ xà ita caxuw? Hãpà! Heramã amjia kôt me pahwỳr iwrỳc, ne cator. ⁷Ne hanea ne, nee pjê krac ri mehtyc cahêna Jeju Crixto wỳr jũm wrỳc, ne cuteto ihtĩr xà hamreare. Ampo na? He pê ramã Pahpãm to ihtĩr ita kam, quêt nee me pamã pahte me cumã me pahcator xà ita tỳj nare. Ne pê Mojxe xwỳ hanea ne Ixaher catêjê mã:

⁸“He ramã me pahcaxwãm pê me pamã Pahpãm jarkwa na, me amã hahkre pej” hane.

Ne cu ramã Jeju pê me pahkritxwỳ te me pahpytâr catê na, me to amji kampa, ne amji mã me harê. Ne harên xà ita to wa hãn ne me cumã harên to ipa he:

⁹— Ca ha me anō te garkwa to gũjarên to: “Jeju pê mehcunea jō Pahhiti” hajỳr, ne acaxwãm pê, ate amji kam gapac xà kam, Pahpãm te hacpỳa mã to ihtĩr na amjimã to hajỳr na, quê ha ihtỳj ampo kên kêanre ata pê apytà, ne ana amji capa — hane. ¹⁰Ampo na? He cu me pahcaxwãm pê Jeju pê Pahhiti to amji mã me pahhimpej na, quê ha ihtỳj Hũm me pahna amji capa. Ne cu ha me pajarkwa to me Jeju jarênna, quê ha ihtỳj Hũm Cati pahkên pê me pahpytâ. ¹¹Ne pê ramã Ixaj xwỳ Pahpãm jarkwa na, hō kàhhôc kam, Jeju na ihhóc to hane he:

“Ne por mehcunea Pahpãm te me pamã jũm kujahêc ata to amji mã me hajỳr atajê,
quê ha nee mehkên pê cute me hũtâr nare na, amji naamehcãmjĩ nare.

Ampo na?

Quê ha ihtÿj me hÿrmã cato ne me hÿtã” hane.

¹²Ne cute harên xà ita ri, pjê cunea kam, mehcunea caxuw impej. Ampo na? He Juta catêjê me, mehcahkrit atajê pê nee ajteare mã, me cupê ajpên pê ajropê nare. Ne Pahpãm mã me ipipên pit. Ne cupêa rimehcunea jô Pahhiti, ne ihtÿj mehcunea te amji tehcajpar xà caxuw, ahna me hãhwÿr catêjê tehcajpar to kryjre nare, ne me to impejti. ¹³Ne pê ramã Jôwer xwÿ Pahpãm jarkwa na, hõ kãhhôc kam, ihhôc to hane he:

“Por ihkên pê cute me amji pytãr xà na me Pahhiti na ahwÿ atajê, quê ha ihtÿj me amji pytã” hane.

Cute me cumã Jeju jarên nare ita kam, jÿ wÿr quê amji mã me to hane

¹⁴Ne jÿ mã quê ha cormã amji mã me Jeju to hajÿr nare ita kam, cute ihkên pê me amji pytãr xà na ahna me hãhwÿr to?

Jÿ wÿr quê me to.

Ne cormã nee cute me harên par nare ita kam, jÿ mã quê ha me, ne amji mã me to hane?

Jÿ wÿr quê me to.

Ne cormã neecute me cumã harên, mã cute me kam hapac nare ita kam, jÿ mã quê ha me, ne kam me hapac to?

Jÿ wÿr quê me kampa.

¹⁵Ne cormã nee cute me cumã harên catê na, me jÿm kujahêc nare ita kam, jÿmã quê ha jÿm me cumã harên to?

Jÿ wÿr quê me cumã harê.

Pê ramã Ixaj xwÿ Pahpãm jô kãhhôc kam, me cumã harên catêjê to hÿjarên to hane he:

“Me pamã hÿjarên pejti to me cator xà ita pyrên ri ame pajakry” hane.

¹⁶Mã Juta catêjê mã me hÿjarên catêjê cator, ne me cumã Jeju pê me pahkrixwÿ jarên xà impejti to mehÿjarên, mã cute mempar. Ne nee mehcunea te me harên par xà ata kôt, amji mã me to hajÿr nare. Ne pê hanea ne Ixaj xwÿ ahna ihhôc to hane he:

“Pahhiti! He ihhêj ne nee jÿm te ijÿjarên xà ita to amji mã hajÿr nare” hane.

¹⁷Hôhõ, cu ha me pahteme Jeju Crixto pê Pahpãm kra, ne amji to me pahkrixwÿita na, jÿmjê mã harê, quê ihhêaj to me pahkampa, ne por amji mã me ahna prãm catêjê atajê, quê ha ihtÿj to amji mã mehhimpej.

Juta catêjê mã Jeju jarên par prãm nõ túam

¹⁸ He xà ajkĩ me cupê Juta catêjê te me Pahpãm kra jarên kam me hapacnare na mã, nee cute amji mã me to hajÿr nare? Hãpà! Ihtÿj cute me kam hapac, ne cama nee kôt me amji ton nare. Pê Tawi xwÿ ramã ita to, Pahpãm jarkwa na, hõkàhhôc kam hÿjarên to hane he:

“Me hÿjarên catêjê atajê cakôc xà ata, pjê cunea kam cute me kam hapac xà.

Ne ma pjê jicu xà mã me harkwa ata cator” hane.

¹⁹ Xà ajkĩ Juta catêjê te nee me Jeju jarkwa jahkre pej nare cwÿrjapê mã, nee cute amji mã me to hajÿr nare? Hãpà. He cute kam mehapac, ne me hahkre pej, ne me cumã impar prãm nõ túam na ri, nee cute amji mã me to hajÿr nare. Ne quêt mehcahkrit itajê, ihtÿj amji mã me to hajÿr to me ipa. Ne pê ramã Mojxe xwÿ, Pahpãm jarkwa na, hõ kàhhôc kam, me ahna ihhôc to hane he:

“ÿhÿ, ipê me Apãm Cati, ne wa ha itÿj jÿmjê cahkrit me, krìxàre krã te amji jahkre kêatre atajê tehcajpa.

Ne wa ha mehstechajparxà ata kôt, ca ha ame hÿ na mempej mã me hàr ata kìn, ne me kam me acryc na me ato” hane.

²⁰ Ne pê Ixaj xwÿ amji na hàhtàt nare kam me ahna, Pahpãm jarkwa na, ihhôc to hane he:

“Por pê nee ame ijapên nare atajê pê me imã cato.

Ne pê nee ame ina hàhcukjêr nare atajê mã, pê wa amji to ajpê” hane.

²¹ He pê hanea ne Ixaj xwÿ Juta catêjê na ihhôc to hane he:

“Ne pê amcro cunea kam, Pahpãm tee ajco me cupê Ixaher catêjê jÿpar nare, ne ma amehcaca atajê mã ihhêj ne, hÿ to apê, ne me cumã hÿhkra pê, cuteamji wÿr me to ipipkjêr prãmte” hane.

Nee mã Ixaher catêjê cunea ame Jeju curê nare

11 ¹ Xà ajkĩ Pahpãm ma amehkwÿ pê Ixaher catêjê atajê cunea caca? Hãpà! He pom ipê Ixaher catêjê nõa ita? Ne hanea ne me cuxà, ipêAprãw xwÿ tàmxwÿ nõa ita? Ne me iquêtĩ pê Pênjamĩ cukwa kam ri, nee Pahpãm te amji pê icaca xà nare ita? ² Pahpãm nee apu cute mam pjê te amji ton pê mã, amji mã mehkwÿ capi atajê caca nare. He me amã, Pahpãm jõ kàhhôc kam, Erij xwÿ pê me cumã Pahpãm jarkwa to ihcakôc catê ata te ahna ihcakôc xà ata jahkre pej. Ne Erij xwÿ te Pahpãm cunaa mã, cumã Ixaher catêjê kôt harên to kêanre to hajÿr he:

³ “Ijõ Pahhiti, ramã cute me cumã garkwa to mehçakôc catêjê jipej. Ne hanea ne, ma ame ato amji japackre caca, na ri curi cute me amã ampo tocaxàr xà atajê to, cute me hamre tu. Wa ipyxit peaj ne ijàhhuc, mã ita caxuw ihtÿj me cuxà, ame icuran to prãm” hane.

⁴ Mã Pahpãm Erij mã:

“Amãa ri, ca ahte apu apa, ne imã cute hajÿr nare. Ampo na? He cormã imã pjê ita kam, me hũmre te mir te xet wa ite amji mã me capi, ne me huwahi, mãame ipa itajê, ma ame hũm cahàc krekà pê Pahar atacaca, ne nee amji mã ame hũpa nare, ne quêt ikôat ame ipa” hane.

⁵ He ita caxuw Pahpãm te amji kam hapac xàa na, amjia kôt, hàhcaprĩa kam me cupê Ixaher catêjê kwÿa kwÿ capi, ne amji mã me huwahi.

⁶ He xà ajkĩ cute me hàpên xà impejti ton cwÿrjapê mã, Pahpãm te amji mã me capi? Hãpà. He amjia kôt, hàhcaprĩa kam, cute me capi. Quê ha Pahpãm te me hàpênxà atajê kôt amji mã me capi na, quê ha nee cute amji kam hapac xàa na hàhcaprĩa kam amji mã me capi nare.

⁷ Pê Ixaher catêjê amjia kôt, cute me amji kam me hapac xàa na, Pahpãm wÿr me ipipkjêr to prãm, cute me ahna amji caxàr prãmte, ne neehÿrmã me cator nare. Mã Pahpãm te amji mã menchrêre ne me capi atajê ri, hÿrmã me cator, mã cute me ahna amji caxàr. Mã ihhêj ne mehcahhur cuneajapactu, ne nee Pahpãm te me cumã hàkjêr xà ata na, me kam hapac nare. ⁸ Pê Mojxe xwÿ me, Ixaj xwÿ, ajwar ahpÿanre na me hõ kàhhôc kam, me ahna mehhôc to hane he:

“Pahpãm te me cupê mehkrã kam, me cute amji kam hapac xà cunea to ihcunĩ ita na, mã nee ita kam ihhêj ne me Pahpãm kam hapac, ne me hõmpun nare” hane.

⁹ Pê hanea ne Tawi xwÿ me ahna ihhôc to hane he:

“Pom hãn ne ampo pry mã mehhêj ne mehpro, ne me curê, mã ajhu ita jĩkjê na ri Pahpãm te, me hõ amji kĩnata kam mehkên mã me mên na, imã me to prãm.

¹⁰ Ne imã ate me cupê mehkrã cunea to ihcunĩ na me to prãm, mãr quê nee ampo kam hapac nare.

Ne imã mehkên xà te me hirô pê ihpÿpÿm tu na,
me to prãm” hane.

Quê ha nee cute me to ihcupan xà itajê mecumã irohnÿtti mã nare
Me Hâpên Xà 13.46; 28.23-28; Epet 2.11-22

¹¹He xà ajkĩ Juta catêjê te ampo to ihcupan xà itajê me cumã irohnÿtti mã? Hâpà. Quê ha ihtÿj jũ caxuw hacpÿa mã Pahpãm wÿr meapkjê. Mã Pahpãm te mehcahkrit atajê wÿr amji toirô, ne mam atajê jicu. Ne mam atajê te to ihcupan xà kôt, mehcahkrit atajê te ampo pej pit na, me amji caxâr. Ata kôt quê ha me cupê Juta catêjê atajê, me hõmpu, ne ame hũ na mempej mãme hàr xà ata kìn, ne ihhêaj to hacpÿa ne Pahpãm wÿr me apkjê, ne me amji jaxà. ¹²He Juta catêjê te to ihcupan xà atajê jahpan xà na ri, mehcahkrit atajê te Pahpãm pìn, ampo pej pit hapôj atajê incwÿr. Ne quê ha jũ caxuw Juta catêjê te hacpÿa mã Pahpãm wÿripipkjêr, ne me amji jaxâr na, quê ha me hirôa pê Pahpãm pìn amji mã me ampo pej catia ne me to amcwa.

Juta catêjê pê pìxô pàr pyrâac

¹³Ita caxuw wa ha me apê mehcahkrit atajê mã amji jarê. Ipê me amã Jeju jarkwa na iprar catê. Ne ite amji kam ijapac xàa na, imã ijâpên xà ita peaj to impej, na wa xwÿ kam to ijâpên nare. ¹⁴Ne wa Pahpãm wÿr me ato ipipkjêr to imôr xà ita kam, quê ihhêaj to me ikwÿ kwÿa nô, ame gũ na me apej mã me acjêj xà ita kìn, ne hacpÿamã Pahpãm wÿr amji jaxà, mâr quê ahna amji capa. ¹⁵Ne Pahpãm te mehkwyã kwÿ pê Juta catêjê atajê jicu, ne me apê mehcahkrit atajê wÿr ipipkjêr, ne me ana amji caxâr, na ca hacpÿa mã ajpên to me gô ikwÿ nô. Na quê ha jũ caxuw me cupê Jutacatêjê hacpÿa mã Pahpãm wÿr me amji jaxà, ne ampeaj kam me hakry to hanea, pom quê ihhêj rûm me cupê me hũkjê ty, ne hacpÿa mã me kôt ne mehtîr, mã hûrên ame hakry ata to, quê ha ame hakry.

Me papê pìxô pàr jarê pyrâac

¹⁶Ita caxuw wa ha me amã ampo itajê kôt harên to incrí. Quê ha me anô mã gô pur kam ampo pìxô pàr na, xà ca ha ajkĩ harê to pit mã gô tekjê? Hâpà, ca ha hanea ne ipâr kam ihpa itajê cunea togô tekjê. Mêr hõhõ, he mam me cupê Juta catêjê atajê pê pìxô pàr jarê ata pyrâac, ne me cupê Pahpãm tekjê, ne mehtãmwxwÿ itajê pêpìxô pàr pa atajê pyrâac, na ri hanea ne me cupê Pahpãm tekjê.

¹⁷Ne me apê mehcahkrit atajê pê, ihhêj rûm ahkêt kam pìxô pàr te ihcuhê, ne cupê jûm te to hõ tekjê nare ata pyrâac. Ne por pur kam jûm pìxô pàr to hõ tekjê ata, quê ha hõ pìxô pàr ata pa kên nô jakep, ne cumê. Ne ma cute môr ne ahkêt kam ihnõ xa ata pa jakep, ne pur kam cute hõ pìxô pàr pa jakep ata wÿr to amji jaxâr, ne cute hakep, ne mên ata jaxà

kam tocaxwÿr. Mã cute ahna impÿn, ne ihkat kam mam harê ata kôt ri, ihtÿjpicamên to mō. Ita jÿkjê na mã, Pahpãm te me apê mehcahkrit to hajÿar, ne cute Juta catêjê kêanre atajê jicu, ne me ana ipyr ne mehaxà kam amji wÿr me gacjên. Ca menquêtjê pê pÿxô pàr jarê pyracti ata kam, atÿj me apicamên to me mō. ¹⁸ Cwÿrjapê ca ha nee me cupê Juta catêjê pê pÿ pàr pa, mã cute me hakep ne me irên atajê na ame acakôc kên nare. Ampo na? He cute me hakep xà ata kôt, nee ate amji to me acati prãnte, cute me hakep nare. Ampo na? He me apêpÿxô pàr pa ata pyràac, ne jÿ wÿr quê pÿxô pàr pa nō harê to ihhimpej, ne harê ri quêt ipàr pa cunea to ihhimpej. Cwÿrjapê ca nee jÿmjê jaxà kam me gàhhuc ata to amji to ame acati prãm nare.

Pahte Jeju to amji mã me pahhimpej, na ri me haxàr xà kam me paxàr xà

¹⁹ Na ca ihhêaj to me anō imã garkwa to:

— Juta catêjê itajê jaxà kam me ixãm prãnte ri, Pahpãm te me hicu, ne pō mã me cator, wa me haxà kam me ijàhhuc ita kam, mōrmō maramã Pahpãm amehcaca — hane. ²⁰ Ne Jeju to cute amji mã mehhimpej nare cwÿrjapê ri, cute pō mã me cator, ca me haxà kam me axà. Ampo na? He ate Jeju to amji mã me ahimpej, na ri me haxà kam me axàr xà ata to, ca me amji japackrea ne. Cwÿrjapê ca ha nee cute me ato hajÿr xà ata pyrên amji to ame acati prãm to me apanare, ne quêt cama amji mã me hÿpahti to me apa. ²¹ Ne por jÿm te pÿxô pàr to hō tekjê ata te ipàr tète kam ihpa kênjakep, ne cute mên ata pyràc pej na mã, Pahpãm te Jutacatêjê kêanre atajê jicu. Na ca ha me guphêa ne. Ampo na? He nee me apê mam Pahpãm na mehwÿ pê Juta catêjê atajê nare, ne me apêmehcahkrit. Na ca ha meapê me hÿràac, ne me akên xà kêanre nō to, quê ha ihtÿj me gicu.

²² Ita na cu ha Pahpãm jàhcaprÿhti na me hōmpu, ne hanea ne cu ha, cute ampo kên cwÿrjapê me to kêanre xà na, me hahkre pej. Ne ate Jeju to amji mã meahimpej catêjê mã ri, ihcunea na Pahpãm pej. Ne ma ame Jeju caca, ne mehkra kêanreatajê mã ri, hanea ne Pahpãm kêanre. Quê ha cute me acaprÿ kam to incrà ita na, ca ha me apej ita na ame apa. Nãmri quê ha cute me acaprÿ jicu na, quê ha hanea ne, me gicu ne me akên mã me arê.

²³ Ne quê ha hanea ne Juta catêjê te Jeju caca jicu, ne hacpÿa mã cumã me amji jôr na, quê ha ihtÿj mehwÿ mã me haxà. Ampo na? He quêihtÿj Pahpãm ita to hane. ²⁴ Me apê mehcahkrit atajê pê ahkêt kam pÿxô pàr pa, mã cute hakep, ne pur kam ihnō ata kam hãm ata pyràac. Ne me cupêJuta catêjê atajê pê ri, por cute me pÿxô pàr pa jakep, ne me ihnō mã to hãm xà caprãr ata pyràac. Na quê ha to hō tekjê ata mã hacpÿamã ihkwÿ kam hãm to prãm na, quê ha ihtÿj hacpÿa mãihkwÿ kam hãm. Ampo na? Hepÿ pa ata pê ri quêt ihpaa to ihpa. Na ri hacpÿ mã cute kam

hãm xà na cumã ihcacure. Ata pyràc pej na, quê ihtÿj Pahpãm hacpÿa mã Jutacatêjê kwÿ mã mehkwy jaxà. Ampo na? He me cupê mehkwyà to mehkwy, na quêihtÿj hacpÿa ne mehkwy mã me haxà.

Quê ha jũ caxuw Juta catêjê cute me amji kam hapac xà to antuw

Ruc 21.24; Jowāw 10.16; Carati 3.22

²⁵Yhÿ me ikjêjê, ca ihhêaj to me anô te, hahkre kêt kam amji krã kreti na, ate amjicãmji cupate, wa ha me amã Pahpãm te imã ampo to hahkre xà ata jarê, ca ha me hahkre pej to impeaj ne. He pê mam, nee jũm ampo itajê nõ jahkre pejnare. He quê ha me cupê Juta catêjê, Pahpãm cuna mã mehkãrã tÿjti ita na me to hãmtu nare. Ampo na? He quê ha Pahpãm mehcahkrit atajê te hÿrmã me ipipkjêr atajê cahyt, ne me to hàhtô xà atamã hahê, ne me hïcu. Ne hacpÿa mã me cupê Juta catêjê wÿr apkjê, ne me ahna cupy. ²⁶Ata to, quê ha mehkên pê, me cupê Juta catêjê cunea pytà. Ne pê Ixaj xwÿ ramã Pahpãm jarkwa na, hõ kãhhôc kam, me ahna ihhêc to hane he:

“Quê ha jũ caxuw Xijāw jō kēn cahēna Krīpinkrēn pīn me pahkēn pēme pahpytār catē ata cato, ne Jaco pê Juta pām ata tāmwxÿ catêjêintēte, cute amji kam me hapac xà kēn to pōj partu.

²⁷Quê ha Pahpãm me cumã amjijarēn to hane he:

‘Pê wa rÿ pēa mã me amãite me akên to pōj xà ata na, me amã amji jarēa na, wa ramã me atēte to pōj to mō he’ ” hane.

²⁸Ne ita caxuw, cormã me cupê Juta catêjê ma ame Jeju pê mehkên pê me hÿtār catê na me harēn par caca xà ata to ri, cute amji to me Pahpãm curê xwÿn. Na ri me apê mehcahkrit atajê te Jeju to amji mã me ahimpej atajê pê Pahpãm na mehkwyà. Ne pê rÿ pēa mã Pahpãm ramã amji mã menquêtjê capi, ne me cumã amji to ata na, cormã to amji japackre.

Cwÿrjapê ri cormãcumã mehtãmwxÿ catêjê atajê kwÿ kīn rohnÿtti mã.

²⁹Quê ha Pahpãm te amjimã jũm capi, ne cute to impejti na amji ton na, quê ha nee jũ caxuw jũm ita to hapac kêt nare, ne ihtÿj to amji japackre rohnÿtti mã. Ne nee cute ahna amji ton xà ata kaj na, ihnô na to ipintuw nare.

³⁰He pê ramã rÿ pēa mã, me apê mehcahkrit atajê inquêtjê ajco me Pahpãm jarkwa kam hapac nare to me ipa. Na pê ajco nee me caprī nare. Neita kam nare. Ihtÿj cute me cupê Juta catêjê jũpar nare atajê jaxà kam me acaprī, ne me ato amji kwÿ. ³¹Ne quê ha ihtÿj jũ caxuw Pahpãm me cupê Juta catêjê jũpar nare atajê caprī to hanea, pom quê cute me acaprī he. He Pahpãm te me caprīprãmte ri, ihhêj ne amehkên ton to me ipa.

³²He me pahcunea jũpar nare kam ri, Pahpãm te me pahcunea pro, ne ihhêj rÿm me pahto me hacjên catêjê pyrãac. Ne mēr ampo na mã cute

me pahtohajÿr? Nee mã ampo na nare. He cute me pahcunea caprĩ prãm to ri, cute me pahto hajÿr.

Pahpãm te amji jahkre pejti ita rya to iry

³³ÿhÿ, ampeaj kam Pahpãm mã hàhcaprĩ ita catia to cati! Ne cumã cute amji jahkre pejti ita rya to iry! Ne me hirõa pê ihkrã kre cati! Ne quécute ampo to ihhimpej xà na to ihhimpej na, quê nee jùm ihkõt hahkre pej nare. He hũ na cute ton xà ata jahkre kêatre. Quê ha hõtpê cumãhahkre peaj xà na ihtÿj to. Ne jùm mã quê ha ajte, cute amji mã Pahpãm te amji kam hapac xà to, cute amji mã ihhimpej xà atajê nõ kõt hakop nehahkre pej? Hamreare, he caxuw jùm jamreare. ³⁴Pê ramã Ixaj xwÿ hõ kàhhõc kam, ita to hũjarèn to hane he:

“Jùm mã quê ha ajte me pajõ Pahhiti mã ihkrã kam, cute amji kam hapac xà ita jahkre pej?

Hamreare!

He nee jùm te me pajõ Pahhiti jahkre pej xà caxuw hamreare” hane.

³⁵Ne pê me iquêtjê nõ japrÿ te Jo ita, hõ kàhhõc kam Pahpãm na ihhõc to hane he:

“Xà ramã ajkĩ Pahpãm te jùm to new xà caxuw, cute cumã ampo jõr? Hãpà!

He ampo itajê cunea Pahpãm tekjê pit ita kam,

jũ mã quê ne jùm cumãampo gõ, quê to new?

Hamreare!” hane.

³⁶Hõ, he pê Pahpãm amji mãa, ampo itajê cunea ton partu. Ne nee ihkaj na, iràn xà na, jùm teamjia kõt ampo itajê nõ ton nare. Mãnee hanea ne ampo te, amjia kõt amji ton nare. Ne Pahpãm ri ampo cunea to ihhimpej. Na cu ha amcro cunea kam me pahcunea Pahpãm cati na amji mã me to, me pajũjarèn to me papa! Ampeaj kam!

Pahpãm ihtÿj me pamã me pahteamji kam me pajapac xà to ipintuw partu

Pirip 4.8-9; 1 Texarõn 4.1-3

12 ¹ÿhÿ me ikjêjê, pom ramã Pahpãm te ampo jãhtõa na me pahcaprĩ hyre nare ita? Cwÿrjapê wa ate me cumã amji jõr xà caxuw me anaahwÿ. Ate amji to me Pahpãm cajpuaw xà na, ca ha cumã me amji gõ, ne cumã pit mã ate me gápên to me apa na, ca ha atÿj amji mã me to cati to me mõ. ²Ne nee ca ha amji na pjê ita kam, Pahpãm curê xwÿncatêjê te mehkên ton catêjê jamãr, quêamji kõt me aton nare. Ne quêt cama amji na Pahpãm jamã, quê amã ate amji kam gapac xà to

ipintuw partu. Quê ha me ato hane, ca ha me Pahpãm te ampo pej cunea, kam ampo kên jamreare, ne ihcajpuaw atajê jahkre pej.

³Pahpãm te amjia kôt ito, ite me amã harkwa jarên catê ne ahna ixãm. Cwÿrjapê wa haitÿj me gapackre, ne me ato ihmpej to ipa, ca ha me ikampa. Ne nee ca amjipeaj to apej na, amji to ame gãmra nare. He Pahpãm te ri ate amji mã to ahimpej xà ita na cute aton. Na ca me akwÿ, xwÿ kam amji mã me to ahimpej nare, ne me akwÿ kwÿ, cormã kyre pê amji mã me to ahimpej. Ca ha ate kyre pê Pahpãm to amji mã ahimpej na, ca ha nee ahna amji jarên to:

— Wa ramã xwÿ kam Pahpãm to amji mã ihmpej to ipa nare — hajÿr nare.

Me papê Jeju jĩa pyrãc

⁴Ne me pajĩ pyxit peaj ne kam, ahpÿanre na, me pahcukrã xà itajê mã hàpên xà. ⁵Ita jĩkjê na mã Jeju Crixto kam pahte me ajpên hõnco catêjê, ajpên kam me pahpyxit peaj. Ne ahpÿanre na me pamã me pajàpên xà ita pê me pajĩkam ahpÿanre na me pahcukrã xà atajê pyrãc.

Pahpãm te ahpÿanre na me pamã me pajàpên xà jõr

⁶Mã Pahpãm te amjia kôt ahpÿanre na me pamã pahte amji kam me pajapac xà te amji jahkre pej jõrpartu, ahpÿanre na me pahte cumã me pajàpên xà ton xà caxuw. Na quê ha Pahpãm te harkwa to ihcakôc catêjê na me pahkwÿa kwÿ pyxwÿr na, cuha pahtÿj cute to ihmpej xà ata na mehcunea mã harkwa to me pahcakôc to me papa.

⁷Ne quê ha cute me pahte mehtehcajpar catêjê na me pahkwÿa kwÿ pyxwÿr na, cu ha pahtÿj mehtehcajpar to me papa. Ne quê ha cute ampo tome cumã hahkre catêjê na me pahkwÿa kwÿ pyxwÿr na, cu ha pahtÿj me cumã ampo to hahkre to me papa.

⁸Ne quê ha cute, me pahte cumã me hũcanãr ton xà caxuw me pahkwÿa kwÿ pyxwÿr na, cu ha pahtÿj me cumã me apô ne me cumã hũcanãr ton to me papa. Ne quê ha Pahpãm te, me pahte me cumã me hàhcukrêj to me papicokjêr catêjê na mepahkwÿa kwÿ pyxwÿr na, cu ha me pajàhcajrên jõxÿ nare kam, me pahtÿj me cumã me to me papicokjêr to me papa. Ne quê ha Pahpãm te me topahhimpej catêjê na me pahkwÿa kwÿ pyxwÿr na, cu ha pahtÿj me pahkrã kreti kam me pajuphêa rũm me to me pahhimpej to me papa. Ne quêha Pahpãm te me pahte me caprĩ catêjê na me pahkwÿa kwÿ pyxwÿr na, cu ha pahtÿj me pamã amji kĩa kam ame caprĩ, ne mehtehcajpar to me papa.

Cu ha caxwãm catia mã me ajpên kĩa to me papa

Epet 4.25-5.2; 1 Petrô 3.8-12

⁹Ca ha nee apu amji krãhky na me akwÿ kĩa nare, ne quêt caxwãm catia mã amehkĩa to me apa. Ne ma apu amji pê mehkên caca, ne quêt

impejtica me hūnār to me apa. ¹⁰Por ca Jeju kam ajpēn to me akjêjê atajê, ca ha me apeaj kam, me ajpēn kīn to me apa. Ne amji mā me akjêjê to me catia to me apa, ne ajpēn cupahti to prāmti to me apa. ¹¹Ne nee ca me gâpên xà kam ame xuwcaya to ame apa nare, ne quêt ampeaj kam me gâpên prāam kam me pajō Pahhiti mā me gâpên to me apa. ¹²Ne me gakrya kam, Pahpām pīn me amā ampo pejti cator xà ata jikaj to me apa. Ne atỳj ampo te me ato jū mǎn xà atajê mā me gūcanār to meapa. Ne nee jū caxuw Pahpām mā me acakôc jicu nare, ne nee me cumā amji cajrēn jicu nare. ¹³Ne quê Jeju kam ajpēn to me akjêjê pê ampo jamreare ata me amā, ca ha atỳj me cumā to ajcokjê. Ne atỳj me gūrkwa kam jūa rūm me akjêjême ipa atajê jamā, quê me acahê na ame ipa.

¹⁴Quê ha cute me ato kên prāmte, ame acapôr to me ipa atajê mā, ca Pahpām na ahwỳ, quê me to impej, ne quê nee gahpan xà na ame to kên nare. ¹⁵Ne me cumā amji kīnti atajê cahê na me amā amji kīnti ne. Ne ame amrā atajê cahê na atỳj ame amrā.

¹⁶Ne me acunea hān ne me acaca xà na, me acapēnti to me apa, ne nee ame ajpēn rēn nare. Ne amji mā mehcunea cupa to me apipēnti to me apa. Ne neeapu amji to me acati prām to me apa nare. Ne ca ha atỳj me amā ihcunea na me akwỳ pê mehkryjre atajê kīnti ne. Ne nee ca me hirôa pê amjikrā kreti na amji to gāmnān to me apa nare.

Cu ha nee amji jahpan xà na jūm to kên nare

¹⁷Ne quê jūm ato kên, ca nee amji jahpan xà na to kên nare. Nemehcunea mā ampo pejti atajê to pit mā gâpên to me apa. ¹⁸Ne quê jūm apu amān kēanre, ca ha nee amji jahpan xà na cumān, ne apu cume apijapu nare. ¹⁹Me ikjêjê, quê jūm ame ato kên, ca nee Pahpām pê gāmtār, ne amji jahpan xà na ame kam acryc nare. Mār quê Pahpām me gahpan xà na ame kam incryc. Ampo na? He ramā Pahpām te hō kàhhôc kam me ahna amjijarēn to:

“He pa wa ha cute ame ato kên atajê jahpan xà na amcwa, ne ijàm cwỳr xà ita pê ite ame to kēanre xà” hane.

²⁰Ne Pahpām mā cute mehhôc catêjê te ramā hō kàhhôc kam, harkwa na ihhôc to:

“Quê acurê xwỳn mā prām, ca ha atỳj cumā harte, nare, quê cumā kôr, ca ha atỳj ihkôm.

Ampo na?

Ca ha ate to hajỳr na, quê ha cama apu akamihpahàm, ne cute apu ato kên xà ata jū na ihpeacre ne, ne nee hipêr amji to cupê acurê xwỳn to prām nare”

hajÿr xà ata kôt, ca ha to.

²¹Na quê ha jÿm te apu ato kên na, ca ha nee amji jahpan xà na apu kam acryc nare, ne cama to impejti ne. Hõ, ca ha ate ita to me hajÿr na, quê haneê hipêr cupê acurê xwÿn nare, ne cama cupê gõ ikwÿn nõ rohnÿtti mã.

Cu ha pahtÿj amji caxuw me pajõ pahhi kwÿ kampa

Tito 3.1; 1 Petrõ 2.13-17

13 ¹Ne ca ha me acunea me cupê pahhi catêjê kam me gapac to me apa. Ampo na? Nee mã ampo na nare. He Pahpãm te ri pahhi na, pahhi catêjê itajê pyxwÿr, cute me ato ihhimpej xà caxuw. Jÿ wÿr quê Pahpãm te pahhi na jÿm xãm prãm nare kam, quêamjia kôt cupê pahhi. ²Cwÿrjapê quê ha jÿm te hõ pahhi par nare, ne ma apu ihcaca na, quê ha ma ramã apu Pahpãm te pahhi xãm ata par caca, ne ma apu Pahpãm caca na, quê ha ihtÿj jÿ caxuw amji kên mã amji mẽ.

³He xà ajkĩ catyt kam me ipa catêjê mã me hõ pahhi cupa? Hãpà! Ne por mehkên ton to me ipa atajê mã ri ihtÿj me hõ pahhi cupa. Nãmri quêha amã gõ pahhi cupa nare to prãm na, ca ha nee apu akên ton to apa nare, ne quêt catyt kam apejti na apa. Quê ha ramã pahhi me apupu, ne me garên pejti to me ipa. ⁴He me apejti to prãm to ri, Pahpãm jarkwa kôt pahhi ata hàpên xà ata to apê. Nãmri ca ate akên ton to apa na, ca ha atÿj amji mã pahhi ata teato kên xà ata cupa to apa. Ampo na? He pahhi ata te ihtÿj akên jahpan xà name ato kêanre xà. He Pahpãm mã ri pahhi ata apê, cwÿrjapê quê ha ihpïan ajpên cumã cute akên mã amên xà caxuw harkwa cato. ⁵Cwÿrjapê ca ha atÿj pahhi catêjê cunea kampa. He xà ajkĩ Pahpãm te me pahkam incryc, ne ame pahto kên xà ata cupate pit mã, cu ame pahhi catêjê kampa? Hãpà. He ramã pahte mempar xà na me amji jahkre pej.

Cu ha nee ampo to jÿm to new nare

⁶Cwÿrjapê ca ha hanea ne pahhi catêjê atajê te Pahpãm krac ri cumã hàpên to me ipa ata jahpan xà na, atÿj hãn ne me cumã gãmjõr to me apa. ⁷Nãmri ca ha me anõ te cormã cumã gãmjõr nare na, ca ha atÿj cumã amgõ. Nare, ca ha ate cumã me gápên xà na, ca ha atÿj cumã apê. Ne amji mã me hÿpahti to me apa, ne amji mã me harên pejti to me apa. ⁸Ne ca ha ate jÿm to new na, ca ha atÿj cumã amgõ, mãr ca nee ate to new ata na apa nare. Ne ampo ita pyxit peaj, ca ha atÿj me ton to me apa he. Ca ha atÿjme amã ajpên kinti ne. Ne ate ajpên to mempejti to apa xà ata pê ri ihhêj rÿm ate me ajpên to new. Ca ha ate me ajpên kinti to me apa na, ca ha ramã me Pahpãm te me amã harkwa jirên atajê cunea kam me gapac to me apa.

Cu ha pahtÿj me ajpên kìn to me papa

⁹Ata pê ramã rÿ pêa mã Pahpãm me pamã harên to:

“Ne por ramã me amã me aprõ, ne me amã me apjê atajê,
ca ha nee ahti na meiràn xà na, jũm me ajpẽn caxun nare.
Ne nee jũm curan nare.
Ne nee ajpẽn pê ame gãhkj̄ nare.
Ne nee ajpẽn jũ na ame ampo kĩn to me apa nare” hane.

Ne Pahpãm te me pamã harkwa jirên itajê cunea pipẽn pit. Ne ihnõ ita pê ri ihhêj rũm ihcunea pyrãc, ata te hajj̄r he:

“Ca ha me amã me akwỳ kĩn hanea, pom quê amãa amji kĩn he”
hane.

Cu ha pahte ihkõat me ton to me papa na, cu ha ramã ihkõtihkwỳ cunea ton to me papa. ¹⁰Quê ha jũm mã mehkwȳ kĩn na, quê ha nee jũ caxuw ame to kên nare. Hõhõ, cu ha ame pahkwỳ kĩn to me papa xà ata pê, ramã pahte me Pahpãm te me pamã harkwa jirên xà ata cunea kam me pajapac to me papa xà.

Cu ha Jeju te amji kam hapac pejti to me amji tỳj

Epet 5.14-21

¹¹Ne ampo na mã cu ha ame amji to hane? Nee mã ampo na nare. He me pahkwỳa kwỳ, nee hacp̄ȳ ne Jeju te amji jaxàr, ne ampo kêncunea pê me pahto cator xà ita to, me amji japackrenare, ata pê ihhêj rũm ihtj̄j cute ame hikwa ne ame hõt pyrãac. He me pahpytâr xà jõ amcro ramã ajpẽn hàhtêp to mõ, cwỳrjapê cu ha mepahte me amji kam me pajapac xà cujrõ, quê apu ampra. He maam pahte Jeju to amji mã me hajj̄r xà jõ amcro ata japyre mã ri, ramã cute me pahpytâr xà jõ amcro ajpẽn hàhtêp to mõ, ne ramã hàhtêp. ¹²Ne caxwa jõ awcapãtkõ kam, jũ wỳr ca apu amji mã hamã ne apu mõ. Ne apê kam, ca ha atj̄j amji wỳr ampo te ato kên xà ata pupu, ne cupêamji pytà. Ita jĩkjê na, quê ha akam Jeju te amji kam hapac xà tuw pejti hamreare, ca ha nee akên catianõ pê amji pytâr nare. Ne quê ha Jeju me awỳr cato, ne ihtj̄j me akên xà catia pê me apytà. Ne mehkêanre catêjê ri hõtpê caxwa ri ame ampokêanre ton to me ipa, quê ha apê, quê ha me ton to hicu. Ne nee me apê cute me hajj̄r catêjê atajê pyrãc nare, na ca ha me akên ton jicu, ne catyt kam me apa rohnj̄tti mã. Ne pom krãhtare ipijapu xà caxuw hàprê xà to amji tỳj, ita jĩkjê na, ca ha Jeju te amji kam hapac xà tuw pejti to me amji tỳj, ne ihkõat catyt kam me apa. Mãr ca ate to ihcupan xà pê meakên catia ata pê me to amji pytà. ¹³Ne catyt kam me pahpahãmti to me papa to me hanea, pom quê amcro jãhcujro kam mehpahãmti to me ipa he. Ne nee ajpẽn kam mare mã amji to ame axy to me apa nare. Ne nee cõxyhti toame amji to apipãn to me apa nare. Ne nee ame cahãj xyre atajê caxun

nare, ne nee ame to apahàm nō to me apa nare. Ne nee ame apijapu to me apa nare. Ne nee amji jū na ame ampo kīn nare. ¹⁴Ne nee ca ha mam ampo kêanre atajê to me amji cajpuaw to prām to, ame amji kam gapac to me apa nare. Ne quêt me pajō Pahhiti pê Jeju Crixto te amji kam hapac xà tuw pejti ita to, cu ha ampo kên cunea pê me amji pytà.

Cu ha pahtỳj ihcunea na ajpên na me amji to pōj to me papa

14 ¹Ïhỹ, he ca ha, por kyre pê cormã Jeju to amji mã mehhimpej atajê, ca haatỳj me akwỳ kam, ahna me amji capa. Ne nee ame acaca xàa na, ahpyanre na ame hūn, ne ame ahna xwỳ nare, ne quêt hipêr Jeju kôt me ipicamên na, ca mehtehcajpa. ²Ampo na? He ramã me akwỳ xwỳ kam Jeju to amji mã mehhimpej nare, na quê ha ihtỳj me hō itajê cunea ku. Ne nee me akwỳ kwỳ te me hajỹr nare, ne cormã kyre pê Jeju to amji mã mehhimpej. Na ri ihtỳj me amji mã me hō to me hàpàn xà atajê cunea cawpa to:

— Jū wỳr wa ijō ita krê, kôt mã ikam tē, nare, quê me ikra kam tē — hane. ³Ne por ca atỳj me gō cunea ku atajê, nee ca ame akwỳ te ihcaca catêjê măn kên nare, ne aracri me hōmpu. Ne por ca nee ame hō ata kur nare atajê, ca ha nee kam ate me cumãn xà ata to me curê mã me irên nare. Ampo na? He ramã Pahpãm te me ahna amji caxâr. ⁴Ne cupêa ri me hō Pahhiti, ne nee me apê me hō pahhi nare. Ne taa mã quê ha mehkwy na ihcakôc to kêanre to prām, ne me to ihcakôcto kêanre, nare, quê ha me to ihcakôc to impejti ne. Me hō Pahhiti quê ha cute me hàpên to hamâr na me to, quê ha me to hamã, quê ha ihtỳj mempej.

⁵Ne me gakrã kam me akwỳ, ma ame amji mã me amcro kên na me aprã. Ne mehkwy ihtỳj me amcro kên me, imej picacwỳr na me harê. Ne itacaxuw ca ha ahpyanre na, ate me amji kam gapac xà jahkre pejti xà atajêa kôt me apa. ⁶Ne me gakrã kam, me akwỳ te Pahpãm to amji japackre xà caxuw, ramã amji mãme amcro capi. Ne me gakrã kwỳ kam, me akwỳ te Pahpãm to amji japackre xà caxuw, ihtỳj me hō cunea ku, ne hūrên me hakryti na, cumã me amji jarê. Ne me gakrã kam me akwỳ te Pahpãm to amji japackre xà caxuw, nee me hō cuneakur nare, ne ihtỳj me ajcri. Ne me ipijacri xà ata kôt ri Pahpãm te me to impejti na me amji jarê.

Cu me pahte Pahpãm cajpuaw prãmte ame papa

⁷⁻⁸He nee cu amji mã, me pahnō apu papa nare. Ne me pahte me Pahpãm cajpuaw prãmte, cu ame papa. Ne nee cu amji mã me pahnō pahtyc nare. Neme pahte me Pahpãm cajpuaw prãmte, cu ame ty. Neme pahtiar kam cupê me pajō Pahhiti, ne hanea ne me pahtyc xà jirô pê, cupêa ri me pajō Pahhiti. ⁹Ampo na? He me pajō Pahhiti pê Crixto tyc, ne hacpyã mã ihtĩr, mârquê cupê mehtyc me, mehtĩr jō Pahhiti. ¹⁰Ita kam,

jũ mã ca ha ajte, ne me akjêjê kwỳ te amji kam hapac xà pê ajteare mã ita kôt, ca ame cupê cute to ihcupan catê na me cumã hacjê? Ne me ca, meca xwỳjê? Jũ mã ca ajte ame, ne me akjêjêa kwỳ to mehkryjre to prãm to ame apa? Hãpà! Ahna cute hajỳr nare! Ampo na? He cu ha jũ caxuw mepahcunea Pahpãm cuna mã me pahcuhhê, quê ha taa me pahcukij xà kêanre ata to me pahcukij, ne me pahkwỳ cukij xà impejti xà ata to me pahcukij, ne ma ajpẽn pê me pahto ajcokjê. ¹¹He pê ramã me Pahpãm hõ kàhhôc kam me pahna amji jarẽn to:

“He ipê itĩr rohnỳtti mã ata catê wa,
na ca ha jũ caxuw me acunea me akryjre na ate me imã amji
jarẽnprãmte,
icuna mã me akõn krã na me jỹ, ne meimã: ‘Quêt apê Pahpãm to
apêPahpãm’ ” hane.

¹²Hajỳr xà ita kam, jũ mã cu ha me? Cu ha ahpỳanre na Pahpãm mã pahte amji to me pahhimpej xà atajê me, me pajàpẽn xà cunea na me amji jarẽn partu.

Cu ha nee me pahkjêjê nõ Pahpãm pê ipictor na hamãr nare

¹³Cwỳrjapê cu ha ajpẽn pê me pajõ me, pahte amji kam me pajapac xà na me pahcakõc jicu. Ne jũ to ca ha quêt me? Ca ha me ate amji kam gapacxà cunea to catyt kam me apa. Ne nee ca me ate amji kam gapac xà kên ton to me apa xà ata to, me akjêjê te cormã kyre pê Jeju to amji mã mehhimpej atajê te mehkên ton na me ton, quê mehkên mã mencjêj nare. ¹⁴Pajõ Pahhiti Jeju kam me pahte amji hõnco xà ita kam, ramã pahte me pajõ te me pahto kên xà nare na, hahkre pej pejtu. Nãmri quê ha jũm te amji mãhõ kêanre na harẽn, ne hanea ne Pahpãm mã ihkêanre na harẽn na, quê ha ihtỳj hõ ata cumã ihkêanre ne. Ne cute Pahpãm mã hõ ata kên naharẽn jipy ihkrêr na, quê ha Pahpãm mã jũm te hajỳr ata kêanre ne.

¹⁵Quê ha me akjêjê nõ te cormã kyre pê Jeju Crixto to amji mã ihhimpej ata te gõ ata kur na gõmpun, ne amã ihcawpa to:

— Ca ate gõ ita krêr na ihkaj na — hajỳr na, ca ha nee gõ ata krêr nare. Nãmri ca ha ate gũpar nare, ne mãnea mã ihkrêr na, quê ha nee amã akjê ata kĩnnare. Quê ihhêaj to akjê ata akõt hũpa kam cukrê, ita na Pahpãm pê me akam ihkaj na. Ne hanea ne Jeju te akjê ata kritxwỳ na amji ton, ne haxà kam ihtyc na, ca to amji japackre. Ne nee gápàn xà ata cwỳrjapêapê akjê ata Pahpãm pê ipictor na hamãr nare. ¹⁶Quê jũm mã ate ampo ton xà itajê na akam ihkaj na, ca ha hucu, ne nee hipêr ton nare, mãr quê nee ampo pejti ita kên na harẽn nare. ¹⁷Ampo na? He Pahpãm himpej xà nee me pajõ me, me pahkõm xà to amji kam hapac to ipa nare. Ne quêt Pahpãm Carõ Pejti kôt, catyt kam me papame, me pahcarĩcti

kam, me pamã amji kĩnti to ri amji kam hapac to ipa. ¹⁸Ne jũm te Jeju Crixto mã hãpên xà to hãpên to impejti to ipa to hajÿr te ri Pahpãm cajpuaw. Mã hanea ne mehkwy jũm ata jarên pejti to me ipa.

Me pamã, nee me pajõ cawpa xà hamreare

¹⁹Cwÿrjapê cu ha ajpên kam me pahcapên pej pêa mã me papa na, cume amji to prãm. Ne hanea ne pahte me ajpên tehcajpar to mepapa na, me pahtehcajpar xà ata to, cu ha me. ²⁰Me papê Jeju tekjê catêjê mã, nee me hõ cawpa xà nare. Na cu ha pahtÿj me pajõ cunea ku. Quê nee me pajõ nõ me pahnõ to kên, nejũm to kên nare. Nãmri quê ha jũm te hõ ata kuar kam amji mã cute mehcajpa xà ata cupa na, quê ha Pahpãm mã jũm ata pê ampo to kênecatê. Cwÿrjapê ca ha nee cumã, Jeju wÿr jũmjê incjêj ne cormã kyre pê amji mã me to ihhimpej atajê mã, me akõt me cumã me hõ cunea to hahkrenare. Quê ihhêaj to cute ampo krêr xà ata kam ihcajpa xà ata to amji japackre, ne cumã hũpa na, quê ha ihtÿj ihkên mã axà. ²¹Na quê ha me pajàpàn xà me, me pahkõm xà me, ampo kwÿ te Pahpãm pê me pahkjêjê kwÿ to kên, ne cupê me to hũjawry na, cu ha mehcajpa, ne nee hipêr mehcajpa nare.

²²Quê ha amã gõ cunea kur xà caxuw impej na hahkre pej na, ca ha ate ihkurxwÿjrea na Pahpãm mã ahna amji cajrên to hane he:

— Ca ate, ite ampo itajê cunea kur xà na imã ton, cwÿrjapê wa ha itÿj cukrê, ne nee ihcajpa xà nõ na to amji japackre, ne apu hũpa nare — hane. Ne nee me akwÿ kwÿ mã ate ihkrêr xà ita na amji jarên nare. Nearacri amji mã:

— Wa Pahpãm mã ampo pejti itajê pit ton to ipa, mãr quê nee ihkõt ikên mã imên nare, ata pyrên ri ijakry — hane. ²³Nãmri quê ha jũm ata te ampo ata krêr xà ata kam, amji mã ihcajpa to:

— Pÿpÿn, mõrmõ ajkĩ ite ijõ krêr xà ita na Pahpãm mã ipej, nare, mõrmõ ajkĩ ipej nare — hajÿr jipy, cute ihkrêr na, quê ha ramã amji kên mã amji mẽ. Hõ, quê ha jũm te Pahpãm jarkwa kõt cute ihkrêr na amji jahkre pej nare kam ihkrêr na, quê ha ahna Pahpãm pê kam ihkaj na. Hõ, cu ha amjia kõt, me pahte Pahpãm jarkwa jahkre pej nare kam, ampo ton na, quê ha Pahpãm pê ahna me pahkam ihkaj na.

Cu ha nee pahte amji to amji cajpuw prãm to pit mã me papa nare

Pirip 2.3-5

15 ¹Ne pom cu ramã xwÿ kam Jeju to amji mã me pahhimpej nare itajê, cu ha, pom cormã kyre pê amji mã me to ihhimpej itajê tehcajpa, mãr quê haneane me pahcuxà, xwÿ kam amji mã me to ihhimpej nare. Ne cu ha nee pahte amjito amji cajpuaw prãmte ame papa nare. ²Ne quêt ita to cu ha me he. Cu ha pahtÿj me pahkjêjê impejti xàwÿr me mõi na mehcajpa, quê me mõi, mãr quê Jeju to amji mã

mehhimpej xà to me ajcamẽ. ³Ne mẽr ampo na mã cu ha me ita to? Nee mã ampo na nare. Pê me pajõ Pahhiti pê Jeju Crixto nee cute amji to amji cajpuaw prãm to, pjê kam apu ipa nare. Ne ihtÿj cute amji pupun xà ata caxuw apu mõ. Pê ramã Pahpãm jõ kàhhôc to hũjarẽn to hane he:

“Inxũ, por cute me acrôn xà kêanre to me acrôn atajê te me ato tojnõ, ne ma iwÿr me ipipkjêr, ne ame icrôn xà kêanre to ame icrõ” hane.

Pahpãm jarkwa jõ kàhhôc pê me pamã ampo to hahkre catê

⁴He pê nee Pahpãm ihcaprÿ na mam hõ kàhhôc tũm ata kam harkwa na, ihhõc na me mẽn nare. Ne cute me pahcunea mã ampojãhtõa to hahkre xà caxuw, pê harkwa kõt hõ kàhhôc ata kam mehhõc. Ne Pahpãm jarkwa ihtÿj ampo kên mã me pajũcanãr na me pahto, ne haneane me pajakryti na me pahto. Na cu ha pahtÿj me, por jũ caxuw Pahpãm cahê na ame papa xà ata na, me hikaj. Ampo na? He jũ caxuw cute me pahto catia, mã me papê hũràac xà na me pamã hahkre pej.

⁵Wa ijõtpê Pahpãm mã me acajrẽn to hane he:

— Ỹhÿ me ijõ Inxũ Cati pê Pahpãm, he ca ihcunea caxuw me imã me ijũcanãr xà pê me ijõ katcrã gõ, wa itÿj me awcanã. Ne ma akra pêJeju Crixto kam me akwÿ itajê te ajpẽn hõnco na me to, mãr quẽ ihkõatcute amji kam hapac xà pyxit peaj to amji kam me hapac to me ipa. ⁶Ne me harkwa pyxit peaj to me garẽn pejti to me ipa, ne me amã: “Apê me ijõ Inxũ Cati pê Pahpãm, ne apê me ijõ Pahhiti pê JejuCrixto Pãm, ne ihcunea na ampeaj kam apej” — hane.

Quẽ ha mehcahkrit atajê, hanea ne me cupê Jeju namehkwÿ mã axã

⁷Ne me pajõ Pahhiti pê Jeju Crixto te me ana amji caxãr xà ita na, ca ha me akwÿ na me amji to põj to me apa. Hõ, ate me to hajÿr xà ata to, caha me amji mã Pahpãm to cati. ⁸He pê rÿ pẽa mã Pahpãm ramã me cupê Juta catêjê quêtjê mã cute Jeju Crixto kujahêc na amji to awjahkre, mãr quẽ cato ne cupêmehtehcajpar catê. Mã Jeju cator xà ata te, Pahpãm teampeaj kam to hũjahkre xà na amji par na harẽn. ⁹Ne hanea ne cator xà te, mehcahkrit atajê te Pahpãmjàhcaprihti na harẽn na me ton. Ne pê Tawi xwÿ ramã hõ kàhhôc kam, ita na me to hũjarẽn to hane he:

“Ỹhÿ, wa ha mehcahkrit atajê jipõc ri gaprÿ na icrer to impejti ne, ne wa ha itÿj me cumã ato ijãmnãn to ipa” hane.

¹⁰Ne hõ kàhhôc kwÿ kam hanea ne to hũjarẽn to hane he:

“Me apê mehcahkrit me, me apê Ixaher catêjê pê Pahpãm na mehkwÿ atajê mea mã,

Pahpãm pyrên me gakry!” hane.

¹¹Ne hanea ne to hũjarên to hane he:

“Ne por me apê mehcahkrit cunea pêIxaher catêjê nare atajê,
ca ha atÿj me pajô Pahhiti to amji mã me gãmnan to me apa” hane.

¹²Ne hanea ne Pahpãm jarkwa to ihcakôc catê pê Ixaj xwÿ jô kàhhôc kam, pê to hũjarên to hane ne:

“Quê ha jũ caxuw menquêtti pê Jexê tàmwxÿ tàmwxÿ nã cato.
Ne cupê mehcahkritatajê jô Pahhiti.
Quê ha ihtÿj cupê me hõ Pahhitina amji mã me to ihhimpej to me ipa” hane.

Pê Pawrô pjê cunea kam, mehcuea mã Pahpãm jarkwa jarên to ipa
Epet 3.1-9; 1 Petrô 1.12-13

¹³Ne Pahpãm ri pahte me hikaj, mã me pajũcanãr na me pahto, cu me hikaj. Ata kôt imã, cute me amã amji kinti me, me acarĩcti jôr na, toprãm, mãr ca nee amji mã ampo cupa nare. Ne hanea ne imã Pahpãm Carô Pejti carôt kôt me gãcanãr, ne me hikaj xà ata te me amã ipicamên to môr na, me ato prãm.

¹⁴ÿhÿ me ikjêjê, he me apejti, ne me akrã kreti to atÿj me ajpên japackre to me apa na, imã me gahkre pej. ¹⁵Cakrô wa amji mã ijãhkyaj kam, hirãa pê ite me amã ampo itajê na ihhóc, mãr ca me cahyt, ne me to amji japackre. Ne mër ampo na wa ite amjimã ijãhkyaj kam me amã ihhóc? Nee mã ampo na nare. ¹⁶He Pahpãm te ito icati, ne mehcahkrit atajê jipóc ri, cute ihcãmter Jeju Crixto mã ipê cumã ijãpên catê na ixãm. Por pê Pahpãmmã mehcajrên catêjê ajco cute amji to me Pahpãm cajpuaw prãmte me cumã ampo gã, ata jĩkjê na, wa itÿj ite amji to Pahpãm cajpuaw prãmte, hÿrmã mehcahkrit atajê to ipipkjêr to ipa, mãr quêPahpãm me cumã Carô Pejti gã.

¹⁷Ne Jeju Crixto kam ite amji hõnco xà ita kôt ri, imãa Pahpãm mã ijãpên xà cunea impej pit. ¹⁸He xà itea ijãpên xà impejti ita na, amji to ijãmnan xà caxuw mã, wa apu amji jarên to ipa? Hãpã. He Jeju Crixto te ri ite mehcahkritte Pahpãm jarkwa kam hapac naitehcajpar, mã cute mempar. Mã cutea, ite me cumã ijũjarên xà na iton, ne caxuw imãite amji jahkre pejti jôr. ¹⁹Ne cute imã Carô Pejti carôt jôr, mãr wa carôt ata kôt me cumã ampo pihho pejti to, quê me hõmpu, ne me Pahpãm to me amji japackre. Ne itakam wa ma Krĩpinkrên pĩn, Iririj jô pjê wÿr imôr xà ata kam, wa itÿj mehcuea mã Jeju Crixto pê me pahkritxwÿ na harên xà impejti atajêcunea na harên to mõ. ²⁰Wa ijõtpe, por nee rÿ jũ ri jũm te me

cumã Jeju Crixto pê me pahpytârcatê na harên nare ata wÿr, wa ikrâr. Ne nee wa ramã jũ ri jũm te me cumã harên ata wÿr ikrâr nare. ²¹Ne pê ramã Pahpãm jô kâhhôc kam Ixaj xwÿ ita to hũjarên to hane he:

“He por rÿ jũ caxuw jũm te me cumã Pahpãm kra jarên nare atajê, quê ha ita caxuw me kampa, ne me hõmpu.
Ne por rÿ jũ caxuw cute me Pahpãm kra jarên par nare atajê, quê ha me kampa, ne me hahkre pej” hane.

Pê Pawrô Jeju na mehkwÿ pupun prãmte me hÿrmã ihkrâr
Roman 1.8-15

²²He wa tee me awÿr ikrâr, ne me apupun to prãm. Mã ma ijâpên xà icahpêrkâr to ipa ita kam, jũ wÿr wa apu amji mã hamã. ²³⁻²⁴Ne rÿ pêa mã, wa caku jâhtôa kam me awÿr ikrâr, ne me apupun to prãm, ne hamre, ramã ita caxuw ite pjê itajê kam ijâpên xà jipêjpartu. Cwÿrjapê wa ha ma Cra jô pjê wÿr imôr xà ita kam, wa ha me anaa mō, ne me apupun to ramã ite amji kam ijapac. Ne wa ha meawÿr icator xà kam, quê ha ampeaj kam me pamã amji kîn. Wa ame acahê na imôr xà ata kam, ca ha ampoto me itehcajpa, ite to Cra jô pjê wÿr imôr xà cahhurkrã curan xà ata caxuw. ²⁵Ne wa ha xa me awÿr imôr xà ita kam, mam Krîpinkrên kam Jeju namehkwÿ atajê tehcajpar prãmte, me hÿrmã icato. ²⁶Ampo na? He Maxeton jô pjê me, Crec jô pjê kam Jeju na mehkwÿ pê mehcahkrit atajê te, Krîpinkrên kam me cupê hamreare atajêtehcajpar prãmte, amjia kôt me imã ihpore to cuprôn, mâr wa curi to icato, ne Jeju na mehkwÿ pê Juta catêjê pê hamreare atajê mã to ajcrã. ²⁷Me cutea ri me ita to me hajÿr to me amji kam hapac. Na ri ihhêj rûm ramã mehcahkrit itajê te, me cupê Juta catêjê to new, na quê ha ihtÿj me amgō. Ampo na? He pê mam me cupê Juta catêjêitajê, mehcahkrit atajê wÿr, ihtÿj me Pahpãm jarkwa kujahêc to me ipa. Mã me harkwa kôt Pahpãm wÿr me ipipkjêr, ne mempej mã me hàr, ata jahpan xà na ri, hacpÿa ne cute me cumã ampo itajê kujahêc. ²⁸Ne ite curi to icator, ne me cumã me hũhkra kam me hō pore ata cunea to icahkũmjirô pê mã, wa ha Cra jô pjê wÿr imôr xà ata jô pry kôt me awÿr mō. ²⁹Ne me awÿr icator xà ata kam, quêha Jeju Crixto cukwa kam ampeaj kam mepamã ampo pej cunea hàhtô, na ramã imã hahkre pej.

³⁰Me ikjêjê, cu me pajô Pahhiti pê JejuCrixto to amji mã me pahhimpej, neCarô Pejti ata kôt ri me pamã ajpên kîn ata kôt, wa me ana ahwÿ, mâr ca icuxà xwÿ kam Pahpãm mã me icajrên nare. ³¹Ne cumã me icajrên to hane he:

— Me ijô Inxũ Cati, ca ha Juta jô pjê kam amji mã me ato ihhimpej nareatajê pê Pawrô pytà. Ne hanea ne cute me akwÿ mã ihpore jôr xà ata kam, quê nee ihpore ata to me amji na ampo kên cãmjĩ, ne amehcaca nare, ne quêt ihtÿj me hakrya kam, ihpore ata na me amji capa — hane.

³²Hõ, ca ha Pahpãm mã me icajrën to hane, ne quê ha Pahpãm mã ito hajÿr to prãm na, wa ha icator xà ata kam, quê ha me pamã amji kïnjakryti ne. Ne pahte me ajpën pupun xà ata kam, quê ha Pahpãm ajpën pyrën me pajakryti na me pahto. ³³Ne imã Pahpãm pê me pamã me pahcarïcti jör catê ata te me acahê na ipa rohnÿtti mã na, me ato prãm. Hamre.

Pê Pawrô me cumã amji jarën kujate

Me Hàpên Xà 18.1-3

16 ¹ÿhÿ, ita caxuw, wa ha me amã hàpà, ne me amã me pahkjê cahäj pê Pepkwÿj kujate, ne me amã ihkôt harê. He cupê Ampohy jô krï kamJeju na mehkwyê tehcajpar catêjê nõ. ²Na ca ha ahna me amji caxàr to hanea, pom quê ate Jeju na me amji caxàr he. Hõhõ, Jeju na mehkwyê to pahte amji kam me pajapac tohajÿr xà pit. Ramã cute me hàhtôa tehcajpar, ne haneane itehcajpar, na ca ha atÿj ampo to mehtehcajpa.

³Ne hanea ne Prixirakwÿj me Aquira pê mam ajco icahê na Jeju Crixto mã me apê atajê mã ite me amji jarën kujahêc. ⁴Ne pê Jeju jàpên xà kam, cute me itehcajpar xà ata kam, cute amji to mehtyc xà jàhtôa jakren. Cwÿrjapê wa me cumã me hürên ijakryti naamji jarê, ne nee wa ite ahte ijakryti na me cumã amji jarën nare. Ne hanea ne me cupê Jeju na mehkwyê pê mehcahkrit atajê te mecumã hakryti na amji jarën.

⁵Ne wa hanea ne Jeju Crixto na mehkwyê te me hürkwa kam me cuprôn catêjê mã, ite amji jarën kujahêc. Ne wa hanea ne ite imã ikwÿ nõ kïnti pêEpet te Axij jô pjê kam, cupê mam Jeju to amji mã ihhimpej catê ata mã, ite amji jarën kujahêc.

⁶Ne hanea ne Marij te ramã me amã hàpên crire nare ata mã, ite amji jarën kujahêc.

⁷Ne hanea ne Antrôn me Juna pê me ipyràac, ne me cupê Juta catêjê pê mam icahê na me hacjên xà kam mehcuhhê atajê mã, ite meamji jarën kujahêc. Ne me cupê Jeju jarkwa na memprar catêjê na, ramã ite me hõmpun pejtu, ne pê mam ramã icumam Jeju to amji mã mehhimpej to me ipa.

⁸Ne hanea ne, por me pajô Pahhiti pê Jeju kam, cupê ijô ikwÿ nõ pê Amprij ata mã, ite amji jarën kujahêc.

⁹Ne hanea ne Rupan pê me icahê na Jeju Crixto mã hàpên catê ata me, me imã ikwÿ nõ kïnti pê Xaqui mã, ite amji jarën kujahêc.

¹⁰Ne wa hanea ne Aperti te mehcunea kam mare mã Jeju Crixto to amji mã ihhimpej, ne cumã hàpên catia ata me, Arixô me, mehkjêjê mã, ite amji jarën kujahêc.

¹¹Ne wa hanea ne Herotãw pê ipyràac, ne cupê Juta catêjê nõ me, Narqui me, mehkjêjê pê Jeju na mehkwyê atajê mã, ite amji jarën kujahêc.

¹²Ne wa hanea ne Tripenkwỳj me, Triponkwỳj pê me pajõ Pahhiti mã hàpên catêjê atajê me, Penxikwỳjpê imã me ijõ ikwỳ nõ cahãj kĩntite Pahpãm mã hàpên catia ata mã, ite amji jarên kujahêc.

¹³Ne hanea ne wa Rupo pê me pajõ Pahhiti mã hàpên catê catia ata me, inxi te ihhêj rûm ito ihkraa, ne ito impejti ata mã, ite amji jarên kujahêc.

¹⁴Ne hanea ne, wa Axin me, Precon me, Mecurij me, Patropa me, Herma me, me pahkjêjê cunea apu ihkôt me ipa atajê mã, ite amji jarên kujahêc.

¹⁵Ne hanea ne wa Piror me, Jurijkwỳj me, Nerew me, ihtõj me, Orimpa me, Jeju na mehwỳ cunea cahê na ame ipa atajê mã, ite amji jarên kujahêc.

¹⁶Ne me amã ajpên kĩa kam me ajpên mã me hàpà. Ne ita ri me cupê Jeju Crixto na mehwỳ cunea te me amã amji jarên kujahêc.

Quê ha cute me pahto ipicapôn prãm atajê to amji na me pajuphêa ne
1 Jowãw 3.10; 4.1-6; Epet 5.6-7

¹⁷Me ikjêjê wa ha cormã me gapackre to incire ne, ihkãhhôc ita jicu xà kam. Ýhỹ, ca ha ma amji na, cute me Jeju to, ate amji mã me ahimpej tète me acahpêrkãr, ne ite me amã ampo tohahkre atajê tète me girên ne me ato ipicapôn prãmcatêjê to, amji na me guphêa ne. Neampỳa mã ame cupê me apa. ¹⁸Ampo na? He cute me hajỹr catêjê, me pajõ Pahhiti pê Crixto pê ampỳa mã ame ipa, ne nee me cumã hàpên nare, ne amji cajpuaw cute ampo na mehprãmti xà ton to me ipa. Ne me harkwa cakôc xà hêj xi xà picre to, cute me amji jahkre kêatre catêjê mã mehhêj to me ipa. ¹⁹Ne me ca nare, ca quêt atỹj me gũcanãar kam Jeju to amji mã me ahimpej to me apa. Cwỳrjapê ri me apyrên me ijakry pit. Ne imã me ate, me ampopejti ton na ate amji jahkre pejti na, imã me ato prãm, ne me apê ampo kên ton jahkre kêatre na imã me ato prãm.

Pahpãm kôt me papa xà ita kôt, cu ha Xatanaj tohêj

²⁰Ne Pahpãm pê me pamã me pahcarĩcti jõr catê xakat, ne quê ha me amã me acarĩcti gõ, mãr ca nee ame pahcurê xwỳn pê Xatanajata cupa nare. Ampo na? He quê ha me pahcurê xwỳn ata curan pej to hàhtũm nare to hanea, pom ca me apar kãhtỹjti to me cagã krã gã he. Ne imã me pajõPahhiti pê Jeju Crixto te ihcunea na me ato impej na to prãm.

Pê Pawrô cahê na mehwỳ krĩ atajê me cumã amji jarên kujate

²¹Ne Timot pê icahê na hàpên catê ita te hanea ne me amã amji jarênkujahêc. Ne hanea ne Rutikwỳj me, Jaxãw me, Xõpat pê me ipyrãac, ne hanea necupê Jeju na mehwỳ kam Juta catêjê kwỳa kwỳ atajê te me amã amji jarên kujahêc.

²²Ne ipê Tertur pê Pawrô kôt ihkãhhôc ton catê te hanea ne me amã amji jarên kujahêc, Jeju jarkwa na.

²³Ne wa Cajo jūrkwā kam ikrī, mā hūrkwā kam Jeju na mehwỳ me cuprō atajê te hajjār, ne me amā amji jarēn kujahêc. Ne Eraxô pê krī jō pahhi mā ihpore jamār catê me, Jeju kam me pahkjê pê Cwatro te me amā amji jarēn kujahêc.

²⁴Ne imā me pajōPahhiti pê Jeju Crixto te ihcunea na me ato impejti name ato prām. Ýhỹ, he ampeaj kam.

Cu ha hōtpê Pahpām to me pajàmnān to me papa

Epet 3.20-21; Juta 24-25

²⁵⁻²⁶Imā me acunea mā, Pahpām jàhcaprī mā me pahtehcajpar na, me ate me hahkre pej na, me ato prām. Ampo na? Nee mā ampo na nare. He pê rỳ pēa mā Pahpām Jeju Crixto pê me pahkritxwỳ na, to amji kampa. Mā rỳ jücaxuw jūm te, Pahpām te Jeju Crixto to me pahkritxwỳ na hahkre pej nare, ne me cupê ipimxur tu. Ne pêramā rỳ pēa mā Pahpām jarkwa na, cute mehhôc catêjê ita na mehhôc, ne cute me ahna ihhōc xà ata, pê nee hirā pê hūjarēn nare, ne harēn xàincwỳrpê harē. Ne ita caxuw Pahpām tír rohnýtiti mā ata te nee to ipimxur nare, ne hirāa pê to ipipê xà caxuw, ahna harkwa hyr, mār quêpjê kam, mehcunea me hahkre pej, ne amji mā me to ihhimpej, ne ihkōat me ipa. Ne Jeju pê me pahkritxwỳ ita to, pê wa Pahpām jarkwa kôt, me amāicakôc. Ne Jeju to ate amji mā me ahimpej xà ita kam, quê ha Pahpām ihtỳj me atehcajpa, mār ca jū caxuw me hīcu nare.

²⁷Ne Jeju Crixto cukwa kam, quêha pjê kam mehcunea me Pahpām pyxit peaj, neihkrā krea to ihkrā kre na me hahkre pej, na cu ha mecumā:

— Quêt apyxit peaj ne ampeaj kam akrā kre rohnýtiti mā. Ýhỹ, he ampeaj kam — hane. Hamre, ijō kàhhôc ita pit.

CORINTI JÕ KRĨ WÛR

Mam Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ, ne hanea ne cupê cupêhkà te ikre cahyr catê, ne hàpên xà ata to pê ajco amji to ajpa. Ne pê Jeju na mehkwy jakrã Corinti jõ krĩ kam mehkri atajê wÿr, pom cu me hõ kàhhôc pijakrut cahyt ita kujate. Na pê mam hõ kàhhôc ita japyr pê **Corinti Jõ Krĩ Kam Jeju Na Mehkwy Jakrã Mehkrĩ Atajê Wÿr, Mam Pawrô Jõ Kàhhôc (1 Corinti).**

Ne mam hõ kàhhôc ita kam cute ampo cunea to mehapackre, mãr quê nee mehkwy jirôa pê me cati to me amji kam hapac to me ipa nare. Mãr quê nee amji na, cute me amji kam hapac xà kên tũmti nõte mehkwy cunea pãc, ne amehũm na hamãr nare. Ne hanea ne, pahte me cuprõn xà kam, me pamã pahte Pahpãm na amji to me pahhimpej xà to hahkre. Ne hanea ne Pahpãm te me pahcunea mã Carõ Pejti jõr na me pamã harê.

He nee ite Corinti wÿr Pawrô te hõkàhhôc pijakrut kujahêc atajê cunea to ipintuw nare, ne ihkwÿ jatujre atajê ri ite to ipintuw.

1 Corinti 1.1-13

Pê Pawrô me cumã amji jarê

Me Hàpên Xà 18.1-17

1 ¹⁻²Hàpà me ikwy pê Pahpãm na mehkwy, ca Corinti jõ krĩ kam me akrĩ atajê. Ipê Pawrô. Pê Jeju Crixto pê Pahpãm kra amji mã harkwana cumã iprar catê na ixãm. Na wa ite me amã ihhõc, ne ihkujahêc. Ne Jeju kam me pahkjê pê Xoten ita icachê na ihkrĩ. Ne Jeju Crixto cukwa kam ri me apê Pahpãm na mehkwy, na ca ajtea mã me, ne ampeaj kamme apej. Pê Pahpãm ihkra kam ate meajpên hõnco xà ata kõt, pê me ato amji kwÿ xà na, me ana ahwÿ. Ne ihkàhhôc ita hanea ne, pjê cunea kam me cumã Jeju Crixto pê me pajõ Pahhiti kam me hapac to me ipa atajê cunea mã wa ite ihhõc. Ne Jeju pê me pajõ Pahhiti, ne hanea ne cupê me hõ Pahhiti, na wa ite ahna me amã ihhõc.

³Ne wa ijōtpê Pahpām pê me pajō Inxū Cati me, me pajō Pahhiti pê Jeju Crixto mā, me acajrēn to hane he:

— Ÿhỹ, ca ha Corinti jō krī kam me akwỹ mehkriatajê caprĩ, ne me caxwỹn caxwām pê me cumā me acarĩcti gō, mār quēnee ame amji mā ampo cupa nare — hane.

Cu ha Jeju cukwa kam, ampo pej cunea cwa

1 Texarōn 5.23-24

⁴Pahpām te Jeju Crixto cukwa kam hàhcajrēan kam me ato impej xà ata pyrēn, wa ijōtpê hūrēn ijakryti na cumā amji jarēn to ipa. ⁵Ne Jeju Crixto kam ate me ajpēn hōnco xà ita kam ri, me akrā kre te amji jahkre pejti me, Pahpām jarkwa kōt me gūjarēn xà impejtito, ihcunea na me gakrāj. ⁶Ne ate me Jeju te amji kam hapac xà intuw pejti jarēn xà ita na me amji caxār, ne ihkōat atỹj me apa. ⁷Cwỹrjapê, ca ate me pajō Pahhiti pê Jeju Crixto te amji jaxār xà na me hikaj xà ita kam, Pahpām Carō Pejti te ihtỹj me amā ampo pejtijōr xà atajê, ne nee me apê hamre nare. ⁸Ne Jeju to ate amji mā me ahimpej xà ata kam ame apec cupate ri, ihtỹj me atehcajpar to ipa, mār ca nee ahna ame apec nare. Mār quê me pajō Pahhiti pê Jeju Crixto te amji jaxār xà ata kam, nee ampo na amji mā me acuhtom nare.

⁹Ÿhỹ, cu pahtỹj Pahpām to amji mā me pahhimpej xà ata na, amji mā me to hane. Ne cute hanea ne ihkra pê Jeju Crixto kam pahte me ajpēn hōnco tu xà caxuw, cute me pahna hàhwỹr, ne nee cute harkwa ata to ipintuw, ne to hapac kêt nare.

Pê Corinti jō krī kam Jeju na mehkwy picapōn pa

Roman 15.5-6; Epet 4.1-6; Pirip 2.1-4

¹⁰⁻¹¹Ÿhỹ Jeju kam me ikjêjê, he Crowkwỹj na mehkwy nō te ri imā me akwỹ kwỹa cwỹrjapê ate me garkwa to me ajpēn mǎn na me garēn, wa iteme garēn par. Na wa ha me pajō Pahhiti pê Jeju Crixto japrỹa na me ana ahwỹ, ca nee hipêr ame ajpēn mǎn to me apa nare, ne nee hipêr ajpēnto me apicapōn nare. Ne quêt catyt kam cama me ajpēn par peaj ne, ne ajpēn kam me ahōnco, ne ate amji kam me gapac xà pyxit peaj kōt me apa. ¹²Ampo na? He ca ihhêj ne me gakrā cunea kam me amji jarēn to me hane he:

— Me ipê Pawrō kōt me ipa catêjê — hane. Ne me gakrā kwỹ me amji jarēn to:

— Me ipê Apōr kōt me ipa catêjê — hane. Ne me gakrā kwỹ me amji jarēn to:

— Me ipê Petrō kōt me ipa catêjê — hane. Ne me gakrā kwỹ me amji jarēn to:

— Me ipê Crixto kōt me ipa catêjê — hane.

¹³Pÿhàpà! Xà ajkĩ Crixto picapôn? Hãpà! He xà ajkĩ pa wa me acwÿrjapê pĩ kam ityc? Hãpà! Xà ajkĩ Jeju japyr kaj na jũm teijapyr na cô kam me anõ cumrãr? Hãpà! He xà me gõ pahhi cwÿrjapê ate amji to me apicapôn ita jũ na, nee me apahãm nare? Ampeaj kam ate amjito me apicapôn ita na, me gũ na ipahãm. Na wa ha me awÿ, ca hacpÿa mã me cuprõ, ne me ajpẽn hõnco tu na me apa.

1 Corinti 11.17-34

Cu ha catyt kam Jeju to me amji japackre

Ruc 22.19-20

11 ¹⁷Ne ihnõ, ca cormã ihkaj na ame to, na wa nee ate me to impejti na me garẽn nare. He ca Jeju to ate amji kam me gapac prãnte, ate amji to me cuprõn xà ata kam, ajte nee catyt kam ihkõt me apa nare, ne cama me ajpẽn to kên to me apa. ¹⁸Ne mam ramã jũm te imã me garẽn to:

— Corinti jõ krĩ kam Jeju na mehkwy atajê ihtÿj Jeju to amji kam me hapac prãnte me cuprõ, ne cama amji to me ajcokjê, ne ajpẽn cuna mã mehcuhhê — hane. Wa ite jũm jũjarẽn xà ita kam ijapac ne amji mã:

— Ampeaj kam mormõ cute me hajÿr — hajÿr. ¹⁹Ne ampo na mormõ ca ame amji to ajcokjê? Mormõ me gakra kwÿ pê catyt kam me ipa catêjê na, cute amji to me ipipê xà caxuw, hãn ne me amji to caprã. ²⁰Ca hãn me pajõ Pahhiti to ate me amji japackre xà caxuw me cuprõ, ne me gápàn xà ata kam, nee Jeju to ame amji japackre nare, ne amji too pit mã ame amji japackre. ²¹Ampo na? He ca nee me akwy jikaj nare. Ne me atũm prãm catêjê me akwy jirõa pê me apà, ne meakwy prãm na ame apa. Ne me akwy me ikõa to me ikõ, ne me ajpã, ne me akwy mã kôr cacrõ, nee mehkõm nare. ²²Pÿhàpà! Pom me acunea mã me gũrkwa ita? Quê me amã prãm, ca kaam me apà, ne ame ikõ. Měr ampo na mã ca ame Pahpãm na mehkwy caca, ne me cupê hamreare atajê mã amehpahãm to? He ate me hajÿr xà ita kam, jũ wÿr wa ha me apejti to me amã icakõc. Na wa ha quêtcatyt kam me amã me pajõ Pahhiti to amji japackre xajõ kur to hahkre.

Jeju to pahte me amji japackre xà

²³⁻²⁴Pê me pajõ Pahhiti, ite me amã ita to hahkre xà to imã hahkre, pê wa ramã me amã to hahkre to hane he. Pê me Jeju kên mãme mẽn xà ata jõ caxware kam, pê pãw py, ne hũrẽn hakryti na, Hũm mã amji jarẽn jirõ pê, ihkryj ne ihkõt me ipa catêjê cunea mã hõr pa. Ne me cumã:

— Pãw ita pê me gahpan xà na cute me ijĩ to kên ata pyrãac, na ca ha ita caxuw ate mehkur xà ata kam, atÿj me ito amji japackre — hane. ²⁵Ne pê me hãpàn jirõ pê, hanea ne ihkõm xà ata py, ne to hanea ne me cumã:

— Ampo cacô ita ri, Pahpãm me, me pahte me ajpën par xà intuwti na harê. Na ri ampo cacô ita pê icaprôa te me acwÿrjapê ipijaxwÿrpyràc, na ca ha ita caxuw ate me ampo cacô to me akôm xà ata kam, ca ha atÿj me ito amji japackre — hane. ²⁶Mêr hõhõ, ate Jeju to me amji japackre prãmte, ca ha me pãw ita ku, ne me ampo cacô ita to ikõ. Ne me hàpàn xà me, mehkôm xà ata quê ha mehcunea mã, me pancwÿrjapê me pajõ Pahhiti pê Jeju tyc naharên ita na, quê ha ahnaa hacpÿ ne amji jaxà.

²⁷Cwÿrjapê quê ha jÿmjê te, me pajõ Pahhiti to me amji japackre xà jõ to cute me cuprôn ata kur na, mehphahàm nare kam, mehkur ne amehkôm na, quê ha me pajõ Pahhiti te mencwÿrjapê ihtyc xà catia to, ihtyc ata to mencri, ne me to hõkrenõ, ne amehtùm. ²⁸⁻²⁹ÿhÿ, quê ha jÿmjê te me hàpàn xà ata kam, nee mencwÿrjapê Jeju tyc xà ata to me amji kam hapac nare kam, cama ame hàpàn, neamehkôm na, quê ha me taa me amji curê mã me amji mẽ, ne quê ha Pahpãm ihkên mã me cumê. Cupate, ca ha xa ate amji kam gapac xà to, ate amji pyrác xà ata to amji kampa, ne ahna amji kôpî, jirõ pê, ca ha cormã pãw ata krê, ne cormã ihkõt ampo cacô ata to ame ikõ.

³⁰Ca nee ihhêj ne ame ita ton nare cwÿrjapê ri me akwÿ jàhtõa ne me kàj xà, ne me akwÿ jàhtõa ne mehpeacre, ne me akwÿ kwÿ tyc. ³¹Nãmri cu ha pahte amji kam me pajapac xà na ampeaj kam me amji kôpîrna, quê ha nee me Pahpãm me pahcurê mã me pamên nare. ³²Ne Pahpãm pê Pahhiti te me pahcurê mã me pamên xà ata to me pajapackre, ne to me pahcuhtac, mâr cu nee mehkrã kên te mehkên mã mencjêj xà ata mã, mehkõt me paxâr nare.

³³Na ca ha me ikjêjê, ate me pajõ Pahhiti to me amji japackre xà caxuw me cuprôn na, ca ha xaa me ajpën jikaj, ne me cuprõ, ne cormã me apà. ³⁴Ne quê ampeaj kam me anõ mã prãm, ca ha gÿrkwa ri apà, mâr ca nee ate me cuprôn xà ata kam, ate me to amji kam gapac xà kaj na, gâpànnare. Ca ha ate me to hajÿr na, quê ha ihtÿj Pahpãm me acurê mã me amê. Hamre, wa ite me amã ita pit jarên, ne ihkwÿ, wa ha xa curiicato, ne cormã me amã harê, ca ha me hahkre pej.

1 Corinti 12.1-31

Pê Pawrô Pahpãm Carõ Pejti to me cumã hahkre

Roman 12.6-8; 1 Petrô 4.10-11; 1 Jowãw 4.1-2

12 ¹ÿhÿ Jeju kam me ikjêjê, imã me apê Pahpãm Carõ Pejti te me amã ampo jõr xà ata jahkre kêatre na me ato prãm nare. Na wa ha ita caxuw me amã to hahkre, ne ihcunea na ihkõt me amã harê. ²Xà cormã mam me apê Pahpãm jahkre kêatre ata to mã, ca ame amji japackre? Por pê pahpãm cahàc krekà tÿr nare, kam ampo hamreare ata

to meamji mã ahêj, pê ihtÿj ajco meato ihhimpej to ipa, na pê ca ajco atÿj ihkôt me apa, ata to amji japackre.

³Ne ita kam nee cute hajÿr nare. Quêt Pahpãm Carô Pejti tÿar ata, ihtÿj me ato ihhimpej to ipa, ne taa mã ri me pamã Jeju pê me pajôPahhiti na harê. Cwÿrjapê quê ha jÿm te harên to:

— Jeju ita kêanre — hajÿr na, quê ha ramã Xatanaj carô kên ata, ihcakôc xà ata na to ihhimpej, quê ha to ihcakôc. Ne nee quê Pahpãm CarôPejti jÿm ata jÿm to ihhimpej to hajÿr nare. Ne quê ha jÿm te Jeju jarên to:

— Jeju pê Pahhiti — hajÿr na, quê ha ramã Pahpãm Carô Pejti ata toihsimpej, quê ha harkwa kôt harên to hane. He nee quê ampo carô kên ata hÿjarên xà te hajÿr na jÿm to ihhimpej nare.

Pahpãm Carô Pejti ajteare mã me pamã cute amji jahkre pej xà gô

⁴He Pahpãm Carô pyxit peaj cacrô, ihtÿj me pamã ahpÿanre na ajteare mã, me pahte amji kam me pajapac xà te amji jahkre pej xà atajê jôr to ipa. ⁵Me pajô Pahhiti pyxit peaj cacrô, cu ahpÿanre na ajteare mã, cumãmê pajâpên xà pihho jâhtôa to me apê. ⁶Ne Pahpãm pyxit peaj cacrô, mã ahpÿanre na cute me pamã ajteare mã, me pahte amji kam me pajapac xà te amji jahkre pej jôr par, mâr cuahpÿanre na, ajteare mã cumã to me apê.

⁷Ne Pahpãm te me pahcunea to impej prãmte ahpÿanre na, ajteare mã, hirãa pê me pahcunea mã Carô Pejti te amji jahkre pej xà atajê jôr par. ⁸Pahpãm Carô Pejti hân ne mehkwÿ mã ahpÿanre na, me hâpên xà pihho jôr to ipa. Ne taa, mehkwÿ kwÿ mã, ihcakôc xà te amji jahkre pej krâ kreti jôr to ipa. Ne taa, mehkwÿ kwÿ mã, ihcakôcxà to cute me hapackre xà jôr to ipa.

⁹Ne taa, mehkwÿ kwÿ mã, cute amji mã me Jeju to ihhimpej xà tÿjti jôr to ipa. Ne taa, mehkwÿ kwÿ mã cute me hà catêjê caprâr xà caxuw me cumã carôt jôr to ipa.

¹⁰Ne taa, mehkwÿ kwÿ mã, cute amjia kôt me hâpên xà pihhoti ton xà nare atajê ton xà caxuw me cumã carôt jôr to ipa. Ne taa, mehkwÿ kwÿ mã, cute me Pahpãm jarkwa to mehcakôc xà caxuw me cumã amji jahkre pej jôr to ipa. Ne taa, mehkwÿ kwÿ mã, cute me Pahpãm Carô te amji kam hapac xà pejti me, ajteare mãjÿm te amji kam hapac xà kêanre jahkre pej xà jôr to ipa. Ne taa, mehkwÿ kwÿ mã, ajteare mã cute mehcakôc xà pihho to mehcakôc xà jôr to ipa. Ne taa, mehkwÿ kwÿ mã, cute mehcakôc xà pihho to mehcakôc xà ata kôt harên to capô xà jôr to ipa.

¹¹Ne por Pahpãm Carô pyxit peaj ata ri, ampo itajê cunea to. Ne taa, ahpÿanre na cute me cumã amji kam hapac xà jôr to prãmte atajê jôr to ipa.

Jeju na mehkwy pê hĩ kam cukrã xà pyrãac
Roman 12.3-8; Epet 1.22-23; 4.11-16

¹²Me pajĩ pyxit peaj, ne ampeaj kam, kam me pahcukrã xà jãhtô, ne me pahcukrã xà ita te amji to cuprôn, ne amji to me pajĩ pyxit peaj. Itajĩkjê na mã, me pajãhtôa cacrô me papê Jeju na mehkwy pê hĩ kam cukrã xà atajê pyrãac. ¹³Pê mam me pahkwý kwý pê Juta catêjê, ne me pahkwý kwý pê krĩxãre cahkrit, ne me pahkwý kwý pê amjia kôt amji mã mehãpên catêjê, ne me pahkwý kwý pê cama jũm mã me hãpên catêjê. Ne ahpãanre naajpên caxuw ajco me papa cacrô, pê Pahpãm Carô pyxit peaj, ne me pahto cuprô, ne me pahto Jeju na mehkwy. Ne me papê Jeju jĩ pyxit peaj ata pyrãac. Ne hanea ne pê Pahpãm Carô Pejti me pahcunea mã amji gô.

Me pahcukrã xà itajê ajpên pê ajteare mã cacrô, me pamã ihcunea na prãm

¹⁴Ne me pajĩ pyxit peaj kam, ahpãanre na me pahcukrã xà, hãpên xà caxuw, me pahkam ihcuhhê. Ne nee mã me pahkam me pahcukrã xà nõ pyxit nare. ¹⁵Quê ihhêaj to me pajĩ par amji jarên to:

— Nee ipê gãhkra nare, na rinee ipê gã kam acukrã xà nare — hajÿr cacrô, quê ha cormã cupê me pajĩ kam me pahcukrã xà ata na. ¹⁶Ne quê ihhêaj to me pajapac amji jarên to:

— Ipê gapac ne nee ipê ato nare, na rinee ipê gã kam acukrã xà nare — hajÿr cacrô, quê ha ihtÿj cupê pajĩ kam pahcukrã xà ata na. ¹⁷Ne quê me pajĩ cunea pê me panto pit, jũ mã cu ha me, ne ame awpa? Nare quê me pajĩ cunea pê me pajapac pit, jũ mã cu ha me, ne me ampo pã? ¹⁸Mêr hõhõ, pê Pahpãm me pajĩ kam ahpãanre na, cute me pajĩ kam me pahcukrã xà pyxwÿr prãm̃ti ata na pê kam hũxwÿ. ¹⁹Quê ha me pahkam pahcukrã xà nõ pyxit na mã, quê ha nee cupê me pajĩ nare. ²⁰Ne nee cute hajÿr nare, ne me pajĩ pyxit peaj kam, ampeaj kam me pahcukrã xà jãhtô.

²¹Cwÿrjapê quê nee me panto me pajũhkra mã harkwa to:

— Imãa icaxuw akôt hamreare, nare, nee imã ana ihprãm nare — hajÿr nare. Nare, quê nee me pahkrã me pahpar mã harkwa to:

— Nee imã ana ihprãm nare — hajÿr nare. ²²Ne me pahcukrã xà kwý peacre cacrô, mã ihtÿj cumã ihkwý na ihprãm. ²³Ne nee me pahcukrã xà kwý kwý impejti nare cacrô, cu ha pahtÿj me hamãr to impeaj ne. Ne me pahcukrã xà kwý kwý to, nee jũmjêmã me papipê xà nare, ne to papipê na me pahpahãm, na cu ha ihpro ne ame to papa. ²⁴⁻²⁵Ne me pahcukrã xà impejti kam me pahpahãm nare atajê ri, nee ihpro xà nare, cu ha pahtÿj põ pê ame to papa. Ne Pahpãm mã me pahcukrã xà atajê pyxit peaj, na quê nee apu ajpên japu nare, ne quêt cumã ihcunea te ajpên jamãr na to prãm. Cwÿrjapê ri cute me pajĩ kam me pahcukrã xà itajê cunea pyxwÿr, ne to cuprôn. Ne ihkwý impej nare atajê ri, Pahpãm te ihkwý jirôa pê

to impej. ²⁶Ne quê ha me pahcukrã xà nõ pyxít ne hà, quê ha ihcahhur cunea ihkàj xà ata cajpê, ne hũ na ihpeacre ne. Ne quê ha ihnõ pyxít ne impej mã ihpým, quê ha ihkôt ihcahhur cunea impej mã ihpým, ne hũ na hakry.

Pê Pahpãm, cute mehkwy to impej xà caxuw mehkwy pyxwý

²⁷Jíkjê na mã me papê Jeju Crixto na mehkwy atajê cunea pê hĩ pyrãac, ne ahpÿanre na me papê cukrã xà. ²⁸Pê Pahpãm ahpÿanre na cute mehkwy jamãr ne to impej xà caxuw, mehkwy to ôjtô ne me hũxwý.

Ne mam cati mã itajê pê ihkra pê Jeju jarkwa na memprar catêjê. Ne ihcote na itajê pê, Pahpãm jarkwa to cute me cumã mehcakôc catêjê.

Ne ihkôt itajê pê, Jeju te amji kam hapac xà to me cumã hahkre catêjê.

Ne ihkôt itajêpê, Pahpãm carôt kôt cute amjia kôt me hàpênxà pihhoti ton xà nare atajê ton catêjê.

Ne ihkôt itajê pê, Pahpãm carôt kôt cute me hà caprãr catêjê.

Ne ihkôt itajê pê, mehkwytehcajpar catêjê.

Ne mehkôt itajê pê, mehkwy to mehhimpej catêjê.

Ne hanea ne mehkwy pê mehcakôc xà pihho to mehcakôc catêjê.

²⁹Xà ajkĩ mehcunea pê Jeju jarkwa na memprar catêjê? Hãpà! Nare mormõ, mehcunea pê Pahpãm jarkwa to me hapackre catêjê? Hãpà. Nare, mormõ, mehcunea pê Jeju te amji kam hapac xà to me cumã hahkre catêjê? Hãpà. Xà mehcunea Pahpãm carôt kôt amji kôt me hàpên xà pihhoti, ton xà nare atajê ton to me ipa? Hãpà. ³⁰Nare, mehcunea Pahpãm carôt kôt me hà caprãr to me ipa? Nare, xà mehcunea Pahpãm carôt kôt me harkwa pihho to mehcakôc to me ipa? Nare, xàmehcunea mehcakôc xà pihhoti atajê kôt harên to me capô to me ipa? Hãpà. He ahpÿanre na cute me hàpên xà ton xà pit. ³¹Ne ihtÿj me amã, Pahpãm te mam cati mã me amã me gápên xà impejti jôr atajê juwahi to prãm. Ne hàpên xà ata pê Pahpãm jarkwa pejti to cute me hapackre xà. Ne ampo itajê cunea jirôa pê cute amji kam hapac xà impej ata, wa ha cormã me amã harên to hane he.

1 Corinti 13.1-13

Me pamã ajpên kĩnti xà ata ri ampo cunea jirô pê cati ne impej

Jowãw 13.31-35; Carati 5.13-15; Coroxo 3.12-14

13 ¹Imã pjê me côjkwa kam mehkri atajê jarkwa cunea to icakôc jahkre pej cakrô, imã mehcunea kĩn nare ita kam,

quê ha ite me harkwa to icakôc xà ata pê ihhêj rûm wakÿti kràkràc jôkre, ne ihkôt hamreare ne.

² Wa Pahpãm jarkwa to me hapackre to ipa, ne hanea ne imã ampo cunea jahkre pej, ne hanea ne imã ampo pimxur, ne hahkre kêatre atajê cuneajahkre pej,

ne hanea ne ite Pahpãm to amji mã ihmpej xà ata kôt itÿj jũ kam kënti nõ catia to antuw jahkre pej cacrô,

imã mehcuneakĩn nare ita kam ri,

nee Pahpãm mã ipê jũm nare,

ne cupê ampo cunea na ijamreare.

³ Wa ite ijâhcukrêj cunea to ipicràn par, ne hanea ne cama ite, Jeju to amji mã ihmpej cwÿrjapê,

cute me ijĩ tiar to caxàr na me hamã, mã cute me to caxàr cacrô,

imã mehcunea kĩn nare ita kam,

quê ha imãa ihcunea na ihkôt hamreare ne.

⁴ Wa ha imã mehcunea kĩn na mã,

wa ha amji mã me to ijâhtùm ryti to ipa.

Ne hanea ne me kam ijâhcajrënti to ipa,

ne nee hanea ne me hũ na amji to prãm to ipa nare.

Ne nee hanea ne amji to ijâmnãn to ipa nare. Ne nee amji to icati

prãm to ipa nare. ⁵ Ne nee hanea ne apu amji mã quêt to ipa nare.

Ne nee hanea ne, amji to pit mã apu amji kam ijapac to ipa nare.

Ne nee hanea ne ampo cuneakôt ame kam icryc pyrentu nare.

Ne nee hanea ne jũm te apu ito kên ata to amji japackre nare. ⁶ ÿhÿ,

wa ha imã me ikwÿ kĩn na mã, wa ha nee cute me ampo kên ton xà ata pyrên ijakry nare.

Ne quêt cute me ampo pej ton xà ata pyrên ijakryti to ipa. ⁷ Quê ha

imã me ikwÿ kĩn na mã,

wa ha mentête ijâmtàr to ipa ita na.

Ne wa hanea ne Pahpãm to amji mã ihmpej to ipa ita na.

Ne hanea ne Pahpãm to ite amji mã hajÿr ita kam, itÿj me ikwÿ to amji mã hajÿr to ipa ita na.

Ne wa hanea ne ampo cunea kam, ihcunea na ijũcanãr to ipa ita na.

⁸ Ne me pamã me pahkwÿ kĩnti xà ita, jũ caxuw me papê hamre xà nare. Ne

ihkĩnte, cu ha pahtÿj jũ caxuw Pahpãm jarkwa to pahte me hapackre xà ita to me tojnõ.

Ne hanea ne, cu ha pahtÿj jũ caxuw me pahcakôc xà pihho to me pahcakôc to me tojnõ.

Ne pahte me ampo jahkre pejatajê, cu ha pahtÿj me to pajapac kêt partu. ⁹⁻¹⁰ÿhÿ, cu ha mam me pahnõ ampo jîkjê crire ne cupy, ata to ma amji jamãr to papa, ne jû caxuw ihcunea na cupy, ne ihkõt ihcunea na ita to pit mã amji kam me pajapac to me papa, ne nee hipêr hîkjêincrيره ata to me amji japackre nare. Jîkjê na mã, amcro itajêa kam me pamã ampo cunea jîkjê kryjre ne hahkre pej. Ne hanea ne Pahpãm jarkwa to me hapackre xà jîkjê incrيره to, cu ame hapackre to me papa. Ne cu ha jû caxuw ampo itajê cunea jahkre pej.

¹¹ Ne pê wa cormã ipê ahkrare ria mã, itÿj ahkrare cakõc xà ata to icakõc, ne ahkrare te amji mã to ihhimpej xà ata to amji mã ihimpej. Neikà, ne ite ahkrare te amji kam hapac xà atajê cunea rer, ne hîcu. Jîkjê na mã, cu amcro itajêa kam, me papê ahkrare pyrãac, pjê ita kam. Ne jûcaxuw Pahpãm wÿr me pajàpir xà ata pê ramã me pahkà pyrãac, na cu ha nee hipêr pjê kam ampo itajê to me amji japackre prãm nare. ¹² Ne cu ha hanea ne irît xà nõ wejti cakênti kam, te ame amji pupun pej prãm, ita jîkjê na mã, cormã nee me pahte me Pahpãm pupun pej nare cakrõ, cu ha pahtÿj jû caxuw Pahpãm kuc ri me hõmpu, ne me ajpênpupu. Ne cormã ita kam, me pamã Pahpãm jahkre pej crire, ne cu ha pahtÿj jû caxuw ihcunea na me Pahpãm jahkre pej to hanea, pom quê ihcunea na cumã me pajahkre pej he.

¹³ Ne cu cormã me Pahpãm jikaj ita kam, cu ha pahtÿj amji mã me to pahhimpej to me papa rohnÿtti mã. Ne hanea ne pahte amji mã me to hajÿr ita kam, cu ha pahtÿj me hikaj to me papa rohnÿtti mã. Ne hanea ne me pamãmehcunea kîn rohnÿtti mã. Ne pahte amji mã me pahkwÿ kîn ita ri, quêt ihkwÿ itajê jirõa pê cati ne impej.

1 Corinti 15.1-58

Hacpÿa mã Jeju Crixto tîr xà to me hapackre xà
Me Hàpên Xà 2.24-36

15 ¹ÿhÿ Jeju kam me ikjêjê itajê, wa ha mam ite me amã Jeju pê me pahpytâr catê jarên ata to, ate me amji japackre prãmte, wa

ha hipêr me amã harên to capô. Pê wa me amã harê, pê ca ahna me amji capa, neatÿj Jeju to amji mã me ahimpej kam me to acrà tu. ²Ne pê wa me amã harên pejti to harê, pê ca amji mã me to hajÿr xà ata kôt ri, Jeju te me apytàr. Na ca ha ite me amã harên ita to amji mã me hajÿr tÿaj kam me to acrà tu ne. Nãmri ca ha ate amji mã me tohajÿr xà ita jicu na, ca ha Jeju to ate amji mã me ahimpej xà ata kôt hamreare ne.

³⁻⁴Pê wa Jeju na ijûpar xà ata ri ihkwÿ jirôa pê cati ne impejti, ata pê wa me amã harên to hane he:

“Pê Jeju Crixto me pahkên cwÿrjapê ty,
pê me harêt,
pê ahna amcro incrê jirô pê,
hacpÿa mã ihtîr” hane.

Ne pê ramã Pahpãm jarkwa na ihkàhhôc kam ahna mehhôc ata na ri cute hajÿr. ⁵Ne hacpÿa mã ihtîr jirô pê, pê Petrô mã amji to ajpê. Ne hanea ne hapu na, ihkôt me ipa catêjê te tôxi atajê mã amji to ajpê. ⁶Jirô pê mã pê, Jeju kam me pahkjêjê jàhtô te quijênta jirôa pê me cumã amji to ajpê. Ne pê me hõmpu atajê kwÿ ramãamehtyc, ne cormã me hàhtôa ne mehtîar na ame ipa. ⁷Jirô pê mã, pê hanea ne Tijac mã amji to ajpê, ne ihkôt harkwa na memprar catêjê cunea mã amji to ajpê.

⁸Ne me hicu xàa kam hanea ne cute imã amji to ipipê, ne hapua na ite hõmpun xà ita pê ihhêj rûm, ahkrare te ihpÿpÿm xà kaj na ihpÿpÿm ata pyrâac. ⁹Wa hapu na icator ita kam, wa mam Jeju jarkwa na memprar catêjê atajê cunea japyre mã, ne icrire. Ne imãa ipê Jeju jarkwa na imprarcatêjê nō caxuw ipej nare. Ampo na? He pê wa ajco ite Pahpãm na mehkwy to kēanre to prãm to, ajco itÿj me hahêr to ipa. ¹⁰Cakrô mã nee ite Pahpãm to kên ita jahpan xà na, cute icaca nare, ne ihtÿj quêt cute, ite cumã harkwa na iprar catê na amji mã icapi, ne Pahpãm te ito impej xà ita kôt hamre nare, na wa itÿj cumã ijâpên toipa. Ne Pahpãm te, ite cumã ijâpên xà na itehcajpar xà ita kam, wa harkwa na cumã memprar catêjê cunea jirôa pê cumã ijâpên to catia to ipa. ¹¹Wa ha ite mãn me amã Jeju jarên na, nare, me cute mãn me amã harên na, quê ha nee ahna jû mãn nare. Ampo na? He me ijûjarên xà itajê pipên pit. Ne ate ahna me ipar xà atajê to, ca atÿj amji mã me hajÿr to me apa.

Hacpÿa mã me pahcunea tîr xà to me hapackre xà

¹²Wa hirãa pê me amã hacpÿa mã Jeju Crixto tîr na harên to me ipa ita kam, jû mã ca ha ajte me anō amji mã mehtyc jarên to:

— Nee hacpÿ mã mehtyc tîr xà nare — hane. ¹³Quê ampeaj kam cute hajÿr na, quê nee hanea ne hacpÿ mã Jeju Crixto tîr xà hamreare. ¹⁴Ne nee hacpÿa mã Jeju Crixto tîr nare ita kam, quê ha ite me amã ita na

harĕn xà ita kôt hamreare ne, ne hanea ne ate amji mã me to hajÿrxà ita kôt hamreare ne. ¹⁵Ne cormã ihnõ te hajÿar he. Quê nee hacpÿa mã mehtyc tÿr xà nare na mã, quê nee Pahpãm hacpÿa mã Jeju Crixto to ihtÿr nareita kam, wa cama ite me amã Pahpãm te Jeju to ihtÿr jarĕn xà ita to ame amã ihêj. Ne hacpÿa mã ihtÿr ita kam, jũ mã wa me, ne ame amã ihêj?

¹⁶⁻¹⁷Quê ha hacpÿa mã mehtyc tÿr xà hamreare na mã, quê ha nee hanea ne Jeju hacpÿ mã ihtÿr nare. Ne quê nee Jeju Crixto hacpÿa mã ihtÿr nare na mã, quêha hanea ne ate amji mã me to ahimpej xà ata kôt hamreare ne, na ca ha cormã me akĕnmã me axà, ne kam me apictor xà itajêa kam ame apa. ¹⁸Ne me pahkwÿ te Jeju Crixto to amji mã mehhimpeaj kam amehtyc atajê, quê ha ihtÿj hanea ne Pahpãm kaj na me acto. ¹⁹Ne quê ha Jeju Crixto pjê ita kam pit mã me pajamã, ne nee me pahtyc xà jirô pê, pahte me amji pupun xà kĕanre atajê jahpan xàna, me pamã ampo jôr nare na mã, cu ha nee ame amji mã hamãr nare, ne mehcunea jirôa pê me pahkĕn mã me axà.

Cu ha me pahcunea, Jeju cukwa kam, hacpÿa mã me pahtÿr

Me Hàpĕn Xà 26.23; Ipiĕn Xà 20.1-15

²⁰Ne nee cute hajÿr nare ita kam, quĕt ampeaj kam mam ihtÿr cakõnĩ to hacpÿa mã ihtÿr, ata na quê ha hanea ne, ihkôat hacpÿa mã mehtyc atajê pê hÿràc peaj, ne mehcunea hacpÿa mã mehtÿr. ²¹⁻²²Ne pê hÿmre pyxit peaj pê me panquĕtti pê Atãw to kĕn ata cukwa kam ri, me pahcunea tyc xà. Jÿkjê na mã, hÿmre pyxit peaj pê Jeju Crixto ata cukwa kam, cu ha quĕt me pahcunea hacpÿ mã me pahtÿr. ²³Quê ha mam hacpÿa mã Jeju Crixto ihtÿr, ne ihkôt quê ha hacpÿ ne cõjkwa pÿn amji jaxà ne wrÿ, me ajkaam, quê ha me cupê me hõ tekjê catêjê atajê hacpÿa mã mehtÿr. ²⁴Ne curia quê ha ampo cunea jicu xà kam ahtwÿ. Quê ha Jeju Crixto, Hÿm curê xwÿn pê Xatanaj na mehkwy jô pahhi catêjê carôt tÿjti atajê, cunea tohjê. Mãr quê nee hipêr pjê kam mehkrĩ catêjê to ihhimpej nare, ne quĕt cute Hÿm kam hapac na me to, quê ha me kampa.

²⁵Ne quê ha Jeju Crixto me to ihhimpej to ipa ita kam, quê ha ahnaa Hÿm curê xwÿn catêjê cunea ihkra par krac ri me nõr na me to, quê ha me nõ. Quê ha cute me tohjê na me hahkre pej xà na, me hipy ihpar xãm. ²⁶Ne quê ha me pahtyc xà pê me pahcurê xwÿn ata, quê ha hapua na hicu xàa kam me to hamre. ²⁷Pê Tawi xwÿ Pahpãm jarkwa kôt hõ kãhhôc kam ihhõc to:

“ÿhÿ, Inxũ Cati,
ate ampocunea to me ihimpej xà na me ixãm,
ne ate ampo cunea ton itajê to me ihimpej,
ne hirô pê me icuhhê na me iton” hane.

Ne Pahpām te ihkra curê xwÿn catêjê cunea to ihhimpej prām to, cumã to ihcakôc to hajÿr. Ne nee ihkra te Hũm Cati to ihhimpej xà na cute to cumãihcakôc to hajÿr nare. ²⁸Ne quê ha xa Pahpām, ihkra pê Jeju krac ri mehcunea xàr na me to, ne cute me to ihhimpej na me to, jirô pê quê ha ihkra Hũm krac ri axà, mārquê Hũm ihcunea to ihhimpej.

²⁹Ne wa ha hipêr me amã hacpÿa mã mehtyc tĩr xà kôt harên kam to icrà tu ne. Ihhêj ne ramã jũmjê te mehtyc catêjê mã, cô kam me amji cumrār. Ne ampo caxuw mã cute me hajÿr? Pom quê ha xwahna neehacpÿ mã mehtyc mehtĩr nare ita? ³⁰Quê ha nee hacpÿa mã mehtĩr xà nare na mã, wa ha nee ampo kên te ito kên xà itajê cunea mã icjêj to ipa prām nare. ³¹Pÿhàpà, me ikjêjê! He wa amcro cunea kam ityc xà na pire mã ipa, cu me pajô Pahhiti pê Jeju Crixto kam me pahhônco xà ita kam, wa me apyrênijakryte, me amã amji jarên to hane. ³²Wa ita ri Epet jô krĩ kam me icurê xwÿn catêjê me, me ijarkwa to kypê me ajpên cujtên nare. Mã me cupê ampo jàprêhti ata pyrác, ne cute me ikam ihtêm, ne ajmār me icuran. Ne hacpÿa mã mehtyc tĩr xà nare ita kam, mēr ampo na mã wa ajte ampo kên itajê cunea mã icjêj to ipa? Ne quê nee hacpÿ mã mehtyc tĩr xà nare na mã, cu ha pajapacta ne mehkrã kên te me amjijarên xà kôt me amji kampa, ne me amji mã:

— Apê na ame pahtyc xà ita kam, hacme, ne ame ampo to ikõ, ne ame apà, ne cormã ita kam ame amji kĩn cri — hane.

³³Cohê! Me guphêa ne, mār quê nee jũm me amã ihhêj nare! Ampo na? He cu ha mehkrã kên kôt me papa, ne me pahna ahtũm nare, quê ha haneane me pahkrã kêanre ne. ³⁴He nee me akwÿ kwÿ mã Pahpām carôt jahkre pej nare ita kam, xà nee ahna amji jũ na me apahàm nare? Na ca ha ate amji kam me gapac xà kên kôtme apa xà atajê jicu, ne hacpÿa mã hipêr catyt kamate amji kam me gapac xà impejti kam me apa.

Hacpÿa mã me pahtĩr jirô pê me pajĩ tuw kôt harên xà

Ruc 20.34-36; Roman 8.10-11; Pirip 3.20-21

³⁵Ca ihhêaj to me akwÿ kwÿ mehtyc te hacpÿa mã mehtĩr na me ajpên cukij to:

— Quê ha jũm ty, ne ramã hĩ ihcacu, jũ mã quê ha Pahpām ramã hĩ jamre ata to, ne hacpÿa mã to ihtĩr? Ne hĩ jũ to quê ha hacpÿa mã cumã ihtĩr, quê ha apu to ipa? — hane.

³⁶Pÿhàpà! He apê amji jahkre kêatre! Pom ca ha ampo hy kre, quê ha xa ty, jirô pê cormã kam huprãj cato ita? ³⁷Ne ca ha arÿjhy kre, nare, ampo hy kre, ne ihhy pit kre, ne nee ihcahkôa na ihkre nare. ³⁸Ne Pahpām te, ihtÿj ahpÿanre na ampo hy kre ata kam ihcahkô na, cute ton to amji mã ihprãmti xà ata na to. Mēr hõhõ, pom ca ha ihhy pit kre, quê ha kam ihcakô cato ata, nee ihhy ata me ipipên nare, ne ajtearemã, ne hirôa pê impej. Hõhõ, ita jĩkjê na, quê ha jũm ty, quê ha me hĩ jarê, quê

ha hacpÿa mã ihtîr, ne hî to cato ata, quê ha ajteare mã, ne mam ita jirôa pê impej.

³⁹Ne pom ampo cunea tîr itajê jî, ajpên pê ajteare mã. He ajteare mã me pajî, ne ajteare mã pryre jî, ne ajteare mã pryjara jî, ne ajteare mã tep jî.

⁴⁰Ne còjkwa kam, ajteare mã me hî na me ipa. Ne pjê kam cute hajÿar ne ajteare mã me hî na me ipa. Ne pjê kam ampo pejti itajê, me còjkwa kam ampo pej itajê, ajwar impej cakrô, nee impej na ajpên na ipimrâc nare. ⁴¹Ne ajteare mã pyt jâhcujro impejti ata, ne ajteare mã putwÿr jâhcujro impejti ata, ne ajteare mã ahpÿanre na caxêre jâhcujro impejti atajê. ⁴²Jîkjê na mã Pahpâm te hacpÿa mã mehtyc to ihtîr xà ata te hajÿar he. Ne cute mehtyc jarêt xà ata kam, quê ha ramã hî hamre to mō. Ne hacpÿa mã ihtîr xà ata kam, quê ha quêt hîata ajteare mã, ne nee jû caxuw hamre nare. ⁴³Ne quê ha mehtyc jarêt xà ata kam, quê ha ramã ihkên ne ihpeacre, na quê ha nee hipêr jûm ahna prãm nare. Ne hacpÿa mãihtîr xà ata, quê ha quêt impeaj to impej, ne ihtÿj. ⁴⁴Ne cute me harêt xà ata kam, quê ha me hî pit jarêt. Ne hacpÿa mã ihtîr xà ata kam, quê ha quêt Pahpâm Carô Pejti kôt hî tuwto ihtîr ata to ipa. Ne pjê ita kam, me pajî itajê pê pjê tekjê atajê to pit mã me papa. Nehacpÿa mã me pahtîr jirô pê, cu ha còjkwa kam, Pahpâm Carô Pejti kôtme pajî pê còjkwa tekjê atajê to ame papa.

⁴⁵Pê Mojxe xwÿ jô kâhhôc kam, ramã Pahpâm jarkwa kôt mam Atãw cator ata jarên to hane he:

“Pahpâm te pjê te mehî pê Atãw ton, nehîjakre jakôr, mã hîa na cute amji ton” hane.

Ne còjkwa pîn Atãw nōa pê Jeju cator ata ri quêt ajteare mã, ne ihtÿj Carōa kôt me pahto ihtîr. ⁴⁶⁻⁴⁷Pê mam Atãw ata pê pjêa tekjê, na pê Pahpâm pjêa to, to. Ne quêt hapu na Atãw nōa pê Jeju pê còjkwa tekjê ata, còjkwa pîn Pahpâm Carōa kôt wrÿ, ata ri mam ita jirôa pê impej, ne cati. ⁴⁸Ne pjê kam mam Atãw te amji kam hapac xà kôt me ipa catêjê atajê pê ri, pjê tekjê, ne me cupê hÿràac. Ne quêt hapu na còjkwapîn Atãw nō pê Jeju te amji kam hapac xà kôt me ipa catêjê atajê pê ri, còjkwa tekjê, ne me cupê hÿràac. Cwÿrjapê quê ha me hî pê Jeju hacpÿa mã ihtîr ata jîa pyrâc. ⁴⁹Ne pjê te mam me panquêtî Atãw jî ata japua na ri, me pajî ita pê hîa pyrâc, na cu cormã ame to papa. Ita jîkjê na, cu ha ame pahtyc jirô pê hacpÿa mã ame pahtîr, ne me pajî pê còjkwa pîn Jeju jîapyràc, na cu ha pahtÿj jû caxuw ame to papa.

Còjkwa kam me pahkrî xà caxuw me pamã me pajî tuw na prãm

1 Texarôn 4.13-18

⁵⁰ÿhÿ, Jeju kam me ikjêjê, jû wÿr quê pjê kam me pajî kam caprô ramã ihcacu to mō itajê, còjkwa wÿr Pahpâm himpej xà wÿr api. Ne jûwÿr quê me pajî itajê ihtîar na ipa rohnÿtti mã.

⁵¹Cormã nee ate me ampo jahkre pej nare ata jarên na, me ikampa. He cu ha nee me pahcunea me pahtyc nare cakrô, cu ha pahtÿj caxuw ame pajĩ to antuw to hane he. ⁵²Quê ha cõjkwa pĩn hõhhi cakôr jicu xà ata jõkre kampa, me ajkaam, hũjarêan kam, cyt ne, me amji to antuw pyrentu. Ýhÿ, ampeaj kam, quê ha mehtyc hacpÿ mã mehtĩr me ajkaam, cu ha me pahcunea nee jũ caxuw me pajĩ tyc xà nare ata wÿr me amji toantuw, mehtyc ne hacpÿa mã mehtĩr atajê mea mã. ⁵³Ne me pajĩ ty, ne ihcacu xà wÿr pra itajê, ihtÿj cute amji to ipintuw xà pit, mãr quê nee jũ caxuw hipêr ihtyc nare. Nãmri quêha nee cute amji to ipintuw nare na, quê ha nee Pahpãmcahê na ihkrĩ nare. ⁵⁴⁻⁵⁵Pê ramã Pahpãm jarkwa to mehcaôc catêjê pê Ixaj xwÿ me, Hõxêj xwÿ, harkwa kôt hõ kãhhôc kam hacpÿa mã me pahto pahtĩr, neamji to me papintuw xà na ajwar mehhôc to:

“Me pahte me pahtyc xà pê me pahcurêxwÿn tohjê,
ne me to hamre partu.
He me pahtyc xà pê pacti pêrhy xà, ne ihtÿj me pahcãmxe.
Ne hacpÿa mã me pahtĩr xà ata pê pacti curan xàpyràac.
Na cu me pahtĩr rohnÿtti mã xà ita kam,
nee hipêr jũ caxuw me pamã me pahtyc xà cupa nare” hane.

⁵⁶Cu ha Mojxe xwÿ jõ kãhhôc kam Pahpãm jarkwa jirô pê me pahpÿm xà ata pê pahte me Pahpãm to kên, cwÿrjapê ri ihtÿj me pahtyc xà. ⁵⁷Ne jũm kôt mã pahte me pahtyc xà ita tohjê? He nee mã jũm kôt nare, me pajõ Pahhiti pê Jeju Crixto kôt, cu pahte me tohjê. Na cu ha Hũm pê Pahpãm te me pamã ihkra pê Jeju kujahêc atapyrên me pajakryti na cumã me amji jarê.

⁵⁸Ýhÿ, imã me ikjêjê kĩnti itajê, he ampo itajê cunea cwÿrjapê, ca ha atÿj me pajõ Pahhiti to amji mã me ahimpej kam me to acrà tu ne, nenee jũ caxuw kam me apec nare. Ca me pajõ Pahhiti mã apê ita kam, quê ha nee me gãpên xà ita kôt apê hamre nare na, ramã me amã hahkre pej. Cwÿrjapê ca ha atÿj cumã gãpên xà ita to pit mã hupkre cahkô to me apa.

CORINTI JÕ KRĨ WÛR

Hapu Na Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ. Ne pê Jeju na mehwÿ jakrã Corinti jõ krĩ kam mehkri atajê wÿr, pom cu me hõ kàhhôc cahyt ita kujate. Na pê hapu na hõ kàhhôc ita japry pê Corinti Jõ Krĩ Kam Jeju Na Mehwÿ Jakrã Mehkrĩ Atajê Wÿr, Hapu Na Pawrô Jõ Kàhhôc (2 Corinti).

Ne hõ kàhhôc itajê kam, cute ampo cunea to mehapackre, mâr quê nee me cumã mehtyc xà cupa to me ipa nare. Ne hanea ne cute me pamã me pajĩ tuw jarên.

He nee ite Corinti wÿr Pawrô te hõkàhhôc kujahêc atajê cunea to ipintuw nare, ne ihkwÿ jatujre atajê ri ite to ipintuw.

2 Corinti 4.1-18

Pê Pawrô Pahpãm mã hàpên na amji kôt harê
Me Hàpên Xà 19.23-40; Roman 1.11-12

4 ¹Pê Pahpãm hàhcaprĩa kam, me ipê harkwa na me iprar catêjê na me ipyxwÿ ita kam, wa ha nee intête me amji hi kwĩn, ne ame ipec, ne me cumã ijâpên jicu nare. ²Ne wa quêt ampo kên pimxur cunea kam me pahpahàmti atajê cunea, wa ma ame ton caca, ne nee ame cumã me ihêj to me ipa nare. Ne neewa Pahpãm te harên xà kaj na me amã ihcupan xà nõ jarên to me ipa nare. Ne wa quêt catyt kam me amã hirãa pê Pahpãm jarkwa jarên xà tocapô to me ipa. Ne wa Pahpãm kam mare mã, me cumã harkwa jarên to me ipa, mâr quê mehcunea, wa nee ame ihêj xi nare na, me ijahkre pej. ³Nãmri quê ha jũm te nee ite me ijũjarên xà ita par jahkre pej nare na, quê ha nee incwÿrjapê amji mã me icuhtom nare. Ne ampo na mã nee me kam hapac jahkre pej nare? Jũ wÿr quê ramã me ipictor to me mō ita kamme kam hapac pej. ⁴Ne quê jũm ato caxwÿ, ca ha nee arĩt nare. Ita jĩkjê na mã Xatanaj pê pjê ita kam, cute

amji kam me hapac xà kên jō pahhi ita te, me cupê cute amji kam me hapac xà to kên, mār quê neeJeju Crixto pê Pahpām kra pê ampo kên catia pê me hūtār catê ata na me hahkre pej nare. Jeju pê Hūam pyrác, na quê ha nee Pahpām to amji mā mehhimpej nare ita kam, quê ha nee Jeju Crixto kôt me Pahpām jahkre pej nare. ⁵Ne nee wa me pa, amji to me amā me icakôc nare, ne quêt Jeju Crixto pê me pajō Pahhiti to, wa me amā me ijūjarēn to me ipa. Ne Jeju cwyrjapê ri me ipê me amā me ijapên catêjê pit. Cwyrjapê wa ame amā me amjjarēn to me ipa.

⁶Ne pê Pahpām pjê ton xà ata kam, awcapàtkô cunea to hamre prānte, harēn to: “Amcro” hane. Hamre pê amcro pyrentu, pahte me ampo cunea pupun, ne me hahkre pej xà caxuw ahcujro pyrentu. Ita jikjê na mā, ihhêj ne Pahpām te me pamā pahte amji kam me pajapac xà cujro, cu ihkôt me ampocunea kampa, ne me hahkre pej. Ne Jeju Crixto tea ri me pamā Pahpām to ipipê, na cu ha ihkôat me Pahpām carôt jàhcujro jahkre pej.

Pō rúm me pajī peacre cakrô, mā kam Pahpām Carō Pejti carôt tỳj ihkrī

⁷Ne pjê te pot na kyre pê hī jàhwÿr, ne ihcasure, ne ihkre kam, ampo pejti na hī jàhwÿrti te hipu, ita na mā me ite. Ne me ijī peacre, neihcasure cakrô, mā ihtỳj me amā ampo pej pit jarēn to ipa. Na quê ha mehcunea, ite Pahpām jarkwa kôt mehcunea mā harēn xà pejti jarēn ita na me ipupu. Ne Pahpām te ri imā caxuw ampo cunea jirô pēcarôt tỳjti ita jōr na me hahkre pej.

⁸⁻⁹Wa ampo cunea kam me amji pupun to kēanre cakrô,

mā nee cute me itohjê nare.

Ne ampo kwÿ kam amji jahkre kêatre cakrô,

wa nee amjia kôt ite me hīcu nare.

Ne me icurê xwÿn ame icapôr cakrô,

mā nee Pahpām te meimā hikran nare.

Ne hān ne ihtỳj me ito kên cakrô,

wa nee me ijamre nare.

¹⁰⁻¹¹Ne Jeju te me pancwyrjapê mehcuran xà mā amji jōr, mā cute mehcuran. Jikjê na, wa itỳj me amā Jeju te amji kam hapac xà pejtijarēn xà mā amji jōr to ipa. Ne ite me amā harēn xà ata kôt, ca ha me atirrohnÿtti mā na me apa xà ata, ihtỳj mehcunea mā Jeju te hacpÿa mā ihtír na harēn. Ne wa Jeju cwyrjapê amji to me ikên cunea japên to me ipa. ¹²Ne ite amji to me ikên japên to me ipa xà ita kôt, ca ha me atír rohnÿtti mā na me apa.

¹³Pê pahhi xwÿ pê Tawi ata, ita na Pahpām jarkwa kôt hō kàhhôc kam ihhôc to hane he:

“Imāa, Pahpām jūjarēn xà ita pê nee ihhêj xi nare,

na wa itỳj amji mã to ihmpej,
ne me amã harẽn to me ipa” hane.

Na wa itỳj cuxà Pahpãm to amji mã me ihmpej to me ipa, ne itỳjcuxà me amã Pahpãm jũjarẽn xà jarẽn to me ipa. ¹⁴Ne ampo na mã wa Pahpãm to amji mã me ihmpej? Wa ite, cute hacpỹa mã me pajõ Pahhiti pẽ Jeju to ihtĩr na me hahkre pej, na quẽ ha ihtỳj cuxà me ito itĩr, ne hanea ne me ato me atĩr. Na cu ha pahtỳjjũ caxuw me pahcunea cuxà hỹrmã me api, necahẽ na ame papa rohnỳtti mã. ¹⁵Ne me acwỳrjapẽa ri, ite me amji pupun xà kẽanre itajẽ jãhtõa to hàhtõ. Ne me imã pjẽ cunea kam, me hàhtõa ne Pahpãm wỳr me ipipkjẽr na me to prãm, mãr quẽ Pahpãm mehcunea caprĩ, ne mehkẽn pẽ me hũtã. Mãr quẽ me hàhtõa to me hàhtõ, ne Pahpãm te ampo kẽn pẽ me hũtãr pyrẽn me hakry na, cumã me amji jarẽn catia to me ipa.

Cu ha pahtỳj Pahpãm to amji mã me pahhimpej kam me to pancrà

¹⁶Ne amcro cunea kam, me pahkà amji to hamre to mõr cakrõ, mã me pahcaxwãm pẽ pahte amji kam me pajapac xà ihtỳj amji to intuw to mõ. Na cu ha nee Pahpãm mã me pajãpẽn tẽte me amji hi kwĩn, ne me hicu nare. ¹⁷Ne pahte amji pupun xà to kẽanre kẽnre, kẽn pejti te cyt ne imprar atajẽ jahpan xà na, quẽ ha Pahpãm amji cahẽ na me papa na me pahto, ne ampo kẽn ita jirõa pẽ me pahto imej catia to catito ihcuhẽ rohnỳtti mã. ¹⁸Ne por cu pjẽ kam me panto to me ampo pupu atajẽ, quẽ ha ihtỳj jũ caxuw hamre. Ne quẽt cõjkwa kam pahte me ampo pupun nare atajẽ, quẽ ha hàhhuc rohnỳtti mã. Cwỳrjapẽ cu ha nee ita ri, pjẽ kam, pahte me ampo pupunitajẽ to ame pajãptõ nare. Ne quẽt cõjkwa kam, cormã nee pahte me hõmpun nare atajẽ to, cu ha pahtỳj me amji japackre to me papa.

2 Corinti 5.1-21

**Nee pahte me pajĩ tuw pupun nare cakrõ, ramã to me pajapac xà
2 Petrõ 1.13-14**

5 ¹Quẽ ha jũm ikre pejti catia nõ ton xwỳjrea na, ramã amji mã ikre cahàc nõ xãm ne kam ihkrĩ. Ne cute ramã ikre catia ata jipẽj jirõ pẽ, quẽ ha ikre cahàc ata hu, ne ma cute intuw jipẽj ata mã axà, ne kam ihkrĩ. Jĩkjẽ na mã me pajĩ pẽ me pahcaxwỳn carõ krekã te hajỹar. Neramã pahte me Pahpãm te cõjkwa kam me pahcaxwỳn carõ mã, hĩ tuw jipẽj na me hahkre pej. Ne quẽ ha jũ caxuw me pajĩ pẽ ikre cahàc pyrãcti itaty, quẽ ha caxwỳn carõ ata ihtỳj cõjkwa kam me pajĩ tuw pẽ ikre cati pyrãcti ata kam ihkrĩ. Ne Pahpãm te ri me pamã me pajĩ tuw pẽ ikre

pejti pyrãcti ata ton, naquê ha nee jũ caxuw hamre nare. ²⁻³Ne pom quê ha jũm ikre cahãc pê ihkrĩ xã kêanre kam ihkrĩ, ne ihtÿj ikre pejti ata mã hãr ne kam ihkrĩ pyrentu to prãm, ita na mã mepajĩ te, ne ihtÿj me pajĩ ita rer pyrentu to prãm. Ne ma cõjkwa kam me pajĩ tuwti te jũ caxuw hamre xã nare ata mã hãr, ne kam ihkrĩ to prãmto, me to pajapac xã te me pahcagãgã.

⁴Ne pom cu pjê kam me pajĩ to ame papa xã ita kam, cu pahtÿj ame pahcagãgã to me papa. Ampo na? He nee mã me pahte me pajĩ tũm ata cacaxã to nare. Ne quêt intuw ata mã hãr ne kam apu ipa to prãm to, cu ame pahcagãgã. Ne cu ha me pajĩ tuw te jũ caxuw hamre xã nare ata kam ame papa, ne nee hipêr me pajĩ tũm, ramã hamre to mõi ata to me amji japackrenare. ⁵Ne pê Pahpãm ramã mam ita to amji kampa. Ne cute ampeaj kam, ihtÿj jũ caxuw me pahto ipintuw na me pajarên xã caxuw, ramã cuteme pamã Carõ Pejti jõr, na quê ha ihtÿj to.

Pahte me pajĩ tuw to me amji pytãr na ramã me pamã hahkre pej

⁶⁻⁸Ita pyrên me pajakry to, cu pahtÿj me pajũcanãr na amji mã me pahcarõt. Ne cormã pjê ita kam, ame papa xã ita kam, nee pahte me pantoa to me Pahpãm pupun nare cakrõ, cu pahtÿj amji mã me to pahhimpej to mepapa. Ne pahte amji mã me to pahhimpej xã ata kõt ri, me pamã hahkre pej. Ne cu cormã me pajĩ ita kam amepapa xã ita kam, cormã nee Pahhiti cahê na me pajĩ tuwti ata kam ame papa xã nare na, pahte me amji jahkre pej. Ne pahtÿj me pamã, pahte me pajitũm ita pê me pajapõj, ne ma Pahhiti cahê na me pajĩ tuwti ata mã me pancjêj na me pamã to prãm.

Cu pahtÿj amji to me Pahpãm cajpuaw to prãm

⁹Ne ampo pyxit peaj ata na ri me pamã ihprãam to prãm. Cu ha pahtÿj pjê kam, cormã me pajĩ tũm kam ame papa xã ata kam, amji to me Pahpãmcajpuaw to prãm, nare, cõjkwa kam me pajĩ tuw kam me papa xã ata kam, cu ha amji to me Pahpãm cajpuaw. ¹⁰Ne mër ampo na mã cu pahte me ita ton xã? He cu ha jũ caxuw me pahcunea me pajõ Pahhiti pê Crixto cuna mã me pahcuhhê, mãr quê catyt kam me pahcunea cukij, ne me ajpên pê me pahto haprã. Ne taa, cormã pjê kam me pajĩ tũm to me papa, nepahte me pajãpên xã ton atajê jahpan xã na, ahpÿanre na me pamã amgõ pa. Ne me pahkwÿ te ampo pejti ton atajê to, quê ha impej, ne me pahkwÿte me ampo kên ton atajê to, quê ha apu ihkêanre ne.

Jeju mã me pahkĩn xã ata, ihtÿj me pahto ihhimpej

Roman 6.4-6; Epet 4.22-24; Coroxo 3.9-10

¹¹Cwÿrjapê wa itÿj kypê amji mã me pajõ Pahhiti cupa to me ipa nare. Na wa itÿj Pahpãm wÿr me hàhtõa to me ipipkjêr to prãm. Pahpãm mã

ihcunea na me ijahkre pej, cwÿrjapê wa nee me ipej mã me ipÿm prãnte, hÿrmã ame to ipipkjêr to me ipa nare na, cumã me ijahkre pej, ne hanea ne ahna me amã me ijahkre pej. ¹²⁻¹³He jÿmjê itajê ri pō rÿm pit mã amji to me cati prãm, na ri pō rÿm pit mã ampo atajê na amji to me hãmnãn to me ipa. Ne ihhêj ne ihtÿj jÿmjê itajê te pō rÿm mento to me ipupun, ne nee meicaxwãm pê, cute me ite amji kam me ijapac xà na me ijahkre pej nare kam, amã me ijarên to kêanre to:

— He Pawrô na mehkwy itajê te me amjijahkre kêatre, ne ihhêj ne ame kam waj — hajÿr. Ne mehkwy me ijarên to:

— Cute me pamã ihhêj xà ita caxuw, cute amji jahkre kitre nare — hane. Ne wa ha ite me ikam waj cacrô, wa itÿj cormã me amji to Pahpãm cajpuaw to ipa. Ne nee wa ame ikam waj nare, wa me ikrã impeaj kam me atoimpej to me ipa. Wa ite ramã me amã, me icaxwãm pê ite me amji kam ijapac xà na me amji jarên. Mãr ca atÿj me cumã me ikôt harê, ne nee ameijÿ na apahãm nare. Ne nee mã ite amji to me icati to prãm to, ite me amã ite amji kam me ijapac xà ita na me amji jarên nare. ¹⁴Ne Jeju Crixto mã me ikinti ata ri me ito ihhimpej to ipa, cwÿrjapê wa itÿj me atehcajpa. Ne por pê Jeju pê me pajô Pahhiti pyxit peaj ne ty, ata cukwa kam ri ihhêj ne me pahcunea te amji kam pajapac xà tÿm kênatajê tyc, ne hamre par. ¹⁵Ne pê me pahcunea cwÿrjapê ty, ne me pancwÿrjapêa pê hacpÿa mã ihtir, mãr cu pjê kam ame papa atajê, nee hipêr amji to me amji cajpuaw to prãm to ame papa nare. Ne quêt ihcajpuaw to prãm to, cu cumã ame papa.

Jeju me pamã cute amji kam hapac xà tuw pejti gô

¹⁶Ita kam ri pahte amji kam me pajapac xà ita ajteare mã, ne impej. Cwÿrjapê, cu ha nee pjê kam, cute me amji kam hapac xà tÿm ata kôt, jÿmjê to amji kam me pajapac nare. He pê wa mam Jeju to me amji kam ijapac xà to hanea. Ne ita kam, wa nee hipêr me to hajÿr nare. ¹⁷Ne quê ha jÿm Jeju Crixto to amji mã ihhimpej, ne kam amji hõnco ata pê quê ha jÿm tuwta ata. Ne ramã mam cute amji kam hapac xà tÿmkên ata cupê hamre partu. Na quê ha quêt cute amji kam hapac xà tuw pejti ata kam apu ipa. ¹⁸Ne ampo pej itajê cunea Jeju kôt, Pahpãm pîn, me pahwÿr pra. Ne pê mam me papê Pahpãm curê xwÿn. Ne Jeju cukwa kam ri cute hacpÿa mã, mepahto amji jô ikwy nõ. Ne cute hÿrmã mehkwy to ipipkjêr xà ata pê ri me pajapên xà, pê ahna me paxãm, mãr quê me pahcuxã hanea ne me to amji jô ikwy nõ. ¹⁹Na wa itÿj mehcunea mã Pahpãm jarên to:

— Pahpãm mã me ato hõ ikwy nõ na me ato prãm. Na ri cute Jeju Crixto cukwa kam, ate ame to kênxà atajê cunea to hapac kêt, ne to tojnõ — hane. Ne Pahpãm te, ite mehcunea mã me ita jarên na, me imã hÿjahkre.

Cu Jeju me ajpên kam me pahhônco, na ri Pahpâm te me pahna amjicaxàr

²⁰ Cwÿrjapê pê Jeju harkwa na me iprar catêjê na me ipyxwÿ. Na wa me cumã me icakôc xà ata kam, ihhêj rûm Pahpâam ri me cumã ihcakôc, ne me ahna hàhwÿr to:

— Me icurê xwÿn itajê, cama amji na me ijamá, wa amjiwÿr me ato apkjê, ne me ato ikwÿ nõ, cu ajpên to me ikwÿ nõ, ne ajpên kam me pahhônco — hane. ²¹ Pê nee Jeju Crixto jû caxuw ampo kên ton nare. Ne nee kam ampo kên nõ incirre hamreare cakrô, mã Pahpâm te me pancwÿrjapê to amji kamhapac to ihhêj rûm, cute mehkên ton catêjê nõ. Ne cu Jeju me ajpên kam me pahhônco xà ata kôt ri, Pahpâm te me pahna amji caxàr, mâr cuajpêan kam ame papa, quê ha ahna ihcajuaw.

2 Corinti 6.1-18

Cu pahtÿj Pahpâm te me pahto impejti xà ata na me amji to pôj

6 ¹ Me ipê Pahpâm cahê na cumã me ijâpên catêjê ita kam, wa ha me awÿ, mâr ca atÿj Pahpâm te hàhcapria kam me ato impejti xà ata na me amji caxàr to impeaj ne. ² Ne pê ramã Ixaj xwÿ pê Pahpâm jarkwa na ihcakôc catê ata, ita na Pahpâm jarkwa kôt ihhêc to hane he:

“Wa, ate amji tehcajpar xà na me iwÿr xà atana,
me akam ijapac prâam kam ikrî.
Ne me apytâr xà jô amcro ata kam,
ite itÿj me apytâr” hane.

Mêr hôhõ, me ikampa. He ita kam ri pahte me amjipytâr xà na, me Pahpâm na me pajâhwÿr xà. He ita kam ri ramã pahte me amji pytâr xà jô amcroa kam hàhhuc.

Pê Pawró cupê catyt kam Pahpâm mã hàpên catê na amji jarê

³ Wa ite amji kôt me jûm te catyt kam ipa intête mehcahpêrkâr cupate, wa catyt kam me ipa, mâr quênee jûm, ite me ijâpên xà ton to me ipa ata na, ihcakôc kên nare. ⁴ He wa itÿj quêt me ipê Pahpâm mã me ijâpên catêjê itajê na me amã amji to me ipipê to me ipa. Gapacta ne me ikam me ato xa ne me ipupuhe:

Wa itÿj ampo kên me, ite amji pupun kêanre me, ampo te amji wÿr me ikrã jacjên itajê mã, itÿj me ijūcanâr to me ipa.

⁵ He hõtpê me icahhy, ne me ijacjê, ne me hàhtôa ne ihtÿj me ito kên prãmte me ikrã, ne ajpên wÿr me icapôr to me ipa cakrô, wa itÿjcatyt kam me Pahpâm mã apê.

- Ne wa itỳj me ijapên to tỳaj to me ipa.
 Ne wa hanea ne itỳj me ijikwa ne me ijõt xà kaj na, Pahpãm mã mehcajrên to me ipa.
 Ne hanea ne prãm na ame ipa cacrô, wa itỳj catyt kam Pahpãmmã ijapên to me ipa mã, me ijũcanãr to me ipa.
- ⁶ Ne wa ampo kên ton xà ata pê ampỳa mã me ipa, ne Pahpãm te amji kam hapac xà ri quêt me imã hahkre pej to prãm.
 Ne wa itỳj cute me ito kên catêjê atajê kam me icryc, mã me ijũcanãr to mentête amji jiprôn to me ipa. Ne quêt ijâhcapria kam, catyt kam me to amji kam ijapac to me ipa.
 Ne hanea ne ihtỳj Pahpãm Carô Pejti te me imã amji jôr, wa ihkôat me ipa.
 Ne hanea ne ihtỳj me imã mehcunea kîn, wa mehkiã kam me ipa.
- ⁷ Ne wa hanea ne itỳj me cumã Pahpãm jarkwa hêj xi nare ata jarên to me ipa.
 Ne hanea ne itỳj Pahpãm carôat kôt, me ijapên xà pihhoti catiaton to me ipa.
 Ne wa catyt kam Pahpãm te amji kam hapac xà pejti kôt me ipa xà ita to me icurê xwỳn catêjê kam pra ne toa me cupê amji pytà, ne me tohjê.
- ⁸ Ne ite me amã, ite amji kam me ijapac xà na amji jarên xà itajê, ihtỳj me ipê Pahpãm jarkwa na cumã me iprar catêjê impeaj na me ijarê.
 Mã mehkwy kwỳ ihtỳj me ito me icati, mã mehkwy me ito ijökrenô, ne me imã ipahàm to.
 Mã mehkwy me ito mehcajê to impejti,
 mã mehkwy me ito mehcajê kêanre.
 He me ito hajyr cacrô, wa nee itajê nõ na me toamji kam me ijapac nare.
 Ne me cumãa, me papê me pahhêj xi catêjê cacrô,
 wa itỳj catyt kam ihêj xi xà nare to icakôc to me ipa.
- ⁹ Ne me cumãa, nee me ipê jũmjê catihtu atajê nare cacrô,
 mã me hàhtôa mã pjêcunea kam me ijahkre pej.
 Ne me cumãa, wa ijõtpê amji to me ityc xà japên to me ipa cacrô,
 wa itỳj me amji to me ipijapar to me ipa.
 Ne ihtỳj me icahhyr to me ipa cacrô,
 nee cute amji mã me hamãr ne me ijipej nare.
- ¹⁰ Ne me imã amji kîn nare cacrô,
 hõtpê Pahpãm pyrên me ijakry.
 Ne me ipê ampo hamreare cacrô,
 wa itỳj ite, Pahpãm te amji kam hapac xà to, me hàhtôa ne me to hakràj.

Ne me ipê ampo pê pjê itatekjê jamreare cakrô,
mã hõtpê me imãampo pê cõjkwa tekjê atajê cunea.

Pê Pawrô hirã pê, ihcunea na, me cumã amji jarên pa

¹¹ Corinti jô krī kam me ikjêjê itajê, wa ite nee ampo na me apê amji to ipimxur nare, ne quêt hirãa pê me amã ihcunea na me amji jarên par. Ne itỳj imã me akĩnti ata to ite me amã ipipê. ¹² Ne imã me akian to me akĩn cakrô, mã nee ihhêj ne me amã me ikĩn nare. ¹³ Ne Jeju kôt ihhêj rûm me apê me ikra pyrãac. Ne imã me akĩnti ita jahpan xà na, hanea ne hipêr amã me ikĩn.

Cu ha nee me cupê Jeju na mehkwȳ nare atajê caca xà mã me paxàr nare
Epet 5.3-14; Tijac 4.4-5; 1 Petrô 4.1-6

¹⁴ Ne me apê Jeju to ate amji mã me ahimpej catêjê atajê, ca ha nee amji mã me Jeju to mehhimpej nare atajê me, me gâpên xà na ame ajpênpar, ne ajwar, ajpên cahê na me gâpên nare. Ampo na? Quê ha pijamã jũm krã impejti ne catyt kam ipa atajê me, jũm krã kên ne amjia kõtipa atajê me, ajpên cahê na me hàpên to me ipa? Hãpà! Jũ wỳr quê ame amji mã hamã ne ajpên cahê na me hàpên to me ipa. He xà quê ajkĩ ihtỳj amcro me awcapàtkô ajcacwa? Hãpà! ¹⁵ He xà ajkĩ ihtỳj Jeju Crixto me Xatanaj mã ajpên cajrên? Hãpà! Me cupê ajpên curê xwỳn. Mêr hõhõ, por jũmjê amji mã Jeju tomehhimpej to me ipa atajê, quê nee Jeju to amji mã mehhimpej nare atajê me, ajpên kam me ihhõnco nare, ne ajpên kaj na me ajpên kampa. ¹⁶ Quê ha pijamã jũm Pahpãm tĩr rohnỳtti mã ata jũrkwa wỳr pahpãm cahàc krekà tĩr nare ata to hỳrmã mõ, ne kam hãm? Hãpà! Jũ wỳr quê Pahpãm me, pahpãm cahàc krekà ata apu amji mã hamã, ne ajpên kôt amji kampa. Mêr hõhõ, Pahpãm Carõ Pejtime pajĩ caxwãm pê ihkrĩ ita kam, ihhêj rûm me papê Pahpãm tĩr rohnỳtti mã ata jũrkwapyrãac. He pê Pahpãm jarkwa to mehcakõc catêjê atajê me hàhtõa, ne ramã Pahpãm jarkwa na, hõ kàhhõc kam, ahna mehkhõc to hane he:

“Wa ha itỳj me cahê na ikrĩ, ne mehcotea na apu ipa,
ne pa amji to me hõ Pahpãm, quê ha me cupê me ikwỳ.

¹⁷ Na ca ha mehkrã kên catêjê te Pahpãm to amji mã mehhimpej nare
atajê pê me acato,
ne ajtea me cupê ampỳa mã ame apa.

Ne nee ca ha mehkhõc cute me ampo kên ton xà atajê nõ ton nare.

Ca ha me to hane, wa ha itỳj me ana amji caxàr to impeaj ne.

¹⁸ Na wa ha me Apãm Cati na amji to, ne me apê me ikra na me ato” hane.

Hõhõ, pê Pahhiti mehcunea jirõa pê carõt tỳjti ata, me ana amji jarên to hane.

CARATI JÕ PJÊ WÛR

Pawrô Jõ Kàhhôc

Ûhÿ, pê Pawrô pê Jeju jarkwa namemprar catêjê nõ, ne ma Carati jõ pjê kam Jeju na mehkwy mehkri atajê mã, pomcu me hõ kàhhôc cahyt ita kujate. Na pê hõ kàhhôc japyr ita pê Carati Jõ Pjê Kam Jeju Na Mehkwy Jakrã Mehkri Atajê WÛr, Pawrô Jõ Kàhhôc (Carati).

Ne ihkàhhôc ita kam, cute me cumã ihhêj xi catêjê cawpa to hajÿr he: “Nee hipêr me cute me Juta catêjê te amji kam me hapac xà wej tũm atakôt me ipa xà nare. Jũ wÛr quê Pahpãm pahte me pajàpên xà impejti ton itajê kôt, me pahna amji capa. Ne jũ wÛr quê me panquêtjê me, jũmcaca xà kôt me papa xà ita kôt, Pahpãm me pahna amji capa. Ne Jeju to quêt amji mã me pahhimpej, ne kam me pahhônco, mã cute me pamã pahteamji kam me pajapac xà intuwti jôr xà ita kôt, quê ha Pahpãm me pahna amji capa” hajÿr.

**Pawrô te amji kôt harên xà
Me Hàpên Xà 16.6; 18.23**

1 ¹⁻²Hàpà me ikwÿ pê Jeju na mehkwy, ca Carati jõ pjê kam ame akrĩ atajê. Ipê Pawrô, ne ipê Jeju jarkwa na iprar catê. Ne itea wa ijarkwahyr, mã ijarkwa kôt cute me amã ihkàhhôc ita ton. Ne Jeju jarkwa na iprar xà ita caxuw nee jũmjê xũmre te me icapi nare, ne nee jũmjê xũmre kôtPahpãm te icapi nare. Ne quêt Jeju Crixto me, Hũm pê Pahpãm te hacpyã mã to ihtĩr ata me ri ajwar ijàpên xà ita caxuw icapi. Ne ita ri Jeju kam ajpên to me pahte amji to me pahkjêjê kwÿ, icahê na mehkri itajê te me amã amji jarên kujahêc.

³Imã Pahpãm pê me pajõ Inxũ me, me pajõ Pahhiti pê Jeju Crixto te me ato impejti na me ato prãm. Ne cute me acaprĩ, ne me acaxwãm pê me acaxwÿn kam me amã me acarĩcti, impejti jôr to ipa na, imã me ato prãm. ⁴He Pahpãm mã me pahcunea pê mehkên ton catêjê, cwÿrjapê ri ihtÿjme pahkên mã me paxàr xà. Ne pê Jeju ihtyc mã amji gõ. Cute me pahkên mã me paxàr xà ata pê me pahto cator xà caxuw cumã amji gõ, mã me pancwÿrjapê ihtyc.

Mār quê pjêkam, cute me amji kam hapac xà kên ita pê me pahto cato. Hõ, ita na pê me Pahpãm pê me pajõ Inxũ Cati ihkra pê Jeju Crixto to prãm.

⁵Cwÿrjapê ri imã amcro cunea kam me pahte Pahpãm mã me:

— Mehcunea jirõa pê quêt acatihti, ne apejti rohnÿtti mã — hajÿr to prãm. Ampeaj kam!

Cu ha cute me pamã ihhêj catêjê par nare

Roman 16.17; Coroxo 2.8; 2 Petrô 2.1-3

⁶Pÿhàpà! Mã ajte xãmte ramã me ate, pê Jeju hàhcaprĩa kam amji kõt Pahpãm wÿr pry ata kõt me ana ahwÿ, ca ihkõt me amõr cahtiri, ramã ate me cumã hikran! Pê Pahpãm Jeju te amjikam hapac xà na ihkõt me amõr prãmte me ana ahwÿ, ca ihkõt me amõr cahtiri ihhêj ne ramã ate me cumã hikran! Ne ajte ita caxuw Pahpãm wÿr ajteare mã, me amã jũm te amji kam hapac xà nõ ita kõt ame apa. ⁷He xà ajkĩ ampeaj kam me Pahpãm wÿr pry jãhtõ? Hãpà! He Jeju te amji kam hapac xà ita pê ri pry pyxit peaj ata, Pahpãm wÿr. Wa ite curijũmjê itajê te Jeju te amji kam hapac xà tète ame girên to me ipa na me garên par. Ne cute me amã ampo to hahkre xà atajê kõt ri, me akrã cunĩ pit. Neihÿtÿj Jeju te amji kam hapac xà pejti ata to me amã ihhêj to me ipa. ⁸He imã jũm te Jeju ràn xà na ajteare mã me amã ampo kên to hahkre catê atajê to, Pahpãm te Xatanaj jõ cuhy catia ata kam, mehkên mã me mên rohnÿtti mã na, me to prãm. Wa ha meite mãn Jeju ràn xà na ajteare mã me amã ampo to hahkre na, wa ha itÿj Pahpãm te me ito kên na, imã amji to prãm. Ne quê cõjkwa pĩn Pahpãm mãmemprar catê nõ wrÿ, ne Jeju ràn xà na, ajteare mã, me amã ampo to hahkre na, quêha ihtÿj imã Pahpãm te cuhy catiaata kam ihkên mã mên na, imã to prãm.

⁹He pê wa mam me amã ampo to hahkre, pê ca ahna me amji capa ata ràn xà na, xà wa ha ajkĩ hipêrajteare mã ihkaj na me amã ampo to hahkre? Hãpà, wa ha hipêr me amã ite to hahkre xà atajê to pit mã hahkre. Ne quê ihhêaj to jũm ita, Jeju ràn xàna, ajteare mã me amã ampo to hahkre ata ri, imã Pahpãm te cuhy catia kam ihkên mã mên rohnÿttimã na, imã me to prãm.

¹⁰Ne por ame amã ihhêj to ipa, ca kam me akrã cunĩhti atajê ri, ito meamã ihhêj to hane he:

— Por Pawrô me amã ampo to hahkre atajê kõt hamreare. Ne ate mehkĩn prãmte ri ame amã ihcakõc to ipa — hane. Wa nee meate me ikĩn prãmte ame amã icakõc nare, ne quêt Pahpãm te ikĩn prãmte, wa ame amã icakõc. Wa pjê ita kam ite amji to mehcajpuaw prãm na mã, wa ha nee cumã ijàpên xà, pê Jeju mã iprar catê ita, mã ixàr nare.

Pê Jeju harkwa na imprar catê na Pawrô xãm

Me Hàpên Xà 26.9-20

¹¹⁻¹²He por atajê te hanea ne, pom ite me amã ampo to hahkre xà itajê, nee Pahpãm pĩn cator nare na me harê. Cwÿrjapê Jeju kam me ikjêjê, wa

ha ita cunea na me amã amji jarën to capô partu ne. He wa nee ite ikrãa kamita to amji kam ijapac, ne ame amã harën nare. He nee jüm xümre te me caxuw imã hõr nare, ne nee jümjê te me caxuw imã ita to hahkre nare. Ne Jeju Crixto te ri imã itajê cunea jahkre pej na iton, ne imãipêr.

¹³He pê ca ramã me ijarën pa, pê wa ajco mam Juta catêjê te amji kam hapac xà kôt ipa xà ata kam, pê wa ajco Pahpãm na mehkwy jahkre kêt kam, ijãprêa kam ipa. Ne cute me amji pupun xà kêanre na me ton to ipa. Ne ajco ite me to hamre prãmte ihcunea na me ton to ipa. ¹⁴Ne pê wa amcro atajê kam, ajco me ikwy pê Juta catêjê te amji kam hapac xà kam, me ikwy pê ajkam me icati jirõa pê catyt kam, me iquêt xwypê Mojxe te me hapackrexà kôt ipa. Ne pê wa ajco me iquêtjê caca xàa kôt, caxwãm catia mã, catyt kam ipa na ajco amji to ahcukij.

¹⁵He pê wa cormã ipým nare kam, pê ramã Pahpãm hàhcaprĩa kam amjia kôt amji mã icapi, ne ina ahwy, cumã ijãpên prãmte. ¹⁶Wa ite mehcahkrít pê, por me cupê Juta catêjê nare atajê mã, Jeju jarën, ne ipêrprãmte, pê Pahpãm imã ikra jahkre ne imã cupê. Ata caxuw pê wa nee jüm xümre wýr ipicahur nare, cute imã Jeju te amji kam hapac xà to hapackre prãmte. ¹⁷Pê wa nee hanea ne Krípinkrên wýr itêm, ne mam, icumam me cupê Jeju jarkwa na memprar catêjê atajê nõ cukij nare, cute imã Jeju te amji kamhapac xà to hahkre prãmte. Ne ma cama Põcapryhti jõ põtí kam me hamreare ata wýr itêm pyrentu. Pê curia Jeju imã cute amji kam hapac xà to hahkre, jirõ pê mã wa ma, Tamatcõ jõ krí wýr ite amji jaxàr.

¹⁸Ne pê wa Krípinkrên wýr itêm nare to amji to caku to incrê, jirõ pê, pê wa cormã Petrõ pupun. Ne cumã icakõc prãmte Krípinkrên wýr tẽ, ne icato, ne curia cahê na amji to putwry jíkjê to hamre. ¹⁹Pê wa nee Jeju jarkwa na memprar catêjê nõ pupun nare, ne ite Tijac pê Jeju tõ te amji to hapu na kjê atame, Petrõ pit pupun. ²⁰He ampeaj kam wa Pahpãm kam mare mã, me amã awjarê, pom wa ampo cuneato awjarê itajê, nee mã ihêj xi nare, ne ampeaj kam pê Jeju imã to hahkre. ²¹Pê wa Petrõ pupun jirõ pê, ma Xiri jõ pjê me, Xirixij jõ pjê kam amehkrí atajê kwý kôt apu mõ.

Pê Jeju Pawrõ te amji kam hapac xà cunea to antuw

²²Ne pê amcro atajê kam, nee Juta jõ pjê kam JejuCrixto na mehkwy atajê me jahkre pej, ne mento jãa to me ipupun nare. ²³Ne pê cama ajco me cumã me ijarën to hane he:

— Por pê Pawrõ ajco Jeju to amji mã me pahhimpej tète me pahcahpêrkà ata ri, ita caxuw ihtýjmehcunea mã, cute amji mã Jeju to mehhimpej na me ton to ipa — hajýr na cute me ijarën par. ²⁴Ne cute me ijarën par xà ita kôt ri, ihtýj Pahpãm to amji mã me hàmnãn to me ipa.

Pê mam Jeju jarkwa na memprar catêjê atajê Pawrõ pejti na harê

Me Hàpên Xà 15.1-11

2 ¹⁻²Ne ina caku te cwatõxi jirõ pê mã, Pahpãm te hacpyã mã Krípinkrên wýr itêmto imã hũjarën, wa ite impar, ne ma amji jaxàr.

Ne ma amji kôt Parnap me Tito pê Crec catêjê nō ata me, me pra, ne curi me icator. Ne ite Jeju namehkwÿ jō pahhi catêjê pit me, me cuprôn, wa ite me cumã mehcahkrit pê Juta catêjê nare atajê, mã Jeju jarên xà atajê cunea na, amji jarên. Neampo na wa ite cumã catyt kam amji jarên to hajÿr? Ihtÿj ame ite amji kam ijapac xà ita kôt hamreare na mehcamjÿ cupate, wa ite me cumã harên par. ³⁻⁵Mã cute me, ite me cumã harên xà ita na me ipar, ne ahna me cumã impejti. Mã ikôt mehkwy cator atajê te me cupê Jeju na mehkwy na me cumãamji jarên. Ne hamreare, imãa cama ame cumã mehhej. Ne ampo na ri curi me cator? He cama cute ame ikôpÿr prãnte, mōrmō wa ajkÿ Juta catêjête amji kam me hapac xà me, Mojxe xwÿ te me hapackre xàa kôt, ajkÿ me mō. Mã cute ahna me ipupun prãnte, curi me cator. Ne cute me ikôt mōr catê pê Tito pupun, mã nee cupê Juta catêjê nō nare, na pê neeme ipê Juta catêjê caca xà kôt amji mã impy kà kwÿ jakep nare. Cwÿrjapê ri me imã:

— Ampo na mã ca me pancaca xà to pahte me amji pyrãc xà kôt, nee ate me Tito mã impy kà kwÿ jakep nare? Me imãa, me cupê Jeju na mehkwy cuneate hanea ne ihtÿj me panquêtjê te amji kam hapac xà to, cute me amji pyrãc xàatajê cunea kôt me ipa xà — hajÿr. Wa nee ite me kam ijapac nare, ne cama, ma ame amji pê cute amji kam me hapac xà ita cunea curê. Ampona? He wa nee me iquêtjê caca xà itajê me, Jeju te amji kam hapac xà impejti ita to me ipicacwÿr prãm nare. Ampo na? He Pahpãm te amji kam hapac xà impejti ita kôt ri, me apa na imã me ato prãm. Xà Jeju namehkwÿ jō pahhi catêjê atajê te ajkÿ Tito mã impy kà kwÿ jakep na, me imã hÿjahkre? Hãpà! Nee cute ahna me imã hÿjahkre nare!

⁶Mã Tijac me, Petrô me, Jowãw pê Jeju na mehkwy jō pahhi catêjê na cuteme imã harên atajê te nee, ite ampo to ihcupan xà nō mã cator nare. Na ri nee cute me, ite amji kam ijapac xà ita jirô pê, me imã ampo jarên, ne tomehhimpej nare. Ne me cupê Jeju na mehkwy mã ihtÿj amji mã me hÿmre itajê cupa to me ipa, ne me ajpên mã:

— Pê me hÿmre itajê mento jãa to me Jeju pupu, cwÿrjapê ri me hÿmrecunea jirô pê me cati — hajÿr. Wa nee ampo ita to amji kam ijapac prãm nare. Ampo na? He Pahpãm mã me pahcunea jahkre pej pejtu, ne cumã me pahcunea pipên pit. ⁷Ne me cupê pahhi catêjê atajê mã ijahkre pej, Pahpãm te ite mehcahkrit mã, Jeju te amji kam hapac xà jarên catê na, cute ixãm na me ijahkre pej, ahnaamã cute Petrô, pê me cupê Juta catêjê mã Jeju kôt harên catê na hãm he.

⁸Pê Pahpãm mehcahkrit mã, ite Jeju jarên xà caxuw, imã ikrã kre te amji jahkre pej xà gō. Ne hanea ne me cupê Juta catêjê mã Petrô te Jejujarên xà caxuw cumã ihkrã kre te amji jahkre pej xà gō. ⁹Ne wa ite Jeju na mehkwy jamãr catêjê atajê me, Pahpãm te me imã ijapên xãjōr ata na me ajpên par pej jirô pê mã ri, cute ahna Parnap me ijahkre pej, ne mehkwy kam mare mã, cuteme imã:

— He cu me pahcunea Pahpām mā hāpên xà pyxít peaj ita to pit mā me apê. Ne me atekjê pê, mehcahkrit jô pjê kam me ipa atajê mā, ate me Jeju jarên xà. Ne me pa, wa ha me cupê Juta catêjê jôpjê kam ame ipa atajê mā Jeju jarê. ¹⁰Ne cormã ampo ata pyxít peaj ri, ate ton xà. Nee mā ampo nare, he ita ri Krîpinkrên kam Jeju na mehkwyê pê, me pahkwý kwý mehkri itajê pê ampo hamreare, na caha ihmat ri pjê nōa kam, me pahkwý mehkri atajê mā me harê, mār quê me harên pa, ne ajpên me cumã ampo kujate — hajÿr. Wa ite me kam ijpac, ne me cumã:

— Imã ri quêt ita ton to prãm to prãm rohnÿtti mā — hane. Ne ite me ajpên par jirô pê mā, wa ma hacpÿ mā Antijoc jô krî wÿr me pra.

Pê Pawrô Petrô te to ihcupan xà jarê

Roman 3.21-23; 6.1-14

¹¹⁻¹²Ne jũ mā me ina amcro te, mā ma Petrô Antijoc jô krî kam me iwÿr tẽ, ne curi cute to ihcupan to hajÿr he. Pê ajco Petrô Antijoc jô krî kam, mehcahkrit pê Jeju na mehkwyê cahê na ihkri, ne ajcoapà, me cupê Juta catêjê te amji kam hapac xà kaj na. Ne Pahpām mā, nee ita na ihkaj na nare. Ampo na? He Pahpām mā me pahcunea pipên pit. MãTijac cormã Krîpinkrên kam ihkri, ne cute Petrô wÿr jümjê itajê kujahêc, cute me hõmpun prãmte. Mã curi me cator, mā Petrô te mehõmpun, ne taa amji mā:

— Wa ha mehcahkrit itajê cahê na ijàpàn kam to icrà, quê ha me hũmre itajê me ipupu, ne me amji jaxà, ne me ijarê, quê ha ahna me kam ipahàm — hajÿr. Na ri cute mehcahkrit atajê cahê na hāpànjicu, ne me cupê ampÿa mā hÿr, ne ahte jÿ ne apà. ¹³Mã hanea ne Antijoc catêjê kwý pê Jeju na mehkwyê pê Juta catêjê te me hajÿar, ne cuteme amji to caprâr, ne Petrô kôat, nee hipêr Jeju kam ajpên to mehkjêjê, ne mehcahkrit atajê cahê na amehàpàn nare. Mã hanea ne Parnap te hajÿar, ne cute amji kam me hapac xà kên ata kôt, mehcahkrit atajê mā hikran.

¹⁴Wa ite, cute me Pahpām jô pry pejti ata cupan na, me hõmpun pyrentu, ne me kam mare mā, Petrô kuc ri, cute to ihcupan ita tète cumãn to:

— Pÿhàpà! He apê Juta catêjê nōa cacrô, ca nee ajte catyt kam ihcunea na Juta catêjê caca xà kôt apa nare! Mêr ampo na mā ca Juta catêjê caca xà kôt mehcahkrititajê ton to me apa to prãm? Nee ate me hajÿr xà hamreare! — hajÿr.

Pê Pawrô Juta catêjê mā ahna ihkôt harê

¹⁵Ne curi me cupê Juta catêjê pê Jeju na mehkwyê, me jÿ atajê mā, ite ihcunea na ihkôt harên to hajÿr he:

— He me pahpÿpÿm xà kôt ri, me papê Juta catêjê impeaj, ne nee me papê ampo kra cahkrit pê Pahpām te to ihhimpej xà jahkre kêatre atajê kwý pyrác

nare. ¹⁶⁻¹⁷He me pamã Pahpãm te, nee Mojxe xwÿ te me hapackre xà kôt me ipa atajê na, cute amji caxàrnare na, me hahkre pej. Ne quêt Jeju Crixôtô to amji mã mehhimpej xà ata kôt ri, Pahpãm me ahna amji to pôj. He me papê Juta catêjê me, mehcahkrit atajê me, me Pahpãm mã me pahcunea pê, me to ihcupan catêjê. Nãmri quê ha mehcahkrit atajê te amji mã Jeju to ihhimpej na, quê ha Pahpãm mã jũmjê atajê impejti ita na. Ne me papê Juta catêjê te mehajÿar. Na cu ha hapac xàa kôt, me ajpênto me papicokjêr jicu, ne mePahpãm te amji kam hapac xà pejti ita kôt pit mã me papa. Quê ha jũm ahna me pahpupu, ne me pamã: “Pÿhàpà, me imãa, ca ihhêj ne ate me Jeju Crixôtô teamji kam hapac xà ita cryc, me papê Juta catêjê te amji kam hapac xà jicu, ne ate me hünâr, ne hamre ate me to ihcupan. Cwÿrjapê ri Jeju Crixôtô te, meate me to kên na me aton” hajÿr. Me ikjêjê, he mehcahôc xà ita kêanre. Xà quê ha pijamã Jeju Hũm pê Pahpãm te amji kam hapac xà kaj na, mepamã ampo kên to hahkre? Hãpà! ¹⁸Ita ri, imãa ihcupan he. Ca ha me pancaca xà kôt hamreare ata mã me hikra, ne impej wÿr me apkjê, ne ana ahtũm, ca ha hacpÿa mã, mam me acacaxà kôt hamreare ata wÿr me apkjê, ita na ri ihkaj na.

Cu ha nee jũ caxuw Jeju te amji kam hapac xà pejti jicu nare

¹⁹⁻²⁰ — Jũ wÿr cu ha me pahnô Mojxe xwÿ jô kàhhôc kam, menquêtjê japackre xàcunea kôt, catyt kam me papa. Cwÿrjapê ri Pahpãm mã me pahcunea kêanre, ne ihhêj ne me papê jũmjê te ihkên ton jahpan xà na ihtyc to prãm atajê pyrãac. Cu ha ihcunea na catyt kam me papa na mã, quê ha nee me pancwÿrjapê Jeju ihtyc prãm nare. Na pê Jeju amjia kôt me pancwÿrjapê ihtyc mã amji gô ne ty, na cu ha pahtÿj ihtyc xà ata kôt amji mã to me pahhimpej. Ne amji mã ihtyc xà ata to me pahhimpej xà ata pê ihhêj rũm cahê na me pahtyc. Cwÿrjapê cu ha neehipêr, pahte amji to mehcajpuw prãm to ame papa nare. Na pê Pahpãm kra mã me pahkĩn, pê me pancwÿrjapê ty, ne cute me pamã amji jôr, neme pahcaxwãm pê ihkrĩ, ne catyt kam ihkôt me papa xàcaxuw, cute me pamã carôt jôr. ²¹Ita kam, xà wa ha ajkĩ Jeju te amji kam hapac xà jicu, ne hacpÿa mã me iquêtjê te amji kam hapac xà wÿr apkjê ne hünã? Hãpà! Wÿr waha hicu!

— Pê Pahpãm Mojxe xwÿ mã hõ kàhhôc kam Juta catêjê mã, cute mehapackre xà gô ata, nee Pahpãm te ihkôt me pahna amji caxàr xà caxuw impejnare. Quê ha caxuw impej na mã, quê ha nee Jeju ihtyc prãm nare. Ne ampo caxuw ri impej? He cute me pahkên na me pajarên, cu pahte me hahkre pej, ne Jejuwÿr me papipkjêr xà caxuw ri impej. Ne Jeju pê Pahpãm kra ata kôt ri, me pahna amji to pôj — hane. Hõ, pê wa me cumã harên to hane.

Quê ha Pahpãm nee me pajapên xà impejti kôt mepahna amji to pôj nare

Carati 5.16-23; Tito 3.4-7

3 ¹Pÿhàpà, ca Carati jô pjê kam me akrĩ itajê, ca ihhêj ne ame ato kam waj. Ampo na? He ihhêj ne me apê amji jahkre kêatre. He ihhêj ne jũmte me ato hy. Mâr pê wa hirãa pê me amã:

— Me pancwÿrjapêa ri pī kam Jeju tyc — hanena harê ta? Nō na mǎ ca, Pahpām te me ana amji caxàr prāmte hacpÿa mǎ menquêtjê caca xà wÿr ate me amjijaxàr? ²Xà pê ca Mojxe xwÿ caca xà kôt me apa xà ata kam, xà pê hōtpê ajco Pahpām Carō Pejti me amǎ amji gō? Hāpà, nee pê me amǎ amjijōr nare. Ne quêt me ate amji mǎ, Jeju jarēn par ita kam, amji mǎ me to hajÿr, ne amji mǎ me to ahimpej xà kôt ri, Pahpām Carō Pejti te me amǎ amji jōr.

³Pÿhàpà, ihhêj ne me apê mehkrā nare catêjêpyràc. He pê ca Jeju toamji mǎ me ahimpej kam me to atēm xà ata kam, pê Pahpām me amǎ amji Carō Pejti gō, mǎr ca, carôat kôt, ihkôt me apa. Hō, pê ca amji mǎ me to ahimpej kamto atēm to hane. Nō na mǎ ca ita caxuw ihhêj ne Mojxe xwÿ caca xà wejti ata kôt, ate me to ihkrā curan to prām to mǎ, ca hÿrmǎ me apipkjêr? Ne me carôat kôt mehkrā ame apa prām. ⁴He xà ajkī ihcaprÿ na Pahpām Carō Pejti te ramǎ me ate amji kam me gapac xà tuw pejti ato ipijapar toiryti to hajÿr? Hāpà, imǎ nee cute ahna hajÿr nare! ⁵Pê Pahpām amji Carō Pejti kôt, ihcunea na, me amǎ ate amji jahkre pejti gō. Ne cute me akam hāpên xà catia ton atajê to, cute amji carôto ipipê, mǎr quê mehcunea me hōmpu, ne me akwÿ kam carôt ata jahkre pej. He xà ca ajkī, Mojxe caca xà wejti kam, ate me atēm xà ata kôt mǎ, ame atohane? Hāpà! Ne mēr ampo na mǎ cute me ato hajÿr? Nee mǎ ampo na nare, he me ate me Jeju jarēn par xà ata to amji mǎ me ahimpej na ri, cute me ato hajÿr.

Pê Aprǎw Pahpām to amji mǎ ihhimpej, na pê ahna amji capa

Roman 4.1-25

⁶Ca me iquêtswÿ pê Aprǎw to me amji japackre! He xà pê ajkī catyt kam ipa, ne nee jū caxuw ampo kên ton nare cwÿrjapê pê Pahpām ahna amji capa? Hāpà. He pê Pahpām Aprǎw mǎ:

— Ate amji mǎ ito ahimpej, cwÿrjapê ri imǎ apê catyt kam apa catê — hane. ⁷Cwÿrjapê ri mehcunea amji mǎ me Pahpām to ihhimpej atajê pê Aprǎw tǎmxwÿa pyràc.

⁸Pê rÿ pêa mǎ Pahpām amji mǎ:

— Wa ha itÿj jū caxuw pjê kam mehcahkritmehkrī atajê te amji mǎ ito mehhimpej xà ata kôt, me ahna amji capa — hane. Cwÿrjapê pê Aprǎw xwÿ mǎ:

— Acwÿrjapê wa ha pjê cunea kammehkrī atajê cunea to impejti ne — hane. ⁹Mǎ Aprǎw te Pahpām to amji mǎ hajÿr, cwÿrjapê ri cute ahna amji caxàr ne to impejti. Cwÿrjapê quê ha Aprǎw cuxà mehcunea te Pahpām toamji mǎ hajÿr na, quê ha ihtÿj Pahpām me ahna amji to pōj, ne me to impejti ne.

Jū wÿr cu me panquêtjê caca xà kôt me papa kôt Pahpām cajpuaw.

¹⁰Quê ha me pahnō amji mǎ:

— Wa ha Mojxe xwỳ te me hapackre xà cunea na ihkôt amji kampa, quê ha Pahpām ihtỳj ina amji capa — hajỳr na, quê hataa, amji curê capa. Ampo na? He jũ wỳr cu me pahnõ Mojxe te me hapackre xà cunea kôt hakop, ne nee ihnõ to gapac kêt nare. He pê ramã Pahpāmhõ kàhhôc kam amji mã Mojxe caca xà kôt me ipa catêjê crôn to hane he:

“Quê ha jũm te, amcro cuneakam ite Mojxe mã ijarkwa jirên mã cute ahna ihhôc ata kam hapac nare na, wa ha itỳj apu kamicryc, ne apu cucrô. Quê ha cama pyxit peaj ne to hapac kêt cakrô, wa ha itỳj hahpan xà na apu to kên” hane.

¹¹ Pê ramã rỳ pêa mã Pahpām jarkwa to ihcakôc catê japyrỳ te Hapakuc ita Pahpām jarkwa kôt hõ kàhhôc kam, ita na ihhôc to hane he:

“Quê ha hajũm ito amji mã ihhimpej na, wa ha to amji kam ijapac to, cupê jũ caxuw jũm te icuna mã ampo kên ton nare catê ata rohnỳtti mã. Na wa ha itỳj ahnaamji capa, quê ha icahê na icarôt kôt ihtĩar na ipa rohnỳtti mã” hane.

Ne cute harên xà ita kôt, cu ramã pahte me amji jahkre pej. He jũ wỳr quêha Pahpām pahte Mojxe xwỳ te me hapackre xà kôt me papa xà ita kôt, me pahna amji capa. ¹² He Mojxe te me pajapackre xà ata, nee me pahte Pahpām to pahte amji mã me pahhimpej na me pahton nare, ne ajte me pajapên xà na, pahte amjito me hajỳr na pit mã me pahto. Ampo na? Pê ramã Mojxe ampo itajê na Pahpām te cumã amji jarên xà na, hõ kàhhôc kam ahna ihhôc to hane he:

“Quê ha jũm te ite me cumã ijarkwa jirên xà itajê cunea to amji kam hapac to ipa, ne nee jũ caxuw ihnõ to hapac kêt nare na, wa ha itỳj ahnaamji capa, quê ha icahê na ihkrĩ rohnỳtti mã” hane.

¹³ Nãmri quê ha me pahnõ te Mojxe te me hapackre xà ita jirô pê ihpỳmna, quê ha taa amji curê capa, quê ha Pahpām ihkên mã cumê. Ne jũ wỳr cu me pahnõMojxe te me hapackre xà atajê cunea kôt me papa. Cwỳrjapê cu ha mepahcunea Pahpām mã me amji curê capa. Na ri Jeju te ita na me pajahkre pej, ne me pajaxà kam pĩ kam ihtyc. Ne ihtyc xà ata te ri me pahcurê pê me pahcaxàr. Ne Pahpām jõ kàhhôc kam, ramã cute ita na harên to hajỳr he:

“Ne por quê ha jūm pī kam ajêť ne ty,
ata to, pê Pahpām ramã amji mãincrôn hiahpuro,
ne toa cute curê mã mên” hane.

¹⁴Ne mēr ampo na pê Jeju pī kam ty? He nee mã ampo na nare, por pê Pahpām Aprãw mã ampo catia to awjahkre ata, quê ha Jeju Crixťo tyc xàata kôt, hanea ne me apê mehcahkrit mã hōr xà. Mār cu, me pahcunea, Pahpām te me pamã Carō Pejti to hūjahkre ata cwa. Ne Jeju Crixťo to pahte amji mã me pahhimpej cwyrjapê, quê ha me pamã cugō.

Pê Pahpām ampo to hūjahkre ata, ampo cunea jirōa pê irohnŷtti mã
Roman 3.19-20; 5.20-21; 11.32

¹⁵Jeju kam me ikjêť, wa ha hirãa pê me amã ampo ita kôt harê, mār ca me kam gapac to impeaj ne. Cu ha me pahnō ajkrut ne ampo na ajpên pa, ne to amjimã awjahkre, ne ahna amji xãm jirō pê, quê ha nee jūm hipêr ampo ata to ipicamên ne to ipintuw nare. ¹⁶Pê Pahpām Aprãw xwŷ mã ihtãmxwŷ to awjahkre. Ne pê Pahpām hō kãhhōc kam, nee ita to hūjarên to: “Mehtãmxwŷ” hajŷr nare, pê neeme hàhtōa to hūjahkre nare, ne quêt Pahpãm hō kãhhōc kam ita jarên to: “Ihtãmxwŷ” hane. Ampo na? He Aprãw xwŷ tãmxwŷ pyxit peaj pê Jeju Crixťo ata to, pê awjahkre. Ne me papê Jeju kam pahte me ajpên hōncō catêť mã ri, hanea ne cute to hūjahkre xà ata. ¹⁷Ne ampo na mã wa ame amã ijūjarên to hane? Nee mã ampo na nare! Pê Pahpãm rŷ pēa mã Aprãw me, ihtãmxwŷ mã, ampo catia to awjahkre ata na, ramã caku jãhtō te cwatxēnta ne ihkôt cute trĩnta jirō pê, pê Pahpãm Mojxe mã ajteare mã cute amji kam hapac xà gō. Ne curmã Mojxe te me hapackre xà tuwti ita, quê nee rŷ pēa mã Pahpãm te Aprãw me amji ton na, me ajpên par xà ata to hamre nare.

¹⁸He me amã ihhêj catêť atajê ri me amã ihhêj to hane he:

— Cu ha nee Mojxe xwŷ caca xà ata kôt me papa nare na, quê ha nee Pahpãm mepamã cute ampo to hūjahkre xà ata jōr nare — hane. Ne cute harên xà ata hêj xia to hêj xi. Ampo na? Quê ha ita pê ampeaj kam na mã, quê ha ihtŷj Mojxe teme hapackre xà ita, Pahpãm te amji kam hapac xà to, cute me pamã hūjahkre xà ita to hamre. Ne nee ita te hajŷr nare, ne cute Aprãw xwŷ mã to hūjahkre xàata kôt, amjia kôt to impejti.

Pê Mojxe jō kãhhōc ita, pahte me to ihcupan xà to me pamã ajpê

¹⁹⁻²⁰Pê Pahpãm Aprãw me pit mã ajpên pa. Ne nee pê Pahpãm hŷrmã jūm kujahêc, pê cumã hūjarên nare. Pê Pahpãm Aprãw kuc ri cumã awjarê, ne cume ajpên pa. Ne Mojxe nare, pê nee Pahpãm to hajŷr nare. Pêcōjkwa kam cumã memprar catêť mã, cute amji kam hapac xà ita gō, pê ma Mojxe mã cugō, pê ma Mojxe to me cupê Juta catêť japackre. Caihhêaj to me anō amji mã:

— Ampo caxuw mã Mojxe te me pajapackre xà ita pej? — hane. Ỹhỹ, wa ha me amã harẽ. He mehcunea te Pahpãm te amji kamhapac xà jirô pê mehpÿpÿm na, cute me hahkre pej xà caxuw ri, cute me hapackre xà ita. Ne cute me hapackre xà ata to me amji japackre ita na, mã ahnaa Aprãw tãmxwÿ pê Jeju Crixto ata cator. Ne nee cute meMojxe te me hapackre xà ata to pit mã, cute hipêr me amji kam hapac xà nare.

Mojxe caca xà ita nee Pahpãm cahê na me papa na me pahton nare

²¹Ca ihhêaj to me anõ ita kampa, ne amji mã:

— Pÿhàpà, he ihhêj neMojxe te me hapackre xà ita, Pahpãm te Aprãw me ajpên par xà ata kaj na — hane. Co he! Nee ca amji mã harên to hajÿr nare. Ampo na? He Mojxete me hapackre xà ita hõtpê impej cakrô, quê nee Pahpãm cahê na mepahfîr rohnÿtti mã na me pahton nare. Quê ha cute mãn me Pahpãm te me pahna amji caxàr na ton na, cu ha nee hipêr ihnõ na mehprãm nare. ²²He ramã Pahpãm te, me pahcunea te hõ kãhhôc kam pjê cunea kam, me pahcunea te meharkwa jirô pê me pahpÿm na, me pajarên. Ne me pahte amji kam me pajapac xà kêanre itajê pê ihhêj rûm me pajô pahhi, mã me pahcunea to ihhimpej. Ne ma me pahte ampo pej ton tète me pajiprô. Ne cute me pajiprôn xà ita pê ihhêj rûm cute me pahcajpre. Ne ampo kên ton na ri ihtÿj me pajamã. Cu ha quêt Jeju Crixto to amji mã me pahhimpej, quê ha me pamã me pahcajpre ata pô, cu ha pahtÿj Pahpãm te me pamã ampo pejti to hÿjahkre ata cwa.

Pê Mojxe te me pajapackre xà ita ri, Jeju cator jikaj xà me pajamã

Roman 10.4

²³Ne mam Mojxe te me hapackre xà ata pê ihhêj rûm krãhtarea, ne ma cute ampo kên ton tète me hiprôn to hãm ita kam, mã ahnaa Jeju cator, mã cute hÿhkra mã me haxàr, mãr quê Jeju to amji mã mehhimpej. ²⁴Ne pê ihhêj ne me cupê me ahkrarea, na pê Mojxe te me hapackre xà ata, cute me ampo kên ton tète, ma mehcahpêrkàr to ipa ita na, mã ahnaa Jejucator. Mã cute to amji mã mehhimpej, mã Hÿm pê Pahpãm te me ahna amji caxàr. ²⁵Ne hamre, cu ramã Jeju to amji mã me pahhimpej ita kam, quê nee Mojxe te me hapackre xà ata me pahto ihhimpej nare.

Pê Jeju kam pahte me ajpên hõnco, na ri me papê Pahpãm kra

²⁶Ca Jeju Crixto to me ate amji mã me ahimpej, ne kam me ajpên hõnco, na riPahpãm te me acunea to amji kra. ²⁷Ne me pahcunea te cô to me amji cumrãr, me Jeju kam pahte me ajpên hõnco atajê pê ramãhÿràac, ne cuxà cute amji kam hapac xàa kôt me papa. ²⁸He Jeju kam ate me ajpên hõnco ita kam, ajpên kam me pahpyxit peaj. Cwÿrjapê ri Pahpãm mã, me ipê Juta catêjê me, me apê mehcahkritme, me pahcunea pipêan. Ne me hõ pahhi

catêjê jarkwa kôt cama me hâpên catêjê me, amjia kôt me hâpên catêjê me, me apipêan. Ne hanea ne me hũmre me, pyjê me, me apipêan, ne nee jũm pê ajteare mã nare. ²⁹He me apê Jeju tekjê ita kam ri, Jeju kôt me acunea pê Aprãw tãmxwã. Cwÿrjapê ca atÿj, por pê Pahpãm Aprãw mã ampo to awjahkre ata, ca ha atÿj me acwa.

Mojxe te me hapackre xà nee hipêr me pahto ihhimpej nare

Roman 8.14-17

4 ¹⁻²Ita caxuw, wa ha hipêr me amã ite ihkôt harên xà ata kôt harê. Xà quê ajkĩ jũm, ihkra incirre, ne nee cormã mehapôn catê himpej xàkam ihkà nare, ne cormã amji jahkre kêatre ata mã, pijamã hàhcukrêj atajê cunea gô, quê to hõ tekjê? Hãpà! Quê ha cama cumã:

— Apê ikraa to ikra, ne cama cormã acirre, ne ate amji jahkre kêatre. Na ca ha ma me acapôn catê krac ri axà, ne atÿj ijâpên xà na itehcajpar toapa, ne ihhêj rũm apê cama imã gâpên catê. Ne jũ caxuw akà, ne amji jahkre pej, wa ha hacpÿ ne me acapôn catê pê gaprô, ne cormã amã ijâhcukrêj gô, mãr ca caa, amjia kôt hamãr to apa — hane.

³He pê mam me papê hũmre kra ata pyrãac, ne pahte me amji kam me pajapac xàto pahte me amji pyrãc xà pê me pahcapôn catê te amji kam hapac xà ata krac ri ame papa, pê ajco taa, me pahto ihhimpej. Na pê cute me pamã ampo cawpa xà atajê hàhtôa to hàhtô, ne pê hanea ne ampo carô te amji kam hapac xà atajê, ajco me pahto ihhimpej. Ampo na? He cu cormã nee me pahte catyt kam, Pahpãm jarkwa jahkre pej nare. ⁴Mã Pahpãm te, me pahto cumã ihkra xũmre ata pyrãac, ne cute me pahcapôn catê ata pê me pahcaxàr, cute ahna amji mã amcro hyr xà atana. Cwÿrjapê pê, intête me pahcaxàr xà caxuw me pahwÿr ihkra pê Jeju kujate, pê me hũmrea na amji to, ne Marij mã ihpÿm, ne Mojxe te me hapackre xà himpej xàkrac ri ipa. ⁵Mãr quê Mojxe te me hapackre xà nee me pahto ihhimpej nare. Ne Jejua kôt, cu ha quêt Pahpãm krac ri me axà, ne ihkôt me papê Pahpãm kra, ne pahÿjamjia kôt ihkrac ri ame papa.

⁶Mã Pahpãm te me pamã ihkra Carô Pejti kujahêc, mã cute me pamã amji jôr. Mã Carô Pejti ata me pahcaxwãm pê me pamã:

— Apê Pahpãm kraa to ihkra — hane. Ne hanea ne me pahcaxwÿn caxwãm pê Carô Pejti ita pahte Pahpãmçukij na me pahto, cu me cumã:

— Inxũ — hane. ⁷Ne hamre, ita caxuw, nee me papê cama me hõ pahhi jarkwa kôt me hâpên catêjê nare, ne me papê Pahpãm kra. Ne me papê mehkra ita kam ri, ihtÿj me pamã, cumã cute ampo pejti to hũjahkre atajê cunea gô.

Cu ha nee hipêr me panquêtjê te me to ihhimpej xà kôt me papa nare

Coroxo 2.16-19

⁸Pê rÿ pêa mã, cormã nee ate me Pahpãm jahkre pej nare kam, pê ca ajco me aquêtjê te amji kam hapac xà pit to amji mã me ahimpej to

meapa. Ne ajco me amã me carõ me, cupẽ jarõti me, ampo cawpa xà kên me, ampo cunea kwÿ cupaa to hÿpa. Ne ajco atÿj Pahpãm kaj na ampo to ame pahpãm. Mã pahpãm cahac atajê mã nee carõt nare. ⁹Ne ita caxuw, nee cute hajÿr nare. Ne me amã Pahpãm jahkre pej, ne hanea ne Pahpãm mã me gahkre pej. Ne mër ampo na mã ca ajte hacpÿa mã meaquêtjê te amji kam hapac xà kôt hamreare ata wÿr ate me amji jaxàr? Neampo na mã ca ajte hipêr atÿj ampo cawpa xà me, ampo carõ kên atajê to ame amji kampa, ne ame to amjjipackre? Mã taa hacpÿ mã me ato ihhimpej, na ca ame amji mã to hane? ¹⁰Ne atÿj amcro kên cawpa xà jàhtôa to amji mã me ahimpej to me apa. Ne atÿj me Juta catêjê jõ amji kîn jàhtôa kôt me amji ton to meapa. Ampo na mã ca ame amji to hajÿr to prãm? ¹¹Cõt mã ca me Pahpãm pê catyt kam ata te amji kam hapac xà jicu? Ca ha ate me hajÿr na, waha itÿj amji caxwãm pê ita na me ato po mã quê, ne imã amji kîn nare, ne ipeacre ne. He xà pêwa ihcaprÿ na ajco me amã Jeju jarê, ne to hahkre xà catihtí to hahkre toipa ata, xà ajkí ihkôt hamreare?

Pê mam ajco me Pawrô tehcajpar to catia

¹²Jeju kam me ikjêjê, pê ca mam ajco me ito impej ne nee rÿ jü caxuw ate ito kên nare atajê, wa hame apê ipyràac xà na me awÿ. He pê mam ipê me apyràac, ne me acuxà ampo cawpa xà atajê cunea kôt ipa. Ne ita caxuw ite ampo itajêcunea jicu, ne Jeju te amji kam hapac xà to pit mã amji kampa. Na ca ha ita caxuw me apê ipyràac, ne me ampo itajê cunea jicu.

¹³Xà ca atÿj cormã ite mam me amã Jeju jarên xà ata to me amji japackre? He pê wa ixà, ne me acahê na ahtwÿ, ne jü mã amji to amcro to ata kam, pê wa me amã Jeju te amji kam hapac xà pejti to hahkre.

¹⁴Pê ca nee ixà kêanre ata kam me ina acprêc nare, ne me ito, ihhêj rûm, kÿj rûm Pahpãm mã memprar catêjê nõ, nare, me ito me pajõ Pahhiti pê Jeju Crixtó pyràac, ne atÿj ina me amji capa. ¹⁵Ne pê ca atÿj ajco, tee me atoa to pøj, ne me imã hõr prãm, ate me itehcajpar prãmte. Ne pê caxuw me amã ikîn, ne ampeaj kam ipyrên megakry. Ne mër jõ ri mã ita caxuw me gakryti ita? He ihhêj ne nee ita caxuw me gakry nare. ¹⁶He pê wa nee jü caxuw ame amã ihêj xi jarên nare, ne cormã me amã catyt kam to hahkre to ipa cacrô, ca caa ihhêj ne ipê me acurê xwÿn na, ame ito amji kampa.

Pê mehhêj xi catêjê Pawrô te amji kam hapac xà intête me ta

¹⁷Mehhêj xi catêjê atajê hãn ne me amã ihhêj to:

— Ampeaj kam me imã akîn, na wa itÿj me gamã, ne me ato impejti to prãm — hane. Ne camaame amã ihhêj, ne ite amji kam ijapac xà ita tète cute me ahyr, ca mehkôat amji kam me gapac prãmte ri ame amã ihhêj.

¹⁸Pê wa curi ame acahê na imõr xà ata kam, pê wa me ate catyt kam me

apa na me atehcajpa. Ne pom amcro itajê kam, wa nee curi apu imõr nare ita kam, quêha ihtÿj ijaxà kam jũm te me atehcajpar xà ata na imã impej. Ne cute me atehcajpar catêjê atajê, nee mempej nare. Ne cute me ato impejti xà ita toame amã ihhêj, ne ite amji kam ijapac xà ita tète, cute me acaxàr to prãm to ri, ihhêj ne ame amã ihhêj.

¹⁹Me apê imã ikra kĩnti atajê pyràac. Wa ihhêj ne ipê me anã mã me axà, mã tee ame axà te cute amji cupên ata pyràac. Ampo na? He caha me apê Jeju pyràac, ne me apejti to prãm to, wa ha amji pupun to kêanre to ipa kam to icrà, ca ha ahnaa ihcunea na, catyt kam Jeju kôt me apa, quêha cormã ikàj xà ata hamre. ²⁰Jamã ne wa krãa me akuc ri jÿ, ne ajteare mã me amã icakôc xà nõ to icakôc. Wa itÿjme ato po mã quê, ne me ato pit mãamji kampa ita kam, ramã ikrã pictor tu ita kam, jũ mã wa ha ajte me ato.

Pê Mojxe cama jũm jarkwa kôt me pajapên catêjê na me pahto

²¹Por ca Mojxe jũjarên xà kôt me amji kam gapac to prãm atajê, me ikampa. Wa ha pa me amã Mojxe jũjarên xà ita kôt pahte amji kam mepajapac xà atajê jarê. ²²Pê Mojxe me iquêtxwÿ Aprãw jarên kôt me imã harê, pê Aprãw mãihkra xũmre ajkrut. Ne pyxit ne cupê Ixamar, ne hĩxi mã hàpên catê cahãj pê Hacakwÿj kam ihpÿm. Ne ihnõ ita pê Ixac, ne inxi pê Xarakwÿj pê Aprãw mehĩxia kam ihpÿm. Ne pê Xarakwÿj pê nee cama jũm mã hàpên catê nare, ne ihtÿj apu ipa. ²³Mã ihkĩn te Hacakwÿj ita pê Aprãw me hĩxi mã hàpên catê ata, pê Aprãw amjia kôt kam ihkra, pê mam cumã ihpÿm. Ne quêt Ixac toPahpãm te hũjahkre xàa na pê, inxia kam ihpÿm. ²⁴⁻²⁵Ne pyjê pijakrut itajê jarên xà kôt, wa ha me amã ita kam me pahte amji kam pajapac xà kôt harê. Ne pyjê pijakrut atajê, nee meipipênti nare, ne ajpên pê ajteare mã me. Ne Pahpãm me, cute me ajpên par xà te hajÿar, ne nee ipipênti nare, ne ajpên pê ajteare mã me. Hacakwÿj pê Ihcuhhyt jõ kēnti pyràac. Por pêPõcaprÿhti jõ pjê kam, Pahpãm Mojxe mã Juta catêjê caxuw, Ihcuhhyt jõ kēnti kam, cumã cute me hapackre xà jõr ata, mãr quê catyt kam ihkôt me ipaxà ata pê Hacakwÿj ata pyràac. Ne cama ame cumã me hàpên xà ata kôt Pahpãm te me ahna amji caxàr na to prãm catêjê caxuw ri harkwaita. Ne ahnaa ita kam, Juta catêjê Krĩpinkrên kam mehkrĩ atajê pê Hacakwÿj kra pyràac, ne cama me harkwa ita kôt pit mã ame hàpên to meipa. Ne Pahpãm te me ahna amji caxàr prãmte, ihtÿj me hàhcawpa xà cunea kôt me ipa.

Pê Jeju pahtÿj ame papa na me pahto

²⁶Ne quêt cõjkwa kam Krĩpinkrên tuw ata pê Aprãw me hĩxi ihtÿj apu ipa ata pyràac, ne cupê me pahnpê Xarakwÿj ata pyràac. Ne me pahte Jeju to amji mã me pahhimpej atajê pê Xarakwÿj kra atajê pyràac. Ampo

na? Ihhêj ne Pahpãm Carõ Pejti kôt hipêr me pahpÿpÿm, na ri cupê me pahnã. ²⁷Ne pê ramã Ixaj xwÿ Pahpãm jarkwa kôt, hõ kãhhôc kam ita na ihhôc to hane he:

“Por cormã nee jũm mã ihkra pÿm nare ata,
gapacta negakryte acarâr,
ne amã amji kĩnti ne.
He quê ha ihtÿj, por me cumã mempjê atajê jirôa pê,
quê ha jũ caxuw amã me akra hàhtô” hane.

²⁸Mêr hõhõ, me apê Jeju kam me ikjêjê atajê, he me apê Ixac pyrãac, ne Pahpãm te me ato hũjahkre xãa kôt ri me apê Pahpãm kra. Me papê, por pê Pahpãm Aprãw mã ihtãm xwÿ to awjahkre ata mã cu me. ²⁹Ne caxuaw, pom amjia kôt me ajhu ita na pê Ixamar ihpÿm ata pê cama me cumã hàpên catê kracakrô, ajco ihtÿj Ixac to Pahpãm jũjahkre, mã Pahpãm Carõ Pejti kôt ihpÿm ata jahê. Mã cute amji pupun to kêanre xã caxuw pê ajco apu hahê. Ita jikjê na mãita kam cute hajÿar he, ne menquêtjê te me hapackre xã kôt me ipa catêjêatajê, cama me papê Jeju kôt me papa catêjê jahê, cute me pahto kên prãmte. ³⁰Ne pê Mojxe xwÿ ramã ita na Pahpãm jarkwa na hõ kãhhôc kam ihhôc to hane he:

“Ca ha ma jũ kam cama me hàpên catê ita kujate, ihkramea mã.
Ampo na?
He wa ha nee cama me cumã hàpên catê kra pê Ixamar ata mã,
ite Ixac pê gĩxia kra mã ampo to ijũjahkre atajê nõ jôr nare” hane.

³¹Hõhõ me ikjêjê, he nee me papê, por cama hàpên catê ata kra pyrãac nare. Ne quêt me papê Xarawkÿj pê Aprãw me hĩxia kra ata pyrãac.

5 ¹Jeju Crixto te mam me panquêtjê himpej xã atajê pê me pahcaxâr, mãr cu pahtÿj amepapa. Cwÿrjapê ca ha nee hipêr jũm himpej xã mã axâr, ne ihkrac ri apu apa nare.

Quê ha Pahpãm nee me pajapên xã impejti kôt me pahna amji caxâr nare
Jowãw 8.32, 36

²ÿhÿ, ipê Pawrô pê Jeju Crixto jarkwa na imprar catê, ne pa wa ha me amã awjarê, cwÿrjapê ca ha ikam me gapac to impeaj ne he. Ihhêj neramã Juta catêjê kwÿ me awÿr cator, ne cute me amã:

— Ca ha Mojxe te me hapackre xã kôt, cama amji na me ijamã, wa me amã me apy kã kwÿ jakep. Ampona? Ca ha ate ita to hajÿr nare na, quê ha nee Pahpãm ana amji caxâr nare — hajÿr na. Ca ha nee kam me gapac, ne amji na me hamãr, quê me amã apy kãkwÿ jakep nare. Ampo na? Ca ha ate amji na me hamãr na, ca ha nee Jeju to pit mã amji mã me

ahimpej nare. Quê ha me amã me pajõ Pahhiti tyc xà ita kôt hamreare ne.

Pê Pahpãm amjia kôt me pahna amji capa

³He wa ha hipêr me amã ita cawpa he. Ca ha me anõ te amji na me hamãr, quê ha cute me amã apy kà kwý jakep na, hamre, ramã ate Mojxe te mehapackre xà pyxit ne ihkôt amji ton, na ca ha atýj ate ahpyãre na ihcunea kam gapac to prãm xà. ⁴Ca ha Pahpãm te me ana amji caxàr prãmte, ate me Mojxe te me hapackre xà ata pynãr na, ca ha ramã me Jeju Crixto mã hikra. He me atea ca mePahpãm te hàhcaprĩa kam, amjia kôt cute me apytãr jicu na me ton, mã cute me gicu. ⁵He nee me ite me hajýr nare. He quêt me imã quê ha Pahpãm amjia kôt me ina amji caxàr na me imã hahkre pej. Ne quêt Pahpãm Carõ Pejti carôt ri, Jeju to ite amji mã me ihmpej týj na me itehcajpa. ⁶Cu ha Jeju Crixto na me ajpên hõncu ita kam, nee Pahpãm me, me papê ajpên pê ajteare mã nare, ne cumã me papipên pit. Ne me pahkà jakep me, me pahkà jakep nare itajê me, me Pahpãm mã me papipên pit. Ne cumã Jeju to me pahte amji mã me pahhimpej xà ata kôt ri me pamã ajpên kïn, ata na ri cumã imej.

⁷Pýhàpà! He curmã ca Pahpãm kôt me aprõt kên nare ta? Ne ampo na mã ate amji na me jùm ita jamãr, mã cute me ato pry hydr, ca ate me pry hydr? ⁸He nee Pahpãm te hõ pry ita tète me amên nare, ne ihtýj quêt amji wýr me amã akij. ⁹He cu ha me pahnõ cuhkõn cahàc to cuprõ, ne hakôt, quê ha ihkrĩ ne hipõc ri ihnõ kam cõ, ne ihcacu, ne amji kôt ihkwý cunea to kên. Ýhý, ita jĩkjê na mã jùm te, Jeju te amji kamhapac xà kaj na, me amã ampo kên kryjre to hahkre xà atajê to me acunea to kên. ¹⁰Ne jùm ata te me amã ampo kên to hahkre cakrõ, wa itýj, nee ate mempar nare na, amji mã me ato hane. Ne imãa, ca ha me anõ te kam gapac, neihkôt amji ton na, ca ha hacpýa mã ate amji jaxàr, ne hipêr Jeju te amji kam hapac xà imejti ata pynãr na, wa itýj me ato amji mã hane. Ne porame amã ampo kên to hahkre to ipa ata, quê ha Pahpãm ihtýj cute me ato kên xà ata cwýrjapê to ihtýj tu ne.

Pê Pawrõ nee jùm te impy kà kwý jakep to cumã hahkre nare

¹¹Ýhý me ikjêjê, wa ha me amã amji jarê. He cute me amã ito ihhêj xi catêjê me amã hane he:

— Pawrõ cormã mehcunea te mempy kà kwý jakepto me cumã hahkre — hane. Wa ha ite me cumã to hahkre to hajýr na, quê ha nee Juta catêjê jõ pahhi kwý itajê ame ito kên nare. Ne mër ampo na mã ame ito kên? Nee mã ampo na nare. He wa mehcunea mã Jeju te pĩ kam me pancwýrjapê ihtyc xà ata kôt Pahpãm te me pahna amji caxàr na harê, na ri ame ikam incryc. ¹²Ne por ame akrã to acto atajê, quê hapacta ne ihtýj amji mã mehhy me incre cunea jakep hiahpuro, wa ha nee intête mehcahpêrkãr nare.

Cu ha ajpën to mempeaj ne
Jowāw 13.31-35

¹³Jeju kam me ikjêjê, pê Pahpām amji wÿr me pamā akij, mār quê nee pjê kam jūm cute amji kam hapac xà to pahte amji kam me pajapac xà to ihhimpej nare. Co he! Ca ha nee me anō ate amji kamgapac xà tūm kên ata kôt apa prāmte, amji mā:

— Taamā, jūm nee ito ihhimpej nare ita kam, wa ha itÿj ite amji to amji cajpuaw prāmte, ite ampo ton prāmata cunea to — hajÿr nare. Ne quêt amā me akwÿ kīan kam, cute ampo na mehprāmti xà atajê to ca ha me. ¹⁴Ne por Mojxe te me hapackre xà atajê, ca ha ihcunea to cuprō, ne to pyxit peaj to hane he:

“Quê ha amā mehcunea kīn hanea,
pom quê amāa amjikīn he” hane.

Cu ha pahte me ajpën to hajÿr na, cu ha ramā Mojxe te me pajapackre xà atajê cunea kôt me ajpën to. ¹⁵Nāmri ca ha me apê ampo kên pyrác, ne cama ame ajpën curê, ne ajpën kam me atēm na, ca ha me caa me ajpën jipej. Cupate ca ha atÿj ateamji kam gapac xà na me amji kōpīr to me apa.

Pahte mam amji kam me pajapac xà kên atajê pê Carō Pejti curê xwÿn
Roman 7.7-25; 8.1-11

¹⁶ÿhÿ me ikjêjê, ca ha Pahpām Carō Pejti te amji kam hapac xà tuw pejti ata kôt me apa na, ca ha nee hipêr ate amji kam me gapac xà tūmkên ata kôt me apa nare. Ne nee ate amji to amji cajpuaw prāmte, ate ampo ton prāmata cunea ton to me apa nare. ¹⁷Mam pahte amji kam me pajapac xà tūm kên ata me, Pahpām Carō Pejti te amji kam hapac xà tuw pejti ita me, cupê ihhêj rūm ajpën curê xwÿn. Na ri ihtÿj ajpēcahpêrkār to ipa. Na cu nee me pahte amji kam me pajapac xà pejti to me papa to prām ata kôt me papa nare. ¹⁸Cu ha pahte Pahpām Carō Pejti to amji mā me pahhimpej na, cu ha nee hipêrme hàhcawpa xà me, me to ihhimpej xà atajê to apu amji kam me pajapac nare. Ampo na? Nee hipêrcute me hàhcawpa xà ata me pahto ihhimpej nare.

Mam pahte amji kam me pajapac xà tūm kên atajê te hajÿr

¹⁹He me pahcunea mā hirāa pê mam pahte amji kam me pajapac xà tūm kēanre te ampo kên cunea na me pahton na, pahte me amji jahkre pej. Itajête hajÿr he:

Me pahnō te me pahprō kaj na ahti na me pyjê nō caxun me,
hanea ne pyjê nōte impjên kaj na, ahti na jūm xūmre caxun.

He ihhêj rûm me pahkwỳ pê rop pyrâac, ne pahte amji kam me pajapac xà kam me panxyre kamme pahpahàmti ton to ame papa.

²⁰ Ne hanea ne Pahpâm kaj na, pahnõ te amji mã mepahpâm cahã krekà cupa me,
 pahte me pahkwỳ to hy to amji kam me pajapac to me papa me,
 pahte me ajpẽn curê me,
 pahte me pajarkwa to ajpẽn mãn kên me,
 pahte me pajõxỳ to me papa me,
 pahte ajpẽn kam me pancryc me,
 amji to pit mã amji kam me pajapac to me papa me,
 pahte ajpẽn cuna mã ame amji jakrã me,

²¹ pahte ajpẽn jũ na ampo kĩn me,
 pahkõm ne me papipãn me,
 amji kĩn kam, me kam mare mã me pahkõm catia me,
 me ampo kwỳ jãhtõa pê itajê pyrãcti atajê me.

Ïhỹ, he mam pahte amji kam me pajapac xà tũm kên itajê, ihtỳj pahte ampokên itajê cunea ton na me pahto, cu ton to me papa. Ne pom ite mam ramã me amã ampo cawpa atajê, wa ha hipêr me amã ihcawpa. He cute me ampo kêanreitajê ton catêjê, quê ha nee jũ caxuw Pahpãm himpej xà krac ri hãr, necatyt kam, cumã amji kĩnti jakryti kam ipa nare.

Pahpãm Carõ Pejti te amji kam hapac xà tuw pejti atajê te hajỹr

²²⁻²³ Ne quêt Pahpãm Carõ Pejti te amji kam hapac xà ajteare mã. Quê ha me Pahpãm Carõ Pejti te me pamã amji jõr na, cu ha me pahte ampo pejpõt ton xà itajê te hajỹr he:

me pamã ajpẽn kĩnti me,
 me pajakryti me,
 ajpẽn mã me pampejti ne me pahcarĩcti na me pahkrĩ me,
 ampo te me pahto kên mã me pajũcanãr me,
 ajpẽn mã me pahcaprĩ me,
 pahte me ajpẽn to impejti me,
 cute amji mã me pahto hajỹr me,
 ajpẽn mã me ampejti me,
 ampo kên têtê pahte me amji jiprõn to me papa me,
 cute amji mã ampo na prãm atajê na amji jamãr peaj me.

Ïhỹ, Pahpãm Carõ Pejti ihtỳj pahte ampo pejti ton xà itajê cunea na me pahto, cu me ton to me papa. Na ri nee jũm xũmre te me hapackre xà te ampopejti ita têtê me pajiprõn xà hamreare. ²⁴ Ne me papê Jeju Crixto tekjê atajê te, ramã ihhêj ne mam me pahte amji kam me pajapac xà tũm kên atajê cunea jipej, mãr cu nee hipêrihkõt ame papa nare. Na cu ha nee hipêr me pamã ampo kên ton prãmti atajê na me amji jamãr, ne me ton nare.

Cu ha Carō Pejti te amji kam hapac xà tuw pejti ata kôt me papa

²⁵Ne me Pahpām Carō Pejti ata pê me pajō Pahhiti, cu carôat kôt me papa. Mā taa, me pahtoihhimpej, ne pahte ampo pejti ton na me pahto, cu ha me ton to me papa. ²⁶Na cu ha nee ajpên jirôa pê amji to me pahcati prām nare. Cu ha pahte me hajÿr na, cu ha cama me ajpên cyt kam tẽ, ne cama ajpên jũ na amji to prām kam me tẽ.

6 ¹Yhÿ, me ikjêjê, quê me akwÿ nō ihhêaj to ampo kên to, ca ahna me hõmpu, ne me apê Pahpām Carō Pejti to ate amji mā me ahimpej catêjêatajê, mehtehcajpa, quê ampo kên ton jicu, ne ihcuhtac, ne catyt kam ampo pejti ton to ipa. Ne ate me hapackre xà ata kam, ca ha amji mā me apriakam, me hapackre. Ne hanea ne ma amji to me guphê, cõt cahanea ne mehkôt ampo kên ton kam tẽ. ²Ne ca ha atÿj me ate amji kam gapac xà kam ampo te me ato kêanre atajê to ate ajpên mā mehcajoc na me ajpên tehcajpar to me apa. Cu hapahte ajpên to me hajÿr to me papa na, cu ha ramā me Crixto te mepamā harkwa jirên xà atajê kôt me amji kampa. ³Quê ha jũm te amji to ihcakôc to:

— Wa me hirôa pê icati, ne ipej — hane, ne nee cati ne impej nare xà ata kam ri, taa ramā apu amji to amji mā ihhêj to ipa. ⁴Na cu ha ahpÿanre na, pahte amji kam me pajapac xà na me amji kôpir to me papa. Na cu ha me pahnô te pajâpên xà impejti ton na, cu ha pahtÿjhûrên me pajakrya, ne cu ha nee amji mā:

— Wa ite itajê jirôa pê ijâpên xà impejti ton — hajÿr nare. Ne quêt cama amji mā:

— Wa ite ijâpên xà impejti ton — hane. ⁵Na cu ha ahpÿanre na, me pajÿrkwa caxuw me amji kampa, ne pahtÿj me amji jâpên xàa to me pajâpên to me papa. ⁶Ne cute me amā Pahpām jarkwa to hahkre catê ata, ca ha ma me hamā, ne ma cumā, amā ampo atajê to ajcokjê.

Jũ wÿr cu ha me pahnô Pahpām mā pahhêj

⁷Ca ha nee me anô amji mā ahêj nare! Jũ wÿr quê jũm Pahpām mā ihhêj. Xà cu me pahnô pajō pur kam, pànkryt xÿ pit kre, quê pijamā kamhàn nÿre nō cato? Hâpà! Quê ha hÿ pit hapôj. Ita jikjê na, cu ha pahte amji kam me pajapac xà kên to pit mā amji kampa, cu ha nee hahpan xà naampo pejti pyr nare, ne hahpan xà na ampo kên pit cwa. Jũ wÿr cu pahte ampo kên ton xà ata kôt, me Pahpām mā me pahhêj, cute me pamā ampo pejti jôr prãmte. Cu pahte ita to amji kam me pajapac na, cu ha me paa, ramā, amji mā me pahhêj. ⁸Cu ha mam pahte amji kam me pajapac xà tũm kên ata pit kôt me papa na, cu ha ramā Pahpām kaj na ampÿa mā ame papa, ne me ty, ne me acto rohnÿtti mā. Ne cuha quêt Pahpām Carō Pejti te amji kam hapac xà tuw pejti ata kôt me papa na, cu ha quêt Pahpām cahê na me pahkrÿ rohnÿtti mā.

Cu ha nee me ampo pejti ton jicu nare

⁹Cu ha nee me ampo pejti ton to mehkin hi nare, ne pahtÿj pahte ampo pejti ton xà ata kam me awcanã. Ne hahpan xàa na, quê ha Pahpãm me pamãampo pejti gõ. ¹⁰Ne atÿj ate mehcunea mã ampo pejti ton na, ca amji to ahcukij. Ne Jeju kam me pahkjêjê to, ca ha me hirôa pê impej.

Pawrô me pancwÿrjapê Jeju tyc xà ita to pit mã apu ihcakôc

¹¹Ita caxuw, wa ha ijÿhkra to me amã ihhóc, ca me hõmpu. Mã ihhóc cati pit he, mãr ca me ijahkre pej, nãmri pa wa me amã ihhóc.

¹²Ne por me amã ihhêj catêjê atajê ri, cama amji to ame hàmnãn to me ipa. Ne Jeju te amji kam hapac xà kaj na me amã harên to:

— Ca ha apy kàkwÿ crire ne hakep xà ata kôt, quê ha Pahpãm ihtÿj ana amji capa — hane. Me pajô Pahhiti curê xwÿn te ame to kên cupate ri, nee me amã:

— Pí kam me pancwÿrjapê Jeju tyc xàa kôt, quê ha Pahpãm me pahna amji capa — hajÿr nare. ¹³Ne cute mempy kà jakep xà ata to me amji kam hapac to me ipa cakrô, nee me Mojxe xwÿ te me hapackre xà cunea kôt me ipa nare. Ne mër ampona mã ame amã apy kà jakep prãm? Nee mã ampo na nare. Cumã cute me hÿnãr catêjê jãhtôa na, cute amji to me hàmnãn prãmte ri ame hane. ¹⁴Ne pa nare, wa quêt me pancwÿrjapê me pajô Pahhiti Jeju Crixto tyc xà ata to, wa mehcuneamã, ijãmnãn to ipa. Ne por Jeju te amji kam hapac xà curê xwÿn te amjikam hapac xà itajê, nee icajpuaw nare. Na ri me imãa, cute amji kam me hapac xà itajê pê ampo tyckro pyrãac. Ne hanea ne ite Jeju kôt amji kam ijapacxà ita, nee me hÿmre atajê cajpuw nare. Na ri me cumã ite amji kam ijapacxà ita pê ampo tyc kro pyrãc, ne ihkêanre. ¹⁵Ne Pahpãm mã, jÿm te amji kà jakep ata me, cute amji kà jakep nare atajê pipên pit, na ri me ipijakrut itajê na, nee Pahpãm te amji caxãrnare. Cu ha Pahpãm te amji kam hapac xà kôt me papa na, quê ha me pahcunea to antuw, ne me pahto intuw. Cu ha me papê curmã ampo tuwti ata, quê ha cormã me pahna amji capa.

Pê Pawrô Pahpãm mã mehkwy cajrên pej

¹⁶Ne wa itÿj Pahpãm mã me acajrên to hane he:

— Ýhÿ me Ijô Inxÿ, wa cute, ite me hapackre na me ipar atajê mã, wa ha ana ahwÿ, ca me caxwÿncaxwãm pê me cumã acarÿcti gõ, mãr quê nee cumã ampo hÿpa nare. Ne ca ha me akwÿ cunea caprÿ, ne me to impej — hane.

¹⁷Hamre, he nee hipêr imã, ramã ite me amã ampo jarên itajê jarên prãm nare. Wa ramã ite ita cwÿrjapê amji pupun to kêanre, ne pom ijÿkam apu icaxôti itajê, ramã ipê Jeju mã ijãpên catê na ijarê. He nee ipy kà jakep xà caxô ata, ipê Pahpãm tekjê na ijarên nare. Ne quêt ite

mehcunea mã Jeju jarẽn cwÿrjapê jũm te icahhyrjaxà kam caxõ, ita ri quêt ipê Pahpãm tekjê na ijarê. Na ri nee hipêr jũm te, ite amji pupun xà kêanre na iton xà hamreare. ¹⁸Ne imã me pajõ Pahhiti pê Jeju Crixto te amjia kôt, me apê me ikjêjê itajê cunea to, cute impej na to prãm. Taamã, hamre.

EPET JÕ KRĪ WÛR

Pawrô Jõ Kàhhôc

Ûhÿ, pê Roman jõ krĭ kam, me hacjên xà kam Pawrô ihkrĭ, ne Jeju na mehkwy mã ajco hõ kàhhôc kujate. Na pê Epet jõ krĭ kam, Jeju namehkwy jakrã mehkri atajê mã hõ kàhhôc ita kujate. Na pê hõ kàhhôc ita japry pê **Epet Jõ Krĭ Kam Jeju Na Mehkwy Jakrã Mehkri Atajê WÛr, Pawrô Jõ Kàhhôc (Epet).**

Ne hõ kàhhôc ita kam ri cute Jeju kôt me ipa catêjê pê Jeju jã pyràc na, me cumã harên neto hahkre. Ne pom cu amjia kôt me amji jĩ jamãr to me papa, ita kôpit na mã, ihtÿj Jeju me papê mehkwy pê hĩa pyràc ata jamãr to ipa. Nepom me pahkrã me pajĩ to ihhimpej to ipa ita na mã, Jeju me papê mehkwy to ihhimpej to ipa, pjê ita kam.

Pawrô te amji jarên xà
Me Hàpên Xà 18.19-21; 19.1-40

1 ¹Hàpà me ikwy pê Jeju na mehkwy, ipê Pawrô, ne ipê Jeju Crixto jarkwa na iprar catê. Ampo na? He Pahpãm pê ita caxuw icapi. Na wa Epetjõ krĭ kam, me apê Pahpãm na mehkwy atajê mã, apu ihhõc. Ne ca atÿj Jeju Crixto to ate amji mã me ahimpej, ne ajpên kam me ahõncokam me to acrà ita na.

²Ne imã me pajõ Inxũ Cati pê Pahpãm me, me pajõ Pahhiti pê Jeju Crixto te me ato impejti na me ato prãm, mãr ca nee ame ampo kên cupa nare, ne ihcãmtà rûm me acaxwÿn me, me gĩ cunea cuhkrit pej pëa mã me apa.

Pê Pahpãm ramã cute pjê ton xwÿjrea na amji mã me pahcapi
Roman 8.28-30; 1 Petrô 1.2

³Cu ha Pahpãm pê me pajõ Pahhiti pê Jeju Crixto Pãm pyrên me pajakryti na cumã me amji jarê. Ampo na? Cu cõjkwa kam me pajõ Pahhiti pê Jeju Crixto kam me pahhõncõ tu ita kam, ramã cute ampo pejti cunea to me pahto impejti. ⁴Pê pjê ton xwÿjrea na, ramã Pahpãm Jeju

kam pahte me ajpên hõnco, ne me papê hõ tekjêa xà caxuw, amji mã me pahcapi. Mâr cu kampahte amji kam me pajapac xà impej pit, ne Pahpãm kam mare mã me pahkam, ampo kên hamreare ne. ⁵Ne Pahpãm mã me pahkîn cwÿrjapê pê mam, rÿ pêa mã, ramã ihcãmter pê Jeju Crixto kôt me pahto amji kra xà caxuw amji mã me pahcapi, ne ahna amji to. Ita na ri cumã me pahto prãm to prãm na pê to hane. ⁶Pahpãm kinte, ampo caxuw me pampej nare cakrô, mã amjia kôt cumã me pahkîn. Mã hãhcajrënti kam cumã ikra kînti ata kôt, me pahtoiampejti pyrên me pajakryti na, cu ha cumã me amji jarê.

⁷⁻⁸Ne pê mam me papê ihhêj rûm pahte me Pahpãm to new catêjê. Ne pahte me to kên xà ita kam ri, cute me hacjên xà kam me pajacjên, cu kam me pahkrî. PêJeju pê me pahkritxwÿa, ne me pajaxà kam ty ne caprô jaxwÿ. Ne cute caprô jaxwÿr xà ata to pê me pahkên jahpan xà na Pahpãm mã amgô, mã cute me pahkên ita to tojnô, cu pahtÿj ame papa. Hõ, pahte me Pahpãm to kên itajê cunea ri, cute to tojnô, ne hicu to hajÿr. He ampeaj kamPahpãm jãhcajrën cati, mã ihtÿj amjia kôt cama me pahto impejti to ipa, ihkrã kre te amji jahkre pejti kôt. ⁹Ne pê mam nee jûm Pahpãm te amji kam hapac xà jahkre pej xà hamreare. Ne curmã ri Pahpãm te ihkra pê Jeju Crixto kôt me pamãamji to ipipê to prãm to ri, cute ihkujahêc. ¹⁰Ne cute amji kam hapac xà pimxur jahkre kêatre ata te hajÿr he. Quê ha Pahpãm ihtÿj jû caxuw cute amji mã amcro hyr xà ata na, cutepjê me cõjkwa kam ampo cunea ton itajê cunea to cuprô, ne Jeju mã cugô, mâr quê cupê hõ pahhi, ne to ihhimpej to ipa rohnÿtti mã.

¹¹Ne hamre, Pahpãm te mam ramã amji kam hapac xà ton atajêa ton partu, cute amji mã ihkîn xà ata na. Ne Jeju kam pahte me ajpên hõnco xà ita kam ri, cute amji mã me pahcapi, ne me pahto amji kwÿa. Nepê ramã ita to amji kam hapac hiahpuro, ne cumã ahna to prãm, na ri cute ton. ¹²He me ipê Juta catêjê, pê wa mam amji mã me iprã kam, Jeju Crixto pê me itehcajpar catê na me hikaj kam me tẽ. Cwÿrjapê waPahpãm mã me amji jarên to hane he:

— Me ijô Inxû Cati, he ampeaj kam ate me ito kênre nare, na ri me imã acati pê ihhêj rûm ampo jãhcujrohti ata pyrãac, ne ampeaj kam apej! — hane.

¹³Ne pê hanea ne ite me amã Jeju pê me pahkên pê me pahpytãr catê na harên to prãm to, pê Pahpãm amji mã me icapi. Ne ite me amã harên xà ata, ampeaj kam ri. Na pê ca me ikampa, ne ite me amã harênxà to amji mã me ahimpej kam tẽ. Ne pê Pahpãm me pahcunea mã Carô Pejti to awjahkreatã, pê me amã amji gô. Ne cute me amã amji jôr xà ata, ihtÿj me apê hõ tekjê na me garê. ¹⁴Ne pê Pahpãm Carô Pejti ramã me papê hõ tekjê mã ampo jôr na amji ton hiahpuro ata, quê ha ihtÿj me pamã cugô, ne ampeaj kam cu ha pahtÿj mepahkên pê me pahcato. Cwÿrjapê cu ha me pahcunea Pahpãm to me amnã ne cumã me hane he:

— Ampeaj kam acati! — hane.

Pawrô te me hûrên hakryti na, Pahnâm mã amji jarên xà
Roman 12.3-8; Epet 4.11-16; Coroxo 1.9-12

¹⁵⁻¹⁶ Ỹhỹ, me ikwỹ, pê wa me ate me pajõ Pahniti Jeju to amji mã me ahimpej na megarên pa. Ne hanea ne me amã me akwỹ cunea pê Pahnâm tekjê atajê kîn na me garên pa. Ne ite me garên par xà ata caxuw, wa nee meapyrên, ite cumã ijakryti na, amji jarên jicu nare. Ne wa ijõtpê Pahnâm mã me acajrên to ipa to hane he:

¹⁷— Ỹhỹ Pahnâm, apê me ijõ Pahniti pê Jeju Crixto Pãm pê ijõ Inxũ Pejti ata, wa ha awỹ, ca ha Epet jõ krî kam me ikwỹ mã AcarõPejti te amji kam hapac xà pejti gõ, mâr quê cute amji jahkre pejti, krã kreti kôt me hirõa pê, cute me gahkre pej na me to. ¹⁸Ca ha hirãa pê me cumã ampo pejti incrê itajê to hahkre, mâr quê me gahkre pej peytu ne. Ne mam, ate amji mã me capi, mâr quê amjimã mehprĩa kam jũ caxuw cõjkwa kam acahê na amji to me ipijapar rohnỹtti mã. Ne hanea ne me cupê atekjêa, na ca ha cõjkwa kam amã gãhcukrêj jãhtõ catia ita kam, gõtpê amji mã me to impej to catia to apa.

¹⁹— Ne hicu xà ita kam ca hanea ne acarõt tỹjti catihti to, me ite amji mã me ato ihmpej atajê tehcajpar to impeaj ne. Hõ, ampo to ate mecumã hahkre xà itajê to, ate me cumã hahkre xà ita na, wa ana ahwỹ — hane.

²⁰ Ỹhỹ me ikwỹ, he por Pahnâm carõt te me pahtehcajpar ata te ri hacpỹa mã Jeju Crixto to ihtĩr. Ne carõt ita to ri cute cõjkwa kamamji cahê na, awpõc rũm hỹr xà ata kam hỹr. ²¹Ne cute to ampo cunea jõ Pahniti, me paxũmre me, me pajõ pahhi catêjê me, me carõ cunea me, ampo carõ pej me, me pahcurê xwỹnti carõ kênme, me hõ pahhi catêjê me, cupê jarõti me, ampo cunea carõt tỹjti mea mã. Ne pom me hõ pahhi itajê cunea jirõa pê carõt tỹj ita na apuipa. Pjê ita me, cormã hapua na pjê ata kam, cupê pahhi ita na apu ipa rohnỹtti mã.

Me papê Jeju na mehkwy pê hĩa pyrãc

²²He ampeaj kam ri Pahnâm te ampo cunea jõ Pahniti na, ihcãmter pê Jeju xãm. Ne hanea ne cute me pahkwỹ krã na hãm, mâr quê taa me pahto ihmpej. ²³Ne ihkrã kre te amji jahkre pejti ita kôt ri me papê hĩ, mã cupê me pahkrã. Na ri me pajĩ kam me pahcukrã xà cunea, ne nee ihnõ jamre nare. Na cu ha pjê cunea kam cumã me pajãpên to me papa.

Pê Pahnâm amjia kôt me pahkên pê me pahto cato
Roman 3.19-24; 5.6-11; Tito 2.11-3.7

2 ¹ Ỹhỹ me ikwỹ, pê ca mam me acunea ajco me akên ton to me apa, ne ajco Pahnâm jarkwa jirõ pê me apỹpỹm to me apa, cwỹrjapê ri cumã me apê mehtyc pyrãc. ²Ne caku atajê kam pê ca pjê kam, cute

amji kam me hapac xà atajê to pit mã me amji pyrâc. Ne ate Xatanaj pê me pahcurê xwÿn carõ kênatajê jõ pahhi te, Pahpãm jarkwa jirõ pê mehpÿpÿm xi atajê to, pê ca ajco amji mã me ahimpej to me apa. ³Ne pê mam me pahcunea pê me hÿràac, ne ajco amjia kôt pahte amji kam me pajapac xà kên atajêa kôt, me papa. Ne me pajĩ me, me pahkrã te amjimã ampo na ihprãmti atajê pit ton to me papa. Ne ihkôt me papa xà ita kam, cu me papê mehkên catêjê atajê pyrâac, ne ma ramã me cuxãPahpãm te pahte me amji pupun xà kêanre na me pahton xà ata wÿr me pra.

⁴⁻⁵Ne me pajúpar nare ita kam, ihhêj rÿm ramã Pahpãm mã me pahtyc par. Ne Pahpãm mã me pahkĩn catia, ne ampeaj kam cumã me pahcaprĩ. Cwÿrjapê ri cute Crixto kôt ihhêj ne hacpÿa mã me pahto ihtĩr. Xà mormõ ajkĩ me pampej cwÿrjapê mã, cute me pahkên catia pê me pahtocator? Hãpà! He hàhcãjrëan to hàhcãjrën na ri amjia kôt, cute me pahkên catia ita pê me pahto cator, ne me pahto impej. ⁶Pahpãm te Jeju Crixto kam me pahhõnco na me pahton. Cwÿrjapê ri ihhêj rÿm hacpÿa mã ramã cute me pahto ihtĩr, ne ma cõjkwa wÿrme pahto hàpir, ne Jeju cahê na me pajÿr, ne cahê na cute ampo cunea to me pahhimpej na me pahton. ⁷Ne mër ampo na mã cute me pahto hajÿr? He nee mã ampo na nare! He pjê cunea kam ame ipa itajê, quê ha ita caxuw Pahpãm me cumã hàhcãjrënti, ne ma me pahcaprĩ na me hahkre pej. Ne cute me pamã Jeju kôt me pahto impejna, me hahkre pej na cumã me pahto prãm, rohnÿtti mã.

⁸Xà cu Pahpãm mã ampo pej pit ton to ame papa na mã, cute me pahkên catia pê me pahto cator? Hãpà! He Pahpãm te amjia kôt, mepahtehcãjpar prãmte, me pamã ihkra pê Jeju jõr, mâr cu to amji mã me pahhimpej, quê ha amjia kôt cama me pahpytà. ⁹Ita cwÿrjapê quê ha nee jÿ caxuw jÿm amji to hàmnãn to:

— Ite amji kam ijapac xà impejti, ne ijãpên xà impejti ita jahpan xà na ri, Pahpãm te ikên pê ito cator — hajÿr nare. Jÿ wÿr quê ha jÿcaxuw jÿm amji pej na amji to hàmnãn to hane. ¹⁰Ne mër ampo cwÿrjapê mã pê Pahpãm me pamã pahte amji kam me pajapac xà tuw pejti ita gõ, ne pjê kam me pahto ajpa? Nee mã ampocwÿrjapê nare. He ramã Pahpãm te Jeju Crixto kam me pahhõnco na me pahton, pahte jÿmjê to me pajapên to impejti to prãmte to me papa xãcaxuw. Por rÿ pëa mã cute me pamã hàpên xà pejti to me pajãpên na, me pahto amji kam hapac ata to, cu ha me apê. Cwÿrjapê cu ha pahtÿjajpên to impejti to me prãm.

**Juta catêjê me, mehcahkrit atajê me ajpên hõnco xà
Carati 3.28; Coroxo 1.21-23; 1 Petrõ 2.4-8**

¹¹Wa me ipê Juta catêjê hãn ne me ajhu, ne itÿj amji mã me ipy kà kryjre ne me hakep. Ne hakep xà ata pê ri Pahpãm tekjê na cute meijarën xà. Ne me apê mehcahkrit pê Juta catêjênare atajê na, ca amji to me amjijapackre. Ne pê wa mam ajco me ato amji kam ijapac to:

— Itajê mã mehkà Jakep nare, na ri nee me cupê Pahpãm tekjê nare — hane. ¹²Ata caxuw pê ca caku atajê kam Jeju Crixto pê ampÿa mã ame apa. Ne pê Pahpãm rÿ jÿ caxuw me amã ampo to hÿjahkre nare na mã, ca neerÿ me icuxà Pahpãm me, me ajpên kam gapac nare. Na pê me apê Pahpãm tekjê nare, ne me apê Pahpãm jahkre kêatre ita kam, ca nee amjiwÿr ihpîn ampo pejti cator xà ata jikaj nare. ¹³Ne ita caxuw quêt nee hipêr ate me hajÿr nare, ne Pahpãm pê ampÿa mã ameapa xà nare. Ampo na? Nee mã ampo na nare. Pê Jeju Crixto me gaxà kam ty ne caprô ajxwÿ, ne ihtyc xà ata kôt, ca ate kam me ajpên hônco. Cwÿrjapêri Pahpãm te amji wÿr me ato hàntêp.

Quê ha Pahpãm me cupê Juta catêjê me, mehcahkrit na amji capa

¹⁴⁻¹⁶Mã Jejua te mehcuran catêjê mã amji jôr, mã cute mehcuran, mã me pajaxà kam ihtyc. Ne ihtyc xà ata te ihcunea na ajpên na mepajaxôr to hajÿr he. Cu ha nee hipêr ajpên kam me pancryc nare, ne quêt catyt kam ajpên mã me pahcakôc to me papa. Quê ha hanea ne, neehipêr me iquêtjê pê Mojxe xwÿ caca xà ata, me pahto ihhimpej nare. Ne nee hipêr me acahkrit nare, ne nee hipêr me papijakrut nare, ne quêtajpên kam me papê Pahpãm na mehkwy pyxít peaj, ne ajpên kam me pantuwti, ne me pahpyxit peaj. Ne hacpÿa ne Pahpãm wÿr me pahcunea te amji jaxàr. ¹⁷Ne cute me apê mehcahkrit atajê, ca ampÿa mã Pahpãm pê ame apa atajê me, me ipê Juta catêjê, pê wa hÿ na pire mã ame ipa atajê to hacpÿa ne Pahpãm wÿr me amji jaxàr. He pê neejum ajpên na me pajaxôr na harên nare. Pê Jejuaajpên na me pajaxô. ¹⁸Ne pom Jeju te me papijakrut mã ampo ton itajêa kôt, cu ha pahtÿj Pahpãm Carô Pejti pyxít peaj ata kôt, ihwÿr me axà, ne cumã me pahcakôc.

¹⁹Cwÿrjapê ri ita caxuw, nee hipêr me pahnô te amji to ihcahkrit xà hamreare. Ne quêt me icuxà me apê Pahpãm kraa to kra, ne me apêmekhwÿa, ne ajpên kam me papê mehkwy ita na, ne me pahpyxit peaj.

Me papê Pahpãm na mehkwy pê hÿrkwa pyrâac

²⁰⁻²¹Por mam Krÿpinkrên kam, Pahpãm to amji kam hapac xà jÿrkwa ata kam pê Pahpãm ihkrÿ. Ne cute me Pahpãm jahkre pej prãmte, pê ajco makên me pÿ te ikre ata wÿr me pra. Ita kôpit na mã, me papê mehkwyã pê Pahpãm jÿrkwa pyrâac. Ne ita caxuw me pahkam Pahpãm ihkrÿ, ne mepahkôat ri me cumã Pahpãm jahkre pej. Ne me papê Pahpãm jÿrkwa mã hikwa xà me, hiwrÿhhi me, pô me hõrti pyrâac. Ne pê mam Jeju jarkwa na memprar catêjê me, Pahpãm jarkwa to me cumã mehcahôc catêjê atajêpê ihhêj rÿm, harã na ikre mã hÿxwÿr xà me, cumã hÿxwÿr xà cati pyrâac. Ne Jeju Crixto pê ri ikre mã hãm xà catia ata pyrâac, mãtahna ihhê cunea te cuprôn tu. Ata jÿkjê na mã me papê Pahpãm

jürkwa, mã me pahkam ihkrĩ. ²²Ne ate me hajÿar ne atÿj Jeju to ate amji mã me ahimpej xà atajêa kôt ri ihhêj rûm me apê Pahpãm jürkwa, na ri Pahpãm ihtÿj Carõ Pejti ata kôt me akam ihkrĩ.

Me cupê mehcahkrit mã ri Pawrô pê Pahpãm jarkwa na imprar catê

Roman 15.14-21; Coroxo 1.24-29

3 ¹Ata kôt wa itÿj Pahpãm mã me acajrên to ipa. ÿhÿ, ipê Pawrô, ne pa wa me hacjên xà kam ikrĩ. Ampo na? Wa Jeju Crixto jarkwa kôt meapê mehcahkrit atajê mã Jeju pê me pahkritxwÿ jarên xà impejti itajê to harê, ne me amã to hahkre. ²⁻³Ne pê Pahpãm hàhcaprĩa kam icapi, ne ijĩa to me acaxuw ihhimpej to hane he:

— Mõ, ne mehcahkrit catêjê mã ijarê. Ne nee mã ampona, ca ha me cumã ijarên nare. He wa hacpÿa mã cute me ajpên hõnco, ne ajpên mã me caprĩ na ri, imã me to prãm. Cwÿrjapê pê wa pjê ita wÿrme cumã ikra pê Jeju ata kujate. Ata ca ha me cumã harê — hane. Ne pê ca ramã ita na meijarên pa. Na wa ite curmã ihkàhhôc ita kam hipêr ahna me amã amji jarên, ne ahna me amã ihhôc, mâr ca me cahyt ne ahna me ijahkre pej.

⁴⁻⁵Pê mam nee jûm Jeju Crixto na Pahpãm te amji kam hapac xà ata jahkre pej nare. Ne ita caxuw Pahpãm Carõ Pejti te Pahpãm jarkwa to mehcahôc catêjê me, me ipê Jeju jarkwa na memprar catêjê mã toajpê, ne me imã to hahkre. ⁶ÿhÿ, ita caxuw ca ha Jeju tycxà ata kôt, me icuxà me apê me pajõ Pahhiti pê Jeju Crixto jĩ pyrãac. Ne me ca, me apê mehcahkrit atajê me, me pa, me ipê Juta catêjê me, ajpên kam me pahpyxit peaj. Ne por pê Pahpãm ramã mehwÿ mã ampo pej cunea to awjahkre atajê, ca ha atÿj hanea ne me cuxà me acwa.

⁷Pê Pahpãm carôt tÿjti ata hàhcaprĩa kam, me amã ipê harkwa na iprar catê na ixãm ne ikujate, mâr wa me amã harên xà impejti to harê. ⁸⁻⁹Ne wa pa, me cupê Pahpãm tekjê atajê japyre mã icrire na amji to hajÿr cacrô, pê Pahpãm ihtÿj imã ijâpên xà impejti ita gô. Ite meapê mehcahkrit atajê mã Jeju Crixto te amji kam hapac xà tuw pejti jarên xà kôt harên to capô partu xà caxuw, pê imã ijâpên xàita gô. Por Jeju te amji kam hapac xà impejti jakràjti ata, wa me amã harên to ipa. Mâr ca me acunea Pahpãm te mam pjê ton xwÿjrea na, me amã amji kam hapac xà to ipipê nare ata jahkre pej. Ne Pahpãm ita pê, por pê Pahpãm ampo cunea to ata. ¹⁰Ne ita caxuw cumã, mehcunea te Pahpãm te amji kam hapac xà jahkre pej na, me to prãm. Ne quê ha, por ampo carõ carôt tÿjti atajê me, pjê me côjkwakam me hõ pahhi catêjê atajê cunea, quê ha me papê Pahpãm na mehwÿ pupun xà ata kôt, me Pahpãm te ihcunea na amji jahkre pej catia na me hahkre pej. ¹¹Pê mam, pjê ton xwÿjrea na, Pahpãm ramã Jeju Crixto pê me pajõPahhiti te me pahto impej na to amji kampa. ¹²Cu pahtÿj Jeju to amji mã me pahhimpej, ne ahna me ajpên hõnco. Cwÿrjapê cu ha nee Pahpãm mã me pahcahôc na me pajãhtàt nare

kam, cumã me pahcakôc. Ne cu ha pahtÿj cute me pahkam hapac na me hahkre pej. ¹³ÿhÿ, he me acwÿrjapêa wa me hacjên xà ita kam amji pupun cakrô, ca ha nee ate me ipupun xà ata kôt me amã amji kîn nare nare. Ne quêt ite me ato impejti xà caxuw ri, ite amji pupun kêanre xà ita.

Pawrô te Pahpãm mã mehcajrên xà

¹⁴Ampo itajê cunea cwÿrjapê wa me pajô Inxũ Cati cuna mã ikôn krã na ijÿr, ne ijôtpê cumã me acajrên. ¹⁵Ampeaj kam Pahpãm pê me pajô Inxũ Cati. Ne cupê pjê cunea me, cõjkwã kam ampo kra me, ikre ry cunea me, por amji mã me to ihhimpej atajê cunea Pãm Cati. ¹⁶⁻¹⁷Wa hõtpê cumã me acajrên to hane he:

— Me ijô Inxũ Cati, ampeaj kam acarôt tÿaj to ihtÿj, ne gâhcjãjrên cati. Na ca ha Acarô Pejti kôt, cute me amji kam hapac xà caxwãm pê mecumã acarôt tÿjti ata gô, por ate amji kam gapac xà pejti carôt tÿjti ata kôt. Mâr quê kypê Jeju Crixto to amji mã mehhimpej nare. Ne ajpênkam mehhônco ata pê ihhêj rûm me caxwãm pê cute apu ihkrî. Ne pom ampo pâr pjê impejti kam harê to ihcuhhê, ne ihtÿj ipicamên to ipa, ita kôpit na, ca ha me cumã mehcunea mã ajpên kinti ita to apicamên to mō. Ne ampeaj kam akra Jeju mã me ikîn catia, ne nee cumã jûm kîn nare nare.

¹⁸— Ne akra pê Jeju mã me ikîn ita pê ihhêj rûm kenti kãa nō ata pyrãac, ne cupê ihhêj rûm cõxwa tua pyrãac ne catia, ne ihhêj rûm cupê pōti pyrãac, ne nee hicu xà hamreare. Ne ampo pejti catihti itajê jîkjê na mã, akra mã me ikîn te hajÿr. Na ca ha me caxwãm pê mecumã to hahkre, mâr quê mehcunea mã akra mã mehkinti ita te, amji kam hapac xà itajê jahkre pej pa.

¹⁹— Jũ wÿr quê me ixũmre nō akra Jeju mã me ikinti xà catia to cati ata na hahkre pej, cwÿrjapê ca ha cute Jeju Crixto mã ikinti itajahkre pej na me akwÿ tehcajpa, quê me kam hapac kam tē, ne me hahkre pej. Mâr ca me cumã amji gō, quê me cupê apyrãac to mō, ne mempejti ne.

²⁰— ÿhÿ me ijô Inxũ Cati, me ikam acarôt tÿjti ita kam, ca atÿj me imã, pom ite ampo na me awÿr, ne me to amji kam ijapac xà atajê jirôa pête me imã hõr na, imã me gahkre pej. ²¹Ne me imã me icunea pê Jeju Crixto na mehkwy, ne wa ahna me ajpên hõnco. Ne wa acatihti me acarôt tÿjti me, gâhcjãjrênti na apyrên me ijakryti na, me amã amji jarên to prãm, rohnÿtti mã. Netahnaa, hamre — hane. Hõ, wa ita na ijôtpê Pahpãm mã me acajrên.

Me papê mehkwy pyxit peaj, na cu ha ajpên to mempej

Pirip 2.1-4; Coroxo 3.12-17

4 ¹ÿhÿ me ikwÿ, pê Pahpãm me ato impej ne amji mã me acapi, mâr ca cute amji kam hapac xà kôt me apa. Ne ita cwÿrjapê wa

me awỳ, hePahpãm jàpên xà incwỳrjapê wa ipê me hacjên xà kam ikrĩ catê. Ne pa wa me awỳ, mâr ca me apê Pahpãm tekjê atajê, cute amji kamhapac xàa to amji kam me gapac to me apa. ²Ne nee me hirôa pê amji to me acati to me apa prãm nare. Ne ampo na amji mã aprĩa kam, gũcanâr to me apa. Ne amji mã me akwỳ cupa. Ne neeampo na ame amji to ihtỳj tu to me apa nare. Quê jũm ampo to kên, ca ha nee kam me acryc nare. Ne quêt me amã ihkĩan kam, me gakryti kam cumã me gũcanâr to me apa. ³Pahpãm Carô Pejti te me acunea mã ajpên kĩnti ton, ne ajpên kam me apejti na me aton. Cwỳrjapê ca ha ajpên mã me awcanã, mâr ca atỳjajpên kam me ahônco to me apa kam me to acrà.

⁴Xà ajkĩ Pahpãm Carô Pejti te amji kam hapac xà jàhtô? Hãpà! He Pahpãm Carô Pejti pyxit peaj. Cwỳrjapê ri ajpên kam me pahcuneapyxit peaj. Ne ihhêj rũm me papê Jeju jĩ pyxit peaj ata pyrãac. Ne hanea ne pjê ita kam Pahpãm te me pahcunea to ihhimpej xà pyxit peaj atamã, cu ramã me hikaj xà caxuw ri Pahpãm te me pahcapi. ⁵Ne hanea ne me pamã me pajô Pahliti pyxit peaj. Ne pahte Jeju to amji mã me pahhimpej xà ata pyxit peaj. He ampo pyxit peaj ita caxuw ri cô to me pahcumrâr xà. ⁶Ne hanea ne Pahpãm pê, por pjê cunea kam amji mã me to ihhimpej atajê cunea jô Inxũ Cati pyxit peaj, ne mehcunea to ihhimpej. Mã ihtỳj hàpên xà atajê kam ihkôat me apê, ne me Pahpãm ita ri me pahcunea kam ihkrĩ, cwỳrjapê cu ha pahte amji kam me pajapac xà pyxit peaj to, amji kam me pajapac to me papa kam me to pancrà.

Pê Pahpãm ahpÿanre na me pamã pahte to amji japackre xà gô

Roman 12.3-8; 1 Petrô 4.10-11

⁷⁻⁸Xà Pahpãm te me pahcunea mã pahte me hahkre pej xà pyxit peaj jôr? Hãpà! He cumã me pajàpên xà caxuw ri, cute ahpÿanre na mepamã pahte amji kam me pajapac xà te to amji japackre xà jôr, Jeju Crixto te amji mã ahna prãm ata na. Ne pê Pahpãm jô kàhhôc kam, ramã rỳ pêa mã jũm Jeju na ihhôc to:

“Quê ha me curê xwỳn jàhtôa ne tohjê,
ne ma hacpÿ mã côjkwa wỳr api.

Ne pjê kam mehkwy ame ipa atajê mã cute ampo jôr xà atajê gô”
hane.

⁹Hũjarên xà ita kôt, cu ha pahtỳj côjkwa wỳr Jeju jàpir na me hahkre pej ne me to amji japackre. He pê nee Jeju pô rũm, pjê ita wỳr pit mã iwryc nare, ne hanea ne pjê krac ri mehtyc carô krĩ xà ata wỳr wrỳ. ¹⁰Ne taa hanea ne hacpÿa mã côjkwa wỳr api ne hakren tu, cute ampo cunea to ihhimpej xà caxuw. ¹¹Ne Jejua te ri ahpÿanre na, me pamã pahte amji kam me pajapac xà te amji jahkre pej jôrpar. Ne cute me pahkwỳ capi,

mār quê me cupê harkwa na memprar catêjê, ne mehkwy pê harkwa to me cumã ihcakôc catêjê, ne mehkwy pê Pahpãm te me pahkên pê me pahpytâr xà ata wÿr me to ipipkjêrcatêjê, ne mehkwy pê Jeju na mehkwyã jamâr catêjê, ne mehkwy pê mehkwyã mã ampo to hahkre catêjê. Ne Pahpãm te mehkwy atajê mã ahpyãre nacute me amji kam hapac xà te amji jahkre pej atajê jôr, me hâpên xà itajê caxuw.

Cu ha pahte amji kam me pajapac xà to me amji jĩ tÿj to me mō

¹²Ne mēr ampo caxuw mã cute me pamã mehkwy itajê jôr? He nee mã ampo caxuw nare. He Pahpãm mã me pajâpên xà ata pê ihwÿr me to mepapipkjêr xà caxuw ri, cute me pamã mehkwy itajê jôr. Ne me pajâpên xà ita kôt rime papê mehkwy, cu pahÿtÿj me papicamên to me mō. Ne me pamôr xà ita pê ihhêj rûm Jeju Crixto jĩ picamên to môr pyrâac. ¹³Ne cu ha me pahcunea me papicamên to me pamôr ita kam me to pancrà, ne JejuCrixto to pit mã amji mã me pahhimpej to ajpên kam me pahhônco tÿaj to me papa. Mâr cu Jeju cuxà, pahte amji kam me pajapac xà itajêã to me amji kà to me amji jĩ tÿj to me mō.

¹⁴Ne cu ha nee hipêr me papê ahkrare pyrâc, ne jûm te me pamã ihhêj xi xà ata kôt, Jeju to amji pê me pajapac kêt to me pamôr nare. Nãmri quê ha me pahnô te hajÿr na, quê ha cupê ihhêj rûm kôc te amji wÿr pjê kam pihhô incrà to imprar ata pyrâac, na quê ha ihtÿj mehhêj xi catêjê te aracri mehkên mã me irên prãm atajê kampa, ne ihtÿj jû ri me ipa xà ata kam ihkôt me ipa. ¹⁵Ne Pahpãm mã cute me hajÿr catêjê kôt, me pahto prãm nare. Ne quêt cumã me pamã ajpên kinti kam me pahcakôc xà kam, me pahhêj xinare na, cumã me pahto prãm. Cu ha pahte me hajÿr to me pamôr na, cu ha me papê me pahkrã pê Crixto ata pyrâac ne me ajpêan. ¹⁶Ne Crixto pê me pahkrã, cu ha kam me pahhônco, cwÿrjapê quê me papê hĩa pyrâc. Ne ahpyãre na me papê hĩ kam cukrã xà atajêpyrâac, mã taa pyxit peaj me pahcunea to ihhimpej. Ita kôpit na cu ha me pahcunea Crixto te amji kam hapac xàã kôt me ajpên kinti, kam meajpên tehcajpar to me papa. He pahte me pahkwÿ to me hajÿr to me papa xà ata pê Jeju Crixto jĩ te ipicamên to môr pyrâac.

Cu ha quêt me pahte amji kam me pajapac xà tuw pejti ita kôt me papa

Coroxo 3.5-11

¹⁷⁻¹⁸Cwÿrjapê wa ha Pahhiti jarkwa na me amã awjarê, ca ha atÿj catyt kam me ikampa. Por nee Pahpãm to amji mã mehhimpej nare atajê teamji kam hapac xà atajê wa ha me amã ihcawpa, mâr ca nee hipêr cute me amji kam hapac xà kên atajê kôt me apa nare. He cute amji kam mehapac xà itajê kôt hamreare. Ne ihhêj rûm me cupê awcapâtkôti kam ame ipa, ne nee me ampo pupun nare atajê pyrâac. Ne nee me caxwãm pê me Pahpãm pupun ne me hahkre pej nare. Ne cute me hajÿr xà ita

kam ri ma ame Pahpām te amji kam hapac xà tuw pejti ita caca, ne cute mempar cupate me hapac jihê, na ri me cupê hahkre kêatre. ¹⁹Ne nee ajte amji jū na mehphām nare, mā mānea mā mehkrā kên kam, cute mehkhên ton xà itajê kam me amji cajpêr nare na me to. Mā mehcunea ampo kên xen xà pahām nare atajê mā, me amji jōr to me ipa, ne ihtÿj me ton to me ipa kam me to incrà tu.

²⁰⁻²¹He nee Jeju Crixto te amji kam hapac xà te hajÿr nare. Ne pê ramā jūm me amā Jeju te amji kam hapac xà to hahkre, ne me amā harê. Na ca ramā ate mempar ne me hahkre pej, ne kam me amji hōnco, cwÿrjapêca ate amji mā me cute amji kam hapac xà incwÿr. ²²Ne mam me amā ampo kên ton to me ipa xà ata pit na me amā prām. Cwÿrjapê ri ate amji kam me gapac xà tūm kêanre ata ihtÿj me amāihhêj, na ca hān ne atÿj ihkōat me akên mā me acjêj. Cwÿrjapê ca ha mam ate amji kam me gapac xà tūm ata mā me hikra, ne neehipêr me ahna prām, ne me to amji japackre nare. ²³Na ca ha me ate amji kam me gapac xà wej ita me, intuw to me ahpa, ne ate amji kam me gapac xà intuw ata, ca ha amji mā me huwahi to me apa. ²⁴Ne pom cu hān ne me pahkà tūm to pōj, ne intuw mā me amji jacjê, ne mehtūm jicu ne me curê, jīkjê na, ca ha ate amji kam megapac xà kên tūm ita to me tojnō, ne me hīcu, ne intuw ita ca ha amji mā me acwa, ne me huwahi, ne me to apa. Ne Pahpām ri me amā cute amjikam hapac xà pejti jōr to ipa. Mār ca me apê me hūràac, ne me ate amjikam me gapac xà impejti ne, ne nee ihhêj xi nare, ne ampo cunea kam catytkam, Pahpām cuna mā me apejti na me apa.

Cu ha me ajpên to me pampej to me papa

²⁵Cwÿrjapê ca ha nee hipêr ajpên mā amji to ame ahêj nare. Ne ahpÿanre na quêt catyt kam ajpên mā me acakôc to me apa. Ampo na? Heme papê Jeju jī kam cukrā xà atajê pyràac, na ri ajpên kam me pahpyxit peaj. ²⁶⁻²⁷Ne ca ha me anō te ame akwÿ nō kam acryc na, ca ha nee kam acryc kam acrà nare, ne pyt xàr xwÿjrea na, hacpÿa mā ajpên mā meacaprī. Nāmri ca ha ate nee kam acryc jicu nare, ne mānea mā kam acryc na, quê ha apê me pahcurê xwÿnti pê Xatanaj te amji kam hapac xà kōtapa catê, na ca ha atÿj Pahpām to kên to apa. ²⁸Na ca ha mam ajco me gāhkij to me apa atajê, ca ha me gāhkij jicu, ne me gāpên kam me atēm pyrentu, mār ca me akrā kreti te amji jahkre pejti kam, me amji to ajpa, ne me akwÿ pê hamreare atajê tehcajpa.

²⁹Ne nee ame acakôc xà kên kam amji kīn nare atajê to me acakôc to me apa nare. Ne me acakôc xà impejti kam amji kīnti to ca me akwÿmā me acakôc, ne ma me to impej to me apa. Ne cute me Pahpām kam hapac na mehtehcajpar xà atajê to, ca me acakôc to me apa, mār quê me akampaatajê, ma me ipicamên to me mō. ³⁰Nāmri ca ha ate me hajÿr nare na, ca ha cama Pahpām Carō Pejti mā amji kīn nare, ne ihpeacre na

me to. Ne me akam Pahpām Carō Pejti te ihkrī xà ita pê ihhêj rûm, cute me akam amji japyr̃ na ihhōc. Cuteme apê hō tekjê na me ato apipê xà caxuw. Ne ihkōat ca ha at̃j jū caxuw cute me akên pê me apytār na me amji jahkre pej.

Cu ha ajpên mã me pahcaprī to me papa

³¹Ne ampo kên itajê ca ha me hīcu he. Ca ha jūm me ajpên kam acryc ne ma ame ajpên mã acaprī caca ata, ca ha amji pê ihcaca ne hīcu, neat̃j hacp̃yã mã ajpên mã me acaprī. Ne me gâhcurẽ me, me gâprê jīcu, ne quêt me amã ajpên kīnti, ca me ajpên caprī to me apa. Nenee ajpên mã me gâkjêr nare. Ne nee ame hūn kên to me apa nare. Ne nee ame ajpên curẽ to me apa nare. ³²Ne quêt cama ajpên mã me acaprī, ne ajpên mã me apejti ne. Ne Crixto kam me ahōncō, ita cw̃yrjapê ri Pahpām te ramã ate me to kên xà atajê to tojnō ne me hīcu. Na ca ha cuxà ate me ajpên to kên atajê to tojnō ne me hīcu.

Cu ha ampo kên cunea jīcu ne quêt catỹt kam me papa

Coroxo 3.16-17; 1 Jowãw 1.5-10

5 ¹Me apê Pahpām kra, ne cumã me akīnti, cw̃yrjapê quê ha me apêhūr̃aac na amji kôt me ato prãm. ²Crixto mã me akīnti na ri, me acw̃yrjapê ihtyc xà mã cute amji jōr. Mã Pahpām te cumã me akīnti ita na hōmpun, ne ampeaj kam haneane ahna Pahpām mã Jeju kīn. Ne cumã Jeju tyc xà ita pê ihhêj rûm ampo cacô cuxwati impejti te ihcajpuaw ata pyr̃aac. Na ca ha Jeju cuxame amã ajpên kīnti to amji mã me ahimpej to me apa.

³Ne ramã me apê Pahpām na mehkwỹ, cw̃yrjapê ri nee me ate ampo kên crê itajê caxun xà nare he. Mam ca ha nee ahti na ame cupê mehprōcaxun nare, quê nee pyjê xw̃yjê ahti na ame cupê mempjê caxun nare. Ne hanea ne nee menxyre impijapit to ame apahàm nō to me apa nare. Ne ihcote na, ca ha hanea ne nee gâhcukrêj to pit mã amji mã cuprôn to me apa to me amjijapackre nare. Ampo na? He jūm te haj̃r to ipa xà ata, nee Pahpām to amji japackre nare, ne hàhcukrêj itajê pê ri ihhêj rûm me hōpahpām, ne ampeaj kam cumã ihkīn, mã to pit mã amji kam hapac to me ipa. Ca ha nee me anō te ampo kên itajê nō caxun to kênre xàhamreare ita kam, jū w̃yr̃ quê jūm ahna me anō jarê.

⁴Ne hīcu xà kam, ca ha nee ame acakôc xà kam, me pahpahàm̃ti atajê to me acakôc to me apa nare. Ne nee me acakôc xà kôt hamreare atajê to me acakôc tome apa nare. Ne nee ca ha me garkwa x̃y xà tūmti kēanre atajê to me acakôc nare. Ne quêt Pahpām te me amã ampo pejti cunea jōr itajêpyrên me gakryti na, cumã me amji jarê.

⁵Xà quê ha pijamã cute ampo kên crê itajê ton to me ipa catêjê nō, Pahpām me Crixto himpej xà krac ri me axà? Hãpà! He jūm xàr xà

hamreare na ramã me pamã hahkre pej. Ampo na? He Pahpãmmã me cupê ihhêj rûm pahpãm cahac krekà to amji mã mehhimpej catêjê pyrãac, ne mehkêanre. ⁶Nãmri quê ha jûm te awÿr ihtêm, ne pom wa ite ampo kên tète me amãn atajê nõ to amã ihhêj prãmte, hÿrmã gator na, ca nee me harkwakôt hamreare atajê kam gapac, ne ihkôt amji ton nare. He ampo kên itajê cwÿrjapêa ri Pahpãm me kam incryc. Ne quê ha ihtÿj jû caxuw, por jûmjê te nee me kam hapac nare atajê kam incryc, ne ame to kêanrene, ne ihtÿj mehkên mã me curê. ⁷Cwÿrjapê ca ha nee cute me hajÿrjê to me amji japackre, ne me to amji kwÿ nare.

Cu ha pahte amji kam me pajapac xà tuw kôt me ampo cunea jahkre pej

⁸ÿhÿ, he pê ca mam ihhêj rûm me apê mehtyc pyrãac, ne me akam awcapãtkô pit. Mã pyt ahcujro, cu pahtÿj me rît ne me ampo pupu, itajikjê na mã Pahhiti jarkwa ihtÿj me amã ampo pej to pit mã hahkre to mō. Ne ate Pahpãm na mehkwy na me amji ton xà ata caxuw, ca ha atÿj ita caxuw ampo pej cunea pupu. Cwÿrjapê ca ha ate ampo pej pupun xà atajêa kôt me amji ton to me apa, ne me to.

⁹ÿhÿ, ca ha ate me Pahpãm jarkwa pê hàhcujro xà pyrãc ata kam me hajÿr to me apa na, ca ha me apê jûmjê pejti atajê, ne catyt kam ameapa, ne me acakôc xà hêj xi nare pê catyt kam, ampeaj kam atajê to pit mã, me acakôc to me apa. ¹⁰Ne ca ha ate me hajÿr to me apa na amji to me gâhcukjêr to me apa na, ca ha me Pahpãm cajpuaw. ¹¹Ne por cute amji kam me hapac xà kêanre kam, Pahpãm jarkwa pê hàhcujro xà pyrãcti ata kaj na, awcapãtkô kam me ipa atajê jãpên xà cunea kôt hamreare. Cwÿrjapê ca ha nee mehkôt me apa na amji toprãm nare. Ne quêt mehcunea kam mare mã, ca ha ate amji kam me gapac xà pejti jãhcujrohti to me apa. Mãr quê ahna me apupu, ne cute me apupun xà ita kôat me amji kên itajê pupu, ne ahna me amji jahkre pej.

¹²ÿhÿ, ampeaj kam ri cute amji kam me hapac xà atajê kêanre, cwÿrjapê cu ha nee cute me ampo kên to ipimxur, ne aracri ame ton atajê na, nee me pahcakôc xà nare. Ampo na? He kypê ahna me kam me pahpahãm nare. ¹³Quê ha hàhcujro xà to ampo kujro, quê ha hirã pê hõmpun xà. Ne por hàhcujro xà te ampo jakati prãti kujro ata, ihtÿj ma harwrÿ itakôt ahcujro. Ita kôpit na quê ha mehkra kên catêjê atajê, ate amji kam me gapac xà impejti na me apupu, ne me akôat quê ha ramã cute meamji kam hapac xà kêanre na me amji jahkre pej. Ne me akôat quê hahanea ne cute amji kam me hapac xà impejti to me ipa. ¹⁴Ne pê Pahpãm ramã me pamã ita to ihcakôc to hane he:

“Por ate amji kam me gapac xà kêanre ata kôt,
ihhêj rûm ramã me atyc atajê,
me ampra!

Ne me atyc ita pê me to xa,
 quê ha Crixto me amãate amji kam me gapac xà cujro,
 ne hacpya mã me ato tîr!” hane.

Cu ha me pahkrã kreti kam me amji to ajpa

¹⁵Cwÿrjapê ca ha ate amji to ame apijapar xà itajê na me amji kôt hakop to mempeaj ne. Ne nee ca ha me apê cute me amji jahkre kêatre atajê pyrãc nare, ne quêt me akrã kreti te amji jahkre pejti kam me amji to ajpa. ¹⁶Ne amcro atajêa kam, quê ha mehkên catêjê me hàhtô. Cwÿrjapê ca ha atÿj amcro cunea kam Pahpãm mã me apê, ne nee jÿ caxuw amcro nô to me apictor nare. ¹⁷Ne nee ca ha me apê cute me amji jahkre kêatre atajê pyrãc nare, ne quêt me pajô Pahhiti mã ampo na me pahto prãm atajê to pit mã, ca hame gâpên to me apa na amji to me ahcukij.

Cu ha Pahpãm Carô Pejti ata kôt me pajô Pahhiti mã me cre

¹⁸Ca ha côxÿhti to amji mã me ahimpej jicu, ne nee hipêr me to akôm quê me ato ipipãn nare. Ampo na mã wa me amã ihcawpa? He quê ha ihtÿj ate amji kam me gapac xà cunea kam ato kên. Na ca ha quêt Pahpãm Carô Pejti to amji mã me ahimpej to me apa. ¹⁹Ne ca ha me acakôac kam ajpên mã me Pahpãm na increr xà cunea to me acrer to me apa. Ne hanea ne mam Pahpãm te amji kam hapac xà na me ahna increr xà ata to me cumã cre. Ne cute ampo ton xà itajê na curmãme cumã increr xà ata to me cumã cre, ne me amã amji kïan kam me cumãcre, ne catihti pyrên me gakryti to me cumã cre. ²⁰Jeju Crixto kam me ahônco, cwÿrjapê ca ha ampo pej me, ampo te me ato jÿ mãn xà atajê mea mã hÿrên me gakryti na, me pajô InxÿCati pê Pahpãm mã me amji jarê. ²¹Ne pom ca amji mã Crixto cupa, ne amji caxuw me kampa ita cuxà, ca haatÿj ajpên kam me gapac to me apa.

Pê Pawrô mehprô catêjê japackre

Coroxo 3.18-19; 1 Petrô 3.1-7

²²Ne pyjê pê mempjê prô itajê, pom ca amji mã me Pahpãm kampa ita na, ca ha amji caxuw me apjê kampa. ²³Ne ampo na mã wa ame amã ita to hahkre to hane? Nee mã ampo na nare. He Crixto pê mehkwy krã pyrãac, ne mehkwy pê hÿ pyrãac. Necupêa ri me to ihhimpej catê, ne cupê mehkwy kên catia pê me hÿtâr catê. Jÿkjê na mã, me apê mehprô impjê catêjê, ca ha atÿj me aprô to me ahimpej. ²⁴Cwÿrjapê ca ha me apê me apjê prô catêjê, ampo cunea na amji caxuw me apjê kam me gapac to me hanea, pom quê Crixto na mehkwy amji caxuw me kampa he.

Pê Pawrô mempjê catêjê japackre

Coroxo 3.18-19; 1 Petrô 3.1-7

²⁵Mempjê catêjê, quê ha me amã me aprô kïn hanea, pom quê Crixto mã mehkwy kïn, mã me hahpan xà na ihtyc he. ²⁶⁻²⁷Ampo na pê Jeju me

papê mehkwỹ mã ty? Nee mã pê ampo na ihtyc nare. He pê ihcunea na me papê mehkwỹ atajê kên pê me pahtoimpej partu to prãm to pê ty, mãr quê nee me pahkam ampo kên crire nô hamreare ne. Ne me pamã me pahte amji kam pajapac xà to impej neihcuhhõ, mãr quê ihtetetti ne. Ampo na? He ramã me papê Jeju jĩ pyrãac. Ne harkwa ita pê ihhêj rûm cô te ampo tûm cuhhõn pyrãc, netoa ri ihtÿj me pahte amji kam me pajapac xà cuhhõ ne to impej. Ampo na? He cumã Hûm mã cute me pahto ipipê xà ata kam me pampejti kam, ampo kên tûm nare na me pahto prãm. He me papê hĩ pyrãac na ri. ²⁸Ne me hûmre mã quê ha mehprõ kîn hanea, pom quê cumã amji jĩakîn he. Quê ha jûm mã ihprõ kîn ne to impej na, quê ha cumã ihkîn ita pê ihhêj rûm, amji jĩa kîn ne to impej. ²⁹⁻³⁰He xà quê ha ajkĩ jûm mã amji jĩa kîn nare ne cumã amji curê? Quê! He ihtÿj cumã harte, ne ma hamã. Ita na mã Jeju Crixto mepapê mehkwỹ to, ne me papê hĩ kam cukrã xà pyrãac. ³¹Pê Pãhpãm mam me panquêtjê mã harkwa ta ne me cumã:

“Quê ha me hûmre mehprõ,
ne me hûmjê me, menxyrxwÿ jicu,
ne hixime ajcaxê ne ajpên kam me pyxit peaj” hane.

³²Ne pom Pãhpãm te me pamã me pahprõ me, me pajikwa tuw xà to hũjarên xà ita, pê mam nee me hahkre pej nare. Ne ita caxuw cupê Crixto me, mehkwỹa pyrãc, ne ajpên kam me pyxit peaj na, ramã pahte me hahkre pej. ³³Ne hanea ne me pamã to hahkre to hane he. Quê ha me hûmre mã mehprõ kîn hanea, pom quê me cumã amji jĩa kîn he. Ne mehprõxwÿjê, quê ha ihtÿj amji mã mempjê cupahti to me ipa.

Cu ha me pãhpãmjê me, me panxyrxwÿ kampa

Coroxo 3.20-21

6 ¹Ne me apê mehkra xwÿjê, ca ha atÿj amji mã me apãmjê me, me axyrxwÿ kampa, neamji mã me hũpahti to me apa, me pajõ Pãhhiti jarkwa kôt. Hõ, quêt catyt kam me apa xà itajê te hajÿr he. ²⁻³Ne pê Pãhpãm mam ramã me panquêtjê kra mã harkwa ta, ne mecumã ahna hũjahkre to hane he:

“Ca ha atÿj amji mã, me apãmjê me, me axyrxwÿ kampa,
mãr ca apej pêa mã me apa,
ne amji to me apijapar to irya ne, pjê ita kam” hane.

⁴Ne me apê me hûmjê me inxyrxwÿ xwÿjê, ca ha nee ame akra mã ame quêt nare, ne nee ame cumã mencryc ton nare. Ne quêt me pajõ Pãhhiti jarkwakôt me cumã aprĩa, ne catyt kam me cumã cute amji to me ipijapar

xà to hahkre. Ne Pahpãm krã kreti te amji jahkre pejti te me hapackre xà atajê to, ca me hapackre.

Cu ha me pajô pahhi catêjê kampa

Coroxo 3.22-4.1; 1 Timot 6.1-2; Tito 2.9-10; 1 Petrô 2.18-25

⁵Ne cama me cumã me gâpên to me apa catêjê xwÿjê, ca ha atÿj amji caxuw me gô pahhi kampa, ne amji mã me hûpahti to me apa to hanea, pom ca me amã amji kînti kam, amji caxuw me Crixto kampa ne me hûpa he. Hôhô, cu ha me hane. ⁶⁻⁷Ne nee cute me gâpên xà impejti na me garên prãmte ahêj, ne cama mento kam mare mã, me gâpên xà to mempejti to me apa nare. Nequêt me cumã me gâpên prãam kam me gâpên to me apa to hanea, pom ca Crixto pit mã me apê he. Ita na ca ha me hũmre mã me apê. ⁸Ne me amã me gô pahhi catêjê me, me gô pahhi nare catêjê me, Pahpãm te ahpÿanre na ate me gâpên xà impej ton atajê jahpan xà na, me amã hãmjôr na, ca me to amji japackre.

⁹Ne me apê hõ pahhi catêjê xwÿjê, ca ha me amã me hâpên catêjê to mempeaj ne, ne me hâpên xà na me cumã quêt jicu. Ne camacôjkwa kam me gô Pahhiti mã ajwar me gâpên na, ca amji to me amji japackre. Ne me pahcunea pipên pit, ne cumã me pajâpên xà atajê kôt, quê ha me pahto ajpëan, ne catyt kam ahpÿanre na me pahcunea mãhãmjôr xà atajê to amgô.

Pê Pahpãm Xatanaj me, me papijapu xà caxuw me pamã hàprê xà gô

1 Texarôn 5.8-11; 1 Petrô 5.8-11

¹⁰ÿhÿ, Jeju kam apê me ikjêjê, wa ite me amã ihhóc jicu xà ita kam, wa ha ate mehkên me, me apijapu xà to me amã hahkre. He me papêihhêj rûm krãhtare kwÿ pijapu xà caxuw, cute apu amji mã hàhcuprôn pyrãac. Cwÿrjapê ca ha atÿj me pajô Pahhiti carôt tÿjti kam me ahônco, mãr quê taa me amã me acarôt to ihtÿj. Ne carôt tÿj ata kôt ca hame apijapu xà caxuw apu amji mã me ahcuprô, mãr quê me pahcurê xwÿn pê me apytà.

¹¹⁻¹²Ne mër me pahcurê xwÿn jÿjê me, cu ha me ajpu? He nee mã jÿmjê nare, he ampo carô kên pahtÿjti atajê me, me hõ pahhi pê Xatanaj me ri me papijapu xà. Ne nee mã mehĩ nare, me cupê ampo carökên jô pahhi catêjê pê cupê jarôti me, cu ha me ajpu. Ne pjê cunea kam ampo kên to mehhimpej, ne mehtahtÿjti, ne me hûpahti, ne ihcunea nacute me amji kam hapac xà kèanre. Ne mencwÿrjapêa ri ihhêj ne ramã pjê kam awcapàtkô, ne ihtÿj me cumã me papictor na me pahto prãm. ¹³Cwÿrjapê ca ha me apê krãhtare kwÿ atajê te hàprê xà to amji tÿj, ne to me amji jamã pyrãac. Ne Pahpãm te hàprê xà to meapytàr xà caxuw, ca ha me apijapu xà te me apytàr xà cunea to me amji tÿj. Mãr quê meacurê xwÿn me akam tẽ, ca atÿj me apijapu kam tẽ, ne me ajpu, ne me tohjê, ne me to hamre. Jirô pê ca ha nee me hûpa te me gô to meatêm nare, ne atÿj me acuhhê rohnÿtti mã.

Me papê krãhtare te hàprê xà to amji tỳj atajê pyrác

¹⁴⁻¹⁵ Por krãhtare hãn ne wakỳti te hitô krekà te hûtàr xà to amji tỳj ata kôpit na, ca ha Pahpãm te me amã ate amji kam gapac xàpejti jôr ata kôt, ca ha catyt kam me apa. Ne ate amji kam me gapac xà impejti ata pê ri me apytàr xà. Ne por krãhtare hãn ne ihtu nahê xà tỳjti to ihtu na hê ata kôpit na, ca ha ate amji kam me gapac xà impejti, hêj xi nare to me apa. Ne por krãhtare hãn ne hõ parkàtỳjti mã amji jacjê, ne ma ramã me to imprar xàa caxuw to ihcuhê ita kôpit na, ca ha jũ kam atêm xà caxuw, ramã apu amji mã me gãhcuprõnhiahpuro. Mãr ca mehcunea mã, Jeju te hacpyã mã Hũm wỳr me to ipipkjêr mã me cumã ajpên kìn na harê.

¹⁶ Ne por krãhtare hãn ne kruw pôc pĩr xà caxuw, wakỳti te hĩ tète hàmtàr xà to amji tỳj ata kôpit na, ca ha Jeju to amji mã meahimpej xà ata to me Xatanaj pê cupê jarôti jô pahhi pê amji tète me amtà. Ampo na? He catyt kam me papa tète cute me pahhi kwĩn, cu ame pahpec, mã cute me pahkam ihtêm prãmte ri ihtỳj me pahcyt to ipa.

¹⁷ Ne por krãhtare hãn ne ihkrã cahhêc cupate wakỳti te ihkrãhkà tỳjti to amji tỳj ata kôpit na, ca ha Xatanaj te akrã kam me amã ateme ampo kên ton to me apa to hahkre cupate, ca ha atỳj Pahpãm te ramã ampo kên itajê pê me pahpytàr na me to amji japackre. Ne por krãhtare hãn nehũhkra to wapohti xwahhihti cwa ata kôpit na, ca ha amji mã me Pahpãm Carô Pejti te me amã Pahpãm jarkwa jôr atajê juwahi to impeaj ne.

Cu ha pahtỳj me awcanã, ne ma Pahpãm mã mehkwỳ cajrên

¹⁸ Ne ate ampo itajê cunea to me amji tỳj to me apa xà ita kam, ca ha Pahpãm mã me acakôc xà na, amji caxuw me Carô Pejti na ahwỳ, mârquê me atehcajpa, ca cumã me acakôc. Ne nee ame apec ne ahna me amji jicu nare, ne atỳj me awcanã, ne ma Pahpãm mã mehkwỳ cajrên. ¹⁹ Ne hanea ne Pahpãm mã me icajrên to hane he:

— Me ijô Inxũ Cati, ca ha Pawrô mã cute ampo jarên xà atajê to hahkre, quê me cumã hũjarên xà kam hãn ne nee amji na hàhtàt nare, mâr quê mehcunea, hirãa pê, por pê mam nee ajco me Jeju jarên pejti kam hapac nare atajê kampa, ne me hahkre pej — hane.

²⁰ He wa me hacjên xà kam ikrĩ cacrô, cormã ipê Jeju jarkwa na iprar catê, na wa itỳj ita ri mehcunea mã Jeju pê me pahkritxwỳ jarên xà impejti to harê. Na ca ha atỳj ita na Pahpãm mã me icajrên, mâr wa ite me cumã icakôc to jũ mãn xà ata kam, nee amji na ijãhtàt nare, ne catyt kam me cumã awjarê.

Pê Pawrô hicu xà kam hipêr amji jarê

Coroxo 4.7-8

²¹⁻²² Ne wa ha ma me awỳr me pahtô kĩnti pê Tiquicô pê Pahpãm mã hàpên catê impejti ata kujate, ijô kãhhôc ita to. Quê ha curicato ne taa

me amã ihcunea na ijarẽn pa. Ne cute me amã ijarẽn xà ita caxuw wa ite me awỳr ijõ kàhhôc ita to ihkujahêc, mār ca me ijarẽnpa, ne me amã amji kīn, ne me gakry.

²³Ne wa ijõtpê Pahpãm mã me acajrẽn to hane he:

— Ỳhỹ me ijõ Inxũ Cati pê Pahpãm me, me ijõ Pahhiti pê Jeju Crixto, ca ha ampo kên jipôc ri me ikjêjê ame ipa atajê mã mehcariçti to, mārquê nee ame amji mã ampo cupa nare. Ne hanea ne me cumã ajpẽn kīnti to, quê me ajpẽn kīn to me ipa. Ne hanea ne cute amji mã me atoihhimpej xà na me to, quê amji mã me ato ihhimpej. ²⁴Ne hanea ne hõtpê me cumã me ijõ Pahhiti pê Jeju Crixto kīn rohnýtti mã atajê mã, ampo pej cunea to — hane. Hamre, ita pit.

PIRIP JÕ KRĨ WÏR

Pawrô Jõ Kàhhôc

Ïhÿ, pê Pawrô pê Jeju jarkwa na memprar catêjê nõ, ne Roman jô krĩ kam me hacjên xà kam ihkrĩ, ne pê Pirip jô krĩ kam, Jeju na mehwÿ mehkriatajê mã hõ kàhhôc ita kujate. Na pê hõ kàhhôc ita japrÿ pê **Pirip Jõ Krĩ Kam Jeju Na Mehwÿ Jakrã Mehkrĩ Atajê WÏr, Pawrô Jõ Kàhhôc (Pirip).**

Ne pom cu me hõ kàhhôc cahyt ita kam, Pawrô te me cumã amji jarên to hajÿr he. Me hacjên xà kam cute amjipupun kêanre cacrô, cormã cumã amji kîn. Mã Pirip jô krĩ kam Jeju na mehwÿ te me Pawrô tehcajpar prãnte me cumã ihpore kujahêc, mã cuteipyr, ata pyrên ri hakryti na amji jarê. Ne me hacjên xà kam ihkrĩ cacrô, ihtÿj me hàhtôa mã Jeju pê me pahpytâr catê na harê. Ne hanea ne ihtÿj Jeju te amji kam hapac xà tuw pejti kôt kypê ipa nare na me cumã harê.

Pawrô te amji jarên xà
Me Hàpên Xà 16.12-40; 20.6

1 ¹Hàpà me ikwÿ, pom me apê Jeju na mehwÿ, ca Pirip jô krĩ kam ame akrĩ atajê. Ipê Pawrô, ne ipê Jeju Crixto mã ijâpên catê. Ne itea wa Timot me, pom caramã Jeju na ate me ajpên hõnco tu atajê mã ihkàhhôc ita ton. Ne pomihkàhhôc ita te hajÿar ne me akwÿ to mehhimpej catêjê pupun catêjê atajê me, me akwÿ tehcajpar catêjê mã, wa ite mehkujahêc. ²Imã Pahpãm pê me pajô Inxũ Cati me, me pajô Pahhiti pê Jeju Crixto te me ato impejti na me ato prãm. Ne cute me acaprĩ, ne me acaxwãm pê me acaxwÿn kam, me amã meacarĩcti impejti jôr to ipa na, imã me ato prãm.

³Ne wa hãn ne me ato amji japackre, ne me ana Pahpãm mã icakôc, ne cumã me ate amji kam me gapac xà pyrên ijakryti na amji jarê. ⁴Ne wa hãn ne me acajrên kam pra, ne imã amji kïan kam me acajrên.

Cute me Pawrô tehcajpar pyrên hakry

⁵Ampo na mã me apyrên ijakry? Nee mã ampo na nare! He pê ca mam me icahê na, Jeju to me gÿjarên pejti to me harên na me itehcajpa, ne

ahnaa cormã me to xa. ⁶Ne imãa, quê ha Pahpãm me amã me ate amji kam me gapac xà to ipintuw to mör ita na, ne ahnaa to xa ita kam, quê ha ahnaa jũ caxuw Jeju Crixto te hacpÿne amji jaxàr xà jö amcro kam ahtwÿ, quê ha me pahto impej pa, to wa pa apu amji kampa.

⁷Imã me akĩnti incwÿrjapê, wa itÿj amcro cunea kam me ato amji japackre. Ne jũ na ri ampeaj kam imã impej? Nee mã jũ na nare. Ca götpêhãn ne icahê na me gápên to me apa, ate me itehcajpar prãnte. Na wa Pahpãm jarkwa kôt mehcunea mã Jeju pê me pahkritxwÿ jarên xà impejti to harên to ipa, mâr quê me kampa ne mehünã. Ne quê ha jũm te apu Jeju te amji kam hapac xà cuna mã ihcakôc kên to mör na, wa ha itÿj intête cumã awjarê ne cupê hütà. Na ca ramã me hacjênxà kam, ijÿr xà ata kam, me itehcajpar to me apa. ⁸Imã me akian to me akĩn te hajÿar, pom quê Jeju Crixto mã me pahkian to me pahkĩn he. Ne Pahpãm mã ri ijahkre pej, por waampeaj kam ite me ato ijapac xàhti na amji jarên ata na.

Pê Pawrô Pahpãm mã mehcajrên

⁹⁻¹⁰Ne wa ijötpê Pahpãm mã me acajrên to hane he:

— Me ijö Inxü, Pirip jö krĩ catêjê mã ajpênkĩnti to, quê me cumã ajpên kĩntiita, ma me cumã ipicamên to mō. Ne me cumã mehkrã kre te amji jahkre pejti gö, mâr quê amji mã me ampo pej pit capi to me ipa ata to, ma me cumã apicamên to mō — hane. Ita to wa ijötpê Pahpãm mã me acajrên to amji kam ijapac to ipa. Hō, ita na quê ha jũ caxuw Jeju te amji jaxàr xà jö amcro kam ahtwÿ, caha me akên pê me apejti ne, ne me apahãm pê me acato, quê nee jũmjê me ato ihcakôc kên nare. ¹¹Quê ha Jeju Crixto me acaxwãm pê me amã me acaxwÿn to ihtÿj. Ca ha Jeju cuxà amji kam me gapac xà impejti to me apa, quê ha mehcunea ahna megõmpu, ne me amji mã:

— Pÿhàpà! Ampeaj kam ri Pahpãm me cumã ampo tohahkre, ne mehtehcajpa, mã ita caxuw mehkênre nare, ne catyt kam me amji to ajpa. Ne Pahpãm ita ri catia to cati ne impej — hane.

Pawrô me hacjên xà kam ihkrĩ ita na, nee cute cumã jũ mãn nare

Me Hâpên Xà 28.30-31; Epet 6.19-20

¹²Jeju kam ajpên to me ikjêjê atajê, nee apu ijũ na me akrihkrit nare, ne nee ampo na amjimã me ito pômã quê nare. Cute me ito kên catêjê te me ito kên crire nare, me hacjên xà itajê kôt. Cakrô wa itÿj mehcunea mã Jeju jarênpejti jarên to ixãm ita na. Mã ramã me hàhtôa te me hahkre pej to mō. ¹³Ne Roman jö pjê jö pahhiti jürkwa kam cute me hamãr catêjê me, kammehkrĩ catêjê me, mehcunea te ramã me ijahkre pejtu. Ampo cwÿrjapê? Nee mã ampo cwÿrjapê nare. He ipê Jeju mã ijapên catê, na ri ma ameicurê, ne cute me ijaxàr, cwÿrjapê wame hacjên xà ita kam

ikrĩ, mã mehcunea te me ijahkre pej. ¹⁴Ne Jeju kam me pahkjêjê kwỳ jãhtôa ne me hacjên xà ita kam me ipupu, ne xwỳ kam Jeju to amji mã mehhimpej to me ipa nare. Hõ, ita cãmtà rûm ri neeme cumã jûm cupa nare, mã ihtỳj Jeju to mehçakôc kam pra, ne nee amji na me ampo cãmji nare.

¹⁵⁻¹⁸Ne me pahkjêjê kwỳa kwỳ mã ikĩn nare çakrô, mã ihtỳj icuxà me Jeju to hũjarên to me ipa. Ampo na? Nee mã ampo na nare. Pomjũmjê itajê te ito ipipëan prãm to ri, ihtỳj hãn ne Jeju to me hũjarên to me ipa. He ijũ na me cumã amji to prãm, na ri ame hane. Neampeaj kam me ipijapu xi, ne cama me hacjên xà ita kam imã ite amji pupun xà kêanre to me ipicamên to prãm. Ne ampeaj kam cama ita jũ naimã amji kian to amji kĩn. Ampo na? Ihtỳj Jeju Crixto to me hũjarên to me ipa na ri. Ne mehkwy nare, quêt me cumã ikĩn, cwỳrjapê ri ihtỳj Jeju to me hũjarên to me ipa. Ampo na? Por wa ite me cumã Pahpãm jarkwa çràn ata, nee mã ihhêj xi nare. Ne ampeaj kam ite me cumã ihêj xi jarên nare na, cute me ijahkre pej. Ne Pahpãm te ri ijapên xà ita caxuw ixãm.

¹⁹Ne ampeaj kam me gũ na ijakry. Ampo na? Wa itỳj me ate Pahpãm mã ina me acakôc na, amji mã me ato hane. Na wa apu ijakry, ne itỳj jũ caxuw, Jeju Carô Pejti kôt, ite me hacjên xà ita pê icator na, amji to hane.

Pawrô nee hũ na Jeju pahàmti xà atajê nõ ton prãm nare

²⁰Pê Pahpãm imã, ite amji kam ijapac xà ita mã cato, ne imã ijapênxà ita gô, wa ikrĩ ne to pit mã apê. Ne imã jũ caxuw ijapên xà ita kam ipec prãm nare, ne cama kam itỳjti, ne imã ijũcanâr to prãm pit. Neite amji kam ijapac xà ita kam, imã ijũcanâr tỳjti to prãm, pom ahnaa mã wa ita kam ton to mô, ita na wa ton to imôr to prãm. Ne imã itĩar kam, amji mã Jejujaprỳ to ipicamên to prãm, ne hanea ne ityc xàa kam, imã amji mã to ipicamên to prãm.

²¹Ne imãa itĩar na ipa ita na impej. Ampo na? Wa hãn ne hõtpê itỳj Jeju to amji mã ihmpej to ipa. Ne ityc na ri itĩr jirôa pê imã impej. Ampo na? Wa ha jũ caxuw ty, ne ma Jeju wỳr api, ne curia cahê na ikrĩ rohnỳtti mã. ²²Nãmri wa ha ite itĩr ita na ipa na, wa ha itỳj cormã ijapên xà impejti ita kwỳ to ijapên cri. Ne itỳj hipêr Jeju wỳr mehkwy to apkjê. Ne jũ wa ha ajte amji mã capi? ²³Nãmri imã pry pijakrut na wa ha amji mã ihnô capi. Ne imã, ite amji kam ijapac xà ita jicu ne ityc, ne ma Jeju wỳr ijàpir, ne cahê na ikrĩ na, imã amji toprãm. He ita na ri imã impeaj to impej. ²⁴Ne ite me atehçajpar to prãm to ri, cormã ita ri imã ipa to prãm. ²⁵Cwỳrjapê wa itỳj cormã pjê kam me acahê na ipa na ite amji jahkre pej. Ite me atehçajpar, ca ate me apicamên to me amôr, ne Pahpãm to amji mã me ahimpej kam me gakryti na, ca me amji to mehprãm. ²⁶Wa ha cormã me awỳr amji jaxà, ca ha me ipupu, ne ampeaj kam me gakry. Ca ha ate me Jeju Crixto japrỳ to apicamên to prãmte me to gũjarên to:

— Ampeaj kam Jeju cati ne carôt tỳj ne impej, cwỳrjapê ri hacpỹa necute me pamã Pawrô kujahêc — hane.

Cu ha pahtỳj me pahte amji pupun xà kêanre ata kam awcanã
Juta 3

²⁷Nare, wa ha nee me awỳr icator nare cacrô, wa itỳj me garên par to prãm. Ne pom ite me amã harên itajê cunea jirôa pê impej catia atana ri, imã me ato prãm he. Ca ha me acunea catyt kam, me apejti kam, me Jeju pê me pahkritxwỳ jarên pejti itajê to pit mã, amji to me apijapar to me apa. Ne imãme acuhptom pej pêa mã, ate me gápên xà pê Jeju jarên pejti to, ate me amji cujtên to me apa na imã me garên par prãm. ²⁸Ne nee ca amji mã me acurê xwỳn te Jeju cuna mã mehcakôc xiti itajê cupa nare, ne cama me cuna mã amji to mehtỳaj ne. Quê ha amji name acajpê, ne amji mã me garên to:

— Co he! Quê ha me cumã me pahcupanare ita kam ame hane, ne ihtỳj me pajirô pê xa — hane. Ampo na? Quê ha ihtỳj Pahpãm ate me hirô pê axãm xà caxuw me amã me acarôt gô, ca ha atỳj me mentête hahê ne hirô pê xa, quê ha me hamre. ²⁹Ne Pahpãm te, ate Jeju Crixto mã me gápên xà na, me apyxwỳr. Cwỳrjapê ca ha me kampa, ne ma amji mã me to ahimpej to me apa kam, me to acrà tu ne. Ne hanea ne icuxàcumã me amji pupun xà kêanre to me amji pupun to me apa.

³⁰Pê ca ramã me pahcurê xwỳn pê, ite Jeju te amji kam hapac xà pytàr na, me ipupu. Pê wa iteamji pupun xà kêanre ita me ajco amji cujtên to ipa, pê ca ahna me ijarên pa he. Na ca ha ita kam icahê na ate me hûtàr prãmte, cu ha pahtỳj me amji cujtên to me papa rohnỳtti mã. Na ca ha hanea ne, icuxà ikôt me amji pupun xà kêanre to me amji pupun to me apa.

Me pahte amji kam me pajapac xà pyxit peaj kôt, cu ha me amji kampa
Roman 15.5-6; Epet 4.1-6

2 ¹Imã me acunea te cuprôn ne amji na me ahônco tu na, me ato prãm. Ca ramã Jeju Crixto to amji mã me ahimpej, cwỳrjapê ri ampo cunea caxuw meamã me acarôt tỳj. He ramã Jeju mã me akîn na ri cumã me acaprĩ. He ramã Pahpãm Carô Pejti te amji mã me ato cuprôn, ne ate amji kam me gapac xà to me amã pyxit peaj. Cwỳrjapê ri me acaxwãm pê me amã ajpênkîn, na ca atỳj me ajpên caprĩ to me apa. ²Pom wa ramã me apyrên ijakryti na amji cajpê ita na, wa ha hipêr me ana ahwỳ, ca me imã ijakryti ita to ajcamê. Ne imã me ate amji kam megapac xà pyxit peaj to, ate amji kam me gapac na me ato prãm. Ne mam me amã ajpên kîn ita jirôa pê, quê me amã ajpên kîn, ne quê meacaxwỳn cunea ajpên kam pyxit peaj. ³Ne nee ca me gápên xà to me amji cajpuaw prãmte ame gápên nare, ne nee amji pejti na me amji jarên

nare, ne nee amji to me acati to me apa prãmnare. Ne quêt cama me amji mã:

— Mõrmõ ijirôa pê mehcunea cati — hane. ⁴Ne nee apyxit peaj ne ate amji kam me gapac xà ata toamji mã me ahimpej to me apa nare, ne quêt atÿj me akwÿ te amji kam hapac xà to me hanea, ne me amji mã me ahimpej to me apa.

Pê Jeju me hirôa pê cati cacrô, nee amji to cati prãm nare

Jowãw 13.12-17; Epet 1.20-23; Ipipên Xà 5.1-14

⁵Ne quê ate amji kam me gapac xà pê, Jeju Crixto te amji kam hapac xaa. Ne Jeju jarên xà ita ca ha me kampa, ne ihkôat me ton to me mō.

⁶⁻⁷Ne Jeju me Pahpãm pipëan,

ne catia to cati cacrô,

pê nee cumã amji jarên to:

“Wa papipëan rohnÿtti mã na amji to prãm” hajÿr nare.

Ne quêt cama cumã amji cuprãr tu,

ne cōjkwa jicu, ne pjê wÿr wrÿ,

ne me paxúmrea na amji to,

ne cama amji to me pamã hàpên catê.

⁸Ne nee amji to cati prãm nare,

ne quêt pjê kam Hüm jarkwa kôt apu ipa,

ita kam ahnaa pĩ kam ihtyc.

⁹Cwÿrjapê pê Pahpãm hipêr to ajcamê,

ne to catia to cati,

ne mehcunea jō Pahhiti na hãm.

¹⁰Ne cute Jeju japrÿ to me cati prãm to,

quê ha cōjkwa kam me ipa catêjê me,

pjê kam me ipa catêjê me,

pjê krac ri cute me harêt catêjê me,

Jejucuna mã mehkôn krã na me jÿ,

mehcunea kam mare mã,

ne me harên to hane he:

¹¹“Jeju Crixto pê ri quêt mehcunea jirô pê Pahhiti cati” hane.

Ita na quê ha mehcunea Pahpãm pê Jeju Pãm peaj na me hahkre pej,

ne mehkwyãmã harê.

Pê Pahpãm ri me pamã me pahcarôt to ihtÿj

¹²⁻¹³Pê ca atÿj, imã me ijō ikwÿ nō kĩnti catêjê atajê, ajco me ikampa, ne wa ha ita caxuw ite ame acahê na imôr nare cacrô, ca haatÿj ampÿa mã amji mã me ikam gapac to me prãm. Ne Pahpãm mã catyt kam me apa, ne ajpên na me ahôncu tu na, cumã me ato prãm. Cwÿrjapêri me

acaxwãm pê me ato ihhimpej, ne ate mempar prãmti na me atehcajpa, ne ate ihkôt me amji ton na me atehcajpa. Ne me gĩkjê kam me ato ihhimpej, ca me gĩkjê kam, hanea ne me kampa ne amji mã me hũpa, me gápên xà me, me ate amji kam me gapac xà kam. Hôhõ, ca ha me hane, ne me gĩ cunea kam me apejti ne.

Cu ha catyt kam me papa, mâr quê me pahkôt hanea ne catyt kam me ipa

¹⁴Ca ha ate amji kam me gapac xà cunea kam, nee ajpên mã me gâhcãhhõnnare, ne nee ajpên krac ri me acakôc nare. ¹⁵Ca ha ate me hajÿr na, ca ha ampo kên cunea na me gamreare ne, ne nee me ate amji kam me gapac xà tũm nare, ne quêt ihtetetti ne. Ne me apêPahpãm kra impejti cwÿrjapê ca ha me hane. Ca atÿj mehkên me, cute me amji kam hapac xà kêanre tũm, kam awcapãtkôti atajê jipôc ri amekrĩ. Ne atÿj me cumã Pahpãm te amji kam hapac xà kôt harên to me akrĩ. Mâr quê hanea ne me acuxà, ate amji kam me gapac xà itajê mã me acjêj. Ca me gápên xà ita kam, me apê ihhêj rũm cõjkwa kam awcapãtkôti kam caxêre prã tetetti atajê pyrãac, ne me aprãti ne. ¹⁶Wa ha me apyrên ijakryti ne, por jũ caxuw Jeju Crixto te amji jaxãr xãjõ amcro ata kam. Ampo na? Nee mã ampo na nare. Curi quê ha mehcunea me ijahkre pej, por pê wa ramã me amã ijãpên xà tÿaj to, ata na, ne neeme apê kôt hamreare nare na. Pawrõ mã hakryti ita to, me hakryti na me to prãm

¹⁷Pê ca ramã Pahpãm mã me gápên to catia to cati, ne kam me amji pupun xà kêanre to me amji pupu. Ne me apê gâhcukrêj crêre cakrõ, caatÿj me imã ampo gõ, ate Pahpãm mã ijãpên xà ita tehcajpar prãmte. Ne ate itehcajpar prãmita pê ihhêj rũm ate Pahpãm mã me ampo jõr. Ne Pahpãm to ate amji to me ahimpej prãmte, ca ame itajê to hane. Ne ate me ampo itajê ton xà kam, ajco ampeaj kam me gakry. Wa ha hanea ne ipê meapyrãac, ne itÿj amji pupun xà kêanre to amji pupun to ipa, Pahpãm jãpên xà ita cwÿrjapê. Ne quê ha ihtÿj jũ caxuw amcro nõ na me icura, wa ha ipê me apyrãac ne Pahpãm mã icaprõ gõ ne ty. Ne wa ha ipê meapyrãac ne ampeaj kam ita pyrên ijakry to hanea, pom quê ca mam ame gakry ita na he. ¹⁸Quê ha jũ caxuw me ito hane, wa ha ijakrya ne nõ. Ca ha me ca xwÿjê icuxà atÿj me gakrya to me gakry.

Quê ha Pawrõ Timot te me hõmpun prãmte, ihtÿj me hÿrmã ihkujate

¹⁹Quê ha ihhêaj to me pajõ Pahhiti pê Jeju mã me amã Timot kujahêc pyrentu to prãm na, wa ha me amã ihkujahêc pyrentu. Quê me apupu ne me gahkre pej, ne hacpÿ ne amji jaxà ne imã me garê, mâr wa me garên pejti impar xà kôt, ma amji mã icarôt to ihtÿj. ²⁰Ne Timot pê ipyrãac ne pyxit peaj, ne ihtÿj me ato amji kam hapac to ipa. Ne ihtÿj me ate Jeju kôt amji to me apicamên na cumã me ato prãm. ²¹Ne ihkĩnte mehkwy cunea te nee me hajÿr nare, ne cute me amji kam hapac xà topit mã me

amji kam hapac to me ipa, ne nee Jeju Crixto te amji kam hapac xa to me amji kam hapac nare. ²²Ne nee Timot te hajyr nare, ne ihhêj rûm cupê ikraa, ne ihtyj icahê na mehcunea mã Jeju jarên pejti jarên to ipa na, ramã mehcunea te me hahkre pej. ²³Wa ha ita ri cute ame ito amji kam hapac xa na me hahkre pejjirô pê mã, wa ha amû me awyr ihkujahêc pyrentu. ²⁴Ne wa hanea ne ityj me awyr ikrâr. Na wa ityj me pajô Pahliti pê Jeju te me awyr itêm na ijamâr na, amji mã to hane.

Qué ha Pawrô ma hacpÿ mã me cumã Epaprôti kujate

²⁵Ne pê ca me imã me pahto pê Epaprôti kujate, cute ite amji mã ampo na prãmti xa itajê na itehcajpar prãmte. Ne ramã cute icahê na hãpênã ita me, ajpên cujtên crire nare. Na wa ityj hacpÿmã me amã ihkujahêc prãm. ²⁶Ne ampeaj kam ri ramã Epaprôti mã me apupun prãamto me apupun prãm. Ne ihtyj hà na ate me hahkre pej na amji mã me ato hane. Ne hà itana, ate amji mã me to pô mã quê na, amji mã me ato hane. ²⁷Ne ampeaj kam pê hà to hà, ne ajmâr ty. Pê Pahlpãm mã caprî pê caprã, pê hacpÿa mã impej. Ne hanea ne Pahlpãm mã ramã ite me to ijapac xãhti ita na icaprî, na wa nee hipêr kam icwÿr nare to prãm. ²⁸Cwÿrjapê wa ityj hacpÿa mã me amã ihkujahêc to prãm, ate me hãa pupun ne hacpÿ mã me amã amji kîn prãmte. Wa ha pa xwÿjê imãamji kîn nôti ita jûa kam ipê tẽ. ²⁹Na ca ha Epaprôti pê Jeju kam me pahto ihkjê ita to me gakrya kam me amji pytà. Ca ha atyj amji mã me hÿmre atajê cupa. ³⁰Ne cute Jeju Crixto jãpên xa kam amji mã ihtyc cupa nare, cwÿrjapê ri ihkên mã hàr, ne ajmâr ihtyc. Ampo na? Ca ampÿa mã ipê ame apa, ne jû wÿr ca me itehcajpa, mã me gaxã kam cute itehcajpar. Na ca ha atyj amji mã me hÿmre ata cupa, ne catia na amji mã me to hane.

Pê Pawrô amji caprÿ to Pahlpãm te ahna amji caxâr prãmte ampo cunea to
Pirip 2.18; 4.4

3 ¹Ne ijãhhôc ita jicu xa kam, me ikjêjê, imã me ate Jeju kam me gakryti na me ato prãm. Xãmte, cormã imã me amã ihnô ata jarên xa. Ne pê wa ramã amã harêan xa na, wa ha hipêr amã ahna ihhêc. Nehipêr ite ahna me amã ihhêc xa ita te me amã jû mãn nare, ne nee hanea ne imã cute ahna jû mãn nare.

²Co he! Ma amji na me hÿmre kên pê rop na hamreare pyrãc atajê to me guphê! Nãmri ihtyj me apê me akã kwÿ Jakep to prãm to, me amã hÿjarên to hane he:

— Gapacta ne Jeju to amji mã me ahimpej, ne hanea ne meipê Juta catêjê quêtjê te amji to me icaca xãa kôt me apy kã kwÿ to kryjre ne me hakep. Hô, me acaca xa pijakrut itajê to, ca ha me, quê ha Pahlpãm ihtyj me amã amji capa neme apytã — hane. ³Ne ame amã ihhêj xia jarê. Ampo na? He cu ha me amji kã kwÿ Jakep ita nee me pahto Pahlpãm kra

impej nare. Ne quêt Pahpãm Carõ Pejti ri me pamã Pahpãm to hahkre, mâr cu me hahkre pej ne amji mã me hũpa, ne me pamã ihkĩnti ne, quê hataa me pahto amji kra, cu ha Jeju kam me amji hõnco ne ampeaj kam me pajakry. Ne pom xwahna Juta catêjê jô amji kĩn me, cute me amji kam hapac xà itajê kôt mã Pahpãm mã me pahkĩn. Hãpà! Nee mã ampoitajê kôt Pahpãm mã me pahkĩn nare. Ne quêt ita na ri Pahpãm mã me pahkĩn, mã me pahpytà he. Pom pê Jeju me pajaxà kam ty, cu toa amji to me pahhimpej xà ata to, quê ha Pahpãm quêt me pahkên pê me pahpytà. ⁴Ne pê wa Pahpãm te ipytàr prãmte, amji caprÿ to, me hirôa pê ampo itajê ton partu.

⁵Ne pê xwahna cormã icrire na, ina amcro te ôjtô kam, pê me ipy kà kwÿ Jakep, Juta catêjê te amji to incaca xà ata kôt. Ne me ipãmjêpê Juta catêjê impeaj kra, ne me cupê me iquêtjê nõ, pê Pẽnjamĩ xwÿ tãmwxÿ tãmwxÿ nõ ata kra. Ipê Juta catêjê impeaj nõ wa. Nepê wa Juta catêjê te amji kam hapac xà cunea kôt amji ton pa. Ne me ikwÿ pê Parixêw catêjê atajê pê catyt kam ajco me ipa. ⁶Na pê wa ajco me hãpên xà ita to ijãpên catia to ipa. Ne Pahpãm te ikĩn prãmte itÿj ajco Jeju na mehkwy to pên to ipa. Mã xãmtePahpãm pê ita na ihkaj na, ikam. Hõ, pê wa ajco Juta catêjê te amji kam hapac xà cunea ton to hajÿr to ipa, Pahpãm mã ikĩn prãmte. PêJuta catêjê cunea mã ihhêj ne ipeaj to ipej. Ne pê wa pa hanea ne ajco amji pejti na amji to hane. Ne pê xãmte Pahpãm mã nee ita na ikĩn nare, ne ahna cupê ihkaj na.

Pawrô ita caxuw Jeju Crixto te amji kam hapac xaa kôt ipa to prãm

⁷⁻⁸Na wa quêt ita caxuw Jeju to amji mã ihmpej to ipa. Ne mam ampo pejti itajê to ite amji mã ihmpej to ipa xà atajê ri, nee hipêr imã ampo caxuw impej nare ne ihkêanre. Ne Jeju Crixto pê ijô Pahhiti ata, wa quêt ite hõmpun ne hahkre pej ne ampeaj kam quêtimã ihkĩn, ne mam ampo itajê ri imã ihkĩn nare. Na ri imã cupê ahhi, ne imã ihkĩn nare, wa ite põ mã ihcunea to ijũcapêr, ne nee hipêr ihnõ to amji japackre nare, ite Jeju kam amji hõnco tu to prãm to. ⁹Na ri Pahpãm te ito impej, wa ipejti, cwÿrjapê ri cumã ipejti. Ampo na? Wa nee itacaxuw cumã ipejti prãm to Juta catêjê te amji kam hapac xà atajê to amji jahôt prãm nare. Ne quêt Jeju Crixto to, wa ha amji mã ihmpej to ipa, nema to amji jahôt to ipa. ¹⁰⁻¹¹Na wa ita caxuw Jeju Crixto pit pupun pejti to prãm, ne carôat kôt amji to ipijapar to prãm. He Pahpãm mã carôt ata to ri cute hacpÿa mã Jejuto ihtĩr. Na wa ha itÿj hanea ne cuxà, cute amji pupun xà kêanre ata to amji pupun to prãm, necuxà ityc to prãm, mâr wa ipê hũràac ne hacpÿa mã itĩr.

Pawrô nee cormã catyt kam Crixto te amji kam hapac xà cunea kôt ipa nare

¹²He wa nee pa amji jarên to ihmpej to:

— He ramã ite amji kam ijapac xà cunea na ipeaj to ipej, ne nee jũ kam ijõ nuwre nõ kam, ikên kênre nõ hamreare — hajÿr nare. Ne cama quêt amji jarên to hane he:

— Wa ramã Jeju Crixto kôt ipa ita to, iteamji jĩ tÿj tu, ne cormã ipej ita kôt ipicamên to imõr to prãm — hane. Ne cormã ipejti wÿr icator xà ita pê ihhêj rûm ijâhcukren xà, wa hÿrmã amji mã icarõt to ijũhcajhê to mõi, ite hicu xà mã icator to prãm to, ne nee cormã hÿrmã icator nare. Hepê ramã Jeju Crixto amji mã ito prãmte xà ata caxuw ipro. ¹³Cwÿrjapê wa ha nee hipêr mam icaca xà itajê nõ to amji japackre nare, ne quêt icumam itajê to pit mã, wa ha amji japackre. ¹⁴Ne icatãatre na, pry jicu xàa kam ipicahur catê te amji mã hàmcwÿr xà ata pyr prãmte, hÿrmã ihtêam to tẽ. Ita jikjê na wa apêa to apê, ite amji mã Pahpãm te imã hàmjõr xà ata pyr prãmte. Mã Pahpãm imã hàpõr to mõi, ite Jeju Crixto kôt ipej pêa mã, cahê na ikrĩ rohnÿtti mã xà caxuw.

¹⁵Hõhõ, ite amji kam ijapac xà ita to wa amji kam ijapac to ipa. Ne pom Jeju kôt ramã me pahte me papa to me amji jĩ tÿj tu itajê cunea te amji kam hapac xà itari me pamã. Ne ca ihhêaj to me anõ te amji kam gapac xà ita to hajÿr nare na, quê ha Pahpãm me anõ mã to hahkre, ca ha hahkre pej pej. ¹⁶Ne me pahcunea te hajÿr pit, cu ha me hajÿr to me pamõr mã mã, ma me pamõr ita kam me to pancrà tu. Pom pê catyt kam ramã ampeaj kam mepamã to hahkre xà ata na. ¹⁷Me ikjêjê, pom wa me akam mare mã ampo ton to mõi ita na, ca me ipynãr kam me to acrà tu ne. Ne ma hanea ne amji caxuw mam ikõt me ipacatêjê atajê te amji kam me hapac xà atajê na mehkõpír to me apa, ne megãhkõpír xà atajêa kôt me amji ton to me apa.

Me hàhtõa pê Crixto curê xwÿn kêanre

Carati 6.12-13

¹⁸He pê wa ramã me amã awjarêa, na wa ha hipêr icwÿar kam me amã harê. Ne mekwÿ te amji kam me hapac xà kêanre, ne me cupê Jejururê xwÿn, na ri me to hũjarên to:

— Por pê pĩ kam Jeju ty ata, ampo nahamreare, ne nee jũ na xà caxuw impej nare — hane. ¹⁹Atajê quê ha amjia kôt amji to me hamre to mõi, ne me hamre. Ampo na? Nee mã ampo na nare. Cute me hajÿr xà atajê, quê ha me to hamre. He me hàpàn pê ri ihhêj rûm me hõ Pahpãm. Ne mehcunea mã cute ampo tonxà kam mehpahãmte atajê ton to me ipa. Ne cormã mehcunea mã, cute ampo kam mehpahãmte ton xà ata pyrên me amji jakryti na me amji jarên toipa, ne nee ajte amji jũ na amehpahãm nare. Ne pjê kam ampo itajê to pit mã amji kam me hapac to me ipa, ne nee Pahpãm to ajte amji kam me hapac to me ipa nare.

Me papê cõjkwa te amji kam hapac xà catêjê

²⁰Ne me pa, cu ha nee ame hajÿr nare. Ampo na? Cõjkwa kam quêt me pahkrĩ xà, to cu ha me amji japackre to me papa. Ne cu pahÿtÿj, cute me

pahkênpê me pahpytâr catê pê me pajō Pahhiti pê Jeju Crixto te curũam ajpên ihtêm na me hikaj. ²¹ Quê ha Jeju jũ caxuw me pajĩ peacre, ne ihtyc atajê to antuw. Quê ha me pajĩ pê Jeju jĩa pyrâc, ne ampeaj kam impej ne ihtÿj. Na cu ha jũcaxuw me pahnõ pahtyc nare. Ampo na? He mehcunea jirõa pê Jeju carõt tÿj, na ri pyxit peaj ne mehcunea to ihhimpej.

Cu ha pahtÿj me pahcunea Jeju na me pahhõnco kam me to pancrà
Coroxo 3.15

4 ¹ Imã me ikjêjê kinti atajê, ampeaj kam me ato ijapac xà! Pê wa ajco me amã Jeju jarkwa jarên pejti to ipa, pê ca me awpa ne ihkõat me amji ton to me apa, na ri me apê me imã ijakryti ton catêjê. Na wa itÿj me pajâpên xà itajê kõt mehcunea mã me apejti na me ato ijâmnân to ipa. Ne imã me gũcanãar kam me ate Jeju na me ajpên hõnco tu kam me to acrà tu na, me ato prãm.

² ãhÿ me ikjêjê cahãj pê Ewotikwÿj me, Xintikwÿj ata, he ca ihhêj ne atÿj ajpên krac ri ame acakõc to me apa, na wa ha me awÿr xà ita to me awÿ he:

— Nee ca me ajpên mãn to me acuhhê tu nare. Ampo na? Me apê Pahpãm kra impeaj. Ne mêr ampo na mã ca ajte ame ajpên mã? Hipêr me hajÿr nare — hane. ³ Ne ca, ikwÿ nõ Xixic, he apê ijõ ikwÿ nõ peaj, na wa ha awÿ, mâr ca ajpên caxuw pyjê atajê japackre, ne hacpÿ mã ajpên na me axõ. Pê wa pyjê atajê me, Cremênti me, por icahê na me hàpên catêjêatajê me, pê wa ajkaam me apê, ite me Jeju pê me pahkritxwÿ jarên xà impejti incràn xà caxuw, pê wa me to ijâpên catia. Atajê japyr ramã Pahpãm jõ kãhhõc kam hikwa, cute cahê na amji to me ipijapar rohnÿtti mã xà caxuw.

⁴ Ne imã me acunea te Jeju kam me ajpên hõnco tu kam me gakryti na me ato prãm. Na wa me amã:

— Me gakrya ne — hane!

Quê ha Pahpãm me pamã amji carĩcti gõ

⁵ Ca ha ajpên pê me akrã to arêr nare, ne quêt mehcunea kam mare mã me gãhcãjrênti, jãhcãprĩhti to me apa. Ampo na? Quê ha ahtũm nare, quêha me pajō Pahhiti amji jaxà. ⁶ Ne nee ate amji mã ampo na prãmti xà ata na apu amji to pãmã quê to apa nare, ne quêt cama amji na Pahpãm wÿ. Quê amã ampo itajê gõ, canee hahpan xà na cumã gakryti na amji jarên to gapac kêt nare. ⁷ Ca ha ate me ite me amã ampo jarên xà itajê cunea ton na, quê ha Pahpãm me amã amji carĩcti jõr to hanea, pom quê ihcarĩcti he, ne me amã ampej partu, Jeju kam ate me ajpên hõnco tu ita kam. Quê ha jũmjê meapupu ne me amji mã:

— Jũ mã mã ajte cute me, ne mehkên xà atajipõc ri mehcarĩcti? — hane. Hõhõ, quê ha cute me ana Pahpãm caca xà jahkre pej nare kam, me ato ihcakõc to hane.

Cu ha ampo pej to pit mã amji kam me pajapac to papa

Roman 12.1-2

⁸Ne ite me amã ihhõc xà ita jicu xà kam wa ha cormã me amã ampo to ihmpej. He mõrmõ ca amji kam me gapac xà na me amji cukij to:

— Ampo to mã wa ha ajte amji kam ijapac to ipa? — hane. He, ampo te õjtõ itajê to, wa ha me amã hahkre he:

Mam ita pê ri ampo pejti, kam ampo kên nare ata to, ca ha me amji kampa.

Ne ihkõt ita ri he, jũm jàpên xà imejti na pajàhtàtti xà ata to, ca ha me amji kampa.

Neihcote na ita ri he, ampeaj kam ampo to mehhêj xi xà nare ata to, ca ha me amji kampa.

Ne ihkõtjũm caca xà imejti tũm nare ata to, ca ha me amji kampa. Ne hapu na ita ri he, por Pahpãm mãampo cunea imejti atajê to, ca ha me amji kampa.

Ne ihkõt ita ri he, por ampo na nee jũm cakõc xà kên nare ata to, ca ha me amji kampa.

Ne hapua na ita pê ri, por ampo me pahcajpuaw ata to, ca ha me amji kampa.

Ne ihcahur ita pê ri, ampo to me pahcakõc xà imejti ata to, ca ha me amji kampa.

Hõ, ampoitajê to ri ate amji kam me gapac xà he. ⁹Na pê ca me ijarkwa ita pa, ne me ite amji kam ijapac xà ita pupu, ne me hahkre pej, ne ihkõat ca ha catyt kam me apa. Hõ, Pahpãm te me pamã mepahcarĩcti jõr xà ata quê ha me amã cugõ, ne ihtÿj me acahê na ipa rohnÿtti mã.

Pawrõ te amji kam hapac xà kam hakrya to hakry

¹⁰Pajõ Pahhiti cãmtã rũm ri, ite amji kam ijapac xà kam ijakrya to ijakry. Ampo na? He pê ca rÿ pêa mã ajco gõ pore to me ijamã. Jirõ pê mã ca nee hipêr ate gõ pore to me ijamãr nare. Ne corpej mãca ate hacpÿa mã me gõ pore to me ijamãr kam me atêm. Ne atÿj ate me ito amji kam gapac na imã me gahkre pej, ne jũ wÿr ca ha cama me amji mã hamã. ¹¹Wa nee, jũm te imã hikran na, to amji kam ijapac nare, ne nee ipê ampo hamreare na amji to icakõc nare. Ampo na? Wa ite ramã ita ton to amjipyràc tu, ampo cunea kam. ¹²Ampo na? He pê wa ramã amji na ite amji kam ijapac xà itajê cunea pãjpãj partu. Ne imã ite amji kam ijapac xà na ipê ampo hamreare na, imã amji kãn nare nare, ne hanea ne imã ampo catia na ite jũ mãn nare. He pê wa amji na ijaquêc xà pãjpãj itajê kam, wa ihcunea to amji tekjê. ¹³Ne pom ite amji kam ijapac xà itajê cunea kam, wa Jeju carõat kõt ijũcanãr to ipa.

¹⁴Ne ate ite amji pupun xà kêanre itajê na me itehcajpar ata na ri, imã ihkênre nare. ¹⁵Ne pê wa mam ite me amã Jeju jarên pejti jarên xà ata jõ

amcro cakônĩ na, pê ca me, me gõ pore to ajco me itehcajpa. Pê wa me gõ pjê pê amji to icator xà ata kam, pê ca cormã ampÿa mã ajco meitehcajpa. He me gakrã ata pyxit peaj te me itehcajpar na, ihtÿj me amãa amji jahkre pej. Ne ate me itehcajpar xà ata na, pê hanea ne Pahpãm ajco me atehcajpa.

¹⁶Taamã xãmte cormã ihnõ he. Pê wa Texarõn jõ krĩ kam apu ipa, pê ca ajco atÿj ite ampo na prãm xà ata to me itehcajpar to me apa. ¹⁷Nee mã hipêr ate me Timot me imã ampo jõr xà na, wa me amã ita jarên nare, ne hipêr Pahpãm pê ate amji mã me ampo cwÿr, na ri quêt imã me ato prãm. ¹⁸Mã ita ri Eprãrõti cator ne cute me imã, ate me imã ampo jõr atajê jõr. Ne pom ihkãhhõc ita pê ate imã ampo jõr xà atajê jõ kãhhõc.

Pawrõ mehkwỹ pyrên hakrya

Ne ampeaj kam ca ate imã ampo na ijãhwÿr xà itajê jirõa pê hõr. Na ri ampeaj kam imã amji kĩn ne ijakry. Ne Pahpãm mã ate me imã ampo jõr xà itajê impej te hajÿar, pom quê cumã ampo kũm cuxwati pãr prãm he. Ne me pahte me cupê ampo jamreare atajê mã ampo jõr xà atajê pê ihhêjrũm Pahpãam mã pahte me hõr xà, ne ampeaj kam cumã ita na ihkĩn. ¹⁹Ne imã me pajõ Inxũ Cati pê Pahpãm ihtÿj me amã ampo na ate mehprãmti atajê jõr na, me ato prãm. Ne nee quê ha amã ihkênre ne hõr nare, ne amã catia ne cugõ. Ne quêt Pahpãm catia to cati, ne haneane Jeju Crixto mã hàhcukrêj to hakràaj to hakràj, na ca ha ampo na me wÿ, quê ha nee amã ihkênre ne hõr nare, ne amã hàhcukrêj to me hakràjto ipipëan xà atajê gõ.

²⁰Ne imã mehcunea te me pajõ Inxũ pê Pahpãm catia to cati na, cute me hahkre pej ne amji mã me harên na imã me to prãm, rohnÿtti mã. He ampeaj kam!

Pê Pawrõ me cumã amji jarên kujate

²¹Hapà, me apê Jeju Crixto tekjê, wa me ato amji kjê atajê. Ne pom ita ri me pahkjêjê icahê na ame ipa itajê te hajÿar ne me amã amji jarên kujahêc. ²²Ne por Pahpãm tekjê na me ipa atajê cunea te me amã amji jarên kujahêc. Mã hanea ne ita ri Roman catêjê jõ pahhiti jũrkwa kammehkrĩ atajê te me amã amji jarên kujahêc.

²³Ne imã me pajõ Pahhiti pê Jeju Crixto te me amã ampejti na me ato prãm. Hamre, ita pit.

COROZO JÕ KRĨ WÛR

Pawrô Jõ Kàhhôc

Ûhÿ, Pawrô pê Jeju jarkwa na memprar catêjê nõ, ne Roman jõ krĩ kam, me hacjên xà kam ihkrĩ, ne pê Coroxo jõ krĩ kam Jeju na mehkwy jakrã mehkriatajê mã hõ kàhhôc ita kujate. Na pê hõ kàhhôc ita japry pê **Coroxo Jõ Krĩ Kam Jeju Na Mehkwy Jakrã Mehkrĩ Atajê WÛr, Pawrô Jõ Kàhhôc (Coroxo).**

Ne pom cu me hõ kàhhôc cahyt ita kam, Pawrô te me cumã mehhêj xi catêjê cawpa to hajÿr he. Mehhêj xicatêjê te Jeju pê jũm xũmre pejti na me cumã harên, ne cupê Pahpãm kra nare na me cumã to ihhêj. Ne ampeaj kam ri cupê Pahpãm kraa to Pahpãm kra, na quê ha nee iràn xà na amji na me jũm to tojnõ, quê mecumã cute amji kam hapac xà to ihmipej nare.

Pawrô te amji jarên xà

1 ¹⁻²Hapà, me ikwÿ pê Jeju na mehkwy, ca Coroxo jõ krĩ kam me akrĩ atajê. Ne Jeju Crixto kam me apê me ikjêjê impejti atajê. Ne me apê me ate catytkam, Pahpãm jarkwa kôt me apa na me amji to ihtÿj tu atajê. Ipê Pawrô pê Pahpãm jarkwa kôt Jeju te amji mã ito cumã harkwa na imprarcatê ata, ne itea wa me amã ihkàhhôc ita kujahêc, me pahkjê Timot me. Ne me imã me pajõ Inxũ Cati pê Pahpãm me, me pajõ Pahhiti pê Jeju Crixto te me ato impejti na me ato prãm, mãr ca me acaxwÿn me, me ate amji kam me gapac xà cunea kam me amã ampo cupa nare, ne me acarĩcti kam me apa.

Pawrô te me cute Jeju to amji mã mehhimpej na me harên par

1 Texarõn 1.2-5

³⁻⁴Ne wa ite ita ri Roman jõ krĩ kam mehkrĩ itajê te amji mã me garên to hajÿr na mempar he:

— Coroxo catêjê ihtÿj Jeju Crixto to me amji kampa, ne ihtÿj amji mã me to ihmipej to me ipa, ne hanea ne me cumã Pahpãm na mehkwy cunea kĩn — hajÿr. Cwÿrjapê wa Pahpãm pê me pajõ Pahhiti pê Crixto

Pämmã me icakôc, ne ijôtpê cumã me apyrên ijakryti na meamji jarê.
⁵Ne pê ca me gaxà kam Jeju tyc xà jahpan xà na, jũ caxuw còjkwa kam Pahpãm te amji cahê na me ato ipijapar pejti ata na, ca me harên pa, ne me gakryti kam me amã amji kïan kam me hikaj to meapa. Ampo na? He ampeaj kam quê ha me ato hane. Cwÿrjapê ca atÿj Jeju to amji mã me ahimpej ne me amã mehkwy cunea kïn na, ca ha atÿj amji mã mehkinti to me apa. ⁶Ne Jeju tyc xà jahpan xà na, Pahpãm cahê na còjkwa kam pahte amji to me papijapar xà impejti ata jarên, ramã pjê cunea kam apu ihcahkũm. Ne pjê cunea kam me hàhtôa ne me cupê me apyràac, neihÿtÿj amji mã me hũpar xà itajê kam me hapac to me ipa. Ne Pahpãm jarkwa kôt me amji ton to me ipa. Cwÿrjapê ri ajteare mã me amji kampa, ne catyt kam mehkwy to me amji kwÿ to mempejti to me ipa. Hôhò, pom ca Pahpãm te amji kam hapac xà to me amji kampaita to ri, me amji kam hapac to me ipa. ⁷Ne pê ramã ijarkwa kôt me pahkjê Epapra me amã Pahpãm te me akinti na harê. Ne me imã Epapra te hũjarên catê ata kïnhyre nare, ne cupê me ipyràac ne Jeju mã, me icahê na, me amã hàpên to kênre nare. ⁸Ne cute amji jaxàr ne me imã me ate Pahpãm Carõ Pejti kôt, ate amji mã mehcunea kinti na me garên.

Pawrô hõtpê Pahpãm mã mehcajrên
Epet 1.15-23; 3.14-21; 1 Texarõn 5.23-24

⁹Wa ite mempar, cwÿrjapê wa nee Pahpãm mã, ite me acajrên jicu nare, ne hõtpê cumã me acajrên to:

— Ýhÿ me ijõ Inxũ Cati, ca ha Coroxo jõ krĩ kam me akwÿatajê mã Acarõ Pejti te amji jahkre pejti gõ, mãr quê ate ampo cunea na ihprãmti atajê ton to me cumã hahkre. Ne me cumã mehkra kreti gõ, mãr quê me ampo cunea kampa, ne me hahkre pej — hane.

¹⁰Hõ, ate amji kam me gapac xà atajê to, ca ha me amjikam gapac to me apa, ne gõtpê Pahpãm mã ampokinti atajê to pit mã me cumãn to me apa. Ne atÿj me gápên xà impej pit to me gápên to me apa kam me to acrà tu ne. Ne ma Pahpãmjahkre pejti to amji mã me apicamên to me amõr ita to, waPahpãm mã icakôc, ne cumã me acajrên. ¹¹Ne wa hanea ne Pahpãm mã acajrên to:

— Ýhÿ, ca ha me cumã acarôt tÿjti, catihti ata to me cumãhũcanãr xà to ihtÿj, mãr quê ampo kên cunea mã mehakrya kam me awcanã — hane.

¹²⁻¹³Ne ramã Pahpãm te ame acũmpej, kÿj pê còjkwa kam ihhimpej xà kam, cute me amã ampo pejti to hàmjõr xà atajê caxuw. Cwÿrjapê ca ha atÿj Pahpãm mã me ampo itajê pyrên me gakryti na me amji jarê. Ýhÿ, Pahpãm pê ri hàhcujro prãti himpej xà atajõ Pahhiti, na ri ihtÿj ampo cunea pupu ne cumã hahkre pej. Cwÿrjapê ri ihtÿj me pamã to ipipê to ipa, pahte me hahkre pej prãmte. Ne me pahcurê xwÿn pê ri ihkinte awcapãtkõ jõ pahhi, na ri nee me pamãampo to ipipê nare, pahte

me hahkre pej cupate. Mã Pahpãm te awcapàtkô jô pahhi ata pê me pahcunea caxâr, ne amji wÿr me pahto cator, ne cute cumã ihkra kînti ata himpej xà kam me paxãm. ¹⁴Mã ihkra pê Jeju te ihtyc xà mã amji jôr xà ata te Pahpãm cuna mã me pahte to kên xà atajê cunea to tojnô, ne to hamre tu. Cwÿrjapê cu nee awcapàtkôti kam ampo kên ton xà ata to hipêr amji na me hajÿr nare, ne pahtÿj Jeju krac ri ame papa. Ne ampeaj kam Jeju Crixto pej na, wa ha hipêr me amã harên to hane he.

Jeju me hàpên xà kôt harên xà

¹⁵Jũ wÿr quê jũm pjê ita kam Pahpãm jĩ na hõmpu. Ne Jeju pê ihkra, ne cume ipipêan cakrô, pê pjê kam apu ipa reria mã, pê cu pahtÿj hĩ na ajco me hõmpu. Ne pê pjê te amji ton xwÿjrea na ramã ipa. Ne pjê me cõjkwa kam ampo itajê cunea jirôa pê cati. ¹⁶Ne pê Jeju, Hũm jarkwa kôt, cõjkwa kam ampo cunea me, pjê kam ampo cunea to. Ne hanea ne, pom cu pahtÿj me ampo pupu itajê to, ne haneane, pom cu nee me ampo pupun nare itajê to. Ne hanea ne mecarô carôt tÿjti atajê to. Ne ahpÿanre na me carô kwÿ mã carôt ton partu, cute me pahhi carôt tÿjti ata mã hàpên xà caxuw. Ne amji mãa pê ampo itajê to. ¹⁷ÿhÿ, pê mam ajco Jeju ipa, pjê jamre reria mã. Ne Hũm pê Pahpãm jarkwa kôt amji mãa, ampo itajê cuneaton partu, ne taa hamã, ne ma hõmpu, ihkên mãhâr ne hamre cupate.

¹⁸Ne me papê Jeju na mehkwy itajê cunea pê Jeju jĩ, mã cupê me pahkrã, cute me pahto ihhimpej ne me pajamãr xà caxuw. Ne cupê me papê mehkwy te amji kam hapac xà xakat. Ne pê ramã mam ajco ipa, ne pyxit peaj ne cupê ampo cunea xakat. Ne ty, ne hacpÿa mã pyxit peaj ne ihtir cakônĩ ata to ihtir, mãr quê ampo cunea jirô pê cati. ¹⁹Ne pê Pahpãm amji mã harkwa to:

— Wa ha ikra ita me ajpêan — hane. Cwÿrjapê ri cume ipipêan, ne me carôt pipêan.

Quê ha Jeju Pahpãm me, me hũmre te hacpÿa mã ajpên kĩn na me to

²⁰Ne pê pjê kam mehcunea me, cõjkwa kam me hàhtôtiatajê kwÿ me, ma ame Pahpãm par caca, ne cama cuna mã mexa tÿj pyrentu. Cwÿrjapê pê Pahpãm ame kam incryc. Ne cu cormã pjê kam me pahkwÿ ame hajÿr to me papa, cwÿrjapê ri cormã me pahkam Pahpãm cryc ita na. Ne cute hacpÿa mã ajpên mã me caprĩ prãm to ri, cute pjê wÿr ihkra pê Jeju kujahêc, quê pjê kam me pahkên jahpan xà na, me pajaxà kam, pĩ kam ty. Ne ihtyc xà ita to hacpÿa mã Pahpãm te amji wÿr ampo itajê cunea to cuprôn na ton, na quê ha to cuprô.

²¹ÿhÿ Coroxo jô krĩ kam me apê me ikwy atajê, pê ca mam Pahpãm pê ampÿa mã ame apa, ne ate Pahpãm cuna mã me ampo kên ton xà atajê, me ate ampo kên to me amji kam me gapac xà atajê to pê me apê curê xwÿn. ²²Mã

Pahpām te ihkra pê Jeju tyc xà ata kôt, hacpÿa mã me amã caprĩ, ne me ato amji kwÿ nõ. Na ri cuna mã me ate amji kam me gapac xà tetetti, ne me apejti kam me apa ita na ri, cumã me ana prãm. ²³Hõhõ, Pahpām te me pamã ampo pejti itajê cunea ton to hajÿr. Na cu ha pahtÿj cute me pamã harkwa jirên atajê kôt me papa kam me to pancrà tu ne. Ne nee ca cõjkwa kam Pahpām cahê na ate amji to me apijapar rohnÿtti mã xà ata na, amji to me gapac kêt nare. Ne pom ite me amã Jeju pê me pahkritxwÿ jarên pejti na ihhõc itajê to, wa ramã pjê cunea kam ite me cumã icakõc par. Neijàpên xà ita ri imã.

Me cupê mehcahkrit atajê wÿr, Pawrô pê Pahpām mã imprar catê

Epet 3.1-13

²⁴Ne ijàpên xà ita pê me amã ijùjarên xà impejtiitajê, wa kam amji pupun xà kèanre to amji pupun to ipa cacrô, wa itÿj ijakry. Ne mër ampo na mã, wa ite amji pupun xà kèanre itajê kam apu ijakry? Nee mã ampo na nare. He quêt Pahpām te amji kam hapac xàa kôt, wa ite mehkwy to impej xà caxuw, wa me cumã ijàpên xà itajê kam amji pupun xà kèanre to ipa. Ne Jeju na mehkwy itajê pê Jeju jĩ pyrãac. Na wa ihhêj rûm ipê Jeju pyrãac ne cuxà, itÿjmehkwy itajê mã hàpên xà ita kam, amji pupun xàkèanre to amji pupun to ipa. ²⁵Ne pê Pahpām amji mã ito mehkwy mã hàpên catêna, ite me to impejti to prãm to. Cwÿrjapê pê imã:

— Mõ, ne pjê cunea kam, mehcunea mã ijarê, nãmri wa hacpÿa mã cute me ajpên mã caprĩ na me to prãm! Cwÿrjapê wa ite pjê wÿr me cumã ikra pêJeju ata kujahêc — hane. Na wa ite me acunea mãharkwa itajê jarên partu. ²⁶Ne pom Pahpām te imã hùjarên xà to hùjarên ita, pê rÿ jũ caxuw jũm mã harên nare. Ne curmã ri cute mehkwy mã toipipê, ne ihtÿj me cumã to hùjarên to ipa. ²⁷Ne wa ha catyt kam me amã ampo atajê kôt harênpartu ne. Pom pê mam me ijùjarên xà pejti me papê amxu tu ita te ri hajÿr he, pêJeju me pamã amji gõ ne me pahkam ihkrĩ. Cwÿrjapê ri me pahcaxwãm pê me papê Pahpām pyrãac. Nacu ha jũ caxuw ame pahcati ne ame pampej to hanea, pom quê Pahpām he.

²⁸Cwÿrjapê wa pjê cunea kam ikrã kreti te amji jahkre pejti kôt mehcunea mã Jeju Crixto jarên to ipa. Ne me cumã ampo kên itajê cawpa to ipa, quê mehkên jicu, ne catyt kam me Pahpām wÿr me apkjê. Hõ, wa me tohajÿr to ipa, mār quê jũ caxuw cute catyt kam me ipa to amji pyrãc to hajÿr romã mã, Jeju kam me amji hõnco ita na Pahpām cahê na mehkri. ²⁹Cwÿrjapê wa ijàpên xà tÿjti ita to mecumã ijàpên to ipa, ita cõmria mã ri Jeju te imã carôt catia ne hõr.

Pawrô mã cute Pahpām te amji kam hapac xà jahkre pej na me to prãm

Epet 3.14-19

2 ¹ÿhÿ me ikjêjê, wa itÿj me amã ijàpên xà ita na amji kôt harên to prãm. Nãmri wa itÿj me amã apê, ne hanea Ratixa jõ krĩ kam me

pahkwỳ pê Jeju na mehkwỹ mã apê, ne hanea ne me pahkwỳ tecormã nee me ipupun nare atajê mã apê. ²Ne wa itỳj me acunea mã ijâpên to prãm. Ampo na? Ate me ajpên kinti kam me to acrà tu, ne kam me to ahônco tu to prãm to. Mâr ca nee ame amji mã ampo cupa nare, ne cama cuna mã quêt amji to amehtỳaj to prãm. Ne imã me ate me Jeju Crixto jahkre pejtina me ato prãm. Ne pê mam Pahpãm nee me pamã Jeju toipipê to hajỳr, pê cu me hahkre pej to hajỳr nare. Neita caxuw ri quêt Pahpãm mã mehcunea te Jeju Crixto jahkre pej na me to prãm. Cwỳrjapê wa itỳj me amã ijâpên to ipa. Ampo na? Ate ihcunea name hahkre pej partu to prãm to. Mâr ca ate me hahkre pej itajêa kôt ampeaj kam amji mã me to ahimpej. ³Ne Jeju pê ri me pamã ampo cunea to hahkre pej xà xakat. Ne ihkôat ri Pahpãm me pamã me pahkrã kreti gô. Ne imã me akrã kreti to me gakràj na me ato prãm. Cwỳrjapê ri ampo to ite me amãhahkre xà itajê pê ijâpên xà.

⁴Ampo na mã wa ame amã ijũjarên xà ita to awjarê? Nee mã ampo na nare. He ihhêj ne ramã jũmjê te ame amã ihhêj xi catêjê atajê ame ipa, cute me amã ihhêj prãmte. Ca ha nee ame kam gapac nare. Ampo na? He me cupê ampo jahkre kêatre. Ne me cumãa ihhêj ne ampeaj kam ampo jahkre pej, ne cama ame amã ihhêj. ⁵Wa ita ri me apê ampỳa mã, me hacjên xà kam ikrĩ, na wa ha nee ijĩ ita to curi ame acahê na imôr nare. Cakrô, quê ha ite amji kam ijapac xà me, icaca xà ihtỳj me acahê na apu mō. Ne wa ite me ate Jeju kam me amji hônco na me gahkre pej. Ne toa ate amjimã me ahimpej na me amji to ihtỳj tu na, ite me gahkre pej. Ne hanea ne ramã ite, me ate amji mã me gâhcuprôn partu na me gahkre pej. Na wa me apyrên apu ijakry.

⁶⁻⁷Pom ca ramã Jeju Crixto pê me gô Pahhiti to amji mã me ahimpej ita? Na ca ha ita caxuw kam me ahônco ita na ame to apa, quê ha taa xwỳjê pê me ate amji kam me gapac xà xakat. Na ca ha ihkôatamji mã me gũpar to me apicamên to me mō. Ne ca ha hanea ne Jeju to ate amji mã me ahimpej ita na, me amji to ihtỳj tu ne, por pê ramã Epaprôti me amã Jeju kôt harên xà atajê kôt. Na ca hahanea ne Pahpãm mã me amji jarên to me hane he:

— Ýhỹ, me ijō Inxũ, he akra ita kôt wa amji mã me ampo pejti itajê cunea incwa, na ri hũrên ampeaj kam me ijakry — hane.

Cu ha nee jũm te amjia kôt me pamã ampo to hahkre atajê par nare

⁸Co he, quê ihhêaj to jũm me awỳr cato, ne amji kôt me apa na me ato prãm ne me amã:

— Imã ampo cunea jahkre pej, na ca ha me ipynã ne ijarkwa kôt me apa — hajỳr na, ca ha nee mempar ne me cumã amji jôr nare. Ampo na? Nee mã ampo na nare. Cute me amã menquêtjêa te amji kam hapac xà kôt hamreare atajê to hahkre prãmte ri ame amã ihhêj. Necute me amã

ampo to hahkre xà itajê Jeju Crixto pîn me acaxuw cumã hapôj nare, ne amjia kôt ihkrâpîn cumã hapôj.

⁹Ne Jeju Crixto pê ri pō rūm me hūmrea pyrãc, ne caxwãm pê, cupê Pahpãam to Pahpãm. ¹⁰Ne Jeju kam me pahcunea te me ajpên hōnco tu itajê mã, nee iràn xà na, ampo na prãm nare. Ampo na? He Jeju ata ri me cupê pahhi catêjê cunea jirô pê cati, me hūmre jô pahhi me, cōjkwa kampahhi catêjê me, ampo carô pê me pahcurê xwÿn catêjê jô pahhi atajê jirôa pê cati, ne carôt tÿj.

Pahte amji kam me pajapac xà pintuw xà

¹¹Ne pê Juta catêjê te Pahpãm kôt me ipa catêjê na me amji jarên xà na, ajco me amji py kà jakep. Ita jîkjê na mã, me apêmechakrit pê Juta catêjê nare cakrô, mã ihtÿj Jeju te me apê me acaca xà kên cunea cahpêrhÿr. Na ca ha Jeju te amji kam hapac xà intuwti to amji kam me gapac to me apa. Ne me acaca xà kên atajê cunea jicu. ¹²Pom pê Jeju ty, pê me harêt, pê hacpÿa mã ihtîr ne kre pê cato ita jîkjê na, cu ha Jeju kôt me papa xà na, pahte me amji jarên xà caxuw, cō kam me amji cumrã, ne hacpÿ ne me pahkrãhapôj, ne ramã cō caxwãm pê, pahte amji kam me pajapac xà tūm kên atajê cunea juwahi. Ne Jeju te Pahpãm carôt catihtî ata to amji mã ihhimpej to hajÿr, cwÿrjapê pê hacpÿa mã to ihtîr. Jîkjê na cume pahte carôt catihtî ata to amji mã me pahhimpej to hajÿr cwÿrjapê, pê cō kam pahte me amji cumrãr xà ata hacpÿa mã me pahto ihtîr. Na pê cu mam ajco pahte amji kam me pajapac xà kôt me papa. Na cu ita kam hipêr ita na me prãm nare, ne quêt Jeju na ri me pamã prãm.

¹³He pê ihhêj ne ramã mam Pahpãm mã me acaxwÿnte amji kam hapac xà itajê ihtyc partu. Ampo na? Pê ca ate amji kam me gapac xà kên to pit mã meamji kampa na pê. Ne me apê mechakrit, na pê me apêPahpãm jahkre kêatre. Mã hacpÿa mã Pahpãm te ihkra Jeju Crixto kôt me amã me acaxwÿn carô cunea to ihtîr. Ýhÿ, he Pahpãm cuna mã me pahte ampo kên ton xà atajê ri cute ihcunea jicu, ne to tojnô. ¹⁴He pê cumam, pahte me pahkên cunea to, me Pahpãm to new catia to cati. Na pê ma hō kãhhôc kam ajco amjimã ahna ihhôc to ipa. Ne pahte me to new catihtî atajê jahpan xà na, cu ha ame ty ne nee amehtëp nare, ne cupê ampÿa mã ame papa. Mã quêt Jeju te amji to me pahkritxwÿ, ne me pahkên jahpan xà napî kam ihtyc. Cwÿrjapê ri hahpan xà na Pahpãm te hō kãhhôc kam pahte me to new atajê cunea hur, ne to hamre, ne to hapac kêt. ¹⁵Ne pî kam Jeju tyc xà ata te ri pahhi catêjê jirôa pê to cati. Ne cute me cupê me pahhi catêjê cunea carôt to ihpec. Na ri cupêa pjê kam mehcunea jô pahhi atajê me, kÿj pê cōjkwa kam pahhi catêjêatajê me, me pahcurê xwÿn pê ampo carô kên jô pahhi atajê jirôa pê cati. Ne Jeju te, catihtî na mehcunea mã amji to ipipê xà na, amji kôt cute me tohjê atajê cunea to mō. Mãr quê mehcunea me hōmpu, ne me hirôa pê cati na, me hahkre pej.

Menquêtjê te amji kam me hapac xà pê me harkwa cacrô

Carati 4.8-11

¹⁶Na quê ha jũm te me amã Pahpãm to hahkre to kêanre to prãm to me amã:

— Ca ha ate amji to me Pahpãm cajpuaw to prãm na, ca ha ite me amã ampo jarên xà atajêa na me to. Ne nee ame hĩ kur nare, ne me ajcri. Ne nee ame akôm xà kêanre atajê to ame akôm nare, ne me pahkôt xà jô amcro kam, ca nee ampo to ame gâpên nare. Ne catyt kam me amji kĩn ton to me apa, putwry pintuw jô amji kĩn mea mã. Hô, ca ha ijarkwa kôt ate itajê to me hajÿr na, ca ha mePahpãm cajpuaw. Nãmri ca ha ate ijarkwa kaj na me itajê to hajÿr nare na, quê ha ma Pahpãm ame acurê — hajÿr na, ca ha nee ihkôt amji kam me gapac nare. ¹⁷Ampo na? Nee mã ampo na nare. Pê cormã Jeju cator nõ reria mã, mam cute me amji kam me hapac xaitajê to xwÿ kam me amji kam hapac nare. Ampo na? He pê ramã cute me amji kam hapac xà atajê ajco Jeju to ihcakôc na pê. Mã Jeju cator, mã cute mehcunea jicu. Na ri me pamã Jeju pit na prãm.

Cu ha pjê ita kam, cute amji kam me hapac xà kôt ame papa nare

¹⁸Ne quê ihhêaj to jũm te me akên mã me amên prãmte me amã ihhêj to:

— Pahpãm te ipyxit peaj mã amji to ipipê, wa ite hõmpun, cwÿrjapê ca ha atÿj me ikampa. Nãmri ca ha ate me ipar nare na, ca ha atÿj me akên mã me axà — hajÿr na, ca ha nee me kam gapac nare. Nare, quê ihhêaj to jũm me amã:

— He me girôa pê Pahpãm cati, cwÿrjapê ca ha me cumãacakôc, quê ha ma ame akam hapac caca. Cwÿrjapê ca ha cõjkwa kam cumã me hàpên catêjê mã me acakôc, quê ha ihtÿj quêt me akampa ne me taa, cumã me acajrên — hajÿr na, ca nee me kam gapac nare. Ampo na? He ihhêj nejũmjê atajê te amji jahkre peaj to amji jahkre pej, ne amehhêj. Me cupê amji jahkre kêatre. Ne me caxwãm pê ihhêj ne me cumã amji catia to me cati cacrô, mã ihhêj ne me akam mare mã mehkryre name amji jarê. Ne nee me cupê Jeju na mehkwy nare. ¹⁹Ne me papê Jeju na mehkwy pê hĩ cati pyrãac. Mã cupê me pahkrã. Pom hãnne me pajĩ cuxêc ihhi to cuprô, mã ajkam ihcuhê, ne to carôt tÿjti, ita na ri me papê Jeju na mehkwy te me, ne kam me ajpên hõnco tu. Mã ma me pamãme pahcarôt to ipicamên to mō, cu me pahkà to mō, Pahpãm te amji mã me pahto prãm xà ata na.

Cu nee amjia kôt Pahpãm cuna mã me amji to impejti nare

Carati 3.1-5; 5.1-9

²⁰Ne por me pajô Pahhiti pê Jeju Crixto tyc xà ata te me pahte amji kam pajapac xà tũm kêanre atajê cunea to hamre. Cwÿrjapê cu pahte

amjikam me pajapac xà intuw pejti ita to pahtỳj ame papa. Na quê ha nee ampo carô kên jô pahhi catêjê atajê hipêr me pahcaxun nare. Nô na mã ca ajte cormã ame akên xà itajê ton to me apa? Ne ajte cormã ampo carô kên te amji kam hapac xà itajê toamji mã me ahimpej to me apa?

²¹⁻²² Ne ihhêj ne cormã cute me amã ampo cawpa ihhêj xi xà to hajyr catêjê ame ipa he:

— Nee ca ampo ita pyr nare, ne nee ca garkwa mã gô nô ita mên ne capi nare, ne nee ihnô ita cupên nare — hane. Ca ajte atỳj cormã ampo atajê na ame kampa? Por ramã ampo cunea hamre to mô, ne ihkôt hamreaxà ata na? Ne cute me amji kam hapac xà itajê pê me hümrea te amji kam me hapac xà, na ri amjia kôt cute me ton to me hahkre. ²³ Na ri ihhêj ne cute me amji jahkre peaj to me amji jahkre pej. Ne Pahpãm mã nee cute me amji jahkre pej nare, ne me cupê amji jahkre kêatre. Ne aricri ajte cute amji mã me Pahpãm kîn xà ata. Mãihkaj na ajte còjkwa kam cumã me hàpên catêjê ri amehkîn. Ne me cumã me caxwãm pê ihhêj ne amji catia to cati cakrô, mã me akam mare mã mehkryre na me amji jarê. Na ri hanea ne hõtpême ipjacri xà atajê to, me amji jî to hapêj to kêanre to me ipa, cute Pahpãm cuna mã amji to me kryre to prãm to. Ne me Pahpãm mã, amji cuna mã ampo itajê na prãm nare. Ampo na? Ampo itajê nee me pahkên tète me pahcahpêrkàr na me pahtehcajpar nare.

Cu ha còjkwa te amji kam hapac xà intuwti atajê kôt me papa

Roman 6.4-11

3 ¹Pê Pahpãm hacpÿa mã Jeju to ihtîr, ne ihkôt me amã me ate amji kam me gapac xà to antuw, ne cume mãa mã me amã me acaxwÿn carô tuw gô. Cwÿrjapê ca ha, por Jeju Crixto còjkwa kam Hüm cahê na Pahhiti krìxà kam, awpôc rûm jÿ ata to pit mã, amji mã me ahimpej to me apa. ²Ca ha kÿj rûm, còjkwa pîn Pahpãm te amji kam hapac xà intuw hapôj atajê to pit mã me amji kam gapac to me apa, ne nee pjê te amji kam hapac xà tûm ata to pit mã me amji kam gapac to me apa nare. ³Ne pom ca pjê ita kam me cupê Pahpãm na mehkwy nare atajê kôt, me ampo kên ton to me apa nare ita pê, me cumã ihhêj rûm, ramã me atyc. Ampo na? Ca nee mehkôt me ampo kên itajê ton to meapa nare na ri. Ne Pahpãm mã me apê Jeju Crixto pyrâac, na ca ha jû caxuw amcro nô kam, cahê na apu apa rohnÿtti mã, ne cormã me apê amji jahkre kêatre. ⁴Ne Jeju Crixto quê ha amã ate amji kam gapac xà to ate apintuw xà gô, ne hacpÿa mã ato intuw, ca ha atuw ita na apu apa rohnÿtti mã. Ne quê ha jû caxuw, amcro nô na, hacpÿ ne amji jaxà, ne mehcunea mã catia to cati, ne imejti na amji to ajpê. Ata caxuw ca ha cume mãa mã me amji to ajpê, quê ha mehcunea me acati, ne me apejti na me apupu.

Cu ha me pjê te amji kam hapac xà tũm atajê jicu

Epet 4.17-5.2

⁵Cutêp ca ha nee ate me ampo kên ton xà na amji to meahimpej nare. Ampo na? Quê ha ramã jũm te ihtyc na, quêha ankrê, ne nee hipêr ampo kên ton nare. Ata pyrác pej ne, ca ha ate me ampo kên ton cupate, me apinkrên to me hanea, pom quê me ty ne me ankrê he. Ne pom ampo te hajÿr xà itajê ri nee ate me ton xà nare he:

Ca ha nee ahti na jũm pê ihprô caxun nare, quê ha pyjê xwÿjê nee ahti na me cupê mempê caxun nare.

Ne nee ate me cuprÿ catêjêna gũjaxôr prãmte, ame caxun to me cumã xwÿ to apa nare.

Ne nee ame ampo xen xà kên atajê xen to me apa nare.

Ne nee ate ampo to amji jakren tu to prãm to catia ne ahna prãm nare.

Ampo na? He Pahpãm mã, ampo itajê kĩn nare te hajÿr, pom quê cumã pahpãm cahác krekàatajê kĩn nare he. ⁶Co he! He cute me Pahpãm par nare, ne me ampo itajê ton catêjê kam incryc, mã hãn ne ihtÿj mehkên mã me curê. ⁷He mam pê ca ajco ampo itajêa to amji kam megapac to me apa. Ampo na? Pê amcro atajê na ampo atajêaajco me ato ihhimpej.

⁸Na ca ha ita caxuw nee me akwÿ kam acryc to apa nare.

Ne nee apu gâprê to apa nare.

Ne nee ame ajpên curê tome apa nare.

Ne nee ame hũn kêanre to me apanare.

Ne nee Pahpãm mã ampo kên kĩn nare atajê to, me gapactua kam, ame acakôc to me apa nare.

⁹Ne nee ajpên mã amji to ame ahêj xi to apanare.

Ampo na? He ca ramã ate amji kam me gapac xà tũm atajê cunea jicu, ne me ate amji kam me gapac xà intuwti to, ca ate me apa kam me to atêm.

Cu ha pahte amji kam me pajapac xà tuwti kam me papa

¹⁰Ne Pahpãm pê me Pahton catê ata te ri me amã, me ate amji kam me gapac xà tuwti itajôr, ne ma to ipintuw to môr ita na, ita kam ca ha me ate amji kam me gapac xà pê cute amji kam hapac xàa pyrác. Na quê ha ihtÿj jũ caxuw me amã amji to ajpê, ca ha me hõmpu ne me hahkre pej.

¹¹Na quê ha ita caxuw pahte amji kam me pajapac xà cunea ajpên pit, ne nee ihnô ajpên hyr nare. Me ipê Jutacatêjê me, me apê mehcahkrit me, mehĩ me, cupême, ampo kra me, amjia kôt amji mã me hàpên catêjê me, ne cama me hõ pahhi mã me hàpên catêjê me, quê ha nee me pahno to ajpên hyr nare. Ne cu ha me pahcunea te Jeju Crixto to amji mã me pahhimpej na, cu ha ma Pahpãm cahê na amji to me papijapar rohnÿtti

mã. Ne pahte amji kam me pajapac xà pipẽn pit, itapê Jeju te amji kam hapac xàa. Cwÿrjapê cu pyxit peaj ne ahna me prãm.

¹²Ne me apê Pahpãm na mehwÿ. Pê amji mã me akĩn ne amji mã me acapi, neamji mã me acũmpej, cwÿrjapê ri cumã me apeaj to me apej. Na ri catyt kam me apa xà itajê te hajÿr he:

Ca ha ame akwÿ caprĩ, ne ihcunea na me cumã apejti ne,
ne nee me hirôa pêamji to me acati to prãm to apa nare.

Ne quêt gâhcaprĩakam ate amji kam gapac xà rericre to me cumã
apa.

¹³Ne atÿj ajpẽn mã me gũcanãr to me apa.

Quê ihhêaj to jũmjê apu ato kên, ca ha nee amji jahpan xà na me to
kên prãm nare, ne quêt cama me to tojnô ne me hucu.

Ne me pajô Pahhiti te ramã me acunea te to kên atajê jicu, ne to
tojnô, ne me akam incryc jicu, itana ca ha cuxà ajpẽn kam me
acryc jicu.

Cu ha ajpẽn kam me pahcarĩcti ne

¹⁴Ne pom ite me ato ihmpej xà ita ri ihkwÿjirôa pê cati he: Ca ha me acunea mã ajpẽn kĩntine, mâr ca me acunea Jeju kam me ajpẽn hõnco tu ne. ¹⁵Ne atÿj, Jeju te me ato ihmpej xà na, amji na me hamã, quê me acaxwÿn mã acjêj ne me akam ihkrĩ, ne me amã ate amji kam me gapac xà kam me acarĩcti gô. Ita na ca ha me acunea ajpẽn kam meacarĩcti ne. Ne ihhêj rúm me apê me anô pyxit peaj pyrãc, ne ajpẽn kam me apyxit peaj, ne ajpẽn kam me acarĩcti ne, ne nee ameapijapu nare, ne nee ame ajpẽn mãn nare. Ne cama Pahpãm pyrên me gakryti na cumã me amji jarê. Hôhô, ate amji to me apijapar to hajÿr xà caxuw ri, Pahpãm te me ana hàhwÿr.

Cu ha Pahpãm mã me cre

¹⁶Ne pom Jeju Crixto te me amã ampo to hahkre xà ita ri hakraaj to hakraj ne cati, cwÿrjapê ca ha ma me akrã kam me to amji jahôt to me apa. Ampo na? He taa mã quê ha quêt me amã amji jahkre pejti gô. Ca ha ma ate me amji jahkre pejti xà atajê to, me akwÿ mãhahkre, ne me hapackre to me apa. Ne hanea ne mam Pahpãm te amji kam hapac xà na me ahna increr xà ata to me cumã cre, ne cute ampo ton xà itajê nacurmã me cumã increr xà ata to me cumãcre. Ne kam me amã amji kĩnti to me cumã cre, ne catihti pyrên me gakryti to me cumã cre. Ne cumã me acrer xà atajê to, ca ha me akwÿ japackre, ne me cumã to hahkre.

Cu ha Jeju te amji kam hapac xàa na me pahcakôc

¹⁷Ne pom ca me acakôc xà me, me gâpên xà ton to me apa atajê to, ca ha Jeju cakôc xà me, hàpên xà me ajpẽn to me apa, ne nee ihkaj na

ton to apa nare. Ne ma Pahpãm pê me pajõ Inxũ Cati te me amã ihkra pê mepajõ Pahhiti pê Jeju kujahêc, mã cupê me pahkên pê me pahpytãr catê, ita pyrên, ca ma Hũm mã me amji jakryti na me amji jarê.

Cu ha cute me hapackre xà itajê kôat me amji to

Epet 5.22-6.9

¹⁸Yhỹ, pyjê pê me apjê prõ atajê, ca ha atyj amji caxuw me apjê kampa, ne harkwa kôt me apa. Nãmri ahnaa ri Pahpãm pê Pahhiti te amji mã me ato prãm.

¹⁹Ne me apê me aprõ impjê atajê, ca ha atyj amji mã me aprõ kinti ne. Ne nee ame cumã me gækjêr nare, quê ampo na ame apê ihkrã to irêr na, ca me cumã aprã ne me cumã to ahimpej.

²⁰Ne me apê mehkra xwÿjê, ca ha atyj me amji mã me apãmjê me, me axyrxwÿ kampa, ne amji mã me hũpahti to me apa. Ampo na? Ate me ita ton na riPahpãm mã me ato prãm.

²¹Ne me apê me hũmjê xwÿjê, ca ha nee me akra mã amehpec xà ton, quê ame cumã amji kĩn nare nare.

²²Ne me ca, me apê cama me cumã me gápên catêjê, ca ha atyj amji caxuw me gõ pahhi kampa. Ne me cumãgápên xà cunea to impejti to me apa. Ne nee me gápênxà pejti na cute me garên prãmte ahêj ne, mento kam maremã me gápên xà to mempejti to me apa nare. Ne quêt me cumã gápên prãam kam me gápên to me apa. Ampo na? Ca ha ate ampeaj kam amji mã Pahpãm pê Pahhiti cupa na, ca ha catyt kam me cumã gápên to me apa. ²³Ne pom ca gápên xà cunea to gápên to apa atajê to, ca ha me gápên prãam kam gápên to me apa, to hanea, pom quê, caPahpãm mã pit mã me gápên prãm to, to me apa he. ²⁴Ne Jeju Crixto pê ri quêt me gõ Pahhiti, na ca ha atyj me cumã apê, quê ha taa me amã amgõ, por cute mehkwy pê mehkwy mã hãmjör xà impejti xirata to. ²⁵Ne por me hãpên xà kãanre ton to me ipa atajêjahpan xà na, quê ha ihtyj Pahpãm me cumã amgõ, quê ha mehkên mã me axã. Ampo na? Nee mã ampo na nare. He Pahpãm quê ha ahpyãanre na me pahte me pajápên xà ton atajê jahpan xà na, catyt kam me pamã hãmjör pa.

4 ¹Ne hanea ne me apê me hõ pahhi catêjê, caha catyt kam amã me hãpên catêjê to amji kam me gapacto mempejti to me apa, ne nee ame cumã ahêj nare. Ne hanea ne me amã cõjkwa kam, kÿj pê Pahhiti te ihkrĩ na, ca me to amji japackrepeaj ne.

Cu ha Pahpãm mã me pahcakõc kam to me pancrà tu ne

Ruc 18.1-8; 1 Petrõ 3.13-17

²Ne ca ha me acunea hãn ne Pahpãm mã me acakõc kam pra, ne kam me to acrà tu ne. Ne to pit mã me amji kampa, ne nee irãn xà na ampo to ame amji japackrenare. Ne ate me cumã acakõc xà cunea kam hũrên gakryti na, me cumã amji jarê. ³Ne hanea ne cumã me icajrên to hane he:

— Ỹhỹ me ijõ Inxũ, ca ha Pawrô me Timot te me hàhtôamã akra Jeju jarên xà wỳr me cumã pry jahkjê. Porrỳ jũ caxuw cute me Jeju Crixto jarên kamhapac nare ata to, quê me cumã awjarê, quê mekampa — hane. Pê wa ajco ijũjarên to hajỳr to ipa, cwỳrjapê pê me hacjên xà mã me ijaxà, pê wa kam ikrĩ. ⁴Cwỳrjapê ri ate ina me Pahpãm mã me acakôc na imãme ato prãm, mãr wa catyt kam hirãa pê me cumã ihcunea kôt harên to impej partu ne. Ampo na? He ite ijàpên xàita ton xàa caxuw ri Pahpãm te imã hõr.

Cu ha amcro cunea kam me cumã Jeju to me pahcakôc

⁵Ne me cupê Jeju na mehkwy nare atajê to catyt kamamji kam me gapac to impejti to me apa, me akrã kre te amji jahkre pejti ata kôt. Na ca ha jũ ri ate me cumã Jeju jarên xà caxuw jũmjê cajpar na, ca ha nee me ahna gãhtat nare, ne atỳj me cumã Jeju jarê. ⁶Ne quê ha jũmjê te Pahpãm na acukij na, ca ha me cumã cute me acakôc xà par prãmti atajê to, ca ha me cumã harê. Mãr came cumã ampi ne akrã kreti te amji jahkre pejti ita kôt, me cumã harên to amji rericre ne.

Quê ha Pawrô me cumã Tiquicô me Oneti kujate

Epet 6.21-22

⁷Ne wa ha ma me awỳr me pahkjê impejti kĩnti pê Tiquicô ita kujate. Por cupê me icahê na catyt kam Pahhiti mã hàpên catê impejti ata, ne ihtỳj hãn ne amji jarkwa na amji par to ipa. Ne taa mã quê ha me amã, ipej pêa mã ame ipa na me ijarê. ⁸Ca ha me ijarên pa, ne ampeaj kam ate me ijarên par xà ita pyrên me gakry. ⁹Ne quê ha ihkôt amũ me akwỳ nõa pê Oneti, pê mepahtô kĩnti te amji jarkwa par catê ata mō. Ne quê ha ihtỳj me amã ita ri ampo cunea te hajỳr xàatajê jarên pa.

Pê Pawrô me cumã amji jarên kujate

Coroxo 2.1

¹⁰Ne pom me hacjên xà kam Aritarcô icahê na ihkrĩita te me amã amji jarên kujahêc, ihkãhhôc ita kam. Ne hanea ne Macô pê Parnap quêtiti kra ita te me amã amji jarên kujahêc. Ne quê ha curi hacpỹ mã Macô me awỳr cato, ca nee ite mam ahna me ato ihimpej xà ata kaj na ame to kên nare, ne atỳj quêt ahna me amji capa.

¹¹Mã hanea ne Jojuw japyr krut pê Catytkam ita te me amã amji jarên kujahêc. Ne me hũmre incrê peaj itajê ri ita ri icahê na Pahpãm himpej xà mã me apê. Ne me cupê Juta catêjê na mehkwy, pê haneane Jeju na mehkwy mã me axà. Mã mehràn xà na, nee hipêr Juta catêjê nõ te icahê na hàpên xà nare. Ne ramã cute me itehcajpar crire nare, ne cute me hàhtôa ne Pahpãm wỳr me to ipipkjêr, mã ihkrac ri me hàr, ne me cupê Pahpãm na mehkwy. Na ri me kam ijakryti.

¹²Ne Epapra pê me akwỳ nōa, ne cupê Jeju Crixto mã hàpên catê ata te hanea ne me amã amji jarên kujahêc. Ne hãn ne hõtpê xwỳ kam me amã Pahpãm na hàhwỳr tohajỳr to ipa nare he:

— Ỡhỹ, me ijõ Inxũ Catì, ca ha Coroxo jõ krĩ kam me akwỳ mehkrĩ atajê mã me carõt to ihtỳj, mãr quê ampo te me to kên xà ata jipõc ri, nee ato amji mã mehhimpej jicu nare. Ne quêt ato pit mã amji mã mehhimpej to me ipa to me amji jĩ tỳj. Ne ma ate amji mã cute me ampo ton xà na me to prãmti atajê ton na mehtehcajpa quê me to — hane. Hõhõ, hãn ne Epapra Pahpãm mã meacajrên to hajỳr to ipa.

¹³Ne Epapra te me amã hàpên xà tỳjti catia ton, wa ite ahna hõmpun itajê na, wa ha me amã harê he. He ihtỳj me amã Pahpãm jarkwa to hahkre to ipa, ne cumã me acajrên to ipa. Ne pomme amã hàpên xà to ita to ri hanea ne Ratixa jõ krĩ me Krĩmpejre kam Pahpãm na mehkwỳ mehkrĩ atajê mã apê.

¹⁴Ne hanea ne Ruc pê me pahcahhê catê kĩnti itame Tema te me amã amji jarên kujahêc.

¹⁵Ne wa ite Ratixa jõ krĩ kam me pahkjêjê kwỳ mã me ijõ hàpà kujahêc. Ne hanea ne Nempakwỳj me hũrkwa kam Jeju na mehkwỳ te me cuprõn atajê mã, ite mehkujahêc.

¹⁶Ne imã ate akrãhhia kam, cute me cuprõn atajê mãate ihkãhhõc ita cahyt na, ato prãm. Ne hanea ne Ratixajõ krĩ kam ate cahyt xà ata to jũm te cahyt na me amê, quê jũm cahyt. Ne por pê wa ramã mam Ratixa jõ krĩ kam Jeju na mehkwỳ wỳr ijõ kãhhõc kujate ata, ca ha apy ne cahyt to hanea, pom quê ate ita cahyt he.

¹⁷Ne hanea ne Arquivo mã gũjarên to hane he:

— Por Pahpãm te amã gãpên xà jõr ata, ca ha toihkrã curan partu ne — hane.

¹⁸Ne pom ihkãhhõc cahhur ita, wa ite ijũhkra ita to me amã ihhõc. Ipê Pawrõ, ne pa wa ha me amã ihkãhhõc ita kujate. Ne nee me hacjên xà kam ikrĩ ita na, me Pahpãm mã icajrên to me gapac kêt nare. Ne imã Pahpãm te me acunea to impejti na me ato prãm. Hamre.

TEXARÕN JÕ KRĨ WÛR

Mam Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ. Ne pê Texarõn jõ krĩ kam Jeju na mehkwy jakrã mehkri atajê wÿr, pom cu me hõ kàhhôcpijakrut cahyt itajê kujate. Na pê mam hõ kàhhôc ita japry pê **Texarõn Jõ Krĩ Kam Jeju Na Mehkwy Jakrã Mehkrĩ Atajê Wÿr, Mam Pawrô Jõ Kàhhôc** (1 Texarõn).

Ne Pawrô te Jeju to amji mã mehhimpej to me ipa, cwÿrjapê rime cupê Pahpãm tekjê nare atajê ame to kêanre, mã cute me amji pupun xà kêanre to me amji pupun. Ne hõ kàhhôc ita kam, Pawrô te me cumã catyt kam Pahpãm kôt cute me hũcanãar kam me ipa kam me to incrã nahàpôr. Ne cute me cumã hacpÿ ne Jeju te amji jaxàr, ne cute me pahcunea to côjkwã wÿr hàpir na harên.

Pê Pawrô me cumã amji jarê
Me Hàpên Xà 17.1-9; 17.13-15

1 ¹Hàpà, me ikjêjê, pom ca Texarõn jõ krĩ kam meakri atajê, Pahpãm me, me pajõ Pahhiti pê Jeju Crixto tekjê na ame apa atajê. Ipê Pawrô, mã icahê na Xira me Timot ame ipa. Wa ha me ikjêjê itajê me, me amã ihhõc ne me amã ihkujate. Wa Pahpãm mã me acunea cajrên to ipa, ne me acunea caxuw Pahpãm me, me pajõ Pahhiti pê Jeju na ijãhwÿr to ipa, quê me amã me apejti jôr to ipa, ca me acarĩcre kam me apa.

Pê Texarõn jõ krĩ kam Jeju na mehkwy ihtÿj ihkôt me amji to

²Me apê Pahpãm kôt me apa catêjê impeaj. Ampo na? He cutea ri me amã acarôt jôr, catyt kam me apa xà caxuw. Wa ita pyrên ame ijakry nejõtpe me Pahpãm mã me garê, me apyrên me ijakryti na. ³Wa Jeju to me ate amji mã me ahimpej na me ato amji japackre, ne ampo pejti to pit mã me apipê to me apa, ne me gãhcapria kam me gãpên tocatia to me apa, ne Jeju mã me amji jôr to me apa. Ca hõtpe Jeju pê me pajõ Pahhiti te amji kam hapac xà ata na, me gũcanãar kam me hikaj to me apa. Wa

ahna me atoaamji japackre, ne Pahpãm pê me pajõ Inxũ Cati mã me acajrẽn to ipa.

⁴Me ikjêjê, me imã, Pahpãm te amji mã me acapi, ne cumã me akĩnti na, me gahkre pej. ⁵Wa ite me amã Jeju pê me pahkritxwý jarẽn xà impejti jarẽn, ne nee wa mejarkwa cacrõ to pit mã me amã ijũjarẽn nare. He wa hanea ne Pahpãm Carõ Pejticarõt týtji pejti kõtme ato me ihmpej to ipa, ne pom wa me amã ijũjarẽnxà to ijũjarẽn to ipaitajê ampeaj kam ri. Wa ite me hahkre peaj xà na me amã harẽ. Por pê wa ajco me acahê na apu ipa reria mã, me acaxuw ampo pej to pit mã amji kam ijapacto ipa, pê ca ajco ahna me ipupu. Ne ramã ate ampoitajê na me ijahkre pejtu. ⁶Ne ate me Jeju jarkwa pyr ne ihkõat me amji ton, ne hanea ne ate ikõat me amji ton, ne hanea ne me pajõ Pahhiti kõt me amji ton. Ne icuxà ate me amji pupun xà kên kwý to ame amji pupun. Ampo na? Porme cupê Jeju na mehkwy nare atajê hõtpê ame ato kêanre cacrõ, ca ate Pahpãm jarkwa kõt me amji ton. Cwýrjapê ri Pahpãm Carõ Pejti te me amã gakryti jõr.

⁷Cwýrjapê ri me pahkjêjê cunea te ahna me apupun. Por ame Maxeton jõ pjê kam, me Crec jõ pjê kam me pahkjêjê amehkrĩ atajê cunea te ramã me gahkre pej. Ne ahna impejti, ne quê haita na me gahkre pej, ne me acuxà me ita to hane. ⁸Ca ate me pajõ Pahhiti to amji mã me ahimpej. Ne mêr ampo na mã me ato me hũjarẽn xà itajê pjê cunea kam apu ihcahkũm? Me acwýrjapêa riapu ihcahkũm. Mã gõ pjê pê Maxeton jõ pjê ata kam, cute me ato me hũjarẽn par, ne hanea ne Crec jõ pjê kam ate Pahpãmto amji mã me ahimpej ata na, me ato me hũjarẽn par. Cwýrjapê ri hanea ne me acuxà, cute Pahpãmto amji mã me ihmpej. Ne hipêr ite me amji to me amã icakõc xà nare. Ampo na? Ramã mehcunea amji mã me ato mehcakõc to me ipa. ⁹Ne krĩ cunea kõt amji mã me garẽn tome ipa. Ampo na? Ca ate ampeaj kampahpãm cahac krekà tète me amjijũhhyr, ne quêt Pahpãm tĩarkõt amji kam me gapac. Ne ampeaj kam riPahpãm ihtĩar na ipa, ne taa pyxit peajne me pahto ihmpej. Na ca ha cumã me gápên to me apa. ¹⁰Ne pê Pahpãm ihkra Jeju to hacpý mã ihtĩr, neme ca, ca atýj hacpý ne cõjkwa pĩn cute amji jaxàr xà na ame hikaj. Ampo na? Taa mã quê ha Hũmte mehkên catêjê wýr mehkên xà kujahêc xà ata pê me pahpytà. Quê ha Pahpãm ma amji tète apu mehkên catêjê curê, ne nee quêt amji tète ame pahcurê nare.

Pê Pawrõ me cumã to hahkre to impeaj ne

2 ¹Pê wa me awýr icator xà ata kõt hamre nare. Pê wa me awýr me icato, ne Jeju pê me pahkritxwý jarẽn xà impejti to me amã harẽ. Pê ca atýj Jeju toamji mã me ahimpej, ne me acunea te ramã me hahkre pej. ²Pê wa me awýr icator xwýjrea na, Pirip jõ krĩ kam me ito kên crire nare, pê wa meamji pupun xà kêanre to me amji pupun crire nare. Pê ameixũn

xà kēanre to ameixūn cakrô, pê Pahpām me imã icarôt to ihtÿj, pêwa Jeju jarēn pejti to me amã harē. ³Pê wa nee me amã ihêj xi to ijūjarēn nare, ampeaj kam pê wa me amã awjarē. Ne nee wa me amã ihêj xi to prām to me awÿr me icator nare. ⁴Pê Pahpām me ikujate, wa Jeju jarēn pejti to me amã harēn to me ipa. Cwÿrjapê pê wa nee jūm te hakry xà na ame ijūjarēn nare, ne quêtPahpām te me pahkam hakryti prāmte, pê wa me icato. Ne ame amã ijūjarēn to me ipa, por Pahpām me pahpupu ne me pahcajpêr to ipa ata. ⁵Nee wa ihêj ne amji cwÿrpê ame ato ikwÿ nõ nare. Ne nee ate me imã ampo jôr xà na, wame amã ijūjarēn to apu iprar nare. Pahpām me, meate ita na me ijahkre pejtu. ⁶Wa nee jū caxuw me anõ te me ipejtina me ijarēn na me prām nare. Neme ipê Jeju jarkwa na me iprar catêjê cakrô, wa nee jū caxuw jūm te amji mã me icupa na, imã me to prām nare.

Pê Jeju Texarõn jô krī wÿr Pawrô kujate

Ne nee jūm te me awÿr me ikujahêc nare, neJeju pê quêt amji mã me icapi, ne me awÿrme ikujate cakrô, wa nee me amã icakôc tÿaj to me ipa nare. ⁷Ne me amã icakôc pejti to ipa, pom hân ne menxryxwÿ mehkra mã ihcakôc tÿj nare, ita to pê wa ajco me amã icakôc to ipa, ne pê wa ajco me amã icakôc tÿjnare to ipa. ⁸Ne imã me akīan to me akīn. Cwÿrjapê wa itÿj me amã Pahpām pīn Jeju jarēn pejti hapôj itajê jarēn prām. Ne cormã ita jipycumã me akīn ita kam, wa itÿj me acwÿrjapê me itycprām, ne imã me akīn ne me gapêti incwÿrjapê. ⁹Me ikjêjê, por pê wa me ijâpên xà to atajê na me ito amji japackrea ne. Pê wa hanea ne ijâpên xà itajê kam amji pupun xà kēanreto amji pupu. Pê wa amcro me caxwa kam me gôt cwÿar ajco me ijâpên to me icuhhê, ate me imã me gâmjôr nare prām to. Hô, pê wa ajco me ato hajÿr to ipa, ne me amã Jeju pê me pahkritxwÿ jarēn xà impejti to harēn to ipa.

¹⁰Pê wa ampeaj kam catyt kam ajco me ipa, nenee pê wa me ampo kên crire nõ tonnare. Ne nee pê wa ampo to ajco me amã me apahâm ton to ipa nare. Pê ca ramã ita na me ipupu, ne me ijahkre pej, pê Pahpām hanea ne ramã ahna me ipupu ne me ijahkre pej. ¹¹Ne ramã ate amji na me ijahkre pej, wa me ato ijâpên to ihhêj rûm me hūmjête mehkra to hâpên ita na, wa me ato apê. ¹²Ne wa ita na itÿj me arân to me ipa, ne ahna me amã hakam to me ipa. He wa nee ampo caxuw ame gapackre nare, mâr ca ampeaj kam me awpa ne catyt kam me apa. QuêPahpām me apyrên hakryti to ipa xà caxuw, wa ame gapac caxun to me ipa. Nãmri Pahpām te ihtÿj me anahâhwÿr, ca mehkwy mã axà, quê ato impejti to ipa. Nequê ha jū caxuw amcro nõ na, mehcunea Pahpām himpej xà kam me ajÿr na me apupu, hõ amcro jâhcujrohti ata kam. Ita caxuw ri Pahpām te me ana hâhwÿr.

¹³Cwÿrjapê wa hõtpê me ana Pahpām mã icakôc, ne cumã me apyrên me ijakryti na me amji jarē. Ne Pahpām te ito ihhimpej xàa kôt pê

wa ajco me atoihimpej, pê ca ihhimpej xàa kôt me amji to. Ne me gūparpyrentu, nāmri me icakôc xà ita pê nee me hūmre nō pīn cator nare. Pahpām pīn pê hapôj, pê ca ramā me hahkre pejtu. Cwÿrjapê pê ca me gūpar pyrentu, ne Pahpām jarkwa kôt ame amji ton to me apa. Māharkwa ita me atête hàmtār to ipa.

Pê mam Pawrô ramā amji pupun xà kēanre to me amji pupun to ipa

¹⁴Me ikjêjê, pê ca, me akwÿa kam ramā me amji pupunxà to kên crire nare. Ne por pê ca me amjipupun xà kên atajê kwÿa to, pê wa ramā me amji pupu, Juta catêjê jô pjê kam Jeju na mehkwy pê mam me amā me amji pupu. ¹⁵Ne Juta catêjê pê Pahpām na mehkwy nare atajê, pê me pajô Pahhiti pê Jejucura, ne hanea ajco me Pahpām jarkwa to mehcakôc catêjê cura. Ne pê hanea ne me ito hanea, ne ma amjitête ame icurê. Ne nee Pahpām mā me hakry jôr to meipa nare, ne ihtÿj mehcunea curê to me ipa. ¹⁶Ne Juta catêjê mā, pê ite mehcakrit atajê mā Pahpām jarkwa jarēn ita na, ihkaj na. Wa ite Jeju te mehcakrit pê Juta catêjê nare atajê pytār xà to, me cumā ijūjarēn na, me cupê ihkaj na. Mā cama mentête me ijuwahi to prām. Ne pom meijuwahi to prām itajêa ri cormā nee cute mehkên ton to me hīcu nare. Ne ampo kên to pit mā me amji japackre to me ipa. Cwÿrjapê quê ha Pahpāmuu ne me kam incryc jīcu nare.

Pê Pawrô hipêr Texarôn catêjê pupun prām

Me Hàpên Xà 17.10-13

¹⁷ÿhÿ, me ikjêjê, pê wa ma me apê me pra, ne me ijī to pit mā me hawry, ne pahte amji kam me pajapac xà, nee ajpên pê hūwrynare. Ne ampeaj kam me ato ijapac xà, cwÿrjapê ri hipêr imā me apupun prām crire nare. ¹⁸Ne me ikjêjê kwÿ me, wa me awÿr me ikrār. Ne pa, ipê Pawrô, wa me hirôa pê me awÿr ikrār cakrô, mā me pahcurê xwÿn te jū mā me iton, ne meijuwahi, wa nee me awÿr me iprar nare. ¹⁹Na wa me apyrên ame ijakry catia, ne me acwÿrjapêa ri me ijâpên xà itajê kôt hamre nare. Ite me ana ijâpên xà ita cunea tohjê, neijôtpê mehcunea mā me ato me ijūjarēn pejti to me ipa. Ne por quê ha amcronô kam, Jeju te amji jaxār xà ata kam, cu ha me pahcunea cuna mā me ahtwÿ ne me pahcuhhê. Ne ampeaj kam, quê ha me akam me ijakry, amcro ata kam. ²⁰ÿhÿ, ampeaj kam ri me apyrên me ijakrya tome ijakry. Wa hān ne itÿj me ato mehcunea mā me icakôc to me ipa.

3 ¹Jīcu xà kam, wa nee hipêr ahte ame ipa xà ita mā me ijūcanār nare. Cwÿrjapê wa Atēn jô krī kam me ijāhhuc. ²Ne ite me awÿr me pahtō Timot kujahêc. Ne me pahtōTimot ita me Pahpām jarkwa na apê, ne me icahe na Jeju jarēn pejti to harēn to ipa. Wa me ite me awÿr mehkujahêc, cute me arān ne me atehcajpar, mār ca ampeaj kam Jeju to amji mā me ahimpej to me apa xà na. ³Mār quê me akwÿ nō ame acurê,

ca jũmjê itajê cupate nee Jeju kôt amjiton to hïcu nare. Ne ate me ampo kên itajê mã me gãcanãr xà caxuw, pê Pahpãm amji mã me girê. Ne ramã ita na me ate me amji jahkre pejtu. ⁴Pê wa cormã me akam ame ipa reria mã, me amã ampo kên itajê na me pahte amji pupun ita, pê wa me amã harên hiahpuro, ate me hahkre pej prãmte. ⁵Na wa ite me awÿr Timot kujahêc, ite me garên par prãmte. Ampo na? Jũ wÿr wa me gahkre pej nare kam, hipêr me awcanã. Mãr ca ampeaj kam Jejuto amji mã me ahimpej, ne ihkôt me amji ton to me apa, wa me garên pa, ne me ijakry. Nãmri imã me anapa, quê ihhêaj to me pahcurê xwÿn jũ na me ato, ca Xatanaj kôt me amji kampa, ne Jeju to amji mã me ahimpej jïcu. Nãmri ca ha ate me ita to hajÿr na, quê ha meijãpên xà itajê kôt hamreare ne.

Pê mehkwȳ te Jeju to amji mã mehhimpej pyrên Pawrô hakry

⁶Ne ma ramã Timot me awÿr tẽ, ne ramã cute amji jaxãr ne cute imã me garên pejti to me garên. Ca ampeaj kam Jeju to amji mã me ahimpej to meapa, ne me ajpên to impejti to prãm to me apa. Ne atÿj me ito me amji japackre to me apa, ne me amã me ipupun prãmte hajÿar, pom quê imã me apupun prãm he. ⁷Wa ita ri me amji pupun xà kãanre to me amji pupun to me ipa, ne kam amji jahkre kãatre to ame ipa cakrô, mã Timot te, ca atÿj ame apa na, imã me garên. Wa me ijũpar, ne me apyrên ite me ijakry to me amji rãn. ⁸Ca Jeju to amji mã me ahimpej to me apa, cwÿrjapê wa ite me ijakry to me amji rãn. Ca Jeju kôt me atÿaj kam me amji ton to me apa, cwÿrjapêwa me ijakrya kam me amji to me ipijapar to me ipa. ⁹Ne wa Pahpãm kam mare mã me apyrên meijakry cati, ne me ana me Pahpãm mã me icakôc cati. ¹⁰Ne wa caxwa me amcro kam, Pahpãm na me ahwÿa to me ahwÿ, me ina cuhkônre cunea to, quê me ana me ijamã, wa me itoa to me apupu. Quê ihhêaj to ate Pahpãm toamji mã me ahimpej xà ata kam, me apê ampo hamre na, wa ha cormã me amã to hahkre.

¹¹Wa Pahpãm me, me pajô Pahhiti pê Jeju name ijãhwÿr to me hajÿr he, quê me imãme awÿr pry ita to impej, ne ihkôt me ikujate me awÿr. ¹²Wa hanea ne ahna me ijãhwÿr, quê hãn ne hõtpê me amã ajpên kïnti ita to ipicamên to ipa. Ne hanea ne me amã me akwÿ cunea kïnti itato ipicamên to ipa. Ne ate me ajpên kïn ita, quê ha ipicamên to mō, ne me ite me akïn ita me ajpëan. ¹³Na quê ha me amã me ana cuhkônre to ihtÿj. Cwÿrjapê ca ha me apej pit, Pahpãm pê me pajô Inxũ Cati cuna mã, ne nee ame apahãm nare. Quê ha me pajô Pahhiti Jeju, por ihkôt me ipa catêjê atajê to ajpên mō, ca ha me cuna mã apejti to xa.

Pê Texarõn catêjê pyrên Pahpãm hakry

Roman 13.11-14; Epet 5.3-14

4 ¹ÿhÿ me ikjêjê, wa ha hipêr me amã ampo jarê, neme amã to hahkre. Ne wa ramã ite me amã to hahkre, ca me ate me hahkrepej,

ne ramã Pahpãm kôt me apa to me ate me amji pyrãc. Cwÿrjapê ri me apyrên Pahpãm jakry. Ne wa cormã mepajô Pahhiti pê Jeju japrÿna me ana ahwÿ ne me gapackre, mâr ca hipêr ihkôt me apicamên to me mō. ²Ne ramã me pajô Pahhiti pê Jeju jarkwa kôt ite me amã ampo kwÿ to hahkre, ca ramã ate me ampo itajê jahkre pej, ne me hōmpun.

³Ne ampo itajê na ri Pahpãm mã me ana prãm he:

Ca Pahpãm jarkwa kôt catyt kamme apa.

Ne nee ahti na ame pyjê to me axy nare.

Ne amji na me apahãmti to me apa.

⁴Ne hanea ne Pahpãm mã me ate catyt kamme aprô to me amji prô impejti na cumã me ato prãm.

⁵Ne nee me apê krìxàre kwÿ pê Pahpãm jahkre kêatre atajê pyrãc, ne cama me aprô to ame apahãm nō prãm nare, ne me to amji prôa ne.

⁶Ne pahte mehprô cahkrit to me caxun ita na ihkaj na. Ampo na? Ca ha ramã nee amji mã impjên ata cupa nare.

Wa ha hipêr ampeaj kam me amã harê, pom ramã ite meamã harên ita, quê ha Pahpãm ihtÿj cute ame ampo itajê ton jahpan xà na me to kêanre ne.

⁷Pê nee Pahpãm ampo itajê caxuw me pahna hàhwÿr nare. Catyt kam, harkwa kôt, pahte me papa xà caxuw pê quêt me pahna ahwÿ. ⁸Quê ha jüm apu ite ampo to hahkre xà itajê caca na, quê ha nee me paxümre nō jarkwa caca nare, ne Pahpãm jarkwa quê ha apu ihcaca. Por Pahpãm te mepamã Carô Pejti jôr ata quê ha apu ihcaca.

⁹Wa nee hipêr ate me ajpên kîn na me amã ihhóc prãm nare. Nãmri pê ramã Pahpãm me ate me ajpên kwÿ kîn to me amã hahkre. ¹⁰Ne me ate me ajpên kînti ita to, ca ramã Maxeton jô pjê kam ame akjêjê kîn to me apa. Ne wa ha cormã me ana ahwÿ, ca hipêr me ajpên kînti ita to me amji mã me ajcamê.

¹¹Ne götpê me acarícti kam me apa na, ca me ahcukij. Ne hanea ne me ate amji kam me gapac xà atajê to pit mã me amji mã me ahimpej to me apa. Ne megapên xàa to me amji to ajpa to me apa. ¹²Ca ha ate me itajê cunea ton to me apa na, quê ha me cupê Pahpãm na mehkwy nare catêjê ihtÿj amji mã me acupa to me ipa. Ca ha nee ate ampona me prãm xà atajê kôt ame jüm na prãm nare.

Quê ha Jeju côjkwa wÿr me pahto api

¹³ÿhÿ me ikjêjê, me imã me ate mehtyc atajê jahkre pej pejti na me ato prãm. Porme cupê Pahpãm na mehkwy nare catêjê pêmekhwÿ ty, mã me cumã amji kîn nare atajê cuxà, ca nee me amã amji kîn nare nare. Ampo na? He me pahkînte nee me cumã hacpÿa mã mehtírna me hahkre pej nare na ri. ¹⁴Xà Jeju tyc ne nee hacpÿ mã ihtír nare? Hãpà, ihtÿj ihtyc ne hacpÿa mã ihtír! Mêr hōhō, quê ha Pahpãm Jeju kôt me ipa catêjê to hanea, pom quê Jeju he, ne hacpÿa mã me to ihtír.

¹⁵Wa itỳj me pajõ Pahhiti pê Jeju jarkwa kôt me amãawjarẽ. Quê ha amcro nõ na, Jeju cõjkwa wỳr me pajaprõr prãmte pjê wỳr, ahcakrã kam, amji jaxà. Nemam mehtyc itajê na ahwỳ, quê ha me api. Jirõ pê cu ha cormã me pahťir itajê mehkôt me api.

¹⁶Ỡhỹ, quê ha hane he. Quê ha me pajõ Pahhiti pê Jeju ajpên cõjkwa pĩnwry ne ihkrãhhia kam me pamã caràr. Quê ha haneane cõjkwa pĩ Pahpãm mãmemprar catêjê jõ pahhi caràr, quê ha pea Pahpãm jõ wakỳre te hõhhi harkwa cato. Quê ha mam Jeju na mehkwy tyc atajê kàj mã me mõ. ¹⁷Ne me pa, pom cu cormã me pahťir na ame papa atajê, cu ha kỳj pême cuprõ mehtyc me, me pahte me pajõ Pahhiti pê Jeju cajpar prãmte, kỳj pê. Hõhõ, ita na cu ha me pajõtpê Jeju cahê na ame papa rohnỳtti mã. ¹⁸Cwỳrjapê ca ha ma me ijarkwa ita to me amji jahõtto me apa. Ne ma me akwỳ mã to amji kĩn ton to me apa.

Cu ha Jeju te amji jaxàr xà caxuw me amji cũmpej

2 Petrõ 3.8-13

5 ¹Ỡhỹ me ikjêjê, wa nee me amã amcro me caxwa nõ hyr xà na ihhõc to prãm nare. Por quê ha jũ caxuw ampo hane ata na. ²Ampo na? Quê ha me pajõ Pahhiti pê Jeju te amji jaxàr xà ita pê ihhêj rúm caxwa ri me hàhkĩj xicatêjê imprar xà. Quê ha nee jũm ihtêm xà ita na hahkre pej nare. ³Quê ha ramã me pajõPahhiti ihtêm xàa kam, quê ha mehkwy me ajpên mã:

— Cu ha me pampeaj kam me pahcarĩcti kam ame papa, quê hanee me pahna ampo jamãrnare — hane. Hõ, quê ha me ajpên mã me harkwa tome hajỳr cakrõ, quê ha ihprõt pê Pahpãm te amji mãamcro hyr xà ata kam ahtwỳ. Quê ha ihprõt pê ampokên jãhtõa ne me hỳrmã cato. Quê ha mehkàj xà hane, pom quê hãn ne pyjê mã ihkra hà he.

⁴Ampo na? He me cupê amji jahkre kêatre, cwỳrjapê ri me cupê awcapãtkõ catêjê. Ne me ca, Jeju kam me ikjêjê, nee me apê awcapãtkõ catêjênare. Cwỳrjapê quê ha Jeju te amji jaxàr xà jõ amcro cato, ca ha nee ame amji mã me apikrar nare. Ampo na? He ramã ate amji mã me gãhcuprõn. ⁵Pom ramã me apê amcro jõ amcro tekjêita? Ne nee me papê awcapãtkõ jõ awcapãtkõ tekjê nare. ⁶Cwỳrjapê cu ha me hane, ne nee ame pajõt nare, ne meparĩat na pahte amji kam me pajapac xà impejti kam ame papa to me pahcuhhê, ne xwỳ kam me amji jamãr nare. ⁷Ne awcapãtkõ kam ri hãn neame gõr. Ne caxwa ri cõxỳhti to ame amji peccatêjê ri caxwari cõxỳhti to amehkõm to me ipa.

Cu ha me pahťỳj me amji jamãr pejti ne

⁸Ne me pa, quêt me papê amcro jõ amcro tekjê, cwỳrjapê cu xwỳ kam me amji jamãr nare to me hane he. Pom quê hãn ne krãhtare hõ hitõ kà tỳjtiita me hõ krãhkã tỳjti itato hõtpê amji jĩ pytà ita pyrãc pej ne, cu ha

meamji kam me pajapac xà pytârto me papa. Ne me pahte Jeju to amji mã me pahhimpej xà ata me, me pamã ajpên kînti itajê pêihhêj rûm wakÿre te hitô kà tÿjti me hõ krâhkà itajê pyrâac. Ne Jeju te me pahkên pê me pahpytâr xà ita pê ihhêj rûm krâhtare jõ ihkrâhkà tÿjti ata pyrâac. Hõhõ, me ate amji kam me gapac xà itajê to, ca ha me amji kampa, ne me to amji pytà, ne ahna me ato xar to me apa. ⁹Pê Pahpãm amji tète ame pahcurê xà caxuw amji mã me pahcapi nare. Ne quêt me pajõ Pahhiti pê Jeju Crixto te me pahpytâr xà caxuw, pê Pahpãm amji mã me pahcapi. ¹⁰Ne me pahte Jeju Crixto cape na ame papa xà caxuw, pê me pantête amji to amtà, ne me pancwÿrjapê ty. He nee ihnõ na me pamã hÿpa xànare. He xà mormõ ajkî me pahtyc, nare, cu me pahtïar naame papa, Jeju cator xâkam, cu ha me pahcunea cahê na ame papa rohnÿtti mã. ¹¹Cwÿrjapê ca me ajpên tehcajpar to meapa, ne me amã amji kîn na me amji ràn to me apa. Ne maahna me amji mã hakam. Pom ahnaa mã ramã me to ita na, ca ha kam me to acrà.

Me hapackre xà cahhur
Epet 4.1-6; 1 Timot 5.17-19

¹²ÿhÿ me ikjêjê, wa ha me ana ahwÿ, ca ha me akamame hàpên to me ipa atajê to amji mã me ahimpeaj ne. Nãmri me pajõ Pahhiti Jeju te ri amji mãme capi, mâr quê amji kôt me ato ipa, ne me amã ampo to hahkre to ipa. ¹³Ne jÿmjê atajê to catyt kam amji mã me ahimpej tome apa, ne amji mã mehkînti to me apa, ne catytkam ame ajpên kîn to me apa.

¹⁴Ne wa ha cormã ihnõa to me amã icakôc. Ca ha ampeaj kam cute me xuwcacatiatajê japackre. Ne hanea ne me cute amji mã hàhtât to me ipa atajê na, ca ha mehràn, ne me cumã hakam to me apa. Ne por cute Jeju kôt kyre pê me amji ton, ne amjî kam ihkôt me ipa atajê na, me hamãr nare, ne atÿj ahna mehtehcajpar to me apa. Nemehcunea to gâhtât to me apa. ¹⁵Ne ma ajpên na me to guphê, quê nee jÿm ajpên mãihkên to hàmjôr nare, mehkên xà atajê nõ jahpan xà na. Ne ajteare mã ita to ca ha me to hane he. Ca ha gõtpeajpên mã me apejti ne, ne hanea neme cupê me akwÿ nare atajê to mempeaj ne.

Cu ha me pahtÿj Pahpãm mã me pahcakôc to me papa

¹⁶Ne gõtpe me gakrya ne, ne jÿ caxuw me gakry tome hîcu ne me amã amji kîn nare nare. ¹⁷Ne gõtpe Pahpãm mã me acakôc jîcu nare. ¹⁸Por cute me amã ampo cunea jôr atajê jahpan xà na, ca hãn ne hõtpê me cumã acakôc, ne impejti na me harê, ne catihti na me harê, ne hÿrên me gakryti na me amji jarê. Ne por quê ha cormã ihhêaj to ampo kên me awÿr cato ata cupate, ca nee me Pahpãm to amji mã me ahimpej jîcu nare. Ampo na? Cormã Pahpãm mãme akîn, cwÿrjapê ca gõtpe Pahpãm pejti to mecumã acakôc ne me cumã harê. Hõhõ, atana ri Pahpãm mã me

ana prãm. Pom ate Jeju to amji mã me ahimpej atajê na ri Pahpãm mã me ato prãm.

¹⁹Nee apu amji tète Pahpãm Carõ Pejti te me akam hàpên atajê cahpêrkâr to me apa nare. ²⁰Quê Pahpãm Carõ Pejti jũm jũjarên na cumê, quê awjarê, ca ha nee me jũm ata jũjarên tète me hiprôn nare, nãmri nee harkwa ita kôt hamreare nare. ²¹Ne atýj Pahpãm Carõ Pejti jarkwa kôt me amji mãgũjarên ita kam me to acrà. Ne amji to me ate me ampo kam gapac itajê cajpê, ne ampo pejti atajê, ca me kampa, ne amji mã me huwahi. ²²Ne ampo kên atajê cunea pê amji to me awpjê.

²³Ita na wa Pahpãm mã me acajrên to ipa, por Pahpãm te me pamã me pahcarĩcti jôr ata to, wa meamã ahna ahwý, quê me ato impeaj to ipa, ca me ateamji kam me gapac xà tũm nare ne, ne me acarõ jamã, ne me acaxwýn jamã, ne me akrekà jamã, mãr quê me amã ihtetetti ne. Ne nee jũ kam ihtũm kênrenare. Ampo na? Quê ha me pajõ Pahhiti pê Jeju Crixto amji jaxà ne me atetetti na me ana prãm. ²⁴Ne Pahpãm te ri ita na me papa na, me pamên, ne taa mã quê ha me pahtehcajpa, cu ha ita na kam me to pancrà. Nãmri Pahpãm ita harkwa cacrõ to ihcakôc nare. Ne ramã cute me pahtehcajpar na amji ton.

²⁵Ýhý me ikjêjê, ca ha hanea ne Pahpãm mã icajrên to me apa. ²⁶Ca ha me pahkjêjê cunea mã ite mehkĩnti to ite me cumã hàpà na, ca ha me cumã ijarê. ²⁷Ne ite ampeaj kam me pajõ Pahhiti jarkwa kôt me amãn, ca me pahkjêjêcunea mã ijõ kàhhôc ita cahyt.

²⁸Ýhý, wa hãn ne ijõtpê me pajõ Pahhiti pê Jejuna ahwý, quê me amã apejti caxuw impejti cunea gõ. Hamre, ita pit.

TEXARÕN JÕ KRĪ WÛR

Hapu Na Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ. Ne pê Texarõn jõ krĭ kam Jeju na mehkwy jakrã mehkrĭ atajê wÿr, pom cu me hõ kàhhôc pijakrut cahyt itajê kujate. Na pê hapu na hõ kàhhôc ita japyr pê Texarõn Jõ Krĭ Kam Jeju Na Mehkwy Jakrã Wÿr, Hapu Na Pawrô Jõ Kàhhôc (2 Texarõn).

Ne Pawrô te Jeju to amji mã mehhimpej to me ipa, cwÿrjapê rime cupê Pahpãm tekjê nare atajê ame to kêanre, mã cute me amji pupun xà kêanre to me amji pupun. Ne hõ kàhhôc ita kam, Pawrô te me cumãcute amji mã Jeju to mehhimpej jicu nare na me cumã harĕn. Ne hanea ne cute me cumã pjê jamre xà caxuw, jũ caxuw hacpÿ ne Jeju wÿc na me cumã harĕn.

Pê Pawrô hipêr me cumã amji jarĕ

1 ¹Ûhÿ, Jeju kam me ikjêjê, pom ca Texarõn jõ krĭ kam me apa itajê, ipê Pawrô, wa ite me pahtõ Xira me, me pahtõ Timot me, me awÿr mehhôc. Por me apê me pajõ Inxũ Catipê Pahpãm me, me pajõ Pahhiti pê Jeju tekjê na, came apa atajê wÿr ite mehhôc.

²Ne wa itÿj me pajõ Inxũ Cati pêPahpãm me, me pajõ Pahhiti pê Jeju mã me anaicakôc to ipa, quê me ato imej to ipa, ne me amã meacaxwãm pê me acarĭcti jõr to ipa.

Pê mehkwy pyrĕn Pawrô hakry

1 Petrô 4.12-19

³Me ikjêjê, me acwÿrjapêa ri me ijakry hyre nare. Cwÿrjapê ri me imã ijõtpê hãn ne Pahpãm mã me acajrĕn to me ipa na to prãm ita na. Ampo na? Caampeaj kam Jeju to amji mã me ahimpej to me apa. Ne hanea ne ca ame ajpĕn kĭnti to me apa ita, hõtpê ihcunea name amã ipicamĕn to ipa, cwÿrjapê ri me apyrĕn me ijakrya to me ijakry. ⁴Me imãa, ca catyt kam me amji to apijapar to me apa. Na wa ijõtpê Jeju na mehkwy kwÿ mã me akôt harĕn to ipa. Ne por me Pahpãm par nareatajê kam, ca me

amji pupun xà kêanre to ame apa, mã ajteare mã, mehwý ame acurê to me ipa cakrô, ca cormã amji to me gũcanãr to me apa, ne Jeju to amjimã me ahimpej to me apa. Hõ, ate amji kam me gapac xà impejti to ate amji to me apijapar xà itajê na, wa Jeju na mehwý kwý mã me akôt harê.

⁵Ne pom ca me kam me amji pupun xà kên itajêa to pê ramã Pahpãm ihcakôc, ne ahna harkwa ta. Ampo na? Pom me ate amji pupun xà kên itajêa, quê ha Pahpãmkrac ri himpej xà mã me acjêj xà caxuw me acũmpej. ⁶Ne quê ha Pahpãm catyt kam ipa ata kam, nee to ihnôcupan nare, ne cute ame ato kên itajê to, tapanhanea ne ame to kêanre ne. ⁷Ne me amãa quê ha me akôt xà gõ. Ne hanea ne me imã cugõ, pom hanea ne ite me amji pupun xà kêanre ita jahpan xà na.

Jeju te amji jaxàr xà

Quê ha xa mepajõ Pahhiti pê Jeju pu na cuhypôc pixêrti ata to ahpar mã mô, cõjkwa kam Pahpãm mãmemprar catêjê carôt týtji atajê me. ⁸Quê ha ajpên mô ne cato, ne me cupê Pahpãm jahkre kêatre atajê kên mã ame curê. Por nee me Pahhiti pê Jeju pê me pahkritxwý jarên xà impejti atajê kam hapac narecatêjê to hanea ne apu mehkên mã me curê. ⁹Ne mehkêanre itajê quê ha me pajõ Pahhiti carôt týtji ita pê ampýa mã amehcuhê. Na quê ha jũ caxuw Pahpãm te ame to kên xà ata pê me cator nare. ¹⁰Por Jeju te amji jaxàr xà jõ amcro ata na quê haitajê cunea apu hane. Ne amcro ata na, quê ha Jeju na mehwý me cuprõ ne Jeju mãimpejti to mehcakôc. Ne por mehcuneaJeju to amji mã mehhimpej, ne kam me hapac to meipa atajê, quê ha Jeju pejti ne catia na me hõmpu. Ne ate me hajýar, ca ha atýj cahê na me acuhê. Ampo na? Ite meamã Jeju jarên pejti jarên, ca ate mempar cwýrjapê.

¹¹Pahpãm te amji tekjêa na me ana hàhwýr. Ita cwýrjapê wa hõtpê Pahpãm mã me acajrên to ipa, mãr quê me atehcajpa, ca ate me amji to apijapar xànõ kam me gakryti atajê nõ to, ca ha me amji to ajpa. Me amã catyt kam amji to meapijapar prãm, cwýrjapê wa hanea ne ahna ahwý, mãr quê carôt to me atehcajpa, ca catyt kam amji to me apijapar to me apa ita na. Ca Jeju to amji mã meahimpej kam, me gápên to me apa, ne ahna me ahwý, ate gápên xà itajê cunea to me ajpên ràn to me amõr xà caxuw, hicu xà wýr. ¹²Ita na quê ha mehcunea apyrên ame pajõ Pahhiti pê Jeju japrý to mehcakôc pejti to me ipa. Ampo na? Cute me akam hàpên xà cunea impejti name hõmpun cwýrjapê. Ne quê ha mehcunea me apê hõ tekjê na me gahkre pej. Ne Pahpãm me, me pajõPahhiti pê Jeju mã me akĩnti, cwýrjapê ri hãn ne hõtpê me ato impej to me ipa.

Quê ha jũm kên hêj xi cati cato

1 Jowãw 2.18-19

2 ¹Ýhý me ikjêjê, ita caxuw wa ha me amã hacpý ne Jeju cator, ne cute me pahto cuprõn xà to, hipêr ihmpej. ²Ne ihhêj ne jũmjê

jàhtôa ne Jeju te amji jaxàr xà to amehhêj xi tome ipa. Ne ramã xwahna amcro ita cator na, ame harê. Ne wa me awy, ca nee ame kam gapac nare. Nãmri quê ha mehkwy me iriat kam, cute me ampo pupun name amji jarê, nare, quê ha mehkwy Pahpãm te me cumã ihcakôc na me amji jarê, nare, quê hamehkwy ite me cumã ihkãhhôc ton na me ijarê, ca hanea me jùmjê itajê nõ kam gapacnare. Ne nee ate amempar xà ata to amji pê me gapac kêt to me apa nare, ne nee ame to amji jigêc rênto me apa nare, quê nee jùm me anõ mã ihhêj nare.

³Quê ha Jeju jõ amcro catorxwýjrea na ampo ajkrut ne cato. Ita quê ha mam cato he. Quê ha me hàhtôa ne ame Pahpãm curê, ne cunaa mã amehcaca to amehcuhhê. Ne ihkôt cato ita, quê ha cupê me hirôa pê jùm kêanre ata. Por me hirôa pê jùm kêanre ita quê ha jü caxuw, amcro nõ na, ma ihkên catia pê ihkãkãnti kam cuhy ata kam ihpým. ⁴Quê ha amji to cati prãmte, ma apu Pahpãm caca, ne ma apu pahpãm cahac krekà caca, mehcunea te amehkîn ne mempar prãmte. Quê ha mehcunea jipy apu mô, ne hanea ne ma Pahpãm tome amji kam hapac xà jürkwa mã axà ne jy, ne me cumã cupêa Pahpãm na amji jarê.

⁵He pê wa me acahê na ipa reria mã itýj me amã ampo itajê cunea jarên to ipa. Xà ca nee ampo itajê to ame amji japackre to ame apa nare? ⁶Quê ha jùm kêanre ita jõamcroa kam ahtwy, quê ha ihtýj amji to ajpê. Ne por wýjrea na ramã jùm ipa ata, quê ha neecute amji kam hapac xà ita na hamãr nare. Neramã ate me jùm ata jahkre pej. ⁷Mã ramã cute amji kam hapac xà kêanre ita apu ihcakhüm to mô. Ne ramã me to kên to mô. Ne por ihkêanre ata, quê ha xa jùm ihkên têtéma hiprô ata ma tê, jakàn pê quê ha ihtýj ihkên itajê cunea ton to ipa. ⁸Ne por me hirôa pê jùm kêanre ata quê ha ihtýj amji to ajpê, hõ amcro ata na. Ne por Pahhitipê Jeju te amji jaxàr xà ata kam, quê ha Jeju ihtýjhapkôc to ihcura. Ýhý, quê ha Jeju hàhcujro pràti ita to cato, me ajkaam, quê ha jùm kên ita hamre, Jeju jàhcujro cupate. ⁹Quê ha jü caxuw me hirôa pê jùm kên ita cator xà jõ amcro kam ahtwy, quê ha me pahcurê xwýn pêXatanaj cumã carôt týtji gô, quê ha to amji to hipu, necato, cute mehcunea mã ihhêj prãmte. Quê ha incaca xàa to cute amji kam hapac xà cunea to me cumãna to ipa. Quê ha mehcunea, cute amji kam hapac xà cati na me hahkre pej. ¹⁰Quê ha ampo pihho kên cunea ton to ipa, cute ihkôt me amji ton catêjê mã ihhêj xà na. Ne por cute ihkôt me amji ton catêjê atajê, quê ha me hamre. Ampo na? Nee cute me Pahpãm jüjarên xà ata na meamji caxàr nare, ne ma amehcaca, na quê ha me hamre. Quê ha cama tahna me amji capa na mã, quêha ihtýj mehkên pê me amji pytà. Ne nee cute ahna me amji caxàr nare, cwýrjapê quê ha me hamre.

¹¹⁻¹²Hõhõ, ita na quê ha Pahpãm cama me hamã, quêha me taa amji mã mehhêj. Hõ, cute me Pahpãm par nare atajê caxuw ri cuteamji kam hapac xà ita cumã. Ne por cute mehhêj xi kîn catêjê atajê, quê ha Pahpãm mehkên mã me cumê, quê ha mehkên mã me axà ne me hamre.

Pê Pahpãm me pahpytâr xà caxuw amji mã me pahcapi
Roman 8.28-30; 1 Texarõn 2.13; 5.23-24

¹³Yhỹ me ikjêjê, wa itỳj Pahpãm mã me acajrën, ne cumã me apejti na me garën to prãm. Ampo na? He me pajõ Pahhiti mã me akĩn cwỳrjapê. PêPahpãm mam ramã amji mã me acapi, meakên pê cute me ato cator xà caxuw, ne haneane Pahpãm Carõ Pejti te Pahpãm mã me acũmpej xà caxuw. Ne hanea ne ate Pahpãm jarkwa kôt me amji ton xà caxuw, Pahpãm te amji mã me acapi. Pahpãm te atajê cunea na amji mã me aton, cute me ato ihkwỳa xà caxuw. ¹⁴Itajê cunea caxuw pê Pahpãm me ana ahwỳ. Pom pê wa me amã Jeju jarën pejti to harê ata caxuw, pê Pahpãm me ana ahwỳ. Ne hanea ne cumã me ate me pajõ Pahhiti pê Jeju Crixto cator xà jõ amcro jàhcujro prãti ata kam, cumã ame apa na me ato prãm. ¹⁵Cwỳrjapê, ca me ikjêjê, me amji pyxwỳ, ne ahna meamji pyxwỳr tu. Ne pê wa me amã ijũjarën xà to awjarê atajê, ca ha amji mã me nõr to impeaj ne. Ne ma me to amji japackrea ne. Ne hanea ne me ijõ kàhhôc ita to me amji japackrea ne.

¹⁶Yhỹ, me pajõ Pahhiti pê Jeju Crixto me Pahpãm pê me pajõ Inxũ Cati mã me pahkĩnti, mãhõtpê me pahto impejti to prãm. Cwỳrjapê ri me pamã me pahcarôt gõ, cu nee ame ampo kên cupa nare, mã ma Jeju jikaj na me pahtehcajpa, cu pahtỳj cormã me hikaj. ¹⁷Cwỳrjapê wa Pahhiti pê Jeju na me ahwỳ, ne cumã me caa pit cajrën, ne hanea ne mePahpãm pê me pajõ Inxũ Cati mã me acajrën, quê me anacuhkõnre kam me amã hakam, ne me ato ihtỳj, ca me ampo pej pit jarê, ne me to.

Pahpãm mã me Pawrô cajrën xà
Coroxo 4.2-4

3 ¹Ne ijõ kàhhôc ita jicu xà kam, wa ha meikjêjê me awỳ, ca Pahpãm mãme icajrën. Ne ahna me ahwỳ, mãr quê Pahhiti jarkwa itaihcahkũm to awjarêa ne ihcahkũm. Ne quê ha me hàhtõa mã harkwa ita impeaj to impej, ahna mã meamã impejti he. ²Ne hanea ne Pahpãm mã me icajrën, quê mehkên atajê kaj na me ito ipa. Ca ramã me ate me hahkre pej, mã nee mehcunea Pahpãm jarkwa kam mehapac nare, ne nee amji mã me to ihmipej nare.

³Mã me pajõ Pahhiti ihtỳj amji jarkwa na amji kampa. Quê ha me ato ihtỳj, neme pahcurê xwỳn pê ma me gamã, ne ma me apytã. ⁴Me pajõ Pahhiti te ramã me imã me garën, cwỳrjapê wa ite ampo cunea to me amãn atajê na, wa itỳj ate kam me to acrà na amji mã me ato hane.

⁵Ne wa itỳj cõjkwa kam Pahhiti na ahwỳ, quê me acaxwãam pê, me ana cuhkõnrecunea to ate me hahkre pej na me ato, ca me hahkre pej. Pahpãm mã me akĩnti, ne Jeju Crixto ri meamã me acarôt gõ, ate ihkôt me gũcanãr xà caxuw. Ita na wa me amã Pahpãm na ahwỳ.

Me pahcunea jâpên xà pit*Epet 4.28; 1 Texarõn 4.9-12*

⁶ÿhÿ me ikjêjê, wa me pajõ Pahhiti pê Jeju Crixto jarkwa na me amã ijarkwa jirên to mõ. Ca ha mecaa me pahkjêjê te me xuwcacati atajê pê me amjito gũjawry to me apa. Por ma apu ite me ampo to hahkre xà caca atajê pê ca ampÿa mã ame apa. ⁷Wa ite me amã ampo ton xà atajê na, ca me ipynã. Ne ramã ate me ton xà ita na me hahkre pej. Pê wa me akam ame ipa, ne nee ame xuwcaya to me ipa nare. ⁸Pê wa nee ampo na jũm mã me ijãmjõr nare kam, cupê me ipyr nare. Pê wa quêt cama me apêa to me apê, ne wa me ijâpên xà to hãn ne me amjitycrí. Pê wa ajco caxwa me amcro kam, nee me ijâpên jicu nare, pê wa amji na jũm pê me ampo to hamrecupate. Ne nee ite ampo na me ijâhwÿr to prãm nõ to nare. ⁹Pê Jeju me imã ite itÿj me jũmjê jũhkra kam me ampo cwÿr xà na awjahkre. Pê wa pa, ma apu ita na mehcaya. Ampo na? Ca me ate ahna me ipupun, ne ikõat me amji ton prãmte. ¹⁰Pê wa curi ame acahê na me ipa reria mã, ramã me amã itajê te amji kam hapac xà ata jarê:

— He quê ha jũm mã hàpên prãm nare ne cumã xuwcaya na, quê ha nee hàpàn nare — hane.

¹¹ÿhÿ, ampeaj kam ri ite me amã ijũjarên xàita, wa ite me amã ihkujahêc. Ampo na? He wa ite me acahê na jũmjê jâpên nare, ne cama ame ipane me hàpàn to ame ipa na, me harên par. Cwÿrjapê wa ame amã awjarê. Ajte nee me hàpên nare, ne cama ajte ame ate amjikam me gapac xà caxun to me ipa. ¹²Ne me pajõ Pahhiti pê Jeju Crixto japrÿa na wa ha jũmjê itajê mã ijarkwa tÿaj kujate, quê catyt kam ame ipa, ne me apê, ne amji mã me harte. Ne nee ame ate amji kam me gapac xà caxun to me ipa nare.

¹³Ne me ca me ikjêjê, me gâpênita na, ne nee me gâpên kam ame apec nare. ¹⁴Ne quê ihhêaj to jũm ma apu ite me amã ijarkwa kujahêc ita par caca na, ca ha me hahkre pejne me cupê amji krã, ne me cupê hawry, quê ha ihtÿj amehpahàm. ¹⁵Ne nee pom ca ame acurê xwÿn to ita na ame ton nare, ne catyt kam me to amji kjê, ne me hapackre.

¹⁶Hamre, ijõ kâhhôc cahhur mã he. Wa ha me pajõ Pahhiti wÿ, quê ha hõtpê me amã ihcaricti gõ, ampo itajê cunea caxuw. Ne wa ha hanea ne Pahhitina ahwÿ, quê hõtpê me acahê na apu ipa.

Pê Pawrô me cumã amji jarê

¹⁷ÿhÿ, ipê Pawrô, wa ite ijũhkra ita to ihkâhhôc ita jatuj xà mã to mên. Wa ijõtpê hãn ne ijõ kâhhôc kam hãn ne ijaprÿ nõr to hane, came ijahkre pej, nãmri ihkâhhôc ita itekjêa ri.

¹⁸ÿhÿ, wa ha Pahpãm wÿ, quê ha me pajõ Pahhitipê Jeju Crixto me acunea mã ampo pejti jõr to ipa. Hamre.

TIMOT WÛR

Mam Pawrô Jô Kàhhôc

Ûhÿ, pê Pawrô pê Jeju jarkwa na memprar catêjê nõ, ne ajco pjê cunea kam apu ipa. Ne mehcunea mã Jeju pê me pahkritxwÿ na ajco harên to ipa. Pê Juta catêjê ma ame Jeju jÿjarên xà ita par caca. Cwÿrjapê pê me Pawrô pro, ne Roman catêjê mã cugõ, ne pê me hacjên xà kam me haxà. Mã Pawrô cator jirô pê hipêr mehcunea mã Jeju pê me pahkritxwÿ jarên xà impejti jarên tomõ, na ri hipêr Roman catêjê te Pawrô pro ne me haxàr, me hacjên xà kam. Mã hõtpê cute mehkwy mã ihkàhhôc ita ton ne ma ihkujahêc.

Ne pê hÿmre nõ japyr pê Timot Pawrô kôt Jeju pynâr ita na, cormã intuwre. Ne cupê Pawrôtehcajpar catê, ne ajco kôt apu ipa. Jirô pê mã pê Pawrô Epet jô krÿ kam Jeju na mehkwy mehkri atajê to ihmpej catê na Timot xãm. Ne pom cu me hõ kàhhôc pijakrut cahyt itajê kam, pê PawrôTimot mã, por mehkwy mã ampo kên to hahkre atajê cahpêrhyr na awjahkre. Na pê mam hõ kàhhôc ita japyr pê **Timot Wÿr, Mam Pawrô Jô Kàhhôc (1 Timot)**.

Ne hanea ne cumã cute mehkwy jamâr catêjê impeaj pyxwÿr, mã cute me hamâr to impejti na hÿjahkre. Ne nee Timot te jÿ caxuw Pahpãm mã hàpênjicu nare na cumã hÿjahkre.

Pê Pawrô Timot mã amji jarê

Me Hàpên Xà 16.1-5

1 Ûhÿ, ipê Pawrô, por Jeju te ihkujahêc ata, pa wa. Pahpãm pê me pahkên pê me pahto hapôj catê, ne ihcãmter pê Jeju Crixto te hacpÿa ne amji jaxàr xà ata, cu pahtÿj me hikaj ata jarkwa kôt wa apu ipa.

² Ûhÿ Timot, apê ihhêj rÿm ikra. Ampo na? Ca ikôat Jeju to amji mã ahimpej to apa, cwÿrjapê wa ha amã ihhêc. Ne ahpÿanre na ampo itajê cunea na amãihhêc partu. Ne wa apu Pahpãmme, me pajô Pahhiti pê Jeju Crixto mã me acajrên, ne me cumã:

— Me to amji pytà ne me hamã, ne me caprÿ, ne me caxwãm pê me cumã acarÿcre gõ — hane.

Pê Pawrô Timot mã me hapackre kên xà cawpa

Roman 16.17; Tito 1.5-6

³ÿhỹ, imã Epet jô krĩ kam gãhhuc na ato prãm, ita to pê wa ramã Maxeton jô pjê wỳr itẽm xà xwỳjrea na amã icakôc. Ne Epet jô krĩkam mehkwy te hãn ne ampo to me cumã hahkre xàcupan xà itajê to pit mã ame cumã hahkre to me ipa. Ne caa, ca ha atỳj ita tẽte me cumã, quẽ me ita ton jicu. ⁴Na ca ha me cumã gũjarẽn to hane he:

— Ca rỳ pẽa mã ame aquêtjê te amji kam hapac xà itajê me, me haprỳ na ihhõc japjêhti atajê to pit mã ame hahkre prãm to me apa. Nee ca ameita ton nare. Nãmri ca hãn ne ame ita to, ne teeincwỳrjapê ame apijapu to prãm. Ne Pahpãm mã ihkõt me papa na me pahto prãm, ne pomate me ampo to hahkre xà itajê, nee Pahpãm kõt mepapa na me pahtehcajpar nare. Ne quêt Pahpãm meharkwa to, cu ha amji mã me pahhimpej, ne pahtỳj hỹrmã ame pajapõj — hane.

⁵Ne wa apu amã ihimpej xà itajê cunea to hahkre, mãr quẽ Jeju na mehkwy pê me pahkwỳ cunea mã cute me ajpẽn kĩn xà to ajcamẽ. Cu ha me pamã ampo kên na prãm nare na, cu ha pahtỳj ame ajpẽnkĩnti ne. Cu ha ame amji kampa, ne pahte ramã ame ampo tonitajê kõt me amji kõt hakop, ne nee amji jũ na me pahpahàm nare na, cu ha pahtỳj ame ajpẽn kĩnti ne. Cu ha ampeaj kam Pahpãm to ame amji mã me pahhimpej na, cu ha pahtỳj ame ajpẽn kĩnti ne.

⁶Ne mehkwy te ramã me Pahpãm jarkwa cupan, ne ihcaprỳ na me harkwa cacrõ to ame ajpẽn mã mehhimpej. ⁷Ne ihtỳj cumã cute amjito me cumã Pahpãm jarkwa to hahkre catê na me amjito to me prãm, por pê Pahpãm Mojxe xwỳ mãharkwa to hahkre ata to. Ne camaampo to amehcakõc atajê jahkre pej nare kam ame to ihcakõc, ne nee hãn ne me harkwa na meamji par nare. Ne ihhêj ne ampeaj kam me harkwa atajê na me cumã amji jahkre pej, ne nee ahna me cumã amji jahkre pej nare.

⁸Pê Pahpãm Mojxe xwỳ mã ihhimpej xà impejti kên nare ata gõ, na pahte ramã me hahkre pej. ⁹⁻¹⁰Xà ajkĩ catyt kam me ipa catêjê caxuw pê ihhimpej xà ita to ihhimpej? Hãpà. Por cute me pry rên xiti atajê caxuw pê ihhimpej xà itajê to he. Ihtỳj amjia kõt ame ipa catêjê me, me hũpar nare catêjẽme, Pahpãm to me amji kam hapac nare catêjê me, mehkra kẽanre catêjê me, Pahpãm to me amji prãr catêjê me, nee cute me Pahpãm Carõ Pejti imparnare catêjê me, cute me hũmxwỳa curan catêjê me, mehkwy a curan catêjê me, ahti na mehpahàm nõ catêjê me, me hũmrea te me ajpẽn caxun catêjê me, pyjẽa te ajpẽn to inxy catêjê me, ahti na cutemehkwỳ to ihpore na me hàhpan prãmcatêjê me, mehhêj xi catêjê me, mehcukij catê cunamã mehkwy to mehhêj xi catêjê me, Pahpãm jarkwa to hahkre xà cuna mã mehcakõc kên catêjê. Ne mehcunea te me hajỹr xà catêjê itajê caxuw pê Pahpãm Mojxe xwỳ mã

ihhimpej xà ita to. ¹¹Ne Pahnãm catihtti, ne impejti atate ri amji mã icapi, ite me amã ihkraJeju pê me pahkritxwÿ jarên xà impejti to harên to ipa xà caxuw.

Pê Pahnãm Pawró caprí pyrên hakry

Me Hâpên Xà 26.9-18

¹²Cute icapi ne amji mã ipej na ito hajÿr, ne amji mã cumã hàpên catê na iton. Me pajô Pahnhitipê Jeju Crixto te hàpên xà ita caxuw imã icarôtton, ne imã hõr, wa carôat kôt ijâpên to ipa. Cwÿrjapê ri itajê pyrên ijakryti, wa ijõtpe ijakryti to cumã amji jarên to ipa. ¹³Pê wa mam ajco Jeju to icakôc kêanre to ipa, ne itÿj ahna mehwÿ jahêr to ipa, ne ajco ame to kêanre to ipa. Cakrô mã Pahnãm teicaprí. Ampo na? Pê wa cormã nee Pahnãm jahkre pej nare, ne nee to amji mã ihmpej to ipa nare. Cwÿrjapê pê wa amji jahkre kêt kam apu to kêanre to hajÿr to ipa. ¹⁴Mã me pajô Pahniti te ito kêanre nare, ne amji wÿr ito ipipkjêr, wa hÿrmã ipipkjêr, ne toa amji mã ihmpej to ipa. Mã cute imã ihkinti na iton, cwÿrjapê wa me pahkwÿ cunea me, Jejumã me ajpên kinti to me amji hõnco to me ipa.

¹⁵ÿhÿ, pê ajpên pjê ita wÿr Jeju wrÿ, cute mehkra kên pytâr xà caxuw. Hõhõ, ijûjarên xà ita ri quêt ampeaj kam. Gapacta ne ana cuhkõnrecunea to harên xà ita na amji capa, ne to amji jahôt to apa. Ne papê wa me girõa pê ikrã kên cati. ¹⁶Cwÿrjapê ri Pahnãm te icaprí, quê mehcunea me ipupu ne amji mã me ito:

— Pÿhàpà, ihhêj ne ihtÿj xãmte Pahnãm te Pawró kêanre ita to impej, wa ha hanea ne cuxà Pahnãm wÿr apkjê, quê ha ito impej. Mâr wa Pahnãmcahê na itiar na ipa, rohnÿtti mã — hane. Hõhõ, cute amji mã meito ihcakôc to hajÿr prãmte ri, Pahnãm te icaprí. ¹⁷Ne imã mehcunea te Pahnãm pupun pejti na me to prãm. Pahnãm pê me pahcunea jô Pahniti, na pê nee jûm ton nare, mã ihtiar na hân neihkrî. Quê nee jûm hõmpun nare. He ampeaj kam ri pyxit peaj, ne pjê ita cunea kam cupê Pahnãm. Ne imã mehcunea te quêt Pahnãm catihtti name hahkre pej, ne amji mã ahnamehpahàmnti na imã me to prãm, rohnÿtti mã. Hamre.

¹⁸ÿhÿ ikra Timot, ikam gapacpeaj ne. Pê ramã Pahnãm jarkwa to mehcakôc catêjê me gâpên xà ita jarên to:

— Pahnãm te amji mã acapi, ca ha apê me cumã gûjarên pejti jarên catê — hane. Ne gâpên xà ita pêkrãhtare pijapu xà pyrâac, ne ma harkwa itato amji japackre to apa, ne gõ Pahniti mã gâpên xà to impejti to apa. ¹⁹Ca ha nee Jeju to amji mã ahimpej jicu nare. Por ca ramã ate ampo pejti ton xà jahkre pej ata, ca hanee ton jicu nare. Ne nee ajte mehwÿ te mehajÿr nare, ne me cumã ampo pejti itajê jahkre pej cakrô, mã ihkaj na ihtÿj ame ampo kêanreton to me ipa. Ne ihtÿj hân ne Jeju kôt meamji ton jicu, ne nee ihkôt me hakop ne me hahkre pej nare. ²⁰Ne me hÿmre pijakrut itajê pê ihtÿj ampo

kên itajê to ame he: Himên me Arexânre. Cwÿrjapê pê wa me pahcurê xwÿn pê Xatanaj jühkra mã me haxà. Pê taa ame to kên ne me hapackre, mãr quênee jũ caxuw hipêr Pahpãm cuna mã amehcakôckên to me hajÿr nare.

Timot te catyt kam mehkwy to ihhimpej xà

Me Hàpên Xà 10.34-35; Epet 6.18

2 ¹Ita caxuw wa ha ate mecuprôn xà kam, ate me acaca xà ton xà ata to meamã hahkre. Mam cati mã, quê ha me pahkwÿ cunea Pahpãm mã mehcakôc, ne cumã me ajpên cajrên, ne ahna me ahwÿ, ne Pahpãm catihtiti ne impejti na amji mã me harê. Ne Pahpãm te me cumã ampo cunea jôr atajê pyrên, quê ha me hakrya kam me cumã amji jarê. ²Ca ha mehkwy mã garkwa ta, quê ha mehcunea Pahpãm mã pjê jô pahhi catêjê cajrên, ne krĩ to mehhimpej catêjê cajrên, ne cumã ampo cunea to ihhimpejcatêjê cajrên. Ampo na? Cu haame ita to, ne caxwãm catia mã, catyt kam me pahkrĩ, neamji to me ajpa, ne nee me ajpên mãnnare, ne nee ame papijapu nare. ³Ita to pahte me, na ri ihkênre nare. Ampo na? Pahpãm pê me pahpytâr catê ata mã pahte me ita ton xà itajê na prãm, ne ahna cumã impejti. ⁴Pê mehcunea Pahpãm pê ampÿamã ajco ame ipa, mehkên ata wÿr. Ne Pahpãmri mehkên pê mehcunea tohapôj, ne ampeaj kam cute me harkwa pejti ita cuneajahkre pej na, cumã me to prãm.

⁵Cwÿrjapê pê me pahwÿr ihcãmter Jeju Crixto kujate, cute Hüm me ajpên na me pajaxôr catê na. Ne taa mã quê ha pyxit peaj ne Pahpãm wÿr me paxüme tocuprô. Ne iràn xà na, jũ wÿr quê jüm Pahpãm wÿr me pahto apkjê. ⁶Pê Jeju hàpên xà ita to hàpên to amji pytà, ne taa amji caprôa to me pajahpan xà na amgô. Ita kôt quê ha mehcunea me hõmpu ne me hahkre pej, nãmri quê ha Pahpãm hõ amcroa kam mehcuneakên pê me to hapôj. ⁷Cwÿrjapê ri Pahpãm te ito ijüjarên catê, ne ikujahêc, wa mehcakrit pê, por me cupê Juta catêjê nare atajê mã harên pejti itajê to awjarê, ne me cumã to hahkre. Ne me cumã:

— Ca ha Jeju wÿr amji to me apkjê, ne toa amji mã me ahimpej, ne me apej mã ame apÿpÿm — hane. Nãmri ijüjarên xà ita ampeaj kam ri, wanee ame amã ihêj nare.

Me hümre te ihtÿj Pahpãm mã mehcakôc xà

Epet 5.22; 1 Petrô 3.1-7

⁸Ne imã pjê cunea kam me hümre te Pahpãm mã mehcakôc na me to prãm. Ne Pahpãm mã mehcakôc catêjê atajê, quê ha catyt kam Pahpãm kôt me ipa. Ne nee ame ajpên curê nare, ne nee me ajpên mãnnare kam, Pahpãm mã mehcakôc.

⁹Ita caxuw wa ha Jeju na mehkwy cahãj catêjê to icakôc, ne me hapackre to amã hahkre, jũ mãquê ha ame, ne ame amji cümpej, ne amehkrĩ. Ýhÿ, ca ha me hapackre to hane he:

— Nee ca amji mã me garkwa to: “Me hũmre cunea te me ikĩn prãmtẽ, wa ha ijahĩ xà itajê cunea mã amji jacjê, cute kam me ikĩn, ne ikõt memprar xàcaxuw” hajÿr nare — hane. ¹⁰Nãmri quẽ ha quêt caxwãm catia mã cute amehkwýmã ampo pejti ton to ipa, ne Jejuna mehkwy na me amji jarẽn na, quẽ ha catyt kam me ipa, ne mehkwy tehcajpar to me ipa.

¹¹Ne me cumã Pahpãm jarkwa to hahkre catêjê, quẽ ha cute me cuprõn xà kam me cumã to hahkre, quẽ aracri pyjê itajê mehkri ne ame awpa. ¹²Quẽ nee pyjê nõ me hũmre nõ mã ampo to hahkre nare. Ne nee cupê me hũmre jõ pahhi nare. Ne cama amji caxuw ame hũmre kôpĩ, ne nee amehcakõc nare. ¹³Ampo na mã wa pyjê na amã ihmpej xà itajê to ihmpej? Nee mã ampo nanare. Pê mam Pahpãm Atãw xwÿ xũmre ata to, ne hapu na Ewa xwÿ cahãj ata to. ¹⁴Pê nee Xatanaj Atãw xwÿ mã ihhêj nare, ne Ewa xwÿ mã pê ihhêj. Ne taa mã pê nee Pahpãm te amji kam hapac xà impar nare. ¹⁵Cwÿrjapê quẽ ha pyjê cunea mã mehkra hàà to hà. Nãmri quẽ ha pyjê itajê nõ te Jeju to amjimã ihmpej, ne cumã mehkwy kĩn, mã mehtehcajparrohnÿtti mã, ne nee ahti na ame hũmre na amji mã prãm nare, ne quêt caxwãm catia mã Pahpãm kõt ame ipa na, quẽ ha ihtÿj ihkên xà catia pê me amji pytã.

Timot te mehkwy to mehhimpej catêjê pyxwÿr xà

Tito 1.5-9

3 ¹Ita caxuw, wa ha ate me cuprõn xà jõ pahhi to me amã icakõc, ne me amã to hahkre. Quẽ ha jũm te Jeju na mehkwy to ihmpej catê na amji to prãm na, quẽ ha hàpên xà impejti na amji to prãm. Ýhÿ, ite me gapackre xà ita ampeaj kam ri. ²Por Jeju na mehkwy to ihmpej catêjê pupun catêjê atajê, quẽ ha me cupê hũmre impejti ne, quẽ nee jũm ampokên nõ na me harẽn to kên nare. Ne me cumã hĩxi pyxit peaj, ne hĩxi me ajpên na ajkrut peaj. Ne caxwãm catia mã mehpahãmti ne, ne nee ame amji mã hamãr nare nare, ne nee amji to me cati prãm nare. Nequêt ihcunea na me hàhcjãrënti ne, me hũrkwa to, ne me cumã ampo pejti cunea to me cumã hahkre jahkre pej. ³Quẽ ha nee cupê cõxÿhti to ihkõm catê nare, ne nee apu hàprê nare, ne quêt hàhcprĩa kam, aracri ame to ihmpej to ipa. Ne nee ihpore toamji to hakràj catia to ipa prãm nare. ⁴Ne ihtÿj cumã hũrkwa kam amji to ihmpej jahkre pej, ne amji caxuw mehkra japackre, quẽ amji mã ampo cunea na, catyt kam me hũpahti to me ipa. Cwÿrjapêquẽ ha ihtÿj cupê Jeju na mehkwy to ihmpej catê na, me jũm ata capi. ⁵Nãmri quẽ ha jũm ata pê hũrkwa kam amji to ihmpej jahkre kêatre na, jũ wÿr quẽ ha apu amji mã hamã, ne amji to mehkwy to ihmpej catê.

⁶Ne mehkwy to ihmpej catê ata, quẽ nee cupê curmã Pahpãm kõt ipa catê nare. Nãmri quẽ ha curmã jũm ata te Pahpãm kõt ipa catê na

amji ton, mã cute me to ihhimpej catê na me hãm na, quê ihhêaj to cama apu amji to cati prãm. Ne cute amji to amji jahkre pejti to prãm to ipa to hanea, pom pê mam me pahcurê xwÿn, ne amji curê mã amji mẽ, ita kôpit na, quê ha jũm ihtÿj amji curê mã amji mẽ. ⁷Na quê ha me cupê Jeju na mehkwy nare atajêkam mare mã, catyt kam ipa, quê ihtÿj me to amjimã ihcakôc to impejti ne. Quê ha cute hajÿr na, quê ha nee Xatanaj pê me pahcurê xwÿn ata cupê Jeju na mehkwy to ihhimpej têtê ihcahpêrkâr nare.

Timot te hanea ne mehkwy jamâr catêjê pyxwÿr xà

⁸ÿhÿ Timot, ita caxuw wa ha me pahkwÿ tehcajpar catêjê te amji kam hapac xà to amã hahkre. Jeju na mehkwy tehcajpar catêjê, quê ha caxwãm catia mã, catyt kam ame ipa, ne mehcahôc xà hêj xi nare to mehcahôc to me ipa to me prãm. Ne nee apu ampo cacôxÿhti catia ne to ihkôm nare, ne nee ihpore to pit mã apu amji mã mehhimpej to me ipa nare. ⁹Ne cute Jeju to amji mã mehhimpej ita na, quê amji to mehtÿj tu. ¹⁰Quê ha mam me hâpên xà ita na me capi, quê ha cute hâpên xà ita to me hamâr na, quê ha me hõmpu, ne toa mehkwy tehcajpar catêjê.

¹¹Mehprô xwÿjê, quê hanea catyt kam, caxwãm catia mã ame ipa. Quê nee mehkrî ne ame harkwa te wônare, ne quêt catyt kam, caxwãmcatia mã, me amji kam hapac to me ipa, ne ihtÿj ampo cunea na me amji jarkwa par to me ipa.

¹²Ne Jeju na mehkwy tehcajpar catêjê mã quê ha mehprô pyxit peaj, ne ahpÿanre na amji mã mehkra to me ipijapar to mempeaj ne. ¹³Quê ha cute me hâpên xà to impejti na, quê ha mehkwy cunea amji mã me hÿpa to ipa. Cwÿrjapê quê ha ihtÿj Jeju to cute amji mã mehhimpejna, me amji jarên to me ipa.

Pê Pawrô hipêr Timot mã Jeju kôt harên pejti

Epet 2.19-22

¹⁴ÿhÿ Timot, wa awÿr ikrâr, ite apupun prãmte, ne jũ wÿr wa ha awÿr tẽ, amcro itajê nõ na, cwÿrjapê wa ite amã ihhôt, ne amji cumam amã ihkujahêc. ¹⁵Nãmri wa ha cormã ita ri apu ikên, quê ha mam ihkâhhôt ita me awÿr cato, ne me pahkwÿ te cuprôn xà kam me pahte me amji ton xà ata to meamã hahkre, jũ mã cu ha amji to me pahhimpej xà to. Ne me pahte cuprôn xà ita pê cama pahte me cuprôn xà nare, ne cupê Pahpãm te cuprôn xà. Ampo na? Pahpãm ihtÿj me pahcunea kam amji to ajpa. Cwÿrjapê ri ihhêj rÿm me papê, pom hãn ne ikre jicjêc ikre cajpar to ihcuhê itapyràac, na cu Pahpãm mã cute amji kam hapac xà cunea mã me pajũcanâr to me pahcuhhê, ne ma mehcajpa.

¹⁶ÿhÿ, pom Jeju jarên xà ita peaj to impej. Ne taamã ri catyt kam me papa na me pahtehcajpa. Pê cu mam nee me pahnõ hahkre pej nare, ne

ita caxuw ri me pahcunea mã hahkre pej. Na cu ha ampo itajê cunea na amji mã Jeju to me hane he:

Cupê Pahpãm cakrô, pê ajte me pajã na amji to ajpê.
 Mã Pahpãm Carô Pejti te hõmpun, ne catyt kam ipa na harên.
 Mã côjkwa kam Pahpãm mã memprar catêjê te hõmpun.
 Mã pjê cunea kam harên xà ita picràn.
 Mã pjê cunea kam mehwý te mempar, ne ihkôat me amji ton, ne ma me hũnãr.
 Mã hacpyã mã Pahpãm te to hàpir, côjkwa wýr.

Hõhõ, pahte Jeju to amji mã me pahhimpej xà ita ampeaj kam ri.

Pê Pawrô Timot mã cute me ampo kên to hahkre catêjê cawpa
Coroxo 2.16-19; 1 Timot 3.1-9; 2 Petrô 2.1-3; Juta 3-16

4 ¹Ne ampo itajê cwýrjapê wa ha hipêr cute ampo kênto me amã hahkre catêjê na me amãihhõc. Ýhý, ramã Pahpãm Carô Pejti te hirãa pê me harên, quê ha ihtýj jũ caxuw Jeju na mehwý kwý, Jeju te amji mã mehhimpejjicu. Mã me pahcurê xwýn Xatanaj pîn, cupê jarõti pê ampo carô kên, pê Xatanaj mã hàpên catêjê atajê me hapôj. Mã Jeju na mehwý kwýate ampo carô kên itajê kwýa to amji mã mehhimpej to me ipa. Ne ampo carô kên itajêa kôt me cumã ihhêj xi xà kên atajê cunea to hahkre. ²Ne pom cute me ampo to hahkre catêjê itajê pê ihhêj rûm ampeaj kam ampo to hahkre catêjê, ne nee mã ampeaj kam nare, mehhêj xi to pitmã ame cumã hahkre to me ipa. Neramã me cupê mencaca xà cunea ihkêanre, mã nee me hahkre pej nare kam, ihtýj impej na amji mã me to hane. ³Ne me hũmre itajê te me cumã ampo to hahkre xà itajê te hajýr he:

— Ca ha nee pyjê nõ me gikwa nare, ne ahte apu apa, ita na ri Pahpãm mã impej — hane. Ne hanea ne xwahna, por ampo kur xà impejti atajê, quê ha neeamehkur nare. Ne cama ame cumã ihhêj, nepom Pahpãm te ampo cunea kur xà tonitajê, nee ihkên nare, ne impej pit, Pahpãm kôt me ipa catêjê mã. Ampo na? Pahpãm mã me pahkinti, mã me pamã ampo pej pit gõ, ita na ramã me pahte mehahkre pejtu. Ne me gápàn xà wýr, ca ha xa mam me gõ pyrên me gakryti na Pahpãm mã me amji jarê. ⁴Ne pom pê Pahpãm ampo cunea to itajê impej pit, cwýrjapê cu nee ame papijacri xà atajê cupa nare. Ne gapacta ne ampo itajê cunea na me amji tohpôj, ne Pahpãm mã me harên to hane he:

— Ýhý me ijõ Inxũ Cati, ate me imãampo pejti jõr, itajê pyrên ampeaj kamme ijakry — hane. ⁵Hõhõ, ca ha Pahpãm jarkwa to Pahpãm mã me acakõc to me hane, quê ha me apijacri xà mã, ampo cawpa xà itajê cunea hamre tu. Ampo na? Pahpãm mãampo itajê cunea impej pit.

Quê ha Timot pê Jeju mã hàpên catê impejti

1 Timot 1.6-16; Tito 2.1-8

⁶Ca ha atỳj ite gapackre xà ita to, Jeju kam me pahte ajpẽn to me pahkjêjê atajê mã hahkre. Ca ha ate ita tohajỳr na, ca ha apê Jeju mã gápên catê impejti ne. Hôhô, ca ha hane, ne Pahpãm jarkwa kôt amji ton toapa, ne me cumã harkwa to hahkre to apa, ne atỳj acaxwỳn to amji mã ihtỳj to apa. Ampo na? Ampeaj kam ri Pahpãm jarkwa ita, nee mã ihhêj xi nare. ⁷Ne ihkĩnte me aquêtjê jũjarẽn hêj xi xà to me apijacri catêjê mã ampo cawpa xà, itajê kôt hamreare. Na ca ha nee ihkôat me amji ton to me apa nare. Ne quêt Pahpãm jarkwa pejti atajêto, ca ha me hahkre to me apa, ne catyt kam ihkôat me amji ton to me apa. ⁸Cu ha me pajàpên xà pytĩa tome pajàpên to me papa, ne pahtỳj pajĩ cuneakam ame pahcarôhrôt. Ne ampeaj kam ame pajĩ hi tỳj. Jĩkjê na cu ha Pahpãm mã pajàpên to me papa, ne amji caxwãm pê amji mã me pahcaxwỳn to ihtỳj tome hanea, pom quê me pajĩ kam pahcarôhrôt hi tỳjti he. Ne me pahcaxwỳn tỳjti ita ri me pajĩ hi tỳjti ita jirôa pê impej. Ampo na? Quê ha ihtỳj me pajĩ mepahhi tỳjti ita jũ caxuw hamre, ne me pahcaxwỳn quê ha quêt jũ caxuw hamre nare.

⁹Ita caxuw wa ha ampeaj kam ite me amã ampo to hahkre xà ata to me amã hahkre. Ca nee me anôihcaca nare, ne atỳj ana cuhkônre cunea to ahna amji capa, ne toa amji mã me ahimpej to me apa. ¹⁰Pahpãm ihtĩar ihkrĩ ata pê ri me pahkên pê me pahto hapôj catê. Ne toa, cu amji mã ame pahhimpej, ne ma amji to me hikaj to me papa. Cu pahte mempar, cwỳrjapê cu pahtỳj hàpên xà catijàhtôa itajê to me pajàpên to me amji cujtên to me papa.

¹¹Cwỳrjapê ca ha ijarkwa itajêa to me cumã hahkre to me apa, quê toa amji mã mehhimpej to me ipa. ¹²Quê ha me pahkjêjê nô atuwre na ato ihcakôc, canee jũm ata kam gapac nare. Ne cormã atuwre cacrô, ca catyt kam apu apa, ne catyt kam acakôc to apa, ne amã mehcunea kĩn, ca me caprĩ to apa, ne Jejua to amjimã ahimpej na apahàmti to apa. Quê ha me pahkjêjê kwỳ catyt kam ate apana me apupu, ne hanea ne acuxà catyt kam me ipa. ¹³Cwỳrjapê ca ha atỳj me cumã Pahpãm jarkwa pejti ita cahyt, ne me cumã Jeju pê me pahkritxwỳ jarẽn xà impejti jarẽn to apa. Ne me cumã Pahpãm te amji kam hapac xà cunea capô partu to apa, wa ha ahnaa me awỳr icato.

¹⁴Pê ca cormã gápên nare kam, pê Jeju na mehkwy to mehhimpej catêjê me akrã na me hũxi, ne Carô Pejti jarkwa kôt me garẽn to hane he:

— Ita caxuw, ca ha Jeju na mehkwy jarkwa me, Jeju jarkwa kôt, me cumã Pahpãmjarkwa jarẽn pejti itajê to hahkre to apa — hane. Pê Pahpãm amã acarôt tỳjti atajê jôr partu. Cwỳrjapê ca ha jũ caxuw ita to gapac kêt nare.

¹⁵Hõ, gâpên xà ita mã, ca ha amji jõr to apa, ne ma apicamên to mõi, mehcunea kam mare mã. ¹⁶Ca ha atÿj catyt kam apa na amji jamâr to apa, ne me cumã ampo to hahkre na amji jamâr pejti to apa. Ca ha hane, quê ha Pahpãm ihtÿj cute me akam hapac catêjê me, me akên pê ato hapõj to ipa.

Jeju na mehkwy te ajpên to mempejti xà

1 Timot 2.24-25

5 ¹ÿhÿ, wa ha pahte me ajpên to mempejti xà jarê. Quê me pahkjêjê ame ampo kên ton to me ipa, ca me cumã, quê catyt kam ame ipa. Ne mehwej catêjê, ca hame cumãn kên nare. Ampo na? Ramã quêt acumam ihwejtu. Ca ha cama cumã acakõc, ne hapackre to hane, pom quê ca me apãmjê mã me acakõc to me apa he. Ne pom ca hapu na me akjêjêa japackre ata na, ca ha akõt mentuwre atajê japackre to hane. ²Ne nee pyjê wej itajê mã kên to apa nare to hane, pom ca me axyrxwÿ na me apahàm, ne nee me cumãnnare he. Ne atÿj me cuprÿ na apahàmti to hane, pom ca me akjêjê na apahàmti he.

Pyjê wej pê mempjê tyc, pê hamreare atajê tehcajpar xà

Tijac 1.27

³Ne hanea ne me pahkwÿa cahãj wej, pê mempjê tyc atajê, ca ha me ahna apahàm jàhtõtì to me apa. ⁴Quê ha me pahkwÿ nõ pê impjê ty ita cumã ihkra, ne cumã ihtàmwxwÿ, quê ha nee mehkwy cunea mehtehcajpar nare, ne quêt mehtàmwxwÿ me, mehkra itajêa quê ha mehtehcajpa, ne me cumã hõ gõ. Ampo na? Pê mam mehkra itajê me, mehtàmwxwÿ itajê kryjre na ihtÿj ajco me cumã hõ gõ, ne me to ajpa, jahpan xà na quê haihtÿj me to ajpa, ne me cumã me hõ gõ. Hõhõ, ita na ri Pahpãm mã impej, ne ahna cumã prãm. ⁵Nãmri quê ha jùm cahãj ata caxuwhamreare, ne nee hũkjê nare, quê haamji tehcajpar xà na ihtÿj amcro me, caxwa cunea kam ihkrì ne Pahpãm wÿ. ⁶Ne por pyjê pê me pahkwÿa cahãj pijapit, ihtÿj hãn ne mehkwy kinte ame hapactu to me ipa, ne amji na me ampo cwÿr to me ipa atajê, quê ha nee me pahkjêjê kwÿ me hõ to ame hamâr to me ipa nare. Ampo na? Pom pyjê te hajÿr catêjê itajê, ramã me caxwãm pê ihhêj ne amehtyc. ⁷Cwÿrjapê ca ha Timot, pomite me hapackre xà ita to, ca ha me hapackre, ne me cumã to hahkre to apa. Quê ha me akam hapac, ne catyt kam me ipa na, quê ha nee jùm me ahna ihcakõc kên nare. ⁸Ne por quê ha jùmjê amji to hũkjê atajê, nee me amji to mempej nare na, ne nee hũrkwa kam ame hamâr to impej nare na, quê haramã Jeju to amji mã mehhimpej jicu, ne amji to me cupê Pahpãm kõt ipa catêjênare atajê pyrãac, ne me hirõa pê ihkêanre ne.

Mehkwÿ te pyjê wej pê mempjê tyc tehcajpar xà

⁹Ne por mempijapit pê me hũkjê nare atajê, ca ha me haprÿ nõ, por amji tehcajpar xà na me prãm atajê, mãr quê mehkwy mehtehcajpa.

Porpê mempê to pyxit ita kam mempijapit, ne ramã me ahna caku te xêjxênta jirôa pê atajê, ca ha me haprÿ nõ. ¹⁰Quê ha jÿm mehcunea mã impejti na, quê ha ramã me hõmpu, ne me hahkre pej, ne amji mã me harên to ipa. Quê ha jÿm ita mehkra nõata to ipijapar to impejti, ne cute krÿxàre kwÿmã hõt xà na hÿrkwa jahkre to ipa na, ca ha me haprÿ nõ. Ne hanea ne, por me pahkjêjê kwÿ mãhàpên to ipa, ne hanea ne me cupê hamreare atajê tehcajpa, ne me hà catêjêtehcajpar to ipa, ne ampo to hãpên xà impejti atajê cunea mã cute amji jôr to ipa atajê, ca ha atÿj me haprÿ nõ.

¹¹⁻¹²Ne por cormã mempijapit tuw atajê kwÿ te Jeju na me amã amji to ihhimpej ne, me amã:

— Wa ha hirãa pê Jeju me, me ca mã amjito ihhimpej, nãmri wa ha itÿj me pahkwÿtehcajpar to ipa, ne nee hipêr jÿmme ijikwa nare — hajÿr. Ca ha me haprÿ nõr cakrô, quê ha ihtÿj cormã jÿm impjê to prãm. Ne cama cute amji to ihhimpej xà ata to hapac kêt, quê ha Pahpãm mã ita na ihkÿn nare, ne ahna cupê ihkaj na. Cwÿrjapê ca ha mentuw japrÿ nõr nare. Ampo na? Quê me ahna ahtÿm nare, quê ha ihtÿj hipêr me hikwa tuw prãm. ¹³Ne me cupê mempê tyc tuwre catêjê kwÿ te hajÿr he, quê ha itajê ma krÿ cape na ame ipa, ne ampeaj kam me cumã xuwcaca, ne me xwahna xi, ne neeamji na me hÿcapi nare, ne cama mehkwy na amehcakôc kêanre to me ipa. ¹⁴Cwÿrjapê ri hacpÿa mã imãhipêr pyjê pijapit tuw itajê jikwa tuw, nemehkra me, me hÿrkwa to mehhimpej na, me to prãm. Hõhõ, quê ha ita to ame hane, quê ha nee me pahcurê xwÿn catêjê ame pahna ihcakôc kên nare. ¹⁵Ne ihhêj ne ramã mempijapit kwÿ te me Pahpãm jô pry cupan, ne me pahcurê xwÿn pê Xatanaj jô pry pynãr.

¹⁶Quê ha jÿm cahãj jÿrkwa kam jÿm impijapit, quê ha taa ihtehcajpa, ne ma hamã. Quê ha nee ipu na, ahti na, Jeju na mehkwy mehtehcajpar nare. Jÿ na quê ha Jeju na mehkwy ihtÿj mehtehcajpa? Quê ha quêt me hÿkjêhamreare, ne me caxuw hamreare, ita ri quê hamehkwy kwÿa ihtÿj mehtehcajpa, ne me hamã. Hõhõ, ite amã mempijapit to icakôc to hahkre xà ita to, wa ite amã hahkre.

Pê Pawrô Timot mã mehkwy to mehhimpej catêjê to hahkre

Me Hãpên Xà 14.23; 1 Petrô 5.1-4

¹⁷⁻¹⁸Ne ita caxuw wa ha me cupê me pahkwÿ to mehhimpej catêjê to amã icakôc, ne me to amã hahkre. Pê ramã Pahpãm jarkwa na, ihkãhhôc kam ihhôc ata me pamã hÿjarên to hane he:

“Quê ha jÿm te amã hãpên na, ca ha atÿj cumã gãmjôr to impejti ne. Ne quê hanea ne pryti xÿmti jãpên catêjê nõ amã apê, ca ha neeharkwa na hê nare, hãpãn tête, quê ha taa ihtÿj apã, hãpên xà kam” hane.

Pyrac pej ne quêha me pahkwÿ jō pahhi atajê me hâpên xà toimpejti na, quê ha mehkwy me cumã hãmjōr to impejti ne. Quê ha Pahpãm jarkwa to me cumã hahkre catêjê me cumã ihcakôc to impejti, ne catyt kam, cute me cumã ampo to hahkre to me ipa na, quê ha ihtÿjmehkwÿ me cumã hãmjōr to catia ne.

¹⁹Ne ihnō xwÿjê, quê jūm pyxit peaj ne Jeju na mehkwy to mehhimpej catêjê nō to amã ihcakôc kêanre na, ca ha nee impar nare. Nãmri quê hamencrê ne ajpêan kôt me amã to mehhimpej catêjê nō jarên to kêanre na, ca ha cormã atÿj me kampa. ²⁰Ca ha me acunea te ramã mehkwy to mehhimpej catêjê nō te amji mã hamãr nare, ne cute ampo kên ton na ata me hahkre pej na, gapacta ne kam mare mã me cumã, quê ha mehcunea me hōmpu, quê ha ihtÿj me amji mã pa, ne ton jicu.

²¹ÿhÿ Timot, wa ha Pahpãm me, ihkra Jeju me, cōjkwa kam me cumã imprar catêjê kam mare mã, amã ijarkwa ita ta, ca ha ijarkwa ita pa, nema to amji japackre. Ne ihkôat me cumã ampo itajê cunea to hahkre to apipênti to apa. Ne nee ca amji mã gō kwÿ nō to impejti prãmte, nee cumã ite amã ampo to hahkre xà itajê nō to kyre pê hahkre to ihcajcure nare. Ne nee jūmmã amji jirôa pê ampo itajê nō to hahkre nare, ne me cumã ampo itajê to hahkre to apipênti to apa.

²²Quê curmã jūm amji to Jeju na mehkwy, ca ha nee cormã ne pahhi na me hãm nare. Ca cormã ne pahhi na me hãm, quê ihhêaj to cormã hâpên xà peacre, ne ihtÿj ampo kêanre to, quê ha me gâpên xàita kôt hamreare ne. Ne nee cute mehkên ton catêjê kôtme akên mã acjêj nare, ne quêt ihcunea na, apejti, ne apahàm jãhtôti to apa.

²³⁻²⁵Ne mehkwy hãn ne me kam maremã ampo kêanre to, mã Pahpãm te me pahcukij xàxwÿjrea na mehcunea mã hahkre pej. Ne mehkwy aracri me ampo kên to, mã nee me hahkre pej nare, ne Pahpãm mã ramã me hahkre pej. Ne Pahpãm te me pahcukijxà kam, cu ha me pahcunea me hōmpu, ne me hahkre pej. Ne hanea ne ita xwÿjê na cute hajÿar he, mehkwy ihtÿj hãn ne me ampo pej pit to, mehkwy kam mare mã. Ne mehkwy hanea ne aracri me ampopej pit to, mã nee mehkwy me hahkre pej nare. Mã ihtÿj Pahpãm me hōmpu, ne me hahkre pej. Taamã, xãmte cormã ihnō, ca gōtpêgîtô kre me atu xàa na apu apa, cwÿrjapê ca ha cô topit mã akôm nare, ne hanea ne pîxô cacô xÿre kryjre ne to akôm to apa.

Pê Pawrô Timot mã cama me cumã hâpên catêjê to hahkre
Epet 6.5-9; Coroxo 3.22-4.1; Tito 2.9-10; 1 Petrô 2.18-25

6 ¹Ita caxuw wa ha me hãmcwÿr nare, ne cama me hâpên catêjê atajê pê Jeju na mehkwy to me amã awjarê. ÿhÿ, me hâpên catêjê cunea teihtÿj amji mã me hō pahhi cupa xà, mãr quê nee jūm me pahte amji kam me pajapac xà to hahkre xà atajê na, Pahpãm na ihcakôc kên nare.

²Quê cama me cumã me hàpên catêjê jô pahhi pê Jeju na mehkwy na, quê nee cumã hàpên catê ata amji mã harkwa to:

— Ipê ijô pahhi kjê, cwÿrjapê wa ha neecumã ijàpên cati nare — hane. Quê amji mã hajÿr nare, ne cama quêt harkwa to:

— Ijô pahhi pê imã ikjê kinti ata ri ijàpên xà jahpan xà na hàmcwÿr to ipa, cwÿrjapê wa ha cumã apêa to apê — hane.

Pê hipêr Pawrô cumã, cute me cumã ampo kên to hahkre catêjê cawpa

Ruc 12.13-21; Tijac 5.1-6

³⁻⁴Ca ha ampo itajê to me cumã hahkre, ne ahna me to ahimpej to apa. He Pahpãm me pamã catyt kam me papa tohahkre. Quê jùm me Pahpãm himpej xà me, me pajô Pahhiti pê Jeju jarkwa kaj na, cute me cumã ampo to hahkre na, ca ha ramã me hahkre pej pyrentu, amji to cati prãmte ri apu hajÿr to ipa, ne cupê amji jahkre kêatre. Ne me hũmre itajê hãn ne me ajpên mãn prãmte, Pahpãm jarkwa kryjrecwÿrjapê me ajpên mãn kam pra, ne tee ame ipijapu to prãm. Mã ahna me cuprô, ne mehkrã, ne me toihcuhhê atajê hanea ne me ipijapu to prãm. Nemehkwÿ me hú na me amji to prãm, ne mehkwy ajpên kam ame hũn kêanre, nemehkwÿ mehcaôc xà incràre, kôt hamreare atajê to uu ne ajpên krac ri mehcaôc jicu nare. ⁵Ne pom ame ita ton to ipa itajê, hãn ne mehkrã acto tu, mã nee ame amji kam hapac nare, ne me cumã mehhej xi to pit mã amehcaôcjahkre pej. Ne cute me amji kam hapac xà kêanre cupan itajê to ri ame amji kampa he:

— Wa itÿj jũ na amji ton to prãm, ijakràj prãmte. Wa ha Jeju na mehkwy mã axà, ne Pahpãm mã apê, ne cumã ijàpên ita kam wa ha amji to ijakràj — hane.

⁶Cu ha me pahte catyt kam me papa na, quêha te me papê me pajàhcukrêj crêre cakrô, cu ha me hõmpu, neme amji mã:

— Mã hã, wa ha tahnaa mã me — hane. Hõhõ, pahte me pajàhcukrêj to amji kam me pajapac xà ita na ri Pahpãm mã me pahto prãm. Ne ramã me pajakràaj to me pajakràj. ⁷Ne me pahpÿpÿm xà kam, ampo to pê cu pjê wÿr ame pahpÿpÿm? Hamreare, nee pê cu ampo to ame pahpÿpÿm nare. Ne me pajũ kam ame pahpÿpÿm. Na cu ha me ty, ne ampo to cu ha ame pra, pjê ita pìn, cõjkwa wÿr? Hamreare, cu ha me pajũ kam hacpÿ mã ame pra. ⁸Mêr hõhõ, quê ha me pamã me pajô, ne me pahkà, cu ha pahÿj hũrên ame pajakry, ne me amji mã:

— Mã hã, cu ha ahnaa mã me — hane. ⁹Ne por me pajô me, me pahkà jirôa pê amji to me hakràj prãm catêjê itajê pê ihhêj rũahtorore pê amji jahkre kêatre ata pyràac. Mã arÿjhy xen te kwÿc mã acjêj, mã mehpro, mã hãn ne mehcuraata pyràac, ne ihpore na mehprãmtiita to ihtÿj mehkên mã me amji rên prãm to me ipa. ¹⁰Me pahte ihpore kinti atajê pê ampo kên cunea xakat. Ne me pahkwÿa kwÿte me ita par pej nare kam

ri, cute me Jeju jō pry rên, ne to amji mã mehhimpej jicu, ne pea me hĩ caxwãm pê cute ame caxwÿn itajê jaxôp, ampo kên itajê to. Cwÿrjapêca ha Timot, ma ampo itajê cunea pê amji to gapôj to apa.

Timot te ampo cunea mã hũcanâr xà

1 Timot 2.1-7

¹¹ÿhÿ Timot, apê Pahpãm jō me hũmre nõa, cwÿrjapê ca ha quêt mehcunea to amjikam gapac xà to apipênti to apa, ne quêt Pahpãm te amji ton xàa kôt, catyt kam amji ton to apa. Ne quêt Jeju to amji mã ahimpej to apa, ne quêt mehcuneato imej, ne amã mehkĩnti ne. Ne quêt gâpênxà ita kam, ca ha to acrà necumã gũcanâr to apa, ne neeme hirôa pê amji ton to apa to prãm nare. ¹²Ne cama Jeju te amji kam hapac xà kôt to amji cujtên kam to acrà tu, ita na ca ha gôtpê cahi na akrĩ, rohnÿtti mã. Hôhõ, pom ite amã ampo tohahkre par itajê kôt, quê ha jũ caxuw acaxwÿn ihtyc nare, ne quêt Pahpãm cahê na atĩr rohnÿtti mã. Pê ca me hàhtô kam mare mã amji jarên to hane he:

— Wa Jeju a to amji mã ihimpej, ne ihkôat ipa, ne cumã ijâpên to ipa — hane. Pê amcro ata na Pahpãm ana ahwÿ, ca Jeju cape na apa rohnÿttimã xà caxuw.

¹³ÿhÿ Timot, wa ha amã ijarkwa ta, Pahpãm meJeju kam mare mã. Pê Pahpãm ampo cunea mã amji toipijapar xà caxuw, cumã cute amjikam hapac xà gô. Pê Jeju krĩ jō pahhi pê Pirat cunamã cupê Pahpãm kra na amji jarên to imejti. Wa ha Pahpãm me Jeju kam mare mã, amã ijarkwa ne amã:

¹⁴— Por ite amã ampo cunea to hahkre atajê, ca ha ampeaj kam kampa, ne catyt kam apa ita na, quê ha ahnaahacpÿ ne me pajō Pahhiti pê Jeju Crixto teamji jaxâr xà jō amcro kam ahtwÿ — hane. ¹⁵Quê ha Pahpãm hacpÿa ne pjê ita wÿr Jeju kujate. Ne Pahpãm pyxit peaj, ne cupê mehcunea jō Pahhiti, mã mehcunea imejti na me cumã harê, ne cupê pahhi catêjêcunea jō Pahhiti, ne cupê mehhimpejcatêjê cunea to Ihhimpej catê cati. ¹⁶Ne pyxit peaj, quê ha nee jũcaxuw ihtyc nare. Ne pyxit peaj ne imeaj toimej. Ne imej ita pê ihhêj rũm pyt cuna mã irĩt xà prà. Ne jũ wÿr quê jũmhõmpun mã awcanã. Ita pyrác pej ne, jũ wÿr quê me paxũmre kãanre nõ awcanã, ne Pahpãm pejti ata na ahtêp ne hõmpu. Rÿ jũ caxuw jũm te hõmpun nare, ne jũ wÿr cu me pahnõ hõmpu. Quê ha pjê cunea kam mehcunea amji mã me hũpa. Ampo na? He pyxit peaj, ne cupê me pahcunea to ihhimpej catê, rohnÿtti mã.

Pê Pawrô Timot mã cute me hakràj catêjê to hahkre

Ruc 16.9

¹⁷Ne wa ha cormã hipêr amã me hakràj cati atajê to icakôc crire ne. Ne por pjê ita kam me hakràj cati atajê, ca ha me cumã, quê ha nee ameamji

to cati prãm nare, ne nee me hõ pore to pit mã ame amji to ipijapar to prãm to me ipa nare, ne quêt Pahpãm to quê amji mã mehhimpej to prãmto me ipa. Ampo na? Quê ha ihtỳj jũ caxuw hõ pore ata hamre, ne Pahpãm quê ha quêt jũ caxuw hamre nare. Ne Pahpãm mã me pahkĩn, na ri me pamã ampo cunea jõr to catia to ipa, mã hũrên me pajakryti. ¹⁸Ne me hakràjti atajê mã garkwa ta, quê mehkwy to impeaj ne, ne pom cute mehkwy to impejti ita to, quê ha hakràj cati. Ne me to hàhcajrênti to ipa, ne ihtỳj mehkwy mã me hàhcukrêj jõr to me ipa. ¹⁹Quê ha cute ita to ame hajỳr na, quê ha kỳj pê, Pahpãm cahê na, amji mã me hàhcukrêj itajêato cuprõ. Hõhõ, quê ha me hane, ne Pahpãmcahê na amji to me ipijapar rohnỳtti mã.

Pê Pawrõ Timot mã amji jarê

²⁰⁻²¹ Ỡhỹ Timot, pom ite amã ampo jarên itajê, ca ha amji mã nõr to impeaj to apa, ne ma to amji japackre ne ihkõat apa. Ne me akwỳ kwỳa hãn ne Pahpãm mã ampo kĩn nare atajê to pit mã amehcakõc to me ipa, ne me amji jarên to mehhêj xi to:

— Me imã ri quêt ampo itajê cunea jahkre pej — hane. Cwỳrjapê ri ramã cute me Pahpãm jõ pry cupan ne mehhyr, ne Jeju te amji mã mehhimpej jicu. Ne ca, ca ha cute me hajỳr catêjê pê ampỳa mã apu apa. Ne hamre, imã Pahpãm jarkwa kõt me apeaj na me apa na me ato prãm. Hamre.

TIMOT WÛR

Hapu Na Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ Timot mã, pom cu me hõ kàhhôc pijakrut cahyt itajê kujate. Na pê hapu na hõ kàhhôc ita japyrê pê **Timot WÛr, Hapu Na Pawrô Jõ Kàhhôc (2 Timot)**.

Ne Timot pê intuw, ne ajco Pawrô kôt apu ipa. Jirô pê mã pêPawrô Epet jô krĩ kam Jeju na mehwÿ mehkri atajê to ihhimpej catê na Timot xãm. Ne Pawrô Roman jô krĩ kam me hacjên xà kam ihkri, ne ramãcute mehcuran na hàhtêp na, cumã amji jahkre pej. Ne pom cu hapu na me hõ kàhhôc cahyt ita kam, pê PawrôTimot mã cute Pahpãm cwÿrjapê mehcuranxà ata cupa nare na, amji jarê. Ne hanea ne cute cumã, jũ caxuw jũmjê te me cupê Jeju na mehwÿ na cumã amji jarên, ne ajteare mã cute me amji kam hapac xà atajê cawpa.

Pê Pawrô Timot mã amji jarê

1 ¹⁻²Ikra Timot, ipê Pawrô, wa ha hipêr amã ihhóc. Ca ikôt Jeju kôt apa ita kam, wa ato amji kra, ne imã akĩnti. Pê Pahpãm JejuCrixto mã iprar catê na ito. Na wa ipê cumã iprar catê. Ne pê imã harkwa ta, na wa pjê cunea kam, mehcunea mã icakóc ne me cumã awjarê. He cu ha Jeju na meamji hõnco tu, quê ha me pamã pahte amji kam me pajapac xà tuw pejti atajê gô. Imã Pahpãm pême pajô Inxũ me, me pajô Pahhiti pê Jeju Crixto me ato impejti na, me ato prãm. Ne cute me acapri na, imã me ato prãm, ne amãacaxwãm pê, cute acaxwÿn kam acaricti impejti jôr to ipa na, me ato prãm.

Pê Pawrô amji caxuw Timot japackre

Me Hàpên Xà 16.1-2

³Wa Pahpãm mã apu ijapên to ipa, ne cute ampo cunea na ito ihhimpej atajê cunea wa ton to ipa, me quêtjê cuxà, ne nee amji pêihhimpej xà nõ to ijapac kêt, ne ihcaca nare. Ne wa hãn ne amcro me, caxwa kam Pahpãm mã icakóc, ne nee amji pê ato ijapac kêt nare Timot, ne itÿj

cumã acajrên, ne cumã apyrên ijakryti na amji jarên to ipa. ⁴Ne me papicapôn xà ata kam, wa cormã acwÿr ata na ato amji japackre. Na wa hipêr apupun prãm, ite apyrên amji jakryti prãmte. ⁵Na wa itÿj ate Jeju to amji mã ahimpej to apa na, ato amji japackre to ipa to hanea, pom quê atocatyjre pê Rojtkiwÿj, me anã pê Ewnixêkwÿj Jeju to amji mãmehhimpej he. ⁶Na pê wa akrã na ijü xi, ne acajrên ne apê Pahpãm mã gâpên catê na, cumã agõ. Pê Pahpãm amã Carõ Pejti carôt gõ, ate nee amji mã ampo cupa nare xà na. Ne akam carôt ita to amji japackrea ne. ⁷Quê ha Pahpãm me pamã Carõ Pejti gõ, cu ha nee ame amji mã pahto me papa nare. Ne quêt ampocrê itajê na quê ha me pahtehcajpa he. Quêha carôat kôt ame papa na, me pahtehcajpa. Ne me pahcunea te ajpên kinti na, me pahtehcajpa, ne hanea ne pahte me ampo kên to amji kam pajapac têtê, me amji jiprôn na, me pahtehcajpa.

Pê Pawrô mã Timot te ihkôat amji ton na to prãm

1 Timot 4.6-16; Tito 2.1-8

⁸Cwÿrjapê ca ha nee me cumã me pajõ Pahliti to gÿjarên na apahàm nare. Ne hanea ne, nee Jeju cwÿrjapê cute me ijaxàr ita na, apu ikamapahàm nare. Ne quêt icahê na gÿjarên pejti xà itajê na, ca amji pupun xà kêanre to apa. He ramã me Pahpãm te ita caxuw amã carôt jör. ⁹Ne pê me pahkên pê me pahto hapôj, ne me pahto amji kwÿa. Xà pê cu ajkî me ampo pejti to na mã, pê me pahto hane? Hãpà. Pê cute amji kam hapac xà to hajÿr prãmte, pê me pahto impejti ita to hane. Ne pê mam, rÿ pëa mã, Pahpãm pjê ton xwÿjrea na amji jarên to:

— Wa ha me kritxwÿ na me cumã ikra Jeju kujate, quê hamehtyc jahpan xà na ty. Wa hahõmpu ne ihkôt me to impejti ne, quê ha nee jü caxuw ihkên cati mã mencjêj nare — hane. ¹⁰Ne pê amji jarên xà ata na, me pamã me pahtyc jahpan xà na, Jeju tyc xà wÿr ihkujate. Pê ty, ne hacpÿa mã ihtîr. Cwÿrjapê quê ha Jeju to amji mãmehhimpej to me ipa atajê me ty, ne me cupê hÿràac, ne hacpÿa mã mehtîr rohnÿtti mã. Hõhõ, me pajÿjarên xà impejti itajêa, cu ha me cumã harên to me papa.

¹¹Ne Pahpãm pê icapi, ite ijÿjarên xà impejti itajê jarên, ne Jeju na mehkwÿ mã to hahkre prãmte, pê icapi ne ikujate. ¹²Cwÿrjapê wa ampo itajêa na amji pupun xà kêanre to amji pupu. Ne nee apu ipahàm nare, ne nee apu amji mã pa nare. Ampo na? Pahpãm pëimã ijapên xà ita gõ, ne cute imã ijamãr xà caxuw carôt tÿjti jör. Ne quê ha hàpên xà ita ijamãr itaa na, quê ha ahnaahacpÿ ne Jeju amji jaxà, hõ amcro ata na.

¹³Ne pom ampeaj kam ite amã ampo to hahkre itajê, ca ha amji mã hahkre pej, ne mecumã to hahkre to apa. Ne ihkôat amji ton to apa xà caxuw, wa ite amã to hahkre partu, he ampeaj kam ri quêt ite amã ampo to hahkre xà toihimpej atajê. Ne Jeju to caha amji mã me ahimpej na amji to ihtÿaj to apa kamto acrà tu ne. Ne ca ha hanea ne Jeju na

mehkwỳ kwỳ me, kam ajpën kīnti to me ahônco tu ne. ¹⁴Ca ha atỳj amjimã me ite amã ampo pejti to hahkre xà itajê cunea nōrto me apa na, quê ha acaxwãm pê Pahpãm Carō Pejti ate ton xà ata na atehcajpa.

Pê Pawrô Timot mã Onetipo pejti na harê

1 Timot 4.16-18

¹⁵Ne ramã ate Axij jō pjê kam mehcunea te me ijicu, ne ma ame icaca name ijahkre pej, mã hanea ne Pijer me Hermojên te ijicu. ¹⁶Imã Pahpãm te Onetipome, mehkra to impejti na me to prãm, ne cute me caprina imã me to prãm. Ampo na? Ramã cute imã ijakry catia jōr, ne nee cute me ijaxàr ita jũ na amehpahàm nare. ¹⁷Ne Roman jō krī mã cator, pê ma apu ijapên to mō, ne ina cator. ¹⁸Ne amã Epet jō krī kam cute itehcajpar catia na hahkre pej. Ne imã Pahpãm te, Jeju to amji jaxàr xà kam, cute Onetipo capri na to prãm.

Quê ha Timot pê Jeju cahê na ipijapu catê impejti

1 Timot 6.11-16

2 ¹Yhỹ ikra, ca ha Jeju carôt to amji to ihtỳj. ²Ne pom me hàhtôa kam mare mã ite amã icakôc xà to hahkre itajê, ca ha hanea ne jũmjê mã to hahkre. Ne por jũmjê atajê quê ha catytkam me ipa, ne me hũpar pejti to me ipa na, quê ha ihtỳj ma amũ irô mã, jũmjê mã ampoitajêa to hahkre.

³Me papê Jeju cahê na me papijapu catêjê, cwỳrjapê ca ha icuxà ajũcanãar kam apa. ⁴Ne me ipijapu xà kam krãhtare pê me hàprê catêjê ihtỳj amji caxuw me hō pahhi kam hapac to me ipa. Cwỳrjapêri nee me ipijapu xà te amji kam hapac xàata ràn xà na, ihkwỳ to amji kam hapac nare. ⁵He me hàhcukren catêjê te hajýar, quê ha me hacrer catê me hacrer, quê ha ajkaam amentoj, ne jũm te imprar tỳj ne mam cator na, quê ha ihtỳjamcwa. Hōhō, cu ha me papê me hàhcukren catêjê pyrãac, ne Pahpãm jarkwa kôt, catyt kam mecumã pajapên to mempejti na, cu ha pahtỳj me amcwa. ⁶Ne pur kam hàpên catê te me hajýar, quê ha pur kam apê, quê ha cumã hō intuw, quê ha mam quêt hō intuw ata nō krê, ne Jeju mãme gápên xà itajê pê itajê pyrãac. ⁷Ne ite amã ampo jarên itajê to amji kampa ne ihkôt hakoap ne, quê ha ihtỳj Pahpãm ate impar jahkre pej na atehcajpa, ca ha hahkre pej.

⁸Ne Jeju pê pahhiTawi xwỳ tàmxwỳ, ne hacpýa mã ihtĩr na, harên xàiampejti itajê to wa mehcunea mã ijũjarên to ipa. ⁹Cwỳrjapê ri ihhêj rũm ipê mehkên catêjê pyrãac, mã wakỳti te ijara juwapre. Ne Pahpãm jarkwa nare, jũ wỳr quê jũm ihcajpre. ¹⁰Na wa itỳj Pahpãm na mehkwy mã, ite amji pupun xà kêanre itajê mã ijũcanãr to ipa. Hō, wa itỳj apu hajýr to ipa, mãr quê xwỳ mãPahpãm wỳr me apkjê, quê Jeju mehkên pê me to hapôj pa, mãr quê mempejti na Pahpãm cahê na, cõjkwa kam ame

ipa rohnýtti mã. Hôhõ, pê ramãry pëa mã Pahpãm amji mã me pahto hajÿr to prãm.

¹¹ Ita caxuw wa ha caxwãm catia mã, ite ampo to me amã hahkre xà impejti atajê to me amã hahkre he:

Cu ha amjia kôt me papa jicu me mãa mã, pahtÿj Jeju cwÿrjapê me pahtyc to prãm na,
cu ha pahtÿj cahi na ame papa.

¹² Cu ha ame amji pupun xà këanre ita kam ame pajücanãr kam me to pancrà na,

cu ha pahtÿj cahê na amji to ame pahhi.
Nãmri cu ha pahte amehcaca, ne me hucu na,
quê ha hanea ne ame pahcaca, ne me pajicu.

¹³ Nãmri cu ha pahte me amji jarkwa par nare na,
quê ha ihtÿj quêt Jeju amji jarkwa pa.

Ampo na? Jü wÿr quêt taa amji mã ihhêj.

Pê Pawrô Timot mã amji krac ri mehçakôc kên catêjê cawpa

1 Petrô 3.15-16

¹⁴ Ne me akwÿa te ampo to hahkre xà impejti itajê to ma me amji japackrea ne ajco, ne ma me to. Ne ahna me to ihtÿaj ne, quê nee ihcapry na mehçakôc xà kryjre incwÿrjapê ame ajpën mãn nare. Nãmri mehkwy kam mare mã cute me ajpën mãn ita na ihkaj na, quê ame hane, quê ame kampa, ne hanea ne mehçeanre ne. ¹⁵ Ne me hãpën catê nõ impejti ata, quê ha hãpën xà to impejti to ipa, mãr quê jüm hãpën xà ata pupu, quê nee hãpën xà ita jü naihpahãm nare. Ne pom ca ramã gãpën xà to apê ita to ca ha apê, ne Pahpãm na mehkwy mã ampo to hahkre to impejti to apa. Mãr quê Pahpãm jü caxuw acukij, ca nee gãpën xà nõ impejti ata jü na apu apahãm nare.

¹⁶ Ne mehkwy pê Pahpãm na mehkwy nare atajê ri ajteare mã me amji kampa, ne amjia kôt me harkwa kôt hamreare atajê to ame hahkre to me ipa. Ne Pahpãm ma apu mehçakôc xà kôt hamreare atajê caca. Ampo na? Cute Pahpãm jô pry tète mehkwy to pry rên prãmte ri amehçakôc xà itajêto. ¹⁷ Ne me hümre te me hapackre xà ita pê ihhêj rüm cagã te mehçãmxar, mã kam ihu, ne hĩ cacu, ne ihpÿpÿm to ipa ata pyrãac. Ne me hümre atajêa rikam Pahpãm te amji kam hapac xà cacrô, mãihtÿj ame to këanre to me ipa. Atajê pêri ampo kên to pit mã hahkre catêjê he: Himën me Piret. ¹⁸ Ne ma ame Pahpãm jarkwa cajrer pejti, cuhtacti ata caca, ne cute mehçupan, ne mehkwy mã mehhêj xi xà to:

— Pom Pahpãm te hacpÿa mã me pahto ihtÿr na amji ton xà ata te ma ramã me pajakren — hajÿr. Cwÿrjapê ri Jeju na mehkwy jãhtôa ne cute me hühhyr, mã kyre pê ajpën kam Jeju kôt ame amji ton to me ipa. ¹⁹ Ne

quêt Pahpãm na mehkwy te Jeju to amji mã mehhimpej tÿjti itajê pê ihhêj rûm ikre jicjêc tÿjti ata pyrâac. Mã Pahpãm pê ikre ton catê pyrâac, ne cute ikre mã hÿxwÿr, mã cumã apu ihcuhhê. Ne jÿwÿr quê jÿm hÿhta. Ne por pÿ tÿjti ata kam ihhêj ne ihhóc ata jÿjarên xà te hajÿr he: “Pahpãm mã ihtÿj amji kwÿa jahkre pej” ne: “Quê ha mehkwy te Pahpãm na mehkwy na amji jarên na, quê ha ihtÿj mehkên cunea mã hikra, ne me hïcu” hane.

²⁰Me hakràj catêjê jÿrkwa kam ampeaj kam me cumã me hàwmrô xà me, me hàpàn xà pyxwÿr xà jàhtô. Ne ihkwÿ na kyre pê hÿ ahwÿ, neihkwÿ impejti atajê na ri ampeaj kam hÿ ahwÿ. Ne por impejti atajê ri quêt, cute me to amji mã amcro jirên xà atajêa na kam me apà, itajikjê na ri me papê ampo itajê pyrâac. ²¹Cu ha me pahte ame pahkên jïcu, ne ampo te ame pahtÿm atajê jÿrê, ne ame pahtetetti ne, me pajàpên xà caxuw. Quê ha ihtÿj Pahpãm me pamã hàpên xà impejti nô gô, cu ha me cumã apê.

²²ÿhÿ Timot, cormã atuwre cakrô, ca ha nee apê mentuwre te amji kam hapac xà, kôt hakop nare atajê pyrâc nare. Nãmri mentuwre itajê quê ha pjê kam me ampo pejti pupu, ne nee ihkôt me hakop nare kam, ma ihkôt mepra. Ne caa, ca ha hajÿr nare, ca ha nee apu ita ton to apa nare, ne quêt catyt kam apa, ne Pahpãm to amji mã ahimpej to apa. Ne nee me akwÿa me ameajpên mân nare, ne nee ame apijapu nare, ne catyt kam cama ame ajpên kïnti to me apa. Ampo na? Nãmri me akwÿ cunea te amji kam hapac xà cunea tetetpit, ne quêt Pahpãm te me atehcajpar na, ca me ahcukij.

²³Ne pom ajpên krac ri me harkwa cakrô to amehcakôc atajê pê, ca amjito guphêa ne. Nãmri ramã ate, cute me hajÿr to mormã mã, ma ame ipijapu na me hahkre pej. ²⁴Ne Pahpãm mã me pajàpên catêjê itajê nee ame papijapu xà nare. Cu ha quêt cama me amji mã pahprïa ne me pajàhcaprïa kam mecumã ampi ne, ampo to me cumã hahkre to me papa. ²⁵⁻²⁶Quê ihhêaj to jÿm ame pahkam incryc, cu ha me cumã ampi ne me cumã pahcaprï, ne hacpÿa mã mehcuhtac. Ne por me pampar nare atajê pê ihhêj rûm, ramã me pahcurê xwÿn pê Xatanaj jô kwÿc mã amencjêj. Mã Xatanaj ita me to ihhimpej, mã harkwakôt amji to mehhimpej to ame ipa. Cu ha me cumã ampi ne me to hahkre to me papa, ne me ahna Pahpãm wÿ, quê ihhêaj to mehtehcajpa, quê ha xwÿ mã hacpÿa mã Pahpãm wÿr me apkjê, ne me amji krã kre, ne Xatanajjô kwÿc ata pê ame hapôj.

Pê Pawrô Timot mã amcro cahhur atajê cawpa

Coroxo 2.16-19; 1 Timot 4.1-5; 2 Petrô 2.1-3; Juta 3-16

3 ¹ÿhÿ Timot, wa ha ita caxuw amã Jeju te amji jaxàr xà jô amcro cahhur kôt harê. Ne amcro cahhur ata kam, quê ha ampo cunea

apu amji mã hamãr nare. ²Quê ha amcro atajê ihkêanre, ne ampeaj kam hũpa. Ampo na? Quê ha mehcunea amehkêanre, ne amji to pit mã ame amji kam hapac to me ipa, ne me hàhcukrêj me, ihpore to pit mã amji mã me cuprôn to me ipa prãm. Ne mehkwy amji jirôa pê amji to me cati to prãm, ne amji to me hàprãr to me ipa. Ne mehkwyà kwý to ihhêj rũm mehkryjre ta, ne ampo cunea na mecumã hũjahkre to me ipa. Ne mehcunea me amji xũn kêanre to ame ipa, ne nee me hũmxwýmpar nare, ne nee cute me cumã ampo pejti jôr atajê pyrên, me cumã me hakryti na me amji jarên to me ipa nare, ne nee amji mã me Pahpãm cupa nare. ³Ne nee me cumã mehkwy kïn nare, ne nee me hàhcaprĩ nare, ne cama mehkwy to ihhêj xi xà to kêanre to me ipa, cute mehkên mã me irên prãmte. Ne amji mã mehkêanre ne, ne me amji mã hamãr nare ne. Ne me cupê ampo pejti to kên catêjê, ne nee me cumã ampo pejti kïn nare, ne me hàprêa to me hàprê. ⁴Ne me hõ ikwý nõ catêjêa jarên to mehkêanre to me ipa, cute mehkên mã me irên prãmte. Ne hãn ne ampo kên kam mehkra acto tu, mãnee kam me amji cajpêr nare, ne mehkên itajê to ihtýj amji to ame catia to me prãm. Ne cute Pahpãm kaj na amji kam me hapac xàa na amji mã meampo ton to prãm, itajê to pit mã ame ipa. ⁵Ne mehkwy mã me cupê ihhêj rũm ampeaj kam Pahpãm carôat kôt, catyt kam Jeju kôt meipa catêjê, ne nee mã cama ampeaj kam nare, ne amehhêaj to ame ipa. Ne pom cute me hajýr catêjê itajê pê, ma amji to guphê to apa.

⁶Nãmri hãn ne ikre cunea kôt mencjêj to me ipa, ne pyjê mã mehhêj xi xà kêanre atajê to mehhêj to me ipa. Mã hãn ne pyjê itajê te mehahkre pej nõ kam, mehkôat ame ampo kêanre atajê ton to me ipa. Ne ramã me caxwãm pê cute mehkêanre na me amji jahkre pej, na ri amehpeacre. ⁷Ne pom cute me cumã ampo to hahkre catêjê itajê cuxà, cute ame ampo itajê jahkre pej prãmte, te ampeaj kam me kampa cakrô, ne nee jũm te ihkôthakop, ne kam hapac, ne hahkre pej pej nare. ⁸Ahnaa mã pê Janaj xwý me Jãmprê xwý he, ne Mojxe xwý cuna mã amji kam me hapac xà tokêanre he. Ita kôpit na mã, me hũmre hêj xi itajê te Pahpãm jarkwa hêj xi nare ata cuna mã me amji kam me hapac xà kêanre to me amji kam hapac he. Nemehkrã kêanre, ne cute Jeju kôt me amji kam hapac jicu. ⁹Ne pom me hũmre itajê quê ha nee ame ipa ry nare. Ampo na? Quê ha mehcunea, cute me Janaj me Jãmprê cuxà, cute me amji jahkre kêatre ata na me hõmpu.

Pê Pawró Pahpãm jarkwa na Timot japackre

Me Hàpên Xà 13.50-14.7

¹⁰Ne ca nare, he ca ramã ite amã ampoto hahkre xàa kôt ate amji ton. Neca ramã ite amji kam ijapac xà cunea na ate ipupun, ne ahna ijahkre pej. Ne ramã ate ampo caxuw ipa na ijahkre pej. Nãmriwa ramã Jeju

to amji mã ihmpej to ipa, ne ampo cunea na, amji mã me ato ijàhtàtti to ipa, ne amehkĩnti to ipa, ne ijũcanãar kam ampo itajê kam to icrà to ipa. Mã mehwỳte ame ito kêanre prãmte, cama ame icapôr to me ipa. ¹¹Na wa amji pupun xà kêanre to amji pupun to ipa. Ca ramã ate ijarên par, neahna ipupun xà atajê na amã ijahkre pejtu. Ne ate Antijoc jô krĩ me, Ampokrekà jô krĩ me, Ritij jô krĩkam, por ampo cunea te ito kêanre ata na atejahkre pej pejtu. Pê ajco Pahpãm pê Pahhiti ampo itajê cunea pê ito hapôj to ipa. ¹²Ne por Jeju kôt me amji ton to me ipa prãm atajê cunea, quê ha icuxà, ampo itajê na me amji pupu. ¹³Ne me hũmre krã kêanre, mehwỳ mã ihhêj to ipa atajê kwỳa to ri, cute me cumã ihhêj jahpan xà na, mehwỳa kwỳ te hanea ne me cumã ihhêj.

¹⁴Ne ca Timot, pom ate ampo to hahkre ne hahkre pej, ne catyt kam ihkôat apa atajê kam, ca ha quêt to acrà tu. ¹⁵Ne pê ca gôkre nôre naamã, Pahpãm jarkwa to cute me amã hahkre catêjê jahkre pej, atajê cukwa kam ri amã Pahpãm jarkwa jahkre pej. Ne pom Pahpãm jarkwa jô kãhhôc ita, quê ha ihtỳj ampo cunea na atehcajpa. Ca ha gũparkrà kreti to awpa, ne Jeju Crixto to amji mã ahimpejto apa, ne akên cati pê acato.

Cu ha Pahpãm jarkwa to me pajàpên xà caxuw me pahcũmpej

¹⁶Ne pê ramã mam Pahpãm na mehwỳ, Pahpãm Carô Pejti jarkwaa kôt, ihkãhhôc ata kam mehhôc. Ne ampo pejti itajê cunea caxuw ri impej he. Ihtỳj ampo pej cunea to me cumã hahkre xà caxuw impej. Ne cute me ampo kên ton, mã intête cute me cumãn xà caxuw impej. Ne me cute amji kam me hapac xà jikutti, mã cute hacpỳa mã mehuhtac xà caxuw impej. Ne caxwãm catia mã, catyt kam me ipa xà to mecumã hahkre xà caxuw hanea ne impej. ¹⁷Hôhô, quê ha jũm mã Pahpãm kôt ipa, ne cumã hàpên catê na cumã amji ton to prãm na, quê ha ihkãhhôc ita cahyt, ne ampo par jahkre pej tomô, ne ramã hàpên xà impejti cunea caxuw amji mã hàcprôn to mô.

Timot te mehcunea mã Pahpãm jarkwa jarên xà

Coroxo 4.5-6

4 ¹Yhỹ Timot, wa ha gapackre ne Pahpãm me, Jeju Crixto kam mare mã amã ijarkwa ta. Pom Jeju te mehcukij ne me ajpên pê me to ipicokjêr xà jô amcro kam, quê ha amji na mehtyc to cuprô, ne mehtĩr to cuprô, ne cute ahpỳanre na, cute ame amji kam hapac xà ton atajê kôt, mehcukijxà caxuw. Mã Jeju te ahna me hahkre pej atajê na, quê hamehcukij. Ne cute mehcukij jirô pê, quê ha amji to pjê cunea jô Pahhiti. ²Cwỳrjapê wa ha amã ijarkwa ta, ca ha mehcunea mã Pahpãm jarkwa to acakôc to apa kam apec xà nare kam, kam xuwcaca nare kam, me cumã to acakôc toapa. Ne hanea ne apec xà kam, xuwcaca kam, me cumã Pahpãm jarkwa to acakôc to apa. Negũjarên xà ita na me cumã awjahkrea ne, ne ma mehkên tête mehcãpêrkàr to apa. Ne

me cumã ampo itajê to hahkre na, amji mã me to gâhtàtti toapa, ne ma ajpên kam me hakryti na me cumã gũjahkre to apa. ³Nãmri quê ha cormã me hũmre jũpar nare atajê jô amcro kam ahtwÿ, quê ha nee me gũjarên pejtipe ampeaj kam atajê kam me hapac nare. Neamjia kôt cute amji mã me amji kam hapac xà kînti atajê kôt, quê ha ame ipa. Ne amji mã, cute me ampo to hahkre catêjê jâhtôa ne me to cuprô. Ne me cumã:

— Ite amji mã me ampo parna prãmti atajê to, ca ha me imã hahkre — hane. ⁴Ne pom me hũmre itajê, quê ha me Pahpãm jarkwa pejti kam me hapac jicu, ne ajte menquêtjê jũjarên hêj xi xà kam, quê ha quêt me hapac to me ipa.

⁵Ne ca Timot, ca ha itajê cunea pê amji to guphê to apa, ne ma ahna amji jamãr peaj ne. Ne ate amji pupun xà kên itajê mã awcanãa ne, ne cama amji to apê Pahpãm wÿr me to ipipkjêr catê na, amji toimpeaj ne. Pom apê Pahpãm mã me gâpên catêjê nô ita? Na ca ha cumã gâpên xà itajê cunea to impeaj to apa.

⁶Pê wa mam Pahpãm mã ramã amji gô, ne cumã amji to awjahkre, ite cumã ijâpên itaa kam ityc xà jô amcro mã hahêr, na pê wa cumã amji toawjahkre. Ne ramã ipê pjêkrân to mô, ite amji to ijũjahkre xà ata wÿr. ⁷He wa ramã ite ampo kên itajê cunea me amji cujtên to kênre nare. Ne hanea ne ijâhcukren kênre nare, ne wa hanea ne ite amji mã iteJeju to amji mã ihmpej xà ita juwahi to kênre nare. ⁸Ne pom ijâpên xà itajê jahpan xà na, ramã Pahpãm cahê na imã ijâmcwÿr xà impejti ata nô. Ne mehckij ne me to ipicokjêr xà jô amcro kam, quê ha Pahhitipê krã kreti te catyt kam me pahckij catê ata, quê ha imã ijâmcwÿr xà ita gô. Ne ijâmcwÿr xà ita pê ihhêj rúm pjê kam pahhi krãhkà. Quê ha Pahpãm ikrã na ihkrãhkà ata pupu ne imã:

— Ate amji kam gapac xà cunea na apeaj to apej — hane. Hôhô, quê ha Pahpãm ito hane, ne nee wa ha ahte hajÿr nare, ne por Jeju jikaj kam, mecumã amji kïan kam mehikaj to ipa atajê, quê ha me hanea ne icuxà ame amcwa.

Pê Pawrô Timot mã amji jarê

⁹Na ca ha atÿj ajpên iwÿr atêm pyrentu ne ipupu, nãmri wa ahte ikrï. ¹⁰Pê Tema amji mã pjê ita te amji kam hapac xà kîn, ne incryc imã hikra ne ma tê, Texarôn jô krï wÿr. Mã Crexên ma Carati jô pjê wÿr hàpên xà wÿr tê, ne hanea ne Tito ma Tarmati jô pjê wÿr hàpên xà wÿr tê. ¹¹⁻¹²Ne pê wa ma Epet jô krï wÿr Tiquicô kujate. Mã Ruc pyxit peaj ne icahê na ihkrï. Ca ha tê ne Macô japrô ne ajpên to tê, nãmri taa mãquê ha ihtÿj ijâpên xà ita na itehcajpa. ¹³Ne ajpên me amôr xà wÿr, ajpên me imã ite Trôwat jô krï kam, Carpojürkwa kam, ikãhti juwahi ata pÿ, ne hanea ne ajpên imã ihkãhhôc kwÿ jãhhuc atajê incwa, ne nee ca ha, por wa cormã kam ihhôc to prãm ata to me gapac kêt nare.

¹⁴⁻¹⁵Ne ma amji na me wakÿti to hàpên catê japrÿ te Arexãnre ata to me guphêa ne. Nãmri pahte amji kam me pajapac xà ita na, ampeaj kam cama me pahkam hàprê, na pê ramã ito kên crire nare. Ne imã cute ito kên jahpan xà na, Pahpãm te cumã hàmjôr na to prãm.

¹⁶Ne pê Roman catêjê jô pahhiti icukij prãmte, amji cuna mã ixãm, pê wa ahte me cuna mã xa, ite amji na ijaarãr prãmte. Pê ajte me pahkwÿ itajê cunea me ire, ne ma ipê amehcahkũm. Ne pom cute me itohajÿr xà ita na, quê nee ijahpan xà na jũ caxuw Pahpãmjũ mã me ton nare. ¹⁷Pê Pahpãm icahê na xa, ne ma imã carôt gô, pê wa carôat kôt mehcahkrit atajê mã Jeju jarên pejti itajê cunea jarên toxa, ne pea ite amji to ityc xà jahpan. ¹⁸Ne quêt me Pahpãm pê Pahhiti te hajÿr romã mã, quê ha ampo itajê cunea pê ipytã, ne ma cõjkwa wÿr ijaarô, wa ha curia ihhimpej xà atakrac ri ikrĩ. Ýhÿ, cu ha hõtpê Pahpãm mã me pajũjarên to hajÿr to me papa he:

— Hirã pê, mehcunea jirôa pê acati — hane. Quê ha mehcunea me pahkampa, ne me harkwa to:

— Ampeaj kam! — hane.

Pê Pawrô me, mehkwÿ Timot mã me amji jarê

¹⁹Ne Prixirakwÿj mã ijarê, Aquira mea mã, ne hanea ne Onetipo me, mehramea mã, me cumã ijarê. ²⁰Ne Eraxô mat ri Corinti jô krĩ kam hàhhuc, ne ite amji jakàn pê Tropimo juwahi, Krîtêpti kam, pê hà incwÿrjapê pê wa huwahi. ²¹Ajpên me amji jahkre, ne pahhàjê pÿm xwÿjrea na iwÿr me acator to me hahkre. Ne hanea ne me pahkjêjê kwÿ itajê te ri me amã amji jarênkujahêc he: Ewpuro me, Prutên me, Rino me, Cawtikwÿj me, mehkwÿ cahhur itajê cunea te me amã amji jarên kujahêc. ²²Na wa ijõtpê ite Pahpãm mã me acajrên to hajÿr he:

— Me ijõ Inxũ, ca ha Timot mã acarôt gô, quê nee apu acarôt ita kam amji na ampo cãmji nare. Ne Timot na mehkwÿ cunea to impeaj ne — hajÿr. Hamre.

TITO WÛR

Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ, ne Tito mã hõ kàhhôc kujate. Na pê hõ kàhhôc ita japrÿ pê **Tito WÛr, Pawrô Jõ Kàhhôc** (Tito). Ne pê Tito ajco Pawrô kôt apu ipa. Jirô pê mã pê Pawrô Kênpojrejõ pjê kam Jeju na mehkwy mehkri atajê to ihhimpej catê na hãm. Ne pom cu me hõ kàhhôc cahyt ita kam, pê Pawrô Tito mã, jũ caxuwjũmjê te me cupê Jeju na mehkwy na cumã amji jarên, ne ajteare mã cute amji kam me hapac xà ton atajê cawpa. Ne hanea ne cute cumã, cute me hũmreimpejti pê catyt kam atajê to, Jeju na mehkwy jamãr catê nõ xãm na hũjahkre. Mãrquê me cumã Jeju na mehkwy te ajpên kam mehcarĩcti kam, amji to me ipijapar to hahkre na, cumã hũjahkre.

Pê Pawrô Tito mã amji jarê

Carati 2.1-3

1 ¹⁻²Hàpà Tito, ipê Pawrô, ne ipêPahpãm mã ijapên catê, ne hanea ne ipê JejuCixtô jarkwa na iprar catê, ne pa wa ha amã ihkàhhôc ita to. Pê Pahpãm icapi, ne mehkwy wÿr ikujate. Pom pê ramã mam amji mã mehkwy capi atajê, waite mehtečajpar, mã cute me hũnãr to ihtÿaj prãmte, pê me hÿrmã ikujate. Ne hanea ne cute Jeju to amji mã mehhimpej kam me to incrà tu to prãm to pê mehwÿr ikujate. Ne hanea ne caxwãm catia mã, catyt kam me papaprãmte, me cumã Pahpãm te amji kam hapac xà tohahkre. He nee Pahpãm apu ihhêj nare, ne rÿ pêa mã, pê cormã pjê ton nare kam, me pamã cuteamji cahê na me pahto ipijapar rohnÿtti mã xà na amji to, cu pahtÿj me hikaj. ³Pê rÿ pêa mã ramã me pamã amji to. Ne ramã cute me pamã amji ton xàakam hàhhuc, na ri ihtÿj ita caxuw apucahê na me pancjêj xà to me pamã hahkre. Ne pomcute me pamã ampo to hahkre xà ita pê imã cugõ, ne ite mehcunea mã to icahkũm xà na harkwa ta. Ne Pahpãm te me pahkên kèanre catihtti ata pê me pahto hapôj ata jarkwa kôt, wa mehcunea mã harên xà imejti itajê jarên to ipa.

⁴Ŷhỹ Tito, itea wa amã ihkàhhôc ita ton. Ampo na? Cu ajwar Jeju to amji mã pahhimpej ita kam, wa itỳj ato amji kra. Ne Pahpãm pê me pajõ Inxũ Cati, ne ihcãmter Jeju Crixto te ri me pahkên kêanre pê me pahto hapôj, na wa ijõtpe me cumã acajrên to ipa, ne me cumã:

— Tito to impeaj ne, ne caprĩ, ne caxwãm pê me cumã me acarĩcti jõr to me apa — hane.

Tito te mehkwy to mehhimpej catêjê pyxwyr xà

1 Timot 3.1-13

⁵Cwyrjapê pê wa cô jipôc ri, Kênpojrejõ pjê ata kam guwahi, ne amã ijarkwa hyr to:

— Tito, cormã nee jũm te krĩ cunea kôt Jeju na mehkwy mã me to ihhimpej catêjê pyxwyr nare. Cwyrjapê ca ha ahpyanre na me akwy cunea mã, me toihhimpej catêjê ton partu — hajyr. ⁶Cwyrjapê wa ha ato ihimpej. Ca nee Jejuna mehkwy to ihhimpej catê na, atỳj jũm xãm nare. Ne quêt cute me hajyr catêjê nõ, ca ha hãm he. Quêha hũmre nõ pê catyt kam ipa catê, quê nee jũm ihkôt harên nõ to kên nare, ata pê quêha me to ihhimpej catê. Ne cumã hĩxi pyxit peaj, neajpên na me ajkrut peaj. Quê ha mehkra xwỳjê pê catyt kam Jeju na mehkwy. Mâr quê nee jũm, me hũpar nare, krã kêanre na, amehkra to ihcakôc nare.

⁷Ne Jeju na mehkwy to mehhimpej catêjê pupun catêjê atajê, quê ha Pahpãm jãpên xàa to me hàpên to me ipa. Cwyrjapê quê ha mehkwy nõ te, cute ampo to kên nõ na harên na, quê ha nee cupê mehkwy to ihhimpej catê nare. Ne me cumã, cute amji kam me hapac xà impejti cajcucre to me amji jarêc jahkre pej. Ne haneane me cumã cute amji kam hapac xà pytĩti to amji jarêc jahkre pej. Ne por quê ha me cupê mehkwy to ihhimpej catêjê atajê, quê ha nee amji toame cati prãm nare, ne nee amencryc xi nare, ne nee côxỳhti to ame amji to ipipãn to me ipa nare, ne nee ame hàprê nare, ne nee ihtỳj ahti na hàpên xàkêanre atajê to amji to me hakràj prãm nare. ⁸Ne quêt ihcunea na, me hũrkwa to me hàhcajrênti ne, ne me cumã ampo pej pit kĩn. Ne caxwãmcatia mã amji to mehhimpej to mempej, ne ampo kên cunea tète me amji jiprôn to me ipa. Ne mehcunea to me amji kam hapac to me ipipênti to me ipa. Ne catyt kam me Pahpãm jarkwa kôt ameipa. Hõhõ, quê ha Jeju na mehkwy to mehhimpej catêjê pupun catêjê atajê cute amji kam me hapac xà to me hane. ⁹Ne ihtỳj me caxwãm pê amji mã me Jeju jarên pejti itajê to me ipijarõ to impejti to me ipa. Ampo na? Pom harên xà ita, nee mã ihhêj xi nare, ampeaj kam ri. Ne ihtỳj hũjarên xà ita to me cumã me hakryti to ihtỳj to ipa. Ne hanea ne hũjarên xà ita, cute cuna mã ame ampo to cupan catêjêmã harên to ipa.

Tito te Kênpojre catêjê mãn xà

¹⁰Ŷhỹ, Tito, ca ha maamji to guphê to apa, nãmri ampeaj kam cute me Mojxe xwỳjõ kàhhôc to me cumã hahkre to mehkêanre to meipa catêjê

jàhtô. Ne xwahna cumã me ateJuta catêjê kôt me Mojxe xwỳ jòkàhhôc cunea kôt me amji ton na, me cumã me atoprãm. Na ri hõtpe me amã hũjarên to hane he:

— Gapacta ne Jeju to amji mã me ahimpej to me apa, ne hanea ne hĩkjê na, Mojxe te me hapackre xà cunea kôt me amji ton to me apa — hane. Ne amehhêj xia jarên to me ipa. Ne ame to ihhimpej catêjê pejti atajê cunea cuna mã, mehkên to pit mã ame amji kampa. ¹¹Cwỳrjapê ri imã ate cute me hajỳrjê mãn na ato prãm. Na ca ha me cumãn prãm, ne me cumã garkwa to hane he:

— Me kêt! Ne aracri ame apa! Ca cama apu krĩ kam ikrejàhtôa kam mehkrĩ atajê cunea te me Pahpãm jarkwa pejti ata kôt me ipa xà kaj na mehcahpêrkâr to meapa. Ne ate ampo to me cumã hahkre xà kêanre itajê to, nee ate me cumã hahkre xà nare. Ne ate amji mã mehpoire incwỳr prãmte, ca ame hajỳr to me apa. Xà nee ajte ita na me apahàm nare? — Hô, ca ha me cumã hane. ¹²Ne Kênpoire jô pjê ata kam mehkwyà nô te Pahpãmjarkwa to ihcakôc catê ata te amji jarên to:

— Me ipê Kênpoire catêjê hõtpe me ihêjxia to me ihêj xi, ne ihêj rũm me ipêampo kên jàprêa to hàprê atajê, ne ampeaj kam ite me xuwaca, ne cama ampeaj kamme ijàpàn cati — hane. ¹³Ne pom cute ampo na me amji jarên xà ita, ampeaj kam ri. Cwỳrjapê ca ha ma cute amji kam me hapac xà ita tète me cahpêrkârto ihtỳaj to apa, quê catyt kam caxwãmcatia mã Jeju to amji mã mehhimpej to me ipa. ¹⁴Nee ca ha hipêr mam Juta catêjê quêtjê jũjarên xà to mehcakôc catêjê me, mehkrãa kam, cute me caxuw amji mã mehcakôc xà to mehhimpej atajê to me amji japackre nare. Ampo na? Atajê te ri ramãPahpãm jarkwa pejti caca ne me hucu. Nãmri mehcakôc xà itajê nee Pahpãm pĩn me caxuw me cumã hapôj nare. Ne por Juta catêjê te Jeju kôt me amjito jicu atajê krã pĩn ri me caxuw itajê japôj.

¹⁵Ne Pahpãm te ri me pahcaxwãm pê ame pahcũmpej, mã me pampej. Cwỳrjapê cu ampo pejti na pit mã me prãm. Ne por me Pahpãm par nare, neampeaj kam me caxwãm pê, mehtũmti atajê mã ri, ampokên itajê cunea na prãm. Neme cumã ampo pejti itajê ihkêanre, ne ampo kên ri me cumã imej. ¹⁶Ne ihtỳj Pahpãm kôt me ipa catêjê na me amji jarê. Mã nee me hàpên xà itajê Pahpãm kôt me ipa catêjê na me harên nare. Ne me hũpar nare, mã ihtỳj ame hàhcurê to ame ipa. Na ri nee ampo caxuw mempej nare.

Tito te catyt kam mehkwy to ihhimpej xà

1 Timot 1.6-14; 4.6-16

2 ¹Ne quêt ca nare, ca ha catyt kam ampeaj kam me cumã ate ampo to hahkre xà atajê to hahkre. ²Ne mehkà atajê mã gũjarên to hane he:

— Ame amji mã quêt nare, ne me amji mã ampejti ne. Ne catyt kam, caxwãm catia mã me apa. Ne ampo kên cunea tête me amji jiprôn to me apa. Ne Jeju a to amji mã me ahimpej tÿaj to me apa. Ne amji mã me akwÿ kînti to me apa. Ne me gũcanãar kam me apa — hane.

³Ne hanea ne pyjê kà atajê mã gũjarên to hane he:

— Ca ha Jeju mã me amji gô, ne catyt kam, ate amji kam me gapac xà impejti to amji mã me apijapar to me apa ata na. Ne nee mehkwy toame akwÿ mã ihkôt harên kên to me apa nare. Ne nee côxÿhti to akôm to amji mãahimpej to me apa nare. Ne ampo pejti to, ca ha quêt me hahkre to me apa. ⁴Mâr quê amji cuxà mehkwy cahâj tuwre atajê mã awjarê, quê ha cute catyt kam ame ipa na, quê ha ramã amji mã mempê me, mehkra kîn to me hahkre. ⁵Ne amji mã me ampejti ne, ne ampo kên cunea tête me amji jiprô, ne catyt kam me ipa, ne nee apu mehkwy pêmempjê caxun to me ipa nare. Mârquê catyt kam me hûrkwa jâpên xà to amjimã me hàpên pejti to me ipa, ne ihtÿj amji caxuw mempê kam me hapac to me ipa. Ne me hàhcajrên jâhcaprîhti ne. Quê ha cute amji to me hàpên tohajÿr to me ipa na, quê ha nee jûm Pahpãm te me pamã ita to hahkre xà ita cuna mã ihcakôc kên nare — hane. Hôhô, ca ha pyjê kà mã ahimpej xà to hahkre to hane, mâr quê mentuw kwÿ mã to hahkre.

⁶Ne mentuwjê to hanea ne me hapackre. Mâr quê caxwãm catia mã, catyt kam amji to mehhimpej, ne ampo kên cunea tête me amji jiprôn to me ipa. ⁷Ne ate hajÿar, ca ha catyt kam apa ne ampo pejti ton to apa, mâr quê amji mã me apupun xà kôt, hanea ne catyt kam me ipa. Na ca ha me cumãampo to hahkre kam pra, ne acryac kam, catyt kamme cumã ampo to hahkre. Ne ampo pejti to hahkre to, ca hirãa pê me cumã amji pro rên to apa, ne nee ca ampo kên ton, ne amji cwÿrpê ahêj nare. Ne quêt caxwãm catia mã ampopejti to me cumã hahkre to apa. ⁸Ne garkwa pej to pit mã me cumã acakôc to apa, mâr quê nee jûm apar caca, ne amã ahêj xi na hacjên nare. Ne imã ate amji kam gapac xà impejtiitajê na pit mã me ato prãm, mâr quê nee me pahcurê xwÿn nô apu akôtharên to kên nare. Ne cama me pahkam ihpahãmti ne.

⁹Ita caxuw ri imã ate cama me cumã hàpên tome ipa catêjê japackre to hajÿr na, imã ato prãm he:

— Amji caxuw me gô pahhi kampa, ne catyt kam me cumã gâpên pejti to me apa, mâr quê me gâpên xà impejti atajê kôt, amji mã me akîn to impejti to me ipa. Quê me gâpên xà na me arê, ca nee xuwcaca te me cumã ampojarên nare, ne aracri cute ampo na me arên atajê to me.

¹⁰Ne nee ame gô pahhi pê me gâhkîj nare. Ne quêt ita to ca ha me he, catyt kam me apejti na me apa. Ne me amji jarkwa par pejti to me apa. Quêha mehcunea amji mã me Pahpãm te me pahkên kèanre ata pê me pahto hapôj ata cupa, ne hanea ne amji mã cute ampo to hahkre xà itajê cupa — hane. Hôhô, caha cama me cumã hàpên catêjê japackre to hane.

Pê Pahpām me pamā amji to ajpê

Epet 2.8-10; 1 Texarôn 1.9-10

¹¹ Pê Pahpām me pahto impejti prāmte, me pamā cute amji kam hapac xà itajê na amji to ajpê, ne amji pro mẽ. Mār quê mehcunea me hõmpu, ne mehahkre pej, nāmri cupêa ri me pahkên pê me pahto hapôj catê, ne ihtÿj cute amji kam hapac xà ita to me pahcunea kampa, pjê cunea kam. ¹² Ne ihtÿj pahte mam amji kam me pajapac xà kêanre atajê jicu to me pamā hahkre. Por pahte amji kam me pajapac xà te Pahpām pê ampÿa mã me pahto ipa atajê mã he:

— Ca ha nee amji to acati prām nare, ne nee ahti napyjê caxun nare, ne nee amji to gacràj cati prām nare — hane. Mār cu quêt ampo kên cunea tète me amji jiprôn to me papa. Ne catyt kam, caxwām catia mã ame papa. Ne Pahpām mã me amji jôr to me papa.

¹³ Ne quê ha amcro nō na, jū caxuw, Jeju Crixto pê Pahpām kra pê me Pahpām catia ata, ihtÿj pjê ita wÿr amji jaxà, na cu ha pahtÿj hō amcro kam me pajakryti ata na me hikaj. Quê ha mehcunea, cute me pahkên kêanre pê me pahto hapôj na me hõmpu, ne me hahkre pej. ¹⁴ Nāmri taa mã pê me pahcunea kritxwÿ na amji to, ne me pahcunea jahpan xà na caprô jaxwÿ, ne ampo itajê cunea mã amji gō, ne amji mã huwahiita to pê me pahcunea kên pê me pahto hapôj pa. Me pahte ampo pej to pit mã ame amji kam pajapac to me papa prāmte ri, cute me pamā amji kam hapac xà to ihtetetti. Ne me pahto amji kwÿa to prāmte, pê me pantête mepahkên itajê mã amji gō.

¹⁵ ÿhÿ, Tito, ca ha atÿj ampo itajê cunea to me cumā hahkre. Ne Pahpām jarkwa kôt, ampo na mehpeacre atajê tehcajpa, ne hacpÿa mã me toihtÿj. Nāmri quê ha jūm ampo to kên na, ca ha kam atēm pyrentu, Pahpām jarkwa kôt, ne intête ihcahpêrta. Ne nee amji na jūm te, ate Pahpām jarkwa kôt ampo to hahkre nare na, cute garên na hamār nare.

Cu ha catyt kam me pajō pahhi atajê kampa

Roman 13.1-10; Epet 2.1-10; Tito 1.10-16

3 ¹ ÿhÿ Tito, ca ramā ate me pahkwÿ mã gūjarên xà itajê to gūjarên, ne hipêr to me hapackre, ne me cumā:

— Por me gō pahhi atajê me, me ato ihhimpej catêjê atajê, ca ha amji caxuw me kampa, ne mehhimpej xà krac ri me apa. Quê ampo pejti ton na me amā awjahkre, ca ha me gūjarêan kam, hãn ne me ampo to. ² Ne atÿj jūmjê kôt ame harên kên to me apa nare, ne nee ame gâprê nare, ne cama me amjito impejti ne. Ne amji mã me aprîa kam, me gâhcapriakam me cumā acakôc to me apa, ne amji to me akryjreprām to me apa, ne nee me hirôa pê amji to me acati prām to me apa nare — hane.

³ Pê mam me papê Jeju na mehkwy itajê me, me papê amji jahkre kêatre, na pê cu nee ajco me pajūpar nare, ne me pajō pry kajna ajco ame

papa. Ne me pahcurê xwÿn caca xà kôt pit mã ame papa, ne ihkôat amji to me pahhimpejto me papa. Ne ampo kên kîn itajê mã pit mã meamji jôr to me papa, por me pamã ihkîntiatajê mã. Ne pahtÿj ajco ame ajpên curê to me papa, ne ajpên jü na ame amji to prãm to ame papa. Ne ampo itajê ton to pit mã, ajco me amji pyrác to ame papa. Pê ajco mehkwy, ahna ame pahkam incryc, pê cu hanea neamji jahpan xà na ajco kam ame pancryc.

⁴Pê Pahpãm amji mã me pahkînti ita na me pamã amji to ajpê he. Na pê amji mã me pahto impejti prãmte, me pahkên kêanre pê me pahto hapôj. ⁵Ne me pahkên pê me pahto hapôj partu. Xà pê cu ajkî me ampo pejti to na mã, pê ihkôt me pahto hane? Hãpà! He pê cumã me pahcaprí, na pê me pahto hane. Ne Pahpãm Carô Pejti kôt me pahcaxwãm pê, mepahtetetti ita pê ihhêj rûm curmã ame pahpÿpÿm, ne cormã pahte amji kam me pajapac xà na amencwÿr. ⁶Pahpãm jãhcajrëan to hàhcajrën, na pê me pamã Jeju Crixto te me pahkên pê me pahto hapôj xà caxuw ihkujate. Pê me pahtyc xà jahpan xà na ty, ne me Pahpãm wÿr me pamã pry jahkjê, pêcormã Pahpãm me pamã Carô Pejti gô. ⁷Cwÿrjapê cu Pahpãm kam mare mã, cuna mã, catyt kam ame papa ita na, ne ahnaa jü caxuw cahê napahte amji to me papijapar rohnÿtti mã xà ata mã ame acjêj.

⁸Ne ijüjarën xà itajê ri quêt ampeaj kam. Tito, pom ite amã ampo to hahkre itajêa to, ca ha ate ampeaj kam me cumã hahkre na, imã ato prãm. Ne cute me apar atajê, quê ha me taa ahpÿanre na me amji jarën to: — Wa Jeju to amji mã ihmpej to ipa, mã Pahpãm te icaprí, ne ito kênre nare, ne imã Carô Pejti jôr, cwÿrjapê wa ha cumã amji gô, ne cumãijapên pejti to catia to ipa — hane. Cu ha mepahte me ita to hajÿr na, quê ha ahname pahcunea mã ihkênre nare.

Pê Pawrô Tito mã amji krac ri mehcakôc kên catêjê cawpa

⁹Ne pom cute me hajÿr xà atajê pê, ca ha ampÿa mã me apa he. Cute amji krac ri ihcaprÿ na amehcakôc catêjê kêanre atajê me, mam menquêtjê japrÿ to pit mã cute ame hahkre prãm catêjê me, cute Juta catêjêincaca xà cwÿrjapê tee ame ipijapu prãm catêjê atajê pê, ca ha ampÿa mã apu apa. Ampo na? He ampoitajê kôt hamreare. ¹⁰Ne por cute me ato ipicokjêr prãm to ipa atajê, ca ha me hapackre. Quê ha me hÿpar nare, ne hipêr me ato ipicokjêr prãm, ca ha me hapackre to ajkrut. Quê ha hÿpar nare, ne cute to incrê xà ita kam, caha me cumã hikra, ne nee hipêr me to amji japackre nare. ¹¹Ne por cute me ita ton catêjê, ca ha ramã mehômpu, ne me hahkre pej, ramã me caxwãm pê amehkêanrena, na quê ha ihtÿj ame amji kên mã me amjirê.

Pê Pawrô Tito mã amji jarê

¹²Ne wa ite Metohjêxà jô krî kam amji to pahhàjê kujahêc na amji kam ijapac. Na wa ha ma me awÿrArtima me, Tiquicô pijakrut itajê nõ kujate.

Quê ha curi me awÿr cato, ne me amã ijarẽ, ca ha jũ na me amji to, ne ma Metohjêxà jô krĩ wÿratêm pyrentu. Ne curia cu ha ajpẽn cajpa. ¹³Me pahkwÿ nõ Xena pê Roman catêjê caca xà to cute me amji pyrác xà ata jahkre pejcatê ata, me Apôr, quê ha amũ me anaa me tẽ. Atajê ca ha mehtêm xà ata na mehtehcajpa, mār quê nee me cupê ampo hamre nare. ¹⁴Ne imã me pahkwÿ te ampo pejti ton to me amji pyrác na imã me ato prãm. Ne cute ame ampo na prãm to me ipa atajê na mehtehcajpa. Hõhõ, ca ha me ate amji kam me gapac xà ita ton na, quê ha nee me apê cute me amjikam hapac xà kôt hamreare atajê nare.

¹⁵Ne pom icalhê na mehcunea meipa itajê te me amã amji jarên kujahêc, neme pahkjêjê pê Jeju na mehkwy mã me ikĩnti atajê na ite me to amji japackre na me cumã ijarẽ. Nãmri Pahpãm te me ato impejti na imã me ato prãm.

PIREMÕ WÛR

Pawrô Jõ Kàhhôc

*Pê Roman catêjê me hõ krĩa kam Pawrô jaxà, pê curiaJeju cwÿrjapê ajco ihkrĩ. Ne pê Pawrô Jeju na mehkwÿ nõ japrÿ te Piremõ ita mã, pom cu me hõ kàhhôc cahyt ita kujate. Na pê hõ kàhhôc ita japrÿ pê **Piremõ WÛr, Pawrô Jõ Kàhhôc** (Piremõ).*

Ne pê hũmre nõ japrÿ te Oneti ita, Piremõ itamã cama apu hàpên to ipa, ne cormã to new catia kam ma aracricupê tẽ. Pê cormã nee Jeju to amji mãihhimpej to ipa nare kam, pê Oneti ata hane. Ne ihtÿj ajco apu ampo kêanre ton to ipa. Mã Roman catêjê te, cute ampo kêen ton atajê na me hõmpun, ne mehpro ne me haxàr, mã ihkrĩ. Ne curia ri cute Pawrô cajpar.

Mã Pawrô te Oneti mã Jeju jarên, mã cute ihtÿj amjimã to ihmimpej to ipa. Jirô pê mã ri ma ita caxuwOneti hacpÿa mã hõ pahhi Piremõ wÿr ihkràr. MãOneti jõ pahhi ata pê cormã hõ pahhi rohnÿtti mã. Ne Oneti mã hõ pahhi pê Piremõ ata cupa. Ampo na? Pê nee cumã amji jarên nare, ne cormã to new catia kam, aracri cupê tẽ, cwÿrjapê ri cumã hũpa. Mã Pawrô te ramã Piremõ pupun pejtu, na ri cute cumã ihkàhhôc ita ton, mã cute hacpÿa mã Oneti na amji caxàr prãmte.

Pê Pawrô Piremõ mã amji jarê

¹Hàpà Piremõ, apê me ijõikwÿ nõ, ne apê me ikwÿa nõ, me ijàpên xàkam. Ýhÿ, ipê Pawrô, ne pa waha amã ihhõc. Pê Roman catêjê me ijaxà, wa mehacjên xà kam ikrĩ, Roman jõ krĩa kam, Jeju Crixto cwÿrjapê, ne me pahõt Timot me, wa apu amã ihhõc. ²Ne wa ha hanea ne gũrkwa kam, cute me cuprõn atajê mã mehnhõc. Ne ihkàhhõc ita, ca ha hanea ne me pahkjê cahãj pê Apijkwÿj me Arquipo pêicahê na cute amji pupun kêanre catê ata mã, ca ha me cahyt.

³Imã Pahpãm pê me pajõ Inxũ Cati me, mepajõ Pahhiti pê Jeju Crixto te me ato impejti, ne meamã ihcarĩcti jõr na me ato prãm.

Piremõ te amji kam hapac xà

⁴Na wa ijõtpê ampeaj kam, meate Pahpãm kõt amji ton ita na, cumã me acajrênto ipa. Ne wa ato amji japackre, ne apyrên ijakryti na, Pahpãm mã amji jarê. ⁵Ne amã Pahpãm na mehwïcunea kînti, na ca atÿj me pajõ Pahhiti pê Jeju toamji mã ahimpej to apa. Wa ite ramã cute amji mã ita na me garên na, garên par. ⁶Cu ha me pahcunea Jeju te amji kam hapac xà kam me ajpên hõnco tu ne. Ne ca xwÿjê, ca hanea ne, ate me icahê na amji hõnco tu. Cwÿrjapê ri, Jeju pîn ampopejti hapôj atajê, cu hãn nepahtÿj amji mã me cucwa. Ne ampo itajê jàhtôa tohàhtô, wÿr cu me pahnô hàhtô na hahkre pej, cu nee mepahnô hahkre pej nare. Na wa ha ijõtpê Pahpãmna ahwÿ, mâr cu me Pahpãm te me pamãampo pejti jôr xà atajê na me hahkre pej.

⁷ÿhÿ, ikjê impejti ata, apyrên ijakryti, ne apyrên imã amji kînti. Ampo na? Amã Pahpãm na mehwÿ cunea kîan to mehkîn, ca ramã ate me hïcunea kam, me cumã me hakry ton crire nare.

Pê Pawrô Oneti mã Piremõ na ahwÿ

Roman 15.7; Epet 4.32

⁸Cwÿrjapê cu Jeju kam ajpên topahkjê ita kam, nee imã ate ampo ton xàata na, ijarkwa hyr to ihtÿaj to prãm nare. ⁹Ne imã akînti ita, imã ana ijàhwÿr na pit mã awjahkre, na wa ha cama ana ahwÿ. Ipê Pawrô, wa Jeju jaxà kam ijàhhuc ne apu ipa, neincwÿrjapêa wa me hacjên xà kam ijÿr cacrô, wa ha cama ana ahwÿ, ne nee amã ijarkwa hyr to ihtÿaj nare. ¹⁰Ne ite Jeju Crixto kam Oneti, por cupê amã hàpên catê ata to amji kra ata mã wa ite ana ijàhwÿr xà ita to ana ijàhwÿr. Ampo na? Wa cormã me hacjên xà kam ikrî, ne ahnaaite Pahpãm wÿr Oneti pipkjêr na ihtecajpar, na wa ite amji to Oneti pãm. ¹¹Pê mam Oneti amã ampo na hamreare, ne ita caxuw ihtÿj ampo cunea caxuw amã ipa ne impej, ne hanea ne imã ampo cunea caxuw impej.

¹²Ne ampeaj kam imã ihkîn cacrô, wa ha hacpÿamã amã ihkujate, ne wa ha itÿj hakàn pê to ijapac xà. Cacrô wa ha itÿj awcanã. ¹³Ne wa ma amji na to ipijarô prãm. Ampo na? Pom cuteJeju jÿjarên pejti cwÿrjapê me ijaxâr, wa kam ikrîita kam, cute gaxà kam, itecajpar prãmte. ¹⁴Wa nee ate itecajpar na ato ihtÿj prãm nare. Imã ate amjia kõt imã hõr na ato prãm. Ca ha caa imã Oneti te itecajpar hahkre, wa ha cormã amji na huwahi.

¹⁵Mõrmõ Pahpãm te apê Oneti têm na hamâr, na ri ma apê tê. Ne quê ha taa ita caxuw ihtÿj awÿr to amji jaxà, quê ha ana ahtwÿ. ¹⁶Nãmri mam pê cupê cama amã hàpên catê, ne ita caxuw ri, nee cute amji kam hapac xà pê mam cute amji kam hapac xà ata nare. Ne quêt ita caxuw cute Jeju to Ihà, na ri cupê me pahkjê. Ne imã ihkîan to ihkîn. Ne quê ha

ijirôa pê amã ihkĩn, pê mam cupê amã hàpên catê pit, ne ita caxuw cupê akjê pê amã hàpên catê, cwÿrjapê quê ha amã ihkĩn.

¹⁷Hõ, ca ha ate ito amji kwÿ na, ca ha Oneti na amji caxàr to hanea, pom ca hãn ne ina amji to pøj he. ¹⁸Quê ha cute apê ampo to ipictor na, nare, quê ha cute ato new na, wa ha pa amã amgõ. ¹⁹Ne pom ijũhkraa to ite amã ijãhhôc to incire ita te hajÿr he: “Ipê Pawrô, wa ha pa amã amgõ” hane. Pê wa ramã Pahpãmwÿr amôr na, atehcajpar crire nare, ata pêate ito new catia pyrãc. Cakrô, wa ha nee ate imã Oneti jôr na ato ihtÿj nare. ²⁰ÿhÿ Jeju kam jõhhêwre, ca ha imã ite amji kam ijapac xà ita ton to hane, wa ha apyrên ijakrya to ijakry, quê ha me pajõ Pahhiti pê Jeju Crixto akôt ito impejti ne.

²¹Ne wa cormã jÿ ne ihhõc kwÿa kam, ite ramã ato amji japackre, ca ha atÿj ite ampo na awÿr xà ita to imã, nare, ca ha ite ahna amên xà ita jirôa pê to imã. ²²Ne wa ha hanea ne ana ahwÿ, ca ha imã ikre caxwÿn nõ caprã, he wa itÿj me ate Pahpãm na me gãhwÿr xà ita kôt cute ijamãr, wa hipêrme awÿr itêm na amji mã to hane.

Pê Pawrô me, mehwÿ Piremõ mã amji jarê

²³Ne pom Epapra icahê na me hacjên xà kam Jeju Crixto cwÿrjapê ihkrĩ itajê te hanea ne me amã amji jarên kujahêc. ²⁴Ne pom me ikwÿ itajê te ri me amã amji jarên kujahêc he: Macô me, Aritarcô me, Tema me Ruc.

²⁵Ne imã me pajõ Pahhiti pê Jeju Crixto te me acunea to impejti na me ato prãm. Hamre.

IXAHER CATÊJÊ WÛR

Jũm Jõ Kàhhôc

Ûhỹ, cute ihkàhhôc ita hôc catê te nee kam amji japry xir nare, ne ihhê ne Pawrô te mormô ihhôc. Ne Ixaher catêjê te Jeju to amji mã mehhimpej atajê cunea mã ri cute ihhôc ne ihkujahêc. Na ri ihkàhhôc ita japry te Ixaher Catêjê Te Jeju To Amji Mã Mehhimpej Atajê WÛr, Jũm Jõ Kàhhôc (Ixaher).

Pê ihhê ne Ixaher na mehkwy nare atajê hacpyã mã Jeju na mehkwy to, mam menquêtjê te amji kam me hapac xà tũm ata wÛr ipipkjêr prãm. Cwÿrjapê ri ihkàhhôc ita nee cute Jeju to amji mã mehhimpej jicu nare name cumã apô. Ne Jeju te amji kam hapac xà tuwti ita ri, mam Ixaher catêjê te amji kam hapac xà tũm ata jirôa pê impej. Ne ite nee Ixaher catêjê wÛr ihkàhhôc tẽ ita cunea to ipintuw nare, ne ihkwÿ jatujre atajê ri ite to ipintuw.

Ixaher 11.1-40

Pahte Pahpãm to amji mã me pahhimpej xà kôt harên xà

2 Petrô 3.5-7

11 ¹Ûhỹ me ikwy pê Juta catêjê pê Ixaher catêjê, wa ha me amã me ate Pahpãm to amji mã me ahimpej to hahkre, ne to capô, mãr ca me hahkre pej peytu ne. Quê ha Pahpãm te me pamã ampo to hũjahkre xà ata, cormã nee me pahwÿr cator xà narecacrô, cu ha pahtÿj ampeaj kam, cormã me pamã hõr na amji mã me to hane, ne ihtÿj hikaj. Cu ha pahte Pahpãm to amji mã me pahhimpej na, quê ha ihtÿj mepamã ampo pupun xà nare ata te ihkrĩ na hahkre peaj to hahkre pej. Nãmri cu ha pahte Pahpãm to amji mã me pahhimpej nare na, cu ha nee me hahkre pej nare.

²⁻³Ne cu Pahpãm to amji mã me pahhimpej, cwÿrjapê ri me pamã Pahpãm jarkwa kôt pjê me cõjkwa kam ampo cunea to amji ton nahahkre

pej. Na ri me pamã, pahte nee me ampo pupun xà nare ata te ri ampo itajê cunea ton na hahkre pej. Nepê me panquêtjê ihtÿj Pahpãm to amji mã mehhimpej, cwÿrjapê ri Pahpãm te me to ihcakôc to impejti, ne me ahna amji caxàr.

Pê Ixaher catêjê quêtjê itajê ihtÿj Pahpãm to amji mã mehhimpej

⁴Pê ajco Aper xwÿ Pahpãm to amji mã hane, cwÿrjapê ri Pahpãm mã cute Cãn xwÿ jirôa pê ampo jôr xà ata peaj to impej. Mã Pahpãm te, cute cumã ampo jôr xà ita na cupê catyt kam ipa catê na harên to impeaj to impej. Na pê ihtÿj ihkôt Aper xwÿ na amji capa. Ne pê ramã Aper xwÿ ty cakrô, mã cormã cute Pahpãm to amji mã ihmimpej xà ata, ihkôat me pamã to hahkre.

⁵Pê Enoc hanea ne Pahpãm to amji mã hane, na pê ihcaypuaw pê Pahpãm ahna amji jarê, na pê nee pjêita kam ihtyc nare, pê Pahpãm amji mã ihtÿar na to api, pê nee hipêr jũ caxuw jũm cumã cator ne hõmpun nare. ⁶Jũ wÿr cu Pahpãm to me pahte amji mã hajÿr nare xà ata kam ihcaypuaw. Quê ha jũm te Pahpãm wÿr hàhtêp na amji to hàhcukjêr na, quêha ihtÿj Pahpãm te ihkrĩ na amji mã to hane. Ne quê ha hanea ne caxwãm catia mã Pahpãm kôt me ipa prãmte ahna ahcukij, quê ha ihtÿj cute ahna hàhcukjêr ata jahpan xà na, cute ahna amji caxàr na amji mã to hane.

⁷Pê Nowe xwÿ hanea ne ajco Pahpãm to amji mã ihmimpej, na pê ihtÿj cumã, por rÿ nee jũm te ta catia pupun nare ata cawpa. Pê cute cumã ihcawpa xà ata kôt, amjimã pàr kreti to, mâr quê kaam mehkra me, amji to mehtyc xà jahpa. Mã ihkĩnte cute nee Pahpãm to amji mã mehhimpej nare atajê te amji curêmã me amji mên, ne mehcunea jamre. Mã Pahpãm te Nowe xwÿ te amji mã tohajÿr xà ata kôt ahna amji caxàr, ne cumã:

— Ate ikam gapac pejti, na ri apê catyt kam apa catê — hajÿr.

Aprãw pê cute Pahpãm to amji mã mehhimpej catêjê xakat

⁸Pê Aprãw xwÿ hanea ne ajco Pahpãm to amji mã ihmimpej to ipa, pê Pahpãm cumã jũ ri cute pjê to hõ tekjê xà ata to, hũjahkre xà ata na, amjimã to hane. Ne ma harkwa kôt, nee jũ ri cute hõ pjê ata jahkre pej nare kam, ihwÿr mō. ⁹Pê Pahpãm Aprãw mã pjê to hũjahkre xà ata kôt, ihkôat ihwÿr mō ne curi cato, ne kam ihkrĩ. Ne hanea ne ihkra pê Ixac me, ihtãm xwÿ japyr te Jaco ata me, kammehkrĩ. Ne pê hanea ne Pahpãm Aprãw tãm xwÿ tãm xwÿ mã, menquêtiti kôt pjê ata to awjahkre. Ne pê me cupê mehcahkriat, ne ajco pryre kà te ikre ata kam mehkri. ¹⁰Ampo na? Nee mã ampo na nare. Pahpãm te me cumã amji ton xà ataa na, cute me cumã jũ caxuw krĩ jamre nare ata xãm na, cormã me hikaj.

¹¹Pê Aprãw ramã ihweaj to ihweaj, ne hĩxi pê Xarakwÿj ihkre crà cakrô, pê Pahpãm ahnaa cumã ihkra to awjahkre. Mã cute cumã ihkra

tohühahkre xà ata na amji mã to ihhimpej, ne ihtÿj hikaj, mã cumã ihkra pê Ixac pÿm. ¹²Hõ, pê hÿmre pyxit peaj ne ajmãr ty, ata kôt ri mehtãmxwÿ jãhtôa to hàhtô, ne me cupê caxêre jãhtô pyrãac, nare, me cupêcôxwa tohkà na pjênxôm carôt jãhtô pyrãac.

¹³Ne ite me amã me panquêtjê jarên xà kôt harên itajê ri, Pahpãm to amji mã mehhimpej to me ipa ita kam amehtyc. Ne nee cute me Pahpãm te me cumã ampo to hühahkre xà atajê cwÿr nare kamamehtyc. Ne cute cormã me ampo cunea to Pahpãm te me cumã hühahkre ata jarên par, ne nee cormã me hõmpun pej nare kam, ihhêj ne ramã cute me hõmpun, na ri ame hakry, ne ihtÿj ahna me amji jarên to me hane he:

— He nee me ipê pjê ita tekjê nare, ne me ipê mehchakrit, na wa pjê nõa pîn icator, ne ma ihnõ ita wÿr mō — hane.

¹⁴Ne cute me amji jarên xà ita kôt, cu ramã pahte me hõ pjêa japên na me hahkre pej. ¹⁵Quê rÿ mã pjê pîn me cator ata wÿr hacpÿa mã me amji jaxà, ne nee hipêr hacpÿ mã cute me amji jaxàr xà to ame amji kam hapac nare. ¹⁶Ne quêt ame cõjkwa jô pjê impejti ata pit japên to me ipa. Ne atajê pê Pahpãm kra impeaj, na ri nee me hÿ na ihpahãm nare. Na ri ramã cute me cumã cõjkwa kam mehkrí xà ata ton.

¹⁷⁻¹⁸Pê Pahpãm Aprãw mã ihkra pê Ixac to hühahkre to hane he:

— Ixac pê akra ita cucwa kam, quê ha amã me atãmxwÿ hàhtôa to hàhtô — hane. Pê Pahpãm Aprãw mã hajÿr cakrô, cute ihkra pê Ixac na capi prãmteihcuran na cumã harkwa. Mã Pahpãm jarkwa kôt ramã cute ihkra curan ne to caxàr xàa kam, cute amji mã harkwa to:

¹⁹— Wa ha ihcura, quê ha ihtÿj Pahpãm hacpÿa mã ikra to ihtír — hajÿr. Mã Pahpãm te cute ihkra curan tète huwahi xà ata pê ihhêj rÿm ramãhacpÿa mã ihtír.

²⁰Pê Ixac xwÿ hanea ne ajco Pahpãm to amji mã ihhimpej to ipa, na pê Pahpãm mã mehkra pê Jaco me Exaw tãmxwÿ te amji to me ipijapar xà na mehcajrên, ne me cumã:

— Quê ha Pahpãm ihtÿj jÿ caxuw ato impej cati, me atãmxwÿ mea mã — hajÿr.

²¹Pê Jaco hanea ne ajco Pahpãm to amji mã ihhimpej to ipa, na ri ramã ihtyc xàa kam, cute Pahpãm mã mehtãmxwÿ pê Joje xwÿ kra pijakrut atajê cajrên, ne ihtÿj cormã hàwkô ata na cute amji cajparne xa ne Pahpãm pejti na harên, ne to amji kampa.

²²Pê hanea ne Joje ajco Pahpãm to amji mã ihhimpej to ipa, ne ihtyc xà wÿr, mehkjêjê pê Ixaher catêjê te Ejit jô pjê pê me cator na me cumã harê. Ne cute me cumã harkwa hyr, mãr quê jÿ caxuw hacpÿ mã me amjijaxàr xà wÿr mehhi to mō, ne ma Pahpãm te me cumã pjê to hühahkre xà ata ri me harêt.

²³Pê Mojxe xwÿ pãm me inxi hanea ne ajco Pahpãm to amji mã mehhimpej to me ipa. Na pê Mojxe cumã ihpÿm, pê Paro xwÿ pê pahhi

me ahkrare curan na me cumã harkwa ata kaj na, me to amxu. Ne pê ihkra ata impeaj to impej, pê me hõmpu, na pê nee amji mã me pahhi atacupa nare, ne cama me to ipimxur to putwry încrê.

Pê Mojxe Ixaher catêjê mã cute mehkritxwÿ curan na to hahkre

²⁴Pê Mojxe hanea ne ajco Pahpãm to amji mã ihhimpej to ipa, ne ihkã, ne ma apu cute me, cupê Paro kra cahãj ata kra na me harên na ihcaca. ²⁵Na pê cute ampo kên cunea to amji cajpuaw to ipa xà to hatujre xà ata kam pê hicu, ne quêt ma mehkwy mã hàr na amji to. Ne me cumã axà ne me cahê na amji pupun xà kêanre to amji pupun to ipa. ²⁶Ne pê amji mã: — He quê ha ihtÿj jũ caxuw Pahpãm ite amji pupun xàita jahpan xà na hirôa pê imã amgô. Na wa ha Ejitjô pjê jãhcukrêj pejti itajêcunea to amji pê ijapac kêt. Ne Pahpãm te me pamã cute ampo kên cunea pê me pahpytâr catê to hũjahkre ata cwÿrjapê, wa ha cute ame icurê catêjêkam amji pupun to kêanre ne — hane.

²⁷Pê Mojxe ajco amji mã Pahpãm to ihhimpej to ipa, na pê nee cumã pahhi pê Paro ata te kam incryc xà ata cupa nare, na pê ihtÿj Ejit jô pjê pê mehkwy to cato, ne ma me to mō. Ne me to mōr xà ata kam, ihtÿjihhêj ne, por me Pahpãm pupun xà nare ata pupun to me mō. Na pê kypê me cumã hũcanâr nare. ²⁸Ne pê Pahpãm to amji mã ihhimpej, na pê me Hakrenxà jô amji kîn to Pahpãm jarkwa kôt mehkwy mã ihhimpej, ne to hahkre. Ne amji kîn ata kam, pê ikre cunea kôt cute ame carã cahãcrekra pê mehkritxwÿ caprô jaxwÿr na me cumã harkwa ta. Mâr quê ame haxwÿ, quê Pahpãm pîn ajpên me ahkrare cakônĩ curan catê ata tẽ, ne mehkritxwÿ caprô pupu, nenee mehkwy pê Ixaher catêjê nô pê ihkra curan nare.

²⁹Ne pê Ixaher catêjê hanea ne Pahpãm to amji mã mehhimpej, na pê ma Cõxwatepti cajpuw amcràre ata na me rê. Pê Ejit catêjê me cuxà ahna me irêr prãm cacrô, pê cama cô me hipej.

³⁰Pê Ixaher catêjê Pahpãm to amji mã mehhimpej, na pê Cana jô pjê mã me hàr xà ata kam, ihtÿj Pahpãm jarkwa kôt Krícuxwati ata pu na me ipijarôa to me amcro to xet, me ajkaam pê krĩ tète kwÿc ata cunea apu ajxwÿ, ne pê kam mehkri catêjê atajê cunea jipej tu. ³¹Pê Rapekwÿj xwÿ pê mempijapit xyre ata, ihtÿj Pahpãm to amji mã ihhimpej, na pê Ixaher catêjê te krĩ pupun catêjê atajê na amji capa, pê nee cute me Pahpãm par nare atajê kôt me cahãj ata curan nare.

Pê menquêtjê kwÿ te Pahpãm to amji mã me hajÿr atajê, ihtÿj me ampo cwa

³²Hamre ramã ite me amã ijũjarên xà ita jamre. Ampo na? He ampeaj kam cute mam Pahpãm to amji mã mehhimpej catêjê jãhtô, na wa rÿ mã me amã Gitô me, Parac me, Xãnxã me, Jeta me, Tawi me, Xamer me, Pahpãm jarkwa to mehcakôc catêjê kwÿ jarê. ³³Ne itajê pê hanea ne ajco

Pahpãm to amji mã mehhimpej to me ipa, na pê krĩxàre kwỳ jõ pjê kôt ajco me ajpu ne me hipej, ne amji mã me hõ pjê atajêcunea pytà, ne me to hõ tekjê. Ne pê catyt kam, mehkrã kên me, mempej catêjê atajê to ajpên pê me ajcokjê. Ne pê ihtỳj Pahpãm te me cumã ampo to hũjahkre atajê incwa, ne ihtỳj amji tète me ropcahàcti jòkre hòhti ata jarkwa to me ajpỳ.

³⁴Ne pê hanea ne mehkwy, cuhy kam cute me irên xà ata kam, ihtỳj cuhy pôc kam ame ipa, ne nee jũm caxàr nare. Ne pê hanea ne mehkwy, wapo xwahhihti to cute mehcuran xà ata pê me amji pytà, na pê neeme jũm curan nare. Ne pê mehkwy peacre atajê, carôt tỳj mã me axà. Pê mehkwy mã me hàprê xà caxuw ampeaj kam me carôt tỳj cati, ne pê ihtỳj krĩxàre jõ krãhtare jàhtõa ne ajco me tohjê. ³⁵Ne pê pyjê kwỳ te ramã mehkjêjê tyc atajê tíar na hacpỹ mã amji mã me huwahi.

Catyt kam Pahpãm kôt ame ipa atajê, ihtỳj me amji pupun xà to kêanre

Ne pê mehkwy hanea ne Pahpãm to amji mã mehhimpej cacrô, ihtỳj cute amji pupun xà kêanre to me amji pupu. Ne ma me amji mã hikran caca, ne ihtỳj Pahpãm cwỳrjapêamji na me curê xwỳn jamã, mã me cumã mehkaj xà ton to me ipa ita to mehcura. Ne pê ajco mehkaj xà na me amji pupun xà ata kam me amji mã:

— Quê ha ihtỳj Pahpãm ite incwỳrjapê amji pupun xà kêanre to amji pupun xà ata jahpan xà na, hacpỹa mã cute ito itĩr xà ata kam, hirõa pê imã amgõ — hane.

³⁶Ne pê mehkwy na cute me xwỳ xà kêanre xà atajê to me cumã ihpahàm catia to, ne mehcahhyr xà kêanre to mehcahhy. Ne wakỳre te mehcajpre xà to mehkwy cajpre, ne me hacjên xà kam me hacjê.

³⁷Ne pê kên to mehkwy capê ne to mehcura. Ne pĩ cokjêr xà to mehkwy tíar kam mehcokjê. Ne pê wapo xwahhihti to mehkwy cura. Ne pê mehkwy pê hamreare, pê me curê xwỳn cama ame hahêr to mehcapôrto me ipa, ne ame to kêanre, pê ajmãr mehcakrô ame ipa, ne prykà to pit mã me amji pro to me ipa. ³⁸Ne kên me pôti kam me hamreare ata kam me acto ne ihtỳj kên kre me, pjê kre kam ajco amehkrĩ. Ne Pahpãm mã pjê kam mehcunea mehkrĩ atajê jirõa pê quêt mempeaj to mempej.

³⁹Ne atajê cunea, pê ihtỳj Pahpãm to amji mã mehhimpej to me ipa, na pê Pahpãm mã mempej pit, pê me ahna amji capa cacrô, pê nee cormã cute me, por Pahpãm te me cumã ampo to hũjahkre ata cwỳr nare.

⁴⁰Ampo na? Pahpãm mã cormã cute me ampo cwỳr xà ata jõr xà nare, quê ha cormã me to me pajikaj, mãr cu ajkaam, Pahpãm te ihcuneana me pahto imej prãmte me pamãhãmjõr xà impejti catia ata to me pamã amgõ.

Ixaher 12.1-29

Cu ha menquêtjê cuxà, me pahte amji pupun xà kêanre ata mã me awcanã
Pirip 3.12-16

12 ¹Ne mam me panquêtjê amji mã me Pahpãm to mehhimpej to me ipa catêjê atajê jãhtôa picarô, cormã ihtÿj me pahkôpir to me ipa. Ne cute Pahpãm to amji mã mehhimpej xà atajê ihhêj ne ihtÿj me pamãhãpôr to me ipa. Pom hãn ne me ipicahur curê, ne me hàhcukrêj me, ampo cunea pytiti me, ampo te mehchãpêrkàr xi atajê cunea jicu, nemehcakrô me ajcahu, ita jĩkjê na, cu ha amji pê me ampo kên cunea me, ampo kên te me pahcupu xi atajê cunea jicu, mãr quê nee ampo me pahchãpêrhÿr nare kam, catyt kam Jeju to amji mã me pahhimpej kam me to pancrà. ²Ne pom me ipicahur catêjê amji cumam memprar xà mã catyt kam me irit to me pra, ita jĩkjê na, cu ha Jejuato pit mã amji mã me pahhimpej to mepapa. Ampo na? He taa mã pê mam Pahpãm jô pry kam me paxãm. Ne taa mã pê pahte amji mã me to pahhimpej na me pahto. Ne taa mã quê ha ampo cuneajicu xà kam me pahtehcajpa, mãr cu nee pahte amji mã me to pahhimpej xà ata jicu nare. Ne pê Jeju pjê ita kam ajco apu ipa, ne nee pĩ kam ihtyc xà ita tête amji hi kwĩn nare. Ne ihtÿj cumã jũ caxuwhakryti na amji jahkre pej, na pê ihtÿj ihtyc xà kêanre kam ihpahãmti ita mã awcanã. Na ri amcro ita kam ihtÿj Pahpãm cahê na, awpôc rũm Pahhitikrĩ xà pê me hàmtàr cati krĩ xà ata kam jÿ.

³He Jeju te amji pupun xà kêanre to amji pupun, pê mehkrã kên hàhtôa ne ma ame curê cakrô, pê ihtÿj awcanã na, to ca me amji japackre, mãr ca cuxà, nee ampo kên cunea mã gũcanãr tête me amjihi kwĩn, ne Pahpãm kôt me apa jicu nare. ⁴He nee cormã mehkrã kên te amji kam hapac xà kêanre pê, ate me amji pytãr xà ita kam, nee rÿ me anô caprô pijaxwÿr nare. Ne neejũm te cormã me anô curan nare. ⁵⁻⁶He pê ramã Xarômãw xwÿ, cute me amã acarôt to ihtÿj xà caxuw, Pahpãm jarkwa na hõ kãhhôc kam me amã ita na ihhôc, ca ramã ihhêj neate me to gapac kêt! He pê me pajapackre to:

“Ikra, quê ha Pahhiti pê Pahpãm mã jũm kĩn,
quê ha ihtÿj jũm ata japackre xà to ihcãmxê,
mãr quê catyt kam ihkôt ipa.

Ne quê ha Pahpãm jũm to ihkra xà na ahna amji capa,
ne ihtÿj cute ampo kên ton tête cumã,
ne cumã ihkàj xà to, mãr quê catytkam ihkôt ipa.

Na quê ha jũ caxuw Pahhiti akàj xà nõ to acãmxê,
ca ha atÿj cute acãmxêr xà ata na ihkôpĩ, ne ihkôt hakop.

Ne quê ha ampo tête amã,
ca ha cute amãn xà ata kam,
ihkôt apa intête amji hi kwĩn nare” hane.

⁷Na quê ha ate me amji pupun xà kêanre me akam ajhu, ca ha atỳj me cumã awcanã. He ate me amji pupun xà kêanre itajê pê, pom hãn ne mehũmxwỳ mehkra japackre he. Ne ate me amji pupun xà kêanre itajê, ihtỳj ramã me apê Pahpãm kra na me garê. He xà ajkĩ cute mehkra japackre xàcaxuw me hũmjê me hamreare? Hãpà. Cute me hapackre xà caxuw ihtỳj me cumã me hũmjê me, menquêtjê. ⁸Ne pom krô na mehkra, mã nee me hũmjê me hapackre, ne mehcãmxêr nare, mã amjia kôt me amji to ajpa, ita jikjê na, quê ha Pahpãm nee jũ caxuw acãmxêr nare na, ca ha nee apê ihkra impej nare.

⁹He pê me pajökrenöre na ihtỳj me pahcũmxwỳ ajco me pajapackre, ne me pahcãmxê, na pê cu pahtỳj ajco amji mã me hũpa. Cwỳrjapê cu ha ita caxuw me hirôa pê amji mã me cõjkwa kam me pajõ Inxũ Cati cupa. Necute me pahkàj xà to me pahcãmxêr, na cu ha pahtỳj me kampa, ne me awcanã, mār cu cahê na me pahkrĩ rohnỳtti mã. ¹⁰Pê me pahcũmxwỳ, me pantuwre na, caku crêre kam, jũ na cute amji mã me pahto prãm xà ata na ajco me pajapackre, ne me pahcãmxê. Ne Pahpãm te nee quêt hajỹr nare. Ne cute me pahto impejti xà caxuw ri me pahcãmxê, mār cu me papê hũràac, ne me pampeaj to me pampej. ¹¹He pê me pahcũmxwỳ me pahcahhyr xà ata kam, pê nee me pamã ahna ihkĩn nare cakrô, cu pahtỳj cute me pahcahhyr xà atajê kôt catyt kamame papa, ne me pampej pêa mã me amji to ajpa.

Cu ha pahtỳj Pahpãm kôt me papa rohnỳtti mã to prãm

Carati 5.16-21

¹²Cwỳrjapê, quê ha ate me amji pupun xà kêanre me awỳr hapõj, ca ha nee Pahpãm kôt me apa tête me amji hihkêhkên nare, ne cama quêtçaxuw amji mã me acarôt to mehtỳj. ¹³Na ca ha atỳj gõtpe catyt kam Pahpãm te amji kam hapac xà kôt apa, mār quê ihtỳj jũm akôt mō ata, nee akôt amji cahpêrhyr, ne Pahpãm kôt ipa tête amji hi kwĩn, ne hicu nare.

¹⁴Ne catyt kam mehcunea me, me apijapu to me apa na me amji to prãm nare na, ca amji to me ahcukij. Ne catyt kam ate amji kam me gapac xà impejti to me apa na, ca me caa amji to me hahkre. Nãmri quê ha jũm te ihcunea na catyt kam, cute amji kam hapac xà impejti to ipa nare na, quê hanee jũ caxuw Pahpãm pê Pahhiti pupun nare. ¹⁵Ne ca ha ma me ajpên jamã, mār ca nee me anõ Pahpãm jãhcaprihti ata cwỳr jicu nare. Ne nee ca me akwỳ kam, jũm te amji kam hapac xà kênto ipa na hamār nare. Ampo na? Por jũm te amji kam hapac xà kên ita pê

ihhêj rûm pjêpjêcrejĩ pyrâac. Ne por mehcunea pjêpjêcrejĩ na me pra atajê, quê ha mehcunea caxwỳ, quê ha me kàj xà partu. Jĩkjê na, quê ha mehcunea jũm te amji kam hapac xà kên ata têt, ne ramã ihkên mã hàr pyrentu. ¹⁶Ne nee ca me akwỳ kam, jũm te amji kam hapac xà xyre kam pahpahàmti ton to ipa na hamãr nare. Ne nee ca jũm pê Exaw xwỳ te amji mã Pahpãm te amji kamhapac xà cupa nare pyrâc ata na hamãr nare. He pê Pahpãm Exaw xwỳ mã ampo pej cunea gõ, pê to hõ tekjê. Ne ampo atajê to hõ na crat pyxit peaj na to ahpa. ¹⁷Jirõ pê hapu na ihkrã kre mã ihpỳm, ne te hacpỳ ne apu Pahpãm te cumã ampo pejti jõr ata pyr to hahkre, ne te incwỳar kam hacpỳ ne ahna ahwỳ cacrõ, nee hacpỳ ne cute ipyr xà nare na, ramã me amã hahkre pej.

Pê Ixaher catêjê Pahpãm wỳr me hàhtêp xà ata ihtỳajto ihtỳj

¹⁸⁻²¹Pê Ixaher catêjê, põtĩ kam me hamreare ata kam, Pahpãm wỳr me ahtêp, ne ma kên japyr te Ihcuhhyt ata na me catõ. Ne mento jĩa to me cuhy catia pupu, ne mehcajpê. Ne cute me awcapàtkõtĩ catia pupun. Ne cuteme kõtĩ catia pahtỳjti ata cajpêr. Ne cute me hapac jĩa to me cõjkwa pĩn hõhhi jõkre krãhhi ihtỳjti ata kam hapac, ne hanea ne cute me Pahpãm te ihcakõc na me kam hapac. Ne hanea ne cute me Pahpãm jõkre kam hapac, ne ampeaj kamme cumã hũpa. Na ri cute mehwỳr, quê nee hipêr ihcakõc quê mempar nare. Ne Ihcuhhyt ata kam pê Pahpãm me cumã ihcakõc, cwỳrjapê ri ihtỳj cute amji mã me hũpa xà. Cwỳrjapê pê Pahpãm me cumã kên ata cawpa to:

— Nee me anõ te kenti ita cupên xà hamreare, ne nee hanea ne ampo pry te ihcupên xà hamreare. Quê ha ampo pry ihcupê, ca ha me caa, me kên kwỳ cwa ne to me capê, ne to mehcura — hane. Mã hũpa te, cute nee me cumãharkwa hyr xà ita na me amji caxàr, ne kam me hapac prãm nare. Mã Mojxe te ampo itajê cunea pupun, ne cute ahna amji jarên to:

— Wa itỳj ampo itajê cupate apu itertet — hane. Hõ, pê Ixaher catêjê Pahpãm na me ahtêp xà ata kam, pê me to hane. Ne nee quêt ate me hajỳr nare.

Pahpãm wỳr me pajàhtêp xà quêt ihcajcucre, ne nee ihtỳj nare

²²Ne ca Pahpãm na me gàhtêp xà ata kam, ca ihhêj ne cõjkwa kam Xijãw jõ kên pupun xà nare ata na me gàhtêp. Ne por cõjkwa kam Krĩpinkrên pê Pahpãm tĩr rohnỳtti mã ata jõ krĩ na, ca me gàhtêp. Ne cõjkwa kamkrĩ ata kam, ampeaj kam Pahpãm mã me hàpên catêjê jàhtõa to me hàhtõ, ne me hakrya kam curi me cuprõ. ²³Ne hanea ne Pahpãm na mehkwy ihkõt me ipa atajê, ramã Pahpãm te cahê na me ipa xà caxuw cõjkwa kam, hõ kãhhõc kam me haprỳ nõr atajê na me gàhtêp. Ne hanea ne Pahpãm pê catyt kam, me pahcukij ne ajpên pê me to ipicokjêr catê ata na me gàhtêp. Ne ca hanea ne, por pê ihcunea na catyt kam ajco me

ipa, ne ramã amehtyc atajê na, me gâhtêp. ²⁴Ne hanea ne Jeju te Pahpãm me, me pahte ajpên par to intuwti ata na me gâhtêp. Ne Jeju caprô te ihhêj rûm me pahkên cuhhôn, ne me pahpytâr. Ne pê Aper xwÿ caprô, ihtô te ihcuran jahpan xà na, Pahpãm na cute to kên prãmte ahwÿ. Ne nee Jeju caprô te hajÿr nare. Ne quêt cute mehcunea caprî xà caxuw, Pahpãm na hàhwÿr.

Cu ha nee me pahte Pahpãm par nare na, quê ha ihtÿj me pahto kên

²⁵Cwÿrjapê ca ha nee amji pê Pahpãm jarkwa curê nare, ne quêt kam me gapac to impeaj ne. Pê Pahpãm mam pjê wÿr wrÿ, ne me aquêtjê mã amji cawpa. Pê nee me kam hapac nare, ne cama mehkêanre ton to ajco me ipa, na pê nee jûm Pahpãm te me to kên xà ata pê amjipytâr ne hàhhuc nare. Japu na ri ihtÿj cõjkwa pîn Pahpãm me pamã amji cawpa. Cu nee mempar nare ita kam, cu ha pijamã me pahnõ Pahpãm te me pahto kên xà ata pê amji pytà? Quê! Cu ha pahtÿj me cuxà, me hirôa pê me pahkên mã me acjêj. ²⁶Ne amcro ata kam pê Pahpãm ihcakôc, pê pjê ahcujrô. Ne ita kam ri quêt cute me pamã amji to hÿjahkre to hajÿr he:

— Wa ha nee hipêr ita caxuw pjêê to pit mã ijahcujrôn nare, ne jû caxuw cõjkwa mea mã to ahcujrô — hane. ²⁷Ne pom icakôc xà pê “... hipêr ita caxuw...” ita kôt harên xà te, quê ha Pahpãm cute ampo cunea ton itajê to ahcujrô, ne ihcunea to hamre tu, mâr quê ampo cunea jàhcujrôn te ampo to hamre xà nare atajê, ihtÿj ahtwÿ ne ihcuhhê.

²⁸⁻²⁹Ne quê ha Pahpãm ihhimpej xà krac ri me pamã, me pahkrî xà jàhcujrôn te to hamre xà nare ata gô, cu ha kam me pahkrî rohnÿtti mã. Na cu ha pahtÿj hÿrên me pajakryti na cumã me amji jarê. Pahpãm pêcuhy catia te ampo cunea to hamre xà ata pyrâac, cwÿrjapê cu ha pahtÿjhÿpahti kam, catyt kam cumã cati, ne impejti na me harê.

Ixaher 13.1-25

Cu pahtÿj me ajpên kîn kam me to pancrà to prãm

1 Jowãw 3.17-18

13 ¹Ca Jeju kam ajpên to me akjêjê ita kam, caha atÿj me amã ajpên kîn kam me to acrà tu ne. ²Ne ca ha atÿj mehcahkrit na me amji to pøj kam meto acrà tu ne. Ca ha ate me ita to hajÿr na, ca ha me apê mam me aquêtjê pyrâac, ne pê mehwÿ, kÿj rûm me Pahpãm mã me hàpên catêjê na me hahkre pej narekam, ihtÿj me hÿrkwa kam me ahna amji to pøj. ³Ne ca ha me hacjên catêjê to ma me amji japackre, ne mehtehcajpar to hanea, pom ca ihhêj ne me cahê na me acuhhê he. Ca ha cute me amji pupun to kêanre atajê jamâr to me apa to hanea, pom ca me caa ateme amji pupun xà kêanre to me amji pupun he.

⁴Ne ate me gikwa tuw xà na ateme ajpên par xà atajê, ca ha atÿj amjimã me hÿpahti to me apa. Na ca ha me apê mempjê me, me apê mehprô, ca ha ate mam me ajpên par xà ata na, ma me amji jarkwa to me amji japackre to me apa. Ne nee jÿ caxuw ahti na, me aprô me, me apjê kaj na ate jÿmme ajpên caxun to amji kam me gapac xà hamreare. Ampo na? He quê ha ihtÿj Pahpãm, por jÿm ahti na jÿm caxun to ipa ata, to kêanre ne. Ne hanea ne, por jÿm te amji kam hapac xà xyre kam me pahpahãmti ton to ipa ata, quê ha hanea ne apu to kêanre ne.

Cu ramã me pamã ampo atajê pyrên ri me pajakryti to prãm

⁵Ne nee hanea ne, ame ihpore pit kÿn to me apa ata kam, me gô pore incwÿr xà to pit mã me amji kam gapac to me apa nare. Ne pom ramã me amã ampo atajê pyrên, ca ha atÿj me gakrya na ame apa. He pê Mojxe xwÿ jôkãhhôc kam, Pahpãm ramã me ana ita na amji jarên to:

“Wa ha nee jÿ caxuw me arer nare,
ne nee jÿ caxuw me amã hikran nare” hane.

⁶Pahpãm te me ana amji jarên xà ita cwÿrjapê, cu ha pahtÿj Tawi xwÿ jô kãhhôc kam, cute amji jarên xà ata kôt, me amji jarên to:

“Pahhiti pê Pahpãm pê itehcajpar catê ita kam,
jÿwÿr quê ha jÿm amji mã hamã ne ito kên,
na wa ha nee apu amji mã pa nare” hane.

⁷Ne mam cute me ato ihhimpej catêjê te me amã Pahpãm jarkwa to hahkre na, ca me to amji japackre. Ne cute amji kam me hapac xà me, mehtyc xà na me to amji kampa, ne mehkôat Jeju to amji mã me ahimpej to me apa. ⁸Ne nee jÿ caxuw Jeju Crixto pintuw xà nare. Ne amcro itajê kam, cupê mam Jeju ataa, ne quê ha cormã cupê Jeju ata rohnÿtti mã. ⁹Ca ha nee ite me amã Jeju te amji kam hapac xà pejti to hahkre xà ata kaj na, jÿmjê te me amã ajteare mã ampo pihho to hahkre xà ata kôt, amjikam me gapac nare. He Pahpãm ri hàhcaprã kam, me pamã pahte amji kam me pajapac xà to ihtÿj ne to impej. Ne jÿ wÿr quê me panquêtjê te amji kam hapac xà te me pamã me pajô cawpa xà ata, me pamã me pahte amjikam pajapac xà to impej. Ampo na? Por cute amji mã me hô cawpa xà ata me, me ipijacri xà atajê cunea kôt hamreare.

Jeju ihtÿj me pamã pahte amji kam me pajapac xà to ihtÿj

¹⁰Ne por Krÿpinkrên kam Pahpãm mã mehcajrên catêjê Pahpãm jÿrkwa kam cumã me ampo pry to caxàr to me ipa atajê, ihtÿj cute ampo pry to me ipijapar xà ata to me Pahpãm kam hapac atajêkwÿ ku, mã me hÿ to pit mã

ihțyj, ne nee me cumã caxwãm pê cute amji kam me hapac xà to ihtyj nare. Ne me pa nare, he ihtyj quêt Jeju me pamã pahte amji kam me pajapac xà to ihtyj. Mã nee Pahpãm jũrkwa kam cumã me hãpên catêjê atajê te ahna me pahho xà hamreare. ¹¹Ne Pahpãm mã mehcajrên catêjê jô pahhiti caku cunea jô amcro pyxit kam, cute me Pahpãm to kên jahpan xà na, me ampo pry cura atajê caprô toPahpãm jũrkwa caxwÿn pejti ata mã acjêj, ne Pahpãm mã cupê. Ne por cute me ampo pry curan atajê jĩ to ma krĩ pê me hapôj, ne curia me to capa. ¹²Cwÿrjapê ri cute me ampo pry curan kôpit na, krĩ kaj na Jeju tyc, mãr quê caprô to me pamã me pahkên cuhhô. ¹³Hÿ cu me papê hũràac, ne cuxà krĩ ita kam cute me amji kam hapac xà tũm itajê mã me hikra, ne Jeju kôt pô mã me pahcato. Quê ha me pahpahãmti na me pahto, cu ha nee ame pahpahãm nare. Ampo na? Pê Jejuto me hanea, ne me pahcumam me cumã ihpahãm catia to. ¹⁴Ne me pamã pjê kam krĩ itajê nõ jãhhuc rohnÿtti mã xà hamreare, na cu ha pahtyj cõjkwa pĩn Pahpãm te me pamã krĩ kam me pahkrĩ rohnÿtti mã xà jõr xà ata japê.

¹⁵He Jeju Crixto kôt ri, Pahpãm na me pajãhtêp xà, ne nee cumã ampo pryre to me ipijapar ata jõr xà kôt ahna me pajãhtêp xà nare. Cwÿrjapê cu ha me Pahpãmmã cupê me pajõ Pahhiti cati ne impejti na hũrên me pajakryti na, cumã me amji jarên to me pahcuhhê tu. He pahte me to hajÿr xà ita pê pahte cumã ampo jõr pyrãac, na quê ha ihtyj me pahpyrên hakryti ne. ¹⁶Ne hanea ne gõtpe atyj me ajpên tehcajpar to meajpên to impejti to me apa. Ampo na? He ita te hajÿar ne cupê ate Pahpãm mã ampo jõr xà. Naquê ha hanea ne ihtyj hũrên hakry.

Cu pahtyj me pahto ihhimpej catêjê Pahpãm mã mehcajrên to prãm

¹⁷Na ca ha atyj me akwÿ kam me ato ihhimpejcatêjê krac ri me acjêj, ne me kampa, ne catyt kam ihkôt me apa. Ampo na? He ihtyj cumã jũ caxuw cutePahpãm mã me ana amji jarên na cumã hahkre pej, na ri ihtyj me gamãr to me ipa. Ca ha ate me kam gapac na, quê ha ampeaj kam cute me gamãr xà ita pyrên hakry, nãmri ca ha ate me kam gapac nare na, quê ha cumã amji kĩn nare kam, me gamãr to ipa. He ate me hajÿrxà ita te nee me atehcajpar xà hamreare.

¹⁸Ca ha atyj Pahpãm mã me icajrên kam to acrà tu ne. He ihtyj jũmjê ampo kên na me icãmjĩ cacrô, wa Pahpãm kam mare mã catyt kam me ipa na, me imã amji jahkre pej. Ne me imã ihcunea na catyt kam me ipa kam meto icrà tu na me amji to prãm. ¹⁹Ne wa ha kypê me awÿr nare, mãr ca Pahpãm mã me icajrên, wa me awÿr amji jaxàr to amji to ijãhtũm nare, ne amji jaxà.

Pê Pawrô Pahpãm mã mehcajrê

²⁰⁻²¹Jeju pê me pajõ Pahhiti, ne me pancwÿrjapê ihtyc xà ata kôt ri, cupê carà cahàcre hòhti jamãr catê catia pyrãc, ne cupê me pajamãr catê

catia. He Jeju pê me pahkritxwỳ caprô pijaxwỳr xà ata te ihtỳj Pahpãm te me pahkên pê me pahpytâr rohnỳtti mã na harên. Pê Pahpãm hacpỹa mã Jeju to ihtĩr. Pahpãm te me pahcarĩcti kam ame papa na me pahnton, mãr cu nee ameamji mã ampocupa nare ata mã, wa me acajrên to hane he:

— Me ijõ Inxũ Cati, Juta catêjê pê hanea ne Jeju na mehkwy atajê tehcajpar to impeaj ne, mãr quê ate ampocunea na amji mã to prãmti xà te acajpuaw xà ata to pit mã, me to me ipa. Ne hanea ne akra Jeju Crixto kôt me imã ite amji kam me ijapac xà to impeaj ne, mãr waihcuea na me acajpuaw. Ne me imã mehcunea te akra to acatia to cati na to prãm rohnỳtti mã. Ampeaj kam! — hane.

Ihkàhhôc jicu xà kam cute amji jarên xà

²²Yhỹ Jeju kam me ikjêjê, wa ite me amã ihkàhhôc jatujre ita hôc, mãr ca ite me gapackre xà itajê kam me amã amji kĩa kam, me kam gapac to impeaj ne. ²³He xà ramã me amã, cute me hacjên xà pê me pahkjê pê Timot cator na, me amã hahkre pej? He ramã cute me cator. Na quê ha iwỳr cute uua ne itari cator na, wa ha me ajwar me awỳr me mō ne me apupu. ²⁴Ne wa ha cute me ato ihhimpej catêjê me, me cupê Pahpãm na mehkwy cunea mã me ijõ hàpà kujate. Ne ita ri, me pahkjêjê kwỳ pê Prytikra jō pjê catêjê te me acunea mã me hō hàpà kujahêc. ²⁵Ne imã Pahpãm te hàhcaprĩa kam me acunea to impej na to prãm.

Jeju Na Mehkwỳ Jakrã Cunea Wỳr

TIJAC JÕ KÀHHÔC

ÿhỹ, pê Tijac pê Krĩpinkrên jõ krĩ kam Jeju na mehkwỳ jakrã mehkrĩ atajê to ihmipej catê. Ne cupê Jeju tã te amji to hapu na kjê impeaj, ne cupê Jeju jarkwa namemprar catêjê nõ. Ne pê pjê cunea kam, Juta catêjê te Jeju to amji mã mehhimpej atajê mã hõ kàhhôc ita kujate. Na pê mam hõ kàhhôc ita japrỳ pê Jeju Na Mehkwỳ Jakrã Cunea Wỳr, Tijac Jõ Kàhhôc (Tijac).

Ne pom cu me hõ kàhhôc cahytita kam, pê me pamã ampo pejti to hahkre to hane he. Cu hapahte Jeju to ampeaj kam amji mã mepahhimpej na, cu ha catyt kam Jeju te amji kam hapac xà impejti intuwti ata kôt ame papa.

Pê Tijac me cumã amji jarê

Me Hàpên Xà 12.17; Carati 1.19

1 ¹Hàpà me ikwỳ! Pom me apê Jeju namehkwỳ, ne me apê Ixaher catêjê jakrã te tãxi, ca pjê cunea kam ame apicràn ne ame akrĩ atajê, itea wa me amãihhõc. Ipê Tijac, ne ipê Pahpãm me, me pajõPahhiti pê Jeju Crixto mã ijapên catê.

Cu ha pahtỳj pahte me amji pupun xà kēanre mã me pajūcanār to me papa

Ruc 6.20-23; Roman 5.3-5; 1 Petrô 4.12-19

²ÿhỹ, Jeju kôt pahte ajpên to me pahkjêjê atajê, ca ha hãn ne, ampo te me ato jũ mãnxà kēanre na me amji pupu, ne atỳj hūrên me gakry. ³Ampo na? Pahpãm te me acapi xà caxuw ri hãn ne me amã me akên xà itajê kujate, cute me gahkre peaj prãmte, mōrmō ca ajkĩampeaj kam ihkôt amji kam me gapac to me apa rohnỳtti mã. Ne pom ate me akên xà na me amji pupun ita kam, caha me gūcanār kam me to gãhtàt to me amji pyrác to me apa. Ne ramã ate ita na me amji jahkre pej pejtu. ⁴Na ca ha ate me gūcanār kam me to acrà na, ca ha ma me to amji kà to me mō. Ne ca ha toa me amji jĩ tỳj na, quê ha me acaxwãm pê ate me amji kam me gapac xà kam me apēampo hamre nare, ne ihtỳj me amã ampo cunea Jeju kôt ateme to apa xà caxuw.

⁵Quê ha jüm pê cute amji jahkre pej krã kreti nare, quê ha amji na Pahpãm wÿ, quê ha ihtÿj cumã cute amji jahkre pej krã kreti gõ. Ampona? Pahpãm jãhcãjrëan to hàhcãjrën, ne hàhcãjrëan kãmhãn ne me pahcunea tehcajpa, Jëju kôt me papa xà itana. ⁶Na ca ha me Pahpãm wÿr xà wÿr, amji kam me gapac to me hane he, ne amji mã me garkwa to:

— Wa ha Pahpãm na ahwÿ, quê ha ihtÿj imã ijüparkrã kreti gõ. He wa ihtÿj cute imã hõr na amji mã to hane. Ampo na? Pê ramã taa, ite ahna ijãhwÿr ita na, amji na imã awjahkre — hane. Ne nee ca amji mã me garkwa to:

— Mõrmõ quê ha Pahpãm imã ijüpar krã kreti gõ, nare, quê ha imã hõr nare, pÿpÿn — hajÿr nare. Nãmri cute me hajÿr catêjê pê ri ihhêj rüm kôc te amji wÿr côxwa krã jacjên pyrãac, nare, me cupêihhêj rüm kôc te apu pïhhô incrã to pjê kam imprar, mã cute apu amji jacjên pyrãac. Ne cute amji kam me hapac xà pintuw xi hyre nare. ⁷⁻⁸Ne cute me hajÿr catêjê mã, quê ha nee Pahpãm ampo jõr nare. Ampo na? Mencaca xà te amji jïkjê incire nare. Na quê ha cute me amji kam hapac xà pijakrut jarën to hane he. Quê haihcunea te me cumã impejti na, quê ha me amji mã:

— Quê ha Pahpãm itehcajpar ita na — hane. Nare, quê ha ihcunea me cupê ihkaj na, quê ha me amji mã:

— Ihhêj ne nee Pahpãm mãitehcajpar prãm nare — hane. Na ca ha nee me cuxà ahna me amji mã harën to hajÿr nare.

Me pajakràj me, me pajakràj nare pyrên me pajakry

1 Petrô 1.24-25

⁹Quê ha Pahpãm te me pahkjêjê nõ pê hamreare ata to ihkà, ne to ihtÿj ne to hakràj na, quê ha ihtÿj hakry. ¹⁰⁻¹¹Ne hanea ne me pahkjêjêjê nõ jakràjti ata te hajÿar, quê ha Pahpãm te cupê hakràj ata to incri na, quê ha ihtÿj hanea ne hakry. Ne pom me hakràjti itajê pê ihhêj rüm hòjahkratre rã. Quê ha irã, quê ha amcro tÿj catone ahna cô to, to incrã, quê ha pea ihpÿm. Hõhõ, ita na quê ha me hakràj atajê me hane he, ne cute amji kam me hapac xà atajê cunea jipôc ri me hamre.

Me pahcajpeër xà pyrên me pajakry

Tijac 3.14-16

¹²Nãmri quê ha me pahcunea te me pahkên xà ita kam me to pancrà, ne me pajücanãr, ne me hakren, ne cormã amji mã me Pahpãm to me hajÿr na, quê ha ampeaj kam me pajakry. Ampo na? Me Pahpãm quê ha me pahkên itajê jahpan xà na, ihtÿj me pamã me pahtÿr xà caxuw me pajahĩ xà gõ, cu ha cahê na me pahkrĩ rohnÿtti mã. Ahna mã memprar tÿjti catêjê me he. Ne mehkwyjirõa pê me ajcahu, ne amji mã me hê pejti incwa he. Jïkjê na mã cute hajÿr. Ata to pê Pahpãm cute mehkinti atajê mã awjahkre.

¹³Nāmri, ca ha me anō te amji kam gapac xà to ihcupan na amji cajpěr na, ca ha nee amji mã garkwa to:

— Pahpām te ri imā ite amji kam ijapac xà kên ita ton — hajÿr nare. Ampo na? He nee Pahpām caca xà te hajÿr nare. Jū wÿr quē jūm Pahpām mã ihkên ton na awjahkre, quē harkwa kôt to. Ne hanea ne jū wÿr quēPahpām jūm mã ihkên ton xà na awjahkre, quē to. ¹⁴⁻¹⁵Nāmri quē ha jūm te amji mã ihkên ton to ipa to prām na, quē ha amjia kôt ton to ipa, cute amji kam hapac xàa to. Jirô pê mã, quē ha ihtÿj ihkên mã axà, ne cute ihkên ton atajê jahpan xà nacumã amgõ, ne Pahpām mã hikra ne ty.

¹⁶Ne me ca nare, me ikjêjê impejti kīnti atajê, nee ca ampo itajê nō to, me anōa amji mã ahêj to:

— Pahpām te ri, ite to cupan xà ita na imēn — hajÿr nare. ¹⁷Ampo na? Quêt ampo pejti cunea kam ihkên nare atajêcunea, cōjkwa kam Pahpām pīn me pahwÿr hapôj. Ne Pahpām te cōjkwa kam hàhcujro xà ton ata ri, me pahwÿr ampo pejti itajê cunea kujate. Ne pyt ihtÿj me pamã amcro to, ahna carāre kam. Ne ahnahtūm nare, quē ha ahcacrā ihpro, quē hipēr me pamã amcro ton nare. Ne nee Pahpām te hajÿr nare, ne quêt mepahto impejti ita na, ne nee jū caxuw cute me pahcaxuw amji kam hapac xà kên te ihcupan xà nō ton nare. ¹⁸Ne cute me pamã harkwa kam ihhêj xi nare ita kujahêc. Cu me kampa, cwÿrjapê ri cute me pahto amji kra. Cu ihhêj ne hipēr amepahpÿpÿm, na ri me papê Pahpām kra cakônī.

Cu ha me Pahpām kampa, ne harkwa kôt me ton to me papa

Roman 12.17-21; Epet 4.25-5.2; 1 Jowāw 2.3-6

¹⁹ÿhÿ, Jeju kam me ikjêjê impejti kīnti atajê, ca ha me acunea atÿj me gūparprāmti to me apa, ne me acakôc xà me, me acryc na me apahām jàhtôti to me apa, ne ampo itajê cunea to me amji japackre. ²⁰Ampo na? Ca hān ne me acryc kam pra, ne neePahpām mã me ampo pejti ton nare. ²¹Cwÿrjapê, ca ha me ate amji kam me gapac xà pahām nare, inxyre to ate me amji pyrác atajêcunea jicu. Ne hanea ne ate amji kam me gapac xà kên to me apa xà itajê cunea jicu. Ne quêt amji to me acati prām nare kam, Pahpām jarkwa na meamji to pōj. Ampo na? Nee mã ampo nanare. He Pahpām jarkwa pêampo hy kryjre kre jiprāj atajê pyrác ne ihtÿj ajcamē. Jīkjê na, ca ha Pahpām jarkwa kôt me apa, ne nee me ampo kên itajê ton nare na, ca ha atÿj me apicamēn to me mō.

²²Nāmri ca ha ate amji mã me garkwa to:

— Wa ha itÿj Pahpām jarkwa catia ne kampa, quē ha iteimpar xà atajêa kôt ihtÿj ito impej — hajÿr, ne nee ate ihkôt me amji ton narena, ca ha caa ramã amji mã ahêj. ²³⁻²⁴Ne por me Pahpām jō kàhhôc kampa, ne cama harkwa to me hapac kêt, ne nee me ton nare atajê pê ihhêj rūm me hūmre teirīt xà kam amji kuc na ampo ata kôt me amji pupun, ne memprar kwaa kam me to hapac kêt atajê pyrác. Ne nee cute jū na xà

ata na amji tome amji japackre kam incrà nare. ²⁵Ne Pahpãm te amji kam hapac xà, hãn ne nee mepahte ampo pejti ton tète me pajiprôn nare, ne quêt cama ampo pejti ton na me pahtehcajpa. Ne por me hũmre me Pahpãm jarkwa cahyt, ne nee amji pê me to hapac kêt nare, ne ihkôt me ipa atajê, quê ha Pahpãm ihtÿj cuteme hàpên xà ton atajê cunea kam meto impejti ne.

²⁶Nãmri quê ha jũm te amji mã harkwa to:

— Ipê Pahpãm jarkwa kôt, ihkôt ipa catê — hajÿr, ne nee cute ihcakôc kên tète amji jiprôn nare, quê ha nee cupê Pahpãm kôt ipa catê nare, necama apu ahna amji to ihhêj to ipa.

²⁷Ne quêt Pahpãm pê me pajō Inxũ Cati mã ihkôt ipa catê te catyt kam ipa atajâpên xà te hajÿr he. Quê ha mempijapit me, me huwatĩ pê ampo jamreare, mã tee ame amji to hàhhuc to me ipa atajê, quê ha ihtÿj mehtehcajpar to ipa. Ne me cumã Pahpãm kĩn nare catêjê te amji kam me hapac xà to amji tũm nare. Hôhô, cute me ampo pijakrutton xà itajê na ri, Pahpãm mã nee cute me ampo to ihcupan xà nare, ne mempeaj to mempej.

Cu ha pahtÿj amji mã me cupê hamreare atajê cupa

Roman 2.11; Coroxo 3.25

2 ¹ÿhÿ me ikjêjê, pom ca me pajō Pahhiti pê Jeju Crixto pê hirã pê impej ata to amjimã me ahimpej to me apa atajê, he me pahte mehcunea jirôa pê me pajō Pahhiti cati na me pamã hahkre pej.

Cwÿrjapê ca ha nee jũmjê nô to mehkwy jirôa pê impejnare, ne quêt mehcunea to amji kam me gapac to apipênti to me apa. ²⁻³Quê ha jũm jakràjti, kà impejtime ôr te hũhhi na hê xà ata, ate me acuprôn xà wÿr mō, ca ha me hõmpu ne me hahkre pejpyrentu, ne me cumã garkwa to:

— Ajpên mō, ne ita ri ca gÿr xà impejti ita kam jÿ — hane. Ne hanea nee jũm pê hamreare ata pupu ne me cumã:

— Curia ca xa, nare, ca to jÿ, pjê kam ipar cahê na — hajÿr na, he mōrmôca ramã ate me jũm to hajÿr, na wa me amã ihkôt harê. ⁴Ampo na? He ca me caa, ajte ajpên to amji kam me gapac xà kêanre itajê tonto me apa. Ne amji to me apicokjêr to me apa. Ne ahnaPahpãm pê me akam ihkaj na.

Cu ha nee me cupê hamreare atajê jirô pê, me hakràjti atajê to impej nare

⁵Me ikjêjê impejti kĩnti itajê, me ikampa. Pahpãm te amji mã me cupê hamreare atajê capi, mehkwy jirôa pê cute amji mã me to ihhimpej catia to prãmte. Ne pê ramã Pahpãm cute amji mã mehkĩnti atajê te ihhimpejxà mã mencjêj na, me to awjahkre. ⁶Ne me ca nare! Ca ajte Pahpãm kĩnte me cupê hamreare atajê to amehkêanre, ne ma ame curê, cute jũ mã ame aton nare kam. Ne ca me hakràjti atajê to pit mã mempej.

He me hakràjti itajêa ri ihtÿj hãn ne me amã mehhêj to me ipa, ne megũhkra jãpên xà jahpan xà na me hakràj cati to me ipa. Ne mehhêj xi to ampo cunea na me ato ihtÿj tu to meipa. Ne ma me acukij xà wÿr me ato ipa, cute meakên mã me arên prãnte, ne hipêr mehhêj xia kam me apê me gŏ pore incwa. Xà ajkĩ me cupê hamreare atajê mã me ato hajÿr to me ipa? Hãpà! He me hakràj catêjê ri ihtÿj me ato hajÿr to me ipa. ⁷Ne me hakràj itajêa ri Jeju na mehkwy me, me pajŏ Pahhiti pê Jeju japry to mehcaôc kêanre to me ipa.

⁸Ne Pahpãm pê me pajŏ Pahhiti jŏ kàhhôc ihtÿj mepamã ihhimpej xà ata to hahkre to hane he:

“Pom amãa amji kĩnti ita na,
quê ha amã me akwy cunea kĩnti ne” hane.

Caha ate me harkwa ita par xàa kôt me apa na ri, me amãihkênre nare.

⁹Nãmri ca ha ate pŏ rúm me hũmre itajê pupun xàkôt, me to impejti na, ca ha me ca ramã me akên mã me amji rên to me mŏ. Ate Pahpãm te amji kam hapac xà jirŏ pê me apÿm, cwÿrjapê ri ramãme akên mã me arên to mŏ. ¹⁰Ne por quê ha jũm amji pê Pahpãm te to ihhimpej xà nŏ pyxit ne ihcaca ata, quê ha taa ramã ihkên mã hàr to mŏ. Quê ha Pahpãm jũm ata mã harkwa to:

— Ca ha ate ijarkwa nŏ pyxit ne ihcaca na, ca ha ramã ihcunea caca.

¹¹— Ampo na? Wa ite amã ijũjarên to: “Nee ahti na axy nare” hajÿr, ne hanea ne amã: “Ca ha nee jũm curan nare” hajÿr. Ca ha ate ahti na axy nare cakrô, ate jũm curan na, ca nee ate ipar nare, na ca ha ihcunea na akên mã axà — hane.

¹²Ne Pahpãm jarkwa ihtÿj catyt kam pahte me papa na me pahtehcajpa, na cu catyt kam me papa. Ne nee ame pahcaôc kên to me papa nare. Nãmri quê ha ihtÿj me Pahpãm jũ caxuw pahte amji kam me pajapac xà atajêa na me pahcukij to mŏ. ¹³Ne me pahcukij ne me pahto ipicokjêr xàa kam, quê ha Pahpãm cute mehkwy caprĩ nare atajê, hanea ne nee me caprĩ nare. Ne por mehkwy caprĩ, ne me to impejti atajê, quê ha Pahpãm ihtÿj me caprĩ, ne me to impejti ne.

Cu ha nee me pajarkwa cràre to me pahcaôc nare

Ruc 3.8-14; Me Hàpên Xà 26.19-20

¹⁴Me ikjêjê, ca ha me anŏ te amji jarên to:

— Wa itÿj Jeju to amji mã ihimpej to ipa — hajÿr, ne nee Jeju mã gápên to apa nare ita kam, xà quê ha ajkĩ ihtÿj Pahpãm jũm te hajÿr ata kên pê hũtà? Hãpà! He Pahpãm mã ca nee ihkra pê Jejuata to amji mã ahimpej nare. ¹⁵⁻¹⁶Ne ihnŏ xwÿjê, quê ihhêaj to me pahkjêjênŏ mã prãm, ne cumã ihkà na prãm, ne awÿr cato, ca hacumã ampo jŏr nare ne cama cumã:

— Imã Pahpãm te amã ampo pejti jŏr, ne ato impejti na, ato prãm. Ne imã jũm te amã akã me gŏ jŏr, mã ate gãpãn na, ato prãm — hajÿr, ne nee ihtehcajpar nare na, jũ mã quẽ ha curi? Jũwÿr quẽ ha apu amji mã hamã. ¹⁷Hŏ, quẽ ha jũm te ihcaprÿ na Jeju to amji mã ihhimpej to ipa na amji jarẽn, ne nee ihkŏat amjikam hapac to ipa nare na, quẽ ha nee jũm ata apu amji mã hamãr nare.

¹⁸Nãmri ca ha me anŏ te imã:

— Ca atÿj Jeju to amji mã ahimpej, ne cumã gãpẽn to apa, ne pa nare, wa cama Jeju to amji mã ihimpej to ipa, ne nee cumã ijãpẽn nare — hajÿr na, wa ha amã amji jarẽ ne amã:

— Wa itÿj Jeju to amji mã ihimpej to ipa xã ita jĩkjẽ na, itÿj hanea ne cumã ijãpẽn to ipa. Ne ijãpẽn xã itajẽa ri ihtÿj ikŏt ipana ijarẽ — hane. Ne ca, ca nee Jeju mã hãpẽn xã to gãpẽn nare, mã ahna me apupun nare ita kam, jũ mã quẽ ha me, ne ate Jeju to amji mã ahimpej na me gahkre pej? Jũ wÿr quẽ ha ita na ahna me gahkre pej!

¹⁹Mŏrmŏ ca hãn ne atÿj amji mã Pahpãm jarẽn to:

— Wa itÿj Pahpãm pyxit peaj ne ihtiar na ihkrĩ na, amjimã to hane — hajÿr na, quẽ ha gũjarẽn xã ata nee Pahpãm kŏt apa na garẽn nare. Ampo na? He ihtÿj hanea ne me pahcurẽ xwÿn carŏ kẽn atajẽ me, cupẽ jarŏti atajẽ amji mãPahpãm krĩ na to hane, ne ihtÿj hũpa me cumã ihkãhÿ kry cakrŏ, nee me cupẽ Pahpãm kŏt me ipa catẽjẽ nare.

Pẽ Aprãw Pahpãm to amji mã ihhimpej, na pê ahna amji capa

²⁰Ne ate me amji jahkre kêatre, na wa ha itÿj me amã to hahkre. Nãmri ihcaprÿ na pahte Jeju to amji mã me pahhimpej na me amji jarẽn, ne mepahte cumã hãpẽn xã ton nare ata na ihkaj na. Ne ihcaprÿ na me pahte amji jarẽn xã ata kŏt hamreare. ²¹Na wa ha ampo itajẽ na me amã me panquẽt xwÿAprãw to icato, ne me amã to hahkre. Pẽ Aprãw Pahpãm to amji mã ihhimpej na, Pahpãm mã impejti. Ne mër jũmã pê ajte ne Pahpãm cuna mã impejti? He pê nee jũ mãn nare. Ne ihtÿj, Pahpãm jarkwa kŏt, ajmãr ihkra pê Ixac cura, kẽn jakŏt na. PẽPahpãm hŏmpu, ne ihtÿj cute to amji mã ihhimpej na hahkre pej, na pê ahna amji capa. ²²Ne pom cute ajmãr ihkra curan, mã cute ahnahŏmpun ita, ihtÿj amji caxuw Pahpãm kamhapac pejti na harẽ, ne ihtÿj hanea ne amji mã to ihhimpej na harẽ. ²³Cwÿrjapẽ ri Pahpãm jŏ kãhhŏc kam Aprãw jarẽn to:

“Aprãw te Pahpãm kam hapac,
ne toamji mã ihhimpej to ipa,
cwÿrjapẽ ri Pahpãm cajpuaw,
mã cute ihtÿj ahna amji caxãr,
necumã, ‘Apẽ ikwÿ nõ’ ” hajÿr.

²⁴Ne mër hŏhŏ, ita na me gũcapi to impeaj ne he. Nee mã cu Pahpãm to pahte amji kam me pajapac xã atajẽpit, Pahpãm cuna mã me pampejti na

me pajaxôr nare. Ne quêt cu hân ne hanea ne Pahpãm mã mepajâpên xà ton to me papa atajê ri, Pahpãm cuna mã me pampejti na me pajaxô.

²⁵ Ahnaa mã pê cahâj pijapit xyre pê Rapekwÿj xwÿ ata he, ne Juta catêjê pijakrut pê Krîcuxwati pupun catêjê atajê to ne me hûpa te mehtëm na mehtehcajpa, ne hûrkwa jimoc ri kÿj pê me to amxu, ne me to wrÿ, ne ma jû kam me cute me hahêr catêjê atajê pê mehkujate he. Mã Pahpãm te Rapekwÿj jâpên xà itajê na hõmpun, ne ihtÿj cute to amjimã ihhimpej na hahkre pej, ne ahna amji caxàr.

²⁶ Ne pom Pahpãm to amji mã me pahhimpej xà jarên me, cumã pajâpên nare ita pê ampo kôt hamreare ata pyrâac. Ne ihhêj rûm cupê ramã mehtyc mã carô hamreare pyrâc, ne nee ampo caxuw impej nare, ne ampo na hamreare.

Cu ha me pajarkwa cakôc xà kôpĩ

Epet 4.29

3 ¹ ÿhÿ me ikjêjê, ca ihhêj ne me gâhtôa ne Jeju na mehkwy kam, me cumã ampo to hahkre catêjê na me amji to prãm. Co he, nãmri pahte me ampo to hahkre catêjê atajê, cu ha pahtÿj me pajarkwa to mepahkwÿ to me pahhimpej to me mô. Cwÿrjapê quê ha Pahpãm me pahkwÿ jirôa pê, caxwãm catia mã me pahcukij, ne ma me pahpupu. Ne me pahcukij ne me pahto ipicokjêr xâjô amcro kam, quê ha Pahpãm cute mempejti ton jahpan xà na me cumã mempejti gô, ne cute mehkên ton jahpan xà na quê ha me cumã mehkêanre gô. Cwÿrjapê, ca hanee me gâhtôa ne me apê me cumã ampo to hahkre catêjê nare, nãmri ca ha me anôpyxit te caxwãm catia mã, amji kam gapac to catyt kam apa na, ca ha atÿj apê me cumã ampo to hahkre catê.

² Mêr ampo na mã wa ame amãijÿjarên xà ita to hane? Nee mã wa ampo na ame amã ijÿjarên nare. He cu me pahcunea hân neihcunea na pahkên xà ton to me papa. Ampo to cu hân ne me pahkên xà catia ton to me papa? Me pajarkwa to! Nãmri quê ha jûm te harkwa to ihcakôc kên ton to ipa nare na, quê ha ampeaj kam ihcunea na impej. Nequê ha ihtÿj harkwa himpej xà to amji to ihhimpej to impejti to ipa.

³ Na ca ha me anô cawrôti nô catia jarkwa mã wakÿre incire nô jaxà, ne atÿj jû rito atêm xà ata wÿr to tẽ. Ca harkwa cakrô na to tẽ, ne nee ate to atêm xà ata ri to atêm nare. Ampo na? Quê ha ihtÿj jû kam ato tẽ, ate to atêm xà ata kaj na. ⁴ Ahnaa mã hanea ne côxwa kam pâr kreti he. Quê hate côxwa kam kôc pahtÿjti ihcappêr to môr cakrô, quê ha hõ kam, pĩ po te ihcakrÿn xà incire ata ihtÿj to ihhimpej to mô, porjû ri cute to môr catê te to môr xà ata wÿr.

⁵ Jîkjê na mã me pajarkwa te hajÿar. Ne incire cakrô, ihtÿj amji to hàprâr to catia to ipa. Ne mêr jû mã ca ha krytxwa jakratkryjre ata to amji kam gapac to? He ihkryjre cakrô, ihtÿjpô kam cuhy catia to ne to

pôr. ⁶Jĩkjê na mã me pajarkwa te haj̄yar. Ne me pajarkwa pê ampo kên cunea xakat. Ne mepaj̄ia kam ihcuhhê cakrô, iht̄ȳj me paj̄i cunea mã ihkên crân to ipa. Ne me pajarkwa cakôc xà kêanre atajê hãn ne ampo kên jãhtôa ne to. Necupê ihhêj rûm me pahcurê xwÿn jô cuhy ata pyrãac, ne ampo jãhtôa ne ahna hapÿ ne to kên to ipa.

⁷⁻⁸Ne cu hãn ne ampo pryre me, pryjara me, tep me, ihkênta kwÿ me, ampo kên kwÿ jãhtôa ne me to capô nõ cakrô, jũ wÿrcu ha me pajarkwa ita to me capônÿre ne, quê ihcarĩcre ne. Ne me pajarkwa ita cakôc xà kêanre ita pê ihhêj rûm cagã xwa cacô te me pahcuran xà, ne iht̄ȳj me hàhtôa pê cute me amji kam hapac xà to kêanre to ipa. Ne jũ wÿr quê jũm to ihhimpej quê kêt.

⁹Ne me pajarkwa ita to cu me pajô Pahhiti pê Pahpãm pê me pajô Inxũ Cati mã me pahcakôc to mempejti to mepapa. Ne toa me Pahpãm te amji kôat mehĩ ton atajê xũn kêanre to me papa. ¹⁰Ne me pajarkwa ata pĩn ri ihcakôc xà impejti inxôti atajê hapôj, ne hanea ne hàwxũn xà kêanre xÿhti atajê hapôj. Ýhÿ me ikjêjê, me akam quê nee itajê nõ haj̄yr nare. ¹¹Xà quê ha ajkĩ cõ jatuj xà nõ pĩn iht̄ȳj cõinxô me cõxwa ajcacwa ne ajpjê? Hãpà, jũ wÿr quê apu amji mã hamã. ¹²Ýhÿ me ikjêjê, xà quê ha ajkĩ iht̄ȳj prĩn kam crowrà xõ nõ cato? Nare, quê ajkĩ iht̄ȳj ahkrÿt kam pypypre nõ cato? Quê! Jũ wÿr quê apu amji mã hamã. Ne jũ wÿr quê jũm amji mã hamã ne cõxwa xwati nõ kam cõ inxô jaxà. Mër hõhõ, garkwa cakôc xà to ahimpej pëa to apa, quê nee ihcakôc xà pĩn hàwxũn xà kêanre atajê hapôj nare, ne quêt ihcakôc xà impejti to pit mã ihcakôc to ipa.

Pê Pahpãm me pamã me pahkrã kre gõ

¹³Xà ajkĩ me akam hõtpê jũm jũpar krã kreti te amji jahkre pejti nõ ipa? Quê ihhêaj to jũm te ipa na, quê nee cute amji to cati prãmte apu amji to hàmnãn to ipa nare. Ne por quêt hàpên xà impejti, cuhtactiatajê, quê ha iht̄ȳj hũpar krã kreti na harên to, to ipipê to ipa. ¹⁴Ne ihhêj ne me akwÿ kwÿ iht̄ȳjajpên jũ na ame amji to prãm to me ipa, ne amjia kôtamji to cati to prãm, ne iht̄ȳj jũm te cuna mã amji kam me hapac xà to kên ata to me amji kam hapac to me ipa cakrô, mã iht̄ȳj mempej krã kreti na me amji to ihhêj to me ipa. ¹⁵Nee Pahpãm cute amji kam me hapac xà te haj̄yrjê na prãm nare. Ampo na? Pom cute amji kam me hapac xà itajê nee cõjkwa kam Pahpãm pĩn hapôj nare, ne pjê kam ame ipa atajê pĩn ri hapôj, ne hanea ne mepahpĩn hapôj. Ne me pahcurê xwÿn carõ kên ata pĩn hapôj. ¹⁶Ne por jũ ri ajpên jũ na ame amji to prãm atajê me, amjia kôt amji to me ipicamên prãmcatêjê amehkrĩ atajê ri mehkêanre, ne nee me ajpên parnare, ne ampo kên ton to pit mã, me amji kam hapac to me ipa.

¹⁷Quê ha jũm xũmre te cõjkwa kam Pahpãm pĩn krã kreti te amji jahkre pejti ita pyr na, quê ha hane he. Quê ha mam cati mã cute amji kam

hapac xà cunea kam impejti ne, ne nee apu ampo kên kryjre kwỳ ton to ipa nare. Ne quê ha mehcunea caprĩ to ipa, ne ma ajpẽn tête mehprõn to ipa, ne amji mã mehkwy cupahti to ipa, ne me ahna ihpahãmti to ipa. Ne cuteme ajpẽn par xà kam, hãn ne nee mehkwy cakôc xà na, mempar prãm nõ nare, ne ihtỳj me kampa, ne mehkôt hakop, ne me caprĩ ne mehtečajpa. Quê ha ihhimpej xà ata krac ri me hãpẽn xà cunea impej pit. Quê ha mehcunea toipipẽnti to ipa. Ne nee hũjarẽn kam apu amji to ipimxur nare, ne hirãa pẽhãn ne hũjarẽn jicu xà mã to hahêr tu. ¹⁸Ne por jũm xũmre pẽ ajpẽn kam me to impej catê ata pẽ ihtỳj mehkwy cunea mã catyt kam me ipa na, me ton catê. Ne ihhêj rũm cupê ampo hy kre catê mã amji mã ampo hy ata kre, mã cumã intep, mã cuku ne mehkwy jãhtõa mã to harte ata pyrãac.

Cu ha nee ampo kôt me papijapu nare

Jowãw 16.24

4 ¹Yhỹ me ikjêjê, ca ihhêj nehõtpe me ajpẽn kujtên to me apa. Ampo na? Neemã ampo na nare. He amjia kôt ate amji mã me acaca xà naprãmti atajê, ihtỳj ramã me acaxwãm pẽ hanea ne me acujtê. Ne ramã ate me ampo kên ton xà nare na me amji jahkre pej cakrô, ca atỳj ajte me ampo kên ton to me prãm. ²Ne ca atỳj ampo pej itajê na meamji to prãam kam ame apa cakrô, ca ha neeame amji mã hamãr ne amencwỳr nare. Ne hanea ne ca hãn ne atỳj me hàhcukrêaj kôt mehcuran prãm. Ne cormã me amã ampo kwỳ cunea na amji to prãam to amji toprãm cakrô, jũ wỳr ca ha me cumã acato ne amji mã me apy. Cwỳrjapê ca atỳj ame ajpẽn mã, ne ame ajpu. Ne ampo na ri me apê ampo pej atajê cunea jamreare? Nee mã ampo na nare, ca nee ahna me Pahpãm wỳr nare na ri. ³Ne mẽr ampo na mã ca hãn ne ahna me Pahpãm wỳ, ne nee mencwỳr nare? He ca ahna me gãhwỳr to kãanre, ne cama hãn ne ampo me acajpuaw atajê na pit mã amji mã me ahwỳ. Ne Pahpãm pẽ ahna ihkaj na.

⁴Ne por me cumã Pahpãm kĩn nare atajê, ca nee amehkôt me apa nare. Nãmri ca ha ate mehkôt ameapa na, ca ha ramã amji to apê Pahpãm curê xwỳn. Ca ha ate mehkôt hajỳr na, ca ha nee hipêr Pahpãm cahê na ame apa xà nare, ne ramã me hicu. Ne pomme amã ampo kĩnti kôt me apa xà itajê pẽ ihhêj rũm me hũmre me pyjê te apu amji mã hikran, ne ma ramã ahti na amji to amenxy to ame hikwa to mehcuhwỳr pyrãc. ⁵Ne pẽ Pahpãm jô kãhhôc kam ramã me pahtohũjarẽn to:

“Me pahte hajỳr tũam,
na cu pahtỳj ajpẽn jũ na ame amji to prãm to amepapa” hane.

Ne nee ihcaprỳ na me pahto hũjarẽn to hajỳr nare. ⁶Ne Pahpãm te ita tête me pahhyr xà caxuw, ihtỳjcumã carôt tỳj. He quê ha ihtỳj pahte amji mã

me ampona prãmti ita jicu na, me pahtehcajpa. Ne pê ramã Pahpãm jõ kàhhôc kam ihhôc ata me to hūjarēn to hane he:

“Nee Pahpãm mã cute amji to me cati prãm catêjê kīn nare,
ne ampeaj kam cama me kam incryc.
Ne por cuteamji to me cati prãm nare atajêri Pahpãm mã mehkīn,
ne cumã mehtehcajpar prãm” hane.

⁷Cwÿrjapê ca ha me amã Pahpãm kīn catêjê atÿj me cumã amji gō, quê ha taa me ato ihhimpej. Ca ha me ca xwÿjê ma ame pahcurê xwÿn pê Xatanaj te amji kam hapac xà caca, ne nee Xatanaj to amji mã meahimpej nare, ne ma amji tête amecurê, quê ha me akampa ne ma pra. ⁸Nãmri ca ha ate Pahpãm wÿr meapipkjêr ne mehtêp to me amōr na, quê ha hanea ne Pahpãm ihtÿj me awÿr apkjê ne me anahtêp. Ne ate me ampo kên ton atajê, ca ha me ton jicu. Ne por ate me ampo kên to amji kam me gapac atajê, ca ha me to amji kam me gapac jicu, neampo pejti, tetetti to ca ha me amji kampa. ⁹Ne por ate ramã me ampo kên ton atajê, ca ha me to amji kampa, ne kam me amã amji kīn nare ne, ca hatee hapu na ihcaca xà te atÿj me amrã. Ne nee hipêr ame apicxar nare, ne ca ha cama ameamrã. Ne me amã amji kīnti atajê, quê ha me amã amji kīn nare na amji to, ne me amã amji kīn nare ne. ¹⁰Ne Pahpãm kīnte me pahkryre na, ca amji to me amji japackre. Ne nee Pahpãm mã amji to me gãprār nare, ne cama cute me ato cati xà naamji na me hamã, quê me ato ajcamê, ne me ato cati.

Cu ha nee me pahkwÿ na me pahcakôc kên nare

Ruc 6.37-38; Roman 2.1-3

¹¹Me ikjêjê, ca ihhêj ne me akwÿ te amji kam hapac xà na me hōmpu, ne ahna me gâhcukjêr to me apa, ne ate mehkên mã me irēn prãmte, me ahna acakôc kêanre to me apa. NePahpãm pê ate me akwÿa na acakôc to hajÿr na ihkaj na. Ampo na? Ca ha ate Jeju kam me akjêjê atajê na me acakôc kêanre to me apa na, ca ha ramã Pahpãm te amji kam hapac xàa na me acakôc kên to me apa. Ne Pahpãm te amji kam hapac xà na, nee me pahcakôc kên xàhamreare, ne cama pahte amji mã mempar, ne amji mã me hūpahti to me papa xà. ¹²Ne jūm ata pyxit peaj mã hãn ne me pamã harkwa himpej xà jirê, ne pyxit peaj ne cupê me pahcukij ne me pahto ipicokjêr catê, necupê Pahpãm. Quê ha ihcunea na me pahcukij, cute me pajahkre pej prãmte. Ne taa mã quê ha pyxit peaj ne ihtÿj incaca xàa na mepahpytà. Ne hanea ne incaca xàa na ihtÿj ame pahto kêanre ne, ne me pahto acto. Ne me pahcurê xwÿn jõ cuhy kam cute me parēn xà ata kam, he jū mã cu ha ajte me, ne me apê me akwÿa cukij catê? Jūwÿr ca ha apu amji mã hamã ne me apê mehcukij catê, ne mehcukij ne me pahcurê xwÿn jõ cuhy kam me arê.

Cu ha nee amjia kôt ampo na me amji prâr nare

Ruc 12.13-21

¹³ÿhÿ me ikjêjê, he ramã ihhêj ne me akwÿ te amjimã me hàpên xà capô hiahpuro. Pahpãm to ate me amji kam me gapac nare kam, ate ahna me amji jahkre pej hiahpuro, ne ate ahna me amji jarên to me hajÿrhe:

— ÿhÿ, apê na wa ha ma krî nõ wÿr tẽ, ne curia apu apê, ne amji mã ihpore catia ne cupy, ne kaam to ipixô to mō. Quê ha ina caku pyxit, wa ha hacpÿa ne amji jaxà ne ijakràaj to ijakràj. Hōhō, ijàpên xà ita to wa ha hane — hajÿr. An! Hewa ha cormã me amã cute hajÿr xà itajê to hahkre!

¹⁴Xà ajkî me amã ajpên apê mō ita kam, ate amji kam me gapac xà jahkre pej? Hãpà! Pahpãmmã ri quêt ajpên me apÿpÿm pêa mã me ate amjikam me gapac xà itajê cunea jahkre pej. Ne cumã me pancaca xà ita pê ihhêj rÿm ahcakÿmte iràrà na apu hapôj ne ahcakÿmti, ne ahna amcro, mã apu hamre. Ita na ri Pahpãm mã me acaca xà te hajÿr, ne cumã hatujre.

¹⁵Cwÿrjapê ca ha me gápênxà to amji mã me ahimpej xà ata kam Pahpãm to me amji japackrea ne, ne me ca me amji mã me garkwa to:

— Quê ha Pahpãm mã ijàpên xà ita na ito prãm na, wa ha itÿj itïar na ijàpên xà ita to ijàpên to ipa — hane.

¹⁶Hō, ca ha me amji kampa, ne meamji jarên to hane, quê ha ahna me amã ihkênre nare. Ne pom ca amji to me acati prãm ita na, Pahpãm pê ihkaj na me akam. Ampo na? Ca cama ame amji to me gãmnan to me apa. ¹⁷Ne ramã me amã ampo pej pit ton jahkre pej cakrô, ca ajte nee me ton nare. Co he, nãmri Pahpãm mã ate me ampo pej ton nare ita na cupê me akam ihkaj na. Cwÿrjapê ca ha me ton nare, ne atÿj me akên mã me axà.

Cu ha nee me hakràjti atajê jÿ na ame amji to prãm nare

Ruc 12.13-21; 1 Timot 6.9-10

5 ¹Ne me gō krî kam me hakràj catêjê kwÿ amehkrî atajê mã, nee Pahpãm pynâr prãm nare, na ri nee me cupê Jeju na mekwÿ nare cakrô, ca ajte atÿj hÿ na ame amji to prãm. Co he, ame hajÿr nare! Nãmri wa ha itÿj me cumã icakôc to hane he:

— Pom me gакràjti atajê, me ikampa, ne me ikamgapac to impeaj ne. Nãmri ca ha atÿj me akên mã me axà, ne kam me amji pupun xà kèanre to me amji pupu, cwÿrjapê ca ha me acwÿr kam me atêm pyrentu.

²Nãmri me gакràj ita ramã me apê ipictor to mō, ne me akã impejti itajê ramã rôrôtre me apê ihkur to mō. ³Ne me gō pore carôt ramã cupê hamre to mō. Ne wakÿre pràti pê ôr me wakÿre prà jakare to me gакràj atajê, ramã cama hikwa, mã carôt jamre to mō. Por ca ate awejxà caxuw amji mã gакràj itajê cunea to cuprôn, ne hakôt mã ihkrî ata, ramã hamre to mō. Ne nee me gакràjti itajê mã me atehcajpar prãm nare, mãcama

Pahpām mā me garēn kēanre to me garē. Ne me gakrāj ita pê ihhêj rŭm cuhy pyrāac, ne ihtÿj ampocunea na hapÿ ne to capa. Jĭkĵê na, quê ha ihtÿj gakrāj ita ato hamre.

⁴— Ne ampo na mā quê ha ato hane? Nee mā ampo na nare. He ate gō pur kam me hâpên catêjê atajê mā gāmjōr to impej nare kam, me cumā ahêj. Ne ate hanea ne me cupê me hō pore cahhur juwahi, ne to cuprōn atajê ihtÿj Pahpām mā carār ne cumā me garē. Ne pom me gō pur kam me amā me gō cunea to cuprō atajê, ihtÿj meana ihcakôc kēanre. Ne ihcakôc xà atajê ma Pahpām wÿrramā hâpir. Mā Pahpām, mehcuneaajirôa pê carôt tÿjti ata te kam hapac.

⁵— Ne ita ri, pjê kam me amā ampo pejti atajê to ca ame gicot, ne me acajpuaw, na ca ame gakry. Co, nāmri me apê pryitia pyrāc, ne ampeaj kamramā me gicot, me acuran xà caxuw! ⁶Ampo na? Nee mā ampo na nare. He ca ate jŭ mā cute ame aton nare, ne nee cute me apê amji pytārnaire atajê kên mā ame irēn, ne amehcuran, cwÿrjapê quê ha Pahpām ame ato kēanre ne — hane.

Cu ha Pahpām mā mehcakôc kam Jeju cator xà jĭkaj

2 Petrô 3.1-13

⁷ÿhÿ me ikjêjê, ca ha amji mā me aprĭa ne me pahwÿr me pajō Pahhiti cator xà ata na me hikaj. Nāmri taa mā quê ha cormā me pamāajtea mā me pajakrājxà ata gō, quê ha quêt nee jŭ caxuw me papê hamre nare. Xà ca ajkĭ nee pur kam, cute me ampo hy kre catêjê atajê pupun nare? Quê ha pur kam hâpên jipêj, ne amji mā ihprĭa kam cormā ta me hàprâhti ata jĭkaj. ⁸Ita cuxà ca ha me hane, ne me amā amji kĭan kam, amji mā me aprĭa ne cormā me gŭcanāar kam me hikaj. Ampo na? He ramā hacpÿ ne me pajōPahhiti pê Jeju cator xà ata na hàhtêp to mō.

⁹ÿhÿ me ikjêjê, nee ca me akwÿa kwÿ mā, me gâhcahhôn to me apa nare. Nāmri ca ha ate me amji kwÿa kôt harēn to me hajÿr na, quê haPahpām pê me pahcukij catê me akampa, ne hahpanxà na ame ato kēanre ne. Neramā cute me pahcukij xàa kam hàhhuc to mō. Quê ha cute mempejti ton jahpan xà na, me cumā mempejti gō, ne cute mehkên ton jahpan xà na, quê ha me cumā mehkēanre gō.

¹⁰Ne ita to ca ha quêt me amji japackre. He pê Pahpām jarkwa to me cumā ihcakôc catêjê me amji pupun xà kēanre, ne ihtÿj amji mā mehprĭa ne ajco me hŭcanār to me ipa. Atajê te amji kam me hapac xàca ha me hŭnā, ne me to amji japackre ne ihkôat me apa. ¹¹Quê ha jŭm te amji pupun xà kēanre ata kam hŭcanār, ne nee amji tēte Pahpām jiprôn nare na, quê ha ihtÿj ampo kên itajê cunea jicu xàa kamampeaj kam hakry to hanea, pom quê Jo xwÿ he. Pê amji pupun xà kēanre to ajco amji pupun to ipa, ne hĭcu xàa kam Pahpām te tapan to kēnre nare. Ampo na? Pahpām mā ampeajkam me pahkĭn, na ri ihtÿj cumā me pahcaprĭ.

Cu ha nee ihcaprÿ na Pahpãm japrÿ to me pahcakôc nare

¹²ÿhÿ me ikjêjê, he cormã ampo itajêto hahkre xà kwÿ jirôa pê impej ata cator xà. He ihhêj ne me pahkwÿa kwÿ hãn nemencaca xà na me amji ton xà atajê kam, hãn ne ihkaj na cõjkwa kam Pahpãm japrÿ to mehcakôc ne hãn ne me:

— ÿhÿ, wa ha itÿj to, nãmri wa ha ite ton nare na, quê ha hapacta ne Pahpãm incwÿrjapê ito kên — hane, nare, ca ha me anõ amji jarên to:

— Quê, wa ha nee ton nare, nãmri wa ha ite ton na, quê ha hapacta ne Pahpãm ita cwÿrjapê ito kên — hane. Neate me amji jarên xà ita na ihkaj na, Pahpãm pê. Ampo na? Ca ihcaprÿ na haprÿ to ame acakôc, ita na cupê ihkaj na. Na ca ha quêt ahpÿanre na catyt kam me amji jarên to hane he:

— ÿhÿ, wa ha to — hane, ne atÿj ate ahna me amji ton xà ata na me to. Nare, ca ha me amji jarên to:

— Quê, wa ha nee ton nare — hane, ne atÿj ate ahna me amji ton xà ata na nee me ton nare. Ca ha ate me amji jarên to hajÿr na, quê ha nee Pahpãm me acurêmã me amên nare.

Cu ha ampo cunea na Pahpãm to amji japackre

¹³Quê ha me anõ te amji pupun xà kêanre kam ipa na, quê ha ihtÿj Pahpãm mã ahna amji cajrên to prãm. Ne quê ha jùm te hakryti na, quê ha taa cumã amji kïan kam Pahpãm mã hakryti jõ increr to increr to prãm.

¹⁴Ne quê ha jùm te hà na, quê ha taa me pahkwÿto mehhimpej catêjê kwÿ na amji mã ahwÿ, quê ha me hõmpu, ne me kam ampo cacô te mecaprãr xà ata kwÿ jaxwÿ, ne me to impê, Jeju jarkwa himpej xàa kôt, ne me cumã ihcajrên. ¹⁵Ca ha me to hane ne Pahpãm caca xàa kôt me to ne cumã mehcajrên, quê ha Pahpãm me akampane jùm ata caprã. Ne cute ihkênton xà ata to cumã impej, ne to tojnõ, quê ha impej.

¹⁶Cwÿrjapê cu ha pahtÿj pahte me pahkên ton xà atajê ajpên mã me harê, ne Pahpãm mã me ajpên cajrên, mâr quê pahte me ajpêncajrên xà ata kôt, ihtÿjme pahcaprã. Ne quê ha me pahnõ te catyt kam ipa, ne Pahpãm mã ihcakôc xwÿjrea na amji kam hapac to impejti, ne cormã cumã ihcakôc, quê ha ihtÿj Pahpãm kampa, ne cumã ahna to.

¹⁷Ahnaa mã pê Erij xwÿ he. Ne cupê me pahkwÿa xùmre nõ, ne cupê Pahpãmjarkwa to me cumã ihcakôc catê. Ne Pahpãm mã ihcakôc xà caxuw amji kam hapac toimpejti, ne cumã ta wrÿc nare na to ihcakôc, cute mehkênton atajê jahpan xà na, pê kampa, neta nõ to iwrÿc nare to caku to incrê ne ihkôt to híkjê. ¹⁸Jirô pê mã pê hipêr cumã ihcakôc, pê kampa ne ta to wrÿ, pê hacpÿa mã pjê cunea kam ampo xõ cunea huprãj cato. Hõhõ, ca ha me hane.

¹⁹Me ikjêjê, quê ha me pahnõ te Pahpãm jõ pry hyr ne cupê gũjawry na, ca ha me anõ hacyã mã Pahpãm jõ pry pynãr xà caxuw to amji jaxà, ne pry kam amẽ. ²⁰Ampo na? Quê ha jũm te, por cute ihkên ton catê nõ ata to hõ pry kêanreata pê amji jaxàr na, quê ha jũm kên ata te ihkên mã hàr, ne ihtyc xà ata japy to amjijaxà, ne cute ihkên ton ata jicu na, quê ha Pahpãm ihkên ata to tojnõ, ne to hapac kêt. Ỹhỹ, ite me amã ihhóc xà ita pit. Hamre.

Jeju Na Mehkwỳ Jakrã Cunea Wỳr

MAM PETRÔ JÕ KÀHHÔC

Ỡhỹ, pê Petrô pê Jeju jarkwa na memprar catêjênõ. Ne pê mam cupê teppro catê. Pê Jeju cupê ihkôt ipa catê na ahna ahwỳ. Ne cõjkwa wỳr Jeju jàpir jirô pê mã ri, cupê Krĩpinkrên kam Jeju na mehkwỳ mehkrĩatajê to ihhimpej catêjê nõ. Ne pom cu me hõ kàhhôc pijakrut cahyt ita, pjê cunea kam Jeju na mehkwỳ te me amji pupun to kêanre atajê mã pê ihhõc ne kujate. Na pê hõ kàhhôc ita japrỳ pê **Jeju Na Mehkwỳ Jakrã Cunea Wỳr, Mam Petrô Jõ Kàhhôc (1 Petrô)**. Nepahte me amji pupun xà kêanre ita te me pamã pahte amji kam me pajapac xà to impej, ne to me pamã hahkre.

Pê Petrô me cumã amji jarê
Jowãw 1.40-42; Me Hâpên Xà 1.15; 10.1-48

1 ¹Hâpà me ikwỳ pê Pahpãm na mehkwỳ! Ipê Petrô, pê Jeju Crixtojarkwa na iprar catê. Por jũm te me gõ pjê intêteame acràn, ca jũ ri ame akrĩ atajê mã, wa ite apu ihkàhhôc itajê ton. Ne wa ha maPonto jõ pjê me, Carati jõ pjê me, Cawrõpejti jõ pjê me, Axij jõ pjê me, Pitin jõ pjêwỳr, me awỳr apu ihkujahêc pa.

Pê Pahpãm me pahcapi
Ruc 12.32-34; Roman 8.18-25

²Pê Pahpãm pê me pajõ Inxũ Cati ramã cute amji mã me pahcapi xà na amji kampa. Na pê amji mã me pahcapi, ne me pamã Carõ Pejti gõ, mãr cu mepapê mehkwỳ impej pit, ne catyt kam, Pahpãm kôt me papa. Ne mēr ampo na mã cute me pahto hajỳr? Nee mãampo na nare, mãr cu xwỳ mã ampeaj kam, amji mã me ihkra pê Jeju Crixto kam me pajapac pejti ne. Ne me pajaxà kam ihtyc xà ata pê ri ihhêj rũm cute caprô to me pahkên pê me pahcuhhõn, ne me pahto impej. Ne me pahto impej xà caxuw ri, cute amji mã me pahcapi. Ne wa ijõtpe Pahpãm mã me acajrên to hane he:

— Ỡhỹ, Inxũ Cati, ca ha me pahkwỳ atajê mã, ate amji kam gapac xàa na, me to impejti to apa. Ne me caxwãm pê me cumã acarĩcti gõ, mãr ca,

cute nee me amji mã ampo cupa nare ata to, me cumã apicamên to mō, mār quê nee ame hūpa nare — hane.

Pê Pahpām ramā me pamā ampo pej jàhtôa ne to ahcuprô

³⁻⁴Cu ha Pahpām pê me pajō Pahhiti pê JejuCrixto Pām mã, hūrên mepajakryti na me amji jarê. Ne ampeaj kam ri cute me papê mehkwy to impeaj to impejti xà ita te hajÿr he. Cute me pahcaprî to catia, na ri cute mepamā pahte amji kam me pajapac xà tuwti pejti jōr, na ri me papê mehkra. Ne hanea ne cute hacpÿa mã ihcāmter pê Jeju Crixto to ihtîr xà ata kôt ri, cute me pamā pahte amji kam me pajapac xà tuw jōr, mār cu cahê na me pahkrî rohnÿttimã. Ne ramā Pahpām te cōjkwa kam, me pamā ampo pejti te me pahto impejti xà ata jàhtôa ne nōr. Ne ihtÿj ma me pamā hamã, mār quê nee jūcaxuw me papê carôt hamre, ne ihkên ne ihcacu, ne ipictor nare. Ne cu ha pahtÿj cute me pahto hajÿr xà ata to, amjimã me to hajÿar kam me hikaj. ⁵Ne pahte me Jeju to amji mã pahhimpej xà ita kôt ri, cute me pamā ampo pejti itajê cunea jōr itajê pê, me pahtekjêa ri. Cwÿrjapê quê ha Pahpām me pajamār ita na, quê ha ahnaa jū caxuw, pjê jamre xàata kam, amji carôat kôt amji mã me pajuwahi.

Pahpām te me pahcajpêr prāmte ame pahto kên

⁶Ampo pej itajê pyrên, ca ha me gakrya ne. Ne amcro itajêa kam, ca cormã ate me amji pupun xà kēanre to me amji pupun to me apa na, hōtpê me anaamcro wênre, na ri me amã amji kîn nare. ⁷Ne mēr ampo na mã ampo kên itajê ame ato hane? Nee mã ampo na nare. Cute me acapi, ne ahna me acajpêr prāmte ri ame ato hane. Na wa ha itacaxuw me amã kên prà tepti japrÿ te ôr ata te amji kam hapac xà kôt harê. He hūhhi na hê xà ton xà caxuw, quê ha xa cute ton catê ata, cute wakÿre prà tepti pê ôr ata capi prāmte, cuhy kam cuxi. Quê ha ajgã, neihhorhot, quê ha hōmpu, xà ajkî ampeaj kam ri cupê ôar to ôr. Nāmri quê ha cupê wakÿre prà tepti nare na, quê ha ihcunea capa. Nāmri quê ha cupê wakÿre prà teptia na, quê ha ihhorhot, ne kam ampo kên itajê pit capa, ne ihcahur ahtwÿ ata pê, quê ha wakÿre prà tepti pê ôar to ôr, ne ampeaj kam impej, ne ahna hî ahwÿ. Ita jîkjê na mã, me apê wakÿre prà tepti ita pyrãac, ne ate me amji pupun xà kēanre itajê pê ihhêjrūm, cute cuhy kam me wakÿre prà tepti nōr pyrãac, cute me apupun, ne me gahkre pej xà na. Ne quê ihhêaj to cormã me ate amji kam me gapac xà kamampo kēanre na, quê ha me ate amji pupun xà itajêa kôt, me apê me akên itajê to pōj partu ne. Ne wakÿre prà tepti itajê ampeaj kam ahna hî jàhwÿr cakrô, quê ha ihtÿj hamre to mō, ne ihtÿj jū caxuw hamre. Ne Jeju toquêt ate amji mã me ahimpej xà ata ri, kên prà ata jirôa pê impej, ne neejū caxuw me apê hamre xà nare. Na quê ha amcro nōna, Pahpām Jeju Crixto to ajpê, quê

ha mehcunea ampeaj kam cupê ampo cunea jõ Pahhiti na hahkre pej. Ne amcro ata kam, quê ha Pahpãm me amã:

— Ca ate me amji pupun xà to kêanre itajê kôt ri, ita caxuw ampeaj kam me apej — hajÿr xà ata kôt, quê ha mehcunea ihtÿj amji mã me acupa, ne me apejti jàhcujrohti na me apupu.

Pahte me amji pupun xà kêanre xà ita kam, cu ha pahtÿj ame pajakry

⁸Cormã nee ate me Jeju pupun nare cakrô, ca ha atÿj me amã ihkĩnti kam me apa. Ne nee cormã ita kam, ate me hõmpun nare cakrô, ca ha atÿj amji mã me to ahimpej to me apa. Ne hÿrên ca ha me amã amji kianto amji kĩn catia to cati, ne nee me amã me gakryti ita kôt harên xà hamreare, ne cupê cõjkwa kam amehkrĩ atajê jakryti pyràac. ⁹Ne mër ampo na mã me amã amji kĩn? He nee mã ampo na me amã amji kĩn nare! He Jeju ihtÿj ampo kên catia ata pê me acaxwÿn pytàr to ipa, ne hÿrên ca ame gakry. Ca Jeju to amji mã me ahimpej to me apa xà atakôt ri, cute me apytàr, na ca ha atÿj jÿ caxuw Pahpãm cahê na me apa rohnÿtti mã.

Pê mam harkwa to mehcakôc catêjê nee ihcunea na me hahkre pej nare

¹⁰⁻¹¹Pê ramã rÿ pêa mã Pahpãm jarkwa to mehcakôc catêjê me cumã amjia kôt, me pahkên pê me pahcunea pytàr catê ata kujahêc na, me cumã harê. Pê Crixto Carõ Pejti me caxwãm pê me cumã acjêj, ne ajco me cumã cator xà ata jarê. Ne hanea ne me cumã, por quê ha Crixto cute amji pupun xàkêanre to amji pupun xà ata jakàn pê, quê ha Hÿm hacpÿa mã to ihtĩr, ne hipêr to cati, ne to imej na, me caxwãm pê me cumã harê. Mã cute me hahkre pej prãmte, amji mã mehprĩa, ne ihtÿj me to hahkre to me mō. Ne ihtÿj me ahna hàhcukjêr to me mō, jÿ caxuw mã quê ha cato, nejÿ mã quê ha cator xà ita. ¹²Ne pê Pahpãm cute me cumã harkwa to mehcakôc catêjê mã, ampo itajê to hahkre xà ata kam, hanea ne cute me to pit mã, imejti xà caxuw, me cumãharên nare. Ne pom ca ita kam ame kampa atajê to, cute imejti xà caxuw riame cumã harê. Ne cõjkwa pĩn, Pahpãm Carõ Pejti carôat kôt Jeju pê me pahpytàr catê na, me hÿjarên pejti jarên to memprar catêjê te, ramãampo itajê cunea to me amã hÿjarên. He cõjkwa kam Pahpãm mã memprar catêjê te me hajÿar, ne tee ame hahkre pej to prãm.

Pê ajteare mã Pahpãm, ne imej, na cu ha cuxà me pampej pit

2 Petrô 3.10-13; 1 Jowãw 3.1-6

¹³Cwÿrjapê ca ha me akrã kam, ate Pahpãm jarkwa kam me gapac xà caxuw me amji to gâhcuprõnhiahpuro, ne me guphêa rÿm ate amji kam me gapac xà to amji kam gapac tome apa. Ne Pahpãm te Jeju Crixto to ipipê xà me, cuteme ato imejti xà itana, ca ha atÿj me hikaj to me acrà

rohnýtti mã. ¹⁴Ca ha atýtj Pahpãm kam me gapac to me apa to hane, pom quê me ahkrare me hũmxwỳ kampa he. Ne nee ca mam ate me amji jahkre kêt kam, ate amji kam me gapac xà kêanre to, ate amji kam gapac to me apa xà ata to, hacpỹ mã me amji kam gapac, ne ihkôt me apa nare. ¹⁵Mã Pahpãm pejti pê catyt kam ipa catê ata te me ato ihkra xà na, me ana hàhwỳr. Cwỳrjapê ca ha Pahpãm cuxà me apê ampo cunea kam, catyt kam me apa catêjê, ne nee ampo kên crire nō to, me amji kam gapac nare. ¹⁶Ampo na? He pê ramã Mojxe xwỳ Pahpãm jarkwa na, hō kàhhôc kam mehkwy na ihhōc to hane he:

“He ipê me amã catyt kam ipa catê,
ne wa ajteare mã, ne ipejti.
Cwỳrjapê ca ha hanea ne,
icuxà me apê ajteare mã,
ne catyt kam me apa,
ne me apejti ne” hane.

¹⁷Ca ha me Pahpãm mã acakôc, ne mehcukij to:

— Me ijō Inxū Cati — hane. Ne cormã cōjkwa kaj naame apa xà ata kam, ca ha atýtj amji mã me Apãm ita cupahti ne. Ampo na? He quê ha ihtýtj jũ caxuwme pahcunea cukij, ne me pahte me ampo cunea to me pajàpên xà atajê jahpan xà na, me pamã amgō. Ne catyt kam me pajàpên xàa kôt me pamãamgō. Ne pahte me pajàpên xà impejti ton catêjê, cu ha impejti to me amcwa. Ne pahte me pajàpên xà kêanre to me pajàpên catêjê, cu ha ihkêanre to me amcwa.

Jeju te caprô to me pahna hãmjôr

¹⁸Pê mam me panquêtjê te amji kam me hapac xà kôthamreare atajê kôt pit mã ajco ame papa. Ata jahpan xà na ri ihhêj ne Jeju jãmjôr. Ne cute amji kam me pajapac xà kêanre ata pê me pahto cator. He xà ajkĩ hãmjôr xà ita pê ihpore, nare, cupê wakỳre prà tepti pê ôr na hĩ jàhwỳrti ata? Nare cupê wakỳre prà jakati na hĩjàhwỳrti, mã hanea ne ramã cama hamre to mō ata pyrãac? ¹⁹Hãpà, nee cupê ampo itajê nō nare. Cute me pahna ampo cunea jirôa pê caprô na hĩ jàhwỳrtiata jaxwỳr, ne toa ri cute ihhêj ne me pajũhkàr. Pê mamme panquêtjê amji jaxà kam me carà cahàcre hòhti kra capēnti atajê to me amji kritxwỳ, nemehkên atajê jahpan xà na mehcura. Ata pyrãc pej na mã Jeju Crixtó te amji kam hapac xà capēnti, ne cupê carà cahàcre hòhti kra nōcapēnti ata pyrãac, ne cute me pahna caprô na hĩjàhwỳrti ata jaxwỳr, ne cute caprô jaxwỳr xà ata pê ri me pahkritxwỳ pyrãac. ²⁰Pê Pahpãm cute pjê ton xwỳjre na, ramã me pahkritxwỳ na Jeju capi ne hãm. Ne curmã ri amcro itajê nō kam, cute me amã ihkra te ihcunea na me ato impej partu xà caxuw ri,

me amã to ipipê. ²¹Pê Pahpãm hacpÿa mã to ihtîr, ne ma cõjkwa wÿr to api, ne to cati, ne ampo cunea jipy hãm, ne toimpej. Ne Jeju kõt ri, ate amji mã me Pahpãm to me hajÿr xà ata to, kypê amji mã me ahimpej to me apa nare. Na ca ha atÿj jũ caxuw cute meato impejti xà ita na, me hikaj.

Pê Pahpãm jarkwa pahte amji kam me pajapac xà cuhõ

Ruc 8.11-15; 1 Timot 3.14-17; 1 Jowãw 3.14-17

²²Ne ca ramã ita caxuw Pahpãm jarkwa pejti, hêj xi nare kam me gapac pejti to me apa. Ne ramã ihkõt hanea ne ate amji kam me gapac xà cunea toihtetetti ne me to impej. Ne ca ramã Jeju kõt ate me ajpên to me akjêjê atajê me, ca ramã ame ajpên kînti to me apa. Cwÿrjapê, ca ha me amã ajpên kînti ita na, me amã ajpên kîn prãam kam ame ajpên kîn. ²³Ne por pê cu me pahcunea me panxyrxwÿ pîn ame pajapôj atajê, quê ha ihtÿjame ty, na cu ha hanea ne pahtÿj ame ty. Ne Pahpãm nare. Quê ha Pahpãm harkwa tîar rohnÿtti mã ata kõt, jũm mã cute amji kam hapac xàtuw jôr na, quê ha cupê hacpÿa mãihpÿm ata pyrãac, ne nee jũ caxuw caxwÿn ihtyc nare. Quê ha cupê Pahpãm tîr rohnÿtti mã ata kra, ne nee cupê me panxyrxwÿ tyc atajê pyrãac, ne ihtyc nare. ²⁴Ne pê ramã Ixaj xwÿ Pahpãm jarkwa na, hõ kàhhõc kam, me ahna ihhõc to hane he:

“He pjê kam ame pahcunea ame papa itajê pê ihhêj rûm ahtu pyrãac, ne pahte amji kam me pajapac xàitajê pê pîrã pyrãac.

Ne quê ha jũ caxuw ihtÿj ahtu ata incrà,

quê ha hanea ne pîrã ata incrà, neihpÿm.

Ata jîkjê na mã me pahcunea te me hajÿr pit,

na cu ha pahtÿj ame ty ne me pajamre,

quê ha pahte amji kam me pajapac xà cunea hamre tu ne.

²⁵Ne me pajõ Pahhiti jarkwa te nee hajÿr nare,

ne quêt hikwa rohnÿtti mã,

ne nee jũ caxuw ihkên,

ne ihkõt hamre xà nare” hane.

Ne harkwa hikwa rohnÿtti mã ata to pê Jeju pê me pahpytâr catê jarkwa na memprar catêjê me amã harê.

Cu ha Pahpãm te amji kam hapac xà na me ahcukij

Epet 2.19-22

2 ¹Cwÿrjapê, cu ha nee hipêr Pahpãm jarkwa pejti ata jirô pê ame pahpÿpÿm, ne ame ampo kên ton to me papa nare. Ne cu ha nee me pahhêj xi jarên nare. Ne cu ha aracri me cupê to me papimxur pej pêa mã, hipêr me ampo kên tonnare. Ne cu ha nee me hũ na ame amji

to prãm nare, ne nee ame hũn to me papa nare. ²Ne curmã me ahkrare kwỳ pỳpỳm atajê mã ihtỳj menxyrxwỳ kà xen, mã me cacô to pijahô, ne mehka cacô ata to ihtỳj me ipicamẽn to memõ. Ita jĩkjê na mã, me ate me hajýar. Na ca Pahpãm mã ihhêj ne curmã ame apỳpỳm, ne cormã kyre pê amji mã me to ahimpej to me apa. Ne Pahpãm jarkwa ata pêihhêj rũm mehka cacô pyrãcti, na quê ha me amã hãan to hãn. Ne harkwa kôt me apa xà ata pê ihhêj rũm mehka cacô to ate ame pijahôr xà, naquê ha ihtỳj me ato ipicamẽn to mõ. Na ca ha atỳj jũ caxuw ampo cunea na Jeju kôt me apa. ³Pê Tawi xwỳ ramã Pahpãm jarkwa kôt, hõ kàhhôc kam, ate me hajýrjê na ihhôc to hane he:

“Ate ramã me pajõ Pahhiti te me ato impejti xà ita cajpěr,
ne me hahkre pej” hane.

Jeju me, me papê mehkwy pê Pahpãm jũrkwa pyrãac

⁴Ne ikre pyxwỳr catêjê pej, hãn ne ikre caxuw, me hicjêcti pej pit capi, ne hanea ne me ihhê kwỳ cunea impej pit capi. Nare, quê ha me cumã kẽn to ikre xãm prãm na, quê ha me cumã kẽn cuhtac nõimpejti xi, hõxwahhi kam, ne ikre cahhur caxuw quê ha hanea ne kẽn pej pit capi ne to cuprõ. Jĩkjê na mãPahpãm pê cute me ikre pyxwỳr catêjê atajê pyrãac, ne mehkwy caxuw cute me acapi, ne Jeju na me ato cuprõn. Ita na mã me cupê ikre pyxwỳrcatêjê te amji jahkre kêatre atajê, ma apu amji pê pĩ jicjêc pejti ata caca, ne cute me mẽn. Jĩkjê na mã me cupê Ixaher catêjê jõ pahhi kwỳ, ma ame amji pê Jeju caca. Mã quêt Pahpãm te cupê mehkwyjõ Pahhiti pê ihcunea na hãmkrã jãmtãr cati ata capi.

⁵Ne hanea ne ikre pyxwỳr catêjê pej te amji mã pĩ pej me, kẽn pej pit capi, ata jĩkjê na mã Pahpãm te, cute me ato amji kwỳ xà caxuw meacapi. Cwỳrjapê ca ha cama amji na me hamã, quê ha me ato amji kwỳ peaj, ne mār quê me akôt me hàhtõa ne me Pahpãm jahkre pej. Na ca ha me apê, por mam Pahpãm te amji kam hapac xà jũrkwa na kẽn kwỳ ata pyrãac. Ne me apê, por mam mecupê Pahpãm mã mehcajrẽn catêjê atajê pyrãac, necute ihcajpuaw prãmte atỳj Pahpãm mã ihcunea na catyt kam me apa, ne cumã me apê. Mār ca Jeju Crixto kôt, Pahpãm mã me ampo pej pit tonto me apa, quê ha ihtỳj Pahpãm, ate me cumã ampo pej pit ton xà atajê na, amji capa. ⁶Ne quê ha ikre pyxwỳr catêjê itajê kẽn to pit mã me ikre nõ xãm, ne cute me cumã pĩ jicjêc nõ xãm xà kaj na, hõxwahhi kam, me cumã kẽnõ tỳjti cuhtacti ata nõ xi. Ita na pê Ixaj xwỳ ata, ramã hõ kàhhôc kam, Pahpãm jarkwa na, me ahna ihhôc to hane he:

“Wa ite amji mã kẽn nõ tỳjti cuhtacti na hĩ jãhwỳrti ita capi,
ne wa ha Xijãw jõ kẽncahê na,
Krĩpinkrẽn kam me ikwỳ mehkri atajê kam,

me hipôc ri cuxi.

Ne por kên ata quê ha cupê mam ikre caxuw kên ata,
ne ampeaj kam ihkwỳ jirôa pê impej ne ihcuhtac.
Ne quê ha mehwỳ te amji mã me to ihhimpej na,
quê haihtỳj mempej mã mehpỳm,
ne ampeaj kam hūrên me hakry,
ne nee jũ caxuw hũ na amehpahàm nare” hane.

⁷Ca ate Jeju to amji mã me ahimpej atajê mã ri, cupê mam kên pejti, cuhtacti nahĩ jàhwỳrti ata pyràac. Ne nee Jeju to amji mã mehhimpej nare atajê mã ri, cupê kên kôt hamreare ata pyràac. Ne pê ramã jũm ita Pàhpãmjarkwa na, hõ kàhhôc kam ahna ihhòc to hane he:

“Pom ikre to me hàpên catêjê,
ma ame ikre mã hãm xà caxuw kên pejti caca ita te ihkwỳ jirôa
pêamji to cati,
ne ihcuhtacti ne ihtỳj” hane.

⁸Pê Ixaj xwỳ Pàhpãm jarkwa na, hõ kàhhôc kam, Jeju na ihhòc to hane he:

“Quê ha pry kam cupê kēnti nō pyràac ne jỹ,
ne pry kôt me pra atajêjàhtôa ne mehtôtôc,
quê ha me ajhu” hane.

Hõhõ, cute me to hajỹr xà itakam, quê ha me hàhtôa mã Jeju kĩn nare, quê ha maamehcaca. Ne cupê me hũtâr catê na me harên xà ata to, quê ha nee me amji mã hajỹr nare, na quê ha ma ame harên par caca. Ne por quê ha ma ame harênpar caca atajê te ramã amji kên mã me amji mên. Ne pê ramã Pàhpãm cute me to amji kam me hapac xà ita na, me to amji kampa.

⁹Ne nee pahte me hajỹr nare. He pê Pàhpãm amji mã me pahcapi, me papê me pajõ Pahhiti pê Pàhpãm mã pahte mehwỳ cajrên catêjêna. Ne me papê mehwỳ pê hõ tekjêa ne me pampejti. Mã Pàhpãm te ihhêj ne awcapàtkôti kam ampokên ata pê, hàhcujrohti ata wỳr me pahna hàhwỳr, mâr cu pahtỳj me ampo pejti pupu, ne me to. Ne me pahte mehcunea mã Pàhpãm te ampo pejti catia ton atajê jarên xà caxuw ri, cute me pahna hàhwỳr. ¹⁰He pê mam, nee me apê Pàhpãm na mehwỳ pê me hõ tekjê nare, ne ita caxuw ri meapê hõ tekjêa. Ne mam nee me amã Pàhpãm jàhcaprĩ ita na hahkre pej nare, ne ita caxuw ri ihtỳj me acaprĩ.

Cu ha ampo pej pit ton to me papa

Roman 13.1-7; Tito 3.1

¹¹Yhỹ, imã me akĩnti atajê, por me acahkrit, ca me gõ pjê kaj na, ampÿa mã ame hõ pjê kam amearĩ atajê. He me pahcunea te me hajÿr pit. Ampo na? Cõjkwa kam ri quêt me pahcunea krĩ xà. Cwÿrjapê wa Jeju kam me pahte ajpẽn to me pahkjêjê itajê, wa ha me awÿ, ca nee pjê ita kam ame pahkrĩ rohnÿttimã na, ame to amji kam me gapac nare. Cwÿrjapê wa ha me ana ijãhwÿr to hane he:

— Ca ha nee ate amji kam me gapac xà tũm kẽn atajê kõt ame apa nare — hane. Ampo na? Ca ha atÿj me pajĩ te ampo kẽnre ton na prãmri xà ata tonto ame apa. He ihtÿj pahte me amji kam me pajapac xà tũm kẽn ita, ihtÿj me pahcaxwÿn me, me ajpẽn cujtê. ¹²Na ca ha mehcahkrit pê Jeju to amjimã me hajÿr nare atajê cahê na ame apaxà ata kam, ca ha catyt kam ame apa. Ampo na? Quê ha ate ampo pej pit ton to me apa na me apupun cacrô, ihtÿj me akõt harẽn xà kẽnre to ame akõt harê, ne amji caxwãm pê ame ato ihhêj na, me amjijahkre pej. Ne quê ha jũ caxuw me Pahpãm te amji jaxàr xà ata jõ amcro kam ahtwÿ, quê ha cato, quê ha hanea ne, por cute me akõt harẽn xàkẽnre atajê, ihtÿj amji kẽn na me amji jahkre pej, neme Pahpãm peji na cumã me harê.

Cu ha pjê jõ pahhi catêjê kampa

¹³Ca ha nee me pajõ Pahhitia mã ihpahãm cator nare. Pê ihtÿj amji mã Hũm cupa to ipa, na ca ha atÿj amji mã me cupê pahhi catêjê cupa. Ne ca ha Roman jõ krĩ kam, amji mã me krĩ cunea jõpahhiti pê Xexa ata cupa, por cupê ita ri pjê kam pahhi catia ata. ¹⁴Ne ca ha hanea ne por harkwa kõt, krĩ cunea kõt me cupê pahhi atajê, ca ha amji mã me hũpa. Ampo na? He cutea ri krĩ cunea kõt, cuteame ampo kẽnre ton atajê jahpan xà na, ame to kẽn xà caxuw me cumã harkwa. Ne hanea ne cutea ri, cute catyt kam ame ampo peji ton catêjê namehcakôc to impeji na harkwa.

¹⁵Ne mër ampo na mã ca ha catyt kam ame apa to hane? He Pahpãm mã, cute me amji jahkre kêatre catêjê te ihtÿj ame ana mehcahcakôc kẽnre to me ipa ata tète, cumã mehcahpêrhÿr prãm. Na ca ha catyt kam me apa. ¹⁶Pahpãm te ramã ate amji kam me gapac xà kẽn itajê cunea pê me ato cator, na ca ha atÿj catyt kam ame apa, ne ame ampo pej pit ton to meapa. Ne nee ca ha me anõ amji mã:

— Jeju te, ite nee ampo kẽn ton nare xà caxuw imã carõt jõr. Cwÿrjapê wa nee hipêr ampo kẽn ton to ipa to prãmri nare — hajÿr cacrô, mãnea mã ampo kẽn ton kam to acrà nare. Cwÿrjapê ca ha neehipêr ampo kẽn atajê to ame amji mã me ahimpej, quê me ato ihhimpej nare, ne Pahpãm to, ca ha quêt amji mã me ahimpej. Mãr quê cupêa me gõ Pahhiti. ¹⁷Ca ha amji mã mehccunea cupa to me apa, ne hanea ne amji mã me Xexa pê pjê jõ

pahhiata cupa. Ne quê ha amã Jeju kam, ate me ajpẽn to me akjêjê atajê kîn. Ne me hirôa pê amji mã me Pahpãm cupahti to me apa.

Cu ha amji mã me pahcaprĩa, ne pahtỳj ampo kên cunea mã awcanã
Epet 6.5-8; Coroxo 3.22-25; 1 Timot 6.1-2; Tito 2.9-10

¹⁸Ne me amã me gõ pahhi, ca cama me cumã me apê atajê, ca ha atỳj me kampa, ne amji mã me hũa to me apa. Ne nee ca amji mã me gõ pahhi te meato impejti, ne me gamãr to me ipa atajê pit cupa nare, ne hanea ne cute ame ato amji kam hapac xàto kêanre atajê, ca ha atỳj hanea ne me kampa, ne amji mã me hũa. ¹⁹Ca ha me gõ pahhi to impejti cakrô, quê ampo na ame ato kêanre, ca ha nee amji jahpan xà na me acakôc nare. Ca ha amji pupun xà kêanre to amji pupun cakrô, nee amji jahpan xà na cumã garkwa nō to me acakôc kên nare, ne atỳj me cumã awcanã. Ampo na? He Pahpãm kôt ca ate to hajỳr, cwỳrjapê quê ha me apyrên Pahpãm hakry, ne taa ihtỳj me ato impej.

²⁰Ca ha ate ampo to kên to apa na, quê ha hahpan xà na, ate amji pupun xà kêanre nō akam ihpỳm ne acahhy, ca ha aracri jỳ ne cumã awcanã, quê haahna ajkĩ Pahpãm mã ajehti ne, ne cumã acaprĩ? Hãpà, atea ca amji caxuw ita ton, na ca ha atỳj cumã awcanã, ne aracri jỳ. Ca ha ate ampo pejti ton to apa cakrô, quê ha hahpan xà na ate amji pupun xàkêanre nō awỳr cato, ca ha cumã awcanã, quê ha Pahpãm apupu, ne ihtỳj apyrên hakry ne ato impej. ²¹Me pampejti ton to me papa jahpan xà na, me pahte me amji pupun xà kêanre mã me pajũcanãr xà. Ne caxuaw ri, Pahpãm te me pahna hàhwỳr. Ahnaa mã pê Jeju mepamã to hahkre xà caxuw me pahcumam, cute me pancwỳrjapê amji pupun he. Na cu ha ihkôat me hane.

²²Pê Ixaj xwỳ Pahpãm jarkwa na, hõ kàhhôc kam, ahna ihhôc to hane he:

“Ne nee jũ caxuw me pajõ Pahhiti te ampo kên ton nare, ne nee ihcakôc xà nō to ihhêj xi nare” hane.

²³Pê ame cumãn kêanre cakrô, pê nee amji jahpan xà na, jũm mã harkwa nō kên to ihcakôc nare. Pê ame to kêanre, ne me cumã ihkãjxà ton cakrô, pê nee me to kên ata jahpan xà na, me cumã amji cawpa nare, ne aracri ihcuhhê. Ne cute cama ihcunea na Hũm mã amji jôr, mãr quêtaa, jũ caxuw, catyt kam, ampo itajê cunea to impej. Ne quê ha jũ caxuw mempej catêjê to impej, ne mehkêanre catêjê kên mã me curê.

Pê Jeju kà caxõ xà ata me pahcunea to impej

²⁴Ne Jeju te amjia kôt, cute mehcuran xà ita mã amji jôr, mã cute pĩ kam mehcuran. Ne me ate amji kam me gapac xà kêanre itajê mea mã,

ihhêj ne ramã cute pĩ ata na menxôr, mã ihtyc, ne hamre. Na ri nee hipêr meate amji kam me gapac xà kêanre atajê kôt ame apa xà nare. Ne quêt Pahpãm te amji kam hapac xà impejti ata kôt ri ame apa xà. Ne cute ameJeju kà to caxõ xà ata te ri me amã ate amji kam megapac xà mã ampej. ²⁵He carà cahàcre hòhti pry cupa, mã hamãr catêjê ame hapêê, ne hacpÿa mã me to cuprõ, ne ma me hamã, ita jikjê na mã, mam me acaxwÿn pictor, ne Pahpãm pê ampÿa mã apu ipa. Ne Jeju Crixto te hacpÿa ne amji wÿr me acaxwÿn to cuprõn, ne ita caxuw ma me gamã, ne ihtÿj ampo kên pê me apytà.

Quê ha pyjê ihtÿj amji mã mempjê cupa
Epet 5.22-25; Coroxo 3.18-19; 1 Timot 2.9-15

3 ¹⁻²Ita caxuw, wa ha me apê pyjê mã mempjê atajê japackre. Quê ihhêaj to me akwÿ mã me apjê kwÿ te Pahpãm jarkwa kam me hapac nare atajê, ca haatÿj Pahpãm wÿr me to apipkjêr to hane he. Ca ha me cumã, cute amji mã me hÿpar xà caxuw me cumã acakõc nare kam, ate amji kôat catyt kam Pahpãm to, cute amji mã mehhimpej na me to, quê amji mã meto ihhimpej. Ca ha me apjê kampa, ne catyt kam ame apa, mâr quê me apjê catyt kam me apa na me apupu, ne ate amji mã me hÿpahti na me gahkre pej, ne me akôat Pahpãm wÿr me apkjê, ne amji mã me to ihhimpej to me ipa.

³Ne nee ca ha me apejti to prãm to, põ rÿm pit mã ame amji cÿmpej, ne aracri me acaxwãm pê me ate amji kam me gapac xà kêanre, ne impej nare, ita na ihkaj na. Naca ha nee cama ame amji cÿmpejti to prãm nare, ne nee camaame akĩ to impejti to prãm to ame to apihho, quê impejti nare. Ne nee ca me gacrõ xà peaj to pit mã ame amji jakrõ prãm nare, ne nee cama meapejti to prãm to cupêhkà peaj to pit mã me amji kà prãm nare. He Pahpãm mã ampo itajê te me ato impejti itajê kôt hamreare. Ampo na? Quê ha ihtÿj jÿ caxuw ampo itajê mea mã, me gĩ ty, ne hamre tu, ne acto. ⁴Ne quêt me acaxwÿn nare, quê ha nee jÿ caxuw ihtyc ne ipictor nare. Na ca ha me acaxwãm pê me acaxwÿn cÿmpej. Ne ate amji kam me gapac xà itajê, quê ha nee ampo kam apu incàcàc nare, nequêt amji mã ihprĩa kam, ihcarĩcti kam, catyt kam ipa xà ita ri, quêt Pahpãm mã catia to cati, ne impej. ⁵He mam me apupxwÿjê te Pahpãm to amji mã mehhimpej, ne ihtÿj curÿm me ampo pej jikaj atajê pê ajcome amji cÿmpej to me hane he. Pê ajco ihtÿj amji caxuw mempjê kam me hapac to me ipa. Ne Pahpãm mã cute me hajÿr to ipa xà ita pê ri ihhêj rÿm me hakrõ xà.

⁶Ahnaa mã pê Xarakwÿj xwÿ hanea ne, ajco ihtÿj amji mã impjê pê Aprãw xwÿata kam hapac to ipa, ne ajco cumã: “Ijõ pahhi” hane. Ca ha ampo pej pit ton to me apa, ne nee me amã ampo cupa nare na, ca ha me apê Xarakwÿjxwÿ pyrãac, ne me apê me tãmwxwÿa.

Quê ha mempjê mã ihtỳj mehprô kîn*Roman 12.9-21; 1 Texarôn 5.14-15*

⁷Ne me apê mempjê, ca me aprô me, me apa atajê mã, wa ha ita caxuw icakôc. He me gapyre mã me aprô carôt peacre na, ca me to amji japackre, ne amji mã me hûpa, ne me hamâr peaj to me apa. Ampo na? He quê ha Pahpãm ajwar amji cahê name apa na me ato, ca ha cahê na me atîar na me apa rohnỳtti mã. Hõ, ca ha me to hajỳr to me apa, mãr ca Pahpãm mã me acakôc, quê ihtỳj me akampa, ne nee me apar caca nare.

Cu ha pahtỳj pahte ampo pejti ton na amji to me ahcukij

⁸Hamre, ita caxuw wa ha me acunea japackre. Quê ha me amã ate amji kam me gapac xà pyxit peaj. Nequê ha me amã ajpên kînti hanea, pom quê mehkjêjê mã ajpên kîn he. Ne hanea ne me amã ajpên caprĩhti ne, ne ajpên to me acati to me apa, ne nee me anõ pyxit peaj ne amji to acati prãm nare. ⁹Ne quê jũmjê ame ato kên, ca ha nee amji jahpan xà na ame to kên nare. Ne hanea ne quê jũmjê ame axũn, ca ha nee amji jahpan xà na ame hũn nare. Ne cama amji jahpan xà na, jũmjê atajê to mempejti ne. Me pahte mehcunea to impejti, mã me hahpan xà naPahpãm te me pahto impejti xà caxuw ri, cute me pahna hãhwỳr.

¹⁰Pê Tawi xwỳ ramã Pahpãm jarkwa kôt, hõ kãhhôc kam, ita na ihhôc to hane he:

“Quê ha me amã amji kînti me,
megakryti na me apa to prãm na,
ca ha me hane he:

Ca ha nee jũmjê to ame acakôc kên nare.

Ne nee ame ahêj xi toame acakôc nare.

¹¹Ne ma ame amji tète ampo kên cunea curê,
ne me akên ton jicu,

ne me ampo pej pit ton to meapa.

Ne ca ha hanea ne ajpên mã me apejti na me akrĩ na,

ca ha amji to me ahcukij.

Ne quê jũmjê apu ajpên curê,

ca ha hacpỹa mã ajpên mã me caprĩ na me to.

¹²Ampo na?

He me pajõ Pahhiti mã cute me ampo kên tonitajê na mehkîn nare,
mã ma ame curê.

Ne mempejti catêjê ri quêt,

me hamâr to impejti, ne ihtỳj me cumã,

cute mehcajrên xà atajê na me kampa” hane.

Jũm te pahte amji pupun xà kêanre na me pahton xà pyrên me pajakry
1 Timot 2.24-26

¹³Ne quê me amã ampo pejti ton to prãnte, kamme akrã acto tu, ca me ton to me apa xà ata kam, quê hapijamã Pahpãm kam jũm te ame ato hamre na hamã? Hãpà! ¹⁴Ca ha ate me ampo pejti ton na, quê ha jũmjê te hahpan xà na, ate me amji pupun xà kêanre na me aton na, ca ha atỳj me gækrya ne. Ne nee ame jũm cupa to me apa nare. Ne nee acaxwỳn caxwãm pê ame akrihkrit nare. ¹⁵Jeju pê me pajõ Pahhiti na me to amji japackrea ne, ne me gĩ cunea to amji mã me hũpahti to me apa. Ne ca ha ma ate Jeju to amji mã me hajỳr to meapa na, quê ha jũmjê ahna me apupu, ne ate ihkõt me cumã harên prãmte, ahna me acukij na, ca haramã me cumã harên prãam kam, me cumã harên xàa kam me cumã harên to apa. Ne amji mã aprĩa kam, amji mã me hũpahti kam, me cumã harê.

¹⁶Ne ca ha gõtpe catyt kam, ampo pejti ton to me apa, mãr quê me acaxwãm pê ateamji kam me gapac xà kam, me amã ate me ampo kên ton nare na, me amã amji jahkre pej. Quê ha mehwỳ kwỳ te, me ate catyt kam Jeju kõt me apa na me apupun na, quê haihtỳj ame akam mencryc. Ne mehhêj xi xà to, cute ame ato ihkryjre prãm to, ame amãn kêanre ne. Cakrô ca ha me kam mare mã catyt kam me apa kam me to acrà, quê ha me cumã acaxwãm pê me apejti na megahkre pej, ne amji kam amehpahàm to me ipa. ¹⁷Ne ca ha ate me ampo kêanre ton to me apa na, quê ha hahpan xà na, me ate amji pupun xà kêanre na me aton na, quê ha Pahpãm me amã:

— Hamre, atea ramã me amji kên mãme amji mên, ita na me akam ipê ihkaj na — hane. Ne ca ha ate ame ampo pejti ton to me apa cakrô, quê ha Pahpãm te jũmjê atajê te me amã ate amji pupun xà kêanre ton na me hamãr na, mã cute ame ato kên na, quê ha Pahpãm me amã harkwa to:

— Ate me ampo to kên nare kam, cute me ato kên. Ca atỳj cumã me gũcanãr to me apa, ne nee hahpan xà na ame kam acryc nare, ita na ri imã me apejti — hane.

Pê Jeju pê me pahkritxwỳ ata hanea ne amji pupun xà kêanre to amji pupu

¹⁸He Jeju te me acuxà, amji pupun xà kêanre to amji pupun na, ca me to amji japackre. Ne cute amji to me pahcunea kritxwỳ hiahpuro na, ca me to amji japackre. Ne hanea ne cute maPahpãm wỳr me pahto ipipkjêr prãmte, me pahkênxà itajê jahpan xà na ihtyc pyxit peaj ata na, ca me to amji japackre. Ne cupê hũmre impejti na, ca me to amji japackre. Ne cuteme pahkritxwỳ na amji ton, ne cute me papê mehkên ton catêjê mã amji jôr. Mãcute ame hĩ to kêanre, ne cama cute amji na me hamãr, mã cute mehcuran na, ca me to amji japackre. Mã Pahpãm Carõ Pejti te

hipêr quêt cumã hĩ tuw jôr, na quê hanee jũ caxuw hipêr ihtyc nare, ne quêt ihtĩr rohnýtiti mã na apu ipa. ¹⁹Ne pê Jeju jĩ ty, ne nôr kwÿa kam, ma carõ mehtycarõ jacjên xà wÿr axà, ne me carõ atajê mã, cupêampo cunea jõ Pahhiti na amji jarê. ²⁰Ne me carõ itajê pê, por me panquêtti Nowe xwÿ jõ amcroa kam, pê ajco cormã pàr kre to hàpên to môr xà ata kam, nee cute me Pahpãmjarkwa par nare atajê carõ. Pê Pahpãm amji mã ihprĩa, ne cute jũa caxuw mehkên ton jicu, ne hÿrmã me ipipkjêr na me hikaj to ipa, mã neecute mehkên ton jicu nare. Mã me ahnaa Nowe xwÿ te pàr kreti jipêj, mãkam cute me ôjtô peaj te mehtyc xà pê me amji pytâr.

²¹Ne cô te mehkên jipej xà pê Nowe cator ita pê, ihhêj rüm cô te me pahcumrâr xà atapyràac. Ne me pahcumrâr xà ita pê nee pahte me to amji rà pit jürên xà nare. Ne ihkôt harên xà te, me pahte amji kam me pajapac xà cunea pintuw, ne ihtetetti ata cwÿrjapê, cu carôt tÿjti te hacpÿa mã Jejuto ihtĩr ata kôt, catyt kam me apa. ²²Ne pê hacpÿa mã Jeju cõjkwa wÿr api, ne Pahpãm cahê na, awpôc rüm, pahhi jàmtar jàmkrã catia krĩ xà kam jÿ. Ne jÿ ne cõjkwa kam Pahpãm mã memprarcatêjê cunea me, me cupê me hõ pahhi catêjê me, me carõ carôt tÿjti pê ajteare mã atajê cunea to ihhimpej.

Cu ha me pahte amji kam me pajapac xà tũm ata to me pajapac kêt
Roman 6.1-14; Epet 4.17-24; Coroxo 3.1-11

4 ¹Pê Jeju hĩ to amji pupun xà kêanre to amji pupu. Ca ha cuxà ate me amji pupun xà kêanre cunea caxuw ame apa. Ampo na? Quê ha jũm te hĩ to amji pupun xà kêanre to amji pupun na, quê ha nee hipêr cumã cute ampokên ton xà nõ hamreare, ne nee hipêr ihnõ ton nare. ²Cwÿrjapê, ca ha amji to me Pahpãm cajpuaw xà na, pjê ita kam, harkwa kôt, catytkam ame apa. Ne nee hipêr ate me amji to me amji cajpuaw to prãm to, ame ampo kên ton to me apa nare. ³Ne pê ca mam, ramã me cupê Pahpãm na mehkwy nare atajê kôt, me cumã cute amji kam me hapac xà kĩnti atajê ton to ajco me apa. Ne ramã atemhkôt me ton to me iryyti.

Ne pê ca amcro atajê kam, ajco me amã me apahàm nõ xà kêanre kam, me pahpahàmti atajê ton to prãam kam, ajco me tonto me apa.

Ne ajco cõxÿhti to me amji to me apipãn to me apa.

Ne me gõ amji kĩn atajê kam, ahti na ajpên pê me aprõ caxun to me apa.

Ne meajpên kam mare mã, cõxÿhti to me akômto me catia to me apa.

Ne ajco cõjkwa kam me Pahpãm kaj na, me apãm cahàc krekà atajê kĩn to ame apa.

⁴Ne ita caxuw, ca nee hipêr me cupê Pahpãm na mehkwy nare, ne mehkra nare atajê kôt, ampo kên atajê cunea kôt ame apa prãm nare. Ita kam ri hãn ne me amã:

— Pÿhàpà, xãmte ca nee hipêr me ikôt me amjiton to prãm nare — hane. Jirô pê mã ri, cute mehkwy mã me axün xà kèanre to, me akôt harên. ⁵Ne quê ha ihtÿj jü caxuw, mehkèanre itajê na Pahpãm mã me amji kôt harê. Ne quê ha Pahpãm pê mehcukij ne ajpên pê me to haprãr catê ata ihtÿj mempejti xà wÿr mempej to haprã, ne mehkên xà wÿr mehkên to haprã. Ne ramã cute mehtyc me, mehtÿr itajê jipôc ri ajpên pê mempej to haprãr xàa kam ri ramã jÿ. ⁶Cwÿrjapê ri, por ramã mehkên tyc atajê teJeu pê me pahpytãr catê na, me harên par. Mãr quê xwÿ mã mehkên mã hikra, ne catyt kamme ipa. Mãr quê Pahpãm hacpÿa mã mehtÿr na me to, quê mehtÿr, ne cahê na me ipa rohnÿtti mã.

Cu ha pahte amji jahkre pej krã kreti to me Pahpãm mã me apê
Roman 12.6-8.

⁷Quê ha ahtüm nare, quê ha ampo cunea jamre xà kam ahtwÿ. Cwÿrjapê ca ha me guphêa rüm, caxwãm catia mã, catyt kam me apa, mãr ca catytkam Pahpãm mã me acakôc. ⁸Mãr quê ha ampo itajê cunea jirôa pê, me amãajpên kïn catia to cati, mãr ca cute ame ato kên atajê to me cumã tojnô, ne me hïcu. ⁹Ne me apê ikre jô pahhi atajê, quê jüa rüm me akwÿ gürkwa kam me ana cuprô, ca atÿj me ahna amji to pôj, ne me cumã harte, ne me acahê na mehkri, ca me hamã, ne nee amehkôt harên nare.

¹⁰Ne pê Pahpãm ahpÿanre na, ajteare mã, me pamã pahte amji jahkre pej krã kreti jôr pa, ne ahna me pahpyxwÿr pa. Cwÿrjapê ca ha, cute me amã, ate amji kam me gapac xà jôr xà atajê jamãr peaj, ne ate me to me akwÿ to impejti xà caxuw, ca ha me to apa. ¹¹Quê ha Pahpãm te, jüm te me cumã harkwa jarên xà caxuw, cumã amji jahkre pej krã kreti jôr na, quê ha ihtÿj me cumã Pahpãm jarkwa jarênto ipa. Quê ha Pahpãm te, cute mehtehcajpar xà caxuw cumã amji jahkre pej krã kretijôr na, quê ha ihtÿj Pahpãm carôat to mehtehcajpar to ipa. Hô, ca ha me hajÿr to me apa, mãr quê mehcunea me apupu atajê, me Pahpãm jarên pejti jarên to:
— Inxü Cati, apê me ijô Pahhiti pê Jeju Crixto Pãmpeaj — hane. Quê ha mehcunea me Jeju carôt cati tÿjti rohnÿtti mã na me hahkre pej. Ampeaj kam!

Cu ha pahtÿj Pahpãm te pahte me amji pupun xà na me pahton na me
awcanã

Ruc 6.20-23; Jowãw 16.1-4; 2 Texarôn 1.3-12; Tijac 1.2-4

¹²Imã me ikwÿ nõ kïnti atajê, me apê wakÿre prã tepti pê ôr ata pyrãac na, ca amji to me amji japackre. Ne pom hãn ne me wakÿre prã tepti

pupun pej prãnte, cuhy kam me cunõ, ita na mã me ate. Ita jĩkjê na mã, Pahpãm ma ate me amji pupun xà kêanre kam me apa na me gamã, cute me amã ihkĩn name ato ipipê prãnte. Ỹhỹ, Pahpãm mehkra cunea to hajỹr to ipa. Cwỳrjapê, ca ha nee me ajpẽn mã:

— Pom me papê Pahpãm tekjê ita? Mã cu ajte pahtỳj me amji pupun xàkêanre to me amji pupun to me papa? — hajỹr nare. ¹³Ca ha me amji pupun xà kêanre to me apa ata pyrên me gakrya ne. Ampo na? He ca Jeju me, ate me amji pupun xà kên atajê to ate me apipêan. Cwỳrjapê, ca ha jũ caxuw Jeju carôt jàhcujrohti impejti te amji to ipipê xà ata jõ amcro kam, ca ha me amã amji kian ne. ¹⁴Ne me apê Jeju tekjê, na ri ame axũnto me ipa. Cwỳrjapê ca ha me amã amji kianne. Ampo na? He ate amji kam me gapac xà itajê, ihtỳj me akam Pahpãm Carõ Pejti carôt tỳjti te ihkrĩ na, me garê.

Cu ha nee jũ caxuw ampo kên ton to me papa nare

¹⁵Ca ha nee jũ caxuw jũm curan nare, ne nee ampo to me gãhkĩj nare, ne nee me gõ pjê jõ pahhi jarkwa jirõ pê me apỳpỳm nare, ne nee ate me ampo kên ton catêjê te amji kam me hapac xà mã, atỳj ame acjêj to meapa nare. Ampo na? He imã ampo itajê cunea jahpan xà na, me ate me amji kên mã me amji rên, ne kam me pahpahãmti nõ to ate me amji pupun na, imã me ato prãm nare. ¹⁶Ne quê ha jũm me apê Jeju tekjê itacwỳrjapê, ate me amji pupun xàkêanre na me ato, ca ha nee amji jũ na ame apahãm nare, ne ampeaj kam cama me apê Jeju tekjê pyrên me gakryti na, Pahpãm mã me amji jarê. ¹⁷Ne ramã Pahpãm te mehcukij ne ajpẽn pê me to haprãr xaa kam ri jỹ, ne toa ri jỹ. Ne cute ramã mam me papê me hõ tekjê kam to tẽm, ne pahte ame to ihcupan jahpan xana, ame pahto kên pa. Jirõ pê mã, quê ha, cute Jeju pê me pahkên pê me pahpytãr catê na, harên pejti atajê to amji mã me hajỹr nare atajê, quê ha me pajirõa pê mehkên catia mã me irên kam tẽ. ¹⁸Ne pê ramã Xarõmãw xwỳ Pahpãm jõ kàhhôc kam, ita na ihhõc to hane he:

“Mempejti catêjê te mehkên cati pê me amji pytãr xà wỳr, quê ha xa me amji pupun xà kêanre to me amji pupun cri. Jirõ pê mã quê ha mehkêanrecatêjê ma amji tẽte ame Pahpãm curê, na quê ha ihtỳj me amji pupun xà kêanre to me amji pupun to me ipa rohnỳtti mã” hane.

¹⁹Mêr hõhõ, me pahkwỳ kwỳ te me amjipupun xà kêanre to me amji pupun xaita na ri, me Pahpãm te me to tojnõ. Cakrõ quê ha ihtỳj me Pahton Catê, cute me pahkên pê me pahpytãr to ihcakõc xà ata na, amji to amji japackre. Na cu ha pahtỳj itajê cunea na amji mã me to hane, neampo pejti ton kam me to pancrà tu ne.

Cu ha me pahtỳj Jeju na mehkwy jamār peaj ne

5 ¹Ipê Petrô, ne ite hajỳar ne ipê Jeju na mehkwy to mehhimpej catêjê nõ. Nepê wa ito jĩa to Jeju te amji pupun xà kêanre na hõmpu, pê ikam mare mã ty. Na wa itỳj mehcunea mã ihtyc xà ita na harên to ipa. Ne quê ha jücaxuw amcro nõ na, Pahpãm te mehcunea mã Jeju catia to cati na to ipipê xà ata kam, quê ha cume ajkaam me ito ajpê. Na wa ha ita caxuw me apê megõ krĩ kam me hapackre catêjê na ahwỳ, ne me gapackre.

²He me apê carà cahàcre hõhti jamār catêjê pyràac. Mã Pahpãm te me amã mehkwy pê me hõ tekjê atajê jõr, ne apê me hamār catêjê name apyxwỳr, cwỳrjapê ca ha me hamār prãam kam me hamã. Hõ, ate me to hajỳr xàita na ri, Pahpãm mã me ato prãm. Ca hanee me amã me hamār prãm narekam, ame hamār nare, ne quêt amã mehamār prãm kam ma me hamã. Ne nee ate me ihpore nõ pyr prãmte, ame hamār nare. ³Ne nee ca ate me to ahimpejxà ata kam gàprêa kam ame to ahimpej nare. Nequêt cute akõt me ipa to prãmti xà caxuw, ca ha catyt kam, ate amji kam me gapac xà imejti to me apa. ⁴Ne Jeju pê carà cahàcre jamār catêjê cunea jõ pahhi pyràac, na ca ha atỳj cumã me apê. Ne quê ha jũ caxuw amji jaxà, ne ihtỳj ate megapên xà ton atajê jahpan xà na, me amã amgõ. Ne cute me amã hàmjõr xà ata pê pahhi krãhkà imejti. Ne pahhi krãhkà imejti ata pê jũ caxuw hahĩ xà jamre xà nare ata, quê ha me amãcugõ. Quê ha mehcunea me apê Pahpãm mã me hàpên catêjê imej na megõmpu ne ate me gápên xà jipêj na me gahkre pej.

Cu ha nee me pahkwỳ jirõa pê amji to me pahcati to prãm nare

Ruc 18.9-14; Tijac 4.7; 1 Petrô 1.6-9

⁵Ne ita caxuw wa ha hanea ne me gĩ tỳj tuwtiitajê japackre. Ca ha atỳj amji caxuw mehwej te me hapackre catêjê atajê kampa. Ne ca ha me acunea pêPahpãm na mehkwy atajê, me amji to me acati prãm nare kam, atỳj me ajpên tehcajpar to me apa. Ne pê ramã Xarômãw xwỳ Pahpãm jarkwa kõt, hõ kàhhôc kam ita na, ihhõc to hane he:

“He Pahpãm ihtỳj, por cute amji to me cati prãmti atajê cuna mã ahtwỳ,
ne intête me hiprõ.
Nepor amji to me cati prãm nare atajê ri,
ihtỳj quêt cute mehtehcajpar xà” hane.

⁶Na ca ha Pahpãm carõt pahtỳjti ata krac ri, amji to ame acati prãm nare to ame apa. Mãr quê ihtỳj jũ caxuw, hõ amcro kam hàhhuc xà atakam, ato acati ne ato acarõt tỳjti ne.

Pahpãm ihtÿj me pajamãr to ipa

⁷Ne nee ca ate ampo to amji kam me gapac xà ata to ame amji mã me akrihkrit krÿn nare. Ampo na? He Pahpãm ri, ma ate me amji kam me gapac xà itajê mea mã, me gamãr to ipa.

Me pahcurê xwÿn pê Xatanaj ata pê roptycti pyrãac

⁸He me pahcurê xwÿn pê Xatanaj pê roptyctia, ne cute jÿm krêr prãmte, ihtÿj apu carôrô to ipa ata pyrãac. Ita jÿkjê na mã ihtÿj Xatanaj me papu na apuipa, cute Jeju to pahte amji mã me pahhimpej xà ata to me papê hamre prãmte. Cwÿrjapê ca ha me guphêa rÿm, caxwãm catia mã, catyt kam me apa. ⁹Ne Jeju kam me pahkjêjê atajê te me acuxà pjê cunea kam, ame amji pupun xà kêanre toame amji pupun na, ca me to amji japackre. Ne nee ca Jeju to ate amji mã me ahimpej xà ita jicu nare. Ne nee caame Xatanaj te ame ato kêen kryjre atajê cupa nare. Ne cama quêt cuna mã me ahtwÿ, ne cute me ato hajÿr tète me hiprô.

Cu ha pahte me amji pupun xà kêanre ita nee me pahto iryyti nare

¹⁰Pahpãm mã me pahkÿn, ne cumã me pahcaprÿ, mã cute Jeju Crixto kam pahte me ajpên hõnco tu xà caxuw, cute me pahna hàhwÿr. Mãr cu mepahcunea ajpên kam, imej catihti ata kam, ame papa rohnÿtti mã. Ne ate me amji pupun xà kêanre ita, quê ha nee me ato hãm ryyti nare. Ne quê haPahpãm me gÿcanãr xà caxuw, me amã carôt gô, ne me ato imej, ne ihtÿj me ate amji kam me gapac xà imejti kam me apa na, me atehcajpar to ipa. Mãr ca nee jÿ caxuw Jeju to amji mã me ahimpej jicu nare. ¹¹Pahpãm mã mehcunea jirôa pê carôt pahtÿjti rohnÿtti mã. Ampeaj kam!

Cu ha Pahpãm mã me pahkÿnti ita na amji mã me to hajÿr rohnÿtti mã

¹²ÿhÿ me ikjêjê, wa ite me amã ihkàhhôc crire ita ton xà na, Xira te itehcajpar. Ne cupê me pahkjê, ne pahtÿj pahte amji mã me to hajÿrxà ata mã he. Wa ite me amã Pahpãm mã me pahkÿnti na harên xà ita to, me amã me acarôt to ihtÿj prãmte, wa ite me amã ahna ihhôc. Na ca haatÿj me Pahpãm mã me pahkÿnti ita na amji mã me to hajÿr rohnÿtti mã. ¹³Ne pê Pahpãm amji mã Jeju na mehwÿ capi, mãita ri Papirôn jô krÿ kam ame ipa itajê te me amã amji jarên kujahêc. Ne hanea ne Macô, pê ikracahàhhàc ita te me amã amji jarên kujahêc. ¹⁴Ne ca ha me amã ajpên kÿnti kam, ame ajpên japÿ. Ne imã me apê Jeju tekjê catêjê cunea te me acaxwãm pê me acarÿcti kam, me amã ampo cupa nare na, me ato prãm.

Jeju Na Mehkwỳ Jakrã Cunea Wỳr

HAPU NA PETRÔ JÕ KÀHHÔC

ÿhỹ, pê Petrô pê Jeju jarkwa na memprar catêjê nõ. Ne pê mam cupê teppro catê. Pê Jeju cupê ihkôt ipa catê na ahna ahwỳ. Ne Jeju te cõjkwawỳr hàpir jirô pê mã ri, cupê Krĩpinkrên kam Jeju na mehkwỳ mehkrĩ atajê to ihhimpej catêjê nõ. Ne ramã cute mehcuran xà na hàhtêp na cutehahkre pej. Ne pom cu hapu na me hõ kàhhôc cahyt ita, pjê cunea kam Jejuna mehkwỳ wỳr, cute ihkujahêc. Na ri hapu na hõ kàhhôc ita japyr te **Jeju Na Mehkwỳ Jakrã Cunea Wỳr, Hapu Na Petrô Jõ Kàhhôc (2 Petrô)**.

Ne kam me pamã jũ caxuw jũmjê te me cupê Jeju na mehkwỳ na amji jarên, ne nee cute Jeju te amji kam hapac xàintuwti impejti kôt me ipa nare atajê mã ihcawpa. Ne hanea ne Jeju te amji kam hapac xà tuwti ita kôt me papa kam me to pancrà na, me pamã apô.

Petrô te amji jarên xà

1 ¹Hàpà me ikwỳ! Ipê Ximāw Petrô pê Jeju Crixto mã ijapên catê, ne ipêcumã harkwa na iprar catê nõa wa. Wa ite Jeju jarkwa na memprar catêjê kwỳ me, me amã ihhôc. Ne Jeju pê me pahpytâr catê me, Hũm catyt kam meipa. Cwỳrjapê ri cukwa kam cute me ato, ate amji mã me to ahimpej catêjê. Na ri ita caxuw me apê ipyrac. ²Ne imã, me ate ihcunea na, Pahpãm me, me pajõ Pahhiti pê Jeju jahkre pejpejti na, me ato prãm. Mår quê amjia kôt me ato impej, ne me acaxwãm pê me amã ihcarĩcti gõ, mår ca nee amji mã me ampo cupa nare, ne ihcunea name ate amji kam me gapac xà tuwti capênti to me apa xà ata to, me amã ipicamên to mõ.

Pahpãm me pamã ampo pej jàhtõa ne cugõ
Pirip 2.12-13; 1 Texarõn 1.2-4; 2 Petrô 3.18

³Ne ramã me pamã Jeju jahkre pej pejtu, na ri cute Hũm carõat kôt mepamã me pahcarõt jõr, pahte ihkõat catyt kam ame papa xà caxuw. Ne

hanea ne Jeju kam me ajpên hônco xà ita kôt cute impejti ita kam ajpên kam ame papa, ne me papê hūràac xà caxuw, cute me pahcapi. ⁴Ampeaj kam Pahpām pej, ne hàhcaprĩ cati, na ri cute ahpÿanre na me pamã ampo pej cunea jôr na amji to hūjahkre. Ne hanea necute me pamã, cute amji kam hapac xà tuwti, impejti ita jôr na, amji to hūjahkre. Ne cute me pamã amji kam hapac xà tuwti to hūjahkre ata ri, cute ita kam me pamã hōr, mār cu me papê hūràac, ne me cupê Pahpām curê xwÿn catêjê atajê te amji kam hapac xà kên kro, ne ihcacure xen atajêpê me to amji pytã, ne cupê me pahcato, ne quêt pahtÿj catyt kam ame papa.

Cu pahtÿj mânia mã me hahkre pej to prãm

⁵Pahpãm te ramã ate Jeju to amji mã me ahimpej na me aton, na ca atÿj ramã amji mã me to ahimpej to me apa.

Na ca ha ita caxuw me caa, ate amji kam me gapac xà impejti kôt, catyt kam me apa.

Na me caa amji mã meahihcuxêc to me apa.

Ne hanea ne ma, ate mePahpãm jahkre pej xà ita to me caa, amji mã me apicamên to me mō.

⁶Ne hanea ne, ate me ampo kên ton xà atajê cunea intête me amji jiprōnto me apa.

Ne ca ha hanea ne ate me amji pupun xà kêanre to me amji pupun xà atajê kam me awcanãane, ne nee jū caxuw me Jeju jicu nare.

Nehanea ne ihcunea na Pahpãm mã me amjigō, mār ca ihkōat catyt kam me apa.

⁷Ne hanea ne, Jeju kam ajpên to me akjêjê atajê me, me ajpên to me akwÿ impeaj ne.

Ne ca ha hanea ne Pahpãm cuxã, amã mehcunea kinti ne.

⁸Na ca ha atÿj ate me to hajÿr to apicamên to me apa, mār quê ate amji mã Jeju to meahimpej xà atajê kôt hamre nare. Na ca ha quêt me pajōPahhiti pê Jeju Crixto kôt catyt kam ame apa xà atajê kôt, ihtÿj me amã ampo. ⁹Ne me akwÿ kwÿ, nee cute amji kam me hapac xà itajê to me hajÿr to me ipa nare. Atajê mã ri, neePahpãm to amji japackre nare. Por cute mehkên atajêcunea to impej, ne totojnō, ne me cumã cuteamji kam hapac xà intuwti jôr na, nee me to amji japackre nare. Ne me cupê mento tūm pyrãac, na ri nee me cumã amji jahkre pej, mã me amji pupun nare.

Cu ha ihcunea na, catyt kam Pahpãm kôt me papa na, amji to me ahcukij

¹⁰Jeju kam ajpên to me pahkjêjê itajê, he amji mãa ri Pahpãm te me pamã hàkjêr, ne mepahcapi, cwÿrjapê ca ha catyt kam, ihcunea na, Pahpãm kôt me apa na, amji to me ahcukij. Ca haate ita to me hajÿr na, ca ha nee jū caxuw Pahpãm jō pry kaj na, jū kam cupê me pry hyr nare.

¹¹Na quê ha ihtÿj me amã, me pajõ Pahhiti pê Jeju Crixto pê mepahpytâr catê ata himpej xà krac ri, me amã me acjêj xà. Na ca ha me axà, ne cahê na me akrî rohnÿtti mã.

¹²Ne ate ramã me Pahpãm te amji kam hapac xà impejti jahkre pej. Ne ca atÿj amji mã me huwahi to tÿaj na, imã me gahkre pej cacrô, wa ha itÿj hõtpê atehipêr me to amji japackre na me ato, ca me to amji japackre. ¹³Imãa, wa cormã itîr na ipa ita kam, wa ha itÿjate me to amji japackre name ato ita na imã impejti, na ca ha me to amji japackre. ¹⁴He ramã me pajõ Pahhiti pê Jeju Crixto te imã ityc xà jarên, na quê ha ahtûm nare, wa ha ty. ¹⁵Cwÿrjapê ca ityc xà jirô pê, nee meto gapac kêt nare, ne me to amjijapackre kam me to acrà tu. Ne ita caxuw ite me amã to hahkre xà ihtÿaj to ihtÿj cacrô, wa itÿj ihcunea na me amã to hahkre to mõ.

Pê Petrô into jïa to Jeju jàhcujro catia pupu

1 Timot 3.16-17

¹⁶He pê wa me amã me pajõ Pahhiti pê Jeju Crixto te amji carôt tÿjti to, cute amji jaxârna, me amã harên xà ata, pê wa nee amjia kôt, ikrãa kam to amji japackre, ne me amã harên nare. Ne nee pê jûm amjia kôt imã Jeju jarên hêj xi xànõ to hÿjarên nare. Ipê Petrô, ne pa pê wa me ikwÿ me, me icunea me ito jïa to me hirõa pê Jeju catia to cati na me hõmpu to hane he. ¹⁷⁻¹⁸Pê wa Jeju me, kên pejti na Pahpãm wrÿc xà ata na ame ipa, pê wa me Pahpãmcarôt jàhcujrohti te Jeju jï cunea kam hàhcujro na me hõmpu. Ne hanea neite carôt jàhcujrohti pîn Hûm pê Pahpãm te me imã Jeju to hÿjarên to:

— Hûmre ita pê imã ikra kînti ata, ne ampeaj kam hÿrên ijakry — hajÿr na me kampa.

Mam Pahpãm jarkwa to mehcakôc catêjê nee amehhêj xi nare

¹⁹Ne cõjkwa pînimpar xà ata kôt, wa cormã ite me, por pê mam me cupê Pahpãm jarkwa to mehcakôc catêjê atajê te ampeaj kam me hÿjarên na me to amji japackre, ne me hahkre pej. Ne cormã ite me hÿjarên xà ita to amji mã me hajÿr to hipêr me ipicamên. Na ca ha cute me Pahpãm jarkwa to mehcakôccatêjê kam me gapac na, quê ha ihtÿj me Pahpãm me ato impejti ne. Ne pom awcapàtkô kam hàhcujro xà ahcujro, cu ihkôt me ampo pupu, ita jîkjê namã, Pahpãm jarkwa to mehcakôc catêjê te me hajÿr, ne ihtÿj me pahte Pahpãm pupun na me pahto, cu me hõmpu, ne me hahkre pej. Ne pom hân necaxêti hapôj mã apêto ipa, cu me ampo cunea pupu, ne me hahkre pej, ita jîkjê na mã, hacpÿ ne Jeju te amji jaxâr xà ata te hajÿr. Ne quê ha Jeju cator xà atapê caxêtia pyrâc, neihtÿj me pahte me Pahpãm pupun pejti na me pahto, cu ha me hõmpu, ne me hahkre pej pejtu ne.

²⁰⁻²¹Ne mam Pahpãm jarkwa to mehcakôc catêjê atajê, pê nee amjia kôtmehhêc nare. Ne Pahpãm Carõ Pejti te me cumã harkwato hÿjarên xà

atajê na pê mehhôc pa. Ita kam, xà cu ha ajkĩ mehkàhhôc ata cahyt, ne amjia kôt me kampa, ne me hahkre pej pej pyrentu? Hâpà! He Pahpãm Carõ Pejti ata quê ha me pahte me harkwa ata kôt me hakop, ne me hahkre pej na me pahto, cu ha me hahkre pej, na cu ha me to amji japackrea ne.

Cute amji kam me hapac xà kên xyre cawpa xà
Coroxo 2.16-19; 1 Timot 3.1-9; 4.1-5; Juta 3-16

2 ¹Pê mam Ixaher catêjê wÿr, me hũmre te amji jarkwa kôt me cumã mehçakôc catêjê kêanre atajê me cato. Ne me cupê Pahpãm jarkwa to mehçakôccatêjêa na me cumã me amji jarê. Ne cama ame cumã mehhêj, ne ajco mehkrãakam ame cumã ampo kên atajê to pit mã hahkre to me ipa. Ita jikjê na, quê ha me akam ita hanea, ne ihtÿj aracri me awÿr, cute me amã ampo to hahkrecatêjê kêanre atajê nõ cato, ne ame amã ihhêj, ne cute ampo to me hahkrexà kêanre atajê to pit mã, me amã hahkre to me ipa. Cute, ate Jeju to amji mã me ahimpej xà ata to me apê hamre prãmatajê te, me pajõ Pahhiti pê mehkên pê me hütàr catê ata te me hahpan xà na caprô to hàmjör ata jicu, ne ahname harcô mên. Cwÿrjapê ri me cutea me amji kên mã me amji mên. Na quê ha ahtũm nare quê ha ihtÿj jũ caxuw Pahpãm me to hamre hiahpuro.

²Ne cute me cumã ampo kên to hahkre xà atajêa kôt, quê ha me hàhtôa ne mehkôat, cute amji kam me hapac xà kam menxyre kêanre atajê to meamji kam hapac to me ipa. Quê ha me cupê Pahpãm na mehkwy nare atajê ahna me hõmpu, ne me amji mã:

— Cute amji kam me hapac xà ata kêanre, mõrmõ me hõ Pahpãm ita kêanre, na mã ihkôat cute amji kam me hapac xà ita kêanre — hane. ³Ne cute me amã ampo to hahkre catêjê itajê te, me apê me gõ pore catia ne incwÿr prãmte ri, ame amã mehhêj xia jarên to me ipa. Ne xà quêha ajkĩ ihtÿj cute mehkên ton xà itajê pê me amji pytà? Hâpà! He Pahpãm te ajpên pê me to haprãr catê ata me kôpĩr to ipa, ne rÿ pêamã cute mehkên mã me mênxãa kam ramã jÿ. Ne cumã cute me hajÿrjê to hamre xà na ramã me hahkre pej.

Cu ha Pahpãm tekjê na me amji jarê ne mãnea mã pahkên ton nare

⁴Ne mam cõjkwa kam, Pahpãm mã memprar catêjê kwÿ te harkwa jirô pê mehpÿm, ne mehkêanre ton atajê ri nee Pahpãm te, ihtÿj ame ipana me hamãr nare na, ramã me amã hahkre pej. Ne pêmehcunea pro, ne mehçajpre, ne kre jatõhhy narekam awcapãtkôti ata kam me to hũcapêr pa. Ne quê ha curi mehcuhhê ita na, quê ha ahnaa Pahpãm te mehçukij, ne mehkên mã me irên xà ata jõ amcro kamahtwÿ. Quê ha mehkên itajêa kôt, ajpên pê me to haprã, ne mehkên itajê mã ame curê.

⁵Ne pê hanea ne mam, rÿ pêa mã me panquêtjê nôpê Nowe xwÿ jõ amcro kam, Pahpãm nee mehkên catêjê cunea te me amji pytàr na me

hamãr nare. Ne cute cõhti ata to mehcunea jipej tu. Ne cute Nowe xwý me, hĩxi me, mehkraincrê me, mehprõ crê atajêpit pytãr. Pê te catyt kam cute ame ipa to ame cumã hahkre to ipa cacrõ, pê nee mempar nare na, ca me to amji japackrea ne. ⁶Ne Pahpãm te cuhy to Krĩhcumrãrti me, Krĩhpõc jõ krĩ kam mehkên catêjê atajê cunea to caxãr, ne me to hamre na, ca me to amji japackre. Ne cute me to hamre xà ita pê, cute mehkên catêjê cunea mã amji cawpa xà ata na, ca me to amji japackrea ne.

⁷Ne Ro xwý pê Aprãw xwý tàmxwý ata, pê ma apu hõ krĩ ata kam mehkri atajê te amji kam mehapac xà kam menxyre kêanre atajê cunea caca, ne me hũ na cumã amji kĩn nare. Na pêPahpãm cuhy to cute krĩ to caxãr xà ata pê hũtã. ⁸Ne pê Ro pê hũmre impejti ata amcro cunea kam, cute mehkên ton xà atajê cunea pupu, ne kampa, na pêamcro cunea kam, caxwýn pejti ata cunea kam, me hũ na ihpeacre. ⁹Ne Pahpãm te ampo to me panquêtjê to hamre xà ita, ihtýj me pamã cute me pahto amji kam hapac xà to hahkre. Ne ihtýj cumã, por catyt kam meipa atajê kên pê me hũtãr jahkre pej. Ne hanea ne cumã mehkêanre atajê te mehkên ton jahpan xà na, cute mehcukij, ne mehkên mã me irên xà jõ amcro atacaxuw cute me hamãr, ne me huwahi jahkre pej.

Mehhêj xi catêjê mã nee jũm cupa nare

¹⁰Ne quê ha Pahpãm, cute amji kam me hapac xà kêanre kam menxyre atajê to, mehkwy jirõa pê apu ihkêanre ne. Ne quê ha hanea ne nee amji mã me pajõPahhiti cupa nare atajê to me hirõa pê apu ihkêanre ne. Ne me akwý kam, cute me amã ampo kêanre to hahkre catêjê atajê, ampeaj kam amjia kõt me ipa to prãm na, me hàhtãt nare kam me ipa. Ne nee amji mã me cõjkwa kam Pahpãm mã memprar catêjê jõ pahhi kwý te to ihcupan atajê cupa nare, ne ihtýj hãn ne me hũn kêanre to me ipa. ¹¹Ne cõjkwa kam Pahpãm mã memprar catêjê kwýa pê, nee ahti na ihtýj ame hũn to me ipa atajê pyrãc nare, ne quêt me hũmre atajêjirõa pê me carõt týj cacrõ, mã nee Pahpãm mã memprar catêjê te to ihcupan atajê xũn, ne mehkõt harên kêanre to ame ipa nare. ¹²Ne me amã ampo kêanre to hahkre catêjê atajê te amji kam me hapac xà atajê na mehahkre pej nare kam ame hũn to me ipa. Ne ihhêj rũm me cupê ampo pê cute amji kam hapac xà hamreare atajê pyrãac. Mã jũmjê te ame hahêr, neamehcuran xà caxuw, hãn ne me ajhu. Na quê ha me hipec tu, quê ha me hamre tu.

Mehhêj xi catêjê ihtýj me pahte amji kam me pajapac xà impejti to hamre

¹³Ne cute me jũm te amji pupun xà kêanre na me ton, mã cute ahna amji pupun ata jahpan xà na, quê ha Pahpãm me to hũrãac, ne cute me amjipupun xà kêanre na me to, quê ha ahna me amji pupu. Ne hãn ne amcro cunea kam, hirãa pê me kam mare mã, cute amji kam me hapac xà kêanre kam menxyre atajêkõt apu memprar to pyt. Ne ca ha hãn ne

amji mã me amji kîn to, ne me akrĩ, ne ame apà. Quê ha ihtỳj me acahê na mehkri ne me apà, ne mecupê Pahpãm na mehkwyà na me amã amji jarẽ, ne cama ame amã mehhêj. Me cupê me amã me apahãm catia ton catêjê, na ca ha atỳj me kam, meapahãm catia to cati.

¹⁴Ne quê ha ahti na me jũm cahãj pupun xà ri, ramã ihtỳj cahê na mehikwa, ne amehcaxun na me amji to prãm pyrentu. Ne nee ajte cute mehkên tonxà itajê kam amehtycrĩ xà nare. Ne ampeaj kam me cumã, pom kyre pê Pahpãm to amji mã mehhimpej atajê to, mehkên mã me hàr xà ata wỳrme to ipa to prãm. Ne mehcuneajirõa pê me cumã, amji mã cute me ampo cunea to mehtũm prãm to ramã cute me amji pyrãc tu. Atajê, quê ha Pahpãm mehkên jahpan xà na ame to ihtỳj tu ne. ¹⁵Cute Pahpãm jõ pry cupan, na ri ihhêj ne ipictor, ne ma Pahpãm pê ampỳa mã apu ipa. Ne cupê Parãw xwỳ pê Pejor xwỳ kra ata pyrãac. Parãw ata pê me cumã Pahpãm jarkwa to ihcakõc catê cacrõ, pê ajte cute amji mã ihpore nõ pyr prãmte, ramã ampo te ihcupan xà to me cumã hahkre to mõ. ¹⁶Mã cawrõ cahacre te mehĩ cakõc xà to cumã ihcakõc, ne ihtỳj cute ihkên ton ata tète cumãn, ne pea hõ pahhi kam waj te amji kamhapac xà ata tète ihhyr.

Mehkrã kêanre itajê ihtỳj Xatanaj jõ cuhy wỳr imprar xà

¹⁷Ne ihhêj ne me hũmre itajê pê ampo pejti toncatêjê, ne hamreare, rỳ jũ caxuw ajte cute me ampo pejti ton nare. Na ri me cupê ihhêj rũm cõhkre kam cõ nare ata pyrãac, ne hanea ne me cupê ihhêjrũm ahcakrã to ipa, mã kõc ma to pra, mã nee jũ ri hàhhuc nare ata pyrãac. Cwỳrjapê ri ramã Pahpãm te ita jahpan xà na, cute ma kre jatõhhy narekam awcapãtkõti ata wỳr mehkujahêc na me to amji kam hapac hiahpuro.

¹⁸Ne nee me cumãa, cute me amji kam hapac xà atajê na amji jahkre pejnare kam, ihtỳj mehcunea mã amji to me hàmnãn to ame ipa. Ne cute amji kam me hapac xà kam menxyre kêanre atajê to, por curmãmehkên ton catêjê atajê pê cormã me hapõj ne Pahpãm wỳr me ipipkjêr, ne cormã kyre pê Jeju toamji mã mehhimpej atajê mã ihhêj, ne intête me to hawry.

¹⁹Ne hãn ne me amã hũjarên to me ipa to hane he:

— He nee jũm te ampo itajê na, me ato ihhimpej catê hamreare. Cwỳrjapê caha gapacta ne atỳj me ampo itajê cunea ton to me apa — hajỳr cacrõ, quêha cute amji kam me hapac xà kêanre to ame ipa to, cute me amji pyrãc xà atajêa pê quê ha ihhêj rũm me hõ pahhi, na quê ha taame to ihhimpej. Na quê ha nee meamji mã hamãr, ne mehkên ton jicu nare. Ýhỹ, por cu ha ampo to amji mã me pahhimpej ata pê quê ha me pajõ pahhi, na quê ha taa me pahto ihhimpej.

Cu ha me pampej mã me acjêj, ne kam me papa rohnỳtti mã

²⁰Ne mehkwyê te ame ampo kêanre ton to me ipa, ne ramã mehkên cati wỳr mempraar kam, cute me pajõ Pahhiti pê Jeju Crixto pê me

pahkritxwý na meharēn par. Ne hÿrmã me ipipkjêr, ne toa amji mã mehhimpej xà ata kôtri, pjê ita kam, cute amji kam me hapac xà kêanre atajê pê me cator. Jirô pê mã ri, cute ajte me Jeju te amji kam hapac xà impejti ita jicu, ne ahna me harcô mēn, ne hacpÿa mã cute amji kam me hapac xàkêanre ata wÿr me ipipkjêr, ne toa amji mã mehhimpej to me ipa. Ne cute amji kam me hapac xà ita pê ri me hõ pahhi. Ne me cupê ihhêj rûm kryhti te apu ampo teppro ata pyrâac, ne nee amji mã hamãr, ne me ampo kên tonjicu nare. Ne hamre, ita caxuw cute mamme amji pupun xà ata jirôa pê ihkêanre ita mã me hàr.

²¹ Quê ha jÿm te ramã Jeju jahkre pej, ne ihkôat ramã ipa cacrô, cute hicu, ne hipêr ampo kên ton to ipa na amji mã to ihhimpej na, quê ha jÿm teJeju jahkre pej nare kam, to kên xà ata jirôa pê Pahpãmapu to kêanre ne. Ne por wa ame ato icakôc itajê, quê rÿ mã nee me Jeju te amji kam hapac xà impejti ata na me hahkre pej nare. Ampo na? CuteJeju te amji kam hapac xà pyr ata jicu xàa kam, quê ha mam cute me amji pupun xà atajê jirôa pê, cute meamji pupun xà ata me cumã ihkêanre ne. ²² Ne cute me hajÿr catêjê pê, pê mã nãm, pom rop hãn ne hõjahir, ne ahna ahtÿm nare, mã hacpÿa mã hõjahir ku, ita na mã cute me hajÿr. Nepê mã nãm crô te hajÿar, quê ha cô ata kam xwa, ne amji cuhhô, ne ahnaahtÿm nare, quê ha hacpÿa ne amji jaxà, ne carêc ata kam xwa. Ita jÿkjê na mã mehkên catêjê te me hajÿar, ne mempej mã me acjêj, nekam ame ipa ry nare, ne hacpÿa mã mehkên mã me acjêj.

Quê ha ihtÿj jÿ caxuw Pahpãm ampo cunea to hamre

Ruc 13.6-8; Tijac 5.7-11; Ipipêñ Xà 19.11-16

3 ¹ Imã ikwÿ nō kînti itajê, pom ihkàhhôc ita pê hapu na ite me amã ihhôc ita. Ne pom ite me amã ihkujahêc to ipijakrut ita kam, wa itehipêr ate amji kam me gapac xà impejti, tetetti to ate amji kam me gapac na me aton, mãr ca nee me to gapac kêt nare. ² Ne wa ite me amã Pahpãm jarkwa rer atajê to, ate meamji japackre na me aton. Ne mam rÿ pêa mã Pahpãm jarkwa to mehçakôc catêjê atajê, pê catyt kam ajco me ipa, ne mempejti. Ne imã, por me harkwa cunea na ihhôc atajê to, ate me amji japackre na, imã me ato prãm. Ne hanea ne me pajô Pahhiti pê me pahpytâr catê te me amã harkwa na me iprarcatêjê na me iton atajê nōa mã cute me amã harkwa jirên atajê to, ca me amji japackrea ne.

³ Ne imã me ate ampo cunea jamre xà kam, me awÿr mehkêanre japôj xà ata na, ate me hahkre pej na, me ato prãm. Ne quê ha, cute amji kam mehapac xà kêanre to amji mã mehhimpej to me ipa atajê, quê ha amjia kôtame ipa. Ne ame ana xwÿ to me ipa to:

⁴ — Por Jeju te amji jaxàr xà na me amã amji to hÿjahkre ata, jô ri mã cator xà ita? Nee jÿ caxuw cator xà nare. Ne ramã ame pahcÿmxwÿ cunea tyc par. Mã mam ramã pjê te amji ton pêa mã, ampo cunea cormã hãm ita na, ne nee rÿ jÿ caxuw ampote amji to ipintuw nare — hane.

⁵⁻⁶Ne pom me ana xwỳ to ame ipa itajê, cama ame amã mehhêj to ame ipa. Ampo na? He pjê te amji ton pêa mã, ramã kam ampo jãhtôa te amji toipintuw. Pê mam Pahpãm pjê me cõjkwa te amji ton na cumã harkwa, pê ihtỳj amji to. Ne cute cô me pjê to ajpẽn pê ipicapôn jirô pê mã ri, Nowe xwỳ jõ amcro kam, hacpỹa mã cute cô ita to pjê cunea pro, ne to mehcunea jipej tu. Nepom ame ana xwỳ itajê mã, nee ita jahkre pej prãm nare. ⁷Pê pjê me, cõjkwa te amji ton na cumã harkwa, ne hanea ne jũ caxuw cutea amji to caxàr na cumã harkwa hyr hiahpuro. Ne nee ita caxuw cama me tohamre pyrentu to prãm nare. Quê ha xa Pahpãm te mehcuneacukij xà jõ amcrocato, quê ha amehcukij, ne ajpẽn pê me to haprãr xà ata na pit mã ramã me hikaj. Ne quê ha amcro ata cato, quê ha Pahpãm mehkên catêjê cunea kên mã me curê.

Pahpãm mã me pahnõ pictor na to prãm nare, na ri cormã me pajikaj

⁸Imã me ijõ ikwỳ nõ kĩnti itajê, me pajõ Pahhiti mãa, caku te mir pê amcro pyxit peaj. Ne cumã amcro pyxitpeaj pê caku te mir. Na ca ha atỳj me to amji japackre. ⁹Ne mehkwy me to amji kam hapac xà to kêanre ne me amji mã: — Me pajõ Pahhiti te ampo na amji tonatajê, quê ha jũa caxuw cormã to. Nare, quê ha nee cute ampo na amji ton xà atajê nõ ton nare — hane. Ne ampo na mã hacpỹa ne cute pjê ita wỳr amji jaxàr xà ita to kuu apu ihkên? Nee mã ampo na nare, Pahpãm mã mehnõpictor na to prãm nare, ne cumã mehcunea te hỹrmã meipipkjêr na me to prãm, na ri cormã me hikaj.

Quê ha jũ caxuw pjê me cõjkwa kam ampo cunea to caxàr partu

¹⁰He nee amã me hàhkĩj xi te me awỳr imprar, ne me apê ampo to hàhkĩj xà na hahkre pej nare. Ita jĩkjê na mã hacpỹ ne me pajõ Pahhicator xà te hajỹar, na ca ha nee amji wỳr cator xà na me hahkre pej nare. Ne cator xà jõ amcro ata kam, quê ha hàhkrihkrit krãhhi tỳjti meajkaam, quê ha jũ kam cõjkwa tẽ. Ne jũ kam ihtêm xà ata kam, quê ha ramã pyt capa, ne putwry capa, ne caxêre cunea capa, ne ampo cunea caxàr tu. Ne hanea ne pjê kam ampo itajê cunea to caxàr tu.

Jeju te amji jaxàr xà caxuw amji mã me pajãhcuprõn hiahpuro

¹¹Ne me amã ampo itajê cunea jamre na hahkre pej ita kam, jũ mã ca ha ajte me? Ca ha atỳj Pahpãm mã me amji jõr to me apa, ne catyt kam me apa. ¹²Ne Jeju te amji jaxàr xà jõ amcro ata pê Pahpãm jõ amcro catia. Na ca ha cator xà ata na me hikaj. Ne ca ha ampo pej cunea to me gãpẽn to me apa, mãr quê cyt ne me awỳr cato. Ne cator xà ata jõ amcro kam, quê ha cuhy cõjkwa tohamre. Quê ha pjê cacroa to cacro, ne ihhorhot ne ajgã. ¹³Cu ha Pahpãm te me pamã pjê intuw me cõjkwa tuw ton na, me pamã amji tohũjahkre xà ata na, cu ha me hikaj. Ne pjê me

côjkwa tuwatajê kam, quê ha mehcunea, ihcunea nacatyt kam Pahpãm jarkwa kôt me ipa rohnÿtti mã. ¹⁴Cwÿrjapê ca ha imã me ijõ ikwÿ nõ kĩnti itajê, ate me amcro ita jikaj xà ata kam, ca ha ramã ate amji kam me gapac xà tetetti, impejti kam ampokên jamreare ata to amji mã me gâhcuprôn hiahpuro na, imã me ato prãm. Mãr quê cato, ne ahnaa me pahcunea pupu, ne ihkôt me pahna amji capa, ne nee ame pahcurê nare.

Pê jümjê Pawrô jũjarên xà kaj na me to pry ta

1 Timot 3.1-17; 1 Jowãw 3.2-3

¹⁵Ne Pahpãm te apu kuu ihkên xà ita pyrên ca ame gakry. Ampo na? Ca cormã apu ihkên ita kam, ihhêaj to cormã me anõ hÿrmã apkjê, quê haakên pê apytà. He Pahpãm te ramã me pamã me pahtõ kinti pê Pawrô ata mã amji jahkre pej catia ne hõr. Mã cute amji jahkre pejti ata kôt ampoitajê na me amã ihhõc. ¹⁶Ne cute hõ kàhhõc cunea kam ihhõc atajê kam, cute ramã me pamã Jeju te amji jaxàr xà ita kôt harên to amji pyrãc tu. Ne hõtpê hõkàhhõc kwÿ kam, me papê ampo kwÿ kam me pajapac jahkre kêatre atajê na hãn neme pamã ihhõc. Ne cute me amji jahkre kêatre atajê me, cormã kyre pê Jeju kôt me ipa atajê, ampo itajê kôt harên xà kaj na ame harê. NePahpãm jarkwa jõ kàhhõc kwÿa kôt me harên xà ihmajti atajê to pit mã me harê. Ne cute me harên xà atajê to me taa me amji kên mã me amji rê.

Cu ha Jeju te amji kam hapac xà tuwti kam amji to ajcamê

¹⁷Ne me ca nare, me ijõ ikwÿ nõ kĩnti itajê. Ramã quêt me amã jümjêatajê te amji kam me hapac xà teihcupan na, me amã hahkre pej. Cwÿrjapê ca ha amji to me guphêa ne. Ampo na? Ca ihhêaj to hanea ne mehkôt me Pahpãm jõ pry ta, ne ihkaj na ame apa. Ne nee hipêr catyt kam Pahpãm te amji kam hapac xà kôt me apa nare. ¹⁸He pê me pajõ Pahhiti pê Jeju Crixto pê me pahpytãr catê, me pamã cute amji kam hapac xätuwti gõ ita, ca ha cute me akam ipicamên na cama me hamã, quê ajcamê. Mãr ca mam ate amji kam me gapac xà atajê jirõa pê catyt kam apa. Ne ita caxuw, cu ha hõtpê Jeju to amji mã me cati to me hane he:

— Quêt apyxit peaj ne acati, ne ampeaj kamapej rohnÿtti mã. Ne wamehcunea te, pjê cunea kam, quêt acatihti me apejti na, me gahkre pej na meto prãm — hane. Taamã, ampeaj kam!

Jeju Na Mehkwỳ Jakrã Cunea Wỳr

MAM JOWĀW JÕ KÀHHÔC

Ýhỹ, pê Jowāw pê Jeju jarkwa na memprar catêjê nõ. Ne pê mam cupê tep pro catê, pê Jeju ihkôt ipa catê na ahna ahwỳ. Pê caku crê kam Jeju kôt ipa, ne cute amji kam hapac xà cunea na hõmpu. Ne ramã ihwej tu kam ri cutepjê cunea kam Jeju na mehkwỳ mã ihkàhhôc ita hôc, ne ihkujahêc. Na ri hõ kàhhôc ita japrỳ te **Jeju Na Mehkwỳ Jakrã Cunea Wỳr, Mam Jowāw Jõ Kàhhôc** (1 Jowāw).

Ne pom cu me mam ihkàhhôc cahyt ita kam ri cute me pamã, pahte me ampo kên ton, neahna amji to me papimxur nare, ne hirãa pê Pahpãm mã pahte ahna me amji jarên to me pamã hahkre. Ne hanea ne jũ mã me pahte me, ne me papêPahpãm tekjê na pahte me amji jahkre pej to me pamã hahkre. Ne hanea ne cute me pahkwỳ me, me pamã ajpên kinti to me pamã hahkre.

Jowāw te Jeju pupun na amji jarên xà

Jowāw 1.1-4

1 ¹Hàpà me ikwỳ pê Jeju na mehkwỳ, ipê Jowāw pê mam Jeju kôt me ipa catêjê atajênõ. Ne pa wa ha me amã ihhôc ne ihkujate. Ýhỹ, wa ha me amã ramã rỳ pëa mã pjê ton xwỳjrea na jũm ipa ata jarê, ne ahna ihhôc. Ne jũm ita pê me pamã pahte amji kam me pajapac xàjôr catê. Ne cupê Pahpãm te amji kam hapac xà xakat. Ne cupê me pamã Pahpãm to ipipê catê. Cwỳrjapê ri haprỳ pê “Pahpãm Jĩa Jarkwa”. Ne por jũm ata pê jũm nare, he cupê Jeju Crixto. Pê hũmrea na amji to, nepjê wỳr wrỳ, pê wa ihkôt me ipa catêjê me, meijapac jĩa to me kampa, ne me ito jĩa to ajco me hõmpu, ne mehkopĩ, ne itỳj me ijũhkra to ajco mehcupê.

²Ýhỹ, Jeju mam Pahpãm cahê na ihkrĩ, ne cupê Pahpãm Jĩa Jarkwa, ne cupê me pamã cõjkwa pĩn Pahpãm te amji kam hapac xà to ipipê catê, ne pëwa cute me cumã to ipipê na hõmpua na, wa me amãharên to mõ. Ne taa mã ri Pahpãm cahê na pahte amji to me papijapar rohnỳtti mã na me pahto. ³Ne ampo na mã wa me amã Jeju jarên to ipa to hane? Nee

mă ampo na nare. Imă me ate Jeju me Pahpăm pê Hũm me, me ajpẽn to ikwỳ nŏ na meato prămte hajỹr, pom pê wa ipê hŏ ikwỳ nŏ he. Ita na cu ha me pahcunea Jeju me ajpẽn kam me pahhŏnco ita na me papa. ⁴Ate me ijŏ kăhhŏc ita cahyt ne mempar, cu ajpẽn kam me pajakrya to me pajakry prăm to, wa ite me amă ihhŏc ne ihkujahêc.

Cu ha catyt kam Pahpăm jarkwa kŏt me papa na, cu ha me pahhŏnco tu
Epet 5.3-21; 1 Timot 2.5-6

⁵Pê Jeju me imă, ite me amă Pahpăm jarẽn xà ita to pê hahkre he:

— Amcro jăhcujrohti ita ihtỳj jũ ri me pamŏr xà ata to me pamă hahkre, ne awcapătô kam, cu nee jũ kam me pamŏr xà ata na me amji jahkre pej nare. Ita kŏpit na măPahpăm pê amcro jăhcujrohti ata pyrăac, ne ihtỳj me pahte amji kam me pajapac xà impejti to me pamă hahkre — hane. ⁶Cwỳrjapê cu ha me pahnŏ te nee Pahpăm kŏt papa nare, ne pahtỳj ampo kên ton to me papa na, cu ha ihhêj ne awcapătô kam me pahkrĩ. Cu ha awcapătô kam me pahkrĩ cacrŏ, cu ha me amji jarẽn to:

— Ipê Pahpăm jŏ ikwỳ nŏ, na wa cume ajpẽn kam ihŏnco ita na ipa — hajỹr na, cu ha ame pahhêj xia jarê, ne nee me papê catyt kam me papa catêjê nare. ⁷Ne nee pahte me hajỹr xà nare, cu ha quêt Pahpăm cuxă, catyt kam me papa, ne harkwa kŏt me pahcunea ajpẽn to me ikwỳ nŏ. Hŏ, cu ha me pahcunea me hane, ne pahte me hajỹr xà ita pê ihhêj rũm amcrojăhcujrohti kam me papa xà ata pyrăac, ne ma amji mă me papa xà pupu ne ihkŏat, catyt kam me papa. Pê Pahpăm kra pê Jeju me pajaxă kam ty, ne caprŏ jaxwỳ, necaprŏ ata pê ihhêj rũm cŏ te ampo tũmti cuhhŏn pyrăac. Ne cute me pahkên atajê cuneacuhhŏn par ne to hapac kêt. Cwỳrjapê ri pahte amji kam me pajapac xà cunea tetet pit.

Cu ha Pahpăm mă pahte me ampo kên ton atajê cunea na me amji jarẽn

⁸Quê ha me pahnŏ te amji jarẽn to:

— Nee ite amji kam ijapac xà kên nŏ hamreare — hajỹr na, quê ha ramă taa apu amji toihhêj to mŏ, ne nee caxwăm pê cumă Jeju te amji kam hapac xà jahkre pej nare. ⁹Ne quêt ajteare mă ita to, cu ha me he. Cu ha Pahpăm mă me pahte ampo kên ton atajê cunea na me amji jarẽn. Ne pahte amji jarẽn xà ata kam, quê ha Pahpăm pahte me pahkênton atajê to tojnŏ ne hicu, ne pahte amji kam me pajapac xà kên cunea pê ihhêj ne me pahcuhhŏn pa. Ne cupêa ri catyt kam ipa catê, ne pê ramă me pamă ahna amjijarẽn xà ata, quê ha to. ¹⁰Ne pê ramă Pahpăm rỳ pêa mă me pahto hũjarẽn to hane he:

— Pjê kam mehcunea mehkrĩ itajê ihtỳj hŏtpê mehkên ton to me ipa — hane. Cwỳrjapê quê ha me pahnŏ te amji jarẽn to:

— Wa ite nee jũ caxuw ampo kên ton nare — hajỹr na, quê ha ramă Pahpăm mă ihhêj xi na hacjê, ne nee Pahpăm jarkwa to amji jahŏt to ipa nare.

Jeju Crixto pê me pahkritxwỳ

2 ¹Me apê imã me ikra kīnti atajê pyràac. Ampo na? He ca ikôt Jeju to amji mã meahimpej, na wa ite me amã ihkàhhôc ita ton, mār ca me cahyt ne me kampa, ne nee me ampo kên ton to me apa nare. Nāmri quê ha me pahnō te ihkên xà nō tonna, quê ha Jeju pê catyt kam ipa catê ata taa to amji pytà, ne taa Hūm mã harē. Ne cumã amji jarên to:

— Jūm ata te ihkên ton xà ita jahpan xà na ihkên mã mēn nare. Ampo na? He pê wa ramã pa amji toihkritxwỳ, ne hahpan xà na ty — hane. Jeju peaj to impej, na ri ihtỳj me pahto hane. ²Jeju tyc xà ata kôt ri Pahpãm ihtỳj pahte me pahkên ton itajê jicu, ne totojnō ne to hapac kêt. Ne nee mã pahte me pahkên ton xà jahpan xà na pit mã Jeju tyc nare, ne pjê cunea kam, mehcunea te mehkên ton atajêcunea kritxwỳ na ri cute amji ton ne ihtyc.

³Cu ha pahte me Pahpãm te me pamã harkwa jirên itajê kam catyt kam me pajapac na, cu ha pahtỳj me pamã pahte Pahpãm jahkre pej na me amji jahkre pej, neihkôt me papa xà impej na, me pamã amji jahkre pej.

⁴Nāmri quê ha jūm te amji jarên to:

— Wa ramã ite Pahpãm pupun pejtu, ne imã hahkre pej, na wa itỳj ihkôt ipa — hajỳr, ne nee por cutecumã harkwa jirên xà atajê kam hapac nare na, quê ha taa ramã apu amji to ihhêjto mō, ne apu ahna amji caprỳ jarē. ⁵Ne quêt jūm te Pahpãm kam hapac pejti toipa ata mã ri caxwãm catiamã Pahpãm kīn, ne ihtỳj cumã Pahpãm me cute ajpên kam ihhônco na amji jahkre pej. ⁶Nāmri quê ha jūm te amji jarên to:

— Wa Pahpãm me ajpên kam ihônco tu — hajỳr ata, quê ha harkwa to amji japackrea ne, ne ihtỳj Jeju pêPahpãm kra te amji kam hapac xàa kôt ipa na amji to ihtỳj tu ne. Ne ihtỳjcumã Pahpãm me ajpên kam ihhônco tu na amji jahkre pej.

Cu ha me pamã ajpên kīnti to me papa to me prãm

Jowāw 13.34-35; 1 Jowāw 3.14-18

⁷Imã me ijō ikwỳ nō kīnti itajê, xà ajkī cormã wa Pahpãm te me amã harkwa jirên xà itajê na me amã ihhôc? Hãpà! He rỳ pêmã ramã pahte me ajpên kīnti xà ita na cute me pamã harkwa jirên xà ata na me gūpar.

⁸Na wa ha Jeju te amji kam hapac xàa kôt hipêr me amã harên to intuw. Ne pahte me ajpên kīn kam me pahtēm xwỳjrea na, pê mam ramã Jeju amjimã me pahkīn. Ne pom Jeju te amji mã me pahkīn ata pê ihhêj rūm pyt krã cator pêê mã hàhcujro. Ita kôpit na, pahte me ajpên kīn to me papa xàita pê ihhêj rūm ramã pyt jàpir tu jàhcujro. Na ri pahte ajpên kīnti to me papa xà ita pê ihhêj rūm, nee me pahkam awcapàtkô nare.

⁹Nāmri quê ha jūm amji jarên to:

— Pahpãm te ihhêj ne imã ite amji kam ijapac xà cujro, cwỳrjapê ri imã ampo pejcunea ton jahkre pej — hane, ne ma apu Jeju kam ajpên to mehkjêjê atajê

nõ caca, ne nee me to impej nare na, quê ha ihhêj ne cormã awcapàtkô kam apu ipa ita na. ¹⁰Ne por jũm mã Jeju kam cute ajpên toihkjê kĩnti, mã ihkĩn mea mã ipaata pê ihhêj rũm amcro jãhcujro kam ipa xà, cwyrjapê quê ha nee catyt kam ipa jicu nare. ¹¹Ne por jũm mã ihkjê kĩn nare, mã ma apu ihcaca ata pê ri ihhêj rũm awcapàtkô jãmkřã kam mŏr xà ata pyrãac. Ne cupê ihhêj rũm mento tũam, ne nee hãn ne catyt kam Pahpãm te amji kam hapac xà kŏt ipa nare.

Cu ha pjê kam amji kam me hapac xà kaj na me papa to me prãm

¹²⁻¹⁴Ihhêj rũm me apê me ikra pyrãac, na wa ite me amã ihhŏc. Ampo na? He me amã Pahpãm pê me Apãm jahkre pej. Na ri ihkra pê Jeju tyc xà atakŏt, cute me akên itajê to tojnŏ ne hıcu. Ne por ca ramã Jeju kŏt ate me apato me amji kãhtu atajê mã, wa ite hanea ne ihhŏc. Ampo na. Me amã, por pê ramã Pahpãm pjê ton xwýjrea na jũm ipa ata jahkre pej. Ne pom ca curmãJeju kŏt ate me apa kam me atêm atajê mãhanea ne ite ihhŏc. Ampo na? He ampeaj kam meatýj, ne me acaxwãm pê ihtýjPahpãm jarkwa amji to ajpa. Na ca ate amji kam me gapac xà impej to, ate mepahcurê xwýn pê Xatanaj jırŏ pê me axãm, ne me tojhê.

¹⁵⁻¹⁶Ne wa ha me amã pjê ita kam, Pahpãm curê xwýn te amji kam hapac xà me ampo cuneahapŏj itajê cawpa. Pom pjê kam ampo kên itajê nee cŏjkwa pĩn, Pahpãm pĩn hapŏj nare, ne pjê ita pĩn ri hapŏj. Ne por Pahpãm curê xwýn catêjê atajê te amji kam hapac xà incrê itajê mã he.

Cute me Pahpãmmã ampo kĩn nare atajê xen.

Ne cute me cumã ampo kên xen atajê to, cute me amji
cajpuawprãmte, ampeaj kam me cumã hãn.

Ne hanea ne quê ha ampo te mehcajpuaw ata pupu, ne me ahna
prãm pyrentu.

Ne hanea ne me cumã hàhcukrêj jãhtŏti atajê kŏtihtýj amji to me
cati prãm to me ipa.

Atajê mã ri Pahpãm kĩn nare. Na ca ha nee me apêjũmjê atajê pyrãc, ne amji mã ampo itajê na pit mã prãm to me apa nare. Ne Pahpãm ca quêt amehkĩn. Nãmri ca ha ate me amã ampo itajêpit kĩn na, quê ha nee me amã Pahpãm kĩn nare.

¹⁷Ne mêr ampo na mã wa me amã ampo itajê cawpa to hane? Nee mã ampo na nare. He quê ha jũ caxuw pjê te amji kam hapac xà itajê cunea me, Pahpãm curê xwýn te ampoxen xà itajê cunea ihkên mã axà ne hamre tu. Ne por quêt me cumã Pahpãm kĩn, mã Pahpãm mã ampo kĩnti to pit mã amji kam me hapac tome ipa atajê, quê ha quêt me ahtwý, ne amji to me ipijapar rohnýtıti mã, Pahpãm cahê na.

Cu ha nee Crixto curê xwýnti hêj xi xà kam me pajapac to me prãm nare
1 Jowãw 4.1-6; 2 Jowãw 7-11

¹⁸Me ikra, he ramã ampo cunea jamre xà na hàhtêp. Ne ramã ate me Jeju Crixto curê xwýnti ata jarên par. Ne por jũm ata pê ihhêj ne pŏ

rŭm Jeju Crixto teamji kam hapac xà kôt ipa catê, ne caxwãm pê aracri cupê Jeju curê xwÿn. Neramã Jeju curê xwÿn catêjê jãhtôa ne me hapôj, cwÿrjapê ri ramã me pamã ampo cunea jamre xà na hàhtêp to mŏr na hahkre pej. ¹⁹Ne pê mam me pahcurê xwÿn itajê pê me pahkwÿa, ne ihtÿj me pahcahê naipa. Ne hamre, ramã ma me papê cator, ne nee mã ampo na me papê cator nare. Pê pahte amji kam mepajapac xà kaj na amji kampa. Quê ha cama me cupê me pahkwÿ na mã, quê ha ita ri me pahcahê na ame ipa. Pê me papê me hapôj xà ata kôt me pahcunea te me cupê me pahkwÿ nare na me hahkre pej.

²⁰Pê Jeju Crixto me amã Pahpãm Carô Pejti gŏ, pê ca ahna me amji capa, cwÿrjapê ri me acunea mã Pahpãm te amji kam hapac xà impejti, hêj xi nare ata jahkre pej. ²¹Xà ajkí ate me Pahpãm te amji kam hapac xà impejti jahkre pej nare na mã, wa ite ahna me amã ihhŏc? Hãpã. He ramã me ate, cute amji kamhapac xà impejti kam ihhêj xi nare na, ate me hahkre pej.

²²Wa ha me amã mehhêj xi catêjê jarê. Quê ha jŭm te me amã hŭjarên to:

— He nee Jeju pê, por pê Pahpãm me pamã pahpytâr catê na Crixto to awjahkre ata nare — hajÿr na, ca ha mehhêj xi na me hahkre pej pyrentu. Ne ihtÿj Jeju meHŭm pê Pahpãm to mehhêj to me ipa, ne ma ame curê. Cwÿrjapê ri jŭm ata pê Crixto curê xwÿnti. ²³Ne por jŭm Jeju pê Pahpãm cãmter ita to ihhêj xi ata, hanea ne ihtÿj Pahpãm pê Hŭm to ihhêj xi, ne ma apu curê. Ne quêt jŭm te ihcãmter na amji caxàrata te ramã hanea ne Hŭm na amji caxàr.

²⁴Pê ca Pahpãm wÿr me apkjê, ne me kampa atakam, pê ca me Pahpãm teamji kam hapac xà cunea jahkre pej. Ne ate mehahkre pej atajêa kôt, ca ha catyt kam me apa kam me toacrà. Ita na ca ha ihcãmter me Hŭm kam me ajpên hŏnco ita na, ne me atír rohnÿtti mã, Pahpãm cahê na. ²⁵Hŏ, ampo ita to pê ihcãmter me pamã awjahkre.

²⁶Ne pom ame amã ihhêj xi prãm to me ipa itajêna, wa ite me amã ihhŏc. ²⁷Ne ramã Crixto te me amã Carô Pejti jŏr. Mã me akam Carô Pejti itakam, ca ha nee me jŭm te me amã ampo to hahkre xà atana me prãm nare. Ampo na? Carô Pejti ata ri ihtÿj me amã Pahpãm te amji kam hapac xà cunea tohahkre to ipa. Ne cute ampoto hahkre xà atajê nee mã ihhêj xi nare, ne quêt ampeaj kam ri. Cwÿrjapê ca ha Carô Pejti te me amã ampo to hahkre xà atajê na kam megapac to impeaj ne, ne ma ihkôt me hakop. Ne Crixto me ajpên kam me ahŏnco kam me to acrà.

²⁸ÿhÿ, imã me ikra kinti itajê. Quê ha ihtÿj jŭ caxuw me pajŏPahhiti pê Jeju Crixto hacpÿ ne me pahwÿr amji jaxà. Cwÿrjapê ca ha Crixto me ajpên kam me ahŏnco kam me to acrà ita na. Mã ca nee kam ame apahãm, ne ame amji mã hŭpa nare, ne atÿj cuna mã me xa.

²⁹Ne ramã me amã Crixto pê Pahpãm kra te catyt kam ampo pej pit ton to ipa na hahkre pej. Na cu ha pahte catyt kam ampo pej pit ton to

me papa na, cu ha hanea ne me papê Pahpām kra na ramã me pamã amji jahkre pej.

Cu ha pahtỳj jũ caxuw Jeju Crixto me, me ajpēan
Jowāw 1.12-13; 1 Petrô 1.13-21; 2 Petrô 3.11-14

3 ¹Pỳhàpà, he Pahpām mã me pahkían to me pahkín! Ne ihtỳj cute me pahto amji kra. Mã pjê kam me cupê Pahpām tekjê nare, ne ma ame curê atajê pê me papêihkra na me pajahkre kêatre. Ampo na? He nee me Pahpām jahkre pej nare na ri. ²Imã me ijô ikwỳ nõ kinti itajê, ramã me papê Pahpām kra. Ne cormã jũ caxuw me papê ihkraa to ihkra xà ata na, cormã pahte me amji jahkre pejpej nare. Ne ita ri me pamã hahkre pej he: Quê ha hacpỹ ne Jeju me pahwỳr amji jaxà, ne me pamã amji to ajpê, cu ha ajteare mã, ihnô na me hõmpu. Ne pahte me hõmpun xà ata caxuw, cu ha me amji to intuw, ne Jejume, me ajpēan. ³Ne pahte amji to me papintuw xà impejti ita jikaj xà ata kam, cu ha hahkà na amji tète pahte amji kam me pajapac xà kên cunea japôj to memô. Ne pahte amji kam me pajapac xà tetetti impejti to me amji kampa to me hanea, pom quê Jeju te amji kam hapac xà tũm nare ne ihtetetti he.

⁴Ne quê ha jũm te, cute amji kam hapac xà kam ampo kên to ihtũm na, quê ha taa ramã Pahpām jarkwa jirô pê ihpỳm, ne ihkaj na amji kampa. ⁵Ne ramã me amã Jeju te jũ caxuw ampo kên ton nare na hahkre pej. Ne taa mã pê me pahwỳr wrỳ, cute me pahcunea tète me pahkên jūrên prãmte. ⁶Na cu ha pahte Jeju kam me ajpên hõnco na, cu ha nee me pahkên ton kam me to pancrà nare. Nãmri quê ha jũm te Jeju jahkre pej nare, ne hõmpun pej nare kam, mãnea mã ihkên ton kam to incrà na, quê ha nee Jeju to amji mã ihhimpej, ne me ajpên kam ihhõnco nare.

⁷Imã me ikra kinti itajê, nee ca amji na me jũm jamār quê me amã ihhêj nare. Ne por jũm catyt kam Pahpām cuna mã impejti to ipa ata pê riJeju pyrãac, ne catyt kam ipa. ⁸Nãmri quê ha jũm te mãnea mã ihkên ton to ipa na, quê ha Pahpām cuna mã ihkêanre ne, ne cupê me pahcurê xwỳnti pê Xatanaj tekjê. Ampona? Pê Pahpām pjê ton pêã mã, pê Xatanaj ihkên ton kam tẽ. Cwỳrjapê ri cute Xatanaj jàpên xà cunea to hamre xà caxuw me Pahpām kra cato.

⁹Ne por me cupê Pahpām kra atajê, nee mehkên ton kam me to incrà nare. Ampo na? Me caxwãm pê Pahpām te amji kam hapac xà hàpên to ipa na ri. Ne Pahpām pê me Hũam to me Hũm ita kam, jũ mã quê ne ajte mehkên ton kam me to incrà? Jũ wỳr quê jũm hane! ¹⁰Měr me Pahpām kra, me Xatanaj kra te amjikam hapac xà to me ajpên ne me hõmpu. Por jũm nee catyt kam ipa nare ata me, cumã ihkjê kín nare atahirã pê nee cupê Pahpām kra nare, ne cupê Xatanaj kra.

Cu ha me pamã ajpên kînti to me papa to me prãm*Ruc 10.25-37; Jowāw 13.31-35*

¹¹ Imã me ijō ikwỳ nō kînti itajê, por pê wa mam me amã Pahpãm jarkwa jarê ata, wa ha hipêr me amã harên to mō:

— Cu ha me pamã ajpên kînti ne — hane. ¹² Cu ha nee me papê me panquêt xwỳ pê Cãn kêanre pê Xatanaj tekjê, ne ihtōa cura ata pyrác nare. Ne mēr ampo na mã pê ihtō te amji to hapure ita cura? Pê ajco hapure catyt kam impejti ton to ipa, ne Cãn pê ihkînte ajco ihkêanre ton to ipa, ne ma apu ihtōre te impejti ton ita na to ihcaca, na pê ihcura.

¹³ Ỡhỹ me ikjêjê, he me cupê pjê ita tekjê catêjê te ihkên ton to hajỹr tũam. Ne quê ha cute me hajỹr catêjê ma ame acurê, ca nee me amji mã:

— Pỳhàpà, ampo na mã ame icurê? — hajỹr nare. ¹⁴ Ne por me cumã mehkîn nare atajê pê ri ihhêj rûm mehtyc pyrác, ne nee me ampo pej ton nare, nema ramã ihkên kam, cute me amji pupun xà kêanre ata wỳr me pra. Ne me pa nare. Ihtỳj quêt me pamã Jeju kam me cupê me pahkjêjê kîn. Cwỳrjapê cu ramã me papê ihhêj rûm pahte me pahtyc xà jahpan, ne ma me pampej mã, amjikînti ata wỳr me pamprar pyrác. ¹⁵ Quê ha jũm te ma apu ihkjê curê na, quê ha ramã Pahpãm mã cupê mehcuran catê pyrác. Ne ramã me pamã, jũm pê mehcuran catêata te nee Pahpãm cahê na ihkrĩ nare na, hahkre pej.

¹⁶ Jũ mã cu ha ajte me, ne me pamã ajpên kîn ita na me ajpên jahkre pej? MeJeju pupu he. Ampeaj kam cumã me pahkîn, cwỳrjapê ri me pajaxà kam ihtyc. Ata pê ri me pamã ajpên kînti xà. Na cu ha me pamã me pahkjêjêkîn hanea, cu ha pahtỳj mencwỳrjapê me pahtyc na me amji to ihtỳj tu to me papa. ¹⁷⁻¹⁸ Ne nee cu ha me pajarkwa to pit mã ame pahkjêjê kîn, ne me to impej nare. Ne me hâpên xà na cu ha me tehcajpa, ne me to impejti ne, ne ampeaj kam me pamã mehkîn. Ne quê me anō mã ampo, ca me akjêjê nō pupu quê apu ampo na prãm to mō, ca ha hõmpu ne atỳj gâhcukrêj to ihtehcajpa. Nãmri ca ha ate nee me akjêjê caprĩ nare, ne nee mehtehcajpar nare ita kam, jũ mã ca ha ajte ne amji jarên to:

— Imã Pahpãm kîn — hane?

Cu ha ajpên kînti to me papa na, cu ha pahcaxwỳn carĩcti kam me papa

¹⁹ Me pamã me pahkjêjê caprĩ xà ita ihtỳj me papê Pahpãm hêj xi nare ata tekjê na me pajarê. Cwỳrjapê cu ha Pahpãm cuna mã me paxãm xà jō amcro ata kam, cu ha nee me pahkên na me amji cãmji nare, ne quêtme pahcaxwãm pê me pahcarĩcti ne. ²⁰ Nãmri cu ha me pahcaxwãm pê me pahcarĩc nare na, cu ha cama me amji cukij to:

— Xà ajkĩ ipê Pahpãm tekjê? Nare mōrmō nee ipê hō tekjê nare — hajỹr na, cu ha cormã me Pahpãm mã ampo cunea jahkre pej ata to meamji japackre. Ne hanea ne cumã me pajirôa pê me pamã pahte amji

kam me pajapac xà pupun na me hahkre pej. Ne ita jirô pê cu ha cormã cumã me pahcapriata na me to amji japackre.

²¹Imã me ijô ikwÿ nŏ kinti itajê, cu ha pahte me ajpên kîn na, cu ha nee me pahcaxwãm pê amji mã ame Pahpãm cupa, ne nee ame pahpahàm nare. ²²Ne por cu ampo cunea na me cuwÿ atajê, quê haihtÿj me pamã cugô. Ampo na? Cu pahtÿj cute me pamã harkwa jirên itajê na me kampa, ne cteamji mã ampo kinti itajê to pit mã me hupkre cahkô to me papa. ²³Pê Pahpãm mehcunea mã harkwa hyr to hane he:

— Ikra pê Jeju Crixto to ca amji mã me ahimpej, ne hanea ne me amãa ajpên kinti ne — hane. Ne pê hanea ne me imã harkwa hyr to hanea he. ²⁴Quê ha jüm te Pahpãm te cumã harkwa jirên itajê na kam hapac to ipa na, quê ha cume ajpên hõnco tu ne, ne ajpên kam mehkri. Ne pê Pahpãm me pamãCarô Pejti gŏ, cwÿrjapê ri me pamã ita jahkre pej.

Cu ha nee Jeju curê xwÿnti atajê kam me pajapac to me prãm nare
1 Texarŏn 5.21-22; 1 Jowãw 2.18-26; 2 Jowãw 7-11

4 ¹Imã me ijô ikwÿ nŏ kinti itajê, quê ha me hàhtôa ne me amã amji jarên to:

— Pahpãm Carô Pejti te imã amji jŏr, wa harkwa kôt harên to ipa — hane. Ca ha nee me kam gapac nare. Ampo na? He ramã me hàhtôa ne pjê kam amehcahküm, ne Pahpãm jarên xà kaj na ame harên to me ipa. Cwÿrjapê ca ha ma me jüm te me amã amji jarên to hajÿr ata kôpî, neihkôt me hakop, hàpên xà atajê na. ²Cu ha me kampa, quê ha cute catyt kam me amã Pahpãm jarên to:

— Pê Jeju me paxümrea na amji to, ne me pahwÿr wrÿ, ne cupê, por pê Crixto to me pahkritxwÿ na, Pahpãm me pamã awjahkre ata — hajÿr na, ca ha me kampa. Ne me amãampeaj kam cupê me amã Pahpãm jarkwa to ihcakôc catê, ne kam Pahpãm Carô Pejti na me hahkre pej pyrentu.

³Nãmri quê ha cute Jeju jarên to hajÿr nare na, ca ha ramã kam Pahpãm Carô Pejti nare na me hahkre pej, ne kam Jeju Crixto curê xwÿnti carô kên na mehahkre pej pyrentu. He pê cu ramã ampo carô kên ita te pjê wÿr ajpên mŏr na me harên pa, ne hamre, ramã cator ne ihtÿj apu mŏ.

⁴Jeju kam me apê me ikra kinti atajê, me apê Pahpãm tekjê, na ca ramã cute me Pahpãm jarên kaj na ame harên catêjê atajê jirô pême axãm, ne me tohjê. Ampo na? He me akam Pahpãm Carô Pejti ihkri ita ri, pom pjê kam me kam ampo carô kên atajê jirôa pê ihtÿj. ⁵Ne me cumã pjê kam ampo itajê jarê, mã ihtÿj me cupê pjê ita tekjê pê Pahpãm curê xwÿn catêjê mekampa. Ampo na? He pjê ita te amji kam hapac xà ri me cumã harê, mãpjê ita kam me ipa catêjê pê Pahpãmcurê xwÿn atajê ihtÿj ahna me kampa. ⁶Ne me pa nare, he quêt me papê cŏjkwa pîn Pahpãm tekjê, ne cu me Pahpãm te amji kam hapac xà to pit mã me hupkre cahkô to me papa. Quê hajüm mã Pahpãm jahkre pej na, quê ha ihtÿj me pahkampa.

Nāmri quê ha cumã Pahpãm jahkre pej nare na, quê ha nee me pahkam hapac nare. Ita na cuha me Pahpãm Carō Pejti te amji kam hapac xà impejti hêj xi nare ata me, ampo carō kên te amji kam hapac xà kên te to ihcupan xà na me hahkre pej.

Cu ha Pahpãm cuxà me pamã ajpên kînti na to prãm

Jowāw 3.16-21; Roman 5.5-9

⁷Imã me ijō ikwỳ nō kînti itajê, cu ha me pamã ajpên kîn, cu ha me ajpên to impejti ne. Ampo na? Pahpãm te amji kam hapac xà ita te hajÿr pit, ne taa mã ri me pamã ajpên kînti ita na me pahtehcajpar toipa. Por jùm mã mehcunea kîn, mã me to impej ata pê ri Pahpãm kra, ne ihtÿj cumã Pahpãm te amji kam hapac xà na hahkre pej ne hahkre pejtu.

⁸Ne por jùm mã mehkin nare ata pê Pahpãm jahkre kêatre. Ampo na? Pahpãm jãhcaprĩa to hàhcaprĩ, ne cupê cumã mehkînti xà cunea xakat.

⁹Ne Pahpãm mã me pahkînti na cute me pamã amji to ipipê xà caxuw, me pamã pjê wÿr cumã ihkra pyxit peaj ata kujate, mãr cu me cute amji kam hapac xà intuwti impejti ita cwa, ne kam me pahtÿr rohnÿtti mã.

¹⁰Me pamã Pahpãm kîn, ne me pajirôa pê cumã me pahkîn. Cwÿrjapê pê me pamã ihkra pê me pahkritxwÿ ata kujate, mãr quê pahte me to kên ata jahpan xà na ty, quê Pahpãm pahte me to kên xà atajê jicu.

¹¹Imã me ijō ikwỳ nō kînti atajê, he ramã Pahpãm mã me pahkînti ita kam, cu ha pahtÿj me pamã ajpên kînti ne. ¹²Rÿ jū caxuw jùm te Pahpãm pupun nare cakrô, cu pahtÿj kam pahte me amjihônco. Mã me pahcaxwãm pê ihkrĩ, ne cumã me pahkînti na ri cute amji kôat me pahton, mã me pamã ajpên kînti. ¹³Ne cute me pamã Carō Pejti jôr na, ca me to amji japackre. Cwÿrjapê ri pahte Pahpãm kam me ajpên hônco tu na me pamã amji jahkre pej. ¹⁴Pahpãm pê me pajō Inxū Cati, na cu hōtpê mehcunea mã me harên to me papa to me hane he:

— Pê Pahpãm pjê wÿr ihkra kujate. Pê wa hōmpu ata temehcunea caprĩ ne mehkên catihti ata pê me hütär xàcaxuw pê pjê wÿr ihkujate — hane.

¹⁵Nāmri quê ha jùm te Jeju Crixto pê Pahpãm kra na harên na, quê ha Pahpãm jùm ata mã amji gō, ne kam ihkrĩ, quê ha hanea ne Pahpãm mã amji gō, ne kam ihkrĩ, ne ajpên kam mehhônco tu ne. ¹⁶Ne me pamã Pahpãm te me pahkînti na hahkre pej, na cu toa amji mã me pahhimpej to me papa. He Pahpãm pê me pamã ajpên kîn ton catê xakat. Ne por me cumã ajpên kîan kam mehkĩrĩ atajê ri, Pahpãm kam cute me ajpên hônco tu. ¹⁷Ne quê ha ihtÿj jū caxuw Pahpãm te me pahcukij xà ata kam ihtÿj me pahto ajcokjê. Cu ha Jeju te cormã pjê kam ipa reria mã me cumã mehkîntiata cuxà, me pamã mehkînti na, cu ha neeamji mã ame hūpa, ne kam ame pahpahàm nare. ¹⁸Quê ha jùm te mehcunea caprĩ ne mehkîn to ipa na, quê ha nee jū caxuw amji na ampo cãmji nare. Ampo na? He Pahpãm mã ampeaj kam me pahkîn, na cu ha nee amji mã ame ampo

cupa nare. Nāmri quê ha jūm māmehcunea kīn nare na, quê ha ihtỳj amji na Pahpām cāmji pyrentu, ne cumā hūpa. Ne cumā ampo cupahti ata quê ha ihkên ata mā cumê.

¹⁹Pahpām mā mam me pahkīnti, cwỳrjapê ri me pamā ihkīn. ²⁰Nāmri quê ha jūm te amji jarên to:

— Imā Pahpām kīn — hajỳr, ne cumā Jeju kam ihkjê kīn nare, mā ma apu curê, ata ri ihhêj xia to ihhêjxi. Ne jū mā quê Pahpām pupun nare kam cumā ihkīn, ne ihkjê pupun cacrô, ma apu curê ne apu ihcaca? Jū wỳr quê cute hajỳr ita kam apu amji mā hamā. ²¹Pê Crixto me pamā ita na harkwa jirên to hane he:

— Por jūm mā Pahpām kīn ata mā, quê ha ihtỳj hanea ne ikam cupê ihkjê ata kīn — hane.

Cu ha me pamā Pahpām kīn na, cu ha me harkwa kampa

Roman 8.35-37; Iipên Xà 3.5

5 ¹Por quê ha jūm Jeju Crixto pê Pahpām kra, pê Hūm me pamā cupê me pahpytâr catê na to awjahkre ata to jūm amji mā ihhimpej, ata pê riPahpām kra impeaj. Cu ha me pamā jūm xūmre ata kīn na, quê ha hanea ne me pamā ihkra ata kīn. ²Jīkjê na mā, quê ha me pamā Pahpām kīn, cu ha cute me pamā harkwa jirên xà atajêa na, kam me pajapac na, quê ha hanea ne ihtỳj me pamā me cupê Pahpāmkra na mehwỳ atajê kīn. ³Xà quê pijamā me pamā Pahpām kīnti ita kam, cu nee ajte cute me pamā harkwa jirên xà itajê kam me pajapac nare? Hâpà, cu ha pahtỳj amji mā me kampa! He xà cute me pamā harkwa jirên itajê ajkī ampeajkam me pamā ihtỳj? Hâpà. ⁴⁻⁵He pom me papê Pahpām kra ita, ne cutea ri me pamā ampo cunea kam, pahte Pahpām kam me pajapac xà caxuwcarôt jôr. Ne pahte Jeju pê Pahpām kra to amji mā me pahhimpej, cwỳrjapê cu ha pahtỳj, Pahpām te me pamā carôt jôr ata kôt, pjê ita kam Pahpām curê xwỳn atajê te me amji kam me hapac xà kên cunea tohjê.

Cu ha Jeju Crixto cāmta rūm Pahpām cahê na me papa rohnỳtti mā

⁶⁻⁷Ne jū mā cu ha me, ne me Pahpām te Jeju to mehcunea pytâr catê na hām xà ata na me hahkre pej? He cōjkwa kam menchrê ne cute me pamāharên. Atajê pê, Jeju Pām pê Pahpām ata te cō kam ihcumrâr xà ata kam ri, Jeju pê ihkra na harê. Ne pê hanea ne Jeju pê Hūm Jīa Jarkwamā iwryc ne ihtyc, ne cute caprô jaxwỳr ata te ri, cupê Pahpām kra na harên. Ne pê hanea ne Pahpām Carô Pejti hêj xi nare ata cupê Pahpām kra na harê. Ne menchrê atajê pê Pahpām to Pahpām, ne ajpên kam me pyxit peaj.

⁸Ne hanea ne cormā ita kam pjê kam menchrê ne me pamā Jeju pê Pahpām kra na harên to me ipa ita na. Atajê pê Pahpām Carô Pejti hêj xi nare ata, mā catytkam me pamā Jeju jarê. Ne hanea ne cō kam me

pahcumrâr xà ata ihtỳj me pamã harẽ. Ne hanea ne me pamã Jeju tyc na pahte me to amji japackre xà ata, ihtỳj me pamã harẽ. Ne harẽn crê itajê pipẽn pit, ne ajpẽn kam pyxit peaj.

⁹⁻¹⁰Ne quẽ ha jũm te me pamã ampo jarẽn na, cu ha pahtỳj me kampa. Ne quẽ ha Pahpãm te me pamã Jeju pê ihkra na harẽn na, cu ha pahtỳj pahte mehũmre jũjarẽn kam me pajapac jirõa pê me Pahpãm kampa. Ne por quẽ ha jũm Jeju pê Pahpãm kra na amji mã to ihhimpej ata, quẽ ha ramã amji caxwãm pê amji mã:

— Ampeaj kam ri Jeju pê Pahpãm kraa to Pahpãm kra — hane. Nãmri quẽ hajũm te Pahpãm to amji mã ihhimpej nare ata, quẽ ha ihtỳj Pahpãm te apu ihhêj xi na harẽ. Ampo na? He nee Pahpãm te Jeju pê ihkra jarẽn xà atato amji mã ihhimpej nare na ri. ¹¹Pê Pahpãm me pamã ihkra jarẽn to hane he:

— Ikra tyc xà ita cwỳrjapê, wa ha me amã cute amji kam hapac xà tuw pejti gõ, ca ha ihkõat me apa, ne me atyc xà jirõ pê mã icahê na me akrĩrohnỳtti mã — hane. ¹²Hõ, por jũm te Pahpãm kra to amji mã ihhimpej ata te ri, cute amji kam hapac xà tuw pejti pyr. Na quẽ ha ihtyc jirõ pê, Pahpãm cahê na apu ipa rohnỳtti mã. Nãmri jũm te nee ihkra to amji mãihhimpej nare ata te nee amji mã Jeju te amji kam hapac xà tuw pejti ata pyr xà hamreare. Na quẽ ha ihtyc jirõ pê, Pahpãm pê ampỳa mã apu ipa rohnỳtti mã. ¹³Ne me ca nare. Ca atỳj Jeju to amji mã me ahimpej, na ri ate me amji mã cute amji kam hapac xà tuw pejti ita pyr. Na ca ha me atyc jirõ pê, atỳj Pahpãm cahê na me akrĩ rohnỳtti mã na ate me hahkre pej pejtu, na wa ite me amã ihhõc.

Cu ha Pahpãm mã me pahcakõc, quẽ ha ihtỳj me pahkampa

¹⁴Cwỳrjapê cu ha nee Pahpãm cuna mã hũpa kam, ahna me pajãhtõt kam, cumã me pahcakõc nare, ne pahtỳj pahte ampo na me prãm xà ata na, cumã me amjicajrẽn. Ne ramã me pamã Pahpãm te me pahkam hapac, ne me pahtecajpar na hahkre pej. ¹⁵Quẽ ha ihtỳj me pahkampa, ne me pamã pahte ahna mepajãhwỳr xà atajêa jõr na, ramã me pamã hahkre pej.

¹⁶⁻¹⁷Quẽ ha jũm te Jeju to amji mã ihhimpej cacrõ, ihtỳj cormã ampo kên ton na, me anõ te hõmpun na, ca ha atỳj Pahpãm mã ihcajrẽn. Mãrquẽ Pahpãm akampa ne jũm ata tehcajpa, quẽ nee hipêr ihkên itajê nõ ton nare, ne quêt cute amji kam hapac xà tuw pejti na ipa. Pê Pahpãm pahtecuna mã me to kên xà atajê cunea pê me pahcator na me pamã harkwa to. Mã pahte hirõ pê me pahpỳm xà ata na ri ihkaj na, ne ihkêanre. Ne ampo kên pyxitata ri ihkwỳ jirõa pê ihkêanre. Na quẽ ha jũm te ihkên catia ata ton to hajỳr to ipana, quẽ ha ihtỳj jũ caxuw hahpan xà na ty. Cwỳrjapê ca ha jũm te ihkên xà catia ata ton to hajỳr na, ate hõmpun na, wa ha nee ate mehcajren xana, me amã ijũjahkre nare.

Pahpām me pahte ampo kên ton nare na me pahtehcajpa

Jowāw 17.3-6

¹⁸ Me papê Pahpām kra impeaj, na cu nee me pahnō ampo kên ton to me papa kam to pancrà nare. Ampo na? Jeju pê Pahpām kra, ne ihtỳj me pahcurê xwỳntipê me pahpytà, ne me pahto kên cupate me pajamār to ipa na, ramā pahte me hahkre pej. ¹⁹ Me pahcurê xwỳnti ita pjê cunea kam mehcunea to ihhimpej cacrô, mã ihtỳj cormā me pamā papê Pahpām tekjê na, ramā me pamā amji jahkre pej. ²⁰ Pê Jeju pê Pahpām kra cato, ne me pamā pahte amji jahkre pej krā kretigō, mār cu me Pahpām pê Pahpāam to Pahpām na me hahkre pej. Ne Jeju pê ihkra, ne cupêa ri pahte amji kam me pajapac xà tuw pejti xakat na me pamā hahkre pej. Netaa mã ri Hūm cahê na me pahkrī rohnỳtti mã na me pahto. Ne por Hūm pê Pahpāam to Pahpām ata me, cu ha ajpên kam me pahhōnco ita na.

²¹ Imā me ikra kīnti atajê, ca ha nee jū caxuw Pahpām ràn xà na pahpām cahàc krekà nō to amji mã me ahimpej nare. Hō, ijō kàhhôc ita pit. Hamre.

Me To Ihhimpej Catêjê Wÿr

HAPU NA JOWĂW JÕ KÀHHÔC

Ûhÿ, pê Jowăw pê Jeju jarkwa na memprar catêjê nõ. Ne cute por pyjê nõ te hũrkwa kam me cumă ampo kên to hahkre catêjê na amji caxàr ata mã, pom cu me hapu nahõ kàhhôc cahyt ita kujahêc. Na ri hõ kàhhôc ita japyrê te Jeju Na Mehkwÿ Jakră To Ihhimpej Catêjê Wÿr, Hapu Na Jowăw Jõ Kàhhôc (2 Jowăw). Ne kam cute cumă mehhêj xi catêjê cawpa, măr quê nee me kam hapac nare.

Jowăw te amji jarên xà

¹Hàpà me ikwÿ to mehhimpej catêjê! Ûhÿ, imă me apê me akwÿ to mehhimpej catêjê kinti atajê. Ampo na? He ihhêj rúm me apê menxyrxwÿapyràc, ne me akwÿ itajê pê me akra pyrâac. Pahpâm te ri me hamăr caxuw me acapi. Ûhÿ, ipê Jowăw pê Jeju na mehkwÿ to ihhimpej catê, itea wa me amăihkàhhôc ita kujahêc. Ampeaj kam imă me akîn, ne ita ri Pahpâm te amji kam hapac xàa kôt, catyt kam meipa itajê cunea mã hanea ne me akîn. ²Ampo na ri imă me akîn? Nee mã ampo na nare, wa Jejuto amji mã me ihmpej to me ipa, cwÿrjapê ri cute me imăme akinti ton, na ri ampeaj kam imă me akîn. Ne neequêt Jeju pê ihhêj xi catê nare, ne quêt cupê ampeaj kam catyt kam ipa catê, ne ihtÿj hăn ne me pahcunea kam ihkră, ne me pahcahê na apu ipa rohnÿtti mã.

³Ne wa ijôtpê Pahpâm mã me pahcunea cajrên to ipa to hane he:

— Ijô Inxū Cati, wa ha akra pê me ijô Pahhiti pê Jeju Crixto me ajwar me ana ahwÿ. Ca me icaprî, ne me ijamăr to impeaj ne. Ne me imă me icaxwÿn kam, ite amji mã me ampo cupa xà nare gõ, măr wa nee amji mã ame ampo cupa nare, ne me icarîcti kamame ipa, ampo kên jipôc ri. Ne hanea ne catyt kam me imă ite amji kam ijapac xà impejti to, ne me imă ajpên kinti to, wa me imă ajpên kinti ne — hane.

⁴Wa ite me akôt me ipa catêjê kwÿ pê, ihhêj rúmme ikra te catyt kam Pahpâm jarkwa kôt me ipa atajê kwÿ cajpar, ne ampeaj kam me hũrên

ijakry. Ampo na? He catyt kam me papa ita na ri Pahpām te me pahcunea mā harkwa hyr, ne ahna me pamēn.

Cu ha me pamā ajpēn kīnti ne
Jowāw 13.34-35; 1 Jowāw 2.7-11

⁵Ne ita caxuw wa ha ite me gapackre xà ita na me amāihhōc to hane he:
— Cu ha me pahcunea ajpēn kīnti kam ame papa — hajȳr. Ne pom ite me gapackre xà ita pê nee curmā ite me gapackre xà ata nare, ne cupê mam, por pê ca Jeju to amji mā me ahimpej xà ata. ⁶Cu ha pahte catyt kam ame ajpēn kīnti to me papana, cu ha ramā, por pê Pahpām me pamā harkwa hyr xà atana pahtȳj me kampa, ne ihkōat ramā me amji ton to me papa.

Mehhêj xi catêjê nee Jeju te me hūmre na amji ton na me harēn nare
Roman 16.17-18; 1 Timot 5.22; 1 Jowāw 2.18-26

⁷Ne ramā pjê kam mehhêj xi catêjê jàhtōa ne amehcakhūm atajê ri hān ne me Jeju jarēn to me hane he:

— Nee Jeju ita pê Pahpām nare — hane. Atajê pê ri Jeju Crixto curê xwȳn, na ri ihtȳj me pamā mehhêj to prām. ⁸Ca ha nee mempar nare. Côt ca me kampa, ne me Pahpāmmā ate me gāpēn xà ton itajê jahpan xà na, cute me amā hāmjōr xà atajê kwȳ to ame acto.

⁹Ne por jūm te Jeju te me hapackre xà impar nare, ne hirō pê ihpȳm ata, nee Pahpām jahkre pej nare. Ne por jūmjê te Jeju te me hapackre xàa kōt me ipa atajê, ihtȳj me Pahpām jahkre pej, ne me Jeju pê ihkra na me hahkre pej.

Cu ha nee mehhêj xi catêjê na me amji to pōj nare

¹⁰Quê ha jūm me awȳr cato, ne nee catyt kam me amā Jeju te me hapackre xà ata to hahkre nare na, ca ha nee ahna me amji caxār nare, ne nee me gūrkwā mā me to axār nare. Ne nee me cumā garkwa to:

— Apej pēa mā apa — hajȳr nare. ¹¹Nāmri ca ha ate me jūm ata mā hajȳr na, caha apê mehkwy nōa, ne me hāpēn xà kēn atajēa kwȳ to me gāpēn to me apa.

Pê Jowāw me cumā amji jarēn kujate
3 Jowāw 13-15

¹²Ne cormā ampeaj kam imā me amā ampo jarēn xàjāhtō, ne cama imā me amā ahna ihhōc prām nare. Newa ha itȳj jū caxuw amū me awȳr icato, ne meakuc ri me amā harē, cu ha ajpēn pyrēn me pajakrya to me pajakry.

¹³Ne pom ita ri me pahkjêjê ame ipa itajê te me amā amji jarēn kujahêc, ihkàhhōc ita kam. Itajê pê ihhêj rūm atōaj kra, pê Pahpām amji mā me capi. Hamre, ita pit.

Cajo Wÿr

JOWĂW JŌ KÀHHÔC CRÊ

ÿhÿ, pê Jowăw pê Jeju jarkwa na memprar catêjê nŏ, ne hŏ ikwÿ nŏ pê Cajo ata mǎ, pom cu ihkàhhôc crê cahyt itajê kujate. Na pê hŏ kàhhôc ita japyrÿ pê Cajo Wÿr, Jowăw Jŏ Kàhhôc Crê (3 Jowăw). Ne kam cumǎ Cajo te Jeju jarên catêjê tehcajparpyrên hakryti na cumǎ amji jarê. Ne hanea ne cute cumǎ mehwÿ to ihhimpej catê ata te amji kam hapac xà kêan kam ipa ata cawpa.

Jowăw te amji jarên xà
Pirip 4.1; 1 Texarŏn 2.19-20

¹ÿhÿ ikwÿ nŏ Cajo, ampeaj kam imǎ akîn. IpêJowăw pê Pahpām na mehwÿ to mehhimpej catê, itea wa amâihkàhhôc ita kujahêc.

²Wa ijŏtpê Pahpām mǎ acajrên to ipa to hane he:

— ÿhÿ, ijŏ Inxū Cati, ca ha ikwÿ nŏ pejti ita tehcajpa, quê ha impej pêa mǎ apu ipa to hanea, pom quê ramǎ caxwÿn kam cumǎ AcarŏPejti to ipa he — hane.

³Ne ita ri me arŭm me pahkjêjê nŏ cator, ne cute me imǎ me apejti na me apa na, me garên. Wa ite me garên pejti to me garên par, na ri ampeaj kam me apyrên ijakry. Ne cute imǎ me garên to hajÿr he:

— Cajo ihtÿj hŏtpê Pahpām te amji kam hapac xà kŏt, catyt kam ipa — hajÿr. ⁴Wa hǎn ne me ikwÿ to ihhimpej ne me hamǎ itajêjarên par xà impejti itajê to me harên pa, ne ampeaj kam hǎn ne ijakry.

Pê cute mehwÿjêjê tehcajpar pyrên Jowăw jakry

⁵ÿhÿ imǎ ikwÿ nŏ kînti ita, quê hǎn ne jŭa rŭm me pahkjêjê kwÿ me awÿr hapôj, ca ate cormǎ me hŏmpun nare cakrô, atÿj me to kênre nare. Ata na ri impeaj to impej. ⁶Na ri ita ri me pahkjêjê kwÿ cator, ne cuteita ri me cupê Pahpām na mehwÿ mǎ me garên to kênrenare, ate mehkînti ne me to impejti ita na. Na wa ite amji kam ijapac xàana amǎ ijarkwa. Quê ha me pahkjêjê te me apê amji to

mehapôj xà ata kam, ca ha nee me hüre kam amehkujahêcnare. Ne ate amji to Pahpãm cajpuaw xà na, ca ha atÿj mecumã ampo gō, quê ha ma me to pra. ⁷⁻⁸ Ampo na? Nee mã amjia kôt ame ipa nare, ne Pahpãmjarkwa kôt hãn ne ame ipa, cute mehcunea mã Jeju jarênpejti to harên prãmte. Ne ma me pra, ne nee me cupê Jeju na mehkwy nare atajê pê ame ampo cwÿr prãm nare. Cwÿrjapê ri me papê mehkwy teme cumã ampo jör na ri, me cumã ihprãm. Na ri pahte mehtehcajpar catêjê atajê, cu ha pahtÿj, cute me hâpên xà ton xà itajê kwÿ to me apê.

Nee Jeju na mehkwy jō pahhi kên mã Jowāw par prãm nare
1 Jowāw 3.6

⁹Ne wa ite ramã me gō krī kam, Jeju na mehkwy wÿrate mehtehcajpar xà ita na, me ato ihmpej prãm to, ite meamã ijō kàhhôc crire ata kujahêc. Nō na mã me anōjaprÿ pê Tijot ata ma apu ipar caca, ne ajte cama ihtÿjcumã amji to me gō pahhi na amji to prãm, ne ramã cute amji to pahhi. ¹⁰Cwÿrjapê wa ha jü caxuw curi icato, ne itÿjmehcunea kuc ri ihcukij ne cumã awjarê. Ampo na? Ihtÿj ampo na apu ito ihcakôc kêanre to ipa, ne ihtÿj ampo na me cumã ito ihhêj to ipa. Ne hanea ne, por me pahkjêjê kwÿ me hÿrmã me hapôj atajê na, nee amji to pōj nare, ne ma ame curê. Ne quê ha mehkwy kam jümjê me ahna amji capa ne mehuwahi to prãm, quê ha Tijot ata nee me ahna me hamār nare. Quê ha mãnea mã macute me jüm juwahi na, quê ha ihtÿj mehkwy pê amji tète me hapôj pa.

Cu ha me hümre impej pit kôt me papa

¹¹Na ca ha imã ikwÿ nō kinti ita, ampo pej pit kôtamji to, ne nee ampo kên kôt amji ton nare. Ne por me ampo pejti ton to me ipa atajê pê ri Pahpãmkra, ne por me ampo kêanre ton to me ipa atajê pê riPahpãm jahkre kêatre, ne nee me cupê Pahpãm kra nare.

¹²Ne mehcunea me akwÿ nō pê Temetti ata to mehÿjarên pejti to me ipa. Ne cute amji kam hapac xà pejtiaatajê, ihtÿj ihkôt harên xà impejti to harê. Ne wa itehajÿar ne amji mã me harên to:

— Hümre ita peaj to impej — hajÿr. Ne ramã ate, iteihêj xi jarên nare na, ijahkre pej.

Pê Jowāw Cajo mã amji jarên kujate
2 Jowāw 12-13

¹³Ne ampeaj kam cormã ite amã ampo jarên xàjàhtô, ne cama ahna imã amã ihhêc prãm nare. ¹⁴Na wa ha jü caxuw awÿr tē, ne ijarkwa to akuc ri amã harê.

¹⁵Na wa Pahpãm mã acajrên to hane he:

— Ijõ Inxũ Cati, ca ha Cajo mã acarĩcti gõ, quê nee apu amji mã ampo cupa nare — hane. Ne ita ri me cupê gõ ikwỳ nõ catêjê cunea te amãamji jarẽn kujahêc. Na ri imã hajỹar, ne ate ahpỹanre na me ikwỳ nõ catêjê mã gũjarẽn par na ato prãm. Hamre, ita pit.

Jeju Na Mehkwỳ Jakrã Cunea Wỳr

JUTA JÕ KÀHHÔC

Ỗhỹ, pê Juta pê Jeju jarkwa na memprar catêjê nõ, ne hanea ne cupê Jeju tõi te amji to hapu na kjê. Ne cute pjê cunea kam Jeju na mehkwỳ atajê cunea mã, pom cu me hõkàhhôc cahyt ita kujahêc par. Na pê hõ kàhhôc ita japrỳ pê Jeju Na Mehkwỳ Jakrã Cunea Wỳr, Juta Jõ Kàhhôc (Juta). Ne kam cute, por me cupê Jeju na mehkwỳ na me amji jarẽn cakrô, cute amji kam me hapac xà kên kam menxyre to me cumãihhêj xi atajê cawpa.

Juta te amji jarẽn xà

¹Hapà Jeju kam cu ajpẽn to me pahkjêjê atajê! PorPahpãm te amji mã me acapi ne me anahàhwỳr atajê. Ipê Juta, ne ipê Tijac tõi, ne ipê Jeju Crixto mã ijapên catê, ne itea wa me amã ihkàhhôc ita ton. Por Pahpãm mã me akĩnti, mã Jeju Crixto meapytã atajê mã, wa ite ton.

²Ne imã me ana Pahpãm mã icakôc xà te hajỳr he:

— Me pahkwỳ caprĩa ne, ne me caxwãm pê me cumã mehcarĩcti gõ, ne amã mehkĩnti ne. Na ca ha me cumã, pom ite amã ampo crê jarẽnitajê catia ne agõ — hajỳr.

Pê mehhêj xi catêjê kwỳ aracri mehkwỳ mã axã, ne me cumã ihhêj

1 Timot 1.18-20

³Ỗhỹ, imã me ikwỳ kĩnti atajê. Pê wa ramã ite me amã ihhôc xà na amji kampa, ata pê Pahpãm te me pahkên pê me pahpytãr xà. Na wa ite ajmãr me amã ahna ihhôc. Ne ajteare mã iteto amji kam ijapac, ne hỹrmãipipkjêr xà na, me amã ihhôc. Pê Pahpãm ramã me pamã cute amji kam hapac xà to hahkre, ne me pamã hõr pyxit, pahte me to amji pytãrxà na. Cwỳrjapê wa ha ate me Pahpãm to ate amji kam hapac xà ita jamãr, ne me hũtãr, ne me to amji jahôt prãmte, wa ha ahna me amã ihhôc. ⁴Ne ampo na mã wa ha me amã ihkàhhôc ita hõc to hane? Nee mã ampo na nare. He ramã mehkên catêjê kwỳ aracri me pahcatãt kre na me hãr. Atajê cunea pê ampo kãnre to hahkre catêjê, ne me cumã Pahpãm

kĩnnare, mã ma amempar caca. Ne cute Pahpãm te amji kam hapac xà intête me ato ipintuw prãmte, me amã ihhêj xia jarên to:

— Gapacta ne ate amji mã me ampo kên ton to prãm atajê cunea ton to me apa. Quê ha Pahpãm hõtpê me acaprĩ, ne nee me anõ kên mãme anõ mên nare, hahpan xà na — hane. Ne mër ampo na mã ame amã ampo kên itajê to hahkre to hane? He taa me ton to me ipa, na ri amji kôat me amã me to hahkre. Ne ramã ma ame Pahpãm me, me pajõPahhiti pê Jeju Crixto caca, ne ma ame curê. Atajê quê ha ihtÿj mehkên mã me axà. Ampo na? He pê rÿ pêa mã Pahpãm jõ kàhhôc kam ramã me ahna ihhóc.

Cu ha Pahpãm tekjê na me amji jarê, ne nee catyt kam me papa nare nare
1 Timot 3.1-9; 2 Petrô 2.1-17

⁵Na wa ha cute me hajÿr catêjê me, ate ajpên cujtêna me amã ihhóc, ne me amã to hahkre, mâr ca atÿj me ajpên cujtê ne me ajpên mã. He pê mam me panquêtjê kwÿ atajê hanea ne ajco cute me amã ampo to hahkre xà kên itajê kwÿato, ajco mehkwy mã hahkre to me ipa, ne mehkên mã me axà. Cwÿrjapê ca ha ita pê amji to me guphê. Ne ramã ate me ampo itajê cunea jahkre pej, na ca ate meto amji japackre prãmte, wa me amã harê. Ne pê Pahpãm Ejit jô pjê kên pê me panquêtjê kwÿ cunea pytà, ne me to cato, cakrô pê ihtÿjcute mempar nare catêjê cunea jipej, por pjê kam pô caprÿhti ata kam.

⁶Jikjê na pê cõjkwa kam mam Pahpãm mã memprar catêjê jãhtôa ne cute me cumã hãpên jicu, ne mam me hãpên xà ata jirôa pê cute mehnô to cati ne me to impej to prãm to, hacpÿa mã Pahpãm na me apkjê. Pê Pahpãm amji na me hahkre pej, ne mehcunea pro ne wakÿre to mehcunea juwapre, ne me pajarãa mã, awcapãtkôti ata kam me hãm. Mã cormã curia mehcuhhê, rohnÿttimã. Ne quê ha ahnaa Pahpãm te me pahcukij, ne me pahto ipicokjêr xà jô amcro kam ahtwÿ, quê ha hipêr mehkên mã me axà. ⁷Ata jikjê na pê Krĩhpóc me Krĩhcumrãrti me, ipu na krĩ kwÿ hũ na pire mã apu ihcuhhê atajê cunea kam, mehkwy me amji kam hapac xà kãanre itajê to me. Atajê pê cute amji pê mehprô caxun me, me hũmre jãhtôa te me ajpên caxun. Cwÿrjapê pêPahpãm cõjkwa pĩn me hÿrmã cuhykujate, pê me to caxàr tu. Nãmhã cu cormã me hãm xà pupu, ne ma ihkôt me to amji japackre he.

Mehhêj xi catêjê mã nee jũm cupa nare

⁸Cuxà mã, me amã ampo kãanre to hahkre catêjê atajê ihtÿj mehkên xà kãanre itajê ton to me ipa. Ne ihtÿj cute mehkên ton xà atajê kôt meamti. Ne me hĩ me, cute amji kam hapac xà mea mã, amji pê me to kên, ne ma ame pajõ Pahhiti pê Pahpãm par caca, ne ihtÿj me cõjkwa kam cumã memprar catêjê carôt tÿjti atajê incrôn kãanre. ⁹Pê quêt cõjkwa kam Pahpãm mã me hàprêcatêjê jô pahhi pê Miquer neeihcakóc xà to hajÿr

nare. Pê Mojxe xwỳ na Miquer me, me pahcurê xwỳn pê Xatanaj ajcaxê, ne me ajpên măn kam tẽ. Pê nee Miquer harkwa jàmcrônxa nõ to hàmcrôn nare, ne cama hõ Pahhiti to me pahcurê xwỳn mã ihcakôc to hane he:

— Quê ha jũ caxuw ijõ Pahhiti acrôn xa kêanre nõ to acrô — hane.

¹⁰Ne me hũmre itajê nee me ampo jahkre pej nare kam, ihtỳj me hàwxũn xa kêanre kam pra. Ne ihhêj rũm me cupê ampo jàprê te amji kôt hakopnare ata, ne ihtỳj ame jũ măn to me ipa, atato quê ha me taa me amji kên mãme amji mẽ, ne me hamre pa.

¹¹Ỡhỹ, quê ha ihkên mã hàr to hanea, pom quê pê me panquêtti Cãn apu ihtô caca ne ihcura he. Pê Parãw xwỳ ata hanea ne ihkên xa ata to. Ne cute mehkwyã mã ihkêanre xa to hahkre jahpan xa na, ajco me curê xwỳn atajê jũhkra kamamcwa. Pê Cõre xwỳ ita hanea ne mehkwy to pahhi na apkjê ne ame kam incryc. Jĩkjê na mã menquêtjê atajête amji kam me hapac xaa to me amji kampa he, ne ihtỳj me amji cura, ne amji to me hakràj to prãm, ne pahhi cuna mã mehcakôc kêanre. Hõ, pê menquêtjê incrê atajê ame hane ne mehcunea me hamre tu, ata jĩkjê naquê ha me amã ampo kêanre to hahkre catêjê atajê ihtỳj me hamre.

Mehhêj xi catêjê kôt hamreare

¹²Ca hõtpê hãn ne me cuprô, ate ajkam me gápãn ne me akôm prãmte. Ampo na? Nee mã ampo na nare. Pom ca ame cuprô itajê me amã ajpênkĩnti na, ca me cuprô. Ne ahnaa ri Pahpãm mã impej, meakam. Ne pom me hũmre kêanreitajê hãn ne me acajpuw acjêj, ita na ri ihkêanre, ne nee mehkôm na mehphahm nare. Ne ampeaj kam me hõ to mehtũm prãm. Ne ihhêj rũm me apê cupêhkà impejti jakati ata, ne cute me hajỹr catêjê pê ihhêj rũm ampotũmti kêanre te ame atũm xa ata. Ne cute me hajỹr catêjê hõtpê me amã ampo to awjahkre, ne nee me amã hõr nare. Ne jũ caxuw quê me amã ampo atagõ. Ne me cupê ihhêj rũm cama apu ahcakrã, ne nee ta wrỳc nare, mã pjê incrãre ata pyrãac. Ne me cupê ihhêj rũm pĩxõ pàr, mã hãn ne hõ xaã kam ahtwỳ, mã nee hõ nare ata pyrãac. Ne me cupê pĩxõ pàr jarê me amã catõtõc, ne ihcapĩr mã incrã neincrã tu ata pyrãac. ¹³Ne mehkên itajê pê ihhêj rũm cõxwa te ihu to imprar, ne amji jakàn pê cute hãmprõ tũmti juwahi ata pyrãac, ne ampeaj kam me kam pahpahm. Ne me cupê caxêre pê ihkrĩ xa jamreare ata pyrãac, ne amjiakôt ame ipa. Pê Pahpãm awcapàtkõ tycti kam me to awcapê, mår quê curia ame ipa rohnỳtti mã.

Quê ha mehhêj xi catêjê mehhêj xi jahpan xa na me amgõ

¹⁴⁻¹⁵Pê Enoc xwỳ, Atãw xwỳ jakàn pê, rỳ pêã mã ihkrĩ, ne mehkêanre itajê to hũjarên to hane he:

— Me hõmpu he, quê ha me pajõ Pahhiti pê Pahpãmajpên pjê wỳr cumã me hàpên catêjê impejti jãhtõti atajê to mõ. Quê ha mehcunea cukij, ne mehkên

catêjêcunea kên mã me cumẽ. Pom me Pahpãm par nare itajê me, cute me ampo kên ton to me ipa catêjê me, cute Pahpãm cuna mã mehçakôc kêanre atajê me, quê ha mehçên mã me cumẽ — hane. Hõ, pê Enoc xwỳ me to hũjarên to hane.

Mehhêj xi catêjê te amji kam me hapac xà kêanre

Carati 6.1-2; 2 Petrô 3.3; Tijac 5.19-20

¹⁶Ne ampeaj kam me hũmre itajê jàhcahñõn xi, ne cute me ahna xwỳ xi, ne cute me ampo kên xen. Ne ampeaj kam me harkwa cràre, kôt hamreare, ata to cute amji to me hàmnãn xi. Ne cute me cupê ampo cwỳrprãmte me hàhcukrêj kôt me cumã ihtỳj nare, nehãn ne me cumã ihçakôc rerecre, ne impejti na, me harê.

¹⁷Ỡhỹ, me ijõ ikwỳ nõ catêjê, nee ca meapê mam itajê pyrác ne apu cute me hajỳrcatêjê impar nare, ne quêt me pajõ Pahhiti pê Jeju Crixto mã memprar catêjê to, ca me amji japackre kam me to acrà. ¹⁸Pê hõtpê ajco me amã me amji to hũjarên to hane he:

— Jeju te amji jaxàr xà jõ amcro atajê kam, quê ha mehũmre kêanre itajê me awỳr me cato, necatyt kam me apa ita na, cama ame ana acxa. Ne amjia kôt, Pahpãm kaj na, cute amji mã me ampo kên xen xà atajê kôt ame pra — hane. ¹⁹Ne cute me hajỳr catêjê ri ihtỳj me ato ajcokjê. Ampo na? Me kam Pahpãm Carõ Pejti nare na ri. Mã amjia kôt, cute amji mã me ampo kên xen xà atajê ton to pit mã, me amji mã ihhimpej to me ipa.

Cu ha Pahpãm te amji kam me pajapac xà to ajcamê

²⁰Me ijõ ikwỳ nõ catêjê, ca hanee me hajỳr nare, ne quêt cama amji to meapicamên to me mõ, Pahpãm te me akam amji to ihhimpej xà na. Ne cumã me acakôc xà wỳr, quê ha Carõ Pejti cumã acakôc to me amã hahkre, ca ha harkwa kôt cumã me acakôc.

Ampo crê itajê to cu ha me, Jeju te amji jaxàr xà jikaj xà na

²¹⁻²³Ne me pajõ Pahhiti pê Jeju Crixto mã me pahcaprĩ catia ata, quê ha ihtỳj jũ caxuw amji wỳr me pajaprõ. Cu ha pahtỳj cahê na amji to me papijaparohnytti mã ata jõ amcro, cu ha me hikaj. Hõhõ, ampocrê itajê to ca ha me, Jeju te amji jaxàr xà jikaj xà na. Ca ha Pahpãm mã me pahkĩnti ita to, nee amji pê me gapac kêt nare. Ne pom kyre pê Pahpãm kôt me ipa itajê, ca ha me caprĩa ne, neme cumã aprĩa kam, mehçkĩnti kam, me hapackre to me apa, hacpỹa mã Pahpãm jõ pry kam mehpỳm prãmte. Ne pom cute amji mã me ampo kên xenti itajê, ca ha hanea ne me caprĩ, ne guphêa rũm mehtehçajpar tome apa, cõt ca hanea ne mehçkôt me pahçurê xwỳn jõ cuhyhti mã me axà.

Cu ha Pahpãm te me pahto ihtỳj pyrên me pajakry na, cumã me amji jarê

1 Petrô 1.5-7

²⁴Ne Pahpãm Pejti na me to pahçakôc xà impejti itajê to, cu ha cumã me pahçakôc he:

— Me ijõ Inxũ, ca ha atỳj me ijamã, wa ha nee apê me ikên nare, ne nee apê me gõ pry hyr nare. Na ca ha ma amji wỳr me ijaprô, ite curiakrĩ xà ita kam acahê na me ikrĩ xà na. Na wa ha curi me ipej pit na acuna mã me xa, por wa nee me ikrã kam ampo kên to me amji kam ijapac nare itajê me, me ijĩ tũm nare itajê me, wa ha curi acuna mã me xa, neampeaj kam ahna me ijakry. Ne imã mehcunea te acatihti na me gahkre pej ne apupun name to prãnte hajỹar, pom quê hãn ne mehcunea me hàhcujro xà nõ jàhcujrohti pupu he. ²⁵Ne apyxit peaj, ne apê Pahpãm, na ca atekra pê me ijõ Pahhiti pê JejuCrixto to me imã me ipytàr catê. Ne ateampo cunea jahkre pej catia. Mã quêtmehcunea, ampo cunea jirôa pê amji mã me acupa. Ne me cupê pahhi cunea jirôa pê quêt apê Pahhiti cati, ne mehcunea jirôa pê acarôt tỳjne cati. Ne me imã mehcunea te ampo itajê cunea na me gahkre pej na me ato prãm. Pê ca mam ahnaa akrĩ, ne cormã ahnaa to akrĩ, rohnỳtti mã — hane. Hamre.

Cormã Ampo Te Jũ Mãn Xà Ata Te

JOWĀW MĀ AMJI TO IPIPĒ XÀ

Jarĕn Xà

Yhỹ, pĕ Jowāw ihkàhhôc ita to, ne krĩ te xet kam Jeju na mehkwỹ atajê cunea mãihkujate. Ne pĕ cupê Jeju jarkwa na membrar catêjê nō. Ne pĕ mam cupê tep pro catê, pĕ Jeju ihkôt ipa catê na ahna ahwỳ. Pĕ caku crê kam Jeju kôt ipa, ne pĕ Jeju te amji kam hapac xà cunea na hōmpu. Ne ramãihwej tu kam ri cute Jeju na mehkwỹ mã ihkàhhôc ita hôc, ne ihkujahêc.

*Ne pom cu me ihkàhhôc cahyt ita kam ri, cute me cumã, cute me Jeju te amji kam hapac xà jicuna, me cumã cawpa, mãr quê nee me hicu nare. Ne cute Jeju to amji mã mehhimpej cwỳrjapê ri, mehkwỹa te me amji pupun xà kêanre na me to, mã me amji pupun to kêanre. Cwỳrjapê ri ahna me cumã apô. Ne me cumã pjê ita jamre xà kam, ampo cunea te me hỹrmã cator xà ata jarĕn. Ne mecumã Pahpãm te pjê ita cunea to hamre, ne intuw ton na cute me cumã harĕn. Ne Jeju te me cumã ampo itajê cunea to hahkre, mã harkwa kôt cute me cumã harĕn par. Na ri hō kàhhôc ita japrỳ te **Cormã Ampo Te Jũ Mãn Xà Ata Te Jowāw Mā Amji To Ipipĕ Xà Jō Kàhhôc (Ipipĕ Xà).***

Jowāw te amji jarĕn xà

Ipipĕn Xà 22.6-7

1 ¹Yhỹ, ihkàhhôc ita cahyt xà te hajỹr he. Ipê Jowāw, ne pa wa ha me amãihkàhhôc ita hôc. Pĕ mam, ramã rỳ pĕa mã, Pahpãm Jeju mã ampo tehajỹr xà itajê cunea jarĕn pa. Mã Jeju te me cumã hàpĕn catêjê mã ampo itajê jarĕn xà na, imã cumã imprar catê kujahêc, côjkwa pĩn. Mã iwrỳc, ne iwỳr cator ne cute imã ampo itajê cunea jarĕn, neimã hahkre par. Cwỳrjapê wa ha ihkàhhôcita kam, me amã ampo itajê cunea jarĕ. Ne ampo te hajỹr xà itajê, quê ha nee amji to hàhtũm ry nare.

²Ÿhỹ, pê Pahpãm, ihkrapê Jeju mã ampo itajê cunea jarẽ, pê Jeju harkwana imprar catê mã harẽ, pê ma ajpên imã harẽ, na wa ha ihkàhhôc ita kam ihcunea na me amã ihhôc partu. Ne quêt Pahpãm cakôc xà ita ampeaj kam ri. ³Na ca ha ate me ihkàhhôc ita cahyt, ne kam me gapac na, ca ha ampeaj kam me gakry. Ne por quê ha me kampa ne me hahkre pej atajê, quê ha hanea ne amehakry. Hõ, por quê ha ampeajkam me Pahpãm jarkwa itajê kam, me hapac pejtijatajê, quê ha ihtýtj me hakry. He, quê ha nee ampo te hajýr xà itajê amji to hàhtúm ry nare, na quê ha me hakry.

⁴Ÿhỹ, ipê Jowãw, wa me apê Jeju na mehkwȳ jakrã te xet, ne Axij jô pjê kam me akrĩ atajê mã, wa ite ihkàhhôc itajê ton. Ne me amã Pahpãm me, ihkra Jeju Crixto mã me icakôc, ne cumã me acajrên to:

— Me to impeaj ne, ne me caxwãm pê me cumã acarĩcti gõ — hane. Ne Pahpãm ita pê rý pëa mã Pahpãm ata, ne cormã cupê Pahpãm rohnýtti mã, ne cõjkwa kam Pahhiti krĩ xà ata kam ihkrĩ. Ne cahê na Pahpãm CarõPejti caca xà te xet atajê mehkrĩ. ⁵Pê pjê ita kam Jeju te apu ipa reriamã, ampeaj kam Pahpãm jarkwa atajê to ajco ihcakôc to ipa. Ne cupêa ri Pahpãm mehcãmter, ne pyxitpeaj ne hacpýa mã ihtír cakõnĩ to ihtír, ne taamã ri pyxit peaj ne cupê pjê kam pahhi catêjê cunea jô Pahhiti. Ne cumã me pahkĩn, cwýrjapê pëty ne caprô jaxwȳ. Ne caprô jaxwȳr ata to me pahkên kêanre atajê cunea cuhhôn partu. ⁶Ne cute me pahcunea to Hũm mã hàpên catêjê na. Na cu ha me harkwa kampa, ne pjê kam mehkrĩ itajê mã me harẽ. Ne hacpýa mã Pahpãm wýr, pjê kam mehkrĩ itajê cajrên xà atajê to, cu ha me cumã, pjê kam mehcunea to me pahhimpej. Pê Jeju Crixto me pamã ampo pejti itajê cunea ton pa. Cwýrjapê ri mehcunea te hahkre pej na imã me to prãm, nãmri Jeju ri quêt mehcunea jirõa pê carôt týj rohnýtti mã! Ne ahnaa ri imã to prãm!

⁷Ne me hõmpu he, ramã pjê wýr ahcakrã kam iwryc xàa kam he! Quê ha mehcunea me hõmpu, quê ha hanea ne cute ame caxwȳr catêjê ihtýtj amehõmpu. Ne por pê pjê kam mehcunea amehcaca atajê, quê ha Jeju te amji jaxàr na me hõmpu, ne ampeaj kam me cumã hũpa. Quê ha hũpate ame amrãa to ameamrã. Ne quêt imã Jeju te hacpýa ne amji jaxàr ita na ri ampeaj kam imã to prãm. ⁸Ne me hirõa pê Pahpãm pê Pahhiti carôt týjti ata te amji jarên to:

— Ipê pjê kat me hihôt jô Pahhiti, ne ipê cumã kat kam ampo cunea jô Pahhiti, ne ipê hicu xàa kam ampo itajê cunea jô Pahhiti — hajýr. Ÿhỹ, Pahpãm pê rý pëa mã Pahpãm ata, ne cormã cupê Pahpãm rohnýtti mã.

⁹Ÿhỹ, ipê me akrã tũm pê Jowãw, ne ipê, por ca Axij jô pjê kam Jeju kôt me amji pupun xà kêanre to me amji pupu atajê, tõ kàa wa. Ne cu ha pahcuneaJeju cwýrjapê ame amji pupun xà kêanre to me papa, ne pom cu me pahcunea ame amji pupun kêanre itajê mã, cu ha me pahcunea pahtýtj me awcanã to mehtýaj ne, neme pahcunea Jeju kôt amji to me

pahhi. Pê Jeju Jowāw mā amji to ipipĚ Pê wa ajco pjĚ cunea kam Pahpām jarkwa jarĕn to ipa, por pê Jeju imā to hahkre ne imā huwahi ata, pê wa ajco harĕn to ipa. CwÿrjapĚ pê me ipro ne ma cō jipōc ri, pjĚ japyrĚ te Patmo jŏ pjĚ ita wÿr me ikujate. wa ita ri apu ipa, ne jŭ caxuw icatorxā hamreare.

¹⁰Ne pê wa me pahkōt xà jŏ amcro pê tōmĭc na jÿ ne Pahpām to amji kampa. Pê Pahpām Carō Pejti imā amji gō. Pê wa pea amji caquĕc kōt jŭm jōkreĭ, pê ihhĕj rŭm hōhhi jōkre krāhhi tÿjti ata kampa. Pê imā harkwa to:

¹¹— Wa ha amā ampo jàhtōa ne to ajpĚ, ca ha hōmpu ne atÿj ahna ihhōc partu. Ne ma krĭ te xet kam Jeju na mehkwyġ atajĚ mā ihkujahĕcpa. Ne por krĭ atajĚ japyrĚ te ri Epet jŏ krĭ me, Pĭhhōcuxwa jŏ krĭ me, Hawĕnti jŏ krĭ me, Tijat jŏ krĭ me, Pyt jŏ krĭ me, Ihkjĕ kĭn jŏ krĭ me, Ratixa jŏ krĭ atajĚ wÿr ca ha ihkujahĕc partu — hane.

¹²Wa ite jŭm ita pupun prānte hÿrmā ipipkjĕr, ne ite wakÿre prā tepti pê ôr te ihpōc xà mā cuhhĕ xà te xet atajĚ pit pupun. ¹³Mā hipōc ri jŭm pê me Pahhākā Cati pyrācti ata ihkā japyĕhti ata kam xa. Ne wakÿre prā tepti pê ôr te ihcahti na hĕ mā to xa. ¹⁴Ne ihkĭ jaka ita pê ihhĕj rŭm kĕn pojre jaka, ne into jarwryġ ita pê ihhĕj rŭm cuhy pōc jarwryġ. ¹⁵Ne ihpar prā ita pê ihhĕj rŭm me hŭhhi na hĕ xācrecerti ata prā pyrāac. Ne hōkre par ita pê ihhĕj rŭm cōhxocti jāhkrihkrit par. ¹⁶Ne pê awpōc rŭm, hŭhkra ata to caxĕre te xet ata cwa ne to xa. Mā harkwa pĭn wapo xwahhihti xwapeaj te hŭjĕ ata cator. Ne ihkuc prā pê ihhĕj rŭm pyt te me pahkrā jimoac kam ihkrĭ prā pyrācti.

¹⁷Wa ite hōmpun, ne pea hŭpa te ipĕ mehtyc pyrāc, ne cuna mā ijŏ pōrpo ne nō. Mā cute ina awpōc rŭm hŭhkra xir ne imā:

— Nee apu icupa nare. Ipĕ cumā kaat kam ampo cunea jŏ Pahhiti, ne ipĕ hĭcu xāa kam ampo atajĚ cunea jŏ Pahhiti. ¹⁸Ne pê wa ty, ne me ipupu he, wa hacpÿa mā itĭr, ne ita caxuw jŭ caxuw ityc xà nare, ne ipĕa ri mehtyc xà jŏ Pahhiti, ne hanea ne ipĕari mehtyc catĕjĕ jŏ Pahhiti.

¹⁹— Na ca ha ate ampo te hajÿr xà atajĚ pupun xāa na, ahna ihhōc. Ne hanea ne cormā ampo te jŭ mĕn xà atajĚ na ihhōc. ²⁰Ne hamre, wa ha amā ijŭhkra kam caxĕre te xet atajĚ me, ihpōc xà te xet atajĚ cuhhĕ xà itajĚ kōt harĕ, ca ha kampa. Pom ihpōc xà cuhhĕ xà te xetitajĚ pê me ikwyġ jakrā te xet atajĚ pyrāac. Ne caxĕre te xet itajĚ pê ihhĕj rŭm cōjkwa pĭn imā me hāpĕn catĕjĕ te xet atajĚ pyrāac, quĕ ha ihtÿj ahpÿanre na me ikwyġ jakrā te xet atajĚ jamā — hajÿr. Hōhō, cute imā hŭjarĕn to hajÿr.

Epet jŏ krĭ kam mehkwyġ jakrā mā kyre pê Pahpām kĭn

2 ¹Ne jŭm ata te imā harkwa hyr to hajÿr he:
— Ÿhÿ Jowāw, ita caxuw ca ha Epet jŏ krĭ kam, por ikrac ri me ikwyġ jamār catĕata mā ijarkwa kōt, ihkàhhōc ton to hane he: “Ipĕ jŭm

te hũhkra to caxêre te xet ne incwÿr ne to xa ata, ne ipê, por jũm ôr te wakÿre te ihpôc xà cuhhê xà cajpuw apu mŏ ata. Ne ijarkwakôt ri me amã ihkàhhôc ita. ²Ne imã ate me ampo ton xà atajê cunea na me gahkre pej. Ne ate amji mã me aprĩa kam, ramã me gâpên xà ton to me catia. Ne imã ate nee mehkêanre atajê mã me gũcanâr nare na me gahkre pej. Ne ma cute me amãInxũ jarkwa to mehcahôc catêjê na me amji jarên atajê cajpê, ne me hahkre pej. Quê ha cute ame amã ihhêj xia jarên na, ca ha me hahkre pejpurentu, ne ma amempar caca, ne ma ame curê. ³Ne icwÿrjapêa ca ate amji mã me aprĩa kam, ame amji pupun xà kêanre to ame amji pupun. Ne ate me amji pupun xà kêanre atajê mã atÿj meawcanã, ne imã ampo itajê cunea na me apej pit.

⁴“Ne por ampo pyxit peaj ata na ri imã me ana prãm nare he. Nee mã ampo nare, pê ca mam ampeaj kam me amã ikĩn, ne ita kam mã ajte kyre pême amã ikĩn, mam kĩnte. ⁵Xà ca gŏtpê ajkĩ mam me amã ikĩnti ata tome amji japackre? Ca ha ate me to amji japackre na, ca ha hacpÿa mã iwÿr me apkjê, ne ikĩnti ata to ame ikĩn. Nãmri, ca ha ate me akên jicu nare, nenee iwÿr me apipkjêr nare na, wa ha hacpÿ ne amji jaxà, ne itÿj me apê gŏ pôc xà cuhhê xà ata capa, quê ha hãm xà kam caprÿ. ⁶Ne por ca ramã ame ampo pyxit ton to me apa ata na ri, imã ihprãam to prãm. Nee mã ampo nare, ca ramã ma ame Nicoraw kôt me ipa catêjê hêj xia to amehcâcâcatajê par caca, ne me apê ipyrãac, nema ame curê. Nãmri wa ma ame curê.

⁷“ÿhÿ me ikwÿ, xà ajkĩ me gapac nare, me gũpar xà caxuw? Hãpà. Ihtÿj me akam me gapac, na ca ha me Apãm Carŏ Pejti te mehkwy jakrã mã harên xà na me kampa, ne mempartu. Inxũ mã ihkrĩ xà ata kam pĩxŏ pãr pejti ne ihcuhhê. Quê ha jũm te pĩxŏ ata nŏ krêr na, quê ha nee jũ caxuw ihtyc nare, ne quêt ihtĩar na apuipa, rohnÿtti mã. Ne por quê ha me ampo kên cunea tohjê, wa ha itÿj pĩxŏ ata na me hamã, quê ha ame cuku. Hŏhŏ ita pit” — hajÿr.

Pĩhhôcuxwa jŏ krĩ kam mehkwy jakrã te me amji pupun xà kêanre
Me Hàpên Xà 7.54-60

⁸Ne cute hipêr imã harkwa hyr to hajÿr he:

— ÿhÿ Jowãw, ita caxuw ca ha Pĩhhôcuxwa jŏ krĩ kam, por ikrac ri me ikwÿ jamãr catê ata mã ijarkwa kôt ihkàhhôc ton to hane he:

— “Ipê cumã kat kam ampo cunea jŏ Pahhiti, ne ipê hicu xàa kam ampo itajê cunea jŏ Pahhiti. Ne ipê jũm tyc ne hacpÿa mã ihtĩr ata. Ne ijarkwa na ri me amã ihkàhhôc ita. ⁹Ne icwÿrjapê ate ame amji pupun xà kêanre to ame amji pupun atajê na, imã me gahkre pej. Ne icwÿrjapêa ri me apê me acukrêj jamre tu, neme apê hamreare na, ite me gahkre pej. Ne Inxũ mã me apê hamreare nare, ne ampeaj kam quêt cumã me gakràj. Ne imã cute me ato xwahna to kêanreatajê na me hahkre pej, ne me amã

me amji to ihhêj xi xà to, ‘Me ipê Juta catêjê impej pit, na wa ha itỳj me amã catyt kam ampo pejti atajêpit to hahkre’ hane. Ne cama ame amã ihhêj, ne aracri Xatanaj kôt amjikam me hapac to me ipa, ne toa amji mã mehhimpej to me ipa. ¹⁰Ne ca ha cormã ame amji pupun xà kêanre to ame amji pupu, ne nee ca ha ame amji mã pa nare, ne me ikampa he. Quê ha Xatanaj kôt me ipa catêjêihtỳj me anô pro, ne me hacjên xà kam me gaxà, ne me acajpêr hiahpuro. Ca ha ame amji pupun xà kêanre to me amcro to me tej cacrô, ca ha ito pit mãamji mã me ahimpej to me apa kam me to acrà, ne ahnaa ame gamre na, wa ha amji wỳr me ato ahtêp, ca ha icahê na ame apa, rohnỳtti mã. Ne pom hãnne memprar tỳj catêjê mehkwỳ re, ne amji mã me hê cwa, ata jikjê na, ca ha ate me gücanãr na, wa ha itỳj me amã me atĩr xà caxuw me gahĩxà gõ, ca ha me atĩr rohnỳtti mã.

¹¹“Yhỹ me ikwỳ, xà ajkĩ me gapac nare me gũpar xà caxuw? Hãpà! Ihtỳj me akam me gapac. Na ca ha me Apãm Carô Pejti te mehkwỳ jakrã mã harên xà ne me kampa ne mempartu. Ne por quê ha me ampo kên cunea tohjê atajê, quê ha nee hipêr amehtyc nare, ne nee hipêr ame amji pupun xà kêanre nô to ame amji pupun nare. Hõhõ ijarkwa ita pit” — hajỹr.

Hawênti jô krĩ kam mehkwỳ jakrã te nee mehphãm nare atajê jicu nare

¹²Ne cute hipêr imã harkwa hyr to hajỹr he:

— Yhỹ Jowãw, ita caxuw ca ha Hawênti jô krĩ kam, por ikrac ri me ikwỳ jamãr catê ata mã ijarkwa kôt ihkàhhôc ton to hane he:

— “Ipê, por jũm jarkwa kam wapo xwahhihti xwapeaj te hũjê ata jarkwa na mã, me amã ihkàhhôc ita he. ¹³Ne imã Xatanaj to me amji mã mehhimpej catêjê jipôc ri ate ame akrĩ na, imã me gahkre pej. Ne curia ri cute me Antipa curan. Ito me cumã ihcakôc to ipa, incwỳrjapê ri cute mehcuran cacrô, ca nee ate itoamji mã me ahimpej jicu nare, ne ikam me to acrà tu.

¹⁴“Ne ampo ata pyxit peaj ne ahna imã me ana prãm nare. Nee mã ampo nare, me akwỳa kwỳ ihtỳj Parãw xwỳ himpej xà kêanre atajê to ame amji mãmehhimpej to me ipa. Ne pê Parãw xwỳIxaher catêjê to kên prãmteme cumã Xatanaj me, ampo carô kên to ihhimpej to: ‘Gapacta ne me pryre jãhtôa ne me to cuprô ne me hipej, ne Xatanaj me, me amã ampo carô kĩntiatajê mã me to amji kĩn nô to, nehanea ne atỳj ahti na amji pê me aprô to meaxy’ hane. Mã me akwỳa kwỳ te ihtỳj ihhimpej xà ata mã me amji jôr, ne toa amji mã mehhimpej to me ipa. ¹⁵Ne hanea ne me akam Nicoraw kôt me ipa catêjê te me to ihhimpej catêjê ame ipa. Ne me imã ampo itajê nô na prãm nare. ¹⁶Cwỳrjapê wa me amã, ‘Me amji to apkjê, ne me akên itajê jicu. Ca ha ate me akên itajê jicu nare na, wa ha me awỳr itêm pyrentu, ne pomijarkwa pĩn wapo hapôj ita to, ate me hajỹr catêjê cunea cuna mã ajpu’ hane.

¹⁷“Ŷhỹ me ikwỳ, xà ajkĩ me gapac nare, me gũpar xàcaxuw? Hãpà! Ihtỳj me akam me gapac. Na ca ha me Apãm Carŏ Pejti te mehkwy jakrã mã harĕn xà na mekampa, ne mempartu. Ne por quĕ ha ame ampo kĕn cunea tohjĕ, wa ha itỳjaracri me cumã harte, quĕ ha nee jũm ite me cumã harte ita na ijahkre pej nare, to hanea, pom quĕ pĕ wa Juta catĕjĕ mã me hŏ pĕ mana to harte he. Newa ha ahpỳanre na kĕn jakatiatajĕ kam me cumã me haprỳ to ipintuw partu. Quĕha nee jũm me haprỳ itajĕ jahkre pej nare, ne me cumãa quĕ ha me haprỳ atajĕ jahkre pej. Hŏhŏ ijarkwa ita pit” — hane.

Me hũxy xi cahãj nŏ te Tijat jŏ krĩ kam mehkwy jakrã mã ihhĕj
Juta 3-23

¹⁸Ne cute hipĕr imã harkwa hyr to hajỳr he:

— Ŷhỹ Jowãw, ita caxuw ca ha Tijat jŏ krĩ kam, por ikrac ri me ikwỳ jamãr catĕ ata mã ijarkwa kŏt ihkãhhŏc ton to hane he:

— “Ipĕ me Apãm kra, ne ito jarwrỳ pĕ ihhĕj rũm cuhy pŏc jarwrỳ ata, neipar prã pĕ ōr te me hũhhi na hĕ xà prã pyrãcti ata. ¹⁹Ne imã me gãpĕn xà cunea na me gahkre pej. Ne me amã ajpĕn kĩnti, ne ate me ajpĕn tehcajpar na, imã me gahkre pej. Ne imã ate itoa me amji mã meahimpej, ne amji mã me aprĩa kam ampo kĕn mã me gũcanãr na, imã me gahkre pej. Ne ca mam me acaca xà atajĕ jirŏa pĕ me to apicamĕn to me mŏ.

²⁰“Ne por ampo ata pyxit peaj, ne ahna imã me ana prãm nare. Nee mã ampo nare. Por me acahĕ na pyjĕ nŏ kĕanre apu ipa ata, ca ajte nee ihkĕntĕte me cumãn nare, ne cama ahna me hamã. Mã ihtỳj apu ihkĕn xà atajĕ ton to ipa. Ne pyjĕ nŏ kĕanre ata pĕ ihhĕj rũm mam pyjĕ nŏ kĕanrejaprỳ te Ixapewkwỳj xwỳ ata pyrãac, ne me amã amji jarĕn to, ‘Pahpãm te ri me awỳr ikujahĕc, ite catyt kam me amã ampo to hahkre to hajỳr prãmtehe. Gapacta ne ahti na amji pĕ ame aprŏ caxu, ne hanea ne atỳj cute ampo carŏ kĕnti mã me hŏ ton atajĕ ku’ hane. Ne cute me cumã ampo to hahkre to hajỳr xàatajĕ to hãn ne ijŏ pry kaj na imã me hãpĕn catĕjĕ atajĕ rĕ. ²¹Ne tee ite mentĕte pyjĕ nŏ ata mãn to, ‘Me to kĕn jicu!’ hajỳr. Mã ma apu ipar caca.

²²“Cwỳrjapĕ wa ha to kĕn prãmte cumã ijarkwa to, ‘Hã, ita caxuw ca ha atỳj ahti na ate me hũmre to gikwa, ne ame to axỳ xà ita kam nŏ. Ne itacaxuw quĕ ha gikwa xà ata amã ihkĕanre, ne hanea ne, por quĕ ha acahĕ na kam me hikwa atajĕ mã ihkĕanre ne. Ne ihtỳj ate me amji pupun xà kĕanre to me amji pupun to acuhhĕ na, me ato’ hane. Quĕ ha cute meipar nare, ne nee mehkĕn ton jicu nare atajĕ cunea mã, quĕ ha itajĕ hane. ²³Ne itỳj cupĕ mehkra cunea jipej. Quĕ ha pea me ikwỳ me ahna ijahkre pej, ne hanea ne ite me hũmre cunea mã cute me amji kam hapac xàjahkre pej na me ijahkre pej. Ne pa wa ha ahpỳanre na ate me ampo ton atajĕ mã ampi, ne hahpan xà na me amã ijãmjŏr pa.

²⁴“Por tee me amã harkwa to, ‘Hacu ne Xatanaj jarkwa to ame hahkre, ne to amji mã me pahhimpej to me papa’ hane. Ca nee ate mempar nare, ne nee mehkôt me amji ton nare atajê, wa nee hipêr na me gapackre prãm nare. Ampo na? He ca atÿj ramã amjia kôt me gũpar to me apa.

²⁵Ne kam me to acrà mã me awcanãa ne, wa ha ahnaa me awÿr icato. Hô, hamre, ite me gapackre xà ita pit” hane.

²⁶— “Ne por quê ha me ampo kên cunea tohê, ne ma imã ampo na prãmti kĩnti atajê ton kam me to incrà, ne ahnaa amehtyc na, wa ha me to krìxàre cunea jô pahhi to hanea, pom quê Inxũ te ito pjê cunea jô Pahhi he. ²⁷Quê ha mehpahtÿaj kam me to ihhimpej to me ipa. Quê ha jũm te apu Pahpãm par caca na, quê ha me gãn to hane, pom quê hãn ne me pjê te pot gã he. ²⁸Ne me to ihhimpej xà to prà to hanea, pom quê awcahti xà wÿr caxêti prà he. Mã mehcunea me hõmpu, mã me cumã hõmpun xà impejti he.

²⁹“ÿhÿ me ikwÿ, xà ajkĩ me gapac nare, me gũpar xà caxuw? Hãpà! Ihtÿj me akam me gapac, na ca ha me Apãm Carô Pejti te mehkwy jakrã mã harên xà na me kampa ne mempartu. Hô, ite me gapackre xà ita pit” — hajÿr.

Pyt jô krĩ kam mehkwy jakrã te amji kam me hapac xà kêanre

Ruc 12.35-40

3 ¹Ne cute hipêr imã harkwa hyr to hajÿr he:

— ÿhÿ Jowãw, ca ha ita caxuw Pyt jô krĩ kam, por ikrac ri me ikwÿ jamãr catê ata mã ijarkwa kôt ihkàhhôc ton to hane he:

— “Ipê Pahpãm Carô Pejti caca xà te xet atajê cahê na ipa catê, ne ipê jũm jũhkra kam caxêre te xet ata. Ne imã me gápên xà cunea jahkre pej. Mã mehcunea amji mã me garên to, ‘Jeju kôt me ipa catêjê atajê toa amji mã mehhimpej to me ipa’ hane. Ne cute ikôt me apa na amji mã me garêncatêjê atajê mã ihhêj ne me atiar. Ne mehkĩnte imãa ihhêj ne ramã ame acuneatyc. Ampo na? Ca nee amji mã me ito ahimpej nare. ²Ame ampra! Nãmri ca cormã kyre pê ito amji mã me ahimpej, na ca ha ita caxuw ito amji mã me ahimpej to ihtÿaj to ihtÿj. Nãmri ca ha ate amji mãme ito ahimpej nare na, ca ha atÿj ikôt me apa jicu, ne pea imã me apê mehtyc pyrãac. Ne mër ampo na mã wa ame amã Inxũ cawpa to icakôc to hane? Ampo na nare. Pom ca ate me gápên xà cunea ton itajê ri, nee Inxũ cuna mãcumã impej nare.

³“Cwÿrjapê ca ha ate me ampo jahkre pej, ne me hõmpun atajê to me amji japackrea ne, ne hÿrmã me apkjê, ne amji mã me hũpahti to me apa. Ampo na, wa ha hacpÿ ne pjê wÿr me awÿr itêm xà ata pê ihhêj rũm mehàhkij xi têm xà pyrãac, na wa ha aracri tẽ. Quê ha nee jũm itêmxà ata na ijahkre pej nare. Cwÿrjapê ca ha me ampra!

⁴“Ne me akwÿ kam me pyxitre atajê ri amã mempeaj to mempej. Ne mempej ita pê ihhêj rũm cute amehkã jakati tũm nare mã me amji jacjên,

ne maihtũm pê me to amji cajhê to ame ipa, mã nee apu ihtũm nare, ne hakati ata na, atapyràac. Ne ikôt me akà jakati kam me apa xà caxuw, ampeaj kam me apej, cwÿrjapê ca ha atÿj jũ caxuw icahi na ame apa” hane.

⁵— “Ne por quê ha me ampo kên cunea tohjê, ne ma imã ampo na prãmti kĩnti atajê ton kam me to incrà, ne ahnaa amehtyc na, wa ha itÿj me cumã mehkàjakati atajê gô, quê ha kaam ame ipa. Wa ha nee jũ caxuw hacpÿa mã mehtĩr xà jô kàhhôc kam ramã ame haprÿ hikwa itajê nõ caxàr neihhur nare. Ne hirãa pê cama Inxũ mã me hàpên catêjê kam mare mã, me ahna amji jarên to, ‘Pom mempejti mehkà jakati kam ame ipa atajêcunea pê itekjê, ne me cupê me ikwÿa’ hane.

⁶“ÿhÿ me ikwÿ, xà ajkĩ me gapac nare, me gũpar xà caxuw? Hãpà! Ihtÿj me akam me gapac, na ca ha me Apãm Carô Pejti te mehkwy jakrã mã harên xà na me kampa, ne mempartu” — hane.

Ihkjêkĩn jô krĩ kam mehkwy jakrã mã Pahpãm mã hàpên xà
1 Texarôn 2.13-16

⁷Ne cute hipêr imã harkwa hyr to hajÿr he:

— ÿhÿ Jowãw, ita caxuw ca ha Ihkjêkĩn jô krĩ kam, por ikrac ri me ikwÿ jamãr catê ata mã ijarkwa kôt ihkàhhôc ton to hane he:

— “Ipê rÿ jũ caxuw jũm te ampo kên nõ ton nare ata, ne ihcunea na ipeaj to ipej. Ipê rÿ jũ caxuw jũm te ampo to ihhêj xi nare ata, ne wa icakôc xà hêj xi nare to icakôc to ipa. Ne pê rÿ pëa mã pahhi Tawixwÿ ikre nõ impejti ata kam ihkrĩ. Pê pea jũm ata pyxit peaj ne hũrkwa jihê rên xà ata to ajco apu ipa. Jĩkjê na ri ipyxit peaj ne imã Inxũjũrkwa jihê rên xà. Na wa ha to hihê mē, quê ha nee jũm to hihê nare. Nãmri, wa ha ite to hihê na, quê ha nee jũm hihê mên nare. ⁸Ne ramã ite me gápên xà atajê na me gahkre pejtu, ne ite me acarôt peacre na me gahkre pej. Cakrô ca atÿj ijarkwa kôt ame apa, ne itoa amji mãme ahimpej to me apa. Na wa ite me amã harkwa jihê mên, ate ahna me gapôj ne iwÿr me jũmjê japrôr ne me to acator, mã me acuxà ikôt me ipa prãmte. Wa ite me amã hihê mên, mã ahnaa xa, na quê ha nee jũm to hihê nare.

⁹“ÿhÿ, me akam jũmjê ame ipa atajê pê Xatanaj tekjê. Ne ihtÿj meamã amji jarên to ihhêj xi to ipa to, ‘Me ipê Juta catêjê, ne me ipeaj to me ipej, naca ha atÿj me ikampa. Ampo na? Wa ha itÿj me amã catyt kam ampo pejti atajê to pit mã me amã hahkre’ hane. Cakrô, wa ha nee me to amji kwÿnare. Ne cama me hipy mã me amē. Ne acuna mã, mehkôn krã na amehkrĩ na me to, quê ha me garên to, ‘Ampeaj kam ri, quêt me apê Pahpãm kôt meapa catêjê, ne ampeaj kam ri quêt me cumã akĩn!’ hane.

¹⁰“Pê wa me amã ijarkwa hyr to hane he: ‘Me awcanãa ne, ne ampo cunea na amji mã me aprĩa to me apa’ hane. Ca ate me ijarkwa ita par pyrentu, ne atÿj megũcanãr to me apa. Cwÿrjapê wa ha itÿj ampo kên

atajê cunea pê me apytà. Por ite pjê kam ampo kên cunea to me capi ne to mehcajpêr xà ata pê, wa ha me apytà. ¹¹Ne wa ha nee amji to ijàhtëm nare ne ajpên me awÿr tē. Ite me amā ijàmjör prämte, wa ha me awÿr tē. Cwÿrjapê ca ha ite me amā ijàmjör xà to ajpên me awÿr itēm xà ata jahkà na meawcanāa ne. Nāmri ca ha ate me gūcanār nare na, ca ha nee me gàm cwÿr nare, ne me gàm cwÿr xà ata to me acto, quê ha jūm me gaxà kam amji mā cupy” hane.

¹²— Ne por quê ha me ampo kên cunea tohjê, ne ma imā ampo na prämti kīnti atajê ton kam me to incrà ne ahnaa amehtyc na, wa ha ma jūm ata to Inxūjürkwa wÿr tē, ne to axà, ne pea ihhêj rüm to ikre mā ihcuhhê xà, ne ikre ata mā kam hām. Quê ha curia ihcuhhê rohnÿtti mā. Wa ha pea kam me ijapry incrê na ihhêc to hane he. Wa ha kam Inxū japry na ihhêc, nekam, por quê ha Inxū, cōjkwa pīn pjê wÿr, hō krī tuw Krīpinkrên kujate ata japry naihhêc. Ne wa ha hanea ne kam ijapry intuwti ata na ihhêc.

¹³— Ÿhÿ me ikwÿ, xà ajkī me gapac nare me gūpar xà caxuw? Hāpà! Ihtÿj me akam me gapac, na ca ha me Apām Carō Pejti te mehkwy jakrā mā harên xà na me kampa ne mempartu — hajÿr

Ratixa jō krī kam mehkwy jakrā me cupê Pahpām tekjê na me amji jarên na me amji to ihhêj

Roman 12.11; Jowāw 9.39-41

¹⁴Ne cute hipêr imā harkwa hyr to hajÿr he:

— Ÿhÿ Jowāw, ita caxuw ca ha Ratixa jō krī catêjê kam, por ikrac ri me ikwÿ jamār catê ata mā ijarkwa kôt ihkàhhêc ton to hane he.

— “Ipê mehhêj xi nare tekjê, ne ipê mehhêj xi nare catêjê xakat, ne ipê jūm te amji jarkwa par to ipa rohnÿtti mā ata, ne ipê catyt kam ampo cuneajarên catê. Ne pa pê wa Inxū jarkwa kôt pjê me ampo cunea ton pa, ne ipêa ri ampo itajê cunea xakat. ¹⁵⁻¹⁶Ne imā me gápên xà cunea jahkre pej. Ca ha ikôt me apa na amji to mehtÿj tu na, wa ha itÿj me ana prām. Nāmri ca ha ate kyre pê ikôt me apana, wa ha nee me ana prām nare. Ampo na? Ihhêj rüm ate me hajÿr catêjê pê cō cacrujre na, imā prām nare ata. Ne nee me ato ikôm xà caxuw me apej nare, ne nee me gakryti nare, ne nee me acacrohti nare, ne meacacrujre. Cwÿrjapê wa ha ijarkwa pê me gaxwÿ.

¹⁷“Ampo na mā wa ame amā icakôc xà ita to? Nee mā ampo na nare, ca me caahān ne amji mā me garkwa to, ‘Ampeaj kam me pajakrāj! Ne ampo cunea na me pahte amji mā me prām atajê ramā me pamā! Ne nee ahna ihkên nare!’ hane. Hajÿr cakrô, mā me apê amji jahkre kêatre, ca nee ampo kôt me hakop nare kam amji mā ame garkwa to ame hane. Ne Inxū me imā nee ate me hajÿrnare! Ne me imā me apê ampo hamreare, ca me acakrô ame apa, ne me acunea into tūm pit. Ca nee ate me amji pupun

xà kêanre kam me apahàmti ata na, ate me amji pupun ne ahna me amji jahkre pej nare, ne me imãa ri me ate me hajÿr xà itajê jahkre pej.

¹⁸“Cwÿrjapê wa ha gapackre, ne me amã. Ajpên iwÿr me pra, ne amji mã me ate amji kam me gapac xà pejti pê ôr prà pyrãcti atajê jũhkà, ne pea atÿj to Inxũ me imã me gakràj. Ne hanea ne, ca ha iwÿr me pra neamji mã me icarôt jũhkà, ne ihkôat catyt kam me apa, ata pê ri ihhêj rũm me akà jakati atajê mã ate me amji jacjên, ne kam ame apa ata pyrãac, meapahàm cupate. Ne hanea ne iwÿr me pra ne amji mã me ite amji jahkre pej pê ihhêj rũm mento cahhê xà pyrãac ata jũhkà, ate me amji jahkre pej, ne mearit pej me ate me to ampo pupun xà caxuw.

¹⁹“Xà ajkĩ me imã me akĩn nare na mã wa ame ato kêanre, ne ame gapackre xà tÿjti itajê to ame gapackre? Hãpà! Imã me akĩnti, incwÿrjapê wa itÿj ampo kên itajê cunea intête me amãn to me gapackreto ihtÿaj to ipa. Hôhô, ita na wa ijôtpê imã mehkiñti atajê to hajÿr to ipa. Cwÿrjapê ca ha caxwãm catia mã iwÿr me apkjê. ²⁰Ne wa ihhêj ne ikre cunea jarkwa mã icuhhê to ijãhcukjêr to ipa, ixàr prãmtê. Quê ha jũm te ijôkre par, ne imã hihê mên, wa ha iteixàr ne cahê na ijapàn na, quê ha ihtÿj jũ caxuw hanea ne icahê na apà.

²¹“Ne por quê ha me ampo kên cunea tohjê, ne ma imã ampo na prãmti kĩnti atajê ton kam me to incrà, ne ahnaa amehtyc na, wa ha itÿj amji cahê na ikrĩxà ata kam me hÿr. Quê ha curia icahê na amehkrĩ rohnÿtti mã to hanea, pom quê pê wa ampo kên cunea tohjê ne hakren pa, pê Inxũ amji cahê na ihkrĩ xà ita kam ijÿr, wa cahê na kam ikrĩ, ita na wa ha me to.

²²“ÿhÿ me ikwÿ, xà ajkĩ me gapac nare, me gũpar xà caxuw? Hãpà. Ihtÿj me akam me gapac, na ca ha me Apãm Carô Pejti te mehkwÿ jakrà mã harên xà na me kampa ne mempartu” — hajÿr.

Côjkwa kam mehkrĩ catêjê cunea mã Pahpãm to cati prãm

4 ¹Hô, cute imã harên to hajÿr jirô pê wa ite hipêr ampo pupun. Ne nee mã ampo nare, côjkwakam ri harkwa ata te amji jihê mên. Mã jũm jôkre pê ihhêj rũm hôhhi jôkre pyrãcti ata te imã hũjarên to hajÿr. Pom pê wa mam kampa ita na ri cuteimã hũjarên ne imã:

— Iwÿr api, wa ha amã ampo te jũ mãn xà ata jahkre ne amã to ajpê, ca ha hõmpu! — hajÿr.

²Me ajkaam mã Pahpãm Carô te imã amji jôr. Wa curi côjkwa kam, ite Pahhi krĩ xà kam jũm ata jÿr na hõmpun. ³Mã ihkuc prà pê kên prà tatapti ata pyrãc, ne cupê kên prà tepti ata pyrãc. Ne ihkrĩ xà pu na ihpra krorti ata pê ihhêj rũm ta jôxwÿn.

⁴Ne Pahhi krĩ xà ata pu na mehkrĩ xà kwÿ jãhtô na cute winticwat, mã kampahhi catêjê te winticwat, ne mehka jakati kam mehkrĩ, ne ôr te wakÿre prà pejti ata te mehcunea krãhkà. ⁵Ne me hipôc ri Pahhi

krī xà ata pīn ri ihcuxê, ne kam me hōkre, ne hàhkrihkrit pê pahhàjê pyrãcti. Ne Pahhi krī xà ita cuna mã hàhcujro xà te xet, atajêpê Pahpãm Carō Pejti caca xà te xet atajê pyrãc, ne hàhcujrohti. ⁶Ne Pahhi krī xà ita cuna mã ampo pê cô cati pê wit pràti tetetti ata pyrãac ne nō. Ne Pahhi krī xà ita pu na pê jūmjê tīar te cwatatajê te mehkrã ne me to xa. Ne jūmjê tīar te cwat atajê kam into jàhtōa to hàhtō, me hī cunea kam. ⁷Ne mam ita pê ihhêj rŭm rop hòhtia pyrãc. Ne ihcote na ita pê ihhêj ne pryti xŭmtia pyrãc. Ne hapu na ita kuc pê ihhêj rŭm me hŭmre kuac. Ne hapu na ita pê ri ihhêj rŭm hàctia te apu ihtor pyrãc. ⁸Ne cute me cwat itajê kam pê ahpÿanre na me hara xêj partu. Ne caxwãm pê mento, ne pō rŭmmento. Ne nee caxwa me amcro kam mençrer to hīcu nare, nemençrer to:

“Apejti!

Ne quêt apejti ita pê Pahhiti pê Pahpãm!

Ne ca ri quêt acarôt tÿjti, mehcunea jirōa pê.

Ne apê mam ata, ne apê cormã ata,

ne apêcormã ata rohnÿtti mã” hane.

⁹Ne cute me cwat atajê hipêr Pahpãm mã mençrer to:

“Quêt mehcunea mã acatihti na gahkre pej,

ne apejti na me cumã gahkre pej.

Ne mehcunea amji mã me acupa.

Ne mehcunea jirōa pê acarôt tÿj!” hajÿr.

¹⁰Ne hãn ne cute me cwat atajê Pahpãm pê Pahhiti mã mençrer kam pra, mã pea pahhi te winticwat itajê Pahpãm cuna mã mehpÿpÿm, ne Pahhi krī xà ata cunamã me hō krãhkà atajê nō, ne me harên to:

¹¹“Me ijō Pahhiti pê me ijō Pahpãm,

quêt apejti neacatihti,

mã quêt mehcunea amji mã me acupahti to me ipa.

Ne quêt acarôt tÿjti, ne ampeaj kam apej.

Ampo na?

Pê ca quêt ampo cunea to.

Ne ate amji mã toapijapar xà na ihprãmti ata to, ca to ajpa” hane.

Ihkàhhôc na hê xà te xet atajê

5 ¹Wa ite Pahhiti krī xà kam jŭm jÿ ata jŭhkra kam, awpôc rŭm, ihkàhhôc krãre ata pupun. Mã ihkàhhôc ata kam ihhôc te hŭjê, caquêc kam ihhôc, ne hanea ne hōkwa kam ihhôc. Mã ahna hê xà te xet

atajê te ahna hê. ²Ne hanea ne ite Pahpām mā memprar catê nõ tỳjti ata pupun, mā ihkrāhhia kam cute hàhcukjêr to:

— Jūm ri ihkàhhôc ita tète ahna hê xà itajê jirên xà caxuw impej, quê hihê mē? — hajÿr.

³Mā nee cōjkwa kam ihkàhhôc ata caxuw jūm hamreare, ne nee pjê kam caxuw jūm hamreare, ne hanea ne nee pjê krac ri caxuw jūm hamreare, cute ihkàhhôc atatête ahna hê xà na ihtô xà itajê jirên, ne caxwām pê hōmpun xà caxuw. ⁴Pê wa ajco amrāa to amrā. Ampo na? Pê nee ihkàhhôc na hê xà jirênxà ata caxuw jūm impej nare, cute ahna hê xà atajê jirên, ne caxwām pê irīt ne cute hōmpun xà caxuw. ⁵Mā pahhi na mehkwy nõ ata te imā:

— Apu acwÿr nare, hōmpu he, Juta na mehkwy jō Pahhiti pê rop cahàcti jōkre hōhti pyràcti ita ri me hirôa pê carôt tỳj. Ne cupê pahhi Tawi xwÿ tàmwxÿtàmwxÿ, Juta tàmwxÿ, ne taa mā quê ha ihtÿj ihkàhhôc na ihtô xà te xetitajê jirên pa, ne capô ne hōmpu — hajÿr.

Jeju pê carà cahàcre kra nõ pyràc, mā jūm jaxà kam cute mehcuran xà

⁶Wa pea ite carà cahàcre hōhti kra xūmre nõ pupun, mā Pahhiti krī xà cuna mā xa. Mā cute me cwat atajê me, pahhi catêjê atajê te mehkra. He pê ihhêj ne jūm carà cahàcre kra xūmre ata cura, mā hacpÿa mǎihtir ne xa ata pê me pajō Pahhiti pê Jeju. Ne kam hipàr te xet, ne kam into te xet. Ne cukrà xà te xet atajêpê Pahpām Carō Pejti caca xà te xet atajê, mā pjê wÿr hān ne mehkujate, atajêa ri. ⁷Mā pea Caràcahàcre Kra ita mō, ne cute, por Pahhiti hÿr xà kam jÿata pê awpôc rūm hūhkra kam ihkàhhôc ata caxàr. ⁸Mā pea, pom cute me cwat itajê me, pahhite winticwat atajê me, cuna māmehkôn krā na mehpÿm. Ne pê ahpÿanre name cumā me hàkôr xà. Ne ahpÿanrena me cumā ampo kūm cuxwati atajê te wakÿre pràti atajê to hipu partu atajê pê Pahpām na mehkwy te me to cumā mehçakôc xà pyràc.

Ihkàhhôc jihê mēn xà caxuw Jeju pej

⁹Pê ajco mençrer tuw to mençrer to me hane he:

“Ate ihkàhhôc ita pyr ne hihê mēn xà caxuw ampeaj kam apej!
Ampo na?

Pê ca ty, ne acaprô jaxwÿ.

Ne acaprô jaxwÿr ata to Pahpām mā pjê kamkrīxàre cunea pê
mehkwÿ japrô,

ampo kra me, me harkwa pihho to mehçakôc catêjême,
pjê cunea kam atajê cunea pê ca me haprô.

¹⁰Ne amji mā mehçunea to amā me hàpên catêjê.

Ne me taa mā quê ha mehkwy to me amā mehçakôc,
ne me taa pjê cunea to mehhimpej” hane.

Pjê me cōjkwa kam mehcunea ame Jeju catia to me cumā ihcakōc

¹¹ Wa hipêr irît ne ite Pahpām mā memprar catêjê jàhtōa to hàhtô ne me hōmpun, ne me hàhtôti atajê pê jūm te me cahyt par xà nare. Mācute Pahhiti krī xà me, cute me cwat itajê me, me pahhi itajê krā tu ne me to xa, ne kÿj cati pêa mā cute me cumā harēn to:

¹² “Apê Caràcahàcre Kra pê Jeju.

Pê ca amji to me ikritxwÿ, pê ca ijaxà kam ty ne apeaj to apej.

Ne me hirôa pê atÿj, ne me hirôa pê gakràj, ne me hirôa pê ate amji jahkre pej, ne me hirôa pê ahihtÿj!

Mā pjê cunea kam amji mā me acupa, ne mehcunea mā apejti na gahkre pej, ne me imā mehcunea te acatihti me apejti name garēn na me to prām!” hajÿr.

¹³ Ne pea ite ampo pryre cunea increr na kam ijapac. Cōjkwa kam cuwēnti me, pjê kam pryre me, pjê krac ri pryre itajê me, cōxwakam tep me, pjê cunea kam, pryre cunea increr na kam ijapac. Mā cute mençrer to hajÿr he:

“Por ca ajÿr xà kam jÿ ata me,

Caràcahàcre Kra ata me,

wa acatihtiimpejti na me garēn to prām.

Mā pjê cunea kam amji mā me acupa,

ne mehcunea mā apejti na me gahkre pej,

ne mehcunea jirôa pê me acarôt tÿj rohnÿtti mā” hajÿr.

¹⁴ Mā cute me cwat itajê me kampa ne me cumā:

— Ýhÿ, ampeaj kam! — hane. Mā pahhi atajê mehkōn krā na mehpyÿm, ne catihti impejti na me harē.

Hūmre cawrô jakati kam jÿ ata pê me cupê amji mā hūtâr catê

6 ¹ Wa pea ite Caràcahàcre Kra te mam, pom ihkàhhôc na hapÿn xà te xet itajê nō hyr na hōmpun, ne pea ite, pom cute me cwat itajê nō jōkre pêpahhàjê jàhkrihkrit ita par, mā cute kÿj cati pêa mā hàkjêr to:

— Ajpên mō! — hajÿr. ² Wa irît, ne ite cawrô jakati ata pupun, mā ajpên tē. Mā kam me hūmre nō ata jÿ, ne cumā cuuhê, mā cute me cumā pahhi krāhkà jōr. Mā ma totē ne ihtÿj amji mā me cupê pjê cunea pytâr to mō.

Hūmre cawrô caprêcti kam jÿ ata pê me ipijapu to hapôj catê

³ Jirô pê mā ri, hipêr Caràcahàcre Kra ita te ahna hapÿn xà nō ata hyr. Wa pea ite cute me cwat atajê nō te amji to cote ata par, mā cute hàkjêr to:

— Ajpên mō! — hajÿr. ⁴Mã pea cawrô nō caprêcti ita cator ne ajpên mō. Ne kam hÿr catê ata te pjê kam, cute me ipijapu ne me hÿmre te pjê kam me amji kwÿa curan xà caxuw, amji na hÿpar. Mã jÿm te cumã caxuw wapo xwahhihti nō catiaita jôr.

Hÿmre cawrô tycti kam jÿ ata pê mehkôt prãm cràn catê

⁵Ne Caràcahàcre Kra ita te hipêr ahna hapÿn xà incrê hyr xà ita kam, wa ite cute me cwat atajê nō te me to incrê ata par, mã cute hàkjêr to:

— Ajpên mō! — hajÿr. Wa irít ne ite cawrô tycti ita pupun, mã ajpên mō. Mã kam hÿr catê ita te hÿhkra to cute ampo to ipipên xà ita pyr ne kam to jÿ. ⁶Mã cute me cwat itajê cajpuaw jÿm jôkre ita jÿjarên ita te hajÿr he:

— Amcro pyxit kam me hàpên xà jahpan xà na, me cumã arÿjhy na crat to pyxit peaj ne agô. Ne kwÿr xôm na, ca ha me cumã crat to incrêne me cumã agô, amcro pyxit to me hàpên jahpan xà na. Ne hō kryjre to ampeaj kam me cumã hÿ to ahwÿ. Ne nee ampo to impê xà me, ampo itajê nō to apicacwÿr nare, ne nee hanea ne ampo cacôxÿre ita me ampo itajê nō to apicacwÿr nare — hajÿr.

Hÿmre cawrô tatapre kam jÿ ata pê me hipej catê

⁷Jirô pê mã ri Caràcahàcre Kra te ahna hapÿn xà te cwat ita hyr. Wa ite cute me cwat itajê nō te me to cwat ata par, mã cute hàkjêr to:

— Ajpên mō! — hajÿr. ⁸Wa pea irít ne ite cawrô tatapti ata pupun, mã kam hÿr catê ata kam jÿ, mã cute me cumã haprÿ jôr to Me Hipej Catê. Mã ramã pjê kammehtyc catêjê ihkôt ame ipa. Ne pea cute pjê kam me hipej na amji na hÿpar to hajÿr he:

— Ca ha ahpÿanre na mehcuran xà cunea to mehcuran to apa. Quê ha me hÿmre me cwat, ca ha me ipijapu na me to, quê ha me ajpu ne me amji pyxit ne me amji cura. Ne prãm me, me hà me, pjê kam ampo kên jàprê cunea to mehcuran to hane he. Quê ha me hÿmre me cwat, ca ha mehcuran xà itajê to hân ne me pyxit ne mehcura — hajÿr.

Cute mehkwÿ jipej jahpan xà na, cute me to kên na me ahwÿ

⁹Mã pea Caràcahàcre Kra ita te ahna hapÿn xà te xÿc ita hyr. Wa pea ite Pahpãm mã ampo kÿm cuxwati to caxàr xà ata pupun. Mã ihkrac ri mecaxwÿn jàhtôa ne me jÿ, atajê pê Pahpãm jarkwa to mehcaôc catêjê te catyt kamme ipa, mã me curê xwÿn te amehcuran atajê caxwÿn, wa ite me hōmpun. ¹⁰Mã mehkrãhhia kam cute ame caràr to:

— Me ijô Pahhiti impejti ne carôt tÿjti ata! Ampeaj kam apê Pahpãm ata! Jÿ caxuw ca ha pjê kam itajê cukij? Ne jÿ caxuw ca ha cute ame icuran catêjê itajê to apu ihkên, cute me icuran jahpan xà na? — hajÿr. ¹¹Mã ahpÿanre na cute me cumã mehkà jakati atajê jôr partu, ne me cumã:

— Ca ha cama ame akôt to mehkryjre ne. Ne hanea ne cute ame gâpên xà ita to me hâpên, ne me ato amji kjê catêjê kwý jikaj. Por quê ha cormãhanea ne amehcura atajê, quê ha me akôt me cato ne me aràn. Ne pea cute amji mã me gâhtô na, cute me ato hũjahkre xà ata mã, me ato hahê — hajÿr.

Quê ha Pahpãm to cute ame kên jahpan xà na ame to kêanre ne

¹² Wa pea ite Caràcahàcre Kra te ahna hapÿn xà te xêj ita hyr na hõmpun. Mã pea pjê jâhcujrôn, ne pyt kam awcapàtkô tycti ita pêihhêj rûm cupêhkà tycti ata pyrâac, ne putwry întep pê ihhêj rûm me caprô tep. ¹³ Mã caxêre cõjkwa pîn apu ipijaxwÿr te hajÿr, pom quê hân ne kôc prîn mã ipâr to ahcujrô, mã hân ne apu pjê kam ajxwÿ he. ¹⁴ Mã cõjkwa jamre xà te hajÿr, pom quê hân ne ampo kà incrà amji krâ, cu me capône me cumã hikra, mã hân ne hacpÿa mã amji krâ to pra he. Ne por hakôt apu ihkrî atajê me, cõ kam amcrà jacot atajê te amji pê ihkrî xaitajê caca, ne ma cupê ipintuw partu.

¹⁵ Mã pjê jô pahhi catêjê me, krî jô pahhi catêjê me, krâhtare jô pahhi catêjême, por me hakràj catêjê atajê me, me carôt tÿjti atajê me, me hũmre cunea me, cama me cumã me hâpên catêjê me, me hõ pahhi me, mehcunea pimxur, kên kre me hàhkà jakôt krac ri ame ipimxur partu.

¹⁶ Ne cute kên kre me, hàhkà jakôt mã mehkrâhhia kam me carâr to:

— Ame ikam apÿpÿm ne ame ipro, por hÿr xà kam jÿ ata me, Caràcahàcre Kra ata te ame ikam incryc xà atajê cupate, ca ha me cupê me ito amxu. ¹⁷ Ampo na? Hamre, ramã cute ame ikam incryac to incryc jô amcroa kam hàhhuc, na wa ha nee me inô cumã ijũcanâr nare — hajÿr.

Pahpãm na mehkwyè te 144 mir kuctÿj kam haprÿa na ihhõc

Ipipên Xà 9.4

7 ¹ Jirô pê mã wa ite cõjkwa pîn Pahpãm mã memprar catêjê te cwat te me pjê jô xwahhi jô kôc te cwat na incwÿr, ne me huwahi, ne me to ihcuhhê na me hõmpun. Ampo na? Cute ame to kênxwÿjrea na mam kôc nô te pjê me, cõ me, pî pâr nô jakôr cupate ri cute me to amji tÿj ne me to xa. ² Wa pea ite Pahpãm mã memprar catêjêa nô pupun, mã pyt japôj xà rûm ihtor, ne tẽ. Ne Pahpãm tîar ihkrî ata te haprÿa na cute mehhõc catê ata kujahêc, mã ihkwÿ te cwat te apu pjê me cõ cunea to kên catêjêatajê wÿr tẽ. Ne kÿj cati pêa mã cute ihkwÿ mã carâr to:

³ — Ca ha nee cormã ne ame pjê to kên nare, ne nee cormã ne ame cõ to kên nare, ne nee cormã ne ame pî pâr nô to kên nare, wa ha xa mepajô Pahpãm tîar ata jô tekjê na ame ipa atajê kuctÿj kam haprÿa na ihhõc pa mã — hajÿr. Ne cute me kam mehhõc par.

⁴ Wa pea ite, cute Pahpãm japrÿ na mehkuctÿj kam ihhõc itajê jâhtô na me harên par. Mã me hàhtô na cute me 144 mir. Ne me cupê ahpÿanre

na Ixahercatêjê jakrã ne ajpĕn kam mehpÿm ne me xa. ⁵⁻⁸Pê Ixaher catêjê na ahpÿanre na me hakrã kwÿ amji to atajê, amji to me ajcokjê ne me xa, pêahpÿanre na ajpĕn caxuw me hakrã hàhtô na me tóxi mir. Ne Ixaher catêjê na kjêjê name amji to ne me xa atajê pê, Juta me, Rupĕn me, Cate me, Axer me, Naptar me, Manaxê me, Ximãw me, Rewi me, Ixaca me, Xepurô me, Joje me, Pĕnjamĩ.

Pahpãm na mehkwy cunea me cumã cati to ihcakôc

⁹Jirô pê wa irit, ne ite me cupêIxaher catêjê nare pê mehcakrit jãhtôapupun. Mã me hàhtôa to me hàhtô, ne jũ wÿr quê jũm me cahyt pa. Ne ahpÿanre na ajpĕn caxuw ampo kra me, pjê kam krixàre cunea me, me harkwa pihho me, pjê cunea pĩn mehcuneaPahpãm krĩ xà ata me Caràcahàcre Kra ata cuna mã mehkà jakati kam me xa, ne me hũhkra kam têrti hô pit mã, me to xa. ¹⁰Ne kÿj cati pêa mã me hũjarĕn to:

— Por Pahpãm hÿr xà kam jÿ ata, me Caràcahàcre Kra ata pê ri me ikĕn pê me ito hapôj catêjê — hane. ¹¹Pê Pahpãm mã memprar catêjê cunea Pahpãm krĩ xà ata me, me pahhi catêjê cunea me, por cute me cwat atajê pu na me ajxĕr ne me to xa. Ne mehcunea mehkôn krã na me hÿr ne pea me Pahpãm jarĕn to:

¹²— Taamã, ampeaj kamquêt acati, ne mehcunea mã apejti na gahkre pej, nequêt akrã krea to akrã kre. Ne ate me imã ampo pejti jôr atajê pyrĕn ampeaj kam me ijakry, ne mehcunea amji mã me acupa, ne mehcunea jirôa pê acarôt tÿj, ne me hirôa pê ahiltÿj rohnÿtti mã. Taamã! — hane.

¹³Mã me pahhi nô te icukij ne imã:

— Mĕr jũmjê mã mehkà jakati kam amehcuhê atajê? Ne jũ pĩn mã ame hapôj? — hajÿr. Wa ite cumã:

¹⁴— Pÿpÿn, ipê me hahkre kêatre, ne quêt amãa ri me hahkre pej — hajÿr. Mã cute imã me harĕn to:

— Pom me xa itajê pê ame amji pupun xà kêanre to ame amji pupu, ne Caràcahàcre Kra ita caprô to ri cute ame amji mã mehkà itajê cahhôn, mãmehkà itajê jakaa to haka. ¹⁵Cwÿrjapê ri Pahhiti pê Caràcahàcre Kra ita krĩ xà ita cuna mã amehcuhê, ne amcro me caxwa cunea kam Pahpãm to me amji kam me hapac xà jũrkwakam me hàpĕn to pyt, ne me to apĕ, ne por hÿr xà kam jÿ ata ri ihtÿj haprÿa na me hamãr to ihkrĩ. ¹⁶Ne quê ha jũ caxuw hipĕr me cumã prãm nare, ne nee me cumã kôr nare. Ne nee quê pyt cacro me ampo cacrohti me to caxãr nare. ¹⁷Ampo na? Por Caràcahàcre Kra ihkrĩ xà jipôc ri jÿ ata, quê ha amji to me hamãr catê catihti, ne ma, por cô impejti te me to ihtĩr rohnÿtti mã xà ata wÿr me to ipa, quê ha pea Pahpãm me cumã mento cacô atajê incrã — hajÿr. Hô, cute imã me harĕn to hajÿr.

Côjkwa kam ahcarĩcti

8 ¹Ne pea Caràcahàcre Kra te ahna hapÿn xà te xet ita hÿr, mã pea côjkwa kam ahcarĩcti na ahtũm ryre. ²Wa pea irit, ne ite Pahpãm

cuna mã cumã memprar catêjê te xet ne mehcuhhê na me hõmpun. Mã cute ahpyãre na me cumã hõhhi jõr partu.

Pahpãm na mehkwỹ te cumã mehcakôc xà

³Mã pea Pahpãm mã memprar catê nõ ata te ampo run xà pràti pê ôr ita pyr, cumã ampo to me caxàrxà cahê na ne to xa. Cute kam ampo kũm cuxwati ata kwỳ to hipu prãmte ri to xa. Mã cute me cumã ampo kũm cuxwati catia ne hõr. Pahpãm na mehkwỹ te Pahpãm mã mehcakôc xà ata pê ri ihhêj rũm ampo kũm cuxwati te caxàr xà ata. Mã ma ôr te ampo kũm cuxwati te caxàr xà ata wỳr to mō, Pahpãm krĩ xà cuna mã xa ata wỳr. ⁴Ne hũhkra pĩn ampo kũm cuxwati ata kũm ma hàpir to mō, Pahpãm na mehkwỹ cunea te me Pahpãm mã mehcakôc xà atajê me ajkaam mã ma Pahpãm wỳr hàpir to mō. ⁵Mã pea Pahpãm mã memprar catêjê nõ ata te ampo run xà ata pyr, ne kam ampo kũm cuxwati te caxàr xà ata jō cuhy pôc to hipu, ne ma ahpar mǎpjê wỳr to hũcapêr. Mã pea kam pahhàjê ahkrihkrit, ne kam me caràr, ne ampeaj kam, kam ihcuxê, mã pjê cunea apu ahcujrō.

⁶Mã Pahpãm mã memprar catêjê te xet atajê te hõhhi te xet atajê cakôr xà caxuw ame to hàhcuprõn.

Pjê kam ampo jàhtôa te caxàr

⁷Mã mam pyxit ita te hõhhi cakôr. Mã pea cuhy cator, ne kên te ta me, caprô picacwỳr, mã ma pjê wỳr ahpar mã cute to hũcapêr. Ne hanea ne pjê jàhtôa ne cute to caxàr. Quê ha pjê incrê, quê ha pyxit ne to capa. Mã cute pĩ jàhtôa ne to caxàr. Quê ha pĩ incrê, quê ha pyxit ne to capa. Ne hanea ne cute kam pøre kukũmti ata cunea to caxàr par.

Côxwa te me caprô na amji jahkre

⁸Jirô pê mã ri hipêr ita te hõhhi ita cakôr. Mã ampo pê ihhêj rũm hàhkà jakôtti te apu ihpôc to ipa pyrãcti ata ihpôc to mō, mã maahpar mã côxwa kam cute to hũcapêr. Mã pea côxwa jĩkjê te me caprô na amji jahkre. Quê ha côxwa incrê, quê ha pyxit ne caprô. ⁹Mã côxwa kam ampo apu ipa itajê jàhtôa ne ihtyc par, mã hanea ne pàr kre jàhtôa ne hamre. Quê ha ampo incrê, quê ha pyxit ne hamre.

Cô ajpjê atajê nõ xya to hỳ

¹⁰Mã hipêr incrê ita te hõhhi cakôr. Mã caxêre nõ catia ita pê ihhêj rũm pahte ame pajũhkra to ame pĩ pôc cwỳr, mã hãn ne apu ihpôcto ipa, mã ma côjkwa pĩn cô kam ihpỳm. ¹¹Ne caxêti ita japyr te Xỳhti. Cwỳrjapê ri cô jĩkjê kam caxêti ita pỳpỳm atajê xya to hỳ. Quê ha cô incrê ne ajpjê atajê nõ pyxit ne hỳa to hỳ. Cwỳrjapê ri me hũmre kwỳ jàhtôa ne cute cô ata to mehkôm catêjê cunea tyc partu.

Côjkwa kam ampo ahcujro atajê cunea jîkjê kam awcapàtkô

¹²Mã cute to cwat ita te hõhhi cakôr. Mã pea pyt me, caxêre me putwry jîkjê pot kam awcapàtkô. Ne nee pyt jîkjê pot kam hàhcujro jõ amcro jàhcujro nare, ne kam awcapàtkô. Ne caxêre te hajyar, ne putwry te hajyar, ne nee hîkjê pot kam hàhcujro nare, ne pea cajê to mõ.

¹³Jirô pê mã wa irît, ne ite hàcti nõ ita tor ne kàaj mã tẽ ata pupun. Mã cute ihkrãhhia kam hûjarên to:

— Akỳ, akỳ, akỳ, por pjê kam amehkrî atajê, quê ha cormã me Pahpãm mã memprar catêjê incrê te me hõhhi cakôr atajê jôkre kampa, ne pea mehkên mã me axà! — hajyr.

Ampo kên pê hõxwa catia pyrác atajê me cumã mehkàj xà to

9 ¹Jirô pê mã ri Pahpãm mã memprar catê te xîc ita te hõhhi ita cakôr. Wa ite, pom pjê kam caxêti nõ te ampo carõ kên jûrkwa kre jatõhhy nare ata jihê mên xà pyr na hõmpun. ²Mã caxêti te kre jatõhhy nare ata jihê mên, mã ihpîn ihkûm jicrôtti ita pê ihhêj rûm kwÿr cajror xà jicrôt, ne pom kre jicrôt cator ita te pyt pro, mã pea kÿj pê kam awcapàtkô. ³Mã ihkûm jicrôt ita pîn xycxycti itajê hapôj, ne ma pjê wÿr ajpên pra, ne ihhêj rûm incaca xà pê pactia incaca xà. ⁴Mã jûm te me cumãn to hajyr he:

— Ca ha nee ame põre kukûmti atajê nõ to kên nare, ne nee ame ahkêt to kên nare, ne nee ame pjê kam ampo pî pâr atajê nõ to apu mehkên nare. Ne por me hûmre kuctÿj kam Pahpãm japyr na ihhõc nare atajê to pit mã, ca ha atÿj amehkên. ⁵Ne nee amehcuran nare, ne cama me cumã mehkàj xà to, quê ha mehkàj xà itajê na ame amji pupun kèanre ita to ame putwry to xîc — hajyr. Ne pom quê hamehkàj xà itajê pê, quê ha ihhêj rûm pacti te ame caxwÿr xà. ⁶Putwry te xîc ita kam, quê ha me hûmre atajê tee apu amji to mehtyc xà japê, ne nee ampo te amehcuran xà atajê na ame hapôj nare. Quê ha ihtÿj amehtyc prãm cakrô, quê ha ma mehtyc xà atajê ame hahpa.

⁷Ne xycxycti itajê pê ihhêj rûm cute ame hàprê xà wÿr cute cawrô pytâr xà ame to hàhcuprôn. Ne ihkrã kam ihhêj rûm cupê wakÿre prã tepti pê ôr teihkrãhkà, ne ihkuc pê ihhêj rûm me hûmrea kuc. ⁸Ne ihkî pê ihhêj rûm pyjêa kî. Ne wa pê ihhêj rûm rop cahàcti jôkre hõhti xwaa. ⁹Ne hî pytâr xà ita pê ihhêj rûm wakÿti te ame hî pytâr xà. Ne hara jãhkrihkrit pê ihhêj rûm cawrô jãhtôa te me hàprê xà wÿr kujtikjên to ihprôt jãhkrihkrit. ¹⁰Ne cupê pactia ne hapy kam ihpêrhy, ne ihpêrhy ita pê ihhêj rûm wakÿti te ame caxwÿr xà, ne wahhi. Ne ihpêrhy ita to quê ha ame hûmre itajê caxwÿr toipa ita to putwry to xîc. ¹¹Ne ihtÿj cumã hõ pahhi mã to ihhimpej, por caxêtite kre jatõhhy nare jihê mên xà to amji pytâr ata pê ri hõ pahhi. Ne Ixaherjarkwa na hapry te Apatõ ne Crec jõ

pjê catêjê jarkwa na ri haprÿ te Apôrijô ne, pom haprÿ itajê hūjarĕn to “Me to hamre catê”.

¹²Ne mam cute me amji pupun xà kêanre catia ita te ma ramã me hakren. Jirô pê mã, quê ha ihtÿj cormã cute me amji pupun xà kêanrepajakrut atajê cormã me hÿrmã cato.

Krãhtare me hàhtôa jipej

Roman 1.18-27

¹³Mã pea Pahpãm mã memprar catê nõ te ihkwÿ to xêj ita te hõhhi cakôr. Wa pea ite Pahpãm cuna mã wakÿre prà tepti pê ôr te ampo kũm cuxwati pôc xà jô xwahhi te cwat ata pĩn jũm jökre ita par. ¹⁴Mã cute hõhhi cakôr catê ata mã:

— Por Cômpejti jô côhti cahi na Xatanaj mã memprar catêjê te cwat ne me huwapre ne mehcuhhê atajê mã me hê pô, ne me cumã hikra — hajÿr.

¹⁵Mã cute me Xatanaj mã memprar catêjê te cwat itajê mã me hê pôn, ne me cumã hikran. Ne pê ramã ampo itajêa na me to awjahkre, amcro ata me, putwrÿ me, caku me, mâr quê pjê kam me hũmre jãhtôa ne me hipej. Quê ha me hũmre incrê, quê ha pyxit ne ihcura. ¹⁶Ne ite me cumã cawrô kam me hàprê catêjê jãhtô na cute me 200 mirjãw na ite me harĕn par.

¹⁷Ne irĩat kam ite cawrô itajê pupun, kam me hàprê catêjê mea mã, mã me hĩ pytâr xà itajê tepti ita pê ihhêj rũm cuhy, ne ihkukũmti itapê ihhêj rũm cõjkwa kukũm, ne ihtatapti ita pê ihhêj rũm pyrãnre tatap. Ne me hõ cawrô krã itajê pê ihhêj rũm rop cahãcti jökre hõhti krã, neharkwa pĩn ihtÿj cuhy hapôj. Ne ihkũm hapôj ne hanea ne kam ihkũm tatapti ita hapôj, cute mehcuran xà caxuw. ¹⁸Ne pom cawrô jarkwa pĩn cuhy me, cuhy kũm me, ihkũm tatapti atajê te me hũmre jãhtôa ne me hipej xà. Quê ha hũmre incrê, quê ha hõtpê pyxit ne mehcura. ¹⁹Ampo na? Cawrô itajê cunea jarkwa kam ri hàprê xà, ne hanea ne hany kam ri hàprê xà. Ne hany kam ihkrã itajê pê ihhêj rũm cagã krã, mãto me hũmre cãmxa, mã mehkãj xà kêanre na, me amji pupun xà kêanre to me ipa.

Ma cute ame amji kam me hapac xà to ipintuw caca

²⁰Ne ampo te amehcuran nare atajê cahhur jãhhuc atajê te nee me hũhkra to cute ame amji mã me hõ pahpãm cahãc krekà ton atajê kĩn jicu nare. Ne nee hanea necute ame ampo carô kĕn itajê kĩn jicu nare, ne pom me hõ pahpãm cahãc krekà itajêri he: Wakÿre prà tepti pê ôr te me hõ pahpãm cahãc krekàita, ne wakÿre prà jakare te pahpãm cahãc krekà me, kĕn te me hõ pahpãm cahãc krekà me, pĩ te me hõpahpãm cahãc krekà. Ne me hõ pahpãm cahãc krekà itajê nee irĩt, ne nee hũpar nare, ne nee hanea ne ipa nare cakrô, mã ihtÿj me cumã ihkĩn. ²¹Ne nee cormã cute mehkwy curan jicu nare, ne nee cormã cute me hũxy xi jicu nare.

Ne hanea ne nee cormã cute ahti na ame pyjê caxun itajêjicu nare, ne nee cormã cute ame hàhkij jicu nare.

Ta jàhkrihkrit te xet jarên xà, Jowāw te ihhóc xà nare

10 ¹Wa pea ite cõjkwa pîn Pahpām mã memprar catê nõ tỳjti ata pupun, mã ajpên ahpar mã iwrýc to mō. Ne ihkà ita pê ihhêj rûm ahcakrã, ne ihkrâkam ta jõxwÿn xa, mã to mō. Ne ihkuc prà ita pê pyt prà. Ne ihte pê cuhy ne kam xa. ²Ne hũhkra kam ihkàhhóc nõ ita crire ne ihpahe hiahpuro mã to tẽ. Ne cute cô kam awpôc rûm ihpar ita xãm, ne pjê kam cute awke xãm. ³Ne kÿj cati pêa mã caràr, ne caràr ita pê ihhêj rûm rop cahacti jõkre hòhtijõkre. Caràr jirô pê mã cõjkwa pîn me hòkre jàhkrihkrit te xet pêta jàhkrihkrit pyracti ita to cute catia. ⁴Ne cormã cumã mehcakôc kwÿa kam, wa ajmâr ite ahna ihhóc, ne ramã ahna ihhóc xàa caxuw apu amji mã ahcuprô, mã cõjkwa pîn jũm jõkre ita te imã:

— Aracri acaxwãm pê amji mã me hũjarên xà itajê nõ, ne nee ahna ihhóc nare — hajÿr. Wa ite impar, ne nee ahna ihhóc nare.

Pê Jowāw mã cute ihkrêr xà caxuw ihkàhhóc crire gõ

⁵Wa pea ite pjê me cô kam Pahpām mã memprar catê ata pupun, mã cute cõjkwa wÿr awpôc rûm hũhkra pêr, ne ihcakôc. ⁶Por Pahpām ihtiar ihkrî ne cute cõjkwa me, pjê me, cô kam ampo cunea ton ata jarkwa na hũjarên te hajÿr he:

— Quê ha nee hipêr amji to amcro nõ mên nare! ⁷Quê ha Pahpām mã imprar catê te ihkwÿ to xet ita hòhhi cakô. Quê ha Pahpām, pom pê ramã cumã me hàpên catêjê pê harkwa to me cumã ihcakôc catêjê mã, amji kam hapac xà na amji jarê ata to hàpên kam tẽ — hajÿr.

⁸Mã hipêr cõjkwa pîn jũm te imã ihcakôc ata te hipêr imã ihcakôc ne imã: — Tẽ ne Pahpām mã memprar catê nõ, cô me pjê kam xa ata jũhkra kam ihkàhhóc nõ curor hiahpuro ata, cupê apy — hajÿr.

⁹Wa ma tẽ ne ite ihkàhhóc ita na ihwÿr. Mã cute imã hũjarên to: — Ihkàhhóc ita py ne krê, quê ha garkwa kam inxô pê pen xô, ne gõxà kam quê ha wa xÿ — hajÿr.

¹⁰Wa ite cupê ihkàhhóc ita pyr, ne ite ihkrêr. Mã ijarkwa kam inxô pê pen xô, wa ite ihkrêr jirô pê mã ri ijõxà kam, wa xÿa to hÿ. ¹¹Mã cute imã hũjarên to:

— Ýhÿ Jowāw, hipêr amã ate ampo kra me, krîxàre me, pjê kwÿ me, me harkwa pihho catêjê kwÿ me, pahhi kwÿ mã Pahpām jarkwa kwÿ jarên xà — hajÿr.

Pê Jowāw cute me Pahpām kîn catêjê cahyt

11 ¹Ne cute imã ampo to ipipên xà pê pĩ cajrer pyracti ata jõr, ne imã hũjarên to:

— Hã, to xa ne tẽ, ne to Pahpãm to cute me amji kam hapac xà jũrkwa me, cute cumã ampo to caxàr xà ata to ajpẽn, ne cute me Pahpãm kĩn catêjê atajê cahyt. ²Ne põ pê carãhti ata, ca nee to apipẽn nare. Ampo na? He kaam quẽ ha mehcahkrit atajê, por cupê Jutacatêjê nare atajê me amji to caku to incrê ne ihkôt hĩkjê xà, na ri Pahpãm te me cumã Krĩmpejre jõ cã carãhti ita jahkre. ³Ne wa ha ma ijarkwa to mehcahoc catêjê pijakrut te xãc to mehka atajê ajwar kujate, quẽ ha me ijarkwa jarẽan to caku to incrê ne ihkôt hĩkjê — hajỹr.

Pahpãm jarkwa to mehcahoc catêjê pijakrut

⁴Harkwa to mehcahoc catêjê pijakrut itajê pê pĩxô pãr cacô pôc pejti ata pyrãac, ne me cupê ihpôc xà pijakrut itajê pyrãac, por Pahpãmpê pjê jõ Pahhiti cuna mã me xa atajê. ⁵Quẽ ha jũm te ame to kẽn prãm to mõr na, quẽ ha me harkwa pĩn cuhy cato, ne me curê xwỳn ata to hamre. Hõ, quẽ ha jũm te ame to kẽnprãm to mõr na, quẽ ha cama ty. ⁶Ne cute me Pahpãm jarkwa jarẽn to ipa atajê te cõjkwa pĩn ta to me iwryc nare na, cute amji caxuw me hũpar. Ne hanea ne cute cõ kam me caprõton xà caxuw amji na me hũpar. Ne hanea ne cute ampo kẽn jãhtõa to ame pjê to kẽn xà caxuw amji na me hũpar.

⁷Ne caku crê ne ihkôt hĩkjê kam quẽ haame to hane, ne cormã me hũjarẽn jicu, me ajkam quẽ ha ampo kẽnti ata kre jatõhhy nare ata pĩn mehwyrcato, ne me kam tẽ. Quẽ ha ame ajpu ne ajwar me tohjê ne mehcura. ⁸Ne pê mam krĩ catia kam, mam me hõ Pahhiti curaata jõ krĩ cape na, quẽ ha me hũmre pijakrut tyc atajê me nõ. Ne por krĩ krã kẽanre ata pêKrĩhpõc me Ejit jõ pjê krã kẽanre ata pyrãac. ⁹Quẽ ha ampo kra me, krĩxàre atajê me harkwa pihho catêjê atajê cunea me nõr ita na me hõmpun to amcro to mencre ne ihkôt me to hĩkjê. Ne neequẽ ha jũm me harêt na amji jamãr nare. ¹⁰Ne pjê kam quẽ ha mehcuran xà ata to ame amji mã amji kĩn to, ne hũrẽn ame hakry. Ne quẽ ha ihtỹj me hũrẽn me hakryte ame amji mã me ampo jõr to me ipa. Ampo na? Pom Pahpãm jarkwa to mehcahoc catêjê itajê te me hũmre mã mehken xà catia ton, ne mehtyc, na ri ame hakry.

¹¹Ne me ahna amcro incrê ne ihkôt hĩkjê, quẽ ha Pahpãm pĩn mehtĩr xà jõ kõcti pahtỹjti ata cato, ne ajwar me hakõ, ne me cumã axà, quẽ ha ajwar me jỹ ne me hãm pyrentu. Quẽ ha cute mehtĩrna me hõmpun atajê mã me hũpa to me hũpa. ¹²Quẽ ha Pahpãm jarkwa to mehcahoc catêjê pijakrut itajê me cõjkwa pĩn jũm jõkre pahtỹjti ata kampa, quẽ ha me cumã hũjarẽn to:

— Ajpẽn iwyr me api! — hane. Quẽ ha cormã ame curê xwỳn itajê amehõmpun kwỳa kam, quẽ ha ma ahcacrã nõ ita kam cõjkwa wỳr me hàpir to mõ.

¹³Me ajkaam quẽ ha pjê hàhcujrõn kam tẽ, ne hàhcujrõn to catia to cati. Na quẽ ha krĩ jĩkjê pot ne to hamre. Quẽ ha ikre tej, quẽha pyxit

ne hamre. Ne pjê jàhcujrôn ata quê ha mehàhtô na me to xet mir ne me hipej. Na quê ha mehkwy me hõmpu, ne me cumã hūpaa to hūpa. Na quê ha me cõjkwa jõ Pahpãm mã me catia to cati na, me cumã harẽ.
¹⁴Ne ramã cute amji na me cute me amji pupun xà kēanre ata pupun to me ipijakrut, mã ramã hamre. Ne me hõmpu he, quê ha cormã cute amji namehkên xà kēanre incrẽ pupun xà ata, quê ha cormã mehwyr cator pyrentu.

Cõjkwa kam ihtỳj me Pahpãm jarën pejti to me ipa

¹⁵Mã Pahpãm mã memprar catê te xet ita te hõhhi cakôr, mã cõjkwa kam me hõkre ita jũjarën xà ita te hajyr he:

— Hamre, ita caxuw Pahpãm pê me gõ Pahhiti me, ihkra pê Crixto te pjê ita cunea to mehhimpej xàa kam ri ramã hàhhuc, ne taa mã quê ha hõtpê ihmpej rohnỳtti mã — hajyr. ¹⁶Mã me pahhi te me winticwat ne Pahpãm cuna mã mehkri xà kam amehkri atajê, mehkôn krã na pjê kam me h̄yr, ne pea pjê kam ame hipô, ne ame kri, cute me Pahpãm cuna mã amji to mehkryjreprãmte ne pea Pahpãm jarën pejti to me harën to:

¹⁷“Me ijõ Pahhiti pê Pahpãm,
 ampeaj kam acarôt tỳj,
 pê ca mam ramã akrĩ ita na,
 cormã akrĩ rohnỳtti mã!
 Wa itỳj apejti na me garẽ.
 Ampo na?

Ca ramã ate me imã acarôt catia to ampo itajê cunea ton,
 neita kam ca ha ahimpej xà ata kam to tẽ.

¹⁸Ne me cupê me akôt me ipa catêjê nare atajê,
 ampeaj kam akam mencryc.
 Ampo na?

Hamre, ate mehcukij ne ame to kên xàa kam ri ramãhàhhuc.
 Ramã ate mehtyc catêjê cukij xàa kam ri ramã hàhhuc.
 Ne ate amã me hàpêncatêjê me,
 garkwa to mehcakôc catêjê cunea to imej xàa kam ri ramã hàhhuc.
 Ne ca ha hanea ne me akwỳ cunea to hanea,
 ne me cati me, mehkryjreatajê mea mã,
 cute amji mã meacupa.
 Hamre, cute ame pjê to kên catêjêto,
 ate hamre xàa kam ri ramã hàhhuc!” hane.

¹⁹Mã cõjkwa kam Pahpãm to me amji kam hapac xà jũrkwa nõ xa ata jarkwa te amjijihê mën. Wa ite pĩ po te Pahpãm jãmjcên xà ata pupun, por pê Ixaher catêjê pjê kam ihkôt me to, ne ajco me hapỳ ne me to ipa

ata, Pahpämme cute me ajpĕn par xà ata na. Me ajkaam mã ihcuxê, ne me hõkre, me ta ahkrihkrit, ne pjê jàhcujrõn, ne kĕn te ta pahtýtji ata.

Cagã tepti kĕanre krã te xet jarĕn xà

12 ¹Mã cõjkwa kam rý jũ caxuw pahte me ampo pupun nare ata te amji to ipipĕ. Ata pê pyjê nõ ata. Ne pê ihkã pê pyt, ne ihpar krac ri putwrý ajĕt, ne ihkrã kam caxêre te tõi ne amji to ihkrãhkã ata ihkrã na ajĕt. ²Ne pê ramã ihkra, ne ihkra xà te ampeaj kam carãr.

³Mã hipĕr cõjkwa kam ampo ita te amji to ipipĕ ata pê nee mã ampo nare, cagãti intepti kĕanre nõ ata, ne kam ihkrã te xet, ne kam hĩpar te tej. Ne ahpyãnre na ihkrã atajê na wakýre prã tepti pê ôr te ihkrãhkã atajê harij. ⁴Ne cute cõjkwa pĩn hany to caxêre jãhtõa ne hũhhyr, ne ma pjê wýr tohũcapĕr. Quê ha caxêre incrê quê ha pyxit ne to awcapĕ. Ne pea pyjê nõ ata cuna mã hàhhuc ne xa, cumã ihkra ita pým kõt mãmã, cute ihkrĕr prãnte.

Pyjê nõ ata mã ihkra pým

⁵Mã pea pyjê nõ ata mã ihkra ata pým, ne cumã hũmre, por quê ha ihpa týtji to krĩxãre cunea to ihhimpej ata. Mã ma cute me ahkrare nõata pým, cagãti pê, ne ma Pahpãm wýr me to tĕ, ihkrĩ xà kam ihkrĩ ata wýr.

⁶Mã ma cagãti te inxi to irõ, ne ahna ipipkjĕr ne apu to kĕn prãm. Mã ma inxi ata, por pê ramã Pahpãm cumã ahkĕt kam ipimxur xà toata wýr tĕ, ne curia quê ha me to ipijapar to caku to incrê ne ihkõt hĩkjê.

Cõjkwa pĩn Pahpãm jõ krãhtare me cagãti tohjĕ

⁷Jirõ pê mã ri cõjkwa kam cute me ipijapu kam mehtĕm. Pahpãm mã me hàprĕ catĕjê jõ pahhi japrý te Miquer ata me, cõjkwa kam me hàprĕ catĕjĕme, cute cagãti kĕanre ata mã me hàprĕ catĕjê me, me ajpĕn kam mehtĕm, ne ame ajpu. ⁸Ne cute me cagãti ata tohjĕ, na quê nee hipĕr cõjkwa kam cumã me hàprĕ catĕjê me, me hàhhuc nare. ⁹Ne cagã catia kĕnti ata, pê mam Xatanaj te mehcunea mã ihhĕj ata. Mã ma cute pjê wýr me to hũcapĕr, ne cute cumã me hàprĕ catĕjê tohajýar, ne ma ihkõt me to hũcapĕr par.

¹⁰Wa ite cõjkwa kam jũm jõkre týtji ata par, mã cute hũjarĕn to:

— Ita caxuw me Pahpãm te me pahkĕn pê me pahto cator! Ita caxuw ri Pahpãm te cupĕ Pahhiti na carõt to ipipĕ! Ita caxuw ri Pahpãm kra pê Crixtõte ihhimpej xà to ipipĕ. Ampo na? Por me pahkjĕjê jarĕn kĕn catĕ Pahpãm cuna mã xa, ne cute me harĕn kĕanre to caxwa ne to apĕ ata, macõjkwa pê cute me to hũcapĕr, quê ha jũ caxuw hipĕr me pajarĕn to kĕn nare. ¹¹Me pahkjĕjê te ihtýj me pahcurĕ xwýn tohjĕ. Ne nee mã amjia kõt cute me tohjĕ nare. Pê Carãcahãcre Kra pê Jeju ata caprõ jaxwý, ne me pajaxà kam ty. Cwýrjapĕ ri ihtýj me pamã ajpu, caprõ ita kõt. Mãihcãmtã

rũm me pahkjêjê atajê ihtÿj amji to mehtyc japên to me ipa. Neihtÿj amji mã me Jeju te me cumã ipijapu na me harên to ipa, na ri ihkôat cute me tohjê. ¹²Na ca cõjkwa kam me amji to ajpa atajê, ca ha me acunea me gakrya ne! Ne pjê me cõ kam amji to me ajpa atajê, ca ha me apeacre ne. Ampo na? MaXatanaj me awÿr iwrÿc, ne me akam incryc te to hipu tu ramã cumam cumã amcro incrêre na cute amji jahkre pej na ri — hajÿr.

Xatanaj ihkra xũmre caapõ

¹³Ne cagã kênti ata te ramã pjê wÿr amji to hũcapêr na amji jahkre pej, ne cute, por pyjê nõ mã ihkra xũmre pÿm ata, caapõr kam ihtêm. ¹⁴Mã cute ahkêt kam ihkrĩ xà ata wÿr ihtor xà caxuw me cumã hàcti catia jara to me ipijakrut ne me cumã hõr. Por quê ha curi amji tome ipijapar to caku to incrê ne ihkôt me to hĩkjê xà ata wÿr, cagãti ata te apu to kên cupate. ¹⁵Mã cagãti ata te harkwa pĩn cõ mã hikran. Mã ma pyjê nõ ata kôt ajpjê, cute cõ ata to, ma to ihtêm prãmte, cute ihkôt cumã hikran. ¹⁶Mã ihtÿj pjê te pyjê nõ ata tehcajpar, ne cõ mã harkjêc. Mã harkwa mã cagãti te cõ kujahêc ata xàr, mã cute intête ihkrêr. ¹⁷Mã cagãti ata apu pyjê nõ ata kam incryac to incryc, ne ma tẽ, ne cute pyjê kwÿ pê mehtãmxwÿa atajê kwÿ to kên kam ihtêm. Por me Pahpãm jarkwa kampa, ne catyt kam Jeju kôt me ipa atajê tori apu hane. ¹⁸Ne ma cagãti ita tẽ ne cõxwa tohkà na hàhhuc ne nõ.

Hũmre kêanre nõ ata pê ampo jãprêa pyrãc

13 ¹Jirõ pê mã, wa ite cagãti wÿr ampo kênti nõ ata te cõxwa pĩn hàpir na hõmpun. Nepê ihkrã xet, ne kam hĩpàr tej, ne ahpÿanre na hĩpàr itajê na cumã ihkrãhkà, ne ihkrã na ihcakõc xàhêj xi kêanre na ihkàhhôc ata ajê, nehũjarên to: “Ipê Me Apãm Cati” hane. Cute ihkàhhôc kam ihcakõc xà kêanre ita to apu Pahpãm to kên prãmte. ²Ne por ite ampo kênti pupun ata pê ihhêj rũm rop cahàc krorti, ne ihpar pê ihhêj rũm awcapãtkõkrit jũhkrahti, ne harkwa pê rop cahàcti jõkre hõhti jarkwa. Mã cagãti kêanre ata te cumã hàpên xà caxuw carõt catia ne hõr. Ne cute cumã cupê pahhi krĩ xà ata jahkre, ne harkwa kôt cute hàpên na mên. ³Ne pê ampo kênti ita krã nõ pyxit ne cupê ihhêj rũm haxõp te ihcuran, ne pê ihkên xà te ihcuran xà ata ramã cumã hà nõ, mã hacpÿa mã ramãihtĩr. Mã pjê cunea kam hãn ne ame amji mã ame ipikrar to me ipa, ne cute me ampo kênti ata pynãr, ne ihkôat me amji ton to me ipa. ⁴Ne mehcunea ame cagãti kêanre ata kĩn, ne me cumã ihcakõc to kênre nare. Ampo na? Pê ampo kênti ata mãcarõt to cute hàpên xà cunea gõ, na pê. Ne hanea ne ame ampo kênti ata kĩn, ne me ajpên mã me to ihcakõc to impejti to hane he:
— Jũm pê mã ampoti ita pyrãac, ne cume ipipêan? Ne jũm ri ampeaj kam ihhihtÿj, cute me ajpên cujtên xà na? Hamreare! Jũm me quê amji cujtê! — hane.

⁵Ne cute me hũmre mã ampo jahkre kêatre ton xà ata na amji na hũpar, ne hanea ne cute Pahpãm na ihcakôc kêanre xà na amji na hũpar, ne taa mã quê ha ihhimpej to caku to incrê ne ihkôt hĩkjê. ⁶Mã cute Pahpãm cuna mã ihcakôc kêanre, haprÿ mea mã, ne hanea ne curi Pahpãm krĩ xà ata mea mã ahna ihcakôc, ne hanea ne ihkôtçôjkwa kam amehkrĩ atajê cunea na apu ihcakôc kêanre. ⁷Ne cute Pahpãm na mehkwy cunea me apu ajpu, ne cute me hirô pê ihcuhê na amji caxuw hũpar. Ne hanea ne cute ampo kra me, krĩxàre cunea me, me harkwa pihho catêjê atajê cunea to ihhimpej xà caxuw, cute amji na hũpar. ⁸Ne por mehcunea pjê kam me amji to me ajpa atajê cunea, quê ha ampo kênti ata kôt me amji kampa, ne toa amji mã mehhimpej. Ne por hacpÿa mãmehfir xà jô kàhhôc kam me haprÿ hikwa atajê ri, nee ihkôt me amji kam hapac nare. Ampo na? He pê Pahpãm pjê ton pêa mã cute me Caràcahàre Kra curan na to amji kampa ata to ri amji mãmehhimpej to me ipa. Cwÿrjapê ri cute amji mã hō kàhhôc kam me haprÿ nōr.

⁹Cwÿrjapê ca me ipar peaj ne, me gũpar mã ate me hamãr pàràpên. ¹⁰Por jũm jaxàr xà caxuw apu mō ata, quê ha ihtÿj me haxà, ne por jũm apu wapo xwahhihti te ihcuran xà caxuw apu mō ata, quê ha ihtÿj wapoxwahhihti to mehcurea. Ne pom ampo itajê, me cupê Pahpãm na mehkwy caxuaw ri, ne quê ha ihtÿj me cumã awcanã, ne Pahpãm to amji mã mehhimpej kam me to incrã tu ne.

Mã hũmre nōa pê ampo jàprêhti pyrãc ata cator

¹¹Ne ite pjê pĩn ampo kênti itajê nōa jàpir na hōmpun. Mã kam hĩpàr pê carà cahãcti hōhtia jĩpàr ne ipijakrut. Ne cama cagãti kêanre ata cakôc xà me ipipëan. ¹²Ne mam cagãti kêanre ata carôat to, kam mare mã hàpên to ipa. Ne pjê kam mehcunea amehkrĩ atajê mã cute mam ampo kênti ata kĩn na, incryac kam hũjahkre. Por ajmãr cute wapo xwahhihti tomehcurean, mã hacpÿa mã cutea amji caprãr ne impej ata kĩn, na ri incryac kam me cumã awjahkre. ¹³Ata te ri me hũmre kam mare mã ampo pihhoti catia ton. Ne cute çôjkwa pĩncuhy ton, ne pjê wÿr ihkujahêc, mã pjê kam ihpÿm. Mã me hũmre cunea te me hōmpun. ¹⁴Mã hapu na ampo kênti cator ita te ri pjê kam me hũmre itajê cunea mã ihhêj. Mã Pahpãm te cama cute mam ampo kênti ata carôat to ampo ton xà na hamãr, mã cute ton, ata to ri cute me hũmre cunea mã ihhêj. Ne cute pjê cunea kam mehcunea mã harkwa to:

— Ca ha cute wapo xwahhihti to ajmãr me ampo kênti curan ita krekà to me amjimã ahimpej, ate amji mã mehkĩn prãmte — hajÿr. ¹⁵Mã cute me ton, mã pom hapu na ampo kênti ita te ampo kênti krekà ata jakôr, mã pea ihcakôc, ne cumã mehkĩn ne me hũpa nare atajê cunea jipej xà caxuw amji na hũpar.

Ampo kênti ata me hàhtôa kam haprÿ nō

¹⁶Ne pea cute me hũmre kà me, me ahkrare me, me hakràj me, me cupê hamreare me, cama me cumã me hàpên catêjê me, amjia kôt me

hàpêncatêjê mã harkwa, mãr quê amji kam awpôc rûmamji jûhkra kam me haprÿ nō, nare, quê ha mehkcütÿj kam me cunō. ¹⁷Ne cute me to hajÿr xà ata kam, quê nee jûm kuctÿj kam ampo kênti japrÿnare ata mã me ampo to hàhpan nare, ihpore na. Ne nee me cupê ampo japrôr nare, ihpore to. ¹⁸Ne haprÿ cahyt xà te hajÿr he: “666”. Ca ha ate akrã krea te amji jahkre pejti na, ca ha atÿj kampa.

Por 144 mir atajê Pahpãm pej na me harên

14 ¹Jirô pê mã wa irît, ne ite Caràcahàcre Kra pê Jeju ata te Xijãw jō hàpkàjti na hãm na hõmpun. Mã cahê na cute me 144 mir ne mehcuhhê. Mã mehkcütÿj kam me Jeju haprÿa hikwa, ne me kam Hùm Cati japrÿ. ²Wa ite cõjkwa pîn me hõkre ata par, mã ihhêj rûm cupê cõhxocti jãhkrihkrit, ne hàwrãrãc ita pê ihhêj rûm pahhãjê jãwrãrãc, wa ite impar. Mã hõkre pê ihhêj rûm wakÿre japàre ita jõkre par. ³Mã Pahpãm krî xà pu na cute me cwat atajê me, pahhi te me winticwat atajê me, cute mehkrã ne me to xa. Mã me cuna mã cute me 144 mir atajê me xa. Ne mençrer xà intuw ata to me cre, ne jû wÿr quê pjê pê cute mejûm pytãr nare ata me iràn xà na increr atajahkre pej ne to cre. ⁴Ne por me xa atajê te amji kam me hapac xà peaj to impej, ne nee rÿ jû caxuw pyjê na amehûhkra nare. Quê ha jû kam Caràcahàcre Kra ata mör prãm, quê ha ma ihkôt me mō atajê pê me hûmre cahhur na me hütã. Ampo na? He me taa mã pê mam Pahpãm me Caràcahàcre Kra ata mã me amji gō. ⁵Ne jû caxuw mehnō te ihhêj xi xà nō ton nare. Ne nee ampo pyxitre na mehnō kên nare, ne mempeaj to mempej.

Quê ha Pahpãm me cupê hõ tekjê nare atajê to hamre

⁶Wa ite Pahpãm mã imprar catêjê nōa tor, ne kÿj pê ihtêm na hõmpun. Mã cute pjê kam ampokra me, me harkwa pihho me, ampo krîxàre cunea mã, ihkrãhhia kam Jeju pê me pahkritxwÿ na harên xà impejti to hûjarên to ihtêm na, ite hõmpun. ⁷Mã cute me cumã hûjarên to hajÿr he:

— Imã me amã ampo pej rohnÿtti mã ata jarên xà ata pê nee mã ampo nare. Caamji mã me Pahpãm cupa, ne catihti na amji mã me harê! Nãmri cute pjê kam me hûmre cunea cukij xà ne me to ipicokjêr jō amcroa kam ramã hàhhuc. Ca ha, por cutecõjkwa me, pjê me, cõxwa me, hatuj xà cunea ton catê ata, ca ha to me hàmnãn prãmte me acakôc to impejti, ne me amã ihkînti ne — hajÿr.

⁸Mã ihkôt mare mã ihtor ita te hanea ne hûjarên to:

— Ma krî catia japrÿ te Papirôn jō krî ata pÿm ne hamre. Ampo na? Por pê curi mehkrîatajê pê mehkeãre, ne ajco pjê cunea kam mehkwy mã ampo to hahkre to hane he: “Hacme ne ahti na ame pyjê kwÿ caxu” hane. Ata pê ihhêj rûm cutemehkwÿ mã cõxÿhti jör, ne amehkwÿ to ipipãn pyrãac. Ne me caxun ita pê ihhêj rûm cute me cõxÿhti xen, ne

ampeaj kam ahti na me cumã me cahãj caxun prãm. Cwÿrjapê ri Pahpãm te me hõ krī meã mã me tohamre tu — hajÿr.

⁹⁻¹⁰Ne pom hapu na ipijakrut kôt ihtor ita te ri ihkrãhhia kam hũjarĕn to: — Por jũmjê apu ampo kĕnti me, ihkrekà kĭn, mãcute mehkuctÿj kam haprÿ nŏr, nare, cute mehũhkra kam haprÿ nŏr atajê, quê ha Pahpãm te ame kam incryc xà pê ihhêj rũmcôxÿhti ata to amehkôm. Por mehcunea te ame ita ton atajê, quê ha mehkàj xà atajê uu ne cuhy te kĕn to ihprà ata kam me cumã hamre nare. Nekĕn cacro ata, quê ha ihtÿj Pahpãm mã memprar catêjê me, Caracahàcre Kra ata kam mare mã mehkà to caxàr to ihcuhhê. ¹¹Ne pom quê ha cuhy ame cumã ihkàj xà to ita kũm, quê ha ihtÿj hŏtpê ma hàpir to ipa rohnÿtti mã. Quê ha cute ame ampo kĕnti me, ihkrekà kĭn itajĕmã, jũ caxuw caxwa me amcro kam mehkàj xà itajê amji to ihpec nare. Ne hanea ne, por cute mehkuctÿj kam ame haprÿ nŏr atajê cunea mã, quê ha ita hane — hajÿr.

Pahpãm na mehkwy ihtÿj me amji pupun xà kĕanre kam ame ipa

¹²Quê ha Pahpãm na mehkwy me, por me harkwa kampa, ne ampeaj kam Jeju to amji mã mehhimpej atajê, quê ha ihtÿj me curê xwÿn te ame to kĕanre ata jãhpan xà na, mehkĕn mã me hàr name to amji japackre. Ne quê ha ihtÿj me awcanã, ne cormã Pahpãm me Jeju kŏat me amji ton to me ipa.

¹³Wa pea ite cŏjkwa pĭn jũm jŏkre ita par, mã hũjarĕn to:

— Ita na ca mehhŏc he: “Pom quê ha cormã Pahhiti jãpĕn xà kam ame ty atajê quê ha ame hakry” — hajÿr. Mã Pahpãm Carŏ Pejti te me cumã hũjarĕn to:

— Ýhÿ, ita ampeaj kam ri. Hamre. Ita caxuw, quê ha ihtÿj me hàpĕn catêjê atajê ame kôt. Ampo na? Ramã me hàpĕn xà ita kôt me cumã ampo cunea — hajÿr.

Quê ha Pahpãm mehkwy to cuprŏ ne amji mã me huwahi

¹⁴Wa irĭt, ne ite jũm pê me Pahhàkà cati pyrãcti, ne wakÿre prà tepti pê ôr te ihkrãhkà ne ihkrã na ajĕt ata pupun. Mã cute hũhkra to rŏhkrÿt xwahhi pyrne ahcacrã jakati kam to jÿ. ¹⁵Mã pea Pahpãm mã memprar catêjê nŏ Pahpãm to amji kam hapac xà jũrkwa pĭn cator, ne cute kÿj cati pĕã mã ahcacrã jakati kam jÿ ata mã carãrto:

— Gŏ rŏhkrÿt to, pjê kam, me hũmre pê ihhêj rũm pur kam ramã ampo teptu, neramã ihkĕhkĕn xà na atajê, ca ha to hakep — hajÿr.

¹⁶Jirŏ pê mã ri, por ahcacrã kam jÿ ata te pjê na hŏ rŏhkrÿt to ihtĕm, ne cute to ampo cunea jakep xà atajê jakep partu.

Quê ha Pahpãm cute mehkĕn ton atajê to pĭxŏ ne me hatĕ

¹⁷Wa ite cŏjkwa kam Pahpãm to amji kam me hapac xà jũrkwa pĭn harkwa na imprar catê nŏ cator na hŏmpun, mã cator, ne hanea ne cumã

hõ rōhkrýt xwahhihti. ¹⁸Jirô pê mã wa ite Pahpãm mã imprar catê cuhy toamji pytâr ata te Pahpãm jürkwa pê cator na hõmpun. Ne cute ihnõ mã rōhkrýt ata mã kýt cati pêa mã carâr to:

— Ramã pîxô pê uwa itajê cunea inteptu, gõ rōhkrýt to pjê kam pîxô atajê cunea jakep partu — hajÿr. ¹⁹Mã cute pjê na hõ rōhkrýt to ihtẽm, ne cute to pîxô atajê cunea jakep partu, ipâr pê. Ne cute Pahpãm te incryc to hipu xà pêihhêj rûm kwÿr jatên xà ata kam haxwÿr. ²⁰Ne pê Pahpãm jõ kwÿr jatên xà ata krî pê ampÿa mã xa. Ne pê Pahpãm te incryc tohipu xà kam me pîxô jatên kam me tê, ne pê pîxô cacô ata pê me caprõne ajxwÿ. Ne ihtua to ihtu. Ne kàj mã ihtu na me pajara capô pyxit. Ne mõi jüwry to cute 300 quirom.

Cute me pahcurê xwÿn carõ kên tohjê atajê Pahpãm to amji mãme amnä

15 ¹Ne hanea ne irît, ne ite cõjkwa kam ampo catia cupahti ata pupun, ne ite amji mã:

— Pÿhàpã ampo mã ajte? — hajÿr. He nee mã ampo nare, Pahpãm mã memprar catêjê te xet atajê te Pahpãm te pjê kam ame to kên xà atajê to me amji tÿj, ne me to xa. Atajê pê ri Pahpãm te amekam incryc xà cahhur kêanre atajê.

²Ne pea ite wit pê cô catia pyrãcti me cuhy picacwÿr ata pupun. Ne hanea ne ite, por cute me cagãti kêanre ata me, carõ krekã atajê me, ampo kënti te me hũmrekam haprÿ nõi atajê tohjê catêjê pupun, mã me xa. Por wit pê cô catia pyrãctiata cahê na ri me xa. Ne ame wakÿre japãre atajê cakõ, por Pahpãm te me cumã hõi atajê. ³Pê Mojxe xwÿ Pahpãm te mehkên pê meto cator xà na increr to ihkõt me ipacatêjê mã hahkre. Pê hanea ne Carãcahãcre Kra pê Jeju ata Pahpãm te mehkên pê me to cator xà na mehkÿ mã increr to hahkre. Mã me to increr to:

“Me ijõ Inxũ Cati pê Pahhiti ata,
ampeaj kam acarõt tÿj,
ne ampeaj kam gãpên xà itajê catyt kam ne impej.
Ne apê pjê cunea kam ampo krìxãrecunea jõ Pahhiti,
ne ate amji mã ahimpej xà atajê,
ampeaj kam ihcuhtac, ne ampeaj kam ri!

⁴Ne jũm quê amji mã acupa nare?

Wa me icunea amji mã me acupa.

Ne jũm quêacati na amji mã garên nare?

Wa me icunea acati na amji mã me garên to me ipa.

Ampo na?

Quêt apyxit peaj ne apê ajteare mã,
ne apeaj to apej,

ne nee akam ampo kên hamreare.

Quê ha krĩxàre cunea awỳr me apkjê ne me cumã akĩn,
 por ca mehcunea kam mare mã ampo to gâpên xà cunea cuhtactiitajê
 to,
 mã me hõmpu,
 na ri me awỳr me apkjê ne me cumã akĩn” hane.

Pahpãm mã memprar catêjê ampo kên te xet ne me to cator

⁵Jirô pê mã, wa ite cõjkwa kam Pahpãm to me amji kam hapac xà jũrkwa te amji jihê mên na hõmpun, mã ampo kà te Pahpãm jũrkwa caxwỳn ataxa. ⁶Mã Pahpãm mã memprar catêjê te xet atajê te ampo kên te xet atajê to me cator, Pahpãm to me amji kamhapac xà jũrkwa pĩn. Ne cupêhkà jakati pràti atajê to pit mã cute amehkà, ne wakỳre prà tepti pê ôr ata te ri amehcahti na hê, mã ame to ihcuhhê. ⁷Mã ampo tĩr te cwat ne Pahpãm pu na mehcuhhê atajê nõ te Pahpãm mã memprar catêjê te xet atajê mã wakỳre pràti pê ôr te cratti atajê jõr. Mã kam Pahpãm te ame kam incryc xà te hipu partu, por Pahpãm tĩr rohnỳtti mã ata cryc te ri to hipu. ⁸Mã cute Pahpãm to me amji kam hapac xà jũrkwa ata kam, Pahpãm carôt jàhcujrohtikam ihkũmti ata te to hipu tu, ne jũ wỳr qué cormãne jũm cumã axà. Quê ha xa Pahpãm mã memprar catêjê te xet atajê ampo kên itajê to ame hamre, qué ha ihtỳj jũm cormã cumã axà.

16 ¹Jirô pê mã, wa ite cute Pahpãm to amji kam me hapac xà jũrkwa pĩn, Pahpãm mã memprar catêjê te xetatajê mã, jũm jõkre tỳjti jũjarên xà te hajỳr ata na impar:

— Ca ha pjê kam me Pahpãm cryc te cratti te xet to hipu atajê jaxwỳr to mō — hajỳr.

Mam ampo kêanre ata pê ri mehxêt kêanre

²Mã mam cati mã ita te pjê kam cratti pê Pahpãm te ame kam incryc ata jaxwỳr. Mã mehxêt kêanre te, por cute ame amji mã me ampo kênti me, ihkrekà jũpa ne to cati, mã cute me kamhaprỳ nõ atajê kam ihtêm, ne me cumã hàà to hà.

Hapu na ampo kên ata pê ri cõxwa te me caprô na amji ton

³Mã hapu na ita te cõxwa kam cratti pê Pahpãm te ame kam incryc ata jaxwỳr. Mã hamrecõxwa te me caprô na amji ton ita pê ihhêj rũm jũm tyc caprô, ne pea cute cõ kam ampo tĩr atajê cunea jipej.

Ampo kên crê ita te ri cõ jatuj xà te caprô na amji ton

⁴Mã incrê ita te cõ jatuj xàa kam cratti pê Pahpãm te ame kam incrycata jaxwỳr. Mã pea cõ te me caprô na amji ton. ⁵Ne ite, por Pahpãm mã imprar catê te cõ to amji pytàr ata te hũjarên xà te hajỳr na impar he:

— Apyxit peaj ne me hirôa pê apej! Caa pê ca mam akrî, ne cormã akrî rohnýtti mã. Ne catyt kam ate mehçukij xà caxuw apeaj to apej. ⁶Ampo na? Cute me akwÿ caprô jaxwÿr, ne hanea ne me cumã garkwa to mehçakôccatêjê caprô jaxwÿr, cwÿrjapê quê ha hahpan xà na ihtÿj me caprôa to me ikô, naca ate me cumã me caprô ita jôr, quê ha ihtÿj me to ikô — hajÿr na, ite impar.

⁷Ne pea ite Pahpãm mã ampo kûm cuxwati to caxâr xà ata pîn, jûm jôkre jûjarên xà te hajÿr ita par, mã cute hûjarên to:

— Me ijô Inxû Cati pê Pahhiti ata, ampeaj kam quêt acarôt tÿj. Ca ate amehçukij ne me to ipicokjêr xà ita caxuw, acaxwãm catia mã apej ne acuhtacti, ne ampeaj kam riapeaj to apej — hajÿr.

Ampo kên te cwat ata pê ri pyt cacro te me to caxâr xà

⁸Jirô pê mã ri cute cwat ita te pyt kam cratti pê Pahpãm te ame kam incryc ata jaxwÿr, ne cumã cuhy to cute me hûmre to caxâr na hûjahkre. ⁹Mã cuhy te me to caxâr, mã cute ame Pahpãm japyr to ihçakôc to kêanre to me hajÿr he:

— Akêanre! Nãmhã, ne me ito kên ita jicu! — hajÿr. Ne nee cute amehkên itajê jicu nare, ne nee Pahpãm catihti ata to cumã mehçakôc nare.

Ampo kên te xïc ata pê ri awcapàtkô me, me kàj xà

¹⁰Mã cute xïc ita te ampo kênti krî xà ata kam cratti pê Pahpãm te ame kam incryc ata jaxwÿr. Mã ampo kênti te ihhimpej xà atajê cunea kam awcapàtkô, na ri curi mehkrî catêjê cunea kàj xà. Mã tee mehkàj xàhte ame ahkà cãmxa, por me haxôp atajê xàhte. ¹¹Ne ame còjkwa jô Pahpãm mãn to kêanre, ne nee ajte cormã cute me hõ pry kên ata jicu nare ajte.

Ampo kên te xêj ata pê ri me ipijapu xà catia

¹²Jirô pê mã ri cute xêj ita te còhti japyr te Cômpejti ata kam crattipê Pahpãm te ame kam incryc ata jaxwÿr. Mã pea cô ata crà, ne ihçajpuw pry nô, ihkôt pyt japôj xà pîn pahhi catêjê te me ipa, ne me hapôj xà na. ¹³Wa ite ampo carô kên crê pê pôrti pyràcti, tûmti, kêanre atajê japôj na hõmpun. Mã pyxit ne cagãti ata jarkwa pîn cator, ne hanea neampo kênti ata jarkwa pîn pyxit ne cator, ne hanea ne cagãti jarkwa kôt mehhêj xi to mehçakôc catê ata jarkwa pîn pyxit ne cator. ¹⁴Ne ampo carô kên pê pôrti atajê pê jû caxuw jûm xûmre te ampo pihhoti pupun nareatajê ton catêjê, ne ihtÿj to me higêc rê. Ne pom ampo carô kên atajê pjê cunea kôt amehçahkûm, pahhi catêjê kôt, cute me to cuprônprãmte. Mã hàhtôa ne cute me cuprôn, Pahpãm pê Pahhiti carôt tÿjti ata cuna mã me ipijapu prãmte, hõ amcro ata kam.

Pahpãm na mehkwÿ ihtÿj Jeju cator jikaj xà me cuprô

¹⁵ÿhÿ me ikwÿ, he pê Jeju me pamã amji cawpa to hane he:

— Me ikampa he, wa ha ajpên me awÿr itēm xà ita to ihhêj rŭm me hàhkij xi prar xà! Ne por quē ha me ikampa atajê, me iriat na ame ipa. Quē ha mehkà to me amji cŭmpej hiahpuro ne me hakryti to me ipa. Ampo na? Quē ha nee me hàhtôti atajê kam mare mã amehcakrô naamehpahàmti to me ipa nare — hane.

¹⁶Jirô pê mã ri ampo carô kên crê pê pôrti pyrác atajê te me cupê pahhi catêjêcunea to cuprôn, por Epew catêjê jarkwa na pjê japyrÿ teMequit jô kên ata ri.

Ampo kên te xet ata pê ri pjê jàhcujrôn catia

¹⁷Mã cute xet ita te cratti pê Pahpâm te ame kam incryc ata jaxwÿr, kÿj pê. Mã pea Pahpâm to me amji kam hapac xà jŭrkwa kam ihkrĭ xà atapĭn, jŭm jôkre tÿjti ata te hŭjarĕn to:

— Ramã cute amji jipêj! — hajÿr.

¹⁸Mã ihcuxê, ne me hŏkre, ne hàhkrihkrit jàwrārāc, ne pjê jàhcujrôn catia to cati ata, por rÿ jŭ caxuw jŭm te pjê jàhcujrôn kēanre pupun nare ata. Ne mam ihkwÿ atajê jirôa pê ihkēanre. ¹⁹Ne por krĭ catia ata te amji cahhêc to incrê, mã pjê cunea kam krĭ atajê cunea jamre. Mã Pahpâm te Papirôn jô krĭ kēanre kam, cuteincryac to incryc na amji to amji japackre. Ne cute krĭ kam incryc jàprēhti ata mēn. ²⁰Mã cô jipôc ri amcrà atajê cunea jamre. Ne hanea ne hàhkà jakôtti atajê cunea jamre. ²¹Mã ta te amji to kên ne me hŭmre kam apu ipijaxwÿr, ne cute ame to kēanre, ne ta te kên atajê pytĭ na cute cwarēnta quir. Mã pjê kam me hŭmre itajê cunea ame Pahpâm mân kēanre, pê kên te taita ame to kēanre, na pê.

Cute Pahpâm pynār nare atajê pê cahāj xyre kēanre ata pyrác

17 ¹Mã pea Pahpâm mã memprar catêjê te xet te cratti te xet cwÿr atajê nŏ ajpên iwÿr mŏ, ne cute imã hŭjarĕn to:

— Ajpên iwÿr mŏ, wa amã cute krĭ cati kēanre ata to cute amehkên xà ata jahkre, ne amã harê. Ýhÿ, por cô jàhtôa cote na, krĭ catia xa ata pê ihhêj rŭm pyjê nŏ inxyre kēanre pê impjê nare ata pyrác. ²Mã pjê cunea kam krĭ jo pahhi catêjê cunea hÿrmã me pra, cute amji mã ame ampo kĭnti atajê wÿr. Ne cute me ampo kĭnti atajê pê ihhêjrŭm jŭm cahāj xyre ata pyrác. Mã pjê cunea pĭn me hÿrmã me pra, ne kam ame ipa ata pê ri ihhêj rŭm cuteame cô xÿhti xen catêjê te cô xÿhti to pit mã ame amji japackre — hajÿr.

³Mã pea Pahpâm Carô Pejti te imã amji jŏr, mã ma ahkêt wÿr harkwa na imprar catê te ijaprôr ne ito mŏ. Ne curia wa ite pyjê inxyre nŏ ata teampo kēnti intepti ata kam hÿr na hŏmpun. Mã ampo kēnti ata kam, cute me cumã haprÿkēanre pyxwÿr atajê na ihhŏc. Ne pê ampo kēnti ata kam ihkrā xet, ne kam hĭpār tej. ⁴Pê hanea ne cahāj xyre kà ata inteap to intep, ne hakrô xà itajê to pê amji jakrô ne kam jÿ he. Wakÿre prà tepti

pê ôr ata me, kên prà tepti na hĩ jàhwÿrti atame, ampo prà pê kên prà pyrãcti ata me, pê to amji jakrô ne kam jÿ. Ne pê hũhkra kam wakÿre pràti pê ôr te ihkôm xà kam me hàhtôa te me to inxÿ xà tũm kêanre ata juwahi ne to jÿ, pom pê ajco mehcunea ajco me caxu ata to pê jÿ. ⁵Ne ihkuctÿj kam cute amji jarên xà na, ihhóc ata harên to:

— Ijapryê pê Papirôn jô krĩ catihti ata, ne ipê pjê kam pyjê inxyre catêjê me, ahti na me hũmrea te ame amji to inxy catêjê menxi — hajÿr. ⁶Wa ite pyjê nõ ata pupun, mã cute Pahpãm na mehkwy me, por pê ampeaj kam Jeju kôt me amji ton to me ipa, pê ajco mehcura atajê caprô tocute amji to ipipãn tu. Wa ite hõmpun, mã cute imã ipikrar ne ijigêc hyr.

Pjê to mehhimpej catêjê pê ampo jàprê kêanre ata pyrãc

⁷Mã Pahpãm mã memprar catê ata te icukij ne imã:

— Ampo na mã cute amã ipikrar ne gigêc hyr, ca hũpate apu ato cara? Apu amji mã pa nare, wa ha amã cahãj ata me, ampo kënti kam ihkrã te xet ne kamhĩpãr te tej ata, wa ha amã kôt harên to imej. ⁸Ne pom ca ampo kënti pupu ita, ihtĩar cormã, ne nee quê ha cama ihtĩr ata na ahtũm ry nare, quê ha hamre. Quê ha kreti jatõhhy nare ata pĩncator pê, quê ha Pahpãm to hamre. Ne por mehcunea te ampo kënti cator na me hõmpun ata te me cumã ipikrar, mã hũpate amento cara. Ampo na? Pêmam ampo kënti ata ihtĩar na apu ipa, ne ajte krã ihtyc, ne quê ha jũ caxuw hacpyã mã ihtĩr ne cato. Ne por mam, pjê jamre reria mã Pahpãm te amji mã hacpyãmã mehtĩr xà jô kàhhóc ata kam ramã me hapryê nõr atajê ri, nee apu amji mã me hũpa nare. Ne mehkĩnte ihkàhhóc kam me hapryê hikwa nare atajê, quê ha ampo kënti ata pupu, ne me cumã hũpaa to hũpa.

⁹— Ne pom ite harên xà itajê, jũm krã kre te amji jahkre pejti quê ha ihtÿj kampa, ne hahkre pej. Pom ampo kënti krã te xet itajê pê, por hàhkã jakõtti te xet mãkam pyjê nõ jÿ ata pyrãac. Ne hanea ne cupê pahhi te xet atajê pyrãac. ¹⁰Ne ramã cute xĩc ne hamre, ne cormã pyxit ne ihhimpej, ne nee cormãihnõ ata cator nare. Ne pom quê ha cormã pahhi cato ita, quê ha cato ne nee ahna ahtũm ry nare, quê ha hamre. ¹¹Ne pom mam ramã ampo kënti cator, ne ramã hamre ata te ri ihkwÿ itajê to ôjtô, ne taa mã quê hapu na ihkwÿ te xet itajê to ihhimpej, quê ha ihtÿj hamre.

¹²— Ne por hĩpãr te tej, ca ate hõmpun atajê pê ihhêj rũm pahhi te tej, ne nee rÿcute mehhimpej kam ihtêm nare. Na quê ha cormã cute ampo kënti cahê namehhimpej to me amcro pyxit xà caxuw amji na me awpa.

¹³Ne mehcunea te ramã me amji par, quê ha ihtÿj me ampo kënti ata mã cute me amji jahkre pej atajê gõ, ne hanea ne cumã me carôt gõ. ¹⁴Ne quê ha ihtÿj Caracahãcre Kra ata me, me amji cujtê, ne me ajpu, quêha pea Caracahãcre Kra ita ihtÿj me hirô pê xa, ne me tojhê. Ampo na? Cupê me hũmre jô Pahhiti, ne cupê pahhi cunea jô Pahhiti na ri. Ne por Pahpãm

te amjimã me capi, mã ihkôat me amji kam hapac to me ipa atajê me, quê ha ampo kênti ata ajpu, ne pea me hirô pê xa, ne me tohjê — hajj̄r.

¹⁵Ne hipêr Pahpãm mã memprar catê te imã:

— Ne pom ca ate cô jãhtôa pupun, mã cahê na jũm cahãj xyre jj̄ atajê pê pjê cunea kam ampo kra me, krĩxàre me, me harkwa pihho catêjê.

¹⁶Ne pom ca ate ampo kênti me, hĩpàr te tej pupun atajê, quê ha ma ame cahãj xyre ata caca, ne ame curê. Ne cupê cute ampo kĩn xà to amjijakrô atajê cunea to cupê ihpôj partu, ne mehcakrô to tojnô quê ha jj̄. Jirô pê mã quê ha ihtj̄j me jũm xyre ata jĩ ku, ne pea cuhy to me tocapa, ne me to acto, quê ha hamre. ¹⁷Ampo na? Pahpãm te aracri pahhi atajê mã caxwãm pê me cumã me cute me to jũ mãn xà atajê jôr, ne hanea ne cute caxuw me cumã carôtjôr. Ne hanea ne ampo kênti te me to ihhimpej xà caxuw cute cumã carôt jôr, mã ampo kênti ita ihtj̄j cahãj ata to apu ihkêanre toipa, Pahpãm te ahna harkwa hyr xà na. ¹⁸Ne pom ca ate cahãj xyre pupun ita pê krĩ catia ata pyrãc, mã cute amji wj̄r pjê cunea jô pahhi to cuprôn, ne taa me to ihhimpej ata — hajj̄r.

Cute Pahpãm pynãr nare atajê, quê ha me hamre

18 ¹Jirô pê mã wa ite côjkwa pĩn Pahpãm jarkwa na memprar catê nô pupun, mã ajpên ahpar mã tẽ. Por Pahpãm carôt t̄jti ata jarkwakôt, ajpên ahpar mã tẽ. Ne ampeaj kam ihprã, ne ihprã jãhcujro ita te pjê cunea kujro. ²Mã kj̄j cati pëa mã cute carãr to:

— Papirôn jô krĩ catia ata p̄m! Ne ita caxuw quê ha mepahcurê xw̄yn pit kam apu ipa, ampo carô kên tũmti atajê me. Quê ha ihtj̄j xõnti me, ampo jara kêanre, kĩn nare atajê me, quê ha hanea ne kam amji to ajpa. ³Ampo na? Cute me hũmre cunea mã hõ côx̄yhti jôr, ne ihtj̄j hõ côx̄yhti ita na mehw̄j mã quêt to ipa, ita pê ihhêj rũm cute me cahãj xyre to amenxyto ame ipa pyrãac. Mã pjê jô pahhi catêjê cunea te ramã amehcaxun par, mãcute ame ampo to ihpore na hàhpan catêjê cunea te amehcaxun xà ita jahpan xàna, ramã amji to ame hakràj par — hajj̄r.

⁴Ne hanea ne ite côjkwa pĩn jũm jôkre ita par, mã cute hũjarên to:

“Me ikw̄j, krĩ ita pê me acato,
cupê me acato!

Nee ca cuxà ame ampo kên itajê kw̄j ton nare.
Ne nee ca ihkên ita mã ihkôt me axàr nare!

⁵Ampo na?

He ihkên ita ramã amji jipy hakôat to hakôt,
ne ramã cute côjkwa huctu.

Ne Pahpãm ihtj̄j cute ihkên ton xà ata to amji japackre.

⁶Ne cute me amã ampo kêanre jôr atajê jahpan xà na hacp̄ya mã,
me cumãme ampo kêanre atajêa gô.

Ne cute me amã ampo kêanre ton atajê jahpan xà na,
 ca ha me cumã gãmjôr to catia to ajkrut.
 Ne cute me ato kên prãmte ihkôm xà kam me amã côxÿhti to hipu
 jahpan xà na,
 ca ha ihkôm xà ata kam me cumã to hipu to ajkrut,
 cute me amã ihkôm xà kam ton atajê jirôa pê hacpÿ mã me cumã to.
 7 Me cumã amji kîn nare to,
 ne hanea ne me cumã ihkên xà kêanre to, ne me cumã agõ.
 Ampo na?
 Pê ramã taa amji mã ampo pejti jãhtôa ne cugõ.
 Atajê kôt ri mehcunea ramã amji mã hakràj cati na me harê.
 Mã taa amji to hàmnãn to:

“ Wa ipê pahhikwÿj ne ijÿr xà ita kam jÿ!
 Ne nee mã ipijapit nare,
 ne nee waha jũ caxuw amji na ihkên xà nõ pupun nare’ hane.
 8 Cwÿrjapê quê ha amcro nõ pyxit,
 quê ha hÿrmã ampo kên kwÿ cato,
 ne apu to kêanre ne.
 Quê ha cumã ampo hà,
 quê ha ihtÿj ihkàj xà na amjipupu,
 ne ampeaj kam cumã prãm.
 Quê ha cama cuhy kam me to capa.
 Ampo na?
 Pom me pajõ Pahpãm pê Pahhiti carôt tÿjti ata quê ha ihcukij ne apu
 to kêanre ne” hajÿr.

Pjê kam me hakràj jamre japête ri ame amrã

9 Ne pjê jõ pahhi catêjê atajê te ame cahãj xyre to amenxy atajê me,
 menxÿ xà kêanre atajê, quê ha krî pê me cahãj xyre pyrãc ata kam
 cuhykũm pupu, ne ihtÿj ame caràr ne ame amrã. 10 Ne pea ampÿa mã
 cupê amehcuhhê, mehkên mã hàr ne cute me amji pupun xà kêanre to
 me amji pupun cupate, ne me ajpên mã:

— Akÿ, akÿ, Papirõn jõ krî catia carôt tÿjti ata, ca ajte amcro pyxit peaj
 kam akên mã axàr ne gamre pyrentu — hajÿr.

11 Ne pjê cunea kam me cupê ihpore na ampo to hàhpan atajê hanea ne
 hapête ame amrã. Ampo na? Jũ wÿr quê ha jũm hipêr me cumã ihpore
 na cute me cumã ampo to hàhpan xà atajê nõ japrô. 12-13 Jũ wÿr quê
 ha hipêr jũm mecupê ampo pejti itajê nõ japrô he: Wakÿre prã tepti pê
 ôr me, wakÿre prã jakare me, kên pejti na hĩ ahwÿ atajê me, caxàt xê
 pejti me, cupêhkà intepti me, cupêhkà hêrhêtre me, carà cahàcre hô te
 cupêhkà intepti ata me, pĩ na tee amehcukij ata me, ampo jĩpàr jakare

impejti atajê me, pĩ na hĩ ahwỳ ata me, wakỳre cahhyr na impejti ata me, wakỳre me, kĕn jaka pejre me, ampo pĩ kà te me hũrkwa cuxwa xà me, ampo pĩhhôc pê ràm cuxwa pyràcti me, ampo cacô cuxwati atajê me, pĩxô cacô xỳre me, ampo to impê xà me, kwỳr xôm me, arỳjhy me, pryti me, carà cahàcre hōhti me, cawrô me, cawrô jō kujti me, me pahcaxwỳn me, me hũmre me, me cahāj te cama cumā hāpĕn xà itajê nō to ihpore na me ahpa. ¹⁴⁻¹⁵Ne me cupê ampo to me hàhpan catêjê atajê, ampỳa mǎ amehcuhhê, mehkĕn mǎ me hàr xà ata cupate, ne ame caràr ne me amrǎ, ne cama krĩ ata mǎ me:

— Por pê ca ampo pejti na ajco mehprǎm atajê jamre, ne hamre, ca gōtpê apictor! Ne hanea ne gakerǎj itajê cunea to apictor! Pom kĕn pràti itajême, wakỳre pràti pê ca ajco to amji jakrô atajê me. Ne hamre, jũ wỳr ca hipĕr me cumā acato. Pê wa ajco ampo to me ijāhpan kam, wa rỳ ame ijakerǎj. ¹⁶Akỳ, akỳ, por krĩ cati ata! Ate cupĕhkà increcrti to akà ata, cupĕhkà tepti me irārāti ata, me hakrô xà cunea pràti pejti atajê me. ¹⁷Ajte ana amcro pyxit peaj mǎ ajte ihcunea na gamre, me gakerǎj mea mǎ! — hane. Mǎ pǎr kre jō pahhi catêjê cunea me, kam me ipa itajê cunea me, cōxwa kamcute amji to me ipijapar xà caxuw kam me hāpĕn catêjê me, ampỳare mǎ ajte cupê me xa. ¹⁸Ne cute mehkrĩ kũm jàpir to mōr na me hōmpun, ne ame caràr to:

— Wa rỳ jũ caxuw ite krĩ jakrājti nō te hajỳr pupun nare — hajỳr.

¹⁹Ne pea me cumā amji kĩn nare na cute me amji jarĕn xà na, cute meamji krǎ jipro, pjê jacrô to, ne amencwỳr to:

— Akỳ, akỳ, krĩ cati ata! Gakerǎj te ri, por cōxwa kam mehcunea mǎ pǎr kre atajê cunea to hakrāj par. Ne ajte ahna ahtũm nare mǎca ajte ihcunea na apictor, ne amcro pyxit kam ihcunea nagamre! — hajỳr. ²⁰Hōhō, ite impar ne hōmpun to hajỳr. Na wa ite ijarkwa to:

— Cōjkwa kam me acunea ame gakry! Krĩ ata jamre pyrĕn, ca ame gakry! Meapê Pahpām na mehkwy me, me apê Pahpām mǎ me cumā acakôc catêjê me, ca Pahpām jarkwa kôt me apa catêjê me, ca ame gakry! Ampo na? Nee mǎ ampo na nare, pom pê krĩ ita pê ame ato kĕanre itajêa to ri me Pahpām tehahpan xà na apu to kĕan to kĕanre — hajỳr.

²¹Mǎ pea Pahpām mǎ memprar catêjê nō, carôt tỳjti ata te kĕn catia nō ata jarĩ ne cōxwa kam to hũcapĕr, ne ihkôt me cumā harĕn to:

— Hōhō, quĕ ha me apê Papirōn jō krĩ kam me akrĩcatêjê mencryac kam me to hũcapĕr to mehanea, pom quĕ ite kĕn to ijũcapĕr he, quĕ ha jũ caxuw hipĕr me apupun nare. ²²Ne nee jũ caxuw akam, cute me wakỳre japàre cakôr catêjê nō jōkre kam me hapac nare, ne nee akam, cute me pohhê cakôr catêjê nō jākôrjōkre kam me hapac nare, ne nee akam hipĕr me hàkôr catêjê nō jōkre kam me hapac nare. Ne quĕ ha jũ caxuw cute me ampo cunea to hāpĕn jahkre pej atajĕnō, akam hāpĕn xà nō mǎ cator nare. Ne nee me akam arỳjhy huc nō jàhkrihkrit nō kam me hapac

nare. ²³Quê ha jũ caxuw hipêr akam hàhcujro xà nõ, jàhcujro nõ na me hõmpun nare. Ne nee akam, por me hũmre me pyjê nõ jikwa tuw to me amji mãmehcakôc atajê nõ jõkre kam me hapac nare. Ne akam ampo to me hàhpan catêjê atajê, pjê cunea kam mehkwy jirôa pê me carôt tỳj. Ne me gũxyto ajco pjê cunea kam mehcunea mã ahêj to apa.

²⁴— Papirôn jõ krĩ catia to cati ata, ca akên xà catia mã axàr. Ampo na? Cute akam me Pahpãm na mehkwy caprô me, Pahpãm jarkwa to mehcakôc catêjêcaprô me, Pahpãm kôt me amji ton to me ipa catêjê caprô mã me cator. Por ate me hipej atajê caprô mã ri, cute me cumã cator. Ỳhỹ, ne hanea ne, pom cute pjêcunea kam amehcuran itajê caprô mea mã cute me cumã cator, cwỳrjapê ri cute ihcunea to ajkam mehpỳm — hajỳr.

Côjkwa kam Pahpãm na mehkwy amji mã me to amnã

19 ¹Ita jirô pê mã, wa ite côjkwa kam me hàhtôa jõkre par, mã me harkwaxa, ne cute amji mã me hũjarên to:

— Cu ha Pahpãm catihti mempejti na me harê! Ne cupêa ri quêt me pahcunea kênpe me pahto hapôj catê! Ne mehcunea mã, pjê cunea kam, impejti na me hahkre pej! Ne quêt mehcunea jirôa pê carôt tỳaj to carôt tỳj! ²Ne cute me hahkre pej xàa na ri mehcukij ne meto ajcokjê, cajrerti cuhtacti to hãn nemehcukij, nee mã ihtỳj ame to ipicokjêr nare. Ne cutea ri krĩ ata pê cahãj xyre inxỳ xà kêanre ata cwỳrjapê ihkên xà kêanre ata mã mên, pjê cunea kam inxỳ xà kêanre atajê cwỳrjapê. Ne hanea ne Pahpãm te apu to kêanre, cute cumã me hàpên catêjê curan jahpan xà na.

³— Cu ha Pahpãm pejti catihti na me harê. Ampo na? Quê ha krĩ pôc ita kũm ihtỳj hõtpê hàpir to ipa, ne nee hamre nare! — hajỳr. ⁴Mã pahhi catêjê te me winticwat atajê me, cute me cwat atajê me, Pahpãmhyr xà kam jỹ ata cuna mãmehkôn krã na me hỹr, ne cute me amji mã me hũpa ne to cati prãmte, cumã harkwa to:

— Ampeaj kam ri! Apê me Ijõ Inxũ Cati! — hajỳr.

Jeju pê Caràcahàcre Kra ata jikwa tuw xà

⁵Mã pea Pahpãm krĩ xà ata pĩn jũm ita jarkwa cator, ne cute hũjarên to:

— Me pajõ Inxũ Cati pê Pahpãm catihti na ca me harê! Me apê cumã me gápên catêjêcunea, me hũmre kà me, mehkryjre me, por ca meacunea amji mã me hũpahti atajê, ca ha catihti na me harê! — hajỳr. ⁶Ne pea ite me hàhtôa jarkwa xãmte pê ihhêj rũm cõhxocti jàhkrihkrit me, pahhãjê jàhkrihkrit pyrãcti ata kam ijapac, mã cute me hũjarên to:

— Pahpãm mã ca me catihti to me acakôc. Ampo na? Me pajõ Inxũ Cati pê Pahpãmpe Pahhiti ita ri mehcunea jirôa pê carôt tỳj, ata ri pjê cunea to ihhimpej. ⁷Ne ampeaj kam me pajakry ita mã amji kĩn, ne me pajakrya to me pajakry, cwỳrjapê wa catihti na amji mã me harê. Ampo na? He ramã CaràcahàcreKra jikwa tuw xà jõ amji kĩa kam ri hàhhuc,

ne hõamcroa mã he. Ne hĩxi me hikwa xà caxuw cute me ajpĕn par, ne cute amji cŭmpej xàa kamri ramã hàhhuc. ⁸Ne ramã cute ihkà jakati, tŭm nare, pràti ata pyr, cute to ihkà xà caxuw, ne ihkà jakati impejti ata pĕ Jeju na mehkwŷ te ampo pejti ton to meipa xà — hajŷr.

⁹Jirô pĕ mã ri cute imã hŷjarĕn to:

— Ita na ca ihhõc he: “Por Caràcahàcre Kra pĕ Jejujikwa tuw xà jŏ amji kĭn wŷr cute me hatoratajĕ, me hakrya to me hakry”. Nãmri itajĕ pĕ ri quĕt caxwãm catia mã Pahpãm cakõc xà impejti atajĕ, na ca ha ahna ihhõc — hajŷr. ¹⁰Wa pea Pahpãm jarkwa na imprar catĕ cuna mã ikõn krã na ijŷr, ite amji mã hŷpa ne to cati prãmtĕ, mã cute amji tĕte imã harkwa to:

— Apu ito hajŷr nare, ipĕ me akjĕjĕ kwŷa nõ wa. Ne hanea ne ipĕ, por Jeju jarkwa to me amji mã mehhimpej to me ipa atajĕ kwŷ nõa wa. Pom me kamJeju jarkwa itajĕa ri me to ihhimpej to ipa. Na ca ha quĕt apu Pahpãm pit kĭn — hajŷr.

Quĕ ha Jeju ajpĕn tĕ ne curĕ xwŷn catĕjĕ to hamre

Ruc 21.25-28; 2 Texarõn 1.6-10

¹¹Jirô pĕ mã, wa ite cõjkwa te amji jihĕ mĕn na hõmpun, mã pea cawrô jakati ita cator. Mã kam hŷr catĕ ata japrŷ te CaxwãmCatia Mã Cute Amji Jarkwa Par Catĕ. Ne catyt kam hãn ne ajpu, ne cute ampo na me hõmpun xà atajĕa kõt hãn nemehcukij ne me to ipicokjĕr to ihcuhhĕ. ¹²Ne into pĕ ihhĕj rŭm cuhy põc hire ata pyrãac, ne ampeaj kam ihkrã kam cumã ihkrãhkà jãhtô. Ne por haprŷ na kam ihhõc ata ri, nee jŷmmã irãn xà na hahkre pej nare, ne cumãa ri hahkre pej. ¹³Ne ampeaj kam ihkãhti ata na me caprô. Mã cute amji mã haprŷ to: “Pahpãm Jarkwa” hajŷr. ¹⁴Mã ma cõjkwa jõkrãhtare te ihkà jakati impejti me, hõ cawrô jakatiata to me hŷnãr. ¹⁵Ne pĕ harkwa kam wapo xwahhihti ata xa, ne ajco hapõj, ne toa pĕ ajcoampo kra me, krĩxàre cunea to kĕanre to ipa, ne ajco me tojhĕ! Ne por wakŷrete pĩ cajrer pahtŷjti ata to, quĕ ha me to ihhimpej to mō. Ne pea Pahpãm carõt tŷjti ata te incryc to cuprõn xà pĕ kwŷr jatĕn xà ata kam, quĕha cute mehcuran atajĕ cunea caprô jaxwŷ. Por me caprô pĕ ampo cacõxŷre intepti ata, quĕ ha kam haxwŷ ne cormã hatĕ. ¹⁶Ne pĕ ihkãhti me, ihkjĕ kam ihhõc ata harĕn to: “Pahhi Catĕjĕ Jõ Pahhiti, Ne Me To Ihhimpej Catĕjĕ To Ihhimpej Catĕ”.

Pryjara te mehtyc kur atajĕ mehtyc jãhtõa pyrĕn hakry

¹⁷Ne hanea ne, pom Pahpãm jarkwa na imprar catĕ pyt kam xa ata te cõjkwa kam xõnti me, ampo jara cunea mã kŷj cati pĕa mã hàkjĕr to:

— Ajpĕn me cuprô! Pahpãm te me amã me gõ jõr xà atajĕ wŷr! ¹⁸Ajpĕn ame pra, ne ame cupĕ pahhi catĕjĕ jĩ ku, ne ame krãhtare jõ pahhi jĩ ku, ne ame krãhtare jĩ ku, ne ame cawrô me, kam ihkrĩ catĕjĕjĩ ku, ne ame

hũmre me, cama ame hàpên catêjê jĩ ku, hõ pahhi jĩ mea mã, ne ame hakràj jĩ ku, ne ame cupê hamreare atajê jĩ ku — hajj̄r.

Jeju te me pahcurê xwÿn pê ampo kên jàprê pyrác ata tohjê

¹⁹Jirô pê mã, wa ite ampo kênti ata pupun, ne hanea ne pjê jô pahhi catêjê pupun, mã cute me hõ krãhtare to me cuprôn, ne me to xa, cute, porcawrô jakati kam jÿ ata me hõ krãhtare cuna mã me hàprê prãmte. ²⁰Ne pea cute me ampo kênti ita kam ihtêm, ne mehpro, ne hanea ne cute ampo cunea to me cumã ihhêj xi to ipa catê kêanre ata pro, ne ajwar cute me haxàr. Nãmri taa mã pê ajco, por amji mã me hũpa, mã cute me kuctÿj kam haprÿ nŏr atajê mã ihhêj xi toipa. Cwÿrjapê ri cute ampo kênti ata me, cute harkwa na me cumãihhêj xi catê ata me, ajwar cuhy pôc te amji to kwa, ne kam kên te me to caxàr xà ata kam, cute mehtiar na me to hũcapêr. Mã curia mehkrĩ rohnÿtti mã. ²¹Ne por cawrô jakati kam jÿ ata jarkwa pĩn, wapo xwahhihti hapôj ata te ampo kênti jô krãhtare cunea jipej. Mã pea cute me ampo jara cuneamã me hàkjêr itajê te ame hĩ to harte partu.

Pê Xatanaj huwapre ita na ahna caku mir

Ipipên Xà 5.9-10

20 ¹Wa pea ite côjkwa pĩn Pahpãm jarkwa na memprar catê nŏ ata pupun, mã ajpên ahpar mã tẽ. Ne hũhkra kam cumã kre jatôhhy nare jihêrên xà ata, me wakÿti pytiti te mehcajpre xà ata to ajpên ihtêm na, ite hŏmpun. ²Mã pea iwrÿc, pê cute cagãti ata pro, ne por cagãti ata pê Xatanaj pê mam cati mã mepahcunea curê xwÿn ata. Mã cute ihpro, ne pea huwapre, quê ha huwapre ita na amji to caku to mir. ³Ne cute kre jatôhhy nare ata kam mên. Ne pea hihê xà to ihpro ne ahnato hihê. Cute cator ne ampo krìxàre kwÿ cunea mã apu ihhêj to ipa to caku to mir ita mã hahêr cupate ri, cute haxàr. Ne quê ha ihcuhhê, quê haxa caku to mir ita hamre, jirô pê mã, quê ha cormã me cumã hikran to incire ne.

Quê ha Jeju pjê kam mehkrĩ atajê cunea to ihhimpej to caku to mir

⁴Wa ite pahhi krĩ xà atajê pupun, ne kam mehkrĩ catêjê pupun, mã kam mehkrĩ. Ne por mehkrĩ atajêa te ri mehcuikij catêjê na amji caxuwme hũpar. Ne hanea ne ite Jeju to cute amji mã mehhimpej to me ipa, ne Pahpãm jarkwa to mehcajco to me ipa, mã cute incwÿrjapê mehkrã Jakep catêjêatajê caxwÿn pupun. Ne por ite me hŏmpun atajê, pê nee ame ampo kênti ata me ihkreka ata amji mã me hũpa nare, mã nee mehkuuctÿj kam me haprÿ nare, ne nee me hũhkrakam haprÿ nare. Cwÿrjapê ri hacpÿa mã amehit̄r, ne pea Jeju cahê na cutemehhimpej to caku to mir ita jicu xà mã me hahêr. ⁵Ne mehtyc atajê cahhur, nee hacpÿ mã amehit̄r nare, quê ha xa caku te mir atajê hamre, jirô pê quê

ha cormã mehcukijxà caxuw hacpỹ mã amehtĩr. ⁶Ne pom mam mehtĩr xà kam amehtĩr atajê, me hakrya to ame hakry. Ampo na? Quê ha Pahpãm quêt me to kênre nare, quê ha hipêr amehtycnare. Ne quêt me cupê Pahpãm tehcajpar catêjê, ne me cupê Jeju cahê namehhimpej catêjê, ne mehhimpej ita to me caku te mir ita jicu xà mã me to hahê.

Quê ha Xatanaj mã me hê pôn cri

⁷Ne caku te mir ata jamre jirô pê mã, quê ha me Xatanaj cator, ihcuhhê xà pê kre jatôhhy ata pê. ⁸Quê ha ma Coc jô pjê me, Macoc jô pjê kam, krĩ cunea apu ihcuhhê atajê kôthapôj to ipa, ne mehcunea mã ihhêj to ipa. Ne cute me cumã ihhêj ita toquê ha me hàhtôa ne me haprô, ne me to cuprô. Quê ha me hàhtô pê ihhêj rüm pjênxôm carôt jàhtô, me hàprê xà caxuw.

⁹Ne ma mehcakũm to me ipa. Ne cute me Pahpãm na mehkwy jô krĩ pê cumã Krĩpinkrên kĩnti ata krã, cute me hipej prãmte. Mã cõjkwa pĩn cuhy cator, ne cute mehcunea jipej tu.

Cuhy catia mã cute Xatanaj mên xà

¹⁰Ne pea cute me Xatanaj pro, ne cuhy te amji to kwa ata kam me to hũcapêr, por pê ramã kam me ampo kênti me harkwa na me cumã ihhêj catêto me awcapê ata kam. Ne hamre, quê ha caxwa me amcro cunea kam, jũ caxuw me cumã mehkàj xà atajê me cumã amji to pec nare, quê ha mehkàj xà itame cumã hà rohnýtti mã.

Quê ha Pahpãm mempej japê mehkôpĩ Jowãw 5.25-29

¹¹Ne wa ite Pahhi krĩ xà jakati ata pupun, ne hanea ne kam hỹr catê ata pupun, mã kam jỹ. Mã xà cuna mã pjê me cõjkwa xa, wa ite hõmpun, mãkrãa, jũ kam hũpate ajwar ipictor. Ne nee jũm te hipêr hõmpun nare. ¹²⁻¹³Ne hanea ne ite me hãmkrã me, me hãmkrãnare catêjê tyc pupun. Mã cõxwa te me ipĩr catêjê atajê jĩ cunea curia hanea ne me xa. Mã hanea ne pjê cunea kam cute ame harêr atajê jĩ, curi mexa. Mã pea me hỹrmã me carô japôj par, ne hacpỹa mã cute ame hĩ tỹj par, mã me xa. Ne Pahhi ihkrĩ xà kam jỹ ata cuna mã mehcunea me xa. Mã peacute ihkàhhôc atajê pahe, ne hipêr ihnô pahe, por kam me haprỹ hikwa atajê tohacpỹa mã ihtĩr xà caxuw. Ne me cumã ampii, ne ramã ihkàhhôc atajê kam ihhôc ata kôt cute ame ampo tonxà atajêa na, ahpỹanre na cute mehcukij par.

Quê ha cuhy catia mã mehkên rê

¹⁴⁻¹⁵Ne por hacpỹa mã mehtĩr xà jô kàhhôc kam me haprỹ nare atajê to ri, cute cuhy te amji to kwa kam, cute me to caxàr xà ata kam, mehĩ me, me carô meamã, cute me to hũcapêr. Ne mehtyc catêjê jô pahhi me, mehkĩrĩ xà mea mã cuhy te amji to kwa kam, cute me to hũcapêr. Ne pom

cuhy te amji to kwaata pê ri mehtyc jirô pê hipêr mehcuran xà. Ne ikam mare mã cute me to hajÿr, wa ite me ahna hõmpun.

Quê ha cõjkwa tuw me pjê tuw kam ampo pej pit

2 Petrô 3.8-13

21 ¹Ne pea ite cõjkwa tuw me, pjê tuw te amji to ipipê na hõmpun. Ne mamcõjkwa ata me, pjê ata me, cõxwa mea mã hamre ne hamre tu. ²Wa pea ite Krîpinkrên pejti tuwti ata pupun, mã Pahpãm pîn ahpar mãmõ, ata pê ihhêj rûm jûm cuprÿ te impjên me hikwa xàcaxuw, me ajpên cajpar to me mör. ³Wa pea ite ihkrî xà ata pîn jûm jökre tÿjti jûjarên xà te hajÿrata na impar, mã cute hûjarên to:

— Ita caxuw me hûmre cahi na Pahpãm krî xà. Ne Pahpãm ita quê ha me cahi na ihkrî, ne taaamji to me Hûm Cati. Quê ha hanea ne amji to mehkwy neamji cahi na amehkrî, quê ha Pahpãm ata amji to me hõ Pahpãm. ⁴Ne taa mehcunea mã mehkuc na mento cacô incrà. Quê ha pea hipêr jû caxuw mehtyc xà nare, ne nee me cumã amji kîn nare nare, ne nee hipêramencwÿr xà hamreare, ne nee hipêr amehkàj xànõ me cumã hamreare. Ampo na? Maramã mam ampo wej itajê cunea ma tẽ, ne ramã ampo tuw cator xàa kam — hajÿr.

⁵Ne por hÿr xà kam jÿ ata te ri me cumã harkwa to:

— Wa ha ita caxuw ampo tuw ton partu — hajÿr. Ne cute imã harkwa to:

— Atÿj amji mã ijarkwa itajê to hane, nãmri wa ha itÿj ihcunea ton pa, na ca ha ahna ihhõc partu.

⁶— Ne ramã ampo atajê cunea te amji jipêj partu. Ne ipê pjê kat me hihõt jõ Pahhiti, ne ipê cumã kat kam ampo cunea jõ Pahhiti, ne ipê hicu xàakam ampo itajê cunea jõ Pahhiti. Ne por jûm mã kôr ata, wa ha cama cumã mehtîr rohnÿtti mã xà jõ cõ ata kwÿ, quê ha to ikõ, ne nee hipêrcumã kôr nare, ne nee hipêr ihtyc xà nare, ne nee quê ha hahpan xà na imã hàmjör nare. ⁷Ne por quê ha me ampo kên cunea tohjê atajê, to wa ha amji kra, ne pa amji to me Hûm Cati. ⁸Ne por amji mã ame ampo cupa to me ipa atajê me, mehkwy ihkên mã meirên to me ipa atajê me, ampeaj kam amji mã me ito Pahpãm nare atajê me, mehkwy curan to me ipa atajê me, ahti na me pyjê caxun atajê me, me hûxy xi catêjê atajê me, cute amji mã ame hûm cahàc carõ kên kîn to ipacatêjê me, mehhêj xi catêjê cunea, krî xà ri cuhy te amji to kwa, ne kam kên te me to caxàr xà cacrohti ata, quê ha hipêr amehcura — hajÿr.

Pahpãm na mehkwy impej pê Krîpinkrên tuw pejti pyrãc

Carati 4.26

⁹Mã pea Pahpãm mã memprar catêjê te xet atajê nõ te hapua na cratti pê Pahpãm cryc jaxwÿr ata ajpên iwÿr mõ, ne cute imã hûjarên to:

— Ajpên ikôt mō, wa amã Caràcahàcre Kra me hīxi jikwa tuw xà jahkre, ca hōmpu — hajÿr.

¹⁰Mã Pahpãm Carō Pejti ata te imã amji jōr, mã macumã imprar catê te ijaarōr ne ito mō, ne pea cutehahkà jakōtti nō kàa to ihkà ata naixãm. Ne cute imã Krīpinkrên pejti tuwta ata jahkre, wa ite hōmpun, mã Pahpãm pīn cōjkwapīn ajpên iwryc to mō. ¹¹Ne ampeaj kam Pahpãm pejti jàhcujrohti ata te to ihpràa to, to ihprà. Pê krī ita prà pê ihhêj rûm kên prà tetetti ata. ¹²Ne ampeaj kam intête kwÿc ata ihkà, ne harkwa jàhtô na cute tôxi, nehamãr xà na Pahpãm mã memprar catêjê te tôxi ne ahna amehcuhhê. Ne harkwa atajê kam Ixaher kra te tôxi japry na ihhōc. ¹³Ne pê harkwa itajê amji jīkjê na ahpÿanre na incrê pa, ne pyt japōjxà rûm incrê, ne hanea ne pyt cjêj xà rûm incrê, ne hanea ne ita rûmitajê incrê, ne hanea ne hīkjê rûm itajê incrê. ¹⁴Ne krī têtê kwÿc ata pê kēnte tôxi atajê jipy me to kwÿc, ne kamCaràcahàcre Kra jarkwa na memprar catêjê japry te tôxi ne hikwa.

Krīpinkrên tuw ata kam ihtÿj me hàhtôa ne mehkrī xà

¹⁵Ne pom pê Pahpãm mã imprar catê imã ihcakôc ata jühkra kam pê cumã wakÿre pràti pê ôr te pīhhêre ata. Pê cupy ne to xa, cute to krī me, intête kwÿc me, harkwa to ipipên xà caxuw. ¹⁶Pê krī ata hakep pejti itajêa apu ihkrã, ne ajpên pit. Ihcahpa na ihpo me, ihcajpuw ihpo me, hīpê na ihpo me, kàj mã ihpo me, ihcunea ajpên pit, nenee ihnō te ajpên jīkjê nare. Mã pea cute hō pī cajrer ata to to ipipên, mã ihpo te quirom te mir pijakrut ne ihkôt xêj pijakrut. ¹⁷Ne hanea ne cute ipu na kwÿc ata tic to ipipên. Mã ihtic na pajara capô te xīncwēnta.

Krīpinkrên tuw ata peaj to impej

¹⁸Ne krī pu na kwÿcata, pê kên pràti japôc mã apê tetetti ata pitintête kwÿc. Ne krī ata, pê ôr te wakÿre prà tepti ata to pit mã me krīata xãm, ne pê ihprà pê ihhêj rûm irīt xà prà. ¹⁹Ne krī mã cuhhê xàkat ata pê ahpÿanre na ajpên jipy, kên prà pihhopejti itajê to pit mã me to he. Ne mam ita pê ihprà jakati, ne incwÿrpê ita pê ihprà ihkukūmti, ne ihnō ita pê ihprà irārã ahhoti, ne ihnō ita pê ihprà ihkukūm tycti. ²⁰Ne ihnō ita pê ihprà ihtatapti, ne ihnō ita pê ihprà intep rārãti, ne ihnō ita pê ihprà ihkukūm tatapti, ne ihnō ita pê ihprãihkukūm jiprone, ne ihnō ita pê ihprã ihkukūm tatapre, ne ihnō ita pê ihprã ihkukūm jakati, ne ihnō ita pê ihprã ihkukūm jiwryincoti, ne ihnō ita pê ihprã ihkukūm jiwry jiproti. ²¹Ne pê kên prà jaka jajoti te tôxi atajê kam, ahpÿanre na harkwa partu. Ne krī jō krī cape ata, pêwakÿre pràti pê ôr japôc mã apēhti pê wit pyrãc ata to pit mã mehkrī cape ata to.

²²Ne pê wa tee krī ata kam Pahpãm to me amji kam me hapac xà jürkwa japê, ne nee ihnō pupun nare. Ampo na? Me pajō Pahhiti pê

Pahpām mehirôa pê carôt tỳj ata me, ikra pê Caràcahàcre Kra ata pê ri krĩata cunea kam me Pahpām to amji kam hapac xà.

Pahpām jàhcujrohti te Krĩpinkrĕn tuw kujro

²³Mã nee krĩ ata amji kujro xà caxuw pyt me putwrỳ na prām nare. Ampo na? Nee mã ampo na nare, Pahpām pejti jàhcujro xà ata ri ihcujro, neCaràcahàcre Kra ata pê ri hanea ne hàhcujro xà. ²⁴Quê ha pjê kam mehcunea hàhcujrohti ata kam ame ipa. Quê ha pea pjê kam me cupê pahhi catêjê cunea hỹrmã me pra, me hakràj me, me hàmkrà catêjê me. ²⁵Ne krĩ jŏ harkwa ata, quê ha hihê mĕnata na ihcuhhê. Ampo na? He curi caxwa xà nare na, na quê ha nee jũ caxuw me to hihê nare. ²⁶Quê ha krĩxàre jàmkrã cati catêjê me, me hakràj cati catêjê me, ihtỳj krĩ ata wỳr me hakràj itajê cunea to me ipa.

Nee curi mehkĕn ton catêjê cjêj xà hamreare

²⁷Ne nee krĩ ata mã mehcunea incjêj xà nare. Ampo na? Por krĩ ata mã nee cute me amji kam hapac xà tũmti atajê incjêj xà nare. Ne hanea ne, por cute ame ampo ton xà kam me pahpahàmti atajê incjêj xà nare. Ne hanea ne, nee mehhêj xi catêjê incjêj xà nare. Ne por Caràcahàcre Kra jŏ kàhhôc kam hacpỹa mã mehtĩr xà kam me haprỳ hikwa atajê ri ihtỳj mencjêj xà.

22 ¹Ne hanea ne cute imã mehtĩr rohnỳtti mã xà jŏ cŏ to ihkŏm xà ata jahkre, wa ite hŏmpun. Mã Pahpām me, ihkra pê Caràcahàcre Kra ihkrĩxàa pĩn ajpjê, ne ampeaj kam ihprà jiwrỳ, pê ihhêj rŭm kĕn prà jiwrỳhti ata, ne krĩ jŏ krĩ cape cajpuw ajpjê. ²Ne pĩxŏ pàr te cŏ jũjĕata, quê ha jũm hŏ nŏ krĕ, ne jũ caxuw ihtyc nare, na pê haprỳ pê Mehtĩr Rohnỳtti Mã Xà Jŏ Pĩxŏ Pàr. Ne ahpỹanre na putwrỳpyxit kam ajco hŏ xen xà to hŏ. Ne caku pyxit kam hŏ xen xà to hŏ to tŏxi. Ne ihhŏ atajê pê hanea ne ihtỳj curi krĩxàre cahhĕxà na impej, ne ihtỳj me cumã ampej.

Cu ha pahtỳj Pahpām kuc ri me hŏmpu

³Ne krĩ ata kam, por Pahpām mã ampo kĕn kĩn nare atajê jamreare. Ne Pahpām krĩ xà ata ri, krĩ ata kam ihcuhhê. Mã mehkwy cunea pê cumã me hàpĕn catêjê atajê ihtỳj Pahpāmmã cute mehkĩnti na me amji jarĕ.

⁴Ne ihtỳj me Pahpām kuc pupu, ne cute me hŏmpun catêjê atajê cunea kuctỳj kam haprỳ pit. ⁵Ne hipĕr curi caxwa xà nare, ne nee cute me amji kujro xà na ame ampojàhcujro xà na me prām nare, ne nee ame pyt jàhcujro na me prām nare. Ampo na? Me pajŏ Pahhiti pê Pahpām pê ri mehcujro xà, ne quê ha me tame to ihhimpej to mehkĩr rohnỳtti mã.

Pom Jowāw te me cumã ihcakŏc itajê ampeaj kam ri

⁶Ne por Pahpām mã imprar catĕ apu imã ampo to ipipĕ to harĕn to mŏ ata te ri imã hũjarĕn to:

— Pom ite amã ampo cunea jarĕn itajĕ, atỳj kampa, nãmri ampeaj kam ri. Ampo na? Pahpãm pĕ me pajō Pahhiti, pĕ ajco harkwa to mehcahôc catĕjĕ mã Carō Pejti kujate, ata te ri awỳr ikujahĕc. Itē amã ampo te hajỳr xàitajĕ jarĕn, ne amã to ipipĕ, ca ate hõmpun prãmte ri, cute awỳr ikujahĕc — hajỳr. Mã pea Jeju te amji jarĕn to:

⁷— Pom ca Inxũ Cati jarkwa na ihkàhhôc kam me gapac pejti to me apa atajĕ, me gakrya ne. Ampo na? Wa ha amji jaxàr pyrentu — hajỳr.

⁸Ipĕ Jowãw, ne wa ite ampo itajĕ cunea impar, ne ihcunea pupun. Ne ite hõmpun ita jirô pĕ, wa apu Pahpãm mã imprar catĕ ata to catia ne imã ihkĩnprãmte hỳrmã tĕ, ne pea cuna mã ikõn krã na ijỳr, mã cute imã harkwa to:

⁹— Apu ito hajỳr nare. He wa nee girôa pĕ icati nare, nãmri ipĕ anõa wa, ne hanea ne ipĕ me akjĕjĕkwỳa nō wa, ne ipĕ, por wa me ihkàhhôc ita jarkwa kampa atajĕ nōa wa. Ne quĕt Pahpãm to ca me catia ne me amã ihkĩn.

Cu ha pahte amji kam me pajapac xà pejti to me papa

¹⁰— Nee ca apu ihkàhhôc ita te ampo jarĕn xà itajĕ to apimxur nare, ne atỳj mehcunea kam mare mã harĕn to apa. Nãmri, pom ampo te hajỳr xà ita, quĕ ha nee ahna ahtũm ry nare, quĕ ha ihcunea cato. ¹¹Por mehkĕanre atajĕ, quĕ ha ihtỳj mehkĕn itajĕ kam me to incrã tu, ne por mehtũmti atajĕ, quĕ ha ihtỳj mehtũmti ita kam me toincrã tu. Ne mempejti atajĕ, quĕ ha ihtỳj mempej ita kam me to incrã. Ne por me Pahpãm cuna mã mempejti na me ipa atajĕ, quĕ ha ihtỳj Pahpãm cuna mã impejti ita kam me to incrã tu ne — hajỳr.

¹²Ne ite hipĕr Jeju kam ijapac, mã cute imã hũjarĕn to:

— Wa ha amji jaxàr pyrentu! Ne ajpĕn me hàmcwỳr xà atajĕ to tĕ, ahpỳanre na cute me imã hàpĕn xà ton atajĕ jahpan xà na. ¹³Ipĕ pjĕ kat jō Pahhiti, ne ipĕ hihôt jō Pahhiti. Ne ipĕ harĕ me, ihhō me, hō jō Pahhiti. Ne ipĕ ampo cunea kam to iprar catĕ, ne ampo cunea to hamrecatĕ.

¹⁴— Ne por cute ame Caràcahàcre Kra caprô pĕ icaprô ata kam, cuteamji mã mehkã cahhõn catĕjĕ, me hakrya to me hakry. Ampo na wa ha me cumã ijũjarĕn to hane he: “Gapacta ne atỳj Mehtĩr Rohnỳtti Mã Xà Jō Pĩxô ita ku, neatỳj hanea ne krĩ jō harkwa itajĕ na me acjĕj xà” hane.

¹⁵Ne por cute ame ampo kĕn kĩnti atajĕ ri, pō pĕ krĩ pu na ame ipa xà, quĕ nee jũm hàr nare, krĩ kam ame ipa atajĕ kĩnte. Ne me hũxy xicatĕjĕ te hajỳr, ne cute me ampo kam me pahpahãmti ton catĕjĕ me, cute mehcuran catĕjĕ me, cute ame pahpãm cahàc krekã kĩn catĕjĕ me, cute ameharkwa me, me hàpĕn xà to mehhĕj to me ipa catĕjĕ atajĕ cunea, quĕ hane krĩ ata mã jũm hàr nare, ne pō pĕ ame ipa.

¹⁶— Ipĕ Jeju, wa ite imã imprar catĕ kujahĕc me amã, cute me apĕ me ikwỳ mã ijarkwa na me amã ampo itajĕ cunea jarĕn xà na. Ne ipĕ

pahhiTawi xwỳ tàmwxỳ nŏa wa. Ne pom mehcunea awcahti xà wỳr me caxêti prà tetetti pejti pupu ata jĭkjê na mǎ, mehcunea me ipupu ne ipej na meijahkre pej — hajỳr.

¹⁷Pahpām Carō Pejti me Jeju me hĭxi pê krĭ impejti ata te hàkjêr to:

— Ajpên me acjêj — hajỳr. Ne por cute me ita par catêjê, quê ha mehkwy mǎ harkwa to:

— Hacme, ne me acjêj! — hane. Ne me anŏ mǎ kŏr ata, ajpên mŏ ne cama cŏ ita kwỳ to ikŏ. Ne pom cŏ ita, quê ha jŭm te to ihkŏm ataihtĭr rohnỳtti mǎ, ne nee jŭ caxuw ihtyc nare.

Ihkàhhôc ita nee kam me to incri xà nare, ne nee kam me to cati xà nare

¹⁸Ipê Jowāw, pa wa ha caxwām catia mǎ ate Pahpām jŏ kàhhôc ita kam me gapac catêjê mǎ ihcawpa. Nāmri quê ha ihkàhhôc ita kam harkwa itakaj na, hirŏa pê jŭm te ampoto ipicamēn na, quê ha Pahpām hanea ne ihtỳj cumāihkàhhôc ita kam, cute ihkên na ihhŏc atajê to cumā ajcamē.

¹⁹Nāmri quê ha hanea ne jŭm te Pahpām jarkwa ita têtê, pŏ mǎ harkwa nŏ to hŭcapêr na, quê ha hanea ne Pahpām ma apu cupê hŏ pixŏ te me to ihtĭr rohnỳtti mǎ xà ata intê, ne nee cumā ihnŏ nare, ne hanea ne ma hŏ krĭ impejti ata têtê apu curê. Hŏ, por ramā ite ijŏ kàhhôc kam ahna ihhŏc atajê mǎ he.

²⁰Ne por catyt kam Jeju te ampo itajê cunea jarēn ata te ri amji jarēn to:

— Ampeaj kam wa ha hacpỹ ne amji jaxàr ne itēm pyrentu, he wa ha nee amji to ijàhtŭm rynare, ne ajpên tē — hajỳr.

²¹Ne imā me Pajŏ Pahhiti pê Jeju te me acunea to impej na me ato prām. Hamre. Appendix

Ampo Kôt Harẽn Xà

Pom me ahna Pahpãm jarkwa jô kàhhôc itajê pê rỳ pëa mã, pjê nõa kam mehkrĩ. Cwỳrjapê ri nee ihcunea na me amã hahkre pej nare. Cwỳrjapê wa ite me amã mehkhôt harẽn, ne ate me hahkre pej xà caxuw ahna mehhôc. Ne ihkàhhôc ita kwỳ kam wa ite ahna mehkwỳ na me amã ihhôc, ne cute me to amji pyrác xà me, me hõ amji kìn na me amã mehhôc.

Ne ahpÿanre na ampo kôt harẽn xà jô kàhhôc ita jicu xà kam, haprỳ jatujre me, ihkrã cahyt xà hikwa. Mår ca me cahyt prãm ne amjia kôt me hapê ne ahna me gapôj ne me cahyt.

Mehkwỳ atajê kôt harẽn xà

Jeju kôt me ipa catêjê

Pê Jeju pjê ita kam apu ipa reria mã, pê ampeaj kam ihkôt me hàhtô. Pê cute me to ihkwya xà caxuw, amji mã me hũmre to tôxi ne me capi, mår quê me hapac jĩa to me kampa, ne mento jĩa to me hàpên xà cunea na mehõmpu, ne Jejua kôt ri cute me Pahpãm jahkre pej.

Ruc 6.13-16; Jowãw 2.1-2, 11; Me Hàpên Xà 1.2

Jeju jarkwa na memprar catêjê

Jeju tyc ne hacpỹ mã ihtĩr jirô pê, cute ihkôt me ipa catêjê mã amji to ipipê. Ne hacpỹa mã cõjkwa wỳr hàpir xà wỳr, cute harkwa na memprar catêjê na, ihkôt me ipa catêjê pyxwỳr. Ne hanea ne cute Pawrô xwỳme, mehkwỳ kwỳ to harkwa na memprar catêjê. Mã pjê cunea kôt me cumã Jeju pê me pahkritxwỳ ne cupê me pahkên catia ata pê me pahpytår catê na harẽn to ipa.

Me Hàpên Xà 1.2; 1 Corinti 12.28; Carati 1.1-2; Epet 2.20-21; 1 Timot 1.11

Jeju na mehkwy

Ne cute me Jeju jarkwa na memprar catêjê jûjarên kam me hapac atajê jàhtôa te mehkên mã hikran, ne Pahpâm wÿr me ipipkjêr, ne ahna mehkwy mã mehâr. Ne por Jeju pê mehkritxwỳ ata kôt ri Pahpâm wÿr me hâr. Cwÿrjapê ri Jeju te amji mã ihkwỳ na me capi atajê japyrÿ te Jeju Na Mehkwỳ.

Mã cupê me hõ Pahhiti, necupê mehkên pê me hûtâr catê. Na ri krî cunea kôt Jeju na mehkwy jakrã amehcuhhê. Ne Jeju kam cute ajpên to mehkjêjê atajê, nee ajpên pê mehcahkrit nare. Ne me cupê Jeju jî kam cukrã xà atajê pyrâac. Ne ahpÿanre na mehprãm pit. Mã Jeju pê mehkã, ne taa me to ihhimpej.

Me Hâpên Xà 2.1-44; 11.26; Roman 15.26; 1 Corinti 12.12-13; Coroxo 1.18

Jeju na mehkwy jakrã to mehhimpej catêjê

Ne Jeju na mehkwy kam, cupêa ri me hõ Pahhiti, na ri nee ajpên to ame pahhinare cacrô, mã ihtÿj Jeju krac ri, me cumã me to ihhimpej catêjê. Ne ahpÿanre na Jeju na mehkwy jakrã kam, cute me to ihhimpejcatêjê kwỳ na hân ne Pahpâm jarkwa kôt me amji kwÿa capi.

Ne Jeju na mehkwy jakrã to mehhimpej catêjê kwỳ atajê pê prohti kam me hÿràac, ne me hâpên xà te hajÿr he. Ihtÿj Pahpâm jarkwa to mehkwy japackre, necute me amji kam hapac xà kên tète me cumã.

Ne Jeju na mehkwy jakrã kwỳ kam, mehkwy to mehhimpej catêjê amji pê me to ihhimpej catêjê pyxit ne capi, ne me hõmpun catê na hÿxwỳ. Mã ihtÿj mehkwy jakrã kwỳ to mehhimpej catêjê pupu, ne me to ihhimpej.

Me Hâpên Xà 14.23; Pirip 1.1; 1 Timot 3.1-7; 5.17; Tito 1.5-9

Jeju na mehkwy jakrã tehcajpar catêjê

Ne ahpÿanre na, Jeju na mehkwy jakrã kam, cute me cupê mehtehcajpar catêjê na me amji kwÿa capi.

Mã me hâpên xà te hajÿr he. Quê ihhêajto Jeju na mehkwy kam jÿm pê ampo hamreare, nare, cupê ihkà nare, nare cupê ihpore hamreare, nare, hà, nare, cupê hõ nare, quê ha tẽ ne mehkwy kam, cute mehtehcajpar catêjê atajê mã amji jarê. Quê hame hahkre pej, ne taa mehkwy cunea kôt me caxuw ampo to cuprô, ne toihtehcajpa. Ne hanea ne Pahpâm jarkwa to mehkwy japackre.

Roman 16.1; Pirip 1.1; 1 Timot 3.8-13

Jeju na mehkwȳ jakrã jamãr catêjê

Ne ahp̄yanre na Jeju na mehkwȳ jakrã kam, me cumã me hamãr catê pyxit peaj pit. Ne me to mehhimpej catêjê kam, hãn ne me hamãr catê na me amjikwya pyxw̄y, mã cupê mehkwȳ jamãr catê. Ne hãpên xà pê mehkwȳ jamãr catê, ne ihtÿj hãn ne me hõmpun to ipa, ne ihtÿj me cumã Pahpãm jarkwa to hahkre to ipa.

Epet 4.11

Ixaher catêjê

Pê mam Pahpãm amji mã Aprãw xw̄y pê mehkwȳ xakat na capi, ne Aprãw kra pêIxac xw̄y, ne Ixac kra pê Jaco xw̄y, mã Pahpãm te Jaco mã haprÿ to ipintuw, necumã Ixaher. Mã Ixaher kra xũmre te tõi atajê pê Ixaher kra jakrã tetõi. Ne atajê pê Rupên catêjê me, Ximãw me, Rewi me, Ixaca me, Xepurõme, Joje me, Pẽnjamĩ me Tã me, Naptar me, Cate me, Axer me, Juta catêjê.

Ne me hakrã te tõi pê Ixaher catêjê itajê te amji mã me, Canãn jõ pjê pytãr, Jojuw xw̄y ata jõ amcro kam. Ne ahp̄yanre na me hakrã atajê te amji mã ame pjê ata kryj, ne kam amehcuhhê. Mã me ahnaa Xarõmãw xw̄y tyc xà jõ amcro kam hàhhuc.

Kam To Ihtẽm Xà 32.22-32; 1 Pahhi Catêjê 12.17-20; Ruc 22.30;

Ixaher 11.22

Juta catêjê me Ixaher catêjê picapõn xà

Xarõmãw tyc jirõ pê mã, pê Ixaher catêjê jakrã te tõi itajê amji tome ajcapõ. Na pê me hakrã te tej itajê amji to me kÿj catêjê, ne kÿjrũm, Krirĩtpej jõ pjê kam amehkrĩ. Ne hõtpê cute amji mã me haprÿ to Ixahercatêjê. Ne me hakrã pijakrut itajê te ri amji to me harã catêjê, neharã mã Juta jõ pjê kam amehkrĩ, ne cute amji mã me haprÿ to Juta catêjê. Ne hõtpê me hakrã te tej atajê pĩn Ixaher catêjê jãhtõa ne ma Juta jõ pjê wÿr me ipintuw, ne curi me cahê na me xa.

Ne ahtũm nare mã kÿj catêjê pê Ixaher catêjê atajê ma ame Pahpãmca, ne ihtÿj me to hapac kêt to me mõ. Cwÿrjapê pê Pahpãm me hÿrmã me curê xw̄yn catêjê kujate, pê mehkwȳ to hamre, ne ma me hõ pjê wÿr mehcahur to me mõ, pê curia me ipictor pa. Na pê Juta catêjê pit me ahtw̄y, ne me xa. Mã me ahnaa Jeducator xà kam hàhhuc.

1 Pahhi Catêjê 12.17-20

Pahpãm jarkwa to me cumã mehçakôc catêjê

Pê mam Ixaher catêjê mã nee Pahpãm jarkwa na ihkàhhôc jamreare. Pê Pahpãm me hũmre kwý te me cupê Ixaher catêjê japackre, ne me cumãcute me amji kam hapac xà kên cawpa xà na me hũxwý. Pê Pahpãm ajco me hũmre atajê mã me iriat kam, nare, me hôt kam, cute mehçên ton jahpan xà na Pahpãm te mehçên mã mên xà to ihçakôc, pê ajco harkwakôt me cumã ihcawpa. Ne pê mehçakôc catêjê ajco mehkwý mã to awjarê, ne ma hõ kàhhôc kam ahna ihhôc. Ne mehkwý to mehçôc to catia, ne mehkwý to mehçôc to kryjre. Na ri ihtýj Pahpãm jarkwa jô kàhhôc kamcormã me pamã me hàhhôc xà itajê hikwa rohnýtta mã.

Mã ita caxuw ihtýj caku ita kam Jeju na mehkwý kam harkwa to mehçakôc catêjê. Mã Pahpãm jarkwa jô kàhhôc ata kôt mehkwý mã harkwa to hahkre.

2 Me Hũjarên Xà 20.20; 1 Corinti 12.28; Epet 4.11

Juta catêjê na mehkwý pê pro kam

Ne Juta catêjê pê pro kam cute me xetênta, ne ihkôt pyxit ata pê ri me hõ pahhi. Ne me cupê mehkwý jakrã jô pahhi catêjê me, Pahpãm mã mehçajrên catêjê jô pahhi kwý. Ne pro kam me hàhtôa atajê pê ajco me ajpên pa, ne ihcunea na me Juta catêjê to ihhimpej.

Ruc 22.52; Me Hàpên Xà 4.5

Me cumã Mojxe xwý jô kàhhôc to hahkre catêjê

Pê Pahpãm Mojxe mã cute Ixaher catêjê japackre xà gô, pê Mojxe hõ kàhhôc kam ihcunea na ihhôc. Mã Mojxe jô kàhhôc to hahkre catêjê te ihkôat mehçôc, ne me cumã me to hahkre to me ipa. Ne ihtýj mehçunea mã Ixaher catêjê quêtjê te amji pyrác xà pit to hahkre to ipa. Na ri nee me cumã Jeju te ampo tuw to hahkre xà atajê impar prãm nare.

Ruc 5.17, 21; 20.46; Jowãw 8.3; Me Hàpên Xà 4.5

Parixêw catêjê kwý

Ne Juta catêjê kam mehkwý jakrã te amji kam hapac xà ajteare mã, neParixêw catêjê pê mehkwý atajê jirôa pê me cati. Ne Parixêw catêjê te amjikam hapac xà te hajýr he. Quê ha Mojxe xwý jô kàhhôc cahyt kam me hũpar xàa kôt me ipa. Na ri me cumã, menquêtjê te amji kam me hapac xà to cute me amji pyrác xà atajê napit mã me prãm, ne ma iràn xà na cute amji kam me hapac xà tuw par caca.

Ne me hàhtôa ne catyt kam menquêtjê te amji kam hapac xàa kôt me ipa cakrô, nee Pahpãm te amji kam hapac xà kôt ame ipa nare, na ri ma ame Jeju curê. Pê Jeju ihtÿj cute amji kam me hapac xà kên tète ame cumã.

Ruc 5.17; Jowãw 8.3; Me Hàpên Xà 4.5

Xato xwÿ kôt me ipa catêjê

Ne Juta catêjê jakrã kwÿ kam, me cupê Xato xwÿ kôt me ipa catêjê. Mencrêre cakrô, ampeaj kam me carôt tÿj, ne ampeaj kam me kam mehkwÿjakràj cati. Ne nee me cumã hacpÿa mã mehtyc tÿr na me harĕn kam me hapac prãm nare. Ne Mojxe te hapackre xà jô kàhhôc pit kam me hapac to me ipa. Na ri Parixêw catêjê me, Xato kôt me ipa catêjê atajê nee me ajpĕn kam hapac to impej nare. Ne ihtÿj hanea ne ma ame Jeju curê.

Ruc 20.27; Me Hàpên Xà 4.4; 5.17

Cute Pahpãm mã mehcajrĕn catêjê

Cute Pahpãm mã mehcajrĕn catêjê Pahpãm to me amji kam hapac xà jÿrkwakam, cute me hàpên xà pijakrut ton to me hane he. Cute me ampo capônÿre curan ne Pahpãm mã me to caxàr me, cute me cumã ampo jacrô cuxwati to caxàrxà ata, me ajkaam cute me Pahpãm mã mehcaçôc xà.

Ruc 1.5, 9; Me Hàpên Xà 4.4; 6.7

Cute Pahpãm mã mehcajrĕn catêjê jô pahhi

Cute mehcajrĕn catêjê jô pahhi cati, caku cunea kam, cute me Hakren xà jôamji kĭn ata jô amcro pyxit kam, hãn ne carà cahàcre hòhti kra pê mehkritxwÿ ata cura, ne caprô cwa, ne ma Pahpãm jÿrkwa caxwÿn caxwãm pê to acjêj. Ne cute cumãto ipipê xà caxuw, Pahpãm me cute me ajpĕn par xà pê pĭ po te hàmcjĕn xà ata cwÿrpê ihkwÿ cahkÿm.

Mã Juta catêjê te me ita ton to hãm ita kam, mã ahnaa Jeju cator, ne cupê me pahcunea cajrĕn catê catia ata, ne cuteamji caprô jaxwÿr ata to, Hÿm pê Pahpãm wÿr hàpir ne cumã ipĕr ata kôt, quê ha Pahpãm me pahcunea te me to kên atajê to tojnô ne hicu. Na rinee hipĕr ampo capônÿre curan xà hamreare. Mã ita caxuw nee Jeju namehkwÿ te me ita ton xà hamreare. Na ri ihtÿj ahpÿanre na Pahpãm mã mehcaçôc, ne cumã mehkwÿ cajrĕn.

Ruc 20.1; Jowãw 7.32; Me Hàpên Xà 5.17; 9.2

Rewi xwỳ catêjê

Pê Rewi xwỳ catêjê Pahpãm to me amji kam hapac xà jũrkwa jamãr to me ipa. Ne ihtỳj hanea ne cute Pahpãm mã mehcajrên catêjê te Pahpãm mã me ampocuran, ne me to caxàr xà na, mehtehcajpa.

Me Hũjarên Xà 20.19

Roman catêjê

Prytikra jô pjê jô krĩ cati ata japrỳ pê Roman jô krĩ, na pê pjê atakam mehkrĩ catêjê japrỳ pê Roman catêjê. Ne pê me hõ pahhi japrỳ pê Xexa, ne cumã hõ krãhtare jãhtôa to hàhtô, na pê pjê cunea kam ajco ipa ne me ajpu to ipa. Pê ajco krĩxàre cunea tohjê partu, ne amji mã mehõ pjê pytà, ne to hõ tekjê, na pê Xexa pê pjê cunea jô pahhi. Ne cute hõ krãhtare to Canãn jô pjê pê Juta catêjê jô pjê to hipu, ne taa to ihhimpej. NeJeju te pjê kam apu ipa reria mã pê ita hane. Mã Xexa krac ri Heroti xwỳ pê Hípôjajo jô pjê jô pahhi. Ne Ponti Pirat xwỳ pê Krĩpinkrên jô pahhi.

Ruc 3.1; Ruc 18.32-33; Me Hàpên Xà 2.23; 11.28

Xexa xwỳ jarkwa kôt me to ihhimpej catêjê

Ne pjê cunea kôt, krĩ kwỳ cunea kôt Xexa te me cumã me hõ krĩ to ihhimpej catêjê pyxwỳr, mâr quê harkwa kôt me to ihhimpej to me ipa. Ne me to ihhimpej catêjê itajê pê Xexa na mehkwỳ pê Roman catêjê. Ne mehkwỳ pê curia catêjê, Xexa mã me amji gõ, ne hacpỹa mã mehkwỳato mehhimpej to me ipa. Na ri mehkwỳa mã mehkin nare.

Me Hàpên Xà 24.1

Pahhi jarkwa kôt me hũhkra kam me hàmcwỳr catêjê

Ne pjê cunea kôt amehkrĩ atajê cunea te me Xexa mã me hàmjõr xà pit. Cwỳrjapê ri me hakràj catêjê ihtỳj me hàmjõr cati, ne me cupêhamreare catêjê me hàmjõr to kryjre. Ne ahna me cumã ihkĩn nare cakrô, mã caku cunea kam cute me hàmjõr xà pit. Cwỳrjapê ri krĩ cuneakôt cute me cumã me hũhkra kam me hàmcwỳr catêjê pyxwỳr partu.

Mã me hũhkra kam me hàmcwỳr catêjê atajê, hãn ne Xexa jarkwa jirôa pêmehkwỳ jũhkra kam me amcwa, ne taa hãn ne amji mã amgõ, na ri ihpore cahhur ahtwỳ atajê cunea to me amji mã ahtwỳ. Ne mehkwỳ krã kêanre catêjêatajê, ihtỳj pahhi jarkwa jirôa pê mehpỳp̀m, ne amji mã ne ihpore ata cahhur catia ne me huwahi. Na ri mehkwỳ mã mehkin nare.

Ne Juta catêjê kwỳ te Xexa mã me amji jôr atajê, mehkwyà pê ihpore catia ne me cucwa. Ne mehkwyà mã cute me hajÿr catêjê kêanre, ne me cumã ihkĩn nare. Mãma ame curê cacrô, pê Jeju ihkôt ipa catê na, amji mã me hũhkra kamhãmcwÿr catêjê nõ pê Matew xwỳ ata capi.

Ruc 5.27, 29; 7.29

Cama me cumã hàpên catêjê

Ne mam pê ajco amji to me hàpên to me hane he. Quê ha jũm te me hũmre nõ jakràjti nõ to new catia, ne nee cumã hàmjôr nare na, quê ha amjimã haprô, nare, quê ha amji mã cupê ihkra nõ japrô ne to hõ tekjê. Quê ha cama apu cumã hàpên to ipa, ne nee hàmcwÿr nare, ne hõ to pitmã hàpên to ipa. Nare, quê ha krĩxàre nõ me, me ajpu, ne amji mã me jũmjê pro atajê, quê ha hanea ne cama cupê me cumã me hàpên catêjê.

Ne quê ha hanea ne cama me cumã me hàpên catêjê me hikwa tuw ne amjikam mehkra, quê ha ihkra ata pê hanea ne to hõ pahhi ata tekjê. Ne me cumã me hàpên catêjê atajê, quê ha nee jũ caxuw amjia kôt ame ipanare, ne me hõ pahhi ata mã me hàpên rohnÿtti mã.

1 Corinti 12.13; Carati 3.28; Coroxo 3.11; 1 Timot 6.1

Crec catêjê

Ne Crec catêjê jô pjê cati, ne kam me hàhtô, ne me carôt tÿj cacrô, pê Roman catêjê ihtÿj me tohjê. Ne Roman catêjê Crec jô pjê to ihhimpej cacrô, mã Crec catêjê jarkwa me incaca xà itajê pjê cunea kôt apu ipicràn.

Jowãw 1.41-42; Me Hàpên Xà 6.1

Mehcahcrit pê krĩxàre pê Ixaher catêjê nare atajê

Pê mam Pahpãm cute Ixaher catêjê pê Juta catêjê to ihkwỳ xà na amji mã me capi. Na ri me iràn xà na nee jũm pê Pahpãm na mehkwyà nare. Quê ha krĩxàre nõ pê mehcahcrit nõmã amji to Pahpãm na mehkwyà to prãm na, quê ha mam cute amji kam hapacxà to cute amji pyrác xà atajê cunea jicu, ne amji to Ixaher catêjê, nemencaca xàa kôt Pahpãm to amji kam hapac to ipa. Mã ahnaa Jeju jô amcro kam hàhhuc.

Ruc 2.31-33; Me Hàpên Xà 4.27; 9.15; 1 Corinti 12.13

Côjkwa pĩn Pahpãm mã memprar catêjê

Côjkwa kam Pahpãm cahê na me hàhtôa to me hàhtô ne mehkri atajê ajteare mã me, ne mempej pit. Ne mehkwyà pê Pahpãm mã me hàpêncatêjê, ne mehkwyà pê cumã me hàprê catêjê, ne mehkwyà pê cumã

pjêita wỳr harkwa to memprar catêjê. Ne me cupê me carõa pyrác, ne ampeaj kam me hũpa. Na cu nee jũ mã me jũm ton, ne me to jũ mãn nare. NePahpãm jarkwa kôt ihtỳj pjê kam mehkwỹ amehkrĩ atajê jamãr to me ipa.

Matew 2.19; Ruc 22.43; Me Hâpên Xà 6.15; Ipipên Xà 10.1

Krĩrĩtpej jô pjê catêjê

Pê Krĩrĩtpej catêjê pê Ixaher catêjê cahhure atajê, ramã mehcahkrit me, me ipicacwỳr crire nare. Na ri cute Pahpãm to me to amji pyrác xà atajê me, cute me amji kam hapac xà itajê ajteare mã. Na ri Juta catêjê mã mehkêanre. Ne Jeju jô amcro kam, pê Krĩrĩtpej jô pjê Juta jô pjê cote na hikwa, ne nee ajco me ajpên par pej prãm nare.

Ruc 9.53; 10.33; Me Hâpên Xà 1.8

Pahpãm jũrkwa kôt harẽn xà

Ampo kà te Pahpãm jũrkwa

Pê Ixaher catêjê Ejit jô pjê pê me cator jirô pê, pōti kam me hamreare ata kam me ipijarô to caku to cwarênta. Ata jô amcro nō na, pêPahpãm te amji mã ikre xãm to prãm to Mojxe xwỳ mã to hahkre. Pê Ixaher catêjê Pahpãm te Mojxe mã ikre xãm na harkwa atajêa kôt, me cumãhũrkwa ata xãm, pê impeaj to impej.

Ne ampo kà te Pahpãm jũrkwa ata pêhane he. Quê ha mam cupêhkã jakati impejti atajê to me pjê kam ikre xãm xà ata cunea tête kwỳc, ne cumã ihcuhhê xà atajê pê ôr pit. Ne harkwa mã mencyêj xà cahê na Pahpãm mã cute me ampo jĩ to caxàr xà ata ihcuhhê.

Ne ihkre caxwỳn pijakrut. Ne mam ihkre caxwỳn ita kam ri Pahpãm mã cute me ampo kũm cuxwati to caxàr xà ata ihcuhhê. Mã ihcujro xà caxuw ihpôcxà cuhhê xà pyxit ata kam ihpôc xà te xet ne ihcuhhê, ne ahcujro. Ne hanea ne pĩ po te ampo pyxwỳr xà ihcuhhê, ne kam pãw te tōxi ne hikwa atajê pê ahpyanre na Ixaher catêjê jakrã. Ne caxwỳn nō ita pê ri Pahpãm krĩ xà, ne kam cute me ajpên par xà pê pĩ po te hãmcyjên xàata xa. Mã Pahpãm jãhcujro impejti ata te ihcujro.

1 Pahhi Catêjê 8.1-6; Me Hâpên Xà 7.45; Ipipên Xà 15.5

Pahpãm to amji kam me hapac xà jũrkwa

Pê caku jãhtôa kam ampo kà te Pahpãm jũrkwa ata ihcuhhê, mã ahnaaXarômãw xwỳ pê pahhi jô amcro kam hàhhuc. Pê Pahpãm ampo

cunea caxuw Xarômāw māihkrā kreti te amji jahkre pejti gō. Ne pê Xarômāw cumā ampo kà te ikre ata jaxàkam, cumā kēn te ikre pejti nō hūxwỳ. Ne quēt ikre ita catia to cati, ne mam ampo kà te ikre ata jirōa pê cati ne impej. Ne ikre ita Kripinkrēnkam ri pyxit peaj ne ihcuhhê.
1 Pahhi Catêjê 8.1-6; Me Hūjarēn Xà 20.1-30; Ruc 1.8; Me Hâpên Xà 2.46

Juta catêjê te cuprôn xà

Ne ahp̄yanre na krī cunea kôt Juta catêjê te cuprôn xà kryjre atajê ihcuhhê. Mā Juta catêjê te kam amji mā Pahpām te Mojxe xwỳ mā cute me hapackre xà atajê to hahkre xà caxuw ame cuprō. Ne hanea ne me Pahpām jarkwa cahyt, ne cumā mehcakôc prāmte me cuprō. Ne nee Pahpām mā cute me ampo to caxâr xà caxuw ikre ita nare.
Me Hâpên Xà 9.2; 9.20; 13.14

Jeju na mehkwy te cuprôn xà

Pê mam Jeju na mehkwy ajco me cuprôn prām, ne me hūrkwā kôt ame cuprō. Ne cute me cuprôn xà ata caxuw, nee me cumā ikre nō hamreare. Ne ihtyjme Pahpām jarkwa cahyt, ne me cumā cre, ne ajpên mā me to hahkre, ne Jeju to me amji japackre, ne cumā me ajpên cajrēn prāmte hân ne me cuprō.
Me Hâpên Xà 11.22

Pahpām me, cute me ajpên par xà jàmçjên xà

Pê Mojxe cute ampo kà te Pahpām jūrkwā ata ton xà kam, Pahpām jarkwā kôt, pī po te hàmçjên xà nō to. Ne pō rúm wakỳre pràti pê ôr toihahty, ne ihkre caxwām pê to ihcahty, mār quē impejti ne. Ne cute kēn pokam Pahpām te me cumā harkwa te tej jirēn, ne ahna ihhōc ata, cute caxwām pê hir. Ne cute Pahpām jūrkwā caxwỳn caxwām pê to hâr ne ahna hām.

Mā Pahpām me cumā amji ton to hane he: “Wa ha me ato amji kam ijapac to hane he. Ca ha caa me akwỳ me, catyt kam, ite me amā ijarkwā jirēn itajê cunea kôt me apa na, waha paa me acahê na ikrī, ne me akrā kam ijarcô mē. Quê ha icarôt jähcujrohti ita ijàmçjên xà incwỳrpê ahcujro rohnýtta mā. Nāmri ca ha nee catyt kam, ite me amā ijarkwā jirēn itajê kôt me apa nare na, wa ha itỳj me are. Ca ha me acuneame akên mā me axàrtu” hane. Pê ame kampa.

Hō, pê Ixaher catêjê me Pahpām me ajpên par to me hane. Na ri hàmçjên xà ita japyrỳ te, Pahpām me, cute me ajpên par xà jàmçjên xà.
Me Cator Xà 35.4-29; Jojuw 3.1-17; Ipipên Xà 11.19

Pahpãm mã ampo jacrô cuxwati to caxàr xà

Pê Mojxe hanea ne Pahpãm jarkwa kôt ampo jacrô cuxwati to caxàr xà to, ne Pahpãm jũrkwa caxwỳn na cupêhkà te hahêr ata cuna mã hãm. Mã amcro cunea kam, Pahpãm mã cute mehcajrên catê ata, kam me ampo jacrôcuxwati ata to capa. Mã ihkũm cuxwati hàpir to ipa ata me ajkaam mã Pahpãm mã amehcakôc. Ruc 1.9-10; Ipipên Xà 5.8

Pahpãm mã ampo to caxàr xà

Ne kwỳc caxwãm pê, Pahpãm jũrkwa jarkwa mã, Pahpãm mã ampo to caxàr xà ata ihcuhhê. Ne kaam pê cumã mehcajrên catêjê ajcoPahpãm mã me ampo capônỹre pê mehkritxwỳ to me capa. Ne Ixaher catêjê te me Pahpãm mã ampo jôr xà itajê pê, pryti me, carà cahàcre hôhti me, tutti me, mehàpràhhy me, impê xà me, ampo kwỳ itajê nō. Ne pê cute Pahpãm to kên jahpan xà na cumã ampo jôr to me ipa, mãr quê Pahpãm cute to kên ata to tojnō ne hīcu. Ne hanea ne Pahpãm pyrên me hakry na cumã ampo jôr to me ipa.

2 Xamer 6.1-19

Jeju na mehkwȳ te amji kam hapac xà kôt harên xà

Côjkwa kam ri Pahpãm krĩ xà

Pahpãm me ihkra pê Jeju côjkwa kam ihkrĩ. Mã cahê na, me hàhtôa ne mehkĩ atajê ajteare mã me, ne mempej pit. Ne cute me tocati prãmte, cumã me cre. Mã Jeju ihtỳj me papê mehkwȳ te me pahtyc jirô pê mã, kam pahte me pahkrĩ xà caxuw, to hàpên to mō. Ne nee côjkwa kam Pahpãm wỳr ampo kên me, me hà me, me kàj xà incjêj xà hamreare ita kam, curi ampo pej pit.

Ipipên Xà 7.9, 11; 13.6

Côjkwa kam hacpỹa mã mehtĩr xà jō kàhhôc

Côjkwa kam Pahpãm mã hō kàhhôc ata hikwa, mã kam ahna mehkwȳ cunea japrȳ nō. Ne pê ramã rỳ pêa mã ajpên kam me cupê hō tekjê atajê japrȳ nōr kam to tē. Ne ramã kam Ixaher catêjê me, krĩxàre me, ampo kra

jàhtôa japry hikwa. Ne por rý jũ caxuw Pahpãm wýr me ipipkjêr, ne ahna mehkwy mã hàr nare atajê ri, nee kam me hapry hikwa nare.

Ne ihkàhhôc kam me hapry hikwa atajê, quê ha amehtyc jirô pê hacpyã mã amehtír, ne Pahpãm cahê na mehkri rohnýtti mã. Ne por mehkínte, nee ihkàhhôc kam me hapry nare atajê, quê ha amehtyc jirô pê hacpyã mã amehtír, ne mehkên catia mã me axà, ne Pahpãm pê ampýa mã ame ipa rohnýtti mã.

Ruc 10.20; Ipipên Xà 3.5; 13.8; 21.27

Xatanaj pê me pahcurê xwýn

Pê mam ramã Pahpãm me paxũmre ton xwýjrea na, cõjkwa kam mehkri atajêcunea to, ne cute me hõ pahhi nõ na Xatanaj xãm. Mã amcro ata na Xatanaj atapeaj to impej. Mã ramã rý pêa mã, cakujahtôa kam Xatanaj, Pahpãm na mehkwy cõjkwa kam mehkri atajê me Pahpãm mã mencrer na mehkri.

Ne Pahpãm krac ri mehkwy jirôa pê Xatanajcatia to cati cacrô, cute Pahpãm jirôa pê amji to cati prãmte, Pahpãmjúhhyr to amji kam hapac. Ne cute cõjkwa kam mehkri atajê kwý jáhtôa ne amji kôt me to cuprõn, ne me Pahpãm kam ihtêm. Mã Pahpãm apu cumêajpu, ne cute tohjê, ne ma cõjkwa pê mehkwy atajê mea mã me cator, ne pjê ita wýr ajpên mehkujahêc.

Ne Xatanaj tehcajpar catêjê atajê pêampo carô kên me, cupê jarôti. Atajê ihtýj pjê kam mehcunea mehkri atajê mã, cute amji kam hapac xà kên to pit mã hahkre to ipa.

Ruc 4.1; Roman 6.2; Epet 2.2; Ipipên Xà 20.2

Cuhy kam Xatanaj kri xà

Xatanaj pê Pahpãm curê xwýn xakat, na pê Pahpãm amji pê ampýa mã, pjê ita wýr kujate, mãr quê kam ihkri. Ne pê Pahpãm ramã Xatanaj mã ihkri xà kêanre to, ne quê ha ihtýj jũ caxuw hýrmã ihkujate. Ne ihkri xà ata kam nee ampo pej hamreare, ne ampo kên pit, mehkàj xà me, cuhy me, cute me amji pupun xà kêanre kri xà, na ri cute me amji pupun xà kêanre curi. Ne Xatanaj me, mehkwy pê cõjkwa pín amjikôt cute me Pahpãm júhhyr prãm atajê mea mã ri, quê ha curi mehkri xà.

He nee pê me paxũmre tyc jirô pê curi me pajapôj xà nare cacrô, pê mepanquêtti pê Atãw xwý ata Xatanaj jarkwa kôt me Pahpãm jarkwa jirô pê ihpým. Ne ihkôat ri, me papê mehtãm xwý cunea pê cuxà Xatanaj jarkwa kôt me papacatêjê. Na cu me pahpýpým pêa mã, ma ramã Xatanaj jô cuhy wýr me pra. Cwýrjapê cu pahtýj me Jeju na prãm, mãr quê me

pahkên kêanre catia ita pê me pahto pôj.

Matew 5.22; 30; 13.42; Carati 1.8; Ipipên Xà 20.10

Crixtô

Pê Pahpâm ihkra pyxit peaj pê Jeju capi, ne cute me pahkên kêanre catia ata pê me pahto hapôj xà caxuw me pajô Pahhiti na hãm. Ne pê ramã rỳ pêa mǎlxaher catêjê mǎ, cute hũmre capi ne ahna hãm ata to hũjahkre. Na ri Jejujaprȳ kwỳ ata te Ixaher catêjê me Juta catêjê jarkwa na, Mexij, ne Crec jarkwa na haprȳ te Crixtô, atajê kôt harên xà pê “Cute capi ne ahna hãm”.

Matew 1.18; 2.4; Ruc 4.41; 1 Corinti 1.1-2

Ipê me Ahàkà cati

Pê cormã Jeju pjê kam apu ipa reia mǎ, mehcunea mǎ ajco Pahpâm te amji kam hapac xà to hahkre to ipa to caku to incrê. NeHũm carôat kôt, me kam mare mǎ ampo catia pihhoti ton to ipa, mǎr quê cupê Pahpâm kra na me hahkre pej.

Ne nee pê hũjarên kam to ihtêm pêêmã, hirãa pê me cumã cupê Pahpâm kra na amji jarên nare. Ampo na? Quêhirãa pê cupê Pahpâm kra na me cumã amji jarê na mǎ, quê ha amji mǎ me to hajyr nare catêjê atajê, mencaca xàa kôt, mehcuran pyrentu. Na ri cupê Pahpâm kra na me cupê amji to ipimxur to ipa, ne amjicwyrpê me cumã amji jarên to: “Ipê me Ahàkà catia te hũmre na amji ton” hane. Ne hicu xàa kam, ramã cute mehcuran xàa jô amcro kam hàhhuc ata kam, pê hirãa pê cupê Pahpâm kra na me cumã amji jarê.

Ruc 5.23-24; 6.5; Jowãw 1.51; 3.13

Pahpâm wỳr me papipkjêr xà

Pê Atãw xwỳ pê me panquêtti ramã Xatanaj wỳr hõ pry kam me pahcunea mē ita kam, cu me pahpypym pêa mǎ, ma ramã me pahkên kêanre ata wỳr mepra. Ne jũ wỳr quê Pahpâm te amji wỳr me pamã hàkjêr nare kam, cu amjia kôt hỹrmã me apkjê. Nãmri quê ha Pahpâm ahna mehkwȳ mǎ jũm ata xàr xà caxuw amji wỳrcumã akij, quê ha ihtỳj Jeju pê ihkritxwỳ ata cukwa kam, hỹrmã jũm ata te amji jaxàr xà. Na quê ha cumã ahna mehkwȳ mǎ hàr prãm nare na, quê haihtỳj cormã ihkên kêanre ata mǎ incjêj to ipa ita na.

Quê ha me pahnõ mǎ Pahpâm na mehkwȳ mǎ hàr prãm na, quê ha ihtỳjPahpâm mǎ amji jarên to hane he: “Ite ato kên itajê jũ na ipahàm crire nare, na wa hacpỹa mǎ amji mǎ icryc, ne ahna amji jũ na ipeacre.

Na wa ma apu ite mam amji kam ijapac xàkên kôt ipa atajê cunea caca, na wa nee hipêr ihkôt ipa na amji ton prãm nare. Ne quêt apeaj to apej, ne akĩnte ikêanre ita kam ri, atỳj ate ikênkêanre mã imên xà. Ne pê akra pê Jeju ata ramã ijaxà kam ihkên mã axà. Na wa awỳ, ca ha cukwa kam, ite ato kên ita to tojnõ ne hicu, ne ite meakwỳ mã ixar na ijamã, wa me cumã axà” hane.

Ruc 10.2; Roman 3.21-24

Pahpãm pê Pahhiti himpej xà

Pahpãm pê pjê me cõjkwa kam ampo cunea jõ Pahhiti Cati. Na ri ihtỳj pytme, putwrỳ me, caxêre me, ahcacrã me, pjê me, cõxwa cunea to ihhimpej. Ne nee pahte me Pahpãm himpej xà pupun nare cacrõ, ihtỳj hanea ne pjê cunea kam ampo kra cunea me, krĩxàre cunea to ihhimpej, ne cupê me hõ pahhicatêjê cunea jõ Pahhiti.

Ne cumã amjia kôt ihhimpej xà mã mencjêj na me to prãm, ne nee quê jũm to ihhimpej xà ata mã hàr xà caxuw jũm atamã quêt nare. Ne ampo cunea jicu xà kam, quê ha Pahpãm hirã pê, mehcunea kam mare mã, pjê cunea to ihhimpej.

Ne por ihkra pê Jeju to jũmjê amji mã mehhimpej atajê, quê ha ihtỳjahna mehkwy mã axà, ne ma mehkôt ihhimpej xà ata mã axà, atajê pê ri Pahpãm kra impeaj, ne me cupê hõ tekjêa to hõ tekjê. Na quê ha ihtỳjme hamãr pejti ne.

Ne pê Pahpãm me ton cacrõ, mã nee cumã Jeju to amji mã mehhimpej nare atajê pê nee mehkra impej nare, ne nee cupê mehkwy nare, na ri nee me toihhimpej, ne nee me hamãr nare. Ampo na? He cormã me cupê Xatanaj tekjê, na ri nee cupê Pahpãm tekjê nare.

Ruc 6.20; 13.18; Jowãw 3.3-5; Roman 14.17

Pahpãm te me pahcunea cukij xà

Quê ha jũ caxuw ampo cunea jamre xà jõ amcro kam ahtwỳ, quê ha Pahpãmpjê kam mehcunea tyc atajê me, mehtĩr atajê me, mehcunea cukij, ne mempej me, mehkên to ajpên pê haprã. Ne quê ha mempejti pê, por Jeju pê mehkritxwỳto amji mã mehhimpej atajê to mentête ihpõj pa, mãr quê cahê na mehkri rohnỳtti mã.

Ne mehcahhur te nee Jeju to amji mã mehkritxwỳ nare, ne nee amji mã me to ihhimpej nare atajê, quê ha ma Xatanaj caxuw ihkri xà pê mehkên kêanre catia ata wỳr mehkujate. Quê ha curi me cato, ne curia ampỳa mã Pahpãm pê, quê ha me amji pupun xà kêanre to me amji pupun to mehcuhê rohnỳtti mã.

Roman 2.5-6; 5.9; 2 Corinti 5.10; 1 Timot 4.1; Ixaher 12.23

Jeju pê me pahkritxw̃ỹ

Me panquêtti pê Atâw ata kôt ri me pahpÿpÿm pêa mã, pahte amji kam mepajapac xà kêanre. Na cu pahtÿj me ampo kêan ton to me papa to prãm, ne pahte intête me amji jiprôn xà caxuw, me papê me pahcarôt hamreare. Ne quêtPahpãm peaj to impej, na ri ihtÿj ita na me pahkam incryc. Na ri ihtÿj cuteme pahtyc jirô pê me pahto kên xà cacrô, mã Pahpãm mã me pahcunea kîn.

Cwÿrjapê ri cute me pahkritxw̃ỹ na ihkra pê Jeju xãm. Mã Jeju te amji kam hapac xà impejti cacrô, ihtÿj me pahkrã kên kôt ihtyc, neihkên catia mã hâr, ne hacpÿa mã ihtÿr. Cwÿrjapê quê ha jÿm Jeju pê ihkritxw̃ỹ na, amjimã to ihhimpej ata, quê ha nee hipêr ihkên mã hâr nare. Ampo na? Heramã Jeju pê ihkritxw̃ỹ ata haxà kam ihkên kêanre catia mã hâr, na quê ha ihtÿj Pahpãm cahê na apu ipa rohnÿtti mã.

Epet 1.7-8; Coroxo 2.13-14; 1 Timot 1.9

Jeju pê me pajô Pahhiti pê me pahpytâr catê carôt tÿj

Pê Jeju ty ne hacpÿa mã ihtÿr xà ata kôt ri cupê me pajô Pahhiti, ne ampeaj kam carôt tÿj. Ne mehcunea jirô pê carôt ita tÿaj to ihtÿj. Cwÿrjapê ri cute Xatanaj pê me pahcurê xwÿn pê me pahpytâr xà caxuw ampeaj kam cumã carôt tÿj. Ne hanea ne cute cupê jarôti me, ampo carô kên me, me carô pê me pahpytâr xà caxuw ampeaj kam cumã carôt tÿj. Ne hanea ne ihtÿj cumã mehÿxy xi cunea pê me pahpytâr jahkre pej.

Ne cu ha Jeju to amji mã me pahhimpej, ne amji mã me to me pajô Pahhiti, quê ha ihtÿj ampo kên itajê cunea pê me pahpytâ. Ampo na? He me papê mehkwỹ pê hõ tekjêa. Ne hanea ne me pahtyc jirô pê quê ha ma cõjkwa wÿr me pahto api, cu ha cahê na amji to me papijapar rohnÿtti mã.

Cwÿrjapê cu ha me papê Jeju na mehkwỹ atajê nee jÿ caxuw amji mã Xatanaj me, hõ cupê jarôti me, ampo carô kên me, me carô me, me hÿxy xi atajê nõ cupa nare. Ne hanea ne nee ame pahtyc cupa nare.

Ruc 2.29-33; Jowãw 1.14; 1 Corinti 15.1-4; Epet 1.13; 2.8-9

Me pajï me, me pahcarô me, me pahcaxwÿn

Me pajï pê me pahcarô me, me pahcaxwÿn krekà pit, na quê ha ihtÿj jÿ caxuw ty, ne hamre ne acto.

Ne cu ha me pahnô pahpÿm xà ata caxuw, quê ha ramã me pahcarô me pajï to ihtÿr. Ne me pahtyc xà kam, quê ha ma me pahcarô ita me pajï

pê cato. Hamre quê ha me pajĩ ty, cu nee hipêr me pamã me pahcarõ na prãm nare.

Ne ajteare mã me pahcaxwÿn, na ri nee jũ caxuw ihtyc ne hamre nare, ne quêt ihtÿj apu ipa rohnÿtti ma.

Ne cu ha me pahnõ Pahpãm wÿr apkjê, quê ha me pamã Carõ Pejti gõ, quê ha me pajĩ mã axà, ne me pahcaxwãm pê me pamã me pahcaxwÿn to ihtÿr, na quê ha me pahte amji kam me pajapac xà cunea antuw.

Ne me pahtyc xà pê ri me pahto ipicokjêr xà. Ampo na? Quê ha jũm ty, ne hĩ ihcacu ne hamre, ne hacpÿa mã pjê na amji to. Ne carõ quê ha ma hĩ pê cato. Ne caxwÿn quê ha quêt ipa rohnÿtti mã.

Ne me cupê Pahpãm tekjê atajê caxwÿn, quê ha Pahpãm hipêr cumã hĩ tuw pejti gõ, quê ha hĩ ata to cõjkwa kam Pahpãm cahê na impej pêa mã ipa rohnÿtti mã. Ne me cupê Pahpãm tekjê nare atajê caxwÿn ri mehkĩnte, Pahpãm pê ampÿa mã mehkên kêanre kam ame ipa rohnÿtti mã.

2 Corinti 5.1; Coroxo 2.13; 5.23

Cô kam me pahcumrãr xà

Quê ha jũm te ihkritxwÿ na Jeju to amji mã ihhimpej na, quê ha Pahpãm ahnaamji capa, quê ha cupê Pahpãm kra impeaj, ne ahna mehkwy mã axà. Ne quêha ampeaj kam cupê Jeju na mehkwy na cute amji to ipipê xà caxuw, quê ha mehkwy jamãr catê me, mehkwy to mehhimpej catêjê, mehkwy kam mare mã, cô kam mehcumrã.

Ne mehcumrãr xà ata te hajÿar, pom quê ha jũm ty, quê ha pjê kam me harêt, quê ha cute amji kam hapac xà cunea hamre. Ita jĩkjê na mã, cô caxwãm pê cute mehcumrãr xà ata pê, cute me harêt. Mãmam cute amji kam hapac xà tũm kên ata hamre. Ne hacpÿa mã cô pê cator xà ita pê ihhêj rũm hacpÿa mã ihtÿr, ne ita caxuw cute amji kam hapac xà intuw pej mã hàr.

Me Hàpên Xà 2.28; Roman 6.3-5; Coroxo 2.12

Mehkrã na hũxir xà

Ne quê ha Jeju na mehkwy amji mã cute me to ihhimpej catêjê na mehkwyã nõ capi, ne cute ahna me hãm xà caxuw ihkrã na me hũxi, ne Pahpãm mãmehcajrên, quê ha me cupê me to ihhimpej catêjê xà caxuw, Pahpãm me cumã Carõ Pejti carôt gõ. Quê ha me to ihhimpej catêjê atajê amji jõpahhi caxuw mehkwyã nõ pyxit ne me capi, ne ihkrã na me hũxi, ne Pahpãm mã mehcajrên, quê ha Pahpãm cupê pahhi xà caxuw cumã Carõ Pejticarôt gõ. Ne quê ha Jeju na mehkwy, me jũm te jũ kam ihtêm ne ampÿamã, cute me cumã Jeju pê mehkritxwÿ na harên pejti jarên xà

caxuw me capi, ne ihkrã na me hūxi, ne Pahpãm mã mehcajrên, quê ha Pahpãm caxuwcumã Carõ Pejti carôt gō, ne ma ihkujate, quê ha tẽ.

1 Timot 4.14

Pahpãm pyxit peaj kam incrê

Pahpãm pê me pajõ Inxū Cati cõjkwa kam ihkrĩ, ne me pajirõa pê cati necarôt tỳj, ne carôt jàhcujro cati. Mã nee rỳ jũ caxuw me paxũmre nõ te hirã pê hõmpun nare. Ne quê ha me pajõ Inxū Cati ihcunea na jũm xũmre mã amji to ajpẽ, quê ha hõmpu ne ihtyc pyrentu.

Na pê me pahcahê na ihkrĩ xà caxuw, me hũmrea na amji ton to prãm. NePahpãm te me hũmrea na amji ton, ne iwrȳc, ne cupê me ahkrarea, ne inxi pê Marij mã ihpỳm. Na ri Jeju pê Pahpãm kra pê Pahpãm to Pahpãm.

Ne jũ wỳr quê Jeju jĩ pyxit peaj ata, pjê cunea kam, mehkwȳ jakrã jàhtõtĩ atajê cahê na apu ipa. Na ri ma hacpỳ mã cõjkwa wỳr cute amji jaxàr, ne hacpỳa ne ajpên cute pjê wỳr me pamã Carõ Pejti kujahêc. NeCarõ Pejti pê Pahpãm to Pahpãm ata, pjê cunea kam me cupê Jeju na mehkwȳ atajê cunea mã amji jõr to ipa.

Ne me pajõ Inxū Cati pê Pahpãm to Pahpãm, ne cõjkwa kam pit mã ihkrĩ. Ne me pajõ Inxū kra pê Jeju pê Pahpãm to Pahpãm, ne pjê kamihkrĩ cri, ne hacpỳa mã hàpir ne cõjkwa kam ihkrĩ. Ne Carõ Pejti ata pê Pahpãm to Pahpãm, ne cõjkwa pĩn cato, ne pjê cunea kôt ipa, ne ahna mehkwȳ atajê jĩ kam ihkrĩ. Ne Jowãw te cumrãr cate te me Jeju cumrãr xà ata kam, pê hirãa pê menchrê itajê jarẽ.

1 Jowãw 5.6-7

Jeju to amji japackre xà

Jeju jarkwa kôt, ahna mehkwȳ hõtpê ma me to amji japackre. Pê Jeju ihtycxà xwỳjrea na, ramã caxwaare kam, ihkôt me ipa catêjê me, me hàpàn xà na me jỳ. Ne por cute pãw pyr ata pê me pajahpan xà na, cute ame hĩ to kên atapyràac. Ne hanea ne cute ampo cacô pyr ata pê caprô te me pancwỳrjapê ipijaxwỳr pyrãac. Ne cute me hàpàn, ne mehkôm xà ata to cute me to amjijapackre xà na me cumã hũjahkre.

Na ri Jeju na mehkwȳ cute me cuprõn xà ata kam, ihtỳj me ita to hane. Ne nee ahti na ihtỳj jũm te hàpàn, ne ihkôm xà hamreare, ne me cupê Jejuna mehkwȳ te pit mã me ita ton xà. Ne nee mã me hapactu kam cute me itaton xà hamreare, ne caxwãm catia mã, cute me ita ton xà.

Ne pê Pawrô xwỳ Corinti jõ krĩ kam Jeju na mehkwȳ atajê mã ihhóc, ne kam catyt kam mecumã Jeju to cute me amji japackre xà ita to hahkre.

Ruc 22.14-20; 1 Corinti 11.17-34

Juta catêjê pê Ixaher catêjê te amji kam hapac xà kôt harĕn xà

**Juta catêjê te ihkĕn ton jahpan xà na, cute me
ampo capônÿre pê mehkritxwÿ curan xà**

Pê Pahpām Mojxe xwÿ mã harkwa to: “Imã pjê cunea kam mehcunea kĕanre, na wa hacute me ito kĕn ita jahpan xà na, ite mehcunea jipej xà pit. Ne me akwÿ pê Ixaher catêjê kĕanre cakrô, mã imã me akĭn, cwÿrjapê wa ha meamã, ate me ito kĕn atajê cunea to tojnô ne hĭcu xà caxuw, ate me ampo capônÿre capĕnti mã ampo xà nare ata curan xà to me amã hahkre.

Ne ita caxuw, quĕ haimã mehcajrĕn catêjê amcro cunea jô iràrà me pyt cunea kam me ikwÿ te me ito kĕn jahpan xà na me imã ampo cura. Ne ate amji kam ijapac xàjŭrkwa kam, icunaa mã me ampo cura, ne me caprô jaxwÿ, ne me to hĭ kryjne imã ampo to caxàr xà ata kam me haxwÿ ne me to capa. Ne ampo capônÿre impejti ata pê me akritxwÿ cahàc, ne cute caprô jaxwÿr, ne me gaxà kam ihtyc. Na wa ha me akritxwÿ ata cwÿrjapê nee cormã ne me gipej nare” hane.

Na pê Juta catêjê ita ton to me hãmrohnÿtti mã, ne ihtÿj me cumã tutti me, carà cahàcre hôhti me, pryti curan to hãm ita na, mã ahnaa Jeju pê me pahkritxwÿ cator. Ne nee mã cupê Juta catêjêpit kritxwÿ nare, ne cupê pjê cunea kam me pahkritxwÿ impeaj. Ne ramã ihtyc ne cute caprô jaxwÿr, na ri nee hipĕr ampo curan xà hamreare. Naquĕ ha Pahpām ihtÿj cukwa kam me pahna amji capa.

Ixaher catêjê xŭmre pê impy kà kwÿ jakep xà

Pê Pahpām Aprãw xwÿ capi ne cupê mehkwyà xakat na hãm. Ne cumã amji ton to hane he: “Ca ha ita caxuw me ca me, me atãmxwÿ cunea me, amji mã meapy kà kryjre ne me hakep, cute me apĕ me ikwÿ na me gahkre pej prãmte. Nãmri quĕ ha jŭm mã ihkra pÿm, mã nee ahna amcro te ôjtô kam, cutecumã impy kà kwÿ jakep nare ata, quĕ ha nee cupê me ikwÿ nare” hane. Mãme cupê Juta catêjê amji to me hajÿr to me hãm ita na. Ne nee Jeju na mehkwyê pê Juta catêjê nare, na ri cute nee me ita ton xà nare.

Kam To Ihtĕm Xà 17.1-27

Me ipijacri xà

Pê Pahpām Mojxe xwỳ kôt Ixaher catêjê mã cute me ipijacri xà jàhtôa tohahkre. Mã ihtỳj me ipijacri xà itajê kôt me ipijacri to me ipa ita na. Ne cormã ita kam, nee me ampo jĩ caprô pijaxwỳr nare atajê kur nare, nenee ame crô jĩ me, hác jĩ me, xôn jĩ me, mãã jĩ me, caprij jĩ me, xêpre jĩ me, pỳp jĩ me, cormã ampo kwỳ jàhtôa ne nee amehkur nare. Mã Jeju cator, ne cute menquêtjê te amji kam hapac xà to cute me amjipyràc xà itajê cunea to hamre partu. Na ri nee Jeju na mehkwy me ipijacri xà itajê kôt me ipa nare.

Me Hàpên Xà 10.10-15; 17.20; 21.20-25

Mehkôt xà pê xap

Pê Pahpām amcro te xêj kam ampo cunea ton pa, ne amcro te xet ita kam riihkôt xà. Na ri amcro ita pê ajteare mã, na ri nee kam me hàpên xà nare, ne cama ame kôt, ne Pahpām to pit mã cute me amji kam me hapac xà. MãJuta catêjê te, ita jipy, amjia kôt mehkôt xà pê xap ata cawpa xà jàhtôa to mehcawpa.

Mã Jeju cator, ne cute menquêtjê te me ampo to meamji pyrác xà cawpa xà catihti itajê cunea to hamre partu. Ne tòmíc nahacpỹa mã Jeju tĩr. Na ri Jeju na mehkwy te xap na mehkôt xà ita mãhikran, ne me pajô Pahhiti te hacpỹa mã ihtĩr xà jô amcro ata to amji mã mehkôt xà. Ne amcro ata mã me haprỳ to Pahhiti Jô Amcro pê tòmíc.

Kam To Ihtêm Xà 2.1-3

Mojxe xwỳ te me hapackre xà jô kàhhôc

Pê Mojxe pê mam Ixaher catêjê mã Pahpām jarkwa to ihcakôc catê, nePahpām jarkwa kôt me cumã ihkàhhôc kam ihhôc partu. Na ri ihkàhhôc atajaprỳ te, Mojxe te me hapackre xà jô kàhhôc. Na ri ihkàhhôc ata kam, cute me hapackre xà me, me ipijacri xà me, cute me ampo kên cawpaxà me, cute amji kĩn to mehhimpej xà me, cute me to amji pyrác xà me, cute me hà caprâr xà me, Pahpām to cute me amji japackre xà me, cute meamji kam hapac xà kwỳ jàhtôa to hàhtô to me amji kam hapac to me ipa.

Ne caku jàhtôa kam, Ixaher catêjê ihkàhhôc kamincaca xà atajê kôt me hakop to me ipa to prãm, ne tee ame to hahkre, neihtỳj cama Pahpām jarkwa jirô pê mehpyrỳm to me ipa. Mã Jeju pê me pahkritxwỳ pê Pahpām kra cator, ne pyxit peaj te Húm caca xà atajê cunea kam hapac, ne cuteton par. Ne nee jũ caxuw cute ampo pyxit ne to hapac kêt ne to

ihcupan nare, na ri Pahpām te ahna amji caxàr. Cwÿrjapê ri, por cute Jeju to me amji mã mehhimpej atajê na, cute amji caxàr.

Krîpinkrên

Pê Tawi xwÿ pê Ixaher catêjê jô pahhi ata amji mã Krîpinkrên capi, cute kam pjê jô pahhi jô krî ton prãmte. Mã ihkra pê Xarômãw xwÿ ata tekam Pahpām to me amji kam hapac xà jûrkwa catia to cati ata xãm. Mã kaam hanea ne me cupê Ixaher jô pahhi jàhtôa te prohti kam me cuprônxa. Ne Krîpinkrên ita Xijãw jô hàpkàjti cahê na xa.

Juta catêjê pê Ixaher catêjê jô amji kîn kôt harĕn xà

Me Hakren xà jô amji kîn

Pê Pahpām Juta catêjê mã Ejit pê me cator xà to cute me amji japackrexà caxuw me cumã amji kîn ita ton na awjahkre. Ampo na? Pê Pahpām cõjkwa pîn Ejit jô pjê wÿr cute mehcuran catê kujahêc, mār quê Ejitcatêjê kra cakõni atajê cunea jipej. Na pê Ixaher catêjê cunea mehûrkwa kôt, me carà cahàcre hôhti kra cura, ne caprô to me hûrkwa jarkwa jatom to hÿjê. Cwÿrjapê ri nee Pahpām pîn cute mehcuran catê tē ata teIxaher catêjê jûrkwa kam jûm curan nare, ne cama me hakren. Na ri amjikîn ata japrÿ pê, me Hakren xà jô amji kîn.

Ne me Hakren xà jô amji kîn jirô pê, Pãwtÿjre jô amji kîn hãn ne hapôj. Pê amji kîn ata kam, quê ha Ixaher catêjê ame pãw tÿjre pit kur to amcro to xet. Pê Pahpām cute me Ejit jô pjê pê me cator xà wÿr, ramã ame amji mãahcuprô, ne ramã memprar xàa kam ame pãw tÿjre pit ku ata to me amji japackre xà caxuw pê Pahpām me cumã amji kîn ita ton na awjahkre. Aprir jô putwrÿ kam ri hãn ne ame amji kîn ita to.

Ruc 22.1-16

Me Hõ kēhkēn xà jô amji kîn

Ne me Hakren xà jô amji kîn jamre, ne me ahnaa amcro te xīncwēnta jirô pê, quê ha putwrÿ pê maj jicu xà kam, quê ha me Hõ kēhkēn xàjô amji kîn to me cato. Na pê Pahpām Ixaher catêjê mã, cute me amji kīnita ton na awjahkre, mār quê me hõ pyrēn me hakryti na me hahkre pej. Neamji kîn ata kam ri hōtpê, cute me Pahpām jûrkwa jamār catêjê mã cute ame hõ kēhkēn atajê kwÿ jôr.

Ikrere jô amji kîn

Pê Pahpām Ixaher catêjê mã, cute Ejit jô pjê pê me cator xà to cute me amjijapackre xà caxuw, me cumã amji kîn ita na awjahkre. Ampo na? He pê pjê ata pîn, pōti kam me hamreare ata kam, amji to me caku to cwarēnta ikrerekam pit mã amehkrĩ. Cwỳrjapêcute me to amji japackre prãmte, Jeju jô amcro kam, cormã ojtup jô putwrỳ na, me hō amji kîn ita caxuw, me hũrkwa pej atajê jicu, ne mehcunea mehkra mea mã ikrerekam pit mã amehkrĩ.

Mehĩ Jarkwa Me Cupẽ Jarkwa Na Me Haprỹ

Acapê *Acabe*

Acrip *Agripa*

Agap *Ágabo*

Agew *Ageu*

Aguxô *Augusto*

Amarec *catêjê*

amalequitas

Amcoti jô krĩ *Beréia*

Amcrati jô pjê *Frígia*

Aminati *Aminadabe*

Amjia kôt me ipa *catêjê*

libertinos

Amonit *catêjê amonitas*

Amorit *catêjê amorreus*

Amoti *Amós*

Ampohy jô krĩ *Cencréia*

Ampokrekà jô krĩ *Icônio*

Amprij *Amplíato*

Anakwỳj *Ana*

Anana *Ananias*

Anati *Anás*

Antijoc jô krĩ *Antioquia*

Antipa *Antipas*

Antipatrij *Antipátride*

Antre *André*

Antrôn *Andrônico*

Apatô *Abadom*

Aper *Abel*

Aperti *Apeles*

Apij *Abias*

Apijkwỳj *Áfia*

Apinatap *Abinadabe*

Apirãw *Abiraão*

Apirẽn jô pjê *Abilene*

Apôr *Apolo*

Apôr jô krĩ *Apolônia*

Apôrijô *Apolião*

Aprãw *Abraão*

Aquira *Áquila*

Ararati jô kën *Ararate*

Arãw *Arão*

Arexãre *Alexandre*

Aritarcô *Aristarco*

Arixô *Aristóbulo*

Arni *Arni*

Arpaxat *Arfaxade*

Arpew *Alfeu*

Arquipo *Arquipo*

Arquirãw *Arquelau*

Artima *Ártemas*

Ataraj jô krĩ *Atália*

Atarijkwỳj *Atalia*

Atãw *Adão*

Atên jô krĩ *Atenas*

Ati *Adi*

Atmin *Admin*

Atrami jô krĩ *Adramítio*

Awjarôti jô pjê *Samos*

Axa *Asa*

Axarãw *Absalão*

Axarot *Astarote*

Axer *Aser*

Axij jô pjê *Ásia*

Axin *Asíncrito*

Axiri jô pjê *Assíria*

Axô jô krĩ *Assôs*

Axoti jô krĩ *Azoto*

Cajo *Gaio*

Cajpa *Caifás*

Camar *Gamaliel*

Camot *Quemos*

Cãn *Caim*

Cana *Cainã*

Canãn jô pjê *Canaã*

Cantikwỳj *Candace*

Capata *Gabatá*

Capernam jô krĩ

Cafarnaum

Caprer *Gabriel*

Carãhkwỳj *Dorcas*

Carati *catêjê gálatas*

Carati jô pjê *Galácia*

Carep *Calebe*

Carer jô kënti *Carmelo*

Carijot *Iscariotes*

Caro *Gálio*

Carpo *Carpo*

Cartêj jô pjê *Caldéia*

Cate *Gade*

Catytkam *Justo*

Cãw *Cam*

Cawrôpejti jô pjê

Capadócia

Cawta jô pjê *Cauda*

Cawtikwỳj *Cláudia*

Caxêti jô awjarô

Areópagu

Caxêti jô awjarô *catêjê*

kwỳ areopagitas

Caxô *Castor*

Coc *Gogue*

Côhkrãcator jô krĩ

Pozuoli

Côhnameirêrxã jô krĩ

Betânia

Côjarô jô krĩ *Salamina*

Cômpejti jô cô *Eufrates*

Coner *Cornélio*

Côpiho jô pjê	Epew catêjê <i>hebreus</i>	<i>herodianos</i>
<i>Mesopotâmia</i>	Epicurij catêjê <i>epicureus</i>	Herotijkwÿj <i>Herodias</i>
Côpijapjêr jô cô <i>Jordão</i>	Eprî <i>Efraim</i>	Himên <i>Himeneu</i>
Coraxim jô krî <i>Corazim</i>	Er <i>Er</i>	Hîpôjajo catêjê <i>galileus</i>
Côre <i>Coré</i>	Erâw jô pjê <i>Elão</i>	Hîpôjajo jô pjê <i>Galiléia</i>
Corinti jô krî <i>Corinto</i>	Eraxô <i>Erasto</i>	Hirquij <i>Hilquias</i>
Coroxo jô krî <i>Colossos</i>	Ercân <i>Elcana</i>	Hôr <i>Hor</i>
Cot jô pjê <i>Cós</i>	Erexa <i>Eleazar</i>	Horma jô krî <i>Horma</i>
Cowat <i>Coate</i>	Eri <i>Eli</i>	Hôxêj <i>Oséias</i>
Coxam <i>Cosã</i>	Erij <i>Elias</i>	Ihcuhyt jô kên <i>Sinai</i>
Côxwa cahê na Xiri jô	Erima <i>Elimas</i>	Ihkjêkîn jô krî <i>Filadélfia</i>
pjê siro-fenícia	Eriquim <i>Eliaquim</i>	Ikrere jô amji kîn <i>Festa</i>
Côxwatepti o mar	Erixê <i>Eliézer</i>	<i>das Barracas</i>
<i>Vermelho</i>	Erixêw <i>Eliseu</i>	Incjênpej <i>Bons Portos</i>
Côxwatycti o mar <i>Morto</i>	Ermatâw <i>Elmadã</i>	Iririj jô pjê <i>Ílria</i>
Cra jô pjê <i>Espanha</i>	Etê jô pjê <i>Éden</i>	Iturij <i>Ituréia</i>
Crawti <i>Cláudio</i>	Eti <i>Esli</i>	Ixac <i>Isaque</i>
Crec catêjê <i>gregos</i>	Etô catêjê <i>edomitas</i>	Ixaca <i>Issacar</i>
Crec jô pjê <i>Grécia, Acaia</i>	Ewakwÿj <i>Eva</i>	Ixaher catêjê <i>israelitas</i>
Cremênti <i>Clemente</i>	Ewnixêkwÿj <i>Eunice</i>	Ixaj <i>Isaías</i>
Crexên <i>Crescente</i>	Ewotikwÿj <i>Evódia</i>	Ixamar <i>Ismael</i>
Cripa <i>Cleopas</i>	Ewpuro <i>Êubulo</i>	Ixapewkwÿj <i>Isabel</i>
Cripo <i>Crispo</i>	Ewti <i>Êutico</i>	Jaco <i>Jacó</i>
Crixtô <i>Cristo</i>	Exaw <i>Esaú</i>	Jajiwer <i>Jaaziel</i>
Cropa <i>Clopas</i>	Exeker <i>Ezequiel</i>	Jajrô <i>Jairo</i>
Crowkwÿj <i>Cloe</i>	Exequij <i>Ezequias</i>	Jâmprê <i>Jambres</i>
Cupêtycre catêjê <i>etíopes</i>	Exom <i>Esrom</i>	Jana <i>Janai</i>
Cupêtycre jô pjê <i>Etiópiã</i>	Extikwÿj <i>Ester</i>	Janaj <i>Janes</i>
Cuxa <i>Cuza</i>	Extra <i>Esdras</i>	Jape <i>Jafé</i>
Cuxã catêjê <i>Cuchã</i>	Geti jô cô <i>Fonte de Gedi</i>	Jaret <i>Jarete</i>
Cwatro <i>Quarto</i>	Gijô jô cô <i>Giom</i>	Jaxãw <i>Jasão</i>
Ejit catêjê <i>egípcios</i>	Gipôm jô krî <i>Gibeom</i>	Jeju <i>Jesus</i>
Ejit jô pjê <i>Egito</i>	Gipôw jô hàpkàjti <i>Gilboa</i>	Jeremij <i>Jeremias</i>
Emanew <i>Emanuel</i>	Krîjajo <i>Gilgal</i>	Jeta <i>Jefté</i>
Emôr <i>Emor</i>	Gitô <i>Gideão</i>	Jexê <i>Jessé</i>
Enêj <i>Enéias</i>	Gorijti <i>Golias</i>	Jexer <i>Jezreel</i>
Engeti jô pô <i>Engede</i>	Hacakwÿj <i>Agar</i>	Jo <i>Jó</i>
Enô <i>Enom</i>	Hapakuc <i>Habacuque</i>	Jojata <i>Joiada</i>
Enoc <i>Enoque</i>	Hawênti jô krî <i>Pérgamo</i>	Joje <i>José</i>
Enotti <i>Enos</i>	Heprôm jô krî <i>Hebrom</i>	Jojuw <i>Josué</i>
Epapra <i>Epafras</i>	Herma <i>Hermas</i>	Jona <i>Jonas</i>
Epaprôti <i>Epafrodito</i>	Hermojên <i>Hermógenes</i>	Jonã <i>Jonã</i>
Epet jô krî <i>Éfeso</i>	Herotâw <i>Herodião</i>	Jônata <i>Jônatas</i>
Epet catêjê <i>efésios</i>	Heroti <i>Herodes</i>	Joquî <i>Jeoquim</i>
Epew <i>Éber</i>	Heroti na mehkwỳ	Jorim <i>Jorim</i>

Jowanakwỳj <i>Joanã</i>	Maraquij <i>Malaquias</i>	Mira jô krĩ <i>Mirra</i>
Jôwape <i>Joabe</i>	Marco <i>Malco</i>	Mirãnkwỳj <i>Míriam</i>
Jôwat <i>Joás</i>	Marer <i>Maleleel</i>	Mitij catêjê <i>midianitas</i>
Jowãw <i>João</i>	Marijkwỳj <i>Maria</i>	Mitij jô pjê <i>Midiã</i>
Jôwer <i>Joel</i>	Martakwỳj <i>Marta</i>	Mojxe <i>Moisés</i>
Joxap <i>Josafá</i>	Matarkwỳj <i>Madalena</i>	Morij jô pjê <i>Moriá</i>
Joxij <i>Josias</i>	Matat <i>Matata</i>	Moroc <i>Moloque</i>
Jujo <i>Júlio</i>	Matatij <i>Matatias</i>	Mowap catêjê <i>moabitas</i>
Juna <i>Júnias</i>	Mate <i>Maate</i>	Naca <i>Nagai</i>
Jupiter <i>Júpiter</i>	Matew <i>Mateus</i>	Naco <i>Nacor</i>
Jurijkwỳj <i>Júlia</i>	Matij <i>Matias</i>	Nahúm <i>Naum</i>
Juta <i>Judá, Judas</i>	Matuxarem <i>Matusalém</i>	Namã <i>Naamá</i>
Juta catêjê <i>judeus</i>	Maxeton jô pjê	Naptar <i>Naftali</i>
Juta catêjê <i>nare os</i>	<i>Macedônia</i>	Napuc <i>Nabucodonosor</i>
<i>não-judeus</i>	Me Hakren Xà jô amji	Narqui <i>Narciso</i>
Juta jô pjê <i>Judéia</i>	<i>kĩn Festa da Páscoa</i>	Natã <i>Natã</i>
Kën <i>Cefas</i>	Me Hô Kêhkên Xà jô	Natanew <i>Natanael</i>
Kën jô krĩ <i>Tiro</i>	<i>amji kĩn Festa da</i>	Naxare jô krĩ <i>Nazaré</i>
Kênpojre jô pjê <i>Creta</i>	<i>Colheita</i>	Naxare catêjê <i>nazarenos</i>
Kênpojre catêjê <i>cretenses</i>	Me hõ pjê kĩn catêjê	Naxon <i>Nassom</i>
Krícuxwati <i>Jericó</i>	<i>nacionalistas</i>	Nemij <i>Neemias</i>
Krĩhcumrãrti <i>Gomorra</i>	Mecurij <i>Mercúrio</i>	Nempakwỳj <i>Ninfa</i>
Krĩhkãhti <i>Arimatéia</i>	Mehakepxà jô krĩ	Nepo jô kën <i>Nebo</i>
Krĩhpôc <i>Sodoma</i>	<i>Mitilene</i>	Nerew <i>Nereu</i>
Krĩhtuw <i>Neápolis</i>	Mehcahkrit <i>os não-judeus</i>	Neri <i>Neri</i>
Krĩhtỳj <i>Gaza</i>	Mehkênpupunxà jô krĩ	Nicanõr <i>Nicanor</i>
Krijãhcaprĩ <i>Betesda</i>	<i>Betânia</i>	Nicoraw <i>Nicolau</i>
Krijara <i>Tarso</i>	Mehkrãhhia jô kën	Nicoraw kôt me ipa
Krijikre <i>Siquém</i>	<i>Gólgota</i>	<i>catêjê nicolaítas</i>
Krĩmpejre <i>Jope</i>	Mehtehcajpar jô krĩ	Nicotem <i>Nicodemos</i>
Krĩpãtre <i>Régio</i>	<i>Alexandria</i>	Ninew jô krĩ <i>Nínive</i>
Krĩpinkrên <i>Jerusalém</i>	Mena <i>Mena</i>	Ninew catêjê <i>ninivitas</i>
Krĩpuhnacô <i>Anfípolis</i>	Mequit jô kën	Nir jô cô <i>Nilo</i>
Krĩrĩtpej jô pjê <i>Samaria</i>	<i>Armagedom</i>	Nomikwỳj <i>Noemi</i>
Krĩrĩtpej catêjê	Merej <i>Meleá</i>	Nowe <i>Noé</i>
<i>samaritanos</i>	Merqui <i>Melqui</i>	Nũm <i>Num</i>
Krĩtêpti <i>Mileto</i>	Merquixê <i>Melquisedeque</i>	Oneti <i>Onésimo</i>
Krĩtetej jô pjê <i>Decápolis</i>	Metij jô pjê <i>Média</i>	Onetipo <i>Onesiforo</i>
Kuhkũmtyc jô krĩ <i>Fenícia</i>	Metohjêxà jô krĩ	Opet <i>Obede</i>
Kwapijakrut jô krĩ <i>Dotã</i>	<i>Nicópolis</i>	Orimpa <i>Olimpas</i>
Kỳhti jô cô <i>Cedrom</i>	Mewỳrcacro jô krĩ <i>Emaús</i>	Orpakwỳj <i>Orfa</i>
Macô <i>Marcos</i>	Mexij <i>Messias</i>	Pahar <i>Baal</i>
Macoc <i>Magogue</i>	Mexô <i>Menasom</i>	Pahhi <i>mestre, Rabi</i>
Manaxê <i>Manassés</i>	Mica <i>Miquéias</i>	Pahpãm <i>Deus</i>
Manem <i>Manaém</i>	Miquer <i>Miguel</i>	Pahpãm Carô <i>Pejti</i>

<i>Espírito Santo</i>	Peri Félix	Potipar Potifar
Pajõxwÿn pê Xatanaj	Perxar Belsazar	Potorma Ptolemaida
<i>Satanás, o Diabo, Belial,</i>	Perxep Belzebu	Powa Boaz
Paner Fanuel	Peter Betel	Praxô Blasto
Paniher Peniel	Petrô Pedro	Precon Flegonte
Panpir jô pjê Panflia	Pêxerpa Berseba	Prixirakwÿj Priscila
Papirôn catêjê babilônios	Pexô Festo	Procor Prócoro
Papirôn jô krî Babilônia	Pîhhôcuxwa jô krî	Prutên Prudente
Papo jô krî Pafos	<i>Esmirna</i>	Prytikra jô pjê Itália
Parã jô kên Parã	Pîhpoti jô pjê Mísia	Puprijô Públío
Parac Baraque	Pijer Fígelo	Purcaprô Aceldama
Parapa Barrabás	Pinkrênti jô krî Salém	Pyt jô krî Sardes
Parãw Balaão	Pirã jô krî Rodes	Querat Geresa
Parec Faleque	Pirã jô pjê Genesaré	Quiriti jô pjê Cilícia
Parixêw catêjê fariseus	Pirat Pilatos	Quiti Quis
Parjeju Barjesus	Piremô Filemom	Quito jô amcrà Quios
Pàrkô jô pjê Fenícia	Piret Fileto	Quixô jô cò Quisom
Parmena Pármenas	Pirip Filipe	Racaw Ragaú
Parnap Barnabé	Pirip jô krî Filipos	Ramec Lameque
Paro Faraó	Pirip catêjê filipenses	Rapãw Labão
Partij catêjê da Pártia,	Piritew catêjê filisteus	Rapekwÿj Raabe
<i>partos</i>	Piro Pirro	Rapôn Raboni
Partômew Bartolomeu	Piror Filólogo	Raquekwÿj Raquel
Paruc Baruque	Pitin jô pjê Bitínia	Ratixa jô krî Laodicéia
Parxap Barsabás	Pixitij jô pjê Pisídia	Ratixa catêjê laodicenses
Patara jô krî Pátara	Pixô jô cò Pisom	Raxa Laséia
Patij Obadias	Píxô jô kên monte das	Raxaro Lázaro
Patmo jô pjê Patmos	<i>Oliveiras</i>	Renpa Renfã
Patropa Pátrobas	Píxô jô krî Betfagé	Repecakwÿj Rebeca
Pãw jô krî Belém	Píxô jô pjê Getsêmani	Repitî Refídim
Pawrô Paulo	Píxôhrôt jô pjê Efraim	Rewi Levi
Pãwtÿjre jô amji kîn	Pjê cunea jô pahhiti	Rewi catêjê levitas
<i>Festa dos Pães Sem</i>	<i>Imperador, César</i>	Rexa Resa
<i>Fermento</i>	Pjêcajpuw Cóxwa o mar	Rijakwÿj Léia
Paxã Basã	<i>Mediterrâneo</i>	Rino Lino
Paxur Pasur	Pjêhcaprêcti Iduméia	Rita Lida
Pejor Beor	Pjêhpôc Líbia	Ritij jô krî Listra
Pen jô pjê Malta	Pjêjôti jô krî Perge	Rixij Lístias
Pênjamî Benjamim	Pjêncrâti jô krî Harã	Rixij jô pjê Lícia
Penkwÿj Penina	Pôcaprÿhti jô pjê Arábia	Rixin Lisánias
Penxikwÿj Pérside	Ponti Pirat Pôncio Pilatos	Ro Ló
Pepkwÿj Febe	Ponto jô pjê Ponto	Rojtikwÿj Lóide
Perac jô caprûm Beraca	Pôre jô krî Naim	Roman catêjê romanos
Pere Peres	Poruc Pollux	Roman catêjê jô pahhiti
Perenikwÿj Berenice	Porxij Pórcio	<i>Imperador, César</i>

Roman jō pjê <i>Itália</i>	Tijot <i>Diótfefes</i>	Xemi <i>Semei</i>
Roman jarkwa <i>latim</i>	Timāw <i>Timão</i>	Xena <i>Zenas</i>
Roman jō krī <i>Roma</i>	Timew <i>Timeu</i>	Xepa <i>Cefas</i>
Ropcahãc jō pjê <i>Licaônia</i>	Timot <i>Timóteo</i>	Xeptew <i>Zebedeu</i>
Rotihkwỳj <i>Rode</i>	Tiperij <i>Tibério</i>	Xepurô <i>Zebulom</i>
Ruc <i>Lucas</i>	Tiperij jō krī <i>Tiberíades</i>	Xerjô <i>Sérgio</i>
Rupan <i>Urbano</i>	Tiquicô <i>Tíquico</i>	Xerunque <i>Serunque</i>
Rupên <i>Rúben</i>	Tiran <i>Tirano</i>	Xeruwew <i>Jeruel</i>
Rupo <i>Rufo</i>	Tito <i>Tito</i>	Xeruxij jō krī <i>Selêucia</i>
Rutikwỳj <i>Rute</i>	Tome <i>Tomé</i>	Xet <i>Sete</i>
Tã Dã	Torca <i>Dorcas</i>	Xetequij <i>Zedequias</i>
Taconiti <i>Traconites</i>	Traxij jō amcrà <i>Samotrácia</i>	Xewa <i>Ceva</i>
Tagô <i>Dagom</i>	Tripenkwỳj <i>Trifena</i>	Xexa <i>César, Imperador</i>
Tamar <i>Damáris</i>	Triponkwỳj <i>Trifosa</i>	Xexa jō krī <i>Cesaréia</i>
Tamatcô jō krī <i>Damasco</i>	Tropimo <i>Trófimo</i>	Xic <i>Zis</i>
Taner <i>Daniel</i>	Trôwat jō krī <i>Trôade</i>	Xica jō krī <i>Sicar</i>
Tarir <i>Dario</i>	Truxirkwỳj <i>Drusila</i>	Xicô catêjê <i>estóicos</i>
Tarman jō krī <i>Dalmanuta</i>	Tycre <i>Níger</i>	Xijāw jō hàpkàjti <i>Sião</i>
Tarmati jō pjê <i>Dalmácia</i>	Xacarij <i>Zacarias</i>	Ximāw <i>Simeão, Simão</i>
Tatã <i>Datã</i>	Xamer <i>Samuel</i>	Xintikwỳj <i>Síntique</i>
Tawi <i>Davi</i>	Xānxã <i>Sansão</i>	Xipre jō amcrà <i>Chipre</i>
Tejopir <i>Teófilo</i>	Xapêw <i>catêjê sabeus</i>	Xira <i>Silas, Silvano</i>
Tema <i>Demas</i>	Xapirkwỳj <i>Safira</i>	Xiracuxa jō krī <i>Siracusa</i>
Temetti <i>Demétrio</i>	Xaquêw <i>Zaqueu</i>	Xiren jō krī <i>Cirene</i>
Tep jō krī <i>Betsaida</i>	Xaqui <i>Estáquis</i>	Xiren <i>catêjê Cireneus</i>
Teppro jō krī <i>Sídom</i>	Xara <i>Sala</i>	Xiri <i>catêjê sírios</i>
Tera <i>Tera</i>	Xarakwỳj <i>Sara</i>	Xiri jō pjê <i>Síria</i>
Terpe jō krī <i>Derbe</i>	Xarati <i>Salatiel</i>	Xirixij jō pjê <i>Celícia</i>
Tertur <i>Tércio, Tértulo</i>	Xarep jō krī <i>Sarepta</i>	Xiro <i>Ciro</i>
Têtec jō krī <i>Caná</i>	Xarim jō krī <i>Salim</i>	Xiro jō ikrekã <i>Siloé</i>
Tewāw <i>Estêfanas, Estêvão</i>	Xarmô jō pjê <i>Salmona</i>	Xito <i>Cnido</i>
Tewta <i>Teudas</i>	Xarômāw <i>Salomão</i>	Xixic <i>Sisifo</i>
Texarôn jō krī <i>Tessalônica</i>	Xarômkwỳj <i>Salomé</i>	Xôpat <i>Sópatro, Sosípatro</i>
Texarôn <i>catêjê</i> <i>tessalonicenses</i>	Xaron jō pjê <i>Sarona</i>	Xôpôn <i>Sofonias</i>
Tico <i>Tício</i>	Xatanaj <i>Satanás</i>	Xore jō pjê <i>Salim</i>
Ticre <i>Tigre</i>	Xato <i>xwỳ kôt me ipa</i> <i>catêjê saduceus</i>	Xoropapew <i>Zorobabel</i>
Tijac <i>Tiago</i>	Xawrô <i>Saul</i>	Xoten <i>Sóstenes</i>
Tijānkwỳj <i>Diana</i>	Xecun <i>Segundo</i>	Xucot jō krī <i>Sucote</i>
Tijat jō krī <i>Tiatira</i>	Xêm <i>Sem</i>	Xuxankwỳj <i>Susana</i>
Tijoniti <i>Dionísio</i>		



